


Yusuja Quisarati



New Testament in Cavineña (BL:cav:Cavineña)

Yusuja Quisarati

New Testament in Cavineña (BL:cav:Cavineña)

copyright © 2012 Wycliffe Bible Translators, Inc.

Language: Cavineña

Translation by: Wycliffe Bible Translators, Inc.

Cavineña [cav], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cavineña

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files dated 29 Jan 2022

8e1f7a23-824b-5b2d-af4e-1406fdb68f20

Contents

MATEO	1
MARCOS	114
LUCAS	183
JUAN	299
HECHOS	384
ROMANOS	497
1 CORINTIOS	550
2 CORINTIOS	601
GALATAS	631
EFESIOS	652
FILIPENSES	671
COLOSENSES	684
1 TESALONICENSES	697
2 TESALONICENSES	708
1 TIMOTEO	714
2 TIMOTEO	729
TITO	739
FILEMON	746
HEBREOS	750
SANTIAGO	786
1 PEDRO	799
2 PEDRO	813
1 JUAN	821
2 JUAN	833
3 JUAN	835
JUDAS	837
APOCALIPSIS	842

JIDAQUE QUISARATI MATEORA HUENECUAREQUE MATEO

Riyaque quirica ri Mateora huenecuareque. Jesúsja empequetu jucuare. Jesúsja mepema jarijutu Roma juque enaruquija ishü chipiru baca puji jucuare.

Riyaque quirica ri israelita cuanaja ishü huene-tanacuareque. Mateora tuna bahue amerecara acuare Jesús MESÍAS, YUSUJA EMEPEQUE. Berutu Yusu equeque quisarati cuejaqui cuanara icueneta cueja acuare eje tupu Mesías junabuqueque. Tura tuna bahue amerecara acuare Jesús jadya ayaque tuna jadya huenecuareque.

Ejitaju tujatu acuare Jesús israelita cuanaja ECUARI DYAQUE ARIDAQUE. Tura tuna ejitaju acuare dutyara jujeri israelita cuanara Jesús bijidamaduracuareque. Mateoratu cuejacuare Jesús curusuju majucuareque, majutsu, chacha netitsuranucatsu, barepaju Yusuja yacuaju tsuracuareque.

Riyaque quiricajuri ehüene aniya:

Jesús cuinanacuareque (capítulo 1, 2)

Jesús utsatanacuareque (cap. 3)

Satanásra Jesús cajuchatishacara acuareque (cap. 4)

Jesúsra ecuita cuana emataju bahuityacuareque (cap. 5-7)

Yahua terehuie eje bucha judadibuqueque (cap. 24-25)

Jesús majucuareque (cap. 26-27)

Jesús emajuque chacha netitsuranucacuareque (cap. 28)

Jesucristoja baba cuana

(Lc 3.23-38)

¹ Jesucristo jucuareque micuana cuejaya.

David eque ejuracanaque tu jucuare. David bacue Abraham equeque. Riya cuanaque ri Jesucristoja baba cuana jucuare cuanaque.

² Abraham tu Isaacja etataque jucuare.

Isaac bacue Jacobja etataque.

Jacob tu Judája, tuatsehuequi cuanaja jadya etataque jucuare.

³ Judá tu Fares, Zara jadyaja etataque jucuare. (Tatseja ecuaquedya tu Tamar jucuare).

Fares tu Esromja etataque jucuare.

Esrom bacue Aramja etataque.

⁴ Aram tu Aminadabja etataque jucuare.

Aminadab bacue Naasónja etataque.

Naasón tu Salmónja etataque jucuare.

⁵ Salmón bacue Boozja etataque. (Boozja ecuaquetu Rahab jucuare).

Booz tu Obedja etataque jucuare. (Obedja ecuaque tu Rut jucuare).

Obed tu Isaija etataque jucuare.

⁶ Isai tu ecuari Davidja etataque jucuare.

David tu Salomónja etataque jucuare. (Salomónja ecuaque tu Betsabé jucuare,

Urías yanumeja ehuanegue jucuareque).

⁷ Salomón tu Roboamja etataque jucuare.

Roboam bacue Abiasja etataque.

Abiás tu Asaja etataque jucuare.

⁸ Asa bacue Josafatja etataque.

Josafat tu Joramja etataque jucuare.

Joram bacue Uziasja etataque.

⁹ Uzías tu Jotamja etataque jucuare.

Jotam bacue Acazja etataque.

Acaz tu Ezequiasja etataque jucuare.

¹⁰ Ezequías bacue Manasésja etataque jucuare.

Manasés bacue Amónja etataque.

Amón tu Josiasja etataque jucuare.

¹¹ Josías bacue Jeconiasja, tuatsehuequi cuanaja etataque jucuare.

(Babiloniaju tuna erisi dujutanacuare, jetiama umae tunaja ata cuana tsehue).

¹² Jeconías tu Salatielja etataque jucuare.

Salatiel bacue Zorobabelja etataque.

¹³ Zorobabel tu Abiudja etataque jucuare.

Abiud bacue Eliaquimja etataque jucuare.

Eliaquim tu Azorja etataque jucuare.

¹⁴ Azor bacue Sadocja etataque.

Sadoc tu Aquimja etataque jucuare.

Aquim bacue Eliudja etataque.

¹⁵ Eliud tu Eleazarja etataque jucuare.

Eleazar bacue Matánja etataque jucuare.

Matán tu Jacobja etataque jucuare.

¹⁶ Jacob bacue Joséja etataque.

José tu María tsehue caquemiticuare.

Riyaque epunadya tu Jesúsja ecuaque jucuare.

Riyaque Jesúsdy tuque ecua "Mesías" bacani

jadya aya, "Yusuja Emepeque" jadya.

¹⁷ Riya cuanaqueri Mesiásja ebaba cuanaque jucuare.

Abraham equeque David tu anicuare peadya tunca pushi earacana ebaba cuanaque. David equeque ecuanaja baba cuana Babiloniaju dujutanacuare patya tujatu anicuare peadya

tunca pushi earacana nucadya. Tuna dujutanacuare patya equeque tuque cuinanacuare eque tuna anicuare peadya tunca pushi earacana nucadya.

Jesús cuinanacuareque
(Lc 2.1-7)

¹⁸ Cuatsabiji micuana aya Jesucristo eje bucha cuinanae cuita jucuaque. Tuja ecuaque Mariatu José tsehue caque-miti ishugue jucuaque. Tatse caquemitima jariju, Joséja jipema jariju cuitadyatu carecani isaqui jucuaque Yusuja Espirituja casa eque. ¹⁹ Josétu Yusuja cacuatsashati eque anicara juhua. Jadya tibudya tujatu carecani isaqui baatsu, jacacara acuare. Jadya ama bucha tuja tuatsehue canerecabati aniya tibu, tujatu etehua tyau acara acuare quirica tatse cajacati ishugue, dutyaja yacuaju bahue ameretsu tuque ebisuturau tibu. ²⁰ Tumeque inime tupuqui ayaque tahuitsutu barepa juque Yusu tsahuaquira isaracuare tahuiju:

—José, miquemi David eque ejuracanaque. Arepa María carecani isaqui ama bucha, jabama tu ni ejeque ecuitaja buchique. Tuja ebacua ecarecaniju badeyaque tu Yusuja Espiritu equeque. Bisuume tuque micue etareju duju ishu. ²¹ Deca nana piji tujatu cuinanaya. JESUS tuja ebacani paju. (Riyaque ebacani tu “INAJACAMEREQUIQUE” jadique). Jadya bacanietu juya, tuque tuja cuanaque inajacamerequi jubuque tibu, tunaja jucha cuana apupashaqui jubuque tibu, —jadyatu barepa juque Yusu tsahuaquira José acuare tahuiju.

²²⁻²³ Berutu quisarati cuejaqui eque Yusura cuejacuare eje bucha judadiyaque:

“Epuna deca jipemaquetu carecani isaqui jubuque.

Cuinanabuque tujatu ebacua.

EMANUEL bacanitu jubuque” (‘YUSU ECUANA TSEHUE’ jadique),

jadyatu Yusura quisarati acuare beru.

Jesucristo cuinanahuajutu tura quisarati iyahua eque jucuaque.

²⁴ Tahuiyaque cabatietitsutu José barepa juque Yusu tsahuaquira cuejahua equedya jucuaque. Caquemiticuaredya ecatsé María tsehue. ²⁵ Tumetu arepa caquemitihua ama bucha Joséra jabahuishacuare ama tuja ebacua cuinanaya tupu. Ebacua nana cuinanahuajutu Joséra JESUS bacanidya acuare.

2

Purari cuana eje bucha riyaque yahuaju judadiyaque bahue ishu cabahuityatiya cuanaque Jesús queja juticuareque

¹ Herodes ecuanaja yahua naruqui jucuare patyatu Jesús cuinanacuare Belén bacani epu eje ariju ama. Riyaque eputu Judea yahuaju jucuare.

Tuequedyatu junacuare Jerusalénju ecuita cuana dyaque bahue cuanaque ijete cuinanaya queja amaca aniya cuanaque. Tuna tuna purari cuana riyaque yahuaju eje bucha judadiyaque bahue juishu cabahuityatiyaque jucuare. ² Tuhua junatitsu tunajatu bacaduranaticuare:

—¿Are, eje queja ri israelita cuanaja ecuari judadiyaque cuinanachineque? Ijete cuinanaya queja amaca tuque ecuana bachine purari, amena cuinanachine jadique adeba ishucue. Rehua ecuana jehua tuque pureama ara, —jadya tunajatu anaticuare.

³ Herodes enaruquique tunara eje buchique bacadurayaque bahue juatsu tujatu bape inime tupucuaré, tuque cuaredadiqui juyaque bucha baatsu. Tumebaedya Jerusalénju cuanara enaruquique iyacuaquepa cuinanachine jadya bacatsu, eje bucha adebataqui ama bape bape jutidya tunajatu inime tupucuaré. ⁴ Herodesratu ihuaramerecuare pae cuanaja huaraji cuana, cacuatsashati bahuityaqui cuanaque jadya. Tuna junatihaju tuna Herodesra bacaduracuare:

—¿Eju Yusuja Emepeque cuinanadadiya? jadyatu Yusu equeque quisarati cuejaqui cuanara cuejacuaré, —jadya tujatu ecana bacaduracuare.

⁵ Tunaratu quemitsacuare:

—Belénju patu cuinanabuque. Belénju Judea yahuaju patu cuinanabuque. Miqueas Yusu equeque quisarati cuejaquiratu beru huencuaré:

⁶ “Belén tu epu eje arique ama yahua ecuanaja ebaba Judá tyatanacuareque.

Aniyatu peya epu dyaque arida cuanaque.

Jadya ama buchatu tumeque epu piji dyaque emuique judadiya, tuhua enaruquique dyaque inime metseque cuinanabuque tibu.

Israel eque ejuracana cuanaque ecue cuanaque tujatu ecana narudadibuque”,

jadyatu ehue Yusuja quisarati, —jadyatu jucuare israelita cuanaja huaraji cuana.

⁷ Jadique bahue juatsutu Herodesra dyaque bahue cuanaque tuna cuita camadya ihuaramerecuare. Junatihaju tujatu ecana bacaduratsacuare:

—¿Ejeque huecacatu purari ejitaju jumetse juchine micunara ique bacadurahuque?

⁸ Tunara cuejahuaju tujatu ecana cuadishacuare.

—Necuacue Belénju. Ita nebaticue. Pana bau neaticue tumeque ebacua nana. Dadititsu reequedya nejueticue. Necuejaeticue ique. Era dyadi pureamadya paati, —jadyatu Herodes jucua, ai muicara aatsu ama.

⁹ Herodesra jadya ahuaaju ecuita cuana cuanucacua. Purari, ijete cuinanaya queja amaca ejitaju juhuaquetu tunaja yacua queja ajequenancuacua tuna eju cuita juti ishuhue juishu. Ebacua nana aniya dyaque junatit-sutu purari netinacua. ¹⁰ Purari tuhua netihua baat-sutu ecuita cuana dyaque pureama jucua. ¹¹ Etareju tuna nubucua. Etareju nubinatitsu tunajatu ebacua nana banaticua ecuaque María tsehue. Ebacua nanaja yacuaju tuna chichucata junaticua tuque muiyaque. Jadya juatsu tunajatu caju caca cuana pacashacua. Pacashatsu tunajatu ebacua nana tyacuare tuja ishuhue bechine cuanaque. Tyacuare tunajatu oro, tumbaedy beta acumadi bapebapeque ijimedaque tsuje aridaque, “incienso”, “mirra” jadya bacani. ¹² Ebacua nana amena muihuaju tuna Yusura tahuju cuejacua dirunucayaque Herodes aniya eque ama dirunuca ishuhue. Jadya tibudya tuna Jerusalén eque ama cuedirunucua tunaja yahuaju dirunucayaque.

José tuja familia tsehue Egiptoju huanacuareque

¹³ Purari cuana eje buchique bahue cuanaque dirunucahuaju barepa juque Yusu tsahuaquira tahuju José cabamereti ishuhue acua Yusuja quisarati cueja ishuhue.

—Isaranaya mique era. Netitsuracua. Cabajejeticua. Huanacuarecue ebacua nana Egiptoju tuja ecuaque tsehue. Tuhua anidirucua jari, era mique micue yahuaju dirunuca ishuhue cuejaya tupu. Herodesratu sareya ebacua nana iye ishuhue, —jadyatu José barepa juque quisarati cuejaquira cuejacua.

¹⁴ Jadya cuejahuaaju José netitsuracua. Tumeque meta cuitadyatu José, ebacua nana, ecuaque jadya tsehue huanacuare Egiptoju. ¹⁵ Tuhua tuna anidirucua Herodes majuya tupu. “Egipto juque tuque ecua Ebacua ihuarahua”, jadya patu jucua Yusu tuja quisarati cuejaque. Tumetu ebacua nana Egipto juque jueticuahuaju, Yusura quisarati acua bae cuitadya jucua.

Herodesra ebacua piji cuana iyemerecuareque

¹⁶ Dyaque bahue cuanaque Jerusalén eque ama judirunucahuaju Herodes dyaque ecahuaiti cuita jucua, tunara ijahue ahua bucha cabatitsu. Cuadishacua retu tuja sudaru cuana Belénju.

—Neiyetillaticue dutya ebacua deca nana cuana tsuneedya cuinana cuana eque, beta mara tupu cuanaque. Neiyecue Belénju aniya cuanaque camadya ama, tumbaedyu epu japadama aniya cuanaque, —jadya tuna Herodesra acuare.

Jadya tujatu ecana amerecuare, dyaque bahue cuanara beta maratu butseeju tumeque purari amena ejitaju jucuaque, jadya acuare tibu. ¹⁷ Jeremías Yusu equeque quisarati cuejaquira patu icuenetadya cuejacuare tumbae cuitadya judadibuqueque:

¹⁸ “Ramáju taa peya inime, paa tsuri jadya bacataqui jubuque. Raquel tu tuja ebacua cuanaque jiteque pabuque.

Ni aija isaratsu casaturataquimatu paya tuja ebacua cuanaque jiteque, dutya iyetillatahua tibu”, jadyatu Jeremiasra beru yuequedya hueneacuare.

Jesús Egipto juque dirunucacuareque

¹⁹ Herodes majuhujutu Yusura cuadishacuare barepa juque etsahuaquique Egiptoju. Tahuijutu José queja cabameretinuacuare. Isaracuare tuja tuque:

²⁰ —Netitsuracue. Yudijidya dirunucacue micue yahuaju nucadya ebacua piji, ecuaque tsehue Israelju. Herodes, peya cuana, ebacua nana iyecara jucuaque cuanaque tuna amena majuchine, —jadyatu quisarati bepujira acuare José.

²¹ Jadya ahujutu José netitsuracuare. Dirunucacuare Israelju ebacua piji tsehue, ecuaque jadya. ²² Dirunucatsu tujatu bacacuare quisarati. Arepa Herodes majucuaque ama bucha, tuja ebacuaque Arquelao etataque cuarequi enaruquique. Jadya bacatsutu José bajida jucuaque Judeaju dirunuca ishü, Arquelaora dyadi ebacua piji iyecara anucaya bucha baatsu. Tahuijutu Yusura cuejacuare tuna eju diru ishü. Jadya tibudyatu dirucuare ebacua piji, ecuaque jadya tsehue Belénju ama. Galilea yahuaju tuna dirucuare. ²³ Tuhua judirutsu tuna anidirucuare epu Nazaret bacaniju. Icuene Yusu equeque quisarati cuejaqui cuanara patu cuejacuare: “Yusuja Emepequetu nazareno bacani jubuque” jadya. Jadya eque tuna Nazaretju anidiruhuaaju, tunara icueneta cueja acuare bae cuitadya jucuaque.

3

Juan Ecuata Cuana Utsaquira Yusuja quisarati cuejati-bunecuareque

(Mr 1.1-8; Lc 3.1-9, 15-17; Jn 1.19-28)

¹ Tsunuda juatsutu Yusuja quisarati cueja puji ejitaju jucuaque Judea yahuaju epu japadama anitaya cuanaju.

Tumeque ecuitatu Juan Ecuita Cuana Utsaquiue bacani ju-
cuare, ecuita cuana utsayaque junenicuare tibu. ² Tura tuna
cuejacuejanicuare:

—Necacualeticue inime, Yusuja micuanaja jucha cuana
apupasha ishu. Tsunutaya amatu Yusuja Emepeque ejitaju
juishu. Ejetsunue amadyatu tumeque enaruqui jutibune
ishuque, —jadya tuna Juanra cuejacuejanicuare.

³ Beru yuequedya Yusu equeque quisarati cuejaquiue
Isaiasratu huenecuare:

“Quisarati cuejatu jubuque ejeque cuana tsecada eje uma piji
anitaya cuana queja.

‘Nequihuaticue, Ecuana Cuatsashaquiue junayaju ishu.

Jidamaque neajacacue.

Jida tuyu nejudue, ediji benubenuque etuyune ejuu bucha’ ”.

Juan tu Isaiasra jadya acuare, tsecada anitaya cuanaju quis-
arati cueja judadiya jadya.

⁴ Juanratu jutucuaque camello tsaru etarique etataque eju-
tuqui eaque, baya ecuita cuanadya jutidya cajututiya bucha.
Ebiti patsa quinida ejicui tshuedya jutidyatu ecaquereti ju-
cuare. Tsei ebari, huaja jadya tujatu araaranicuare. ⁵ Jetiama
epu cuanajuratu quisaratiyaju ijacabacati bahue jucuare.
Jerusalénju cuanaque tuna tuhua cuacuare. Judea yahuaju
peya epu cuana juque, Jordán cueri japadama anicuare cua-
naque, jadya tuna cuabahue jucuare Juan quisarati cueja
juyaju. ⁶ Tura quisarati cuejayaju bacatsu,

—Yuneridya ecuana jucha arida, —jadya tuna cacuejatic-
uare.

Jadya tuna cacuejatihuaju tuna Juanra utsacuare Jordán
cueriju.

⁷⁻⁸ Juanratu jetiama fariseo cuana, saduceo cuana jadya
batsacuare tuaqueja cutsameretira cuayaju. Batsatsu tujatu
ecana atsacuare:

—Cutsameretimaquedya necabamereticue inime
cacualeticuague, cajuchaticarama juyaque jadya. Bacua
cuana yachi tiruyaju eje buchadya huanacara ejuu bucha
micuana juya. Cutsameretitsu Yusura enerecaturauque
ehuanau bucha tuque micuanaja inime juya. Jadya ama
tuque. ⁹ “Abraham eque ejuracanaque tibu, ecuana Yusura
nerecaturabuque ama”, jadya micuanaja inime paju ama.
Dyaque inime metseque juishuque ama tu Abraham eque
ejuracanaque. Cuejaya micuana era. Yusujuatu aniya
casa riyaque tumu cuana Abraham eque ejuracanaque
amere ishu. ¹⁰ Micuana micuana acui cacacati baecuague
buchu. Acui cacacati baecuague tu jacha tsehue cuere,
pahua jadya aishuque. Jadya micuana Yusura aboque,
micuana inime cacualeticuague ama juatsu. Acui cuere

bahuera eau bucha tura micuana abuque. ¹¹ Era tuna utsaya ena tsehue, jucha cuana aniyaque caadebatitsu inime cacuaretihua cuanaque. Tsunutaya amatu peya junayaque. Tujatu dyaque casa aniya, ecue bucha ama. Tuque baatsu ique ni aishuquedya jutidya; mere puji tuja patrón tsehue beta tupu ama ejuu bucha jutidya ique. Tume junayara micuana Yusuja Espiritu tyanaya, tujaque jadique adebataqui juishu. Tuaqueja catyaticarama juya cuanaque tujatu nerecaturabuque ijahuaja etiquiju. ¹² Ecuiteda trigo iruru, tsaje jadya aishuque buchique tu Junayaque. Turatu tuja cuanaque nityasicuanabuque tunaja ishucuita emajacaju, ecuita trigo etareju equiyatiu bucha. Tuja ama cuanaque bacuetu ijehuebuque nerecatura ishucuita etiqui ticu baecuaju, trigo tsaque epahuata bucha, —jadya tuna Juanra acuare.

Jesús cutsamereticuareque
(Mr 1.9-11; Lc 3.21-22)

¹³ Tumetu Jesús jecuare Galilea juque, Jordán cueri japadama Juan quisarati cueja juyaju, Juan queja cutsameretira. ¹⁴ Tuque jutihuajutu Juanra utsacarama acuare, Jesús tuque buchique ama baya tibu.

—Micue di taa ique utsataqui. Mique equeque di taa tu Yusuja Espiritu eaqueja jutaqui. ¿Eje bucha juatsu jatsumi jeya eaqueja enaju cutsameretira? —jadyatu Juanra Jesús atsacuare.

¹⁵ Jesusratu quemitsacuare:

—Iyacia jadidya jutidya paju. Yusura amereyaque tuque yatseja ataqui, —jadya tujatu acuare.

Jadya tura ahujaju, en aatsutu Juanra utsacuare. ¹⁶ Utsahuajutu Jesús ena juque cuinanacuare. Ena juque cuinanayajutu barepa pacashatanacuare. Bacuaretu Yusuja Espiritu huei jiuque tuque dyaque buteyaju. ¹⁷ Tume tujatu barepa juque etsuri bacacuare. Yume tucuetu jucuar tuja Etataque Yusu.

—Riyaque rique ecue Ebacua dyaque iyuhuedaque. Ique dyaque pureama juya tuatsehue, —jadyatu Yusu jucuar.

4

Satanásra Jesús cajuchatishacara acuareque
(Mr 1.12-13; Lc 4.1-13)

¹ Tuequedyatu Yusuja Espiritura Jesús dujucuar japada peya queja amaca anitaya amaju, Satanásja nime adeba ishucuita. ² Pushi tunca huecaca, pushi tunca meta jadyatu arama jucuar. Jadya juatsutu amena aracara jucuar. ³ Satanasratu Jesús jipecuare, cajuchatishacara aatsu.

—Yusuja Ebacuaquepa mique, jadyami juya. Jutaquiiju riyaque tumu pan cacueyatishacue, —jadyatu Satanásra acuare.

⁴Jesusratu quemitsacuare:

—¡Aama! ¡Aya ama tuque era! Ehuene tu Yusuja quisarati: “Earaqui tsehue jipidya amatu Yusura ecuita cuana anishaya. Tumbaedyatu Yusuja dutya cacuatsashati eque anitaqui”, —jadyatu Jesúsra acuare.

⁵Jadya juatsutu Satanásra Jesús, Jerusalén bacani epu ari-daju dujuacuare. Dujutsu tujatu tsuraquerecuare Yusuja etare camahua barudaju.

⁶—Putitanacue reeque. Yuneridya ni mi Yusuja Ebacuaque, tumemi ujeda ecatiu ama, Yusuja quisarati jadya ehue tibu:

“Yusuratu cuadishaya barepa juque tuque tsahuaqui cuanaque mique naru ishu, mique pacacayaju inatsa ishu, mique ni riya piji buchique ujeda cati ishu ama, tumura ehuchiju ujeda eauju”

jadya.

⁷Jesusratu acuare:

—¡Aama! ¡Aya ama tuque era! Tumbaedyata tu Yusuja quisarati ehue: “Nime adebaume Yusu” jadya, —jadyatu Jesúsra Satanás acuare.

⁸Tumetu Satanásra Jesús dujunucacuare emata dyaque barudaque matina. Tuequeradya tujatu bamerecuare dutya epu cuana riyaque yahua juque. Tumeque epu cuanaju dutya ai jida pijique aniya cuanaque tujatu bamerecuare.

⁹—Mira ique chichucata juatsu muiyaju, tume mique etyau dutya riya cuanaque, —jadyatu Satanásra Jesús acuare.

¹⁰—¡Aijama, Ijahua! ¡Micue yacuaju ique chichucata junime ama! Ehuene tu Yusuja quisarati: “Mique Cuatsashaquique Yusu camadya muicue. Tura cuatsashaya eque peadya camadya jucue” jadya. Dirucue rehuaque, Satanás, —jadya tujatu acuare.

¹¹Tura jadya ahujutu Satanásra jacacuare. Tumetu Yusu tsahuaqui cuanaque butecuare barepa juque Jesús tsahua, casatura jadya aishu.

*Jesús Galileaju Yusuja quisarati cueja catibuticuareque
(Mr 1.14-15; Lc 4.14-15)*

¹²Juan Ecuita Cuana Utsaquiique patu etare apudaju eishatana jucuaré. Jadya bahue juatsutu Jesús Galileaju cuacuare. ¹³Anidirucuarétu Capernaumju, Nazaretju ama. Capernaum tu bei jiruru jucuaré, ecuanaja ebaba ecátse Zabulón, Naftalí jadyaja yahua jucuaréju. ¹⁴Jadyatu jucuaré,

Isaías Yusu equeque quisarati cuejaquira icuenetadya quisarati acuare eque juya tibu:

15-16 “Pureamatu jubuque Zabulón, Naftalí ecatseja yahua jucuareju aniya cuanaque.

Galileaju tuna aniya, Jordán cueriju ijeti nubiya queja amaca. Israelita ama cuanaque aniya japadama tuna aniya.

Icuene tunajatu adebahua ama Yusuja quisarati.

Eje buchadya jucara, huenanaya jadya tuna juhua, maju tsehue bajida juatsu.

Tunaratu adebabuque Yusu.

Enime casatura tuna jubuque”.

¹⁷ Tuequedyatu Jesús Yusuja quisarati cueja catibuticuare.

—Necacuareticue inime. Yusu queja necatyaticue. Yusu-jatu adebamerehuie tuja Emepeque. Ejetsunue ama tu tuque enaruqui jutibune ishucue, —jadya tuna Jesúsra cuejacuejan-icuare.

Jesúsra pushi jae puji cuana tuatsehue juneni ishuhuaradirucuaque

(Mr 1.16-20; Lc 5.1-11)

¹⁸ Jesússtu Galilea bei jiruru eque dirucuaque. Diruyara tujatu badirucuaque beta jae puji ecatse. Peadyatu jucuaque Simón. (Peya ebacani tujatu jucuaque Pedro.) Peyatu jucuaque Andrés, Simón tsehuequique. Jae deru ishucue enaju mare tatse jucuaque. ¹⁹ Jesúsra tatse isaradirucuaque:

—Nejecue. Eatsehue nejunenicue. Metse metse jae puji ecatse. Iyacia metse era ecuita cuana Yusu adeba mere ishucue amereya, —jadya tatse Jesúsra adirucuaque.

²⁰ Tumeque ura cuitadya tatse jae deru ishucue shanaquenatsu junenitibunecuaque Jesús tsehue.

²¹ Cuabacanucatsu tujatu banucacuaque beta ecuita ecatse. Jucuaquetu Santiago, Santiago tsehuequique Juan jadya, Zebedeaja ebacuaque ecatse. Cuaba aridaju tatse juanicuaque etataque tsehue, jae deru ishucuaque sipiani juyaque. Jesúsra tatse ihuaracuaque tuatsehue juneni ishucue. ²² Tura ihuarayaju bacatsu tatsejatu shanaquenacuare tatsera ai ayaque. Cuinanacuare tatse cuaba arida juque, etataque isaraquenatsu. Jadya juatsu tatse Jesús tsehue junenitibunecuaque.

Jesúsra jetiama ecuita cuana bahuityacuareque

(Lc 6.17-19)

²³ Jesússtu junenicuaque Galileaju dutya epu cuanaju. Nubi bahuetu jucuaque caradati ishucue etare cuanaju, tuna bahuitya ishucue. Nubitsu tujatu ecana cueja bahue jucuaque quisarati jidaque.

—Tata ecana, Yusura micuana tujaque amerecara aya; tura micuana narucara aya, —jadya tujatu ecana abahue jucuare.

Chachanecuairetu ujejeda cuanaque, ejeque ujejedya jutidya. ²⁴ Jesús eje bucha juyaque tuna bahue juterecuare dutya Siria yahuaju aniya cuanaque. Tuque epuju judiruhua-jutu ecuita cuanara dujubarecuare ujejeda cuanaque, tuja ecana chachane ishu. Dujubarecuare tunajatu ai ujera juya cuanaque, ijahua cuanara quijahuatishaya cuanaque, manu arida cuanaque, bucucutaquima cuanaque jadya. Jadya chachaneetu Jesúsra acuaré bape bape ujeje tsehue cuanaque.

²⁵ Jetie ecuitara amatu tupujudya anenicuare. Jecuare tuna Galilea juque, Peadya Tunca Epu Cuana juque, Jerusalén juque, Judea yahua cuana juque, Jordán cueri yueque macare aniya cuanaque jadya.

5

Jesús emataju tsuratsu Yusuja quisarati cueja jucuaque

¹ Ecuita jetieque ama tuaqueja jutiya baatsutu Jesús tsuracuare emataju tura mepehua cuana tsehue. Tuque anibutehuajutu tura mepehua cuanaque caradaticuare tuque peque, tuja ecana bahuitya ishu.

Dyaque jida juya cuanaque
(Lc 6.20-23)

² Jadya bahuityae tujatu ecana atibunecuare.

³ —Dyaque jida taa tuna taca caadebati Yusu pureamaturayaque ama juya cuanaque, tuja tsahua ishu tunaja tuque saretanique. Pusha ama cuitadya tuna Yusura naruya, baya jadya aya.

⁴ “Dyaque jida taa cajuchatitsu peya inime juya cuanaque. Arepa ecana peya inime, paya jadya juya ama bucha tuna Yusura nime casaturaya.

⁵ “Dyaque jida taa eje bucha cabatitsu abacata juya cuanaque. Tuna tuna Yusu jaque. Tura tuna tyaya dutya jidaque tura tyaana ahua cuanaque, Yusu dutya naruqui juatsu.

⁶ “Dyaque jida taa Yusura amereya eque jucara ebari juya cuanaque, ecuaana aracara, ijicara ejuu bucha Yusura cuatsashaya eque jucara ebari juya cuanaque. Yusura tuna tsahuaya tura amereya eque juishu.

⁷ “Dyaque jida taa peya cuana tsehue canerecabati aniya cuanaque. Yusuajatu tuna tsehue canerecabati aniya.

⁸ “Dyaque jida taa Yusu pureamatura cuita camadya inime tupu juya cuanaque, ai riyaque yahua juque ama. Tunaratu badirubuque tuaqueja judirutsu.

⁹ “Dyaque jida taa ecahuaiti cuanaque jida inime bajeje, tsahua jadya juya cuanaque. Yusura tuna ‘Ecue ebacua rena’ jadya aya.

¹⁰ “Dyaque jida taa Yusuja biji eque juyaju jidama ataya cuanaque. Arepa ecana iyacua nrecada ataya ama bucha, pusha ama cuitadya tuna Yusura naruya, baya jadya aya.

¹¹ “Dyaque jida taa micuana peya cuanara ijillahuanaya cuanaque, peya cuanara jidama aya cuanaque, yuneriju ama jadya micuana jadya ataya cuanaque. Arepa micuana jadya nrecada juya ama bucha, Yusura micuana narujacaya ama.

¹² Pureama nejujacaume. Necanimehuallatiume, barepaju Yusura dyaque jidaque tyatsabuqueque adebatsu. Micuana camadya ama micuana jadya canerecattie juya. Jadya nerecaturaedy a tunajatu acuare beru yuequedy Yusu equeque quisarati cuejaqui cuanaque, Yusuja biji eque tuna aniya baatsu, —jadya tujatu ecana bahuityacuare.

Banu, hueca jadya buchique micuana

(Mr 9.50; Lc 14.34-35)

¹³ Jesúsra tuna bahuityanucacuare:

—Banu ecuanaja ara ishuque cayuamatimaque etsumeu bucha, jadidya micuana Yusura tsume buque ecue quisarati cueja ishu, dutya ecayuamatitereu tibu. Banuja ni, banu huaja etereu, aijamatu ni eje bucha banuqui amerenuca ishuque. Jidamatu ni aishu buchique. Ecuiteda cuanaja tapapasha ishutu ijehuetaqui etsecueju. Tumebaedya micuana micuana ni era cuatsashaya eque jujacaya, tume micuana ni aishu ejuu, Yusuja yacua juque ijehue ishuque jutidya.

¹⁴ “Micuana equetu peya cuanara Yusu adebabuque. Udera apudaju eudau buchadyatu micuanara ecuita cuanaja inime huecashaya Yusu adeba ishu. Era micuana mepehua dutyara bayaju ique mere ishu, ai etehua ama, epu ebarucueque dutyara epetau bucha. ¹⁵ Udetu tuchatanaya caju ducu tehua ishu ama, apuda ducu hueca ishu, etareju dutya pana peta aishu. ¹⁶ Tumebaedya tuque micuanaja Yusu meretaqui, etehua mere ama. Micuana dutyara petayaju micuana era cuatsashaya eque jutaqui, peya cuanaja micuana jida juyaque baatsu, micuanaja Tata Yusu barepa juque pureama aishu, —jadya tuna Jesúsra bahuityacuare.

Yusura cuatsashaya eque jujacataquique ama

¹⁷ Jesúsra tuna bahuityanucacuare:

—Paju ama micuanaja inime: “Jesús amena junahua tibusu Moisésra cuatsashahuque amena iyataqui, Yusu equeque quisarati cuejaqui cuanara cuejahuaque tumebaedya”, jadya micuanaja inime paju ama. Ique jehua tume cuanaque aputashara ama; eje buchique cuita pana adebamerera

jehua. ¹⁸ Yuneri cuitadya micuana cuejaya. Barepa, yahua jadya aniya jari tuputu ni ejeque cacuatsashati cuaretanaya ama ni apupashatanaya. Cacuatsashati cuana Yusura iyahua eque micuana anitaqui dutya tura eje bucha judadi ishunque inime iyahuaque judaditereya tupu. ¹⁹ Inime ni micuanaja juya: “Arepa Yusura amerehuaque ama bucha, aishunque cuita ama rique. Aniya ama riyaque cacuatsashati eque”, tume micuana dyaque jetiedyaque jubuque Yusu enaruqui juhuaju. Dyaque jidamadyatu judadibuque cuatsashaya eque ama ani ishunque bahuityaqui cuanaque. Jadya ama bucha Yusura cuatsashaya eque ni micuana aniya, peya cuana ni micuana cuatsashaya eque ani ishunque bahuityaya, tume micuana Yusu enaruqui juhuaju dyaque inime metseque jubuque. ²⁰ Fariseo cuanara, cacuatsashati bahuityaqui cuanara jadyatu jidaque ayadya, ecuita cuanaja sumi ish u cuita camadya. Yusu queja ni micuana judirucara juya, ataqui tuque micuanaja jidaque Yusu pureamatura ish u, ecuita cuana pureamatura ishunque camadya ama.

Jesúsra cahuititaquique ama bahuityacuareque
(Lc 12.57-59)

²¹ “Micuanajatu ebacadya ecuanaja baba cuana bahuityatanacuareque: ‘Nequiyetiume. Ejeque quiyetiyaquetu dututaya huarajija yacuaju, nerecatura, iye jadya ata ish u’. ²² Era micuana cacuatsashati iyacuaque bahuityaya. Yurameta ujeu peya cuana tsehue necabatiume. Ejeque cahuitiyaquetu Yusura quiyeti puji bucha nerecaturae eau. Ejeque cahuitiyaquetu huarajija yacuaju edujutanau nerecatura ish u. Ejeque quijillahuanatiyaquetu edujutanau huaraji cuana ecasitatiju, nerecaturamereta ish u. Ejera ni peya aya, ‘Inimema, miquemi dyaque jidama’, tudya jutidyatu ijahuaja etiquiju ejudiruu.

²³ “Netsunutaume peya tsehue inime bajeje ish u. Peya micuanara cahuitishahuaque ura, jadya ama juatsu eje bucha ahuaque adebayaque ura inime nebajejeticie, arepa micuanara Yusuja etareju tuque pureama aya ama bucha, arepa micuanara behuaque Yusu tyahuie ama bucha. ²⁴ Tuhuadya micuanara tyashu dujuyaque neiyacue jari. Icuene necuacue jari micuanaja ai inime aniya queja. Jida nebajejeticie jari inime tuatsehue. Amena jida inime bajejetitsu, necuanucacue Yusuja etareju, micuanara tyacara ahuaque amena netyaticue.

²⁵ “Ejera ni micuana huaraji queja cuejaya, dujucara ni tunara micuana aya, huaraji queja junatimaradya icuene jida inime nebajejecue. Icuenedya ni micuana inime ebajejeu ama, tume tunara micuana edujuu huaraji dyaque aridaja

eaniquiiju. Dujuhuaaju micuana huarajira policia cuana queja edujumereu. Tume tunara micuana etare apudaju eishau.
²⁶ Tuhua tunara micuana enityamereu, huarajira tsujebacayaque tsujetyatillaya tupu, —jadya tujatu ecana acuare.

Epuna caquemitiqeremaque jabataquimaque Jesúsra bahuityacuareque

²⁷ Jesúsra tuna bahuityanucacuare:

—Ebacadya tuque micuanaja beruque cacuatsashati: “Nejabaume epuna micuana tsehue caquemitimaque”. ²⁸ Era micuana cacuatsashati iyacuaque bahuityaya. Micuanaja caquemitiqeremaque jaba ishuque inime tupuqui neaume. Ejera tuja caquemitiqeremaque jabacaraque inime tupuqui ayaquetu jabahua bucha nrecaturae cuitadya Yusura aya. Arepa jabama ama bucha, Yusratu ecajuchati baya, tumeque epuna jabacaraque inime tupuqui ahua tibu.

²⁹ “Nejacacue cajuchaticaraque. Petaya ni micuana micuanaja petataquique ama, nehuicacue micuanaja yatuca cajuchatimaradya. Huicatsu neijehuecue, jidamaque petatsu ebijiseriu tibu. Cajuchatiajeyadya jutidya ni micuana, tume micuana ijahuaja etiquiju ijehuetanabuque. Dyaque jidatu Yusu queja atuca pidya camadya judirutaqui, ijahuaja etiquiju atuca beta enubidiruque. ³⁰ Emetucu tsehue ni micuana ai jabataquimaque jabacara aya, necatubuticue cajuchatimaquedya. Catubutitsu neijehuecue, emetucu tsehue ecajuchatiu tibu. Cajuchatiajeyadya jutidya ni micuana, tume micuana ijahuaja etiquiju ijehuetanabuque. Dyaque jidatu metucu pidya camadya Yusu queja judirutaqui, metucu betaque ijahuaja etiquiju enubidiruque.

Ecaquemitiqeremaque jabataquimaque Jesúsra bahuityacuareque

(Mt 19.9; Mr 10.11-12; Lc 16.18)

³¹ “Ebacadya tuque micuanaja beruque cacuatsashati: ‘Epuna ecaquemitiqeremaque ijehuetaquidya. Jacacara ni micuana aya, neinamerecue quirica eje bucha juatsu micuanara jacayaque cuejayque’. ³² Era micuana cacuatsashati iyacuaque bahuityaya. Nequijehuetiume micuanaja huane tsehue. Eje bucha baatsu cuita camadya micuanaja huane jacataquique, micuanaja huane peya tsehue jarayaju daditsu cuita camadya. Epuna ni micuanara jacahuaju peya tsehue caquemitiya, tumetu epunara, deca iyacuara jadya Yusu cahuaitishaya, peyaja tsehue cajipetihua tibu, —jadya tujatu ecana bahuityacuare.

Quejenemereticara juatsu “Yusu bahue” jadya jutaquique ama

³³ Jesúsra tuna bahuityanucacuare:

—Ebacadya tuque micuanaja beruque cacuatsashati: “Quejenemereticara ni micuana juya quisarati ahuaque, ‘Yusu bahue’ jadya nejucue. Micuanara aana ahua equedya nejucue”.³⁴ Era micuana cacuatsashati iyacuaque bahuityaya. “Yusu bahue” jadya quisarati neaume. Micuanara ni yunerique quisarati ajacaya ama, tumetu aijamadya quejenemereti ishu, Yusu bacani huesa ishu. “Barepaju aniyaquetu bahue que yuneri quisaratiyaque”, jadya quisarati neaume. Yusu tuque micuana bacani huesaya.³⁵ “Riyaque yahua iyaquiquetu bahue ique yuneri quisaratiyaque”, jadya nejuume. Yusu tuque micuana bacani huesaya. “Jerusalénju aniyaquetu bahue ique pusha pusha ama juyaque”, jadya nejuume. Yusu tuque micuana bacani huesaya.³⁶ “Ique yuneri ama quisaratiyaque juatsu ique papajata”, jadya neaume quisarati. Ecuana ni tu eje bucha cacuaretishae ama etsaru pajada, sehueda jadya ni peadya etsaru buchique.³⁷ Ai ni micuana aana aya, neacue quisarati barema. Aana ama ni micuana ai aya, neaume. Micuanara quisarati aya equedya neacue, “Yusu bahue” jadya tsehue ama. Quisarati ejenemerecara ebarique tu Satanás jaque jutidya.

Jesúsra ecana etsuje juishuque ama bahuityacuareque
(Lc 6.29-30)

³⁸ “Ebacadya tuque micuanaja beruque cacuatsashati: ‘Ejera jidama ayaju etsuje nejucue. Ejera ni peya yatucaju ujeda aya, yatucajudyatu peya paanuca. Ejera ni peyaja etse jupuya, tuja etse dyaditu pajupunucadya’.³⁹ Era micuana cacuatsashati iyacuaque bahuityaya. Ejera jidama ayaju, etsuje jucara nejuume. Jida tsehue jutidya nebacue. Ejera bahuapajayaque juatsu, peya ebahua eque necatimerenucacue.⁴⁰ Ejera ni micuana huaraji queja cueja ishu dujuya, huarajira ni micuana aya, ‘Mique jidamapa ejuu jadya cuejaquique micue camisa tyacue’, camisa camadya ama tyacue. Micue chompa tyanucacuedya.⁴¹ Ejera ni micuana tura abuyaque casada tsehue japadama dujumereya, japada tuque tsahuayaque nedujucue.⁴² Ejera ai bacayaquedya netyacue. Ejera ni micuana ai masadama tyanuca ishu bacaya, netyacue, —jadya tujatu ecana bahuityacuare.

Eje bucha iyuhuebatsae ecuaa ujeu baqui cuanaque aishuque

(Lc 6.27-28, 32-36)

⁴³ Jesúsra tuna bahuityanucacuare:

—Ebacadya tuque micuanaja cacuatsashati beruque: “Iyuhueda nebacue micuana iyuhueda baqui cuanaque camadya. Micuana ujeu baqui cuanaque ujeu nebacue”.

44 Era micuana cacuatsashati iyacuaque bahuityaya. Iyuhueda nebacue micuana ujeu baqui cuanaque. Micuana jidama quisarati tsehue apuji cuanaque jida nebacue. Yusu queja nebacabacacue micuana ijillahuana, jidama aqui cuanaja ishu. “Jida jucue ique ujeu, jidama jadya aqui cuana tsehue”, jadya Yusu neacue. 45 Yusu tu jida dutya tsehue. Micuanara peya cuana jida tsehue bayaju, micuana ejitaju juya yunerí cuitadya micuana Etata Yusu barepaju aniya jaque. Turatu ijete hueca cuinanashahuecacaya jidama cuanaja ishu, jida cuanaja ishu jadya. Nei bacue jida, jidama jadya cuanaja jida ishu. 46 Inime micuanaja paju ama: “Yusura ecuana tyabuque jidaque, ecuana iyuhueda baqui cuanaque camadya ecuanara iyuhueda bayaju”. Butsee jidama juya cuanaratu iyuhueda baya tuna iyuhueda baqui cuanaque. Butsee huarajija ishu chipiru sitaqui cuanaque tuna jadya juya. 47 Micuanara ni jida batsaya micuana iyuhueda baqui cuanaque cuita camadya, “Ecuana ecuana peya cuana bucha dyaque jida”, jadya micuanaja inime paju ama. Butsee Yusu adeba baecua cuanajatu tuna iyuhueda baqui cuanaque jida batsa bahue. 48 Dutya tsehue jida anicara ne jucue. Micuanaja Tata barepa juque bae ne jucue. Jida tsehue nebacue peadya peadya ecuita cuana, —jadya tuna Jesúsra bahuityacuare.

6

Peña tsahuatsu casumititaquique ama

¹ Jesúsra tuna bahuityanucacuare:

—Tsahuaya ni micuana peya cuana, netsahuacuedya peya cuana queja capetamereti ishu ama. Dutyara bayaju ni micuana aya, peya cuanara micuana sumiya. Jadya ama bucha micuanaja Tata barepajura micuana tyabuque ama ni ai jidaque peya tsahuahua tsuje.

² “Jadya tibudya nrecada cuanaque tsahuatsu, necasumitiume ai tyaatsu; Yusu adebaquipa ejuu jadya juya cuanaque bucha nejuume. Nrecada cuanaque tsahuatsu tuna cacuejatiya dutya queja tunara jidaque mere ahuaque, caradati ishucue etare cuanaju, edijiju juneniyaque jadya. Ecuita cuanaja jida baishu jutidya tuna jadya juya. Ecuita cuana ni tu tunaja ishu jida quisaratiya, Yusu bacue aijama. Riyaque yahujaju camadya tunajatu jidaque inime baya. Yusura tuna jidaque tyadadibuque ama ni riya piji buchique. ³ Nrecada cuanaque tsahuatsu necacuejatiume ni eje quejadya jutidya. Ni ejeque micuanaja iyuhueda queja necacuejatiume. ⁴ Ejeque cuejamaque neacue. Micuanaja Tata dutya petaquiratu baya eje bucha micuana juyaque.

Tura micuana jida juya baatsu dyaque jidaque tyabuque, — jadya tujatu ecana bahuityacuare.

Jesúsra eje bucha quisaratie Yusu tsehue jutaquique bahuityacuareque

(Lc 11.2-4)

⁵ Jesúsra tuna bahuityanucacuare:

—Micuana Yusu tsehue quisaratiyaque, ecuita cuanaja sumi ishü jutidya nequisaratiume; Yusu adebaquipa ejüu jadya juya cuanaque bucha nejuume. Tunaratu dutya bahue amerecara aya tuna Yusu tsehue quisaratiyaque. Jadya tibudya tuna Yusu tsehue quisarati neti bahue caradati ishüque etare cuanaju, ejudya jutidya ecuita cuanaja peta ishü. Ecuita cuana camadyatu tunaja ishü jida quisaratiya, Yusu bacue aijama. Riyaque yahuaju camadya tuna tyatanaya tuna jida pureama juishüque. ⁶ Era micuana bahuityaya. Arepa Yusu tsehue quisarati ishü casitatitaqui ama bucha, jida nucadyatu yatse taca Yusu tsehue quisarati ishü. Jadya juyaque nenubicue eju aira buchique sicaturaya amaju. Nubitsu etsecue necateriticue. Micuanaja Tata Yusu tu tuhuadya micuana tsehue. Nequisaraticue tuatsehue. Turatu adebayadya micuanara inime tupuyaque. Turatu bacayadya micuana tacara tuque cuejayaque. Tura micuana jida juya baatsu, dyaque jidaque tyadadiya.

⁷ “Yusu tsehue quisaratiyaque, tumeque quisaratidya jutidya atinuca atinuca neaume; Yusu adebaquipa ejüu jadya juya cuanaque bucha nejuume. Tunajatu inime juya, quisarati ahuaquedya atinuca atinuca ayaju Yusura bacaya bucha. ⁸ Tuna bae nejuume. Yusu tuque micuanaja Tata. Turatu berudya adebahua micuanara ai sareyaque, micuanaja bacamajudya. Jadya tibudya tuque micuanaja tumeque quisarati atinuca atinuca ataqui ama. ⁹ Jadya Yusu tsehue quisaratiyaque nequisaraticue:

‘Ecuanaja Etata barepaju aniyaque, muiaba ishüque mique. Adebaya mique ecuana juchama nerique.

¹⁰ Pajuetihuisha huecaca micue ecuana naru ishüque.

Barepaju micue inime dutya juya bucha, tumbaedyä paju dutya rehua riyaque yahuaju.

¹¹ Tyacue ecuana riyaque huecaca ara ishüque ecuanara sareyaque.

¹² Apupashacue ecuanaja jucha cuana.

Ecuana peya cuanara jidama ayaque nime aputaya bucha, jadidya ecuanaja ecuana jidama juya cuanaque apupashacue.

¹³ Satanásra cajuchatishacara ayaju, ecuana tsahuacue, ecuana ecajuchatiuju.

Miquemi enaruqui.

Miquemi dutya casa tsehueque.

Miquemi eje tupu mui, pureama jadya ajaca ishunque ama.

Jadidya paju', jadya neacue Yusu tsehue quisaratiyaque.

¹⁴ "Micuanaja Tata barepajura tuque micuanaja apupashaya micuanara jidama ahuaque, micuanara, micuana jidama aqui que nrecabayaque juatsu. ¹⁵ Micuanara ni peya nrecabaya ama, tume tuque micuanaja Tatara dyadi apupashaya amadya micuanaja jucha cuana, —jadya tujatu ecana acuare.

Yusu mui ishuru arama quibetiyaque peya inime jutaquique ama

¹⁶ Jesúsra tuna bahuityanucacuare:

—Yusu mui ishuru arama quibetiyaque, micuana jadya juyaque ni eje quejadya jutidya necaadebameretiume. Yusu adebaquipa ejuu jadya juya cuanaque juya bae nejuume. Tunaratu dutya bahue amerecara aya tuna arama quibetiyaque. Peya inime tuna jubahue. Ramusu pahua muru tsehue ecana ebutsequiniju capepati bahue. Ecuaita cuana camadyatu tunaja ishuru jida quisaratiya, Yusu bacue aijama. Riyaque yahuaju camadya tuna tyatanaya tuna jida pureama juishuque. ¹⁷ Micuana Yusu mui ishuru arama quibetiyaque, pureama nejuque. Necajibururuticue. Cajibururutitsu necaluticue jida, micuana arama quibetiyaque peya cuanara eadebauju. ¹⁸ Micuanaja Tata tu micuana tsehue. Tuquetu bahue dutya eje bucha micuana juyaque. Tura micuana jida pureama juishuque tyabuque.

Tere baecuaque etsujequi jida quiyatiaje ishuruque
(Lc 12.33-34)

¹⁹ "Nequiyatiajeume chipiru, riyaque yahuaju ai tsuje arida cuanaque. Micuana rehuaque quiyatiyaquetu muju cuanara eyuamaturau. Eaputatereu jutidya tuque micuanaja. Chiri puji cuanaratu echiriu. Tume tuque micuanaja aijama ejuu ni ai buchique. ²⁰ Nequiyaticue Yusuja yacuaju micuana pureama juishuque. Micuana yunque quiyatiyaquetu cayuamati baecua. Mujuratu araya ama. Jitsu baecua tuque. Chiritanaya ama tuque; ni tu yuamaturaya rapara. ²¹ Tupujacaya ama tuque ecuanana inime ecuanaja iyuhueda cuanaque quiyatihuaaju.

Ecuaita educujuque inime udaquique
(Lc 11.34-36)

²² "Yatuca tsehue ademe ecuanana capetatiya. Capetatitsu ecuanana canarutiya ai muda cuanaju. Yatuca ecatse jidaju ecuanana jidadya anitaqui. ²³ Yatuca ecatse jidamaju, ecuanana ecanarutiu amadya muda cuanaju. Era micuana cuejayaque

tu hueca buchique. Ecue yana equedya ama ni micuana aniya, tume micuana apudaju juneniyaque cuji juhuaque bucha.

Yusu mereya ama bucha cachipiruticara ebari jadya jutaquique ama

(Lc 16.13)

²⁴ “Ni ejera buchiquetu emereu ama beta patrón ecatsé. Jadya jucara juyaque juatsu, tuque micuana, peya ujeu, peya bacue iyuhueda jadya jutidya ebau. Peyatu nijuta ducuta jadya tsehue emereu, peya bacue merecarama tsehue. Eje bucha anie ni micuana juma Yusuja biji eque, micuanaja ishucuita camadya chipiru radanitya jadya juatsu, —jadya tujatu ecana acuare.

Yusura tuja cuanaque narujacayaque ama

(Lc 12.22-31)

²⁵ Jesúsra tuna bahuityanucacuare:

—Cuejaya micuana era. Netsapeume inime: “¿Ai dyadi rique araya, ijiya? ¿Ai dyadi rique jutuya?” jadya. Yusura micuana iyahua tibu, yuneri cuitadya micuana tura tyadadiya micuanaja aijamaque ara ishucue, jutu ishucue jadya. ²⁶ Neadebacue upati huiri cuana. Tunaratu inime tsapeya ama tunara sareya tsehue. Tuna tuna cuhuatiya ama ni cahuesatiya ama ara ishucue. Aijama tunajatu ni eju tunaja earaqui iya ishucue. Jadya ama bucha tuna micuanaja Tata barepajura tyaya ara ishucue. Tujaque micuana. Micuana tura micuana dyaque iyuhueda baya, upati huiri cuana bucha ama. Yuneri cuitadya tura micuana tyaya micuanara ara ishucue sareyaque. ²⁷ Ni ejeradya jutidyatu tuja maju ishucue ura juetihuaju tuja ani erirunucáu ama.

²⁸ “Micuanajatu tsapetaqui ama inime jutu ishucua tsehue. Nebacuedya yachiju shasha cuana eje bucha da-nee juyaque. Tunaratu jidama ama inime baya jutu ishucua tsehue. Mere ecana juya ama chipiru jiteque, ni ecana taritariya. Jadya ama bucha tuna Yusura jida piji amereya. ²⁹ Salomón tu jucuaré ecuari dyaque jida tsehue cajututitsu jida piji. Jadya ama bucha shasha cuana yachi juquetu dyaque jida piji, Salomónra ejutuqui dyaque jidaque jutucuaré bucha ama. ³⁰ Shasha yachi juquetu tsunuda ama juya. Tumeque huecaca camadya tu jida piji; peya huecaca bacue eijehue ejuu etiquju. Yusura yachi juque shasha cuana dyaque jida piji amereya tibu, yuneridya tura micuana tyadya micuanara jutu ishucua sareyaque. Micuanaratu tura naruyaque ejeneya ama, arepa tuque micuana upati jeta aqui cuanaque, shasha cuana jadya naruyaju baya ama bucha. ³¹ Yusura tura iyahuaque naruya tibu, inime

netsapeume: ‘¿Ai dyadi tuque ecuana araya? ¿Ai tuque ecuana ijiya?’ jadya ama juatsu ‘¿Ai dyadi tuque ecuana jutuya?’ ³² Yusu adeba baecua cuanaque tuna tumeque inime tupu tsehue jutidya juneniya. Micuana jadya inime tupu tsehue nejunenime. Micuanaja taa tu aniya Etata Yusu barepa juque, micuanara ai ara ishuque, jutu ishuque jadya sareyaque tyaquique. ³³ Pana catyati nejucue Yusu queja, tuja micuana naru ishu. Eje buchadya tuque pureamaturacara ayaque anicara nejucue. Jadya anie ni micuana juya, tume tura micuana tyaya dutya micuanara sareya cuanaque. ³⁴ Netsapeume inime huecacape eje bucha juya tsehue. Dutya huecacatu aniya eje buchique inime, masada, inime tupu jadya. Inime tsapequi neaume eje buchique inime cuetimaque jari. Baecua micuana eje bucha judadiyaque. Tume cuanaque inime tupuqui aatsu, eje bucha inime tsapema anie ni micuana juma, —jadya tujatu ecana acuare.

7

Peya cuana jidama juyaque cuatsabiji jutaquique ama
(Lc 6.37-38, 41-42)

¹ Jesúsra tuna bahuityanucacuare:

—Peya jidama juyaque cueja nejuume, Yusura micuana dyadi jidama juyaju ebau tibu. ² Micuanara peya cuana baya bucha baedya micuana Yusura eau. Micuana ni peya cuana ai tyashu inijeda juya, tumetu Yusu dyadi inijedadya juya micuana jidaque tyashu. Micuanara ni tyacara tsehue tupuya ai tyayaque, tume micuana Yusura dyaque jidaque tyaajeyadya jutidya, —jadya tujatu ecana acuare.

³ Jesusratu cuatsabiji cuejacuare tuna bahuityayaque:

—Micuanaja cuitadya yatucaju acui tibu ebari aniyaque juatsu, ¿eje bucha juatsu jatsu tuque micuana peyaja yatuca juque aijara piji quemicara aya? ⁴ Micuanaja cuitadya yatucaju acui tibu aniyaque caadebatiyaque ama, ¿tume tuque micuana peya eje bucha juatsu jadya eau: “Aijara tuque micue yatucaju aniya. Paquemi micue era”, jadya eau? ⁵ ¡Ebaupa, ai jadique micuana shuhui buchique! Icuene micuana cuitadya yatuca juque acui tibu necaquemiticue. Caquemititsu tuque micuana ebau jida peyaja aijara yatuca juque quemi ishu, —jadya tuna Jesúsra acuare.

(Riya tsehue tujatu ecana bahuityacuare: Neadebacue micuanaja jucha. Adebatsu neajacacue, peyaja ishu jidama quisaratimaque.)

⁶ Jesúsra tuna bahuityanucacuare:

—Aniyatu Yusuja quisaratati tsehue tsaya cuanaque. Chapa mureda buchique tuna jipeyaju cacaruticaraqe. Cuchi

cuana buchique jutidya tuna. Tapapasha, asicatura jadya jutidya tunajatu aya peya cuanara tyayaque. Casada tsehue ecana quisarati bacamerecara neaume tunara bacacarama ayaque, —jadya tuna Jesúsra acuare.

Yusura ai tyaya tupu bacajacataquique ama
(Lc 11.9-13; 6.31)

⁷Jesúsra tuna bahuityanucacuare:

—Nebacabacajacaume Yusu queja. Tyayadya tura micuana. Nebacajacaume ai sareyaque. Yusura micuana dadimereya. Canimehuallatima neihuacue, micuanara ai Yusu bacahuaque tura tyaya tupu. Tyayadya tura micuana. Etareju nubicara juatsu etare metsera pacashaya tupu eihua bucha ihuae neacue. ⁸Ejera bacajacayaque ama tujatu tyayadya. Ejera sareyaratu dadiyadya. Ejera canimehuallatima ihuayaratu bayadya tura bacahuaque. ⁹⁻¹⁰¿Micue bacuara pan bacayaju ni taa mi tumu jutidya etyau ara ishu? ¿Micue bacuara jae bacayaju ni taa mi bacua jutidya etyau ara ishu? ¿Ni ejeque etataqueratu tura bayaque jadya eau ama! ¹¹Butsee micuana jidamaradya tuque micuana micuanara baya cuana jidaque tyaya. Yutsumadya Yusu barepa juque micuana dutya tyaquique, dyaque jidaque micuanara bacayaju tura micuana tyayadya. ¹²Peja cuana queja necabamereticue tunara eje bucha bacara aya eque. Jadya tibudya tuna dyadi jida tsehuedya nebacue. Riyaquedyatu Moisésra, Yusu equeque quisarati cuejaqui cuanara jadya bahuityacuare, —jadya tuna Jesúsra acuare.

Eje uma ama Yusu queja judirubunque
(Lc 13.24)

¹³Jesúsra tuna bahuityanucacuare:

—Eaqueja necatyaticue Yusu queja judiru ishu. Eje uma tuna jadya jucarama juya. Tunaja biji eque ecana anijacacarama juya. Tunadya tuna etsecue quinida eque nubiya buchique; ediji quinida eque ajeyaque buchique tuna. Ijahuaja etiquiju tuna judirubunque. ¹⁴Masabaya micuana Yusu pureamatura ishu, micuana cuita camadya capurea-maturatijacacarama juya tibu. Eje uma ama tuna Yusu camadya pureamatura juya cuanaque. Tunadya tuna etsecue quinidama eque nubiya buchique; ediji ibeda eque ajeya buchique tuna. Tunadya tuna Yusu queja judirubunque.

Ecacaju acui adebataquique
(Mt 12.33-35; Lc 6.43-45)

¹⁵“Necanaruticue pusha pusha arida cuana tsehue, Yusuja quisaratipa ecuejau jadya juya cuana tsehue. Quisaratiyaju bacatsu tuque micuana ecana micuana tsahuara jehuaque

buchadya ebau. Pana yuamatura cuitadya tunara micuana eau, micuanara bacayaque juatsu. Uhuisha bucha cuita jida datse tuna jucara juya, iba bucha jidamaque jutidya. ¹⁶ Micuanaratu eadebaudya ejeque pusha pusha arida cuanaque tuna eje bucha juyaju baatsu. Ecacaju petatsudyatu adebataqui acui. Abarijutu uva caca ecuinanau ama. Higitu acuija ducu edaneu ama. ¹⁷ Jadidyatu dutya acui jidaque jida cacacatiya. Acui amena rarayaquetu jida amadya cacacatiya. ¹⁸ Acui jidajatu juya amadya ecaca jidama arataquimaque. Acui arataquimajatu juya amadya ecaca arataquique. ¹⁹⁻²⁰ Tumbae adebaedya tuque micuana eau ejeque jidama bahuitya bahuitya puji que tuna eje bucha juya baatsu. Tuna tuna judiruya ama eju Yusu adebaqui cuanaque judiruyaju. Ijahua etiquiju tuna ishatanabuque, acui ecaca arataquimaque eata bucha cuere, pahua jadya.

Dutya ama Yusu aniyaju judirubuque

(Lc 13.25-27)

²¹ “Aniyatu umae ecuiquepa jadya juya cuanaque. ‘Miquemi Ecuana Cuatsashaquique’, jadya datse tunara aya. Jadya ama bucha tuna Yusu queja judirubuque ama, ecue Etata barepaju aniyaja biji eque ama anihua tibu. Tuja biji eque aniyaque cuita camadyatu tuaqueja judirubuque. ²² Tere ishucue huecaca juetihuaju camadyatu Yusu adebaquipa ejuu jadya juya cuanara abucue: ‘Ecuana Cuatsashaquique, ecuanaratu Yusu quisarati cuejaha micue ebaniju. Micue ebaniju tuque ecuanan ihua cuanara quijahuatishaya cuanaque ihua cuana ijehuecuinaha. Micue ebaniju tuque ecuanan ahua ni ejeque ecuitaja ataquique ama’, jadya tunara abucue. ²³ Era tuna quemitsabuque: ‘A, aijama. Ecuique ama micuana. Adebaya ama micuana era. Nenetisicuacue ique pequeque, micuana micuana jidama juhua cuanaque’, jadya tuna abucue, —jadya tuna Jesúsra cuejacuare.

Jesús queja nimee cuanaque, tuaqueja nimee ama cuanaque jadya

(Mr 1.22; Lc 6.47-49)

²⁴⁻²⁷ Jesúsra tuna cuejanucacuare:

—Anicuaretu beta ecuita etare caticuareque ecatsé. Icuenequetu inime adebabada, bahue jadya jucuaré. Purucuaretu deda. Tumu ebari dyaque yahua pajidaju tujatu dudu cuana puchacuare ni eje tupu bucucunuca ishuhua ama. Peya bacue inimema jucuaré. Mejijiju jutidya etare caticuare. Nei ebari juatsu cuerí cuana pesitanaterecuare. Cuejipa casadara etare ecatsé aeticuare. Icueneque etare pujija eaque casada neticuare. Rihuicuare ama, dudu cuana

yahua pajidaju casada epucha tibu. Peyara etare acuareque bacue rihuicare. Pana aputatere jucuaire.

“Era bahuityayaque bacatsu era amereya eque juya cuanaque tuna yahua pajidaju etare caticuare buchique. Tuna tuna ni eje tupu yuamaturatana ishuque ama. Era amereya eque ama juya cuanaque bacue mejijiju etare caticuare buchique. Tuna tuna pana aputatere jubuque, —jadyatu Jesúsra ecuita cuana cuejacuare.

²⁸ Jesús quisaratiyaque abacatanahuajutu ecuita jetieque ama anajacatacuare tura bahuityayaque bacatsu. ²⁹ Jadya tuna jucuaire:

—Pana adeba taa tu aya eje buchique quisarati ayaque. Cacuatashati cuejanuca cuejanuca jadya amatu juya, ecuana bahuityaqui cuanaque bucha ama taa, —jadya tuna jubarecuare.

8

Jesúsra ecuita pusesera ririshayaque chachanecuareque
(Mr 1.40-45; Lc 5.12-16)

¹ Jesús bahuitya bahuityayaque emata juque butehuaajutu ecuita jetiera ama tupujudya acuare. ² Tumetu ecuita pusesese huera rami ririshayara jipeticuare. Jipetitsu tujatu Jesús tuja yacuaju chichucata juatsu isaratsacuare:

—Ique Cuatsashaquique, chachanecara aatsu taa mira ecue ujeje aniyaque echachaneu, —jadya tujatu acuare.

³ Tura jadya ayajutu Jesúsra jabacuare.

—Chachaneyadya mique era, —jadyatu Jesúsra acuare.

Jadya aya tsunumeetu pusesese aputacuare tuja ecuita juque. Chachadya tu jucuaire.

⁴ —Cuejacueja camadya aume ni ejequedya jutidya mique eje bucha chachae juhuaque. Aticue Moisésra amerehua equedya. Riyata cuau cuitadya jucue pae queja, tuja mique pana adeba atsa ishu, “Chachadya rique,” jadya tuja aishu. Cadujuticue Moisésra amerehua equedya riyaque ujeje chacha eju cuanaja Yusu tyabahueque. Jadya juatsutu ecuita cuana bahue juya mique amena chachaque, —jadyatu Jesúsra acuare.

Jesúsra 100 sudaru cuana cuatsashaquija mere puji chachanecuareque

(Lc 7.1-10)

⁵ Jesússtu Capernaumju junaticuare. Junatihuaajutu huaraji cien sudaru cuana cuatsashaquique Roma juque ecuadishara jipeticuare Jesús. Tume tujatu Jesús jipeticuare tuaqueja canerecati ishu.

⁶ —Ique Cuatsashaquique, ique merequique tuque ecue ujejeda ecue etareju. Jarayadya tuque. Bucucutaqui amatu juya. Dyaque nerecadatu juya, —jadyatu sudaru cuana cuatsashaquira acuare Jesús.

⁷ Jesusratu quemitsacuare:

—Cuayadya ique. Chachanetiadya tuque era, —jadya tujatu acuare.

⁸ —Eratu adebayadya mira ecue etareju cuamara echachaneuque, Ique Cuatsashaquique. Cuatsashacue. Tuquetu chachadya juya. Ique israelita ama. Bahuedya ique micue cacuatsashati eque mique ecue etareju nubitaquique ama.

⁹ Ique ecue huaraji cuanara cuatsashayaju yana equedya jubahue. Era dyaditu sudaru cuana cuatsashayadya. Era ecue sudaru cuadishayaju, masadamadyatu cuaya. Peya ni era ihuaraya, masadamadyatu jeya. Era ni ecue mere puji, “Acue jeeque” jadya aya, masadamadya tujatu aya. Ique bahuedya micue casa aniyaque ique merequique chachane ishu, —jadyatu huarajira acuare Jesús.

¹⁰ Jadya bacatsutu Jesúsra ecuita bape bacuare tuja quejeneti baatsu. Jadya baatsu tujatu tuque tupuju cuaya cuanaque cuejacuare:

—Riyaque Romajura taa dyaque ejene neri aya era tuja tuque merequique echachaneuque. Pusha amadya aijamatu ni ejeque ecue ata israelita ique dyaque ejenequique.

¹¹ Nebacacue taa era cuejayaque. Eje uma israelita ama cuanaque tuna Yusu huaraji dyaque aridaque aniyaju judirubuque. Dutya quejaque tuna tuhua jubuque. Ijeti cuinanaya queja amacaque, ijeti nubiya queja amacaque jadya tuna caradatibuque. Caradatitsu tuna Abraham, Isaac, Jacob jadya tsehue araarapeedya jubuque. ¹² Ecue ata israelita cuanajatu anihua emajaca Yusuja quisarati baca ishu. Jadya ama bucha tuna dutya jujeri Yusu queja judirubuque ama, eaqueja catyatiya ama tibu. Apudaju tuna ijehuetanabuque. Ijahuaaja etiquiju tuna judirubuque. Tuhua tuna dyaque payaque, etse tari jubuque, dyaque canerecatiya cabatitsu, —jadya tuna Jesúsra acuare.

¹³ Tuequedyatu Jesúsra isaranucacuare sudaru cuanaja huaraji:

—Dirucue micue etareju. Miratu ejenehua era ujejedaque japada equera chachaneyaue. Mique merequiquetu amena chacha, —jadyatu Jesúsra acuare sudaru cuanaja huaraji.

Tumetu mere puji tumeque ura cuitadya yunqueja chacha jucuare.

Jesúsra Pedroja ehuaneequeja ecuaque chachanecuaque
(Mr 1.29-31; Lc 4.38-39)

¹⁴ Jesústu Pedroja etareju cuacuare. Tuhua junatitsu tujatu banaticuare Pedroja ehuanegueja ecuaque dyaquene cuita baara jyaque jarayaju. ¹⁵ Junatitsutu Jesúsra emetucuju jabanaticuare. Jabanatihujutu baarara ajacacuare. Tumetu netitsuratsu earaqui jucuaré Jesús, tura mepehua cuanaque jadya mihua ishu.

Jesúsra umada ujejeda cuanaque chachanecuareque
(Mr 1.32-34; Lc 4.40-41)

¹⁶ Amena ijeti nubihuaju tunajatu becuare Jesús queja ijahua cuanara quijahuatishaya cuanaque, peya ujeje tsehue cuanaque jadya. Tura tuna quisarati tshuedya jutidya ijahua cuanara quijahuatishaya cuanaque quijahuatishajacacuare, tumbaedyá peya ujejequi cuanaque. ¹⁷ Tura jadya ahujutu jucuaré. Isaías Yusu equeque quisarati cuejaquirá beru cuejacuaré bae cuitadyatu judadicuaré: “Tura cuitadya ecuana chachanecuare ujejedaque. Secacuare tura ecuanaja uje cuana”.

Jesús tsehue junenicara jucuaré cuanaque datse
(Lc 9.57-62)

¹⁸ Ecuata cuana jetiama caradatiya baatsutu Jesúsra tura mepehua cuanaque jadya acuare:

—Necarequetira bei yueque macare, —jadya tujatu ecana acuare.

¹⁹ Cacuatashati bahuityaquiratu Jesús jipeticuare.

—Ebahuityaquique, ique junenicara juya miatsehue eju mique cuayaju, —jadya tujatu Jesús acuare.

²⁰ —Dyaque masada tuque. Equique chapa cuanajatu aniya cani; upati cuanaja bacue eja. IQUE ECUITAJA bacue aijama etare tahuí ishuque, —jadyatu Jesúsra acuare.

²¹ Peya tuque ijacabacaquiratu acuare:

—Ecuatsashaquique, icuene tuque ecue etata narutaqui tuque majuya tupu. Tuque majuhaju, papatsu piisi miatsehue juneniya. Ihuacue jari ique, —jadya tujatu Jesús acuare.

²² —A, aijama. Iyacuadya eatsehue junenicue. Ique adébaya ama cuanaque tuna emaju cuanaque bucha. Tunara inime tsapequi paa ai riyaque yahuaju cuanaque, emaju cuanaque papaya tupu, —jadya tujatu acuare.

Jesúsra cuejipa, ena pacu jadya nityacuareque
(Mr 4.35-41; Lc 8.22-25)

²³ Jadya juatsutu Jesús cuaba ebariju anibutecuare tura mepehua cuana tsehue. Anibutetsu tuna carequeticuare.

²⁴ Bei riquyaquetu Jesús tahuicuare. Tuna eje tujatu ajuhaju amatu muya jutidya cuejipa casadaque jueticuare.

Cuejipa juetitsutu ena pacura cuaba ebari nudyajeri nudya-
jeri acuare. ²⁵ Jadya baatsutu tura mepehua cuanara Jesús
bushishaticuare.

—¡Ecuana Cuatsashaquique, chachanecue ecuana! ¡Rumu-
tanaya ecuana! ¡Ena pacura ecuana nudyaya! —jadya tuna-
jatu acuare quique eque.

²⁶ —¿Eje bucha juatsu jatsu micuana bajida juya? Ejeneya
ama jaridya tuque micuana ecue micuana naru ishu casa
aniyaque.

Jadya juatsutu Jesús netitsuracuare. Netitsuratsu tujatu
acuare cuejipa enapacu jadya:

—¡Tume tupu camadya! ¡Neticue! —jadya tujatu acuare.

Tura jadya aya tshuedyatu cuejipa neticuare. Dutyatu
pana abacatana jucuare. ²⁷ Jadya baatsu tuna eanajacata
jucuare. Cabacaduratibarecuare ecana:

—¡Ai ecuita dyadi ri riyaque! Cuejipa, enapacu jadya taa
tuya yana equedya juya, —jadya tuna jubarecuare.

*Jesúsra ijahua cuanara quijahuatishayaque ecitse quijahu-
atishajacacuareque*

(Mr 5.1-20; Lc 8.26-39)

²⁸ Chamacama tuna jaratsuradirucuare Gadaraju aniya
cuana queja bei yueque macare. Jaratsuradiruhajutu beta
ecuita ecatsera Jesús jipeticuare. Ijahua cuanara quijahu-
atishayaque tatse jucuare. Emaju cuanaque eisha cani cuana
juque tatse jecuare. Dyaque emuba tatse jucuare. Ni eje-
quedya jutidyatu tumeque ediji eque juneni bahue jucuare.
²⁹ Jesús baatsu tatsejatu quiquetsacuare:

—¿Ai jitequemi jeya yatse queja, Jesús Yusuja Ebacuaque?
Bacuedya jutidya yatse. Huecaca juetima jariju cuitami jeya
yatse nerecaturara, —jadya tatsejatu acuare.

³⁰ Tueque eje japa amatu cuchi cuana jetiama araarani-
barecuare.

³¹ —Riyaque ecuita ecitse quijahuatishajaca ishu, mira
ecuana cuinanashayaque juatsu, ecuana panubi cuchi cua-
naju, —jadyatu ijahua cuanara acuare Jesús.

³² —Nenubicue taa, —jadya tuna Jesúsra acuare.

Tumetu ijahua cuanara quijahuatishajacacuare tumeque
ecuita ecitse. Tatse quejaque cuinanatsu tuna cuchi cua-
naju nubibarecuare. Dutya cuchi cuana ijahuaqui cuanaque
tuna tsajajayaque pacacadirucuare bei tihuesu baruda eque.
Beiju pacacatsu tuna huiditerecuare. ³³ Cuchi cuana naru
juya cuanaratu bacuare jadya juyaju. Ejecutana tuna tsa-
jajaterecuare epu ebariju. Tuhua judirutsu tuna cuatsabiji
adirucuare dutya eje bucha juhuaque, ijahua cuanara qui-
jahuatishayaque ecitse eje bucha quijahuatijacae juhuaque.

³⁴ Jadya bahue juatsutu dutya jujeri ecuita cuana tumeque epu juque cuacuare Jesús queja. Batitsu tunajatu aticuare:

—Dirucue rehuaque, —jadya tunajatu Jesús aticuare.

9

Jesúsra ajebaecuaque ajeshacuareque

(Mr 2.1-12; Lc 5.17-26)

¹ Jadya juatsutu Jesús nubicuare cuaba ebariju, bei yueque macare carequeti ishu, tuja epuju judiru ishu. Judirucualetu Capernaumju, tuque aniqui epuju. ² Tsunuda juatsu ama cuitadyatu ecuita cuanara dujuacuare ecuita ajebaecuaque tu-aqueja. Tumeque ecuitatu jaracuare ujejeda cuanaque huesa ishuj. Ujejedaque dujuqui cuanara Jesúsra ajebaecuaque ea-jeshauque ejeneyaque adebatsu tujatu jadya ajebaecuaque acuaire:

—Cacasaticue, tata. Micue jucha cuana tu amena eapupasha, —jadyatu Jesúsra acuaire ajebaecuaque.

³ Jadya juyajutu cacuatsashati bahuityaqui tuhua jucuaire cuanara jadya inime tupucuare:

—Riyaqueri Yusu tsehue beta tupu cabatiya. Yusu tujatu ijillahuanaya. Ni ejeradya jutidyatu jucha cuana eapupashau, Yusura peadya camadya, —jadya tunajatu inime tupubarecuare.

⁴ Jesústu bahuedya jucuaire tunara eje bucha inime tupuyaque.

—¿Eje bucha juatsu tuque micuana jadya inime tupuya: “Yusu tujatu ijillahuanaya” jadya? Jida ama tuque micuana inime tupuya. ⁵ Era ni aje baecuaque eau: “Micue jucha cuana tu eapupasha” jadya, eadebau ama tuque micuana ecue casa aniyaque, eapupasha, apupashama jadicue ejitaju ama tibu. Era ni eau: “Netitsuracue. Ajecue”, tumeque ura cuitadya tuque micuana eadebau ecue casa aniyaque, ajebaecuaque juneniyaju baya tibu. ⁶ Tuque juneniy baatsu micuana bahue juya ecue tumbaedy a riyaque yahuaju jucha cuana apupasha ishu casa aniyaque, —jadya tujatu ecana acuaire.

Tumetu Jesúsra acuaire ajebaecuaque:

—Netitsuracue. Piruricue micue jara ishuque. Dirucue micue etareju, —jadya tujatu acuaire.

⁷ Jadya ahuaaju cuitatu ecuita netitsuratsu tuja etareju dirucuaire. ⁸ Ecuita jetiama capetatiya cuanaquetu jadya baatsu anajacatacuare. Pureama tuna Yusu acuaire.

—¡Dyaque jida, casada taa Yusu! Riyaque ecuita Jesús tujatu tyahua casa ujejeda cuanaque chachane ishu, tumbaedy a jucha cuana apupasha ishu, —jadya tunajatu acuaire.

Jesúsra Mateo tuatsehue juneni ishu ihuaracuareque
(Mr 2.13-17; Lc 5.27-32)

⁹ Ecuíta ajebaecuáque ajeshatsutu Jesús dirucua-re tuhuaque. Diruyara tura ique badirucua-re Roma juque enaruquiá ishu chipiru tsuje bacayaque juaniyaju. Ique Mateo bacani. Ique enaruquiá ishu chipiru tsuje baca puji jucuare. Tuhuadya tura isaracuare:

—Eatsehue junenicue, —jadya Jesúsra acuare.

Jadya ahuaju netitsuratsu Jesús tsehue junenitibunecuare.

¹⁰ Ejetsunue juatsu amatu Jesús ecue etareju araaraa-punacuare tura mepehua cuana tsehue. Tuhuatu jucuare-nya enaruquiá ishu chipiru tsuje bacaqui cuanaque, umae bi-jidamadurataya cuanaque jadya. Dutya ecuana mesaju Jesús tsehue araacuare. ¹¹ Tume ecuana fariseo cuanara bacuare. Baatsu tunajatu acuare tura icuene mepehua cuanaque:

—Riyaque ecuíta cuana ri bijidamadurataya cuanaque. Micuana Bahuityaqui-quetu araarataqui ama enaruquiá ishu chipiru tsuje sitaqui cuana tsehue, tumbaedyá peya jucha arida cuana tsehue, —jadya tunajatu ecana acuare.

¹² Jesúsra tuna quisaratiyaju bacacuare.

—Chacha cuanaratu sareya ama casamati puji. Ujejeda cuanara camadyatu sareya. ¹³ Jadya tu ehúene Yusuja quisarati: “Dyaque jida micuana quiyuhue batsati aquí amere-cara aya, ique uu cuana iyetsu tyaishuque bucha ama”. Jida inime netupudirucue tume ehúeneju, pana adeba aishu. Juchama bucha cabatiya cuanaque sarera ama jehua. Ique jehua jucha arida cabatiya cuanaque jiteque, tuna inime cacua-retisha ishu, —jadya tujatu ecana acuare.

Eje bucha anitaqui amatu beruque inime eque, iyacua eque jadya

(Mr 2.18-22; Lc 5.33-39)

¹⁴ Jadya juatsutu Juan Ecuíta Cuana Utsaqui tsehue junenicua-re cuanara Jesús jipeticua-re. Jipetsu tunajatu bacaduracuare:

—Ecuana ecuana arama quibeti bahue, Yusu muiyaque cabamereti ishu. Tumbaedyatu fariseo cuana jadidya juya. Mira mepehua cuanaque bacue arama quibeti baecua. ¿Eje bucha juatsu? —jadya tunajatu Jesús acuare.

¹⁵ Jesúsra tuna quemitsacuare:

—Caquemitiyaju cuaishu ecueja cuanaque tuna peya inime juya ama caquemitihuaque tuna tsehueju. Tuna que-jaque dujutanahuaju piisi tuna arama quibetiya. Tumbaedyatu ecue cuanaque; ique cuanucahuaju piisidya tuna arama quibetiya.

¹⁶ “Ni ejeratu camisa siri sipiya eraca iyacua tsehue. Jadya ayaque juatsutu nacatatsu eraca iyacuaque dyurutanatsu camisa siri echajatanau. Chajatanayaque juatsutu camisa beru juhua bucha dyaque jidama ejuu. ¹⁷ Tumbaedyatu ishataqui ama tupari sasana ishuque sura siri cuitaju. Tupari sasanayaratu epututashau sura siri. Tumetu eaputau sura, tupari jadya. Jadya tibudyatu tupari sasana ishuque sura jida iyacuaaju ishataqui. Tumetu jidadya juya. Aputaya ama tupari ni sura, —jadya tujatu ecana acuare.

(Riyaque cuatsabiji tsehue tuna Jesúsra bahuityacuare. Eje bucha anitaqui amatu beru inime israelita cuanara bahuityacuare eque, iyacuaque tura cuitadya bahuityaya eque jadique.)

Jairora Jesús jipeticuareque

(Mr 5.21-24; Lc 8.40-42)

¹⁸ Jesús jadya quisaratijajutu peadya ecuanaja huarajira jipeticuare. Jipetitsutu Jesúsja yacuaaju nuyucuare. Isaracuare tuja tuque:

—Nerecabacue ique. Ecue ebacujunatu iyacua cuitadya majuhua. Mira camadyatu enityatsuranucau. Mique ecue etareju cuaatsu mira jabatsu camadyatu chacha enetit-suraucau, —jadya tujatu Jesús acuare.

¹⁹ Jadya ahujutu Jesús cuacuare tuatsehue. Ecuana dyadi Jesúsra mepehua cuanaque ecuana cuacuarenya tatse tsehue.

Jesúsra epuna ujejedaque chachanecuareque

(Mr 5.25-34; Lc 8.43-48)

²⁰ Ecuana huarajija etareju cuaya tsunumeetu epunara Jesús etibene eque jipeticuare. Ujejedaquetu epuna jucuaire. Peadya tunca beta earacana maratu amena nerecada, uje-jeda jucuaire. Ebacuatate tujatu jidama jucuaire; ami tujatu jucuairenya jutidya. Jipetitsu tujatu jabacuare Jesúsja unaju ebebacuaaju ehuejitaque. ²¹ Tujatu inime jucuaire: “Tura jutuyaque jabatsu chacha juya” jadya. ²² Tibene bajiyu aatsutu Jesúsra bacuaire epuna. Isaracuare tuja tuque:

—Cacasaticue, mama. Chachami juhua, mira era chachaneya que pana ejene ahua tibu, —jadya tujatu acuare.

Tura jadya aya tsehuedyatu chacha jucuaire.

Jesúsra Jairoja ebacujunaque emajuque chacha nityatsuranucacuareque

(Mr 5.35-43; Lc 8.49-56)

²³ Junaticuare ecuana huarajija etareju. Junatitsu tuque ecuana tuhua cuanaque siccada juyaju bacanaticuare. Dudududu puji cuanara emajuque papati ishuque duduyaju ecuana bacanaticuare. ²⁴ Jesusratu tuhua cuanaque acuare:

—Necuinanacue rehuaque. Dyaque peya inimetu jutaqui ama. Tumeque ebacujuna piji tu majuma. Tahuiya jutidya tuque, —jadya tuna Jesúsra acuare.

Jadya bacatsutu ecuita cuanara ijaribacuare, tunara yuneri cuitadya emaju bahua tibu. Ecanajetijacatu ebacujuna piji jucuaré. ²⁵ Jesúsra tuna cuinanashacuare. Tuna cuinanashatsutu nubiticuare ebacujuna piji emajuque jarayaju. Emetucuju tujatu ebacujuna piji emajuque inanaticuare. Inayajutu ebacujuna piji chacha netitsuracuare. ²⁶ Duya tuque amaca aniya cuanaque tuna bahue jubarecuare Jesúsra emajuque chacha nityatsuranucahuaque.

Jesúsra beta shuhuique ecatsé capetishacuareque

²⁷ Jesús tuhuaque cuinanayajutu beta shuhuique ecatsé tupujudya quiqueajecuare.

—¡Jesús, miquemi Yusuja Emepeque, David eque ejuracanaque! ¡Nerecabacue taa yatse! —jadya tatsejatu quique eque acuare.

²⁸ Etareju nubinatihuajutu shuhui ecatsé jipeticuare. Tatsé jipetihuaju tujatu ecatsé bacaduracuare:

—¿Ejeneyadya metse era ecapetishauque?

—Jejee, Yatse Cuatsashaquique. Ejeneyadya tuque yatse mira jadya eauque, —jadya tatsejatu acuare.

²⁹ Jadya aatsu tatse Jesúsra yatucaju jabacuare.

—Metsé era capetishayaque ejeneya tibu, capetiyadya metse, —jadya tatse Jesúsra acuare.

³⁰ Tura jadya aya tsehue cuitadya tatse jida capetaticuare. Jadya aatsu tatse Jesúsra cuatsashacuare tatse cacuejati ishú ama:

—Necuejaume ni ejequedya jutidya metse eje bucha capetatie juhuaque, —jadya tujatu ecatsé acuare.

³¹ Tuhuaque cuinanatsu piji cuitadya tatsejatu cuatsabiji acuare duya tumeque emajacaju Jesúsra tatse eje bucha ahuaque.

Jesúsra quisarati baecuaque quisaratishacuareque

³² Tatse cuinanaquenayajutu ecuita cuanara becuare ujejedaque. Tumeque ecuitatu quisarati baecuaque jucuaré; ijahuara jadya amereyaquetu jucuaré. ³³ Tumetu Jesúsra quisarati baecuaque ijahua queja jacamerecuare. Jacamerehuajutu ecuita quisaratitibunecuare. Quisaratiya bacatsutu tuhua jucuaré cuanaque anajacatacuare.

—¡Bama rique ecuanaja riyaque yahua Israelju riyaque ecuita buchique! —jadya tuna jucuaré.

³⁴ Jadya baatsutu fariseo cuanaja juticuare ama inimeju Jesúsra Yusuja casa tsehue jadya ayaque.

—Satanás ijahua cuana cuatsashaquique tu tuatsehue. Jadya tibudya tujatu casa aniya ijahua cuana ijehuecuina ishu, —jadya tuna jucuaire tuna camadya jutidya.

Jesúsra ecuita cuana nrecada bacuareque

³⁵ Jesústu junenicuare dutya epu cuanaju, tumbaedyá japada epu achaacha cuanaju. Bahuityajacacuare ama tujatu ecana caradati ishuque etare cuanaju, epu tura cuajiya cuanaju jadya. Jidaque quisarati tujatu cuejacuare, Yusura eje bucha narue adadiyaque. Dutya ujeje tsehue ujejeda juya cuanaque tujatu chachane bahue jucuaire. ³⁶ Bacuaretu ecuita jetiamaque. Nrecada, ecapeya inimeti jadya tujatu ecana bacuaire. Uhuisha cuana aija naruquima juneniyaque bucha tujatu ecana bacuaire. ³⁷⁻³⁸ Jesúsra ecuaana acuare:

—Riyaque ecuita cuana ri trigo amena ejahuane buchique. Aniya jari tuna jetiama Yusuja quisarati bacama cuanaque. Eje uma ama tu quisarati tsapequi cuanaque. Nebacacue Yusu. Pacuadishatu jetiama ecue quisarati cueja ishu cuanaque. Tee metsera mere puji cuana trigo racara ecuadishau bucha, jadidyatu Yusura tuja cuanaque cuadishaya tuna tuaqueja catyatishamere ishu, —jadya ecuaana Jesúsra cuejacuare.

10

Jesúsra tura mepehua cuanaque tuja casa tyacuareque

(Mr 3.13-19; Lc 6.12-16)

¹ Jesúsra ecuaana sitacuare ecuaana peadya tunca beta earacana tura mepehua cuanaque.

—Ijahua cuana ijehuecuina ishu micuana tyaya casa. Tumbaedyá micuana cuatsashaya ejeque ujeje, eje bucha ujeje tsehue cuanaque chachane ishu, —jadya tura ecuaana acuare.

² Ecuaana ecuadisha cuanaque ecuaana peadya tunca beta earacana jucuaire.

Simón (Icuene ebacaniju atanahuaque; peya ebacani tujatu “Pedro” jucuaire.)

Andrés (Simón tsehuequique)

Santiago

Juan (Santiago tsehuequique; tatse tatse jucuaire Zebedeoja ebacuaque ecatse.)

³ Felipe

Bartolomé

Tomás

Mateo (Ique icuene jucuaire enaruquija chipiru sitaquique.)

Santiago (Alfeoja ebacuaque)

Tadeo

⁴ Simón (Tuquetu Roma juque enaruquique bijidamaduracui juyaque jucuaire.)

Judas Iscariote (Jesús inamerequi judadicuareque)

Jesúsra tura mepehua cuanaque tuja quisarati cuejara cuadishacuareque

(Mr 6.7-13; Lc 9.1-6)

⁵ Ecuana tura mere amerehuaju cuama jariju ecuana Jesúsra cuejacuare:

—Necuaume israelita ama cuana aniya queja amaca ni samaritano cuana aniya epu cuanaju. ⁶ Necuejaticue Yusuja quisarati ecuanaja ata israelita cuana camadya. Tuna tuna uhuisha cuana eaputa buchique. ⁷ Necuejacue ecana, amena tu japadama huecaca Yusura dutya narudadiyaque. ⁸ Nechachaneticue ujejeda cuanaque. Nenityatsuraticue emaju cuanaque. Nechachaneticue ujeje dyaque jidamara biti ririshaya cuanaque. Ijahua cuanara quijahuatishaya cuanaja ijahua cuana necuinanashaticue. Era micuana tsujema tyaya riyaque casa cachachaneti ishuque. Jadya tibudya micuanara netsujebacame ujejeda cuanaque chachanetsu.

⁹⁻¹⁰ “Micuanara tsahuatiya cuanaradya micuana tsujema tyatsaya micuanara ai sareya cuanaque, micuana Yusuja mere juyaque baatsu. Jadya tibudya necadujutiume chipiru ni peya ai etsujequi tsehue cacualetiquere ishuque. Asicada juatsu catacati ishu jutu ishuque necadujutiume. Zapato jutuyaque cuita camadya necadujuticue. Necadujutiume shitara ni sari. Dutya micuanara sareyaquedya micuana tyataya.

¹¹ “Ejeque epuju junatitsu banatimetseque etareju nenubinaticue etare metsera jida batsayaju camadya. Tuhuadya neanicue tuja etareju peya epuju dirunucaya tupu. ¹² Nubinatitsu tumeque etareju aniya cuanaque neisaranaticue. ‘Yusura inime tsapema neamerecue’, jadya ecana neanaticue. ¹³ Tumeque etareju cuanara ni micuana jida batsaya, micuanara cuejayaque ni tuna jida tsehue bacaya, tume tuna jida inime tsapema juya micuanara isaranatihua baedya. Jidama ni tunara micuana batsaya, micuanara cuejayaque ni tuna bacacarama aya, tume ecana pureama ni inime tsapema jadya paju ama. ¹⁴ Tunara micuana batsacarama ayaju, micuanara cuejayaque bacacarama ayaju, masadama necuinanacue tuhuaque. Cuinanayaque neitataquenacue muru micuanaja ehuachi juque, ‘Aine yatse micuana tsehue juma’, jadya tuna ayaque. Tunadya tuna inime metse, Yusuja quisarati bacacarama ahua tibu. ¹⁵ Tere huecaca juetihuaju tuna Yusura dyaque

nerecaturabuque tuja quisarati bacacarama juya cuanaque. Sodomaju, Gomorraju anicuare cuanaque tuna dyaque jidama jucuare. Jadya ama bucha tuna tumeque huecaca juetihujaju dyaque ama canerecatibuque, micuanara quisarati cuejayaque bacacarama ahua cuanaque bucha ama, —jadya ecuana Jesúsra acuare.

*Jesucristo ujeu baqui cuanara tuja cuanaque nerecat-
urabuqueque*

¹⁶ Jesúsra ecuana bahuityanucacuare:

—Pana ijacabaca neacue. Cuadishaya micuana ecue quisarati cuejara. Cacuarehuanaticara nejuume, arepa tunara micuana jidama aya ama bucha. Micuana micuana uhuisha iba cuana ducu buchique. Jida inime netupucue micuana ai jutiyaju. Cuejayaque ecana necuejacue jida inime tsehue, yana ujeta ujeta tsehue ama. ¹⁷ Necanaruticue. Ecuata jidama cuanara micuana huaraji cuana queja inamerebuque. Catsacatsa tunara micuana amerebuque caradati ishuque etare cuanaju. ¹⁸ Dujubuque tunara micuana enaruqui cuanaja yacuaju, ecuari cuanaja yacuaju eaqueja ecatyati baatsu. Tume tuque micuanaja emajaca anibuque ique eje buchique tuna cueja ishu, israelita cuana tumbaedyá israelita ama cuanaque jadya. ¹⁹ Huaraji cuanaja yacuaju dujutayaju jidama inime nebaume quicueneti ishu quisarati aishu, ni eje bucha cuejae aishu. Quisarati ishuque ura juetihujaju, Yusura micuana huecashabuque micuana eje bucha quisaratie juishu. ²⁰ Micuanara inime tupuya eque ama micuana quisaratibuque; micuanaja Tataja Espiritura inime tupumereya eque micuana quisaratibuque.

²¹ “Ecue cuanaque tuna tunaja etareju cuanara cuitadya ijahue ijahue abuque. Iyemere ishu tunajatu huaraji cuana queja inamerebuque. Tuna tsehuequi cuanara cuitadya tuna huaraji cuana queja inamerebuque. Etata cuanaqueratu ebacua cuanaque cuitadya inamerebuque, ebacua cuanaquera bacue etata cuanaque. ²² Dutya jujerira micuana ujeu babuque, eaqueja ecatyati baatsu. Tereya tupu ejeque eaqueja nimee jujacayaque ama camadyatu Yusu queja judirubuque ni eje tupu tuque jakanuca ishu ama. ²³ Tunara ecue cuanaque baatsu nerecaturaya cabatitsu, nehuanacue peya epuju ecue quisarati cuejara. IQUE ECUITA junanucabuque, micuanara dutya ecuanaja ata israelita cuana ecue quisarati cuejatillama jarijudya.

²⁴ “Ique tunara baya bae, baedyá tunara micuana abuque. Ejeque cabahuityatiyaquetu tuque bahuityaqui que bucha emui ama jubuque. Mere puji bacue tuja patrón bucha mui bae ama atabuque. ²⁵ Cabahuityatiyaque tunajatu tuque

bahuityaqui que bucha baedya abunque. Mere puji tunajatu tuja patrón bucha baedya abunque. Iquepa Satanás, jadya tunara ijillahuanahua. Ecue inime tunara micuana micuana dyadi ijillahuanayadya, —jadya ecuana Jesúsra acuare.

Yusu camadya mubataqui que

(Lc 12.2-7)

26-27 Jesúsra ecuana bahuityanucacuare:

—Bajida nejuume ecuita cuanara eje bucha eauju. Dutya era etehua cueja ahuaque micuanara dutyaja ijacaju necuejacue. Dutya era bahuityahuaque micuanara peya cuana pana adebamere neacue. Dutya etehuaquetu ejitaju judadiya. Dutya ibedaquetu adebataqui judadiya. 28 Nemubaume micuana iyecara juya cuanaque. Arepa tunara micuana eiyeu ama bucha, aijama tunajatu casa ni ejeque ijahuaja etiquiju nudya ishu. Nemubacue Yusu camadya. Tuja peadya camadyatu casa aniya quiyeti ishu, tumbaedya ijahuaja etiquiju ejeque nudya ishu. Tura cuatsashaya eqe nejucue, arepa micuana ecuita cuanara jidama aya ama bucha.

29 “Yusuratu naruya dutya ai aniyaque. Upati huiri cuanatu tsujequi cuitaque ama. Beta chaitu catyati atanaya ficha patya cuesi tsuje piji. Jadya ama bucha tuna ecuanaja Etatara naruya, tunaja maju ishuque huecaca iyahuaque juetiya tupu, tuna emaju yahuaju pacacaya tupu. 30 Yusuratu adebaya dutya eje bucha micuana judadiyaque. Turatu adebaya dutya, eje uma micuanaja iyucaju etsaru aniyaque. 31 Jutaquijudya bajida nejuume. Pusha ama cuitadya micuana Yusura naruya. Upati huiri cuana naruya bucha, dyaque jida tura micuana narujacaya ama.

Ecuita cuanaja yacuaju “Jesús jaque ique” jadya juya cuanaque

(Lc 12.8-9)

32 “Ejeque ni ecuita cuanaja yacuaju ‘Jesús jaque ique’ jadya cacuejatiya, eratu ecue Etata barepajuja yacuaju ‘Ecuique tume’ jadidya abunque. 33 Ejeque ni ecuita cuanaja yacuaju ‘Ique Jesús jaque ama’ jadya cacuejatiya, era dyaditu ecue Etata barepajuja yacuaju ‘Ecuique ama tume’ jadidya abunque.

Jesúsja inime riyaque yahuaju cuanaque catibuqueque

(Lc 12.51-53; 14.26-27)

34 “¿Micuanaja ni tu inime juya, ique junahua baatsu dutya inime jidama cuanaque, cati jadya amena terehua bucha? Jadya ama tuque. Ique adeba baecua cuanaque tuna ecue cuana teshue cahuititsu catibuque. 35-36 Micuana

eaqueja catyatihua tibu, micuana micuanaja etareju cuanara cuitadya ujeu babuque. Ebacua cuanaqueratu etata cuanaque ujeu babuque. Ebacujuna cuanaqueratu ecua cuanaque ujeu babuque. Ebacuaque jahuane cuanaratu yahuiqueja ecua cuanaque ujeu babuque.

³⁷ “Arepa micuanaja etareju cuanaquedya iyuhueda ebau ama bucha, ique dyaque iyuhueda nebacue, tuna iyuhueda baya bucha iyuhuee ama; paanidya datse micuanaja tata, cuaa, bacua, bacujuna, ejeque micuanaja iyuhuedaque. Ejeque ecuita jutidya ni micuanaja dyaque iyuhueda, ique iyuhueda ebauque, tume micuana ecue jutaqui ama. ³⁸ Ecue yana equedya nejucue, arepa micuana canerecati, maju jadya jutaqui ama bucha, curusuju etata ejuu bucha. Ique jiteque iyetacara juyaju, iyetacarama juyaquetu ecue jutaqui ama. ³⁹ Micuana ni catehuatiya eaqueja ecatyatique eiyetauju, ejetsunue ama micuana anibuque. Tume micuana majutsu ni eje tupu Yusu queja judirubuque ama. Micuana ni ique jiteque ejenetsu jadya iyetaya, tume micuana Yusu quejadya anisiribuque, arepa micuanaja ecuita ririya ama bucha.

Pureama juishuque tyatabuqueque
(Mr 9.41)

⁴⁰ “Ejera ni micuana jida batsaya, tumbaedy a tunara ique jida batsaya. Ejera ni ique jida batsaya, tumbaedy a tunajatu ecue Etata Ique Cuadishaquique jida batsaya. ⁴¹ Yusuja quisarati cueja juya cuanaque tuna jidaque tyatanabuque. Yusuja quisarati cueja juya cuanaque jida batsaqui cuanaque tuna tyatanabuquedya jidaque, tuna tyatanabuqueque nucadya. Ecuita jida cuanaque tuna jidaque tyatanabuque. Tuna jida batsaqui cuanaque tuna tumeque jidaque nucadya tyatanabuque. ⁴² Micuanara ni ecue cuanaque tsahuaya, babuquedya tuque micuana dyaque jidaque, arepa micuanara dyaque jetiedya cuanaque tsahuaya ama bucha. Arepa tuna ena cuana pijidya jutidya iji ishu tyaya ama bucha micuana Yusura tsujetyabuquedya, —jadya ecuana Jesúsra cuejacuare.

11

Juan Ecuita Cuana Utsaquira Jesús bacaduramerecuareque
(Lc 7.18-35)

¹ Jesúsra ecuana peadya tunca beta earacana tume cuanaque cueja ishuque bahuitya amena ahuaju ecuana dutyadya Jesús tsehue cuacuare tuhuaque, tuja quisarati cueja, bahuitya jadyara tumeque yahua epu cuanaju.

² Juan Ecuíta Cuana Utsaquiquetu amena etare apudaju erisi neticuare. Tuhuaquedyatu bahue jucuare Jesús ai juyaque. Jadya bacatsu tujatu tura mepehua cuanaque cuadishacuare Jesús queja. ³ Tuhua junatitsu tunajatu bacaduracuare Jesús, Juanra bacaduramerehuaque:

—¿Midyami Mesías, Yusuja Emepeque rehua junataquique? ¿Ihuaya jari ni taa ecuana peya? —jadyatu Juanra cuadishahua cuanara Jesús bacaduraticuare.

⁴ Jesúsra tuna quemitsacuare:

—Micuanaratu bacahuadya era ai cuejayaque. Bahuadya micuanara ique ujejeda cuanaque chachane juyaju. Dirunucatsu Juan necuejadirucue micuanara bahuaque, bacahuaque jadya. ⁵ Necuejacue era shuhui cuanaque capetatishayaque; rudurudu cuanaque rena jida ajeshaya; pusesera ririshaya cuanaque rena chachaneya; isahue cuanaque rena quijacabatishaya; emaju cuanaque rena nityatsuranucaya; nerecada cuanaque rena Yusu queja judiru ishuque quisarati cuejaya. ⁶ Dyaque jida paju ique dyaque adebaquique, eaqueja nimee jujacayaque ama jadya, —jadyatu Jesúsra Juan cuejamerecuare.

⁷ Jadya cuejahuaaju tuna dirunucacuare. Tuna diruhuaajutu Jesúsra cuejatibunecuare Juan eje buchique:

—Jetiama micuana cuachine yachiju Juanra cuejayaque ijacabacara. ¿Ai tuque micuana batichine tuhua? Micuanaratu adebahuadya Juanra ejenecara, ejenecarama jadya ama Yusuja quisarati ahuaque. Shita cuejijira peya queja huanati, peya queja huanati eau bucha ama tuque. ⁸ Bacaduranucaya micuana era. ¿Eje buchique ecuita batiya bucha tuque micuanaja inime juchine? Bahuedya micuana, tuque ejutuqui jida piji tsehue ama ecajututique. Ejutuqui jida piji tsehue ecajututi cuanaque tuna chipiruda cuanaja, ecuari cuanaja etareju aniya. ⁹ Bacaduranucaya micuana era. ¿Ai bucha adebatsu tuque micuana batichine? ¿Yusu equeque cuitadya quisarati cuejaquique ni taa tuque micuana batichine? Pusha amadya Juan tu Yusu equeque cuitadya quisarati cuejaquique. Yusratu tuque mepecuare israelita cuana quisarati cueja ishu. ¹⁰ Jadya tu Yusuja quisarati ehue:

“Cuadishabuque tuque mique cuadishama jariju ique merequique.

Turatu ecuita cuana bajejebuque, tunaja mira quisarati cuejadadibuqueque bacatibune ishu”.

Juan tu Yusuja quisarati cuejaquique. ¹¹ Riyaque micuana cuejaya. Juan Ecuíta Cuana Utsaquiratu quisarati cuejahua dyaque saretanayaque, beru yuequedyá quisarati cueja puji

cuanara cuejahlua buchique ama. Jadya ama bucha iyacua ecue cuanara cuejayaque tu dyaque jidaque, Juanra cuejacuare buchique ama. Jadidya tuque, arepa micuanara ecue cuanaque jetiedya, aishuque ama jadya baya ama bucha.

¹² “Juanja cuejama jarijutu ni ejera buchique cuejahlua ama, inime cacuaretiya cuanaque iyacua eque Yusu queja eje bucha judirue juishuque. Iyacuatu era cuejaajenucaya tura quisarati cuejahluaque nucadya. Cuejayaju bacatsutu eje umadya pureama tsehue Yusu queja catyatiya. Casada dyaidama cuanaque pureama tsehue ijahue aya tupu ecatiu bucha, jadidya tuna pureama tsehue eaqueja catyatiya. ¹³⁻¹⁴ Moisésra, Yusu equeque quisarati cuejaquique cuanara jadyatu cuejacuare ejeque huecaca Yusura iyacua inime eque narutibuneyaque. Ejeque cuanapa Elías Yusu equeque quisarati cuejaquique junabuque, Yusuja Emepeque junama jarijudya. Juan tu tumeque Elías buchique, arepa micuanara ejenecarama ahua ama bucha. ¹⁵ Micuana quijacabati aqiu juatsu, nebacacue.

¹⁶ “¿Ai baetu iyacua aniya cuanaque? ¿Ai tsehue beta tupu jadya tuna eau? Tuna tuna peya cuanara cuejaya eque jucarama juya. Ebacua cuana ijahue juya bucha jutidya tuna, peya ebacua cuanara ijahue aquerecara ayaju ijahue jucarama juya bucha. ¹⁷ ‘Yusura tuaqueja judiru ishuque quisarati cuejamereyaju bacatsu, pureama nejucue’, jadya ayaju bacatsu, tuna pureama jucarama juya. ‘Peya inime micuanaja jucha cuana aniyaque caadebatitsu nejucue’, jadya ayaju bacatsu, tuna peya inime jucarama juya. Ebacua cuana tuna tsehue tupu cuanara rauta duduyaju ijahue jucarama ejuu bucha tuna. Ebacua cuana tuna tsehue tupu cuanara peya inimeque jeru ayaju pacarama ejuu bucha tuna. ¹⁸ Iyacua tunara yatse bijidamadurahua Juan, ique jadya. Juantu anicuare quibeti neri juyaque, ecuita cuana tsehue araara, ijiji jadya juyaque ama. Tuque jadya juya baatsutu ecuita cuanara ahua, tuquepa equijahuati, jadya. ¹⁹ Tuequedya IQUE ECUITA junahlua. Ique bacue earaqui ara, uva nacaca esanashaque iji jadya juya ecuita cuana tsehue. Ique jadya juya baatsu tunara dajicada, nijuqui arida jadya aya. Iquepa ecuita cuanara bijidamaduraya cuanaja ecare; tumbaedy a quepa enaruquiya ish u chipiru sitaqui cuana tsehue casitatiya, jadya tunara aya. Era, Juanra jadya ayaque baatsutu ejitaju yatse betadya Yusura bahue amereya eque juyaque, —jadya tujatu ecana acuare.

*Inime cacuareticarama jucuar e cuanaque
(Lc 10.13-15)*

²⁰ Corazín, Betsaida, Capernaum epu cuanajutu Jesúsra acuare jetiama ni ejeque ecuitaja ataquique ama Yusuja casa bamereyaque. Arepa tuhua aniya cuanara tura ayaque bacuare ama bucha, cacuareticarama tuna inime jucuare. Jadya tibu tuna Jesúsra nereda atibunecuaré:

²¹ —¡Dyaque nrecada micuana jubuque, micuana Corazínju, Betsaidaju jadya aniya cuanaque! Tiro, Sidón jadyaju anicuare cuanaque tuna dyaque jidama jucuare. Jadya ama bucha, baquena ni tuna juquena juhua Yusuja casa era micuana iyacua bamereyaque, cacuaretiquena tuna inime juquena jucuare. Jutuquena tunajatu jucuare ejutuqui sehuedaque, ai tiru, muru tsehue iyucaju casehueti jadya, inime cacuaretihua jadya ata ishu. Micuana micuana cacuaretihua ama inime, arepa era Yusuja casa tsehuedya ayaju bahua ama bucha. ²² Riyaque micuana cuejaya. Ejeque huecaca Yusura jidama cuanaque nrecaturadadiyaju; tura micuana dyaque nrecaturabuque; Tiroju, Sidónju cuanaque jucuare dyaque tura micuana nrecaturabuque. Micuanajatu anicuare emajaca ecue casa baishu. Tunaja baishuque aijama jucuare tibu micuana tuna bucha dyaque micuana nrecada jubuque. ²³ Micuana Capernaumju aniya cuanaque, jida bucha datse micuana cabatiya. Dyaque inime metseque bucha datse micuana cabatiya. Barepaju etsurashatau bucha datse micuana cabatiya. Ijahuaja etiquiju jutidya micuana nudyatabuque. Sodomaju anicuare cuanaque tuna dyaque jidama jucuare. Jadya ama bucha baquena ni tuna Yusuja casa juquena juhua iyacua micuana era bamereyaque, cacuaretiquena tuna inime juquena jucuare. Pana aputashatana ama tunajatu epu juquena jucuare. ²⁴ Riyaque micuana cuejaya. Tere huecaca juetihuaju micuana Yusura dyaque nrecaturabuque. Sodomaju anicuare cuanaque tuna dyaque jidama jucuare. Jadya ama bucha tuna tumeque huecaca juetihuaju, dyaque ama canerecatibuque, micuanara quisarati cuejayaque bacacarama ahua cuanaque bucha ama, —jadya tuna Jesúsra acuare.

Jesús tu ecuana jucha cuana secaquique
(Lc 10.21-22)

²⁵ Jesús tuja Etataque barepaju tsehue quisaraticuaré:

—Tata, miquemi barepa, yahua jadya aniyaque metseque. Bahue, inimequi bucha cabatiya cuana queja ecabameretiquemi, mique eje buchique adebacara, bahue jucara ebari juya cuana queja cabameretihua. Yusurupai mique aya, mique jadya juhua tibu. ²⁶ Jadidya tu juya,

mira jadya amerehua tibu, Tata, —jadyatu Jesúsra acuare Etataque.

²⁷ Jadya juatsu tujatu isaranucacuare tuhua cuanaque:

—Ecue Etatara ique mepehua tuque cuarequi rehua ecuita cuana ejitaju amere ishu. Ecue Etatara peadya camadya ique pana adeba aya. Ique tuja Ebacuaque. Era cuita camadya tuque ecue Etata pana adeba aya. Tumebaedyatu adebaya era adebamerehua cuanara. ²⁸ Yanacana cuita micuana cacasatiya ecuita cuanaja cacuatsashati eque anitsu Yusu queja judiru ishu. Ai bicueda cuitaque abutsu ereme ejuu bucha micuana. Eaqueja necatyaticue. Era micuana secaya micuana inime tsapemere, bajitura jadya ayaque. ²⁹ Catsahuamereti ishu ique neacue micuana remeshaquique buchique dujuquere ishu. Ique eque necabahuityaticue Yusu queja judiru, tuja biji eque ani jadya juishuque. Ique jida, casumiti baecuaque. Eaqueja catyatitsu micuana ecabutique quiyabutyatitsu canajaraya bucha ecabatiu. ³⁰ Casaturaya micuana era, era amereyaque micuanaja aishu. Dyaque jida inime tsapema micuana amereya. Era micuanara bicuedaque abuyaque jatada tsehue ecuareu bucha tuque, —jadya tuna Jesúsra acuare.

12

Jesúsra mepehua cuanara trigo esa canajara huecacaju sepi-ajecuaque

(Mr 2.23-28; Lc 6.1-5)

¹ Tume patyatu Jesús cueticuare euhua cuana eque canajara huecacaju. Aridatu trigo euhuaque jucuaque ejuane, amena racataqui. Ecuana tura mepehua cuanaque ecuana tuhuadya jucuaque tuatsehue. Aracara ecuana jucuaque. Aracara juatsu tuque ecuana trigo esa sepitsu etsucaca mucuajecuaque. ² Umae fariseo cuanara baatsu tunajatu Jesús cuejacuaque:

—Mira mepehua cuanaquetu Moisésra cuatsashacuare eque ama juya. Meredy a tuna juya etsucaca cuana sepi, mucu jadya juyaque. Meretu jutabaecua canajara huecacaju, —jadya tunajatu cuejacuaque Jesús.

³ Jesúsra tuna quemitsacuare:

—Neadebacue ecuanaja ebaba David emuique jucuaque. Tuque, tuatsehue cuaya cuanaque jadya tuna aracara jucuaque. ⁴ Davidtu Yusuja etareju nubicuare. Nubitsu tujatu Yusuja ishu eiyaque pan cuana inacuaque. Inatsu tujatu aracuare. Arepa tuja, tuatsehue cuaya cuanaja jadya arataquima paju ama bucha tuna aracuare, pae cuanaja cuita camadya arataquique. Jadya ama buchatu

Yusu cahuaishacuare ama, tumeque pan aratsu. ⁵ Ni dyaditu pae cuanara Yusu cahuaishaya canajara huecacaju Yusuja etareju mere juyara, arepa Moisésja cacuatsashati eque mere huecaca ama paju ama bucha. ⁶ Era cuejayaque pana ijacobaca neacue. Yusuja etareju mere juya cuanajatu canajara aijama canajara huecacaju, dyaque di taa tu ecue cuanaque canajaraya amadya. ⁷ Ehuene tu Yusura quisarati acuareque: “Dyaque jida micuana quiyuhue batsati aqui amerecara aya, ique uu cuana iyetsu tyaishuque bucha ama” jadya. Micuanaratu adebataqui ama baya eje buchique jadique quisarati. Adebaquena ni micuana juquena juhua, tume tuque micuana eje bucha jumaque ecajuchati mique jadya aquena ama juhua. ⁸ IQUE ECUITAJatu aniya cacuatsashati canajara huecacaju ai juishuque, —jadya tuna Jesúsra acuare.

Jesúsra ecuita emetucu majuque chachanecuareque
(Mr 3.1-6; Lc 6.6-11)

⁹ Jadya juatsutu Jesús tuhua caradati ishucue etareju nubinucacuare. Canajara huecacajutu jadya jucuare. ¹⁰ Ecuita emetucu majuquetu tuhua jucuare, tumbaedyá Jesús ujeu baqui cuanaque. Tunaratu dadicara acuare Jesús eje bucha ejuuque tuque jidama aishu. Jadya tibu tunajatu bacaduracuare jadya:

—¿Chachanetaquidyatu ujejeda cuanaque canajara huecacaju?

¹¹ Jesúsra tuna quemitsacuare:

—Meredyá tu uu caniju pacacahuaque cuinanasha. Jadya ama bucha ejeja ni micuanaja cani dedaju uhuisha epacacau canajara huecacaju, ecuinanashaudya tuque micuanara, arepa ecuanaja cacuatsashati eque tumeque huecaca mere jutabaecua ama bucha. ¹² ¡Ecuita tu dyaque inime metseque uhuisha bucha ama! Jadya tibutu ecuitaja ishú jidaque ataquidya canajara huecacaju, —jadya tuna Jesúsra acuare.

¹³ Tumetu Jesúsra ecuita emetucu majuque isaracuare:

—Rirucue micue ebi, —jadya tujatu acuare.

Ebi riruya tsehuedya cuitadya tujatu emetucu chacha jucuare peya emetucu bucha. ¹⁴ Jadya baatsutu fariseo cuana cuinanaquenacuare. Tuequedya tunajatu inime bajejeti-bunecuare Jesús iye ishú.

Isaiasra icueneta cueja Jesús eje bucha judadiyaque acuareque

¹⁵ Tunara iyecara ayaque caadebatitsutu Jesús tuhuaque dirucuaré. Jetiama ecuitaratu tupujudya acuare. Jesúsratu chachanecuare dutya ujejeda cuanaque ecuita jetiama ducuque. ¹⁶ Cuatsashacuare tujatu ecana:

—Necuejaume ni ejeque buchique era eje bucha ahuaque.

¹⁷ Berutu Isaías Yusu equeque quisarati cuejaquira icueneta cueja acuare Yusuja Emepeque junatsu eje bucha judadiyaque. Jesús jadya juhuajutu, tura cuejacuare bae cuitadya jucuare.

¹⁸ “Riyaque ri ique merequique, ecue Emepeque.

Iyuhueda tuque ecue.

Ique dyaque pureama tuatsehue juya.

Ecue Espiritutu tuatsehue jubuque.

Ique Merequiratu dutya queja aniya cuanaque cuejabuque ecue yatucaju jida, tuyu juishuque.

¹⁹ Quicueneticaramatu jubuque.

Quiquebuque ama tujatu peyaja icuenena ishu.

Junenibuque amatu epu quini eque quicueneti tsahua ishuque sare juyaque.

²⁰ Ecapeya inimetique, casadamaque jadyatu shita penuque buchique aishu ama buchique.

Jadya ama buchatu ecue Emepera casaturadadiya ecasatereque.

Eaqueja pana catyati juma cuanaque tuna tsahuabuque, eaqueja nimeedya jutidya juaje ishu.

Arepa ecana shita penuque bucha paju ama bucha, arepa ecana ude ticuhuieque hueca bucha paju ama bucha, era tuna casaturabuque dutya tere huecaca juetishayaju tuyu aya tupu.

²¹ Dutya queja aniya cuanaque tuna tuaqueja catyatibuque”, jadyatu Yusu jucuare beru tuja quisarati puji Isaías eque.

Jesús tunara “Satanásja casa rejari aniya” jadya acuareque (Mr 3.20-30; Lc 11.14-23; 12.10)

²² Jesús queja tunajatu dujucuare ecuita ijahua cuanara quijahuatishayaque, shuhuique quisarati baecuaque jadya ijahua cuanara amereyaque. Jesusratu capetatisha, quisaratisha jadya acuare. ²³ Jadya baatsutu dutya ecuita cuana anajacatacuare. Cabacaduratitibunecuare ecana:

—¿Jesús ni tu David eque ejuracanaque, Yusura cuadisha ana acuareque ecuana jida inimeju cuinana ishu junabuque jadique? —jadya tuna jucuare.

²⁴ Fariseo cuanatu tuna jadya bacatsu jadya jucuare:

—¡Aama! Beelzebú ijahua cuana cuatsashaquique tu tuatsehue. Jadya tibudya tujatu casa aniya ijahua cuana ijehuecuina ishu, —jadya tuna jucuare.

(Beelzebú taa tu Satanás bacani nucadya).

²⁵ Jesusratu adebacuare tunara eje bucha inime tupuyaque.

—Jadique juatsu taa tu Satanás tuta tacadya jutidya pana cayuamaturati ejuu. Yahuaju dutya aniya cuanaque ni ecajaquetibareu cuarepe cuarepe tuna cama cati ishu, tuna camadya jutidya tuna ecattillatiu. Epuju cuanaque ni ecajaquetibareu cati ishu, tumbaedy a tuna ecayuamatiu; tumbaedyatu ejuu etareju cuanaque tuna cama catiyaque juatsu. ²⁶ Era ni Satanásja casa tsehue ijahua cuana eijehuecuinau, tume taa tu Satanás tuja cuana tsehuedya jutidya ecatiu. Tumetu ni ejeque ijahuadya jutidya tura cuatsashaya equ ejuu ama. Satanásja casa tsehue ama tuque ijahua cuana ije-huecuinaya. ²⁷ Micuanara ique aya, Beelzebúja casa tsehuepa ijahua cuana ije-huecuinaya jadya. Micuanara ni ejeneya era Beelzebúja casa tsehue ijahua cuana ije-huecuinaya, jutaqui ju ¿aia casa tsehue jatsutu ije-huecuinaya micuana tsehue juneniya cuanara? Micuanara Yusuja casa tsehue tunara ije-huecuinayaque ejeneya tibu, nejenecue era dyadi Yusuja casa tsehuedya ayaque. ²⁸ Yusuja Espiritura ique casa tyaya ijahua cuana ije-huecuina ishu. Jadya tibudya tuque micuanaja inime jutaqui “Riyaquedya ri Yusuja Emepeque”, idya micuanara ihuacuareque.

²⁹ “Ijahua cuana ije-huecuina ishutu icuene cuita tuna cuatsashaquique Satanás dutya tuja casa secataqui, ecuita dyaque casadaque tuja ai seca ishu icueneta risi ataqui bucha. Ejeque casa secamaja etarejutu eje bucha nubitaqui ama tuja ai aniyaque seca ishu.

³⁰ “Ejeque ecue ishu jidama quisaratiyaquetu ique ujeuque. Ique tsahua baecuara ique jidama aya. Tumequetu era mepeyaque dacashaajeya buchique.

³¹ “Jadya tibudya micuana riyaque cuejaya. Yusuratu jidama quisarati aya cuanaja jucha cuana eapupashau, eje bucha cajuchatie juya cuanaja. Jadya ama bucha Yusuja Espirituja ishu jidama quisarati aya cuanaja jucha tujatu apupasha nime ama. ³² Yusuratu IQUE ECUITAja ishu quisarati jidama ayaja jucha cuana eapupashau. Jadya ama bucha tujatu jucha cuana apupashabuque ama tuja Espirituja ishu cuita jidama quisarati aya cuanaja. Ejeque jadya quisaratiyaquetu dyaque nrecada jubuque riyaque yahuaju, tumbaedy majutsu, —jadya tujatu ecana acuare.

Ecacaju acui adebataquique

(Mt 7.16-20; Lc 6.43-45)

³³ Jesusratu isaranucacuare fariseo cuana:

—Acui ni jidaque, jidadya tujatu ecaca. Acui ni jidamaque, jidamadya tujatu ecaca. Dutya acuitu adebataqui ecacaju.

(Riyaque quisarati tsehue tuna Jesúsra huecashacara acuare. Ejeque eje bucha juya equetu adebataqui eje buchique ecuita jadicque).

³⁴ “Micuana micuana jii jii ama bacua bucha. Micuanadya micuana jidama; jadya tibu micuana jida quisaratitaqui ama cabatiya. Educuju ecuanaja inime tupu aniyaquedya tuque ecuanaja quisarati abahue. ³⁵ Ecuita jidaquetu jidadya quisaratiya, jidaque inime tuja educuju aniya tibu. Ecuita jidamaque bacue jidama quisaratiya, jidamaque inime tuja educuju aniya tibu. ³⁶ Era micuana riyaque cuejaya. Yusuja yacuaju inime bajeje ishú netititsu tuhua, micuana eje bucha juhuaque dutya cacuejatibuque eje bucha juatsu micuanara quisarati jidamaque ahua cuanaque. ³⁷ Micuanara cuitadya quisarati ahua equé micuana Yusura jidama jadya abuque. Micuanaja quisaratijudya micuana eje buchique cabameretiya. Jida ni micuana quisarati ahua, ‘Jida mique baya’, jadya micuana Yusura abuque. Jidama micuana quisarati ahua ju bacue, ‘Ecajuchati mique baya’, jadya micuana Yusura abuque, —jadya tuna Jesúsra acuare.

Yusu adeba baecua cuanara Jesús Yusuja casa ejitaju juishuque amerecara acuareque

(Mr 8.12; Lc 11.29-32)

³⁸ Tumetu umae fariseo cuanara, cacuatsashati bahuityaqui cuanara jadya jipeticuare Jesús. Jipetsu tunajatu isaracuare:

—Ebhauityaquique, acue ai bapeque inimeradya jutidya, ecuanana mique Yusura cuadishahuaque bahue juishu, —jadya tunajatu acuare Jesús.

³⁹ Jesúsra tuna quemitsacuare:

—Micuana micuana jidama inime cadujutiya cuanaque. Yusu micuana iyuhueda bajacahua ni micuana tuja yana equedya juya. ‘Acue ai inimeradya jutidya, ecuanana mique Yusura cuadishahuaque bahue juishu’, jadya micuana juya. Aya ama tuque era. Jonás jucuaque cuita camadya micuana huecashaya. ⁴⁰ Tuquetu jae ebarija ecarecani ducu jucuaque quimisha huecaca, quimisha meta jadya, Yusura jae queja mejijiju pushamereya tupu. IQUE ECUITA tumbaedyá quimisha huecaca, quimisha meta jadya emaju jubuque. ⁴¹ Jadya juatsu Jonás cuacuare Niniveju Yusuja quisarati cuejara. Cuejayaju bacatsutu tuhua cuanaque inime cacuaquere. Ique Jonás bucha dyaque inime metseque. Jadya ama bucha micuana bacacarama aya era bahuityayaque. Tumetu tumeque huecaca Yusura dutya eje bucha judadibuqueque cuejabareyaju, Niniveju anicuare cuanara micuana pana cueja abuque Yusuja yacuaju: “Dyaque ecana pacanerecati

Jesús yahuaaju anicuare patya tura cuejayaque bacacarama jucuare cuanaque”. ⁴² Beru yuquejanetu ecuari epuna Sabá juque beni diji queja anicuareque jecuare dyaque japadaque Salomón dyaque inimequija quisarati bacara. Ique Salomón bucha dyaque inime metseque. Jadya ama bucha micuana era cuejayaque bacacarama aya. Jadya tibudyatu tere ishucue huecaca juetihuaaju, Yusura ecuita cuana tuna eje bucha jubuqueque cuejabareyaju tumeque ecuari epunaradya micuana pana cueja abuque Yusuja yacuaju: “Dyaque ecana pacanerecati Jesús yahuaaju aniya patya tura cuejayaque bacacarama jucuare cuanaque”, jadya tuna tumeque epunara Yusuja yacuaju cuejabuque, —jadya tuna Jesúsra acuare.

Ijahua yudijidya judirunuca jucuareque
(Lc 11.24-26)

⁴³ Tuhua cuanaque tuna Jesúsra cuejanucacuare:

—Anicuaretu ijahua tura quijahuatishaya quejaque ecuinanaque. Tumeque ijahuatu junenicuare anitaya ama cuanaju ani ishucue sare juyaque. Dadicuare amatu eju ani ishucue. Dadima aatsu tujatu jadya inime tupucuar: ⁴⁴ “Padirunuca ique eju ique cuinanashatahuaaju. Tuatsehue camadya ique eaninucáu” jadya. Tumeque ecuita queja judirunucatsu tujatu badirucuar ni ejeque ijahua tsehue ama, etare ejabu jida, ebajeje bucha. ⁴⁵ Jida baatsutu tumeque ijahuara peya ijahua cuana sareticuare. Pacarucu ijahua cuana, tuque bucha dyaque jidama cuanaque tujatu daditicuar. Daditsu tujatu ecana beticuare. Juetinucatsu tunajatu dutyara quijahuatishanuc acuare tumeque nerecadaque ecuita. Jadya juetu ecuita juya tuque icuene juhua bucha dyaque jidama. Tumbaedy a micuana iyacua nerecada juya bucha dyaque nerecada jubuque, —jadya tujatu ecana acuare.

Jesúsja ecuaque, tuatsehuequi cuanaque jadya Jesús jiteque cuacuareque

(Mr 3.31-35; Lc 8.19-21)

⁴⁶ Jesús quisarati netiyajutu juticuare ecuaque, tuatsehuequi cuanaque jadya. Ecuita jetiama tibu tuna etsecueju netinaticuar. Quisaraticara datse tuna jucuare tuatsehue.

⁴⁷ Tumetu ejera cuana Jesús cuejaticuar:

—Micue cuaa, micue miatsehuequi cuanaque jadya rena etsecueju. Miatsehuepa tuna quisaraticara juya, —jadya tujatu Jesús aticuare.

⁴⁸ —Tumeque epuna tuque ecue ecuaa; tume cuanaque tuna ecue eatsehuequi cuanaque. Jadya ama bucha tuque

ecue aniya peya ecue iyuhueda cuanaque, —jadyatu Jesúsra acuare tuhua cuanaque.

⁴⁹ Tume tura ecuana imetacuare tura mepehua cuanaque.

—Riya cuanaque rique ecue iyuhueda cuanaque. Riya cuanaque rena ecue ecuaa buchique, ecue eatsehuequi cuana buchique jadya. ⁵⁰ Iyuhueda tuna baya ecue Etata barepaju aniyaja inime eque juya cuanaque. Tunadya tuna ecue ecuaa, ecue eatsehuequi cuanaque bucha bae ayaque, —jadya tujatu ecana acuare.

13

Uhuauhua puji cuatsabiji
(Mr 4.1-9; Lc 8.4-8)

¹ Tumeque huecacatu Jesús cuinanacuare etare juque. Cuinanatsutu aninaticuare bei jiruru tuhua cuanaque bahuitya. ² Masadamatu caradatinucacuare jetiama ecuita cuana. Tuna majacama cuita baatsutu Jesús cuabaju nubitsu anibutecuare. Mejiji equera tunajatu bacacuare tuque quisaratiyaju. ³ Cuatsabiji eque tujatu ecana bahuityacuare, yunerique adebamere ishu.

—Anicuairetu ecuita. Cuacuaretu tuja teeju uhuauhuara. ⁴ Tura uhuaajeyaquetu umae pacacacuare edijiju, yahua pajidaju. Uhuayaque etsucaca yahua ju huiruhuaquetu upati huihi cuanara anibutetsu mucutillacuare. ⁵ Peya etsucaca cuanatu pacacacuare yahua macana dedamaju. Yahua macanamaque dedama tibutu huijatsu danecuare ama, masadama buraracuare ama bucha. ⁶ Ijetija uqueratu iyecuare euhua cuanaque, etiri yahua nacadaju ama tibu. ⁷ Umae bacue pacacacuare acui tiri, acuija jadya jetiama ducu. Acuija cuana danetsu tujatu trigo euhuaque ehuija cuanaque iyetillacuare. ⁸ Umae etsucaca cuanatu pacacacuare yahua jidaju. Cacacaticuare umada. Tee mere pujiratu jetiama huesacuare tuhua euhuaque. Umae esa cuanajutu cien tsucaca jucuar. Peya esa cuanajutu shucuta tunca tsucaca jucuar. Peya esa cuanaju jucuar quimisha tunca tsucaca. Jadyatu jucuar teeju euhua cuanaque.

⁹ “Quijacabacati aqui juatsu, nebacacue, —jadya tujatu ecana acuare.

Eje bucha juatsu ecana Jesúsra cuatsabiji eque bahuityacuareque
(Mr 4.10-12; Lc 8.9-10)

¹⁰ Tume tuque ecuana tura mepehua cuanara jipeticuare. Jipetitsu tuque ecuana acuare:

—Ecuita cuana bahuityayaque tuquemi ecana cuatsabiji cuana eque bahuityaya. ¿Eje bucha juatsu tuquemi ecana jadya bahuityaya? —jadya tuque ecuana acuare.

¹¹ Jesúsra ecuana quemitsacuare:

—Yusura micuana pana adebamere acara aya tura tuja cuanaque naruyaju eje bucha juyaque. Peya cuana jadya cuejae eauque, tuna cuatsabiji cuana eque jutidya cuejaya jari, pana huecasha cuita ayaque ama. ¹² Ejeja ai aniyajatu dyaquedya ai aniajeya. Ejeque aiqúi bucha cabatiyaquetu, aimaquedya jutidya. Tuja aniyaque piji tujatu aputatereya. ¹³ Jadya tibudya tuna cuejaya cuatsabiji cuana eque, tunara era bahuityayaque pana adeba eauju. Tunaratu era ayaque baya. Tume tuna baatsu bama jiu juya. Bacatsu tuna bahuityahua ama jiu juya, arepa bacahua ama bucha. ¹⁴ Berutu Isaiás, Yusu equeque quisarati cuejaquique, jadyatu judadiya jadya jucuare. Tumetu iyacua tuequedya juya.

“Micuanaratu bacabuquedya.

Adebataqui ama tuque micuana babuque.

Tume tuque micuana adebataqui ama babuque micuara petayaque.

¹⁵ Micuanaja Yusu adeba ishunque tuque micuanaja aishu ama cuita jubuque caadebati ishu.

Bacabuque datse micuana Yusuja quisarati.

Ijaca cani ecatse ehuijitutana bucha jutidya micuana jubuque.

Yatuca ecatse etumu bucha jutidya micuana jubuque.

Jadya tibudya tuque micuana adebabuque ama micuanaja yatuca tsehue bayaque, ni micuanara micuanaja ijaca tsehue bacayaque.

Micuanaratu adebabuque ama, ni micuana inime cacuareticara jubuque, eaqueja catyatitsu eaqueja judiru ishu”.

¹⁶ Isaiasra béru huenecuareque quisarati aatsu ecuana Jesúsra cuejanucacuare:

—Micuana micuana dyaque jida, pureama, micuanaja yatuca tsehue bayaque micuana pana adeba aya tibu, micuanaja ijaca tsehue bacayaque micuana pana ejene aya tibu. ¹⁷ Neadebacue riyaque. Beru yuequedyatu Yusu equeque quisarati cuejaqui cuanara, tumbaedyá ecuita tuyu cuanara jadya bacara ebari acuare ecue casa micuanara iyacua bayaque. Bacacara ebari tuna acuare ecue quisarati iyacua micuanara bacayaque. Jadya ama bucha tunaja anihua ama emajaca baishu ni baca ishu.

Jesúsra pana cueja cuatsabiji uhuauhua puji equeque acuareque

(Mr 4.13-20; Lc 8.11-15)

18 “Pana ijacabaca neacue. Pana cueja micuana aya uhuauhua puji cuatsabiji equeque eje buchique. 19 Umaetu Yusura naruyaju eje buchique quisarati bacatsu masadama nime aputaya, Satanásra masadama pana nime aputashamere aya tibu. Tuna tuna ediji pajidaque buchique. 20-21 Umaeratu ejetsunue ishü ama pureama tsehue Yusuja quisarati bacaya. Nerecada juya cabatitsu tuna ejenejacaya. Quisarati ejenehua baatsu jidama atayaju, masadama tuna ejenejacaya, pana adeba aya ama tibu. Tuna tuna yahua macana dedamaque buchique. Huijahua cuanaquetu macana quini danetsu tsunuda ama juya, etiri dedama tibu. 22 Umaera Yusuja quisarati bacaya cuanaratu ejenejacaya, riyaque yahujaju cuanaquedya jutidya dyaque inime tsapequi aya tibu. Tunajatu inime juya chipiru dyaque umada anitsu camadya pureama ejuu bucha. Chipiru dyaque iyuhueda baatsu tuna tunadya jutidya ijahue catiya. Jadya juatsu tuna Yusu muijacaya. Tuna tuna yahua acuija quinique buchique. 23 Umae cuana Yusuja quisarati bacaqui juya cuanaratu adebaajeyadya jutidya. Tuna eje bucha anieju tuna ejitaju Yusuja biji eque aniyaque. Umae cuana tunajatu tsahuaya eaqueja catyati ishü. Tunadya tuna esaju jetiama etsucaca juhuaque bucha, cien, shucuta tunca, quimisha tunca jadya catyatihuaque buchique, —jadya tuna Jesúsra acuare tuhua cuanaque.

Trigo ducu trigo jiuque uhuatanacuareque

24 Jadya juatsu tuna Jesúsra bahuityanucacuare:

—Bahue micuana amerecara aya eje bucha micuana amena Yusura naruyaque. Nebacacue riyaque cuatsabiji. Jucuaire tu ecuita. Cuacuairetu tuja teeju trigo uhua. Uhuatsutu dirunucacuare tuja etareju. 25 Tumetu meta tuque, dutya tuja etareju aniya cuana tsehue tahuiyaju, nubicuare tuja teeju tee metseque ujeu baquique. Uhuacuaretu tumeque teeju nucadya peya etsucaca. Etsucaca euhua cuanaque huijatsutu trigo bae cuitadya jucuaire. Ecaca bacue tuja arataqui ama jucuaire. Trigo jiuque tsucaca uhuatsutu dirucuaire. 26 Uhuahuajutu dutya euhua cuanaque huijacuaire trigo neri, trigo jiuque jadya. Cacacatihuaaju piisi amena esaju baatsutu teeju mere juya cuanara chamacama adebacuaire dutya tumeque teeju huijahuaque trigoque ama. 27 Jadya baatsu tuna emechiqui queja cuacuare. “Tata, miratu uhuachine teeju trigo neri. Jetiama cuitatu huijachine trigo ducu trigo jiuque. ¿Airatu uhuachine tume jidamaque

huijachineque?” jadya tunajatu aticuare. ²⁸ Tee metse-quetu jucuare: “Ecue inimetu ejeque ique ujeu baquira uhuachine”, jadya tuna emechiquira acuare. “¿Mutsumere-cara mira ecuana aya trigo jiuque?” jadya tunajatu bacaduracuare. ²⁹ “Paju ani. Mutsuyaque tuque micuana emutsuu trigo neri. ³⁰ Panetidya jutidya ecuanara racaya tupu. Trigo raca ishuque huecaca juetihuaaju piisi tuque mere puji cuana jadya abuque: ‘Icuene nemutsucue trigo jiuque. Mutsutsu nequerebarecucue. Jadya aatsu nepahuacue. Jadya bajejee dutya aatsu piisi neracacue trigo. Racatsu neiyacue ecue trigo iyaquiju’ ”, jadyatu acuare emechiquira mere puji cuana, —jadya tuna Jesúsra cuejacuare.

(Jadiquetu Jesúsra cuatsabiji eque huecashacuare, arepa ecuana riyaque yahuaju yuhua cama aniya ama bucha, ejeque huecaca Yusuja cuanaque Yusuja ama cuanaque jadya cajuquetibuque.)

Mostaza caca cuatsabiji eque bahuityacuareque
(Mr 4.30-32; Lc 13.18-19)

³¹ Jesúsra tuna bahuityanucacuare peya cuatsabiji eque bahuityayaque.

—Bahue micuana amerecara aya eje bucha micuana amena Yusura naruyaque. Adebayadya micuana mostaza caca, teeju ehuataque. ³² Achaachaque piji, bataqui nerique ama. Jadya ama buchatu buraratsu, huijatsu danetsu dyaque arida juya, teeju peya euhua cuanaque bucha ama. Tuja yaa cuanajudyatu upati huiri cuana eja catiya, —jadya tuna Jesúsra acuare.

(Riyaque cuatsabiji eque tuna Jesúsra jadique huecashacuare. Arepa catibutiyaque eje uma piji tuaqueja catyatiya ama bucha, tuequedya tuna riya piji, riya piji jetiama catyatiajeya.)

Levadura cuatsabiji eque bahuityacuareque
(Lc 13.20-21)

³³ Tumbaedyu tujatu ecana riyaque cuatsabiji eque bahuityanucacuare:

—Bahue micuana amerecara aya eje bucha micuana amena Yusura naruyaque. Epunatu pan ejuu. Eiyautu riya piji levadura. Quimisha equiniqui medidaju tujatu harina ehuaau. Tumeque riya piji levaduraradyatu dutya esaca huauhuaaju emujashau, —jadya tuna Jesúsra acuare.

(Riyaque cuatsabiji eque tujatu ecana jadique huecashacara acuare. Levadurara dutya esaca mujashaya bucha, jadidyatu tuja quisarati dutya queja cuejatanabuque jadique.)

Eje bucha juatsu Jesúsra cuatsabiji eque bahuityayaque cuejacuareque

(Mr 4.33-34)

³⁴ Jesusratu ecuita jetiamaque cuatsabiji eque cama bahuityacuare. Cuatsabijima tujatu ecana bahuityacuare ama. Pana adebamere ama tujatu ecana cuatsabiji eque acuare. ³⁵ Jadya juetu jucuare Yusu equeque quisarati cuejaquira acuareque:

“Cuatsabiji eque tuna bahuityabuque.

Yusura yahua iyahua equeque etehuaque tuque quisarati abuque”,

jadya patu Yusu equeque quisarati quejaquira hueneacuare.

Trigo ducu trigo jiuque eje buchique jadique

³⁶ Jadya juatsutu Jesúsra camadya ishu isaracuare tuhua aniya cuanaque. Tuna isaratsutu ecuana tsehue etareju dirucuare. Tume tuque ecuana jipetinucacuare.

—Ecuana peya cuana tsehueju mira ecuana cuatsabiji cuejahua trigo ducu trigo jiuque uhuacuareque. ¿Ai mira ecuana bahuityacara aya tumeque cuatsabiji eque? —jadya tuque ecuana acuare.

³⁷ Jesúsra ecuana quemitsacuare:

—IDYA ECUITA tee metse buchique, trigo neri uhuaquique.

³⁸ Yahua tu tee buchique. Dutya ecue neri cuanaque tuna trigo neri cuana buchique. Satanásja cuanaque tuna trigo jiuque ehuijaque buchique. ³⁹ Satanás tu trigo jiuque uhuaquique buchique. Mere puji cuanara teeju euhuaque jahuanehuaju huesahuaju jucuareque tu yahua tereyaju judadibuqueque buchique. Tume teeju euhuaque huesa puji cuana tu barepaju Yusu tsahuaqui cuanaque jadique.

⁴⁰ Trigo huesaqui cuanara trigo jiuque trigo ducuque cuitubutsu pahuacuareque jadiquetu yahua tereyaju judadibuqueque. ⁴¹ Tumeque huecaca ique enaruqui juatsu tuque ique barepaju tsahuaqui cuanaque cuadishabuque, dutya jidama juhua cuanaque sita ishu, dutya peya cuana jidama amerequi juhua cuanaque. ⁴² Tume cuanaque tuna ijahuaja etiquiju ijehuetanabuque. Tuhua tuna payaque dutya etse tari jubuque. ⁴³ Tumetu adebataqui jubuque eje cuanaque Yusura amereya eque cuita juhuaque. Jidama cuana ducuque tuna cuinanabuque, barepa asicadaque cuetiyaju ijete epujetanau bucha. Tuna tuna tuhua Etataque Yusu huaraji arida queja judirubuque.

“Micuana quijabacati aqui juatsu, nebacacue, —jadya tura ecuana acuare.

Cuatsabiji chipiru etehua equeque

⁴⁴ Jesúsra ecuana bahuityanucacuare:

—Bahue micuana amerecara aya eje bucha micuana Yusura naruyaque. Riyaque cuatsabiji micuana cuejaya. Jucuaire patu ecuita. Yahua puru juyaque tujatu dadicuaire dyaque tsuje aridaque etehuaque. Daditsutu dyaque pureama jucuaire. Tuja yahua juque ama tujatu dadicuaire. Jadya tibudya tujatu tuhua nucadya papanucacuare. Tehuanucatsu patu dirucuaire, tuja dutya ai aniyaque catyati ara, dyaque umada chipiru anitsu tumeque yahua quemi ishu. Quemicuaredya tura, —jadya ecuana Jesúsra cuejacuaire.

(Riyaque cuatsabiji eque tuna Jesúsra huecashacara acuare. Tuja juishuque patu dyaque saretanayaque. Eje buchadya tujaque jucara ebari tsehue ecuana tuja ishu jutaqui.)

Tumu dyaque tiquidaque tsuje aridaque cuatsabiji equeque
⁴⁵ Bahuityanucacuare ecuana Jesúsra:

—Bahue micuana amerecara anucaya eje bucha micuana amena Yusura naruyaque. Anicuairetu catyati puji tumu dyaque tiquidaque tsuje aridaque perla bacani sare juyaque. ⁴⁶ Jadya juyajutu ejera cuana bamerecuare tumu dyaque tiquidaque tsuje aridaque. Dutya tuja ai aniyaque catyati caticuaire tumu quemi ishu. Quemicuaredya tura, —jadya tura ecuana cuejacuaire.

(Riyaque cuatsabiji eque tuna Jesúsra huecashacara acuare tuja juishuque patu dutya ai dyaque tsuje arida cuanaque buchique.)

Jae deruqui equeque cuatsabiji

⁴⁷ Jesúsra ecuana bahuityanucacuare:

—Bahue micuana amerecara aya eje bucha micuana amena Yusura naruyaque. Riyaque cuatsabiji micuana cuejaya. Ecuita cuanaratu marecuare jae deruquique enaju. Derucuaire tuna jae bape bape cuanaque earataque, arata baecuaque jadya cuanaque. ⁴⁸ Jae deruquique jequehuaajutu jae puji cuanara repecuare mejijiju. Tuhuadya tuna jae earataque, arata baecuaque jadya mepe juanibarecuare. Jae earata cuanaque tunajatu jitiju ishacuaire. Arata baecua cuanaque tunajatu ijehuebarecuare. ⁴⁹ Jadidyatu jubuque tere ishucue huecaca juetihuaaju. Barepa juque Yusu tsahuaqui cuanaque tuna jebuque ecuita Yusuja ama cuanaque, ecuita Yusuja cuanaque ducucue mepera. ⁵⁰ Jidama cuanaque tunajatu ijehuebuque ijahuaja etiquiju. Tuhua tuna pajacabuque ama. Dyaque nerecada tuna jubuque. Ujera tuna etse tari amerebuque, —jadya tura ecuana acuare.

Yusuja inime beruque, iyacuaque jadya

51 Tume ecuana Jesúsra bacaduracuare:

—¿Jutiyadya micuanaja inimeju era cuejahuaque?

—Jejee, Ecuana Cuatsashaquique. Jutiyadya tuque ecuana inimeju, —jadya tuque ecuana acuare.

52 Tura ecuana acuare:

—Dyaque jida tu cacuatsashati bahuityaqui cuanaque eaqueja catyati ishu. Jadya juatsu tunajatu chamacama pana cueja eau beruque inime equeque, iyacua equeque jadique. Ecuita dutya tuja aniyaque tsumequi buchique tuna, iyacuaque, beruque jadya tsumeya bucha tuja etareju cuanaja jida ishu, —jadya ecuana Jesúsra acuare.

Jesús Nazaretju juetinucacuareque

(Mr 6.1-6; Lc 4.16-30)

53 Tume cuanaque cuatsabiji atillatsutu Jesús dirunucacuare tuhuaque. 54 Cuacualetu Nazaretju, tuque catemuticuareju. Caradati ishuque etareju tujatu ecana bahuityacuare. Anajacatacualetu tuhua casitaticuare cuanaque. Bacuare tuna tura Yusuja casa tsehue aya cuanaque.

—Riyaque ecuita taa dyaque inimequi quisarati ishu. ¿Eju jatsuri riyaque jadya quisarati cabahuityatihua? ¿Eje bucha ae jatsu rejari eau ejeque ecuitara ayaque ama? 55 Nanadaju ecuanara bacuaque taa riya. ¿Riyaquedya ama jatsu ri Joséja ebacuaque, mesa, caju cuana pujija ebacuaque? ¿Mariaja ebacuaque di taa riya? ¿Riyaque di taa ri Santiago, José, Simón, Judas jadyaja euji que? 56 Tuja enuu cuanaque tupuju cuanaque taa rena ecuanaja epujudya aniya. ¿Tume jatsuri eje bucha juatsu dyaque quisarati bahue? —jadya tuna jucua.

57 Tunara nanada equedya bahua tibu, tunajatu ejenecarama acuare tuque Mesías, Yusuja Emepeque jadique. Jadya tibudya tunajatu bacacarama acuare tura bahuityayaque.

Jesúsra tuna acuare:

—Quisarati dyaque jida cuanaque cuejaqui cuanaque tuna dutya queja jida batsataya, tunaja epuju cuanara cuita bacue aijama. Dutyara tuna pana ijacabaca aya, tunaja ata cuanara bacue aijama, —jadyatu Jesúsra acuare Nazaretju cuanaque.

58 Tuhua tuja epuju cuita tujatu anericuare ama ai ejeque ecuitaja ataquique ama, tuhua cuanaque tuaqueja catyaticarama jucua baatsu.

14

Eje bucha iyetanae Juan Ecuita Cuana Utsaquique jucuaque

(Mr 6.14-29; Lc 9.7-9)

¹ Tume patyatu Herodes Galilea naruquique jucuaré. Bacuaretu Jesús ai juyaque, eje bucha juyaque jadya.

² —Tumeque Jesús tu baya ecuita ama. Juan Ecuita Cuana Utsaquique emajuque cacuitatitsu netitsuranucachineque tume. Jadya tibudyatu Jesús ja casa aniya ejeque ecuitaja ataquique ama aishu, —jadyatu Herodesra acuare tuque merequi cuanaque.

³ Herodestu pana bahuedya jucuaré Juan emajuque, tura cuitadya iyemerechine tibu. Iyacia micuana Juan eje bucha iyetanae jucuaré que cuejaya. Herodesratu Juan inamerecuare. Inameretsu tujatu etare apudaju ishamerecuare. Etare apudaju tujatu ishamerecuare Herodías pureamatura ishú. Tumeque epuna tujatu ejuque jahuane jucuaré, tuatsehuequique Felipeja ehuanéque. Tumeque epunaratu Felipe jacuaré, Herodes tsehue anicara juatsu. ⁴ Eje uma cuejadyatu Juanra acuare Herodes: “Caquemititaqui amami micue miatsehuequija ehuanéque tsehue”, jadyapa tujatu acuare.

⁵ Jadya tibudya tujatu Juan iyecara acuare. Jadya ama bucha tujatu inime tupucuaré: “Juan iyemereu; tume taa tu ecuita cuana eatsehue ecahuaitiu. Tunaratu ejeneya Juan Yusuja quisarati cuejaquique”. Ecuita cuana mubatsu tujatu Juan risimeretsu ishamerecuare jutidya. ⁶ Herodesja cuinana huecaca camaratsurutiyaque chine ishutu Herodiasja ebacujunaque ihuarahua cuanaja yacuaju ijahue jucuaré. Jadya tuque ijahue juyaju baatsutu Herodesra bijisericuare tuja ijahue. ⁷ Tuque tuja biji ijahue juya baatsu tujatu epuna ehue ebari acuare:

—Bacacue ique ai mira bijida bayaque. Etyaudya mique era. Yusura ique panerecatura, era mique tyaana ayaque tyayaque ama juatsu, —jadyatu Herodesra epuna ehue ebari acuaré.

⁸ Ecuaquera ana cuejahujutu epuna ehue ebarira Herodes bacuaré:

—Iyemerecue Juan Ecuita Cuana Utsaquique. Piti tubumeretsu, tuja iyuca pejaju iyatsu, ique inamerecue. Riyaque mique bacaya, —jadyapa tujatu acuare.

⁹ Jadya ahujutu Herodes dyaque peya inime jucuaré. Jadya ama bucha tujatu ataquidya jucuaré, tura quisarati ahuaque tuatsehue chine juya cuanaja ijacaju jadya juhua tibu, “Yusura ique panerecatura, era tyaana ahuaque tyayaque ama juatsu”. Jadya tibu tujatu cuatsashacuare tuja sudaru cuana:

¹⁰ —Necuacue etare apudaju. Juan Ecuita Cuana Utsaquique nepititubuticue, —jadyapa tujatu ecana acuare.

¹¹ Tume tuna cuatsashatahua equedya jucuaire. Jadya aatsu tunajatu Juanja iyuca pejaju iyatsu epuna ehue ebari tyaeticuare. Tunara tyaetihuaju tujatu ecuaque inamereticuare.

¹² Jadya juhuaque bahue juatsutu Juanra mepehua cuanara emajuque queticuare. Dujutsu tuna ishaticuare caniju. Jadya aatsu tunajatu cuejaticuare Jesús, Juan eje bucha juhuaque.

(Herodesratu dutya tume cuanaque inime tupuqui acuare. Jadya tibudya tujatu Jesús, Juan Ecuita Cuana Utsaqui que chacha enetitsuranucaque bucha bacuare.)

Jesúsra pishica pan, beta jae jadya umanashacuareque pishica mil ecuita cuana mihua ishu

(Mr 6.30-44; Lc 9.10-17; Jn 6.1-14)

¹³ Juan Ecuita Cuana Utsaqui que majuchineque bahue juatsutu Jesús tuhuaque cuacuare cuaba eque peya queja amaca ecuana tsehue cuita camadya. Ecuita cuanaratu badadicuare eje queja amaca cuayaque. Badaditsu tuna cuacuare tunaja epu cuana juque yahua eque tuaqueja juti ishu. ¹⁴ Cuaba juque cuinanayaratu Jesúsra bacuare jetiama ecuita tuque ihua juyaju. Jadya baatsu tujatu ecana nrecada banaticuare. Chachanecuairetu ujejeda cuanaque tunara dujuya cuanaque. ¹⁵ Amena ijete nubihuie ecuana tura mepehua cuanara jipeticuare.

—Amena taa ri chinehua. Rehuari aijama ni eju buchique ara ishu cuanaque quemí ishuque. Isaracue ecuita cuana. Padiru ecana epu cuanaju, eje queja tuna japadama aniyaju. Pacabacatidiru ecana ara ishu cuanaque, —jadya tuque ecuana aticuare.

¹⁶—Cuadishaya ama tuna era. Micuanaradya ecana nemi-huacue, —jadya ecuana Jesúsra acuare.

¹⁷—Rehua rique ecuanaja aniya pishica pan, beta jae jadya piji camadya, —jadya tuque ecuana acuare.

¹⁸—Nebecue requeja, —jadya ecuana Jesúsra acuare.

¹⁹ Tume tujatu ecuita cuana iyabutyamerecuare tuhua tuna netibareyaju cuitadya. Jadya juatsu tujatu inaticuare pishica pan, beta jae jadya. Inatsu tujatu barepa Yusu aniya queja petacuare. Petayaquetu jucuaire:

—Yusurupai mique aya, Tata, mira ecuana riyaque ara ishuque tyahua tibu, —jadya tujatu Yusu acuare.

Yusurupai au jadya aatsu tujatu pan cuana cuesibarecuare. Jadya aatsu tura ecuana tyabarecuare, ecuita cuana ecuanaja tyabare ishu. Tura ecuana tyabareya tupu tujatu jetiama umanashacuare. ²⁰ Dutya tuna araaracuare, pana jeque juya tupu. Amena jadya juhuaaju tuque ecuana

jequeshabarecuare peadya tunca beta earacana jiti arida cuanaque pan tunara arabishahua cuana tsehue, jae jadya tsehue. ²¹ Jetieque ama tuna araaracuare. Pishica mil deca cuana tuna araaracuare; epuna cuana, ebacua piji cuana jadya piyebamaque.

Jesús ena dyaque eque ajecuareque
(Mr 6.45-52; Jn 6.16-21)

²² Tume ecuana Jesúsra jadya acuare:

—Neanibutecue cuabaju. Necarequeticue bei yueque macare. Tumidya micuana adadiya ecuita cuana isaratsu, —jadya tura ecuana acuare.

Tura jadya ahujaju ecuana cuabaju anibutecuare. Anibute jadya juatsu ecuana carequeticuare, Jesús ecuita jetiamaque isara juya tupu. ²³ Amena ecuita cuana cuadisha ishuh isaratsutu Jesús tsuracuare emata baruda cuita amaju Yusu tsehue quisarati ishuh. Apunaya tupudyatu tuhua jucuar. ²⁴ Ecuana ecuana bei patya patya juajecuare. Ena pacutu cuaba queja catsatana catsatana jucuar, cuejijira ecuana acuatsuruya tibu. ²⁵ Amena huecaca japadara tacure quique pidya juhujaju ecuana Jesúsra jipedirunucacuare ena dyaque eque ajeajeyara. ²⁶ Jesús ena dyaque eque ajeajeyaju batsatsu ecuana dyaque bajida jucuar. Bajida juatsu ecuana jadya jucuar:

—¡Ita nebacue! ¡Yatanana tume! —jadya ecuana quique eque jucuar.

²⁷ Jesúsra ecuana yume quiquedya acuare:

—¡Bajida nejuume! ¡Idya ique! ¡Casada nejucue!

²⁸ Pedroratu acuare:

—Ecuana Cuatsashaquique, midya ni taa mique, ique dyadi ajeshacuedya ena dyaque eque mique netiya tupu, —jadyatu Pedrora acuare.

²⁹ —Jecue taa, —jadyatu Jesúsra acuare.

Jadya ayajutu Pedro butecuare cuaba juque. Butetsutu ena dyaque eque ajequenacuare Jesús netiya queja. ³⁰ Cuejijira bucucushaya cabatitsutu bajida jucuar. Tumetu ajeya que nubiajecuare.

—¡Ecuana Cuatsashaquique, chachanecue ique! —jadyatu Pedro quiquecuare.

³¹ Tumeque ura cuitadyatu Jesúsra ebi rirutsu inaticuare.

—Ejenehua ama tuquemi era cuejipa casada juque echachaneuque, ena pacu juque jadya. ¿Eje bucha juatsu tuquemi ejenehua ama era echachaneuque? —jadya tujatu acuar.

³² Tatse cuabaju tsurahuajutu cuejiji neticuare. ³³ Tume ecuana cuaba ducu anicuare cuanaque chichucata jucuare Jesúsja yacuaju tuque muiyaque.

—¡Pusha ama cuitadya mi Yusuja Ebacuaque! —jadya tuque ecuana acuare.

Jesúsra ujejeda cuanaque Genesaretju chachanecuareque
(Mr 6.53-56)

³⁴ Bei riquetsu ecuana Genesaret yahuaju jaratsuranaticuare. ³⁵ Tuhua aniya cuanaratu Jesús adebatsacuare. Masadama tunajatu tsapecuare quisarati tuque junatiyaque tumeque epuju. Jetiama ecuitatu peya cuejati peya cuejati jadya jucuare tunaja ujejeda cuanaque Jesús queja duju ishu, tuja ecana chachane ishu. ³⁶ Canerecaticuare tuna tuaqueja:

—Cajabamereticue taa ujejeda cuana queja micue una cuatsa cuana pijidya jutidya, tuna chacha juishu, —jadya tunajatu Jesús acuare.

Dutya ejeque tuja una jabaqui jucuare cuanaque tuna pana chacha jubarecuare.

15

Baba cuanaja bahue eque ama ecuana jutaquique, Yusuja inime eque

(Mr 7.1-23)

¹ Umae fariseo cuana, cacuatsashati bahuityaqui cuanaque jadya tuna juticuare Jerusalén juque. Junatitsu tunajatu Jesús jipeticuare. Jipetitsu tunajatu bacaduracuare:

² —Mira mepehua cuanaquetu ecuanaja baba cuanaja bahue eque ama juya. Araara ishutu micue cuanaque emetucu cutsatiya ama ecuanaja bahue eque. ¿Eje bucha juatsu? —jadya tunajatu Jesús acuare.

³ Tura tuna quemitsacuare:

—Arepa micuana peya cuanapa jidama juya jadya aya ama bucha, dutya amadya tuque micuana aya Yusura amerehuaque. Micuanaja bahue cuana eque cuitadya jutidya juyaque tuque micuana Yusura amereyaque aya ama.

⁴ Moisés equetu Yusura cuatsashacuare béru: “Muibacue micue tata, micue cuaa jadya”. Tumebaedyatu jucuare: “Paiyetana ejeque etataqueja ishu, ecuaqueja ishu jidama quisarati ayaque”. ⁵ Micuanaratu cuarehua riyaque cacuatsashati. Tume micuana, micuanaja tata nerecada cuanara catsahuamereti ishu bacayaju, jubahue: “Tahuataqui ama mique ecue, amena ecue dutya ai aniyaque amena Yusu etya tibu”. ⁶ Ejera jadya quisarati ayaquetu tuja etataque, tuja ecuaque tsahuataqui ama, jadya tuque micuanaja cuatsasha bahue. Jadya apupashae tuque micuana Yusura

cuatsashuaque aya, micuana cuejatahua cuana equedya jutidya juishu. ⁷Yusu adebaquipa ejuu, jadya micuana juya, ai yuneri ama. Isaías Yusu equeque quisarati cuejaquiratu micuana jadya ayaque huenecuare jadya:

⁸ “Riyaque ecuita cuanara muiya tunaja quisarati tsehue camadya.

Jadya ama bucha tuna eje bucha juya eque ejitaju ecue cuanaque ama.

⁹Yanacana cuita tunara tunaja bahue cuana eque muiya. Tunara bahuityayaquetu ecuita cuanara inime tupuyaquedya jutidya”,

jadyatu Yusu jucuaque Isaías eque, —jadyatu Jesúsra acuare fariseo cuana, cacuatsashati bahuityaqui cuanaque jadya.

¹⁰Tumetu Jesúsra ihuaracuare ecuita cuana tuhua eje uma netiya cuanaque.

—Pana baca neacue. ¹¹Ecuitara ai arayaratu ecuita cajuchatishaya ama. Micuanaja ducuta inime jidamaque cuinanayaratu cajuchatishaya, —jadya tuna Jesúsra acuare.

¹²Tume tuque ecuana tura mepehua cuanara jipeticuare.

—¿Bahuedyami fariseo cuana mira quisarati jadya ayaju cahuaitiyaque? —jadya tuque ecuana bacaduracuare.

¹³—Ecue Etata barepajuja ama cuanaque tuna pana aputashatana jubuque, acui tiritu mutsu eau bucha.

¹⁴Nebacaume tunaja quisarati. Arepa tuna Yusuja quisarati pana adeba ama aya ama bucha tunajatu peya cuana bahuityacara aya. Shuhuique ecatsedya jutidya ecaaquerenitiu buchique tuna. Shuhuiru ni peya shuhuique eaquereniu, betadya tatse caniju epacacadiruu. Tumebae cuitadya tuna; yanacana cuita tuna peya cuana Yusu adebamerecara juya. Tunara, ni peyara jadyatu Yusu adebabuque ama, —jadya ecuana Jesúsra acuare.

¹⁵Jadya ayajutu Pedrora Jesús jipetitsu isaraticuare.

—Arepa ecuanaja cacuatsashati eque ai arata baecuaque aniya ama bucha, mira bacue ecuana cuejahua ai araya tsehuepa ecuana cajuchatiya ama jadya. Pana cueja ecuana acue, —jadyatu Pedrora acuare.

¹⁶—Arepa micuana eatsehue juneniya ama bucha, tuque micuana adebaya ama jari micuana era eje buchique bahuityacara ayaque. Ni ejeque earaquira micuana cajuchatishaya ama. ¹⁷Earaqui tu ecuanaja ecuita casatura ishuedya jutidya. Dutya earaqui ecuatsa eque nubiyuquetu ecare canijudya jutidya judiruya. Tuhuaquedyatu cuinanaya. ¹⁸Educujuquetu ecuitaja juetiya cajuchati ishueque. ¹⁹Tuhuaquedyatu riya cuanaque jidama cuanaque, bijiseri, au jadya cuanaque juetiya: jidama

inime tupucara cuanaque, quiyeticaraque, peya tsehue ecaquemitique jaraquerecaraque, chiri jucaraque, pusha pusha jucaraque, quijillahuanaticaraque jadya. ²⁰ Dutya riya cuanaratu ecuita cajuchatishaya. Yusuratu asicabaya riya cuanaque. Araaraya ni micuana emetucu cuana cutsatimaque fariseo cuana cutsatiya bucha, jadya cuana tsehue micuana cajuchatiya ama ni riya piji buchique, —jadya tura ecuana acuare.

Epuna israelitaque ama Jesús queja catyaticuareque
(Mr 7.24-30)

²¹ Jesústu cuanucacuare tuhuaque. Tumetu cuacuare Tiro, Sidón jadya queja amaca. ²² Epuna israelitara amatu jipeticuare. Tumeque epunatu jucuare israelita ama cuana eque ejuracanaque ecuanaja baba cuana Canaánju anidiruma jar-iju anicuareque. Jipetsu tujatu quiquecuare:

—Ique Cuatsashaquique, midyami David eque ejuracanaque. Nerecabacue ique. Ijehuecuinacue ijahua cuana ecue ebacujuna juque, —jadyatu epunara aticuare Jesús.

²³ Isaraya ama buchatu Jesús diruajecuareadya jutidya. Epuna bacue quiqueajecuareadya jutidya. Bacacarama ecuana acuare.

—Cuejacue tumeque epuna. Padiru. Ecuana tupujutu quiquebeya. Bacahuillahua tuque ecuana amena, —jadya tuque ecuana Jesús acuare.

²⁴ —Ecuanaja ata israelita cuana tuna uhuisha cuji eju buchique. Yusura ique cuadishahua tuna tsahua ishú, israelita ama cuanaque tsahua ishú ama, —jadyatu Jesús ju-
cuare.

²⁵ Epuna bacue Jesúsja yacuaju junatitsu nuyunaticuare.

—Tshuacue ique, Ique Cuatsashaquique, —jadya tujatu anaticuare.

²⁶ —Adebayami quisarati: “Jidama tu ebacua cuana ear-
aqui secatsu chapa cuana tyau” jadique, —jadyatu Jesús
jucuare.

²⁷ —Jejee, Ique Cuatsashaquique. Jadya ama buchatu chapa cuanara arayadya enimetsequera araarayaque mesa juque pacacashayaque, —jadyatu epunara acuare.

(Jadya quisarati tsehue tujatu acuare. Tumbaedyatu is-
raelita ama cuanaque Jesús queja ecatyatiudya.)

²⁸ —Yuneri cuitadya tuquemi pana ejene aya era micue bacujuna juque ijahua cuana eijehuecuinauque. Ayadya tuque era mira bacahua eque, —jadyatu Jesúsra acuare.

Tumeque ura cuitadyatu ebacujunaque quijahuatija-
cacuare.

Jesúsra jetiama ujejeda cuanaque chachanecuareque

²⁹ Jesústu tuhuaque dirunucatsu cueticuare Galilea bei jiruru eque. Tuequedyatu tsuracuare emataju. Tsuratsutu tuhuadya anibutecuare. ³⁰ Jetiamatu ecuita cuana tuaqueja juticuare. Dujucuaré tuna aje jidama cuanaque, shuhui cuanaque, ebi jidama cuanaque, quisarati baecua cuanaque, umada peya ujeje tsehue cuanaque jadya. Jesús anibutehua peque tunajatu iyabareticuare. Chachanecuaredya tujatu ecana. ³¹ Quisarati baecua cuanaque tuna quisaraticuare. Ebi jidama cuanaquetu chacha jucuaré. Ajebaecua cuanaque tuna ajecuaré. Shuhui cuanaque tuna capetaticuare. Dutya riya cuanaque baatsutu ecuita cuana anajacatacuare. Pureama tuna Yusu atibunecuare:

—Dyaque casada, jida jadya taa Yusu, Yusu israelita cuanara muiyaque, —jadya tunajatu acuaré.

Jesúsra pushi mil ecuita pacarucu pan eje uma jae piji jadya umanashatsu mihuacuareque
(Mr 8.1-10)

³² Tume ecuana Jesúsra ihuaracuare isara ishu:

—Nerecada taa rique ecuita cuana arama baatsu baya, riya barepa tibene equeque taa rena ique ijacabaca juyaque. Amena taa renajari aijama ara ishuque. Cuadishacarama taa rena aramaque aya tunaja etare cuanaju. Edijiju taa rena emajudiruu, —jadya ecuana Jesúsra acuaré.

³³ —¿Eje bucha dadie jatsu tuque ecuana eau earaqui ecuita jetiamaja ishu, rehua ni ejeque buchique anitayaju ama? —jadya tuque ecuana acuaré.

³⁴ Jesúsra ecuana bacaduracuare:

—¿Eje uma pan micuanaja aniya?

—Pacarucu piji camadya, eje uma cuana piji jae, —jadya tuque ecuana acuaré.

³⁵ Tuequedya tujatu iyabutyamerecuare ecuita cuana.

³⁶ Yahuaju iyabutyameretsu tujatu inacuaré pacarucu pan, jae piji jadya.

—Yusurupai mique aya, Tata, mira ecuana riyaque earaqui tyahua tibu, —jadya tujatu Yusu acuaré.

Yusurupai aatsu, tujatu pan cuesibarecuare. Cuesibaretsu umanashatsu tura ecuana tyabarecuare. Tudyá tuque ecuana tyabarecuare ecuita cuana. ³⁷ Dutya tuna araaracuare jequeya tupu. Araara amena juatsu tuque ecuana jequeshabarecuare pacarucu jiti arida cuanaque pan cuesi cuana anidadihua tsehue. ³⁸ Jetieque ama tuna araaracuare. Pushi mil deca cuana tuna araaracuare, epuna cuana, ebacua cuana jadya piyebamaque.

³⁹Jadya juatsu tujatu ecuita cuana amena isaracuare. Tuna isaratsutu anibutedirucua cuabaju, Magadán queja amaca diru ishu.

16

Fariseo cuanara, saduceo cuanara, Jesúsra ai ejeque ecuitaja ataquique ama amerecara acuareque
(Mr 8.11-13; Lc 12.54-56)

¹ Fariseo cuanara, saduceo cuanara jadyaratu baticuare Jesús. Sarecuare tunajatu eje bucha eque jidama aishu. Tume tunajatu Jesús acuare:

—Acue ecuanaja yatucaju ai bapeque inimeradya jutidya, ecuana mique Yusura cuadishahuaque bahue juishu, —jadya tunajatu acuare, arepa tuna tuque Yusu equeque junahuaque ejenecarama acuare ama bucha.

² Jesusratu adebacuaredya tunara inime tupuyaque. Jadya tibu tujatu ecana acuare:

—Barepa asicada cuanaque baatsu tuque micuana pana adeba abahue eje bucha huecaca juyaque, nei juya, juyaque ama jadique. Chinequeja piji ni jacua pude juya, tume micuana jubahue “Metajudyatu jida juya huecaca”. Micuanara quisarati ahua bae cuitadyatu juya. ³ Apudajudya barepa jidama nei jucara juyaju, huani ducu ijete riyá piji baatsu micuana jubahue: “Iyacuari nei juya” jadya. Tumetu micuanara quisarati ahua equedya juya. Yusratu jetiama ahua ique tuaquejaque junahuaque adebamere ishuque. Micuanaradya jutidyatu adebahua ama, arepa micuana huecaca cuana eje buchique adeba bahue ama bucha.

⁴ Micuana micuana jidama inime cadujutiya cuanaque. Yusu micuana iyuhueda bajacahua, ni micuana tuja yana equedya juya. “Acue ai inimeradya jutidya, ecuana mique Yusura cuadishahuaque bahue juishu”, jadya micuanara aya. Aya ama tuque era, ni ainya jutidya. Jonás jucuaque cuita camadya micuana huecashaya, —jadya tujatu ecana acuare.

Jadya isarae aatsu tujatu ecana shanaquenacuare.

Fariseo cuanara bahuityacuareque tu levadura buchique
(Mr 8.14-21)

⁵ Nime aputacuare ecuana bei yueque macare cuayaque pan cadujuti ishu. ⁶ Tuhua ecuana Jesúsra acuare:

—Necanaruticue bacue fariseo cuanaja, saduceo cuanaja jadya levadura teshue, —jadya ecuana Jesúsra acuare.

⁷ Ecuanaratu adebacuare ama eje buchique tura ecuana jadya ayaque. Jadya ecuana ecuana cama quisaraticuare:

—Ecuana pan nime aputahua baatsu tura ecuana jadya quisarati teshue aya, —jadya ecuana jucuaque.

⁸ Jesusratu adebacuaredya ecuanara inime tupuyaque.

—¿Eje bucha juatsu micuana pan beishu nime aputahuaju era nereda aya bucha cabatiya? ¡Ejeneya ama tuque micuana era micuanaja ai aijama juyaque etyauque! ⁹ ¡Adebaya ama jari cuitadya tuque micuana era micuanara ai sareyaque etyauque! Pishica pan era pishica mil ecuitaja ishú tupu amerechine patya ¿eje uma jiti tuque micuana jequeshachine pan arabishahua cuana tsehue? ¿Adebaya ama jatsu micuanara? ¹⁰ Pacarucu pan umanashatsu era pushi mil ecuita aramerechineque, ¿eje uma jiti tuque micuana jequeshachine anidadichine cuana tsehue? ¿Nime aputachine cuitadya ni taa micuana era jadya achineque? ¹¹ Era adebaya ama eje bucha juatsu micuanara levadura jadya ayaque bape cueyane jutidya ayaque. Yudijidya tuque quisarati anucaya. Necanaruticue bacue fariseo cuanaja, saduceo cuanaja levadura tsehue, —jadya ecuanara Jesúsra anucacuare.

¹² Chamacama ecuanara adebacuare fariseo cuanara, saduceo cuanara jadya bahuityayaque jadya tura ayaque. “Levadura tsehue canarutitaquíque ama”, tujatu jadya acuare.

Pedrora “Jesús tu Mesías Yusuja Emepeque” cuejacuareque (Mr 8.27-30; Lc 9.18-21)

¹³ Jesús tu cuacuare Cesarea Filipino epu ebari japadama anitaya cuana queja. Cuayara tura ecuanara bacaduranaticuare:

—¿Eje buchatu ecuita cuanara ecue ishú inime tupuya?

¹⁴ Ecuanaratu quemitsacuare:

—Umae cuanarami aya Juan Ecuita Cuana Utsaquíque emajuque enetitsuranucaque jadya. Peya cuanarami Elías jadya aya. Peya cuanarami Jeremías jadya aya. Peya cuanarami ejeque cuana Yusu equeque quisarati cuejaquíque baba cuana anicuare patyaque jadya aya, —jadya tuque ecuanara acuare.

¹⁵ —¿Micuanara bacue, ique ai jadya aya? —jadya ecuanara Jesúsra bacaduracuare.

¹⁶ —Miquemi Mesías, Yusuja Emepeque. Miquemi Yusu Chachaja Ebacuaque, —jadyatu Simón Pedrora Jesús acuare.

¹⁷ —Jadidya ique. Yusura jida amerecue, Simón Jonásja ebacuaque. Ni ejeque maju aquira amami adebamerehua riyaque. Ecue Etata barepajurami adebamerehua.

¹⁸ Miquemi Pedro. (Micue ebacani tu “Tumu aija bucushataquímaque” jadique). Mira quisarati ahuarami ejitaju amerehua mique eaqueja catyatihuaque. Cuadishaya mique ecue quisarati cueja ishú, ecue cuanaque ique dyaque jida adebamere ishú. Aija aputashataqui ama, ni yuamaturataqui amatu eaqueja catyatiya cuanaque. Ni ejeque Satanásja ecuadishara tuna eyuamaturau ama. ¹⁹ Erami casa

tyaya Yusura naruyaju judiru ishuque cueja ishu. Era etsecue pacasha ishu yahue etyau bucha tuque. Mira riyaque yahuaju “Jucha metse” jadya ayaquetu Yusura barepaju “Jucha metse” jadidya abunque. Mira riyaque yahuaju “Jucha metse ama” jadya ayaquetu Yusura barepaju “Jucha metse” jadya amadya abunque —jadyatu Jesúsra Pedro acuare.

²⁰ Tume ecuana Jesúsra acuare:

—Necuejaume jari ni ejeque buchique ique Mesiasque, —jadya tura ecuana acuare.

Jesús eje bucha iyetanadadie juyaque cacuejaticuareque
(Mr 8.31–9.1; Lc 9.22–27)

²¹ Tumeque huecaca equetu Jesús cacuejatitibunecuare ecuana tura mepehua cuana queja tuque eje bucha judadiyaque.

—Eje tupu cuaya Jerusalénju. Emuiba cuanara, pae cuanaja huaraji cuanara, cacuatsashati bahuityaqui cuanara jadya dyaque nerecaturadadiya. Iyemeradadiya tunara ique. Quimisha huecaca juatsu netitsuranucaya, —jadya tura ecuana cuejatibunecuare.

²² Pedroratu ejenecuare ama Yusuja Emepeque jadya ejudadiuque. Jadya tibudya tujatu peya queja ihuara acuare. Ecuana peya queja jacameretsu piji tujatu Jesús nereda atibunecuare:

—Jadya quisarati aume. Yusura iyuhue batsacue mique, mira cuejahua bae judadi ishu ama, Ecuana Cuatsashaquique. ¡Arequemi jadya ejudadiu ama! —jadyatu Pedrora Jesús aticuare.

²³ Jesusratu huareretsu Pedro jadya acuare:

—Satanástu mique equé quisaratiya. Maju aqui cuana jaque jutidya tuquemi inime tupuya, Yusu jaque ama. Bacacarama tuque aya mique equé Satanás ama amara cuejayaque, —jadyatu Jesúsra Pedro acuare.

²⁴ Tume tura ecuana tura mepehua cuanaque isaracuare:

—Micuana eatsehue junenicara juyaque juatsu, era cuatsashaya equé neanicue, micuanaja biji equé juneniyaque nime aputatsu, arepa micuana canerecati, maju jadya jutauqui ama bucha, curusuju etata ejuu bucha. ²⁵ Micuana ni catehuatiya eaqueja ecatyatique eiyetauju, ejetsunue ama micuana anibuque. Tume micuana majubuque ni eje tupu Yusu queja judiru ishu ama. Micuana ni eaqueja catyatihua baatsu iyetaya, Yusu tsehue micuana anisiribuque, arepa micuanaja ecuita ririya ama bucha. ²⁶ Ecuita ni ijahuaja etiquiju judirubuque, ni aishu buchique tujatu jida juhua ama riyaque yahuaju tuja dutya ai anihuaque. Ni aishu buchiquetu jida ama dyaque chipiruda juishu, majudaditsu

dutyadya shanadadiya tibu. Aijamatu ni ai buchique micuanara maju ishü ama etsujetyauque. ²⁷ Ejeque huecaca IQUE ECUITA junanucabuque. Barepaju Yusu tsahuaqui cuanara tajibebuque. Ique junanucayajutu dutyara babuque ecue Etataja casa. Tsujetyanabuque tuna peadya peadya eje bucha anie tuna juhua eque. Era amereya eque juya cuanaque tuna jida tsehue babuque. Era amereya eque juya ama cuanaque tuna jidama abuque. ²⁸ Umae micuana rehuaque majuhuishaya ama, dutya era ecue casa tsehue narutibuneyaque badadiya tupu, —jadya tura ecuana acuare.

17

Jesús cabapeticuareque

(Mr 9.2-13; Lc 9.28-36)

¹ Shucuta huecaca juatsutu Jesúsra dujuicare emata barudaju Pedro, Santiago, Juan jadya. (Juan tu Santiago tsehuequique jucuaré). ² Tuhuadyatu tunara petayaju cabapeticuare. Tuja ebutsequinitu tiquida jucuaré, ijeti bucha. Tuja unatu pajada, huecada dyaque tiquida jucuaré. ³ Masadaque amatu Moisés yanume, Elías yanume jadya ejitaju jucuaré. Tume tatse Jesús tsehue quisaratinacuare. Tuatsehue cuacuare cuanaratu bacacuare quisaratiyaju. ⁴ Jadya baatsutu Pedrora Jesús acuare:

—Ecuana Cuatsashaquique, dyaque jida taa ecuana rehüa. Micue jadya inimeque juatsu taa ecuana eau quimisha erere, peadya micue ishü, peya Moisésja ishü, peya bacue Eliasja ishü, —jadya tujatu acuare.

⁵ Pedro quisaratiya jarijudya tuna huani tiquidara dunutillacuare. Tume tunajatu bacacuare huani ducuque Yusu jadya quisaratiyaju:

—Riyaque rique ecue Ebacua dyaque iyuhuedaque. Dyaque pureama ishü rique aya. Nebacajacaume. Eje bucha tura cuejaya eque nejucue, —jadya tuna Yusura acuare.

⁶ Jesús tsehue cuahua cuanaque tuna jadya bacatsu dyaque bajida jucuaré. Jadya tibu tunajatu chichucata juatsu remetsu ebutsequini tsehue yahua tseracuare. ⁷ Tume tuna Jesúsra jipetitsu isaraticuare:

—Nenetitsuracue. Bajida nejuume.

⁸ Bajiyunucatsu tunajatu banucacuare ama Moisés, Elías jadya, Jesús camadya.

⁹ Emata juque butejeyara tuna Jesúsra cuatsashacuare:

—Necuejahuishaume jari ni ejeque buchique micuanara eje bucha bahuaque. IQUE ECUITA majuhuaque, chacha netitsuranucahaju piisi ecana necuejacue, —jadya tuna Jesúsra acuare.

¹⁰ Tuatsehue cuahua cuanaratu Jesús bacaduracuare:

—¿Eje bucha juatsutu cacuatsashati bahuityaqui cuanara Eliaspa icuene junabuque, Mesías junama jariju, jadya aya? —jadya tunajatu bacaduracuare.

¹¹ Tura tuna quemitsacuare:

—Tunara bahuityayaque tu yuneridya. Eliastu icuene junabuque. Turadyatu dutya bajejenabuque. ¹² Pusha amadya micuana cuejaya. Elías buchiquetu amena junahuadya. Dutya jujerira tunajatu adebacuare ama. Eijacabacaque tunajatu jahue jahue acuare, tunara acara aya eque. Ique tunara tumbaedyabuque, —jadya tujatu ecana acuare.

¹³ Tura jadya quisarati ayajutu tuatsehue cuahua cuanaja inime juticuare Juan Ecuira Cuana Utsaquiuedya Mesías junamaju junataqui jucuareque.

Jesúsra ebacua piji jahua cuanara quijahuatishayaque quijahuatishajacacuareque

(Mr 9.14-29; Lc 9.37-43)

¹⁴ Emata juque tuna butecuare. Jetiama ecuitara ihuayajutu Jesús judirucuare. Jesús, quimisha tuatsehue cuahua cuanaque jadya tuna ecuita cuanara ihuayaju judirucuare. Tumetu peadya ecuitara Jesús jipeticuare. Tumetu chichucata jucuare tuja yacuaju tuaqueja canerecatiyaque.

¹⁵ —Ique Cuatsashaquique, nrecabacue ecue ebacua. Manu tuque ecue juya. Dyaque nrecadatu juya. Eje uma ri-huitu eju etiquiju, jadya ama juatsu ena dedaju. ¹⁶ Riya behua mira mepehua cuana queja jahua cuana ijehuecuinamere ishú datse. Ijehuecuinataqui ama tunajatu bahua, —jadya tujatu Jesús acuare.

¹⁷ Jadya bacatsutu Jesúsra acuare tuhua jucuare cuanaque:

—¡Micuana micuana quejeneti baecua, cuejataqui ama jadya! Arepa micuana era ayaju bahua ama bucha, adebaya ama jaridya tuque micuana Yusuja casa. ¿Eje tupu cuita micuana eiduu? Nebecue requeja ebacua piji —jadya tuna Jesúsra acuare tuhua jucuare cuanaque.

¹⁸ Behuajutu Jesúsra nereda acuare jahua ebacua piji quijahuatishaquique:

—Cuinanacue riyaque ebacua piji quejaque, —jadya tujatu acuare jahua.

Nereda aatsu tujatu cuinanashacuare. Tumeque ura cuitadyatu ebacua piji quijahuatijacacuare, ni eje tupu jadya quijahuatinuca ishú ama.

¹⁹ Jadya juatsu tuque ecuana Jesús tsehue camadya cabatitsu bacaduracuare:

—¿Eje bucha juatsu tuque ecuana ijehuecuinataqui ama bahua tumeque ijahua ebacua piji yuamaturaquique? — jadya tuque ecuana acuare Jesús.

20 —Ijehuecuinataqui ama tuque micuana tumeque ijahua bahua, era ijahua cuana ijehuecuina ishuque casa tyahuaque ejeneriya ama tibu. Micuanara ni ejenequena juhua, paju riya piji cuana; ni ainya jutidya tuque micuana ataquima ama ebau. Emata ni micuana eau: “Netisicuacue”, enetisicuaudya tuque, era casa tyahuaque ejenehuaque juatsu. Mostaza caca achaacha piji; jadya ama buchatu baruda mostaza acui daneya. Tumbaedy a riya piji cuana ni micuanaja eaniu quejeneti, eaudya tuque micuana ai ataquima buchique. ²¹ Micuanara ni Yusu bacaya tuja riyaque casa tyashu, arama ni micuana equibetiu, eaudya tuque micuana riyaque. Aijamatu peya eje bucha eque aishuque, —jadya tura ecuana acuare.

Jesús eje bucha iyetanadadie juyaque cacuejatinucacuaque

(Mr 9.30-32; Lc 9.43-45)

²² Galilea yahua queja dutya juneni juyaque jari ecuana Jesúsra cueja beta acuare tuque eje bucha judadiyaque.

—Ejera cuana tsetatsu inameredadiya IQUE ECUITA. Inameretsu tura ique iyecara juya cuana queja iyemeredadiyadya. ²³ Iyedadiya tunara ique. Iyehuaquimisha huecaca juatsu netitsuranucaya, —jadyatu cacuejaticuare.

Jesús iyetanadadiyaque cacuejatiyaju bacatsu ecuana dyaque capeya inimeticuare.

Jesúsra tuque tsujebacayaju Yusuja etare juque mere tsahua ishu tsujetyacuareque

²⁴ Jesús ecuana tsehue Capernaumju juetihuajutu Yusuja etareju mere juya cuanaque jecuare. Tuna tuna chipiru ecuanaja tyabahueque Yusuja etareju ai quemi, tsujetya jadya aishuque sitaqui cuanaque jucua. Pedro jipetsu tunajatu bacaduracuare:

—¿Tsujetyayadyatu chipiru tsehue Micuana Bahuityaquira Yusuja etareju tsujetya ishuque?

²⁵ Pedrora tuna quemitsacuare:

—Jejee, tsujetyayadya tuja tuque, —jadyatu Pedro jucua.

Pedrotu Jesús etareju netiyaju nubiticuare. Nubitihuajutu Pedroja isarama jariju cuitadya Jesúsra isaratsacuare:

—Riyaque yahuaju ecuatsashaqui cuanara peya yahuaju cuanaque ijahue aatsu ¿eje cuanaque tunajatu chipiru bacaya tuna naruquija ishu? ¿Tunaja yahuajuquedya jutidya

tuna bacaya, tunara catiju ijahue ahuaque ni taa? ¿Eje buchami adebaya, Pedro?

²⁶—Catiju ijahue ahuaquedya, —jadyatu Pedrora acuare.

Jesústu quisaratinucacuare:

—Tuyudyami juya. Tunaja yahuaju cuanajatu tsujety-ataqui ama ni riya piji buchique. Jutaquiju, ique Yusuja Ebacuaque juya tibu, ecuetu tsujetyataqui amadya tunara Yusuja etareju ishucue ique tsujebacayaque. ²⁷ Jadya ama bucha tuque tsujetyadya, tuna ecahuaitiu tibu. Cuacue beiju. Huica mutya jutucue. Tinutinu metse juyaquedya acue. Jaeja ecuatsajudya tuquemi chipiru dadiya. Tumeque chipiru tu tupu tunara ique tsujebacayaque tsujetya ishu, tumbaedya micue. Jae juque quemitsu, dujucue Yusuja etareju. Tsujetyaticue yatseja tunara tsujebacayaque, —jadyatu Jesúsra Pedro acuare.

18

¿Ejeque tu dyaque inime metseque?

(Mr 9.33-37; Lc 9.46-48)

¹ Tume patya tuque ecuana Jesúsra mepehua cuanara jipetitsu bacaduracuare:

—¿Ejeque ecuana dyaque inime metseque jubucue, mique enaruqui judadihuaju ecuana dyadi mique tsahuaqui juatsu? —jadya tuque ecuana bacaduracuare.

² Tume tujatu ihuaracuare ebacua piji tuhua netiya baatsu. Ihuaratsu tujatu nityacuare ecuana patya.

³—Riyaque micuana era cuejayaque ri yunerique. Peadya peadya micuana micuana taca casumiti jutaqui ama. Inime metseque ama bucha micuana jutaqui, riyaque ebacua piji bucha. Jadya juyaque juatsu camadya micuana judirubuque eju Yusura naruyaju. ⁴ Ejeque dutyaja jetiedyaque cabatiyaque, riyaque ebacua piji bucha dyaque jetiedyaque, tumequetu dyaque emui jubucue Yusura dutya naruyaju.

⁵ Micuanarani ecue cuanaque jida tsehue baya, arepa riyaque ebacua piji bucha paju ama bucha, idya datse micuana jida tsehue baya, —jadya tura ecuana acuare.

*Peya cuana cajuchatishaquique dyaque canerecaticu-
buqueque*

(Mr 9.42-48; Lc 17.1-2)

⁶ Jesúsra ecuana bahuityanucacuare:

—Ejera riyaque ebacua piji bucha cuanaque cajuchatishayaquetu Yusura dyaque nerecaturabuque. Dyaque jidatu majutaqui juhua ejeque cajuchatishamaquedya. Dyaque jidatu peya cajuchatishaquique tumu ebari epitiju risitsu bei dyaque dedaju ijehuetaqui juhua. ⁷ Dutyatu

riyaque yahuaju cuanaque nrecada juya, peya eje buchadya cajuchaticara jadya juya cuanaque aniya tibu. Majuma jari tuputu ecuita cajuchaticara jujacaya ama. ¡Dyaquetu nrecada jubuque peya eje buchadya cajuchaticara juya cuanaque!

⁸ “Emetucu tsehue ni micuana cajuchaticara juya, necatubuticue cajuchaticara juya, jidamaque acara ayaque micuanaja aishu ama. Cuacara ni micuana juya eju micuana cuataqui amaju, cajuchaticara ehuachi necatubuticue eju micuana cuacara juyaju cuaishu ama. Nejacacue cajuchaticaraque. Dyaque jidadyatu bipidya, rudurudu Yusu queja judirutaqui, bibeta, huachi beta jadya ijahuaja etiquiju enubidiruuque, etiqui ticu baecuaju. ⁹ Micuanaja petataquimaque ni micuana petacara aya, necahuaticue yatuca cajuchaticaraque, jidamaque peta ishuhu ama. Nejacacue cajuchaticaraque. Dyaque jidatu Yusu queja judirutaqui atuca pidya camadya, ijahuaja etiquiju atuca beta enubidiruuque, etiqui ticu baecuaju.

Cristo queja nimee juyaque ama tu uhuisha cuji eju buchique

(Lc 15.3-7)

¹⁰ “Nebijidamaduraume eaqueja ecatyatique ai ama jipe-nee juya cuanaque. Etata barepajuquetu bahue tuna ai juyaque. Barepa juque quisarati bepuji cuanaquetu tuna tsahuaqui cuanaque Yusuja yacua juque netisicuayaque ama. ¹¹ Ique riyaque yahuaju junahua Yusu adeba baecua cuanaque, uhuisha cuji eju bucha cuanaque inajacamerera. ¹² Cuejaya micuana riyaque cuatsabiji piji micuana pana huecasha aishu. Peadya ecuitaja cien uhuisha eaniu. Peadya tuja cuji ejuu. ¿Eje buchatu tumeque ecuita ejuu? Eshanau jari di taa tujatu puscurucu tunca puscurucu earacana taracaju. Eishautu eju aija eje bucha ataquí amaju. Jadya shanatsutu pereu amadya ecuau uhuisha cuji ejuque sarera. ¹³ Esareudya tujatu dadiya tupu. Daditsutu pureama eau dadihuaque, aputama cuanaque pureama eau bucha ama. ¹⁴ Uhuisha naruqira ni peadya uhuisha aputashacarama eau bucha, tumbaedy a micuanaja Tata barepajura micuana ijahuaja etiquiju nudyacarama aya, ni ejeque eaqueja ecatyatique ai ama jipenee juya cuanaque, —jadya ecuana Jesúsra acüare.

Pebara jidama ayaju ecuanaja nrecabataquique
(Lc 17.3)

¹⁵ Jesúsra ecuana bahuityanucacuare:

—Ejera ni micuana jidama aya, tuta tacaju neisaraticue. Nehuecashacue tuque jidama juhuaque. Bacaya ni tura

micuana micuanara cuejayaju, cacuejatiyadyatu micuana jidama ahuaque, tume tura micuana jidadya carenenucaya. ¹⁶ Tura ni micuana bacacarama aya, adebacarama ni tu aya tuque cajuchatihuaque, necuejacue peadya, jadya ama juatsu beta eaqueja ecatyatique, cajuchatihuaque isarara micuana tsehue cuaishu. Micuana tsehue inime bajejera cuaya ecatsera neredadya paati. Tatseradya paba micuana tumeque inime bajeje ishuhue cacasatihuaque. ¹⁷ Tumeque ecuitara ni bacacarama aya micuana tsehue cuayaque ecatsé, tume necuejacue ecue cuanaque casitatihuaaju. Dutya ecana necuejacue. Tunara cajuchatihuaque paihuara, peya cuana tsehue casitatisatsu dutyaja yacuaju nereda aishu. Tura ni bacacarama cuitadya cuejayaque aya, tume amena bijidamadurayaque ebau bucha bae neacue. Yusu adeba baecua cuanaque, jadya ama juatsu enaruquija ishuhue chipiruhue sitaqui cuana bucha bae neacue ecajuchatique inime cacuareticarama juyahu tibu.

¹⁸ “Micuanara riyaque yahuaju ‘Jucha metse’ jadya ayaquetu Yusura barepaju ‘Jucha metse’ jadidya aya. Micuanara riyaque yahuaju ‘Jucha metse ama’ jadya ayaquetu Yusura barepaju ‘Jucha metse’ jadya amadya aya.

¹⁹ “Micuana riyaque yahuaju aniya cuanaque ni micuana casitatiya inime jidamaque bajeje ishuhue paju beta piji, betaja tupu ni metseja inime Yusu bacayaque, tyadadiyadya tura metse. ²⁰ Ejudyahue jutidya micuana ecasitatiu beta, jadya ama juatsu quimishahue eatsehue quisarati ishuhue, ique tuhuadya micuana tsehue, —jadya ecuana Jesúsrahue acuhue.

²¹ Jadya bacatsutu Pedrorahue jipetitsuhue bacaduracuhue:

—Ejera ique jidama ajacaya amaju, ¿eje uma nrecabahu tuque eahu tume ique jidama aquihue? ¿Pacarucu nrecabahu ni taa tu tupudyahue? —jadyatu Pedrorahue acuhue.

²² Jesúsrahue quemitsacuhue:

—¡Aijama! ¡Tupu ama tuque! Tura jidama ayaju nrecabahu jacaumedyahue; pushi cientos puscurucu tunca nrecabadyahue acue, —jadya tujatu acuhue.

Mere pujira tuja ecare nrecabacarama acuhueque cuatsabiji

²³ Jesúsrahue ecuana bahuityanucacuhue:

—Cuejaya micuana riyaque cuatsabiji Yusura dutya naruyaju eje buchihue micuana bahue juishuhue. Jucuharetu ecuari. Tumeque ecuarithu tuque merequi cuanajahu manu bajeje jucarahue jucuhue. ²⁴ Tuque jadya juyaju tunajatu ecanahue becuare tuaquejahu peadyahue beu, peadyahue beu. Becuhare tuna tuaquejahu manuhue nerihue. Eje bucha piyebatilla tupu ama jujeri tujatu manu tuatsehue anicuhue. Eje uma

millones tujatu manu jucuaré. ²⁵ Tumeque mere pujijatu aijama chipiru jucuaré tuja manu tsujetyatilla ishu. Tura ai tsehue tsujetyataqui ama bayajutu ecuarrira acuaré: “Catyati mique aya, micue huane, micue bacua cuana jadya tsehue. Casada micuana mere jutaqui. Dutya chipiru micuanara inayaque micuanara tyaaajeya dutya micuanara manu tsujetyatillaya tupu”, jadyatu ecuarrira acuaré ecuita manu metseque. ²⁶ Jadya ayajutu ecuita manuquique tuja yacuaju chichucata juatsu canerecaticuaré: “Nerecabacue ique, Ique Cuatsashaquique. Cahuaitiume. Ihuacue jari. Tsujetyatillayadya mique era”, jadya tujatu acuaré. ²⁷ Ecuarriratu nerecabatsu tuja manu apupashacuaré. Apupashatsu tujatu tuaqueja manuqui juhua bucha nime ama bacuaré. Pana inajaca tujatu acuaré.

²⁸ “Tumeque ecuita ecuarrira yacua juque cuinanatsu tujatu tsurutsacuaré peya tuja ecare, tuaqueja eje uma piji manu aniyaque. Erumuju inatsatsu tujatu rumupuditsu iye-cara acuaré. ‘Iyacua cuita tsujetyacue micue manu eaqueja aniyaque’ jadyatu ecuita ecuarrira manu apupashahuara tuja ecare atsacuaré. ²⁹ Tuja ecaretu tuja yacuaju chichucata juatsu canerecaticuaré tuaqueja: ‘Ihuabacanucacue jari taa ique. Tsujetyayadya taa mique era’ jadyatu manuquirá acuaré. ³⁰ Tura bacue ihuacarama acuaré. Inameretsu tujatu etare apudaju ishameracuare, tura manu piji tsujetyaya tupu. ³¹ Etare apudaju nubihuaja ata cuanatu peya inime cuita jucuaré. Jadya tibu tunajatu ecuarrira cuejaticuaré, tura peya jadya ahua baatsu. ³² Tumetu ecuarrira tumeque ura cuitadya ihuaramerecuare tura manu apupashahuaque. Ihuaratsutu ecuarrira acuaré: ‘¡Miquemi dyaque jidama! ¡Cuejataquima mique! Era tuque micue manu jetieque ama apupashahua mique eaqueja canerecaticuaju. ³³ Jida tsehue tuquemi micue ecare nerecabataqui ahua, era mique nerecabahua bucha’ jadyatu ecuarrira acuaré. ³⁴ Dyaque cuita cahuaititsutu ecuarrira etare apudaju ishameracuare. Eterinetiya cuanaque naruqui cuanaque tujatu acuaré: ‘Ijahue ijahuemeree neacue tura dutya tsujetyaya tupu’. Jadyatu jucuaré tuja ecare manu apupashacarama acuaréque.

³⁵ “Jadidya micuana ecue Etata barepajura abuque micuanara yuneri cuitadya micuana jidama aquique nerecabayaque ama juatsu, —jadya tura ecuaná acuaré.

19

Ecaquemitique cajacatitaquiquemaque

Jesúsra bahuityacuareque
(Mr 10.1-12; Lc 16.18)

¹ Jádique cueja amena aatsutu Jesús dirucuaré

Galilea yahua juque. Judea yahua jutu cuacuare Jordán cueri yueque macare. ² Jetiama ecuitaratu tupujudya acuare. Jesusratu chachanecuaré ujejeda cuanaque.

³ Tumetu umae fariseo cuanara jipeticuaré. Quisaratishatsu tunajatu pusha pusha tsehue jidama amerecara datse acuare. Bacaduraticuaré tunaja tuque:

—¿Ecuanaja ehuané amena bijidama baatsu, ijehuetaquidya tuque ecuanaja? —jadya tunajatu aticuaré.

⁴ —Eisara micuanaja Yusuja quisarati. Adebayadya tuque micuanara tuhua eje bucha ehuenéque. Jadya tu ehuené: “Yusuratu yuequedyadya iyacuare deca, epuna jadya carequi juishu”. ⁵ Tumbaedyá tu ehuené: “Jadya tibudyatu decaja jacataqui etataque, ecuaque, carequi juatsu. Caquemitihuaju tatse Yusura baya peadya camadya bucha”. ⁶ Jadya tibu tatse amena beta ama, peadya camadya. Yusura cuitadya casitashahua tibu, tujatu ecatsé peadya camadya bucha baya. Jadya tibudya tatse ni ejeque ecuitaja buchique cajacatishataqui ama, —jadya tuna Jesúsra acuare.

⁷ Tumetu fariseo cuanara bacaduranucacuare:

—Miquemi bahuédyá Moisésra cuatsashahuaque. “Ijehuecara ni micuana aya micuanaja huane, neinamerecue quirica eje bucha juatsu micuanara ijehueyaque cuejayaque. Inameretsu micuanaja huane neijehuecue”, jadya tujatu huenequere béru. ¿Eje bucha juatsu jatsutu Moisésra huenequere ehuenéque tsehue cajacatitaquique, cajacatitaquique ama inime aniya ama bucha? —jadya tunajatu bacaduracuare Jesús.

⁸ —Moisesratu adebacuareadya Yusuja cuanaque ama Yusuja biji equé ama anicara juyaque, tunaja biji equedya jutidya. Jadya tibudya tujatu huenequere ecaquemitiqué cajacatitaquique. Jadya ama buchatu Yusura yuequedyadya inime iyahua ecaquemitiqué cajacati ishú ama. ⁹ Era micuana cuejaya. Eje bucha juatsu cuita camadya micuanaja huane ijehuetaquique, micuanaja huane peya tsehue jarayaju daditsu cuta camadya. Micuanarar ani micuanaja huane ijehueya eje bucha juatsu pijidya jutidya, jadya juatsu micuana peya tsehue caquemitiya, Yusu tuque micuana cahuaitishaya. Tuja yatucaju tuque micuaanaja icueneque epuna huane neri jaridya, ai tupujuque ama, —jadyatu Jesúsra fariseo cuana acuare.

¹⁰ Ecuana tura mepehua cuanara tuque ecuana acuare:

—Caquemititsu eje bucha cajacatitaquima juya tibu, jutaquiju taa ecuana caquemitima siri didya jutaqui, —jadya tuque ecuana acuare Jesús.

¹¹ Jesúsra ecuana quemitsacuare:

—Dutya ama micuana caquemitima siri eaniu. Yusura jadya ani ishü casa tyahuaque cuita camadyatu jadya anie ejüü. ¹² Bape bape inime equetu peadya peadya deca cuana huanema. Umaetu ai jidamaquedya cuinanaya. Jadya juat-sudya tuna cabacuati baecua. Jadya tibu tuna caquemitiya ama. Peya cuana bacue cabacuatiya ama, peyara ujeda eje bucha ahüaju. Peya cuana bacue carequi jucarama juya, Yusu mere juyaju aija buchique pere ishü ama. Caquemitima paani Yusura jadya ani ishü casa tyahua cuanaque, —jadya tura ecuana acuare.

Jesúsra “Yusura jida panaru ebacua cuana” jadya acuareque (Mr 10.13-16; Lc 18.15-17)

¹³ Tumetu umae ebacua cuana etata cuanaquera Jesús queja dujubarecuare.

—Emetucu micue iyacue ebacua cuanaja iyuca dyaque. Bacacue ecana Yusu queja, tuja ecana jida naru ishü, —jadya tunajatu Jesús acuare.

Ecuana tuna jadya baatsu, nereda jutidya atsabarecuare ebacua cuana tsehue cuacuare cuanaque:

—Nepereume Jesús, —jadya tuque ecuana ecana atacuare.

¹⁴ Ecuana jadya quisaratiyaju ecuana Jesúsra acuare:

—Pajedya ebacua cuana eaqueja. Necuadishaume ecana eaquejaque. Esiri cuanaque camadya ama, tumbaedyä tuna dyadi tuna Yusu jaquedya, —jadya ecuana Jesúsra acuare.

¹⁵ Tuna dyaque ebi rirutsu tujatu peadya peadyaja iyuca dyaque emetucu iyabarecuare, Yusu tuna tsehue jadique adeba ishü. Jadya amena au jadya juatsutu tuhuaque dirucua.

Ecuita chipirudaque Jesús tsehue quisaraticuareque (Mr 10.17-31; Lc 18.18-30)

¹⁶ Peya huecacatu Jesús ecuitara batitsu bacaduraticuare:

—Jidaque Ebahuityaquiue, ¿ai mere tuque jidaque eau, Yusu queja judiru ishü ni eje tupu tuque jaca ishü ama? —jadya tujatu Jesús aticuare.

¹⁷ Jesusratu quemitsacuare:

—¿Adebayadyami eje buchique quisarati ahuaque? ¿Eje bucha juatsu mira “Jidaque Ebahuityaquiue” jadya aya? Yusu peadya camadya tu jidaque. Jutaquiü, Yusu queja judirucara juatsu, Yusura cuatsashaya eque jucue, —jadyatu Jesúsra acuare.

¹⁸ —¿Ejeque cacuatsashati cuana eque jutaqui? —jadyatu ecuitara bacaduracuare.

—Quiyeti puji juume. Peyaja ehuanegue micuique bucha aniquere aume. Chiri juume. Ni ejeque buchique

pusha pusha aume. ¹⁹ Muibacue mique baquique, mique susuquique jadya. Iyuhue tsehue bacue peya cuana. Mique cuitadya iyuhueda cabatiya bucha, iyuhuee peya bacue, —jadyatu Jesúsra acuare.

²⁰ —Dutya riyá cuanaque cacuatsashati cuana tuque muibacuare nanada equeradya. ¿Ai tuque ecue peya bataqui ama Yusu queja judiru ishu? —jadyatu ecuitara acuare.

²¹ Jadya bacatsutu Jesúsra jadya acuare:

—Yusura amerecara aya eque jucara juyaque juatsu, dutya micue aniya cuanaque catyati aticue. Catyati aatsu tyabarecue chipiru nrecada cuanaque. Dutya micue ai catyati aatsu, juetinucacue eaqueja, eatsehue juneni ishu. Eaqueja ni mi ecatyatiu, tume tuque micue eaniu Yusuja cuanaja ishu tuja barepaju aniyaque, —jadyatu Jesúsra acuare.

²² Jadya ayaju bacatsutu ecuita dyaque peya inime dirucure, tuja dyaque jetiama aniyaque catyati acarama aya tibu.

²³ Tumeque ecuita yuneridya tuatsehue junenicarama juyaque adebatsu ecuana Jesúsra acuare:

—Yuneri cuitadya micuana riyaque cuejaya. Jetiama ai aniya cuanaratu dyaque ibeda, masada baya eaqueja pana catyati juishu, Yusura dutya naruyaju judirutaqui juishu.

²⁴ Yudijidya cuejanuca micuana aya. Cahuayutu etsucuija cani eque eje bucha cuetitaqui ama. Tumbaedyá tuna tunaja ai aniyara eje bucha judirutaqui ama amereya Yusu queja, —jadya ecuana Jesúsra acuare.

²⁵ Jadya bacatsu tuque ecuana bape bacacuare.

—Chipiruqui cuanaque ni Satanás quejaque quinajacameretitaqui ama cabatiya, ¿ejeque jatsutu tuaquejaque equinajacameretiu? —jadya ecuana cabacaduratibarecuare.

²⁶ Jesúsra ecuana petacuare. Petatsu tura ecuana quemitsacuare:

—Ecuita ni tu tuta taca eje bucha quinajacameretie juma Satanás quejaque. Yusura peadya camadya tuna einjacamereu. Yusuja ishutu aijama ai ataquimaque, —jadya tura ecuana acuare.

²⁷ Jadya bacatsutu Pedrora acuare:

—Ecuana ecuana dutya cashanatihua miatsehue juneni ishu. ¿Ai tuque ecuana inabuque? —jadyatu Pedrora Jesús acuare.

²⁸ —Pusha amadya micuana cuejaya. Juetibuquetu huecaca dutya era iyacuaneyaque. Ique huaraji dyaque aridaque jubuque. Ique ecue eaniqui muidaju anibutebuque dutya ecuita peadya peadya eje bucha judadiyaque cueja ishu. Micuana micuana ique muitaya bucha muiyaedyá jubuque, peadya tunca beta earacana eaniqui cuanaju anibutehuaju. Micuanaratu narubuque peadya tunca beta

earacana cuare cuanaque Israel eque ejuracana cuanaque. Peadya peadya micuanaja eaniquijuradya tuque micuana ecana narubuque. ²⁹ Micuana ni cashanatiya dutya micuanaja ai aniyaque eatsehue juneni ishü, Yusura micuana tyaya dutya micuanara riyaque yahuaju sareyaque. Tura micuana tyaya micuanara sareya tupu dyaquedya jetiama, cien tyau bucha dyaque jetiama. Micuana ni etare cashanatiya, tura micuana tyaya eju ani ishüque. Cashanatiya ni micuana micuana tsehuequique epuna, deca cuana, micuanaja tata, micuanaja cuaa, micuanaja bacua cuana, tura micuana peya cuana queja iyuhue tsehue narumereya tunaja ata neri bucha. Cashanatiya ni micuana micuanaja tee cuana, tura micuana tyaya dutya micuanara ara ishü sareya cuanaque. Micuana majuhuaju tura micuana barepaju tuatsehue anishasiribuque ni eje tupu tuque jaca ishü ama. ³⁰ Iyacua dyaque inime metse cabatiya cuanaque tuna inime metse ama jubuque. Iyacua jetiedya inime metse ama cabatiya cuanaque bacue dyaque inime metse cabatibuque, —jadya tura ecuaa acuae.

20

Teeju mere puji cuana cuatsabiji equeque

¹ Bahuityanucacuare ecuaa Jesúsra:

—Cuejaya micuana riyaque cuatsabiji Yusura dutya naruyaju eje buchique micuana bahue juishu. Anicuairetu ecuita uva tee ebari metseque. Apudajudya cuitatu mere puji cuana sarera cuacuare, tuja uva ejahuanegue pitu ishü. ² Mere puji cuana daditsu tujatu ecana acuae: “Jida micuana tsujetyaya, peadya huecacaque mereja etsujequidya micuana tsujetyaya”. Tunaratu jidadya bacua peadya huecacaja etsujequidya tsujetyayaju. Jadya etsujequi bajejetsu tujatu ecana cuadishacuare teeju merera. ³ Quimisha ura juatsu, las nueve ura tupu dyanetu cuanucacuare mere puji cuana sarera. Plaza eque cuetiyaratu eje uma ecuita tsurucuare mere sare juneniya cuanaque. ⁴ Isaracuairetu ecana: “Micuana dyadi necuacuedya ecue teeju uva ejahuanegue pitura. Jida micuana tsujetyaya”, jadya tuna tee metsera acuae. Jadya ahuaaju tuna merera cuacuare. ⁵ Barepatyatu cuanucacuare mere puji cuana sarera. Las tres chinequeja dyanetu cuanucacuare mere puji cuana sarera. Tsurutsu tujatu ecana cuadishacuare tuja teeju merera. “Jida micuana tsujetyaya”, jadya tujatu ecana acuae. Jadya ahuaaju tuna merera cuacuare. ⁶ Las cinco chinequeja pijitu cuanucacuare. Plaza eque cuetinucayara tujatu ecana tsurunucacuare ecuita merema juneniya cuanaque. Banucatsu tujatu ecana jadya

acuare: “¿Ai micuana juya rehua dutya huecaca merema?”
 7 “Ni aira buchique ecuana mere ishü isaraya ama tibu”,
 jadya tunajatu quemitsacuare. “Jutaquiju ecue teeju mere
 nejuticue. Era micuana tsujetyaya jida”, jadya tuna tee
 metsera acuare. Jadya ahuaju tuna teeju cuacuare merera.

8 “Amena ijete nubihuie, las seis chinequeja cuana tujatu
 acuare tujá mayuruma: ‘Ihuaracue mere puji cuana tsu-
 jetya ishü. Tsujetyatibunecue ecana tupuju mere catibutihua
 cuana eque. Icuene cuita mere catibutihua cuanaque tupuju
 tsujetyacue’ jadya tujatu mayuruma acuare. 9 Tumetu las
 cinco chinequeja mere catibuticuare cuanaque casitaticuare
 mere juhuaque tsujetyata ishü. Inacuare tuna peadya hue-
 cacaque mere etsujequidya. 10 Jadya tujatu ecana tsujetyaa-
 jecuarere mere juhua cuanaque peadya huecacaque mere tsu-
 jedya. Amena chamacama judirunucacuare icuene las seis
 apudajudya mere catibutihua cuanaque tsujetya. Tunaja
 datsetu inime jucuarere: ‘Peadya huecacaque mere dyaque-
 dya tura ecuana tsujetyaya’. Jadya ama bucha tunajatu
 peadya huecacaque mere etsujequi piji cuita camadya in-
 acuare. 11 Etsujequi baatsu tuna tee metse tsehue cahuaitic-
 uare jipenee. 12 ‘Jidama mira ecuana tsujetyahua. Tupuju
 mere catibutihua cuanaque tuna peadya ura pijidya mere
 juhua. Ecuana bacue peadya huecaca yuta mere juhua ijete
 uquedaju. Jadya ama bucha mira ecuana tuna tsehue dutya
 tupu tsujetyae ahua’ jadya tunajatu acuare. 13 Tee metseratu
 bacacuare tuna quisaratiyaju. Tume tujatu acuare peadya,
 etsujequi baatsu quisaratihuaque: ‘Tata, jidadya mique tsu-
 jetyaya. ¿Adebaya ama jatsumi peadya huecacaque mere
 etsujequi tsujetya ishü yatseja quisarati juhuaque? 14-15 Ique
 bahue ecue chipiru tsehue ai juyaque. Era ni tsujetyacara aya
 dutya tupu las cinco chinequeja mere catibutihua cuanaque,
 las seis apudajudya mere catibutihua cuana tsehue, ni riya
 piji buchique micuana jidama ama tsujetyaya. ¿Mique ni mi
 cahuaitya ique jida juya baatsu? Jeedyá micue etsujequi.
 Dirucue’ jadyatu tee metsera acuare tumeque ecuita. Jadyatu
 jucuarere teeju mere jucuarere cuanaque.

16 “Jadya equedyatu tupuju cuanaque icuene; icuene cua-
 naque bacue tupuju, —jadya ecuana Jesúsra acuare.

*Jesús eje bucha iyetanae juyaque cacuejati quimisha ishü
 cacuejatinucacuareque*

(Mr 10.32-34; Lc 18.31-34)

17 Jesúsra ecuana Jerusalén diji eque cuayaque tura mepe-
 hua cuanaque peya queja amaca duju acuare, tuque eje
 bucha juyaque cueja ishü.

18 —Micuana micuana bahuedya Jerusalénju ique cuayaque. Neadebacue bacue ique eje bucha judadiyaque era cuejahuque. Pae cuanaja huaraji cuana queja, cacuatsashati bahuityaqui cuana queja tunara inamereya. Tunara ique aya “Paiyetanadya” jadya. ¹⁹ Israelita ama cuana queja tunara inamereya. Ijahue ijahue tunara aya. Ebi tsehue au, catsacatsa jadya tunara aya. Tataya tunara curusuju ique maju ishu. Quimisha huecaca majutsu chacha netitsuranucaya, —jadya ecuana Jesúsra acuare.

Santiago, Juan jadyaja ecuaquera ebacuaque ecitse Jesús tsehue huaraji juishu bacacuareque

(Mr 10.35-45)

²⁰ Tumetu Zebedeoja ehuanequera jipeticuare ebacuaque ecitse tsehue, Santiago, Juan jadya tsehue. Tuja yacuajutu chichucata jucuaque, tuaqueja canerecatiyaque. ²¹ Jesusratu epuna bacaduracuare:

—¿Ai micue?

—Mique dutya naruqui jutibuneyaque, ecue ebacua ecitse bacanishacue miatsehue enaruqui iyuca juishu. Emuita eanicuareju ecitse iyabutyacue, peadya micue jida equé amaca, peya bacue jani equé amaca jadya. Miatsehue muitapeadya ecitse paju, —jadyatu epunara acuare.

²² Santiago, Juan jadya ecitse jipetinucatsu tujatu ecitse isaratinucuaque:

—Metse metse baecua eje buchique metseja cuara bacayaque. Ique dyaque canerecatiyaque tu patsedaque ebuijiu buchique. ¿Ique canerecatiya bucha canerecatie metse ejuudya?

—Eiduudya tuque yatsera, —jadya tatsejatu quemitsacuare.

²³ —Pusha amadya metse cuejaya. Canerecatibuquedya metse, ique canerecatiya bucha. Jadya ama bucha ecuetu aijama cueja ishu ejeque ecue jida equé amaca, jani equé amaca jadya iyabutya ishu, eatsehue enaruqui juishu. Ecue Etatara camadyatu mepebuque tuhua iyabutya ishu, —jadyatu Jesúsra acuare Santiago, Juan ecitse.

²⁴ Tume ecuana, Santiago, Juan ecitsera bacayaque bacatsu, cahuaiticuare tatse tsehue. ²⁵ Jesúsra ecuana dutya tuaqueja ihuaracuare.

—Yahua juque huaraji cuanara tuna cuatsashaya, emechiquira cuatsashaya bucha. Casada cuanaratu jetiedya cuanaque casada tsehue cuatsashaya equedya amereya. ²⁶ Micuana micuana jadya jutaqui ama. Peya queja ni micuana camuimereticara juya, tunadya tuque micuanaja tsahuataqui. ²⁷ Ejeque muitacara juyaque juatsu,

necacasaticue peya cuana pureamatura ishu, micuana cuita camadya ama. ²⁸ Ique juya bae nejucue. Ique junahua riyaque yahuaju peya cuana tsahua ishu, tunaja ique tsahua ishu ama. Tuna jiteque maju ishu, eaqueja catyatihuaju tuna Ijahua quejaque inajacamere ishu ique junahua, —jadya ecuana Jesúsra acuare.

Jesúsra beta shuhuique ecitse capetatishacuareque
(Mr 10.46-52; Lc 18.35-43)

²⁹ Ecuana Jericó juque cuinanayajutu Jesús jetiama ecuitara tupujudya acuare. ³⁰ Tuhuatu beta ecuita shuhuique ecitse juanicuare ediji jiruru. Jesús cuetiyaque bacatsu tatse quiquecuare:

—¡Ecuana Cuatsashaquique, miquemi Yusuja Emepeque, David eque ejuracanaque! ¡Nerecabacue taa yatse! —jadya tatsejatu quique eque acuare.

³¹ Ecuita cuanara tatse nereda acuare tatse abacasha ishu. Tatse bacue jadya ayaju dyaque jebuda quiquecuare:

—¡Ecuana Cuatsashaquique, miquemi Yusuja Emepeque! ¡David eque ejuracanaque mique! ¡Nerecabacue taa yatse! —jadya tatse quiquecuare.

³² Tatse juaniya tuyu junatitsutu Jesús netinaticuare. Ihuaratsu tujatu ecitse bacaduracuare:

—¿Eje bucha metse eaqueja catimerecara juya? —jadya tujatu ecitse bacaduracuare.

³³ —Ecuana Cuatsashaquique, capetatishanucacue yatse, —jadya tatsejatu acuare.

³⁴ Jadya juyaju tatse Jesúsra nerecada bacuare. Jabacuare tujatu ecitse yatucaju. Tura jadya aya tsehuedya cuita tatse capetaticuare. Capetatitsu tatse Jesús tsehue junenicuare.

21

Jesús Jerusalénju judirucuarque
(Mr 11.1-11; Lc 19.28-40; Jn 12.12-19)

¹ Junaticuare ecuana Betfagé epuju, Jerusalén piji dyane. Emata baruda cuita ama Olivo Acui Quini bacaniju ecuana junaticuare. Junatitsutu Jesúsra icueneta cuadisha acuare beta tura mepehuaque ecitse.

² —Ecuanaja yacua tuyu epu achaachaju necuacue. Tuhua junatitsu tuque metse banatiya burra erisique netiyaju. Tuatsehuedya tujatu ebacua ehue ebarique. Nepisuticue. Pisutsu ecue nebecue. ³ Ejera ni metse aya: “¿Aishu tuque metse pisuya?”, “Ecuana Cuatsashaquiratu sareya. Masadama tujatu cuadishanucaya”, jadya neacue, —jadya tatse Jesúsra acuare.

⁴ Yuequedyadyatu Yusu equeque quisarati cuejaquira icueneta cueja acuare, jadyatu judadiya jadique. Jesús burro dyaque eque Jerusalénju (Sión bacanídyá tume) judiruhua-jutu beru cuejatanacuare baedya jucuare:

⁵ “Necuejacue Sionju aniya cuanaque:
‘Micuanaja ecuaritu micuana queja junaya.

Micuana catiju ijahue ara amatu junaya.

Burro dyaque equetu junaya.

Uu cabuti ishucue jabacua dyaque equetu junaya’ ”,

jadyatu Yusu equeque quisarati cuejaquique béru jucuare.

⁶ Jesúsra cuadishahuaju, tura amerehua equedya tatsejatu aticuare. ⁷ Yaratupu juatsu tatsejatu burra, burra jabacua jadya dujucuare Jesús queja. Judirucheretsu tatsejatu tatera jutuya tsehue titecuare. Tatera bajeje amena ahuaajutu Jesúsra isaanicuare. ⁸ Jesúsra isaanihuaju tunajatu jetiama tuhua cuanara tunaja jutu ishucua cuanaque pijabarecuare edijiju, tuque muiyaque. Peya cuanaratu ejaqui cuana huanabarecuare edijiju, tuque muiyaque. ⁹ Jesús icuene, tupuju jadya cuaya cuanaquetu quiquetibunecuare:

—¡Hosana! ¡Miquemi dyaque emuique ecuanaja Ecuari!
¡David eque ejuracanaque mique! ¡Jida paju Yusuja ebacaniju jeyaque! ¡Arida, dyaque casada jadyatu Yusu barepajuque! —
jadya tuna jubarecuare.

¹⁰ Tuequedyatu Jesús junaticuare Jerusalénju. Tuque junatihuaaju tuna dutya tumeque epuju cuanaque capuriticuare.

—¿Ai ri riyaque? —jadya tuna cabacaduratibarecuare.

¹¹ Ecuita jetieque ama tuatsehue junatihuaara tuna quemitacuare:

—¡Jesús riyá! ¡Yusu equeque quisarati cuejaquique riyá!
¡Galilea yahua juque epu Nazaret juque riyá! —jadya tuna jubarecuare.

Jesúsra catyati puji cuana Yusuja etare juque ijehuecuinatillacuareque

(Mr 11.15-19; Lc 19.45-48; Jn 2.13-22)

¹² Jadya juu jadya juatsutu Jesús Yusuja etareju nubidircuare. Nubitsutu dyaque cahuaiticuare, tuhua eje bucha juyaque baatsu. Jadya tibudya tujatu ecana etsecueju pana ijehuecuinatilla acuare catyati puji cuana, bacabaca puji cuana jadya. Tipacatillacuare tujatu chipiru cuarequi juya cuanaja mesa cuana. Huei catyati juya cuanaja ani ishucua cuanaquetu tumebaedya tipacabarecuaredya.

¹³ Cuinanashayaque tujatu ecana jadya acuare:

—Yusuja quisarati tu jadya ehucue: “ ‘Ecue etare tu eatsehue quisarati ishucue etare bacani’ jadyatu Yusu beru jucuare”. Jadya ama bucha tuque micuana chiri puji cuana

catehua ishuque cani bucha jutidya amereya, —jadya tuna Jesúsra acuare.

¹⁴ Tuhua Yusuja etarejutu shuhui cuanara, rudurudu cuanara jadya Jesús jipeticuare. Jipetihujaju tujatu ecana chachanecuare. ¹⁵ Pae cuanaja huaraji cuanara, cacuat-sashati bahuityaqui cuanara jadyatu bacuare Jesúsra shuhui cuanaque, rudurudu cuanaque jadya chachaneyaju. Bacuare tunajatu ebacua cuana quiqueyaju:

—Jesús, miquemi dyaque emuique! ¡David eque ejuracanaque mique!

Jadya bacatsu tuna cahuaiticuare dyáque.

¹⁶ —¿Bacayami ecana quiqueyaju? ¿Eje bucha juatsu tuquemi ecana jadya quiqueyaju bacayadya jutidya? —jadya tunajatu Jesús bacaduracuare.

—Jejee, bacaya tuque era. Yuneridya tuque micuanaja eisara Yusuja quisarati ehuenegue:

“Miquemi emui jubuque ebacua achaacha cuanaja, ebacua atsuju cuanaja.

Jeru eque tunarami pureama abuque”,

jadya tu ehue ne Yusuja quisarati.

¹⁷ Jadya aatsu tujatu ecana shanaquenacuare. Yudijidya dirunucatu jucua re Betaniaju, tahuiti ishu.

Jesúsra higuera “Cacacatinucanime ama mique”, jadya acuareque

(Mr 11.12-14, 20-26)

¹⁸ Apudajudya Jerusalén epu queja diruyaquetu Jesús aracara jucua re. ¹⁹ Bacuaretu acui higuera ediji jiruru. Baatsu tujatu jipeticuare, cacaqui bucha baatsu, ecaca tuja ejaqui cuana tsehue cuinanae jipenee juya tibu. Bacuare amatu ni peadya ecaca buchique ecuiju, ejaqui camadya. Jadya baatsutu Jesúsra quisarati tyacuare higuera:

—¡Cacacatinucanime ama mique! —jadya tujatu acuare.

Tura jadya aya tshuedya cuitadyatu higuera masadama raracuare. ²⁰ Acui rarahua baatsu ecua na tura mepehua cuanaque anajacatacuare.

—¡Masadama cuitari higuera rarahua! —jadya ecua na jucua re.

²¹ —¿Eje bucha juatsu micuana anajacataya? Yuneridya ni micuana ejeneya era ecue casa tyahuaque, ejenecara ejenecarama jadya ama ni micuana eau, era higuera ahua baeque cuita camadya ama tuque micuana eau. Aidya jutidya tuque micuana eau, arepa ai ibedaque paju ama bucha. Riyaque uhua cuemusu micuana eau: “Anisicuacue tuhuaque. Cueri cuanaja ecuaqueju pacacacue”. Amereya equedyatu ejuu. ²² Yusu tsehue quisaratiyaque, ai ni micuana

ebacau, tyayadya tura micuana, ejenecara ejenecarama jadya ayaque ama juatsu, —jadya ecuana Jesúsra acuare.

¿Airatu Jesús cuatsashacuare tura aya cuanaque aishu?
(Mr 11.27-33; Lc 20.1-8)

²³ Tumetu Jesús dirunucatsu Yusuja etareju nubidirucuare. Tuhua tuque bahuitya bahuityayajutu pae cuanaja huaraji cuanara, israelita cuanaja emuiba cuanara jadya jipeticuare. Jipetitsu tunajatu bacaduracuare:

—¿Airami ejeque ecuitaja ataquique ama aishu cuatsashahua? ¿Aija casa tsehue tuquemi jadya aya? —jadya tunajatu acuare Jesús.

²⁴ Jesúsra tuna quemitsacuare:

—Era micuana tumbaedy a bacaduraya. Quemitsaya ni micuanara ique, tume micuana cuejaya aira cuatsashahuaju era riya cuanaque ayaque. ²⁵ ¿Airatu Juan cuatsashacuare ecuita cuana utsa ishu? ¿Yusura, ecuita cuanara ni taa? Nequemitsacue ique, —jadya tuna Jesúsra bacaduracuare.

Tume tuna, tuna cama quisaraticuare:

—¿Eje bucha tuque ecuana equemitsau? “Yusuradyatu cuatsashacuare”, jadya ni ecuana eau, tume tura ecuana ebacadurau: “¿Eje bucha juatsu jatsu tuque micuana Juanra cuejacuareque ejenecuare ama?” jadya tura ecuana eau. ²⁶ “Ecuita cuanaja ecuadishaquedya jutidyatu jucuaré”, jadya ni ecuana eau, tumetu dutya jujeri ecuita cuana ecahuaitiu ecuana tsehue. Juan tunajatu Yusu equeque quisarati cuejaquique bucha adebaya, —jadya tuna cacuejaticuare.

Ecuita cuana mubatsu tunajatu Jesús quemitsacarama acuare. ²⁷ Chamacama tunajatu quemitsacuare:

—Baecua ecuana aira Juan ecuita cuana utsa ishu cuatsashacuareque, —jadya tunajatu Jesús acuare.

—Jutaquiju micuana era cuejaya amadya aira ique ecuitaja ataquique ama aishu cuatsashahuaque, —jadya tuna Jesúsra acuare.

Beta ehue ebari ecatsé equeque cuatsabiji

²⁸ Bahuityanucacualetu Jesúsra pae cuanaja huaraji cuana, cacuatsashati bahuityaqui cuanaque jadya:

—Cuejaya micuana cuatsabiji piji. ¿Ai era bahuityacara aya bucha tuque micuanaja inime juya? Peadya ecuitajatu anicuare beta ebacuaque. Peadya tujatu ebacuaque acuare: “Cuacue teeju merera, deca. Uva ejahuanegue pituticue”, jadya tujatu acuare. ²⁹ “Aijama, tata. Cuacarama juya merera”, jadya tujatu etataque quemitsacuare. Yara tupu junenitsu eje bucha inime tuputsutu merera cuacuare.

³⁰ Peadya icuene jadya isarae aatsutu etataquera peya isarat-inucacuare: “Cuacue teeju merera, deca. Uva ejahuaneque pituticue”, jadya tujatu acuare. Turatu quemitsacuare: “A, pacua taa, tata. Mere pajuti”, jadya tujatu etataque acuare. Jadya ama buchatu cuacuare ama merera. Jadyatu ehue ebari ecitse jucuaré, —jadya tuna Jesúsra acuare.

³¹ Jadya cuejatsu tuna Jesúsra bacaduracuare:

—¿Ejera tatsejatu etataqueja yana acuare?

—Inime cacuaretitsu merera cuacuarera, —jadya tunajatu quemitsacuare.

—Micuanara bijidamaduraya cuanaque tuna Yusu jaque judadibareya; micuana jida bucha cabatiya cuanaque micuana Yusu jaque ama. ³² Juan Ecuíta Cuana Utsaquiquetu junahua micuana Yusuja biji eque ani bahuitya ishu. Bacacarama micuana tura cuejayaque ahua. Micuanara bijidamaduraya cuanara bacue tuja quisarati bacacuare. Tume Roma juque enaruquija ishu chipiru sitaqui cuanaque, tumbaedyá epuna decadeca arida cuanaque jadya tuna inime cacuareticuare. Arepa micuana tuna inime cacuaretihuaque baya ama bucha micuana inime cacuareticarama juya, Yusura cuejahua eque ani ishu, — jadya tujatu ecana acuare.

Mere puji jidama cuanaque cuatsabiji eque bahuityacuareque

(Mr 12.1-12; Lc 20.9-19)

³³ Bahuityanucacuare tuna Jesúsra:

—Nebacacue riyaque peya cuatsabiji micuana bahue ishu. Peadya ecuitajatu tee aridaque anicuare. Tee aatsutu uva uhuamerecuare. Taracanemerecuare tura. Amerecuaretu uva jahuanehuaju pitutsu nacaca tisi ishuque. Amerecuaretu etare piji barudaque, tueque tsuratsu, dutya queja naru ishu. Umae ecuíta cuana queja tujatu tee narumerecuare. Tura tuna acuare: “Micuanara ni ecue tee naruya, tume ecuana uva jahuanehuaju cajuquetiya micuana tsehue”. Tuna tuna endya jucuaré. Tume cuanaque bajejetsutu emechiqui cuacuare japada peya yahuaju.

³⁴ Uva jahuane mara juetihuaju tujatu tuque merequi cuanaque cuadishacuare tee naruqui cuana queja. “Necucue ecue teeju mere juya cuana queja. Necuejaticue ecana; pacuadisha tuna ecue ishuque uva epituque”, jadya tujatu ecana acuare. ³⁵ Jadya ahaju tuna cuacuare. Jutihuaju tuna tee naruqui cuanara inatsacuare. Peadya tuna catsacatsa acuare. Peya tuna iyecuare. Peya tuna tumu tsehue acuare. ³⁶ Jadya juhua bacatsutu emechiquira umaé tuque

merequi cuanaque cuadishanucacuare. Tee naruqui cuanara icueneque atsahua baedya jutidya tuna atsanucacuare dutyadya jutidya.

³⁷ “Datse juatsu tujatu ebacuaque neri cuadishacuare. ‘Riyaque renajari eje bucha ama atsaya. Ecue ebacua neri tibu, tunajatu muibatsaya’ jadya datse tujatu inime jucuaire. ³⁸ Ebacuaquera jipeajeyajutu tee naruqui cuanaque jadya jucuaire tuna cama: ‘Riyaquedyari tee metseja ebacuaque neri. Eje tupu etataque majuhuaajuri riyaquedya tee metse judadiya. Neiyetsara. Ecuandya emechiqui nejura’ jadya tuna jucuaire. ³⁹ Inatsacuare tunara. Inatsatsu tuna tee juque cuinanashacuare. Cuinanashatsu tuna iyecuare. Jadyatu tee naruqui cuanaque jucuaire, —jadya tuna Jesúsra cuejacuaire.

⁴⁰ Tumetu Jesúsra bacaduracuare tuque quisaratiyaju ba-caqui cuanaque:

—¿Eje buchatu anabuque tee naruqui cuanaque emechiquira? —jadya tujatu ecana acuare.

⁴¹ Tuhua cuanaratu quemitsacuare:

—Iyemerenuabuquedya tujatu nerecabatsu ama tumeque ecuita jidama cuanaque. Peyadya tujatu mere puji cuana sarenabuque tee naru ishu. Tume iyacua cuanaratu tyabuque dutya uva cuana tee metseque jaquetsu, —jadya tunajatu quemitsacuare.

⁴² Jesúsra tuna anucacuare:

—Neadebacue riyaque Yusuja quisarati ehuenecue. Adebayadya tuque era micuanaja riyaque quisarati eje uma isara eaque:

“Tumu etare puji cuanara tsumecarama acuarequetu tumu dyaque saretanayaque judadicuaire.

Ecuana Cuatsashaquiratu dyaque saretanayaque amerecuare.

Riyaque jadya baatsu, ecuana dyaque pureama juya”, jadya tu ehuenecue.

⁴³ “Jadya tibudya micuana cuejaya riyaque. Micuanara ique bijidamadurahua tibusu Yusuja quisarati israelita ama cuanaque quisarati cuejatanabuque. Tuna tuna eaqueja catyatibuque. ⁴⁴ Idya tumeque tumu etare puji cuanaja ebijidamaduraque buchique. Ique bijidamaduraquiquetu yuamaturatanabuque. Ejeque era nerecaturayaquetu pana yuamaturatana jubuque, ejeque tumu ebarira tyanatsu pana jemi muru eamereu bucha, —jadya tuna Jesúsra acuare.

⁴⁵ Riyaque quisarati bacatsutu pae cuanaja huaraji cuana, tumbaedya fariseo cuana jadya cahuaicuaire, tunara cuitadya Jesús bijidamadurahuaque caadebatitsu, mere puji cuanara tee metseja ebacuaque bijidamadurahua bucha. ⁴⁶ Eje buchadya iyecara datse tunajatu acuare. Jadya

ama bucha “Iyacua ni ecuana einau, tumetu ecuita cuana ecuana tsehue ecahuaitiu, tunara Jesúsra Yusuja quisarati cuejayaque ejeneya tibu”, jadya tunajatu inime jucuaire. Ecuita cuana mubatsu tunajatu Jesús inacuaire ama tumeque ura cuitadya.

22

Chine ishu eihuara cuana equeque cuatsabiji (Lc 14.15-24)

¹Jesúsra tuna bahuityatibunenucuaire. Cuejacuaire tujatu ecana cuatsabiji tuna bahuitya ishu:

²—Cuejaya micuana riyaque cuatsabiji Yusura dutya naruyaju eje buchique micuana bahue juishu. Anicuaire tu ecuari. Dyaque arida chinetu jucuaire tuja ebacuaque caque-mitiyaju. ³Ihuaramerecuare tujatu ecana jetiama chine ishu. Earaqui amena juhuaju tujatu cuadishacuaire tuque merequi cuanaque tuja ecueja cuanaque ihuarara. Cuejatahua ama bucha ecana cuacarama jucuaire. ⁴Yaratupu juatsutu peya tuque merequi cuanaque cuadishanucuaire. “Necuejatinucacue eihuara cuanaque; ebajarara ecana paje. Patsunuta ama ecana. ‘Iyetanahuari huaca, uu etseri cuinasha cuanaque. Eramiri jinahua amena. Dutyari amena ebajeje’ jadya necuejaticue eihuara cuanaque”. ⁵Tura jadya ayaju tuna cuanucuaire ecueja cuanaque ihuarara. Eihuara cuanaque tuna jubarecuare: “Aijama, cuaya ama ique chiner”. Peadyatu cuahua teeju. Peya bacue cuahua tuja ai catyatira. ⁶Peya cuanara bacue ecuari merequi cuanaque inatsacuaire. Inatsatsu tunajatu iyeya tupu miririshacuaire. ⁷Jadya juhuajutu ecuari dyáque cahuaicuaire. Tuja sudaru cuana cuadishatsu tujatu iyemerecuare quiyeti puji cuana. Epu pahua jadya tujatu amerecuare.

⁸“Tumetu ecuarrira tuque merequi cuanaque jadya acuare: ‘Dutyatu amena ebajeje carisitihuaju chine juishu. Era cuejamerehua cuanaque tuna jecarama juhua. Paje ama taa ecana. ⁹Necuacue ediji arida cuana eque. Ejeque tsuryaquedya jutidya ecana necuejacue; chine juyaju tunara pabana’ jadyatu ecuarrira acuare tuque merequi cuanaque. ¹⁰Tura jadya ayaju tuna yana equedya cuacuare. Cuacuare ecana ediji cuana eque. Dutya jecara juyaque tunajatu becuare chine juishu, jidama cuanaque, tumbaedyá jida cuanaque jadya. Tume tujatu ecana tyamerecuare caque-mitiyaque chine juishu jutu ishucue cuita camadya. Jadya jequeetu etare jucuaire.

11 “Yaratupu juatsutu ecuari nubiticuare junahua cuanaque isarara. Nubitsu tujatu bacuare peadya ecuita caque-mititayaju tarepe ishucue ejutuqui tsehue ama. 12 Tume tujatu isaraticuare: ‘Miquemi caque-mititayaju tarepe ishucue ejutuqui tsehue ama ecajututi. ¿Eje bucha juatsu?’ jadya tujatu bacaduracuare tumeque. Ecuitaratu quemitsacuare ama. 13 Tumetu ecuarrira acuare eihuara cuanaque bau juya cuanaque: ‘Nerisicue ehuachiju, emetucuju jadya. Etsecue apuda ducu neijehueticue. Tuhua dyaque canerecatiyaque etse tari paju’ jadya tuna ecuarrira acuare. 14 Jadyatu caque-mititayaju chine ishucue jucuare. Chine ishucue juchine bucha, jadyatu Yusu enaruqui juhuaju jubucue. Arepa jetiama tuja eihuaraque ama bucha, eje uma ama tuna tuaqueja judirubucue, —jadya tuna Jesúsra acuare.

Yusu tuja ishucuedya tyataquique
(Mr 12.13-17; Lc 20.20-26)

15 Jadya cuejayaque bacatsutu fariseo cuana dirucuar. Jesús jidama aishucue inime bajeje tuna jucuare. “Jidama nequisaratishara, huaraji cuana queja duju ishucue”, jadya tuna jucuare. 16 Jadya eque tunajatu tuna tsehue juneni puji cuana cuadishacuare, tumbaedyá Herodes tsehue juneni puji cuana Jesús tsehue quisarati ishucue. Cuadishahua cuanaque jutitsu tunajatu Jesús aticuare fariseo cuanara bacaduramerehuaque:

—Ebahuityaquique, ecuana ecuana bahue mique jida, tuyucue. Miratu bahuityaya Yusuja inime eque ani ishucue, ni ejeque buchique mubatsu ama. Micue ishucue ecuita cuana dutya tupu. 17 Cuejacue dyadi ecuana mira inime tupuyaque. ¿Ecuana cacuatsashati eque tuque ecuanaja ecuana naruquique Roma juque tsujetyataqui, tsujetyataqui ama ni taa? —jadya tunajatu Jesús aticuare.

18 Jesusratu adebacuaredya tunara jidama inime tupuya tsehue jadya bacaduratiyaque.

—Jidadya batacara datse micuana juya, ai jidaque ama. Micuanara ijahue acara aya, jadya cabacadurati tsehue, babi pujira armadilla nityatsu ai cuanubi eamereu bucha. 19 Nebamerecue ique ficha enaruquiya chipiru tuque tsujetya ishucue. Papeta era, —jadya tujatu ecanacuare.

Jadya ahujaju tunajatu queticuare peadya ficha “denario” bacani Roma juque enaruquique tsujetya ishucue chipiru. 20 Petatsu tuna Jesúsra bacaduracuare:

—¿Aija ebutsequini ri riyaque fichaju eiya? ¿Aija ebacani ri rehua ehucue?

21 —Enaruqui muidaque César bacani jaque tume, —jadya tunajatu quemitsacuare.

—Jutaqui ju netyacue enaruquique César tuque tyaihuquedya. Yusu netyacue Yusuja ishuquedya, —jadya tuna Jesúsra acuare.

²² Anajacatacuare tuna tuque jadya caquemitsatiyaju bacsu. Jadya juatsu tuna cuinanatsu dirubarecuare.

Emaju cuanaque netitsuradinucabuqueque
(Mr 12.18-27; Lc 20.27-40)

²³ Tumeque huecaca nucadyatu saduceo cuanara Jesús baticuare. Tunaradyatu ejenecuare ama emaju cuanaque netitsuranucayaque. Junatitsu tunajatu Jesús isaranaticuare:

²⁴ —Ebahuityaquique, Moisésra taa tu riyaque cuatsashacuare: “Ejeque ecuita ni majuya cabacuatimaque, tuatsehuequiquetu caquemitinucataqui eahuemaju tsehue, tuatsehue cabacuati ishu, icueneque ebacua emajuja ebacuaque bucha ishu”, jadyatu Moisésra cacuatsashati huenecuare béru. ²⁵ Riyaque cuatsabiji mique ecuana aya; ijariba ishuque jutidya tu ecuita emajuque chacha netitsuranucaya jadique. Anicuaretu ecuitaja pacarucu ebacua cuanaque. Icueneque ebacuaquetu caquemiticuare. Huanequi juu jadya juatsutu majucuare bacuamaque. Majuhuajutu ejuque beta ishuque caquemitinucacuare eahuemaju tsehue. ²⁶ Beta ishuque tumbaedyá majunucacuare dyá bacuamaque. Quimisha ishuque ejuquetu caquemitinucacuare eahuemaju tsehue. Tumbaedyatu junucacuare. Bacuamaquedyatu majunucacuare. Jadya ecana jubarecuare; pacarucudyatu tumeque epuna tsehue cama ecana caquemitsu majuetibecuare bacuamaque tere. ²⁷ Tumeque nrecadaque epunatu pacarucu ahuee juhuaque majucuaedyá, yahue cuanaque majuterehuaju. Jadya tuna jucuaere.

²⁸ “Ecuánarami bacaduraya riyaque. Yuneridya ni majuya cuanaque chacha netitsuranucabuque, ¿ejeja ehuanequetu jubuque chacha netitsuranucatsu, riyaque yahuaju tuque pacarucu ahuee juhua tibu? —jadya tunajatu Jesús bacaduracuare.

²⁹ Jesúsra tuna quemitsacuare:

—Micuana micuana cuji juya. Micuanaratu adebaya ama Yusuja quisarati ehuenequé, ni Yusura eauque. ³⁰ Emaju cuanaque netitsuranucatsu tuna caquemitinucabuque ama. Barepaju Yusu tsahuaqui cuanaque tuna caquemiti baecua. Jadidya tu emaju cuanaque; netitsuratsu tuna caquemitinucabuque amadya. ³¹⁻³² Yuneridyatu emaju cuanaque chacha netitsuranucabuque. Pusha ama cuitadya tuque micuana eje uma isara ahua Yusuja quisarati ehuenequé adebayaque ama: “Ique Yusu Abraham, Isaac, Jacob jadyara iyacua

muiyaque”. Chacha cuanara cuita camadya Yusu emuiu tibu, yuneridyatu Abraham, Isaac, Jacob jadya ecana enetitsura. Yusu tu chacha cuanara muiyaque, emaju cuanara ama, — jadya tuna Jesúsra acuare.

³³ Ecuiteda cuanatu anajacatacuare jadya caquemitsatiya bacsu.

Ejeque cacuatsashatira cuatsashaya eque cuita ecuana jutaquique

(Mr 12.28-34; Lc 10.27)

³⁴ Fariseo cuanatu, Jesúsra saduceo cuana abacashahua jadya bahue juatsu casitaticuare, Jesús eje bucha jidama acara aatsu. ³⁵ Peadya fariseo cacuatsashati bahuityaqui-quetu tuna tsehuedya jucuare. Turatu Jesús bacaduracuare, cabacadurati eque ijahue acara aatsu datse:

³⁶ —Ebhautyaquique, aniyatu jetiama cacuatsashati cuana ecuanaja cacuatsashatiju ehuenegue. ¿Ejeque cacuatsashatira cuatsashaya eque cuita ecuana jutaqui? —jadya tujatu Jesús bacaduracuare.

³⁷ Jesusratu quemitsacuare:

—“Iyuhueda bacue ducuta Yusu Mique Cuatsashaquique. Yusu iyuhueda bacue ducuta, dutya micue cabijiseriti tsehue Yusu pureamaturacue, dutya micue inime tupu tsehue, dutya micue casa tsehue”. ³⁸ Riyaque cacuatsashatiratu dutya cacuatsashati cuana sabutillaya. Riyaque cacuatsashatira cuatsashaya eque cuita micuana jutaqui. ³⁹ Beta ishuetu tumebae cuita nucadya: “Iyuhue tsehue bacue peya cuana; mique cuitadya iyuhueda cabatiya bucha iyuhuee peya bacue”. ⁴⁰ Riya beta cacuatsashati ecatsera cuatsashaya eque ni micuana aniya, tumemi Moisésra, Yusu equeque quisarati cuejaqui cuanara jadya bahuityacuare equedya juya, — jadyatu Jesúsra acuare.

Mesías tu ecuita camadya ama, ecuita cuana dyaque inimequique

(Mr 12.35-37; Lc 20.41-44)

⁴¹ Fariseo cuanatu tuhuadya ecasitati jucuare jari. ⁴² Jesúsra tuna bacaduracuare:

—¿Eje bucha micuana adebaya Mesías? ¿Ejeque ecuita eque ejuracanaquedy jutyadya ni taa tume? —jadya tujatu ecana acuare.

Tunaratu quemitsacuare:

—Ecuana ehaba David emui eque ejuracanaquedy jutyadya tume, —jadya tunajatu acuare.

43 —David cuitadyatu bahue jucuare Mesías ecuita camadya ama jubuqueque, ecuita cuana bucha dyaque inimequique, Yusuja Espiritura huecashayaju, “Ique Cuatsashaquique” jadya isarae acuare tibu, Micuana micuana bahuedya Davidra quisarati jadya acuareque:

44 “Yusuratu Ique Cuatsashaquique jadya cuejacuare: ‘Anibutecue ecue jida eque amaca muita ishu, era mique ujeu baqui cuanaque dutya ijahue atillaya tupu, Ique Cuatsashaquique’ ” jadya.

45 “Davidradyatu Mesías ‘Ique Cuatsashaquique’ jadya acuare, arepa tueque ejuracanaque ama bucha. Yuneri cuitadyatu Mesías ecuita jutidya ama ejuu; ecuita cuana bucha dyaque inimequiquedya tume, —jadya tujatu ecana acuare.

46 Jadya bacatsutu ni ejera buchique quemitsataqui ama bacuare, dutya ecana tuque yuneri quisaratihuaque bahue tibu. Tumeque huecaca equetu ni ejera bacaduranucacuare ama tuque jidama acara aatsu.

23

Jesúsra fariseo cuana, cacuatsashati bahuityaqui cuanaque jadya jidama juyaque ejitaju acuareque

(Mr 12.38-40; Lc 11.37-54; 20.45-47)

1 Tuequedya ecuana tura mepehua cuanaque ecuana Jesúsra isaracuare, tumbaedya ecuita cuana tuhua jucuare cuanaque.

2 —Fariseo cuanaja, cacuatsashati bahuityaqui cuanaja mere tu Moisesra cuatsashahuaque cueja. ³ Jadya tibudya nebacacue tunara amereyaju. Dutya tunara cuatsashaya equedya nejucue. Jadya ama bucha tuna aniya bae neaniume. Arepa jida bahuityaya ama bucha tuna jidama aniya. ⁴ Tunajatu peya cuana cuatsasha bahue eje bucha anie juishuque; ai tuna cuitadya tunara bahuityaya eque aniyaque ama. Tshuaya ama tuna peya jida Yusuja biji eque ani ishu. Cacuatshatiya camadya ecana. Abu ishuque dyaque bicueda eje bucha abutaquimaque peya abumere ishuque bajejequi buchique tuna. Tunara cuitadyatu ni ai buchique abucarama aya, ni tuna peya abucherera aya.

⁵ Dutya tunara ayaquetu peya cuanaja peta ishuque jutidya, peya cuanaja sumi ishu. Ecuana bahue eque tunajatu Yusuja quisarati huene bahue ebite eje junuju ama equetiju carisiti ishu, ebiju jadya. Quinquinisi tunaja ebiju, equetiju jadya erisi cuanaque. Dyaque junudaque tuna unaju huesiruyaque jutuya, peya cuana queja Yusu adebaqui jadya cabamereti ishu datse. ⁶ Chine cuana ishu araratayaju cuaatsu tuna emuita cuanaja eaniqui cuanaju cama tuna

eaniqui metsene juya. Caradati ishuque etareju cuaatsu tuna muida cuanaque anibahueju anibutetiya. ⁷ Ediji cuanaju juneniyaju tuna dyaque muida tsehue isaratacara juya. “Ebahuityaqui” jadya tuna isaratacara juya.

⁸ “Micuana jadya nejuume. Peya cuana dyaque inimeju bucha necabatiume. Peya cuana queja ‘Ebahuityaqui’ jadya catimerecara ebari nejuume. Ique camadya Micuana Bahuityaqui, ni ejeque buchique micuana dyaque inimeju ama; micuana tsehuequi cuanaque buchique micuana dutya. ⁹ Nemuiume muita ishu ama cuanaque. “Ecuanaja Etata Emuique” jadya ebacani eque neisaraume micuanaja tata ama cuanaque. Peadya camadya tuque micuanaja Tata aniya, barepaju aniyaque. ¹⁰ Micuana cuita camadya ecuatashaqui, bucha necabatiume. Ique Ecuatsashaqui. Ique Yusuja Emepeque. ¹¹ Ejeque ni micuana dyaque inime metseque cabatiya, tumejadyatu peya cuana tsahuataqui iyuhue tsehue. ¹² Yusratu dyaque inime metse cabatiyaque aishu ama amereya. Aishuque ama cabatiyaquetu dyaque inime metse Yusura amereya, —jadya ecuana Jesúsra acuare.

¹³ Tuequedya tujatu fariseo cuana, cacuatsashati bahuityaqui cuanaque jadya isaratibunecuar:

—¡Nerecapane micuana, cacuatsashati bahuityaqui cuanaque, fariseo cuana jadya! ¡Jidadya batacara datse micuana juya ai jidaque ama! Dyaque nrecada micuana jubuque, micuanara peya cuana Yusu queja ecatyati cuanaque eaqueja nimee amerejacaya tibu. Micuanaratu era iyacua bahuityaya cuanaque bijidamaduraneri ahua. Tumbaedy a micuanara peya cuana queja ijacabacamerecarama aya. Micuana micuana etsecue yahue tsehue teriqui buchique, micuana cuitadya nubi ishu ama ni peya cuana nubi ishu.

¹⁴ “¡Nerecapane micuana cacuatsashati bahuityaqui cuanaque, fariseo cuana jadya! ¡Jidadya batacara datse micuana juya ai jidaque ama! Arepa micuana eahuemaju cuanaque tsahuaya bucha cabatiya ama bucha, yuneri cuitadya micuana eahuemaju nrecada cuanaque tunaja ai aniya cuanaque secatillaya, tuna tunaja etare juque cuitadya ijehuecuinaya tupu. Yusu tsehue quisaratiyaque micuana tsunuda quisarati bahue dutyaja ijacaju, tuna queja ‘Yusu adebaqui cuita rena’ jadya catimere ishu datse. Jadya tibudya micuana Yusura dyaque nrecaturabuque.

¹⁵ “¡Nerecapane micuana cacuatsashati bahuityaqui cuanaque, fariseo cuana jadya! ¡Jidadya batacara datse micuana juya, ai jidaque ama! Japada micuana cuabahue, muda cuana eque micuana cueti bahue, peya cuana micuanara

ejeneya bucha ejenemerera. Amena tunara, tunaja beruque quejeneti cuana iyatsu, micuanara ejeneya bae ejenetsu, tuna icuene juhua bucha dyaque jidama, micuana bucha dyaque jidama. Micuana tsehue judirupeedyata tuna ijahuaaja etiquiju jubuque.

¹⁶ “¡Nerecapane micuana shuhuique bucha cuanaque! Arepa micuana Yusuja quisarati bahuityacara aya ama bucha, micuanara cuitadyatu pana adeba ama aya. Jadya tibudya tuque micuanaja bahuitya bahue: ‘Baretaqui amatu micuanara quisarati ayaque, Yusuja etareju ai oro ea cuanaque bacani huesayaque juatsu. Baretaquidyatu quisarati Yusuja etare bacani huesayaque juatsu. Micuanaja ishuta oro Yusuja etare ducuque dyaque emuique, Yusuja etare bucha ama. ¹⁷ ¡Micuana micuana inimema! Shuhuique bucha cuanaque micuana. Yusuja etaretu dyaque saretanayaque, tumeque etareju aniya buchique ama. Tuhua oro ea cuanaque tu Yusuja cuanaque, tuja etare ducu tibu. ¹⁸ Tumbaedyata tuque micuanaja bahuitya bahue: ‘Baretaqui amatu micuanara quisarati ayaque, Yusu tyayaque bacani huesayaque juatsu. Baretaquidyatu quisarati tyayaque iyaquique mesa bacani huesayaque juatsu’. ¹⁹ ¡Micuana micuana inimema, shuhuique bucha cuanaque! Mesa Yusu jaque juya tibu, tumeque mesa tu dyaque emuique, uu, upati cuana jadya micuanara Yusu tyayaque mesaju iyaya cuanaque bucha ama. ²⁰ Bijidamaduraya ni micuana mesa, tumbaedyata tuque micuana bijidamadurayadya mesa dyaque aniyaque. ²¹ Bijidamaduraya ni micuana Yusuja etare, tumbaedyata tuque micuana bijidamadurayadya Yusu tuhua cabameretiyaque. ²² Bijidamaduraya ni micuana barepa, jutaquiju taa tuque micuana bijidamadurayadya Yusuja eaniqui, Yusu cuitadya jadya, tuque tuhuadya aniya tibu.

²³ “¡Nerecapane micuana cacuatsashati bahuityaqui cuanaque, fariseo cuana jadya! ¡Jidadya batacara datse micuana juya, ai jidaque ama! Arepa micuana cacuatsashati cuana aishuque ama jipenee equa juya ama bucha, cacuatsashati dyaque inime metse equa micuana aniya ama. Micuanajatu Yusu tyabahue cacuatsashatira casada tsehue tyamereyaque camadya. Acuihuija ijimeda cuanaque “anis”, “comino” jadya bacani micuanaja etare taracaju euhua cuanaque tuque micuanaja tyabahue. Jadya ama bucha tuque micuana jida, tuyu tsehue ama baya peya cuana. Nereca baya ama micuanara ecana. Micuanara aana ayaque tuque micuana aya ama. Pusha amadya tuque micuanaja Yusu tyataqui cacuatsashati equa casada tsehue tyataquique. Jadya ama

buchatu dyaque saretanaya jida, tuyu peya cuana tsehue ani ishü, tuna canerecabati tsehue baishu, micuanara aana ayaque aishu jadya. ²⁴ Shuhuique cama micuana caaquerenitiya. Micuanaratu quibeti tsehue aya aishuque ama, dyaque ataquique micuana peya queja iya aya. Canecu juque ena ijiyaque dii ebuijiuju equemiu bucha, tumeque piji buijicaramaque, cahayu ebari ebuijiu bucha tuque.

²⁵ “¡Nerecapane micuana cacuatsashati bahuityaqui cuanaque, fariseo cuana jadya! ¡Jidadya batacara datse micuana juya, ai jidaque ama! Arepa micuana ecuitaju asicadaque jida catillaticara juya ama buchatu Yusura micuanaja inime ducuta asicada baya. Bijiserijacaya ama micuana chipiru, micuana cuita camadya capureamaturati ishü. Chiri micuana juajeyadya jutidya ai bijiseriyaque cadaditi ishü. Yusratu tume cuanaque dyaque asicada baya. Micuana micuana canecu, peja jadya dyaque camadya eutsaque bucha, educuju asicadaque utsama. ²⁶ Fariseo cuana, micuana micuana shuhui cuana buchique. Icuene cuita necajuchatiyacacue, Yusuja biji eque ani ishü. Jadya anie juyaju micuana Yusura jida asicadama baya, canucu dyaque, educuju jadya pana utsa eaque bucha.

²⁷ “¡Nerecapane micuana cacuatsashati bahuityaqui cuanaque, fariseo cuana jadya! ¡Jidadya batacara datse micuana juya, ai jidaque ama! Micuana micuana emajuja uhuacuare pajada tsehue dyaque epepaque bucha. Petatsutu emaju cuanaja uhuacuare cuana jida piji. Educuju bacue emajuja etsau cuana erami jadya eririque jirutaquimaque. ²⁸ Jadya micuana juya. Quisaratiyaju bacatsu micuana ecuita cuanara ecuita jida cuanaque bucha baya. Educuju micuanaja inime tupu bacue micuanaja jidama. Micuana cabameretiya bucha ama micuana.

²⁹ “¡Nerecapane micuana cacuatsashati bahuityaqui cuanaque, fariseo cuana jadya! ¡Jida bucha datse micuana cabamereticara juya, ai jidaque ama! Béritu micuanaja baba cuanara iyecuare Yusu equeque quisarati cuejaqui cuanaque, peya jida cuanaque jadya. Iyacia tuque micuana micuanaja baba cuanara iyecuare cuanaja uhuacuare cuana, tunaja cueya cueya cuana mui ishü jida piji bajejeya. ³⁰ ‘Ecuana beru yuequedya anicuareque juatsu, ecuanaja baba cuana juhua eque ama ecuanaja juquena juhua. Iyequena ama ecuanaja juquena juhua Yusu equeque quisarati cuejaqui cuanaque’ jadya micuana jubahue. ³¹ Jadya quisarati eque micuana amena ejitaju juya micuanaja baba cuanaja inime cadujutiyaque. Micuana cuitadya micuana Yusu equeque quisarati cuejaqui cuanaque iyequi cuanaque ju-

cuare bae juya. ³² Micuanaratu aajeya jaridya micuanaja baba cuanara jidamaque tibunecuaque.

³³ “¡Micuana micuana jii jii ama, bacua ujedaque bucha! ¡Micuanaja baba cuana baedya micuana juya! Tunaja inime jari cuitadya micuana cadujutiya jari. Yuneri cuitadya micuana ijahuaja etiquiju canerecatibuque; eje bucha huanataqui ama micuana jadya canerecati ishü ama. ³⁴ Era tuque micuanaja cuadishabuque ique equeque quisarati cuejaqui cuanaque. Cuadishabuque tuque micuanaja ecue quisarati pana adeba aya cuanaque. Cuadishabuque tuque micuanaja ecue quisarati pana bahuitya abahue cuanaque. Ijacabacacarama tuque micuana abuque. Eje uma tuque micuana ecana iyebuque, curusuju tatatsu. Peya cuana tuque micuana miririshabuque etare caradati ishü cuanaju. Peya cuana tuque micuana nerecada abuque, peya epu cuana juque huanashayaque. ³⁵ Nerecaturatabuque micuana ecue cuanaque jidama ahujaju camadya ama, tumbaedya micuanaja baba cuanara béru yuequedya ecuita jida cuanaque iyecuare tibu. Dutya iyetacuare tibu Abel equeque, Zacarías tupu micuana jucha metse. Zacarías, Berequíasja ebacuaquetu Yusuja etareju iyetanacuare, Muida Cuitaque Ama, mesa tumu eaque Yusu tyaya cuanaque iya ishüque patya majaca. ³⁶ Pusha amadya micuana cuejaya. Micuana iyacua aniya cuanaque micuana nerecada atabuque Yusu dutya merequi cuanaque iyetacuareja inime, —jadyatu Jesúsra acuare fariseo cuana, cacuatsashati bahuityaqui cuanaque jadya.

Jesús Jerusalénju cuanara bijidamadurayaque caadebatitsu pacuareque

(Lc 13.34-35)

³⁷ Jadya quisarati amena aatsutu Jesúsra quisarati acuare Jerusalénju aniya cuanaja ishü. Tuna cuitadya baatsu quisarati aya buchatu jucuaque, arepa tuna tuhua ama jucuaque ama bucha.

—Micuana Jerusalénju aniya cuanaque, micuanaja epu ebarijutu Yusu equeque quisarati cuejaqui cuanaque tumu teshue iyetajacama jucuaque. Eje uma narucara ebari datse micuana ahua. Tacure jabacua cuana ecuaquera yajapara emaque ishatsu enaruu bucha, narue datse micuana acara ahua. Micuanajatu ecue jadya narue aishu bijidama juhua. Dutya jujeri micuana eaqueja catyaticarama juhua. ³⁸ Nebacacue. Yusuratu tuja epu ebari narujacabuque, tumbaedya tuhua anibuque cuanaque. ³⁹ Banucabuque ama micuanara ique, “Jida paju Yusuja ebacaniju junayaque”,

dutya israelita cuana jadya judadiya tupu, —jadyatu Jesús jucuare.

24

Jesús “Yusuja etaretu pana rihuishatana jubuque” jadya jucuareque

(Mr 13.1-2; Lc 21.5-6)

¹Yusuja etare juque cuinanayara, ecuana Jesúsra mepehua cuanara tuque ecuana isaracuare:

—¡Ecuana Bahuityaquique, petacue! Dyaque jida piji taa Yusuja etare, tumbaedy a dutya ai ea cuanaque etare tsecue cuanaju, —jadya tuque ecuana acuare.

²—Pusha amadya. Jida pijidya tuque ecuana petaya. Jadya ama buchatu Yusuja etare, etsecueju dutya ai ea cuanaque pana rihuishatanatere jubuque. Anibuque amatu tumu ecadyaqueti. Dutya tumu etare enityatsuraquetu yahuaju tere jubuque, —jadya tura ecuana acuare.

Terehuie adeba ishunque jubuqueque

(Mr 13.3-23; Lc 21.7-24; 17.22-24)

³Jadya juatsu ecuana cuanucacuare uhua cuemusu Olivo Acuí Quini bacaniju. Cuayaquetu Jesús anibutenaticuare. Anibutehuaju tuque ecuana isaracuare:

—Cuejacue ecuana. ¿Eje tuputu jadya judadiya? ¿Aiju ecuana caadebatibuque mique junanucayaque, yahua tereyaque huecaca japadamaque jadya? —jadya tuque ecuana bacaduracuare.

⁴—Nimequi teshue nequihuaticue. Ijahue neca-timereume. ⁵Ique junanucahuie tuna jetiama junabuque iquepa ejuu jadya juya cuanaque. “Idya Mesías, Yusuja “Emepeque”, jadya tuna jetiama junabuque. Jetiamara tuna ejenebuque. Ijahue tuna atabuque. ⁶Dutya quejaquedya jutidya tuna catibuque. Japadama tuque micuana ecana catiyaju bacabuque. Tumbaedy tuque micuana ecana japadapa catiya jadya bacabuque. Jadya bacatsu “Masadamatu tere juetiya”, jadya micuanaja inime paju ama. Dutya tume cuanaquetu jadya jubuque icuene. Tere ishunque ama jari tume. ⁷Riyaque yahuaju cuanaque tuna peya yahuaju cuana teshue catibuque. Anape cuanaquetu catibuque peya anae cuana teshue. Eje uma epu cuanaju tuna dyaque mije jubuque. Bucucubuquetu yahua dutya queja. ⁸Jadya cuana judadiyaquetu canerecati catibutiyaque jutidya. Ecue cuanaque tuna dyaque canerecatibuque.

⁹“Tume tunara micuana tunaja biji jahue jahue abuque. Dutya jujerira micuana ujeu babuque, eaqueja ecatyati baatsu. Iyebuque tunara micuana. ¹⁰Eje uma tuna eaqueja

nimee jujacabuque, ecue ama cuanaque aniya bucha anie junuca ishu. Ujeu tuna cabatibuque. Yurameta ijahue quinatibare juatsu tuna ujeu cabatitsu huaraji cuana queja quinaeretibuque. ¹¹ Jetiamatu cuinanabuque pusha pusha arida cuanaque, Yusuja quisaratipa ecuejau jadya juya cuanaque. Dyaque ijahue tunajatu ecuita cuana abuque. ¹² Dyaque cuita canerecati juetihuaju tuna dutya jujeri yurameta iyuhueda cabatijacabuque. Etiqui riya piji ticuajeya bucha tunajatu iyuhue tereajebuque. ¹³ Ejeque tereya tupu eatsehue nime aputayaque ama camadyatu Yusu queja judirubuque, ni eje tupu tuque jakanuca ishu ama. ¹⁴ Dutya quejatu riyaque yahuaaju quisarati tsapetanabuque Yusura dutya naruyaque, dutyaja ecue quisarati adeba ishu. Dutya queja Yusuja quisarati cuejatanahuaju ique chamacama junanucabuque, —jadya tura ecuana acuare.

¹⁵ Jesúsra ecuana cuejanucacuare:

—Ejitajutu dyaque jidama cuitaque judadibuque, “Ecuita Cuana Bajituraquique” bacani. Tumequedyatu Yusu equeque quisarati cuejaqui Danielra béru huenecuareque. Tuquetu ejitaju jubuque Yusuja etareju. Tumequepa amena juetihua jadya bacatsutu Yusuja quisarati ehuenecue pana adeba aya cuanara adebabuque masadama eje bucha judadiyaque. ¹⁶ Ecuita Cuana Bajituraquique Jerusalénju juetihua jadya bacatsutu Judea yahuaaju cuanaque huanataqui emata cuanaju catehua juishu. ¹⁷ Muya jutidyatu Ecuita Cuana Bajituraquique juetibuque. Jadya tibudya tuna etare ebarucue ecamahua jepeda cuana juque ai inaquenama butetaqui huana ishu. ¹⁸ Teeju mere juya cuanaque tuna judirunucataqui ama tunaja etareju. Tuequedya tuna huanataqui. Nubitinucataqui ama tuna tunaja caramati ishucue jiteque. ¹⁹ Dyaque nerecadatu jubuque epuna maqui cuanaque, bacua nanaqui cuanaque jadya. Tuna tuna eje bucha huanataqui ama ebajarara cabatibuque. ²⁰ Nebacabacacue Yusu queja, micuana huanayaque huecaca cuejipa, nei, jadya ama juatsu canajara huecacaaju micuana huanayaque huecaca ejuetiuju. ²¹ Ecuita Cuana Bajituraquique ejitaju juhuajutu dyaque canerecati ishucue anibuque. Ni eje tuputu jadya canerecati anihua ama Yusura yahua iyahua equeque tumeque huecaca judadibuque bucha. Ecuita Cuana Bajituraquique ijehuetanahuajutu aninucabuque ama jadique canerecati ni eje tupu. ²² Dyaquetu Yusura iyuhueda baya tuja cuanaque, tura mepehua cuanaque. Jadya tibudyatu Yusura tumeque huecaca canerecati ishucue jununushabuque ama. Tura ni jadya ama eau, ni aira buchiquetu eiduu ama; ni ejequetu

chacha ejuu ama.

²³ “Aira cuejatsu ama micuana ique junanucahuague bahue jubuque. Jadya tibudya ejera ‘Mesiastu junanucahu. Ecuanaja epujudya rique’ jadya ayaju, neejeneume. Ejera ni micuana aya: ‘Mesiastu junanucahu. Peya epuju tuque’ neejeneume. ²⁴ Tume cuanaque huecaca juetihuaju tuna jetiama pusha pusha jubuque: ‘Ique Mesías, Yusuja Emepeque’ jadya ama juatsu ‘Ique Yusuja quisarati cueja ishuque cuita camadya’ jadya. Abuque tunajatu inimeradya jutidya ecuitaja ataqui que ama. Eje uma tunajatu ecana ijahue abuque. Dutya tunajatu ecana cujishabuque. Yusuja cuanaque neri neri tunajatu ecana ijahue acara ebari abuque. ²⁵ Jida nebacacue. Icuenetadya micuana cuejaha riyaque, micuana ijahue eatauju. ²⁶ Jadya tibudya, ejera jadya cuejayaju: ‘Mesiastu junanucahu. Yuqueja tuque’ neejeneume. Necuaume ique sarera tuhua. Cuejaya ni tunara micuana; ‘Mesiastu junanucahu. Rehuadyari catehua juya’ neejeneume. ²⁷ IQUE ECUITA eje tupu junanucayaju, dutyaradya babuque. Dutyajadyatu babahue pupipupiyaque ijete cuinanaya queja, ijete nubiya queja; jadidya ique dutyara babuque junanucayaju. ²⁸ Eju ai emajuque ririyajutu jamani cuana caradatiya aija cuejatsu ama. Tumebaedyatu jubuque ique junanucayaju. Dutya tuna bahue jubuque, aija cuejatsu ama, —jadya tura ecuana acuare.

ECUITA junanucayaju eje bucha jubuqueque
(Mr 13.24-37; Lc 21.25-33; 17.26-30, 34-36)

²⁹ Jesúsra ecuana bahuityanucacuare:

—Masadama huecaca cuana nrecada juishuque cuetiajeyaju cuitadyatu ijete apunabuque. Baditu huecadama jubuque. Purari cuanatu barepa juque pacacabuque. Barepaju casada aniya cuanaque tuna piririterebuque. ³⁰ Ique masadama junanucayaque adeba ishuquetu barepaju ejitaju jubuque. Dutya yahuaju cuanaratu babuque. Baatsu tuna dyaque bajida juatsu pabuque. Tuequedya tunara IQUE ECUITA junanucayaju batsabuque. Ecue dyaque casa teshue junanucabuque. Cabameretibuque ique eje bucha muitaeque. ³¹ Meyamerebuque tuque jebuda barepa juque meya ishuque. Cuadishabuque tuque barepaju ique tsahuaqui cuanaque, ecue cuanaque dutya yahua queja aniya cuanaque sita ishu.

³² “Anibuquetu ique masadama junanucayaque adeba ishuque, masadama nei mara catibutinucayaque adeba

ishuque aniya bucha. Ita taa acui higuera bacani neadebacue. Yaa cuana catapananatiyaju baatsu, micuana bahue amena nei mara catibutiyaque. ³³ Tumbaedy micuana dutya riya cuanaque era cuejaha cuanaque juajeya baatsu, bahuedya micuana jubuque yahua amena terehuieque. ³⁴ Pusha amadya micuana cuejaya. Dutya riya cuanaquetu judadibuque iyacua ecuita cuana aniyaque majuma jarijudya. ³⁵ Arepa barepa, yahua jadya pana cuaretana jubuque ama bucha, dutya micuana era cuejaha cuanaquetu cuaretanatsu ama jadya judadibuque.

³⁶ “Yusu ecue Etata peadya camadyatu bahue ejeque huecaca ique junanucayaque. Tuque peadya camadyatu bahue huecadajuni, jadya ama juatsu meta eje tupu ique junanucayaque. Ni ejeque ecuitaratu adebaya ama. Ni ejeque barepaju Yusu tsahuaquiratu adebaya ama. Arepa ique Yusuja Ebacuaque ama bucha, eratu adebaya amadya.

³⁷ “Noé anicuare patya, tuque cuaba ebariju nubima jarijutu ecuita jidama cuanaque anicuare; ni ecana Yusura nerecaturayaju canerecati ishū equihuati jucuarē. Jadidyatu jubuque ique junanucahuie. Ecuita cuanatu jidamadya jutidya anibuque, Yusura eje bucha ayaque quihuatima. ³⁸ Beru tume patya, ena eque teretama jarijutu ecuita cuana anicuare tuna anietibehua buchadya jutidya. Araaraya; iji-ijiya; huanequi juya; ebacujuna cuanaque, ebacua cuanaque caquemiti ishūque inime bajeje jadya anie tuna jucuarē Noé cuaba ebariju nubicuare tupu. ³⁹ Muya jutidyatu ena shumaumaque ama jeticuare, tunara ihuayaju ama. Dutya tuna huiditerecuare. Jadidyatu jubuque ique junanucahuie. Ecuita cuanaratu adebabuque ama eje tupu ique junanucayaque. ⁴⁰ Tumeque huecaca ique junanucayajutu ecue cuanaque enityasicua jubuque ecue ama cuana ducuque. Beta ecuita teeju cuinetse mere ejuu. Ecuiquetu Yusu queja dujanabuque. Peya bacue shanatanabuque. ⁴¹ Beta epuna tuhua cuinetse eerieriu. Ecuiquetu dujanabuque Yusu queja. Peya bacue shanatanabuque.

⁴² “Jadya tibudya nequihuaticue. Neihuajacaume ique junanucayaque, ai micuana bahue batune eje tupu Micuana Cuatsashaquique junanucayaque. ⁴³ Ni ejeque etare metsequetu bahue ama ejeque ura chiri puji ejutiūque. Junayaque bahueque juatsutu ecabati ejuu, chiri puji etareju chiri ejutiūque naru. ⁴⁴ Micuana dyadi equihuaticudya nejudue ique batsa ishū. Muya jutidya micuana eanau, ejeque huecaca ique junanucayaque baecua juya tibu, —jadya tura ecuana acuarē.

Mere puji cuejataquique, cuejataquimaque jadya
(Lc 12.41-48)

⁴⁵ Jesúsra ecuana bahuityanucacuare:

—Neihuacue ique, mayuruma jidara tuja patrón iyuhuedaque juetiyaque eihuau bucha. Mere puji yana equedya juyaquetu jida, inimequique. Micuanaja pana adeba aishu micuana cuejaya riyaque. Anicuaretu mayuruma. Tuja patronratu shanacuare tuque juneniya tupu tuja etareju cuanaque naru ishu. “Dutya huecaca ecana ara ishu cuanaque tyacue”, jadya patu tuja patrónra aquenacuare. ⁴⁶ Tumeque mayuruma ni amerehua eque juya, peya cuana ni tu narujacaya ama, dyaque pureamatu jubuque tuja patrón juetihuaju. ⁴⁷ Pusha amadya micuana cuejaya. Tura tuja patrónja mere puji cuana jida naruhua tibu tujatu dutya tuja ai aniya cuanaque narumereya.

⁴⁸ “Mayuruma ni cuejataquima, amerehua eque amadyatu juya. Turani jadya inime tupuya: ‘Ecue patróntu juetihuishaya ama’ jadya. ⁴⁹ Amena jadya juatsu tujatu peya mere puji cuana nerecaturaya; ijahue ijahue jutidyatu ecana aya. Chine mere, araara, nijuqui arida cuana tsehue ijijiya jadya tsehue jutidyatu ecana aniquereya, tuja mere ataqui ama bucha. ⁵⁰ Tumetu tuja patrón juetiya ni tuque quihuatiyaju, ni tuque juetinuycayaque ura bahueju. ⁵¹ Jadya baetitsutu tuja patrónra catsacatsa, ijehue jadya aetiya tuja etare juque. Riyaque mayuruma baetu Yusuja cuanaquepa ejuu jadya juya cuanaque tuja yacua juque ijehuetanabuque. Tuhua ijahuaja etiquiju tuna dyaque canerecatiyaque, payaque etse tari jubuque, —jadya ecuana Jesúsra acuare.

(Riyaque cuatsabiji eque tuna Jesúsra bahue amerecara acuare tuque iyuhueda baqui cuanara ihuayaque; tuque iyuhuedama baqui cuanara bacue ihuaya ama jadique.)

25

Peadya tunca epuna ehue ebari cuana equeque cuatsabiji

¹ Jesúsra ecuana bahuityanucacuare:

—Cuejaya micuana riyaque cuatsabiji Yusura naruyaju eje buchique micuana bahue juishu. Caquemitiyaque chinetu anicuare. Caquemitiyaja iyuhueda cuanaque tuna etse-cueju neticuare tuque junayaque ihua juyaque. Peadya tunca epuna ehue ebari tuna jucuaré. Peadya peadyajadya tunajatu lamparina anicuare etseri tsehue ejequeshaque. ²⁻⁴ Pishica tuna inime adebabadaque jucuaré. Icuenetadya tunajatu lamparina etseri tsehue jequeshacuare. Tumebaedya ecana botillaju etseri cadujuticuare, terehuaju lamparina jequeshanuca ishu, caquemitiyaque etsunutaque

adebatsu. Pishicadya tuna inimema jucuaré. Cadujuticuare ama ecana etseri lamparina urahuaju jequeshanuca ishu. ⁵ Peadya tunca epuna ehue ebari cuana tuna tahuira jetiedya ahuaaju tahuicuare. ⁶ Tume tuna metapatya quique eque aira cuana bushishacuare. “¡Jehuatu amena caquemitiyaque! ¡Netsurutsacue!” jadyatu ejeque cuana quiquecuare. ⁷ Dutyatu epuna ehue ebari cuana netitsuracuare. Tume tuna lamparina cabajejetitibunecuare. ⁸ Yara tupu juatsutu pishica inimema cuanara adebacuare tunaja lamparina jequesha ishu etseri aijamaque. “Riya piji ecuana etseri netyacue. Ticuya tuque ecuanaja lamparina”, jadya tunajatu inime adebabada cuanaque acuare. ⁹ Tunaratu quemitsacuare: “Aama. Aijama tuque ecuanaja etseri micuana tyaishu. Necuacue tunara catyati ayaju. Nequemiticue micuanaja”, jadya tunajatu ecana acuare. ¹⁰ Jadya ahuaaju tuna cuacuare etseri quemira. Tuna etseri bacara cuaya tsunumeedyatu huanequi juyaque junaticuare. Epuna ehue ebari equihuati jucuaré cuanaque tuna tuatsehue nubipee jucuaré, carisitihuaque chine juyaju. Nubitsu tunajatu etsecue tericuare. ¹¹ Yara tupu juatsutu peya pishica epuna ehue ebari cuana juetinucacuare. “Nudyacue ecuana”, jadya tuna quiquecuare. ¹² Tura tuna pana teri ea eque quemitsacuare: “Aijama. Adebaya ama micuana era. Nedirucue”, jadya tuna caquemitiyara acuare. Jadyatu jucuaré peadya tunca epuna ehue ebari cuana, —jadya ecuana Jesúsra cuejacuare.

¹³ —Nequihuaticue, ai micuana ique ejeque huecaca junanucayaque bahue batu. Baecua micuana huecadaju, jadya ama juatsu meta jadya ique junanucayaque, —jadya ecuana Jesúsra acuare.

Chipiru umanashaqui cuanaque cuatsabiji eque bahuityacuareque

(Lc 19.11-27)

¹⁴ Jesúsra ecuana bahuityanucacuare:

—Cuejaya micuana riyaque cuatsabiji Yusura dutya naruyaju eje buchique micuana bahue juishu. Anicuairetu ecuita chipirudaque. Peya yahuaju cuacaraquetu jucuaré. Ihuaracuare tujatu tuque merequi cuanaque. Ihuaratsu tujatu ecana acuare: “Ique juneniya jari tupu jida nenarucue tumeque chipiru peadya peadyaja ishu era micuana tyabareyaque. Neumanashacue”, jadya tujatu peadya peadya cama mere puji cuana abarecuare. ¹⁵ Dutya tupu ama tujatu ecana chipiru tyabarecuare. Peadya tujatu tyacuare pishica mil chipiru, peya bacue beta mil, peya bacue peadya mil. Tyabarecuaretu ecana tunaja umanashataqui tupu adebatsu. Tuna chipiru tyabaretsutu cuacuare japada.

16 Pishica mil tyatanahuaquetu meredyá jucuare chipiru tsehue. Chipiru tsehue jida mere juatsu tujatu tuja patrónra chipiru tyahuaque beta tupu amerecuare. 17 Beta mil tyatanahuaquetu meredyá jucuare chipiru tsehue. Chipiru tsehue jida mere juatsu tujatu tuja patrónra tyahuaque beta tupu amerecuare. 18 Mil tyatanahuaquetu tuja patrónra amereya eque ama jucuare. Dirutsu tujatu tuja patrónra chipiru yahua puru jadya aatsu papacuare.

19 “Eje uma badi juatsutu juetinucacuare tunaja patrón tuna queja. Ihuarabarecuare tujatu chipiru tyaquenacuare cuanaque. Bahuetu jucara jucuare tunara chipiru eje bucha acuareque. 20 Icuenetu juticuare pishica mil chipiru tyatanacuareque. Tyatsacuaretu tuja patrón pishica mil chipiru tuja cuare tyanuca aishuque, tura pishica mil mere aatsu umanashacuare tsehuedya. ‘Ique mira tyacuare pishica mil chipiru. Jeedyá micue, peya pishica mil tsehue, era mere juatsu umanashacuareque’ jadya tujatu tuja patrón acuare. 21 ‘Jida. Jidaque ecuita yana equedyá juhuaque mique. Miratu pana tsume ahua era riya piji tyacuareque. Tume mique tyaya mere dyaque muidaque. Eatsehue pureama jupeedyami juya ecue jidaque aniya tsehue’ jadyatu tuja patrónra acuare. 22 Tuequedyatu jutinucacuare beta mil chipiru tyatanacuareque. ‘Ique mira tyacuare beta mil. Jeedyá micue, peya beta mil tsehue, era mere juatsu umanashacuareque’ jadya tujatu tuja patrón acuare. 23 ‘Jida. Jidaque ecuita yana equedyá juhuaque mique. Miratu pana tsume ahua era riya piji tyacuareque. Tume mique tyaya mere dyaque muidaque. Eatsehue pureama jupeedyami juya ecue jidaque aniya tsehue’, jadyatu tuja patrónra acuare.

24 “Tupujutu jutinucacuare mil chipiru tyatanacuareque. Junatitsutu anaticuare tuja patrón: ‘Ique bahue micue peya cuana tsehue canerecabati aijamaque. Ique taa bahuedya jucuare mira ecue riya piji aniyaque secanucabuqueque. Arepa ecuanaradya tee cuana uhuahua ama bucha, miratu huesamereya micue ishú cuita camadya. Arepa ecuanara iruruya ama bucha, dutyadya tu micue etsucaca cuana quiniquique jequesha ishúque. 25 Jadya tibu bajida jucuare, mira era aputashahuaju cuana jidama eauju. Bajida juatsu tuque micue chipiru yahua purutsu papatsu tehuacuare. Jeedyá micue ique mira tyacuareque’ jadya tujatu tuja patrón acuare. 26 ‘¡Cuejahuanataquima! ¡Dyaini! Iyacuami bahue juya. Era camadyapa tsumehua dutya ecue ishú camadya micuanara uhuahuaque. Erapa ecue etsucaca iya ishúju iyahua dutya micuanara iruruhua cuanaque jadya. 27 Jadya mira

ejeneya tibu taa tuquemi dujuquena cuana dyadi juquena jucuare chipiru umanashaqui cuana queja. Tume taa tuque junanucatsu equeminan mil chipiru tumeque umanashaqui cuana queja tyacuareque juatsu. Tume tuque ecue chipiru eumana tsehue inapee aquena juhua' jadyatu tuja patrónra acuare. ²⁸ Isaracuare tujatu tuhua jucuare cuanaque: 'Nesecacue chipiru tumeque mere puji cuejataquimaque. Netyacue peadya tunca mil umanashaqui juhuaque. ²⁹ Ejeja aniyaquetu dyaque tyatanabuque. Tuja aniyaque dyaquedyatu tyatanabuque. Ejera ni jidama tsumeya tuque tyatahuaque, secatabuquedyatu tuque, arepa riya piji tuja aniya ama bucha. ³⁰ Ryaque mere pujiratu tuque tyatahuaque jida ama tsumehua. Apuda ducu neijehuecue. Tuhua dyaque canerecatiyaque payaque etse tari paju' jadyatu tuja patrónra acuare tuhua jucuare cuanaque. Jadyatu jucuare mere puji cuana chipiru tyatacuare cuanaque, —jadya ecuana Jesúsra acuare.

(Ryaque cuatsabiji eque tuna Jesúsra huecashacuare, Yusu ecuanaja dutya casa tsehue meretaquique tura ecuana casa tyaya tsehue.)

Ecuana rehua eje bucha juhua eque ecuana Yusura adadibuqueque

³¹ Jesúsra ecuana bahuityanucacuare:

—IQUE ECUITA junanucatsu, huaraji dyaque aridaque bucha junanucabuque. Barepaju ique tsahuaqui cuana tsehue junanucabuque. Junanucatsu anibutebuque dyaque emui judadiyaju, ique Yusura tuque cuarequi enaruquique jadya ishuhue cuatsashahua tibu. ³² Cuadishabuque tuque barepaju ique tsahuaqui cuanaque dutya ecuita dutya yahua juque, epu cuana juque sitabare ishuhue. Uhuisha naruquira uhuisha cuana, cabra cuana ducuque ejaquebareu buchatu era ecue cuanaque jaquebuquedyatu ecuique ama ducu cuanaque. ³³ Iyabuque tuque ecue cuanaque jida eque amaca, eaniqui muidaju tunaja tuna muitaqui juishuhue. Ecue ama cuanaque tuque iyabuque jani eque amaca, ecue cuanaque pana jacamere aishuhue. ³⁴ Ecue jida eque amaca cuanaque tuna abuhue: "Nejecue eatsehue. Ecue Etata Yusura micuana dyaque jidaque tyabuque cuanaque micuana tyaya, yahua iyatanahua eque era ecue cuanaque tyaana ahuaque. Nebaeticue era micuanaja ishuhue bajejeeticuareque. ³⁵ Aracara juyaju micuanara tyahua ara ishuhue. Ijicara juyaju, micuanara tyahua iji ishuhue. Ique tarema juneniyaju, micuanara nudyahua micuanaja etareju. ³⁶ Jutuquima juneniyaju micuanara tyahua jutu ishuhue. Ujejeda juyaju micuanara cuajitihua chachanecara aatsu. Etare apudaju

netiyaju baatsu micuanara batihua ique nime casatura ishu”, jadya tuna era abuque ecue cuanaque. ³⁷ Tume era jadya ayaju tuyu jucuaire cuanara quemitsabuque: “Ecuana Cuatsashaquique, caadebatiya ama taa ecuana eje tupu mique ecuana arama, ijima jadya baatsu mira ai sareyaque tyahuaque. ³⁸ Caadebatiya ama ecuana eje tupu mique tarema bucha juneniyaju etareju nudyahuaque, ni eje tupu mique jutuquima baatsu tyahuaque. ³⁹ Caadebatiya ama ecuana eje tupu mique ujejeda baatsu ni etare apudaju baatsu mique ecuana tsahuacara aatsu batihuaque”, jadya tunara abuque. ⁴⁰ Era tuna quemitsabuque: “Pusha amadya cuejayadya micuana era. Micuanaratu ecue cuanaque tyahua tunaja ai aijama cuanaque. Micuanaratu tsahuahua ecue eatsehuequi cuanaque buchique. Ejera dyaque jetiedya buchique tsahuahuaque, idya cuitadya tura tsahuahua”, jadya tuna abuque.

⁴¹ “Tuequedya tuque ecue cuanaque ama abuque: ‘¡Japada nejucue cuejahanataquima cuana! Nenubidirucue ijahuaaja, tuque tsahuaqui cuanaja jadya ishu etiqui eiyaju. Tuhua micuana canerecatijacanime ama. ⁴² Ique aracaraque juneniyaju micuanara tyahua ama ara ishuque. Ijicaraque juneniyaju micuanara tyahua ama iji ishuque. ⁴³ Ique tarema bucha juneniyaju micuanara nudyahua ama micuanaja etareju. Jutuquima baatsu micuanara tyahua ama jutu ishuque. Ique ujejedaju etare apudaju netiya baatsu micuanara batihua ama ique nime casatura ishu’ jadya tuna era abuque. ⁴⁴ Era jadya ayaju tunara jadya abuque: ‘Ecuana Cuatsashaquique, ¿eje tupu jatsu mique ecuana tsahuacarama acuare? ¿Eje tupu jatsu mique ecuana arama ijima, tarema, jutuquima, ujejeda, etare apudaju jadya baatsu tsahuacuare ama?’ jadya tunara abuque. ⁴⁵ Era tuna quemitsabuque: ‘Pusha amadya cuejaya micuana era. Micuanaratu ecue cuanaque, ecue eatsehuequi cuanaque buchique tsahuahua ama ni dyaque jetiedya bucha cuanaque. Tuna tsahuahua ama tibu, idya micuanara tsahuahua ama’ jadya tuna abuque. ⁴⁶ Jadya cuanaque tuna canerecati ishuhu nubidirubuque ni eje tupu cuinana ishu ama. Yusuja biji eque juya cuanaque tuna Yusuja yacuaju judirubuque ni eje tupu tuque jaca ishu ama —jadya tura ecuana cuejacuare.

26

Jesús ujeu baqui cuanara tuque inamere ishu inime bajeje-cuareque

(Mr 14.1-2; Lc 22.1-2; Jn 11.45-53)

¹ Jadya cueja amena aatsu tura ecuana tura mepehua cuanaque cuejanucacuare:

² —Micuana micuana bahuedya metajudya tibene Pascua chine juyaque. Ryaque chine ishudya ique ujeu baqui juya cuanara inamereya curusuju tatamere ishü, —jadya tura ecuana acuare.

³ Jesúsra ecuana isaraya jarijutu pae cuanaja huaraji cuanara, israelita cuana emuiba cuanara jadya inime tupucuaré eje bucha iyemere Jesús aishuque. Casitaticuaré tuna Caifás pae dyaque muidaja etareju. ⁴ Tuhua tunajatu Jesús iye ishü, tseta inamere aishu inime bajejecuaré. ⁵ —Neinamerera ama Pascua chine ishü cuita, ecuita cuana ecapuritishau tibu, —jadya tuna jucuaré.

Epunara Jesúsja iyucaju etseri ijimedaque juracuareque
(Mr 14.3-9; Jn 12.1-8)

⁶ Jesús tu Betaniaju jucuaré Simónja etareju. Icuenu tu meque ecuita erami ririshaqui ujeje tsehue jucuaré. Jadya tibudya tunajatu “Leproso” jadya isarae acuare. ⁷ Chineju araarayajutu Jesús epunara jipeticuaré botilla caca alabastro eaque ina jadya. Tumeque botilla cacatu etseri ijimeda tsehue ejequeshaque jucuaré, dyaque tsuje aridaque. Jesús mesaju juaniyajutu epunara etseri ijimedaque tuja iyucaju juraticuaré. ⁸ Epunara jadya aya baatsu ecuana Jesúsra mepehua cuanaque cahuaiticuaré.

—Nepetacue tura etseri dyaque tsuje aridaque ijehueneyaju. Ni aishu buchiquetu jida ama jadya ijehuenetsu. ⁹ Catyati ni tu aquena juhua etseri ijimedaque, umada tujatu chipiru inaquena juhua. Jetiamatu nrecada cuanaque etsahuauque chipiru inatsu, —jadya ecuana jucuaré ecuana cama.

¹⁰ Ecuana quisaratiyajü bacatsu ecuana Jesúsra ecuana acuare:

—¿Eje bucha juatsu jatsu tuque micuana tumeque quisarati tsehue aya? Tura ique jadya ahuaquetu dyaque jidaque. ¹¹ Micuana ducutu jujacaya amadya nrecada cuanaque, ique bacue aijama. Ique micuana tsehue junenisiriya ama. ¹² Tura ecue ecuitaju etseri ijimedaque jurahuaquetu ique iyetahuaju papata ishüque, tura jadya ahua. ¹³ Pusha amadya micuana cuejaya. Ryaque epunara jadya ahuaque tuna dutya yahuaju bahue jubuque, eju ecue quisarati jidaque cuejatanayaju, ecuita cuanaja tuque adeba ishü, —jadya tura ecuana acuare.

Judasra Jesús inamere ishü inime bajejecuaréque
(Mr 14.10-11; Lc 22.3-6)

14 Tumetu Judas Iscariote, Jesúsra mepehuaque, cuacuare pae cuanaja huaraji cuana queja. Junatitsu tujatu ecana isaranaticuare:

15 —¿Eje uma micuanara tsujetyaya, era micuana Jesús inamereyaju? —jadya tujatu ecana bacaduraticuare.

—Quimisha tunca chipiru.

—Eratu aya tumeque, —jadya tujatu ecana acuare.

16 Tumeque huecaca equeratu Judasra Jesús eje bucha in-amere aishuque sarecuare.

Jesúsra Pascua earaqui tura mepehua cuana tsehue aracuareque

(Mr 14.12-21; Lc 22.7-18; Jn 13.21-30)

17 Jueticuaretu icueneque huecaca Pascua chine ecuanaja pan levaduramaque ara bahueque huecaca. Tumeque huecaca tuque ecuana Jesús jipetitsu bacaduracuare:

—¿Ejumi bajejemerecara aya riyaque chineju Pascua ishu araara ishu? —jadya tuque ecuana aticuare.

18 Tura ecuana quemitsacuare:

—Jerusalénju nebajejeticie. Eisaradya tuque ecue ecuita tuja etareju araara ishu. Necuacue. Necuejaticuedya tumeque ecuita: “Ecuana Bahuityaquiquestu jeya. Amena patu ura japadama tuque iyetayaque. Junaya patu micue etareju Pascua juyaque chineju araarara tura mepehua cuana tsehue”. Jadya necuejaticue, —jadya tura ecuana amerecuare.

19 Jesúsra cuatsashahua equedya ecuana jucuaré. Tuhuadya tuque ecuana bajejecuaré Pascua juyaque chineju ara ishuque.

20 Amena apunahuajutu Jesús ecuana tura mepehua cuana tsehue mesaju anibutecuare. 21 Araarayara ecuana Jesúsra isaracuare:

—Peadyara micuanara ique ujeu baqui cuana queja in-amereya, —jadya tura ecuana acuare.

22 Jadya ayaju ecuana peya inime jucuaré. Peadya peadyara tuque ecuana bacadurabarecuare:

—¿Era ni taa, Ecuana Cuatsashaquique? —jadya tuque ecuana abarecuare dutyara.

23 —Eatsehue peadya pejaju araarayara pan mullayara inamereya. 24 Bérutu Yusu equeque quisarati cueja puji cuanara hueneacuare ecuita jidama cuanara ique iyebuqueque. Tunaja quisarati ehueene equedyatu juya. ¡Dyaque nerecadatu jubuque ique ujeu baqui cuana queja inamerequi juyaque! Dyaque jida taa tu tumeque ecuita ecuaquera ejitaju aquena ama juhua, —jadya tura ecuana acuare.

25 Jadya bacatsutu Judas tuque inamerequi juyara acuare:

—Ique Cuatsashaquique, ¿era ni taa mi jadya amereya?

—Jejee, mira quisarati aya equedya, —jadyatu Jesúsra acuare.

Ecuana Cuatsashaquique majucuaque adeva ishu araarataquique

(Mr 14.22-25; Lc 22.19-23; 1 Co 11.23-26)

²⁶ Araarayaquetu Jesúsra pan inacuaque. Pan inatsu tujatu

—Yusurupai mique aya, Tata, —jadya Yusu acuare.

Yusurupai jadya aatsu tujatu pan cuesicuare. Cuesitsu tura ecuana tuatsehue anibareya cuanaque tyabarecuare.

—Nearacue. Rियाque pan rique ecue ecuita, —jadya tura ecuana acuare.

²⁷ Tuequedya tujatu canecu juque uva nacaca esasanashaque inanucacuare. Canecu inatsu,

—Yusurupai mique aya, Tata, —jadyatu Yusu acuare.

Yusurupai aatsu tura ecuana sadatsu inamerebarecuare.

—Neijicue jeeque canecu juque uva nacaca esasanashaque. ²⁸ Rियाque rique ecue ami, micuana jiteque quijehuetiyaque. Jetiama tuna eaqueja catyatibuque, tunaja jucha cuana tillatana ishu. Ique ecue ami quijehuetitsu majuhujutu Yusura iyaya iyacuaque inime tuaqueja judiru ishuque. Ique majuhujutu piisitu rियाque inime yunerinetanaya. ²⁹ Rियाque micuana cuejaya. Ni eje tupu tuque rियाque yahuaju Pascua chine micuana tsehue anucaya ama; ijinucanime ama tuque ecue uva nacaca esasanashaque. Jadya ama buchatu tumeque huecaca, era dutya naruyaque huecaca juetihuaju piisi tuque ijibuque micuana tsehue iyacuaque eijiqui, —jadya tura ecuana acuare.

Jesúsra Pedro “Adebaya ama tuque era” jadya juyaque cuejacuaque

(Mr 14.26-31; Lc 22.31-34; Jn 13.36-38)

³⁰ Chineju araara amena juatsu tuque ecuana Yusu pureama aishuque jeru acuare. Jeru amena juatsu ecuana cuacuare uhua cuemusú “Olivo Acui Quini” bacaniju.

³¹ Tuhua ecuana Jesúsra isaranucacuare:

—Rियाque meta micuanara era ijahue ahua bucha cabatitsu jacatillaya. Yusuja quisarati tu ehue: “Tuna aquereniquiquetu iyetanabuque. Dutya tura aquerenihua cuanaque tuna tsapetanabuque, uhuisha cuana naruquique iyetanahuaju etsapetanau bucha”. ³² Emajuque netitsuranucatsu icuenetadya cuaya Galileaju, tuhua micuana tsehue catsurutinuca ishu, —jadya ecuana Jesúsra acuare.

³³ Jadya juyajutu Pedrora acuare:

—Arepa dutyara jacatillaya ama bucha, ecuemi jacanime ama, —jadya tujatu acuare.

34 —Pusha amadya mique aya. Riyaque meta, tacure quiquehuiemi catehuati quimisha juya. “Adebaya ama tuque era”, jadya aquimisha mira aya, —jadyatu Jesúsra Pedro acuare.

35 —¡A, aijama! Mique adebaya ama jiu junime ama ique. Miitsehue iyepedyá datse tunara paa. “Tujaque ama ique” jadya junime ama ique, —jadyatu Pedrora Jesús acuare.

—Mique adebaya ama jiu junime ama ique, —jadya tuque ecuana abarecuare, Pedrora aya baedya.

Jesús Etataque tsehue Getsemaníju quisaraticuareque
(Mr 14.32-42; Lc 22.39-46)

36 Tumetu Jesús junaticuare ecuana tura mepehua cuana tsehue Getsemaní bacani emajacaju. Tuhua junatitsu tura ecuana anaticuare:

—Rehuadya neanibutecue, ique ecue Etata tsehue quisaratiya tupu.

37 Jadya juatsu tujatu dujuquare Pedro, Zebedeoja ebacuaque ecatse jadya. Cuacuare tuna ecuana japada cuita ama. Dyaque peya inime, niju huenanada, eje buchadya jucara jadyatu cabatiajecuare.

38 —Dyaque peya inime taa cabatiya. Idutaqui ama jipenee cuita taa rique baya. Rehuadya neanicue. Ecabati nejucue. Netahuiume, —jadyatu Jesúsra acuare Pedro, Santiago, Juan jadya.

39 Jadya tuna aatsutu Jesús cuacuare eje japa cuita amadya. Cuaatsutu chichucata junaticuare, yahua queja huipuchitana. Jadya juatsutu Yusu tsehue quisaraticuare:

—Tata, riya ique nerecada jutaquique tu ai patseda buchique. Canerecatitaquique ama juatsu taa ecanerecatiu ama. Ebacau datse mique era, ique canerecati ishú ama. Jadya ama bucha ecue biji eque ama paju. Micue biji eque paju, —jadyatu Jesúsra acuare tuja Etataque.

40 Jadya juatsutu cuanucacuare quimisha tura dujuhua cuana queja. Cuaatsu tujatu ecana tahuijarabareyaju baticuare. Isaranaticuaretu Pedro:

—¿Eje bucha eatsehue ecabati jupee jutaqui ama micuana yarapupu cuana cabatihua, ni peadya ura cuana? 41 Necabaticue. Netahuiume. Nebacabacacue Yusu queja, micuana Satanásra ique jacamerecara ayaju, micuanaja idu ishú. Micuanaja tacatu aijama casa Ijahuara cajuchatishacara ayaju casada juishu, arepa micuanara jacacarama aya ama bucha, —jadya tuna Jesúsra acuare.

42 Cuabeta ishutu Jesús cuacuare tuque cuahuaju nucadya, Yusu tsehue quisaratira:

—Tata, canerecatitaquique ama juatsu taa ique ataya bae eatau ama. Jadya ama bucha ecue biji eque ama paju. Micue biji eque paju, —jadya ati beta tujatu acuare.

⁴³ Jadya juatsutu cuanucacuare tura quimisha dujuhua cuana queja. Cuanucatsu tujatu ecana tahuijarabareyaju batinucacuare. Busataqui ama cuita tunajatu yatuca bacuare tahuicara juatsu. ⁴⁴ Tuna shanatsutu cuaquimisha ishu cuanucacuare Yusu tsehue quisaratira. Tuque quisaratihua baedyatu quisaratinucacuare. ⁴⁵ Jadya juatsutu cuanucacuare tura dujuhua cuana queja.

—¿Canajaraya jari cuitadya micuana? ¿Tahuiya jari cuitadya ni taa micuana? Amenatu ura juetihua IQUE ECUITA tunara jucha arida cuana queja inamereyaque. ⁴⁶ Nenetitsuracue. Nedirura. Amenatu jehua ique ujeu cuana queja inamerequi juyaque, —jadya tuna Jesúsra acuare.

Jesús erisique dujutanacuareque
(Mr 14.43-50; Lc 22.47-53; Jn 18.2-11)

⁴⁷ Jesús quisaratiya jarijutu Judas junaticuare, tura mepehuaquedya datse. Ecuita jetiama tsehetu cuacuare. Cuchiru tsehue, acui tsehue jadya tuna junaticuare. Pae cuanaja huaraji cuanara, israelita cuana emuiba cuanara jadya tuna cuadishacuare. ⁴⁸ Junatima jariradya tuna Judasra cuejanaticuare: “Era dyahuanatiyaque, tudya tume. Risitsu, nedujucue”, jadyapa tujatu ecana junatimaradya anaticuare. ⁴⁹ Junatitsu tujatu Jesús jipeticuare:

—Banuchi, Ebahuityaquique.

Jadya aatsu tujatu Jesús dyahuanaticuare. ⁵⁰ Tura jadya ayajutu Jesúsra isaracuare jadya:

—Acuedya mira ai acara aya eque, era mepehuaque, —jadyatu Jesúsra acuare.

Jesús dyahuahua baatsutu Judas tsehue cuahua cuanara jipetitsu inaticuare.

⁵¹ Jesúsra mepehuaratu cuchiru baeque baina juque juputsu pae dyaque muidaque merequique ijaca pejuacuare.

⁵² —Cuchiru tsehue icuenecara aume. Ishacue micue cuchiru bainaju. Miratu adebayadya quisarati: “Cuchiru tsehue quiyetiyaquetu cuchiru tsehuedya iyetabuque” jadique.

⁵³ Sareya ama tuque era micue ique icuene ishu. Eratu Etata ebacaudya peadya tunca beta earacana cuare barepaju Yusu tsahuaqui cuanaque ique icuene ishu. Masadamadya tujatu ecana ecuadishau. Jadya ama bucha bacaya ama tuque era. ⁵⁴ Ehuenedya tu Yusuja quisarati ique nrecada judadiyaque. ¿Eje bucha judadie jatsutu ejuu, jadya judadi ishuque era barepa juque etsahuaqui cuana ique tsahuana

ishu bacahuaju? —jadyatu Jesúsra acuare ecuita ijaca pejuquique.

⁵⁵ Tuequedya tujatu isaracuare ecuita cuana jetiamaque:

—Micuana micuana jehua cuchiru tsehue, acui tsehue jadya ique inara, chiri puji inara ejeu bucha. Anichinedya tuque micuanaja emajaca ejudya jutidya ique ina ishu cuchiruma, acuima. Dutya huecaca taa ique Yusuja etareju Yusuja quisarati bahuitya juchine. ¿Tume micuanara eje bucha juatsu inachine ama tuhua? ⁵⁶ Riya ique atayaqueri juya Yusu equeque quisarati cuejaqui cuanara cuejacuareque, Yusuja quisaratiju ehue ne bae cuitadya, —jadya tuna Jesúsra acuare.

Tuque quisaratiya tsunumeedya ecuana Jesúsra mepehua cuanaque huanaterecuare. Jacacuare ecuana Jesús.

Jesús israelita cuanaja huaraji arida cuana ecasitati ducu dujanacuareque

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesús inaqui cuanaratu Jesús dujucuaré Caifás, pae dyaque muidaja etareju. Tuhuatu ecasitati jucuaré cacuat-sashati bahuityaqui cuanaque, tumbaedya israelita cuana emuiba cuanaque. ⁵⁸ Tumetu Pedrora tunara Jesús dujuyaju japa tupuaje acuare. Cuacuarétu pae dyaque muidaja etare tsecue tupu. Etare tsecue junatitsutu sudaru cuana tsehue aninaticuaré, eje bucha tuna Jesús ayaque petacara aatsu.

⁵⁹ Huaraji cuana tuhua ecasitati jucuaré cuanaratu tyacara acuare Roma juque huaraji, tuque iyemere ishu. ⁶⁰ Jadya ama bucha tunajatu dadicuaré ama eje bucha eque jidama cueja ishu. Jetiama tuhua jucuaré cuanaratu pusha pusha tsehue jidamapa ejuu jadya acuare. Daditaqui ama tunajatu bacuaré dutyara tupu tuque jidama ejuque. Eje uma quisaratiyaju baca jadya aatsu tatse beta netitsuranucuaré quisarati ishu.

⁶¹ —Yatseratu Jesús jadya quisaratiyaju bacachine: “Eratu Yusuja etare rihuishatsu puririsha jadya aatsu, quimisha huecacaju enityatsuranucau”, jadyari juchine, —jadyatu ecuita ecatsé jucuaré.

⁶² Tatse jadya juyaju bacatsutu pae dyaque muidaque netit-suracuare. Turatu Jesús bacaduracuare:

—Bacahuadyami ecatsé micue ishu quisaratiyaju. ¿Caque-mitsatiya ama cuitadya mique? ¿Jadidyami quisaratichine, jadya ama ni taa?

⁶³ Jesússtu caquemitsaticuaré ama. Yudijidyatu pae dyaque muidara bacaduranucuaré:

—Yusu aniyara mique quisaratiyaque bacayaque adebatsu, tuyudya cacuejaticue. ¿Midyami Mesías, Yusuja Ebacuaque, aijama ni taa?

⁶⁴—Jejee, Mesiasdya ique; Yusuja Ebacuaque ique. Tumbaedy a mique cuejaya. Ejeque huecaca micuanara ique babuque Yusuja jida eque amaca eaniqui muidaju aniyaju. Tumbaedy micuanara babuque barepa huani ducu eque junanucayaju, —jadyatu Jesúsra acuare.

⁶⁵ Jadya quisaratiyaju bacatsutu pae dyaque muidaque cahuaiticuare. Cahuaititsutu una cachajaticuare, dyaque cuita ecahuaitique ejitaju juishu.

—Riyaque ecuitarari Yusu cahuaitishaya tuja quisarati tsehue. Sareya ama tuque ecuana peyaja riyaque jidama juchineque cueja ishü. Micuanaratu bacahuadya tura quisarati jidamaque ayaju. ⁶⁶ ¿Eje bucha micuana amerecara aya? ¿Iyemerecara, iyemerecarama ni taa? —jadya tujatu acuare peya huaraji cuana.

—Jucha metse tuque. Pamajudya, —jadya tuna caquemitsaticuare.

⁶⁷ Jadya aatsu tunajatu ebutsequiniju ecuedira acuare. Miricuare tunara. Peya cuanaratu bahuapajacuare.

⁶⁸ —Yuneridya ni mi Mesías, Yusuja Emepeque, caadebaticue. ¿Aira taa mi bahuapajahua? —jadya tunajatu ijahue ayaquedy judidya acuare.

*Pedror a “Adebaya ama tuque era” jadya acuareque
(Mr 14.66-72; Lc 22.56-62; Jn 18.15-18, 25-27)*

⁶⁹ Jadya juya tsunumeetu Pedro etare tsecue juanicuare. Juaniyajutu epuna mere pujira jipeticuare.

—Miquemi Jesús Galileaju tsehue junenihuaquedy, —jadyatu Pedro epunara acuare.

⁷⁰ Pedrotu dutya tuhua cuanaja ijacaju catehuaticuare.

—¡Aijama, mama! ¡Adebaya ama tuque era! ¿Ejeque cuana taa tuquemi jadya aya? —jadyatu Pedro caquemitsaticuare.

⁷¹ Tuequedyatu etare tsecue enubitaquiju netidirunucacuare. Tuhua junetiyajutu peya epuna mere pujira banucacuare. Baatsu tujatu anucacuare:

—Riyaque ecuita ri Jesús Nazaretju tsehue junenihuaquedy, —jadya tujatu acuare tuhua cuanaque.

⁷² —¡Aijama, mama! ¡Adebaya ama tuque era! Yusu bahue ique yuneri quisaratiya, —jadyatu Pedror a acuare.

⁷³ Yaratupu juatsutu tuhua cuanara jipeticuare.

—Yuneri cuitadyami mique Jesús tsehue junenihuaquedy. Micue quisarati tu Galileaju aniya cuanaja quisarati cuitadya, —jadya tunajatu Pedro acuare.

⁷⁴ Tunara jadya ayajutu Pedro caquemitsaticuare:

—¡Aijama! ¡Adebaya ama tuque tumeque ecuita! Yusu bahue ique yuneri quisaratiya. Ique yuneri ama juyaque juatsu, Yusura panerecatura, —jadya tuna Pedrora acuare.

Tuque jadya quisaratijaju cuitatu tacure quiquecuare. ⁷⁵ Jadya juyajutu Pedro huecatanacuare. Caadebaticuaretu Jesúsra jadya cuejachineque: “Tacure quiquehuie mira tehua quimisha aya. ‘Adebaya ama tuque era’ jadya mira aquimisha aya”. Jadique adebatsutu Pedro tsajaja cuinana juatsu paa ebari jucuaire.

27

Jesús Pilato queja dujutanacuareque
(Mr 15.1; Lc 23.1-2; Jn 18.28-32)

¹ Apudajadya tunajatu dutya pae cuanaja huaraji cuanara, israelita emuiba cuanara jadya inime bajejecuare Jesús iye-mere ishü. ² Erisi tunajatu Pilato Roma juque enaruqui cuarequi queja dujumerecuare.

Judas capitirisititsu quiyeticuareque

³ Judas tuque inamerequique juhuaratu bacuare tunara Pilato queja iye ishü dujumereyaju. Jadya baatsu tujatu jidama inime jucuaire tura inime ahuaque caadebatitsu. Dyaque peya inime tshuetu cuacuare israelita emuiba cuana queja, pae cuanaja huaraji cuana queja jadya, quimisha tunca chipiru tunara tsujetyahuaque yudijidya tyanucara.

⁴—Cajuchatihua ique, era ecuita jidaque eje buchique ama iye ishü inamerehua tibu, —jadya tuna Judasra aticuare.

—Tyanucaume ecuana riyaque chipiru. Ecuana ama ecuana inime metse. Miaquejadyatu tumeque inime, —jadya tunajatu atsacuare Judas.

⁵ Jadya atsayajutu Judasra tuhuadya Yusuja etareju chipiru marecuare. Tuhuaque cuinanatsutu capitirisititsu quiyeticuare.

⁶ Pae cuanaja huaraji cuanaratu chipiru huesacuare yahuaju mare ijehue ahuaque.

—Riyaque chipiru tshue tuque ecuana iyemere ishüque tsujetyahua. Jadya tibu tuque ecuanaja iyataqui ama Yusu tyayaque cajaju. Ecuana cacuatsashati equetu en ataqui ama, —jadya tuna jucuaire.

⁷ Yaratupu juatsu tunajatu inime bajejecuare israelita ama cuanaque majuyaju papa ishüque yahua quemishü. Tumeque chipiru tshue tunajatu quemicuare mechi jaba puji cuanara sura ishü mechi quemiyaque yahua. ⁸ Riya cama jaridyatu tumeque emajaca emaju cuanaque papa ishüque “Quiyeti pujija chipiru tshue equemique emajaca” bacani. ⁹ Jadya equetu Jeremías Yusu equeque quisarati

cuejaquira icueneta cueja acuare bae cuitadya judadicuare. Tura patu huenequare:

“Inacuare tunajatu quimisha tunca chipiru metal eaque. Riyaque etsujequi tu Israel eque ejuracana cuanara iyacuareque.

¹⁰ Tumeque chipiru tsehue tunajatu yahua quemicuare mechi jaba puji queja,

Ecuana Cuatsashaquira cuatsashahua eque”,
jadya patu Jeremiasra huenequare béru.

Jesús Pilatoja yacuaju netiticuareque
(Mr 15.2-5; Lc 23.3-5; Jn 18.33-38)

¹¹ Jesústu Pilato Roma juque enaruquique cuarequiya yacuaju netiticuare.

—¿Midyami israelita cuanaja ecuari? —jadyatu bacaduracuare Pilatora.

—Jejee, mira aya equedya, —jadya tujatu acuare.

¹² Pae cuanaja huaraji cuanara, tumbaedya israelita emuiba cuanara jadyatu Pilato cuejacuare eje bucha juatsu tuna Jesús tuaqueja dujuyaque. Jesústu tunara pusha pusha cuejayaju caquemitsaticuare ama.

¹³ —¿Bacaya amami ecana micue ishü dutya jidamaque quisarati ayaju? ¿Eje bucha juatsu tuquemi ecana quemitsaya ama? —jadyatu Pilatora Jesús acuare.

¹⁴ Jesusratu quemitsacuare ama ni peadya quisarati tsehue. Jadya baatsutu enaruquique anajacatacuare.

Pilatora “Jesús pamajudya” jadya acuareque
(Mr 15.6-20; Lc 23.13-25; Jn 18.38-19.16)

¹⁵ Dutya maratu Pilatoja bahue jucuare Pascua chine ishü etare apudaju erisi netiyaque inajaca, ecuita cuanara peadya ejeque inajacamerecara ayaque camadya. ¹⁶ Tume patyatu erisi neticuare ecuita etare apudaju dutyara adebayaque Jesús Barrabás bacani. ¹⁷ Jetiamatu ecuita cuana apudajudya Pilatoja etare tsecue casitaticuare. Pilatora tuna bacaduracuare:

—¿Ejeque micuanara inajacamerecara aya? ¿Barrabás, Jesús “Mesías” jadya catiyaque ni taa? —jadya tujatu ecana bacaduracuare.

¹⁸ Turatu adebacuaredya ecuita cuanara ama Jesús ujeu bayaque, tunaja huaraji cuanara camadya. Bahuedyatu jucuare jishatsu huaraji cuanara Jesús inamerehuaque.

¹⁹ Pilato ecuita cuanara quemitsayaque ihua juyajutu ehuanequera cuejamerecuare:

—Iyemereume bacue mira Jesús tuyuque. Eratu dyaque jidama inime ishü baya. Tahui ique juchine tuatsehue dyaque jidama, —jadya tujatu yahuique cuejamerecuare.

²⁰ Jadya ama buchatu pae cuanaja huaraji cuanara, israelita emuiba cuanara jadya ecuita cuana acuare:

—Dyaque jidatu Barrabás inajacataqui, Jesús bacue iye. Jadya necuejacue Pilato tura bacaduranucayaju, —jadya tunajatu ecuita jetieque ama acuare.

²¹ Yara tupu juatsu tuna Pilatora bacaduranucacuare:

—¿Ejeque micuanara inajacamerecara aya?

—¡Barrabás! —jadya tuna caquemitsaticuare.

²² —¿Tume ique ai juya Jesús tsehue? ¿Ai ique juya tunara Mesías bacani jadya aya tsehue? —jadya tujatu ecana bacaduracuare.

—¡Curusuju tatamerecue! ¡Tuhua pamaju!

²³ —¿Eje bucha juatsu? ¿Ai tujatu jidama achine? —jadya tuna Pilatora acuare.

Abacatanacuare ama tuna quiqueyaque:

—¡Curusuju tatamerecue maju ishu!

²⁴ Pilatoratu adebacuaredya inime eje bucha cuarenu-cataquique ama. “Ique ni tunaja biji eque ama ejuu, tume tuna dyaque sicacadadya jutidya ecahuaitiu eatsehue”, jadya tujatu inime jucuare. Tume tujatu jadya bahue juatsu bañadoraju ena quetimerecuare. Emetucutu cutsaticuare ecuita jetiamara bayaju, tuque amapa inime metse jadya cabamereti ishu.

—Ique ama inime metse riyaque ecuita iyetanayaju. Micuanadya micuana inime metse, —jadya tujatu ecana acuare.

²⁵ Dutya tuna caquemitsaticuare:

—Ecuana inime metse paju. Tumbaedy a ecuana eque juracanaya cuanaque inime metsedya paju, —jadya tuna quique eque jubarecuare.

²⁶ Jadya bacatsutu Pilatora inajacamerecuare Barrabás. Tuequedya tujatu Jesús menajetyacuare sudaru Romaju cuanaque, tunaja catsacatsa, curusuju tata jadya aishu.

²⁷ Icuene tunajatu dujuacuare Pilatoja etareju, tuja sudaru cuana tahui ishuque etareju. Dutya sudaru cuana capiretishatsu tunajatu tuna patya nityacuare. ²⁸ Ijahue ayaquedya jutidya tunajatu ecuari edujuta bucha dujue acuare. Dyaque jutuyaque tacatsu tunajatu jutumerecuare una sehuesahuauque, ecuari arida cuanaja ejutuqui tsehue. ²⁹ Iyucaju tunajatu jutumerecuare cunu sahua cuija epicaque, acui sari jida eque amaca inamere jadya. Tuque jadya aatsu tuna tuja yacuaju chichucata jucuare, tuque jahue ayaque.

—¡Emuita paju israelita cuanaja ecuari muidaque! —jadya tuna jucuare tuque ijaribayaque.

³⁰ Ecuedira tuna acuare. Acui secatsu tuna tuatsehuedya iyucaju acuare. ³¹ Jadya ijahue ijahue amena aatsu tunajatu tacanucacuare una sehuesahuauque, tujaque cuita una jutumerenuca ishu. Jadya aatsu tunajatu curusuju tata ishu dujucare.

Jesús curusuju tatatanacuareque
(Mr 15.21-32; Lc 23.26-43; Jn 19.17-27)

³² Epu ebari juque cuinanayara tunajatu tsurutsacuare ecuita Cirene juque, Simón bacani. Casada tsehue tunajatu curusu mapemerecuare Jesús tatatana ishu juyaque.

³³ Jadya junatie tuna jucuaré Gólgota bacani emajacaju. Tumequetu jucuaré uhua cuemusú, emaju iyuca baeque.

³⁴ Tuhua tunajatu Jesús ijimerecara acuare uva nacaca esanashaque patseda tsehue eujaque, ecuita uje cuana ujejarasha ishu. Riya piji chibatsutu Jesúsra ijicarama acuare.

³⁵ Jadya aatsu tunajatu curusuju tatacuare. Curusuju amena tatatanahuaju tuna dadu ijahue jucuaré, Jesúsra jutuhua cuanaque ejeja ejeja juyaque tuna cama cajaquetibare ishu.

³⁶ Jadya juatsu tunajatu petaanibarecuare. ³⁷ Anibutema jarira tunajatu tauraju ehuenéque shuracuare ebarucue tuja iyuca dyaque. Taurajutu ehúene jucuaré eje bucha juatsu Jesús curusuju tatatanahuaque bahue amere ishúque. “Riyaque ri Jesús, israelita cuanaja ecuari”, jadyatu ehúene jucuaré.

³⁸ Tumbaedyá tunajatu beta ecuita casada tsehue ai secaquique ecatse curusuju tatacuare, Jesúsja jida eque amaca, peya jani eque amaca jadya. ³⁹ Tueque cuetiya cuanaratu ijaribacuare iyuca huinu huinu tsehue tuque asicaba, bji-damadura jadya ayaque.

⁴⁰ —Miquemi dyaque casada cabatichine Yusuja etare ri-huisha ishu. Quimisha huecaca juatsupa nityatsuranucaya, jadyami juchine. Yuneridya ni micue casa aniya, quinajacamereticue mita taca. Yuneri ni mi Yusu jabacua, butecue curusu juque, —jadyatu ecuita cuanara acuare, tuque ijarib-ayaque.

⁴¹ Pae cuanaja huaraji cuanara, cacuatsashati bahuityaqui cuanara jadya tunajatu ijillahuanacuare. Tumbaedyatu israelita emuiba cuanara ijaribacuare.

⁴² —Peya cuana inajacamere ishupa tuja casa aniya. Tumetu tuta taca quinajacameretitaquí ama cabatiya. Tuque patu ecuanaja ecuari, jadyatu juchine. Yuneridya ni jadya, pabute curusu juque. Curusu juque ni buteya, tume tuque ecuaná ejeneya tuque Mesiasque. ⁴³ Tura ecuaná cuejachine, tuquepa Yusu Jabacua, tuquepa Yusu queja nimee camadya

Yusuja naru ishu. Yuneridya ni jadya, Yusura curusu juque pabutya. Painajacamere tura, —jadyatu israelita cuanaja huaraji cuana jucuaré tuna cama.

⁴⁴ Chiri aridaque ecátse tuatsehue curusuju tatatanacuar-
eratu ijillahuananucacuare^{dy}a.

Jesús curusuju majucuaréque

(Mr 15.33-41; Lc 23.44-49; Jn 19.28-30)

⁴⁵ Tumetu tumeque chinequeja, barepatya eque las tres chinequeja dutya yahua apunaterecuare. ⁴⁶ Las tres chinequeja dyanetu Jesús jebuda quiquecuare:

—Elí, Elí, ¿lema sabactani? (“Ecue Etata Yusu, ¿eje bucha juatsu mira jacahua?”) jadique) —jadyatu quiquecuare.

⁴⁷ Eje uma tuhua neticuare cuanaratu bacacuare. Elías tura ihuaraya bucha jutidya tunajatu bacacuare.

—Elías béru Yusu equeque quisarati cuejaquique jucuaréque tujatu ihuaraya, tuque tsahuana ishu, —jadya tuna jucuaré.

⁴⁸ Jadya Jesús quiqueyaju bacatsutu eraca pucaca jiteque tsajajaajecuare. Mullaticuare tujatu uva nacaca esanashaque patsedaju. Mullatsu tujatu acui barudaju risitsu nityatsuratsu ecuatsaju jipemerecuare tuja susu ishu datse.

⁴⁹ —Jadya aume. Nebara, ejepa Eliasra junatsu butyanaya curusu juque, —jadyatu peya cuana jucuaré, tuque ijarib-
ayaque.

⁵⁰ Tumetu Jesús quique pidya casada juatsu, amena ishu canajeti pidya juatsu majucuaré. ⁵¹ Tuque majuyajudyatu Yusuja etare juque junuda eshuraque Dyaque Muidaque penequique chajatanacuare ebarucue eque emaque queja. Yahuatu bucucucuaré. Tumu ebari cuanatu buribarecuare. ⁵² Emaju cani cuanatu pacashatanacuare. Yusu queja ecaty-
ati cuanaque emaju cuanaque tuna jetiama chacha netit-
suranucacuare. ⁵³ Emaju cani ducuque tuna cuinanacuare. Jesús emajuque netitsurahuaju tuna cuacuare Jerusalénju. Tuhua tunajatu jetiamara bacuare. ⁵⁴ Cien sudaru cuana cuatsashaquique Jesús naru juyaratu bacuare yahua bucu-
cuyaju, dutya eje bucha juyaju. Tumebaedya umae cuana tuhua neticuare cuanara bacuare^{dy}a. Jadya juya baatsu tuna dyaque bajida jucuaré.

—Pusha ama cuitadya tucueri riyaque ecuita Yusuja Ebacuaque juhua, —jadya tuna jucuaré.

⁵⁵ Tuhuatu jetiama epuna cuana neticuare japada eque capetatiya cuanaque. Jesús Galileaju cuaya patya equetu tumeque epuna cuana tuatsehue junenicuare, tuque tsahua juyaque. ⁵⁶ Jucuaré tuna María Magdalaju aniyaque; María,

Santiago, José jadya ecatseja ecuaque; Zebedeoja ebacuaque ecatseja ecuaque; tumbaedy peya epuna cuana.

Jesús emajuque tumu cani epuruju ishatanacuareque
(Mr 15.42-47; Lc 23.50-56; Jn 19.38-42)

⁵⁷ Apunayajutu jecuare ecuita chipirudaque José bacani, Arimatea bacani epuju aniyaque. Arepa israelita cuanaja huaraji juya ama bucha tuquetu Jesús queja ecatyatique jucuare. ⁵⁸ Pilato queja cuaatsu tujatu bacaticuare:

—¿Ebutyamereu ama mira Jesús curusuju emaju badeyaque? Paishati caniju, —jadya tujatu Pilato aticuare.

Bacatihujutu Pilatora acuare:

—Butyameretsu emaju papa ishucani epuruju ishaticue.

⁵⁹ Tura jadya ayaju tujatu butyamereticuare. Butyameretsu tujatu piruricuare sahuana iyacua tsehue. ⁶⁰ Ishaticuare tujatu tumu cani jadya ishucani epuju, tsumemaju. Tumeque canitu jucuare Joséja cuita yahuajudya. Jesús emajuque ishatsu tujatu etsecue tachimerecuare tumu ebari tsehue. Tachimere jadya aatsu tujatu shanacuare. ⁶¹ María Magdala juque, peya María jadya tatse cani queja acua juanicuare.

Sudaru cuana Jesús emajuque ishatanahuaque cani narumeretacuareque

⁶² Canajara huecaca cabajejeti ishucane huecaca cuetihuaju, amena ijete nubihuaju apunahuajutu pae cuanaja huaraji cuana, fariseo cuana jadya cuacuare Pilato tsehue quisaratira.

⁶³ —Ecuana Naruquique, tume pusha pusha aridaque tuque ecuaana adebaya tuque chacha jarira tura quisarati achineque, quimisha huecaca emajuquepa netitsuranucaya jadya juchineque. ⁶⁴ Jadya tibu narumerecane cani tsecue quimisha huecaca tupu, Jesúsra mepehua cuanara emajuque meta echiritiuju, emajuque tuna etehua queti eaju. “Majuchinequetu chacha netitsuranucachine”, jadya tuna pusha pusha ejuu. Jadya juhujutu ecuita cuanara eejeneu Jesús chachaque nuca. Tunaratu eejeneu tuque Mesiasque. Tumetu dyaquedya ejuu, majuchinequepa chacha netitsuranucachine jadique ejenetsu, —jadya tunajatu Pilato aticuare.

⁶⁵ —Jida, jadidya paju. Tumidya peadya cuare sudaru cuana. Jutaquiju pana narumere neaticue emaju cani, jadya micuanara adebaya bae ejuu tibu, —jadya tuna Pilatora acuare.

⁶⁶ Jadya ahujutu tuna dirucuare. Pana narumereti tuna emaju cani acuare. Tumu tsecue tunajatu pana tachi acuare,

ejera epacashauque adeba ishu. Jadya juatsu tunajatu sudaru cuana enaruqui nityacuare.

28

Jesús chacha netitsuranucacuareque
(Mr 16.1-8; Lc 24.1-12; Jn 20.1-10)

¹ Canajara huecaca cuetihuaaju, semana catibutiyaque dmicu huecacayajutu María Magdala juque, peya María jadya tatse cuahuecacacuare Jesús emajuque tumu cani epuruju tunara ishachineque cuajira. ² Casadatu yahua bucucucuaire. Barepaju Yusu tsahuaquique buteyajutu jadya jucuaire. Junacuaretu emaju caniju. Tuhua junatsu tujatu tumu ebari bucucushanacuare. Cani tsecue tumu penequique tujatu nityasicuacuare. Tumu nityasicuatsutu tumeque tumu dyaquedya juanicuare. ³ Pupipupiya bucha huecaetu jucuaire. Tuja unatu dyáque pajada jucuaire, ai pajada cuanaque dyaque pajada, huapeje bucha pajae. ⁴ Jadya baatsutu sudaru cuana tadadacuare, bajida juatsu. Emaju bucha tuna rihuitsu yahuaju jarabarecuare. ⁵ Tumetu barepa juque Yusu tsahuaquira epuna cuana bajida juya cuanaque isaracuare:

—Nejecutanaume. Jesús, Nazaret juque, curusuju tatatanachineque sare micuana juya. ⁶ Rehua ama rique. Chachatu netitsuranucahua, tuque cacuejatinichine baedya. Nepetanacue tunara ishachineju, yuneri tuque rehua aijamaque bahue juishu. ⁷ Petatsu ebajarara nedirunucacue. Tura mepehua cuanaque necuejadirucue: “Majuchineque patu chacha nuca. Tuque patu icuenetadya cuaya Galileaju. Tuhuadyapa tura micuana ihuatiya. Tuhuadyapa tuque micuana batiya”, jadya ecana necuejadiruhuisacue, —jadya tatse barepaju Yusu tsahuaquira cuejamerecuare.

⁸ Jadya ayajutu epuna ecatsé masadama emaju cani juque dirunucacuare. Bajida, peya inime tuputsu bacue pureama jadya tatse jucuaire. Tsajaja cama tatse ecuana Jesúsra mepehua cuanaque cuejara dirunucacuare. ⁹ Tatse diruyaju tatse Jesúsra cabamereti ishu atsacuare. Isaratsacuare tujatu ecatsé:

—Ban día, mama ecatsé, —jadya tujatu ecatsé isaratsacuare.

Tueque cuitadya tatse rihuitsu chichucata jucuaire. Chichucata juatsu tatsejatu pureama acuare ehuasiju macacatsu.

¹⁰ —Bajida nejuume. Necuejaticue ecue cuanaque; pacua ecana Galileaju. Tuhua ecuana pacatsuruti, —jadyatu Jesúsra acuare epuna ecatsé.

Sudaru cuanara pusha pusha cuatsabiji acuareque

¹¹ Epuna ecatsé ecuana cuejara cuaya tsunumeetu emaju cani naru juya cuanaque dirucuaire epuju. Pae cuanaja

huaraji cuana dutya eje bucha juhuaque cuejara tuna cuacuare. ¹² Riyaque pae cuanatu cuacuare peya israelita cuanaja huaraji cuana tsehue quisaratira. Inime tunajatu bajejecuare narunaruya cuanaque chipiru tsehue tsujetya ishü, tuna pusha pusha juishu. Tsujetyatsu tunajatu ecana acuare:

¹³ —Ejera ni micuana bacaduraya emaju caniju eje bucha juhuaque, “Meta ecuana tahuiyajutu Jesúsra mepehua cuanaque emaju caniju junahua. Junatsu tunajatu Jesús emajuque chirinahua”, jadya necacuejaticue. ¹⁴ Roma juque ecuari cuarequique ni bahue juya micuanara quisarati ayaque, bajida nejuume. Tura ni micuana cahuaitsü iyecara aya, micuana tahuihua baatsu, ecuanara micuana tachiya, tura enerecaturaju, —jadyatu pae cuanaja huaraji cuanara cuejacuare sudaru cuana emaju cani naruqui juhua cuanaque.

¹⁵ Tumetu sudaru cuanara inatsacuaredya etsujequi. Chipiru inatsu tuna cuejatahua equedya jucuaire. Cuejatibunecuare tuna ecuanaja ata cuana ducu tumeque pusha pusha. Riya camatu ecuanaja ata cuanara riyaque pusha pusha ejeneya jaridya.

Jesúsra camadya ishü tura mepehua cuanaque cuatsashacuareque

(Mr 16.14-18; Lc 24.36-49; Jn 20.19-23)

¹⁶ Jadya juatsu ecuana Jesúsra mepehua cuanaque cuacuare Galilea emataju Jesúsra catsurutiquere ana ahuajudya. ¹⁷ Jesús baatsu tuque ecuana pureama acuare, arepa ecuana umaera ejenecarama acuare ama bucha tuque Jesúsque. ¹⁸ Tume ecuana Jesúsra jipeticuare.

—Yusura ique dutya naru ishü cuatsashahua, barepa juque, yahua juque jadya naru ishü. ¹⁹ Necuacue dutya yahuaju aniya cuana queja. Necuejaticue ecana jidaque quisarati, eaqueja ecana pacatyati, ecue juishu. Neutsaticue ecana, tuna Etata jaque, Ebacuaque jaque, Espíritu jaque jadya ejitaju juishu. ²⁰ Era micuana cuejahua eje bucha era cuatsashaya eque juishuque. Nebahuityaticue ecana tuna era amereya eque juishu. Jida bahue nejucue riyaque. Ecue micuana jaca nime ama. Narujacaya amadya micuana era, ique junanucaya tupu, —jadya ecuana Jesúsra acuare.

Riya tupu camadya micuana cuejahua.

Mateo

JIDAQUE QUISARATI MARCOSRA HUENECUAREQUE MARCOS

Riyaque quirica ri Marcosra hueneacuareque. Bernabéja ebuquetu jucuaré. Marcosratu Pablo peya yahua cuanaju Jesúsja quisarati cueja juyaju tajicuare. Turatu tsahuacuarenya Pedro, Jesúsja quisarati cuejaquique. Pedrora cuejayaju bacatsutu Marcosra hueneajecuare Jesús eje buchique.

Marcosratu Jesús MERE PUJI YUSUJA ECUADISHAQUE jadya cuejae acuare. Hueneacuare tujatu eje bucha bameree Jesúsra Yusuja casa acuareque, Jesúsra eje bucha ae Yusuja casa tsehue acuareque. Riyaque quirica isaratsu ecuana bahue juya Jesúsra acuare cuanaque. Dyaque tujatu hueneacuare Jesús eje bucha jucuaré, Jesúsra bahuityacuareque bacue dyaque cuita ama. Turatu ejitaju acuare Jesúsra ecuita cuana tsahuacuareque, tuna tsehue tuja iyuhue anicuareque jadya.

Juan Ecuita Cuana Utsaquira Yusuja quisarati cuejati-bunecuareque

(Mt 3.1-12; Lc 3.1-9, 15-17; Jn 1.19-28)

¹ Cuejaya micuana era Jesucristo Yusuja Ebacuaque eje buchique. ² Béru yuequedya Yusu equéque quisarati cuejaquique Isaiasratu hueneacuare eje bucha judadiyaque:

“Cuadishabuque tuque mique cuadishama jariju ique merequique.

Turatu ecuita cuana bajejebuque, tunaja mira quisarati cuejabuqueque baca ishu.

³ Quisarati cuejatu jubuque ejeque cuana tsecada eje uma piji anitaya cuana queja.

‘Nequihuaticue, Ecuana Cuatsashaquique junayaju ishu.

Jidamaque neajacacue.

Jida tuyu nejucue, ediji benubenuque etuyune ejuu bucha’ ”, jadyatu Yusura Isaías equé quisarati acuare.

⁴ Tsunuda eje uma mara juatsutu Juan tsecada eje uma piji anitaya cuana queja Yusuja quisarati cueja jucuaré. Tu- aqueja jutiyaque ecuita cuana tujatu cuejatsabarecuare:

—Necacuareticue inime, Yusuja micuanaja jucha cuana apupasha ishu. Necutsamereticue yuneridya inime cacuaretihua jadicue adebataqui juishu, —jadya tujatu ecana cueja bahue jucuaré.

Tuna inime cacuaretihuaju tujatu ecana utsa bahue jucuare. ⁵ Jetiama Jerusalén epu ebariju aniya cuanaratu quisaratiyaju bacaticuare. Tumebaedya Judea yahuaju dutya queja aniya cuanara quisaratiyaju ijacabacaticuarenya. Tura quisarati cuejayaju bacatsu,

—Yuneridya ecuana jucha arida cuanaque, —jadya tuna cacuejaticuare.

Jadya tuna cacuejatihuaju tuna Juanra utsacuare Jordán cueriju.

⁶ Juanratu jutucuare camello tsaru etarique etataque eju-tuqui eaque, baya ecuita cuanadya jutidya cajututiya bucha. Ebiti patsa quinida ejicui tsehuedya jutidya tu ecaquereti jucuare. Tsei ebari, huaja jadya tujatu araaranicuare.

⁷ Ecuita cuana isarayaque tujatu jadya abahue jucuare:

—Tsunutaya amatu peya junayaque. Tujatu dyaque casa aniya, ecue bucha ama. Tuque baatsu ique ni aishuquedya jutidya; mere puji tuja patrón tsehue beta tupu ama ejuu bucha jutidya ique. ⁸ Era micuana utsaya ena tsehue, inime cacuaretihua jadicue adebataqui juishu. Tume junayara micuana Yusuja Espiritu tyanaya, tujaque jadicue adebataqui juishu, —jadya tujatu ecana acuare.

Jesús cutsamereticuareque

(Mt 3.13-17; Lc 3.21-22)

⁹ Juan ecuita cuana utsa jucuare patyatu Jesús jecuare Nazaret juque. Tumeque eputu Galilea yahuaju jucuare. Tuque jutihuajutu Juanra Jordán cueriju utsacuare. ¹⁰ Tuque ena juque cuinanayaju cuitatu Jesúsra bacuare barepa pacashatanayaju. Bacuaretu Yusuja Espiritu huei jiuque tuque dyaque buteyaju. ¹¹ Tume tujatu barepa juque etsuri bacacuare. Yume tucuetu jucuare tuja Etataque Yusu.

—Mique mique ecue Ebacua dyaque iyuhuedaque. Ique dyaque pureama juya miatsehue, —jadya tujatu acuare.

Satanásra Jesús cajuchatishacara acuareque

(Mt 4.1-11; Lc 4.1-13)

¹² Jadya juu jadya juatsutu Yusuja Espiritura Jesús duju-cuare japada peya queja amaca anitaya amaju. ¹³ Pushi tunca huecacatu tuhua juticuare. Tuhuatu jetiama cuanubi mureda cuanaque anicuare. Tuhuadyatu Satanásra cajuchatishacara ebari datse acuare. Jadya juhuajutu Yusu tsahuaqui cuanaque butecuare barepa juque Jesús tsahua, casatura jadya aishu.

Jesús Galileaju Yusuja quisarati cueja catibuticuareque

(Mt 4.12-17; Lc 4.14-15)

¹⁴ Ecuarira Juan etare apudaju ishamerehuajutu Jesús Galileaju cuacuare Yusuja jidaque quisarati cuejara.

¹⁵ Cuejacuare tujatu ecana:

—Necacuareticue inime. Yusu queja necatyaticue, tuja quisarati jidaque ejenetsu. Juetihuatu huecaca. Yusuajatu adebamerehuie tuja Emepeque, —jadya tujatu ecana cuejacuare.

Jesúsra pushi jae puji cuana tuatsehue juneni ishuhuaradirucuaque

(Mt 4.18-22; Lc 5.1-11)

¹⁶ Jesúsra Galilea bei jiruru eque dirucuaque. Diruyara tujatu badirucuaque beta jae puji ecatsé. Peadyatu Simon jucuare, peya bacue Simón tsehuequiuedya Andrés. Jae deru ishucue enaju mare tatsé jucuare. ¹⁷ Jesúsra tatsé isaradirucuaque:

—Nejecue. Eatsehue nejunenicue. Metse metse jae puji ecatsé. Iyacia metse era ecuita cuana Yusu adeba mere ishucue amereya, —jadya tatsé Jesúsra adirucuaque.

¹⁸ Tumeque ura cuitadya tatsé jae deru ishucue shanaquenatsu junenitibunecuaque Jesús tsehue.

¹⁹ Cuabacanucatsu tujatu banucacuare beta ecuita ecatsé. Jucua retu Santiago, Santiago tsehuequiue Juan jadya, Zebedeja ebacuaque ecatsé. Cuaba aridaju tatsé juanicuaque, jae deru ishucuaque sipiani juyaque. ²⁰ Jesúsra tatsé ihuaracuare, tuatsehue juneni ishucuaque. Tura ihuarayaju bacatsu tatséjatu shanaquenacuare etataque Zebede cuabaju tuja mere puji cuana tsehue. Cuinanacuare tatsé cuaba arida juque, etataque isaraquenatsu. Jadya juatsu tatsé Jesús tsehue junenitibunecuaque.

Jesúsra ecuita ijahua cuanara quijahuatishayaque quijahuatishajacuaque

(Lc 4.31-37)

²¹ Judirucuaque tuna Capernaum epuju. Canajara huecaca jutu Jesús nubicuare caradati ishucue etareju. Nubititutu catibuticuaque tuna bahuitya. ²² Anajacatacuare tuna tura bahuityayaque bacatsu, huaraji equisaratiu bucha quisaratie juya bacatsu. Bahuityacuare tujatu ecana cacuat-sashati bahuityaquira bahuityaya bucha ama.

²³ Anicua retu tumeque etareju ecuita ijahua cuanara quijahuatishayaque. Tuque quijahuatishaquiuedya jutidyatu ecuita eque quiquecuare:

²⁴ —¿Ai jitequemi jeya ecuaque queja, Jesús Nazaret juque? ¿Ecuana aputasharami jeya? Adebaya mique ecuanara. Miquemi juchama. Yusu quejaquemi jehua, —jadya tujatu acuaque.

²⁵ Jesusratu tumeque ijahua nereda acuare:

—¡Abacata jucue! ¡Iyacua cuita cuinanacue riyaque ecuita quejaque! —jadyatu Jesúsra acuare ijahua ecuita quijahuatishaquique.

²⁶ Jadya quisarati aatsutu ijahuara ecuita tadadashatilla, yahua catsaqui amere jadya acuare. Manu amere, jebuda quiqueshatilla, cuinana jadyatu tuaquejaque jucuaré. ²⁷ Dutya tuque petaqui jucuaré cuanaque tuna jecutanacuare. Cabacaduratibarecuare tuna:

—¿Eje buchique ri riyaque? ¡Eje buchique rejari iyacuaque bahuityaya! Huaraji equisaratiu bucha rejari quisarati. Aniya taa tuja casa ijahua cuana cuatsasha ishu. Tuna bacue tuequedya juya tura amereya equedya, —jadya tuna jucuaré.

²⁸ Masadama cuitatu tumeque jadya juyaque tsapetanacuare dutya Galilea yahuaju. Tumeque yahuaju cuanaque tuna dutya bahue jucuaré Jesús jadya juyaque.

Jesúsra Simón Pedroja ehuanegueja ecuaque chachanecuareque

(Mt 8.14-15; Lc 4.38-39)

²⁹ Caradati ishucue etare juque cuinanatsutu Jesús cuacuare Santiago, Juan jadya tsehue. Cuacuare tuna Simón, Andrés jadyaja etareju. ³⁰ Simónja ehuanegueja ecuaquetu dyaquene cuita, baara juyaque jaracuare. Cuejatsacuare tunajatu Jesús, tumeque epuna ujejeda jarayaque. ³¹ Jadya bacatsutu Jesúsra jipeticuare. Jipetitsu tujatu emetucuju jabanaticuare. Emetucuju jabatsu tujatu iyatsuracuare. Tumeque ura cuitadyatu baara juyaque chacha jucuaré. Tumetu netitsuratsu earaqui jucuaré Jesús, tura mepehua cuanaque jadya mihua ishu.

Jesúsra umada ujejeda cuanaque chachanecuareque

(Mt 8.16-17; Lc 4.40-41)

³² Amena ijeti nubihuaju, apupuyajutu ecuita cuanara becuare Jesús queja ujejeda cuanaque umada ujeje tsehue cuanaque, tumbaedyá ijahua cuanara quijahuatishaya cuanaque. ³³ Dutya epu jujeri tuna casitaticuare etsecueju, Jesúsra eje bucha ayaque petacara aatsu. ³⁴ Jesusratu chachanebarecuare umada bape bape ujeje tsehue cuanaque. Tumbaedyatu ijahua cuanara quijahuatishaya cuanaja ijahua cuana cuinanashacuare. Quisaraticuare tujatu ijahua cuana acuare, ecuita cuanara tuque Mesiasque eadebauju.

Galileaju Jesús Yusuja quisarati cueja jucuaréque

(Lc 4.42-44)

³⁵ Huecacama jarijutu Jesús netitsurahuecacacuare. Epu juquetu cuacuare Yusu tsehue quisaratira tuta taca piji. ³⁶ Umae peya cuana Simón tsehue mepetapee jucuare cuanaratu Jesús sareticuare. ³⁷ Jesús tunajatu Etataque tsehue quisaratijaju baticuare. Quisaratijacahuaju tunajatu cuejacuare:

—Dutyara tunarami sareya, —jadya tunajatu acuare.

³⁸ Jesúsra tuna acuare:

—Caadebatiyadya ique tunara sareyaque. Jadya ama bucha necuara peya queja amaca epu cuana japadamaju Yusuja quisarati cuejara. Jadya ishudy a ique Capernaum juque cuinanahua, —jadya tujatu ecana acuare.

³⁹ Tumetu Jesús junenicuare dutya Galileaju, caradati ishugue etare cuanaju Yusuja quisarati cueja juyaque, tumebaedy a ijahua cuanara quijahuatishaya cuanaque chachane.

Jesúsra ecuita pusesera ririshayaque chachanecuareque
(Mt 8.1-4; Lc 5.12-16)

⁴⁰ Jesús peya queja amaca juneniyajutu ecuita pusese sehuera rami ririshayara jipeticuare. Tume tujatu Jesús tuja yacuaju chichucata juatsu isaratsacuare:

—Chachanecara aatsu taa mira ecue ujeje aniyaque echachaneu, —jadya tujatu acuare.

⁴¹ Nerecada baatsutu Jesúsra jabacuare.

—Chachaneyadya mique era, —jadyatu Jesúsra acuare.

⁴² Jadya aya tsunumeetu pusese aputacuare tuja ecuita juque. Chachadya tu jucuare. ⁴³ Ecuita diruma jarijutu Jesúsra nereda bucha cuejae acuare:

⁴⁴ —Bacacue era cuejayaju. Cuejacueja camadya aume ni ejequedy a jutidya mique eje bucha chachae juhuaque. Riyata cuau cuitadya jucue pae queja, tuja mique pana adeba atsa ishu, “Chachadya rique” jadya tuja aishu. Cadujuticue Moisésra amerehua equedy a riyaque ujeje chacha eju cuanaja Yusu tyabahueque. Jadya juatsutu ecuita cuana bahue juya mique amena chachaque, —jadyatu Jesúsra acuare.

⁴⁵ Jadya ahujutu ecuita dirucuare. Arepa Jesúsra cuejamerecarama ahua ama bucha, tujatu ecana cuejaajecuare tuque Jesúsra chachanehuaque. Jetiama ecuitara bape baatsu petacara ayajutu Jesús epu arida cuanaju cuataqui ama cabaticuare. Epu japada tsecada anitaya quejatu junenicuare. Dutya queja aniya cuanaratu Jesús baticuare.

2

Jesúsra ajebaecuaque ajeshacuareque
(Mt 9.1-8; Lc 5.17-26)

1 Eje uma huecaca cuana juatsutu Jesús yudijidya judirunuca jucuare Capernaumju. Masadamatu ecuita cuana bahue jucuare tuque tuhua etarejuque judiruhuaque. 2 Umadatu ecuita cuana caradatinucacuare tuhua. Aijamatu jucuare emajaca educuju ni etsecueju, umada caradatihua tibu. Tuhua tuna tura Yusuja quisarati cuejacuare. 3 Tuque quisarati cueja juya tsunumeetu pushi ecuita junaticuare, ebadequi baeju ajebaecuaque duju juyaque. Jadya iyabutyamaquedya jutidya tunajatu ajebaecua queja Jesús jipemerecara acuire. 4 Jipetaqui ama tunajatu Jesús bacuare, ecuita jetiama tibu. Amena eje bucha nubitaqui ama cabatitsu, tuna tsuracuare ebarucue etare dyaque. Tsuratsu tunajatu etare ebarucue jepedaque huetsacuare, Jesús netiya tuyu. Huetsatsu tunajatu ajebaecuaque butyacuare ebadequi baeju misa tsehue tisunetsu. 5 Ajebaecuaque dujuqui cuanara Jesúsra ajebaecuaque eajeshauque ejeneyaque adebatsu tujatu jadya ajebaecuaque acuire:

—Micue jucha cuana tu amena eapupasha, tata, —jadya tujatu acuire.

6 Cacuatssashati bahuityaqui cuanaque tuna tuhuadya etareju jucuare. Jadya quisaratiyaju bacatsu tunajatu inime tupucuire:

7 —¿Eje bucha juatsuri riyaque ecuita jadya quisaratiya? Yusu tujatu ijillahuanaya. ¡Ni ejeradya jutidyatu jucha cuana eapupashau, Yusura peadya camadya! —jadya tunajatu inime tupubarecuare.

8 Jesússtu bahuedya jucuare tunara eje bucha inime tupuyaque.

—¿Eje bucha juatsu tuque micuana jadya inime tupuya: “Yusu tujatu ijillahuanaya” jadya? Jida ama tuque micuana inime tupuya. 9 Era ni ajebaecuaque eau: “Micue jucha cuana tu eapupasha” jadya, eadebau ama tuque micuana ecue casa aniyaque, eapupasha, apupashama jadique ejitaju ama tibu. Era ni eau: “Netitsuracue. Piruricue micue jara ishucue. Ajecue”, tumeque ura cuitadya tuque micuana eadebau ecue casa aniyaque, ajebaecuaque juneniyaju baya tibu. 10 Tuque juneniya baatsu micuana bahue juya ecue tumbaedya riyaque yahuaju jucha cuana apupasha ishucue casa aniyaque, —jadya tujatu eana acuire.

Tumetu Jesúsra acuire ajebaecuaque:

11 —Netitsuracue. Piruricue micue jara ishucue. Dirucue micue etareju, —jadya tujatu acuire.

12 Jadya ahujaju cuitatu ecuita netitsuracuare. Tuja jara ishucue piruritsu, huesatsutu cuinanaquenacuare tuhuaque dutyara petayaju. Dutya tuna anajacatacuare. Pureama tuna Yusu acuire:

—¡Dyaque jida, casada taa Yusu! ¡Bama taa rique ecuanaja jadya cuanaque! —jadya tuna jucuare.

Jesúsra Leví tuatsehue juneni ishú ihuaracuareque
(Mt 9.9-13; Lc 5.27-32)

¹³ Jadya junucatsutu Jesús cuanucacuare bei jiruru eque. Jetiama ecuitaratu jipetinucacuare. Tume tujatu ecana bahuityacuare. ¹⁴ Cuetiyara tujatu bacuare Leví, Roma juque enaruquiya ishú chipiru tsuje bacayaque juaniyaju. Levítu Alfoja ebacuaque jucuare. Isaranati jadya aatsu tujatu acuaire:

—Eatsehue junenicue, —jadyatu Jesúsra acuaire.

Jadya ahuaju netitsuratsutu Jesús tsehue juneniti-bunecuare.

¹⁵ Ejetsunue juatsu amatu Jesús Levíja etareju araaraa-punacuare, tura mepehua cuana tsehue. Tuhuatu jucuairenya enaruquiya ishú chipiru tsuje bacacui cuanaque, umae bijidamadurataya cuanaque jadya. Tuhuadya tuna jetiama mesaju Jesús tsehue araaracuare. ¹⁶ Cacuatashati bahuityaqui cuanara, fariseo cuanara jadyara tunajatu bacuare eje bucha juyaque. Bacuare tuna Jesús tunara ecuita cuana ujeu baya cuana tsehue araarayaju. Jadya baatsu tunajatu acuaire Jesúsra mepehua cuanaque:

—Riyaque ecuita ri bijidamadurataya cuanaque. Micuana Bahuityaquiquetu araarataqui ama enaruquiya ishú chipiru tsuje sitaqui cuana tsehue, tumbaedyá peya jucha arida cuana tsehue, —jadya tunajatu ecana acuaire.

¹⁷ Jesúsra tuna quisariatiyaju bacuare.

—Chacha cuanaratu sareya ama casamati puji. Ujejeda cuanara camadyatu sareya. Juchama bucha cabatiya cuanaque sarera ama jehua. Ique jehua jucha arida cabatiya cuanaque jiteque, tuna inime cacuaresha ishú, —jadya tuna Jesúsra acuaire.

Eje bucha anitaqui amatu beruque inime eque, iyacua eque jadya

(Mt 9.14-17; Lc 5.33-39)

¹⁸ Juan Ecuita Cuana Utsaqui tsehue junenicuare cuanaque, fariseo cuana tsehue junenicuare cuanaque jadya tuna arama quibeti bahue jucuaire, Yusu muiyaque cabamereti ishú. Jadya tuna arama quibetiayutu, umae ecuita cuana Jesús queja cuacuare. Jutitsu tunajatu bacaduracuare:

—Juan tsehue juneniya cuanaqueri arama quibetiya Yusu muiyaque cabamereti ishú. Tumbaedyá fariseo cuana tsehue juneniya cuanaque jadidya ecana juya. Mira mepehua

cuanaque bacue arama quibeti baecua. ¿Eje bucha juatsu? — jadya tunajatu Jesús acuare.

¹⁹⁻²⁰ Jesúsra tuna quemitsacuare:

—Caquemitiyaju cuaishu ecueja cuanaque tuna arama quibetiya ama caquemitihuaque tuna tsehueju. Tuna quejaque dujanahuaju piisi tuna arama quibetiya. Tumbaedyatu ecue cuanaque; ique cuanucahuaju piisidya tuna arama quibetiya.

²¹ “Ni ejeratu camisa siri sipiya eraca iyacua tsehue. Jadya ayaque juatsutu nacatatsu eraca iyacuaque dyurutanatsu camisa siri echajatanau. Chajatanayaque juatsutu camisa beru juhua bucha dyaque jidama ejuu. ²² Tumbaedyatu ishataqui ama tupari sasana ishuque sura siri cuitaju. Tupari sasanayaratu epututashau sura siri. Tumetu eputau sura, tupari jadya. Jadya tibudyatu tupari sasana ishuque sura jida iyacuaju ishataqui, —jadya tujatu ecana acuare.

(Riyaque cuatsabiji tsehue tuna Jesúsra bahuityacuare. Eje bucha anitaqui amatu beru inime israelita cuanara bahuityacuare eque, iyacuaque tura cuitadya bahuityaya eque jadicque.)

Jesúsra mepehua cuanara trigo esa canajara huecacaju sepi-ajecuaque

(Mt 12.1-8; Lc 6.1-5)

²³ Tume patyatu Jesús cueticuare euhua cuana eque canajara huecacaju. Aridatu trigo euhuaque jucuaque ejahuane, amena racataqui. Jesúsra mepehua cuanaratu cuetiyaradya jutidya trigo esa sepitsu etsucaca mucuajecuaque. ²⁴ Umae fariseo cuanara baatsu tunajatu Jesús cuejacuaque:

—Mira mepehua cuanaquetu Moisésra cuatsashacuare eque ama juya. Meredy a tuna juya etsucaca cuana sepi, mucu jadya juyaque. Meretu jutabaecua canajara huecacaju, —jadya tunajatu acuare Jesús.

²⁵ Jesúsra tuna quemitsacuare:

—Neadebacue ecuanaja ebaba David emuique jucuaque. Tuque, tuatsehue cuaya cuanaque jadya tuna aracara jucuaque. Aijama tunaja ara ishuque jucuaque. ²⁶ Tume patya, Abiatar pae dyaque muidaque jucuaque patyatu David nubicuare Yusuja etareju. Nubitsu tujatu Yusuja ish eiyaque pan cuana inacuaque. Inatsu tujatu aracuare. Tumbaedyatu tyacuare tuatsehue cuaya cuanaque. Arepa tuja, tuatsehue cuaya cuanaja jadya arataquima paju ama bucha tuna aracuare, pae cuanaja cuita camadya arataquique. Jadya ama buchatu Yusu cahuitishacuare ama, tumeque pan aratsu. ²⁷ Icuene cuitatu Yusura ecuita cuana iyahua. Tuequedyatu iyahua semanaju peadya

huecaca tuna canajara ishu. Canajara huecaca icuene au, ecuita cuana au jadya amatu Yusura acuare. ²⁸ IQUE ECUITAjatu aniya cacuatsashati canajara huecacaju ai juishuque, —jadya tuna Jesúsra acuare.

3

Jesúsra ecuita emetucu majuque chachanecuareque
(Mt 12.9-14; Lc 6.6-11)

¹ Jadya juatsutu Jesús caradati ishuque etareju nubinu-cacuare. Canajara huecacajutu jadya jucuare. Ecuita emetucu majuquetu tuhua jucuare. ² Tumbaedyatu tuhua jucuare Jesús ujeu baqui cuanaque. Tunaratu Jesús jidama inime tupu tsehue petacuare. “Tura ni canajara huecacaju riyaque emetucu majuque chachaneya, tume tuque ecuana huaraji cuana queja cuejatiyadya”, jadya tunajatu inime tupucuare.

³ Tumetu Jesúsra isaracuare ecuita emetucu majuque:

—Netitsuracue. Netinacue requeja tuna patya, —jadya tujatu acuare.

⁴ Netitsurahuajutu Jesúsra tuhua cuanaque bacaduracuare:

—Ecuanaja cacuatsashati eque ¿canajara huecacaju tuque ecuanaja jidaque ataquí, jidamaque ni taa? ¿Ejeque majutaquí baatsu echachaneudya tuque ecuanara, “Pamaju” jadya ni taa ecuana eau? ¿Eje bucha micuana inime tupuya? —jadya tujatu ecana acuare.

Tura jadya ahuaaju tuna caquemitsaticuare ama. ⁵ Tumetu Jesús tuna tsehue ecahuaiti jucuare. Jadya ama buchatu peya inime jucuare, tuna inime cacuareticarama juya baatsu.

—Rirucue micue ebi, —jadya tujatu acuare ecuita.

Jadya ayajutu ecuitara rirucuar ebi. Tura ebi riruya tsehuedya cuitadya tujatu emetucu chacha jucuare. ⁶ Jadya juya baatsutu fariseo cuana cuinanaquenacuare. Cuinanatsu tuna enaruqui Herodes tsehue juneniya cuana tsehue quisaratira cuacuare. Bajejetibunecuare tuna inime Jesús iye ishu.

Jesús quisaratiyaju bacacara aatsu bei jiruru ecuita jetiama caradaticuareque

⁷ Jesússtu cuacuare tura mepehua cuana tsehue bei jiruru queja. Umada ecuita Galileaju aniya cuanaratu tajicuare. ⁸ Jecuare tuna Judea yahua juque, Jerusalén juque jadya. Idumea juque ecana junacuaredya, tumbaedyá Jordán cueri yueque macare cuanaque. Tiro, Sidón yahua cuana juque tuna junacuaredya. Jadya eque tuna dutya quejaque tuque

eje bucha juyaque bahue juatsu jebarecuare. ⁹ Ecuita cuana jetiama baatsutu Jesúsra acuare tura mepehua cuanaque:

—Nequeticue cuaba requeja, ecuita cuanara ique nai- ishayaque juatsu tuhua anibute ishu, —jadya tuna Jesúsra acuare.

¹⁰ Tura icuene ujejeda cuanaque chachanechineque adebatsutu jetiama ujejeda cuanaque tuaqueja cajabamereticara juatsu quitushati quitushati tsehue cuacuare. Cajabameretitsu cuanadya jutidya tuna cachachanemereticara jucuare. ¹¹ Ijahua cuanara quijahuatishaya cuanaquetu tuque baatsu quiqueyaque nuyucuare tuja yacuaju:

—¡Midyami Yusuja Ebacuaque!

¹² Jadya juhuaju tuna Jesúsra nereda bucha cuejae acuare:

—Jadya dutyaja ijacaju nequisaratiume, —jadya tujatu ecana acuare.

Jesúsra peadya tunca beta earacana tuatsehue juneni ishu mepecuare cuanaque

(Mt 10.1-4; Lc 6.12-16)

¹³ Jadya juu jadya juatsutu Jesús tsuracuare emataju. Tue- queradya tujatu ihuaracuare tuatsehue juneniya cuanaque. Tuhuadya tuna caradaticuare. ¹⁴ Tuhuadya tujatu ecana mepecuare peadya tunca beta earacana.

—Eatsehue nejunenicue era eje bucha ayaque cabahuity- ati ishu. “Jesúsja Ecuadisha cuanaque” jadya bacani eque neadebatacúe. Ecue quisarati cuejara micuana cuadishaya. ¹⁵ Tyaya micuana casa jahua cuana ijehuecuina ishu, — jadya tujatu ecana acuare.

¹⁶ Peadya tunca beta earacana tura ebacaniju abarecuare cuanaque tuna jucuare:

Simón (Jesúsra tujatu peya ebacani iyacuare “Pedro”.)

¹⁷ Santiago

Juan (Santiago tsehuequique; tatse tatse jucuare Zebedeaja ebacuaque ecatse. Tatsedya tatse “Boanerges” bacani jucuare, “Tiriti baeque ecatse” jadique.)

¹⁸ Andrés

Felipe

Bartolomé

Mateo

Tomás

Santiago (Alfeoja ebacuaque)

Tadeo

Simón (Tuquetu Roma juque enaruquique bijidamadur- aqui juyaque jucuare.)

¹⁹ Judas Iscariote (Jesús inamerequi judadicuareque)

Jadya tuna jucuare tura mepecuare cuanaque.

*Jesús tunara “Satanásja casa rejari aniya”, jadya acuareque
(Mt 12.22-32; Lc 11.14-23; 12.10)*

²⁰ Jadya juatsutu Jesús tura mepehua cuana tsehue nubidirucua etareju. Jesús judirunucahuaque bahue juatsutu jetiama ecuita cuacuare tuaqueja. Jesúsja, tura mepehua cuanaja jadya tunajatu aijama emajaca jucuare ni araara ishu cuanadya jutidya. ²¹ Jadya bahue juatsutu Jesúsja ata cuana jecuare tuque jiteque, quijahuatiyapa jadya bacatsu datse.

²² Tuhuatu umae cacuatsashati bahuityaqui cuanaque ju cuare Jerusalén juque junahua cuanaque.

—Beelzebú, ijahua cuana cuatsashaquique tu tuatsehue. Jadya tibudya tujatu casa aniya ijahua cuana ijehuecuina ishu, —jadya tuna jucuare.

(Beelzebú taa tu Satanás bacani nucadya.)

²³ Tumidya tuna Jesúsra ihuaracuare. Ihuaratsu tujatu ecana cuejacuare:

—Beelzebúja casa eque ama tuque aya. Tuja casa eque ni eau, tume taa tu Satanás tuta tacadya jutidya pana cayuamaturati ejuu. ²⁴ Ita taa nebacacue. Yahuaju dutya aniya cuanaque ni ecajaquetibareu cuarepe cuarepe tuna cama cati ishu, tuna camadya jutidya tuna ecattillatiu. ²⁵ Peadya etareju aniya cuanaque ujeu cabatitsu, ecajaquetibarequetu catillatiya. Tsapetanatereya. Ebacua cuanaquera tuna etata cuanaque muibajacaya. ²⁶ Era ni Satanásja casa tsehue ijahua cuana eijehuecuinau, tume taa tu Satanás tuja ijahua cuana ducuque peadya tsehue ecatiu. Tumetu ejeque ijahuadya jutidya tura cuatsashaya eque ejuu ama.

²⁷ “Ijahua cuana ijehuecuina ishutu icuene cuita tuna cuatsashaquique Satanás dutya tuja casa secataqui, ecuita dyaque casadaque tuja ai seca ishu icueneta risi ataqui bucha. Ejeque casa secamaja etarejutu eje bucha nubitaqui ama tuja ai aniyaque seca ishu. ²⁸ Yusratu jidama quisarati aya cuanaja jucha cuana eapupashau, eje bucha cajuchatie juya cuanaja. ²⁹ Jadya ama bucha Yusuja Espirituja ishu jidama quisarati aya cuanaja jucha tujatu apupasha nime ama. Apupashaya ama tibusu Yusura nerecaturajacabuque ama tumeque jucha tibu, —jadya tuna Jesúsra acuare.

³⁰ Jesúsra tuna jadya acuare, tuna cuejayaque. Yusuja Espiritu tsehue tujatu ijahua cuana ijehuecuinaya jadya eauquetu tunara Ijahua casa tsehue bucha bacuare.

*Jesúsja ecuaque, tuatsehuequi cuanaque jadya Jesús jiteque
cuacuareque
(Mt 12.46-50; Lc 8.19-21)*

³¹ Jesús quisarati netiyajutu junaticuare ecuaque, tuatsehuequi cuanque jadya. Ecuita jetiama tibu tuna etsecueju netinaticuare. Tuequeradya tunajatu ihuaramerecuare. ³² Jetiama tuna anibarecuare educuju Jesús peque.

—Micue cuaa, micue miatsehuequi cuanaque jadya rena etsecueju. Miatsehuepa tuna quisaraticara juya, —jadya tunajatu Jesús aticuare.

³³ —Tumeque epuna tuque ecue ecuaa; tume cuanaque tuna ecue eatsehuequi cuanaque. Jadya ama bucha tuque ecue aniya peya ecue iyuhueda cuanaque, —jadya tuna Jesúsra acuire.

³⁴ Jadya quisarati aatsutu Jesúsra educuju anibareya cuanaque petabarecuare.

—Nebacacue. Riya cuanaque rique ecue iyuhueda cuanaque. Riya cuanaque rena ecue ecuaa buchique, ecue eatsehuequi cuanaque buchique jadya. ³⁵ Iyuhueda tuna baya Yusuja inime eque juya cuanaque. Tunadya tuna ecue ecuaa, ecue eatsehuequi cuanaque bucha bae ayaque, —jadya tuna Jesúsra acuire.

4

Uhuauhua puji cuatsabiji (Mt 13.1-9; Lc 8.4-8)

¹ Yudijidya catibutitu junucacuare Jesús ecuita cuana bahuitya bei jiruru. Masadamatu caradatinucacuare jetiama ecuita cuana. Tuna majacama cuita baatsutu Jesús cuabaju nubitsu anibutecuare. Mejiji equera tunajatu bacacuare tuque quisaratiyaju. ² Cuatsabiji eque tujatu ecana bahuityacuare, yunerique adebamere ishu.

³ —Nebacacue riyaque cuatsabiji. Anicuairetu ecuita. Cuacuairetu tuja teeju uhuaahuara. ⁴ Tura uhuaajeyaquetu umae pacacacuare edijiju yahua pajidaju. Uhuayaque etsucaca yahua ju huiruhuaquetu upati huiri cuanara anibutetsu mucutillacuare. ⁵ Peya etsucaca cuanatu pacacacuare yahua macana dedamaju. Yahua macanamaque dedama tibutu huijatsu danecuare ama, masadama buraracuare ama bucha. ⁶ Ijetija uqueratu iyecuare euhua cuanaque, etiri yahua nacadaju ama tibu. ⁷ Umae bacue pacacacuare acui tiri, acuija jadya jetiama ducu. Acuija cuana danetsu tujatu trigo euhuaque ehuija cuanaque iyetillacuare. Jadya eque tujatu jucuire ama ni peadya etsucaca. ⁸ Umae etsucaca cuanatu pacacacuare yahua jidaju. Cacaticuare umada. Tee mere pujiratu jetiama huesacuare tuhua euhuaque. Umae esa cuanajatu quimisha tunca tsucaca jucuire. Peya esa

cuanajutu shucuta tunca tsucaca jucuare. Peya esa cuanaju jucuare cien tsucaca. Jadyatu jucuare teeju euhua cuanaque.

⁹ “Quijacabacati aqui juatsu, nebacacue, —jadya tujatu ecana acuare.

Eje bucha juatsu ecana Jesúsra cuatsabiji eque bahuityacuareque

(Mt 13.10-17; Lc 8.9-10)

¹⁰ Tuequedyatu dutya jujeri ecuita cuana cuinanaterecuare. Jesúsra mepehua cuanara, peya cuana cuinanahuishacuare ama cuanara jadyatu Jesús bacaduracuare:

—¿Eje buchique ri riyaque cuatsabiji? ¿Ai mira ecuana bahuityacara aya? —jadya tunajatu acuare.

¹¹ Jesúsra tuna quemitsacuare:

—Yusura micuana pana adebamere acara aya tura tuja cuanaque naruyaju eje bucha juyaque. Peya cuana jadya cuejae eauque, tuna cuatsabiji cuana eque jutidya cuejaya jari, pana huecasha cuita ayaque ama. ¹² Tunaratu era ayaque baya. Tume tuna baatsu bama jiu juya. Bacatsu tuna bahuityahua ama jiu juya, arepa bacahua ama bucha. Adebayaque juatsu tuna inime ecacuairetiu. Tuna inime cacuairetiyaque juatsu tunajatu Yusura jucha cuana eapu-pashau, —jadya tujatu ecana acuare.

Jesúsra pana cueja cuatsabiji uhuauhua puji equeque acuareque

(Mt 13.18-23; Lc 8.11-15)

¹³ Jesúsra tuna bahuityanucacuare:

—Micuanara ni riyaque cuatsabiji uhuahua puji equeque bacaya ama, ¿eje bucha adebae jatsu tuque micuana peya cuatsabiji cuana eau? ¹⁴ Pana cueja micuana aya era bahuityahuaque. Uhuauhua puji tu Yusuja quisarati cuejaquique. ¹⁵ Umaetu Yusura naruyaju eje buchique quisarati bacatsu masadama nime aputaya, Satanásra masadama pana nime aputashamere aya tibu. Tuna tuna ediji pajidaque buchique. ¹⁶⁻¹⁷ Umaeratu ejetsunue ishú ama pureama teshue Yusuja quisarati bacaya. Nerecada juya cabatitsu tuna ejenejacaya. Quisarati ejenehua baatsu jidama atayaju, masadama tuna ejenejacaya, pana adeba aya ama tibu. Tuna tuna yahua macana dedamaque buchique. Huijahua cuanaquetu macana quini danetsu tsunuda ama juya, etiri dedama tibu. ¹⁸⁻¹⁹ Umaera Yusuja quisarati bacaya cuanaratu ejenejacaya, riyaque yahuaju cuanaquedya jutidya dyaque inime tsapequi aya tibu. Tunajatu inime juya chipiru dyaque umada anitsu cuita camadya dyaque pureama ejuu bucha. Chipiru dyaque iyuhueda baatsu tuna tunadya jutidya jahue catiya. Dutya tuna tunaja bijida cuanaque camadya inime

tupuqui aya. Jadya juatsu tuna Yusu muijacaya. Tuja quisarati tuna ejenejacaya. Tuna tuna yahua acuija quinique buchique. ²⁰ Umae cuana Yusuja quisarati bacaqui juya cuanaratu adebaajeyadya jutidya. Tuna eje bucha anieju tuna ejitaju Yusuja biji eque aniyaque. Umae cuana tunajatu tsahuaya eaqueja catyati ishu. Tunadya tuna esaju jetiama etsucaca juhuaque bucha, quimisha tunca, shucuta tunca, cien jadya cacacatihuaque buchique, —jadya tuna Jesúsra acuare.

*Yusura eje bucha ahuaque catehuatitaquique ama
(Lc 8.16-18)*

²¹ Jesúsra tuna bahuityanucacuare:

—Ude tuchatsu tuque ecuana tehuaya ama caju ducu ni eperere emaque. Etehuauque tuque ecuana iyaya ebarucue dutya queja uda ishu. ²² Dutya etehuaquetu ejitaju judadiya. Dutya ibedaquetu adebataqui judadiya. Yusura micuana bahue ameredadiya eje bucha jue tujaque juishuque. ²³ Micuana quijacabacati aqui juatsu, nebacacue.

²⁴ “Pana baca neacue era cuejayaque. Era cuejayaque bacatsu micuanara eje bucha adebae aya eque neanicue. Micuana ni micuanara adebaya eque aniajeya, Yusura micuana adebamereajeyadya jutidya. ²⁵ Ejeja ai aniyajatu dyaquedya ai aniajeya. Ejeque ai aniya bucha cabatiyaque, aimaquedya jutidya, tuja aniya cabatiyaque tujatu apu-
tateraya, —jadya tuna Jesúsra acuare.

*Jesúsra ecaca uhuatsu eje bucha cabapetie acui huija juya
eque bahuityacuareque*

²⁶ Jesúsra tuna bahuityanucacuare:

—Cuejaya micuana riyaque cuatsabiji, Yusura naruyaju eje buchique micuana bahue juishu. Ecuitara tuja tee euhau. ²⁷ Tee uhua, jadya juatsu peya mere ecatinucáu. Huecadaju mere, meta bacue tahui jadya. Tuque jadya juyajutu uhuachine cuanaque buraratsu huijatsu daneya. Yusura eje bucha iyahua equetu uhuaya cuanaque buraraya, ecuitara eje bucha ayaju ama. ²⁸ Yahua ni jida, icuene cuitatu huijaya uhuahuaque. Tuequedyatu danetsu amena catsatiya. Tuequedyatu etsucaca esaju cacueyatiajeya jahuaneya tupu. ²⁹ Ecaca jahuanehuajutu tee mere pujira racaya, raca raca ishuque huecaca juetihua tibu, —jadya tuna Jesúsra cuejacuare.

(Riyaque quisarati tsehuetu Jesúsra bahuityacara aya riyaque: yuneridya ni ecuana ejeneya tura bahuityayaque, ecuanaja bahue cuana, inime tupu cuanatu cuaretanaya, ecaca uhuahuaque huijatsu, ecaca huesaya tupu cuaretanaajeya bucha.)

Mostaza caca cuatsabiji eque bahuityacuareque

(Mt 13.31-32; Lc 13.18-19)

³⁰ Jesúsra tuna bahuityanucacuare peya cuatsabiji eque bahuityayaque:

—Bahue micuana amerecara aya eje bucha micuana amena Yusura naruyaque. Jadya tibudya micuana cuejaya riyaque cuatsabiji. ³¹ Adebayadya micuana mostaza caca, teeju ehuataque. Achaachaque piji, bataqui nerique ama. ³² Jadya ama buchatu buraratsu, huijatsu, danetsu dyaque arida juya, teeju peya euhua cuanaque bucha ama. Yaa cuana tujatu junuda, arida juya. Tumeque yaa cuanajudyatu upati huiri cuana eja catiya, —jadya tuna Jesúsra acuare.

(Riyaque cuatsabiji eque tuna Jesúsra jadique huecashacuare. Arepa catibutiyaque eje uma piji tuaqueja catyatiajeya ama bucha, tuquedya tuna riyá piji, riyá piji jetiama catyatiajeya.)

Eje bucha juatsu Jesúsra cuatsabiji eque bahuityayaque cuejacuareque

(Mt 13.34-35)

³³ Cuatsabiji equetu Jesúsra ecuita cuana Yusuja quisarati bahuityacuare. Tura cuejayaju adebataquima baya cuanaque tujatu cuatsabiji equedya jutidya bahuityacuare. Cuejayaju adebaya cuanaque tujatu ecana dyaquedya pana cueja acuare. ³⁴ Ecuita jetiamaque bahuityayaque tujata ecana cuatsabiji eque cama bahuityacuare. Tura mepehua cuana tsehueju tuna Jesúsra pana cueja acuare cuatsabiji eque bahuityayaque eje buchique jadique.

Jesúsra cuejipa, ena pacu jadya nityacuareque

(Mt 8.23-27; Lc 8.22-25)

³⁵ Apupuyajutu Jesúsra acuare tura mepehua cuanaque:

—Bei yueque macare necarequetira.

³⁶ Tume tunajatu isaraquenacuare ecuita cuana. Jesús patu ecuita cuana tsehue quisaratitibunehuaque yume anidya cuabaju jucuare. Ecuita cuana isara amena aatsu tuna, tuna dyadi anibutecuaredya cuaba ducu. Dujucuare tuna Jesús yueque macare. Umae ecuita cuana tumbaedyá peya cuaba cuana eque carequeticuaredya. ³⁷ Tuna carequetiyajutu muya jutidya cuejipa casadaque jueticuare. Cuejipa juetitusutu ena pacura cuaba ebariju ena ishacuare. Jadya tibutu ena pacura cuaba nudyajeri nudyajeri acuare. ³⁸ Jesús tu tahuicuare cuaba tibu queja, iyuca icuquiju. Rumutanaya bucha cabatitsutu tura mepehua cuanara Jesús bushishaticuare.

—Ecuana Naruquique, ¿miratu jidama ama cuitadya inime baya, ena pacura nudyatsu ecuana ehuiditereju?

³⁹ Tunara jadya ayajutu Jesús netitsuracuare. Netitsuratsu tujatu acuare cuejipa, ena pacu jadya:

—¡Tume tupu camadya! ¡Neticue! —jadya tujatu acuare.

Tura jadya aya tsehue cuitadyatu cuejipa neticuare. Dutyatu pana abacatana jucuaré. ⁴⁰ Jadya juatsutu Jesúsra acuare tura mepehua cuanaque:

—¿Eje bucha juatsu micuana bajida cuita juhua? ¿Eje bucha juatsu micuana eatsehue nime aputahua? —jadya tujatu ecana acuare.

⁴¹ Tuna bacue dyaque eanajacata jucuaré. Bajida ecana jucuaré. Tuna taca tuna jadya jutibunecuare:

—¡Ai ecuita dyadi ri riyaque! ¡Cuejipa, ena pacu jadya taa tuja yana equedya juya! —jadya tuna jucuaré.

5

Jesúsra ecuita ijahua cuanara quijhuatishayaque quijhuatishajacacuareque

(Mt 8.28-34; Lc 8.26-39)

¹ Chamacama tuna jaratsuradirucuare Gerasaju aniya cuana queja, bei yueque macare. ² Amena Jesús cuaba juque cuinanahuajutu ecuita ijahua cuanara quijhuatishayara jipeticuare. Emaju cuanaque eisha cani cuana juquetu jecuaré. ³ Tucuanajutu anicuare, ijahua cuanara quijhuatishaya tibu. Naru ishutu ecuita cuanara eje uma risi datse abahue jucuaré ehuachiju, ebi ecatséju jadya cadena tsehue.

⁴ Ijahua cuanaja casa tsehue tujatu cadena metal eaque riya piji riya piji tibibishajacama acuare. Ni ejera buchiquetu inataqui ama bacuaré. ⁵ Huecada tupu, meta tupu jadyatu emaju cuanaque eisha cuana patya queja, emata cuana queja jadya junenicuare. Tuque amacatu quiqueterenicuare. Tumu cuana tsehuetu ujeda ujeda caticatinicuare. ⁶ Tumetu Jesús japada equera batsatsu, tuaqueja tsajajaajecuaré. Tsajajaajetsutu chichucata jucuaré tuja yacuaju. ⁷⁻⁸ Jadya ayajutu Jesús quisaraticuare:

—Necuinanacue tumeque ecuita quejaque, ijahua cuana, —jadya tujatu ecana acuare.

Jadya ayajutu ecuita quiquecuare:

—¿Ai jitequemi jeya eaqueja, Jesús Yusu barepajuja Ebacuaque? Nerecabacue ique. Nerecaturaume taa ique, —jadyatu equijhuatira Jesús acuare jebuda quique eque.

⁹ Jadya quiqueyajutu Jesúsra bacaduracuare ecuita:

—¿Ai bacani mique?

—Ique Umadaque bacani, ecuana dyaque umada tibu.

¹⁰ Cuinanashaume taa ecuana rehuaque, —jadyatu ijahua cuana caquemitsaticuare ecuitaja quisarati eque.

¹¹ Tuhuatu jetiama cuchí cuana araanibarecuare emata jiruru. ¹² Ijahua cuanaratu Jesús acuare:

—Panubi ecuana cuchí cuanaju, —jadya tunajatu Jesús acuare.

¹³ —Nenubicue taa, —jadya tuna Jesúsra acuare.

Tumetu ijahua cuanara quijahuatishajacacuare tumeque ecuita. Tuaquejaque cuinanatsu tuna cuchí cuanaju nubibarecuare. Jetiamatu cuchí cuana jucuaré; beta mil cuchí cuana ni tuna jucuaré. Dutya cuchí cuana ijahuaqui cuanaque tuna tsajajayaque pacacadirucuaré bei tihuesu baruda eque. Beiju pacacatsu tuna huiditerecuare.

¹⁴ Cuchí cuana naru juya cuanaratu bacuaré jadya juyaju. Ejecutana tuna tsajajaterecuare epu ebariju. Cuetiyara tunajatu epu cuana juque cuejabarecuare tuhua eje bucha juhuaque. Epu ebariju judirutsu tunajatu tumeque quisarati nucadya tsapedirunucacuare. Tunara cuejayaque bacatsutu ecuita cuana cuabarecuare eje bucha juhuaque petara.

¹⁵ Junaticuaré tuna Jesús queja. Tuhua junatitsu tunajatu banaticuaré ecuita equijahuati juhuaque tuhua juaniyaju. Ecajututi, tuja jida inime tsehue, equijahuatijaca jadya tunajatu banaticuaré. Jadya banatitsu tuna dyaque cuita eanajacata jucuaré. ¹⁶ Jesúsra equijahuatija ijahua cuana ijehuecuinayaju baqui jucuaré cuanaratu peya cuana cuejacuaré eje bucha juhuaque. Tunara tuna cuejacuaré Jesúsra eje bucha cuinanashae tumeque ecuita juque ijahua cuana tuque quijahuatishaquique ahuaque. Tumbaedyá tuna cuejatsacuare cuchí cuana equijahuati cuanaque beiju pacacateretsu huiditerehuaque. ¹⁷ Jadya bacatsu tunajatu Jesús acuare:

—Dirucue rehuaque.

¹⁸ Tunara jadya ayajutu Jesús anibutecuaré cuabaju. Cuabaju anibuteyajutu ecuita equijahuatijacara Jesús acuare:

—Ique miatsehue junenicara juya, —jadya tujatu acuare.

¹⁹ —Aijama. Rehuadya anicue. Dirunucacue micue ata cuana queja. Cuejadirucue ecana Mique Cuatsashaquira micue ishú dutya ahua cuanaque. Cuejadirucue ecana era mique jida iyuhue tsehue bahuague, —jadyatu Jesúsra acuare.

²⁰ Tura jadya ahujutu ecuita dirucuaré. Dirutsu tujatu ecana dutya cuejaajecuaré Decápolis epu cuana juque, tuque Jesúsra eje bucha ahua cuanaque. Dutya tuna anajacatacuare tumeque quisarati bacatsu.

Jairora Jesús jipeticuaréque
(Mt 9.18-19; Lc 8.40-42)

²¹ Jesús tura mepehua cuana tsehue cuaba eque carequet-inucacuare bei yueque macare. Judiruhajutu jetiama ecuita cuana jutinucacuare tuaqueja bei jiruru. ²² Tuna tsehue quisaratijajutu ecuita Jairo bacanira jipeticuare. Tuquetu caradati ishucue etare juque inime metseque jucuaré. Jesús banatitsutu nuyunaticuare tuja yacuaju. ²³ Isaracuare tuja tuque:

—Nerecabacue ique. Ecue ebacujunatu majuhuie cuita. Mique jiteque ique jehua. Necua ecue etareju. Jabaticue micue emetucu tsehue. Jabatsu chachaneticue, —jadya tujatu Jesús acuaré.

²⁴ Tura jadya ahujutu Jesús cuacuare Jairo tsehue. Umada ecuita cuanaratu tupujudya ayaque naiishacuare.

Jesúsra epuna ujejedaque chachanecuareque
(Mt 9.20-22; Lc 8.43-48)

²⁵ Tumeque ecuita cuana ducudyatu jucuaré epuna ujejedaque. Peadya tunca beta earacana maratu amena nerecada, ujejeda jucuaré. Ebacuatare tujatu jidama jucuaré; ami tujatu jucuarédyá jutidya. ²⁶ Eje uma casamati bahue cuana quejatu casamamereticuare datse. Dutya tuja chipiru aniyaquetu quijehuetillaticuare casamameretiyaque. Jadya ama buchatu ni ejeradya jutidya chachanecuare ama. Dyaquetanaajecuarédyá jutidya tuque. ²⁷ Jesurapa ecana chachaneya jadya bacatsu tujatu Jesús etibene eque jipeajecuaré ecuita cuana ducu equedyá jutidya. ²⁸ “Tura jutuyaque jabatsu cuanadya jutidya chacha ejuu”, jadya tujatu inime jucuaré. ²⁹ Jipetitsu tujatu jabacuare Jesúsja unaju ebebacuaju ehuejitaque. Tura jabaya tsehuedya tujatu neticuare ami. Chacha cabaticuare tuja ecuita ujejedaque. ³⁰ Tumetu Jesús caadebaticuare tuja casa tsehue ejeque cuana chachanehuaque. Jadya tibudya tujatu tibene bajiyu acuaré ecuita cuana ducu queja. Bajiyutsu tujatu bacaduracuare:

—¿Aira jabahua ecue unaju?

³¹ Jadya juyajutu tura mepehua cuanara jadya acuaré:

—Jeedyá bacuemi ecuita cuanara naiishaya. ¿Eje bucha juatsu mira ecuana bacaduraya aira jabahuaque? —jadya tunajatu Jesús acuaré.

³² Caquemitsatimaradya jutidyatu Jesúsra petatibarillanucacuare, adeba ishu. ³³ Epunatu caadebaticuarédyá tura chachanehuaque. Tuja etibene quejaquetu juticuare tuja yacuaju. Tadadayaquetu tuja yacuaju chichucata juticuare.

—Ique micue una jabadaditsu chacha juhua, —jadya tujatu acuaré Jesús.

34 —Mama, chachami juhua, mira era chachaneya que pana ejene ahua tibu. Cacasaticue. Inime tsapema dirucue. Amena tuque micue ujeje anihuaque chacha juhua, —jadyatu Jesúsra acuare.

Jesúsra Jairoja ebacujunaque emajuque chacha nityatsuranucacuareque
(Mt 9.23-26; Lc 8.49-56)

35 Tuque quisaratiya jarijudyatu yana dujuqui cuanaque juticuare Jairoja etare juque.

—Micue bacujunatu amena majuhua. Ai jiteque ni tu Ebahuityaquique cuama amena, —jadya tunajatu Jairo acuare.

36 Arepa tunara huaraji jadya cuejayaju bacaya ama buchatu Jesúsra jadya acuare:

—Jidama inime baume. Cacasaticue. Eaqueja nimee camadya jucue, —jadya tujatu acuare.

37 Pedro, Santiago, Juan (Santiago tsehuequique) jadya tujatu ecana acuare:

—Micuana camadya eatsehue nejecue. Tuhuadya umae paneti, —jadya tujatu ecana acuare.

38 Junaticuare tuna huarajija etareju. Junatitsu tuna Jesúsra emajuque naru ishuhuaque bajejeyaju banaticuare. Bacaajecuare tujatu ecana quique, pau pau juyaju. 39 Nubinatitsu tujatu ecana jadya anaticuare:

—¿Aishu tuque micuana emajuque naru ishuhuaque bajejeya? ¿Eje bucha juatsu tuque micuana majuhuaque jidama inime ishuhua? Tumeque ebacujuna pijitu majuma. Tahuiya jutidya tuque, —jadya tuna Jesúsra anaticuare.

40 Jadya bacatsutu ecuita cuanara ijaribacuare, tunara yuneri cuitadya emaju baya tibu. Ecanajetijacatu ebacujuna piji jucuaré. Tume tuna Jesúsra dutya cuinanashacuare. Nubiquerecuare tujatu ebacujuna pijija etataque ecatse, quimisha tura mepehua cuanaque jadya camadya. Nubinatituare ecana ebacujuna piji emajuque jarayaju. 41 Tuhua nubinatitsutu Jesúsra emetucuju inanaticuare ebacujuna piji emajuque. Isaranaticuaretu emajuque:

—Talita, cumi (“Ebacujuna piji, netitsuracue” jadicue).

42 Tura jadya ayaju cuitatu ebacujuna piji canajetietinucatu, anitsura netitsura jadya juatsu ajecuare. Peadya tunca beta earacana mara tujatu anicuare. Tuque ajenucaya baatsutu tuhua jucuaré cuanaque dyaque anajacatacuare.

43 Tume tuna Jesúsra nereda bucha cuejae acuare:

—Cueja cueja neaume ni ejeque riya jadya juhuaque, —jadya tujatu ecana acuare.

Jadya juu jadya juatsu tujatu ecatse acuare:

—Nemihuacue, —jadya tujatu acuare ebacujuna pijija etataque ecatsé.

6

Jesús Nazaretju juetinucacuareque
(Mt 13.53-58; Lc 4.16-30)

¹ Jesússtu dirunucacuare tuhuaque. Cuacualetu Nazaretju, tuque catemuticuareju. Tura mepehua cuana tsehuetu cuacuare. ² Amena canajara huecaca juetihuajutu cuacuare caradati ishuque etareju. Nubitsu tujatu tuhua cuanaque bahuityatibunenuacuare. Anajacatacuare ecana, tura jidaque quisarati cuejayaju bacatsu.

—Riyaque ecuita taa dyaque inimequi quisarati ishu. ¿Eju jatsuri riyaque jadya quisarati cabahuityatihua? ¿Eje bucha ae jatsu rejari eau ejeque ecuitara ayaque ama? ³ Nanadaju ecuanara bacuareque taa riya. ¿Riyaquedya ama jatsu ri Joséja ebacuaque, mesa, caju cuana pujija ebacuaque? ¿Mariaja ebacuaque di taa riya? ¿Riyaque di taa ri Santiago, José, Simón, Judas jadyaja eujiique? Tuja enuu cuanaque tupuju cuanaque taa rena rehua ecuanaja epujudya aniya, —jadya tuna jucuaire.

Tunara nanada equedya bahua tibu, tunajatu ejenecarama acuare tuque Mesiasque, Yusuja Emepeque jadique. Jadya tibudya tunajatu bacacarama acuare tura bahuityayaque.

⁴ Jesúsra tuna acuare:

—Quisarati dyaque jida cuanaque cuejaqui cuanaque tuna dutya queja jida batsataya, tunaja epuju cuanara cuita bacue aijama. Dutyara tuna pana ijacabaca aya; tuja etareju cuanara cuita bacue aijama, —jadyatu Jesúsra acuare Nazaretju cuanaque.

⁵ Tuhua tuja epuju tujatu anericuare ama ai ejeque ecuitaja ataquiique ama, tuhua cuanaque tuaqueja catyaticarama juya baatsu. Eje uma piji ujejeda cuanaque cuita camadya tujatu chachanecuare, tuja emetucu tsehue jabatsu. ⁶ Turatu bape cuita bacuare, eje uma piji ecana tuaqueja catyaticara juya baatsu.

Jesúsra tura mepehua cuanaque tuja quisarati cuejara cuadishacuareque
(Mt 10.5-15; Lc 9.1-6)

Jadya juatsutu Jesús junenicuare epu ashaasha cuana japadamaju ecuita cuana bahuitya.

⁷ Sitacuare tujatu peadya tunca beta earacana tura mepehua cuanaque.

—Necuacue beta beta cama ecue quisarati cuejara. Ijahua cuana ijehuecuina ishuh micuana tyaya casa. ⁸ Tuna cuadishahuaque cuahuie tujatu ecana acuare:

—Micuanara tsahuatiya cuanaradya micuana tsujema tyatsaya micuanara ai sareya cuanaque, micuana Yusuja mere juyaque baatsu. Jadya tibudya sari cuita camadya necadujuticue. Necadujutiume shitara ni chipiru. Cadujutitaqui ama micuana ara ishuhque ni jutu ishuhque. ⁹ Asicada jutatsu catacati ishuhque jutu ishuhque necadujutiume. Zapato jutuyaque cuita camadya necadujuticue. ¹⁰ Ejeque epuju junatitsu, ejera jida batsayaju, tuhuadya neanicue tuja etareju, peya epuju dirunucaya tupu. ¹¹ Eju junatijaju ecuita cuanara batsacarama ayaju, eju tunara micuanara cuejayaque bacacacarama ayaju, masadama necuinanacue tuhuaque. Cuinanayaque neitataquenacue muru micuanaja ehuchi juque, “Aine yatse micuana tsehue juma”, jadya tuna ayaque. Tunadya tuna inime metse Yusuja quisarati bacacacarama ahua tibu, —jadya tuna Jesúsra acuare.

¹² Epu cuana tupu tuna junenicuare Yusuja quisarati cueja juyaque.

—Inime necacuareticue. Peya inime nejudue micuanaja jucha cuana aniyaque caadebatitsu, —jadya tunajatu ecana cuejaajecuaré.

¹³ Ijehuecuinacuare tunajatu jetiama ijahua cuanara quijahuatishaya cuanaja ijahua cuana. Jetiama tuna ujejeda cuanaque chachanecuare, iyucaju riya piji etseri juratsu.

Eje bucha iyetanae Juan Ecuita Cuana Utsaquiue jucuaréque

(Mt 14.1-12; Lc 9.7-9)

¹⁴ Ecuari Herodesratu bacacuare Jesús ai juyaque, eje bucha juyaque jadya. Dutya quejatu ecuita cuanara Jesúsja ishuh quisarati acuare.

—Tumeque Jesússtu baya ecuita ama. Juan Ecuita Cuana Utsaquiue emajuque cacuitatitsu netitsuranucachineque tume. Jadya tibudyatu Jesúsja casa aniya ejeque ecuitaja ataquiue ama aishu, —jadyatu Herodes jucuaré.

¹⁵ Peya cuana bacue jucuaré:

—Elías ecacuitatique jutidya tume, Yusu equeque quisarati cuejaquiue.

Peya cuana bacue jucuaré:

—Jesústu beru Yusu equeque quisarati cueja jucuaréque jutidya, emajuque enetitsuranucaque.

Jadya tuna cuji cuita juatsu quisaraticuaré.

¹⁶ Dutya ecuita cuanara quisarati ayaque bacatsutu Herodes jadya junucacuare:

—Tumequetu Juan era iyuca tubumerechineque. Jesús bucha cacuitatitsutu netitsuranucachine, —jadyatu tuque jucuare.

¹⁷⁻¹⁸ Iyacia micuana Juan eje bucha iyetanae jucuareque cuejaya. Herodes patu caquemiticuare Herodías tsehue, arepa tumeque epuna tuatsehuequi Felipeja ehuanegue jucuare ama bucha. Eje uma cuejadya datse patu Juan Ecuíta Cuana Utsaquira acuare: “Caquemititaqui amami micue miatsehuequiya ehuanegue tsehue”. Jadya cuejayaju patu Herodes cahuaíticuare Juan tsehue. Jadya juatsu tujatu sudaru cuana queja inamerecuare. Inameretsu tujatu cadena tsehue risimeretsu etare apudaju ishamerecuare. Tura Herodías dyaque bijida baya tibu tujatu Juan jadya amerecuare. ¹⁹ Juanra jadya quisarati ahujutu Herodiasra dyaque ujeu bacuare. Iyemerecara ebari tujatu acuare. Jadya ama bucha patu Herodesra acuare: “Eje bucha juyaju ni tuque iyema”. ²⁰ Herodestu bahuedya jucuare Juan Ecuíta Cuana Utsaquique tuyuque, tuque Yusuja inime eque aniyaque jadya. Inime tujatu tupucuare “Yusura taa enerecaturau, era Juan iyemerehuaju”. Jadya tibudya tujatu etare apudaju ishamerecuare jutidya. Eje uma cuautu etare apudaju jucuare Juan tsehue quisaratira, tura cuejayaque bacacara ebari aya tibu. Jadya ama buchatu bape bape inime tupu tsehue jutidya cuinana bahue jucuare, inime cacuareticarama juya tibu. ²¹ Chamacamatu Herodiasra eje bucha iyemeree Juan aishuque emajaca dadicuare. Cuinana huecaca camaratsurutiya jutu Herodes chine caticuare. Cuejamerecuaretu dutya huaraji inime metse cuanaque. Sudaru cuana cuatsashaqui cuanaquetu cuejamerecuare dya. Tumbaedyatu Galilea yahua juque dutya inime metse cuanaque cuejamerebarecuare dya. ²² Tuna araarayajutu Herodiasja ebacujunaque dutya ihuarahua cuanaja yacuaju ijahue juishu nubiticuare. Jadya tuque ijahue juyaju baatsutu Herodesra bijisericuare tuja ijahue, tumbaedyata tuatsehue araaraya cuanara. Tuja yatuca eque dyaque jida baatsu tujatu epuna ehue ebari acuare:

—Bacacue ique ai mira bijida bayaque. Etyaudya mique era. ²³ Yusura ique panerecatura, era mique tyaana ayaque tyayaque ama juatsu. Ique chipirui. Jetiamaja ecuari ique. Etyaudya mique ecue ai aniyaque patya jaque, mira bacayaque juatsu, —jadyapa tujatu epuna ehue ebari acuare.

²⁴ Jadya ahujutu tumeque epuna ehue ebari cuinanaque-nacuare etare juque. Tume tujatu ecuaque bacaduraticuare:

—¿Ai mira bacamerecara aya?

—Bacacue Juan Ecuíta Cuana Utsaquija iyuca, iyuca camadya, —jadyatu ecuaquera acuare.

25 Tumetu epuna ehue ebari nubinatinucacuare ecuari Herodes queja.

—Iyemerecuc Juan Ecuita Cuana Utsaquiue. Pitutubumeretsu tuja iyuca pejaju iyatsu ique inamerecuc. Riyaque mique bacaya, —jadya tujatu acuare.

26 Jadya ahuaajutu Herodes dyaque peya inime jucua. Jadya ama bucha tujatu eje bucha tyataqui ama amadya bacuare, tura quisarati ahuaque tuatsehue chine juya cuanaja ijacaju jadya juhua tibu, “Yusura ique panerecatura, era tyaana ahuaque tyayaque ama juatsu”. 27 Jadya tibudya tujatu cuatsashacuare tuja sudaru:

—Juan Ecuita Cuana Utsaquiue pititubuticue. Pitutubutitsu tuja iyuca beticue, —jadya tujatu acuare.

28 Jadya ahuaajutu cuacuare etare apudaju. Cuaatsutu pititubuticua Juan. Tubutsutu Juanja iyuca pejaju iyatsu epuna ehue ebari tyaticua. Tura tyatihuaaju tujatu ecuaque inamereticua.

29 Jadya juhuaque bahue juatsutu Juanra mepehua cuanara emajuque queticua. Dujutsu tuna ishaticua caniju.

(Herodesratu dutya tume cuanaque inime tupuqui acuare. Jadya tibudya tujatu Jesús, Juan Ecuita Cuana Utsaquiue chacha enetitsuranucaque bucha bacuare.)

Jesúsra pishica pan, beta jae jadya umanashacuareque pishica mil ecuita cuana mihua ish

(Mt 14.13-21; Lc 9.10-17; Jn 6.1-14)

30 Jidaque quisarati cuejara cuadishatanacuare cuanaque juetitsu tunajatu cuejaeticua Jesús tuna eje bucha jutihua cuanaque, dutya tunara bahuityatihua cuanaque jadya.

31 Tunara tuque tuna junenitichine cuanaque cuejayaque tsunumeetu ecuita cuana Jesús queja umae jutiya, diruya jadya jucua. Tuja, ni tura mepehua cuanaja jadyatu aijama emajaca jucua ni araara ish. Jadya tibudya tujatu ecana jadya acuare:

—Necua peya queja amaca ecua taca jari. Ecastere micua juneniyaque. Necanajaraticue jari tuhua, —jadya tujatu ecana acuare.

32 Jadya cacuejatitsu tuna cuacuare cuaba equa peya queja amaca ajetaya ama queja. 33 Umada ecuita cuanara tuna badadicua cuayaju. Adebadicua tuna eju Jesús cuayaju. Tume tuna Jesús cuayaju badaditsu ecuita cuana dutya epuju cuanaque tsajabarecua Jesús tura mepehua cuana tsehue cuaya queja. Baredadicua tunara. Icueneta junati ecana jucua. 34 Cuaba juque cuinanayaratu Jesúsra bacua jetiama ecuita tuque ihua juyaju. Jadya baatsu tujatu ecana nrecada banaticua. Uhuisha cuana aija

naruquima juneniyaque bucha tujatu ecana banaticuare. Jadya tibu tujatu ecana jetiama Yusuja quisarati cuejati-bunecuare.

³⁵ Amena ijeti nubihuietu tura mepehua cuanara Jesús jipeticuare.

—Amena taa ri chinehua. Rehuari aijama ni eju buchique ara ishu cuanaque quemi ishuque. ³⁶ Isaracue ecuita cuana. Padiru ecana epu cuanaju, epu ashaasha cuana japadamaju. Pacabacatidiru ecana ara ishu cuanaque, —jadya tunajatu aticuare Jesús.

³⁷ —Cuadishaya ama tuna era. Micuanaradya ecana nemi-huacue, —jadya tuna Jesúsra acuare.

—Ecuanaja dyadi taa ri aijama ecuita jetiamaja ara ishuque quemi ishuque. Jetiama taa tuque ecuana chipiru esareu, tuna tupu, dutya mihua ishu. Beta ciento ficha taa tuque ecuana esareu, peadya ecuita shucuta badi mere ejuuque etsujequi tupu, —jadya tunajatu acuare.

³⁸ —¿Eje uma pan jatsu ecana cabetihua? Nebacaduraticue, —jadya tuna Jesúsra acuare.

Bacaduratitsu tunajatu cuejaeticuare:

—Pishica pan, beta jae jadya piji camadya tunaja aniya.

³⁹ Tume tujatu ecuita cuana cuarequi cuarequi iyabutyamerecuare tuhua tuna netibareyaju cuitadya.

⁴⁰ Dutya ecuita cuana anibutecuare. Peadya cuareju cien, peya cuareju pishica tunca jadya tuna jetiama cuare anibutebarecuare. ⁴¹ Jadya juatsutu Jesúsra inaticuare

pishica pan, beta jae jadya. Inatsu tujatu barepa Yusu aniya queja petacuare. Petayaquetu jucuare:

—Yusurupai mique aya, Tata, mira ecuana riyaque ara ishuque tyahua tibu, —jadya tujatu Yusu acuare.

Yusurupai au jadya aatsu tujatu pan cuana cuesibarecuare. Jadya aatsu tujatu tyabarecuare tura mepehua cuanaque, ecuita cuana tunaja tyabare ishu. Betaque jae umanashatsu tujatu ecana tyabarecuare. ⁴² Dutya tuhua jucuare cuanaque tuna araracuare, pana jeque juya tupu.

⁴³ Jadya juhuajutu Jesúsra mepehua cuanara jequeshabarecuare peadya tunca beta earacana jiti arida cuanaque pan tunara arabishahua cuana tsehue, jae jadya tsehue.

⁴⁴ Jetieque ama tuna araracuare. Pishica mil deca cuana tuna araracuare; epuna cuana, ebacua piji cuana jadya piyebamaque.

Jesús ena dyaque equé ajecuareque
(Mt 14.22-33; Jn 6.16-21)

⁴⁵ Tumetu Jesúsra tura mepehua cuanaque jadya acuare:

—Neanibutecue cuabaju. Necarequeticue bei yueque macare epu Betsaida bacaniju. Tumidya micuana adadiya ecuita cuana isaratsu, —jadya tujatu ecana acuare.

⁴⁶ Amena ecuita cuana cuadisha ishú isaratsutu Jesús tsuracuare emata baruda cuita amaju Yusu tsehue quisarati ishú. ⁴⁷ Cuaba tsehue cuahua cuanaque tuna bei patya patya apunacuare. Jesús camadyatu jucuare uhuaju. ⁴⁸ Japada equera tuna Jesúsra bacuare masada nrecada tsehue tarutaruyaju cuejijira acuatsuraya tibu. Amena huecaca japadama tacure quique pidya juhuaju tuna Jesúsra jipedirunucacuare, ena dyaque equé ajeajeyara. Baredirucara datse tujatu ecana acuare. ⁴⁹ Jesús ena dyaque equé ajeajeyaju baatsu tuna quiquecuare:

—¡Ita nebacue! ¡Yatanana tume! —jadya tuna quique equé jucuare.

⁵⁰ Dutyara tunajatu bape inime tillaqui jadya acuare, ena dyaque equé ajeaya baatsu. Jadya juyaju tuna Jesúsra isaracuare:

—¡Bajida nejuume! ¡Idya ique! ¡Casada nejudue! —jadya tujatu ecana acuare.

⁵¹ Tumetu tsuracuare tuna queja cuabaju. Tuque cuabaju tsurahuaju cuitatu amena cuejiji neticuare. Jadya baatsutu tura mepehua cuanaque anajacatacuare. ⁵² Tunaratu adebacuare ama jari tuja casa aniyaque, arepa tura pan, jae jadya jetiama ecuitaja ishú tupu amerehuaque bahua ama bucha. Adebataqui ama jari tuna bacuare Jesús aique.

*Jesúsra ujejeda cuanaque Genesaretju chachanecuareque
(Mt 14.34-36)*

⁵³ Bei riquetsu tunajatu Genesaret yahuaju jaratsuranatitsu cuaba risinaticuare. ⁵⁴ Muya jutidya, tuna cuaba juque cuinanayajutu tuhua aniya cuanara Jesús adebatsa piisi acuare. ⁵⁵ Masadama tunajatu tsapecuare quisarati tuque junatihuaque. Dutya jujeri tuhua cuanaque tuna bahue jucuare. Jesús, tura mepehua cuanaque jadya tuna epu epu cuanaju junenicuare. Jesús tunaja epuju junatihuaque bahue juatsutu tuhua cuanara dujubarecuare ebadequi cuanaju ujejeda cuanaque tuaqueja. ⁵⁶ Eju tuque junatijaju epu achaacha cuanaju, epu arida cuanaju, tee cuanaju aniya cuanara jadya tunajatu cuinanashabarecuare edijiju ujejeda cuanaque. Canerecaticuare tuna tuaqueja:

—Cajabamereticue taa ujejeda cuana queja micue una cuatsa cuana pijidya jutidya, tuna chacha juishu, —jadya tunajatu Jesús acuare.

Dutya ejeque tuja una jabaqui jucuare cuanaque tuna pana chacha jubarecuare.

7

Baba cuanaja bahue eque ama ecuana jutaquique, Yusuja inime eque

(Mt 15.1-20)

¹Umae fariseo cuana, cacuatsashati bahuityaqui cuanaque jadya tuna juticuare Jerusalén juque. Junatitsu tunajatu Jesús jipeticuare. ²Tuhuadya tunajatu bacuare Jesúsra mepehua cuanaque tunaja bahue ama juyaju emetucu cutsatimaque araarayaju. ³Dutya ecuanaja ata cuana, fariseo cuana neri neri, ecuanaja baba cuanaja bahue eque tuna anijacaya ama. Araaraya ama tuna tunaja bahue emetucu cutsatimaque. ⁴Mercadoju quemihuaque arama jarique tunajatu utsajacama aya tunaja bahue. Tumbaedyda canecu cuana, ena iyaqui arida cuanaque, equiniqui metal cuana tunajatu utsa bahue tunaja bahue. Tumbaedyda tuna cutsati bahue etahuiqui cuana. Dutya ecuanaja baba cuanaja bahue tunajatu ajacaya ama. Jadya tuna juya, jadya jujacatsu Yusu cahuitishaya bucha cabatitsu. ⁵Jesúsja cuanaque cutsatima araarayaju baatsutu fariseo cuana, cacuatsashati bahuityaqui cuanaque jadya quisaraticuare:

—Mira mepehua cuanaquetu ecuanaja baba cuanaja bahue eque ama juya. Araara ishutu micue cuanaque emetucu cutsatiya ama ecuanaja bahue eque Yusu cahuitisha ishuhama. ¿Eje bucha juatsu? —jadya tunajatu Jesús acuare.

⁶Tura tuna quemitsacuare:

—Yusu adebaquipa ejuu, jadya micuana juya, ai yuneri ama. Isaías Yusu equeque quisarati cuejaquiratu micuana jadya ayaque huenecuare jadya:

“Riyaque ecuita cuanara muiya tunaja quisarati tsehue camadya.

Jadya ama bucha tuna eje bucha juya eque ejitaju ecue cuanaque ama.

⁷Yana cana cuita tunara tunaja bahue cuana eque muiya.

Tunara bahuityayaquetu ecuita cuanara inime tupuyaquedyda jutidya”, jadyatu Yusu jucuaré Isaías eque.

⁸“Micuana micuana Yusura cuatsashaya eque anijacahua, ecuita cuanara cuatsashaya eque ani ishuhama.

⁹“Micuanaratu dyaque ijacabacaya ecuanaja baba cuanara cuejehua cuanaque, Yusura cuejayaque ebacauque.

¹⁰Moisés equetu Yusura cuatsashacuare béru: “Muibacue micue tata, micue cuaa jadya”. Tumbaedydya jucuaré: “Paiyetana ejeque etataqueja ishuhama, ecuaqueja ishuhama jidama quisarati ayaque”. ¹¹⁻¹²Micuanaratu cuarehua riyaque cacuatsashati. Tume micuana, micuanaja tata nerecada cuanara

catsahuamereti ishü bacayaju, jubahue: “Tsahuataqui ama mique ecue, amena ecue dutya ai aniyaque Yusu etya tibu”.¹³ Jadya apupashae tuque micuana Yusura cuatsashahuaque aya, micuana cuejatahua cuana equedya jutidya juishu. Micuana camadya ama micuana jadya juya. Tumebaedya micuana peya cuana casada tsehue amereya micuana juya bae. Umada ecuita cuanaja bahue cuanaque micuana ajacaya ama, —jadya tuna Jesúsra acuare.

¹⁴ Tumetu Jesúsra ihuaracuare ecuita cuana tuhua ejeuma netiya cuanaque. Tume tujatu ecana acuare:

—Nebacacue ique dutyara. Pana ijacabaca neacue. ¹⁵ Ni ai buchique micuanara arayara micuana cajuchatishaya ama. Micuanaja ducuta inime jidamaque cuinanayaratu Yusu cahuitishaya. ¹⁶ Micuana quijacabacati aqui juatsu, nebacacue, —jadya tujatu ecana acuare:

¹⁷ Jadya isara aatsutu Jesúsra ecuita cuana isaraque-nacuare. Nubidirucualetu etare ducu. Amena tuque etareju nubidiruhajutu tura mepehua cuanara bacaduracuare:

—¿Eje buchique tu tumeque mira ecuita cuana bahuityahuaque? —jadya tunajatu acuare.

¹⁸ —Arepá micuana eatsehue juneniya ama bucha, tuque micuana adebaya ama jari micuana era eje buchique bahuityacara ayaque. Ni ejeque earaquira micuana cajuchatishaya ama. ¹⁹ Arayaquetu ecare canijudya judiruya. Tuhuaquedyatu cuinanaya. Ni eje tuputu nubiya ama ecuanaja inime Yusu adebaquiju. Jadya tibudya ecuanara, ecuanara arayara cajuchatishaya ama, —jadya tujatu ecana acuare.

Jadya cuejae aatsu tuna Jesúsra huecashacara acuare. Aijamatu ejeque earaqui arataquimaque.

²⁰ Jesusratu tuja cuanaque isaranucacuare:

—Educu juquetu ecuitaja juetiya cajuchati ishucue.
²¹ Iyuca juquetu jidamaque aishucue bijiseri juetiya. Tuhuaquedyatu jidamaque aishucue inime tupu juetiya, eje tsehuedya jutidya decadeca, puna puna jadicue bijiseri, chiri jucaraque, peya iyecaraque, ²² peya tsehue ecaquemitique jaraquerecaraque, tuja ishü cuita camadya ai umada aniajecaraque, dutya ai jidamaquedya jutidya acaracue, peya jahue acaracue, ai ajaca baecuaque acaracue, peya jaque metsene ishü bijiseri, peyaja ishü jidama quisaraticaraque, dyaque inime metse jucaraque. Tuhuaquedyatu aishucue ama inime cuinanaya. ²³ Dutya riya cuanaque acaracuetu educu juque cuinanaya. Dutya riya cuanaratu ecuita cajuchatishaya. Yusuratu asicabaya riya cuanaque.

*Epuna israelitaque ama Jesús queja catyaticuareque
(Mt 15.21-28)*

²⁴ Jesústu cuanucacuare tuhuaque. Tumetu cuacuare Tiro queja amaca. Epuju junatitsutu etareju nubicuare. Tumeque etarejutu etehua junati datse jucara jucare. Eje bucha etehua junatitaqui ama tu jucare. ²⁵ Anicuaretu tumeque epuju peadya epunaja ebacujunaque ijahua cuanara quijahuatishayaque. Bahuetu jucare epuna Jesús junatihuaque. Bahue juatsutu yume cuau cuítadya Jesús queja jucare. Junatitsutu Jesúsja yacuaju nuyunaticuare. ²⁶ Tumeque epunatu israelita ama jucare. Sirofenicia yahuaju ecuinanaque patu jucare. Jesúsja yacuaju nuyut-sutu canerecaticuare:

—Ique Cuatsashaquique, nerecabacue ique. Ijehuecuinacue ijahua cuana ecue ebacujuna juque, —jadyatu epunara aticuare Jesús.

²⁷ —Icuene tuque ecue israelita cuana tsahuataqui. Aijama jari tuque ecue emajaca ecue ata ama cuanaque tsahua ishu. Adebayami quisarati: “Jidama tu ebacua cuana earaqui secatsu chapa cuana tyau” jadique, —jadyatu Jesúsra acuare.

²⁸ Epunaratu quemitsacuare:

—Jejee, Ique Cuatsashaquique. Jadya ama buchatu chapa cuanara enimetsequeja ebacua cuanaquera mesa emaque pacacashaya cuanaque arayadya, —jadyatu acuare epunara.

²⁹ —Jidadya mira quemitsahua. Jadya caquemitsati jutsumi ejitajudya juhua era micue bacujuna juque ijahua cuana eijehuecuinauque, pana ejene ayaque. Jida dirucue. Micue etareju judirutsu tuque mira micue bacujuna ijahua cuanara jacahuaju badiruya. Ijehuecuinatillahua tuja tuque ijahua cuana, —jadyatu Jesúsra acuare.

³⁰ Jadya ahuajutu epuna dirunucacuare tuja etareju. Etareju judirutsu tujatu ebacujunaque badirucuaire amena quijahuatijacahuaju. Dyaque jida inime tsapematu tuja etahuiquiju jaracuare, ijahua cuanara amena jacahua tibu.

Jesúsra isahueque, quisarti baecuaque jadique quijacabatisha, quisaratisha jadya acuareque

³¹ Tiro juque cuinanatsutu Jesús Galilea beiju judirunucacuare. Sidón yahua, Peadya Tunca Epu Ebari Cuana equetu cueticuare. ³² Tuhuadyatu ecuita cuanara tuaqueja dujucuaire ecuita isahueque, quisarati baecuaque jadya. Tuaqueja dujutsu tunajatu isaracuare Jesús:

—Nerecabacue ecuana. Jabacue riyaque ecuita, tuja ijaca pacashatana ishu, quisarati ishu, —jadya tunajatu acuare.

³³ Jesusratu dujucuaire peya queja amaca, ecuita cuana riya piji jacamere ishu. Tuhua dujutsu tujatu emetucu sapara

huicuabu ecatsé beta eqúe amaca ijaca caniju ishacuare. Tuequedya tujatu emetucu sapara tuja ijaca cani juque yume quemi acuare. Emetucu sapara huicuabu tujatu ecuedi iyacuare. Jadya aatsu tujatu pepacuare ujejedaja yanaju. ³⁴ Jadya aatsu tujatu petacuare barepa. Canajeti ebari juat-sutu jadya jucuare:

—¡Efata! (“Pacashatanacue ijaca cani ecatsé” jadique.)

³⁵ Jadya ayaju cuitadyatu ecuita jida quijacabacati, quisarati jadya jucuare. ³⁶ Jesusratu ecuita cuana acuare:

—Cueja cueja ecana neaume, —jadya tuna Jesúsra acuare.

Jadya ama bucha tuna quisarati tsapecuare. ³⁷ Jesúsra quisarati baecuaque, isahueque jadique quijacabacatisha, quisaratisha jadya ahuaque bacatsaqui jucuare cuanaque tuna anajacatacuare.

—¡Dutyatu jida aya! Isahue cuanaquetu jida quijacabacatishaya. Quisarati baecua cuanaquetu quisaratishaya, —jadya tuna jucuare.

8

Jesúsra pushi mil ecuita pacarucu pan, eje uma jae piji jadya umanashatsu mihuacuareque

(Mt 15.32-39)

¹ Eje uma huecaca ama jadya juchineque cuetihuajutu ecuita jetiamaque cuanucacuare Jesúsra cuejayaque bacara. Tuna aracara juyaque adebatsutu Jesúsra tura mepehua cuanaque ihuaracuare.

² —Nrecada taa rique ecuita cuana arama baatsu baya, riya barepa tibene equeque taa rena ique ijacabaca juyaque. Amena taa renajari aijama ara ishuque. ³ Cuadishacarama taa rena aramaque aya tunaja etare cuanaju. Edijiju taa rena emajudiruu. Umae taa ri japada aniya cuanaque, —jadya tuna Jesúsra acuare.

⁴ —¿Eje bucha dadie jatsu tuque ecuana eau earaqui ecuita jetiamaja ishu, rehua ni ejeque buchique anitaya amaju? —jadya tunajatu acuare.

⁵ Jesúsra tuna bacaduracuare:

—¿Eje uma pan micuanaja aniya?

—Pacarucu piji camadya, —jadya tunajatu acuare.

⁶ Tuequedya tujatu iyabutyamerecuare ecuita cuana. Yahujaju iyabutyameretsu tujatu inacuare pacarucu pan. Pan inatsutu jucuare:

—Yusurupai mique aya, Tata, mira ecuana riyaque earaqui tyahua tibu, —jadya tujatu Yusu acuare.

Yusurupai aatsu tujatu pan cuesibarecuare. Cuesibaretsu umanashatsu tujatu pan tyabarecuare tura mepehua cuanaque. Tyahuaju tunajatu tyabarecuare ecuita cuana. ⁷ Tumbaedy a tunaja anicuare eje uma cuana jae. Jesústu quisaratinucacuare Yusu tsehue:

—Yusurupai mique aya, ryaque jae cuana mira ecuana tyahua tibu, —jadya tujatu Yusu acuire.

Yusurupai au jadya aatsu tujatu ecana acuire:

—Netyabarecue ecuita cuana, —jadya tujatu acuire tura mepehua cuanaque.

Jadya aatsu tujatu jae umanashacuare. ⁸ Dutya tuhua jucuare cuanaque tuna araaracuare jequeya tupu. Araara amena juatsutu tura mepehua cuanara jequeshabarecuare pacarucu jiti arida cuanaque pan cuesi cuana anidadihua tsehue. ⁹ Jetieque ama tuna araaracuare. Pushi mil deca cuana tuna araaracuare. Jadya juatsutu Jesúsra ecuita cuana amena isaracuare. ¹⁰ Tuna isaratsutu anibutedirucuare cuabaju, tura mepehua cuana tsehue. Anibutetsu tuna cuacuare Dalmanuta bacani yahuaju.

Fariseo cuanara Jesúsra ai ejeque ecuitaja ataquique ama amerecara acuireque

(Mt 16.1-4; Lc 12.54-56)

¹¹ Umae fariseo cuanatu Jesús queja juticuare. Catibuticuare ecana Jesús tsehue caquemitsati caquemitsati. Sarecuare tunajatu eje bucha eque jidama aishu. Tume tunajatu Jesús acuire:

—Acue ecuanaja yatucaju ai bapeque inimeradya jutidya, ecuana mique Yusura cuadishahuaque bahue juishu, —jadya tunajatu acuire, arepa tuna tuque Yusu equeque junahuaque ejenecarama acuire ama bucha.

¹² Jesústu ducuta peya inime jucuare, tuna tuaqueja catyaticarama juya baatsu.

—“Acue ai inimeradya jutidya, ecuana mique Yusura cuadishahuaque bahue juishu”, jadya micuanara aya. Aya ama tuque era, ni ainya jutidya, —jadya tuna Jesúsra acuire.

¹³ Jadya isarae aatsu tujatu ecana shanaquenacuare. Yudi-jidya anibutedirunucatu jucuare cuabaju. Carequeticuare ecana bei yueque macare.

Fariso cuanara bahuityacuareque tu levadura buchique

(Mt 16.5-12)

¹⁴ Jesúsra mepehua cuanaque tuna cuayaque pan umada cadujuti ishu nime aputacuare. Peadya pan piji camadya tuna cadujuticuare. ¹⁵ Jesúsra tuna isaracuare:

—Neijacabacacue. Necanaruticue bacue fariseo cuanaja, Herodesja jadya levadura tsehue, —jadya tuna Jesúsra acuare.

¹⁶ Tunaratu adebacuare ama tura eje buchique jadya ayaque. Jadya tibu tuna, tuna cama quisaraticuare:

—Ecuana pan umadama cabetihua baatsu tura ecuana jadya quisarati tsehue aya, —jadya tuna, tuna cama jucuaire.

¹⁷ Jesusratu adebacuareadya tuna cabacaduratibareyaque.

—¿Eje bucha juatsu micuana, pan umadama cabetihuaju cuana era nereda aya bucha cabatiya? ¡Adebaya ama jaridya ni taa tuque micuana era bahuityayaque! ¡Adebaya ama jari tuque micuana era micuanara ai sareyaque etyaque! Micuanara ecue quisarati bijidamadurahua bucha tuque.

¹⁸ Micuanaja yatuca tsehuedya tuque micuana bahua micuana era casa bamere ishuhuaque. Micuanaja ijaca tsehuedya tuque micuana bacahua era bahuityahuaque. Neadebacue era jetiamaque mihuachineque. ¹⁹ Pishica pan era pishica mil ecuitaja ishuhuaque tupu amerechine patya, ¿eje uma jiti tuque micuana jequeshachine pan arabishahua cuana tsehue? —jadya tujatu ecana acuare.

—Peadya tunca beta earacana jiti, —jadya tunajatu quemitsacuare.

²⁰ —Pacarucu pan umanashatsu era pushi mil ecuita aramerechineque, ¿eje uma jiti tuque micuana jequeshachine anidadichine cuana tsehue?

—Pacarucu jiti, —jadya tunajatu quemitsacuare.

²¹ —Arepá micuana era achineque bahua ama bucha taa micuana adebaya ama jari micuanara ai sareyaque tyaishu ecue casa aniyaque, —jadya tujatu ecana acuare.

Jesúsra shuhuique Betsaidaju capetatishacuareque

²² Tuequedya tuna junaticuare Betsaidaju. Junatihua-jutu tuhua cuanara dujucuaire Jesús queja ecuita shuhuique. Canerecaticuare tuna tuaqueja:

—Nerecabacue ecuana. Jabacue riyaque shuhuique tuque capetati ishuhuaque, —jadya tunajatu Jesús acuare.

²³ Jadya ayaju tujatu inacuaire emetucuju shuhuique. Inatsu tujatu cuinanaquerecuare epu juque. Cuinanaquere-
retsu tujatu ecuedi tsehue pepacuare yatucaju. Jadya au jadya aatsu tujatu yatucaju emetucu tsehue jabacuare. Jabatsu tujatu bacaduracuare:

—¿Are capetatiyadya mique?

²⁴ Ecuitaratu petatsu jadya acuare:

—Jejee, amena tuque bayadya riya piji. Baya tuque ecuita cuana. Juneniyaju tuna baya. Jadya ama bucha tuna cueyane

jida cuita ama aya. Acui cuana bucha jutidya tuna baya, — jadya tujatu acuare.

²⁵ Tumetu Jesúsra yudijidya jaba anucacuare yatucaju. Jabanucahuajutu ecuita amena jida capetaticuare. Dutyadyatu jida pana cueyane acuare. ²⁶ Tumetu Jesúsra jadya acuare:

—Tuyu diru jucue micue etareju. Epuju yudijidya dirunuca juume, —jadyatu acuare Jesúsra.

Pedrorra “Jesús tu Mesías Yusuja Emepeque” cuejacuareque (Mt 16.13-20; Lc 9.18-21)

²⁷ Jadya juatsutu Jesús cuacuare tura mepehua cuana tsehue Cesarea Filipino epu ebari japadama anitaya cuana queja. Edijiju tujatu ecana bacaduranaticuare:

—¿Eje buchatu ecuita cuanara ecue ishü inime tupuya? ¿Ai jadya tunara aya? —jadya tujatu ecana anaticuare.

²⁸ Tunaratu quemitsacuare:

—Umae cuanarami aya Juan Ecuita Cuana Utsaquiue emajuque enetitsuranucaque jadya. Peya cuanarami Elías jadya aya. Peya cuanara bacuemi aya beru Yusu equeque quisarati cuejaquiue emajuque enetitsuranucaque jadya, —jadya tunajatu acuare.

²⁹ —¿Micuanara bacue, ique ai jadya aya? —jadya tujatu ecana acuare.

—Miquemi Mesías, Yusuja Emepeque, —jadyatu Pedrorra quemitsacuare.

³⁰ —Necuejaume jari ni ejeque buchique ique Mesiasque, —jadya tuna Jesúsra acuare.

Jesús eje bucha iyetanadadie juyaque cacuejaticuareque (Mt 16.21-28; Lc 9.22-27)

³¹ Tumeque huecaca equetu Jesús cacuejatitibunecuare tura mepehua cuanaque tuque eje bucha judadiyaque.

—IQUE ECUITA dyaque canerecatitaqui. Emuiba cuanara, pae cuanaja huaraji cuanara, cacuatsashati bahuityaqui cuanara jadya dyaque nerecaturadadiya. Iyemeradadiya tunara ique. Quimisha huecaca juatsu netitsuranucaya, —jadya tujatu ecana cuejatitibunecuare.

³² Pana ejitaju tujatu ecana bahue amerecuare tuque iyetanadadiyaque. Pedroratu ejenecuare ama Yusuja Emepeque jadya ejudadiuque. Jadya tibudya tujatu peya queja ihuara acuare. Tuna peya queja jacameretsu piji tujatu Jesús nereda atibunecuare:

—Jadya quisarati aume. ¡Arequemi jadya ejudadiu ama! — jadya tujatu aticuare.

³³ Jesúsru huarerecuare. Huareretsu tujatu bajiyucuare tura mepehua cuanaque. Tume tujatu Pedro nereda acuare:

—Satanástu mique eqe quisaratiya. Maju aqui cuana jaque jutidya tuquemi inime tupuya, Yusu jaque ama. Bacacarama tuque aya mique eqe Satanás ama amara cuejayaque, —jadyatu Jesúsra Pedro aticuare.

³⁴ Tuequedyatu Jesúsra isaranucacuare tura mepehua cuanaque, ecuita cuana jadya:

—Micuana eatsehue junenicara juyaque juatsu, era cuat-sashaya eqe neanicue, micuanaja biji eqe juneniyaque nime aputatsu, arepa micuana canerecati, maju jadya jutaqui ama bucha, curusuju etata ejuu bucha. ³⁵ Micuana ni catehuatiya eaqueja ecatyatique eiyetauju, ejetsunue ama micuana anibuque. Tume micuana majubuque ni eje tupu Yusu queja judiru ishú ama. Micuana ni eaqueja catyatihua baatsu iyetaya, Yusuja quisarati ejenehua baatsu ni micuana iyetaya, Yusu tsehue micuana anisiribuque, arepa micuanaja ecuita ririya ama bucha. ³⁶ Ecuita ni ijahuaja etiquiju judiribuque, ni aishu buchique tujatu jida juhua ama riyaque yahuaju tuja dutya ai anihuaque. Ni aishu buchique tu jida ama dyaque chipiruda juishu, majudaditsu dutyadya shanadadiya tibu. ³⁷ Aijamatu ni ai buchique micuanara maju ishú ama etsujetyauque. ³⁸ Iyacua riyaque yahuajutu aniya ecue ama cuanaja yacuaju ique eje buchique quisarati aishu bisuya cuanaque. Tunajatu bisu aniya ecue quisarati cueja ishú. Ejeque huecaca IQUE ECUITA junanucabuque. Barepaju Yusu tsahuaqui cuanara tajibebuque. Ique junanucayajutu dutyara babuque ecue Etataja casa. Bisunabuquedy a ique tume ecue ishú bisuhua cuana tsehue.

9

¹ Pusha amadya micuana cuejaya. Umae micuana rehua majuhuishaya ama, dutya era ecue casa tsehue narutibuneyaque badadiya tupu, —jadya tujatu ecana acuare.

Jesús cabapeticuareque (Mt 17.1-13; Lc 9.28-36)

² Shucuta huecaca juatsutu Jesúsra dujucuaré emata baru-daju Pedro, Santiago, Juan jadya. (Juan tu Santiago tsehuequique jucuaré.) Tuhuadyatu tunara petayaju cabapeticuare. ³ Tuja unatu pajada, huecada dyaque tiquida jucuaré. Ni ejeradya jutidyatu riyaque yahua juque ai utsatsu jadya pajae eamereu. ⁴ Masadaque amatu Moisés yanume, Elías yanume jadya ejitaju jucuaré. Tume tatse Jesús tsehue quisaratinacuare. Tuatsehue cuacuare cuanaratu bacacuare quisaratiyaju. ⁵ Jadya bacatsutu Pedrora Jesús acuare:

—Ecuana Bahuityaquique, dyaque jida taa ecuana rehua. Eau tuque ecuana quimisha erere, peadya micue ishu, peya Moisésja ishu, peya bacue Eliasja ishu, —jadya tujatu acuare.

⁶ Tuque, tuja ecare ecatsé jadya tuna dyaque ejecutana jucuaré. Jadya tibudyatu tuque ai quisarati ataqui ama jucuaré. ⁷ Tumetu barepa juque huanira dunutillacuaré. Tume tunajatu bacacuaré huani ducucue Yusu jadya quisaratiyaju:

—Riyaque rique ecue ebacua dyaque iyuhuedaque. Nebacajacaume. Eje bucha tura cuejaya eque nejucue, —jadya tuna Yusura acuare.

⁸ Jadya bacatsutu quimisha, Jesús tsehue cuacuare cuanara bajiyucuaré. Bajiyunucatsu tunajatu banucacuaré ama Moisés, Elías jadya, Jesús camadya.

⁹ Emata juque buteajeyara tuna Jesúsra cuatsashacuaré:

—Necuejahuishaume jari ni ejeque buchique micuanara eje bucha bahuaque. IQUE ECUITA majuhuaque, chacha netitsuranucahuaju piisi ecana necuejacue, —jadya tuna Jesúsra acuare.

¹⁰ Tura cuejaha equedya tuna jucuaré. Jadya ama bucha tuna tuna cama cabacaduratitibunecuaré:

—¿Eje buchiquetu “Ique majuhuaque, chacha netitsuranucaya” jadique? —jadya tuna cabacaduratiajecuaré.

¹¹ Tume tunajatu bacaduracuaré Jesús:

—¿Eje bucha juatsutu cacuatsashati bahuityaqui cuanara Eliaspa icuene junabuque, Mesías junama jariju, jadya aya? —jadya tunajatu bacaduracuaré.

¹² Tura tuna quemitsacuaré:

—Tunara bahuityayaquetu yuneridya. Eliastu icuene junabuque. Turadyatu dutya bajejenabuque. Tumbaedyatu ehue Yusuja quisarati. ECUITAtu ijahue ijahue atabuque. Pana bijidamadura tunajatu abuque. Yusuja Emepeque eadebau bucha adebae ama tunajatu abuque.

¹³ Pusha amadya micuana cuejaya. Elías buchiquetu amena junahuadya. Eijacabacauque, tunajatu ijahue ijahue acuare, tunara acara aya eque. Judadihuatu Yusuja quisarati icuena huene ea bae cuitadya, —jadya tujatu ecana acuare.

Jesúsra ebacua piji ijahua cuanara quijahuatishayaque quijahuatishajacacuareque

(Mt 17.14-21; Lc 9.37-43)

¹⁴ Jesúsra, emata tuatsehue juque buteetibeya cuanara tunajatu bacuaré ecuita jetiera ama peya cuana dunuyaju. Tuhadyatu jucuaré cacuatsashati bahuityaqui cuanaque Jesúsja cuana tsehue caquemitsati caquemitsati juyaque.

¹⁵ Riya batsa cuita tunajatu Jesús judiruyaju acuare. Batsatsu tunajatu anajacata ishu acuare, tunara emataju jari bucha

baya tibu. Batsatsu tuna tuaqueja tsajajabare jucuaire tuque isarara. ¹⁶ Jesusratu isaratsacuare tura mepehua cuanaque:

—¿Ai micuana caquemitsati caquemitsati juya tuna tsehue? —jadya tujatu ecana acuare.

¹⁷ Peadya tuhua jucuareratu quemitsacuare:

—Behua rique ecue ebacua miaqueja. Ijahua cuanarari quijahuatishaya. Jadya tiburi quisarati baecua. ¹⁸ Ejudyá jutidya juneniyajutu ijahuara ecue ebacua yahua catsaqui amereya. Jadya juyaque tujatu cuinanaya uba jasa yatsanaca eque. Etse tari jadya tujatu amereya. Dutya ecuita tujatu temutsuya. Canerecatihua datse ique mira mepehua cuana queja ijahua ijehuecuinamere ishu datse. Arepa ijehuecuinacara aya ama bucha, tuna ijehuecuinataquima bahua, —jadyatu ebacua pijija etataquera Jesús acuare.

¹⁹ Jadya bacatsutu Jesúsra acuare tuhua jucuaire cuanaque:

—¡Micuana micuana quejeneti baecua! Arepa micuana era ayaju bahua ama bucha, adebaya ama jaridya tuque micuana Yusuja casa. ¿Eje tupu cuita micuana eiduu? ¿Micuanara adebaya tupu ni taa? Nebecue requeja tumeque ebacua piji, —jadya tujatu ecana acuare.

²⁰ Jadya ahujaju tunajatu becuare. Behujajutu ijahuara, Jesús baatsu, manu amerenuacuare ebacua piji. Tume tujatu yahua catsaqui amerenuacuare. Tipiru tipiru, yatsanaca eque ubajasa jadya tujatu amerenuacuare.

²¹ Tumetu Jesúsra bacaduracuare ebacua pijija etataque:

—¿Eje tupuri jadya catibuticuare?

—Nanada equeque cuitadya. ²² Eje uma ijehue cuanatu ijahuara aya etiquiju, enaju jadya iyecara aatsu. Nerecabacue yatse. Tsahuacue yatse, micue casa aniyaque juatsu, —jadya tujatu Jesús acuare.

²³ —¿Eje bucha juatsu jatsu mira “micue casa aniyaque juatsu” jadya aya? Ecue ishutu dutya ai ataqui. Ejera Yusura casa tyahuaque ejeneyaratu eau dutya, —jadyatu Jesúsra acuare ecuita.

²⁴ Tumetu ebacua pijija etataquera pana ejitaju quisarati acuare:

—Riya pijidya tuque ejeneya mira ecue ebacua juque ijahua cuana ijehuecuinauque. Tsahuacue ique; pana ejene paa mira jadya ayaque, —jadya tujatu acuare.

²⁵ Amena Jesúsra umada ecuita cuana caradatiyaju baatsu tujatu nereda acuare tumeque ijahua ebacua piji yuamaturaque juyaque:

—Cuananacue riyaque ebacua piji quejaque, ijahua quisarati baecua, isahue ijacama jadya amerequique. Cuananatsu dirucue; ni eje tupumi tuaqueja nubinucaya ama, —jadya tujatu acuare ijahua.

²⁶ Jadya ayajutu ijahua quiqueterequenancuacuare. Manu tujatu ebacua piji amerequenancuacuare. Jadya aatsutu cuinanacuare. Cuinanatsutu shanacuare ebacua piji emaju bucha.

—¡Majuhua tuque! —jadyatu umae jucuar ebacua piji yahuaaju jujaraya baatsu.

²⁷ Jesusratu emetucuju inatsu nityatsuracuare. Tumetu ebacua piji netitsuracuare.

²⁸ Jadya aatsutu Jesús nubicuare etareju, tura mepehua cuana tsehue. Jesús tsehue camadya cabatitsu tunajatu bacaduracuare:

—¿Eje bucha juatsu tuque ecuana ijehuecuinataqui ama bahua tumeque ijahua ebacua piji yuamaturaquique? — jadya tunajatu bacaduracuare.

²⁹ —Ijehuecuinataqui ama tuque micuana tumeque ijahua bahua, Yusu tuja casa jadya aishu bacahua ama tibu. Aijamatu peya eje bucha equ cuinanasha ishuque, —jadya tujatu ecana acuare.

Jesús eje bucha iyetanadadie juyaque cacuejatinucacuareque

(Mt 17.22-23; Lc 9.43-45)

³⁰ Tuhuaque cuinanatsu tuna cueticuare Galilea yahua equ. Jesusratu ecuita cuana tuque ejuque bahue amerecarama acuare. ³¹ Emajaca tujatu tura mepehua cuanaque bahuitya ishu anicara jucuar. Ni aija perema tujatu ecana bahuityacara acuare.

—Ejera cuana tsetatsu inameredadiya IQUE ECUITA. Inameretsu tura ique iyecara juya cuana queja iyemeredadiyadya. Iyedadiya tunara ique. Iyehuaaju quimisha huecaca juatsu netitsuranucaya, —jadyatu cacuejaticuare.

³² Adebacuare ama tunajatu tura cuejayaque. Bacaduracarama tunajatu acuare tura eje buchique jadya ayaque, adebataqui ama baatsu bacadurayaju nereda eau bucha caadebatitsu.

¿Ejeque tu dyaque inime metseque?

(Mt 18.1-5; Lc 9.46-48)

³³ Tuequedya tuna junaticuare Capernaum epu ebariju. Etareju junatitsu tuna Jesúsra bacaduranaticuare:

—¿Ai tuque micuana caquemitsati caquemitsati ishu abeabehua edijiju jeyaque?

Jadya tujatu ecana bacaduracuare, arepa tuque tunara eje buchique quisarati ahuaque bahue jucuar ama bucha.

³⁴ Tuna tuna anama cuitadya jucuar. Bisucuar tuna, tuque quemitsa ishu, tura mepehua cuanaque ecana ejequepa

ecana dyaque inime metseque jadya juatsu caquemitsatihua tibu. ³⁵ Anibutetsutu Jesúsra acuare tura mepehua cuanaque:

—Nejecue. Nejipenacue ique. Micuana ni emuita jucara juya, dyaque jetiedyaque bucha necabamereticue. Camereti arida ejuuque, nemerecue jutidya peya cuana, —jadya tujatu ecana acuare.

³⁶ Jadya juatsu tujatu ihuaracuare ebacua piji tuhua netiya baatsu. Ihuaratsu tujatu tuna patya nityacuare. Ebacua pijija yaracacaju tujatu ebi ecitse huanacuare.

³⁷ —Micuanara ni ecue cuanaque jida tsehue batsaya, arepa tuna riyaque ebacua piji bucha paju ama bucha, idya datse micuanara jida tsehue batsaya. Micuanara ni ique jida tsehue batsaya, tume tuque micuana ecue Etata Ique Cuadishaquique jidadya batsaya, —jadya tujatu ecana acuare.

Yusuja cuanaque tuque ecuanaja bijidamadurataqui ama, arepa ecuana tsehueque ama paju ama bucha

(Mt 10.42; Lc 9.49-50)

³⁸ Juantu quisaraticuare Jesús tsehue:

—Ecuana Bahuityaquique, ecuana micue quisarati cuejara cuachine patya, tuque ecuana bachine ejeque cuana jahua cuana micue ebacaniju ijehuecuina juyaju. Jadya baatsu tuque ecuana achine: “Jesúsja ebacaniju rique jahua ijehuecuinaya’ jadya ajacacue, ai mi Jesúsra mepehuaque batu”, —jadyatu Juanra Jesús acuare.

³⁹ Jadya ahuajutu Jesúsra acuare:

—Jadya neaume. Ejera yuneridya ecue ebacaniju aya ejeque ecuitaja ataquique ama; tumequetu ecue ishuhua jidama quisaratinime ama. ⁴⁰ Ecuana iyuhueda baquira ecuana ujeu baya ama. ⁴¹ Pusha amadya micuana cuejaya. Yusuratu jidaque tyabuque ecue cuanaque tsahuaqui cuanaque. Arepa tuna ena cuana pijidya jutidya iji ishuhua tyahua ama bucha, tujatu ecana tsujetyabuquedya, —jadya tuna Jesúsra cuejacuare.

Peya cuana cajuchatishaquique dyaque canerecaticuque

(Mt 18.6-9; Lc 17.1-2)

⁴² Jesúsra tuna bahuityanucacuare:

—Ejera riyaque ebacua piji bucha cuanaque cajuchatishayaquetu Yusura dyaque nerecaturabuque. Dyaque jidatu majutaqui juhua ejeque cajuchatishamaquedya. Dyaque jidatu peya cajuchatishaquique tumu ebari epitiju risitsu bei dyaque dedaju ijehuetahui juhua. ⁴³ Emetucu tsehue ni micuana cajuchaticara juya, necatubuticue cajuchatimaquedya, jidamaque acara

ayaque micuanaja aishu ama. Nejacacue cajuchaticaraque. Dyaque jidatu bipidya Yusu queja judirutaqui, bibeta ijahuaja etiquiju enubidiruque, etiqui ticu baecuaju. ⁴⁴ Tuhuatu emaju cuanaja ecuita cayuamatijacaya ama, tsuju cuanara araya tibu. Tuhuatu etiqui ticunime ama. ⁴⁵ Cuacara ni micuana juya eju micuana cuataqui amaju, cajuchatimaquedya ehuachi necatubuticue, eju micuana cuacara juyaju cuaishu ama. Nejacacue cajuchaticaraque. Dyaque jidatu ruduruduque Yusu queja judirutaqui, huachi beta ijahuaja etiquiju ejudiruque. ⁴⁶ Tuhuatu emaju cuanaja ecuita cayuamatijacaya ama, tsuju cuanara araya tibu. Tuhuatu etiqui ticunime ama. ⁴⁷ Micuanaja petataquimaque ni micuana petacara aya, necahuaticue yatuca, cajuchatimaquedya, jidamaque peta ishü amadya. Nejacacue cajuchaticaraque. Dyaque jidatu Yusu queja judirutaqui atuca pidya camadya, ijahuaja etiquiju atuca beta ejudiruque. ⁴⁸ Tuhuatu emaju cuanaja ecuita cayuamatijacaya ama, tsuju cuanara araya tibu. Tuhuatu etiqui ticunime ama. ⁴⁹ Etiquira, banura jadya jidamaque cuinanashaya bucha, jadyatu Yusura ecue cuanaque jidamaque cuinanashaya canerecati eque. ⁵⁰ Banu tu jida earaqui dyaque jida amere ishü. Banuja, ni banu huaja etereu, aijamatu ni eje bucha banuqui amerenuca ishüque. Banura earaqui dyaque jida amerenucaya bucha, tumbaedya micuana dyaque jida peya cuana tsehue ani ishü cabahuenetitaqui, ai aishu jida ama ejuu tibu, —jadya tuna Jesúsra acuare.

10

Ecaquemitique cajacatitaquiquemaque Jesúsra bahuityacuareque

(Mt 19.1-12; Lc 16.18)

¹ Jesússtu diruquare Capernaum juque. Tuhuaque cuinanat-sutu cuacuare Judea yahua queja. Jordán cueri yueque macaretu cuacuare. Tuhuadyatu ecuita cuana jetiama yudijidya caradarati junucacuare tuaqueja. Caradatihuaju tujatu ecana bahuityanucacuare tuja bahue. ² Tumetu umae fariseo cuanara jipeticuare. Quisaratishatsu tunajatu pusha pusha tsehue jidama amerecara acuare. Bacaduraticuare tunaja tuque:

—¿Ecuanaja ehuañe amena bijidama baatsu, ijehuetiquidya tuque ecuanaja? —jadya tunajatu aticuare.

³ Tume tuna Jesúsra quemitsacuare peya cabacadurati eque:

—¿Eje buchique cacuatsashatitu Moisésra huenequare?

⁴ Tunaratu quemitsacuare:

—Turatu huenequere: “Ijehuecara ni micuana aya micuanaja huane, neinamerecue quirica eje bucha juatsu micuanara ijehueyaque cuejayaque. Inameretsu micuanaja huane neijehuecue”, —jadya tunajatu acuare.

⁵ Jesúsra tuna acuare:

—Moisesratu adebacuaredya Yusuja cuanaque ama Yusuja biji eque anicarama juya cuanaque, tunaja biji equedya jutidya. Jadya tibudya tujatu huenequere ecaquemitique cajacatitaquique. ⁶ Jadya ama buchatu Yusura yuequedya inime iyahua ecaquemitique cajacati ishu ama. Ehuene tu Yusuja quisarati: “Yusuratu yuequedyadya iyacuare deca, epuna jadya carequi juishu”. ⁷ Tumebaedya tu ehue: “Jadya tibudyatu decaja jacataqui etataque, euaque, carequi juatsu. ⁸ Caquemitihuaju tatse Yusura baya peadya camadya bucha”. Jadya tibu tatse amena beta ama, peadya camadya. ⁹ Yusura cuitadya casitatishahua tibu, tujatu ecatse peadya camadya bucha baya. Jadya tibudya tatse ni ejeque ecuitaja buchique cajacatishataqui ama, —jadya tuna Jesúsra acuare.

¹⁰ Etareju judirunucatsutu Jesús tura mepehua cuanara acuare:

—Pana cueja cuita ecuana anucacue ecaquemitique cajacati ishuque ama, —jadya tunajatu acuare.

¹¹ —Micuana ni micuanaja huane neri tsehue cajacatitsu, peya epuna tsehue caquemitinucaya, tume micuana cajuchatiya. Yusuja yatucaju tuque micuanaja icueneque epuna huane neri jaridya, ai tupujuque ama. ¹² Tumebae nucadya, epuna ni tuja yahuique jacatsu, peya deca tsehue caquemitinucaya, Yusu tujatu cahuaishaya. Yusuratu icueneque deca baya epunaja yahuique neri, beta ishuque ama, —jadya tujatu ecana acuare.

Jesúsra “Yusura jida panaru ebacua cuana” jadya acuareque (Mt 19.13-15; Lc 18.15-17)

¹³ Tumetu umae ebacua cuana etata cuanaquera Jesús queja dujubarecuare.

—Emetucu micue iyacue ebacua cuanaja iyuca dyaque. Bacacue ecana Yusu queja, tuja ecana jida naru ishu, —jadya tunajatu Jesús acuare.

Jesúsra mepehua cuanara tuna jadya baatsu, nereda jutidya atsabarecuare ebacua cuana tsehue cuacuare cuanaque:

—Nepereume Jesús, —jadya tunajatu ecana atsacuare.

¹⁴ Tura mepehua cuanaque jadya quisaratiyaju bacatsutu Jesús cahuaicuare tuna tsehue.

—Pajedya ebacua cuana eaqueja. Necuadishaume ecana eaquejaque. Esiri cuanaque camadya ama, tumbaedyatuna dyadi tuna Yusu jaquedyatuna. ¹⁵ Pusha amadya micuana cuejaya. Yusura dutya naruhaju tuaqueja judirucara juya cuanaquetu era cuatsashaya eque jutaqui ebacua cuejataquique bucha, —jadya tujatu ecana acuare.

¹⁶ Jadya quisarati aatsutu Jesúsra ebacua cuana tuhua jucuare cuanaque ebiju inatsu macacabarecuare. Peadya peadyaja iyuca dyaquetu emetucu iyabarecuare.

—Yusura jida narucue, —jadya tujatu ecana peadya peadya abarecuare.

Ecuita chipirudaque Jesús tsehue quisaraticuareque
(Mt 19.16-30; Lc 18.18-30)

¹⁷ Amena Jesús dirunucayajutu ecuita juticuare tsajaja cama. Jutitsutu nuyunaticuare tuja yacuaju. Bacaduranaticuare tura:

—Jidaque Ebahuityaquique, ¿ai mere tuque jidaque eau, Yusu queja judiru ishuni eje tupu tuque jaca ishuni ama? —jadya tujatu Jesús aticuare.

¹⁸ Jesusratu quemitsacuare:

—¿Adebayadyami eje buchique quisarati ahuaque? ¿Eje bucha juatsu mira “Jidaque Ebahuityaquique” jadya aya? Yusu peadya camadya tu jidaque. ¹⁹ Bahuedyami Yusura cuatsashahuaque. “Quiyeti puji juume. Peyaja ehuanecue micuque bucha aniquere aume. Chiri juume. Ni ejeque buchique pusha pusha aume. Ijahue aume peya. Muibacue mique baquique, mique susuquique jadya”. Jadyatu Yusura cuatsashacuare béru, —jadyatu Jesúsra acuare.

²⁰ —Dutyariya cuanaque cacuatsashati cuana tuque muibacuare nanada equeradya, Ebahuityaquique, —jadyatu ecuitara acuare.

²¹ Jadya bacatsutu Jesúsra iyuhue tsehue pana peta acuare.

—Aniya jari tuque micue eje bucha ataquique. Dutya micue aniya cuanaque catyati aticue. Catyati aatsu tyabarecue chipiru nrecada cuanaque. Dutya micue ai catyati aatsu, juetinucacue eaqueja eatsehue juneni ishuni. Eaqueja ni mi ecatyatiu, tume tuque micue eaniu Yusuja cuanaja ishuni tuja barepaju aniyaque, —jadyatu Jesúsra acuare.

²² Jadya ayaju bacatsutu ecuita dyaque peya inime dirucue, tuja dyaque jetiama aniyaque catyati acarama aya tibu.

²³ Tumeque ecuita yuneridya tuatsehue junenicarama juyaque adebatsutu Jesúsra peta baretsu tura mepehua cuanaque isaracuare.

—Jetiama ai aniya cuanaratu dyaque ibeda, masada baya eaqueja pana catyati juishu, Yusura dutya naruyaju judirutaqui juishu, —jadya tujatu ecana acuare.

²⁴ Jadya bacatsu tuna bape bacacuare. Jesúsra tuna yudijidya cuejanuca acuare:

—Ecue iyuhueda cuanaque, dyaque ibeda, masadatu eaqueja pana catyati juishu, Yusura dutya naruyaju judirutaqui juishu. ²⁵ Cahuayutu etsucuija cani eque eje bucha cuetitaqui ama. Tumbaedy a tuna tunaja ai aniyara eje bucha judirutaqui ama amereya Yusu queja, —jadya tujatu ecana acuare.

²⁶ Jadya bacatsu tuna bape pana baca anucacuare. Cabacaduratibarecuare ecana tuna cama:

—Chipiriqui cuanaque ni Satanás quejaque quinajacameretitaqui ama cabatiya, ¿ejeque jatsutu tuaquejaque equinajacameretiu? —jadya tuna jubarecuare.

²⁷ Jesúsra tuna petatsu jadya quemitsacuare:

—Ecuira ni tu tuta taca eje bucha quinajacameretie juma Satanás quejaque. Yusura peadya camadya tuna einajacamereu. Yusuja ishutu aijama ai ataquimaque, —jadya tujatu ecana acuare.

²⁸ Jadya bacatsutu Pedrora acuare:

—Ecuana ecuana dutya cashanatihua miatsehue juneni ishu, —jadya tujatu acuare.

²⁹⁻³⁰ —Pusha amadya micuana cuejaya. Micuana ni cashanatiya dutya micuanaja ai aniyaque eatsehue juneni ishu, Yusuja quisarati cuejara cuaishu, Yusura micuana tyaya dutya micuanara riyaque yahuaju sareyaque. Tura micuana tyaya micuanara sareya tupu dyaquedya, cien etyau bucha dyaque jetiama. Micuana ni etare cashanatiya, tura micuana tyaya eju ani ishucue. Cashanatiya ni micuana micuana tsehuequi cuanaque, micuanaja tata, micuanaja cuaa, micuanaja bacua cuana, tura micuana peya cuana queja iyuhue tsehue narumereya tunaja ata neri bucha. Cashanatiya ni micuana micuanaja tee cuana, tura micuana tyaya dutya micuanara ara ishucue sareya cuanaque. Riyaque yahuaju jari tupu micuana ecue cuanara ama ijahue jahue abucue. Jadya ama bucha micuana Yusura dujubucue tuja yacuaju ni eje tupu tuque jaca ishu ama. ³¹ Iyacu dyaque inime metse cabatiya cuanaque tuna inime metse ama jubucue. Iyacu jetiedya, inime metse ama cabatiya cuanaque bacue dyaque inime metse cabatibucue, —jadya tujatu ecana acuare.

Jesús eje bucha iyetanae juyaque cacuejati quimisha ishu cacuejatinucacuareque

(Mt 20.17-19; Lc 18.31-34)

³² Jesús, tura mepehua cuanaque jadya tuna Jerusalén diji eque cuacuare. Jesús tunajatu icueneritya aajecuare. Tuque ujeu baqui cuanaque tumeque epu ebariju aniya baatsutu tura mepehua cuanara inime tillaqui acuare, tuque tuhua cuaya baatsu. Tuque tupuju cuaya cuanaque tuna tumebaedya bajida jucuaré.

³³ —Pana baca neacue. Micuana micuana bahuedya Jerusalénju ique cuayaque. Neadebacue era cuejachineque IQUE ECUITA eje bucha judadiyaque era cuejahuaque. Pae cuanaja huaraji cuana queja, cacuatsashati bahuityaqui cuana queja jadya tunara inamereya. Tunara ique aya “Paiyetanadya” jadya. ³⁴ Israelita ama cuana queja tunara inamereya. Ijahue ijahue tunara aya. Ebi tsehue au, cat-sacatsa, ecuedira jadya tunara aya. Iyemereya tunara ique. Quimisha huecaca majutsu chacha netitsuranucaya, —jadya tuna Jesúsra acuare.

Santiago, Juan jadyara Jesús tsehue huaraji juishu bacuareque

(Mt 20.20-28)

³⁵ Tumetu Santiago, Juan, Zebedeoja ebacuaque ecatsera jipeticuare Jesús.

—Ecuana Bahuityaqui, nerecabacue yatse. Tyacue yatse, yatsera mique bacayaque, —jadya tatsejatu aticuare.

³⁶ —¿Ai tuque metse bijida baya?

³⁷ Mique dutya naruqui jutibuneyaque, yatse bacanishacue miatsehue enaruqui iyuca juishu. Emuita eanicuareju yatse iyabutyacue, peadya micue jida eque amaca, peya jani eque amaca jadya. Miatsehue muitapeedya yatse paju, —jadya tatsejatu acuare.

³⁸ —Metse metse baecua eje buchique metsera bacayaque. Ique dyaque canerecатиyaque tu patsedaque ebuijiu buchique. ¿Ique canerecатиya bucha canerecатie metse ejuudya? Yusura cuatsashaya eque juishu ecutsameretiu bucha; tumebaedya ique majuya Yusura cuatsashaya eque cuita juishu. ¿Ejuudya metse tura cuatsashaya eque? —jadya tatse Jesúsra acuare.

³⁹ —Eiduudya tuque yatsera, —jadya tatsejatu quemit-sacuare.

—Pusha amadya metse cuejaya. Canerecатibuquedya metse, ique canerecатиya bucha. Majubuquedya metse ique majuya bucha. ⁴⁰ Jadya ama bucha ecuetu aijama cueja ishу ejeque ecue jida eque amaca, jani eque amaca jadya iyabutya ishу, eatsehue enaruqui juishu. Yusura camadyatu mepebuque tuhua iyabutya ishу, —jadya tujatu ecatse acuare.

⁴¹ Umae tura mepehua cuanaquetu Santiago, Juan ecatsera bacayaque bacatsu cahuaicuare tatse tsehue. ⁴² Jesúsra tuna dutya tuaqueja ihuaracuare.

—Yahua juque huaraji cuanara tuna cuatsashaya, emechiquira cuatsashaya bucha. Casada cuanaratu jetiedya cuanaque casada tsehue cuatsashaya equedya amereya. ⁴³ Micuana micuana jadya jutaqui ama. Peya queja ni micuana camuimereticara juya, tunadya tuque micuanaja tsahuataqui. ⁴⁴ Ejeque micuana muitacara juyaque juatsu, necacasaticue peya cuana pureamatura ishu, micuana cuita camadya ama. ⁴⁵ Ique juya bae nejucue. Ique junahua riyaque yahuaju peya cuana tsahua ishu, tunaja ique tsahua ishu ama. Tuna jiteque maju ishu, eaqueja catyatihuaju tuna Ijahua quejaque inajacamere ishu ique junahua, —jadya tujatu ecana acuare.

Jesúsra shuhuique Bartimeo bacani capetatishacuareque
(Mt 20.29-34; Lc 18.35-43)

⁴⁶ Tuequedya tuna junaticuare Jericóju tura mepehua cuana tsehue. Tuhuaque cuinanayaratu Jesúsra badirucuare shuhuique ediji jiruru juaniyaju. Bartimeo bacanitu jucuare, Timeoja ebacuaque. Cuetiya cuanaque chipiru bacaanitu jucuare. ⁴⁷ Ejera cuanatu cuejacuare Jesús Nazaret juque cuetiyaque. Jadya bacatsutu quiquetibunecuare:

—¡Jesús, miquemi Yusuja Emepeque, David equé ejuracanaque! Nerecabacue taa ique, —jadya tujatu quique equé acuare.

⁴⁸ Umadaratu nereda datse acuare, tuque abacasha ishu. Tuque bacue jadya ayaju dyaque jebuda quiquecuare:

—¡Miquemi Yusuja Emepeque! ¡David equé ejuracanaque mique! ¡Nerecabacue taa ique! —jadyatu jebuda quiquecuare.

⁴⁹ Tuque juaniya tuyu junatitsutu Jesús netinaticuare. Cuatsashacuaretu tuhua cuanaque:

—Requeja nebecue shuhuique.

Tura jadya ayaju tunajatu ihuaracuare shuhuique:

—Cacasaticue. Netitsuracue. Ihuaraya tura mique, —jadya tunajatu aticuare.

⁵⁰ Tume tujatu caramati ishuque ijehuequenacuare. Nere netitsura juatsutu Jesús jipeticuare.

⁵¹ —¿Eje buchami eaqueja catimerecara juya? —jadyatu Jesúsra bacaduracuare.

—Ebahuityaqui, capetatishanucacue ique.

⁵² —Amenami capetatiya. Erami capetatishahua, mira era mique ecapetatishauque ejenehua tibu. Jida dirucue, —jadyatu Jesúsra acuare.

Tura jadya aya tsehuedya cuitatu capetaticuare. Tajiaje-cuaretu Jesús ediji eque.

11

Jesús Jerusalénju judirucuaque
(Mt 21.1-11; Lc 19.28-40; Jn 12.12-19)

¹Junaticuaretu Jesús tura mepehua cuana tsehue Jerusalén piji dyane. Emata baruda cuita ama Olivo Acui Quini bacaniju tuna junaticuare. Beta epu ecitse Betfagé, Betania jadya japadama tuna jucuare. Junatitsutu Jesúsra icueneta cuadisha acuare beta tura mepehuaque ecitse.

²—Ecuanaja yacua tuyu epu achaachaju necuacue. Tuhua junatitsu tuque metse banatiya burro erisique netiyaju, ni aija buchique isanimaque. Nepisuticue. Pisutsu ecue nebecue. ³Ejera ni metse aya: “¿Aishu tuque metse pisuya?”, “Ecuana Cuatsashaquiratu sareya. Masadama tujatu cuadishanucaya”, jadya neacue, —jadya tatse Jesúsra acuare.

⁴Tura jadya ahuaju tatse cuacuare. Banaticuare tatse burro isanimaque etsecueju erisique netiyaju. Banatitsu tatse pisucuare. ⁵Burro pisuyaju baatsu tatse tuhua cuanara bacaduracuare:

—¿Ai metse juya? ¿Aishu tuque metse burro pisuya? —jadya tunajatu ecitse acuare.

⁶Jadya tunara ayaju tatsejatu quemitsacuare Jesúsra cuejadadhua equedya:

—Ecuana Cuatsashaquira pari sareya. Masadama patujatu cuadishanucaya, —jadya tatsejatu ecana cuejacuare.

Tatsera jadya ayaju, tunajatu ecitse acuare:

—Jida. Nedujucue taa, —jadya tunajatu ecitse acuare.

⁷Pisutsu tatsejatu dujucuare burro Jesús queja. Judiriqueretsu tatsejatu tatsera jutuya tsehue titecuare. Tatsera bajeje amena ahuajutu Jesúsra isaanicuare. ⁸Jesúsra isaanihuaju tunajatu jetiama tuhua cuanara tunaja jutu ishucuanaque pijabarecuare edijiju, tuque muiyaque. Peya cuanaratu ejaqui cuana huanabarecuare edijiju, tuque muiyaque. ⁹Jesús icuene, tupuju jadya cuaya cuanaquetu quiquetibunecuare:

—¡Hosana! ¡Jida paju Yusuja ebacaniju jeyaque! ¹⁰¡Yusurami cuadishahua ecuana naruqui juishu, Davidra ecuanaja baba cuana naruhua bucha narue aishu! ¡Arida, dyaque casada jadyatu Yusu barepajuque! —jadya tuna jubarecuare quique eque.

¹¹Tuequedyatu Jesús junaticuare Jerusalénju. Junatitsutu nubinaticuare Yusuja etareju. Nubinatitsutu petanaticuare ai cuana dutya queja amaca. Petanati jadya aatsutu

cuinananucacuare. Dirunucacuare Betaniaju tura mepehua cuana tsehue, amena chinehua tibu.

Jesúsra higuera “Cacacatinucanime ama mique”, jadya acuareque

(Mt 21.18-19)

¹² Huecacape nuca Betania juque Jerusalénju dirunucayaquetu Jesús aracara jucuaré. ¹³ Japada equeratu badirucuaré acui higuera bacani. Jaquiqui tibutu ecaca sahuaqui cuana datse juquena jucuaré. Cacaqui ejuuque peta ishú tujatu petaticuaré. Baticuaré amatu ni peadya ecaca buchique ecuiju, ejaqui camadya, higo jahuane mara ama tibu. ¹⁴ Tumetu Jesúsra jadya acuare tumeque acui:

—¡Cacacatinucanime ama mique! Aranucanime ama tunaja tuque micue ecaca, —jadya tujatu acuare.

Tura mepehua cuanaratu tura jadya ayaju bacacuare.

Jesúsra catyati puji cuana Yusuja etare juque ijehuecuinatillacuareque

(Mt 21.12-17; Lc 19.45-48; Jn 2.13-22)

¹⁵ Jadya juu jadya juatsu tuna junaticuaré Jerusalénju. Junatitsutu nubinaticuaré Jesús Yusuja etareju. Nubit-sutu dyaque cahuitinaticuaré, tuhua eje bucha juyaque baatsu. Jadya tibudya tujatu ecana etsecueju pana ijehuecuinatilla acuare catyati puji cuana, bacabaca puji cuana jadya. Tipacatillacuare tujatu chipiru cuarequi juya cuanaja mesa cuana. Huei catyati juya cuanaja ani ishú cuanaquetu tumbaedyá tipacabarecuareduya.

¹⁶ —Etsecue cuana eque catyati ishú cuanaque necuetiquereume, —jadya tujatu ecana acuare.

¹⁷ Catyati juya cuanaque ijehuecuinatilla jadya aatsu tujatu cuejatibunecuaré ecuita cuana:

—Yusuja quisarati tu jadya ehúene: “‘Ecue etare tu dutya queja aniya cuanaque eatsehue quisarati ishúque etare bacani’ jadyatu Yusu beru jucuaré”. Jadya ama bucha tuque micuana chiri puji cuana catehua ishúque cani bucha jutidya amereya, —jadya tuna Jesúsra acuare.

¹⁸ Pae cuanaja huaraji cuanara, cacuatsashati bahuityaqui cuanara jadyatu tuque quisaratiyaju bacacuare. Cahuititsu tunajatu inime piritibunecuaré eje bucha iyee aishúque. Tunaratu tuque mubacuare, ecuita cuanara Jesús ijacabacaya baatsu, tuna ebaucuque.

¹⁹ Amena apunahuajutu Jesús dirunucacuare Jerusalénjuque.

Higuera acui raracuareque

(Mt 21.20-22)

²⁰ Huecacape nuca Jesús, tura mepehua cuanaque Jerusalénju dirunucaya tsunumee tunajatu petadirucuaire acui Jesúsra “Cacacatinucanime ama mique” jadya achineque. Pana maju tirita patu raracuare. ²¹ Petatitsutu Pedro huecatanacuare Jesúsra higueraja ishü quisarati achineque.

—Petacue higuera, Ecuana Bahuityaquiue. Acui mira riya barepa “Cacacatinucanime ama mique” jadya achinequeri pana raradya juchine, —jadyatu Pedrorra Jesús acuare.

²² Jesúsra tuna cuejacuare:

—Yusu queja micuana pana catyati neri jutaqui. ²³ Yuneridya ni micuana ejeneya era ecue casa tyahuaque, ejenecara ejenecarama jadya ama ni micuana eau, tumbaedyatu micuanara amereya equedya ejuu, arepa ai ibedaque paju ama bucha. Riyaque uhua cuemusu micuana eau: “Anisicuacue tuhuaque. Cueri cuanaja ecuaqueju pacacacue”. Amereya equedyatu ejuu. ²⁴ Jutaquijudya micuana cuejaya. Yusu tsehue quisaratiyaque, ai ni micuana ebacau, tyayadya tura micuana, ejenecara ejenecarama jadya ayaque ama juatsu. ²⁵ Yusu tsehue quisaratima jarira nenerecabacue peya cuanara jidama ahuaque. Nenerecabacue ecana, Yusura dyadi micuana cuitadya jidama juhuaque apupasha ishü. ²⁶ Micuanara ni peya nerecabaya ama, tume tuque micuanaja Tata barepajura dyadi apupashaya amadya micuanaja jucha cuana, —jadya tujatu ecana acuare.

¿Airatu Jesús cuatsashacuare tura aya cuanaque aishu?
(Mt 21.23-27; Lc 20.1-8)

²⁷ Jerusalénju tuna yudijidya judirunuca jucuare. Yusuja etare queja juneniyajutu pae cuanaja huaraji cuanara, cacuatsashati bahuityaqui cuanara, israelita cuana emuiba cuanara jadya jipeticuare. ²⁸ Jipetitsu tunajatu bacaduracuare:

—¿Airami ejeque ecuitaja ataquique ama aishu cuatsashahua? ¿Aija casa tsehue tuquemi jadya aya? —jadya tunajatu acuare Jesús.

²⁹ Jesúsra tuna quemitsacuare:

—Era micuana tumbaedyä bacaduraya. Quemitsaya ni micuanara ique, tume micuana cuejaya aira cuatsashahuaju era riya cuanaque ayaque. ³⁰ ¿Airatu Juan cuatsashacuare ecuita cuana utsa ishü? ¿Yusura, ecuita cuanara ni taa? Nequemitsacue ique, —jadya tuna Jesúsra bacaduracuare.

³¹ Tume tuna, tuna cama quisaraticuare:

—¿Eje bucha tuque ecuana equemitsau? “Yusuradyatu cuatsashacuare”, jadya ni ecuana eau, tume tura ecuana ebacadurau: “¿Eje bucha juatsu jatsu tuque micuana Juanra

cuejacuareque ejenecuare ama?” jadya tura ecuana eau.
³² “Ecuita cuanaja ecuadishaquedya jutidyatu jucuaré”,
 jadya ni ecuana eau, tumetu dutya jujeri ecuita cuana
 ecahuaitiu ecuana tsehue”, jadya tuna cacuejatibarecuare.

Bahuedya tuna jucuaré, dutya jujeri ecuita cuanara,
 Juan Yusu equeque quisarati cuejaqui jucuaréque ade-
 bacuareque. ³³ Ecuita cuana mubatsu tunajatu Jesús quemit-
 sacarama acuare. Chamacama tunajatu quemitsacuare:

—Baecua ecuana aira Juan ecuita cuana utsa ishü cuat-
 sashacuareque, —jadya tunajatu Jesús acuare.

—Jutaquiju micuana era cuejaya amadya aira ique ecuitaja
 ataquique ama aishu ique cuatsashahuaque, —jadya tuna
 Jesúsra acuare.

12

*Mere puji jidama cuanaque cuatsabiji eque bahuity-
 acuareque*

(Mt 21.33-46; Lc 20.9-19)

¹ Jadya juatsutu Jesús catibutinucacuare ecuita cuana
 bahuitya. Ryaque cuatsabiji tujatu ecana cuejacuare, tuna
 bahuityayaque.

—Peadya ecuitajatu tee aridaque anicuare. Tee aatsutu
 uva uhuamerecuare. Taracanemerecuare tura. Amere-
 cuaretu uva jahuanehuaju pitutsu nacaca tisi ishüque.
 Amerecuaretu etare piji barudaque, tueque tsuratsu, dutya
 queja naru ishü. Umae ecuita cuana queja tujatu tee
 narumerecuare. Tura tuna acuare: “Micuanara ni ecue
 tee naruya, tume ecuana uva jahuanehuaju cajuquetiya
 micuana tsehue”. Tuna tuna endya jucuaré. Tume cua-
 naque bajejetsutu emechiqui cuacuare japada peya yahuaju.

² Uva jahuane mara juetihuaju tujatu tuque merequique
 cuadishacuare tee naruqui cuana queja. “Cuacue ecue
 teeju mere juya cuana queja. Cuejaticue ecana; pacuadisha
 tuna ecue ishüque uva epituque”, jadya tujatu acuare.

³ Jadya ahujutu cuacuare. Jutihujutu tee naruqui cua-
 nara inatsacuare. Mirimiri tunajatu atsacuare. Mema tuna
 cuadishacuare, ni peadya uva caca tsehue. ⁴ Jadya juhua
 baatsutu emechiquira cuadishanucacuare peya tuja mere
 puji. Tumeque tunajatu ijahue ijahue, ujeta, ujeta jadya at-
 sacuare. Puucuaré tuna iyucaju. ⁵ Tuequedyatu emechiquira
 cuadishanucacuare peya mere puji nuca. Tumeque tu-
 najatu iyetsacuare. Jadya juatsutu umada peya cuana
 cuadishacuare. Umae tuna miririshatsacuare. Peya cuana
 bacue tuna iyetsabarecuare.

⁶ “Amena aijama jucuaré mere puji cuana cuadisha
 ishü. Peadya cuita camadya tuhua jucuaré tuja peadyaque

ebacuaque iyuhuedaque. Datse juatsu tujatu ebacuaque neri cuadishacuare. ‘Riyaque renajari eje bucha ama atsaya. Ecue ebacua neri tibu, tunajatu muibatsaya’ jadya datse tujatu inime jucuare. ⁷ Ebacuaquera jipeajeyajutu tee naruqui cuanaque jadya jucuare tuna cama: ‘Riyaquedya ri tee metseja ebacuaque neri. Eje tupu etataque majuhujari riyaquedya tee metse judadiya. Neiyetsara. Ecuandya emechiqui nejura’ jadya tuna jucuare. ⁸ Inatsacuare tunara. Inatsatsu tunajatu iyecuare. Iyetsu tunajatu emajuque ijehueticuare tee tibene. Jadyatu tee naruqui cuanaque jucuare, —jadya tuna Jesúsra cuejacuare.

⁹ Tume tuna Jesúsra bacaduracuare tuque quisaratiyaju bacaqui cuanaque:

—¿Eje buchatu anabuque tee naruqui cuanaque emechiquira? Era micuana cuejaya. Juetitsu tujatu iyemerenuquedya tee naruqui cuanaque. Peyadya tujatu mere puji cuana sarenabuque tee naru ishu.

¹⁰ “Neadebacue riyaque Yusuja quisarati ehuenegue. Adebayadya tuque era micuanaja riyaque quisarati eje uma isara eaque:

‘Tumu ebari etare puji cuanara tsumecarama acuaquetu tumu dyaque saretanayaque judadicuare.

¹¹ Ecuana Cuatsashaquiratu dyaque saretanayaque amerecuare.

Riyaque jadya baatsu, ecuana dyaque pureama juya’ jadya tu ehue.

¹² Riyaque cuatsabiji bacatsutu israelita cuanaja huaraji cuana dyaque cahuaiticuare, tunara cuitadya Jesús bjidamadurahuaque caadebatitsu, mere puji cuanara tee metseja ebacuaque bjidamadurahua bucha. Eje buchadya iycara datse tunajatu acuare. Jadya ama bucha “Iyacia ni ecuana einau, ecuita cuanatu ecuana tsehue ecahuaitiu”, jadya tunajatu inime jucuare. Ecuita cuana mubatsu tunajatu Jesús inacuare ama tumeque ura cuitadya. Shanaque-nacuare jutidya tunaja tuque.

Yusu tuja ishuguayedya tyataquique

(Mt 22.15-22; Lc 20.20-26)

¹³ Israelita cuanaja huaraji cuanaratu cuadishacuare fariseo cuana, Herodes tsehue junenicuare cuanaque jadya Jesús queja.

—Jidama nequisaratishara, huaraji cuana queja duju ishu, —jadya tuna jucuare.

¹⁴ Tume cuadishahua cuanaratu jadya anaticuare:

—Ebahuityaquique, ecuana ecuana bahue mique jida, tuyuque. Miratu bahuityaya Yusuja inime eque ani ishuyue, ni ejeque buchique mubatsu ama. Micue ishutu ecuita cuana

dutya tupu. Jadya tibudya ecuana cuejacue. ¿Ecuanaja cacuatsashati eque, tuque ecuanaja ecuana naruquique Roma juque tsujetyataqui, tsujetyataqui ama ni taa? Tura ecuana tsuje tyamereyaju, ¿tsujetyataquidya tuque ecuanaja, aijama ni taa? —jadya tunajatu Jesús aticuare.

¹⁵ Jesusratu adebacuarenya tunara jidama inime tupuya tsehue jadya bacaduratiyaque.

—Micuanara ijahue acara aya jadya cabacadurati tsehue, babi pujira armadilla nityatsu ai cuanubi eamereu bucha. Nequeticue ficha enaruquija chipiru tuque tsujetya ishuque. Papeta era, —jadya tujatu ecana acuare.

¹⁶Jadya ahuaju tunajatu queticuare peadya ficha “denario” bacani, Roma juque enaruquique tsuje tyaishuque chipiru. Petatsu tuna Jesúsra bacaduracuare:

—¿Aija ebutsequini ri riyaque fichaju eiya? ¿Aija ebacani ri rehua ehue?

—Enaruquique muidaque César bacani jaque tume, —jadya tunajatu quemitsacuare.

¹⁷ —Jutaquiju netyacue enaruqui César tuque tyaishuquedya. Yusu netyacue Yusuja ishuquedya, —jadya tuna Jesúsra acuare.

Anajacatacuare tuna tuque jadya caquemitsatiyaju batsu.

Emaju cuanaque netitsuradadinucabuqueque

(Mt 22.23-33; Lc 20.27-40)

¹⁸ Tumeque huecaca nucadyatu saduceo cuanara Jesús baticuare. Tunaradyatu ejenecuare ama emaju cuanaque netitsuranucayaque. Junatitsu tunajatu Jesús isaranaticuare:

¹⁹ —Ebahuityaquique, Moisésra taa tu riyaque cuatsashacuare. “Ejeque ecuita ni majuya cabacuatimaque, tuatsehuequiquetu caquemitinucataqui eahuemaju tsehue, tuatsehue cabacuati ishu, icueneque ebacua emajuja ebacuaque bucha ishu”, jadyatu Moisésra cacuatsashati hueneacuare béru.

²⁰ Riyaque cuatsabiji mique ecuana aya; ijariba ishuque jutidya tu ecuita emajuque chacha netitsuranucaya jadique. Anicuairetu ecuitaja pacarucu ebacuaque. Icueneque ebacuaquetu caquemiticuare. Huanequi juu jadya juatsutu majucuare bacuamaque.

²¹ Majuhuajutu ejuque beta ishuque caquemitinucacuare eahuemaju tsehue. Beta ishuque tumbaedyu majunucacuarenya bacuamaque. Quimisha ishuque ejuquetu caquemitinucacuare eahuemaju tsehue. Tumbaedyatu junucacuare. Bacuamaquedyatu majunucacuare bacuamaque tere.

²² Jadya ecana jubarecuare; pacarucudyatu tumeque epuna tsehue cama

ecana caquemititsu majuetibecuare. Tumeque nerecadaque epunatu pacarucu ahuee juhuaque majucualedya, yahue cuanaque majuterehuaju. Jadya tuna jucuaire.

²³ “Ecuánarami bacaduraya riyaque. Yuneridya ni majuya cuanaque chacha netitsuranucabuque, ¿ejeja ehuanequetu jubuque chacha netitsuranucatsu, riyaque yahuaju tuque pacarucu ahuee juhua tibu? —jadya tunajatu Jesús bacaduracuare.

²⁴ Jesúsra tuna quemitsacuare:

—Micuana micuana cuji juya. Micuanaratu adebaya ama Yusuja quisarati ehuenequé, ni Yusura eauque. ²⁵ Emaju cuanaque netitsuranucatsu tuna caquemitinucabuque ama. Barepaju Yusu tsahuaqui cuanaque tuna caquemiti bae-cua. Jadidya tu emaju cuanaque; netitsuratsu tuna caquemitibuque amadya. ²⁶ Yuneridyatu emaju cuanaque chacha netitsuranucabuque. Pusha ama cuitadya tuque micuana eje uma isara ahua Moisésra huenecuareque, acui huija jujuyaque murutayaque ama tura huenecuareque. Yusratu Moisés acuare: “Ique Yusu, Abraham, Isaac, Jacob jadyara iyacua muiyaque”. Chacha cuanara cuita camadya Yusu emui tibu, yuneridyatu Abraham, Isaac, Jacob jadya ecana enetitsura. ²⁷ Yusu tu chacha cuanara muiyaque, emaju cuanara ama. Micuana micuana pana cuji eju emaju cuanaque chacha netitsuranucaya ama jadique ejeneya tibu, —jadya tuna Jesúsra acuare.

Ejeque cacuatsashatira cuatsashaya eque cuita ecuana jutaquique

(Mt 22.34-40; Lc 10.27)

²⁸ Tuhuadyatu cacuatsashati bahuityaquique jucuaire. Tura tuna quisaratiyaju bacacuare. Adebacuaredya tura Jesúsra saduceo cuana jida quemitsahuaque. Tumetu tura Jesús isaratsu bacaduracuare:

—Ebhauityaquique, aniyatu jetiama cacuatsashati cuana ecuanaja cacuatsashatiju ehuenequé. ¿Ejeque cacuatsashatira cuatsashaya eque cuita ecuana jutaqui?

²⁹ Jesusratu quemitsacuare:

—Ehuene tu Yusuja quisarati: “Nebacacue ique, micuana Israel eque ejuracana cuanara. Ecuana Cuatsashaquique tu Yusu; tuque peadya camadya tu Ecuana Cuatsashaquique. ³⁰ Iyuhueda bacue ducuta Yusu Mique Cuatsashaquique. Yusu iyuhueda bacue ducuta; dutya micue cabijiseriti tsehue Yusu pureamaturacue, dutya micue inime tupu tsehue, dutya micue casa tsehue.” Riyaque cacuatsashatira cuatsashaya eque cuita micuana jutaqui. ³¹ Riyaque ri beta ishucue: “Iyuhue tsehue bacue peya cuana; mique cuitadya iyuhueda

cabatiya bucha iyuhuee peya bacue”. Jeeque cacuatsashati ecatsera cuatsashaya eqe cuita micuana jutaqui. Aijamatu peya cacuatsashati dyaque inime metseque, —jadyatu Jesúsra acuare.

³² Jadya cuejayaju bacatsutu cacuatsashati bahuityaquira acuare:

—Jidadya tuquemi cuejaya, Ebahuityaquique. Yusu tu Ecuana Cuatsashaquique peadyaque. Aijamatu peya Yusu, tuque cuita camadya. Mira quisarati ahuaque tu yuneridya. ³³ Yusu tuque ecuanaja ducuta iyuhueda bataqui. Dutya ecuanaja inime tupu tsehue tuque ecuanaja iyuhueda bataqui, ecuanaja casa tsehue jadya. Tumbaedy a yuneridya tuque ecuanaja peya cuana iyuhueda bataqui; ecuan a cuitadya iyuhueda cabatiya bucha iyuhuee tuque ecuanaja peya bataqui. Yusu, peya cuana jadya ni ecuan a iyuhueda baya, tuquetu dyaque pureama juya, ecuanara uu cuana, jadya ama juatsu peya ai tuque tyayaju pureama juya bucha ama, —jadya tujatu acuare.

³⁴ Tumetu Jesúsra tura jida inime tupu tsehue quemit-sahuaque adebatsu jadya acuare:

—Miratu amena adebatibuneya Yusu eje bucha purea-matura aishuque. Masadama ni mi tujaque ejudadiu, —jadyatu Jesúsra acuare.

Dutya riya cuanaque bacatsutu ni ejeradya jutidya bacadu-ranucacuare ama.

*Mesías tu ecuita camadya ama, ecuita cuana dyaque inime-
quique*

(Mt 22.41-46; Lc 20.41-44)

³⁵ Jesús tuhua Yusuja etareju bahuitya bahuityaya jarira tujatu tuque quisaratiyaju bacaqui cuanaque jadya acuare:

—Cacuatsashati cuana bahuityaqui cuanaque tuna juya “Mesías, Yusuja Emepequetu ejeque ecuita baedya jutidya judadibuque, David eqe ejuracanaque jubuque tibu”. Cuejaya micuana era. ³⁶ David cuitadyatu bahue jucuar e Mesías ecuita camadya ama jubuqueque, ecuita cuana bucha dyaque inimequique, Yusuja Espirituradya jadya huene-merecuare tibu:

“Yusuratu Ique Cuatsashaquique jadya cuejacuare:

‘Anibutecue ecue jida eqe amaca muita ishu, era mique ujeu baqui cuanaque dutya ijahue atillaya tupu, Ique Cuatsashaquique’ ”

jadya.

³⁷ “Davidradyatu Mesías ‘Ique Cuatsashaquique’ jadya acuare, arepa tueque ejuracanaque ama bucha. Yuneri cuitadyatu Mesías ecuita jutidya ama ejuu; ecuita cuana

bucha dyaque inimequiquedy a tume, —jadya tujatu ecana acuare.

Jesús quisaratijajutu jetiama ecuitara pureama tsehue bacuare.

Jesúsra cacuatsashati bahuityaqui cuanaque jidama juyaque ejitaju acuareque

(Mt 23.1-36; Lc 11.37-54; 20.45-47)

³⁸ Jesúsra tuna bahuityanucacuare:

—Necanaruticue cacuatsashati bahuityaqui cuana tsehue. Tuna aniya bae neaniume. Tunaratu una junudaque jutuya, peya cuana queja Yusu adebaqui jadya cabamereti ishú datse. Epu patya eque cuetiyaju tuna dyaque muida tsehue isaratacara juya. ³⁹ Caradati ishúque etareju cuaatsu tuna muida cuanaque anibahueju anibutetiya. Chine cuana ishú araratayaju cuaatsu tuna emuita cuanaja eaniqui cuanaju cama tuna eaniqui metsene juya. ⁴⁰ Arepa ecana eahuemaju cuanaque tsahuaya bucha cabatiya ama bucha, yuneri cuitadya tunajatu eahuemaju nrecada cuanaque tunaja ai aniya cuanaque secatillaya, tuna tunaja etare juque cuitadya ijehuecuinaya tupu. Yusu tsehue quisaratiyaque tuna tsunuda quisarati bahue dutyaja ijacaju, tuna queja “Yusu adebaqui cuita rena”, jadya catimere ishú datse. Yusura tuna dyaque nrecaturabuque, —jadya tuna Jesúsra acuare.

Eahuemaju nrecadara chipiru Yusuja ishú iyacuareque
(Lc 21.1-4)

⁴¹ Jesúsra Yusuja etareju anibutecuaré ecuita cuanara Yusuja ishú chipiru iyaya tuyu. Petacuare tujatu umada ecuita cuanara chipiru isháyaju. Jetiama chipiruda cuanaque tuna cueticuare tueque jetiama chipiru ishú juyaque. ⁴² Tuequedyatu eahuemaju nrecadaque junaticuare. Tumeque epunaratú ishaticuare cajúju beta ficha piji cobre eaque, tsuje aridaque ama, ai tsujequi cuitaque ama. ⁴³ Baatsutu Jesúsra acuare tura mepehua cuanaque:

—Pusha amadya micuana cuejaya. Yusuratu dyaque tsuje arida baya epuna nrecada eahuemajura ishahuaque, chipiruda cuanara jetiama ishahuaque bucha ama. ⁴⁴ Tunaratu ishahua tunaja anidadiyaque jutidya. Jeeque epuna nrecadara taa tyatillahua tuja dutya aniyaque piji, tuja ai caquemiti ishú ejuuque, —jadya tujatu ecana acuare.

13

Jesús “Yusuja etaretu pana rihuishatana jubuque” jadya jucuaque

(Mt 24.1-2; Lc 21.5-6)

¹ Jesús Yusuja etare juque cuinanayajutu peadya tura mepehuara jadya acuare:

—¡Ecuana Bahuityaquique, petacue! Dyaque jida piji taa Yusuja etare, tumbaedy a dutya ai ea cuanaque etare tsecue cuanaju, —jadya tujatu acuare.

² —Pusha amadya. Jida pijidya tuquemi petaya. Jadya ama buchatu Yusuja etare, etsecueju dutya ai ea cuanaque pana rihuishatanatere jubuque. Anibuque amatu tumu ecadyaqueti. Dutya tumu etare enityatsuraquetu yahuaju tere jubuque, —jadyatu Jesúsra cuejacuare.

Terehuie adeba ishuque jubuqueque

(Mt 24.3-28; Lc 21.7-24; 17.22-24)

³ Jadya juatsu tuna cuanucacuare uhua cuemusú Olivo Acuí Quini bacaniju. Tumeque uhua cuemusutu Yusuja etare tuyu jucuare. Aninaticuaretu Jesús. Anibutehuajutu Pedro, Santiago, Juan, Andrés ecanara jipeticuare. Jipetsu tunajatu bacaduracuare:

⁴ —Cuejacue ecuana. ¿Eje tuputu jadya judadiya? ¿Aiju ecuana caadebatibuque yahua tereyaque huecaca japadamaque? —jadya tunajatu Jesús bacaduracuare.

⁵ —Nimequi tsehue nequihuaticue. Ijahue neca-timereume. ⁶ Ique junanucahuie tuna jetiama junabuque iquepa ejuu jadya juya cuanaque. “Ique Mesías, Yusuja Emepeque”, jadya tuna jetiama junabuque. Jetiamara tuna ejenebuque. Ijahue tuna atabuque. ⁷ Dutya quejaquedya jutidya tuna catibuque. Japadama tuque micuana ecana catiyaju bacabuque. Tumbaedy tuque micuana ecana japadapa catiya jadya bacabuque. Jadya bacatsu “Masadamatu tere juetiya”, jadya micuanaja inime paju ama. Dutya tume cuanaquetu jadya jubuque icuene. Tere ishuque ama jari tume. ⁸ Ryaque yahuaju cuanaque tuna peya yahuaju cuana tsehue catibuque. Anape cuanaquetu catibuque peya anae cuana tsehue. Bucucubuquetu yahua dutya queja. Eje uma epu cuanaju tuna dyaque mije jubuque. Jadya cuana judadiyaquetu canerecati catibutiyaque jutidya. Ecue cuanaque tuna dyaque canerecatibuque.

⁹ “Necanaruticue bacue micuana. Micuana ujeu baqui cuanara micuana jahue jahue abuque eaqueja ecatyati baatsu. Inatsu tunara micuana huaraji cuana queja du-jubuque. Abuque tunara micuana caradati ishuque etare cuanaju. Dujubuque tunara micuana enaruqui cuanaja yacuaju, ecuari cuanaja yacuaju eaqueja ecatyati baatsu. Tume tuque micuanaja emajaca anibuque ique eje buchique tuna queja ishu. ¹⁰ Dutya terema jarijudyatu ecue quisarati jidaque dutya queja cuejatanabuque. ¹¹ Huaraji cuanaja

yacuaju dujutanayaju jidama inime nebaume quicueneti ishhu quisarati aishu. Quisarati ishunque ura juetihuaaju, Yusura huecashaya eque nequisaraticue, Yusuja Espíritu micuana eque quisaratiya tibu. ¹² Ecue cuanaque tuna tunaja etareju cuanara cuitadya ijahue ijahue abunque. Iyemere ishhu tunajatu huaraji cuana queja inamerebuque. Etata cuanaquera tuna ebacua cuanaque cuitadya inamerebuque, ebacua cuanaquera bacue etata cuanaque. ¹³ Dutya jujerira micuana ujeu babunque, eaqueja ecatyati baatsu. Ejeque tereya tupu eatsehue nime aputayaque ama camadyatu Yusu queja judirubunque ni eje tupu tuque jacanuca ishhu ama, — jadya tunaa Jesúsra cuejacuare.

¹⁴ Jesúsra tuna cuejanucacuare:

— Ejitajutu dyaque jidama cuitaque judadibuque “Ecuita Cuana Bajituraquique” bacani. Eju tuque anitaquiju amatu anibuque. Yusuja etarejutu ejitaju jubunque. Tumequepa amena juetihua jadya bacatsutu Yusuja quisarati ehuenegue pana adeba aya cuanara adebabunque masadama eje bucha judadiyaque. Ecuita Cuana Bajituraquique Jerusalénju juetihua jadya baatsutu Judea yahuaju cuanaque huanataqui emata cuanaju catehua juishu. ¹⁵ Muya jutidyatu Ecuita Cuana Bajituraquique juetibuque. Jadya tibudya tuna etare ebarucue ecamahua jepeda cuana juque ai inaque-nama butetaqui huana ishhu. ¹⁶ Teeju mere juya cuanaque tuna judirunucataqui ama tunaja etareju. Tuequedya tuna huanataqui. Nubitinucataqui ama tuna tunaja caramati ishunque jiteque. ¹⁷ Dyaque nerecadatu jubunque epuna maqui cuanaque, bacua nanaqui cuanaque jadya. Tuna tuna eje bucha huanataqui ama ebajarara cabatibuque. ¹⁸ Nebacabacacue Yusu queja, micuana huanayaque huecaca cuejipa, nei micuana huanayaque huecaca ejuetiuju. ¹⁹ Ecuita Cuana Bajituraquique ejitaju juhuajutu dyaque canerecati ishunque anibuque. Ni eje tuputu jadya canerecati anihua ama Yusura yahua iyahua equeque tumeque huecaca judadibuque bucha. Ecuita Cuana Bajituraquique ijehuetanahuajutu aninucabuque ama jadique canerecati ni eje tupu. ²⁰ Dyaquetu Yusura iyuhueda baya tuja cuanaque, tura mepehua cuanaque. Jadya tibudyatu Yusura tumeque huecaca canerecati ishunque jununashabuque ama. Tura ni jadya ama eau, ni aira buchiquetu eiduu ama; ni ejequetu chacha ejuu ama.

²¹ “Aira cuejatsu ama micuana ique junanucaguaque bahue jubunque. Jadya tibudya ejera ‘Mesiastu junanucagua. Ecuanaja epujudya rique’ jadya ayaju, neejeneume. Ejera ni micuana aya: ‘Mesiastu junanucagua. Peya epuju

tuque' neejeneume. ²² Tume cuanaque huecaca juetihuaju tuna jetiama pusha pusha jubuque: 'Ique Mesías, Yusuja Emepeque' jadya ama juatsu 'Ique Yusuja quisarati cueja ishunque cuita camadya' jadya. Abuque tunajatu inimeradya jutidya ecuitaja ataquique ama. Eje uma tunajatu ecana ijahue abuque. Dutya tunajatu ecana cujishabuque. Yusuja cuanaque neri neri tunajatu ijahue acara ebari abuque. ²³ Necanaruticue. Icuenetadya micuana cuejehua riyaque, micuana ijahue eatauju, —jadya tuna Jesúsra acuare.

ECUITA junanucayaju eje bucha jubuqueque

(Mt 24.29-35, 42-44; Lc 21.25-36)

²⁴ Jesúsra tuna bahuityanucacuare:

—Masadama huecaca cuana nerecada ishunque cuetiajeyaju cuitadyatu ijeti apunabuque. Badiu huecadama jubuque. ²⁵ Purari cuanatu barepa juque pacacabuque. Barepaju casada aniya cuanaque tuna piririterebuque. ²⁶ Tuequedya tunara IQUE ECUITA huani ducu junanucayaju batsabuque. Ecue dyaque casa tsehue junanucabuque. Cabameretibuque ique eje bucha muitaegue. ²⁷ Cuadishabuque tuque barepaju ique tsahuaqui cuanaque, ecue cuanaque dutya yahua queja aniya cuanaque sita ishü.

²⁸ "Anibuquetu ique masadama junanucayaque adeba ishunque, masadama nei mara catibutinucayaque adeba ishunque aniya bucha. Ita taa acui higuera bacani neadebacue. Yaa cuana catapananatiyaju baatsu, micuana bahue amena nei mara catibutiyaque. ²⁹ Tumebaedya micuana dutya riya cuanaque era cuejehua cuanaque juajeya baatsu, bahuedya micuana jubuque yahua amena terehuieque. ³⁰ Pusha amadya micuana cuejaya. Dutya riya cuanaquetu judadibuque iyacua ecuita cuana aniyaque majuma jarijudya. ³¹ Arepa barepa, yahua jadya pana cuaretana jubuque ama bucha, dutya micuana era cuejehua cuanaquetu cuaretanatsu ama jadya judadibuque.

³² "Yusu ecue Etata peadya camadyatu bahue ejeque huecaca ique junanucayaque. Tuque peadya camadyatu bahue huecadaju ni, jadya ama juatsu meta eje tupu ique junanucayaque. Ni ejeque ecuitaratu adebaya ama. Ni ejeque barepaju Yusu tsahuaquiratu adebaya ama. Arepa ique Yusuja Ebacuaque ama bucha, eratu adebaya amadya.

³³ "Jadya tibudya nequihuaticue. Neihuaajacame ique junanucayaque, ai micuana bahue batune eje tupu ique junanucayaque. ³⁴ Ique ecuita eje queja cuayaque ejeque huecaca juetinucayaque cacuejatima cuau ejuu buchique. Cuama jariratu tumeque ecuitara aya tuja mere puji cuana:

‘Nenarucue ecue aniya cuanaque’. Cuejabareyatu ecana peadya peadya tuque juneniya tupu tura amerecara ayaque. Cuejamereyatu etsecue naruquique: ‘Quihuatijacaume bacue ejeque uradya jutidya ique juetinucayaju etsecue pacasha ishu’. ³⁵ Canarutijacataqui ama, mere jadya tuna jutaqui ejeque huecaca etare metseque juetiyaque baecua tibu. Ejuetiutu apupuyaju, jadya ama juatsu barepatya, jadya ama juatsu tacure quiqueyaju, jadya ama juatsu apudajudya. Tumbaedy a micuanara ique junanucayaque neihuajacaume. ³⁶ Ique muya jutidya junanucabuque. Neajacaume bacue era micuana amerequenayaque. Ecabatique bucha nejucue. ³⁷ Micuana amereyaque tumbaedy tuque amereya dutya: ‘Neihuajacaume ique junanucayaque. Ecabatique bucha nejucue’ —jadya tuna Jesúsra acuare.

14

Jesús ujeu baqui cuanara tuque inamere ishu inime bajeje-cuareque

(Mt 26.1-5; Lc 22.1-2; Jn 11.45-53)

¹ Beta huecacatu bataqui ama jucuaire Pascua chine, ecuanaja baba cuana Egipto juque cuinanacuareque adeba ishuque, pan levaduramaque ecuanaja ara bahueque. Pae cuanaja huaraji cuanara, cacuatsashati bahuityaqui cuanara jadyatu Jesús iye ishu, tseta inamere aishu sarecuare.

²—Neinamerera ama Pascua chine ishu cuita, ecuita cuana ecapuritishau tibu, —jadya tuna jucuaire.

Epunara Jesúsja iyucaju etseri ijimedaque juracuareque

(Mt 26.6-13; Jn 12.1-8)

³ Jesús tu Betaniaju jucuaire Simónja etareju. Icuenu tu tumeque ecuita erami ririshaqui ujeje tsehue jucuaire. Jadya tibudya tunajatu “Leproso” jadya isarae acuare. Chineju ararayajutu Jesús epunara jipeticuare botilla caca alabastro eaque ina jadya. Tumeque botilla cacatu etseri ijimeda tsehue ejequeshaque jucuaire, dyaque tsuje aridaque, “nardo” bacani. Pucucuare tujatu botilla cacaja etumuqui. Pucutsu tujatu etseri ijimedaque juraticuare Jesúsja iyucaju. ⁴ Epunara jadya aya baatsutu umae tuhua cuanaque cahuaicuaire:

—Nepetacue tura etseri dyaque tsuje aridaque ijehueneyaju. Ni aishu buchique tu jida ama jadya ijehuenetsu. ⁵ Catyati ni tu aquena juhua etseri ijimedaque, umada tujatu chipiru inaquena juhua, quimisha ciento ficha dyaque cuitadya, peadya mara mere juatsu etsujequi einau

tupu. Jetiamatu nerecada cuanaque etsahuaque chipiru inatsu, —jadya tuna jucuare.

Sicacada ecana epunaja ishu quisaraticuare.

⁶Tuna quisaratiyaju bacatsu tuna Jesúsra acuare:

—Jadya neaume. ¿Eje bucha juatsu jatsu tuque micuana tumeque quisarati tsehue aya? Tura ique jadya ahuaquetu dyaque jidaque. ⁷Micuana ducutu jujacaya amadya nerecada cuanaque. Aijama amadya tuque micuanaja emajaca juya tuna micuanaja ai aniyaque tyaishu, ique bacue aijama. Ique micuana tsehue junenisiriya ama. ⁸Riyaque epunaratu ahua tuja ecue ishu ataquique. Ique iyetahuaju papata ishuque tura jadya ahua. ⁹Pusha amadya micuana cuejaya. Riyaque epunara jadya ahuaque tuna dutya yahuaju bahue jubuque, eju ecue quisarati jidaque cuejatanayaju, ecuita cuanaja tuque adeba ishu, —jadya tuna Jesúsra acuare.

Judasra Jesús inamere ishu inime bajejecuareque

(Mt 26.14-16; Lc 22.3-6)

¹⁰Tumetu Judas Iscariote, Jesúsra mepehuaque, cuacuare pae cuanaja huaraji cuana queja. Bajejeticuaretu inime tuna queja eje bucha inamere Jesús aishuque. ¹¹Tura jadya quisarati ayaju bacatsu tuna pureama jucuare.

—Mira ecuana Jesús menajetyahuaju, mique ecuana chipiru tsehue tsujetyaya, —jadya tunajatu acuare.

Tumeque huecaca equeratu Judasra Jesús eje bucha inameree aishuque sarecuare.

Jesúsra Pascua earaqui tura mepehua cuana tsehue aracuareque

(Mt 26.17-25; Lc 22.7-18; Jn 13.21-30)

¹²Jueticuaretu icueneque huecaca Pascua chine ecuana pan levaduramaque, uhuisha jidaque iyetsu jadya ara bahueque huecaca. Tumeque huecacatu Jesúsra mepehua cuanara Jesús jipetitsu bacaduracuare:

—¿Ejumi bajejemerecara aya riyaque chineju Pascua ishu araara ishu? —jadya tunajatu aticuare.

¹³Tunara jadya atihuaju tujatu cuadishacuare beta tura mepehuaque ecatse. Tatse cuama jariju tujatu ecatse acuare:

—Jerusalénju nebajejeticue. Necuacue. Tuhua junatitsu tuque metse tsuruya ecuita suraju ena duju juyaque. Tudyá netupuajecue. ¹⁴Tupujudya aajetsu, ejeque etareju tuque nubidiruyaju baatsu, tuhuadya nenubicue. Etare metseque jadya neaticue: “Ecuana Bahuityaquiramí bacaduramereya: ‘¿Eje dyanepa micue etareju emajaca, tuque tura mepehua cuana tsehue Pascua ishu araara ishu?’ ” jadya nebacaduraticue. ¹⁵Metsera jadya ayaju tura metse bamereya tuja

etareju emajaca aridaque beta ishuque pisoju. Tuhuadyatu aniya dutya ecuanara sareyaque. Tuhuadya nebajejecue ara ishuque, —jadya tatse Jesúsra acuare.

¹⁶ Jadya ahuaju tatse cuacuare. Junaticuare ecatsé epu ebariju. Junatihuaajutu jucuare dutya tatse Jesúsra cuejadadihua bae cuitadya. Tumeque ecuita tsurutsu, etare cuejahuaju cuaatsu, tatsejatu earaqui bajejeticuare Pascua juyaque chineju ara ishuque.

¹⁷ Amena apunahuajutu Jesús junaticuare tura mepehua cuana tsehue. ¹⁸ Amena mesaju ararayara tuna Jesúsra jadya acuare:

—Peadyara micuanara ique ujeu baqui cuana queja inamereya, peadya eatsehue ararayara, —jadya tujatu ecana acuare.

¹⁹ Jadya ayaju tuna peya inime jucuare. Peadya peadyara tunajatu bacadurabarecuare:

—¿Era ni taa, Ecuana Cuatsashaquique? —jadya tunajatu abarecuare.

²⁰ —Eatsehue peadya pejaju ararayara, pan mullayara.

²¹ Bérutu Yusu equeque quisarati cuejaqui cuanara huenecuare ecuita jidama cuanara iyebuqueque. Tunaja quisarati ehue nequedyatu juya. ¡Dyaque nrecadatu jubuque ique ujeu baqui cuana queja inamerequi juyaque! Dyaque jida taa tu tumeque ecuita ecuaquera ejitaju aquena ama juhua, —jadya tujatu ecana acuare.

Ecuana Cuatsashaquique majucuaqueque adeba ishura ararataquique

(Mt 26.26-29; Lc 22.19-23; 1 Co 11.23-26)

²² Araarayaquetu Jesúsra pan inacuare. Pan inatsu tujatu

—Yusurupai mique aya, Tata, —jadya Yusu acuare.

Yusurupai, jadya aatsu tujatu pan cuesicuare. Cuesitsu tujatu tuatsehue anibareya cuanaque tyabarecuare.

—Nearacue. Riyaque rique ecue ecuita, —jadya tujatu ecana acuare.

²³ Tuequedya tujatu canecu juque uva nacaca esanashaque inanucacuare. Canecu inatsu,

—Yusurupai mique aya, Tata, —jadyatu Yusu acuare.

Yusurupai jadya aatsu tujatu ecana sadatsu inamerebarecuare, tunaja ijibare ishura canecu juque.

²⁴ —Riyaque rique ecue ami, micuana jiteque quijehuetiyaque. Jetiama tuna eaqueja catyatibuque. Ique ecue ami quijehuetitsu majuhuaajutu Yusura iyaya iyacuaque inime tuaqueja judiru ishuque. Ique majuhuaaju piisitu riyaque inime yunerinetanaya. ²⁵ Riyaque micuana cuejaya. Ni eje tupu tuque riyaque yahuaju Pascua chine micuana tsehue anucaya ama; ijinucanime ama tuque ecue uva nacaca

esasanashaque. Jadya ama buchatu tumeque huecacaca era dutya naruyaque huecaca juetihuaju piisi tuque ijibuque micuana tsehue iyacuaque eijiqui, —jadya tujatu ecana acuare.

Jesúsra Pedro “Adebaya ama tuque era” jadya juyaque cuejacuareque

(Mt 26.30-35; Lc 22.31-34; Jn 13.36-38)

²⁶ Chineju araara amena juatsu tunajatu Yusu pureama aishuque jeru acuare. Jeru amena juatsu tuna cuacuare uhua cuemusú Olivo Acuí Quini bacaniju.

²⁷ Tuhua junatitsutu Jesúsra isaracuare tura mepehua cuanaque.

—Riyaque meta micuanara era ijahue ahua bucha cabatitsu jacatillaya. Yusuja quisarati tu ehúene: “Tuna aquereniquiquetu iyetanabuque. Dutya tura aquerenihua cuanaque tuna tsapetanabuque, uhuisha cuana naruquique iyetanahuaju etsapetanau bucha”. ²⁸ Emajuque netitsuranucatsu icuenetadya cuaya Galileaju, tuhua micuana tsehue catsurutinuca ishú, —jadya tujatu ecana acuare.

²⁹ Jadya juyajutu Pedrora acuare:

—Arepa dutyara jacatillaya ama bucha, ecuemi jacanime ama, —jadya tujatu acuare.

³⁰ —Pusha amadya mique aya. Riyaque meta, tacure quique beta juma jarijudyami catehuati quimisha juya. “Adebaya ama tuque era”, jadya aquimisha mira aya, —jadyatu Jesúsra Pedro acuare.

³¹ —¡A, aijama! Mique adebaya ama jiu junime ama ique. Miatsehue iyepedyá datse tunara paa. “Tujaque ama ique” jadya junime ama ique, —jadyatu Pedrora Jesús acuare.

—Mique adebaya ama jiu junime ama ique, —jadya tunajatu abarecuare, Pedrora aya baedyá.

Jesús Etataque tsehue Getsemaníju quisaraticuareque

(Mt 26.36-46; Lc 22.39-46)

³² Tumetu Jesús tura mepehua cuana tsehue junaticuare Getsemaní bacani emajacaju. Tuhua junatitsu tujatu ecana anaticuare:

—Rehuadya neanibutecue, ique ecue Etata tsehue quisaratiya tupu.

³³ Jadya juatsu tujatu dujucuaré Pedro, Santiago, Juan jadya. Japada cuita ama tunajatu ecana jacacuare. Cuayaquedyatu Jesús dyaque peya inime cabatiajecuare, niyu huenanada, eje buchadya jucara jadya.

³⁴ —Dyaque peya inime taa cabatiya. Idutaqui ama cuita taa riqúe baya. Rehuadya neanicue. Ecabati nejuque. Netahuiume, —jadya tujatu ecana acuare.

³⁵ Tuna jadya aatsutu Jesús cuacuare eje japa cuita amadya. Cuaatsutu chichucata junaticuare, yahua queja huipuchitana. Jadya juatsutu Yusu tsehue quisaraticuare:

—Tata, ique canerecati ishucue ama juatsu taa ecanerecatiu ama. ³⁶ Ecue Etata, micuetu dutya ataqui. Riya ique nrecada jutaquique tu ai patseda buchique. Canerecatitaquique ama juatsu taa ecanerecatiu ama. Ebacau datse mique era, ique canerecati ishucue ama. Jadya ama bucha ecue biji eque ama paju. Micue biji eque paju, —jadyatu Jesúsra acuare tuja Etataque.

³⁷ Jadya juatsutu cuanucacuare quimisha tura dujuhua cuana queja. Cuaatsu tujatu ecana tahuijarabareyaju baticuare. Isaranaticuaretu Pedro:

—¿Tahuiyami, Simón? ¿Eje bucha ecabati jutaqui amami yaratupu cuana cabatihua, ni peadya ura cuana?

³⁸ Tuequedya tujatu ecana quimishadya isaracuare:

—Necabaticue. Netahuiume. Nebacabacacue Yusu queja, micuana Satanásra ique jacamerecara ayaju, micuanaja idu ishucue. Micuanaja tacajatu aijama casa Ijahuara cacachathacacara ayaju casada juishucue, arepa micuanara jacacarama aya ama bucha, —jadya tuna Jesúsra acuare.

³⁹ Cuabeta ishucue Jesús cuanucacuare tuque cuahuaju nucadya, Yusu tsehue quisaratira.

—Tata, canerecatitaquique ama juatsu taa ique ataya bae eatau ama. Jadya ama bucha ecue biji eque ama paju. Micue biji eque paju, —jadya ati beta tujatu acuare.

⁴⁰ Jadya juatsutu cuanucacuare tura quimisha dujuhua cuana queja. Cuanucatsu tujatu ecana tahuijarabareyaju batinucacuare. Busataqui ama cuita tunajatu yatuca bacuare tahuicara juatsu. Tahuiya baatsu tura nereda ayaju tuna eje bucha caquemitsatitaqui ama jucuar. ⁴¹ Cuaquimisha ishucue cuanucacuare Yusu tsehue quisaratira. Jadya juatsutu cuanucacuare tura dujuhua cuana queja.

—¿Canajaraya jari cuitadya micuana? ¿Tahuiya jari cuitadya ni taa micuana? Riya tupu camadya. Amenatu ura juetihua IQUE ECUITA tunara jucha arida cuana queja inamereyaque.

⁴² Nenetitsuracue. Nedirura. Amenatu jehua ique ujeu cuana queja inamerequi juyaque, —jadya tuna Jesúsra acuare.

Jesús erisique dujutanacuareque

(Mt 26.47-56; Lc 22.47-53; Jn 18.2-11)

⁴³ Jesús quisaratiya jarijutu Judas junaticuare, tura mepehuaquedya datse. Ecuíta jetiama tsehuetu cuacuare. Cuchiru tsehucue, acui tsehucue jadya tuna junaticuare. Pae cuanaja huaraji cuanara, cacuatsashati bahuityaqui cuanara, emuiba cuanara jadya tuna cuadishacuare. ⁴⁴ Junatima jariradya

tuna Judasra cuejanaticuare: “Era dyahuanatiyaque, tudya tume. Neinaeue. Risitsu, nedujucue”, jadyapa tujatu ecana junatimaradya anaticuare. ⁴⁵ Junatitsu tujatu Jesús jipeticuare.

—Banuchi, Ebahuityaquiue.

Jadya aatsu tujatu Jesús dyahuanaticuare. ⁴⁶ Tura jadya ayajutu ecuita cuanara Jesús inaticuare. Inatsu tunajatu jida risicuare.

⁴⁷ Jesúsra mepehuaratu cuchiru baeque baina juque juputsu pae dyaque muidaque merequiue ijaca pejuicare.

⁴⁸ Tumetu Jesúsra isaracuare ecuita cuana jetiamaque:

—Micuana micuana jehua cuchiru tsehue, acui tsehue jadya ique inara, chiri puji inara ejeu bucha. Anichinedya tuque micuanaja emajaca ejudya jutidya ique ina ishucuchiruma, acuima. ⁴⁹ Dutya huecaca taa ique Yusuja etareju Yusuja quisarati bahuitya juchine. ¿Tume micuanara eje bucha juatsu inachine ama tuhua? Riya ique atayaqueri juya Yusu equeque quisarati cuejaqui cuanara cuejacuareque, Yusuja quisaratiju ehueene bae cuitadya, —jadya tuna Jesúsra acuare.

⁵⁰ Tuque quisaratiya tsunumeedyatu Jesúsra mepehua cuanaque dutya huanaterecuare. Jacacuare tuna Jesús.

⁵¹ Peadya ehue ebariratu Jesús tupujudya acuare, sahuana tsehue capirurititsu. Tumeque datse tunajatu inacara acuare. Sahuana camadya tuna inadaditsu secacuare.

⁵² Tunara inadadihuaju tujatu sahuana shanacuare. Quinajacameretitsutu huanacuare ecatacatique.

Jesús israelita cuanaja huaraji arida cuana ecasitati ducu dujanacuareque

(Mt 26.57-68; Lc 22.54-55, 63-71; Jn 18.12-14, 19-24)

⁵³ Tuequedya tunajatu Jesús dujuicare pae dyaque muidaja etareju. Tuhuatu ecasitati juicare pae cuanaja huaraji cuana, cacuatsashati bahuityaqui cuanaque, tumbaedyas israelita cuana emuiba cuanaque. ⁵⁴ Tumetu Pedrora tunara Jesús dujuyaju japa tupuaje acuare. Cuacuaretu pae dyaque muidaja etare tsecue tupu. Etare tsecue junatitsutu sudaru cuana tsehue aninaticuare. Tuna tsehetu etiqui bahuinitya juicare. ⁵⁵ Pae cuanaja huaraji cuanara, dutya huaraji cuana tuhua ecasitati juicare cuanaratu tyacara acuare Roma juque huaraji, tuque iyemere ishucue. Jadya ama bucha tunajatu dadicuare ama eje bucha eque jidama cueja ishucue. ⁵⁶ Jetiama tuhua juicare cuanaratu pusha pusha tsehue jidamapa ejuu jadya acuare. Jadya ama bucha tunajatu daditaqui ama bacuare dutyara tupu tuque jidama ejuque. ⁵⁷ Eje uma quisaratiyaju bacatsutu umae chamacama huaraji cuanaja

yacuaju netitsuranucacuare quisarati ishu. Pusha pusha tunajatu cuejacuare:

⁵⁸ —Cuejaya micuana ecuanara, icuene tuque quisaratiyaju bacachineque: “Rihuishatillaya tuque Yusuja etare ecuita cuanaja eaque. Rihuishatillatsu, quimisha huecaca juatsu tuque anucaya ecuitaja eaque ama”, jadya tuque ecuana quisaratiyaju bacachine, —jadya tuna pusha pusha jucuare.

⁵⁹ Arepa ecana umada “Bacachine tuque ecuana jadya quisaratiyaju”, jadya juya ama buchatu tunara cuitadya eje bucha adebataqui ama bacuare tunara quisaratiyaju bacahua tsehue.

⁶⁰ Tuna jadya juyaju bacatsutu pae dyaque muidaque netitsuracuare dutya tuhua cuanaja yacuaju. Turatu Jesús bacaduracuare:

—Bacahuadyami ecana micue ishu quisaratiyaju. ¿Caquemitsatiya ama cuitadya mique? ¿Jadidyami quisaratichine, jadya ama ni taa?

⁶¹ Jesússtu caquemitsaticuare ama. Yudijidyatu pae dyaque muidara bacaduranucacuare:

—¿Midyami Mesías, Yusuja Emepeque? ¿Midyami Yusu Dyaque Jidaja Ebacuaque, aijama ni taa?

⁶² —Jejee, Mesiasdya ique; Yusuja Ebacuaque ique. Ejeque huecaca micuanara ique babuque Yusuja jida eque amaca eaniqui muidaju aniyaju. Tumbaedyaya micuanara babuque barepa huani ducu eque junanucayaju, —jadyatu Jesúsra acuare.

⁶³ Jadya quisaratiyaju bacatsutu pae dyaque muidaque cahuaaiticuare. Cahuaaititsutu una cachajaticuare, dyaque cuita ecahuaaitique ejitaju juishu.

—Sareya ama tuque ecuana peyaja riyaque jidama juchineque cueja ishu. ⁶⁴ Jesusratu Yusu cahuaaitishaya tuja quisarati tsehue. Micuanaratu bacahuadya tura quisarati jidamaque ayaju. ¿Eje bucha micuana amerecara aya? ¿Iyemerecara, iyemerecarama ni taa? —jadya tujatu acuare peya huaraji cuana.

—Jucha metse tuque. Pamajudya, —jadya tuna caquemitsaticuare.

Dutyaja tupu tunajatu inime jucuare.

⁶⁵ Jadya aatsutu umae cuanara ebutsequiniju ecuedira acuare, eraca tsehue butsequini risi jadya. Jadya aatsu tunajatu bahuapaja bahuapaja acuare.

—¿Aira taa mi ahua? —jadya tunajatu acuare, ijaribayaque. Tumbaedyatu sudaru cuanara bahuapajacuaredya.

*Pedrorra “Adebaya ama tuque era” jadya acuareque
(Mt 26.69-75; Lc 22.56-62; Jn 18.15-18, 25-27)*

⁶⁶ Pedrotu juanicuare jari pae dyaque muidaja etare tse-cue. Tuque tuhua juaniyajutu nubiticuare tumeque etareju mere juyaque. ⁶⁷ Pedro etiqui cunu etiqui bahui ani juyajutu epunara petanityacuare.

—Miquemi Jesús Nazaretju tsehue junenihuaquedya, —jadyatu Pedro epunara acuare.

⁶⁸ Pedrotu catehuaticuare:

—¡Aijama, mama! ¡Adebaya ama tuque era! ¿Ejeque cuana taa tuquemi jadya aya? —jadyatu Pedro caquemitsaticuare.

Tuequedyatu etare tsecue enubitaquiju ne-tidirunucacuare. Jadya juyaju cuitatu tacure quiquecuare.

⁶⁹ Epuna etareju mere juyaratu banucacuare tuhua junetiyaju.

—Riyaque ecuita ri Jesús tsehue junenihuaquedya, —jadya tujatu acuare tuhua cuanaque.

⁷⁰ Tuquetu catehuatinucacuare:

—¡Aijama, mama! ¡Adebaya ama tuque era! —jadyatu pusha pusha junucacuare.

Yaratupu juatsutu tuhua cuanara jadya anucacuare Pedro:

—Yuneri cuitadyami mique Jesús tsehue junenihuaquedya. Ecuánarami adebaya mique Galilea juque, —jadya tunajatu Pedro acuare.

⁷¹ Tunara jadya ayajutu Pedro caquemitsaticuare:

—¡Aijama! ¡Adebaya ama tuque tumeque ecuita micuanara ique jadya ayaque! Yusu bahue ique yuneri quisaratiya. Ique yuneri ama juyaque juatsu, Yusura panerecatura, —jadya tuna Pedrora acuare.

⁷² Tuque jadya quisaratiyaju cuitatu tacure quique beta jucuare. Jadya juyajutu Pedro huecatanacuare. Caadebaticuaretu Jesúsra jadya cuejachineque: “Tacure quique beta juma jarijumi catehuati quimisha juya. ‘Adebaya ama tuque era’ jadya aquimisha mira aya”. Jadique adebatsutu Pedro paa ebari jucuare.

15

Jesús Pilato queja dujutanacuareque

(Mt 27.1-2, 11-14; Lc 23.1-5; Jn 18.28-38)

¹ Apudajudyatu pae cuanaja huaraji cuana caradatinucacuare emuiba cuana tsehue, cacuatsashati bahuityaqui cuana tsehue jadya. Tuhuatu jucuare dutya israelita huaraji cuana. Inime tunajatu bajejecuare Jesús iyemere ishu. Erisi tunajatu Pilato Roma juque enaruqui cuarequi queja dujumerecuare. Pilato tunajatu tyaticuare. ² Tuja yacuaju netitihuajutu Pilatora bacaduracuare:

—¿Midyami israelita cuanaja ecuari?

—Jejee, mira aya equedya, —jadya tujatu acuare.

³ Pae cuanaja huaraji cuanaratu pusha pusha cuita cuejacuare dyaque jidamapa ejuu jadya Pilatoja yacuaju.

⁴ Tumetu Pilatora bacaduranucacuare:

—¿Bacaya amami ecana micue ishü dutya jidamaque quisarati ayaju? ¿Eje bucha juatsu tuquemi ecana quemitsaya ama? —jadyatu Pilatora Jesús acuare.

⁵ Jesusratu quemitsacuare ama ni peadya quisarati tsehue. Jadya baatsutu enaruquique anajacatacuare.

*Pilatora “Jesús pamajudya” jadya acuareque
(Mt 27.15-31; Lc 23.13-25; Jn 18.38-19.16)*

⁶ Dutya maratu Pilatoja bahue jucuare Pascua chine ishü etare apudaju erisi netiyaque inajaca, ecuita cuanara peadya ejeque inajacamerecara ayaque camadya. ⁷ Tumepatyatu erisi neticuare ecuita etare apudaju Barrabás bacani. Roma juque enaruqui tsehue patu cahuaiticuare. Tuque, tuja ecare cuana jadya patuna enaruqui tsehue cahuaititsu quiyeticuare. Jadya tibudyapa tunajatu etare apudaju ishacuare. ⁸ Jetiamatu ecuita Pilatoja etare tsecue casitaticuare. Bacaticuare tuna:

—Nerecabacue ecuana. Inajacacue micue bahue ecuanara mepeyaque, —jadya tunajatu aticuare.

⁹ Jadya tunara bacayaju bacatsu tuna Pilatora bacaduracuare:

—¿Jesús tuque micuana eaqueja inajacamerecara aya, israelita cuanaja ecuari jadya juyaque? —jadya tujatu ecana bacaduracuare.

¹⁰ Turatu adebacuaredya ecuita cuanara ama Jesús ujeu bayaque, tunaja huaraji cuanara camadya. Bahuedyatu jucuare jishatsu huaraji cuanara Jesús inamerehuaque. ¹¹ Jadya ama buchatu pae cuanaja huaraji cuanara ecuita cuana capuritishacuare.

—Pilato nebacacue, tuja Barrabás camadya inajacamere ishü, —jadya tunajatu ecana acuare.

Ecuita jetiera amatu Pilato bacacuare, tuna huaraji cuanara cuejamerehuaque.

¹² Tume tuna Pilatora bacaduranucacuare:

—¿Tume jatsu micuanara ique ai amerecara aya Jesús micuanaja ecuari tsehue?

¹³ —¡Curusuju tatamerecue! ¡Tuhua pamaju! —jadya tuna caquemitsaticuare quique eque.

¹⁴ —¿Eje bucha juatsu? ¿Ai tujatu jidama achine? —jadya tuna Pilatora bacaduracuare.

Abacatanacuare ama tuna quiqueyaque:

—¡Curusuju tatamerecue maju ishü!

15 Pilatoratu ecuita cuana pureamaturacara acuare, tuatehue ecahuaitiuju. Jutaquijudya tujatu Barrabásdya inajacamerecuare. Tuequedya tujatu Jesús menajetyacuare sudaru Romaju cuanaque, tunaja catsacatsa, curusuju tata jadya aishu.

16 Icuene tunajatu dujuacuare Pilatoja etare tsecue. Sitacuare tuna dutya sudaru cuana tuhua anicuare cuanaque. 17 Ijahue ayaquedya jutidya tunajatu ecuari edujuta bucha dujue acuare. Dyaque jutuyaque tacatsu tunajatu jutumerecuare una sehuesahuauque, ecuari arida cuanaja ejutuqui tsehue. Iyucaju tunajatu jutumerecuare cunu sahua cuija epicaque.

18 —¡Emuita paju israelita cuanaja ecuari muidaque! — jadya tuna jucuare, tuque ijaribayaque.

19 Acui tsehue tuna iyucaju acuare. Ecuedira tuna acuare. Jadya aatsu tuna tuja yacujaju chichucata jucuare, tuque jahue ayaque. 20 Jadya jahue jahue amena aatsu tunajatu tacanucacuare una sehuesahuauque, tujaque cuita una jutumerenuca ishu. Jadya aatsu tunajatu curusuju tata ishu dujuacuare.

Jesús curusuju tatatanacuareque

(Mt 27.32-44; Lc 23.26-43; Jn 19.17-27)

21 Epu ebari juque cuinanayara tunajatu tsurutsacuare ecuita Cirene juque, Simón bacani. Simóntu Alejandro, Rufo jadyaja etataque jucuare. Eje queja japada juneniyaque juetiyaque tunajatu tsurutsatsu casada tsehue curusu mapamerecuare Jesús tatatana ishu juyaque.

22 Tudyá tuna dujuacuare Jesús Gólgota bacani emajacaju. Tumequetu jucuare uhua cuemusú, emaju iyuca baeque. 23 Tuhua tunajatu Jesús ijimerecara acuare uva nacaca esanashaque mirra tsehue eujaque, ecuita uje cuana ujejarasha ishu. Jesusratu ijicarama acuare. 24 Jadya aatsu tunajatu curusuju tatacuare. Curusuju amena tatatanahuaju tuna dadu jahue jucuare, Jesúsra jutuhua cuanaque ejeja ejeja juyaque tuna cama cajaquetibare ishu.

25 Apudajudya las nueve cuana ni tunajatu curusuju tatacuare. 26 Tauraju ehuenecue tunajatu shuracuare ebarucue tuja iyuca dyaque. Taurajutu ehue jucuare eje bucha juatsu Jesús curusuju tatatanahuauque bahue amere ishuque. “Riyaque ri Jesús, israelita cuanaja ecuari” jadyatu ehue jucuare. 27 Tumbaedyá tunajatu beta ecuita casada tsehue ai secaquique ecatse curusuju tatacuare, Jesúsja jida eque amaca, peya jani eque amaca jadya. 28 Icueneta huenedyatu Yusuja quisarati atanacuare: “Yusuja Emepeque ujeu baqui

cuanaratu quiyeti puji bucha abuque”. Tumetu icueneta cueja atanacuare bae cuitadya judadicuare.

²⁹ Tueque cuetiya cuanaratu ijaribacuare iyuca huinu huinu tsehue tuque asicaba, bijidamadura jadya ayaque:

—Miquemi dyaque casada cabatichine Yusuja etare ri-huisha ishu. Quimisha huecaca juatsupa nityatsuranucaya, jadyami juchine. ³⁰ Yuneridya ni micue casa aniya, quina-jacamereticue mita taca. Butecue curusu juque, —jadyatu ecuita cuanara acuare, tuque ijaribayaque.

³¹ Pae cuanaja huaraji cuanara, cacuatsashati bahuityaqui cuanara jadya tunajatu ijillahuanacuare:

—Peya cuana inajacamere ishupa tuja casa aniya. Tumetu tuta taca quinajacameretitaqui ama cabatiya. ³² Mesías, Yusuja Emepequepa jadyatu juchine. Ecuanaja ecuari dyaque aridaquepa, jadyatu juchine. Curusu juque ni buteya, tume tuque ecuanaja ejeneya tuque Mesiasque, —jadya tuna tuna cama jubarecuare, tuque ijahue ayaque.

Chiri aridaque ecatse tuatsehue curusuju tatatanacuar-eratu ijillahuananucacuare.

Jesús curusuju majucuarque

(Mt 27.45-56; Lc 23.44-49; Jn 19.28-30)

³³ Tumetu tumeque chinequeja, barepatya eque las tres chinequeja dutya yahua apunaterecuare. ³⁴ Las tres chinequeja dyanetu Jesús jebuda quiquecuare:

—Eloí, Eloí, ¿lema sabactani? (“Ecue Etata Yusu, ¿eje bucha juatsu mira jacahua?” jadique) —jadyatu quiquecuare.

³⁵ Eje uma tuhua neticuare cuanaratu bacacuare. Elías tura ihuaraya bucha jutidya tunajatu bacacuare.

—Nebacacue. Elías béru Yusu equeque quisarati cuejaquique jucuarque tujatu ihuaraya, tuque tsahuana ishu, —jadya tuna jucuar.

³⁶ Jadya Jesús quiqueyaju bacatsutu eraca pucaca jiteque tsajajaajecuare. Mullaticuare tujatu uva nacaca esasanashaque patsedaju. Mullatsu tujatu acui barudaju risitsu nityatsuratsu ecuatsaju jipemerecuare tuja susu ishu datse.

—Nebara, ejepa Elíasra junatsu butyanaya curusu juque, —jadyatu jucuar, tuque ijaribayaque.

³⁷ Tumetu Jesús quique pidya casada juatsu, amena ishu canajeti pidya juatsu majucuar. ³⁸ Tuque majuyajudyatu Yusuja etare juque junuda eshuraque Dyaque Muidaque penequique chajatanacuare ebarucue eque emaque queja. ³⁹ Tuhuatu neticuare curusu tuyu cien sudaru cuana cuat-sashaquique. Jesús majuya baatsutu jucuar:

—Pusha ama cuitadya tucueri riyaque ecuita Yusuja Ebacuaque juhua, —jadyatu jucuare.

⁴⁰ Tuhuatu jetiama epuna cuana neticuare japada eque capetatiya cuanaque. María Magdalaju aniyaquetu tuhuadya jucuare, tumbaedy peya María, Santiago “Barudama”, José jadya ecitseja ecuaque. Salomé, tumbaedy peya cuana umada tuna tuhua netibarecuare. ⁴¹ Jesús Galileaju cuaya patya equetu tumeque epuna cuana tuatsehue junenicuare, tuque tsahua juyaque. Dutya riya cuanaque epuna cuanatu tuatsehue jecuare Jerusalénju.

Jesús emajuque tumu cani epuruju ishatanacuareque
(Mt 27.57-61; Lc 23.50-56; Jn 19.38-42)

⁴² Ijetitu amena nubihuie cuita jucuare. Cuetihuietu amena jucuare huecaca ecuanaja canajara huecaca ishucabajejeti bahueque. ⁴³ Tumetu ijete butema jarijudya, ecuita José Arimateaju cuinanacuareque juticuare Pilato queja. Josétu huaraji dyaque jida, emuique jucuare. Tuquetu peya huaraji cuana tsehue ecadutyatiquedya jucuare. Jadya ama bucha tujatu ejenecuare Jesús Yusuja enaruqui juishu ecuadishaque. Pilato queja junatitsu tujatu bacaticuare:

—¿Ebutyamereu ama mira Jesús curusuju emaju badeyaque? Paishati caniju, —jadya tujatu Pilato aticuare.

⁴⁴ “Jesús amena majuhua” jadya bacatsutu Pilatora ejenecarama acuare. Ihuaracuare tujatu sudaru cuana cuatsashaquique tuhua Golgotaju jucuareque. Tuque jutihuaju tujatu bacaduratsacuare:

—¿Are majuhuadya Jesús? ¿Ejetsunue cuitatu amena maju jida juhuaque? —jadyatu Pilatora acuare.

⁴⁵ Sudaru cuana cuatsashaquiratu quemitsacuare:

—Jejee, yuneridyatu majuhua.

Jadya bacatsutu Pilatora acuare José:

—Butyameretsu emaju papa ishucani epuruju ishaticue.

⁴⁶ Tumetu Joséra quemiticuare sahuana ishucque ejutuqui dyaque jidaque. Tura jadya ayaju tujatu curusu juque butyamerecuare. Butyameretsu tujatu piruricuare sahuana tsehue. Ishaticuare tujatu tumu cani jadya ishuc epuruju. Jesús emajuque ishatsu tujatu etsecue tachimerecuare tumu ebari tsehue. ⁴⁷ María Magdalajura, María Jesúsja ecuaquera jadyatu petacuare. Bacuare tatse Jesús emajuque eju ishatanayaju.

16

Jesús chacha netitsuranucacuareque
(Mt 28.1-10; Lc 24.1-12; Jn 20.1-10)

¹ Amena ijeti nubihuaju, canajara huecaca cuetihuajutu, quimisha epuna cuanara ijimedaque quemiticuare Jesús emaju jarayaque ijimeda tsehue ati ishü. Ijimedaque quemira cuacuare cuanaque tuna jucuaré: María Magdala juque; María, Santiago “Barudamaja” ecuaque; Salomé jadya.

² Ijeti cuinanaya tsehuedya, apudajudya cuita dumicu huecacatu epuna cuana cuahuecacacuare Jesús emajuque tumu cani epuruju ishatanachineju. ³ Tuhua cuayaque tuna juajecuaré tuna cama:

—¿Aira dyadi tuque ecuanaja tumu ebari tecuya emaju cani tsecue penequique? —jadya tuna cabacaduratiajecuaré.

⁴ Junatiyara tunajatu banaticuaré tumu ebari cani tsecue penequique tuhua ama. Etecu tuna banaticuaré.

⁵ Nubinaticuaré tuna caniju. Nubitsu tunajatu banaticuaré ehue ebari jida eque amaca juaniyaju. Ejutuqui paja tsehuetu ecajututi jucuaré. Tuque baatsu tuna dyaque jecutanacuare.

⁶ Tura tuna isaratsacuare:

—Nejecutanaume. Jesús, Nazaret juque, curusuju tatatanachineque sare micuana juya. Rehua amarique. Chachatu netitsuranucahua. Nepetanacue tunara ishachineju, yuneri tuque rehua aijamaque bahue juishu.

⁷ Petatsu ebajarara nedituruncacue. Tura mepehua cuanaque necuejadirucue. Pedro neri neri necuejaticue. “Jesús patu icuenetadya cuaya Galileaju. Tuhuadyapa tura micuana ihuatiya. Tuhuadyapa tuque micuana batiya, tura micuana icueneta cuejachine baedya”, —jadya tujatu ecana cuejamerecuare.

⁸ Jadya ayajutu epuna cuana masadama emaju cani juque dirunucacuare. Tsajaja cama tuna dirucuaré. Tadadaya jadya tuna bajida juatsu jucuaré. Epu ebariju dirunucayara tunajatu ni ejequedya jutidya cuejacuaré, dyaque bajida cuita juya tibu.

María Magdalaju aniya queja Jesús cabamereticuareque (Jn 20.11-18)

⁹ Jesús chacha junucatsu, netitsuratsu dumicu huecacaju tujatu icuene cuita cabamereti ishü acuare María Magdalaju anicuareque, tura icuene pacarucu ijahua cuana ije-huecuinacuareque. ¹⁰ Jesúsra cabamereti ishü ahujutu tumeque epuna cuacuare tura mepehua cuanaque cuejara, Jesús amena enetitsuranucaque. Tuna queja junatitsu tujatu ecana peya inime, paya jadya juyaju banaticuaré. ¹¹ “Jesús tu amena enetitsurunuca. Era cuitadyatu bahua”, jadya tura cuejayaju, tunajatu ejenecuare ama.

Jesús beta tura mepehuaque ecatse queja cabamereticuareque

(Lc 24.13-35)

¹² Beta tura mepehuaque ecatse peya epuju cuayaju tatse Jesúsra cabamereti ishú acuare. Adeba piisi ama tatsejatu acuare, tunara babanicuare bucha ama cabamereticuare tibu. ¹³ Pana adeba aatsu tatse yudijidya cuanuca jucuare peya cuana cuejara. Jadya cuejaya bacatsutu umae cuanara ejenecarama acuare.

Jesúsra camadya ishú tura mepehua cuanaque cuatsashacuareque

(Mt 28.16-20; Lc 24.36-49; Jn 20.19-23)

¹⁴ Peadya tunca peadya earacana tura mepehua cuanaque mesaju ararayaju tuna Jesúsra cabamereti ishú acuare. Jesúsra tuna nereda acuare:

—Eje umara micuana cuejachine tunara cuitadya ique chacha banucachineque. Ejenechine ama micuana ecana, tunara cuejayaju. ¿Eje bucha juatsu? ¿Eje bucha juatsu micuana niju pajida quejeneti baecua? —jadya tujatu ecana acuare.

¹⁵ Isaranucacuare tujatu ecana:

—Necuacue ecue quisarati dutya queja cuejara. ¹⁶ Necuejacue ecana: “Ejeque, Jesús queja catyatitsu cutsameretiyaquetu Yusu judirubuque. Ejeque, Jesús queja catyatyaque amatu ijahuaja etiquiju ijehuetanabuque”, jadya ecana necuejaticue. ¹⁷ Eratu tyabuque eaqueja catyatiya cuanaque casa, ejeque ecuitaja ataquique ama aishu. Ecue casa tsehue tunajatu ijahua cuana ijehuecuinabuque. Ecue casa tsehue tunajatu yana cuana bape eque cuejabuque ecue quisarati. ¹⁸ Inaya ni tuna bacua dyaque ujeda cuanaque, ijiya ni tuna ai venenuquique, eje bucha ama tuna jubuque. Ujejeda cuanaque tunajatu jabatsu chachanebuque, —jadya tujatu ecana acuare.

Jesús barepaju tsuracuareque

(Lc 24.50-53; Hch 1.6-11)

¹⁹ Tuna cueja amena aatsutu Ecuana Cuatsashaquique Jesús cuacuare barepaju. Aniticuaretu eaniqui muidaju Etataque Yusuja jida eque amaca. ²⁰ Tuequedyatu Jesúsra mepecuare cuanaque cuacuare dutya queja tuja quisarati cuejara. Jesús bacue tuna tsehuedya cuacuare. Casaturacuaretu ecana. Tuna quisarati jidaque cueja juyaju tuna Jesúsra ejeque ecuitaja ataquique ama amerecuare, tunara quisarati cuejayaque Yusu jaque yunerine ishú.

Riya tupu camadya micuana cuejahua.

JIDAQUE QUISARATI LUCASRA HUENECUAREQUE LUCAS

Riyaque quiricari Lucasra huenequare. Casamati pujitu jucuare. Turatu Pablo tajicuare Jesúsja jidaque quisarati cueja juyaju.

Turatu Jesús ECUITA jadya cuejae acuare. Huenequare tujatu Jesúsja ujejeda cuana tsehue canerecabati anicuareque, ujejeda cuanaque chachanequareque, ijahua cuanara quijahuatishaya cuanaja ijahua cuana ijehuecuinacuareque jadya.

Tumebaedyatu Lucasra ejitaju acuare Jesús YUSUJA EBACUAQUEque. Huenequare tujatu Jesús Yusuja casa eque eje bucha jucuareque. Tumebaedyatu tujatu huenequare Jesúsra bahuityacuareque. Riyaque quiricajuri umada huenetanacuare Jesús eje bucha jucuareque, tura bahuityacuareque peya quirica cuana Mateora, Marcosra, Juanra jadya huenequare cuanaju aijamaque.

Riyaque quiricajuri ehue aniya:

Juan Ecuíta Cuana Utsaqui que cuinanacuareque (capítulo 1)

Samaria juque ecuita jidara israelita ujeda eaque tsahuacuareque cuatsabiji (cap. 10)

Ebacuaquera etataque jacacuareque cuatsabiji (cap. 15)

Chipirudaque, Lázaro jadya eje bucha jucuareque cuatsabiji (cap. 16)

Peadya tunca ecuita pusesera ririshayaque Jesúsra chachanequareque (cap. 17)

Fariseo, enaruquija ishü chipiru sitaqui que jadya Yusu tsehue quisaraticuareque (cap. 18)

Zaqueo Jesús queja catyatitsu inime cacuareticuareque (cap. 19)

Catibuti ishüque quisarati

¹ Riya micue quirica cuadishaya, Teófilo. Hueneya rique quirica mique Jesucristo eje buchique bahue amere ishü.

² Umaeratu amena huenequaredya Jesús eje bucha riyaque yahua ju nahuaque. Jadique quisarati huena jarique tuna tura mepehua cuana tsehue, tuque eje bucha juyaju petaquí jucuare cuana tsehue, jadya tuna quisaraticuare. Eje bucha juhuaque pana bahue juatsu piisi tunajatu huenequare tuque jucuare cuanaque. ³ Eratu adebacuare dutya inime eque, inime tsapema tsehue catibutihua eque

terediruya tupu. Jidadya tuque adebaya riyá cuanaque huene ishu, mique ecue dyaque iyuhuedaque Teófilo. ⁴ Hueneya tuque micue era riyaque cueja, mique tunara bahuityacuareque, pusha ama cuitadya yunerique mique bahue juishu.

Barepaju Yusu tsahuaquira Juan Ecuíta Cuana Utsaquique cuinanayaque cuejanacuareque

⁵ Teófilo, icuene mique cuejaya Zacarías ehuanegue Elisabet tsehue eje bucha jucuareque. Herodes Judeaju enaruqui jucuare patyatu jadya jucuare. Israel eque ejuracanaquetu Zacarías bacani jucuare. Paetu jucuare. Abías cuare juquetu jucuare. Tuja ehuaneguetu Elisabet bacani jucuare. Tumeque epunatu jucuare pae israelita Aarón bacani eque ejuracanaque. ⁶ Betadya tatse tuyu jucuare Yusuja yacuaju. Tatse tatse anicuare Yusura cuatsashahua eque. Jadya tibu tatse ni ejeradya jutidya ni aiju jucha metse jadya acuare ama. ⁷ Bacuama tatse jucuare, Elisabet cabacuati baecua juya tibu. Betadya tatse amena esiri jucuare.

⁸ Jadyatu jucuare Zacarías queja inime, tuque Yusuja etareju mere juyaju. Quimisacarucu huecaca cama tunajatu mere ishuque jucuare. ⁹ Pae cuanaja bahue tunajatu peadya tuhuaque mepe bahue junenicuare muru ijimedaque pahua ishu Yusuja etareju Muida Cuitaque Amaju. Tume tunajatu Zacarías mepecuare muru ijimedaque pahua ishu. ¹⁰ Tura muru ijimedaque pahuayajutu jetiama ecuíta caradatihua cuanaque etare tsecue Yusu tsehue quisarati bahue jucuare. ¹¹ Tumetu Zacarías queja cabamereticuare barepa juque Yusu tsahuaquique Yusura cuadishayaque. Tumu mesa tunara muru ijimedaque pahuati bahuejutu jida eque amaca netinacuare. ¹² Tuque baatsutu Zacarías ana ajacatacuare. Dyaque bajidatu jucuare. ¹³ Yusu tsahuaquiratu isaracuare:

—Zacarías, bajida juume. Yusura tuque micue quisarati bacahua. Ayadya tujatu mira bacahua equedya. Micue huane Elisabet tu cabacuatiya. Peadya ebacua tujatu adadiya. “Juan” tuja ebacani paju. ¹⁴⁻¹⁵ Mique, tumbaedya peya cuana jadya micuana pureama jubuque ebacua nana cuinanahuaju. Dyaque jida micuana jubuque, Yusura ecuíta dyaque inime metseque bucha baya tibu. Turatu ijibuque ama uva nacaca esasanashaque ni peya nijuqui ishuque. Tuque cuinanama jarijudyatu Yusuja Espíritu tuatsehue jubuque. ¹⁶ Turatu jetiama israelita cuana inime cacuaretishabuque, Yusu iyuhueda bamere ishu. ¹⁷ Ecuana Cuatsashaquira Yusuja quisarati cuejati-bunema jarijutu micue bacuara jadya cuejabuque: “Nequi-huaticue, Ecuana Cuatsashaquique junayaju ishu”. Tujatu

tumeque casadya anibuque Yusu equeque quisarati cuejaque beru Elías jucuaire bae. Yusuja Espiritu tu micue bacua tsehue jubuque, béru Elías tsehue jucuaire bae. Micue bacuaratu etata cuanaque queja ebacua cuanaque iyuhueda bamerebuque. Turatu Yusu adeba baecua cuanaque Yusu iyuhueda amerebuque. Jadya bajejee tujatu abuque ecuita cuana, Ecuana Cuatsashaquique jida tsehue batsa ishu, —jadyatu Yusu tsahuaquira acuare Zacarías.

¹⁸ Zacariasratu bacaduracuare Yusu tsahuaquique:

—¿Eje bucha adebae jatsu tuque eau yuneridya jadya juyaque? Esiri cuita dyadi taa ique, ecue ehuané bacue tumbaedyá, —jadya tujatu acuare.

¹⁹ Yusu tsahuaquiratu quemitsacuare:

—Ique Gabriel bacani; dutya huecaca Yusuja yacuaju tuque mere juyaque ique. Turadya cuadishahua mique isara ishu, riyaque jidaque quisarati cueja ishu. ²⁰ Era cuejahuque mira ejenehua ama tibumi iyacua quisarati baecua juya. Quisaratijacaya mique, micue bacua cuinanaya tupu. Yuneridya, jadyatu judadiya, —jadya tujatu acuare Zacarías.

²¹ Tuque jadya juya tsunumeetu jetiama ecuita etsecueju caradaticuare, Zacarías cuinanayaque ihua. Tume tuna cabacaduratibarecuare:

—¿Eje bucha juatsutu Zacarías tsunutaya?

²² Amena tuque cuinanaetitsu tujatu ecana isaracara datse acuare. Zacariastu quisaratitaqui ama cabaticuare. Anamatu jucuaire. Adebacuaredya tunajatu Muida Cuita Amaju barepa juque ai cuana bahuaque. Emetucu tsehuedya jutidya tujatu ecana piyecuejacuare tura bahuaque.

²³ Amena Yusuja etareju mere ishucue huecaca tuja terehuajutu Zacarías dirucuare tuja etareju. ²⁴ Jadya juatsu tujatu ehuanéque Elisabet maqui jucuaire. Pishica baditu cuinana baecua jucuaire tuja etare juque. Inime tujatu jucuaire:

²⁵ —¡Yusutu dyaque jida eatsehue! Nerecabahua tura ique bacuamaque ebisuaju, —jadyatu jucuaire.

Barepa juque Yusu tsahuaquira Jesús cuinanayaque cuejacuareque

²⁶ Shucuta badi juhujutu Yusura cuadishacuare tuque tsahuaquique Gabriel bacani Nazaret epu ebariju Galilea yahujaju. ²⁷ Epuna ehue ebari María bacani deca baecua queja tujatu cuadishacuare. Tumeque epuna ehue ebarijatu anicuare caquemiti ishucue quisarati ecuita José bacani tsehue. Josétu jucuaire ecuari David eque ejuracanaque. ²⁸ Yusu tsahuaquiquetu nubiticuare María aniyaju. Nubitsu tujatu isaraticuare:

—Bandía, mama. Isaraya mique era. Yusu tu miatsehue dyaque jida. Tuquetu miatsehuedya. Turami mepehua dutya epuna cuana ducuque, —jadya tujatu aticuare.

²⁹ Amena barepa juque Yusu tsahuaquique baatsu, tuja etsuri bacatsu tujatu eje bucha adebataquima, ni daditaqui inime bacuare. Tume tujatu inime jucuare:

—¿Eje bucha juatsu tura jadya isaranae aya? —jadyatu jucuare.

³⁰ Tumetu Yusu tsahuaquira acuare:

—Bajida juume, María. Yusutu miatsehue dyaque jida. ³¹ Ejetsunue juatsu amami carecani isaqui juya. Peadya ebacua tuque micue cuinanaya. JESUS bacani acue. ³² Tuquetu dyaque inime metseque judadiya. YUSU DYAQUE CASADAJA EBACUAQUE bacanitu judadiya. Micue bacuatu Yusura ameredadiya ecuari, tuja ebabaque David amerehua bucha. ³³ Cuatsashajacabuque ama tujatu israelita cuana. Terebuque ama tujatu ecuari juque inime, —jadya tujatu María acuare.

³⁴ Tumetu Mariara acuare:

—Ique deca baecua. ¿Eje bucha cabacuatie ejuu? —jadya tujatu acuare.

³⁵ Yusu tsahuaquiratu quemitsacuare:

—Yusuja Espíritu tu miaqueja junaya. Yusu dutya casa aniyarami jadya amereya. Jadya tibudyatu ebacua nana cuinanayaque YUSUJA EBACUAQUE bacani juya. ³⁶ Tumebaedyatu micue ata Elisabetja cuinanayadya ebacua, arepa tuque esiri juya ama bucha. Tunara “cabacuati baecua” jadya ayaquetu amena shucuta badi maquique. ³⁷ Aijamatu Yusuja ai ataqui amaque, —jadyatu Yusu tsahuaquira acuare.

³⁸ Tumetu Mariara acuare:

—Yusu Ecuana Cuatsashaquira cuatsashaya eque juishuque ique. Paju taa mira ique cuejehua eque, —jadyatu Mariara acuare.

Tuque jadya cuejatsutu Yusu tsahuaquique dirunucacuare.

María Elisabet queja tarepera cuacuareque

³⁹ Eje uma huecaca ama jadya juhuaque cuetihuajutu María cabajejetitsu cuacuare Judea emata epuju, Elisabet, Zacarías ecatse aniyaju. ⁴⁰ Tuhua junatitsutu nubinaticuare tatseja etareju. Etareju nubinatitsu tujatu isaranaticuare tuja ata Elisabet. ⁴¹ Mariara jadya isaranatie ayajutu Elisabetja ebacua ecare caní juque bucucucuare. Jadya juyajutu Elisabet caadebaticuare Yusuja Espíritu tuatsehueque. ⁴² Tume tujatu María jadya acuare:

—Yusurami mepehua dutya epuna cuana ducuque mique peadya. Tuquetu miatsehue dyaque jida. Tumbaedyu tujatu mepehua micue bacua cuinanadadiyaque, dyaque jida tuatsehue juishu. ⁴³ ¿Ai jatsu ique, Ique Cuatsashaquija ecuaque eaqueja tarepera jeishu? ⁴⁴ Mira isarayaju micue etsuri bacaya tshuedya cuitadya tuque ecue ebacua nana ecarecani juque bucucuhua, pureama juatsu. ⁴⁵ Miquemi dyaque jida, mique tyatana ana atahuaque tyatahua tibu. Yuneri cuitadyatu Yusura yana ahua equedyu judadiya, — jadyatu Elisabetra atsacuare.

⁴⁶ Tumetu María jerucuaru Yusu pureama ayaque:

“Dutya ecue inime tsehue mique pureama aya, Yusu Ique Cuatsashaquique dyaque casadaque.

⁴⁷ Mique Ique Inajacamerequiradya ducuta pureama amereya.

⁴⁸ Mira jida tsehue mepehua.

Mique merequique jetiedyaque ique.

Riyaque huecaca eque amena dutyara:

‘María peadyatu aniya epuna Yusura mepehuaque, tuatsehue dyaque jida juishu’ jadya aboque.

⁴⁹ Mique dutya casa aniyaquemi dyaque jida juhua eatsehue. Miquemi juchama neri.

⁵⁰ Micuetu nerecabajacanime ama mique muibaqui cuanaque.

⁵¹ Miquemi dyaque casada.

Casumitiya cuanara inime pireya cuanaquemi pana yuamatura aya.

⁵² Casada cabatiya cuanaque tuquemi casadama amereya.

Casadama cabatiya cuanaque tuquemi casada amereya.

⁵³ Nerecada cuanaque tuquemi dutya tunara ai sareya cuanaque tyaya.

Chipiruda cuanaque bacuemi ecana ni ai buchique tyaya ama.

⁵⁴ Micuetu tsahua bahue Israel eque ejuracana cuanaque, mique merequi cuanaque.

Ni eje tupu mira ecuana iyuhue tsehue bajacaya ama.

⁵⁵ Jadidya tuquemi quisarati tyahua ecuanaja ebaba Abraham, dutya tuque eque ejuracana cuanaque jadya.

Tereya ama tuque micue ecuana tsehue ecuana nerecaba ishuke”,

jadyatu Mariara Yusu jeru eque acuare.

⁵⁶ Quimisha baditu Maria Elisabet queja aniticuare. Jadya juatsutu dirunucacuare tuja etareju.

Juan Ecuira Cuana Utsaquique cuinanacuareque

⁵⁷ Tumetu Elisabetja cuina ishuque huecaca jueticuare. Ejitajutu acuare peadya deca ebacua. ⁵⁸ Yusu Elisabet tsehue dyaque jidaque bahue juatsutu tuja ata cuana tuaqueja cuacuare, “Dyaque jidatu Yusu miatsehue” jadya cuejara.

⁵⁹ Ebacua nanaja cuinana huecaca catsurutiyajutu tuja ata cuana, tuque japadama aniya cuanaque jadya chine ishucuejatanacuare. Tumeque huecacatu ebacua nana ecuita huitu bititubutanacuare tunaja bahue Israel eque ejuracanaque jadya adebatae juishuque. Etataque “Zacariás” bacani datsetunajatu acara acuare. ⁶⁰ Tume tuna ecuaque Elisabetra jadya acuare:

—“Juan” bacani paju, —jadya tujatu ecana acuare.

⁶¹ —¿Eje bucha juatsu? Aijama taa tu Juan bacani micue ata ni peadya, —jadya tunajatu acuare Elisabet.

⁶² Elisabetra “Zacariás” bacani acarama aya bacatsu, “‘Juan’ bacani paju”, jadya ayajutu ecuita cuanara emetucutsehuedya jutidya ebacua nanaja etataque bacaduracuare:

—¿Ai bacani tuquemi amerecara aya? —jadya.

⁶³ Tuja emetucu tsehue piye cuejatsu tujatu bacacuare aiju huene ishuque. Inatsatsu tujatu hueneacuare, “‘Juan’ bacani paju”. Dutyara tunajatu bape ebari bacuare. ⁶⁴ Jadya huene-tsutu Zacariás quisaratitibunenuacuare. Quisaratinuatsutujatu Yusu pureama atibunecuare.

⁶⁵ Dutya tuque japadama aniya cuanaque tuna anajacatuacuare. Tsapecuare tunajatu quisarati dutya Judea yahuaju emata cuanaju anitaya cuana queja Zacariás eje bucha juhuaque. Cuatsabiji tunajatu acuare, ebacuaqueja ebacani cuejatsupa amena quisaratinucaya jadya. ⁶⁶ Dutya tumeque cuatsabiji jadya juhuaque bahue juya cuanara tunajatu bape bacacuare. Cabacaduratibarecuare tuna:

—¿Aitu judadibuque tumeque ebacua nana? —jadya tuna jubarecuare tuna cama.

Yuneridya tucuetu Yusu Ecuana Cuatsashaquira naruya, tsahuaya jadya aya eje tupu tuque aniya jari tupu.

Zacariasra jeru acuareque

⁶⁷ Tumetu Yusuja Espiritura ebacua nanaja etataque Zacariás jerushacuare:

⁶⁸ “Yusu Ecuana Cuatsashaquique, pureama ea jucue.

Miquemi Yusu ecuana Israel eque ejuracana cuanara muiyaque.

Emuita mique, ecuana Ijahua quejaque inajacamerera jehua tibu.

⁶⁹ Mira tuque ecuanaja Ecuana Inajacamerequique casadaque cuadishahua.

David eque ejuracanaque tume.

70 Jadya tuquemi quisarati iyacuare mique eque quisarati cuejaqui cuana eque béru yuequedya.

71 ‘Inajacamerebuque micuana era dutya micuana biji-damaduraqui cuana quejaque, tumbaedyá micuana ujeu baqui cuana quejaque.

72 Anibuque tuque ecue canerecabati micuana tsehue, micuana eque ejuracana cuana tsehue jadya.

Judadima ama amatu judadibuque era micuana eje bucha aana ahuaque’ jadya mira ecuana ahua.

73 Riyaque tuquemi quisarati tyacuare ecuanaja ebaba Abraham:

74 ‘Eratu mique eque ejuracana cuanaque cuinanashabuque tuna ujeu baqui cuana quejaque, tunaja ique bajida tsehue ama mere ishu.

75 Ecue cuanaque tuna amerebuque.

Tuyu tuna anishabuque ecue yacuaju’ jadya tuquemi Abraham tyaana acuaire”,

jadyatu Zacariasra acuaire tuque pureama ayaque.

Jadya quisarati au jadya juatsu tujatu anucacuare quisarati ebacuaque Juanja ishu.

76 “Miquemi ecue ebacua.

Miquemi Yusu ebarucue aniya equeque quisarati cuejaqui judadiya.

Ecuana Cuashatsaqui que junama jarijumi tuque junayaju ishu ecuita cuana bajeje ishu jubuque.

77 Miratu cuejabuque micue ata cuana Yusura tuna inajacamerebuqueque, tunaja jucha cuana tillabuqueque jadya.

78 Yusura ecuana inajacamerebuque ecuana huecaqui que junatsu, ijetira huecacayaju yahua udaya bucha huecaera.

79 Tura ecuana huecanaya ecuana apuda ducu aniya cuanaque, ecuana maju mubajacaya ama cuanaque.

Tura ecuana Yusu tsehue jida amerencaya, tuatsehue ecuana eje bucha tsehue ama ani ishu”, jadyatu Zacarías jucuaire jeru eque.

80 Ebacua nana bacue ariari juajecuaire. Quinimetiajecuaire. Amena ecuita juatsutu anicuaire epu ebari japada anitaya cuanaju. Tuhuatu anicuaire, tuja ata israelita cuana Yusuja quisarati cuejatibuneya tupu.

2

Jesús cuinanacuareque

(Mt 1.18-25)

¹ Tume patyatu Roma juque enaruqui Augusto bacanira cuatsashacuare dutya tuque muibaqui cuanaque tunaja

dutyaja ebacani cuana quiricaju quiyatiti ishu. ² Riyaque inime, ebacani quiricaju quiyatitu jumetse jucuaire Cirenio, Siriaju aniya cuanaja huaraji jucuaire patya. ³ Dutya tuna cuataqui jucuaire tunaja ebaba cuanaqueja epuju, tuhua ebacani cuana quiyamereti ishu.

⁴ José, David eque ejuracanaque juya tibusu cuataqui jucuaire Belén bacani epuju, tuque cuinanacuareju. Tumetu José cuacuare tuja epu Nazaret bacani juque, Galilea yahua juque; tuhuaquetu cuacuare Belénju Judea yahua. ⁵ Tudyata tase María cuinahuaque Belénju cuacuare tatseja ebacani quiyameretira. Mariajatu quisarati anicuare caquemiti ishucue José tsehue.

⁶ Tatse Belénju junatियाque huecaca tujatu cuina ishucue huecaca jucuaire. ⁷ Cuinanacuare tujatu bametseque ebacuaque. Cuinanahuajutu piruricuare eja tsehue. Piruritsutu huanacuare huaca cuana araara ishucu, etare anitaya cuanaju aijama emajaca jucuaire tibu.

Yusu tsahuaqui cuanara uhuisha naruqui cuanaque cuejacuareque

⁸ Tumepatyatu anicuare Belén emajacaju uhuisha cuana narusisa juya cuanaque. ⁹ Muya jutidyatu ejitaju jucuaire barepaju Yusu tsahuaquique. Yusratu uhuisha naruqui cuanaque dutya huecatillamerecuare. Jadya baatsu tuna bajida jucuaire. ¹⁰ Tume tuna Yusu tsahuaquira aticuare:

—Bajida nejuume. Era micuana jidaque quisarati cuejanaya dutya ecuita cuana pureama amere ishucue. ¹¹ Riyaque huecacatu David beru anicuare epuju cuinanahua Micuana Inajacamerequique. Tuquetu Ecuatsashaquique, Mesías “Yusuja Emepeque” jadique. ¹² Riyaque micuana cuejanaya, micuana era cuejayaque yunerique bahue juishu. Ebacua nana petara cuaatsu tuque micuana eja tsehue epiruri jarayaju batiya, huaca cuana araara ishucu, —jadya tujatu ecana aticuare.

¹³ Tuque quisaratiya tsunumeetu ejitaju jucuaire jetiama barepaju Yusu tsahuaqui cuanaque. Tume tuna jerucuare Yusu pureama ayaque:

¹⁴ “¡Hosana!

¡Arida, dyaque casada jadyatu Yusu barepaju aniyaque!

¡Inime tsapema paju Yusu pureamaturaqui cuanaque!”, jadya tuna jucuaire jeru eque.

¹⁵ Jadya juatsutu Yusu tsahuaqui cuanaque dirunucacuare yudijidya barepaju. Amena tuna dirunucahuajutu uhuisha naruqui cuanaque tuna cama quisaratitibunecuaire:

—Necuara Belénju. Nebatira tumeque inime eje bucha juhuaque, Yusura ecuana cuejamerehuaque, —jadya tuna jucuaire tuna cama.

¹⁶ Jadya juatsu tuna ebajarara cuita cuacuare. Junatitsu tunajatu banaticuare María, José, ebacua nana jadya. Ebacua nanatu jaracuare huaca cuana araara ishujú. ¹⁷ Ebacua nana banatitsu tunajatu María ecatsé cuejanaticuare tuna cuejatahuaque ebacua nana eje buchique. ¹⁸ Dutya tuhua jucuaire cuanaque tuna uhuisha naruqui cuanara cuejayaque bacatsu anajacatacuare. ¹⁹ Mariatu nime aputacuare ama uhuisha naruqui cuanara cuejahaque. Tumequedya jutidya tujatu inime tupuqui acuare. ²⁰ Uhuisha naruqui cuanaque tuna dirunucacuare. Barepa juque tsahuaquira cuejaha bae cuitadya batitsu, tunajatu Yusu pureama, mui jadya jeru eque aajecuare.

José, María ecatsera Jesús Yusuja etareju dujucuareque

²¹ Ebacua nanaja cuinana huecaca catsurutiyajutu etataque ecatsera tunaja bahue amerecuare. Ecuíta huitu biti tatsejatu tubumereticuare, israelita riya jadya adebatae juishu. Jadya aatsu tunajatu JESUS bacani iyacuare. Riyaque ebacanidyatu barepa juque Yusu tsahuaquira María iyamerecuareque tuque maqui juma jariju.

²² Pushi tunca huecaca cuetihuaju, tatsejatu dujucuare ebacua nana Jerusalén epu ebariju Yusu bamereti ishu. Moisésja cacuatsashatitu jadya jucuaire. Pushi tunca huecaca ebacua cuinana ishu aniyajutu etata cuanaque quibeti bahue junenicuare Yusuja yacuaju jida, asicadama cabamereti ishu. Jadya tibu tatsejatu ebacua nana dujucuare Yusuja etareju, Yusu bamereti ishu. ²³ Jadya tatsejatu acuare, Yusura cuatsashahuaque jadya ehue tibu: “Dutya icueneque deca ebacua cuinanayaquetu Yusuja ishu cuita camadya jutaqui”. ²⁴ Yusura jadya amereya tibu tatsejatu Yusu tyataqui jucuaire beta huei. Tume tatse cuacuarehya huei tyara.

²⁵ Tumeptyatu ecuita Simeón bacani Jerusalénju anicuare. Tumeque ecuitatu jida tuyuque jucuaire. Turatu ihuacuare eje tupu Yusura Israel eque ejuracana cuanaque jida inimeju cuinanashadadiyaque. Yusuja Espíritu tu anicuare tuatsehue. Simeonratu iyuhueda bacuare Yusu. ²⁶ Berutu Espiritura tuque cuejacuare: “Miratu babuque Yusura riyaque yahuaju cuadishabuqueque. Tuque bamaquemi majubuque ama”. ²⁷ Mariara, Joséra jadya ebacua nana Jesús Yusuja etareju cacuatsashati eque aishu beya tsunumeetu Yusuja Espiritura Simeón inime tyacuare tuque tuhua nucadya

cuaishu. ²⁸ Nubitsu tujatu María ecana jipeticuare. Jipetit-sutu ebacua nana mapaticuare. Mapatsu tujatu Yusu pureama acuare.

²⁹ “Yusu Ecuana Cuatsashaquique, amena tuquemi ahuaadya mira quisarati miqúe merequique tyaana acuareque.

Amena ique pureama juya.

Majutaqui ique, era ihuayaque ejitaju juhua tibu.

³⁰ Bahuadya tuque era, mira Ecuana Inajacamerequique cuadishahuaque.

³¹ Cuadishahua tuque mira dutya queja aniya cuanaque eje bucha inajacameree ayaque adeba ishúque.

³² Tudyatu israelita ama cuana Yusu eje buchique adebamerequique.

Tunaja hueca buchique tume.

Tuque equedya ecuana israelita cuanaque muitabuque.

Tuque equedya ecuana micue cuanaque muitabuque,” jadyatu Simeón jucuare.

³³ Joséra, Jesúsja ecuaquera jadya tatsejatu anajacata ishú acuare, Simeónra ebacua nana eje bucha judadiyaque quisarati ayaju bacatsu. ³⁴ Simeónra tatse cuejacuare:

—Yusura jida nenarucue. Metse tsehue pajuneni, —jadya tujatu ecate acuare.

Tuequedya tujatu María isaracuare:

—Jetiama Israel eque ejuracana cuanaque tuna micue bacua queja catyatibuque. Tuna tuna dyaque jida jubuque. Peya israelita cuana bacue tuaqueja catyatibuque ama. Tuna tuna dyaque canerecatibuque. Dutyara jujerira tunajatu micue bacua bijidamadurabuque. ³⁵ Jadya adebataetu jubuque peadya peadyara inime tupuyaque. Miquemi nerecada jubuque, micue bacua eje bucha judadiyaque baatsu. Cuchiru ebari micue enijuju tutsuhua buchami cabatibuque, —jadyatu Simeónra María acuare.

³⁶ Tumbaedyatu tuhuadya jucuare epuna Ana bacani. Tuquetu Yusu equeque quisarati cuejaquique jucuare. Tuquetu jucuare Fanuelja ebacujunaque, Aser cuare juque. Anatu jucuare esiri. Ehue ebariquetu ahuequi jucuare. Tuja yahuique tsehuetu anicuare pacarucu mara piji camadya.

³⁷ Tumepatyatu jucuare eahuemajuque quimisacarucu tunca pushi earacana mara. Cuinana baecuatu jucuare Yusuja etare juque. Huecada tupu, meta tupu jadya tujatu Yusu merecuare, Yusu tsehue quisarati, arama quibeti jadya juyaque. ³⁸ Simeón María tsehue quisaratiya tsunumeetu Anara jipeticuare. Yusurupaitu acuare Yusu. Yusu yusurupai aatsutu quisaratitibunecuare tuhua cuana tsehue:

—Riyaque ebacua nana ri Yusura Jerusalénju aniya cuanaque jida inimeju cuinanasha ishu cuadishahuaque. Riyaquedy a ri micuanara ihuahuaque, —jadya tujatu ecana acuare.

Nazaretju dirunucacuareque

³⁹ Yusura Moisés eqe dutya cuatsashahuaque atillatsu tuna dirunucacuare Galileaju, tunaja epu Nazaretju.

⁴⁰ Ebacua nana bacue ariari juajecuaire. Casada, quinimeti, bahue jadyatu juajecuaire. Yusratu jacacuare ama. Iyuhue tsehue tujatu narucuare.

Ebacua piji Jesús Yusuja etareju cabameretiyaque

⁴¹ Josétu María tsehue cuau cuau jucuaire Jerusalénju dutya mara Pascua chine ishu. ⁴² Jesús amena peadya tunca beta earacana mara juhuaju tatsejatu dujucuaire Jerusalénju, Pascua chine ishu, tatseja tumepatya jadya bahue jucuaire tibu.

⁴³ Amena chine terehuajutu María, José ecatsé dirunucacuare tatseja epuju. Tumetu Jesús anicuare Jerusalénju, ecuaque, José jadya baecuaque. ⁴⁴ Tatseratu Jesús ecuita cuana ducu diruya cuana bucha datse bacuaire. Ajecuaire tuna peadya huecaca. Amena ijete nubihuaju tatsejatu sarecuare tatseja ata cuana ducu, tatseja eadeba cuana tsehue jadya ediruuque. ⁴⁵ Dadicuare ama tatsera. Yudijidya tatse cuanucacuare Jerusalénju, tuque sarera.

⁴⁶ Quimisha huecaca juatsu tatse chamacama dadicuare Yusuja etareju, cacuatsashati bahuityaqui cuana tsehue juaniyaju, tura ecana bacadurabaretsu ijaca bacaaniyaju. ⁴⁷ Tuque quisaratiyaju bacaqui cuanaratu bape bacuaire tuque dyaque bahue baatsu, tura ecana dutya jida quemitsaya bacatsu. ⁴⁸ Amena anajacatacuare María, José jadya ecatsé Jesús tuhua dadidirutsu. Tuja ecuaqueratu jadya acuare:

—¿Eje bucha juatsu mira yatse jadya jutidya ahua, deca? Tata tsehue mira yatse jidama cuita inime bamerehua mique datse saretsu, —jadya tujatu Jesús acuare.

⁴⁹ Jesúsra tatse jadya quemitsacuare:

—¿Aishu jatsu metsera sareya? ¿Adebaya ama jatsu metsera ique ecue Etataja etareju ai jutaquíque? —jadya tujatu ecatsé acuare.

⁵⁰ Tatseratu adebacuaire ama eje buchique tura jadya ayaque. ⁵¹ Tumetu dirucuare tatse tsehue Nazaretju. Yana equedyatu jucuaire. Tuja ecuaquetu eje bucha nime aputataquima jucuaire dutya eje bucha juhua cuanaque. ⁵² Jesússtu daneajecuaire. Dyaquedy a jutidyatu cabahuityatiajecuaire. Yusu pureamaturayaque, ecuita cuana pureamaturayaque jadyatu anicuare.

3

Juan Ecuita Cuana Utsaquira Yusuja quisarati cuejati-bunecuareque

(Mt 3.1-12; Mr 1.1-8; Jn 1.19-28)

¹⁻² Tumetu Yusura Juan, Zacaríasja ebacuaque cuadishacuare, tuja quisarati cuejara. Juantu anicuare tsecada eje uma piji anitaya cuana queja, Tiberio Roma juque enaruquique peadya tunca pishica earacana mara jucuare patya. Tumebaedyatu Poncio Pilato, Judea juque huaraji jucuare tume patya. Herodes tu huaraji jucuare Galileaju. Felipe, Herodes tsehuequiquetu Iturea, Traconite jadyaju huaraji jucuare. Lisancias tu Abilinia juque huaraji jucuare. Anás, Caifás jadya tatse pae dyaque muidaque jucuare. ³ Tumetu Juan quisarati cuejacuejanira cuacuare dutya queja cueri Jordán bacani jiruru queja. Juanja tuna cueja bahue jucuare tuhua cuanaque:

—Necacuareticue inime, Yusuja micuanaja jucha cuana apupasha ishu. Necutsamereticue, yuneridya inime cacuaretihua jadicue adebataqui juishu, —jadya tujatu ecana cueja bahue jucuare.

⁴ Jadyatu jucuare, beru yuequedya Yusu equeque quisarati cuejaquique Isaiasra hueneacuare equedya:

“Quisarati cuejatu jubuque ejeque cuana tsecada eje uma piji anitaya cuana queja.

‘Nequihuaticue, Ecuana Cuatsashaquique junayaju ishu. Jidamaque neajacacue.

Jida tuyu nejucue, ediji benubenuque etuyune ejuu bucha.

⁵ Dutyatu ebajeje jubuque.

Dutyajidama cuanaquetu etuyune jubuque.

Ediji ebajejeque buchatu jubuque, ehuedeta cuana ejeque-shabare bucha, emata, uhua cuemuscuana ecuepubare bucha, ediji benu benu cuanaque etuyunebare bucha, ediji dutya tupu ama cuanaque epapabare bucha.

⁶ Dutya queja cuanaquetu bahue jubuque eje bucha inajacameree Yusura abunque’ ”,

jadyatu Isaiasra hueneacuare béru.

⁷⁻⁸ Umada ecuita cuanatu cuacuare Juanra Yusuja quisarati cuejayaque ijacobacara, tuaqueja cutsameretira. Tuaqueja cuaya cuanaque tujatu ecana atsacuare:

—Cutsameretimaquedya necabamereticue inime cacuaretihuaque, cajuchaticarama juyaque jadya. Bacua cuana yachi tiruyaju eje buchadya huanacara ejuu bucha micuana juya. Cutsameretitsu Yusura enerecaturauque ehuanau bucha tuque micuanaja inime juya. Jadya ama

tuque. “Abraham eque ejuracanaque tibu, ecuana Yusura nerecaturabuque ama”, jadya micuanaja inime paju ama. Dyaque inime metseque juishuque ama tu Abraham eque ejuracanaque. Cuejaya micuana era. Yusujatu aniya casa riyaque tumu cuana Abraham eque ejuracanaque amere ishu. ⁹ Micuana micuana acui cacacati baecuaque bucha. Acui cacacati baecuaque tu jacha tsehue cuere, pahua jadya aishuque. Jadya micuana Yusura abuque, micuana inime cacuaretiyaque ama juatsu. Acui cuere bahuera eau bucha tura micuana abuque, —jadya tuna Juanra cuejacuare.

¹⁰ Jadyatu tuque bacaqui cuanara bacaduracuare:

—Jutaquiju ¿ai ecuana Yusura amerecara aya? —jadya tunajatu acuare.

¹¹ Tura tuna quemitsacuare:

—Jadya nejucue yuneridya micuana inime cacuaretihuaque ejitaju juishu. Ejeja beta camisa aniyajatu tyataqui peadya ejeja aijama cuitaque. Ejeja ara ishuque aniyajatu jaquetsu tyataqui ejeja aijamaque, —jadya tujatu ecana acuare.

¹² Tumetu juticuare Roma juque enaruquija chipiru bacaqui cuanaque cutsameretira.

—Ebahuityaquique, ¿eje bucha ecuana ejuu inime cacuaretihuaque ejitaju cabamereti ishu? —jadya tunajatu Juan acuare.

¹³ —Dyaque cuita ecana netsujebacaume. Cacuatshatira tsuje bacaya tupu camadya netsuje bacacue, —jadya tujatu ecana acuare.

¹⁴ Tumebaedyatu sudaru cuanara bacaduraticuare:

—¿Ecuana bacue eje bucha jutaqui inime cacuaretihuaque ejitaju adebataqui juishu? —jadya tunajatu acuare.

—Nesecaume ai ni ejeque casada tsehue. Misida neaume ni ejeque eje bucha jumaquedya jutidya. Pureamadya jutidya nejucue micuana tsujetyataya tsehue, —jadya tuna Juanra acuare.

¹⁵ Ecuata cuanatu quihuaticuare ai cuana dyaque jidaque etyatauque ihua. Tume tuna cabacaduratibarecuare tuna cama:

—¿Juan ni taa ri Mesiasdya ejuu Yusuja Emepeque, aijama ni taa? —jadya tuna jubarecuare.

¹⁶ Tume tuna Juanra dutya jadya acuare:

—Era micuana utsaya ena tsehue, inime cacuaretihua jadique adebataqui juishu. Tsunutaya amatu peya junayaque. Tujatu dyaque casa aniya, ecue bucha ama. Tuque baatsu ique ni aishuquedya jutidya; mere puji tuja patrón tsehue beta tupu ama ejuu bucha jutidya ique. Tume junayara micuana Yusuja Espiritu tyanaya, tujaque jadique adebataqui juishu. Tuaequeja catyaticarama juya cuanaque

tujatu nerecaturadadiya ijahuaja etiquiju. ¹⁷ Ecuíta trigo iruru, tsaje jadya aishuque buchique tu Junayaque. Turatu tuja cuanaque nityasicuanabuque tunaja ishú cuita emajacaju, ecuíta trigo etareju equiyatiu bucha. Tuja ama cuanaque bacuetu ijehuebuque nerecatura ishú etiqui ticu baecuaju, trigo tsaque epahuata bucha, —jadya tuna Juanra cuejacuare.

¹⁸ Jadya eque, peya umada cacuejati eque jadyatu Juanra cuejacuejanicuare ecuíta cuana jida iyacuaque quisarati.

¹⁹ Tumebaedya tujatu huaraji Herodes nereda bucha cuejae acuare, Herodías tuatsehuequi Felipeja ehuanegue tsehue baatsu. ²⁰ Herodesratu cuejayaju bacacarama acuare. Tura cuejayaque bacataquiquetu dyaque jidama jutidya inime tupucuare. Etare apudaju jutidyatu Juan ishamerecuare.

Jesús cutsamereticuareque

(Mt 3.13-17; Mr 1.9-11)

²¹ Etare apudaju ishatanama jariratu Juanra utsacuare jaridya umada tuaqueja jutiya cuanaque. Jesústu cuacuare tuaqueja cutsameretira. Tumetu Juanra Jesús utsacuaredya. Amena Jesús cutsameretitsu, Yusu tsehue quisaratiyajutu barepa pacashatanacuare. ²² Bacuaretu Yusuja Espíritu huei jiuque tuque dyaque buteyaju. Tume tujatu barepa juque etsuri bacacuare. Yume tucuetu jucuaré tuja Etataque Yusu.

—Mique mique ecue Ebacua dyaque iyuhuedaque. Ique dyaque pureama juya miatsehue, —jadya tujatu acuare.

Jesucristoja ecuaque eque ebaba cuanaque jucuaré cuanaque

(Mt 1.1-17)

²³ Quimisha tunca maraquetu Jesús Yusuja quisarati bahuitya catibuticuare. Ecuíta cuanaratu Joséja ebacuaque buchadya jutidya bacuare.

José tu Elíja ebacuaque jucuaré.

²⁴ Elí tu Matatja ebacuaque jucuaré.

Matat tu Levíja ebacuaque jucuaré.

Leví tu Melquiya ebacuaque jucuaré.

Melqui tu Janaja ebacuaque jucuaré.

Jana tu Joséja ebacuaque jucuaré.

²⁵ José tu Matatiasja ebacuaque jucuaré.

Matatías tu Amósja ebacuaque jucuaré.

Amós tu Nahúmja ebacuaque jucuaré.

Nahúm tu Eslija ebacuaque jucuaré.

Esli tu Nagaija ebacuaque jucuaré.

²⁶ Nagai tu Maatja ebacuaque jucuaré.

Maat tu Matatiasja ebacuaque jucuaré.

Matatías tu Semeija ebacuaque jucuaré.

Semei tu Josécja ebacuaque jucuare.
Joséc tu Judája ebacuaque jucuare.
²⁷ Judá tu Joanánja ebacuaque jucuare.
Joanán tu Resaja ebacuaque jucuare.
Resa tu Zorobabelja ebacuaque jucuare.
Zorobabel tu Salatielja ebacuaque jucuare.
Salatiel tu Nerija ebacuaque jucuare.
²⁸ Neri tu Melquiya ebacuaque jucuare.
Melqui tu Adija ebacuaque jucuare.
Adi tu Cosamja ebacuaque jucuare.
Cosam tu Elmadamja ebacuaque jucuare.
Elmadam tu Erja ebacuaque jucuare.
²⁹ Er tu Jesúsja ebacuaque jucuare.
Jesús tu Eliezerja ebacuaque jucuare.
Eliezer tu Jorimja ebacuaque jucuare.
Jorim tu Matatja ebacuaque jucuare.
³⁰ Matat tu Levíja ebacuaque jucuare.
Leví tu Simeónja ebacuaque jucuare.
Simeón tu Judája ebacuaque jucuare.
Judá tu Joséja ebacuaque jucuare.
José tu Jonamja ebacuaque jucuare.
Jonam tu Eliaquimja ebacuaque jucuare.
³¹ Eliaquim tu Meleaja ebacuaque jucuare.
Melea tu Menaja ebacuaque jucuare.
Mena tu Matataja ebacuaque jucuare.
Matata tu Natánja ebacuaque jucuare.
³² Natán tu Davidja ebacuaque jucuare.
David tu Isaíja ebacuaque jucuare.
Isaí tu Obedja ebacuaque jucuare.
Obed tu Boozja ebacuaque jucuare.
Booz tu Salaja ebacuaque jucuare.
Sala tu Naasónja ebacuaque jucuare.
³³ Naasón tu Aminadabja ebacuaque jucuare.
Aminadab tu Adminja ebacuaque jucuare.
Admin tu Arnija ebacuaque jucuare.
Arni tu Esromja ebacuaque jucuare.
Esrom tu Faresja ebacuaque jucuare.
Fares tu Judája ebacuaque jucuare.
³⁴ Judá tu Jacobja ebacuaque jucuare.
Jacob tu Isaacja ebacuaque jucuare.
Isaac tu Abrahamja ebacuaque jucuare.
Abraham tu Taréja ebacuaque jucuare.
Taré tu Nacorja ebacuaque jucuare.
³⁵ Nacor tu Serugja ebacuaque jucuare.
Serug tu Ragauja ebacuaque jucuare.

Ragau tu Pelegja ebacuaque jucuare.
 Peleg tu Heberja ebacuaque jucuare.
 Heber tu Salaja ebacuaque jucuare.
³⁶ Sala tu Cainánja ebacuaque jucuare.
 Cainán tu Arfaxadja ebacuaque jucuare.
 Arfaxad tu Semja ebacuaque jucuare.
 Sem tu Noéja ebacuaque jucuare.
 Noé tu Lamecja ebacuaque jucuare.
³⁷ Lamec tu Matusalénja ebacuaque jucuare.
 Matusalén tu Enocja ebacuaque jucuare.
 Enoc tu Jaredja ebacuaque jucuare.
 Jared tu Mahalaleelja ebacuaque jucuare.
 Mahalaleel tu Cainánja ebacuaque jucuare.
³⁸ Cainán tu Enósja ebacuaque jucuare.
 Enós tu Setja ebacuaque jucuare.
 Set tu Adánja ebacuaque jucuare.
 Adán tu Yusuja ebacuaque jucuare.

4

Satanásra Jesús cajuchatishacara acuaque
 (Mt 4.1-11; Mr 1.12-13)

¹ Tumetu Jesús, Yusuja Espiritura cuitadya aquereniyaque, cuacuare cueri Jordán emajaca queja amaca. Tuequedyatu Yusuja Espiritura dujucuare japada peya queja amaca anitaya amaju. ² Tuhadyatu jucuare pushi tunca huecaca. Aramatu jucuare. Pushi tunca huecaca cuetihua-jutu amena aracara jucuare. Satanasratu cajuchatishacara acuaque. ³ Jipetitsu tujatu Jesús acuaque:

—Yusuja Ebacuaquepa mique, jadyami juya. Jutaquiju riyaque tumu pan cacueyatishacue, —jadyatu Satanásra acuaque.

⁴ Jesusratu acuaque:

—¡Aama! ¡Aya ama tuque era! Ehuene tu Yusuja quisarati: “Earaqúi tsehue jipidya amatu Yusura ecuita cuana anishaya. Tumbaedyatu Yusuja dutya cacuatsashati eque anitaqui”, —jadyatu Jesúsra acuaque.

⁵ Tumetu Satanásra Jesús dujucuare emata dyaque baru-daque matina. Tuequeradya tujatu yaratupu piji cuita bamerecuare dutya epu cuana riyaque yahua juque.

⁶ —Erami huaraji amereya dutya riyaque epu cuanaju. Tumeque epu cuana, dutya tuhua jidaque aniyaquetu ecuique. Era ejeque tyacara ayaque tuque tyaya. Etyau mique era dutya ai jidaque aniyaque. ⁷ Mira ique chichucata juatsu muiyaju, dutya riya cuanaque tuque micue ejuu, —jadyatu Satanásra acuaque.

⁸ Jesusratu acuare:

—¡Aijama, Ijahua! ¡Micue yacuaju ique chichucata junime ama! Ehuene tu Yusuja quisarati: “Mique Cuatsashaquique Yusu camadya muicue. Tura cuatsashaya eque peadya camadya jucue”, —jadya tujatu acuare.

⁹ Jadya juatsutu Satanásra Jesús Jerusalénju dujunucacuare. Dujutsu tujatu tsuraquerecuare Yusuja etare camahua baru-daju.

—Putitanacue reeque. Yuneridya ni mi Yusuja Ebacuaque, tumemi ujeda ecatiu ama, ¹⁰ Yusuja quisarati jadya ehue tibu:

“Yusuratu cuadishaya barepa juque tuque tsahuaqui cuanaque mique naru ishu,

¹¹ mique pacacayaju inatsa ishu, mique ni riya piji buchique ujeda cati ishu ama,

tumura ehuchiju ujeda eauju” jadya.

¹² Jesusratu acuare:

—¡Aama! ¡Aya ama tuque era! Tumebaedya tu Yusuja quisarati ehue: “Nime adebaume Yusu” jadya, —jadyatu Jesúsra Satanás acuare.

¹³ Jesús datse cajuchatishacara aatsutu Satanásja inime terecuare. Tume tujatu jacacuare eje uma huecaca cuana.

*Jesús Galileaju Yusuja quisarati cueja catibuticuareque
(Mt 4.12-17; Mr 1.14-15)*

¹⁴ Jesússtu dirunucacuare Galileaju. Yusuja Espirituratu jacacuare ama. Dutya tumeque emajacajutu ecuita cuanara Jesús cuatsabiji acuare. ¹⁵ Dutya huecaca tujatu ecana bahuityacuare Yusuja quisarati caradati ishuque etare cuanaju. Cuejayaque bacatsu tunajatu pureama acuare:

—¡Aijamatu peya ecuana jida bahuityaquique Jesús buchique! —jadya tuna jubarecuare tuna cama.

*Jesús Nazaretju juetinucacuareque
(Mt 13.53-58; Mr 6.1-6)*

¹⁶ Jesússtu cuacuare Nazaretju tuque catemuticuareju. Tuhua jari tuputu canajara huecaca cuanaju cuacuanicuare caradati ishuque etareju, tuja bahue. Tuhua nubitsutu netitsuracuare, Yusuja quisarati jebuda isara ishu.

¹⁷ Inamerecuare tunajatu quirica epirurique isara ishu Isaiasra quisarati cuejacuareque, Yusu equeque cuitadya beru huenetanacuareque. Quirica inatsa, pacasha jadya aatsutu Jesúsra dadicuare jadya ehuenecue. Tume tujatu isaracuare etsuri jebuda tsehue:

¹⁸ “Yusuratu tuja Espíritu eaqueja cuadishahua.

Mepehua tura ique, tuja quisarati nrecada cuanaque cueja ishu.

Cuadishahua tura ique, etare apudaju erisi netiya cuanaque inajacatanabuqueque cueja ishu, shuhui cuanaque capetatisa ishu, jidama ujeda ujeda ataya cuanaque tsahua ishu jadya.

¹⁹ Tura ique cuadishahua, Yusura amena ecuita cuana tuja jidaque bamereyaque huecaca amena juetihuaque cuejara”,

jadya tu ehueene Yusuja quisarati.

²⁰ Yusuja quisarati isarajacatsutu Jesúsra piruricuare quirica. Piruritsu tujatu tyacuare caradati ishuque etareju mere juyaque. Tumetu anibutecuare tuna cueja ishu. Dutya caradatihua cuanaratu pana peta acuare. ²¹ Tura tuna cuejacuare:

—Iyacia cuitadyari juhua riyaque ehue neque jadya judadiya jadya béru huenetanacuareque. Bacahuadya tuque micuanara, —jadya tujatu ecana acuare.

²² Dutya tuhua cuanaratu jida quisarati acuare Jesúsja ishu. Anajacatacuare tuna, tura jidaque quisarati cuejayaju. Cabacaduratibarecuare tuna:

—Riyaque ri Joséja ebacuaque. ¿Eje bucha juatsu jatsutu dyaque jida quisaratiya? —jadya tuna jucuaque tuna cama.

²³ Quisaraticuare jaritu Jesús:

—Eratu adebaya micuanara inime tupuyaque. “Casamati puji, casamaticue mita taca. Ecuana ratu mira Capernaumju ai ni ejeque ecuitaja ataquique ama achineque bacatsachine. Rehua dyadi acuedya”, jadya tuque micuana inime tupuya.

²⁴ “Era micuana jadya ayaqueri yunerique. Ni ejeque quisarati dyaque jida cuanaque cuejaqitu jida batsataya ama tuque catemuticuareju. ²⁵ Adebaya micuana ecuanaja yahua Israelju béru jucuaque, Elías Yusu equeque quisarati cuejaquique anicuare patyaque. Quimisha mara peya patya patya tuputu nei jucuaque ama. Dyaque mije tuna jucuaque dutya epu cuanaju. Anicua retu umada Israelju eahuemaju cuanaque nrecada cuanaque. ²⁶ Jadya ama buchatu Yusura Elías cuadishacuare ama ni ejeque buchique tuna tsahua ishu. Cuadishacuare tujatu peya yahua queja Sarepta epu bacaniju aniya queja. Tumeque eputu epu ebari Sidón japadama jucuaque. Epuna eahuemajuque tuhua aniyaque tsahua ishu tujatu cuadishacuare.

²⁷ “Micuanaratu adebayadya ecuanaja yahua Israelju junucacuareque, Eliseo Yusu equeque quisarati cuejaquique anicuare patyaque. Anicua retu jetiama ujejeda cuanaque pusesera ririshaya cuanaque ecuanaja yahuaju. Jadya ama bucha ni ejeque buchique tujatu tuhuaque chachanecuare

ama. Naamán camadyatu chachanecuare, peya yahua Siria bacaniju aniyaque, —jadya tuna Jesúsra acuare.

²⁸ Jadya bacatsu tuna caradati ishuque etareju aniya cuanaque dyaque cahuaiticuare. ²⁹ Cahuaititsu ecana netit-suracuare. Cuinanashacuare tuna Jesús epu juque. Emata dyaquetu tumeque epu jucuare. Dujucuare tuna emata matina, tueque pacacashacara aatsu. Iyecara datse tuna acuare. ³⁰ Jadya ama buchatu Jesús quinajacamereticuare. Quinajacameretitsutu tuna patya eque cuinanacuare.

Jesúsra ecuita ijahua cuanara quijhuatishayaque quijhuatishajacacuareque

(Mr 1.21-28)

³¹ Judirunucacualetu Jesús Capernaumju Galilea yahuaaju. Canajara huecacajutu ecuita cuana bahuitya jucuare. ³² Pureama tsehue tuna anajacatacuare tura bahuityayaque bacatsu, huaraji equisaratiu bucha quisaratie juya bacatsu.

³³ Anicualetu tumeque etareju ecuita ijahua cuanara quijhuatishayaque. Tuque quijhuatishaquiquedya jutidyatu ecuita eque quiquecuare:

³⁴ —¿Ai jitequemi jeya ecuana queja, Jesús Nazaret juque? ¿Ecuana aputasharami jeya? Adebaya mique ecuanara. Miquemi juchama. Yusu quejaquemi jehua, —jadya tujatu acuare.

³⁵ Jesusratu tumeque ijahua nereda acuare:

—¡Abacata jucue! ¡Iyacua cuita cuinanacue riyaque ecuita quejaque! —jadyatu Jesúsra acuare ijahua ecuita quijhuatishaquique.

Jadya quisarati aatsutu ijahuara ecuita yahua catsaqui amerecuare dutya tuhua aniya cuanaja yacuaju. Tuque rihuishatsutu cuinanacuare tuaquejaque eje bucha ameretsu ama. ³⁶ Dutya tuque petaqui jucuare cuanaque tuna jecutanacuare. Cabacaduratibarecuare tuna:

—¿Eje bucha quisaratietu Jesús jadya ejuu? Huaraji equisaratiu bucha rejari quisarati. Cacuatsashati casada tshuetu tura cuatsashaya ijahua cuana. Tuna bacue tuequedya juya tura amereya equedya, —jadya tuna jucuare.

³⁷ Tumeque jadya jucuarequetu tsapetanacuare dutya tumeque yahuaaju. Dutya tuna bahue jucuare Jesús jadya juyaque.

Jesúsra Simón Pedroja ehuanegueja ecuaque chachanecuareque

(Mt 8.14-15; Mr 1.29-31)

³⁸ Tumetu Jesús israelita cuanaja caradati ishuque etare juque cuinanatsu nubidirucuare Simónja etareju. Simónja ehuanegueja ecuaquetu dyaquene cuita, baara juyaque

jaracuare. Tumetu tuhua cuanaque Jesús queja canerecaticuare tuja chachane ishü. ³⁹ Jadya bacatsutu Jesúsra jipeticuare. Jipetitsu tujatu peque netititsu petaticuare. Nereda tujatu baara acuare. Baara nereda aya tshuedya cuitadyatu baara juyaque chacha jucuaire. Tumetu netitsuratsu earaqui jucuaire Jesús, tura mepehua cuanaque jadya mihua ishü.

Jesúsra umada ujejeda cuanaque chachanecuaireque
(Mt 8.16-17; Mr 1.32-34)

⁴⁰ Amena ijeti nubihuajutu ecuita cuanara becuare Jesús queja ujejeda cuanaque umada ujeje tsehue cuanaque. Tume tujatu ecana iyucaju emetucu tsehue jababarecuare. Jadya chachanee tujatu ecana abarecuare. ⁴¹ Umae cuanatu ijahua cuanara quijahuatishayaque jucuaire. Jesusratu ijahua cuana ijehuecuinacuare. Diruyaque tuna quiquecuare:

—¡Miquemi Yusuja Ebacuaque! —jadya tuna jubarecuare quiquecuare.

Jesusratu ijahua cuana nereda acuare. Quisaratishacarama tujatu ijahua cuana acuare, ecuita cuanara tuque Mesiasque eadebauju.

Galileaju Jesús Yusuja quisarati cueja jucuaireque
(Mr 1.35-39)

⁴² Huecacanucatsutu Jesús cuinanacuare epu juque, peya queja amaca anitaya amaju. Ecuita cuanaratu sareticuare. Junaticuare tuna tuaqueja. Banatitsu tunajatu acuare:

—Jesús, diruume. Ecuana tshuedya rehua anicue, —jadya tunajatu aticuare.

⁴³ Jesúsra tuna acuare:

—A, aijama eje bucha anitaqui ama rehua cabatiya. Cutaqui peya epu cuanaju jidaque quisarati cuejara. Cuejataqui tuque ecue tuhua cuanaque eje bucha narue ecana Yusura ayaque, jadya ishü ique cuadishatanacuare tibu, —jadya tujatu ecana acuare.

⁴⁴ Tumetu Jesús junenicuare Yusuja quisarati cueja juyaque caradati ishüque etare cuanaju dutya queja israelita cuana anitaya cuanaju.

5

Jae deru ishü cuanaque jae bicuera chajacuareque
(Mt 4.18-22; Mr 1.16-20)

¹ Juneniyaquedya jutidyatu Jesús netidirucuare Genesaret bacani bei jiruru. Ecuita cuanatu catiiticuare tuque peque, Yusuja quisarati baca juyaque. ² Bacuare tujatu beta cuaba memaque bei jiruru, jae puji cuana tunaja jae deru ishüque

utsara cuinanahuaju. ³ Tumetu Jesús anibutecuare Simónja cuabaju. Anibutetsu tujatu Simón acuare:

—Japajapa piji nejaca bei cuatsa.

Tuequera tujatu ecana cuejatibunecuare mejijiju cuanaque. ⁴ Amena quisaratiyacatsu tujatu Simón cuejacuare:

—Dujucue cuaba bei deda queja, —jadya tujatu Simón acuare.

—Nemarecue micuanaja jae deru ishucuanaque, —jadya tujatu ecana acuare tuhua cuabaju cuanaque.

⁵ Simonratu acuare:

—Ecuana Bahuityaquiue, dutya meta datse ecuana jae deru jusisahua. Ahua ama tuque ecuana ni peadya jae. Jadya ama bucha mira cuatsashaya tibu, pamaretinuca ecuana jae deru ishucuanaque, —jadya tujatu acuare.

⁶ Jadya ayaju maretsu tunajatu acuare umada jae, amena tunaja jae deru ishucuanaque jae bicuera chaja ishucuanaque. ⁷ Tume tunajatu peya cuabaju cuanaque eme ihuara acuare, tuna tsahuana ishucuanaque. Cuaatsu tunajatu jequeshacuare beta cuaba jae tsehucuanaque. Nudyajericuaretu cuaba ecatse jae bicuera.

⁸ Jadya baatsutu Simón Pedro nuyucuare Jesúsja yacuaju.

—Japada jucue eaquejaque, Ecuana Cuatsashaquiue. Ique ecuita juchaquiue jutidya, —jadya tujatu acuare.

⁹⁻¹⁰ Simón, tuatsehucuanaque juneniyaque ecatse Santiago, Juan, Zebedeoja ebacuaque ecatse, ejecutana tuna jucuar, jae jetiama baatsu. Tumebaedya peya cuana ejecutana jucuar. Tumetu Jesúsra cuejacuare Simón:

—Cacasaticue. Miquemi jae puji. Iyacu mique ecuita cuana Yusu adeba mere ishucuanaque amereya, —jadya tujatu Simón acuare.

¹¹ Jaratsuratsu tunajatu shanaquenacuare tunaja cuaba ecatse. Dutya shanaquenatsu tuna Jesús tsehucuanaque junenitibunecuare.

*Jesúsra ecuita pusesera ririshayaque chachanecuareque
(Mt 8.1-4; Mr 1.40-45)*

¹² Jesús tumeque epuju junatihua jutu ecuita pusesese huera rami ririshayaque juticuare. Jesús baatsutu tuja yacuaju chichucata jucuar ebutse quini tsehucuanaque yahua tseraya tupu, tuque muiyaque. Chichucata juatsu tujatu Jesús isaratsacuare:

—Ique Cuatsashaquiue, chachanecara aatsu taa mira ecue ujeje aniyaque echachaneu, —jadya tujatu acuare.

¹³ Tura jadya ayajutu Jesúsra jabacuare.

—Chachaneyadya mique era, —jadyatu Jesúsra acuare.

Jadya aya tsunumeetu pusesese aputacuare tuja ecuita juque. Chachadya tu jucuar.

¹⁴—Cuejacueja camadya aume ni ejequedya jutidya mique eje bucha chachae juhuaque. Aticue Moisésra amereya equedya. Riyata cuau cuitadya jucue pae queja, tuja mique pana adeba atsa ishü, “Chachadya rique” jadya tuja aishu. Cadujuticue Moisésra amerehua equedya riyaque ujeje chacha eju cuanaja Yusu tyabahueque. Jadya juatsutu ecuita cuana bahue juya mique amena chachaque, —jadyatu Jesúsra acuare.

¹⁵ Arepa Jesúsra cuejamerecarama ahua ama buchatu dutya queja tuque jadya juyaque quisarati tsapetanacuare. Jetiama ecuitatu caradaticuare Jesús quisaratiyaju baca ishü, tuja ujejeda cuanaque chachane ishü jadya. ¹⁶ Jesússtu eje uma cuau jubahue jucuaque emajaca ecuita anitaya amaju, tuhua Yusu tsehue quisarati ishü.

Jesúsra ajebaecuaque ajeshacuareque
(Mt 9.1-8; Mr 2.1-12)

¹⁷ Peya huecaca Jesús tuhua bahuitya bahuityayajutu fariseo cuana anibarecuare, tumbaedyä cacuatsashati bahuityaqui cuanaque. Tuna tuna jecuaque dutya Galilea jiruruque, Judea juque, Jerusalén juque jadya. Yusuja casa tshuetu Jesúsra chachanenicuare tuhua ujejeda cuanaque. ¹⁸ Tumetu junaticuare tuhua ecuita cuana ebadequi baeju ajebaecuaque duju juyaque. Datse tuna emajaca sarecuare ecuita jetiama ducu etareju nubicara juatsu, ajebaecuaque Jesúsja yacuaju huanacara aatsu datse. ¹⁹ Amena eje bucha nubitaqui ama cabatitsu, ecuita jetiama cuita baatsu, tuna tsuracuare ebarucue etare dyaque. Tsuratsu tunajatu eje uma teja bucha cuanaque huetsacuare etare camahua jepedaque. Huetsatsu tunajatu ajebaecuaque butyacuare ecuita jetiama ducu, Jesús netiya tuyu. ²⁰ Ujejedaque dujuqui cuanara Jesúsra ajebaecuaque eajeshauque ejeneyaque adebatsu tujatu jadya ajebaecuaque acuare:

—Micue jucha cuana tu amena eapupasha, tata —jadya tujatu acuare.

²¹ Jadya quisaratiyaju bacatsutu cacuatsashati bahuityaqui cuanara, fariseo cuanara jadya inime tupucuare:

—¿Eje bucha juatsuri riyaque ecuita jadya quisaratiya? Yusu tujatu ijillahuanaya. ¡Ni ejeradya jutidyatu jucha cuana eapupashau, Yusura peadya camadya! —jadya tunajatu inime tupubarecuare.

²² Jesússtu bahuedya jucuaque tunara eje bucha inime tupuyaque.

—¿Eje bucha juatsu tuque micuana jadya inime tupuya: “Yusu tujatu ijillahuanaya” jadya? Jida ama tuque micuana inime tupuya. ²³ Era ni ajebaecuaque eau: “Micue jucha

cuana tu eapupasha” jadya, eadebau ama tuque micuana ecue casa aniyaque, eapupasha, apupashama jadicue ejitaju ama tibu. Era ni eau: “Netitsuracue. Piruricue micue jara ishuque. Ajecue”, tumeque ura cuitadya tuque micuana eadebau ecue casa aniyaque, ajebaecuaque juneniyaju baya tibu. ²⁴ Tuque juneniya baatsu micuana bahue juya ecue tumbaedy a riyaque yahuaju jucha cuana apupasha ishu casa aniyaque, —jadya tujatu ecana acuare.

Tumetu Jesúsra acuare ajebaecuaque:

—Netitsuracue. Piruricue micue jara ishuque. Dirucue micue etareju, —jadya tujatu acuare.

²⁵ Jadya ayaju cuitatu ecuita netitsuracuare. Tuja jara ishuque piruritsu, huesatsutu cuinanaquenacuare tuhuaque dutyara petayaju. Tumetu dirucuaque tuja etareju Yusu pureama ayaque. ²⁶ Dutya tuna anajacatacuare. Pureama tuna Yusu acuare:

—¡Dyaque jida, casada taa Yusu! Iyacia ecuana bahua dyaque bape ebarique, —jadya tuna jucuaque.

Jesúsra Leví tuatsehue juneni ishu ihuaracuareque

(Mt 9.9-13; Mr 2.13-17)

²⁷ Jadya juu jadya juatsutu Jesús cuinanaquenacuare epu juque. Tume tujatu ecuita bacuaque Roma juque enaruquiya ishu chipiru tsuje bacayaque juaniyaju. Tuquetu Leví bacani jucuaque. Tunaja etsujequi sita ishu pequetu juanicuaque.

—Eatsehue junenicue, —jadyatu Jesúsra acuare.

²⁸ Jadya ahuajutu Leví netitsuraquenacuare. Dutya tujatu shanaquenacuare Jesús tsehue juneni ishu.

²⁹ Jadya juatsutu Leví chine arida caticuaque tuja etareju Jesús pureama aatsu. Tuhuatu jucuaedy enaruquiya ishu chipiru tsuje bacaqui cuanaque, umae bijidamadurataya cuanaque jadya. Tudy a tuna jetiama mesaju Jesús tsehue araaracuare. ³⁰ Fariseo cuanara, tumbaedy cacuatsashati bahuityaqui cuanara jadyara tunajatu bacuaque eje bucha juyaque. Jadya baatsu tuna quisaratitibunecuare Jesúsja ishu. Acuare tunajatu Jesúsra mepehua cuanaque:

—Riyaque ecuita cuana ri bijidamadurataya cuanaque. Micuana micuana araarataqui ama, ijijitaqui ama jadya enaruquiya ishu chipiru tsuje sitaqui cuana tsehue, tumbaedy peya jucha arida cuana tsehue, —jadya tunajatu ecana acuare.

³¹ Jesúsra tuna quisaratiyaju bacuaque.

—Chacha cuanaratu sareya ama casamati puji. Ujejeda cuanara camadyatu sareya. ³² Juchama bucha cabatiya cuanaque sarera ama jehua. Ique jehua jucha arida cabatiya cuanaque jiteque, tuna inime cacuaresha ishu, —jadya tuna Jesúsra acuare.

Eje bucha anitaqui amatu beruque inime eque, iyacua eque jadya

(Mt 9.14-17; Mr 2.18-22)

³³ Umae ecuita cuanaratu Jesús bacaduracuare:

—Juan tsehue juneniya cuanaqueri arama quibetiya Yusu muiyaque cabamereti ishu. Tumbaedyá fariseo cuana tsehue juneniya cuanaque jadidya ecana juya. Yusamimi ecana tsunuda juya; arama quibetijacama ecana juya. Mira mepehua cuanaque bacue ecana araaraya, ijijiyá jadya juya. Arama ecana quibeti baecua. ¿Eje bucha juatsu? —jadya tunajatu Jesús acuare.

³⁴⁻³⁵ Jesúsra tuna quemitsacuare:

—Caquemitiyaju cuaishu ecueja cuanaque tuna arama quibetiya ama caquemitihuaque tuna tsehueju. Tuna quejaque dujanahuaju piisi tuna arama quibetiya. Tumbaedyatu ecue cuanaque ique cuanucahuaju piisidya tuna arama quibetiya, —jadya tuna Jesúsra acuare.

³⁶ Jesúsra tuna bahuityayaque cuatsabiji eque cuejacuare:

—Ni ejeratu camisa iyacuaque racaya, camisa siri eraca iyacua tsehue sipi ishu. Jadya ayaque juatsutu yuamaturatanaya camisa iyacuaque. Tumetu esipiquique iyacuaque beru tsehue beta tupu ama juya. ³⁷ Tumbaedyatu ishataqui ama tupari sasana ishuque sura siri cuitaju. Tupari sasanyaratu epututashau sura siri. Tumetu eaputau sura, tupari jadya. ³⁸ Jadya tibudyatu tupari sasana ishuque sura jida iyacujau ishataqui. ³⁹ Ni ejeratu tupari uqueuqueque ijicara aya, tupari sasadaque ijitsu, tupari sasadaquepa dyaque jida jadya juatsu, —jadya tujatu ecana acuare.

(Riyaque cueja tsehue tuna Jesúsra bahuityacuare. Eje bucha anitaqui amatu beru inime israelita cuanara bahuityacuare eque, iyacuaque tura cuitadya bahuityaya eque jadique.)

6

Jesúsra mepehua cuanara trigo esa canajara huecacaju sepi-ajecuareque

(Mt 12.1-8; Mr 2.23-28)

¹ Tume patyatu Jesús cueticuare euhua cuana eque canajara huecacaju. Aridatu trigo euhuaque jucuaré ejahuane, amena racataqui. Jesúsra mepehua cuanaratu cuetiyaradya jutidya trigo esa sepitsu, irurutsu mucuajecuare. ² Umae fariseo cuanara baatsu tunajatu ecana cuejacuare:

—Moisésra cuatsashacuare eque ama micuana juya. Meredyá micuana juya etsucaca cuana sepi, iruru, mucu

jadya juyaque. Meretu jutabaecua canajara huecacaju, — jadya tunajatu ecana quemitsacuare.

³ Tuna jadya quisaratijaju bacatsu tuna Jesúsra quemitsacuare:

—Neadebacue ecuanaja ebaba David emuique jucuaque. Tuque, tuatsehue cuaya cuanaque jadya tuna aracara jucua. ⁴ Davidtu Yusuja etareju nubicuare. Nubitsu tujatu Yusuja ishu eiyaque pan cuana inacua. Inatsu tujatu aracuare. Tumebaedyatu tyacuare tuatsehue cuaya cuanaque. Arepa tuja, tuatsehue cuaya cuanaja jadya arataquima paju ama bucha tuna aracuare, pae cuanaja cuita camadya arataquique. Jadya ama buchatu Yusu cahuaishacuare ama, tumeque pan aratsu.

⁵ “IQUE ECUITAJatu aniya cacuatsashati canajara huecacaju ai juishuque, —jadya tuna Jesúsra acuare.

Jesúsra ecuita emetucu majuque chachanecuareque
(Mt 12.9-14; Mr 3.1-6)

⁶ Canajara huecacajutu Jesús caradati ishuque etareju nubinucacuare. Catibuticuaretu bahuitya bahuitya. Tuhuatú jucua ecuita jida equeque emetucu majuque. ⁷ Cacuatshati bahuityaqui cuanara, fariseo cuanara jadyatu Jesús jidama inime tupu tsehue petacuare. “Tura ni canajara huecacaju riyaque emetucu majuque chachaneya, tume tuque ecuanara huaraji cuana queja cuejatiyadya”, jadya tunajatu inime tupucuare.

⁸ Jesússtu bahue jucua eje bucha tunara inime tupuyaque. Tume tujatu isaracuare ecuita emetucu majuque:

—Netitsuracue. Netinacue requeja tuna patya, —jadya tujatu acuare.

Jadya ahuajutu netitsuracuare tumeque ecuita. Netitsurat-sutu tuna patya netiticuare. ⁹ Tumetu Jesúsra tuhua cuanaque bacaduracuare:

—Bacaduraya micuana era. ¿Ecuana cacuatsashati eque canajara huecacaju tuque ecuanaja jidaque ataqú, jidamaque ni taa? ¿Ejeque majutaquí baatsu echachaneudya tuque ecuanara, “Pamaju” jadya ni taa ecuanara eau? ¿Eje bucha micuana inime tupuya? —jadya tujatu ecana acuare.

¹⁰ Tumetu Jesúsra petacuare dutya tuque tabuquí cuanaque. Tuna petatsutu anucacuare ecuita emetucu majuque:

—Rirucue micue ebi, —jadya tujatu acuare.

Jadya ayajutu ecuitará rirucua ebi. Tura ebi riruya tsehuedya cuitadya tujatu emetucu chacha jucua. ¹¹ Jadya juya baatsutu Jesús ujeu baquí cuanaque dyaque cahuaicuare. Tuna cama tuna cacuejaticuare:

—¿Eje bucha tuque ecuana eau Jesús iyemere ishú? —jadya tuna tuna cama jucuare.

Jesúsra peadya tunca beta earacana tuatsehue juneni ishú mepecuare cuanaque

(Mt 10.1-4; Mr 3.13-19)

¹² Jadya juu jadya juatsutu Jesús tsuracuare emataju Yusu tsehue quisaratira. Peadya meta yutatu Yusu tsehue quisaratisacuare. ¹³ Huecacatsu tujatu tuaqueja ihuaracuare tuatsehue juneni ishú. Tume tujatu mepecuare peadya tunca beta earacana.

—“Jesúsja Ecuadisha cuanaque” jadya bacani eque neadebatacue, —jadya tujatu ecana acuare.

¹⁴ Ebacaniju tujatu abarecuare:

Simón (Jesúsra tujatu peya ebacani iyacuare “Pedro”).

Andrés (Simón tsehuequique)

Santiago

Juan

Felipe

Bartolomé

¹⁵ Mateo

Tomás

Santiago (Alfeoja ebacuaque)

Simón (Tuque patu Roma juque enaruquique bijidamaduraqui juyaque jucuare.)

¹⁶ Judas (Santiago tsehuequique)

Judas Iscariote (Jesús inamerequi judadicuareque)

Jadya tuna jucuare tura mepecuare cuanaque.

Jesúsra jetiama ecuita cuana bahuityacuareque

(Mt 4.23-25)

¹⁷ Jesústu butecuare emata juque tuna tsehue. Tumetu netidiruare uhua jepedaju tura mepehua cuana tsehue. Tumbaedya anicuare umada ecuita dutya quejaque Judeaju aniya cuanaque jecuareque, Jerusalén juque, dyaque japada cuanaque Tiro, Sidón jadya quejaque. Tume cuanaque tuna junacuare Jesús quisaratiyaque bacacara aatsu, tuja chachane ishú jadya. ¹⁸ Jesúsra tuna chachanecuare. Tumbaedya tujatu ijehuecuinacuare ijahua cuana umaecuita cuana quijahuatishaqui juya cuanaque. ¹⁹ Dutya ecuitaratu Jesús jabacara acuare tuja unaju. Tuja una jabatsudya jutidya tuna chacha jubarecuare.

Jida, jidama jadya aniya cuanaque

(Mt 5.1-12)

²⁰ Jadya juatsutu Jesúsra tura mepehua cuanaque petatsu acuare:

—Dyaque jida micuana aniya. Arepa micuana nrecada juya ama bucha, Yusura micuana naruya, baya jadya aya.

21 “Dyaque jida micuana aniya. Arepa micuana iyacua aracara juya ama bucha, tupuju micuana tyatanabuque dutya micuanara ai sareya cuanaque, pana jeque juya tupu.

“Dyaque jida micuana aniya. Arepa micuana iyacua peya inime juya ama bucha, tupuju micuana casaturatanabuque.

22 “Dyaque jida micuana aniya, arepa iyacua micuana Yusu jaque ama cuanara ujeu baya ama bucha, arepa tunara micuana caradati ishuque etare juque ijehueya ama bucha, arepa tunara micuana ijillahuanaya ama bucha, arepa tunara micuana bijidamaduraya ama bucha. Tunara micuana nerecaturaya, IQUE ECUITA queja catyatihua baatsu. Jadya ama bucha dyaque jida micuana aniya. 23 Jadya atayaju, dyaque pureama nejucue. Necanimehuallatiume, barepaju Yusura dyaque jidaque tyatsabuqueque adebatsu. Micuana camadya ama micuana jadya canerecatie juya. Jadya nerecaturaedyatu tunaja ebaba cuanaquera acuare béru Yusu equeque quisarati cuejaqui cuanaque.

24 “¡Nerecapane micuana, ecue ama cuanaque, chipiruda cuanaque! Ryaque yahuaju camadya micuana pureama juya; tupuju bacue aijama.

25 “¡Nerecapane micuana iyacua jetiama ai dyaque umada aniya cuanaque! Tupuju tuque micuanaja aijama jubuque.

“¡Nerecapane micuana iyacua pureama juatsu tsaya cuanaque! Quique, pau pau micuana jubuque.

26 “¡Nerecapane micuana! Dyaque jidama micuana nerecada jubuque, arepa iyacua dutyara jida micuanaja ishū quisarati aya ama bucha, tupuju bacue aijama. Micuanaja ishū camadya ama jadya jida quisaratie juya. Jadya jida quisaratiedyatu jucuaré micuanaja baba cuana pusha pusha bahuityaqui cuanaja ishū, —jadya tuna Jesúsra acuare.

Eje bucha iyuhuebatsae ecuana ujeu baqui cuanaque aishuque

(Mt 5.38-48; 7.12)

27 Jesúsra tuna bahuityanucacuare:

—Micuana ique bacaqui cuanaque micuana cuejaya. Iyuhueda nebacue micuana ujeu baqui cuanaque. Jida ecana nebacue. 28 Micuana jidama quisarati tsehue aqui cuanaque jida nebacue. Yusu queja nebacabacacue micuana ijillahuana, jidama aqui cuanaja ishū. “Jida jucue ique ujeu, jidama jadya aqui cuana tsehue”, jadya Yusu neacue. 29 Ejera bahuapajayaque juatsu, peya ebahua eque necatimerenucacue. Ejera micuana chompa secayaque juatsu, netyacuedya micuanaja camisa. 30 Ejera ai bacayaquedyá netyacue. Ejera micuana jaque ai secayaque juatsu, “Cuaretyau anucacue” jadya neaume. 31 Peya cuana

queja necabamereticue tunara eje bucha bacara aya eque. Jadya tibudya tuna dyadi jida tsehuedya nebacue.

³² “Micuanara ni micuana iyuhueda baqui cuanaque camadya iyuhueda baya, “Ecuana ecuana peya cuana bucha dyaque jida”, jadya micuanaja inime paju ama. Butsee jucha arida cuanaratu iyuhueda baya tuna iyuhueda baqui cuanaque. ³³ Micuana jida aqui cuanaque camadya ni micuana jida baya, “Ecuana ecuana peya cuana bucha dyaque jida”, jadya micuanaja inime paju ama. Butsee jucha arida cuanaratu tuna jida aqui cuanaque jida baya. ³⁴ Micuanara ni chipiru tyaya ejeque micuanara cuaretyau anucayaque adebayaque camadya, “Ecuana ecuana peya cuana dyaque jidaque”, jadya micuanaja inime paju ama. Butsee jucha arida cuanaquetu jadidya juya. Tunaratu jucha arida cuanaque tyayadya, tunara ecuarequi tyanucayaque adebatsu. ³⁵ Iyuhueda nebacue micuana ujeu baqui cuanaque. Jida ecana nebacue. Netsahuacue ecana. Netyacue ecana ai tunara bacayaque, “Cuaretyau tura anucaya”, jadya juatsu ama. Jadya juatsu micuana Yusura dyaque jidaque tyadadibuque. Yusu tu dyaque jida, tuque yusurupai abae-cua cuana tsehue, jidama cuana tsehue jadya. Micuanara ni ecana jida tsehue baya, tume micuana Yusu ebarucueja ebacua cuanaqueque ejitaju cabameretiya. ³⁶ Jida tsehue nebacue ejequedya jutidya, micuanaja Tatara micuana jida tsehue baya bucha, —jadya tujatu ecana acuare.

Peya cuana jidama juyaque cuatsabiji jutaquique ama (Mt 7.1-5)

³⁷ Jesúsra tuna bahuityanucacuare:

—Micuanara ni peya jidama juyaque cuejaya, tume micuana Yusura eje bucha juyaque cuejayadya. Micuanara ni “Peya cuanatu inime metse” jadya aya ama, tume micuana Yusura “Inime metse” jadya ama aya. Micuana ni pana nime aputa juya peya cuanara jidama ayaque, tumetu Yusu micuana jidama juyaque pana nime aputadya juya. ³⁸ Netyacue peya cuana; Yusura dyadi micuana tyayadya. Inijeda nejuume tuna tsehue. Ijahue ecana neaume equiniqui pana jequesha ama tsehue. Nejequeshacue tunaja equiniqui. Pana jequesha neacue. Cuacha cuacha jequesha tii jadya tunaja shitara neacue. Pana jequesha tii ai nudyanucataquima neamerecue. Micuana ni peya cuana ai tyashu inijeda juya, tumetu Yusu dyadi inijedadya juya micuana jidaque tyashu. Micuanara ni tyacara tsehue tupuya ai tyayaque, tume micuana Yusura dyaque jidaque tyaaiejadya jutidya, —jadya tujatu ecana acuare.

³⁹ Jesúsra tuna cuatsabiji cuejacuare tuna bahuityayaque:

—¡Eje bucha jida caaquerenitie jatsutu ejuu beta tupu shuhuique ecatse! Tume taa tatse betadya caniju epacacadiruu. ⁴⁰ Ejeque cabahuityatiyaque tu tuque bahuityaqui que bucha dyaque bahuee ama. Tuque bahuityatayaque bahue juteretsu piisitu tuque bahuityaqui que bahuee bucha ejudadiu.

⁴¹ “Micuanaja cuitadya yatucaju acui tibu ebari aniyaque juatsu, ¿eje bucha juatsu jatsu tuque micuana peyaja yatuca juque aijara piji quemicara aya? ⁴² Micuanaja cuitadya yatucaju acui tibu aniyaque caadebatiyaque ama, ¿tume tuque micuana peya eje bucha juatsu jadya eau: “Aijara tuque micue yatucaju aniya. Paquemi micue era”, jadya eau? ¡Ebaupa, ai jadique micuana shuhuique buchique! Icuene micuana cuitadya yatuca juque acui tibu necaquemiticue. Caquemititsu tuque micuana ebau jida peyaja aijara yatuca juque quemi ishu, —jadya tuna Jesúsra acuare.

(Riya tsehue tujatu ecana bahuityacuare: Neadebacue micuanaja jucha. Adebatsu neajacacue, peyaja ishu jidama quisaratimaque.)

Ecacaju acui adebataqui que

(Mt 7.16-20; 12.33-35)

⁴³ Acui jidajatu juya amadya ecaca jidama arataquimaque. Acui arataquimajatu juya amadya ecaca arataqui que. ⁴⁴ Dutya acuitu adebataqui ecacaju. Acui cuijaquijutu higo ni uvaja ecaca juya ama. ⁴⁵ Ecuíta jidaquetu jidadya quisaratiya, jidaque inime tuja educuju aniya tibu. Ecuíta jidamaque bacue jidama quisaratiya, jidamaque inime tuja educuju aniya tibu. Educuju ecuanaja inime tupu aniyaquedya tuque ecuanaja quisarati abahue —jadya tuna Jesúsra acuare.

Jesús queja nimee cuanaque, tuaqueja nimee ama cuanaque jadya

(Mt 7.24-27)

⁴⁶ Jesúsra tuna cuejanucacuare:

—Ni eje bucha “Ecuana Cuatsashaqui que” jadya ataqui ama micuanaja ique, ai micuana era amereya eque juya batu. ⁴⁷ Cuejaya micuana riyaque cuatsabiji micuana huecasha ishu, ai bae eaqueja catyatitsu ecue quisarati bacaqui cuanaque jadique. ⁴⁸⁻⁴⁹ Anicuairetu beta ecuíta etare caticuareque ecatse. Icueneratu deda purucuare. Puru jadya aatsu tujatu tumu ebari dyaque yahua pajidaju dudu cuana puchacuare. Jida deda tujatu puchacuare ni eje tupu bucunuca ishu ama. Peya bacue mejijiju jutidya etare caticuare. Cueri pesitanatsutu ejuri casada tsehue etare ecatse catsaqui jucuare. Icueneque etare pujija eaque casada neticuare.

Rihuicuare ama, dudu cuana yahua pajidaju casada epucha tibu. Peyara etare acuareque bacue rihuicuare, mejijiju jutidya dudu cuana epucha tibu. Pana aputatere jucuare.

“Era bahuityayaque bacatsu era amereya eque juya cuanaque tuna yahua pajidaju etare caticuare buchique. Tuna tuna ni eje tupu yuamaturatana ishuque ama. Era amereya eque ama juya cuanaque bacue mejijiju etare caticuare buchique. Tuna tuna pana aputatere jubuque, —jadya tuna Jesúsra acuare.

7

Jesúsra 100 sudaru cuana cuatsashaquiija mere puji chachanecuaque
(Mt 8.5-13)

¹ Jesússtu ecuita cuana isaratilla amena aatsu, cuacuare peya epu Capernaum bacaniju. ² Tuhuatu jucuare huaraji cien sudaru cuana cuatsashaquique Roma juque ecuadishaque. Anicuare tujatu mere puji dyaque iyuhuedaque. Tumeque tuque merequiquetu dyaque ujejeda majuhuie jucuare. ³ Jesússpa ujejeda cuanaque chachane juya jadya bacatsutu cien sudaru cuana cuatsashaquira ihuaracuare umae israelita cuana emuiba cuanaque.

—Necuaque Jesús queja. Necuejaticue paje rehua. Pachachanenatu ique merequique, —jadya tujatu ecana acuare.

⁴ Tura jadya ahujaju tuna cuacuare Jesús queja. Tuque jipetitsu tuna tuaqueja canerecaticuare:

—Nerecabacue taa ecuana. Chachaneticue cien sudaru cuana cuatsashaquiija mere puji. Dyaquene cuita, majuhuie tuque. Nerecabacue taa sudaru cuanaja huaraji. Tuquetu dyaque jidaque. ⁵ Arepa Roma juque ama ama bucha, dyaque iyuhueda tujatu baya ecuanaja ata israelita cuana. Turadya tuque ecuanaja amerecuare etare ecuana caradati ishuque rehua Capernaumju, —jadya tunajatu acuare Jesús.

⁶ Tunara jadya ayajutu cuacuare Jesús tuna tsehue. Jesús etare japadama juajeyaju tuna huarajira cuadishacuare tuja eadeba cuanaque Jesús cuejatsa ishu:

—Jetaqui ama taa mi ecue etareju, Ique Cuatsashaquique. Ique israelita ama. Bahuedya ique micue cacuatsashati eque mique ecue etareju nubitaquique ama. ⁷ Jadya tibudya mique tsurutsahua ama, ique mique buchique ama juya tibu. Nerecabacue ique. Mique eju netiya eque camadya cuatsashacue ique merequique ecue chacha juishu. ⁸ Ique ecue huaraji cuanara cuatsashayaju yana equedya jubahue. Era dyaditu sudaru cuana cuatsashayadya. Era ecue sudaru

cuadishayaju, masadamadyatu cuaya. Peya ni era ihuaraya, masadamatu jeya. Era ni ecue mere puji “Acue jeeque” jadya aya, masadamadya tujatu aya. Ique bahuedya micue casa aniyaque ique merequique chachane ishu, —jadyatu huarajira cuejamerecuare Jesús.

⁹ Jadya bacatsutu Jesúsra ecuita bape bacuare tuja que-jeneti baatsu. Tibene huarere juatsu tujatu tuque tupuju cuaya cuanaque petacuare.

—Riyaque Romajura taa dyaque ejene neri aya era tuja tuque merequique echachaneuque. Pusha amadya aijamatu ni ejeque ecue ata israelita ique dyaque ejenequique, —jadya tuna Jesúsra acuare.

Tumetu Jesúsra tuequeradya jutidya chachanecuare. ¹⁰ Amena etareju judirunucatsutu cuadishahua cuanara badirucuare huaraji merequique chacha juhuaju.

Jesúsra eahuemajuja ebacuaque majuhuaque chacha nityat-suranutacuareque

¹¹ Jadya juatsutu Jesús cuacuare Naín bacani epuju. Tura mepehua cuanara, peya umada ecuita cuanara jadyatu taji-ajecuare. ¹² Amena epu piji dyanetu Jesusra tsurutsacuare ecuita cuana ehue ebari emajuque tumu caniju ishata ishu duju juyaju. Tumeque emajuquetu epuna eahuemajuja peadyaque piji ebacuaque jucuare. Umada ecuita epu ebar-iju cuanaratu epuna tajiajecuare. ¹³ Jesusratu eahuemajuque baatsu, nercada bacuare.

—Paume, mama, —jadya tujatu acuare.

¹⁴ Jipetsu tujatu emajura jara ishu ayaque jabatsacuare, emajuque dujuqui juya cuanaque nityatsa ishu. Jabatsaya-jutu emajuque duju juya cuanaque netinaticuare.

—Anitsuracue, ehue ebari emajuque, —jadya tujatu acuare emajuque.

¹⁵ Jesúsra jadya ayajutu ehue ebari emajuque chacha junucacuare. Chacha juatsutu anitsuracuare. Quisaratiti-bunecuare. Chachanetsutu Jesúsra ehue ebarija ecuaque cuejacuare:

—Jee micue bacua chacha juhua, mama, —jadya tujatu acuare.

¹⁶ Jadya baatsutu tuhua cuanaque anajacatacuare. Yusuja ishu tunajatu jida quisarati acuare:

—¡Yusu equeque quisarati cuejaquiquetu ecuana tsehuedya aniya! —jadya tuna jucuare.

¹⁷ Dutya Judea yahuaju, peya epu japadama cuanaju aniya cuanaque jadya tuna bahue jucuare Jesúsra emajuque chacha nityatsuranucahuaque.

Juan Ecuira Cuana Utsaquira Jesús bacaduramerecuareque
(Mt 11.2-19)

¹⁸ Juan Ecuira Cuana Utsaquiratu bacatsacuare quisarati Jesús ai juyaque, emajuque tura chacha nityatsuranuc-
ahuaque. Juan tsehue juneniya cuanaratu cuejacuare.
¹⁹ Jadya bacatsutu Juanra ihuaracuare beta tura mepe-
huaque ecatse, Jesús queja cuadisha ishu, tuque bacadurati
ishu:

—¿Midyami Mesías, Yusuja Emepeque rehua junataquique?
¿Ihuaya jari ni taa ecuana peya? —jadya tatse Juanra Jesús
bacaduramerecuare.

²⁰ Juanra cuadishahuaque ecatsetu junaticuare Jesús
queja. Junatitsu tatsejatu anaticuare:

—Juan Ecuira Cuana Utsaquira yatse cuadishahua rehua
mique bacadurara. ¿Midyami Mesías, Yusuja Emepeque rehua
junataquique? ¿Ihuaya jari ni taa ecuana peya? —jadya
tatsejatu aticuare.

²¹ Tatse junatihua jutu Jesúsra chachanecuare umada
ujejeda cuanaque, dyaque jidama ujeje cuana tsehue
nerecada jucuare cuanaque. Chachanecua retu ijahua
cuanara quijahuatishaya cuanaque; tuna quejaque tujatu
ijahua cuana ijehuecuinacuare. Umada shuhui cuanaquetu
capetatishacuare. ²² Tume tatse Jesúsra quemitsacuare:

—Metseratu bacahuadya era ai cuejayaque. Bahuadya
metsera ique ujejeda cuanaque chachane juyaju.
Dirunucatsu Juan necuejadirucue metsera bahuaque,
bacahuaque jadya. Necuejacue era shuhui cuanaque
capetatishayaque; rudurudu cuanaque rena jida ajeshaya;
pusesera ririshaya cuanaque rena chachaneya, isahue
cuanaque rena quijacabatishaya; emaju cuanaque rena
nityatsuranucaya; nerecada cuanaque rena Yusu queja
judiru ishucue quisarati cuejaya. ²³ Dyaque jida paju ique
dyaque adebaquique, eaqueja nimee jujacayaque ama jadya,
—jadyatu Jesúsra Juan cuejamerecuare.

²⁴ Juanra cuadishahuaque ecatse diruhua jutu Jesúsra cue-
jatibunecuare Juan eje buchique:

—Jetiama micuana cuachine yachiju Juanra cuejayaque
ijacabacara. ¿Ai tuque micuana batichine tuhua?
Micuanaratu adebahuadya Juanra ejenecara, ejenecarama
jadya ama Yusuja quisarati ahuaque. Shita cuejijira peya
queja huanati, peya queja huanati eau bucha ama tuque.

²⁵ Bacaduranucaya micuana era. ¿Eje buchique ecuita
batiya bucha tuque micuanaja inime juchine? Bahuedya
micuana, tuque ejutuqui jida piji tsehue ama ecajututique.
Ejutuqui jida piji tsehue ecajututi cuanaque tuna chipiruda
cuanaja, ecuari cuanaja etareju aniya. ²⁶ Bacaduranucaya

micuana era. ¿Ai bucha adebatsu tuque micuana batichine? ¿Yusu equeque cuitadya quisarati cuejaquique ni taa tuque micuana batichine? Pusha amadya, Juan tu Yusu equeque cuitadya quisarati cuejaquique. Yusuratu tuque mepecuare israelita cuana quisarati cueja ishu. ²⁷ Jadya tu Yusuja quisarati ehue:

“Cuadishabuque tuque mique cuadishama jariju ique merequique.

Turatu ecuita cuana bajejebuque, tunaja mira quisarati cuejadadibuqueque bacatibune ishu”.

Juan tu Yusuja quisarati cuejaquique. ²⁸ Ryaque micuana cuejaya. Juan Ecuita Cuana Utsaquiratu quisarati cuejahua dyaque saretanayaque, beru yuequedya quisarati cuejaqui cuanara cuejahua buchique ama. Jadya ama bucha iyacua ecue cuanara cuejayaque tu dyaque jidaque, Juanra cuejacuare buchique ama. Jadidya tuque, arepa micuanara ecue cuanaque jetiedya, aishuque ama jadya baya ama bucha.

²⁹ “Dutya jujeri ebijidamadura cuanaque Juanra quisarati cuejayaque bacatsu, tunajatu inime juticuare, Yusu yuneridya tuyuque. Butsee Roma juque enaruquija ishu chipiru tsuje bacaqui cuanaque tuna inime cacuareticuare. Tuna jadya juhuaju tuna Juanra utsacuare. ³⁰ Fariseo cuanara, cacuatsashati bahuityaqui cuanara jadyara tunajatu bijidamaduracuare Yusura tunaja ishu eje bucha acara ayaque. Tuna tuna inime cacuareticuare ama; ni ecana Juanra utsacuare, —jadya tuna Jesúsra acuare.

³¹ Tume tuna Jesúsra bahuityanucacuare:

—¿Ai baetu iyacua aniya cuanaque? ¿Ai tsehue beta tupu jadya tuna eau? ³² Tuna tuna peya cuanara cuejaya eque jucarama juya. Ebacua cuana ijahue juya bucha jutidya tuna, peya ebacua cuanara ijahue aquerecara ayaju ijahue jucarama juya bucha. “Yusura tuaqueja judiru ishuque quisarati cuejamereyaju bacatsu, pureama nejucue”, jadya ayaju bacatsu, tuna pureama jucarama juya. “Peya inime micuanaja jucha cuana aniyaque caadebatitsu nejucue”, jadya ayaju bacatsu, tuna peya inime jucarama juya. Ebacua cuana tuna tsehue tupu cuanara rauta duduyaju ijahue jucarama ejuu bucha tuna. Ebacua cuana tuna tsehue tupu cuanara peya inimeque jeru ayaju pacarama ejuu bucha tuna. ³³ Iyacua tunara yatse bijidamadurahua Juan, ique jadya. Juantu anicuare quibeti neri juyaque, ecuita cuana tsehue araara, ijiji jadya juyaque ama. Tuque jadya juya baatsu tuque micuana ahua, tuquepa equijahuati jadya. ³⁴ Tuequedya IQUE ECUITA junahua. Ique bacue earaqui ara, uva nacaca esasanashaque iji jadya juya ecuita cuana tsehue.

Ique jadya baatsu micuanara “Dajicada, nijuqui arida” jadya aya. Iquepa ecuita cuanara bijidamaduraya cuanaja ecare; tumbaedy a quepa enaruquiya ish u chipiru sitaqui cuana tsehue casitatiya, jadya micuanara aya. ³⁵ Era, Juanra jadya ayaque baatsutu ejitaju yatse betadya Yusura bahue amereya eque juyaque, —jadya tuna Jesúsra acuare.

Fariseo Simón bacanija etareju Jesús cuacuareque

³⁶ Fariseo Simón bacaniratu Jesús ihuaramerecuare araaraquere ish u. Jadya ahujatu Jesús cuacuare tuja etareju. Junati jadya juatsutu anibutecuare araara ish u. ³⁷ Tumetu epuna decadeca aridara tumeque epuju aniyara bacacuare Jesús fariseoja etareju araarara cuahua jadique. Jadya bahue juatsutu epuna cuacuare tumeque etareju. Dujucuare tujatu ijimedaque dyaque tsuje aridaque botilla alabastro eaju equineque.

³⁸ Nubinatitsutu Jesúsja eh uachi peque anibutetsu pacuare, Jesús muibayaque caadebamereti ish u. Payara tujatu paanacaca tsehue Jesúsja eh uachi nacatashacuare. Eh uachi paanacaca tsehue nacatashatsu, tujatu etsaru tsehue tillatsu rarashacuare. Huachi dyahua jadya tujatu acuare. Jadya aatsu tujatu etseri ijimedaque juracuare tuja eh uachiju. ³⁹ Jadya juyajutu fariseora Jesús ihuaraqui juhuara bacuare. Jadya baatsu tujatu inime tupucuare:

—Jesús ni tu Yusuja Ecuadishaque ama. Jadique juatsu taa tujatu eadebau tumeque epuna jidamaque. Tumbaedyatu eadebau tumeque epuna jida anieque ama, —jadya tujatu inime tupucuare.

⁴⁰ Jesusratu adebacuare Simónra eje bucha inime tupuyaque.

—Simón, bacacue. Cuejacara mique aya, —jadyatu Jesúsra acuare.

—Cuejacue taa ique, Ebahuityaqui que, —jadyatu Simónra quemitsacuare.

⁴¹—Anicuaretu ecuita chipirudaque. Beta ecuitajatu manu anicuare tuaqueja. Peadyajatu manu dyaque umada anicuare —500 ficha cuana, peadya ecuitara beta mara mere juatsu etsujequi einau tupu. Peyaja bacue peya tsehue beta tupu ama jetiedya —50 ficha cuana camadya, peadya ecuitara beta badi mere juatsu etsujequi einau tupu. ⁴² Betara tatsejatu tsujetyataqui ama bacuare tatseja manu. Jutaqui-judyatu tatse manu inamerequir a nrecabacuare tatseja manu. Jadya apupashaetu chipirudara acuare manu tatseja beta jadya.

“Iyacua era mique bacadurayaque quemitsacue, Simón. ¿Ejera tatsejatu dyaque yusurupai, iyuhueda jadya baya manu apupashaquique? —jadyatu Jesúsra acuare Simón.

⁴³ —Eratu manu dyaque jetiamaque apupashatanahuaque adebaya.

—Tuyudya, —jadyatu Jesúsra acuare.

⁴⁴ Tumetu Jesúsra huareretsu epuna petayara Simón cuejacuare:

—Bahuaryami riyaque nerecadaque epuna. Ique micue etareju nubihuaju mira huachi utsamerehua ama mique merequi cuana queja, ecuanaja bahue eque. Jadya ama bucha riyaque epunara tuque ecue utsahua tuja paanacaca tsehue. Etsaru tsehue tuja tuque ecue tillahua. ⁴⁵ Ni mira ique junayaju dyahuatsahua, ecuanaja bahue eque. Riyaque epunara taa junaya tajira dyahuahuaque dyahua-jacaya ama ecue ehuchiju. ⁴⁶ Ni mira etseri tsehue iyucaju pepahua eihuara cuanaque eata bucha. Tura taa ecue ehuchi nacatashahua etseri ijimeda tsehue. ⁴⁷ Jadya mique cuejaya, Simón. Tura ique jadya ayaquetu cabameretihua tura ique dyaque iyuhueda bayaque, tuja jucha cuana jetiamaque apupashatanahuaque jadya. Ejeque riya piji jucha apupashatayaque bacue dyaque ama iyuhue cabameretiya, —jadya tujatu Simón acuare.

⁴⁸ Simón jadya aatsutu Jesúsra epuna isaracuare:

—Era tuque micue apupashaya jucha cuana, mama.

⁴⁹ Peya cuana tuatsehue anibareya cuanaque tuna quisaraticuare tuna cama:

—¿Eje bucha anie rejari ejuu inime jucha apupasha ishu?

⁵⁰ Jesusratu epuna acuare:

—Yusurami amena inajacamerehua, mique eaqueja catyatihua tibu. Jida dirucue, mama, —jadya tujatu acuare.

8

Jesús tsahuaqui jucuaque epuna cuana

¹ Jesústu junenicuare jetiama epu cuanaju, epu achaacha cuanaju, Yusura tuaqueja catyatiya cuanaque eje bucha narue ayaque jadya cuanaque cueja juyaque. Peadya tunca beta earacana tura mepehua cuanaratu tajitajinicuare.

² Icuenetu Jesúsja echachanedy a jucuaque uma epuna ijahua cuanara quijahuatishaya cuanaque, ujejeda cuanaque jadya. Quimisha epuna jadya chachae jucuaque cuanaratu tajicuarenya. Jucuaque tuna: María, Magdalaju anicuareque (Tujadyatu pacarucu ijahua Jesúsra ijehuecuinacuare.);

³ Juana, Chuzaja ehuanegue, (Chuzatu Herodesja etareju mayuruma jucuaque.); tumbaedy Susana. Jetiama uma

epuna cuanaratu tajicuaredya. Tunaja ai aniya cuana tsehue piji tsahua jadya tunajatu acuare.

Uhuauhua puji cuatsabiji
(Mt 13.1-9; Mr 4.1-9)

⁴ Tuhuapa Jesús jadya bacatsu tuna jetiama epu cuana juque cuinanabarecuare Jesús queja cuaishu. Casitatihua ju tuna Jesúsra bahuityacuare cuatsabiji eque.

⁵ —Anicuaretu ecuita. Cuacuaretu tuja teeju uhuauhuara. Tura uhuaajeyaquetu umae pacacacuare edijiju, yahua pajidaju. Uhuayaque tujatu etsucaca huirucuare yahuaju. Tueque ajeya cuanaratu tapapashacuare. Upati huiri cuanaratu anibutetsu mucutillacuare. ⁶ Peya etsucaca cuanatu pacacacuare yahua macana dedamaju. Huijatsutu danecuare ama. Raracuare jutidyatu euhuaque ehuija cuanaque, tuja etiri yahua nacadaju ama tibu. ⁷ Umae bacue pacacacuare acui tiri, acuija jadya jetiama ducu. Acuija cuana danetsu tujatu trigo euhuaque ehuija cuanaque iyetillacuare. ⁸ Umae etsucaca cuanatu pacacacuare yahua jidaju. Cacacaticuare umada. Tee mere pujiratu jetiama huesacuare tuhua euhuaque. Peadya peadya esajutu jucuaré cien tsucaca. Jadyatu jucuaré teeju euhua cuanaque, —jadyatu Jesús jucuaré.

Tumeque quisarati cueja amena aatsu tuna Jesúsra acuare: —Quijacabacati aqui juatsu, nebacacue, —jadya tujatu ecana acuare.

Eje bucha juatsu ecana Jesúsra cuatsabiji eque bahuityacuareque

(Mt 13.10-17; Mr 4.10-12)

⁹ Tumetu Jesús tura mepehua cuanara bacaduracuare: —¿Eje buchique ri riyaque cuatsabiji? ¿Ai mira ecuana bahuityacara aya? —jadya tunajatu acuare.

¹⁰ —Yusura micuana pana adebamere acara aya tura tuja cuanaque naruyaju eje bucha juyaque. Peya cuana jadya cuejae eauque, tuna cuatsabiji cuana eque jutidya cuejaya jari, tunara era bahuityayaque pana adeba eauju. Tunaratu era ayaque baya. Tume tuna baatsu bama jiu juya. Bacatsu tuna bahuityahua ama jiu juya, arepa bacahua ama bucha, —jadya tuna Jesúsra acuare.

Jesúsra pana cueja cuatsabiji uhuauhua puji equeque acuareque

(Mt 13.18-23; Mr 4.13-20)

¹¹ Jesúsra tuna bahuityanucacuare: —Pana cueja micuana aya uhuauhua puji cuatsabiji equeque eje buchique. Etsucaca euhua cuanaquetu Yusuja quisarati jadicue. ¹² Umaetu Yusuja quisarati

bacatsu masadama nime aputaya, Satanásra masadama pana nime aputashamere aya tibu. Jadya tibudya tuna Yusu queja catyatiya ama; Yusura tuna Ijahua quejaque inajacamereya ama. Tuna tuna yahua pajidaque buchique. ¹³ Umaeratu ejetsunue ishu ama pureama tsehue Yusuja quisarati bacaya. Quisarati ejenehua baatsu jidama atayaju, masadama tuna ejenejacaya, pana adeba aya ama tibu. Tuna tuna yahua macana dedamaque buchique. Huijahua cuanaquetu macana quini danetsu tsunuda ama juya, etiri dedama tibu. ¹⁴ Umaera Yusuja quisarati bacaya cuanaratu ejenejacaya, riyaque yahua cuanaquedya jutidya dyaque inime tsapequi aya tibu. Tunajatu inime juya, chipiru anitsu cuita camadya dyaque pureama ejuu bucha. Dutya tuna tunaja bijida cuanaque camadya inime tupuqui aya. Jadya juatsu tuna Yusu muijacaya. Tuna tuna yahua acuija quinique buchique. ¹⁵ Umae cuana Yusuja quisarati bacaqui juya cuanaratu adebaajeyadya jutidya. Nime aputaya ama ecana. Tuna eje bucha anieju tuna ejitaju Yusuja biji eque aniyaque. Umae cuana tunajatu tsahuaya eaqueja catyati ishu. Tunadya tuna yahua jidaque buchique, esaju jetiama etsucaca cacacatihuaque buchique, —jadya tuna Jesúsra acuare.

*Yusura eje bucha ahuaque catehuatitaquique ama
(Mr 4.21-25)*

¹⁶ Jesúsra tuna bahuityanucacuare:

—Ude tuchatsu tuque ecuana tehuaya ama eperere emaque ni ishaya ama sura ducu. Etehuauque tuque ecuana iyaya ebarucue, nubitiya cuanaja jida capetati ishu. ¹⁷ Dutya etehuaquetu ejitaju judadiya. Dutya ibedaquetu adebataqui judadiya. Yusura micuana bahue ameredadiya eje bucha jue tujaque juishuque.

¹⁸ “Pana baca neacue era cuejayaque. Ejeja ai aniyajatu dyaquedya ai aniajeya. Ejeque ai aniya bucha cabatiyaque, aimaquedya jutidya, tuja aniya cabatiyaque tujatu apu-tatereya, —jadya tuna Jesúsra acuare.

Jesúsja ecuaque, tuatsehuequi cuanaque jadya Jesús jiteque cuacuareque

(Mt 12.46-50; Mr 3.31-35)

¹⁹ Jesúsja ecuaque, tuatsehuequi cuanaque jadya tuna junicuare tuaqueja. Jipetaqui ama tunajatu bacuare, tuhua jetiama ecuita jucuaré tibu. ²⁰ Tumetu ejera cuana Jesús cuejaticuare:

—Micue cuaa, micue miatsehuequi cuanaque jadya rena etsecueju. Miatsehuepa tuna quisaraticara juya, —jadya tujatu Jesús aticuare.

²¹ Jadya bacatsutu Jesúsra acuare:

—Tumeque epuna tuque ecue ecuaa; tume cuanaque tuna ecue eatsehuequi cuanaque. Jadya ama bucha tuque ecue aniya peya ecue iyuhueda cuanaque. Yusuja quisarati bacatsu tueque juya cuanaque tuna tuque ecue iyuhueda cuanaque. Tunadya tuna ecue ecuaa, ecue eatsehuequi cuanaque bucha bae ayaque, —jadya tuna Jesúsra acuare.

Jesúsra cuejipa, ena pacu jadya nityacuareque

(Mt 8.23-27; Mr 4.35-41)

²² Peya huecacatu Jesúsra acuare tura mepehua cuanaque cuabajú anibutetsu:

—Bei yueque macare necarequetira, —jadya tujatu ecana acuare.

Jadya juatsu tuna carequeticuare. ²³ Carequetiyaquetu Jesús tahuicuare. Tuque tahuijarayajutu muya jutidya cuejipa casadaque jueticuare. Cuejipa juetitsutu ena pacura cuaba ebariju ena ishacuare. Jadya tibusu ena pacura cuaba nudyajeri nudyajeri acuare. Rumutanaya bucha tuna cabaticuare. ²⁴ Jadya cabatitsutu tura mepehua cuanara Jesús bushishaticuare.

—¡Ecuana Naruquique, rumutanaya ecuana! ¡Ena pacura ecuana nudyaya! —jadya tunajatu acuare quique eque.

Tunara jadya ayajutu Jesús cabaticuare. Netitsuratsu tujatu acuare cuejipa, ena pacu jadya:

—¡Tume tupu camadya! ¡Neticue! —jadya tujatu acuare.

Tura jadya aya tsehuedyatu cuejipa neticuare. Dutyatu pana abacatana jucua. ²⁵ Jadya juatsutu Jesúsra acuare tura mepehua cuanaque:

—¿Eje bucha juatsu micuana bajida cuita juhua? ¿Eje bucha juatsu micuana eatsehue nime aputahua?

Tuna bacue dyaque eanajacata jucua. Bajida ecana jucua. Tuna taca tuna jadya jutibunecuare:

—¡Ai ecuita dyadi ri riyaque! ¡Cuejipa, ena pacu jadya taa tuja yana equedya juya! —jadya tuna jucua.

Jesúsra ecuita ijahua cuanara quijahuatishayaque quijahuatishajacacuareque

(Mt 8.28-34; Mr 5.1-20)

²⁶ Chamacama tuna jaratsuradirucuare Gerasaju aniya cuana queja, bei yueque macare, Galilea tuyu. ²⁷ Amena Jesús cuaba juque cuinanayajutu ecuitara jipeticuare, epu japadama dyane eanisirira. Tuquetu equijahuatique jucua. Junenicuaretu tarema, ecatacati jadya. Anianinicuaretu tumu cani cuanaju emaju cuanaque eishaju. ²⁸⁻²⁹ Tumetu Jesús baatsu, tuque jipetitsu chichucata jucua

tuja yacuaju. Jadya ayajutu Jesúsra ijahua cuana ecuita yuamaturaqui juya cuanaque acuare:

—Necuinanacue tumeque ecuita quejaque, ijahua cuana, —jadya tujatu ecana acuare.

Tsunudatu ijahua cuanara tumeque ecuita quijahuatishajacama acuare. Naru ishutu ecuita cuanara eje uma risi datse abahue jucuar ehuachiju, ebi ecatsaju jadya cadena tsehue. Ijahua cuanaja casa tsehue tujatu cadena metal eaque tibibishajacama acuare. Ijahua cuanaratu aquerenicuare eje queja anitaya ama cuana queja japada.

Jesúsra ijahua cuana tuaquejaque cuinana ishucuat-sashahuajutu ecuita quiquecuare:

—¿Ai jitequemi jeya eaqueja, Jesús Yusu barepajuja Ebacuaque? Nerecabacue ique. Nrecaturaume taa ique, —jadyatu equijahuatira Jesús acuare jebuda quique eque.

³⁰ Jadya quiqueyajutu Jesúsra bacaduracuare ecuita:

—¿Ai bacani mique?

—Ique Umadaque bacani, —jadyatu ijahua cuana caque-mitsaticuare ecuitaja quisarati eque.

Jadya tuna jucuar, tuna dyaque umada tuque quijahuatishaqui cuanaque juhua tibu.

³¹ —Cuadishaume ecuanana emajaca ebariju ijahua cuana nrecaturatanayaju, —jadyatu ijahua cuanara acuare Jesús.

³² Jetiamatu cuchicuana araanibarecuare emata jiruru. Ijahua cuanaratu Jesús acuare:

—Panubi ecuanana cuchicuana, —jadya tunajatu acuare Jesús.

—Nenubicue taa.

³³ Tumetu ijahua cuanara quijahuatishajacacuare tumeque ecuita. Tuaquejaque cuinanatsu tuna cuchicuana nubilecuare. Dutya cuchicuana ijahuaqui cuanaque tuna tsajajayaque pacacadirucuar bei tihuesu baruda eque. Beiju pacacatsu tuna huiditerecuare.

³⁴ Cuchicuana naru juya cuanaratu bacuar jadya juyaju. Jadya baatsu tuna tsajajaterecuare epu ebariju. Cuetiyara tunajatu epu cuana juque cuejabarecuare tuhua eje bucha juhuaque. Epu ebariju judirutsu tunajatu tumeque quisarati nucadya tsapedirunucacuare. ³⁵ Tunara cuejayaque bacatsutu ecuita cuana cuabarecuare eje bucha juhuaque petara. Junaticuare tuna Jesús queja. Tuhua junatitsu tunajatu banaticuare ecuita equijahuati juhuaque, Jesús peque juaniyaju. Ecajututi, tuja jida inime tsehue, equijahuatijaca jadya tunajatu banaticuare. Jadya banatitsu tuna dyaque cuita eanajacata jucuar. ³⁶ Jesúsra equijahuatija ijahua cuana ijehuecuinayaju baqui jucuar cuanaratu peya cuana

cuejacuare eje bucha juhuaque. ³⁷ Jadya bacatsutu dutya jujeri Gerasa yahuaju aniya cuanara Jesús muda bacuare. Jadya tibudya tunajatu acuare:

—Dirucue rehuaque.

Tunara jadya ayajutu Jesús anibutecuare cuabaju, dirunucacara juatsu. ³⁸ Cuabaju anibuteyajutu equijahuatijacara Jesús acuare:

—Ique miatsehue junenicara juya, —jadya tujatu acuare.

—Aijama. Rehuadya anicue. ³⁹ Dirunucacue micue ata cuana queja. Cuejadirucue ecana Yusura micue ishü dutya ahua cuanaque, —jadyatu Jesúsra acuare.

Tura jadya ahujutu ecuita dirucuaré. Dirutsu tujatu ecana cuejaajecuare dutya tuja epuju cuanaque, tuque Jesúsra eje bucha ahua cuanaque.

Jairora Jesús jipeticuareque

(Mt 9.18-19; Mr 5.21-24)

⁴⁰ Jesús bei yueque macare judiruhujutu ecuita cuanara jida pureama tsehue batsacuare. Dutyara tunajatu ihuacuare. ⁴¹ Jesús tuna tsehue quisaratiyajutu ecuita Jairo bacanira jipeticuare. Tuquetu caradati ishüque etare juque inime metseque jucuaré. Jipetitsutu nuyunaticuare Jesúsja yacuaju. Nuyutsutu canerecaticuare Jesús queja tuja etareju cuaishu:

⁴² —Nerecabacue ique. Ecue ebacujuna peadya tunca beta earacana maraquetu majuhuie cuita. Tuque peadya piji cuita camadya tuque ecue ebacujuna. Chachaneticue ecue, —jadya tujatu Jesús acuare.

Jesús cuayaju baatsutu umada ecuitará tupujudya acuare. Naiishacuare tunaja tuque.

Jesúsra epuna ujejedaque chachanecuareque

(Mt 9.20-22; Mr 5.25-34)

⁴³ Tumeque ecuita cuana ducudyatu jucuaré epuna ujejedaque. Peadya tunca beta earacana maratu amena nerecada, ujejeda jucuaré. Ebacuatare tujatu jidama jucuaré; ami tujatu jucuarédyá jutidya. Eje uma casamati bahue cuana quejatu casamamereticuare datse. Dutya tuja chipiru aniyaquetu quijehuetillaticuare casamameretiyaque. Jadya ama buchatu ni ejeradya jutidya chachanecuare ama. ⁴⁴ Etibene equé jipeaje tujatu Jesús acuare. Jipetitsu tujatu jabacuare tuja unaju ebebacujaju ehuejitaque. Tura jabaya tsehuedya tujatu neticuare ami.

⁴⁵ Jabahuajutu Jesúsra bacaduracuare:

—¿Aira jabahua?

Dutyá tuque peque cuanaquetu

—Juhua aba, —jadya jucuaré.

Jadya juyajutu Pedrora acuare:

—Ecuana Bahuityaquique, jeedyu bacuemi ecuita cuanara naiishaya. ¿Eje bucha juatsu mira ecuana bacaduraya aira jabahuaque?, —jadya tujatu acuare.

⁴⁶ —Ejera cuana jabahua chacha juishu. Ecue casa chachane ishucue cuinanayaju caadebatihua. Ejeque cuana tuque chachanehua, —jadya tuna Jesúsra acuare.

⁴⁷ Amena epunatu tuque jadya juhuaque tehuataqui ama baatsu, tadadayaque Jesúsja yacuaju chichucata juticuare. Dutya tuhua ecuita cuanaja ijacaju tujatu Jesús isaracuare:

—Erami jabahua. Micue una jabatsu chacha ejuuque tuque ecue inime juhua. Tume taa jadiquedya. Micue una jabaya tsehuedya cuitadya chacha juhua, —jadyatu epunara Jesús acuare.

⁴⁸ —Mama, chachami juhua, mira era chachaneya que pana ejene ahua tibu. Cacasaticue. Inime tsapema dirucue, —jadyatu Jesúsra acuare.

Jesúsra Jairoja ebacujunaque emajuque chacha nityatsuranucacuareque

(Mt 9.23-26; Mr 5.35-43)

⁴⁹ Tuque quisaratiya jarijudyatu yana dujuquique juticuare Jairoja etare juque.

—Micue bacujunatu amena majuhua. Ai jiteque ni tu Ebahuityaquique cuama amena, —jadya tujatu Jairo acuare.

⁵⁰ Jadya juya bacatsutu Jesúsra jadya acuare Jairo:

—Jidama inime baume. Cacasaticue. Eaqueja nimee camadya jucue. Micue bacujuna emajuquetu chacha netitsuranucaya, —jadya tujatu acuare.

⁵¹ Etareju junatitsutu Jesúsra acuare Pedro, Santiago, Juan jadya;

—Micuana camadya eatsehue nenubicue. Tuhuadya umae paneti, —jadya tujatu ecana acuare.

Nubiquerecuare tujatu ebacujuna pijija etataque ecatse, quimisha tura mepehua cuanaque jadya camadya. ⁵² Dutya ecuita cuana bacue quique, pau pau jucuaru ebacujuna piji majuhua etareju.

—Nepajacacue. Tumeque ebacujuna piji tu majuma. Tahuiya jutidya tuque, —jadya tuna Jesúsra anaticuare.

⁵³ Jadya bacatsutu ecuita cuanara ijaribacuare, tunara yuneri cuitadya emaju baya tibu. Ecanajetijacatu ebacujuna piji jucuaru. ⁵⁴ Tuque emaju jarayaju nubitsutu Jesúsra emetucuju inanaticuare. Isaranaticuaretu emajuque:

—Ebacujuna piji, netitsuracue, —jadya tujatu acuare.

⁵⁵ Tura jadya ayaju cuitatu ebacujuna piji canajetietinu-catsu, anitsuratsu netitsuracuare. Jesusratu ecuaque ecatsé jadya acuare:

—Nemihuacue.

⁵⁶ Tuja etataque ecatsétu tahuiju bucha cabaticuare.

—Cueja cueja neaume ni ejeque riya jadya juhuaque, —jadya tatsé Jesúsra acuare.

9

Jesúsra tura mepehua cuanaque tuja quisarati cuejara cuadishacuareque

(Mt 10.5-15; Mr 6.7-13)

¹ Jesúsra tuna sitacuare peadya tunca beta earacana tura mepehua cuanaque.

—Ijahua cuana ijehuecuina ishu micuana tyaya casa. Tumebaedya micuana cuatsashaya ejeque ujeje, eje bucha ujeje tsehue cuanaque chachane ishu. ² Cuadishaya micuana, Yusura naruyaju eje buchique quisarati tsape ishu, ujejeda cuanaque chachane ishu jadya.

³ “Yusuja quisarati cuejara cuayaque necadujutiume ni ai buchique. Necadujutiume sari, ni shitara ni ara ishu cuanaque ni chipiru. Asicada juatsu catacati ishu jutu ishuque necadujutiume. ⁴ Ejeque epuju junatitsu ejera jida batsayaju tuhuadya neanicue, tuja etareju peya epuju dirunucaya tupu. ⁵ Eju junatijaju tunara micuana batsacarama ayaju, masadama necuinanacue tuhuaque. Cuinanayaque neitataquenacue muru micuanaja ehuachi juque ‘Aine yatse micuana tsehue juma’ jadya tuna ayaque. Tunadya tuna inime metse, Yusuja quisarati bacacarama ahua tibu, —jadya tuna Jesúsra acuare.

⁶ Jadya ahuaaju tuna cuacuare. Cuacuare tuna dutya epu achacha cuanaju. Yusuja quisarati cueja juyaque, ujejeda cuanaque chachane jadya tuna epu cuanaju juajecuare.

Eje bucha iyetanae Juan Ecuíta Cuana Utsaquiue jucuaqueque

(Mt 14.1-12; Mr 6.14-29)

⁷ Ecuari Herodesratu bacacuare Jesús ai juyaque, eje bucha juyaque jadya. Turatu bape bape jutidya inime tupucuare Jesús tsehue. Umaetu jucuaque: “Jesústu baya ecuíta ama. Juan Ecuíta Cuana Utsaquiue emajuque cacuitatitsu netitsuranucachineque tume” jadya. ⁸ Peya cuana bacue jucuaque: “Elías ecacuitatíque jutidya tume”. Peya cuana bacue jucuaque: “Jesústu beru Yusu equeque quisarati cuejaquiue jutidya, emajuque enetitsuranucaque”. Jadya bacatsatsutu Herodesra eje bucha adebataqui ama bacuaque.

9 —Ique taa dyaque bahue Juan emajuque. Eradyatu piti-tubumerechine. ¿Ejeque ecuita jatsu dyadi tu Jesús? Bacaya taa quisarati ejenetaquique ama, —jadyatu Herodes jucuaire. Bacara ebari tujatu acuare Jesús.

Jesúsra pishica pan, beta jae jadya umanashacuareque pishica mil ecuita cuana mihua ishu
(Mt 14.13-21; Mr 6.30-44; Jn 6.1-14)

10 Jidaque quisarati cuejara cuadishatanacuare cuanaque juetitsu tunajatu cuejaeticuare Jesús tuna eje bucha jutihua cuanaque. Jadya juatsu tujatu ecana dujucuare peya queja amaca Betsaida epu japadama, tuna canajarasha ishu. 11 Tuna cuahuaque bahue juatsutu ecuita cuana cuacuare tuna sarera. Jesusratu batsacuare ecuita cuana tuaqueja jutihuaju. Cuejacuare tujatu ecana Yusura eje bucha narue ecuana adadiyaque. Chachanecuairetu ujejeda cuanaque.

12 Amena ijete nubihuietu peadya tunca beta earacana tura mepehua cuanara Jesús jipeticuare.

—Isaracue ecuita cuana. Padiru ecana epu cuanaju, epu ashaasha japadama cuanaju. Pacabacatidiru ecana ara ishu cuanaque, eju tahui ishuque jadya. Rehuari aijama earaqui ni ai buchique tunaja ishu, —jadya tunajatu Jesús aticuare.

13 —Cuadishaya ama tuna era. Micuanaradya ecana nemi-huacue, —jadya tuna Jesúsra acuare.

—Rehua rique ecuanaja aniya pishica pan, beta jae jadya piji camadya. ¿Ai tsehue ni rique ecuana mihuama ecuita jeticue ama? Dutya ecuitaja ishu tupu ejuuque juatsu, camadya ecuana ecua earaqui bacara, —jadya tunajatu acuare.

14 Deca cuana cuita camadya epiyebaque tuna jucuaire pishica mil ecuita.

—Jaquetsu jaquetsu ecana neiyabutyabarecue; peadya cuare pishica tunca, peya cuareju pishica tunca nucadya jadya ecana neiyabutyacue, —jadyatu Jesúsra acuare tura mepehua cuanaque.

15 Cuejaya equedya tuna jucuaire. Dutya tunajatu ecuita cuana iyabutyacuare. 16 Jadya juatsutu Jesúsra inacuare pishica pan, beta jae jadya. Inatsu tujatu barepaju Yusu aniya queja petacuare. Petayaquetu jucuaire:

—Yusurupai mique aya, Tata, mira ecuana riyaque ara ishuque tyahua tibu, —jadya tujatu Yusu acuare.

Yusurupai au jadya aatsu tujatu pan cuana cuesibarecuare. Jadya aatsu tujatu tyabarecuare tura mepehua cuanaque, tunaja ecuita cuana tyabare ishu. Tura ecana pan tyabareya tupu tujatu pan umanashacuare. Dutyaja ishutu tupu jucuaire. 17 Dutya tuna araaracuare, pana jeque juya

tupu. Amena jadya juhuajutu Jesúsra mepehua cuanara jequeshacuaré peadya tunca beta earacana jiti arida cuanaque pan tunara arabishahua cuana tsehue, jae jadya tsehue.

Pedrora “Jesús tu Mesías Yusuja Emepeque” cuejacuareque (Mt 16.13-19; Mr 8.27-29)

¹⁸ Peya huecacatu Jesús cuacuare peya queja amaca Yusu tsehue quisaratira. Tura mepehua cuanaque bacue tuatsehuedya jucuare. Etataque tsehue quisarati amena juatsutu Jesúsra tura mepehua cuanaque bacaduracuare:

—¿Eje buchatu ecuita cuanara ecue ishú inime tupuya? ¿Ai jadya tunara aya? —jadya tujatu ecana acuare.

¹⁹ Tunaratu quemitsacuare:

—Umae cuanarami aya Juan Ecuita Cuana Utsaqui que emajuque enetitsuranucaque jadya. Peya cuanarami Elías jadya aya. Peya cuanara bacuemi aya beru Yusu equeque quisarati cuejaqui emajuque enetitsuranucaque jadya, —jadya tunajatu acuare.

²⁰ —¿Micuanara bacue, ique ai jadya aya?

—Miquemi Mesías, Yusuja Emepeque, —jadyatu Pedrora quemitsacuare.

²¹ —Necuejaume jari ni ejeque buchique ique Mesíasque, —jadya tuna Jesúsra acuare.

Jesús eje bucha iyetanadadie juyaque cacuejaticuareque (Mt 16.20-28; Mr 8.30-9.1)

²² Jesúsra tuna cuejanucacuare:

—IQUE ECUITA dyaque canerecatitaqui. Emuiba cuanara, pae cuanaja huaraji cuanara, cacuatsashati bahuityaqui cuanara jadya dyaque nerecaturadadiya. Iyemeredadiya tunara ique. Quimisha huecaca juatsu chacha netitsuranucaya, —jadya tuna Jesúsra acuare.

²³ Jadya juatsu tuna dutya tuhua jucuare cuanaque Jesúsra isaracuare:

—Micuana eatsehue junenicara juyaque juatsu, era cuatsashaya eque neanicue, micuanaja biji eque juneniyaque nime aputatsu, arepa micuana canerecati, maju jadya jutaqui ama bucha, curusuju etata ejuu bucha. ²⁴ Micuana ni catehuatiya eaqueja ecatyatique eiyetauju, ejetsunue ama micuana anibuque. Tume micuana majubuque ni eje tupu Yusu queja judiru ishú ama. Micuana ni eaqueja catyatihua baatsu iyetaya, Yusu tsehue micuana anisiribuque, arepa micuanaja ecuita ririya ama bucha. ²⁵ Ecuita ni Yusu jipema, ijahuaja etiquiju ni judiruya, ni aishu buchique tujatu jida juhua riyaque yahuaju tuja dutya ai anihuaque, arepa dyaque chipiruda paju ama bucha.

²⁶ “Iyacua riyaque yahuajutu aniya ique eje buchique quisarati aishu bisuya cuanaque. Tunajatu bisu aniya ecue quisarati cueja ishü. Ejeque huecaca IQUE ECUITA junanucabuque. Barepaju Yusu tsahuaqui cuanara tajibe buque. Ique junanucayajutu dutyara babuque ecue Etataja casa. Bisunabuquedya ique ecue ishü bisuhua cuana tsehue. ²⁷ Pusha amadya micuana cuejaya. Umae micuana rehuaque majuhuishaya ama, dutya era ecue casa tsehue narutibuneyaque badadiya tupu, —jadya tuna Jesúsra acuare.

Jesús cabapeticuareque

(Mt 17.1-8; Mr 9.2-8)

²⁸ Jadya juu jadya juatsutu peadya semana junucatsu Jesús tsuracuare emataju Yusu tsehue quisaratira. Dujucuaré tujatu Pedro, Santiago, Juan jadya. ²⁹ Yusu tsehue quisaratiyaque tujatu ebutsequini cabapeticuare. Tuja unatu pajada, huecada, dyaque tiquida jucuaré. ³⁰⁻³¹ Masadaque amatu Moisés yanume, Elías yanume jadya ejitaju jucuaré hueca dyaque tiquida ducu. Tume tatse Jesús tsehue quisaratinacuare. Jesús eje bucha iyetanae Jerusalénju judadiyaque tunajatu quisarati acuare. ³² Pedro ecanatu tahui idutaquima baatsu tahuicua redya. Cabatietitsu tunajatu bacuaré Jesús hueca tiquidaja edunu, beta ecuita ecatsé tuatsehue netiyaju. ³³ Amena Moisés, Elías jadya Jesús quejaque japacuinaajeyajutu Pedro quisaraticuare:

—Ecuana Bahuityaqui que, dyaque jida taa ecua rehua. Eau tuque ecua quimisha erere, peadya micue ishü, peya Moisésja ishü, peya bacue Elíasja ishü, —jadya tujatu acuare.

Tuque dyaque jecutanahua tibusu ai quisarati ataqui ama jucuaré. ³⁴ Pedro quisaratiyajutu barepa juque huanira dunutillacuaré. Huanira dunutillaya baatsutu Pedro ecan eanajacata jucuaré. ³⁵ Tume tunajatu bacuaré huani ducuque Yusu jadya quisaratiyajutu:

—Riyaque rique ecue ebacua dyaque iyuhuedaque. Nebacajacaume. Eje bucha tura cuejaya eque nejucue, —jadya tuna Yusura acuare.

³⁶ Jadya quisaratiyacahuaju tunajatu banucacuare ama Moisés, Elías jadya, Jesús camadya. Tunaratu ni ejeque buchique cuejacuaré ama tunara eje bucha bahuaque. Jesús barepaju diruhuaaju piisi tunajatu cuejacuaré.

Jesúsra ebacua piji ijahua cuanara quijahuatishayaque quijahuatishajacacuareque

(Mt 17.14-21; Mr 9.14-29)

³⁷ Huecacanucatsutu Jesús, tuatsehue cuahua cuanaque jadya butecuare emata juque. Butehuajutu ecuita jetiera

ama tsurutsacuare. ³⁸ Tuna ducuratu Jesús jipeticuare. Jesús jipetitsu tujatu acuare:

—Nerecabacue ique. Riya ecue ebacua behua. Peadyaque piji ri rique ecue. Ijehuecuinacue ecue ebacua juque ijahua cuana. ³⁹ Mididatu amena ijahuara quijahuatishayaque. Quiqueshatilla bahue reja rique. Piririshatilla bahue tuja tuque. Manutu jubahue. Ubajasa tujatu jubahue ecuatse eque. Ijahuara tuque ecue ebacua dyaque yuamaturaya. Casatilla, nerecatura quijahuatisha jadya aatsutu chamacama cuinana bahue ijahua ebacua piji quejaque. ⁴⁰ Canerecatihua datse ique mira mepehua cuana queja, ijahua ijehuecuinamere ishuhua datse. Arepa ijehuecuinacara aya ama bucha, tuna ijehuecuinataquima bahua, —jadyatu ebacua pijija etataquera Jesús acuare.

⁴¹ Jadya bacatsutu Jesúsra tuhua cuanaque acuare:

—¡Micuana micuana quejeneti baecua, cuejataqui ama jadya! Arepa micuana era ayaju bahua ama bucha, adebaya ama jaridya tuque micuana Yusuja casa. ¿Eje tupu cuita micuana eiduu? —jadya tujatu ecana acuare.

—Becue requeja micue bacua, —jadyatu Jesúsra acuare ebacua pijija etataque.

⁴² Ebacua pijira Jesús jipeajeyajutu ijahuara manu amerenucacuare. Tume tujatu yahua catsaqui amerenucacuare. Jesusratu nereda acuare ijahua ebacua piji yuamaturaqui juyaque:

—Cuinanacue riyaque ebacua piji quejaque, —jadya tujatu acuare ijahua.

Jadya quisarati aya tsehuedya cuitadyatu ebacua piji quijahuatijacacuare. Quijahuatishajacatsutu Jesúsra ebacua pijija etataque cuejacuare:

—Jee micue bacua equijahuatijaca juhua, tata, —jadya tujatu acuare.

⁴³ Anajacatacuare tuna tuhua jucua cuanaque.

—¡Dyaque jida, casada jadya taa Yusu! —jadya tuna jucua.

Jesús eje bucha iyetanadadie juyaque cacuejatinucacuareque

(Mt 17.22-23; Mr 9.30-32)

Dutya tuhua cuanaque Jesúsra aya cuanaque baatsu eanajacata jarijudyatu Jesúsra anucacuare tura mepehua cuanaque:

⁴⁴ —Nebacacue jida era cuejayaju. Nenime aputaume bacue. Ejera cuana tsetatsu inameredadiya IQUE ECUITA, —jadya tujatu ecana acuare.

⁴⁵ Tura mepehua cuanaratu adebacuare ama eje buchique tura jadya ayaque. Arepa quisarati bacaya ama bucha,

tunajatu eje bucha adebataqui ama bacuare, Yusuja adebamerema jari tibu. Tuna tuna bajida jucuaire, “Pana cueja ecuana acue mira quisarati ahuaque”, jadya aishu.

¿Ejeque tu dyaque inime metseque?

(Mt 18.1-5; Mr 9.33-37)

⁴⁶ Tumetu Jesúsra mepehua cuanaque caquemitsati caquemitsati jutibunecuare:

—¿Ejeque ecuana dyaque inime metseque?, —jadya tuna cabacaduratibarecuare.

⁴⁷ Jesusratu adebacuaredya tunara eje bucha inime tupuyaque. Tume tujatu ihuaracuare ebacua piji tuhua netiya baatsu. Ihuaratsu tujatu tuque peque nityacuare.

⁴⁸ Jadya aatsu tujatu tura mepehua cuanaque cuejacuare:

—Dyaque inime metsequetu dyaque jetiedyaque bucha cabatiyaque. Micuanara ni ecue cuanaque jida tsehue batsaya, arepa tuna riyaque ebacua piji bucha paju ama bucha, idya datse micuanara jida tsehue batsaya. Micuanara ni ique jida tsehue batsaya, tume tuque micuana ecue Etata Ique Cuadishaquique jidadya batsaya, —jadya tujatu ecana acuare.

Nebijidamadurara ama Yusuja cuanaque ecuana tsehue beta tupu ama cuanaque

(Mr 9.38-40)

⁴⁹ Juantu quisaraticuare Jesús tsehue:

—Ecuana Bahuityaquique, ecuana micue quisarati cuejara cuachine patya, tuque ecuana bachine ejeque cuana ijahua cuana micue ebacaniju ijehuecuina juyaju. Jadya baatsu tuque ecuana achine: “Jesúsja ebacaniju rique ijahua ijehuecuinaya’ jadya ajacacue, ai mi Jesúsra mepehuaque batu”, —jadyatu Juanra Jesús acuare.

⁵⁰ Jadya ahua jutu Jesúsra acuare:

—Jadya neaume. Ecuana iyuhueda baquira ecuana ujeu baya ama, —jadyatu Jesúsra acuare.

Jesúsra Santiago, Juan jadya nereda acuareque

⁵¹ Eje uma huecaca ama Yusu queja dirunuca ishucue aniyajutu Jesús tuja casada inime tsehue cuacara ebari jucuaire Jerusalénju, arepa tuhua tuque canerecatiyaque bahue juya ama bucha. ⁵² Amena cuita cuahuiera tujatu cuadishacuare icueneta umae ecuita cuana eju junatiyaque etare banati ishu. Tuna tuna cuaatsu, junaticuare Samaria yahua epuju. Cuacuare tuna Jesús, tuatsehue cuaya cuanaque jadya eju junati ishucue sarera. ⁵³ Tumeque epuju cuanaratu icuene cuahua cuanaque jadya atsacuare:

—Nudyatsaya ama tuque ecuana Jesús, ni tuatsehue cuaya cuanaque, micuana Jerusalénju cuaya tibu, —jadya tunajatu

ecana atsacuare, Samariaju cuanara israelita cuana ujeu baya tibu.

⁵⁴ Icuene cuahua cuanaque tuna yudijidya dirunuca ju cuare Jesús tsurutsa ishu. Tsurutsatsu tunajatu cuejat-sacuare tumeque epuju cuanara nudyatsacarama ayaque. Juan, Santiago ecatserratu bacacuare tunara cuejaetiyaju. Jadya bacatsu tatse jadya jucuar:

—¿Miratu bijida baya ecuana Yusu queja bacabaca ishu, tuja barepa juque etiqui butya ishu, tumeque epuju cuanaque iyetillamere ishu, beru Elías etiqui barepa juque butyamere ishu, Yusu queja bacabacacuare bucha? —jadya tatsejatu acuare.

⁵⁵ Jadya juyaju tatse Jesúsra nereda acuare:

⁵⁶ —Jadya nequisaratiume. Micuana micuana baecua jari eje bucha juatsu ique riyaque yahuaju jehuaque. IQUE ECUITA jehua aniya cuanaque anishara, tuna iyetillara ama, —jadya tujatu ecatsere acuare.

Jadya juatsu tuna dirucuar peya epuju.

*Jesús tsehue junenicara jucuar cuanaque datse
(Mt 8.19-22)*

⁵⁷ Tuna ediji eque cuayajutu peadya ecuita quisaraticuar:

—Ebahuityaqui que, ique junenicara juya miatsehue eju mique cuayaju, —jadya tujatu Jesús acuare.

⁵⁸ —Dyaque masada tuque. Equique chapa cuanajatu aniya cani; upati cuanaja bacue aja. IQUE ECUITAJA bacue aijama etare tahui ishuque, —jadyatu Jesúsra acuare.

⁵⁹ Peya tujatu jadya acuare:

—Eatsehue junenicue, eje queja ique cuayaju.

—Ecuatsashaqui que, icuene tuque ecue etata narutaqui tuque majuya tupu. Tuque majuhuaaju, papatsu piisi miatsehue juneniya. Ihuacue jari ique, —jadya tujatu Jesús acuare.

⁶⁰ —A, aijama. Iyacuadya eatsehue junenicue. Cuejaticue ecana dutya queja aniya cuanaque Yusura eje bucha narue adadiyaque. Ique adebaya ama cuanaque tuna emaju cuanaque bucha. Tunara inime tsapequi paa ai riyaque yahuaju cuanaque, emaju cuanaque papaya tupu. Peyatu mere aniya micue ishu, —jadya tujatu acuare.

⁶¹ Peyaratu Jesús acuare:

—Ecuatsashaqui que, ique miatsehue pajuneni. Icuene ecue etareju cuanaque paisarati jari, —jadya tujatu acuare.

⁶² —A, aijama. Cashanaticue micue ai beru anicuareque. Ejeque paruparuyaque catibene bajiyuyiysvsysjs ama mere tu jidama. Tumbaedy a ni mi Yusu mereya micue ai aniya cuanaque cashanaticarama tsehue, ni mi aishudya jutidya jida. —jadyatu Jesúsra acuare.

10

Jesúsra pacarucu tunca beta earacana ecuita Yusuja quisarati cueja ishucadishacuareque

¹ Jadya juatsutu Ecuana Cuatsashaquira mepenuacuare peya cuana pacarucu tunca beta earacana ecuita. Cuadishacuare tujatu ecana beta beta cama icuene dutya epu arida cuanaju, epu achaacha cuanaju, eju tuque cuataqui epu cuanaju. Cuadishacuare tujatu ecana tuna quihuatijaju tuque juti ishucadishacuareque.

² —Yusuja quisarati bacama cuanaque tuna trigo amena ejahuaneque buchique. Arepa ecana jetiama aniya jari ama bucha, eje uma ama tu quisarati tsapequi cuanaque, tee metsera mere puji cuana trigo racara ecuadishau bucha. Jadya tibudya nebacacue Yusu; pacuadishatu jetiama ecue quisarati cuejaqui cuanaque. ³ Necuacue ecue quisarati cuejara. Micuana micuana muda majutaqui inime cuanaju nubi ishucadishacuareque. Cuadishaya micuana era, uhuisha cuana iba cuana ducu ecuadishau bucha.

⁴ “Necadujutiume chipiru ni shurumai. Zapato jutuyaque cuita camadya necadujuticue. Dutya micuanara sareyaquedy micuana tyataya. Tsunuda cuita nenetiume ejeque edijiju isaratsayaque. ⁵ Ejeque etareju ni micuana nubiya, jadya ecana neisanaticue: “Yusura inime tsapema neamerecue. ⁶ Tuhua ni aniya jida jucara juya cuanaque, tume ecana jida inime tsapema paju, micuanara isaranatihua baedy. Jadya ama ni, tume ecana tuna eje bucha anicara juya equedy paani. ⁷ Icueneque etareju tunara jida batsayaque neaninaticue. Nearacue, neijicue tunara tyayaquedy. Nebisuume earaqui tunara tyayaque ara ishucadishacuareque, mere puji tsujetyataqui juya tibu. Nenubinubiniume etare cuana tupu, ani ishucadishacuareque sare juyaque. ⁸ Ejeque epuju junatitsu, ecuita cuanara ni micuana jida batsaya, nearacue tunara tyayaque. ⁹ Nechachanecue tuhuaque ujejeda cuanaque. ‘Iyacia Yusura nenarucue’ jadya ecana necuejacue tumeque epuju aniya cuanaque. ¹⁰ Ejeque epuju junatitsu, tuhuaque ecuita cuanara ni micuana jidama batsaya, necuinanacue tumeque epu juque. Tumeque epu patya equetiyaque ecana jadya neacue tuhua aniya cuanaque: ¹¹ ‘Jeeque epu juque muru ecuanaja ehuchiju badehuaque tuque ecuanara itataya, “Aine yatse micuana tsehue juma” jadicue. Nenime aputaume riyaque. Ecuana micuana cuejahua micuana Yusu queja catyatitsu eje bucha judirue Yusu queja juishucadishacuareque. Micuanadya micuana inime metse, Yusuja quisarati bacacarama ahua tibu’ jadya ecana neacue tumeque epu juque cuinanayaque. ¹² Tere huecaca juetihuaju tuna

Yusura dyaque nrecaturabuque tuja quisarati bacacarama juya cuanaque. Sodomaju anicuare cuanaque tuna dyaque jidama jucuare. Jadya ama bucha tuna tumeque huecaca juetihaju dyaque ama canerecatibuque, micuanara quisarati cuejayaque bacacarama ahua cuanaque bucha ama, — jadya tuna Jesúsra acuare.

*Inime cacuareticarama jucuare cuanaque
(Mt 11.20-24)*

¹³ Jadya quisarati amena aatsutu Jesúsra quisarati acuare tuja quisarati bijidamadurahua cuanaja ishu. Tuna cuitadya baatsu quisarati aya buchatu jucuare, arepa tuna tuhua ajama jucuare ama bucha:

—¡Dyaque nrecada micuana jubuque, micuana Corazínju, Betsaidaju jadya aniya cuanaque! Tiro, Sidón jadyaju anicuare cuanaque tuna dyaque jidama jucuare. Jadya ama bucha, baquena ni tuna juquena juhua Yusuja casa era micuana iyacua bamereyaque, cacuaretiquena tuna inime juquena jucuare. Jutuquena tunajatu jucuare ejutuqui sehuedaque, ai tiru, muru tsehue iyucaju casehueti jadya, inime cacuaretihua jadya ata ishu. Micuana micuana cacuaretihua ama inime, arepa era Yusuja casa tsehuedya ayaju bahua ama bucha. ¹⁴ Riyaque micuana cuejaya. Ejeque huecaca Yusura jidama cuanaque nrecaturadadiyaju, tura micuana dyaque nrecaturabuque; Tiroju, Sidónju cuanaque jucuare dyaque tura micuana nrecaturabuque. Micuanajatu aniya emajaca ecue casa baishu. Tunaja baishuque aijama jucuare tibu, micuana tuna bucha dyaque micuana nrecada jubuque. ¹⁵ Micuana Capernaumju aniya cuanaque, jida bucha datse micuana cabatiya. Dyaque inime metseque bucha datse micuana cabatiya. Barepaju et-surashatau bucha datse micuana cabatiya. Ijahuaja etiquiju jutidya micuana nudyatabuque, —jadyatu Jesús jucuare.

¹⁶ Jesusratu isaranucacuare tuja cuanaque ecuadisha cuanaque:

—Micuanara cuejayaju bacaqui juya cuanaratu era cuejayaque bacayadya. Micuana bijidamaduraqui juya cuanara idya bijidamaduraya. Ique bijidamaduraqui juya cuanara Ique Cuadishaquique dyadi tunajatu bijidamadurayadya, — jadya tuna Jesúsra acuare.

Pacarucu tunca beta earacana ecuadisha cuanaque juetinucacuareque

¹⁷ Yusuja quisarati cuejatitsutu juetinucacuare pacarucu tunca beta earacana cuadishatacuare cuanaque pureama tsehue.

—Atichine ecuana mira amerechineque, Ecuana Cuat-sashaquique. Ijahua cuanara ecuana muibachine, ecuanara tuna micue ebacanjiju ijehuecuinayaju, —jadya tuna-jatu acuare Jesús.

¹⁸ Jesúsra tuna acuare:

—Jejee, bahuedya ique ecue dyaque casa aniyaque, Satanásja casa bacue ecue bucha ama. Bacuaedyá tuque Yusuja yacua juque pupipupiya bucha pacacae juyaju. ¹⁹ Era micuana casa tyachine ni ejeque eju nrecada juishu ama, ni micuana bacuaja ni ajipaja ujeda aishu ama, tumbaedyá micuanaja Satanás dyaque ijahue aishu. ²⁰ Pureama neju-cue, ijahua cuana ijehuecuina ishuque casa aniya cabatitsu jipidya ama. Dyaque pureama nejuque, micuana Yusu queja judiruya cabatitsu, micuanaja ebacani Yusuja quiri-caju ehueene cabatitsu.

Jesúsra Yusu pureamaturacuareque

(Mt 11.25-27; 13.16-17)

²¹ Tumeque quisarati ayaju cuitatu Jesús Yusuja Espiritura pureama amerecuare. Jadya tibutu Jesús Yusu tsehue quis-araticuare:

—Tata, miquemi barepa, yahua jadya metseque. Bahue, inimequi bucha cabatiya cuana queja ecabameretiquemi, mique eje buchique adebacara, bahue jucara ebari juya cuana queja cabameretihua. Yusurupai mique aya, mique jadya juhua tibu. Jadidyatu juya, mira jadya amerehua tibu, Tata, —jadya tujatu Yusu acuare.

²² Jadya juatsu tujatu isaranucacuare tuhua cuanaque:

—Ecue Etatara ique mepehua tuque cuarequi rehua ecuita cuana ejitaju amere ishú. Ecue Etatara peadya camadya ique pana adeba aya. Ique tuja Ebacuaque. Era cuita camadya tuque ecue Etata pana adeba aya. Tumbaedyatu adebaya era adebamerehua cuanara, —jadya tujatu ecana acuare.

²³ Tume tujatu tura mepehua cuanaque quisarati cue-jacuare:

—Dyaque jida paju micuanara era ecue casa tsehue ayaju tunaja yatuca tsehue petaqui cuanaque. ²⁴ Neadebacue riyaque. Beru yuequedyá tu Yusu equeque quisarati cue-jaqui cuanara, tumbaedyá ecuari cuanara jadya bacara ebari acuare ecue casa micuanara iyacua bayaque. Bacacara ebari tuna acuare ecue quisarati iyacua micuanara bacayaque. Jadya ama bucha tunaja anihua ama emajaca baishu ni baca ishú, —jadya tujatu ecana acuare.

Samaria juque ecuita jida jucua cuatsabiji eque Jesúsra bahuityacuareque

(Mt 22.37-39; Mr 12.30-31)

²⁵ Jadyatu cacuatsashati bahuityaquira jipetitsu acuare Jesús, tuque nime adeba ishü.

—Ebahuityaquique, ¿eje bucha ique ejü, Yusu queja judiru ishü ni eje tupu tuque jaca ishü ama? —jadya tujatu acuare.

²⁶ Jesusratu quemitsacuare:

—Micuetu eisaradya Yusuja quisarati. ¿Eje buchatu cacuatsashati ehüene tuhua?

²⁷—Yusujatu cacuatsashati jadya: “Iyuhueda bacue ducuta Yusu Mique Cuatsashaquique. Yusu iyuhueda bacue ducuta; dutya micue cabijiseriti tsehue Yusu pureamaturacue, dutya micue casa tsehue, dutya micue inime tupu tsehue”. Tumbaedyä tu ehüene: “Iyuhue tsehue bacue peya cuana. Mique cuitadya iyuhueda cabatiya bucha iyuhuee peya bacue”, —jadya tujatu acuare.

²⁸—Jidadyami caquemitsatihua. Mique caquemitsatihua eque ni mi eaniu, Yusu quejami judirubuque ni eje tupu jaca ishü ama, —jadyatu Jesusra acuare.

²⁹ Cacuatsashati bahuityaquiratu peya cuana queja jida cabamereti ishü, Jesús bacaduracuare:

—¿Ejeque rique ecue peya cuana iyuhueda baishuque? —jadya tujatu acuare, tuja ata cuana camadya inime tupuqui ayaque.

³⁰ Jesusratu riyaque cuatsabiji cuejacuare tuque quemitsayaque:

—Peadya ecuitatu ehüachi eque cuacuare Jerusalén juque Jericóju. Israelita tu jucuare. Tuque cuayajutu chiri puji cuanara inatsacuare. Miririshacuare tunaja tuque. Secacuare tunajatu chipiru tuque cadujutiyaque. Iyejeri jadya aatsu tunajatu ediji jiruru huanatsu shanacuare.

³¹ Tuequedyä pae cuacuare tumeque ediji eque nucadya. Turatu bacuare ecuita ediji jiruru jujarayaju. Ujeda eaque baya ama buchatu barenaticuare jutidya tumeque israelita ujeda eaque. ³² Tumbaedyatu junatinucacuare pae cuana tsahuaquique. Turatu tumbaedyä banatinucacuare ecuita ujeda eaque. Baya ama buchatu barenuacuareadya jutidya.

³³ “Jadya juatsutu junatinucacuare ecuita Samaria juque, tumeque ediji eque nucadya. Bacuare tujatu ujeda eaque ediji jiruru jarayaju. Arepa israelita cuanara Samariaju aniya cuanaque bijidamaduraya ama buchatu Samariajura nrecabacuare ujeda eaque. ³⁴ Jipeticuaretu ujeda eaque. Jipetitsu tujatu ujeda eaque etseri tsehue tedi, sama jadya acuare. Tuque jadya samatsu tujatu querecuare tuja ujeda eaque. Masadama tujatu tura mula isaanibeyaju iyatsuracuare. Tuque iyatsuratsutu cuanucacuare. Tura cuitadya mula icüene nitya aajecuare ecuita

dujuyaque. Nudyadirucuairetu etare tarepe puji cuana tahui ishujú. Tuhuatu ecuita Samariajura narusisacuare ujedá eaque. ³⁵ Huecacatsu diruyaratu ecuita Samariajura quemicuare beta chipiru tsuje aridaque tuja shurumai juque. Tumeque chipiru quemitsu, tujatu tsujetyacuare etare metseque. ‘Narucue jida jeeque ecuita. Riyaque chipiru ni ri tupu ama, juetinucatsu mique tsujetya tillaetiya’ jadya tujatu acuare. Jadya tsahuaetu Samariajura israelita ujedá eaque acuare.

³⁶ Cuatsabiji cuejatilla amena aatsutu Jesúsra bacaduracuare cacuatsashati bahuityaquique:

—¿Ejeratu ecuita ujedá eaque iyuhue queticuare? —jadya tujatu bacaduracuare.

³⁷ —Tuque nerecabaquira, —jadyatu quemitsacuare ecuitara.

Tumetu Jesúsra jadya acuare:

—Jutaquiju mique tumbaedyá jucue. Canerecabati tsehue peya cuana bacue, arepa micue ata ama paju ama bucha, —jadyatu Jesusra acuare.

Jesúsra Marta, María jadya cuajiticuareque

³⁸ Jesús, tura mepehua cuanaque jadya tuna cuaquenancuare Jerusalénju. Ediji equé cuayaque tuna junaticuare epu achaachaju Jerusalén japadama. Junatihuajutu epuna Marta bacanira jida batsacuare, tuja etareju nudyatsatsu. ³⁹ Tumeque epunajatu anicuare tuatsehuequique tupujuque María bacani. Marta ai juyaque etsahuaquetu ejanaque Jesús peque jutidya anibutecuare tuque quisaratiyaju ijacabaca. ⁴⁰ Martaratu jidama inime bacuare, mere jetiama ataquique aniya baatsu. Tumetu Martara Jesús jipetitsu jadya aticuare:

—Ecuana Cuatsashaquique, ¿miratu jidama ama inime baya ecue ejana tuhua mique quisaratiyaque ijacabacaani, ique bacue casada mere jadya juyaju? Tueque cuejacue; paje, patsahuana tura ique, —jadya tujatu Jesús acuare.

⁴¹ Tudyatu Jesúsra quemitsacuare:

—Miquemi cuji cuita juya, Marta. Miratu dyaque inime tupuqui cuita aya micue mere, Yusuja quisarati ama. ⁴² Yusu jaque peadya camadya micue inime tupuqui ataquique, Mariara inime tupuqui aya bucha. Tuquetu nime aputaya ama tura ijacabacayaque.

11

Jesúsra eje bucha quisaratie Yusu tsehue jutaquique bahuityacuareque

(Mt 6.9-15; 7.7-11)

¹ Jesústu Yusu tsehue quisaraticuare peya queja amaca. Quisaraticuahuajutu peadya tura mepehuara isaracuare:

—Bahuityacue ecuana Yusu tsehue eje bucha quisaratie juishuque. Juanra tura mepehua cuanaque bahuityahua bucha bahuityae ecuana acue, Ecuana Cuatsashaquique, — jadya tujatu acuaré.

²—Yusu tsehue quisaratiyaque, jadya neacue:

“Ecuanaja Etata barepaju aniyaque, muiba ishucue mique. Adebaya mique ecuana juchama nerique.

Pajuetihuisha huecaca micue ecuana naru ishucue.

³ Tyacue ecuana riyaque huecaca ara ishucue ecuanara sareyaque.

⁴ Apupashacue ecuanaja jucha cuana.

Ecuana peya cuanara jidama ayaque nime aputaya bucha, jadidya ecuanaja ecuana jidama juya cuanaque apupashacue.

Satanásra cajuchatishacara ayaju, ecuana tsahuacue, ecuana ecajuchatiuju”, jadya neacue Yusu tsehue quisaratiyaque.

⁵ Tumbaedyá tujatu ecaná cuatsabiji cuejacuare, Yusu ai bacatsu bacajaca ishucue ama.

—Ita taa mi micue ataja etareju meta patya ejutiu. Etsecue equemi etare metseque eisaratiu: “Nerecabacue ique. ¿Etyau ama mira quimisha pan? ⁶ Ecue eadebaquetu junahua ecue etareju. Aijama ecue ai tsehue batsa ishucue. Tuque mihua ishucue mique bacaya”, jadya tuquemi eatiu. ⁷ Jadya mira bacayajumi micue atara equemitsau educu equera: “Aijama. ¿Eje bucha juatsu jatsumi meta patya jeya? Amena taa tuque etare yahuehua. Amena ecuana ecue ebacua cuana tsehue jarahua; canajaraya ecuana. Amena eje bucha netitsurataqui ama”, jadya turami eau. ⁸ Cuejaya mique riyaque. Bacajacaya ama ni mira, netitsurayadya tuque, mira ai bacayaque tyáishu. Mira ai sareyaque turami tyayadya, mira bacajacahua ama tibu, ai mique tuja ata baatsu ama.

⁹ “Cuejaya micuana era. Nebacabacajacaume Yusu queja. Tyayadya tura micuana. Nebacajacaume ai sareyaque. Yusura micuana dadimereya. Canimehuallatima neihuacue micuanara ai Yusu bacahuaque tura tyaya tupu. Etareju nubicara juatsu etare metsera pacashaya tupu eihuau bucha ihuae neacue. ¹⁰ Ejera bacajacayaque ama tujatu tyayadya. Ejera sareyaratu dadiyadya. Ejera canimehuallatima ihuayaratu bayadya tura bacahuaque.

¹¹ “¿Mira bayara pan bacayaju ni taa mi tumu jutidya etyau ara ishucue? ¿Mira bayara jae bacayaju ni taa mi bacua jutidya

etyau ara ishu? ¹² ¿Eca bacayaju ni taa mi etyau ajipa jutidya ara ishu?. ¡Ni ejeque etataqueratu tura bayaque jadya eau ama! ¹³ Butsee micuana jidamaradya tuque micuana micuanara baya cuanaque jidaque tyaya. Yutsumadya Yusu barepajura tuja Espiritu micuanara bacayaju cuadishayadya, —jadyatu Jesúsra tura mepehua cuanaque acuare.

Jesús tunara “Satanásja casa rejari aniya” jadya acuareque (Mt 12.22-30; Mr 3.20-27)

¹⁴ Jesusratu ijehuecuinacuare ijahua ecuita quisarati bae-cua amerequique. Ijahua cuinanahuajutu ecuita quisaraticuare. Tuhua cuanaquetu anajacatacuare quisaratiya bacsu. ¹⁵ Umae cuanatu jucuaré:

—Beelzebú, ijahua cuana cuatsashaquique tu tuatsehue. Jadya tibudya tujatu casa aniya ijahua cuana ijehuecuina ishu, —jadya tuna jucuaré.

(Beelzebú taa tu Satanás bacani nucadya.)

¹⁶ Peya cuanaratu sarecuare eje bucha eque Jesús jidama aishu. Tume tunajatu acuare:

—Acue ecuanaja yacuaju ai bapeque inimeradya jutidya Yusuja peadya camadya ataquique, micue casa Yusu barepajura aniyaque ecuana bahue juishu, —jadya tunajatu acuare.

¹⁷ Jesusratu adebacuare tunara eje bucha inime tupuyaque.

—Jadíque juatsu taa tu Satanás tuta tacadya jutidya pana cayuamaturati ejuu. Ita taa nebacacue. Yahuaju dutya aniya cuanaque ni ecajaquetibareu cuarepe cuarepe tuna cama cati ishu, tuna camadya jutidya tuna ecattiatu. Peadya etaretu pana rihuishatanatere ejuu. Dutya tumu etare enityatsuraquetu yahuaju tere ejuu. ¹⁸ Era ni Satanásja casa tsehue ijahua cuana eijehuecuinau, tume taa tu Satanás tuja cuana tsehuedya jutidya ecatiu. Tumetu ni ejeque ijahuadya jutidya tura cuatsashaya eque ejuu ama. Micuanara ique aya, Beelzebúja casa tsehuepa ijahua cuana ijehuecuinaya jadya. ¹⁹ Jetiama micuana tsehue juneniya cuanara dyaditu ijahua cuana ijehuecuinaya. ¿Aira tuna tyaya tumeque casa? Tuna tuna bahuedya, Beelzebúra ni ejeque casa tyayaque ama ijahua cuana ijehuecuina ishu, ijahua cuana tujaque juya tibu. Micuanara ni ejeneya Yusuja casa tsehue tunara ayaque, tume tuque micuanaja ejenetaquidya era dyadi Yusuja casa tsehuedya ayaque. ²⁰ Yusuja Espiritura casa tyaya ijahua cuana ijehuecuina ishu. Jadya tibudya tuque micuanaja inime jutaqui “Riyaque ri Yusuja Emepeque”, idya micuanara ihuacuareque.

²¹ “Ecuíta casadara quiyeti ishu tsehue tuja ai cuana naruyajutu dutya tuja etareju eje bucha ama juya. ²² Jadya

ama buchatu peya dyaque casadaque tuaqueja ejunau tuatsehue cati ishü. Dyaque casadara ijahue aatsu, tujatu secaya dutya tuja quicueneti ishüque, dutya tuja ai anihua cuanaque jadya. Ique Satanás bucha dyaque casadaque. Aputashatillacuare tuque era tuja casa anicuareque.

²³ “Ejeque ecue ishü jidama quisaratiyaquetu ique ujeque. Ique tsahua baecuara ique jidama aya. Tumequetu era mepeyaque dacashaajeya buchique, —jadya tujatu ecana acuare.

Ijahua yudijidya judirunuca jucuaque
(Mt 12.43-45)

²⁴ Tuhua cuanaque tuna Jesúsra cuejanucacuare:

—Anicuaretu ijahua tura quijahuatishaya quejaque ecuinanaque. Tumeque ijahuatu junenicuare anitaya ama cuanaju ani ishüque sare juyaque. Dadicuare amatu eju ani ishüque. Dadima aatsu tujatu jadya inime tupucuare: “Padirunuca ique eju ique cuinanashatahuaju. Tuatsehue camadya ique eaninucau” jadya. ²⁵ Tumeque ecuita queja judirunucatsu tujatu badirucuare ni ejeque ijahua tsehue ama, etare ejabu, jida, ebajeje bucha. ²⁶ Jadya baatsutu tumeque ijahuara peya ijahua cuana sareticuare. Pacarucu ijahua cuana, tuque bucha dyaque jidama cuanaque tujatu daditicuare. Daditsu tujatu ecana beticuare. Juetinucatsu tunajatu dutyara quijahuatishanuca acuare tumeque nrecadaque ecuita. Jadya juetu ecuita juya tuque icuene juhua bucha dyaque jidama, —jadya tuna Jesúsra acuare.

Dyaque jida paju Yusuja quisarati bacatsu yana equedya juya cuanaque

²⁷ Jesús jadya quisaratiyajutu epuna jetiama ecuita ducuque quiquecuare:

—¡Dyaque jida paju epuna mique ijehuecuinatsu susuqui juhuaque! —jadyatu epunara acuare.

²⁸ —Jejee, tumeque epunatu jida, pureama cabatiya. Dyaque jidatu Yusura cuatsayaque bacatsu cuatsashaya equedya juya cuanaque, —jadyatu Jesúsra acuare.

Yusu adeba baecua cuanara Jesús Yusuja casa ejitaju juishuque amerecara acuareque

(Mt 12.38-42; Mr 8.12)

²⁹ Ecuita cuana Jesús queja casitiatijaju tujatu ecana isaratibunecuare:

—Dutya jujeritu ecuita iyacua aniya cuanaque jidamaque inime cadujutiya. “Acue ai inimeradya jutidya, ecuana mique Yusura cuadishahuaque bahue juishu” jadya ajacama taa micuanara aya. Aya ama tuque era. Jonás jucuaque cuita camadya micuana huecashaya. ³⁰ Niniveju anicuare

cuanaque Jonás eje bucha jucuaqueque bahue juatsu, tunajatu adebacuare tuque Yusura tuna Yusuja quisarati cueja ishu cuadishahuaque. Tumbaedy micuanara IQUE ECUITA eje bucha judadiyaque baatsu, tuque micuana adebadiya ique Yusuja ecuadishaque.

³¹ “Beru yunquejanetu ecuari epuna Sabá juque beni diji queja anicuareque jecuare dyaque japadaque Salomón dyaque inimequija quisarati bacara. Ique Salomón bucha dyaque inime metseque. Jadya ama bucha micuana era cuejayaque bacacarama aya. Jadya tibudyatu tere ishuque huecaca juetihuaju, Yusura ecuita cuana tuna eje bucha jubuqueque cuejabareyaju, tumeque ecuari epunaradya micuana pana cueja abuque Yusuja yacuaju: ‘Dyaque ecana pacanerecati Jesús yahuaaju aniya patya tura cuejayaque bacacarama jucuare cuanaque’. ³² Jonásra Yusuja quisarati cuejayajutu Niniveju cuanaque inime cacuareticuare. Ique Jonás bucha dyaque inime metseque. Jadya ama bucha micuana bacacarama aya era bahuityayaque. Tumetu tumeque huecaca Yusura dutya eje bucha judadibuqueque cuejabareyaju, Niniveju anicuare cuanara micuana pana cueja abuque Yusuja yacuaju: ‘Dyaque ecana pacanerecati Jesús yahuaaju aniya patya tura cuejayaque bacacarama jucuare cuanaque’ jadya, —jadya tuna Jesúsra acuare.

Ecuitaja educujuque inime udaquique
(Mt 5.15; 6.22-23)

³³ Jesúsra tuna cuejanucacuare:

—Ude tuchatsu tuque ecuana tehuaya ama caju ducu. Etehuauque tuque ecuana iyaya ebarucue, nubitiya cuanaque jida capetati ishu. ³⁴ Yatuca tsehue ademe ecuana capetatiya. Capetatitsu ecuana canarutiya ai muda cuanaju. Yatuca ecatse jidaju ecuana jidadya anitaqui. Yatuca ecatse jidamaju, ecuana ecanarutiu amadya muda cuanaju. ³⁵ Era micuana cuejahaque tu hueca buchique. Necanaruticue bacue ecue quisarati enime aputauju. Ecue yana equedya ama ni micuana aniya, tume micuana apudaju juneniyaque cuji juhuaque bucha. ³⁶ Yuneridya ni micuanara adebaya, tume micuanara pana adeba aya ique aique, aira cuadishahuaque jadya. Tume tuque micuanaja saretahui ama ecue ai inimeradya jutidya aishuque yunerique adeba ishu. Ude tsehue jida edijiju juneniyaque bucha micuana ejuu, —jadya tuna Jesúsra acuare.

Jesúsra fariseo cuana, cacuatsashati bahuityaqui cuanaque jadya jidama juyaque ejitaju acuareque
(Mt 23.1-36; Mr 12.38-40; Lc 20.45-47)

³⁷ Jesús quisaratijacahuajutu fariseora tuja etareju ararati ishü cuejacuare. Jesústu nubitsu aninaticuare mesaju, emetucu cutsatimaque israelita cuanaja bahue eque ama. ³⁸ Jadya baatsutu fariseora jidama bacuare, Jesús cacuatsashati eque ama juya baatsu.

³⁹ Ecuana Cuatsashaquiratu tura inime tupuyaque adebaya tibu jadya acuare fariseo:

—Arepa micuana fariseo cuana ecuitaju asicadaque jida catillaticara juya ama buchatu Yusura micuanaja inime ducuta asicada baya. Jidama micuana juajeya. Chiri micuana juajeyadya jutidya. Micuana micuana canecu, peja jadya dyaque camadya eutsaque bucha, educuju asicadaque ut-sama. ⁴⁰ ¡Ecuíta inime tupu baecua cuanaque! Pusha amadya tuque ecuanaja Yusura ecuita iyahua, tumbaedyá ecuanaja educu juque inime. Ecuíta camadya ama inime tupuqui neacue, educu juque inime tumbaedyá. ⁴¹ Micuana micuana jida bucha cabatiya, micuanara nrecada cuanaque ai tyaya tibu. Micuanara ni Yusu mereya educuju inime eiyacuane tsehue, tume micuana Yusura jida asicadama baya, peja dyaque educuju jadya pana utsa eaque bucha.

⁴² “¡Nrecapane micuana fariseo cuana! Arepa micuana cacuatsashati cuana aishuque ama jipenee eque juya ama bucha, cacuatsashati dyaque inime metse eque micuana aniya ama. Micuanajatu Yusu tyabahue cacuatsashatira casada tsehue tyamereyaque camadya. Acuihuija ijimeda cuanaque “menta”, “ruda” jadya bacani micuanaja etare taracaju cuhuatiya cuanaque, teeju cuhuatiya cuanaque jadya tuque micuanaja tyabahue. Jadya ama bucha tuque micuana jida, tuyu tsehue ama baya peya cuana. Micuanaratu Yusu iyuhuedama baya. Pusha amadya tuque micuanaja Yusu tyataqui cacuatsashati eque casada tsehue tyataquique. Jadya ama buchatu dyaque saretanaya jida, tuyu peya cuana tsehue ani ishü, Yusu iyuhueda baishu jadya.

⁴³ “¡Nrecapane micuana fariseo cuana! Caradati ishüque etareju cuaatsu micuana muida cuanaque anibahueju anibutecara juya. Ediji cuanaju juneniyaju micuana dyaque muida tsehue isaratacara juya.

⁴⁴ “¡Nrecapane micuana! Micuana micuana uhuacuare emaju cuanaque eishaque ejitajuque ama buchique. Ecuíta cuanatu cuetiya, emajuque jarayaque dyaque eque adebayaque ama. Tumbaedyá micuana jidadya batacara datse micuana juya; ai jidaque ama, —jadya tuna Jesúsra acuare.

⁴⁵ Jadya juyaju bacatsutu cacuatsashati bahuityaquira acuare:

—Jadya quisarati tsehue, fariseo cuana jipidya ama tuquemi ijillahuanaya. Ecuana cacuatsashati bahuityaqui

cuanaque mira ecuana ijillahuanayadya, —jadya tujatu acuare.

⁴⁶ Jadya juatsutu Jesúsra acuare:

—¡Nerecapane micuana dyadi cacuatsashati bahuityaqui cuanaque! Casada tsehue micuana peya cuana jetiama cacuatsashati cuana eque amereya, tuna tsahuayaque ama. Abu ishunque dyaque bicueda eje bucha abutaquimaque peya abumere ishunque bajejequi buchique micuana. Micuanara cuitadyatu ni ai buchique abucarama aya, ni micuana peya abuquerecara aya.

⁴⁷⁻⁴⁸ “¡Nerecapane micuana! Micuana micuana jidama, micuanaja baba cuana bucha. Berutu micuanaja baba cuanara iyecuare Yusu equeque quisarati cuejaqui cuanaque. Iyacia tuque micuana micuanaja baba cuanara iyecuare cuanaja uhuacuare cuana jida piji bajejeya. Jadya juyaque micuana amena ejitaju juya micuanaja baba cuanaja inime cadujutiyaque.

⁴⁹ “Yusutu icueneta bahue eje bucha judadibuqueque. Jadya tibudyatu jucuare béru: ‘Cuadishabuque tuque tuna queja ique equeque quisarati cuejaqui cuanaque, anaqui cuanaque jadya. Umae tunajatu iyebuque. Peya cuana tunajatu ijahue ijahue abuque’ jadyatu Yusu jucuare. ⁵⁰⁻⁵¹ Nerecaturatabuque micuana ecue cuanaque jidama ahuaju camadya ama, tumbaedy micuanaja baba cuanara béru yuequedy Yusu equeque quisarati cuejaqui cuanaque iyecuare tibu. Dutya iyetacuare tibu Abel equeque, Zacarías tupu micuana jucha metse. Zacariastu Yusuja etareju iyetanacuare, Muida Cuitaque Ama, mesa tumu eaque Yusu tyaya cuanaque iya ishunque petya majaca. Pusha amadya micuana cuejaya. Micuana iyacia aniya cuanaque micuana nerecada atabuque Yusu dutya merequi cuanaque iyetacuareja inime.

⁵² “¡Nerecapane micuana cacuatsashati bahuityaqui cuanaque! Micuana cuitadya micuana baecua eje bucha judirue Yusu queja juishunque, ni micuana peya cuana bahue amerecara aya. Micuana micuana etsecue yahue tsehue teriqui buchique, micuana cuitadya nubi ishuma ni ejeque nubicara juyaque nubi ishuma, —jadya tuna Jesúsra acuare.

⁵³ Jadya quisarati ayaju bacatsutu cacuatsashati bahuityaqui cuanaque, fariseo cuana jadya ecahuaiti dyaque jucuare. Jesúsja ishuma tunajatu jidama quisarati acuare. Cacuatashati eje bucha adeba aishunque tunajatu bacaduracuare. ⁵⁴ Yara tupu yara tupu tunajatu bacaduraajecuaredya jutidya. Eje buchadya Yusuja ishuma jidama quisaratisha, jadya ama juatsu cacuatsashati bape

cuejamere, huaraji cuana queja cueja jadya tunajatu acara ebari acuare.

12

Ejitaju ecuana jubuque eje buchique

¹ Tume juyajutu casitaticuare eje uma mil ecuita cuana. Quitushatiya, ecatiiti jadya ecana jucuaré. Jesusratu tura mepehua cuanaque isaracuare, ecuita jetiera ama bacayaju.

—Necanaruticue fariseo cuana tsehue. Levadura buchiquetu tunara bahuityaya cuanaque. Jidadya batacara datse tuna juya, ai jidaque ama. ² Dutya ibedaquetu adebataqui judadiya. Dutya etehuaquetu ejitaju judadiya. ³ Meta quisaratiyaquetu bacataquidya juya huecadaju. Micuanara etare teritsu cuejayaquetu dutya queja cuejatanabuque, —jadya jutatu ecana acuare.

Yusu camadya mubataquique

(Mt 10.26-31)

⁴ Jesúsra tuna bahuityanucacuare:

—Nemubaume micuana iyecara juya cuanaque. Arepa tunara micuana eiyeu ama bucha, jadya aatsu tunajatu aijama casa micuana nerecatura ishu ni riya piji buchique. ⁵ Cuejaya micuana era, ejeque micuanaja mubataquique. Nemubacue Yusu camadya. Tuja peadya camadyatu casa aniya micuana majuhaju ijahuaja etiquiju nudya ishu. Tuque camadya nemubacue.

⁶ “Yusuratu naruya dutya ai aniyaque. Upati huii cuanatu tsujequi cuitaque ama. Pishicaque tu beta peadya chipiru tsuje piji. Jadya ama buchatu Yusura naruya; bahuiedya tuna eje bucha juyaque. ⁷ Yusuratu adebaya dutya eje bucha micuana judadiyaque. Turatu adebaya dutya, eje uma micuanaja iyucaju etsaru aniyaque. Jutaquiju bajida nejuume. Pusha ama cuitadya micuana Yusura naruya. Upati huii cuana naruya bucha, dyaque jida tura micuana narujacaya ama.

Ecuita cuanaja yacuaju “Jesús jaque ique” jadya juya cuanaque

(Mt 10.32-33; 12.32; 10.19-20)

⁸ “Cuejaya micuana era. Ejeque ni ecuita cuanaja yacuaju ‘Jesús jaque ique’ jadya cacuejatiya, era ecue Etata barepajuja yacuaju, tuque tsahuaqui cuanaja yacuaju jadya ‘Ecuique tume’ jadidya abuque. ⁹ Ejeque ni ecuita cuanaja yacuaju ‘Ique Jesús jaque ama’ jadya cacuejatiya, era dyaditu ecue Etata barepajuja yacuaju, tuque tsahuaqui cuanaja yacuaju jadya ‘Ecuique ama tume’ jadidya abuque.

¹⁰ “Yusuratu IQUE ECUITAja ishü quisarati jidama ayaja jucha cuana eapupashau. Jadya ama bucha tujatu jucha cuana apupashabuque ama tuja Espirituja ishü cuita jidama quisarati aya cuanaja.

¹¹ “Dujubuque tunara micuana caradati ishüque etareju huaraji cuana ecasitatiju. Epu naruqui cuanaque, inime bajejequi cuana jadyaja yacuaju micuana dujutanabuque. Huaraji cuanaja yacuaju dujutatsu jidama inime nebaume quicueneti ishü quisarati ishü ni eje bucha cuejae aya tsehue. ¹² Quisarati ishüque ura juetihuaaju Yusuja Espiritura micuana huecashaya micuana eje bucha quisaratie juishu, — jadya tuna Jesúsra acuare.

Eje bucha jidama chipirura eamereuque

¹³ Umada ecuita cuanatu jucuaré Jesús tsehue. Peadyaratu jadya acuare Jesús:

—Ebahuityaunque, ecue etatara tuque yatseja majutsu shanacuare dutya tuja ai anicuare cuanaque. Cuejacue ecue eusi; patya tura ique ecue ishü aniyaque, —jadya tujatu Jesús acuare.

¹⁴ Jesusratu acuare:

—Ique micue tataja ai jucuaré cuanaque cajuqueti ishüque cueja ishüque ama, —jadya tujatu acuare.

¹⁵ Tumbaedyatu Jesús jucuaré:

—Nebijiseriüme dutya ai aniya cuanaque ni petaya cuanaque. Arepa ecuita dyaque umada chipiru tsehue ama buchatu dyaque jidama inimeju. Ejeque huecaca tujatu majutsu, shanabuquedya dutya tuja ai cuana, —jadyatu Jesúsra acuare.

¹⁶ Jadya aatsu tuna Jesúsra bahuityacuare jeeque cuatsabiji eque.

—Anicuaretu chipirudaque. Dutya tuja tee cuanaju uhuamerecuare cuanaquetu jida huijacuaré. Jetiama tujatu huesamerecuare tuhua euhuaque. ¹⁷ Chipirudaratu inime tupucuaré: “¿Eje bucha ejuu? ¿Eju iyameretaqui ama taa baya ecue teeju era huesamereya cuanaque?” ¹⁸ Tume tujatu adebacuaré eje bucha iyamereé aishüque. “Parihuishamere tucue ecue beruque huesamereya cuanaque quiniqui cuanaque. Paamerenuca peya etare dyaque arida cuanaque. Tuhuadya tucue etare iyacua cuanaju paiyamere dutya ecue aniyaque, dutya era huesamereya cuanaque. ¹⁹ Tume tuque ecue inime juya. Amena ecue aniya umada earaqui eiyaque eje uma mara tupu. Pacanajara ique. Paaraara. Paijiji. Iyacua pureama paju”, jadyatu chipirudaque jucuaré datse. ²⁰ Arepa ecuitaja eje uma mara chacha ani ishü cabaticuaré ama buchatu jadya ama jucuaré. Yusuratu jadya acuare: “Inimema mique. Riyaque apuna cuitadyami majuya. ¿Aija ishü

cuana taa tuquemi tume cuanaque iyamerehua?” jadyatu Yusura acuare chipirudaque. Jadya majuetu tumeque ecuita jucuare.

²¹ “Cuejaya micuana era. Jadyatu jubuque tunaja ishucuita camadya jetiama chipiru, ai jadya caradatiya cuanaque. Arepa tuna dyaque chipirucuita cabatiya ama bucha, tuna Yusura nrecada, aima bucha baya, —jadya tujatu ecana acuare.

*Yusura tuja cuanaque narujacayaque ama
(Mt 6.25-34)*

²² Jadya junuca jadya juatsutu Jesúsra tura mepehua cuanaque bahuityanucacuare:

—Cuejaya micuana era. Netsapeume inime: “¿Ai dyadi rique araya, ijiya? ¿Ai dyadi rique jutuya?” jadya.
²³ Yusura micuana iyahua tibu, yuneri cuitadya tura micuana tyadadiya micuanaja aijamaque ara ishucuita, jutu ishucuita jadya. ²⁴ Neadebacue upati huiri cuana. Tunaratu inime tsapeya ama tunara sareya tsehue. Tuna tuna cuhuatiya ama ni cahuesatiya ama ara ishucuita. Aijama tunaja ni eju tunaja earaqui iya ishucuita. Jadya ama bucha tuna Yusura tyaya ara ishucuita. Tujaque micuana. Micuana tura micuana dyaque iyuhueda baya, upati huiri cuana bucha ama. Yuneri cuitadya tura micuana tyaya micuanara ara ishucuita sareyaque. ²⁵ Ni ejeradya jutidyatu tuja maju ishucuita ura juetihuaaju tuja ani erirunucan ama. ²⁶ Ni micuana ataquí baya batu di taa riya pijique, ¿tume tuque micuana eje bucha juatsu inime tsapequi aya peya ai cuana?

²⁷ “Micuanajatu tsapetaqui ama inime jutu ishucuita cuana tsehue. Nebacuedya yachiju shasha cuana eje bucha danee juyaque. Tunaratu jidama ama inime baya jutu ishucuita cuana tsehue. Mere ecana juya ama chipiru jiteque, ni ecana taritariya. Jadya ama bucha tuna Yusura jida piji amereya. Salomón tu jucuare ecuari dyaque jida tsehue cajututitsu jida piji. Jadya ama bucha shasha cuana yachi juquetu dyaque jida piji, Salomónra ejutuqui dyaque jidaque jutucuire bucha ama. ²⁸ Shasha yachi juqueri tsunuda ama juya. Tumeque huecaca camadya tu jida piji; peya huecaca bacue eijehue ejuu etiquiju. Yusura yachi juque shasha cuana dyaque jida piji amereya tibu, yuneridya tura micuana tyadya micuanara jutu ishucuita sareyaque. Micuanaratu tura naruyaque ejeneya ama, arepa tuque micuana upati jeta aqui cuanaque, shasha cuana jadya naruyaju baya ama bucha. ²⁹ Yusura tura iyahuaque naruya tibu, inime netsapeume: ‘¿Ai dyadi tuque ecua araya? ¿Ai dyadi tuque ecua ijiya?’ jadya tsehue. ³⁰ Yusu adeba baecua cuanaque tuna tumeque inime

tupu tsehuedya jutidya juneniya. Micuana jadya inime tupu tsehue nejuneniume. Micuanaja taa tu aniya Etata Yusu barepa juque, micuanara ai ara ishuque, jutu ishuque jadya sareyaque tyaquique. ³¹ Pana catyati nejucue Yusu queja, tuja micuana naru ishu. Jadya anie ni micuana juya, tume tura micuana tyaya dutya micuanara sareya cuanaque.

Tere baecuaque etsujequi jida quiyatiaje ishuque
(Mt 6.19-21)

³² “Arepa micuana eje uma ama, casadama jadya juya ama bucha, bajida nejuume, ecue cuanaque. Micuanaja Tata Yusura micuana mepehua micuana eatsehue jupee huaraji aridaque juishu. ³³ Catyati neacue micuanaja aniyaque. Tumeque chipiru inayaque nrecada cuanaque netyabarecue. Nequiyatiajecue etsujequi tere baecuaque barepaju. Yusu queja micuana quiyatiajeyaquetu cayuamati baecua. Chiritanaya ama tuque, ni tu yuamaturaya rapara. ³⁴ Tupujacaya ama tuque ecuana inime ecuanaja iyuhueda cuanaque quiyatihuaju.

Jesús junanucayaju quihuati ishuque

³⁵⁻³⁸ “Cuejaya micuana riyaque cuatsabiji. Pana adeba neacue. Anicualetu peadya ecuita chine ishu caquemiti-tayaju cuacuareque. Tuja mere puji cuanatu baecua jucuaré ai ura tuque juetinucayaque. ‘Meta patya ni tu juetiya, jadya ama juatsu ni huecacayaju’ jadya tunajatu inime jucuaré. Ai ura tuque juetinucayaque baecua tibu tuna ecajututi anicuaré. Ude ecana catuchaticuaré. Tahuicuaré ama ecana. Ecabati tuna anisisacuare. Equihuati tuna anicuaré eje tupu tura juetitsu isaraetiyaju masadama etsecue pacasha ishu. Tumetu patrónra tuja mere puji jida cuanaque juetitsu sumietiya ecabati tuque ihua juya cuanaque. Ejeque uradya jutidya tuque juetitsu meta patya, huecacayaju, juetitsu tujatu ecana cuejaetiya mesaju anibute ishu. Ejutuqui jidaque bacue catacati, mere ishuque jutu jadya juatsu tujatu earaqui quinineya.

“Jutaqui ju micuana dyadi nequihuaticuedya ecabajetique junanucayaju ishu, mere puji jida cuanaque jucuaré bucha, tunaja patrón ihuayaque jucuaré bucha. ³⁹ Bahue nejucue riyaque. Ni ejeque etare metsequetu bahue ama ejeque ura chiri puji ejutiunque. Junayaque bahueque juatsutu ecabati ejuu, chiri puji etareju chiri ejutiunque naru. ⁴⁰ Micuana dyadi equihuatidya nejucue ique batsa ishu. Muya jutidya micuana eanau, ejeque huecaca ique junanucayaque baecua tibu, —jadya tuna Jesúsra acuare.

Mere puji cuejataquique, cuejataquimaque jadya
(Mt 24.45-51)

⁴¹ Tumetu Pedrora bacaduracuare:

—Ecuana Cuatsashaquique, ¿jadya cuejae mira ecuana aya, ecuana camadya, dutyadya ni taa?

⁴² Jesusratu quemitsacuare:

—Neihuacue ique, mayuruma jidara tuja patrón iyuhuedaque juetiyaque eihuau bucha. Mere puji yana equedya juyaquetu jida, inimequique. Micuanaja pana adeba aishu micuana cuejaya riyaque. Anicuaretu mayuruma. Tuja patronratu shanacuare tuque juneniya tupu tuja etareju cuanaque naru ishu. “Dutya huecaca ecana ara ishu cuanaque tyacue”, jadya patu tuja patrónra aquenacuare. ⁴³ Tumeque mayuruma ni amerehua equé juya, peya cuana ni tu narujacaya ama, dutya pureamatu jubuque tuja patrón juetihuaju. ⁴⁴ Pusha amadya micuana cuejaya. Tura tuja patrónja mere puji cuana jida naruhua tibu, tujatu dutya tuja ai aniya cuanaque narumereya.

⁴⁵ “Mayuruma ni cuejataquima, amerehua equé amadyatu juya. Tura ni jadya inime tupuya: ‘Ecue patróntu juetihuishaya ama. Ecue biji equé paju jari’ jadya. Amena jadya juatsu tujatu peya mere puji cuana nerecaturaya; ijahue ijahue jutidyatu ecana aya. Chine mere, araara, nijuqui arida cuana tsehue, ijijiyaya jadya tsehue jutidyatu ecana aniquereya, tuja mere ataqui ama bucha. ⁴⁶ Tumetu tuja patrón juetiya ni tuque quihuatijaju, ni tuque juetinucayaque ura bahueju. Jadya baetitsutu tuja patrónra catsa catsa, ijehue jadya aetiya tuja etare juque. Riyaque mayurumatu canerecatibuque. Yusu adeba baecua cuanaque canerecatiya bucha canerecatietu jubuque.

⁴⁷ “Mere puji ni yana equedya ama juya, arepa tuque tuja patrónra amereyaque bahue ama bucha, tumetu dyaque nerecada atanabuque. ⁴⁸ Ejeque mere puji ni yana equedya ama juya, tuja patrónra amereyaque baecua juatsu, tumetu dyaque ama nerecaturatanabuque. Jetiama aniya cuanajatu jetiamadya tyataqui peya cuana. Tumbaedya ejera ni pana adeba aya Yusuja biji equeque bahuityataquidya tunajatu peya cuana tunara adebayaque, —jadya tujatu ecana acuare.

(Riyaque cuatsabiji equé tuna Jesúsra bahue amerecara acuare tuque iyuhueda baqui cuanara ihuayaque; tuque iyuhuedama baqui cuanara bacue ihuaya ama jadique.)

Jesúsja inime riyaque yahuaju cuanaque catibuqueque
(Mt 10.34-36)

⁴⁹ Jesúsra tuna bahuityanucacuare:

—Etiqui jujua jeyara dutya jiji asicada cuanaque jadya tirushatsu baje jeyaya buchique ique. Ique jehua riyaque yahua ju jidamaque aputasha, eaqueja catyatiya cuanaque tunaja educuju asicadaque aniyaque tilla jadya aishu. ¡Eatilla jipe ecue Yusura mere amerehuaque ejuu! ⁵⁰ Ique dyaque canerecatitaqui, majutaqui judadiya ique nrecada juyaque atillaya tupu. ⁵¹ ¿Micuanaja ni tu inime juya, ique junahua baatsu dutya inime jidama cuanaque, cati jadya amena terehua bucha? Jadya ama tuque. Ique adeba baecua cuanaque tuna ecue cuana tsehue cahuititsu catibuque. ⁵² Iyacia equeque tu micuana dyaque ujeu baqui cuanaque micuanaja etareju cuanaquedya. Ita taa nebacue. Peadya etarejutu eaniu ecuita, tuja ehuanegue, ebacujunaque, ebacuaque, ebacuaqueja ehuanegue. Ique adeba baecua cuanaratu ique adebaqui cuanaque ujeu babuque. ⁵³ Etataqueratu ebacuaque ujeu babuque; ebacuaquera bacue etataque. Ecuakeratu ebacujunaque ujeu babuque; ebacujunaquera bacue ecuaque. Yahuiqueja ecuaqueratu ujeu babuque ebacuaque jahuane; ebacuaque jahuanera bacue yahuiqueja ecuaque, —jadya tuna Jesúsra acuare.

Huecaca cuana eje buchiquepa eadebau jadique
(Mt 16.1-4; Mr 8.11-13)

⁵⁴ Jesúsra tuna cuejanucacuare:

—Nei diji equeque huani sehueda netitsuraya baatsu, micuana juya: “Nei tu netihua; iyacuari nei juya”. Tumetu micuanara quisarati ahua equedya juya. ⁵⁵ Beni mara juetihua jutu “Amena nei jujacaya” jadya micuana jubahue. Micuana micuana bahue jida amena beni maraju nei jujacayaque. ⁵⁶ Micuana aniya patyatu Yusura jetiama aya ique tuaquejaque junahuaque adebamere ishique. Micuanaradya jutidyatu adebaya ama, arepa micuana huecaca cuana eje buchique adeba bahue ama bucha, arepa micuana riyaque yahua juque adeba bahue ama bucha. Micuana micuana jidamaque inime cadujutiya, arepa micuana dyaque inime adebabada cabatiya ama bucha.

Ecuana ujeu baqui cuana tsehue jida jutaquique
(Mt 5.25-26)

⁵⁷ “Micuanara cuitadya neadebacue dyaque jida tuyuque.

⁵⁸ Ejera ni micuana huaraji queja cuejaya, dujucara ni tunara micuana aya, huaraji queja junatimaradya icuene jida inime nebajejecue. Icuenedya ni micuana inime ebajejeu ama, tume tunara micuana edujuu inime bajejequi queja. Dujuhua ju micuana inime bajejequirá policia cuana queja edujumereu. Tume tunara micuana etare apudaju eishau. ⁵⁹ Pusha amadya micuana cuejaya. Tuhua tunara micuana

enityamereu, huarajira tsujebacayaque tsujetyatillaya tupu,
—jadya tuna Jesúsra acuare.

13

Inime cacuaretiyaque ama juatsu Yusuja queja judirubunqueque ama

¹ Tumeque huecaca nucadyatu umae ecuita cuana jecuare Jesús queja. Cuejanaticuare tuna Jesús:

—Pilatoratu eje uma israelita cuana Galilea juque iyemerecuare, tuna Yusuja etareju uu cuana iyetsu Yusu tyau juyaju. ¿Eje bucha juatsu tuna iyetanacuare, tuna jucha arida baatsu ni taa?, —jadya tunajatu bacaduraticuare.

² —Micuanaratu adebaya tume cuanaque ecuita cuana Galileaju cuanaque peya cuana Galileaju cuanaque bucha jucha arida juatsu majucuar bucha. ³ ¡Aijama! Tuna tuna peya ecuita cuana bucha dyaque jidamaque ama jucuar. Dutya tuna jucha arida cuanaque, micuana dyadi tumbaedy. Micuana ni cacuaretiya ama micuanaja inime, Yusu queja micuana judirubunque ama. ⁴ Adebaya micuana peadya tunca quimisacarucu earacana ecuita cuana Siloéju aruhue etare rihuitsu tyanatanacuareque. ¿Eje bucha tuque micuana ecana adebaya? ¿Jerusalenju anicuare cuanaque bucha dyaque jucha aridaque ni taa? ⁵ ¡Aijama! Tuna tuna peya cuana bucha dyaque jidamaque ama jucuar. Tuna tuna jucha arida jucuar; micuana bacue tuna baedy. Micuana ni inime cacuaretiya ama, ni ejeque micuana Yusu queja judirubunque ama, —jadya tuna Jesúsra acuare.

Higo acui cacama cuatsabiji eque bahuityacuareque

⁶ Jadya juatsu tuna Jesúsra jadya cuejanucacuare bahuityayaque.

—Anicuaretu teeju acui higuera bacani ehuuaque. Tuque uhuaquiratu sarenacuare ecaca. Dadinacuare amatu ni peadya ecaca. ⁷ Jadya juatsu tujatu ecuita tee naruquique cuejacuare: “Quimisha mara ique amena jeujeu juyaque riyaque acui caca sarera. Ni cacacati pidya ecue riyaque jucuar. Cuerehuanacue. Yanacana cuitari riyaque acui euhua”, jadyatu emechiquira acuare tee naruquique. ⁸ Tee naruquiratu acuare: “Riyaque mara camadya panetinuca jari. Eratu jida naruya. Huaca taraca juque mechi tsehue mechi pahuau ehuuaque jida juishu. ⁹ Peadya mara junucatsu cuanatu cacaqui ejuu. Cacacatinucaya ama ni, tumetu amena cueremeretaqui tumeque acui”, jadya tujatu acuare. Jadyatu jucuar acui cacamaque, —jadyatu Jesús jucuar.

(Riyaque cuatsabiji tsehue tuna Jesúsra bahuityacara acuare. Inime cacuaretiya ama cuanaque tuna ijehuetanabuque jadicque.)

Canajara huecacaju Jesúsra epuna ereme ecatonunatique tuyunecuareque

¹⁰ Canajara huecacajutu Jesús Yusuja quisarati bahuitya jucuare caradati ishuque etareju. ¹¹ Tuhuadyatu jucuare epuna peadya tunca quimisacarucu earacana mara uje-jedaque, yume tucue ijahuara jadya amereyaque. Ebebacua tujatu ecatonunati jucuare. Jida netitaqui amatu jucuare.

¹² Baatsutu Jesúsra ihuaracuare:

—Jecue requeja, mama.

Tuaqueja ihuaratsu tujatu acuare:

—Mama, erami eremeque tuyuneya.

¹³ Jadya aatsu tujatu emetucu tuque dyaque huanacuare tuque chachane ishu. Jadya aya tsehuedya cuitadyatu epuna ereme juneniyaque jida neticuare. Tume tujatu amena Yusu pureama acuare:

—¡Dyaque jida taa Yusu! —jadyatu jucuare.

¹⁴ Caradati ishuque etare naruquique huarajitu yaque cahuaicuare, Jesúsra canajara huecacaju chachanehua baatsu. Turatu tuhua ecaradati cuanaque jadya acuare:

—Aniyatu shucuta huecaca mere juishuque. Mere huecacaju nejecue casamameretira, canajara huecacaju ama. ¡Canajara huecaca tu casamati huecaca ama! —jadya tujatu ecaná acuare.

¹⁵ Jadya juyaju bacatsu tuna Ecuana Cuatsashaquira is-aracuare dutya tuhua cuanaque:

—Jidadya batacara datse micuana juya, ai jidaque ama. Micuana micuana mere juyadya canajara huecacaju. In-ajacaya micuana canajara huecacaju huaca cuana, burro cuana jadya taraca juque cuinanasha ishu, ena ijimereti ishu. ¹⁶ Riyaque epuna ri israelita, Abraham eque ejuracanaque. Amena ri peadya tunca quimisacarucu earacana mara ijahuara ujejeda amereyaque. ¿Eje bucha chachane-taquima rejari ejuu ujeje canajara huecacaju? —jadya tuna Jesúsra acuare.

¹⁷ Jesúsra jadya ayaju cabacatitsutu tuque jadya juyaju jidama baqui cuanaque cabisuticuare. Peya cuanatu purea-madya jucuare Jesúsra ayaque baatsu.

Mostaza caca cuatsabiji eque bahuityacuareque
(Mt 13.31-32; Mr 4.30-32)

¹⁸ Bahuityanucacuare tuna Jesúsra:

—Cuejaya micuana riyaque cuatsabiji, micuana Yusura eje bucha micuana amena naruyaque bahue amere ishu.

¹⁹ Adebayadya micuana mostaza caca, teeju euhuataque. Achaachaque piji, bataqui nerique ama. Jadya ama buchatu buraratsu, huijatsu, danetsu dyaque arida juya. Tuja yaa cuanajudyatu upati huiri cuana eja catiya, —jadya tuna Jesúsra acuare.

(Riyaque cuatsabiji eque tuna Jesúsra jadique huecashacua. Arepa catibutiyaque eje uma piji tuaqueja catyatiajeya ama bucha, tuequedy a tuna riya piji, riya piji jetiama catyatiajeya.)

Levadura cuatsabiji eque bahuityacuareque

(Mt 13.33)

²⁰ Tumebaedya tujatu ecana riyaque cuatsabiji eque bahuityanucacuare:

—Bahue micuana amerecara aya eje bucha micuana amena Yusura naruyaque. ²¹ Epunatu pan ejuu. Eiyautu riya piji levadura. Quimisha equiniqui medidaju tujatu harina ehuaau. Tumeque riya piji levaduraradyatu dutya esaca huauhuaju emujashau, —jadya tuna Jesúsra acuare.

(Riyaque cuatsabiji eque tujatu ecana jadique huecashacara acuare. Levadurara dutya esaca mujashaya bucha, jadidyatu tuja quisarati dutya queja cuejatanabuque jadique.)

Eje uma ama Yusu queja judirubueque

(Mt 7.13-14, 21-23)

²² Jesúsra cuanucacuare Jerusalénju. Cuetiajecuaretu epu ebari cuana eque, epu achaacha cuana eque. Tumeque epu cuanaju aniya cuanaque tujatu bahuityaajecuare. ²³ Ejera cuanatu bacaduracuare:

—¿Eje uma ama tuna Yusu queja judirubueque ni eje tupu jaca ishú ama, Ecuatsashaquique? —jadya tujatu acuare.

Jesúsra tu quemitsacuare.

²⁴ —Yusu queja judiru ishú tu masada, ibeda jadya; etsecue quinidama eque careta careta nubie ejuu bucha tuque. Ducuta inime tsehue eje buchadya dutya acara nejudue tuaqueja judiru ishú. Cuejaya micuana era. Dutya jujeri datse tuna Yusu queja judirucara juya. Jadya ama bucha tuna judirubueque ama, ai tuna eje bucha judiru ishúque aya batudya.

²⁵ “Anicuaretu etare metseque. Nubi ishú emajaca tyau jadya aatsutu etare cateriticuare. Yusu tu etare metseque buchique. Tere huecaca juetihuaju micuana Yusuja eaniqui etsecue netinatibuque. Ihuarabuque micuana Yusu. ‘Ecuana Cuatsashaquique, pacashacue ecuana’ jadya tuque micuana abueque. ‘Aijama. Adebaya ama micuana era. ¿Ejuque cuana taa micuana?’ jadya tura micuana abueque.

26 Tume tuque micuana abuque: ‘Mira taa ecuana adebayadya. Araaracuareadya taa ecuana miatsehue. Mique taa mi ecuanaja epu cuanaju bahuitya bahuityacuare’ jadya tuque micuana abuque. 27 Jadya bacatsu micuana Yusura abuque: ‘A, aijama. Micuana micuana ecue ama cuanaque. Cuejahuadya micuana era. Adebaya ama micuana era. Nenetisicuaque ique pequeque, micuana micuana jidama juhua cuanaque’ jadya tura micuana abuque. 28 Abraham, Isaac, Jacob, Yusu equeque quisarati cuejaqui cuanaque jadya yuqueja Yusuja yacuaju aniya baatsu, micuana dyaque peya inime jubuque, tuna queja nubitaqui ama juya cabatitsu. Etse tari tsehue micuana pabuque tuhua nubitaqui ama cabatitsu. 29 Eje uma israelita ama cuanaque tuna Yusu huaraji dyaque aridaque aniyaju judirubuque. Dutya quejaque tuna tuhua judirubuque. Junabuque tuna nei diji eque amacaque, beni diji eque amacaque, ijeti cuinanaya eque amacaque, ijeti nubiya eque amacaque jadya tuna caradatibuque Yusuja yacuaju pureama juishu. Caradatitsu tuna eatsehue araarapee jubuque. 30 Iyacia dyaque inime metse cabatiya cuanaque tuna inime metse ama jubuque. Iyacia jetiedya, inime metse ama cabatiya cuanaque bacue dyaque inime metse cabatibuque, —jadya tuna Jesúsra acuare.

Jesús Jerusalénju cuanara bijidamadurayaque caadebatitsu pacuareque

(Mt 23.37-39)

31 Amena tuque quisaratijacahuajutu junacuare umae fariseo cuana.

—Dirucue rehuaque. Herodesrami iyemerecara aya, —jadya tunajatu Jesús acuare.

32 Tura tuna acuare:

—Herodes tu inime adebabadaque. Necuejadirucue jadya: “Eje uma huecaca ama mere juya jari. Cuinanashaya jaridya tuque ijahua cuanara quijahuatishaya cuanaja ijahua cuana. Ujejeda cuanaque tuque chachaneya. Jadya juatsu tuque ecue mere tereya”. 33 Juneniya jari ique Jerusalén queja amaca iyacia, metajudya, tibene jadya. Jerusalén tu Yusu equeque cuitadya quisarati cuejaqui cuanaque iyetana ishucue, —jadya tujatu ecana acuare.

34 Jadya quisarati amena aatsutu Jesúsra quisarati acuare Jerusalénju aniya cuanja ishucue. Tuna cuitadya baatsu quisarati aya buchatu jucuaré, arepa tuna tuhua ama jucuaré ama bucha.

—Micuana Jerusalénju aniya cuanaque, micuanaja epu ebarijutu Yusu equeque quisarati cuejaqui cuanaque tumu tsehue iyetajacama jucuaré. Eje uma narucara ebari

datse micuana ahua. Tacure jabacua cuana ecuaquera ya-japara emaque ishatsu enaruu bucha, narue datse micuana acara ahua. Micuanajatu ecue jadya narue aishu bijidama juhua. Dutya jujeri micuana eaqueja catyaticarama juhua.³⁵ Nebacacue. Yusratu tuja epu ebari narujacabuque, tumbaedyu tuhua anibuque cuanaque. Banucabuque ama micuanara ique, “Jida paju Yusuja ebanijiu junayaque”, dutya israelita cuana jadya judadiya tupu, —jadyatu Jesús jucuare.

14

Jesúsra ecuita emujatereque chachanecuaereque

¹ Canajara huecacajutu Jesús cuacuare fariseo huara-jija etareju araara ishuh. Tuhua jucuare cuanara tunajatu Jesús narucuare tura eje bucha canajara huecacaju ai ayaque. ² Tumbaedyatu tuhuadya jucuare ecuita ujedaque emujatereque. ³ Jesusratu bacaduracuare cacuat-sashati bahuityaqui cuanaque, fariseo cuana jadya:

—¿Ecuanaja cacuat-sashatijutu ehue, ecuita ujedaque canajara huecacaju, chachanetaquique, aijama ni taa? — jadya tujatu ecana acuare.

⁴ Tuna bacue abacatadya jutidya jucuare. Caquemitsaticuare ama tuna. Jadya juatsutu Jesúsra ecuita emujatereque jabatsu chachanecuaere. Chachanetsu tujatu

—Jida dirucue micue etareju, —jadya acuare.

⁵ Jadya juatsutu Jesúsra fariseo cuana anucacuare:

—Micuana micuana mere juyadya canajara huecacaju. Micuanaja bacua, jadya ama juatsu juye canajara huecacaju epacacau cani dedaju. Tumeque uradya tuque micuana ecuinanashatiu, arepa canajara huecaca paju ama bucha. ¿Yuneridya? —jadya tuna Jesúsra acuare.

⁶ Eje bucha quemitsataqui ama tunajatu bacuare.

Ecuana taca camuibati jutaquique ama

⁷ Jesusratu bacuare eihuara cuanaque eaniqui dyaque jida muida cuanaque iyabutya ishuhue eaniqui sare juyaju mesaju. Jadya juya baatsu tujatu ecana cuejacuare:

⁸—Eju tunara chine ishuh araara ishuh cuejahuaju, neanibuteume eaniqui muida cuanaque iyabutya ishuhu. Muidaque iyabutya ishuhue eaniqui ni mi metseneya, ¿eje buchami ejuu, peya eihuaraque mique bucha dyaque muidaque jutiuhaju? ⁹ Metse cuejaqui juhuarami jadya eau: “Netit-suracue tumeque eaniqui juque. Riyaque ecuita tuhua paanibute”. Tumemi bisu majaca nercada cuana ducu anidirutaqui. Jadyatu juya tuna taca camuibati juya cuanaque. ¹⁰ Tume amena tunara araara ishuh ihuarayaju,

neanibutecue nrecada cuana tsehue. Jadya juyajumi mique ihuaramerequire jadya eau: “Netitsuracue. Anibuteticue tuhua dyaque muida cuanaja eaniquiju”, jadya turami eau. Tume tuna dutya peya cuana ecueja cuanaque bahue ejuu mique muibataquique. Jadyatu juya tuna taca camuibati juya ama cuanaque. ¹¹ Yusuratu dyaque inime metse cabatiyaque aishu ama amereya. Aishuque ama cabatiyaquetu dyaque inime metse Yusura amereya, —jadyatu Jesúsra eihuara cuanaque acuare.

¹² Tumbaedyatujatu tuque ihuaramerequire acuare:

—Chine catiyaque, micue ata cuana cuita camadya ihuaraume ni micue miatsehuequi cuanaque, micue eadeba cuanaque, micue epuju chipiruda inime metse cuanaque. Ihuaraya ni mi eadeba cuanaque, chipiruda cuanaque camadya, tume tunarami tuna chine catiyaque cuare ihuara jutidya eau. Jadya mique juhuajumi tume tsujema tyatana juya. ¹³ Jadya ama juatsu, chine catinucayaque, ihuaracue nrecada cuanaque, ebi tubu cuanaque, rudurudu cuanaque, shuhui cuanaque jadya. ¹⁴ Arepa micue nrecada cuanara, ujejeda cuanara jadya chine ishuhuaranucataquima baya ama bucha, miquemi dyaque pureama micue canerecabatimi ecana bamerehua tibu. Amena ishuhuecacaju Yusura emaju cuanaque nityatsuranucatsu turami dyaque jida abuque, mira tume cuanaque nereca bahua tibu.

Chine ishuhuaracue cuanaque equeque cuatsabiji

(Mt 22.1-10)

¹⁵ Jadya juya bacatsutu tuhua mesaju juaniyara Jesús jadya acuare:

—Dyaque jida taa Yusu huaraji dyaque arida aniyaju judiruya cuanaque, tuatsehue araara ishuhuecuaja cuanaque.

¹⁶ Tura jadya ayajutu Jesúsra cuejacuare riyaque cuatsabiji tuna bahuityayaque, dutya ecuejaque ama Yusu queja judiruyaque.

—Anicuaretu ecuita chipirudaque. Tuquetu cabajejeticuare chine arida juishu. Ihuaramerecuare tujatu ecana jetiama chine ishuhue. ¹⁷ Earaque amena juhuaju tujatu cuadishacuare tuque merequi tuja ecueja cuanaque ihuarara. “Nejecue. Amenatu iyatanahua”, jadya tujatu cuejamerecuare. ¹⁸ Cuejatahua ama bucha ecana cuacarama jucuar. Tudyatunajatu cuejacuare tuna cuejaqui juhuaque eje bucha juatsu tuna cuataqui ama juyaque. Icueneratu jadya acuare: “Cuaya ama ique chinera. Iyacuacuitadya ique yahua caquemitihua tee ishuhue. Cuataqui ique tumeque petara. Cuejadirucue chine metseque; panerecaba tura ique”. ¹⁹ Peyaratu jadya acuare: “Cuaya ama ique

chinera. Quemihua tuque pishica yunta juye cuana. Tume cuanaque adebara cuaya. Cuejadirucue chine metseque; panerrecaba tura ique”, jadya tujatu acuare. ²⁰ Quimisha ishuratu jadya acuare: “Cuaya ama ique chinera. Iyacuadya taa huanequi juhua. Jadya tibu taa eje bucha cuataqui ama juya. Cuejadirucue chine metseque: panerrecaba tura ique”, jadyatu peyara acuare.

²¹ “Ecuejaquiquetu dirunucacuare. Judirunucatsu tujatu tuja patrón cuejadirucuaire: ‘Dutya mira ihuaramerehua cuanaque tuna jecarama juya’. Tura jadya cuejadiruyajutu chine metseque cahuaiticuare dyaque. ‘Ebajarara cuacue epu quini cuana, epu tipare aniya cuana queja. Queticue requeja nerecada cuanaque, bima cuanaque, rudurudu cuanaque, shuhui cuanaque jadya eatsehue tuna araara ishuh’ jadya tujatu acuare. ²² Tura jadya cuatsashahuajutu ecuejaquique cuacuare tuja yana equedya. Jadya cuejatitsutu judirunucacuare. ‘Mira cuatsashahua eque tuque ahua. Jetiama rena quetihua nerecada cuanaque, ujejeda cuanaque. Aniya jaridya emajaca jetiama ecuitaja ishuh’ jadya tujatu acuare tuque merequique. ²³ Jadya juyajutu patrónra jadya acuare: ‘Cuanucacue peya epu cuanaju, tee cuanaju. Tuqueja cuanaque ihuaraticue. Paje ecana ique chine catiyaju. Eje uma ecue etareju nubiya tupu ecana panubi. ²⁴ Jeeque micuana cuejaya. Paaraarana ama ni ejeque era icuene ihuarahua cuanaque’ jadyatu chine metseque jucuaire, — jadya tuna Jesúsra cuejacuare.

Masadama amatu Jesúsja cuanaque aniya bae anie juishuque
(Mt 10.37-38)

²⁵ Jerusalénju diruyaquetu Jesús tuhuaque cuanucacuare. Ecuita cuana jetiamaratu Jesús tupujudya acuare. Tuna queja huarere juatsu tujatu ecana isaracuare:

²⁶ —Eaqueja catyaticara juya cuanaque, ecue jucara juya cuanaja ique dyaque iyuhueda bataqui, tuja etataque, euaque, ehuanegue, ebacua cuanaque, tuatsehuequi cuanaque bucha iyuhuee ama. Ique tunaja pureama ameretaqui, tuna pureama ejuuque. Jadya ama ni juya, tumetu ecue jutaqui ama. ²⁷ Micuana eatsehue junenicara juyaque juatsu, ecue yana equedya nejucue, arepa micuana canerecati, maju jadya jutaqui ama bucha, curusuju etata ejuu bucha. Ique jiteque iyetacara juyaju, iyetacarama juyaquetu ecuique jutaqui ama. ²⁸ Eaqueja catyatimaquedya yuneri nejucue eatsehue junenisiriyaque, canimehuallaticarama tsehue. Cuejaya micuana riyaque cuatsabiji micuana huecasha ishuh. Anicuaretu ecuita etare

iyacuaque caticara juyaque. Etare tibunema jarira tujatu inime tupucuaque ama dutya tura etare ishü sareyaque tuja aniyaque, aijama jadicque. ²⁹ Tumetu etare catibuticuaque, dutyadya tuja etare atilla ishü aniya jadicque baecuaquedya jutidya. Dudu cuana puchabaretsu tuja aijama jucuaque ejaqui espiqui jadya tsuje tyaisü. Tuja dudu cuana camadya epucha eque tuna jetiama cueti cueti jucuaque. Petatsu tunajatu ijaribacuare. ³⁰ “Nepetacue riyaque dudu cuana camadya. ¡Inimema shana ri ecuita! Etareri caticara juchine, atilla ishü tupu aniyaque baecuaquedya jutidya”.

³¹ “Cuejanucaya micuana era. Anicuaretu ecuari peya yahua juque ecuari tsehue catira cuahuaque. Tuquetu peadya tunca mil sudaru cuana cuatsashaquique jucuaque. Peya yahuajuja bacue beta tunca mil sudaru cuana anicuare. Catira cuamaradyatu icueneque ecuarrira jida inime etupuu: ‘¿Ijahuedya tuque eau peya cuana, aijama ni taa?’ jadya. ³² Juya ni tuja inime: ‘Eje bucha jahuee ni tuque ama sudaru jetiamaque’ peya japada jarijudya tujatu cuadishaya icueneta ecuejaqui cuanaque: ‘Necahuaiti ama. ¿Eje bucha yatse ejuu jida, catima ani ishü?’ jadya aishü.

³³ “Jutaquijudya, eaqueja catyatimaradya jida inime nepucue, yuneridya micuana dutya ai aniya cuanaque cashanaticara tsehueque, aijama jadicque. Eatsehue junenicara juyaquetu ecue yana equedya jutaqui, —jadya tujatu ecana acuare.

Banu huaja tereyaque
(Mt 5.13; Mr 9.50)

³⁴ Jesúsra tuna cuejanucacuare:

—Banu tu jida. Banuja, ni banu huaja etereu, aijamatu ni eje bucha banuqui amerenuca ishüque. ³⁵ Jida amatu ni mechi jida amere ishü, ni aishü buchique. Ijehuetaquidya tuque jidama tibu. Tumbaedyä micuana, micuana ni ecue yana eque jujacaya, tume micuana ni aishü buchique. Micuana quijacabacati aqui juatsu, nebacacue, —jadya tuna Jesúsra acuare.

15

Uhuisha cuji ejuque cuatsabiji eque bahuityacuareque
(Mt 18.10-14)

¹ Jetiama enaruquija ishü chipiru tsuje bacaqui cuanaque, peya ebijidamadura cuanaque jadya tuna cajipeticuaque Jesús queja, tura cuejayaque ijacaba ishü. ² Fariseo cuana, cacuatsashati bahuityaqui cuanaque jadya tuna quisaratitibunecuaque Jesúsja ishü:

—Jeeque ecuitaja taa bijida jucha arida cuana tsehue juneni ishu. Tuna tsehuedya araraya jadyatu juya, —jadya tuna jucuaire.

³ Jadya juatsu tuna Jesúsra riyaque cuatsabiji cuejacuare:

⁴ —Peadya ecuitaja cien uhuisha eaniu. Peadya tuja cuji ejuu. ¿Eje buchatu tumeque ecuita ejuu? Eshanau jari di taa tujatu puscucuru tunca puscucuru earacana taracaju. Eishautu eju aija eje bucha ataquí amaju. Jadya shanatsutu pereu amadya ecua uhuisha cuji ejuque sarera. Esareudya tujatu dadiya tupu. ⁵ Daditsu, pureama aatsu tujatu yaracacaju hueishatsu edujuu. ⁶ Etareju judirutsutu eihuarau tuja ata cuana, tuja eadeba cuanaque jadya. Jadya tujatu ecana eau: “Pureama nejura, era ecue uhuisha cuji ejuque dadihua tibu”.

⁷ “Pusha amadya micuana cuejaya. Barepaju cuanaquetu pureama juya, Yusuja cuanaque jetiama tuja yana equedya juya baatsu. Jadya ama bucha tuna dyáque pureama juya, peadya jucha aridaque inime cacuaretiya baatsu, —jadya tujatu ecana acuare.

Chipiru eaputa cuatsabiji eque bahuityacuareque

⁸ Jesúsra tuna bahuityanucacuare:

—Peya micuana cuejaya. Anicuaretu epuna. Peadya tunca ficha chipiru tuja anicuareque, peadya ni ecaaputashatiu, ¿ai tu ejuu? Etuchau tu ude. Tucha jadya aatsu tujatu tsucuta etare ejabuu inime eque chipiru pana sare ayaque. Chamacama tujatu edadiu. ⁹ Daditsu tujatu eihuarau tuja ata cuana, tuja eadeba cuanaque jadya. “Pureama nejura. Dadihua tuque ecue chipiru aputahuaque”, jadya tujatu ecana eau. Jadyatu epuna chipiru caaputashatiyaque ejuu.

¹⁰ Pusha amadya micuana cuejaya. Ejeque ecuita jucha aridaque inime cacuaretiyajutu dyaque pureama juya barepaju Yusu tsahuaquí cuanaque, —jadya tujatu ecana acuare.

Inime cacuaretitsu, etataque queja ebacuaque judirunucacuareque cuatsabiji

¹¹ Jesúsra tuna bahuityanucacuare:

—Peya micuana cuejaya. Anicuaretu ecuitaja beta ebacuaque ecatse. ¹² Ebacuaque tupujuratu jadya etataque acuare: “Tyacue ique, mique majuhuaaju ecue jubuqueque”. Jadya tura ahuajutu etataquera tyacuare chipiru, ai cuana jadya tuja ishuque. ¹³ Eje uma huecaca piji juatsutu ebacuaque tupujuque casitacuare tuja ai aniya cuanaque. Catyati caticuare tuja ai cuana. Chipiru inatsutu dirucuare japada anape cuana queja. Tuhua judirutsu tujatu baya ijehuene chipiru acuare tuja biji eque. ¹⁴ Amena tuja chipiru pana tere juhuaju tuna dyaque mije jucuaire

tumeque yahuaju. Tumetu ehue ebari arara majuya bucha cabaticuare. ¹⁵ Jadya juatsutu cuacuare mere sarera. Ecuita chipirudaque tumeque yahuaju aniya queja canerecatiticuare: “Micue mere aniyaque juatsu, micue mere paa. Aijama rique ecue ara ishuque”, jadya tujatu aticuare chipirudaque. Ecuitaratu cuadishacuare cuhi cuana naru ishu. ¹⁶ Dyaque cuita aracara juatsu tujatu cuhi cuanara arayaque bijisericuare. Ni ejeradya jutidyatu ara ishuque tyacuare.

¹⁷ “Jadya tibudya tujatu inime tupucuare tuque juneniyaque. ‘Ecue etataja mere puji cuanaja taa tu aniya ara ishuque jetiama. Ique taa rehua arara majuya. ¹⁸ Ecue etata queja tucue padirunuca. Jadya paadiru: “Ecue etata, cajuchatihua taa ique Yusu tsehue, miatsehue jadya. ¹⁹ Mere taa amerecue. Micue bacua bucha bae aume. Micue mere puji bucha bae jutidya acue”, jadya era ecue etata paadiru’ jadya tujatu inime tupucuare. ²⁰ Jadya inime tuputsutu judirunucacuare tuja etataqueja etareju.

“Tuque japada jariju cuitadyatu etataque esirira batsacuare diruyaju. Batsatsu tujatu nerecabacuare. Tsajaja tsurutsa, macacatsa, dyahua jadya tujatu atsacuare. ²¹ ‘Tata, cajuchatichine taa ique Yusu tsehue, miatsehue jadya. Micue bacua bucha batsae aume. Eje bucha micue bacua ique jadya ataquí ama mique baya’ jadya tujatu acuare tuja etataque. ²² Etataqueratu ebacuaque quisaratiyaju bacaya ama bucha jadya acuare tuque merequí cuanaque: ‘Ebajarara ejutuquí jida pijique nequeticue. Nejutumerecue ecue ebacua. Nejutumerecue metara, zapatu jadya. ²³ Neiyeticue huaca ecuanara tsericuinashayaque. Nearaarara. Chine nejura. ²⁴ Riyaque ecue ebacua era emaju bucha bayaqueri chacha juetinucahua. Era eaputa bucha dutya huecaca adebayaqueri juetinucahua’ jadya tujatu ecana acuare. Jadya juatsu tuna catibuticuare chine.

²⁵ “Tuna jadya juyajutu ebacuaque icueneque teeju mere juyaque judirucuare. Etare jipeajeyaque tujatu bacaajecuare tuna dudududuyaju, ijahue jadya juyaju. ²⁶ Judirutsu tujatu dudududuyaju bacatsu tuna merequique tueque cuetiya baatsu ihuaracuare. Ihuaratsu tujatu bacaduracuare: ‘¿Ai tuna juya? ¿Eje bucha juatsu tuna dudududuya, ijahue jadya juya?’. ²⁷ ‘Micue jautu juetihua. Micue tataratu iyemerehua huaca tseridaque, tuja ebacuaque jida chacha juetinucahua baatsu’ jadyatu tuna merequirá acuare. ²⁸ Jadya bahue juatsutu eujique dyaque cahuaiticuare, yanacana chipiru ijehue pujija ebacaniju chine juya baatsu. Cahuaitsutu nubicarama jucuaré. Tuja ebacuaque icueneque cahuaitsutu

nubicarama juya baatsutu esirique cuinanaticuare. ‘Nubicue, ebacua. Baeticue ecue jau. Juetinucagua rique’ jadya tujatu aticuare. ²⁹ Turatu etataque jadya atsacuare: ‘Aijama. Miquemi bahuedya eje uma mara era merehuaque eje bucha tsehue ama, ni micue yana acarama tsehue ama. Jadya ama bucha micue ique ni eje tupu etya uhuisha jabacua ecue iyuhueda cuana tsehue chine juyaque ara ishu. ³⁰ Jeeque micue bacuaratu yanacana ijehue ahua micue chipiru epuna jidama cuana tsehue. Iyacua tuque juetihuaju tuquemi tuja ishu iyemerehua huaca tseridaque chine juyaque ara ishu’ jadya tujatu etataque atsacuare.

³¹ “‘Ecue ebacua, mique taa mi eatsehuedya. Dutya ecue aniyaque tu micuiquedya. ³² Iyacua taa chine dyaque jida, pureama jadya nejura. Micue jau, era emaju bucha bayaquetu chacha juetinucagua. Era eaputa bucha ecue inime juyaqueri juetinucagua’ jadya tujatu ebacuaque acuare, — jadya tuna Jesúsra cuejacuare riyaque cuatsabiji.

(Riyaque cuatsabiji tsehue ecuana Jesúsra bahuityacara aya ecuana ejeque jucha aridaque inime cacuaretiyaju Yusu queja catyatiyaju ecuana pureama juishu.)

16

Mayuruma jidamaque cuatsabiji eque bahuityacuareque

¹ Jesusratu tura mepehua cuanaque bahuityanucacuare:

—Peya micuana cuatsabiji cuejaya micuana bahuitya ishu. Anicualetu chipirudaque, tuja mayuruma jadya. Umae cuanaratu cuejacuare tuja patrón: “Micue mayurumaratu yanacana quemidya jutidya aya micue chipiru, ai jida tsume aishu ama”. ² Jadya bacatsutu tuja patrónra ihuaracuare mayuruma. “¿Eje buchique tunara jadya cuejahua? Bamerecucue ique mira ecue mere puji cuanaja manu cuana huenechine cuanaque. Amenami ecue mayuruma jujacaya”, jadyatu chipiru metsera acuare. ³ Jadya bacatsutu mayurumara inime tupucuar: “Amena taa ecue mere aijama. ¿Eje bucha anie juya? Casadama taa ique tee mere juishu. Bisuya taa ique tsujema bacabaca juneni ishu. ⁴ A, adebahua tuque era. Adebahua tuque ique rehuaque cuinanahuaju aira batsayaque”.

⁵ “Jadya juatsu tujatu ihuaramerecuare peadya peadya mere puji cuana manuqui cuanaque. Icuene junahuaque tujatu bacaduracuare: ‘¿Eje uma tuque micue manu aniya ecuana merequi juchine queja?’ ⁶ Turatu quemitsacuare: ‘Umada tuque ecue manu aniya, pushi mil litro jujeri olivo tseri’ jadya tujatu acuare. ‘Jeedy a micue manu quirica. Era tuque micue manu aniyaque jaquechine. Amena tuque

micue aniya patya jaque camadya, beta mil litro jujeri olivo tseri camadya. Anibutecue. Ebajarara iyacuaque manu quiricaju micue ebacani huenecue’.

⁷ “Jadya juatsu tujatu bacaduracuare peya: ‘¿Eje umatu micue manu aniya?’ jadya tujatu acuare. ‘Umada tuque ecue manu aniya. Cien arrobas trigo tupu tuque ecue manu’ jadya tujatu acuare. ‘Jeedy a micue manu quirica. Era tuque micue cuarechine micue manu. Micue icuene juchine tupu ama tuque micue manu, quimisacarucu tunca arrobas trigo tupu camadya’ jadyatu mayurumara acuare.

⁸ “Chipiru metsequetu bahue jucuaque mayuruma ai juhuaque. ‘Arep a tura ique ijahue ahua ama bucha, tuquetu dyaque inime adebabada. Aniyatu umada tuque rehuaque cuinanahuaju tuque batsaqui cuanaque’ jadyatu tuja patrón jucuaque, —jadya tuna Jesúsra cuejacuaque.

(Jesusratu jadya quisarati acuare. Yusu adeba baecua cuanaquetu dyaque bahue tunaja chipiru tsume; Yusuja cuanaque bacue jadya ama jadique.)

⁹ Jesúsra tuna bahuityanucacuare:

—Pusha amadya micuana cuejaya. Peya cuana tsehue jida juishu cabamereti ish u jadya micuanaja chipiru net-sumecue. Micuana jadya juyaque juatsu, micuanaja chipiru terehuaju micuana jida batsatabuque micuana maju baecua anidiruyaju.

¹⁰ “Ejera ni peya tuja riy a piji aniya tsehue ijahue aya ama, tumbaedy a tujatu jetiama tsehue ijahue aya ama ni ejeque. Ejera ni riy a piji tuja aniya tsehue ejeque ijahue aya, tumbaedy a tujatu jetiama anitsu ijahue eau. ¹¹ Micuana ni baecua riy a que yahuaju chipiru tsume, tume taa micuana ni aira buchique Yusu jaque ai narumereya ama. ¹² Micuana ni baecua peyaja ai naru, tume micuana yuneri cuitady a baecua micuana jaque cuita ai canaruti.

¹³ “Ni ejera buchiquetu emereu ama beta patrón. Jadya jucara juyaque juatsu, tuque micuana, peya ujeu, peya bacue iyuhueda jadya jutidya ebau. Peyatu nijuta ducuta jadya tsehue emereu, peya bacue merecarama tsehue. Eje bucha anie ni micuana juma Yusuja biji eque, micuanaja ish u cuita camady a chipiru radanity a jadya juatsu, —jadya tujatu ecana acuare.

¹⁴ Fariseo cuanatu chipiru dyaque iyuhueda baqui jucuaque. Jadya bacatsu tunajatu Jesús ijaribacuare. ¹⁵ Jadya juatsu tuna Jesúsra acuare:

—Micuanajatu inime juya micuana jida, inime cujisha baecua bucha. Yusura micuana yuneri eje buchique adebaya. Yusu adeba baecua cuanara iyuhueda bayaquetu Yusuja ujeu, —jadya tujatu ecana acuare.

Cacuatsashati, iyacuaque jidaque quisarati jadya

¹⁶ Jesúsra tuna bahuityanucacuare:

—Yuequedyá yahua nanada equedyatu ecuita cuanaja inime juhua, Moisésja cacuatsashati equedyá anitsu, Yusu equeque quisarati cuejaqui cuanara cuejaya eque anitsu, Yusu queja judiruya jadya datse. Juan Ecuita Cuana Ut-saquira micuana cuejacuaredya micuana inime cacuareti ishúque. Tuequequedyatu cuejatanahua Yusura eje bucha narue dutya ecuita cuana ayaque. Jadya bacatsu datse tuna dutya jujeri eje buchadya judirucara juya Yusu queja.

¹⁷ “Yusura cuatsashahuaquetu ni eje tupu apupashatanaya ama. Peadya quisarati tujatu bareya ama. Barepa, yahua jadya aniya jari tuputu cacuatsashati cuana tere nime ama.

Ecaquemitique cajacatitaquiquemaque Jesúsra bahuityacuareque

(Mt 19.1-12; Mr 10.1-12)

¹⁸ “Micuana ni micuanaja huane neri tsehue cajacatitsu, peya epuna tsehue caquemitinucaya, tume micuana cajuchatiya. Yusuja yatucaju tuque micuanaja icueneque epuna huane neri jaridya, ai tupujuque ama. Micuana ni epuna peyaja eijehue tsehue caquemitiya, tumbaedyá micuana cajuchatiya, peya jaque micuana micuana jaque eata aya tibu, —jadya tujatu ecana acuare.

Ecuita chipirudaque, Lázaro jadya jucuaque

¹⁹ Jesúsra tuna bahuityanucacuare:

—Anicuaretu ecuita chipirudaque. Ejutuqui jidaquetu dutya huecaca jutucuaque. Dutya huecacatu chine mere jetiama earaqui bajeje, araara jadya jucuaque. ²⁰ Anicuaretu nerecadaque Lázaro bacani. Dyaque ujejedaquetu jucuaque, tuja ecuita pusese camaque. Chipirudaja etare tsecuetu yahuaaju anianini bahue jucuaque. ²¹ Eje buchadya jequecara jadyatu jucuaque chipirudaja ara cuesusu tsehue, arabishatsu ijehueya tsehue jadya. Casadama cuita tibusu chapa cuanara tuja pusese cuana tecueyaju eje bucha camuyatitaqui ama jucuaque.

²² “Chamacamatu ecuita nerecadaque majucuaque. Barepa juque Yusu tsahuaqui cuanaratu ducuaque Yusu queja ecatyati cuanaque majutsu judiruyaju, ecuanaja ebaba emuibaque Abraham peque. Chipirudaquetu tumbaedyá majunucacuaredya. Papatancuaredya tuque. ²³ Chipirudaquetu majutsu tuyu judirudya ijahuaja etiquiju jucuaque, Yusu adeba baecua cuanaque judiruyaju. Dyaquetu canerecaticuaque. Dyaque nerecada juyara tujatu japada equera bacuaque Abraham, Lázaro jadya. ²⁴ Tumetu chipirudaque quiquecuare: ‘Nerecabacue ique, tata

Abraham. Cuadishacue Lázaro; paje, pabana tura ique. Tuja emetucu sapara huitu enaju mutyatsu tura ecue yana riya piji cuita pabaneshana. Dyaque cuita taa etiquiju canerecatiya' jadya tujatu Abraham acuare. ²⁵ Abrahamratu acuare: 'Tata, adebacue. Chacha jariju tuque micue anihua dutya ai mira bijida bahuaque. Lázaro bacue dyaque nrecada jucuar. Iyacuatu Yusura casaturaya. Mique bacue nrecada juya. ²⁶ Jadya juatsu jipidya ama tuque Lázaro cuadishaya ama miaqueja. Aniyatu ecua patya emajaca dyaque dedaque. Ni ejequedya jutidyatu ecarequetiu rehuaque tuqueja ni tuhuaque requeja' jadyatu Abrahamra acuare chipirudaque.

²⁷ 'Jutaquiju nrecabacue ique. Cuadishacue Lázaro ecue etataja etareju aniya cuana queja, tata. ²⁸ Tuhua tuque ecue aniya pishica ecue eatsehuequi cuanaque. Cuadishacue. Pacuejatitu eana. Chacha jarijudya eana inime pacacualeti. Tuna inime cacualetiyaque ama juatsu, tuna tuna dyadi rehua canerecati ishuhu juetibuque' jadya tujatu Abraham acuare. ²⁹ Abrahamratu acuare: 'Tunajatu aniyadya eje bucha bacae aishuque Moisésra, Yusu equeque quisarati cuejaqui cuanara jadya huenequereque. Cuejayaju bacatsu tuna paejene tumeque ehue cuanaque'.

³⁰ Jadya ajaju bacatsutu chipirudara acuare: 'Tata, bacaya ama tunaja tuque. Ejeneya ama tunajatu ehue cuanaque. Ejeque emajuque chacha netitsuranucahuaque batsatsu camadya tuna inime ecacualetiu' jadyatu chipirudara acuare. ³¹ 'Bacacarama ni tuna aya Moisésra, Yusu equeque quisarati cuejaqui cuanara jadya huenequere cuanaque, bacaya amadya tunajatu ni ejeque emajuque batsatsu' jadyatu Abrahamra acuare. Jadyatu jucuar beta ecuita ecatsé, —jadya tuna Jesúsra cuejacuar.

17

Peya cajuchatishaquique dyaque canerecatibuqueque
(Mt 18.6-7, 21-22; Mr 9.42)

¹ Jesusratu acuare tura mepehua cuanaque:

—Majuma jari tuputu ecuita cuana cajuchaticara jujacaya ama. Dyaque nrecadatu jubuque ejeque cajuchatishayaque. ² Dyaque jidatu majutaqui juhua ebacua cuana bucha cuanaque cajuchatishaquique. Dyaque jidatu tumu erieri ishuhuque epituju risitsu bei dyaque dedaju ijehuetiqui juhua, ejeque cajuchatishamaque maju ishuhu. ³ Necanaruticue eje bucha juyaque.

“Micuana tsehuequi buchique ni cajuchatiya, nereda neacue. Tuque ni inime cacualetiya, nenerecabacue; nenime aputacue tura eje bucha ahuaque. ⁴ Ita taa nebacue. Ejera

micuana jidama ajacama eau, jadya apidya jadya ama, tura micuana jidama juatsu eau, ‘Inime cacuaretihua. Cahuaitis-hanucacarama mique anucaya’ jadya anajacama eau. Jadya tura ayaju, nenerecabacue; nenime aputacue tura eje bucha jidama ahuaque, —jadya tuna Jesúsra acuare.

Jesús queja catyatitsu, ecuanaja casa aniyaque

⁵ Jesúsra mepehua cuanaratu Jesús isaracuare. (“Ecuadishata cuanaque” bacani tuna jucuaire.)

—Tshahuacue ecuana miaqueja dyaque nimee juaje ishü, —jadya tunajatu acuare.

⁶ —Micuanara ni ejenequena juhua, paju era micuanaja ataquimaque aishu casa tyayaque, ni ainya jutidya tuque micuana ataquima ama ebau. Jeeque acui morera bacani ni micuana eau: “Mutsautanacue rehuaque. Netisicuacue ena cuanaja ecuaque patya”, micuanaja yana equedyatu ejuu acui, era casa tyahuaque ejenehuaque juatsu.

Mere puji que eje bucha jutaquique

⁷ “Jadya micuana cuejaya. Ecuitaja eaniu tuja mere puji tuja tee cuanaju, jadya ama juatsu, huaca cuana naruquique. Tuja mere puji chinequeja piji tuja mere juque juetiyaju, ¿tuja patronratu canajara ishü emajaca yume tyatsadya eau? ‘Anibutecue. Canajarabaca, araara jadya juatsu canajaracue’ jadya tujatu eau? ⁸ ¡Aijama! Jadya eauque, ‘Nahui cati-cati jadya juatsu ique ararayaju merenacue. Ique amena juhuaju piisi mique araracue’ jadya tujatu eau. ⁹ Patronratu yusurupai aya ama tuja mere puji, tura cuatsashahuaque camadya ahua tibu. ¹⁰ Tumebaedya micuana, Yusura amereyaque atillatsu muita ishüque bucha necabacatum. ‘Ecuonaratu ecuanaja ai ataquique camadya ahua’ jadya necuejacue Yusu, —jadya tuna Jesúsra acuare.

Jesúsra pusesera ririshayaque peadya tunca ecuita cuana chachanecuaque

¹¹ Jesúsra Jerusalénju cuayaque cueticuare Samaria, Galilea jadya eque. ¹² Peadya epu achaacha equetu cueticuare. Cuetiyajutu peadya tunca ecuita pusesera ririshaya cuanaque tuque tsurutsa ishü cuinanacuare. Japajapa piji tuna netinaticuare. ¹³ Netinatitsu tuna quiquecuare:

—Nerecabacue taa ecuana, Jesús. Chachanecue ecuana, Ebahuityaquique, —jadya tunajatu acuare quique eque.

¹⁴ Jesúsra tuna baatsu isaracuare:

—Pae queja necabamereticue, micuana chacha juhuaque tuna bahue juishu, —jadya tuna Jesúsra acuare.

Tume cuayaquedya jutidya tuna chacha jucuaire Jesúsra casa eque. ¹⁵ Peadya camadyatu yudijidya cuanuca jucuaire

Jesús queja, chacha juhua cabatitsu. Cuanucayaquetu juajecuaire:

—¡Dyaque jida taa Yusu! —jadyatu qui que eque juajecuaire.

¹⁶ Jesúsja yacuajutu nuyunaticuaire. Ebutsequini tsehue yahua tseraya tuputu huipuchitanacuare.

—Yusurupai mique aya, mira chachanehua tibu, —jadya tujatu Jesús aticuare.

Jadya yusurupai atietu ecuitara cuanucatsu acuare, arepa tuque samaritano juya ama bucha. Puscurucu israelita cuana bacue yudijidya cuanuca jucuaire ama Jesús yusurupai ara.

¹⁷—Peadya tunca ecuita taa tuque chachanehua. ¿Are peya cuana? ¿Puscurucu taa tu bataqui ama? ¹⁸ Arepa peya yahua juque ama bucha taa ri riyaque jenucahua Yusu pureama ara. ¿Eje bucha juatsutu umae puscurucu jenucahua ama? Tuna taa tuna ecuanaja ata cuana, —jadyatu Jesús jucuaire.

¹⁹ Jadya juatsu tujatu Samaria juque isaracuare:

—Netitsuracue. Dirucue. Miquemi chacha juhua, mira era eje bucha eauque pana ejene ahua tibu, —jadyatu Jesúsra ecuita acuare.

Eje bucha Yusura naruyaju jubuqueque

(Mt 24.23-28, 36-41)

²⁰ Peya huecacatu fariseo cuanara Jesús bacaduracuare:

—¿Eje bucha juyaju ecuana caadabatibuque Yusura dutya ecuita cuana riyaque yahujaju aniya cuanaque narutibuneyaque?

Tura tuna quemitsacuare:

—Yusura narutibunehujaju ejitajuque ama jubuque, ni eje bucha adebataqui. ²¹ Arepa umae cuana jadya ejuu ama bucha, “Amenari riyaque epu Yusura narutibunehua”, jadya ama juatsu “Yuqueja anape cuana queja tuque”, pusha pusha jutidya tume. Yusura narutibuneyaque ejetaju ama, —jadya tujatu ecana acuare.

²² Jadya juatsu tujatu isaracuare tura mepehua cuanaque:

—Ecue cuanaquetu canerecatidadibuque. Eje tupu ecue cuanaque nerecaturatayaju micuana jubuque: “Areque Jesús ECUITA rehua ecuana tsehuedya ejuu ecuana casatura ishú” jadya. Ique ejitajuque ama tuhua jubuque. ²³ “Rehuadya ri Mesías”, jadya ama juatsu “Tuhua tu Mesías”, jadya ni tu umae jubuque. Neejeneume. Necuinanaume ique sarera, ique rehua ama juya. ²⁴ Aira cuejatsu ama micuana IQUE ECUITA junanucahuaque bahue jubuque. Dutyajadyatu babahue pupipupiyaque dutya queja; jadidya ique dutyara babuque junanucayaju.

²⁵ “Icuene ique dyaque nerecada jutaqui jari. Iyacua ecuita aniya cuanara bijidamadurabuque. ²⁶ Noé aniya

patya, tuque cuaba ebariju nubima jarijutu ecuita jidama cuanaque anicuare; ni ecana Yusura nerecaturayaju canerecati ishü equihuati jucuare. Jadidyatu jubuque ique junanucahuie. ²⁷ Tume patya beru ena eque teretama jarijutu ecuita cuana anicuare tuna anietibehua buchadya jutidya. Araaraya, ijijiyä, huanequi, ahuequi jadya anie tuna jucuare Noé cuaba ebariju nubicuare tupu. Muya jutidyatu ena shumaumaque ama jueticuare, tunara ihuayaju ama. Dutya tuna huiditerecuare. ²⁸ Lot aniya patya jucuare buchadyatu junucabuque. Ecuita cuanatu anicuare tuna anietibehua buchadya jutidya. Araaraya, quemiquemiya, catyati, uhuauhuaya, etare catiya jadya anie tuna jucuare. ²⁹ Lot, Sodoma juque cuinanayaque huecacatu Yusura pacacashacuare barepa juque etiqui, macana huiri cuana epacacau bucha. Dutya tuna majuterecuare. ³⁰ Jadidyatu jubuque IQUE ECUITA ejitaju junayaque huecaca. Ique junabuque ni aira ihuayaju ama.

³¹ “Muya jutidya ique junanucabuque. Tumeque huecaca tuna etare ebarucue ecamahua jepeda cuana juque ai etare ducu inaquenama butetaqui huana ishü. Teeju mere juya cuanaque ecana judirunucataqui ama etareju tunaja ai jiteque. Tuhuaquedya tuna huanataqui. ³² Neadebacue Lotja ehuanecue jucuarque. Tuque yudijidya cuanuca jucara juyajutu Yusura iyecuare. ³³ Micuana ni catehuatiya eaqueja ecatyatique eiyetauju, ejetsunue ama micuana anibuque. Tume micuana majutsu ni eje tupu Yusu queja judirubuque. Micuana ni ique jiteque, ejenetsu jadya iyetaya, tume micuana Yusu quejadya anisiribuque, arepa micuanaja ecuita ririya ama bucha.

³⁴ “Ique junanucayajutu ecue cuanaque enityasicua jubuque ecue ama cuana ducuque. Beta ecatse tuhua cuinetse cuartoju etahuiu. Ecuiquetu Yusu queja dujutanabuque. Peya bacue shanatanabuque. ³⁵ Beta epuna tuhua cuinetse eerieriu. Ecuiquetu dujutanabuque Yusu queja. Peya bacue shanatanabuque. ³⁶ Beta ecuitatu teeju cuinetse mere ejuu. Ecuiquetu Yusu queja dujutanabuque. Peya bacue shanatanabuque, —jadya tuna Jesúsra acuare.

³⁷ Jadya juya bacatsu tunajatu bacaduracuare:

—¿Eje tsunutu jadya jubuque, Ecuana Cuatsashaquique?

Tura tuna quemitsacuare quisarati jida eadeba tsehue:

—Eju ai emajuque ririyajutu jamani cuana caradatiya aija cuejatsu ama. Tumebaedyatu jubuque ique junanucayaju. Dutya tuna bahue jubuque, aija cuejatsu ama, —jadya tuna Jesúsra cuejacuare.

18

Eahuemajuque, huaraji inime bajejequique jadya cuatsabiji eque bahuityacuareque

¹ Jesúsra tuna bahuityacuare cuatsabiji Yusu queja tunara bacayaque tyaya tupu bacabaca ishu.

²—Anicuaretu epuju huaraji inime bajejequique. Jadique inime tujatu ijehuecuare ama: “Eratu aya ai acara ayaque. Eratu inime baya ama Yusura, ecuita cuanara jadya ecue ishu inime tupuyaque” jadya. ³ Tumeque epuju nucadyatu anicuare eahuemajuque. Castere baecuatu jucuare huaraji queja cuau cuau juyaque. “Tsahuacue ique. Bajecue riyaque inime ique jidama aqui juhua tsehue”, jadya tujatu ajacama acuare. ⁴ Tsunudatu huarajira tsahuacarama acuare. Epunaratu bacajacacuare ama. Amena chamacama huarajira inime tupucuare: “Mui baecua tuque ecue Yusu, ni ejequedya jutidya. ⁵ Jadya ama bucha, patsahua tucue era, tuque eaqueja jejaca ishu. Jeujeudya jutidyari ejuu. Amena tuque bacacarama aya”, jadyatu huaraji jucuare. Jadya bajejetu huaraji jidama cuitara acuare inime, —jadya tuna Jesúsra acuare.

⁶ Tuequedyatu Ecuana Cuatsashaquique Jesús jucuare:

—Bacahua micuana huaraji jidamaque jucuareque cuatsabiji. ⁷ Butsee tumeque huaraji jidamaratu tsahuacuare eahuemajuque tuaqueja cuau cuau jucuareque. Yusuratu tsahuayadya tuja cuanaque, huecada tupu meta tupu jadya tuaqueja bacabacaya cuanaque. ¿Quemitsa ishu tsunutaya bucha tuque micuana baya? ¡Aijama! ⁸ Pusha amadya micuana cuejaya. Tuquetu tsunutaya ama tuja cuanaque tsahua ishu. ¿IQUE ECUITA junanucahuajutu riyaque yahuaaju anibuque tunara bacayaque yuneri cuitadya Yusura tyayaque ejenequi cuanaque? —jadya tujatu ecana acuare.

Fariseo, enaruquiya ishu chipiru tsuje bacaquique jadya cuatsabiji eque bahuityacuareque

⁹ Tuhuatu jucuare uma peya cuana bijidamaduraqui cuanaque, tuna dyaque jida bucha cabatiya cuanaque. Jesusratu cuejanucacuare riyaque cuatsabiji, tuna adebamere, huecasha jadya aishu.

¹⁰ —Anicuaretu beta ecuita ecatse. Peadyatu fariseo jucuare. Peya bacue enaruquiya ishu chipiru tsuje bacaquique jucuare. Fariseojatu inime jucuare, peya cuana bucha ama tuque cuita camadya dyaque jidaque bucha. Cuacuare tatse Yusuja etareju Yusu tsehue quisaratira. ¹¹ Fariseotu netinaticuare ejitaju dutyaja peta ishu. Netinatitsutu Yusu tsehue quisaraticuare. “Yusu, yusurupai mique aya; mira ique peya cuana bucha dyaque jida tuyu iyahua. Ique

chiri baecua ni ique jidama ni epuna metsequi tsehue eani. Y usurapai mique aya, yumeque enaruiquija ish u chipiru tsuje bacaquique jidamaque buchique ama ique. ¹² Dutya badiju quimisacarucu huecaca arama quibeti bahue mique era muiyaque cabamereti ish u. Jetiama mique tyabahue ecue chipiru, ai ecue aniya cuanaque. Peadya tunca ecue aniyaque, mique peadya tyabahue micue ish u, —jadyatu fariseora Yusu acua re.

¹³ “Ecasumitiuque, enaruquija ish u chipiru tsuje bacaquique bacue juchaquidya jutidya cabaticua re. Ecuita cuanaja ijacaju amatu Yusu tsehue quisaraticua re. Bisutsu tujatu petacarama acua re ebarucue queja. Yacuatu camiriticua re tuja jucha aniyaque caadematitsu. Jucua retu: ‘Nerecabacue taa ique, Yusu. Ique jucha aridaque. Apupashacue ecue jucha cuana’ jadya tujatu Yusu acua re. Yusu tsehue quisarati jadya juatsu tatse dirucua re tatseja etareju. Jadya tatse jucua re.

¹⁴ “Yusuratu apupashacua re enaruquija ish u chipiru tsuje bacaquija jucha cuana, fariseo jaque bacue aijama. Jeeque micuana cuejaya. Yusuratu dyaque inime metse cabatiyaque aish u ama amereya. Aishuque ama cabatiyaquetu dyaque inime metse Yusura amereya, —jadya tuna Jesúsra acua re.

Jesúsra “Yusura jida panaru ebacua cuana” jadya acua reque (Mt 19.13-15; Mr 10.13-16)

¹⁵ Tumetu uma e ebacua cuana etata cuanaquera Jesús queja dujubarecua re.

—Emetucu micue iyacue ebacua cuanaja iyuca dyaque. Bacacue ecana Yusu queja, tuja ecana jida naru ish u, —jadya tunajatu Jesús acua re.

Jesúsra mepehua cuanara tuna jadya baatsu, nereda jutidya atsabarecua re ebacua cuana tsehue cuacuare cuanaque:

—Nepereume Jesús, —jadya tunajatu ecana acua re.

¹⁶ Jesusratu ihuaracuaredya tuaqueja ebacua cuana.

—Pajedya ebacua cuana eaqueja. Necuadishaume ecana eaquejaque. Esiri cuanaque camadya ama, tumbaedy a tuna dyadi tuna Yusu jaquedya. ¹⁷ Pusha amadya micuana cuejaya. Yusura dutya naruhaju tuaqueja judirucara juya cuanaquetu era cuatsashaya eque jutaqui ebacua cuejataquique bucha, —jadya tuna Jesúsra acua re.

Ecuita chipirudaque Jesús tsehue quisaraticua reque (Mt 19.16-30; Mr 10.17-31)

¹⁸ Peya huecacatu ecuita inime metsera Jesús bacaduraticua re:

—Jidaque Ebahuityaquiue, ¿ai mere tuque jidaque eau, Yusu queja judiru ishú ni eje tupu tuque jaca ishú ama? —jadya tujatu Jesús aticuare.

¹⁹ Jesusratu quemitsacuare:

—¿Adebayadyami eje buchique quisarati ahuaque? ¿Eje bucha juatsu mira “Jidaque Ebahuityaquiue” jadya aya? Yusu peadya camadya tu jidaque. ²⁰ Bahuedyami Yusura cuatsashahuaque. “Peyaja ehuanegue micuique bucha aniquere aume. Quiyeti puji juume. Chiri puji juume. Ni ejeque buchique pusha pusha aume. Muibacue mique baquiue, mique susuquiue jadya”. Jadyatu Yusura cuatsashacuare béru, —jadyatu Jesúsra acuare.

²¹ —Dutya riyá cuanaque cacuatsashati cuana tuque muibacuare nanada equeradya, —jadyatu ecuitara acuare.

²² Jadya bacatsutu Jesúsra jadya acuare:

—Aniya jari tuque micue eje bucha ataquiue. Dutya micue aniya cuanaque catyati aticue. Catyati aatsu tyabarecue chipiru nerecada cuanaque. Dutya micue ai catyati aatsu, juetinucacue eaqueja eatsehue juneni ishú. Eaquejami ecatyatiu; tume tuque micue eaniu Yusuja cuanaja ishú tuja barepaju aniyaque, —jadyatu Jesúsra acuare.

²³ Jadya ayaju bacatsutu dyaque peya inime jucuaré, tuja dyaque jetiama aniyaque catyati acarama acuare tibu.

²⁴ Tuja ai aniya cuanaque cashanaticarama juyaque baatsutu Jesúsra acuare:

—Jetiama ai aniya cuanaratu dyaque ibeda, masada baya eaqueja pana catyati juishu, Yusura dutya naruyaju judirutaqui juishu. ²⁵ Cahuayutu etsucuija cani eque eje bucha cuetitaqui ama. Tumbaedyá tuna tunaja ai aniyara eje bucha judirutaqui ama amereya Yusu queja, —jadya tujatu ecana acuare.

²⁶ Jadya juya bacatsutu tuque bacaqui cuanaque jucuaré:

—Chipiruda cuanaque ni Satanás quejaque quinajacameretitaqui ama cabatiya, ¿ejeque jatsutu tuaquejaque equinajacameretiu? —jadya tuna jucuaré.

²⁷ —Ecuíta ni tu tuta taca eje bucha quinajacameretie juma Satanás quejaque. Yusura peadya camadya tuna einajacameréu, —jadya tujatu ecana acuare.

²⁸ Jadya bacatsutu Pedrora acuare:

—Ecuana Cuatsashaquiue, ecuana ecuana dutya cashanatihua miatsehue juneni ishú, —jadya tujatu acuare.

²⁹⁻³⁰ —Pusha amadya micuana cuejaya. Micuana ni cashanatiya dutya micuanaja ai aniyaque Yusura eje bucha narue ayaque quisarati cueja ishú, Yusura micuana tyaya dutya micuanara riyaque yahuaju sareyaque. Tura micuana tyaya micuanara sareya tupu. Micuana ni etare cashanatiya, tura

micuana tyaya eju ani ishuque. Cashanatiya ni micuana micuanaja huane, micuana tsehuequi cuanaque, micuanaja tata, micuanaja cuaa, micuanaja bacua cuana, tura micuana peya cuana queja iyuhue tsehue narumereya tunaja ata neri bucha. Micuana majuhaju tura micuana barepaju tuatsehue anishasiribuque ni eje tupu tuque jaca ishuma, —jadya tuna Jesúsra acuare.

Jesús eje bucha iyetanae juyaque cacuejati quimisha ishucacuejatinucacuareque

(Mt 20.17-19; Mr 10.32-34)

³¹ Jesúsra tuna peya queja amaca duju acuare peadya tunca beta earacana tura mepehua cuanaque, tuque eje bucha juyaque cueja ishuma:

—Micuana micuana bahuedia Jerusalénju ique cuayaque. Tuhadya ique eje bucha juya, beru Yusu equeque quisarati cuejaqui cuanara ique eje bucha judadiyaque cuejahua equedia. ³² Israelita ama cuana queja tunara inamereya. Ijahue ijahue tunara aya. Ijillahuana, ecuedira jadya tunara aya. ³³ Ebi tsehue au, catsacatsa jadya tunara aya. Jadya aatsu tunara iyeya. Quimisha huecaca majutsu chacha netitsuranucaya, —jadya tuna Jesúsra acuare.

³⁴ Tura mepehua cuanaratu adebataqui ama bacuare eje buchique tura cuejahuaque. Yusura tunajatu inime tachicuare, tunara Jesús quisaratiyaque eadebauju. Jadya tibu tunajatu adebacuare ama.

Jesúsra Jericó juque shuihique capetatisacuareque

(Mt 20.29-34; Mr 10.46-52)

³⁵ Jesús, tura mepehua cuanaque jadya tuna Jericó epuju cajipetiajecuare. Tuhadyatu shuihique ediji jiruru anianinicare cuetiya cuanaque chipiru baca juyaque. ³⁶ Ecuita umadaque cuetiyaju bacatsu tujatu ecana bacaduracuare:

—¿Eje buchatu juya? ¿Ejequetu cuetiya? —jadya tujatu ecana acuare.

³⁷ —Jesús Nazaret juquetu cuetiya, —jadya tunajatu acuare.

³⁸ Jadya ayaju bacatsutu quiquecuare:

—¡Jesús, miquemi Yusuja Emepeque, David eque ejuracanaque! Nerecabacue taa ique, —jadya tujatu quique eque acuare.

³⁹ Jesúsra icueneritya aajeya cuanaratu nereda acuare, tuque abacasha ishuma. Tuque bacue jadya ayaju dyaque jebuda quiquecuare:

—¡Miquemi Yusuja Emepeque! ¡David eque ejuracanaque mique! ¡Nerecabacue taa ique!, —jadyatu jebuda quiquecuare.

⁴⁰ Tuque juaniya tuyu junatitsutu Jesús netinaticuare. Cutsashacuaretu tuhua cuanaque:

—Requeja nebecue shuhuique.

Shuhuique tuaqueja cajipetihuaju tujatu bacaduracuare:

41 —¿Eje buchami eaqueja catimerecara juya?

—Ecuatsashaquique, capetatishanucacue ique.

42 —Amenami capetatiya. Erami capetatishahua, mira era mique ecapetatishauque ejenehua tibu, —jadyatu Jesúsra acuare.

43 Tura jadya aya tsehuedya cuitatu capetaticuare. Tajiaje-cuaretu Jesús ediji eque, Yusu pureama ayaque.

—¡Dyaque jida, casada taa Yusu! —jadyatu juajecuaré.

Tuhua jucuaré cuanaratu jadya baatsu Yusu pureama acuare,

—¡Jejee, casadadya tu Yusu! ¡jidadya tuque! —jadya tuna, tuna dyadi jucuaré.

19

Zaqueora Jesús bacara ebari acuareque

1 Tudyatu Jesús judirucuaré Jericóju. Tuhua judiruhua-quetu cueticuaré tumeque epu eque. 2 Tuhuatú anicuaré ecuita chipirudaque Zaqueo bacani. Tuquetu jucuaré enaruquija ishú chipirú tsuje bacaquí cuanaja huaraji.

3 Jesús pa cuetiya jadya bacatsu tujatu bacara ebari acuare. Tuque ecuita barudama juya tibu, tujatu eje bucha petataquí ama bacuaré ecuita cuana ducu netiyara.

4 Tsajajaajetsutu icueneta tsuranati jucuaré acuí sicómoro bacaniju, japadama cuetiayaju Jesús batsacara aatsu. 5 Jesusratu tueque cuetiayara bajiyudirucuaré ebarucue. Bajiyutsu tujatu bacuaré acuiju tsuratsu yaaju juaniyaju. Baatsu tujatu isaracuaré:

—Bandía, Zaqueo. Butecue ebajarara. Ique micue etareju riyaque huecaca nubidiruya, —jadya tujatu Zaqueo acuare.

6 Jadya ayajutu Zaqueo ebajarara butecuaré. Jida inime tsehuetu Jesús batsacuaré, tuja etareju nudyatsatsu. 7 Zaqueoja etareju nubiya baatsutu tuhua jucuaré cuanaque Jesúsja ishú quisaratitibunecuaré, tuque enaruquija ishú chipirú bacaquíja etareju nubiya baatsu.

—Ita nepetacue. Jesús tu nubitihua ecuita jucha aridaja etareju, —jadya tuna jubarecuare.

8 Zaqueotu juneticuaré Jesúsja yacuaju.

—Tyaya tuque nrecada cuanaque patya jaque dutya ecue aniyaque, Ecuana Cuatsashaquique. Era tuna eje uma ijahue acuare. Ecue tsuje bacataquique dyaquedya tuna tsuje bacabanicuaré, enaruquija ishú chipirú sitayaque. Era peadya peso chirihuaque tuna pushi peso cuaretyau abareya, —jadyatu Zaquerora acuare Jesús.

Jadya cacuejatiétu jucuaré tuque jidama juhuaque, tumebaedya inime cacuaretihuaque.

⁹ Tudyatu Jesúsra acuare:

—Berutu Abraham Yusu queja nimee anicuare. Jadidyari riyaque ecuita tuque eque ejuracanaque Ijahua quejaque quinajameretihua tuque eaqueja catyatihua tibu. ¹⁰ Ique riyaque yahuaju junahua Yusu adeba baecua cuanaque sarera tuna Ijahua quejaque inajacamerera jadya, uhuisha cuji eju bucha cuanaque, —jadyatu Jesúsra acuare.

Chipiru umanashaqui cuanaque cuatsabiji eque bahuityacuareque

(Mt 25.14-30)

¹¹ Jerusalén japadama juajeya cabatitsu tunajatu peadya peadyaja inime jucuaré.

—Masadama ni tu Jesús huaraji dyaque casadaque ejuu riyaque yahuaju, —jadya tuna jucuaré.

Jadya tibudya tuna Jesúsra cuejacuaré riyaque cuatsabiji inime yunerique ama bajeje ishu.

¹² —Anicuaretu ecuita dyaque inime metse eque ejuracanaque. Peya yahuaju japada cuacaraqetu jucuaré, ecuari bacanisha ishu, jadya aatsu tuja yahuaju dirunuca ishu. ¹³ Cuinanama jarira tujatu ihuaracuare peadya tunca tuque merequi cuanaque. Tyabarecuare tujatu ecana peadya peadya ficha cuana chipiru tsuje aridaque. “Ique juneniya jari tupu jeeque chipiru tsehue quemí quemí, catyati jadya nejucue. Neumanashacue ecue chipiru,” jadya tujatu peadya peadya cama mere puji cuana abarecuare.

¹⁴ “Tuja epuju cuanaratu ujeu bacuaré. Cuadishacuare tunajatu icuene ecuejaquique tuque cuayaque epuju. ‘Bijidama tuque ecuana baya jeeque ecuita ecuanaja ecuari juishu’ jadya tunajatu cuejamerecuare. ¹⁵ Japada cuaatsutu ecuari bacanishatanacuare. Jadya juatsutu juetinucacuare tuja epuju. Juetinucatsu tujatu ihuaramerecuare tuja mayuruma. ‘Ihuaramerecue era cuayara chipiru tyaquenacuare cuanaque. Bahue jucara juya tunara chipiru eje bucha acuareque, eje uma tuna umanashacuareque’ jadya tujatu acuare.

¹⁶ “Icuenequetu juticuare tuja yacuaju. ‘Tsumechine tuque micue chipiru mira tyacuareque. Tuatsehue tuque umanashamerechine peadya tunca ficha dyaque tsuje aridaque’ jadya tujatu aticuare.

¹⁷ “Jadya ayaju bacatsutu ecuarrira acuare: ‘Jida. Miquemi jidaque mere puji. Miratu pana tsume ahua era riyá piji tyacuareque. Tume mique tyaya mere dyaque muidaque. Bacanishaya mique era peadya tunca epu cuanaju aniya cuanaque naru ishu’ jadya tujatu acuare tuja mere puji. ¹⁸ Tuequedyatu peya ecuarija yacuaju jutinucacuare. ‘Tsumechine tuque micue chipiru mira tyacuareque.

Tuatsehue tuque umanashamerechine pishica ficha dyaque tsuje aridaque' jadya tujatu aticuare. ¹⁹ Jadya ayaju bacatsutu ecuarrira acuare: 'Bacanishaya mique era pishica epu cuanaju aniya cuanaque naru ishú' jadyatu tuja patrónra acuare.

²⁰ "Jadya juatsutu peya jutinuacuare ecuarrira yacuaju. 'Jeeya micue chipiru mira ique tyacuareque. Eracaju dunutsu tuque iyacuare. ²¹ Bajida juchine mira era aputashahuaju cuana jidama eauju. Ique bahue micue peya cuana tsehue canerecabati aijamaque. Ique taa bahuedya jucuar mira ecue riyá piji aniyaque secanucabuqueque. Arepa ecuanara iruruya ama bucha, dutyadya tu micue ishúque. Arepa ecuanaradya tee cuana uhuahua ama bucha, miratu huesamereya micue ishú cuita camadya' jadya tujatu aticuare. ²² 'Miquemi mere puji cuejataquimaque. Iyacuami bahue juya. Nerecaturaya mique era, mira quisarati ahua equedya. Adebachinemi ecue canerecabati aijamaque. Ecue ishupa dutya micuanara iruruchineque. Era camadyapa tsumehua dutya ecue ishú camadya micuanara uhuahuaque. ²³ Jadya mira ejeneya tibu taa tuquemi dujuquena cuana dyadi juquena jucuar chipiru umanashaqui cuana queja. Tume taa tuque junanucatsu ecue chipiru era mique tyacuareque, tumeque chipiru eumanaque tsehue inapee aquena juhua' jadyatu tuja patrónra acuare. ²⁴ Jadya tujatu ecana acuare tuhua cuanaque: 'Nesecacue chipiru tumeque mere puji cuejataquimaque. Netyacue peadya tunca chipiru umanashaqui juhuaque' jadya tujatu ecana acuare. ²⁵ 'Aniya tujatu peadya tunca chipiru, jadya tunajatu patrón acuare. ²⁶ 'Pusha amadya micuana cuejaya. Ejeja aniyaquetu dyaque tyatanabuque. Tuja aniyaque dyaquedyatu tyatanabuque. Ejera ni jidama tsumeya tuque tyatahuaque, secatabuquedya tuque, arepa riyá piji tuja aniya ama bucha. ²⁷ Peya micuana cuejaya. Jadyatu juya ique ujeu baqui cuanaque, ecue naru ishú bijidama baqui juhua cuanaque. Nerisicue. Nebecue requeja. Neiyecue ecana ecue yacuaju' jadya tuna ecuarrira acuare. Jadyatu jucuar chipiru umanashaqui cuanaque, —jadya tuna Jesúsra acuare.

(Riyaque cuatsabiji eque tuna Jesúsra huecashacuare, Yusu ecuanaja dutya casa tsehue meretaquique tura ecuaná casa tyaya tsehue.)

Jesús Jerusalénju judirucuarque

(Mt 21.1-11; Mr 11.1-11; Jn 12.12-19)

²⁸ Tumeque quisarati cuejatillatsutu Jesús cueticuare tuhuaque tura mepehua cuana tsehue Jerusalénju judiru ishú. ²⁹ Emata baruda cuita ama Olivo Acui Quini bacaniju

tuna junaticuare. Beta epu ecatsé Betfagé, Betania jadya japadama tuna jucuare. Junatitsutu Jesúsra icueneta cuadisha acuare beta tura mepehuaque ecatsé.

³⁰—Ecuanaja yacua tuyu epu achaachaju necuacue. Tuhua junatitsu tuque metse banatiya burro erisique netiyaju, ni aija bucha isaanimaque. Nepisuticue. Pisutsu ecue nebecue. ³¹Ejera ni metse bacaduraya: “¿Aishu tuque metse pisuya?” “Ecuana Cuatsashaquiratu sareya”, jadya neacue, —jadya tatse Jesúsra acuare.

³²Tudyatu cuadishahuaque ecatsé cuacuare. Banaticuare tatse burro isaanimaque Jesúsra cuejahua equedya. Banatitsu tatse pisucuare. ³³Burro pisuyaju baatsu tatse emetse cuanaquera bacaduracuare:

—¿Aishu tuque metse ecuanaja burro pisuya? —jadya tunajatu ecatsé acuare.

³⁴—Ecuana Cuatsashaquira pari sareya, —jadya tatsejatu ecana acuare.

³⁵Pisutsu tatsejatu dujucuare burro Jesús queja. Judiriqueretsu tatsejatu tatsera jutuya tsehue titecuare. Tume tatsejatu bajeje amena aatsu Jesús isaanimerecuare. ³⁶Jesúsra isaanihuaju tunajatu jetiama tuhua cuanara tunaja jutu ishú cuanaque pijabarecuare edijiju, tuque muiyaque. ³⁷Judirucuare tuna emata Olivo Acui Quini jiruru. Dutya umada ecuita cuana tuatsehue ajeya cuanaque jerutibunecuare ecana pureama tsehue. Yusu tunajatu pureama acuare, Jesúsra Yusuja casa bamere ishú dutya ahuaque baatsu.

³⁸—¡Jida paju ecuari Yusuja ebacaniju jeyaque! ¡Amenatu Yusuja cahuaite terehua ecuita cuana tsehue! ¡Arida, dyaque casada jadyatu Yusu barepajuque! —jadya tuna jubarecuare quique eque.

³⁹Ecuita cuana ducutu fariseo cuana jucuare. Jadya quisarati bacatsu tunajatu Jesús acuare:

—Ebahuityaquique, nereda acue miatsehue cuaya cuanaque; jadya ecana paquisarati ama, —jadya tunajatu Jesús acuare.

⁴⁰Tume tuna Jesúsra acuare:

—Ique pureama ataqui tibu tunara jadidya aya. Ecuita cuana ique pureama aquí cuanaque ni eabacashau, tume taa Yusura tumu cuana queja pureama eamereu, —jadya tuna Jesúsra acuare.

⁴¹Amena epu aridaque japadama juetiyara tujatu petacuare epu. Petatsu tuna Jesúsra enapacuare tumeque epu ebariju aniya cuanaque nrecada judadiyaque adebatsu.

⁴²—Arepa micuanara ique iyacua pureama aya ama bucha, micuanaratu adebaya ama eaqueja catyatihuaju

micuana Yusura jida ebajiyunucauque. Areque micuana pana adeba eau. Aijama, eje bucha adebaene tuque micuana ama. Ibecuinahuatu micuanaja ishu. ⁴³ Juetibuquetu huecaca jidamaque micuana canerecati ishuque. Micuana ujeu baqui cuanaratu tibarillabuque micuanaja epu ebari. Nityatsurabuque tunajatu mechi uyuuyu esipique micuanaja epu pana teritilla aishu. Dutya eque tunara micuana iye ishu tabutillabuque. ⁴⁴ Dutya tunara micuana iyetillabuque. Micuanaja etare cuanatu terebuque, ni peadya tumutu anibuque ama cadyaquetitsu. Arepa micuana Yusura Ijahua quejaque eje bucha quinajacameretie juishuque bahue amerehua ama bucha, tuque micuana bijidamadurahua. Jadya tibu micuana canerecatibuque, —jadyatu Jesús jucuaré ai ecuita cuana Jerusalén juque eisarau bucha.

Jesúsra catyati puji cuana Yusuja etare juque ijehuecuinatil-lacuareque

(Mt 21.12-17; Mr 11.15-19; Jn 2.13-22)

⁴⁵ Jadya juu jadya juatsutu Jesús Yusuja etareju nubidircuare. Nubitsutu dyaque cahuaicuare, tuhua eje bucha juyaque baatsu. Jadya tibu tujatu ecana etsecueju pana ijehuecuinatilla acuare catyati puji cuana, bacabaca puji cuana jadya. ⁴⁶ Cuinanashayaque tujatu ecana jadya acuare:

—Yusuja quisarati tu jadya ehue: “‘Ecue etare tu eatsehue quisarati ishuque etare bacani’ jadyatu Yusu beru jucuaré”. Jadya ama bucha tuque micuana chiri puji cuana catehua ishuque cani bucha jutidya amereya, —jadya tuna Jesúsra acuare.

⁴⁷ Jerusalénju judirutsutu Jesús dutya huecaca Yusuja etareju cuau cuau jucuaré, Yusuja quisarati bahuitya juyaque. Pae cuanaja huaraji cuanara, cacuatsashati bahuityaqui cuanara, epu juque huaraji cuanara jadyatu Jesús iyecara ebari acuare. ⁴⁸ Terecuare ama tunaja inime eje bucha iyemeree tuque eauque. Eje bucha eque eje bucha ataqui amatu jucuaré, ecuita cuanara quisaratiyaju jida bacacuare tibu.

20

¿Airatu Jesús cuatsashacuare tura aya cuanaque aishu?

(Mt 21.23-27; Mr 11.27-33)

¹ Peya huecacatu Jesúsra Yusuja etareju ecuita cuana Yusuja quisarati bahuityanucacuare, Yusu queja judiru ishuque quisarati cueja. Tuque jadya quisaratiyajutu junacuare pae cuanaja huaraji cuana, cacuatsashati

bahuityaqui cuanaque, israelita cuanaja emuiba cuanaque jadya. ² Jipetitsu tunajatu bacaduracuare:

—¿Airami ejeque ecuitaja ataquique ama aishu cuatsashahua? ¿Aija casa tsehue tuquemi jadya aya? —jadya tunajatu acuare Jesús.

³ Jesúsra tuna quemitsacuare:

—Era micuana tumbaedy a bacaduraya. Nequemitsacue ique. ⁴ ¿Airatu Juan cuatsashacuare ecuita cuana utsa ishú? ¿Yusura, ecuita cuanara ni taa? —jadya tuna Jesúsra bacaduracuare.

⁵ Tume tuna, tuna cama quisaraticuare:

—“Yusuradyatu cuadishahua”, jadya ni ecuana eau, tume tura ecuana ebadurau: “¿Eje bucha juatsu jatsu tuque micuana Juanra cuejacuareque ejenecuare ama?” jadya tura ecuana eau. ⁶ “Ecuita cuanaja ecuadishaquedya jutidyatu jucuaré”, jadya ni ecuana eau, tumetu dutya jujeri ecuita cuana ecahuaitiu ecuana tsehue. Tume tunara ecuana eiyeu tumu tsehue. Juan tunajatu Yusu equeque quisarati cuejaquique bucha adebaya, —jadya tuna cacuejaticuare.

⁷ Chamacama tunajatu quemitsacuare:

—Baecua ecuana aira Juan ecuita cuana utsa ishú cuatsashacuareque, —jadya tunajatu Jesús acuare.

⁸ —Jutaquiju micuana era cuejaya amadya aira ique ecuitaja ataquique ama aishu cuatsashahuaque, —jadya tuna Jesúsra acuare.

Mere puji jidama cuanaque cuatsabiji eque bahuityacuareque

(Mt 21.33-44; Mr 12.1-11)

⁹ Jadya juatsutu Jesús catibutinucacuare ecuita cuana bahuitya. Riyaque cuatsabiji tujatu ecana cuejacuare, tuna bahuitya ishú.

—Peadya ecuitajatu tee aridaque anicuare. Tee ameretsu tujatu uva uhuamerecuare. Umae ecuita cuana queja tujatu tee narumerecuare. Tura tuna acuare: “Micuanara ni ecue tee naruya, tume ecuana uva jahuanehuaju cajaquetiya micuana tsehue”. Tuna tuna endya jucuaré. Tume cuanaque bajejetsutu emechiqui cuacuare japada peya yahuaju.

¹⁰ Uva jahuane mara juetihuaju tujatu tuque merequique cuadishacuare tee naruqui cuana queja. “Cuacue ecue teeju mere juya cuana queja. Cuejaticue ecana; pacuadisha tuna ecue ishúque uva epituque”, jadya tujatu ecana cuejamerecuare. Jadya ahuajutu cuacuare. Jutihuajutu tee naruqui cuanara inatsacuare. Mirimiri tunajatu atsacuare. Mema tuna cuadishacuare, ni peadya uva caca tsehue. ¹¹ Jadya juhua bacatsutu emechiquira cuadishanucacuare peya tuja

mere puji. Tumeque tunajatu ijahue ijahue, miririsha jadya atsacuare. Memadya tuna cuadishanucacuare, ni peadya uva caca tsehue. ¹² Tuequedyatu emechiquira cuadishanucacuare peya mere puji nuca. Tumeque tunajatu ujeda atsacuare. Ujeda aatsu tunajatu tee tibene ijehueticuare.

¹³ “¿Eje bucha juya?” jadyatu inime tupucuaré tee metsera. ‘A, adebahua tuque era. Pacuadisha era ecue ebacua neri, dyaque iyuhuedaque. Jida tunajatu emuibatsau’ jadya datse tujatu inime jucuaré. Jadya inime tuputsu tujatu ebacuaque neri cuadishacuare. ¹⁴ Ebacuaquera jipeajeyajutu tee naruqui cuanaque jadya jucuaré tuna cama: ‘Riyaquedya ri tee metseja ebacuaque neri. Eje tupu etataque majuhujuri riyaquedya tee metse judadiya. Neiyetsara. Ecuandya emechiqui nejura’ jadya tuna jucuaré. ¹⁵ Inatsacuare tunara. Inatsatsu tuna tee juque cuinanashacuare. Cuinanashatsu tuna iyecuaré. Jadyatu tee naruqui cuanaque jucuaré, —jadya tuna Jesúsra cuejacuaré.

Tume tuna Jesúsra bacaduracuare tuque quisaratiyaju bacauqui cuanaque:

—¿Eje buchatu anabuque tee naruqui cuanaque emechiquira? ¹⁶ Era micuana cuejaya. Juetitsu tujatu iyemerenuquedya tee naruqui cuanaque. Peyadya tujatu mere puji cuana sarenabuque tee naru ishú, —jadya tujatu ecana cuejacuaré.

Jadya bacatsu tuna jucuaré:

—¡Jadya paju ama!

¹⁷ Jesúsra tuna petacuare.

—Ehuenedya tu Yusuja quisarati jadya. ¿Eje buchique tume?

“Tumu etare puji cuanara tsumecarama acuaquetu tumu dyaque saretanayaque judadicuaré.

Ecuana Cuatsashaquiratu dyaque saretanayaque amerecuare”, jadya tu ehúene.

¹⁸ Ejeque chicatsu tumeque tumu dyaque rihuiyaquetu dyaque ujeda catibuque. Tumu ni ejeque dyaque rihuiya muru tujatu tyanatsu amerebuque.

(Riyaque quisarati eque tuna Jesúsra bahuityacuare. Tuque bijidamadurauqui cuanaquetu dyaque nerecatu-ratanabuque.)

Yusu tuja ishúquedya tyataquique

(Mt 22.15-22; Mr 12.13-17)

¹⁹ Riyaque cuatsabiji bacatsutu pae cuanaja huaraji cuana, cacuatsashati bahuityaquí cuanaque jadya dyaque cahuaiticuare, tunara cuitadya Jesús bijidamadurahuaque caadebatitsu, mere puji cuanara tee metseja ebacuaque

bijidamadurahua bucha. Eje buchadya inacara datse tunajatu acuare Jesús. Eje bucha jadya ataquí ama tunajatu bacuare, ecuita cuana ecahuaituque adebatsu. Jutaquiju tunajatu inacuare ama tumeque ura cuitadya, ecuita cuana mubatsu.

²⁰ Jadya juatsu tuna quinimeticuare Jesús ina ishu. Inime bajetsu tunajatu eje uma ecuita cuana Jesús queja cuadishacuare.

—Necuacue Jesús isarara. Jida tuyu cuita bucha necabamereticue. Jadya juya ama bucha enaruquija ishu jidama nequisaratishacue. Tume inatsu nedujura huaraji cuana queja, —jadya tunajatu ecana cuejamerecuare.

²¹ Jadya juatsutu tumeque ecuadisha cuanaque cuacuare Jesús isarara.

—Ebahuityaquique, ecuana ecuana bahue mique jida, tuyuque. Miratu bahuityaya Yusuja inime eque ani ishuque, ni ejeque buchique mubatsu ama. Micue ishutu ecuita dutya tupu. ²² Jutaquijudya ecuana cuejacue. ¿Ecuanaja cacuatsashati eque, tuque ecuanaja ecuana naruquique Roma juque tsujetyataquí, tsujetyataquí ama ni taa? —jadya tunajatu Jesús aticuare.

²³ Jesusratu adebacuareadya tunara jidama inime tupuya tsehue jadya bacaduratiyaque.

²⁴ —Nebamerecue ique ficha enaruquija chipiru tuque tsujetya ishuque. Papeta era. —jadya tujatu ecana acuare.

Petatsu tuna Jesúsra bacaduracuare:

—¿Aija ebutsequini ri riyaque fichaju eiya? ¿Aija ebacani ri rehua ehue?

—Enaruquique muidaque César bacani jaque tume, —jadya tunajatu quemitsacuare.

²⁵ —Jutaquiju netyacue enaruqui César tuque tyaihuquedya. Yusu netyacue Yusuja ishuquedya, —jadya tuna Jesúsra acuare.

²⁶ Yuhua dutyaja yacuaju tunajatu eje bucha jidama quisaratishataquima bacuare. Anajacatacuare jutidya tuna tuque jadya caquemitsatihaju bacatsu. Abacatanacuareadya jutidya tuna.

Emaju cuanaque netitsuradadinucabuqueque

(Mt 22.23-33; Mr 12.18-27)

²⁷ Tumeque huecaca nucadyatu saduceo cuanara Jesús baticuare. Tunaradyatu ejenecuare ama emaju cuanaque netitsuranucayaque. Junatitsu tunajatu Jesús isaranaticuare:

²⁸ —Ebahuityaquique, Moisésra taa tu riyaque cuatsashacuare. “Ejeque ecuita ni majuya cabacuatimaque, tuatsehuequiquetu caquemitinucataquí eahuemaju

tsehue, tuatsehue cabacuati ishu, icueneque ebacua emajuja ebacuaque bucha ishu”, jadyatu Moisésra cacuatsashati huenecuare béru. ²⁹ Riyaque cuatsabiji mique ecuana aya; ijariba ishuque jutidya tu ecuita emajuque chacha netitsuranucaya jadique. Anicuaretu ecuitaja pacarucu ebacua cuanaque. Icueneque ebacuaquetu caquemiticuare. Huanequi juu jadya juatsutu majucuaque bacuamaque. ³⁰ Majuhuajutu ejuque beta ishuque caquemitinucacuare eahuemaju tsehue. Beta ishuquetu tumbaedyu majunucacuarenya bacuamaque. ³¹ Quimisha ishuque ejuquetu caquemitinucacuare eahuemaju tsehue. Tumbaedyatu junucacuare. Bacuamaquedyatu majunucacuare. Jadya ecana jubarecuare; pacarucudyatu tumeque epuna tsehue cama ecana caquemititsu majuetibecuare bacuamaque tere. ³² Tumeque nrecadaque epunatu pacarucu ahuee juhuaque majucuaque, yahue cuanaque majuterehuaju. Jadya tuna jucuaque.

³³ “Ecuanarami bacaduraya riyaque. Yuneridya ni majuya cuanaque chacha netitsuranucabuque, ¿ejeja ehuanequetu jubuque chacha netitsuranucatsu, riyaque yahuaju tuque pacarucu ahuee juhua tibu? —jadya tunajatu Jesús bacaduracuare.

³⁴ Jesúsra tuna quemitsacuare:

—Micuana micuana cuji juya. Riyaque yahuaju camadyatu ecuita cuana caquemitiya. ³⁵ Yusuja yacuaju judirubuque cuanaque netitsuranucatsu tuna caquemitinucabuque ama barepaju. ³⁶ Maju, netitsuranuca jadya juatsu tuna majunucanime ama. Barepaju Yusu tsahuaqui cuanaque tuna caquemiti baecua. Jadidyatu emaju cuanaque; netitsuratsu tuna caquemitinucabuque amadya. Yusu jaque tuna jubuque; tuja ebacua cuanaque tuna jubuque. ³⁷ Yuneridyatu emaju cuanaque chacha netitsuranucabuque. Neadebacue Moisésra cuitadya huenecuareque, acui huija jujuyaque murutayaque ama tura huenecuareque. Yusutu jucuaque: “Ique Ecuatsashaquique. Ique Yusu, Abraham, Isaac, Jacob jadyara iyacua muiyaque”. ³⁸ Yusutu chacha cuanara muiyaque, emaju cuanara ama. Jadya tibudya yuneridyatu Abraham, Isaac, Jacob jadya ecana enetitsura. Yusuratu dutya enetitsura baya, arepa majuhua ama bucha, —jadya tuna Jesúsra acuare.

³⁹ —Dyaque jidami caquemitsatihua, Ebahuityaquique, —jadyatu acuare umae cacuatsashati bahuityaqui cuanara.

⁴⁰ Tumetu saduceo cuanaja inime terecuare bacaduranuca ishu.

Mesías tu ecuita camadya ama, ecuita cuana dyaque inimequique

(Mt 22.41-46; Mr 12.35-37)

⁴¹ Jesúsra tuna jadya cuejacuare:

—Micuanajatu inime juya: “Mesías Yusuja Emepequetu ejeque ecuita baedya jutidya judadibuque, David eque ejuracanaque jubuque tibu”. Micuana micuana cuji juya, jadya inime tuputsu. ⁴² David cuitadyatu bahue jucuare Mesías ecuita camadya ama jubuqueque, ecuita cuana bucha dyaque inimequique. Salmos quiricaju tuque ecuanaja Davidra cuitadya huenecuareque eisara:

“Yusuratu Ique Cuatsashaquique jadya cuejacuare:

‘Anibutecue ecue jida eque amaca muitaj ishü, ⁴³ era mique ujeu baqui cuanaque dutya ijahue atillaya tupu, Ique Cuatsashaquique’ ”

jadya.

⁴⁴ “Davidradyatu Mesías ‘Ique Cuatsashaquique’ jadya acuare, arepa tueque ejuracanaque ama bucha. Yuneri cuitadyatu Mesías ecuita jutidya ama ejuu; ecuita cuana bucha dyaque inimequiquedya tume, —jadya tujatu ecana acuare.

Jesúsra cacuatsashati bahuityaqui cuanaque jidama juyaque ejitaju acuareque

(Mt 23.1-36; Mr 12.38-40; Lc 11.37-54)

⁴⁵ Jesúsratu isaracuare tura mepehua cuanaque, jetie ecuitara bacayaju ama.

⁴⁶ —Necanaruticue cacuatsashati bahuityaqui cuana tsehue. Tuna aniya bae neaniume. Tunaratu una junudaque jutuya, peya cuana queja Yusu adebaqui jadya cabamereti ishü datse. Epu patya eque cuetiyaju tuna dyaque muida tsehue isaratacara juya. Caradati ishüque etareju cuaatsu tuna muida cuanaque anibahueju anibutetiya. Chine cuana ishü araratayaju cuaatsu tuna emuita cuanaja eaniqui cuanaju cama tuna eaniqui metsene juya. ⁴⁷ Arepa ecana eahuemaju cuanaque tsahuaya bucha cabatiya ama bucha, yuneri cuitadya tunajatu eahuemaju nrecada cuanaque tunaja ai aniya cuanaque secatillaya, tuna tunaja etare juque cuitadya ijehuecuinaya tupu. Yusu tsehue quisaratiyaque tuna tsunuda quisarati bahue dutyaja ijacaju, tuna queja “Yusu adebaqui cuita rena”, jadya catimere ishü datse. Yusura tuna dyaque nrecaturabuque, —jadya tuna Jesúsra acuare.

21

Eahuemaju nrecadara chipiru Yusuja ishü iyacuareque
(Mr 12.41-44)

¹ Jesústu juanicuare Yusuja etareju. Petacuare tujatu chipiruda cuanara Yusuja ishü chipiru cajuju ishayaü.

² Tumbaedyatu banucacuare eahuemaju dyaque nrecadara beta ficha piji cobre ishaticyaju, tsuje aridaque ama, ai tsujequi cuitaque ama. ³ Baatsutu Jesús jucuare:

—Pusha amadya micuana cuejaya. Yusratu dyaque tsuje arida baya epuna nrecada eahuemajura ishahuaque, chipiruda cuanara jetiama ishahuaque bucha ama.

⁴ Tunaratu ishahua tunaja anidadiyaque jutidya. Jeeque epuna nrecadara taa tyatillahua tuja dutya aniyaque piji, tuja ai caquemiti ishü ejuuque, —jadya tujatu ecana acuare.

Jesús “Yusuja etaretu pana rihuishatana jubuque” jadya jucuareque

(Mt 24.1-2; Mr 13.1-2)

⁵ Umae cuanatu quisaraticuare:

—¡Dyaque jida piji taa Yusuja etare! ¡Tumu jida piji cuana tsehue taa ea! Ai jida piji cuana tsehue taa ebajeje ecuita cuanara Yusu tyahua tsehue, —jadya tuna jucuare Yusuja etare petatsu.

⁶ Tuna jadya juyaju bacatsutu Jesús jucuare:

—Juetibuquetu huecaca Yusuja etare, etsecueju dutya ai ea cuanaque pana rihuishatanatere jubuqueque. Anibuque amatu tumu ecadyaqueti. Dutya tumu etare enityatsuraquetu yahuaü tere jubuque, —jadyatu Jesús jucuare.

Terehuie adeba ishüque jubuqueque

(Mt 24.3-28; Mr 13.3-23)

⁷ Jesúsra mepehua cuanaratu bacaduracuare:

—Ecuana Bahuityaunque, cuejacue ecuana. ¿Eje tuputu jadya judadiya? ¿Aiju ecuana caadebatibuque yahua tereyaque huecaca japadamaque? —jadya tunajatu bacaduracuare.

⁸ —Nimequi tsehue nequihuaticue. Ijahue neca-timereume. Ique junanucahuie tuna jetiama junabuque iquepa ejuu jadya juya cuanaque. “Idya Mesías, Yusuja Emepeque”, jadya tuna jetiama jubuque. Peya cuanara bacue anabuque: “Amena tu piji dyane Cristo junanucayaque”. ¡Neejeneume! Tuna tsehue nejuneniume tunaja pusha pusha cabahuityati ishü.

⁹ Dutya quejadya jutidya tuna catibuque. Japadama tuque micuana ecana catiyaju bacabuque. “Peya yahuaü aniya cuanaque patuna cahuaitiya tunaja huaraji cuana tsehue”, jadya tuque micuana bacabuque. Jadya bacatsu “Masadamatu tere juetiya”, jadya micuanaja inime paju ama. Dutya tume cuanaquetu jadya jubuque icuene. Tere ishüque ama jari tume.

¹⁰ “Riyaque yahuaju cuanaque tuna peya yahuaju cuana tsehue catibuque. Anape cuanaquetu catibuque peya anae cuana tsehue. ¹¹ Bucucubuquetu yahua dutya queja muda. Eje uma epu cuanaju tuna dyaque mije jubuque. Ujeje cuanatu tsapetanabuque dutya queja. Barepajutu ejitaju jubuque ai muda cuanaque. Babuque tuque micuana jetiama micuana tere japadamaque adebamere ishuque.

¹² “Dutya riya cuanaque ejitaju juma jariju micuana ujeu baqui cuanara micuana nrecada abuque eaqueja ecatyati baatsu. Inabuque tunara micuana caradati ishuque etareju huaraji cuana queja duju ishu. Etare apuda cuanaju micuana ishatanabuque. Dujubuque tunara micuana ecuari cuanaja yacuaju, enaruqui cuanaja yacuaju, eaqueja ecatyati baatsu. ¹³ Tume tuque micuanaja emajaca anibuque ique eje buchique tuna cueja ishu. ¹⁴ Huaraji cuanaja yacuaju dujutanayaju jidama inime nebaume quicueneti ishu quisarati aishu. ¹⁵ Eradya micuana dyaque inimequi amerebuque quisarati ishu. Ni ejequetu micuana eje bucha aquique casada jubuque ama micuana ana tsurutsa ishu. ¹⁶ Micuanaja ata cuanara cuitadya Yusu adeba baecua cuanara micuana menajetyabuque micuana ujeu baqui cuana queja. Micuanaja tata cuanara, micuana tsehuequi cuanara, micuana japadama aniya cuanara, eadeba cuanara jadya micuana tsautyabuque micuana ujeu baqui cuana queja. Umae micuana iyetanabuque. ¹⁷ Dutya jujerira micuana ujeu babuque, eaqueja ecatyati baatsu. ¹⁸ Jadya ama bucha Yusura micuana narujacaya ama. Aputashabuque ama tujatu ni peadya etsaru micuanaja iyuca juque. ¹⁹ Eaqueja nimee ni micuana jujacaya ama, Yusura micuana tuaqueja dujubuque tuatsehue anisiri ishu, ni eje tupu tuque jaca ishu ama.

²⁰ “Sudaru jetiama cuanara Jerusalén epu ebari amena tabuhua baatsu, micuana caadebatibuque amena tillatanayaque. ²¹ Tumetu Judeaju cuanaque huanataqui emata cuanaju catehua juishu. Jerusalénju cuanaque tuna cuinanataqui tuhuaque. Teeju mere juya cuanaque tuna judirunucataqui ama epuju. Tuequedya tuna huanataqui. ²² Yusu adeba baecua cuanaque nrecatura ishuque huecacatu juetibuque; Yusura yana iyacuare eque cuitadyatu judadibuque. ²³ Dyaque nrecadatu jubuque epuna maqui cuanaque, bacua nanaqui cuanaque jadya. Tuna tuna eje bucha huanataqui ama ebajarara cabatibuque. Riyaque yahuaju aniyaquetu dyaque nrecada jubuque. Dyaque jidama, ni eje tupu jadya canerecatie juhua bucha ama, ni yahua ejitaju juhua equeque. Yusuratu dyaque canerecatishabuque tuque adeba baecua cuanaque. ²⁴ Eje

uma tuna catiyaque majubuque. Peya cuana tunajatu dujubuque risitsu japada peya yahuaju. Israelita ama cuanaratu pana tilla abuque Jerusalén epu ebari. Tunaratu israelita cuana nerecaturabuque Yusura huecaca iyahua tupu, israelita ama cuanara jidama adadiyaque tereya tupu, —jadya tujatu ecana acuare.

ECUITA junanucayaju eje bucha jubuqueque

(Mt 24.29-35, 42-44; Mr 13.24-37)

²⁵ Jesúsra tuna bahuityanucacuare:

—Anibuquetu ique masadama junanucayaque adeba ishucue. Cabapetibuquetu ijeti, badi, purari cuana jadya. Dutya ecuita cuanatu enime aputa, tadadaya jadya jubuque, bajida cuita juatsu. Enaja ecuaquetu sicacada jubuque. Ena pacu cuanatu netitsurabuque dyaque muda. ²⁶ Ecuita cuanatu manu, emaju bucha jadya jubuque bajida juatsu, yahua eje bucha juyaque adebatsu. Barepaju casada aniya cuanaque tuna piririterebuque. ²⁷ Tuequedya tunara IQUE ECUITA huani ducu junanucayaju batsabuque. Ecue dyaque casa tsehue junanucabuque. Cabameretibuque ique eje bucha muitaeque. ²⁸ Jadya juyaque catibutiya baatsu necacasaticue jutidya. Pureama tsehue, quihuati jadya jutidya nejucue. Bahuedya micuana jubuque masadama ique junanucayaque micuana inajacamere ishucue, —jadya tuna Jesúsra acuare.

²⁹ Turadya tuna jeeque cuejacuare bahuityayaque:

—Ita taa acui higuera bacani neadebacue, peya acui cuana jadya. ³⁰ Yaa cuana catapananatiyaju baatsu, micuana bahue amena nei mara catibutiyaque. ³¹ Tumebaedya micuana dutya riya cuanaque era cuejahua cuanaque juajeya baatsu, bahuedya micuana jubuque Yusura amena masadama dutya ecuita cuana narudadiyaque.

³² “Pusha amadya micuana cuejaya. Dutya riya cuanaquetu judadibuque iyacua ecuita cuana aniyaque majuma jarijudya. ³³ Arepa barepa, yahua jadya pana cuaretana jubuque ama bucha, dutya micuana era cuejahua cuanaquetu cuaretanatsu ama jadya judadibuque.

³⁴ “Necanaruticue. Daja iji iji, nijuqui jadya nejucue. Riyaque yahua juquedya jutidya inime tupuqui neaume. Tume cuanaquedya jutidya ni micuana inime tupuqui aya, tume micuana junanucayara muya jutidya aya, cuanubi trampa muya jutidya einau bucha. ³⁵ Dutya jujeri yahuaju aniya cuanaque muya jutidya tuna atanabuque ique junanucayaju, tunara ique ihuaya ama tibu. ³⁶ Nimequi tsehue neihuacue. Jadya bacabacae Yusu queja nejucue: ‘Ecuanaja Etata, tsahuacue ecuana, ecuanaja dutya idu ishucue miaqueja

nimee jujacama, bisuma ECUITAja yacuaju cabamereti ishu' jadya Yusu nebacacue, —jadya tuna Jesúsra acuare.

³⁷ Huecadaju tuna Jesúsra bahuityacuare Yusuja etareju epu ebariju. Chineju bacue cuinanacuare epu juque Olivo Acui Quiniju tahuidiru ishu. ³⁸ Dutya jujeri ecuitatu juti bahue jucuare apudajudya cuita Yusuja etareju tuque quisaratiyaju ijacabacara.

22

*Jesús ujeu baqui cuanara tuque inamere ishu inime bajeje-
cuareque*

(Mt 26.1-5, 14-16; Mr 14.1-2, 10-11; Jn 11.45-53)

¹ Japadama israelita cuanaja chine Pascua bacani jucuare, tunaja ebaba cuanaque Egipto juque cuinanacuareque adeba ishuque chine. Tumeque chine ishu tunajatu araaranicuare pan levaduramaque. ² Pae cuanaja huaraji cuanara, cacuatsashati bahuityaqui cuanara jadyatu inime tupucuare Jesús eje bucha iyemeree aishuque. Etehua inamere tunajatu acara acuare. “Ecuíta cuanatu ecuanara Jesús inamerecara ayaque bahue juatsu, ecahuaitiu ecuana tsehue”, jadya tunajatu inime jucuare.

³ Tumetu Judas Iscariote Satanásra netiquerecuare, Jesúsra mepehuaquedya datse. Inimetu tupumerecuare Jesús eje bucha inameree aishuque tuque ujeu baqui cuana queja.

⁴ Tumetu Judas cuacuare pae cuanaja huaraji cuana tsehue, Yusuja etareju mere juya cuanaja huaraji cuana tsehue jadya quisaratira. Cuejaticuare tujatu ecana eje bucha inameree Jesús aishuque. ⁵ Tura jadya quisarati ayaju bacatsu tuna pureama jucuare.

—Mira ecuana Jesús menajetyahuaju, mique ecuana chipiru tsehue tsujetyaya, —jadya tunajatu acuare.

⁶ Tuque bacue endya jucuare. Tumeque huecaca equequetu Judasra Jesús eje bucha inameree aishuque sarecuare. Etehua inamere tujatu acara acuare.

*Jesúsra Pascua earaqui tura mepehua cuana tsehue
arácuaque*

(Mt 26.17-25; Mr 14.12-21; Jn 13.21-30)

⁷ Jueticuaretu icueneque huecaca Pascua chine ishu, pan levaduramaque tunaja ara bahueque huecaca. Tumeque huecaca nucadya tunajatu iye bahue jucuare uhuisha jidaque Yusuja ishuque. ⁸ Jesusratu cuadishacuare Pedro, Juan jadya. Cuejacuare tujatu ecatsé:

—Nebajeticue ecuanaja riyaque chineju Pascua ishu ara ishuque, —jadya tujatu ecatsé acuare.

⁹ Tatsératu bacaduracuare:

—¿Ejumi bajejemerecara aya?

¹⁰ —Jerusalénju nebajejeticue. Tuhua junatitsu tuque metse tsuruya ecuita suraju ena duju juyaque. Tudyá netupuajecue. Tupujudyá aajetsu, ejeque etareju tuque nubidiruyaju baatsu tuhuadya nenubicue. ¹¹ Etare metseque jadya neaticue: “Ecuana Bahuityaquiramí bacaduramereya: ‘¿Eje dyanepa micue etareju emajaca tuque tura mepehua cuana tsehue Pascua ishú araara ishú?’ ” jadya nebacaduraticue. ¹² Metsera jadya ayaju tura metse bamereya tuja etareju emajaca aridaque beta ishúque pisoju. Tuhuadyatu aniya dutya ecuanara sareyaque. Tuhuadya nebajejecue ara ishúque, —jadya tatse Jesúsra acuare.

¹³ Jadya ahuaju tatse cuacuare. Junaticuare ecatsé epu ebariju. Junatihuajutu jucuaire dutya tatse Jesúsra cuejadadihua bae cuitadya. Bajenenaticuareadya tatse chineju ara ishúcuanaque.

¹⁴ Amena araara ishúque ura juetihuajutu Jesús, tura mepehua cuana tsehue anibutecuare mesaju.

¹⁵ —Camadya ishú rique aya riyaque chine riyaque yahuaju. Jadya tibudyá, eje buchadya araaracara ebari juya micuana tsehue, ique majuma jariquedyá. ¹⁶ Yusu tsehue enaruqui jupee juyaque huecaca piisi tuque riyaque chine anucabuque, jucha cuana tillataqui juishu iyetanatsu, uhuisha beru iyetana bahue junenicuare bucha iyetanae juatsu, —jadya tuna Jesúsra acuare.

¹⁷ Jadya juatsu tujatu canecu juque uva nacaca esananashaque inacuaire. Canecu inatsutu

—Yusurupai mique aya, Tata, —jadya Yusu acuare.

Yusurupai jadya aatsu tujatu ecana acuare:

—Neijicue jeeque. Riya piji riya piji necajaqueticue.

¹⁸ Riyaque micuana cuejaya. Riyaque yahuaju Pascua chine micuana tsehue anucaya ama; ijinucanime ama tuque ecue uva nacaca esananashaque. Jadya ama buchatu tumeque huecaca era Yusu tsehue narupée ayaque huecaca juetihuaaju piisi tuque ijibuque, —jadya tuna Jesúsra acuare.

Ecuana Cuatsashaquique majucuaireque adeba ishú araarataquique

(Mt 26.26-29; Mr 14.22-25; 1 Co 11.23-26)

¹⁹ Jadya juatsu tujatu inanucacuare pan. Pan inatsu tujatu

—Yusurupai mique aya, Tata, —jadya Yusu acuare.

Yusurupai jadya aatsu tujatu pan cuesicuare. Cuesitsu tujatu tuatsehue anibareya cuanaque tyabarecuare.

—Riyaque rique ecue ecuita, micuana jiteque maju ishú catyatiyaque. Micuana jadya araarae juyaque, neadebacue

ique micuana jiteque majuyaque, —jadya tujatu ecana acuare.

²⁰ Araara amena juatsutu Jesúsra canecu juque uva nacaca esasanashaque inanucacuare. Canecu inatsu tujatu acuare:

—Riyaque rique ecue ami, micuana jiteque quije-huetiyaque. Ique ecue ami quijehuetitsu majuhuajutu Yusura iyaya iyacuaque inime micuana tuaqueja judiru ishuque.

²¹ “Peya micuana cuejaya. Ique inamerequi juyaqueri rehuadya eatsehuedya mesaju. ²² IQUE ECUITA majuyadya. Iyeyadya tunara ique, Yusuja inime jadya juya tibu. ¡Dyaque nercadatu jubuque ique ujeu baqui cuana queja inamerequi juyaque! —jadya tuna Jesúsra acuare.

²³ Jadya ahuaju tuna cabacaduratibarecuare tuna cama:

—¿Ejeque ecuana jadya ejuu? ¿Aija ishu tujatu quisarati aya? —jadya tuna tuna cama jucuaque.

Dyaque inime metseque bucha cabatitaquique ama

²⁴ Tuequedya tuna caquemitsati caquemitsati jucuaque ejeque ecana dyaque inime metse juyaque. ²⁵ Tume tuna Jesúsra isaracuare:

—Yusu adeba baecua cuanajatu inime juya dyaque inime metse cuanaque camadya cacuatsashati ishuque bucha. Ecuari cuanajatu casada tsehue cuatsasha bahue tunaja epu cuanaju aniya cuanaque. Huaraji cuana tuna casada tsehue camuimereti bahue tunaja jetiedya cuana queja. ²⁶ Micuana micuana jadya jutaqui ama. Inime metse cuanaque tuna jetiedya cuanaque bucha cabatitaqui. Ecuatsashaqui cuanara tuna peya cuana mere, tsahuataqui. ²⁷ Riyaque yahuajutu dyaque inimequi cuanaque anibuteya araara ishu mesaju, tunaja jetiedya cuanara mereyaju. Amena ique micuana queja jecuaque ejeque jetiedyaque inimemaque bucha, micuana tsahua ishu, micuana queja ique cameremereti ishu ama.

²⁸ Micuana micuana eatsehue jujacahua ama ique dyaque canerecatiyaque huecaca. ²⁹ Jadya tibu micuana tyaya casa enaruqui juishu. Ecue Etatara ique enaruqui juishu casa tyahua bucha, tyaedya micuana era casa tyaya. ³⁰ Ecuari tuja eadeba cuana tsehue ejuu bucha araara, ijiji jadya, jadidya micuana eatsehue jubuque Yusuja yacuaju. Micuana micuana ique muitaya bucha muitaedy a jubuque, enaruqui cuanaja eaniquiju anibutehuaju. Micuanaratu narubuque peadya tunca beta earacana cuare cuanaque Israel eque ejuracana cuanaque.

Jesúsra Pedro “Adebaya ama tuque era” jadya juyaque cuejacuareque

(Mt 26.31-35; Mr 14.27-31; Jn 13.36-38)

³¹ Jadya quisarati amena aatsutu Ecuana Cuatsashaquira Simón Pedro isaracuare peya cuanaja ijacaju.

—Satanasratu Yusu queja bacacuare, mique eaqueja nimee amerejacacara aatsu, Simón. Trigo tsaque etsajeu bucha tuque. Trigo asicadaque cuinanasha, jida arataquique camadya ani jadya ishu etsajeu bucha. Jadidya tuque, mira canerecati idutsu, tume tuquemi dyaque jida Yusu emereu.

³² Ique mique jiteque bacabacahua, mique eaqueja nimee jujaca ishu ama. Yara tupu mira jacaya; tumemi eaquejadya juetinucaya. Eaqueja nimee junucatsu micue ecare cuana casaturacue eaqueja nimee juishu, —jadyatu Jesúsra acuare Simón.

³³ —Ecuemi jacanime ama, Ecuana Cuatsashaquique. Ique bajidama miatsehue apuda etareju nubi ishu, ni miatsehue majupee juishu jadya, —jadyatu Simónra acuare.

³⁴ —Cuejaya mique, Pedro. Rियाque meta, tacure quiquehuiemi catehuati quimisha juya. “Adebaya ama tuque era”, jadya aquimisha mira aya, —jadyatu Jesúsra Pedro acuare.

Nimequi tsehue nequihuaticue

³⁵ Jadya juatsu tuna Jesúsra bacaduracuare:

—Era micuana shurumaima, chipiruma, zapatuma jadya ecue quisarati cuejara cuadishaya patya ¿ai tuque micuanaja aijama jucuare?

—Aijama. Anicualedya tuque ecuanaja ecuanara ai sareya cuanaque, —jadya tuna caquemitsaticuare.

³⁶ —Iyacia bacue shurumai, chipiru jadya aniyaque juatsu, necadujuticue. Ejeja ni aijama quicueneti ishuque, catyati micuanaja neacue camisa, quicueneti ishuque quemis ishu. ³⁷ Duya Yusuja quisaratiju ehuenegue ique eje bucha judadiyaque jadidya pajudadi. Ehuenedya tuque: “Yusuja Emepeque ujeu baqui cuanaratu quiyeti puji bucha abuque”. Amena tu ejetsunue ama tunaja ique jadya aishuque, —jadya tujatu ecana acuare.

³⁸ —Jeedya rehua beta cuchiru ebari, Ecuana Cuatsashaquique, —jadya tuna jucuare.

—¡Tume tupu camadya! —jadya tujatu ecana acuare.

Jesús Etataque tsehue Getsemaníju quisaraticuareque

(Mt 26.36-46; Mr 14.32-42)

³⁹ Jadya juatsutu Jesús cuinanacuare epu ebari juque. Tuja bahuedyatu cuacuare uhua cuemusú Olivo Acuí Quini bacaniju. Tura mepehua cuanaratu cuayaju tajiticuare.

⁴⁰ Tuhua junatitsu tujatu ecana acuare:

—Nebacabacacue Yusu queja, micuana Satanásra ique jacamerecara ayaju micuanaja idu ishú, —jadya tuna Jesúsra acuare.

⁴¹ Tume tuna Jesúsra jacacuare, tumu casa tupu dyane emareu tupu japae. Tuna jacatsutu chichucata junaticuare. Chichucata juatsutu Yusu tsehue quisaraticuare:

⁴² —Tata, nerecada ique amerecarama ayaque juatsu, ebauc datse mique era, ique canerecati ishú ama. Riya ique nerecada jutaquique tu ai patseda buchique. Jadya ama bucha ecue biji eque ama paju. Micue biji eque paju, —jadyatu Jesúsra acuare tuja Etataque.

⁴³ Tuque jadya juyajutu cabamereticuare barepa juque Yusu tsahuaquique, tuque casatura ishú. ⁴⁴ Tuja dyaque canerecati tsehuetu bacabacacuare. Tuja ducuta dyaque canerecati tsehuetu jucuaré. Hueruru tujatu ami patataya bucha jucuaré yahuaju, tuque Yusu queja bacabacayaju.

⁴⁵ Yusu tsehue quisaratiyaque netitsuratsutu cuanucacuare tura mepehua cuana queja. Dyaque cuita peya inimeratu huenanashacuare. Baticuaretu ecana tahuijarabareyaju.

⁴⁶ —¿Eje bucha juatsu micuana tahuiya? Necabaticue. Netahuiume. Nebacabacacue Yusu queja, micuana Satanásra ique jacamerecara ayaju, micuanaja idu ishú, —jadya tujatu ecana acuare.

Jesús erisique dujutanacuareque

(Mt 26.47-56; Mr 14.43-50; Jn 18.2-11)

⁴⁷ Jesús quisaratiya jarijutu Judas junaticuare, tura mepehuaquedya datse. Tuque tupujudyatu junaticuare jetiama ecuita cuana. Junatitsutu Judasra Jesús jipenatitsu dyahuacuare. ⁴⁸ Jadya tura ayaju Jesúsra jadya acuare:

—Judas, ¿dyahuatsu mira menajetyaya, IQUE ECUITA ique ujeu baqui cuana queja? —jadya tujatu acuare.

⁴⁹ Jesúsra mepehua cuanaratu jadya juya bacatsu, bacaduracuare:

—¿Quicuenetiya ecuana ecuanaja cuchiru ebari tsehue, Ecuana Cuatsashaquique?

⁵⁰ Peadyaratu pae dyaque muidaque merequique ujeda acuare; jida equeque amaca eque ijaca tujatu pejucuaré.

⁵¹ Jadya ayajutu Jesúsra acuare:

—Jadya neaume. ¡Tume tupu camadya! —jadya tujatu acuare.

Jadya ahujutu Jesúsra jabacuare ijaca pejutanahuaque. Jabatsu tujatu ijaca chachanecuare. ⁵² Jadya juatsu tujatu isaracuare pae cuanaja huaraji cuana, Yusuja etareju mere juya cuana naruqui cuanaque, israelita cuanaja emuiba cuanaque jadya:

—Micuana micuana jehua cuchiru tsehue, acui tsehue jadya ique inara, chiri puji inara ejeu bucha. ⁵³ Anichinedya tuque micuanaja emajaca ejudya jutidya ique ina ishu cuchiruma, acuima. Dutya huecaca taa ique Yusuja etareju Yusuja quisarati bahuitya juchine. ¿Tume micuanara eje bucha juatsu inachine ama tuhua? Amena micuana Yusura emajaca tyahua ique ina ishu. Amenatu dyaque casadaque Ijahua, Yusu tsehue ecahuaitique, tuja biji eque juya, —jadya tujatu ecana acuare.

Pedrora “Adebaya ama tuque era” jadya acuareque

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jadya juatsu tunajatu inamerecuare Jesús. Inameretsu tunajatu Jesús dujuicare pae dyaque muidaja etareju. Tumetu Pedrora tunara Jesús dujuyaju japa tupuaje acuare. ⁵⁵ Etareju judirutsu tunajatu etsecueju etiqui ruquedirucuaré. Ruquetsu tuna etiqui bahui jucuaré. Pedro bacue tuhuadya tuna tsehuedya jucuaré. ⁵⁶ Etiqui jujuyara udayaju baatsutu tuhua mere juya epunara Pedro junetiya baatsu petatsu acuare:

—Riyaque ecuita ri Jesús tsehue junenihuaquedya, —jadyatu epunara acuare.

⁵⁷ —¡Aijama, mama! ¡Adebaya ama tuque era! —jadyatu Pedrora acuare.

⁵⁸ Yara tupu juatsutu peyara banucacuare.

—Mique taa mi Jesús tsehue junenihuaquedya, —jadya tujatu acuare.

—¡A, aijama! ¡Tuatsehue juneninime ama ique! ¡Adebaya ama tuque era! —jadyatu Pedrora acuare.

⁵⁹ Peadya ura tupu junucatsutu peyara jadya anucacuare:

—Yuneri cuitadya ri riyaque ecuita Jesús tsehue junenihuaquedya, Galilea juque nucadya tibu.

⁶⁰ —¡Aijama, tata! Eje buchique cuana taa mira jadya aya; ique taa baecua. ¡Adebaya ama tuque era! —jadyatu Pedrora acuare.

Tuque jadya quisaratiyaju cuitatu tacure quiquecuare. ⁶¹ Tumetu Ecuana Cuatsashaquira huareretsu Pedro petacuare. Jadya baatsutu Pedro huecatanacuare. Adebacuaretu Jesúsra cuejachineque: “Riyaque meta tacure quiquehuiemi catehuati quimisha juya. ‘Adebaya ama tuque era’ jadya aquimisha mira aya”. ⁶² Jadique adebatsutu Pedro cuinanatsu paa ebari jucuaré.

Jesús tuna ijillahuanacuareque

(Mt 26.67-68; Mr 14.65)

⁶³ Jesús naruqui cuanaratu Jesús ijillahuanacuare. Atuca penetsu tunajatu bahuapajacuare.

64 —Caadebaticue. ¿Aira taa mi bahuapajahua? —jadya tunajatu acuare.

65 Ijillahuanajacacuare ama tunaja tuque.

Jesús israelita cuanaja huaraji arida cuana ecasitati ducu dujutanacuareque

(Mt 26.59-66; Mr 14.55-64; Jn 18.19-24)

66 Amena huecakahuajutu casitaticuare israelita cuanaja emuiba cuanaque, pae cuanaja huaraji cuana, cacuatsashati bahuityaqui cuanaque jadya. Dujumerecuare tunajatu Jesús huaraji inime cuana bajejequi cuanaja yacuaju.

67 —¿Midyami Mesías, Yusuja Emepeque? Pusha pusha ecuana aume, —jadya tunajatu acuare.

Tura tuna quemitsacuare:

—Era ni micuana “Jejee” jadya aya, ejeneya ama micuanara ique. 68 Era ni micuana ebacadurau: “¿Ejeneya micuana ique Yusuja Emepeque?”, equemitsau ama micuanara ique.

69 Iyacia equé micuanara IQUE ECUITA baya Yusu Dutya Casa Tsehueja yacuaju, ecue casa ique cabameretiyaju, —jadya tuna tura acuare.

70 Jadya juyaju tunajatu dutyara bacaduracuare:

—¿Jutaquiju ni taa mi midya Yusuja Ebacuaque?

—Jejee, Yusuja Ebacuaquedya ique, micuanara ahua equedya, —jadya tuna Jesúsra acuare.

71 —Sareya ama tuque ecuana peyaja riyaque jidama juchineque cueja ishu. Ecuana cuitadyatu bachua tura quisarati jidamaque ayaju, —jadya tuna jucuaré.

23

Jesús Pilato queja dujutanacuareque

(Mt 27.1-2, 11-14; Mr 15.1-5; Jn 18.28-38)

1 Jadya juatsu tuna dutya huaraji cuana netitsuracuare, “Amena tuque ecuana dutya quisarati atillahua” jadya ishu. Dujumerecuare tunajatu Jesús Pilato queja. 2 Tuhua junatitsu tuna cuejatibunecuare Pilato, Jesús eje bucha ejuuque.

—Riyaque ecuitarari ecuanaja yahuaju aniya cuana queja muimerecarama aya Roma juque enaruqui. Tsujetyataqui amapa tuque ecuanaja ecuana naruquique. Tumbaedyatu Mesías, ecuanaja ecuari jadya catiya, —jadya tunajatu acuare Pilato.

3 Jadya juyajutu Pilatora bacaduracuare:

—¿Midyami israelita cuanaja ecuari?

—Jejee, mira aya equedya, —jadya tujatu acuare.

4 Jadya juatsutu Pilatora acuare pae cuanaja huaraji cuana, ecuita jetiamaque tuhua aniya cuanaque:

—Dadiya ama taa era ni eje buchique inime jidamaque riyaque ecuitaja.

⁵ Jadya bacatsutu Jesús ujeu baqui cuanara dyaque jebuda quique eque acuare:

—Dutya queja tujatu ecuita cuana sicacaturaya. Junenichinetu dutya Judea yahuaju, Galilea eque Jerusalén tupu jadya juyaque, —jadya tunajatu acuare.

Jesús Herodesja yacuaju dujutanacuareque

⁶ Jesús^{pa} dutya Galileaju junenichine jadya bacatsutu Pilatora bacaduracuare:

—¿Galilea juque ri riyaque ecuita?

⁷ Tunara bacue “Jejee, tuhuaquedya tume”, jadya ahuaju, tujatu dujumerecuare Herodes queja, Herodesradya Galileaju cuanaque narucuare tibu. Tuquetu bahuedya jucuare Herodes Jerusalénju jehuaque.

⁸ Jesús baatsutu Herodes dyaque pureama jucuare, beru tura bacara ebari acuareque baya tibu. Ecuita cuanara tuque eje bucha juyaque cuejayaju bacatsu, Herodesra tuja yatuca teshue bacara acuare Yusuja casa bamereyaque ayaque. Jadya tibutu Herodes tuja yacuaju Jesús dujutanahuaju pureama jucuare. ⁹ Dutya aidya jutidya tujatu bacaduracuare. Jesusratu quemitsacuare ama ni riya piji buchique. ¹⁰ Pae cuanaja huaraji cuana, cacuatsashati bahuityaqui cuanaque jadya tuna tuhua jucuare. Tunaratu Herodes eje buchapa Jesús equisaratiu, jadique pusha pusha cuejajacacuare ama. ¹¹ Tumetu Herodesra, sudaru cuana tuhua jucuare cuanara jadya ijillahuanacuare. Jutumerecuare tuna ejutuqui jidaque ecuarira jutuyaque, tuque ijariba ishu ijahue ayaquedya jutidya. Jadya aatsutu Herodesra cuadishanucacuare Pilato queja. ¹² Berutu Pilato, Herodes teshue ujeu cabaticuare. Herodesra Jesús Pilato queja cuadishahuaju tatse jida junucacuare.

Pilatora “Jesús pamajudya” jadya acuareque
(Mt 27.15-26; Mr 15.6-15; Jn 18.39–19.16)

¹³ Jadya juatsutu Pilatora sitacuare pae cuanaja huaraji cuana, israelita cuanaja huaraji cuana, ecuita cuana jadya.

¹⁴ —Micuanarari bemerenucahua riyaque ecuita eaqueja. Ecuita cuanapa rejari sicacaturaya. Micuanaja yacuajudya tuque bacadurahua. Arepa micuanara turapa cacuatsashati muibachine ama jadya aya ama bucha, era taa ri dadiya ama ni riya piji buchique ecajuchatique. ¹⁵ Herodesra tumbaedyada dadihua ama tuque jidama ejuuque. Herodesra tuque ecajuchatique adebahuaque juatsu, eje bucha cuadishanucacae jatsu tujatu aguena juhua rehua. Eje bucha iymereee jatsu rique eau. ¹⁶ Catsacatsa camadya tuque amereya.

Catsacatsa ameretsu tuque inajacaya, —jadya tujatu ecana acuare.

¹⁷ Tunaja bahuetu jucuare Pascua ishü peadya ecuita etare apudaju erisi netiyaque inajaca. Ecuita cuanara ejeque inajacamereyaque camadyatu Pilatora inajacamerenicuare.

¹⁸ Pilatora Jesús tuque inajacamereya jadya ayaju tuna dutya quiquetibunenuacuare:

—¡Pajuani! ¡Iyemerecue Jesús! ¡Barrabás inajacacue! ¡Jesús inajacamereume!

¹⁹ Barrabástu quiyeti puji, ecuita cuana queja huaraji cuana muimerecarama amerequique jadya jucuare. Jadya tibu tunajatu etare apudaju nityacuare. ²⁰ Pilatoratu inajacacara acuare Jesús. Jadidya tujatu ecuita cuana anucacuare datse:

—Inajacaya rique era, catsacatsa ameretsu.

²¹ Jadya bacatsu tuna quiqueterecuare jutidya:

—¡Curusuju tatamerecue! ¡Tuhua pamaju! ¡Curusuju tatamerecue!

²² Cueja quimisha ishü tuna Pilatora acuare:

—¿Eje bucha juatsu? ¿Ai tujatu jidama achine? Era taa dadiya ama eje bucha juatsu iyemere ishüque. Catsa catsa ameretsu painajacamere, —jadya tuna Pilatora acuare.

²³ Ecuita cuanatu dyaque jebuda quiquenuacuare Jesús iyemere ishü:

—¡Curusuju tatamerecue! ¡Curusuju tatamerecue!

Quiquejacacuare ama ecana. Dyaque quique quique juatsu tunajatu Pilato ejetanashacuare. ²⁴ Pilatoratu amena tunaja biji equedya acuare.

—Micuanara acara aya equedya paju, —jadyatu jucuare.

²⁵ Tumetu Pilatora sudaru cuana jadya acuare:

—Neinajacacue Barrabás quiyeti puji, ecuita cuana queja huaraji cuana muimerecarama amerequique. Jesús neiye-cue, israelita cuanara amerecara aya equedya, —jadya tuna Pilatora acuare.

Jesús curusuju tatatanacuareque

(Mt 27.32-44; Mr 15.21-32; Jn 19.17-27)

²⁶ Sudaru cuanaratu Jesús dujucuare tuhuaque iye ishü. Epu ebari juque cuinanayara tunajatu tsurutsacuare ecuita Cirene juque, Simón bacani. Eje queja japada juneniyaque tunajatu tsurutsatsu casada tsehue curusu mapamerecuare. Curusu mapa jadya aatsutu Simónra Jesús icuenenitya acuare.

²⁷ Jetiama ecuita cuanaratu tupujudyä acuare. Tuna tupu-jutu jetiama epuna cuana cuacuare Jesús jiteque peya inime, paya jadya juajeyaque. ²⁸ Tibene bajiyu aatsu tuna Jesúsra jadya acuare:

—Mama ecana Jerusalénju aniya cuanaque, ique riya nrecada juya baatsu camadya ama nepacue. Nepacue, micuana, micuanaja bacua cuana jadya canerecatidadiyaque adebatsu. ²⁹ Micuanaja epuju aniya cuanaque tuna dyaque nrecada judadibuque. Dyaque jidama nrecada juya cabatitsu tunajatu epuna bacuama cuanaque jadya abuque: “Micuana micuana dyaque inime tsapema, epuna cuana bacuaqui cuanaque bucha ama. Tuna tuna huenanaya tunaja ebacua cuanaque canerecatiya baatsu. Micuana micuana huenanataqui ama” jadya. ³⁰ Jerusalénju cuanaratu dyaque canerecatiya cabatitsu quiquebuque tumu ebari cuana emata cuana juque: “Ecuana dyaque nepacacacue ecuana iye ishu. Rihuitsu ecuana netyanacue”. ³¹ Cuati raramaque ni ecuana ruqueya, tume taa tuque ecuana yuneri cuitadya cuati eraraque ruqueya. Tumbaedy a ique, jucha metseque ama dyaque canerecatiya; yutsumadya micuana jucha metse cuanaque dyaquedy micuana canerecatibuque, —jadya tuna Jesúsra acuare.

³² Jesús tsehue dujupeedya tunajatu acuare beta quiyeti puji ecatse curusuju tata ishu. ³³ Jadya junatie tuna jucua uhua cuemusu “Emaju iyuca baeque” bacaniju. Tuhua junatitsu tunajatu Jesús curusuju tatacuare. Tumbaedy tunajatu quiyeti puji ecatse tatacuaredya, Jesúsja jida eque amaca, peya jani eque amaca jadya. ³⁴ Tunara curusuju tatayajutu Jesúsra:

—Tata, nrecabacue ecana. Apupashacue tunaja jucha. Baecua tuna eje bucha juyaque, —jadya acuare.

Curusuju amena tatatsutu sudaru cuana dadu ijahue jucua, Jesúsra jutuhua cuanaque ejeja ejeja juyaque tuna cama cajaquetibare ishu. ³⁵ Jetiamatu ecuita tuhua jucua capetatiyaque. Israelita cuanaja huaraji cuanaratu Jesús ijahue ijahuedya acuare:

—Peya cuana inajacamere ishupa tuja casa aniya. Iyacia tuque tuta taca paquinajamereti, yuneridya tuque Mesías, Yusuja Emepeque juatsu, —jadya tuna jucua.

³⁶ Sudaru cuanaratu ijahue ijahuedya acuare Jesús. Ijil-lahuanacuare tunaja tuque. Jipetitsu tunajatu iji ishu tyacara acuare uva nacaca patsedaque.

³⁷ —Yuneridya ni mi israelita cuanaja ecuari, quicue-neticue. Butecue curusu juque, —jadya tunajatu ijahue ayaque acuare.

³⁸ Shuracuare tunajatu curusuju Jesúsja iyuca dyaque ehuenecue. Huenecuare tunajatu quisarati griego cuanaja yana eque, Roma juque huaraji cuanaja yana eque, israelita

cuanaja yana eque jadya. “Riyaque ri israelita cuanaja ecuari” jadyatu ehue ne jucua.

³⁹ Peadya quiyeti puji tuhua curusuju etata badeyaratu ijillahuanacuare Jesús.

—Mique ni Mesías, Yusuja Emepeque, quinajacamereticue. Yatse dyadi inajacamerecuadya. Butyacue yatse curusu juque, —jadya tujatu acuare.

⁴⁰ Tura jadya ayaju bacatsutu peya quiyeti pujira nereda acuare:

—¿Miratu Yusu mubaya ama? Yatse yatse tuque bae neredada atahuaquedyá. Yatse yatse tumebae majue juyaquedyá. ⁴¹ Yatse yatse yunerijudyá neredada ataya, yatsedyá jucha metse tibu. Riyaque ecuita ri juchama, —jadya tujatu peya acuare.

⁴² Jadya peya aatsu tujatu Jesús jadya acuare:

—Mique enaruqui juatsu, micue canerecabati tsehue ique bacue, —jadya tujatu acuare.

⁴³ —Pusha amadya mique cuejaya. Iyacuadya yatse majuya. Eatsehuedyami Yusuja yacuaju judiruya, —jadyatu Jesúsra acuare.

Jesús curusuju majucuaque

(Mt 27.45-56; Mr 15.33-41; Jn 19.28-30)

⁴⁴⁻⁴⁵ Barepatyatu ijete apunaterecuare. Tumetu dutya yahuaju apuda jucua quimisha ura dyane, las tres chinequeja tupu. Yusuja etare juque junuda eshuraque Dyaque Muidaque penequiquetu patya chajatana jucua.

⁴⁶ Jesússtu majuyaque quiquecuare:

—Tata, amena taa majuya. Ecue yatananatu miaqueja judiruya, —jadya tujatu acuare tuja Etataque Yusu.

Jadya quisarati aatsutu Jesús amena ishú canajeti pidya juatsu majucua.

⁴⁷ Tuhadyatu jucua cien sudaru cuana cuat-sashaquique. Jesús eje bucha majue juhua baatsutu jadya jucua:

—¡Pusha ama cuitadya tucueri riyaque ecuita jucha metse ama juhua! —jadyatu Yusu pureama ayaque jucua.

⁴⁸ Jetiamatu ecuita cuana casitaticuare tuhua, jadya juyaque peta ishú. Jadya baatsu tuna dirunucacuare tunaja etare cuanaju. Tume diruyaquedyá tuna yacua camiritiajecuare, tuna peya inime juyaque cabamereti ishú.

⁴⁹ Jesúsja umada eadeba cuanaque, epuna cuana Galilea eque tuque tajibe juchine cuanaque jadya tuna neticuare japada, dutya eje bucha juyaque peta juyaque.

Jesús emajuque tumu cani epuruju ishatanacuareque

(Mt 27.57-61; Mr 15.42-47; Jn 19.38-42)

50-51 Anicuaretu ecuita José bacani epu Arimatea Judea yahua ju anicuareque. Huaraji dyaque jida, emuiquetu jucua. Tuquetu peya huaraji cuana tsehue ecadutyatiquedya jucua. Arepa israelita cuanaja huaraji juya ama buchatu tuja jadya ama inime jucua Jesús iyemerecara juhua cuana tsehue. Ejenecuare tujatu Jesús Yusuja enaruqui juishu ecuadishaque. ⁵² Tudyatu cuacuare Pilato queja. Junatitsu tujatu Pilato bacaticuare:

—¿Ebutyamereu ama mira Jesús curusuju emaju badeyaque? Paishati caniju, —jadya tujatu Pilato aticuare.

Pilatoratu acuare:

—Butyameretsu emajuque cani epuruju ishaticue.

⁵³ Tura jadya ayaju tujatu curusu juque butyamereticuare. Butyameretsu tujatu piruricuare sahuana tsehue. Ishaticuare tujatu tumu cani jadya ish u epuruju, tsumemaju. ⁵⁴ Jesús majucuareque huecacatu jucua israelita cuana canajara huecaca ish u cabajejeti huecacaju. Ejetsunue amatu canajara huecaca ish u que jucua ni ejeque mere juishuque ama. Jadya tibu tujatu aijama jucua emajaca emajuque pana bajeje aishu.

⁵⁵ Epuna cuana Jesús tajiage jucua cuanaque Galilea equeque cuanaratu Jesús emajuque ishatanayaju bacuare. Baticuare tuna eje bucha ish ae tuna emajuque ayaque. Petacuare tunajatu Jesús emajuque ishatanayaju. ⁵⁶ Jadya juatsu tuna dirunucacuare tuna junachineque etareju. Etareju judirunucatsu tunajatu bajejendirucua ijimeda cuanaque, esamaqui teditedi ish u cuanaque israelita cuanaja emaju cuanaque ish ama jariju tsume bahue jucua cuanaque. Tume cuanaque bajeje amena aatsutu epuna cuana canajaratibunecuare canajara huecacaju, tumeque huecaca ni ejeque buchique mere juishuque ama jucua tibu.

24

Jesús chacha netitsuranucacuareque

(Mt 28.1-10; Mr 16.1-8; Jn 20.1-10)

¹ Amena dumicu huecacaju, semanaju icueneque huecaca, apudajudya cuitatu epuna cuana cuahuecanucacuare Jesús emajuque tumu cani epuruju ishatanachineju, ijimedaque tunara bajejchineque duju juyaque. ² Junatiyara tunajatu banaticuare tumu ebari cani tsecue penequique peya queja amaca etecu. ³ Nubinaticuare ecan caniju. Nubitsu tuna banaticuare ama Jesús emajuque jarayaque. ⁴ Baecua tuna jucua eje bucha juhuaque. Ejecutana tuna jucua. Tume tunajatu bacuare beta ecuita jiuque ecatsé tuna peque netiyaju. Ejutuqui tiquida tsehue tatse ecajututi jucua.

⁵ Tuna bacue dyaque bajida cuita jucuaire. Yahua queja huipuchitana ecana jucuaire bajida juatsu. Tumeque ecuita ecatsera tuna acuare:

—¿Eje bucha juatsu tuque micuana emajuque cani ducu sareya chacha juneniyaque? ⁶ Rehua ama rique. Chachatu netitsuranucagua. Neadebacuedya eje bucha tura micuana Galileaju jariju cuejahuque: ⁷ “IQUE ECUITA Apa ecuita jucha arida cuana queja catyati atanaya. Curusuju tatatsu tunara iyeya. Netitsuranucaya quimisha huecaca juatsu”, jadya tura micuana cuejachine, —jadya tuna ecuita ecatsera acuare.

⁸ Jadya ayaju tunajatu adebacuare Jesúsra quisarati achineque. ⁹ Jadique adebatsu tuna Jerusalénju dirunucacuare tumu cani juque cuinanatsu. Judirutsu tunajatu cuejadirucuaire dutya tunara eje bucha batihua cuanaque Jesúsra mepehua cuanaque, peya ecuita cuana jadya. ¹⁰ Ryaque cuatsabiji ecuadisha cuanaque cuejaquique epuna cuanatu jucuaire: María, Magdala epu juque; Juana; María, Santiagoja ecuaque; peya epuna cuana Jesús tajiQui juchine cuanaque jadya. ¹¹ Ecuadisha cuanaratu ejenetaqui ama bacuare epuna cuanara cuejayaju. “Ryaque epuna cuana rena ejecutana jutidya. ¡Eje bucha jue ni tu tunara cuejaya bae juma!”, jadya tunajatu inime jucuaire.

¹² Jadya ama buchatu Pedro netitsuratsu tsajaja aje-cuare caniju, yuneri, yuneri ama jadique bahue jucara juatsu. Tuhua junatitsutu remenaticuare educuju peta ishu. Bacuare ama tujatu emajuque, sahuana cuana camadya. Eanajacataquetu dirucuaire etareju, eje bucha tumeque juhuaque baatsu.

Emaús dijiju Jesús cabamereticuareque
(Mr 16.12-13)

¹³ Tumeque huecaca nucadyatu Jesúsja emepeque ecatsé cuacuare Emaús bacani epuju. Tumeque eputu jucuaire peadya tunca peadya earacana kilómetro dyane Jerusalén eque. ¹⁴ Cuayaquedya jutidya tatse cuatsabiji juajecuare eje bucha juhua cuanaque. ¹⁵ Tuque eje bucha juchineque adebatsu cabacaduratiayaju tatse, Jesúsra cuitadya jipeajecuare. Adaditsutu tatse tshuedya cuacuare. ¹⁶ Adeba piisi ama tatsejatu acuare, tunara babanicuare bucha ama cabamereticuare tibu.

¹⁷ Tume tatse Jesúsra bacaduracuare:

—¿Ai metse cabacaduratiayeya? ¿Eje bucha juatsu metse peya inime cuita baya? —jadya tujatu ecatsé acuare.

¹⁸ Cleofas bacaniratu quemitsacuare:

—¿Baecua jatsumi Jerusalénju eje bucha inime juchineque? Dutya taa tuna riya cuita juchineque bahue. ¿Mique peadya camadya ni mi baecua riyaque quisarati?

19 —¿Aitu eje bucha juchine? —jadya tatse Jesúsra acuare.

—Jesús Nazaretju anichineque juchineque mique jadya aya. Tuquetu Yusu equeque quisarati cuejaquique juchine. Turatu anenichine jetiama ai ni ejeque ecuitaja ataquique ama, Yusuja peadya ataquique. Yusuja quisarati tujatu cuejacuejanichine. Tura ayaque baatsu, bacatsu jadya tuna dutya jujerira adebachine jida tuyuque ecuita. Anenichine tujatu Yusuja biji eque camadya. ²⁰ Pae cuanaja huaraji cuanara, ecuana naruqui cuanara jadyatu tuque ujeu bacuare. Inamerechine tunaja tuque. Inameretsu tunajatu iyemerechine. Sudaru cuana queja tuna curusuju tatamerechine. ²¹ Ecuanajatu inime juchine tuque Mesiasra cuana ecuana israelita cuana ijahue ijahue atayaque cuinanasha ishuque bucha datse. Amenatu quimisha huecaca tuque iyetanachineque. Ecuana bacue aninucachine jucuare baedya jutidya.

²² “Eje bucha tuputillataqui ama ecuana inime baya. Riyaque apudajudya huecacama jarijutu cuahua umae epuna cuana caniju Jesús emajuque bajejera. ²³ Aijama tuna emajuque batihua. Aijama baatsu tuna ecuana queja judiruhua. Cuejahua tunara ecuana eje bucha batihuaque. Cuejatihua tunara ecuana: ‘Ecuita jiuque patu bahua, Yusu tsahuaquique ecitse. Cuejahua tatsera ecuana: “Jesús pa chacha” jadya’. ²⁴ Ecuanaja eadebaque ecitse cuahua emajuque ishatanachineque petara. Jesús emajuque tatsejatu bahua ama, —jadya tatsejatu Jesús cuejaajecuare.

²⁵ Tatsera cuatsabiji ayaque bacatsu tatse Jesúsra acuare:

—¡Metsejatu cuejayaju jaraya ama cuitadya! Metsera Yusu equeque cuitadya quisarati cuejaqui cuanara cuejahuaque pana adeba ahuaque juatsu taa metse bahue ejuu jadya judaditaquique. ²⁶ ¿Canerecati, maju jadya ishuque ama jatsutu Mesías juchine, Yusuja yacuaju muitama jarijudya? —jadya tujatu ecitse acuare.

²⁷ Cuejatibunecuare tujatu ecitse dutya tuque eque huentanacuareque Yusuja quisaratiju. Moisésra hueneacuare eque tujatu ecitse cuejatibunecuare. Cuejaajecualetu Yusu equeque quisarati cuejaqui cuanara hueneacuare cuanaque. Jadya tsehue tujatu ecitse adebamerecuare yuneri cuitadya Yusura eje bucha judadiya jadya acuare eque cuitadya judadichineque.

²⁸ Tuna cuayaque epuju junatitsutu Jesús cuaya j Judyá ju-
tidya jucuare. ²⁹ Tatse tatse canerecaticuare tuhuadya tuque
tatse tsehuedya junatishacara aatsu.

—Rehuadya anicue yatse tshue. Amenari chinehua.
Apunayari amena, —jadya tatsejatu acuare.

Jadya juatsutu Jesús nubidirucuaire tatse tshue. ³⁰ Mesaju
tuna anibutecuare araara ishu. Ara ishu tujatu pan inacuaire.
Pan inatsutu Jesúsra Yusu acuare:

—Yusurupai mique aya, Tata, mira ecuana jeeque earaqui
tyahua tibu.

Yusurupai jadya aatsu tujatu ecatse tyacuare cuesitsu, cues-
itsu. ³¹ Jesúsra pan cuesitsu tyayaju tatse chamacama Yusura
adebamerecuare tuque Jesúsque. Jadya juatsutu aputacuare
tatse tshueque.

³² Cacuejaticuare tatse:

—Pusha ama cuitadya yatse jida cabatihua. Anajacata
ishu tuque yatse ahua, tura Yusuja quisarati pana cueja
abeabeyaju, —jadya tatse cacuejaticuare.

³³ Jadya juatsu tatse mesa juque yume netitsura ju-
atsu dirunucacuare Jerusalénju. Judirunucatsu tatse yume
barediru cuitadya jucuare peya cuana peadya tunca peadya
earacana Jesúsra mepehua cuana queja, tumbaedyá peya
cuana Jesús queja catyatihua cuana queja. ³⁴ Tatse tuhua
nubidiruhaju tatse tuhua jucuare cuanara jadya atsacuare:

—Pusha amadyatu Ecuana Cuatsashaquique netitsuranuc-
ahua. Chacha tuque. Pedro quejatu cabameretihua, —jadya
tunajatu ecatse atsacuare.

³⁵ Jadya atsayajudyá tatsejatu cuejacuare tatse Emaúsju
cuayaque eje bucha juhuaque. Jadya tatse cacuejaticuare:

—Jesúsra pan cuesiya baatsu tuque yatse chamacama ade-
bahua.

Jesús tura mepehua cuana queja cabamereticuareque
(Mt 28.16-20; Mr 16.14-18; Jn 20.19-23)

³⁶ Tuna quisaratiya jarijutu Jesús cuitadya cabameretic-
uare tuhua tuna queja.

—Netsapeume inime, —jadya tujatu ecana acuare is-
arayaque.

³⁷ Tuna bacue dyaque ejecutana cuita, bajida jadya ju-
cuare. Yatanana cuana baya bucha tunajatu inime tupu-
cuare.

³⁸ —¿Eje bucha juatsu micuana dyaque cuita ejecutana?
¿Eje bucha juatsu micuanara ique ama bucha baya? ¿Eje
buchá juatsu micuana cabacaduratiya “¿Airi riyaque?”, ique
ejuuque adebaya ama bucha. ³⁹ Nepetacue ecue eme-
tucu, ecue ehuaquí jadya. Idya cuitadya ique. Nejabacue.

Nepetacue ique. Yatananajatu aijama erami ni etsau micuanara ecue baya bucha, —jadya tuna Jesúsra acuare.

⁴⁰ Jadya cuejatsu tujatu ecana bamerecuare emetucu, ehuchi jadya. ⁴¹ Jadya bacatsu tuna anajacatacuare. Pureama ecana jucuaré. Pana cueyane ama jari tunajatu acuare tuque Jesúsque. Pana caadebamereti juishu tujatu ecana jadya acuare:

—¿Aniya micuanaja rehua ai ara ishunque? —jadya tujatu ecana bacaduracuare.

⁴² Jadya juyaju tunajatu tyacuare peadya cuesi jae ecuahuique, huaja jadya. ⁴³ Tyayaju tujatu inatsacuare. Inatsu tujatu aracuare. ⁴⁴ Jadya juatsu tujatu ecana acuare:

—Ique iyetama jariju, ique micuana tsehue jariju, micuana cuejachine: “Yusura tuja quisaratiju cuejacuare bae cuitadya ique judadiya, Moisés eque, Yusu equeque quisarati cuejaqui cuana eque, Salmos cuana huenequi jucuaré cuana eque jadya”. Riya cuita eje bucha juchine cuanaquetu dutya era micuana jadyatu judadiya jadya achine equedya juchine, —jadya tuna Jesúsra acuare.

⁴⁵ Jadya juatsu tujatu ecana huecashacuare Yusuja quisarati ehuenéque.

⁴⁶ —Riyaquedya tu Yusura jadyatu judadiya jadya acuareque. Riyaquedya tu jadya ehuenéque: “Mesías tu canerecati, maju jadya ishunque. Quimisha huecaca emajuquetu chacha netitsuranucabuque. ⁴⁷ Mesiasja ebacaniju tuna cuabuque dutya queja quisarati cuejara. ‘Mesías queja catyatitsu necacuareticue inime, Yusura micuanaja jucha cuana tilla ishú’ jadya tuna cuejamerebuque. Cuejatibunebuque tunajatu Jerusalén eque. Tuequedya tuna dutya queja cuadishabuque”. Riyaquedya tu Yusura jadyatu judadiya jadya acuareque.

⁴⁸ “Micuanaratu bahuadya ique eje bucha juhuaque. Jutaquiju peya cuana necuejacue dutya micuanara bachineque, bacachineque jadya. ⁴⁹ Eratu cuadishaya micuana queja Ecue Etatara micuanaja cuadisha ana ahuaque. Neanicue jari rehuardya Jerusalénju ebarucueque Micuana Casaturaquique juetiya tupu, —jadya tujatu ecana acuare.

Jesús barepaju tsuracuareque
(Mr 16.19-20; Hch 1.6-11)

⁵⁰ Jadya juatsu tuna Jesúsra dujucuaré epu ebari juque, peya queja amaca Betania piji dyane. Emetucu tujatu tuna dyaque huesacuare. Jadya aatsu tujatu ecana acuare:

—Yusuja casa micuana tsehue paju. Yusura necasaturacue.

⁵¹ Jadya quisarati aatsutu dirucuaire tuna quejaque. Barepajutu dujutanacuare. ⁵² Barepaju cuaya baatsu tunajatu pureama acuare:

—¡Dyaque jida taa Jesús! ¡Dyaque casada, emui jadya taa tuque!

Tuque pureama au amena aatsu tuna dirunucacuare Jerusalénju tunaja pureama tsehue. ⁵³ Dutya huecaca ecana Yusuja etareju tuque pureama ajacama jucuare. Jadyatu jucuare.

Riya tupu camadya.

Lucas

JIDAQUE QUISARATI JUANRA HUENECUAREQUE JUAN

Riyaque quirica ri Juan Jesúsra mepecuarera huenequaque. Juantu Jesúsja dyaque iyuhuedaque jucuare. Jesús queja nimee neritu jucuare.

Juanratu 'Jesús YUSUJA EBACUAQUE' jadya acuare, Yusu neri jadya. Turatu huenequare, Jesússtu hueca buchique, Yusu adebamerequique juhua tibu. Huenequaretu, Jesús tu ECUANA ANISIRISHAQUIQUE jadya. Eje uma cueja tuna Juanra acuare Jesús queja nimee juhuaju tuque ecuanaja Yusura jucha cuana apupashaya, ecuanaja majunuca baecua ani ishuhua jadya. Juanratu cuejacuare Jesúsra ecuitaja ataquique ama acuareque, bahuityacuareque jadya, Jesús Yusu tsehue beta tupuque adebamere ishuhua.

Riyaque quiricarari cuejaya:

Jesús Nicodemo tsehue chineju quisaraticuareque (capítulo 3)

Jesús Samaria juque epuna tsehue quisaraticuareque (cap. 4)

Jesúsra tura mepehua cuanaque tyaana acuareque (cap. 14-16)

Jesús Etataque tsehue quisaraticuareque (cap. 17)

Riyaque quiricarari cuejaya Jesús riyaque yahuaju cuana tsehue beta tupu jadya caticuareque:

“Ique earaqui neri buchique Yusuja ecuadishaque” (6.35)

“Ique hueca buchique” (8.12)

“Idya Yusu queja enubicuare” (10.9)

“Ique uhuisha metseque uhuisha cuana jida canarutiyaque buchique” (10.11)

“Idya emaju cuanaque nityatsuraquique” (11.25)

“Idya Yusu Etata queja judiru ishuhua. Idya yunerique adebamerequique. Idya eanisirishaquique” (14.6)

“Ique uva cunu buchique” (15.5)

Jesús tu YUSU ADEBAMEREQUIQUE

¹ Yuequedya, yahua iyama jarijutu Jesucristo anicuaredya amena. Tuquetu QUISARATI jucuare, YUSU ADEBAMEREQUIQUE jadique. Tuquetu Yusu tsehuedya anicuare. YUSU EJE BUCHIQUE ADEBAMEREQUIQUE tu jucuare. Yusu cuitadyatu jucuare. ² Yahua iyama jarijutu tuque Yusu tsehuedya anicuare. ³ Betaradya tatsejatu Yusu tsehue dutya aniyaque iyacuare. Tura ni iyaquena ama

juquena juhua dutya aniyaque, ni ai buchiquetu eaniu ama.
⁴ Ryaque YUSU EJE BUCHIQUE ADEBAMEREQUIQUE tu ecuita cuana iyacua ani tyaquique. Tura ecuana bamereya Yusu queja eje bucha judirue juishuque, ude tsehue udatsu ediji ebamereu bucha. ⁵ Turatu Yusu adebamereya tuque adeba baecua juhua cuanaque, apuda ducu huecadaque ejuu bucha. Tuatsehue cahuitiya cuanaratu casa secataqui ama baya, apuda ducu juneniya bucha cuanara.

⁶ Yusuja quisarati Jesúsja cuejatibunema jarijutu anicuare Yusuja peya ecuadishaque. Tumequetu Juan bacani jucuare. ⁷ Tuquetu icueneta junacuare Jesús eje buchique cueja ishu, dutyaja tunaja Jesús queja nimee juishuque emajaca ani ishu. Cudatitsu eju cuayaque adebataqui ejuu bucha, jadiya tu Jesús eque Yusu queja judiru ishuque adebataqui. ⁸ Juan amatu EUDAQUIQUE jucuare. Tuquetu junacuare tumeque EUDAQUIQUE eje buchique cuejara cuita camadya. ⁹ Juan tuque eje buchique cuejaya tuputu Jesús yuneri cuita EUDAQUIQUE caadebameretihuie jucuare. Tuquetu amena dutya ryaque yahuaju cuanaque Yusu adebamerehuie jucuare.

¹⁰ YUSU ADEBAMEREQUIQUE, QUISARATIdyatu ryaque yahuaju junacuare. Rehuadyatu aninacuare. Arepa turadya yahua iyahua ama bucha, yahuaju dutya ai aniyaque iyahua ama bucha, dutyara jujeri tunajatu jida ama batsacuare. ¹¹ Tuja yahuajudyatu junacuare, tuja ata israelita cuana aniyaju. Jadya ama bucha tuna dutya jujeri tuaqueja catyaticarama jucuare. ¹² Peya cuanara bacue jida tsehue batsacuare. Tunadya tuna tuaqueja catyaticuare. Tunadya tujatu ecana Yusu jabacua ameredadihua. ¹³ Tuja ebacuaque tura ecuana amerehua, ecuanaja etatara ecuana susuqui tsehue baatsu bucha ama, aiju cabijiserititsuque ama. Yusura cuitadya ecuana tuja ebacuaque amerehua. ¹⁴ Jesucristo YUSU ADEBAMEREQUIQUE tu ecuita jucuare. Ryaque yahuajutu ecuana ducu aninacuare. Arepa ecuana jucha arida ama bucha tura ecuana dyaque iyuhueda bahua. Tura ecuana Yusuja quisarati neri cuejahua. Ecuana tujatu jidaque bacuare, casa tuja aniyaque, tuque Yusuja Ebacuaque peadyaque juya tibu. ¹⁵ Juan Ecuita Cuana Utsaquiratu jetiama ecuita cuejacuare Jesúsja quisarati. Jesús tuaqueja junahuaju tujatu acuare:

—Jeequedya micuana era jeya jadya cuejachineque. Ique ejitaju juma jarijutu tuque anicuareadya, arepa ique tuja icueneque paju ama bucha. Jadya tibudyatu tuque dyaque emuique, ique bucha ama, —jadya tujatu ecana acuare.

¹⁶ Jesúsra ecuana dyaque iyuhueda bajacaya ama, arepa ecuana cajuchatiya ama bucha. Baajeyadya jutidya tura

ecuana jida tsehue, tura ecuana dyaque iyuhueda baya tibu. ¹⁷ Moisés equetu Yusura ecuanaja baba cuana tuja cacuat-sashati cuana adebamerehua eje bucha anie juishuque. Jesucristo eque bacue ecuana Yusura bamerehua tura ecuana dyaque iyuhueda bayaque, arepa ecuana cajuchatiya ama bucha. Tuque equedya ecuana Yusura adebamerehua tuja quisarati yunerique. ¹⁸ Ni ejejadya jutidya tu Yusu eba. Jadya ama bucha tu peadyaque Ebacuaqueja camadya eba. Tuquetu Yusu tsehueque camadya. Tuquetu Yusu Etataque cuitadya. Tura cuitadya ecuana Yusu eje buchique bamereya.

Juan Ecuita Cuana Utsaquira Jesús eje buchique cuejacuareque

(Mt 3.11-12; Mr 1.7-8; Lc 3.15-17)

¹⁹ Israelita cuanaja huaraji cuanatu bahue jucara jucuar Juan aique. Jadya tibudya tunajatu Jerusalén equeque cuadishacuare tuatsehue quisarati ishu. Cuadishacuare tunajatu umae pae cuana, pae cuana tsahuaqui cuanaque levita bacani cuana jadya.

—¿Ai mique? ¿Midyami Mesías Yusuja Emepeque? —jadya tunajatu bacaduramerecuare.

²⁰ Junatitsu tunajatu bacaduranaticuare. Juantu tuta tacadya jutidya tuque eje buchique cacuejaticuare:

—Ique Mesías ama, —jadya tujatu ecana acuare.

²¹ Tume tunajatu yudijidya bacadura anucacuare:

—¿Midyami Elías, Yusu equeque quisarati cuejaquique? — jadya tunajatu acuare.

—Aama, ique Elías ama.

Yudijidya tuna bacaduranucacuare:

—¿Midya ni taa mi Yusu equeque quisarati cuejaquique ecuanara ihuayaque? —jadya tunajatu acuare.

Tura tuna quemitsacuare:

—A, aijama. Ique ama micuanara ihuayaque, —jadya tujatu ecana acuare.

²² Tudy a tunajatu anucacuare:

—¿Ai jatsu mique? Cuejacue ecuana, ecuana cuadishaqui cuanaque ecuanaja cuejadiru ishu. ¿Mique aique? ¿Ai juyaque? jadique?

²³ Tudy a tuna Juanra quemitsacuare:

—Ique tsecada eje uma piji anitaya cuana queja quisarati cueja juyaque. “Nequihaaticue Ecuana Cuatsashaquique junayaju ishu. Jida tuyu nejucue, ediji benubenuque etuyune ejuu bucha,” jadya tuna cuejaya, Isaiasra cuejacuare baedya, —jadya tuna Juanra cuejacuare.

²⁴ Fariseo cuanara cuadishaya cuanaratu anucacuare.
²⁵ Bacaduracuare tunaja tuque:

—¿Eje bucha juatsu jatsu tuquemi ecuita cuana utsaya, ai mi Mesías, ni Elías ni Yusu equeque quisarati cuejaquique ecuanara ihuayaque batu di taa? —jadya tunajatu Juan acuare.

²⁶ Jadya bacatsu tuna Juanra acuare:

—Era tuna ena tsehue camadya utsaya, inime cacuareti-hua jadique adebataqui juishu. Peya bacue aniya micuana ducu rehua. Ique buchique ama dyaque inime metseque. Tumequetu micuanara adebaya ama. ²⁷ Tsunutaya amatu riyaque yahuaju mere catibuti ishu. Tuque baatsu ique ni aishuquedya jutidya; mere puji tuja patrón tsehue beta tupu ama ejuu bucha jutidya ique, —jadya tujatu ecana acuare.

²⁸ Riyaquetu epu Betania bacaniju jadya jucuare, Jordán cueri yueque macare. Tuhua tujatu inime cacuaretiya cuanaque utsautsanicuare.

Jesús UHUISHA BUCHA IYETAE ATACUAREQUE

²⁹ Jadya juu jadya junucatsutu Juanra bacuare Jesús tu-aqueja jutiyaju. Tuque batsatsutu Juanra acuare tuhua ju-
 cuare cuanaque:

—Nepetacue. Jeequedya ri UHUISHA BUCHA IYETAE ATADADIYAQUE. Yusuja Ecuadishaque riya, ecuanaja jucha cuana apupasha ishuque. ³⁰ Jeequedya tuque quisarati achine peya huecaca ique jadya juya patya: “Tsunutaya ama tu riyaque yahuaju peya dyaque inime metseque mere cati-butiyaque. Tuquetu dyaque inime metseque, ique buchique ama. Ique ejitaju juma jarijutu tuque anihua”. ³¹ Icuene ique baecua juchine Jesús Mesiasque. Jadya ama buchatu era ecue ata israelita cuana Mesías queja catyatishacara achine. Jadya tibudya tuque utsachine inime cacuaretiya cuanaque, —jadya ecuana Juanra acuare:

³² Juanra ecuana cuejanucacuare tura tuja yatuca eque bahuaque:

—Huei jiuque tuque Yusuja Espíritu barepa juque buteyaju bachine. Jesús dyaquetu butechine. Jadya baatsu tuque ecue chamacama inime jutichine Jesús Mesiasque. ³³ Jadya bama jariju ique baecua juchine Jesús aique. Yusura icuenetadya cuejacuare: “Ecue Espíritu tuquemi ecue Emepe dyaque eje tupu buteyaju badadiya. Tuque dyaque tuque ecue Espíritu anibuteya. Iyacua mique cuadishaya ecuita cuana ena tsehue utsara. Mira tuna utsaya inime cacuaretihuaque adebataqui juishu; jadidya tuque tyadadiya ecue Espíritu, ecuique jadya adebataqui juishu”, jadya ique Yusura cue-
 jacuare icuenetadya. ³⁴ Yusura cuejacuare bae cuitadya

tuque bachine. Yuneri cuitadya micuana cuejaya Jesús Yusuja Ebacuaqueque, —jadya ecuana Juanra acuare.

Jesúsra tuatsehue juneni ishü mepecuare cuanaque

³⁵ Huecacanucatsutu Juan tuhua junucacuare yatse tsehue.

³⁶ Bacuare tujatu Jesús cuetiyaju. Petadaditsu yatse Juanra jadya acuare:

—Nepetacue. ¡Tumequedya tu UHUISHA BUCHA IYETAE ATADADIYAQUE! —jadya tura yatse acuare.

³⁷ Jadique quisarati bacatsu yatse Jesús tsehue junenitibunecuaire Juan jacatsu. ³⁸ Jesústu etibene queja cabajiyuti jucuare. Cabajiyutitsu tura yatse batsacuare tuque tupuju cuayaju.

—¿Ai tuque metse sareya? —jadya tura yatse atsacuare.

Yatseratu quemitsacuare:

—Ebahuityaquique, ¿ejumi aniya?

³⁹ —Nejecue. Necuara eju ique junachineju, —jadya tura yatse acuare.

Jadya ahujaju yatse tuatsehuedya cuacuare. Las cuatro chinequeja ecuana junaticuare tuque juticuareque etareju. Tuhuadya ecuana tumeque etareju tuatsehue anichinepecuare.

⁴⁰ Andrés tsehue yatse jucuare, Simón Pedro tsehuequi tsehue. Icuene yatse Juan tsehue junenicuare. Tuequedya yatse Jesús tsehue junenitibunecuaire, tura bahuityayaque cabahuityati ishü. ⁴¹ Jesús tsehue quisaratitsutu Andrés masadama cuacuare tuatsehuequi Simón sarera. Banatitsu tujatu anaticuare:

—Mesías tuque yatse bahua, —jadya tujatu anaticuare.

(“Cristo” jadémie tu Mesías.)

⁴² Andresratu Simón dujucuare Jesús queja. Tudyatu Jesúsra batsatsu jadya atsacuare:

—Miquemi Simón bacani, Jonás bacaniya ebacuaque. Iy-acua tuque micue peya ebacani iyaya. Cefas bacani mi juya, —jadya tujatu Simón acuare.

(Cefas tu “Pedro” jadémie griego yanaju, “Tumu Ebari” jadémie.)

Jesúsra Felipe, Natanael jadya tuatsehue juneni ishü ihuaracuareque

⁴³ Huecacanucatsutu Jesús jucuare:

—Cuaya Galileaju —jadya.

Tuhua cuayara tujatu tsurutsacuare ecuita Felipe bacani. Tuque tsurutsatsu tujatu

—Jecue. Eatsehue junenicue, —jadya atsacuare.

⁴⁴ Felipetu anicuare epu ebari Betsaida bacaniyu, Andrés, Pedro ecitse aniyaju.

45 —Jejee, juneniyadya miatsehue.

Jadya juatsutu Felipe cuacuare Natanael sarera.

—Tsuruhua tuque yatse Mesías Yusuja Emepeque. Bérutu Moisésra huenequare Yusura cuadishadadiyaque jadya ayaque. Tumebaedyatu Yusu equeque quisarati cuejaqui cuanara huenequare tuque jadya ayaque. Iyacu ecua bahue tuque aique. Jesús tume; Joséja ebacuaque, Nazaret juque jeya que tume, —jadyatu acuare Natanael Felipera.

46 Natanaelratu acuare:

—¡Eje bucha jadya jue tu ejuu! Aijama tu ai jidaque Nazaret juque. Miquemi cuji cuita eju, —jadya tujatu acuare:

—Necua. Baticue, —jadyatu Felipera acuare.

47 Jesusratu batsacuare Natanael tuaqueja cuayaju. Batsatsu tura ecua acuare:

—Riya junaya que ri yuneri Israel eque ejuracana que neri. Tuquetu ecuita tuyuque. Tujatu ni ejeque buchique jahue abaecua, —jadya tura ecua acuare.

48 Natanael tu cabacatiajecuare jadya ayaju. Cabacatitsu tujatu Jesús isaracuare:

—Bandía. Bama taa micue ique. ¿Eje bucha adebae aatsumi ique eba bucha cuita quisaratiya? —jadya tujatu Jesús acuare.

—Yusuja casa eque mique icuenedya bahua ique bana ishú mique Felipeja ihuarama jarijudya. Arepa ique tuhua miatsehue ama juhua ama bucha, Yusura bamereyaju mique bahua higuera aputa emaque juaniyaju, —jadya tujatu acuare.

49 Jadya ayatu Natanaelra acuare:

—Ebahuityaqui que, miquemi Yusuja Ebacuaque. ¡Midyami Israel eque ejuracana cuana que narudadiqui que!

50 Jesusratu acuare:

—¿Miratu ique Mesias que ejenehua, era mique higuera aputa emaque juaniyaju bahua jadya ayaju, era ecuita cuanaja ataquima que eau jadi que bahue juatsu? Dyaquedyami eaqueja nimee judadiya, dya que ibeda que era ayaju baatsu, —jadya tujatu acuare.

51 Tuequedya ecua Jesúsra acuare:

—Pusha amadya micuana cuejaya. Yatuca cabapetitsu tuque micuana barepa epacashatana babu que. Babu que tuque micuana barepaju Yusu tsahuaqui cuana que ique merera buteyaju tsurayaju jadya. Babu que tuque micuana ecua IQUE ECUITA mere juyaju, —jadya tura ecua acuare.

2

Canáju caquemititayaju Jesús tuque Yusuja casa tsehueque cabamereticuareque

¹⁻² Jadya juu jadya juatsutu beta huecaca anicuare caque-miti ishuque chine Canáju. Tumeque eputu Galilea yahuaju jucuare. Jesús, Jesúsja ecuaque, ecuana tura mepehua cuanaque jadya ecuana chine ishu cuacuare, dutyadya ecuana cuaishu cuejatanahua tibu. ³ Ecuana tuhuajudya tunajatu uva nacaca esasanashaque eijiqui terecuare chine terema jarijudya. Tunara cuejahujutu ecuaquera cuejaticuare Jesús:

—Aijama patunajatu amena eijiqui uva nacaca esasanashaque, —jadya tujatu aticuare.

⁴ Jesusratu acuare:

—¿Aishu jatsu mira ique tumeque cuejaya, mama? Juetima jari tuque ecue Yusuja casa bamere ishuque, —jadya tujatu acuare ecuaque.

⁵ Jadya tura aya ama buchatu ecuaquera quijimereti puji cuana acuare:

—Ecue ebacuara cuejaya equedya nejudue.

⁶ Anicuaretu tuhua shucuta sura tumu bucha pajie ea cuanaque. Aridatu sura cuana jucuare. Quimisacarucu tunca jadya ama juatsu cien litro tunajatu sura cuanaju ena isha bahue junenicuare. Israelita cuanajatu ena tuhua eishaque tsume bahue junenicuare emetucu cuana cutsati ishu, emaricaca cuana jadya, tunaja bahue utsa ishu. ⁷ Tudyatu Jesúsra quijimeretiya cuanaque acuare:

—Nejequeshabarecue jida ena tsehue tumeque sura cuana, —jadya tujatu ecana acuare.

Jequeshacuaredya tunara. Jida cuachacuacha tuna sura cuana ena tsehue jequeshabarecuare. ⁸ Amena tunara jequeshahua baatsu tuna Jesúsra acuare:

—Iyacia netsehuacue riya piji. Nechibamereticue chine metseque.

Tura jadya ahuaju, tunajatu riya piji tsehuacuare. Tsehuatsu tunajatu chibamereticuare chine metseque. ⁹ Enatu cabapeticuare uva nacaca esasanashaque. Chine metseratu chibatsacuare. Tuquetu baecua jucuare eje bucha juhuaque, aira ena uva nacaca esasanashaque cabapetishahuaque. Quijimereti puji cuana camadya tuna bahue jucuare, tunaradya sura cuanaju ena jequeshabarehua tibu. Dyaque jida cuita baatsu tujatu huanequi juhuaque ihuaracuare. ¹⁰ Amena huanequi juhuaque jutihuajutu chine metsera atacuare:

—Icuene cuita tuque ecuanaja eihuara cuanaque uva nacaca esasanashaque dyaque jidaque ijimere bahue. Tunara amena nime tupu ijihuaju tuque ecuana amena uva nacaca jida cuitaque ama ijimere bahue. Mira taa ecana

jadya ama ahua. Chine terehuie jutidyami uva nacaca dyaque jidaque cuinanashahua, —jadya tujatu acuare.

¹¹ Jesúsra jadya ahuaque baatsu, ecuana tura mepehua cuanara tuque ecuana ejenecuare tuja Yusuja casa aniyaque. Caná Galilea yahuajutu Jesúsra ena cabapetishacuare uva nacaca esasanashaque. Tuhua tujatu ametse acuare ni ejeque ecuitaja ataquique ama. Tuhuatu cabameretimetse jucuare tuque Yusuja casa tsehueque.

¹² Jadya juatsutu Jesús Capernaumju dirucuare. Ecuaque, tuatsehuequi cuana tsehue jadya tuna dirucuare. Ecuana tumbaedyu dirucuare tuna tsehue. Tuhua ecuana anidirucuare eje uma huecaca cuana.

Jesúsra catyati puji cuana Yusuja etare juque ijehuecuinatillacuareque

(Mt 21.12-13; Mr 11.15-18; Lc 19.45-46)

¹³ Pascua chine bacanitu piji dyane cuita jucuare, ecuanaja baba cuana Yusura Egipto juque cuinanashacuareque adeba ishucue. Jadya tibudyatu Jesús cuacuare Jerusalénju. Ecuonaratu tajiajecuare. ¹⁴ Tuhua junatitsutu Jesús cuacuare Yusuja etareju. Nubinatitsu tujatu ecana banaticuare jetiama Yusu tyaishu juye, uhuisha, huei jadya catyati juya cuanaque. Tumbaedyatu bacuare chipiru cuare juya cuanaque. Tume cuanaratu peya epu cuana juque chipiru cuarecuare. Yusu mui ishujú, jadya jutaquiju ama tuna jadya jucuare. ¹⁵ Jadya baatsutu Jesús tuna tsehue cahuaiticuare. Cahuaiticsutu capicaticuare huacabiti. Huacabiti tsehue tujatu ecana pana ijehuecuinatilla acuare tuhua Yusuja etareju catyati juya cuanaque. Tumbaedyatu juye, uhuisha cuana catyati juya cuanaque ijehuecuinacuare. Dacashatillacuare tujatu chipiru amena cuarehua cuanaque. Tipacatillacuaretu mesa cuana. ¹⁶ Jadya tujatu acuare huei catyati puji cuana:

—Nedujutillacue micuanaja dutya ai rehua aniya cuanaque. Riyaque etare ri ecue Etata mui ishucue. Mercado ama riya. Catyati, bacabaca jadya ishucue ama riya, —jadya tujatu ecana acuare.

¹⁷ Jadya juya bacatsu, ecuana tura mepehua cuanara tuque ecuana adebacuare Yusuja quisarati jadya ehuenecue:

“Yusu, micue etare tuque dyaque muibaya.

Ejequeja buchique tuque bijidamaduramerecarama aya”
jadya.

¹⁸ Jadya Jesúsra ahuaque baatsutu israelita cuanaja huaraji tuhua jucuare cuanara Jesús acuare:

—¿Airami casa tyahua Yusuja etare juque ijehuecuinatilla ishú? Acue Yusuja casa bamere ishú yuneridya tura mique

jadya aishu cuatsashahuaque ecuana ejenemere ishü, — jadya tunajatu Jesús acuare.

¹⁹ Jesúsra tuna quemitsacuare:

—Arepa micuanara Yusuja etare rihuishaya ama bucha, eratu quimisha huecacaju nityatsuradadinucaya, —jadya tuna Jesúsra acuare.

²⁰ —¡Eje bucha nityatsuranucae ni tuquemi quimisha huecacaju anucama! Pushi tunca shucuta earacana mara tuna tsunutacuare riyaque etare ayaque, —jadya tunajatu Jesús acuare.

²¹ Tunaja adebataquique amatu Jesúsra jadya acuare quisarati. “Yusuja etare” jadya Jerusalén juque etare ama tujatu jadya acuare. Tudyá cuitadyatu jadya caticuare, tuque Yusuja eaniqui juya tibu. ²² Jadya tibudya Jesús emajuque chacha netitsuranucahuaju ecuana tura mepehua cuanara adebacuare tuja quisarati. “Yusuja quisarati tu ehüene yuneridya Jesús majutsu chacha netitsuranucabuqueque. Jesúsra ecuana icüeneta cueja ahuaque tu yuneriquedya”, jadya ecuana jucüare tuque emajuque netitsuranucahuaque baatsu.

Ecuitara eje bucha inime tupuya cuanaque Jesúsra dutya adebatillayaque

²³ Jesús tunajatu Jerusalénju Pascua chine ishü jetiamara ejenecuare tuque Mesiasque. Yusuja casa tsehüe ayaque baatsu tunajatu ejenecuare. ²⁴ Jesúsra tuna adebacuaredya tuna yuneri ama tuaqueja catyatiyaque. Tura Yusuja casa tsehüe inimeradya jutidya ayaque bacara aatsudya jutidya tupujudya ayaque adebaya tibu, tura tuna ejitaju cuita “Ique Mesías” jadya acuare ama. ²⁵ Ni ejeja buchiquetu tuque ecuita cuana eje buchique cuejataqui ama jucüare, tura cuitadya ecuita cuana eje bucha inime cadujutiyaque, inime tupuyaque jadya adebaya tibu.

3

Nicodemo Jesús tsehüe quisaratiquareque

¹ Anicüaretu ecuita Nicodemo bacani. Tuquetu huaraji israelita cuanaja emüique jucüare. Fariseo tu jucüare.

² Chinejutu Jesús tsehüe quisaratira cuacuare. Junatitsu tujatu isaranaticuare Jesús:

—Banuchi, Ebahüityaquique. Bahüe ecuana mique bahüitya bahüitya pujiqüe, mique Yusuja Ecuadishaque. Ni ejera bucharatu mira Yusuja casa tsehüe ayaque eau ama, Yusura casa tyayaque ama juatsu, —jadya tujatu anaticuare Jesús.

³ —Pusha amadya mique cuejaya. Eje bucha narue ni tu Yusura ama ejeque yudijidya cananatinuca junucamaque, —jadyatu Jesúsra acuare.

⁴ —¿Eje bucha cananatinuca e euana ejuu amena esirique? ¡Eje bucha jadya jue euana ejuu! ¡Eje bucha nubinuca e euana ejuu euana susuqui cuanaja ecarecaniju yudijidya cuinanenuca juishu! —jadyatu Nicodemora acuare.

⁵ Jesusratu acuare:

—Yusuja Espíritu eque iyacuanemaquetu Yusura naruyaju eje bucha nubidirutaqui ama, tumbaedy a utsamaque. ⁶ Euana susuquija ecarecani juque cuinanahuaju euana euana baqui cuanaja ebacuaque. Yusuja Espiritu eque eiyacuanegue bacue euana, Yusuja ebacuaque, Yusuja Espiritura euana Yusu jaque amerehua tibu. ⁷ Bape baume riyaque quisarati, cananatinucataqui mique jadique. ⁸ Cuejijitu riyaque yahuajura ni ejera buchara naruya ama. Tuuyaju bacatsu, ejaqui cuana bucucushayaju baatsu tuque euana cuejiji adebaya. Jadya ama bucha euana adebaya ama ejuque cuinanahuaque ni eju netidiruyaque. Tumba e cuitadyatu Yusuja Espíritu eque cananatinucahua cuanara adebaya ama tuna Yusura eje bucha iyacuanee ahuaque. Jadya ama bucha tunajatu tuja casa bayadya, —jadyatu Jesúsra Nicodemo acuare.

⁹ —¿Eje bucha cuana taa? Adebataqui ama tuque baya, mira ique riyaque cuejayaque, —jadyatu Nicodemora acuare.

¹⁰ —Mique taa mi Israel eque ejuracana cuanaque bahuityaqui. Mira taa tuna Yusuja quisarati bahuityaya. ¿Eje bucha juatsu jatsu tuquemi cueyanetaqui ama baya era cuejayaque? ¹¹ Pusha amadya mique cuejaya. Era pana adeba ayaque mique cuejaya. Ecue yatuca tsehue ebaque mique cuejaya. Jadya ama buchatu mira adebaya ama. ¹² Riyaque yahua juque era cuejayaquemi adebataqui ama baya. ¡Eje bucha adebaedy tuquemi ama era Yusu quejaque cuejayaque!

¹³ “IQUE ECUITA era peadyami Yusu eje buchique pana cueja eau. Ni ejeque buchiquetu tuja yacua juque butehua, ique cuita camadya. ¹⁴ Béru ecuanaja baba cuana japada anianinicuare patya, cuatsashaya eque jucarama juya cuanaque tuna bacua dyaque ujeda cuanara acuare. Yusratu Moisés bacua cueya bronce eaque ameretsu acuiju shuramerecuare. Bacuara ahua bacua cueya eaque petayajutu Yusura chachanecuare. Tumbaedy IQUE ECUITA acuiju tatatanadadiya. Jadya iyetae judadiya. ¹⁵ Dutya eaqueja catyatiya cuanaque tuna iyacuanetanaya. Majutsu tuna Yusu

queja judirubunque ni eje tupu jacanuca ishü ama, —jadyatu Jesúsra Nicodemo acuare.

Yusura dutya ecuita cuana iyuhueda bayaque

¹⁶ Yusratu dutya dyaque iyuhueda baya. Jadya tibudya tujatu tuja peadyaque Ebacuaque ecuana jiteque maju ishü cuadishahua. Tuja Ebacuaque queja ni ecuana catyatiya, ijahuaja etiquiju ecuana judirubunque ama. Yusu tsehue ecuana anisiribuque. ¹⁷ Yusratu riyaque yahuaju cuanaque nerecaturacarama acuare. Jadya tibudya tujatu Ebacuaque riyaque yahuaju cuadishahua, tuaqueja catyatiya cuanaque inajacamere ishü, tuna ijahuaja etiquiju judiru ishü ama.

¹⁸ Yusuja Ebacuaque queja catyatiya cuanaque tuna Yusura jucha metse ama baya. Amena tuaqueja catyatima cuanaque bacue Yusura jucha metse baya, tuna tuja Ebacuaque queja catyatihua ama tibu. ¹⁹ Huecajutu ejitaju eje buchique; jadyatu Yusuja Ebacuaque riyaque yahuaju junahua Yusuja biji eque jadique bamere ishü. Jesús queja nimee ama cuanaque tuna Yusuja biji eque ama aniya. Tunadya tuna apuda ducu juneniya buchique. Jadya tibudya tuna Yusuja Ebacuaque queja catyaticarama juya. ²⁰ Jidama juya cuanaratu apuda ducudya jidamaque aya, huecadaju ama. Japada tunajatu hueca jacaya, tuna jidama juyaque ejitaju ejuu tibu. Tumebaedya Yusu ujeu cuanara Jesúsja quisarati bacacarama aya, tura tunaja jucha cuana ejitaju eauju. ²¹ Yusuja quisarati yuneri eque aniya cuanaque tuna Jesús queja cajipeticara juya, tuna Yusura amereya eque juyaque caadebamereti ishü. Huecaju juneniya cuana buchique tuna.

Juan Ecuita Cuana Utsaquira Jesús eje bucha juyaque cuejanucacuareque

²² Jadya juatsutu Jesús Judea yahuaju cuacuare. Ecuana bacue tuatsehuedya cuacuare. Eje uma huecacadya ecuana tuhua jucuare, tuaqueja nimee juya cuanaque utsa juyaque. ²³ Juantu ecuana eque eje japa amadya jucuare. Enonjutu cutsameretiya cuanaque utsa jucuare Salím japadama, tuhua cueri aniya tibu. Jetiama tuna cuacuare tuaqueja cutsamere-tira. ²⁴ Jadyatu jucuare Juan etare apudaju ishatanama jariju.

²⁵ Umae Juan tsehue juneniya cuanaque tuna caquemitsatitibunecuare peadya israelita tuhua jucuare tsehue, tunaja bahue eque Yusuja yacuaju jida cajuchatima juishu tibu eque.

²⁶ Tuna cama caquemitsati caquemitsati juatsu tuna Juan queja cuacuare.

—Ebahuityaquique, reequé japadama taa tumebaedya aniya ecuita cuana utsa juyaque. Icuene mique Jordán

yueque macare juchine patyatu tuque miatsehuedya juchine. Cuejachinedya mira ecuana tuque Mesiasque. Dutya jujeri tuna tuaqueja cuaya cutsameretira. ¿Jidadya tu jadya juishu? —jadya tunajatu aticuare.

²⁷ Juanra tuna quemitsacuare:

—Yusura yatse casa tyahua tuque mere ishu. Ni ejera buchiquetu emereu ama tuja cuitadya casa tyamaque. ²⁸ Micuanara cuitatu bacahuadya era ejitaju cuejayaju ique ama Mesías Yusuja Emepeque jadique. Cuejehua micuana era, tuque junama jarijudya ique icuene cuadishatahua tuque junayaque cueja ishu. ²⁹ Caquemititayaju cuejatahuaquetu pureama juya, arepa tuque ama caquemitiyaque ama bucha. Huanequi juyaque pureama juyajudya jutidyatu pureama juya. Tumbaedy a ique iyacua pureama juya ecuita cuana Jesús queja catyatiya baatsu, tuque Mesías juya tibu. ³⁰ Dyaquedya tunajatu Jesúsja quisarati bacaajeyadya jutidya. Ecue quisarati tunajatu bacajacaya, —jadya tuna Juan Ecuita Cuana Utsaquira acure.

Jesús Yusu quejaque jecuareque

³¹ Yusu quejaque junahuaque tu dyaque emui, dyaque bahue jadique. Riyaque yahuaaju ejitaju juya cuanara bacue jacataqui ama baya, riyaque yahua juque camadya tuna adebaya. Riyaque yahua juque camadya tunajatu cuatsabiji aya. Barepa juque junahuara bacue dutya adebaya. ³² Turatu Yusu queja bahuaque, bacahuaque jadya quisarati cuejaya. Jadya ama bucha dutyara jujeri ejenecarama aya tura cuejayaque. ³³ Tura cuejayaque ejenequi cuanaque tuna juya: “Yuneri cuitadya tu Jesús Yusuja Ebacuaque, Yusu cuitadya jadya juhua tibu”, jadya jubahue. ³⁴ Tuquetu Jesús Yusuja Ecuadishaque. Turatu Yusuja quisarati yunerique cuejaya, Yusuja Espiritura casaturajacaya ama tibu. ³⁵ Yusuratu dyaque iyuhueda baya tuja Ebacuaque. Jadya tibudya tujatu Ebacuaque casa tyahua dutya naru ishu. ³⁶ Yusuja Ebacuaque queja catyatiya cuanaque tuna Yusu tsehue tere baecua anibuque. Majutsu tuna Yusu queja tuque jakanuca ishu ama judirubuque. Yusuja Ebacuaque queja catyatima cuanara bacue Yusu jipebuque ama. Dyaque nrecada nrecaturajacatsu ama tujatu eana nrecaturabuque.

4

Jesús Samaria juque epuna tsehue quisaraticuareque

¹ Fariseo cuanaratu quisarati bacatsacuare Jesús tsehuepa eana amena dyaque umada juneniya, Juan tsehue bucha ama. Utsaya patu eana dyaque jetiama, Juanra utsaya

bucha ama jadya. ² Jesúsra cuita amadya tuna utsacuare; ecuana tura mepehua cuanara tuna utsacuare. ³ Fariseo cuana tuja ishú quisaratiyaque bahue juatsutu Jesús Judea juque dirunucacuare. Tuatsehue dirupeedyá ecuana jucuaire Galileaju.

⁴ Tume ecuana Galileaju judirutsu Samaria eque cuetitaqui jucuaire. ⁵ Samaria yahua eque juneniyaque ecuana Sicar epu bacaniju judirucuaire. Tumeque eputu japadama jucuaire Jacobra béru ebacuaque yahua tyacuareque. ⁶ Jesús tu ena caní peque judirucuaire. Tumeque ena canitu jucuaire béru Jacobra purucuaireque. Japada ajehua tibutu Jesús dyaque ecastere jucuaire. Jadya tibudyatu ena caní peque anibute-dirucuaire. Barepatya huietu jucuaire. ⁷⁻⁸ Ecuana ecuana epuju cuacuare ara ishú cuanaque quemira. Ecuana epuju cuahuajutu juticuare epuna tuhua Samariaju aniyaque. Ena jitequetu juticuare. Epuna jutihuajutu Jesúsra isaratsacuare:

—Bastare, mama. ¿Ena piji mira eijimereu ama? —jadya tujatu acuare.

⁹ —Aijama, ijimereya ama mique era. Mique taa mi israelita jutidya. Ique taa Samaria juque. ¿Eje bucha juatsu, jatsu, mira ena iji ishú bacaya? —jadyatu epunara Jesús acuare.

(Tumeque epunatu bahuedya jucuaire israelita cuana Samariaju cuana tsehue cajipeticarama juyaque, ni peadya canecu ena Samariaju cuanara ai ijiquerecarama ayaque. Jadya tibudya tujatu jadya quemitsacuare.)

¹⁰ Tudyatu Jesúsra quemitsacuare:

—Yusurami dyaque jida tsehue bacara aya. Miratu adebaya ama. Erami ena iji ishú bacaya. Mira ique adebaya ama ique aique. Ique aique adebayaque juatsu, mira ique ebacau ena iji ishú. Mira ique ena bacayaque juatsumi era etyau. Ijitsumi eiyacuane ejuu. Majutsumi Yusu queja ejudiruu tuque jacanuca ishú ama, —jadya tujatu acuare.

¹¹ —Tata, aijama taa tuque micue ai tsehue ena tsehua ishúque. ¿Eje bucha tsehuae jatsu tuquemi eau ena ique Yusu jaca baecua anidirusha ishúque? ¹² Ecuanaja ebaba Jacobra taa tu riyaque ena caní juquedya ijicuare béru. Tuja ebacua cuanaquera, tuja uu cuanara jadyari rehuaquedya ena ijicuare. Tume patya equequetu ecuanaja ata cuanara ena rehuaque ijicuare riyá cama jaridya. Ecuanaja ebaba emuira ena caní shanacuare juquedya rique ecuana ijiya jari. ¿Mique ni taa mi tuque dyaque inime metseque cabatiya? —jadyatu epunara acuare.

¹³ —Riyaque caní juque ena ijitsumi masadama ijicara junucaya. ¹⁴ Era ena tyayaque ijitsumi ijicara junucanime ama ni riyá puji buchique. Era ena tyayaque tu bapeque.

Muhuehueya buchatu judadiya ena ura baecuaque. Jadiquetu era tyaya. Terebuque ama tuque. Ijitsumi tere baecua anisiribuque. Majutsumi Yusu queja judiribuque, tuque jacanuca ishú ama, —jadyatu Jesúsra acuare.

15 —Tata, tyacue ique tumeque ena ijicara junuca ishú ama, dutya huecaca risharisha ena jiteque junuca ishú ama, —jadya tujatu acuare.

16 —Ihuaraticue micue ahue. Tuatsehue jenucacue rehua, —jadyatu Jesúsra acuare epuna.

17 —Ahuema ique, —jadyatu epunara acuare.

—Pusha amadyami juya. Aijamadya tuque micue ahue. 18 Miquemi pishica ahuee juhua. Iyacuami aniya peya ecuita tsehue. Micue ahue ama tume.

19 —Tata, amena mique adebaya, mique Yusuja casa tsehue quisaratiyaque, mira ique micue bamaque pana adeba ahua tibu. 20 “Yuneridya tuque ecuanaja Yusu rehua emata Gerizimju camadya muitaqui”, jadyatu ecue ebaba ecana icuene rehua Samariaju anicuare cuanaque jubahue jucua. Micuana israelita cuana bacue micuana jubahue “Tuyudya tu Jerusalénju cuita camadya Yusu mui ishú, peya epuju ama”, —jadyatu epunara acuare.

21 Jesusratu acuare:

—Ejenecue era cuejayaque, mama. Juetiyatu huecaca ecue Etata Yusu dutya queja muitanadadiyaque, jadya ishú cuitaju camadya ama. Jetaqui ama micuana ni rehua riyaque emataju tuque muira, ni Jerusalénju tuque muira. 22 Iyacuatu micuana Samariaju cuanara adebaya ama Yusu eje buchique, arepa micuana muiya jadya juya ama bucha. Ecuana israelita cuanara bacue ecuana adebaya tuque eje buchique. Yusu Neri tuque ecuana muiya. Yusratu mepecuare Israel eque ejuracanaque Einajacamerequi juishu. 23 Masadamatu ecuita cuanara Yusu muidadiya tuque eje bucha muitacara juya eque. Tuja inime eque tuna anibuque. Yusuja Esprituja casa eque tunajatu mui neri adadiya. Jadyatu ecuanaja Etata Yusuja bijida tuque jadya muiqui cuanaja mui ishú. 24 Yusu tu cuitama. Ejitajuque ama tume. Tuja Espíritu equetu caadebameretiya. Tuja Espíritu eque cuita camadya tuque micuana tuque emuita bucha muie eau Yusu, tuja quisarati yuneri eque cuita camadya, —jadyatu Jesúsra epuna acuare.

25 —Jejee, adebayadya tuque era ejeque huecaca Yusuja Emepeque, Mesías junabuqueque. Tuque junatsu, tura ecuana bahuityanabuque ecuana bahue jutaquique, —jadyatu epunara acuare.

²⁶ —Idya Mesías, miatsehue iyaja cuita quisaratiyaque, — jadyatu Jesúsra acuare.

²⁷ Jesús tumeque epuna tsehue quisaratiyaju ecuana tura mepehua cuanaque judirunucacuare. Bape ecuana badirucuaré tuque epuna tsehue quisaratiyaju. Jadya ama bucha, “¿Eje bucha equemi tumeque epuna tsehue quisaratiya? ¿Ai tuquemi bacahua?” ni ejera tuque ecuana jadya bacadurataqui ama bacuare Jesús.

²⁸ Tumetu epuna tuja sura ena cani peque shanaquenatsu cuacuare epuju. Ejeque tsuruyaquedya jutidya tujatu cuejaajecuaré:

²⁹ —Necuara ena caniju. Yuhuatú aniya ecuita. Adebamara dya jutidya tura ique eje buchique cuejahua. ¿Tudya ni tu Mesías? ¿Tudya ni tu Yusuja Emepeque? —jadya tujatu ecana cuejaajecuaré.

³⁰ Jadya bacatsu tuna epu juque cuinanatsu cuacuare Jesús queja. ³¹ Ecuita cuana junatimaju tuque ecuana Jesús acuare: —Jee taa ecuana ara ishu cuanaque quemitihua cuanaque. Nearaarara, —jadya tuque ecuana Jesús acuare.

³² —Ecuetu aniya era ai sareyaque micuanara adebayaque ama, —jadya tura ecuana acuare.

³³ —¿Aira cuana ni taa rejari behua ara ishuque? —jadya tuque ecuanaja inime jucuaré.

³⁴ Ecuana ara ishuque adebayaju ecuana Jesúsra quemitacuare:

—Ecuetu ataqui Ique Cuadishaquira amerehuaque. Tura amerehuaque tuque ecue atillataqui. ³⁵ “Pushi badi jutatsutu amena tupu ecuanara uhuahuaque huesa ishu”, jadya micuana jubahue. Era micuana cuejaya. Nepetacue junabareya cuanaque. Tunaratu sareya ejeja tsahuatsu masadama eaqueja catyati ishu. Tuna tuna teeju euhuaque amena ejahuane buchique. ³⁶ Euhuaque huesaqui cuanaque etsujequi inatsu pureama juya bucha, tume bae cuitadyatu Yusu merequi cuanaque pureama jubuque, peya cuana eaqueja catyatiyaju baatsu. Tuna ai juyaque tu ejitajudya judadiya; tumequetu tere baecuaque. Yusratu dyaque jida amerebuque dutya tuque merequi cuanaque, tunaja mere ejitaju ama bahuishaya cuanaque, tumbaedyá masadama ejitaju baya cuanaque. ³⁷ Jadique quisarati tu yuneriquedya: “Peadya tu uhuauhua puji; peya bacue jahuanehuaju huesaqui”. Tumbaedyatu umaera tsahuaya icuene cuita ecue quisarati bacaqui juhua cuanaque eaqueja catyati ishu, peya cuana quisarati cuejaqui cuana eque. ³⁸ Cuadishaya micuana era ecue quisarati iyacuaque cuejara. Micuana micuana peyara uhuahuaque huesaqui buchique, peya cuanara icuene quisarati yunerique cuejahua tibu. Micuana

quisaratiyaju bacaqui cuanaque tuna eaqueja catyatidadiya, ai micuanara jipidya cuejayaju ama, peya cuanara icuene cuejaha tibu, —jadya ecuana Jesúsra acuare, ecuita cuana tuaqueja junayaju.

³⁹ Epunara tuja epuju cuanaque Jesús bana ishü cuejabareyaquepa tujatu ecana acuare:

—¡Dyaque taa tuja casa aniya! Tuja ique bamaque cuitadya tura adebahua ique eje buchique.

Tura cuejayaque bacatsu tunajatu umadara ejenecuare Jesús, Mesiasque Yusuja Emepeque. ⁴⁰ Quisaratiyaju bacatsu tunajatu bacacaradya jutidya acuare. Jadya tibudya tunajatu tuaqueja jutitsu

—Rehuadya ecuana queja eje uma huecaca cuana anicue jari, —jadya aticuare.

Tumetu Jesús beta huecaca tuna queja anicuare. ⁴¹ Tura cuitadya cuejayaju bacatsu tuna dyaque umada tuaqueja catyaticuare. Ejenecuare tuna tuque Mesías jadique. ⁴² Jesús queja catyatihua cuanaratu epuna acuare:

—Icuene cuita tuque ecuana ejenehua tuque Mesiasque, mira cuejayaju bacatsu jutidya. Iyacuatu ecuanara cuitadya bacahua. Catyatihua ecuana tuaqueja. Amena tuque ecuana adebaya Yusura tuque riyaque yahuaju cuanaque Ijahua quejaque inajacamerera cuadishahuaque, —jadya tunajatu epuna acuare.

Jesúsra huarajija ebacuaque chachanecuareque

⁴³ Beta huecaca juatsu ecuana Jesús tsehue Samaria juque cuanucacuare, Galilea yahuaju. ⁴⁴ “Yusuja quisarati cuejaquetu peya epuju cuanara muibaya; tuja epuju cuanara cuita bacue muibaya ama”, jadyatu Jesús beru juquare. ⁴⁵ Jadya ama bucha tunajatu Jesús Galileaju junatihaju tuhua cuanara jida batsacuare. Tuna dyadipa tuna Jerusalénju Pascua chine ishü cuacuaredya. Tuhudya tunajatu bacuare Jesúsra ayaque ni ejeque ecuitaja ataqui que ama. Jadya tibudya tunajatu pureama tsehue batsacuare.

⁴⁶ Tuequedyatu Jesús Caná Galilea yahuaju yudijidya dirunuca juquare, icuene ena uva nacaca cabapetishacuareju. Tuhuatu juquare huaraji, ecuari merequique. Ebacuaque tujatu dyaque ujejeda juquare Capernaumju. ⁴⁷ Jesús junanucahuajutu huaraji ecuita cuanara cuejacuare:

—Jesús ri rehua. Juetinucahuatu Judea juque.

Jadya cuejahuaju tujatu Jesús isaraticuare. Canerecatinaticuaretu tuaqueja:

—Nerecabacue taa ique. Ecue ebacua taa majutaqui cuita. Necua ecue etareju. Ecue ebacua chachaneticue, —jadya tujatu aticuaire.

⁴⁸ Tudyatu Jesús jucuare:

—Ni ejeque buchique micuana eaqueja catyaticara juya, Yusuja casa bamere ishuque era ayaju bamaque, ni ejeque ecuitaja ataquique ama ayaque bamaque.

⁴⁹ Huarajitu quisaratinucuaire:

—Ecuatsashaquique, jecue ebajarara, ecue ebacua majuma jarijudya.

⁵⁰ —Dirunucacue micue etareju. Micue bacua tu amena chacha. Majuya ama tuque, —jadyatu Jesúsra acuare.

Huarajiratu ejenecuaire Jesúsra tuja ebacuaque chachanehuaque, arepa japada ama bucha. Amena tuque ejenetsutu dirucuaire tuja etareju. ⁵¹ Tudyatu tujatu tsurutsacuaire edijiju tuja mere puji cuana. Isaratsacuaire tuna tunaja patrón:

—Micue bacua tu chacha. Amenatu dyaque mejemeje cuita juhua, —jadya tunajatu atsacuaire.

⁵² Tudyatu ecuitara bacaduratsacuaire tuja mere puji cuana:

—¿Ai ura dyane ecue ebacua jida mejemeje juhua? —jadya tujatu ecana atsacuaire.

—Riyabarepa a la una tujatu baara netichine, —jadya tunajatu atsacuaire.

⁵³ Jadya cuejayajutu ecuita huecatanacuaire: “Tumeque ura cuita di taa riyabarepa Jesúsra ‘Micue bacua tu amena chacha’ jadya achine”.

Tumetu Jesús queja catyaticuaire. Tumbaedyu dutya tuja etareju aniya cuanaque Jesús queja catyatibarecuaire.

⁵⁴ Riyaquetu jadya jucuare Jesús Galilea juque Judeaju judiruhaju. Canáju tujatu bamere beta ishu Yusuja casa bamerecuaire, ejeque ecuitaja buchique ataquique ama aatsu.

5

Jesúsra ajebaecuaque ajeshacuareque

¹ Jadya juu jadya junucatsutu Jesús Jerusalénju yudijidya cuanuca jucuare. Tuhuatu israelita cuana chine jucuare.

² Tuhua Jerusalenjutu ena cani dyaque quinidaque anicuaire. Israelita cuanaja yana equetu tumeque ena cani Betzata bacani jucuare. Tumeque ena canitu jucuare epu tachiquique uhuisha cuana epuju nubiquique cani japadama. Anicuairetu pishica etare caca cuana ujejeda cuanaque jara ishuque. Etare caca cuanaja etabutu jucuare. ³ Tuhuatu jarabarecuaire umada ujejeda cuanaque. Anicuairetu shuhui cuanaque, ajebaecua cuanaque, eaturuti cuanaque jadya. Tuhuadya

tunajatu ihuacuare ena muhuehueyaque. ⁴ Juatsudya juatsudyatu barepa juque Yusu tsahuaquique bute bahue jucuare ena cani ebari juque ena muhuehuesha ishu. Tura ena muhuehueshayadyatu ujejeda cuanaque ena caniju nubi bahue junenicuare. Ena muhuehueyaju icuene nubiyaque camadyatu chacha jubahue jucuare.

⁵ Tuhuatu jaracuare ecuita eje uma mara ujejedaque. Quimisha tunca quimisacarucu earacana mara ajebaecuaquetu jucuare. ⁶ Tuhua nubitsutu Jesúsra bacuare tumeque ecuita. Turatu adebacuaredya tumeque ecuita mara mara ajebaecuaque jarayaque. Isaranaticuare tuja tuque:

—¿Netitsuracarami juya, tata? —jadya tujatu bacaduranaticuare.

⁷ —Jejee, Ecuatsashaquique. Netitsuracara taa juya. Jadya ama buchari aijama ejeque ique ena muhuehueyaju isha ishu. Ique bucucutaqui ama juya tibu, peya cuanara bareya jutidya, —jadyatu ajebaecuara acuare Jesús

⁸ —Netitsuracue. Huesacue micue jara ishunque. Dirucue micue etareju, —jadyatu Jesúsra acuare ujejedaque.

⁹ Jadya Jesúsra ahuaaju cuitadyatu ecuita netitsuratsu ajecuare. Ajetsutu cahuesatiquenacuare tura jara ishu ahuaque. Cahuesatitsutu diruquenacuare. Canajara huecacajutu Jesúsra ecuita ebucucujacaque chachanecuare. ¹⁰ Israelita huaraji cuanaratu bacuare tura jara ishu ahuaque cadujutiyaju.

—Riyaque huecaca ri canajara huecaca. Ecuanaja cacuat-sashati eque amami juya. Dujuta baecuatu ni ai buchique canajara huecacaju, —jadya tunajatu acuare.

¹¹ —“Huesacue micue jara ishunque. Dirucue micue etareju”, jadya ique ajeshaquira ahua, —jadya tuna acuare ecuita chacha juhuara.

¹² —¿Aira jatsumi jadya ahua: “Huesacue micue jara ishunque. Dirucue”, jadya? —jadya tunajatu bacaduracuare.

¹³ Ajebaecuaque netitsurahuaquetu baecua jucuare tuque ajeshaquique ai bacanique. Tuque ajeshatsutu Jesús masadama cuinanacuare ecuita jetiama ducuque. Jadya tibutu ecuitara eje bucha bacadurataqui ama bacuare tuja ebacani. ¹⁴ Jadya junucatsutu Jesúsra ecuita tsurunucacuare Yusuja etareju.

—Amena mi juneniya. Cajuchatinucaume. Eajejacanucau mique, —jadyatu Jesúsra acuare.

¹⁵ Tuhuatu ecuitara adebacuare Jesús tura nityatsuratsu ajeshahuaque. Tumetu cuinanacuare. Cuinanatsutu israelita cuanaja huaraji cuana tsehue quisaratira cuacuare.

—Jesusradya tucue ajeshahua, —jadya tujatu ecana aticuare.

¹⁶ Israelita cuanaja huaraji cuana tuna dyaque ecahuaiti jucuare Jesús tsehue, tura ujejedaque canajara huecacaju chachanehua baatsu. Quisaratitibunecuare tuna tuja ishu. Ujeu tsehue tunajatu petacuare. ¹⁷ Jesústu bahuedya jucuare tuna tuatsehue dyaque ecahuaitique. Acuare tujatu ecana:

—Ecue Etatatu dutya huecaca mere juya; ique tumebaedya mere jujacaya ama, —jadya tuna Jesúsra acuare.

¹⁸ Jadya tuque juyaju bacatsutu israelita cuanaja huaraji cuanara dyaque iyecara acuare. Iyecara tunajatu acuare, tura canajara huecacaju ahuaque tunara tumeque huecaca ataqui ama bucha bayaque ahua baatsu. Jadya juatsu camadya ama tuna tuatsehue dyaque ecahuaiti jucuare. Iyecara tunajatu acuare tuque Yusu tsehue beta tupu jadya catiyaju, Yusupa tuja Etataque cuitadya jadya juyaju bacatsu.

Yusuja Ebacuaquera Etataqueja casa tsehue dutya acuareque

¹⁹ Jesusratu israelita cuanaja huaraji cuana anucacuare:

—Pusha amadya micuana cuejaya. Era quisarati ayaque, ai era ayaque tuque ecue casa tsehue ama aya, ni riya piji buchique. Dutya tuque aya ecue Etataja casa tsehue. Ecue Etatara ayaju ebaque camadya tuque aya. Ecue Etatara ayaque era dyaditu jadidya aya, ique tuja Ebacuaque juya tibu. ²⁰ Ecue Etatara ique dyaque iyuhueda baya, tuja Ebacuaque tibu. Turatu ique tyaishu ni ai en aya ama. Dutya tuja casa tura tyahua, tura ai ayaque ecue dyadi aishu. Tuja casa tsehue tuque ujejeda cuanaque chachanehua. Ayadya tuque dyaque ibedaque tuja casa bamere ishu. Baatsu micuana anajacataya. ²¹ Ecue Etataratu emaju cuanaque yudijidya nityatsuranuca aya. Chacha tujatu ecana amerencaya. Tuatsehue tujatu ecana anishanucaya tere nuca ishu ama. Eratu tumebaedya emaju cuanaque nityatsuranucaya. Ecue jadya inimeque juatsu tuna chachadya amerencaya, ique tuja Ebacuaque tibu. ²² Ecue Etatara ama “Tuna ecajuchati” jadya abuque. Ique tura tyahua casa “Dutya jidama cuanaque ecajuchati” jadya aishu. ²³ Jadya tura ique amerehua dutyaja tunaja ique mui ishu, tuque muitaya bae cuitadya ique muita ishu. Ique ni micuanara muiya ama, jutaquiju taa tuque micuana ecue Etata Ique Cuadishaquique muiya amadya.

²⁴ “Pusha amadya micuana cuejaya. Era cuejaya eque aniya cuanaque, Ique Cuadishaqui queja catyatiya cuanaque tuna tere baecua anibuque. Yusu queja tuna judirubuque ni eje tupu jacanuca ishu ama. Yusratu ni riya piji buchique juchaqui baya ama tuaqueja catyatiya cuanaque. Icuene tunajatu Yusu japada bacuare. Emaju bucha tuna junenicuare.

Iyacua tuna amena chacha aniya. ²⁵ Pusha amadya micuana cuejaya. Iyacua emaju bucha cuanaratu bacaya era cuejayaque. Yusuja Ebacuaque queja catyatitsu, tuna Yusuja yacuaju anibuque. ²⁶ Jadya anie tuna Yusu tsehue terenuca ishuhama jubeque, ecue Etataja tuna jadya anisha ishuhama casa aniya tibu. Tumebaedya tura ique tyahua tumeque casa eaqueja catyatiya cuanaque tere baecua anisha ishuhama. ²⁷ IQUE ECUITA tibu, ecue Etatara cuatsashahua jidama cuanaque nerecatura ishuhama, cuejaya equedya aniya cuanaque jidaque tyashuhama jadya. ²⁸ Neanajacataume era jadya cuejayaju. Juetibuquetu huecaca eje tupu dutya emaju cuanara ecue etsuri bacabuqueque. ²⁹ Netitsurabarebuque tuna tunaja uhuacuare cuana juque. Jida juhua cuanaque tuna chacha aninucabuque, ni eje tupu majunuca ishuhama, Yusu jancanuca ishuhama. Jidama juhua cuanaque tuna chachadya aninucabuque. Netitsuranucatsu tuna canerecati ishuhama nubidirubuque ni eje tupu tuhuaque cuinananuca ishuhama,— jadya tujatu ecana cuejacuare.

Jesús Yusuja casa tsehue dutya ayaque cabamereticuareque

³⁰ Jesúsra tuna bahuityanucacuare:

—Dutya era ayaque tuque aya ecue cuita casa tsehue ama. Yusuja casa tsehue tuque aya. Eratu nerecaturabuque era amereya eque ama aniya cuanaque. Amereya eque aniya cuanaque bacue jidaque tyabuque. Dutya era ayaque tu tuyu. Ecue Etatara amereyaque cuita camadya tuque aya. Ecue inime equedya jutidya ama tuque aya, tuja inime eque, Ique Cuadishaquija inime eque. ³¹ Ique ni ecue taca ishudyu jutidya equisaratiu, idya jutidya ni ejuu “Dutyu tuque aya Yusuja casa tsehue”, eejeneu amadya micuanara ique. Peyajatu ataquidya ecue ishuhama jida quisarati. ³² Aniyatu peya ecue ishuhama jida quisarati ayaque. Tumeque tu ecue Etata. Tuquetu bahue ique eje buchique. Ique bahuedya tuque yuneri quisaratiyaque. ³³ Icuene tuque micuana ecuita cuana cuadishacuare Juan Ecuita Cuana Utsaqui queja, eje buchique ique jadique bacadurati ishuhama. Tura ique eje buchique cuejahuaquetu yuneriquedya. ³⁴ Huecashaya micuana era, tura ique jadya ayaque quisarati jadya acuaque, micuana eaqueja catyatitsu quinajacameretitaquique. Jadya ama bucha tuque sareya ama ni ejeque ecuita ique aique pana adebamere aishuque. ³⁵ Ude tsehue cudatitsu ecuana bahue eje eque cuayaque. Juan tu ude buchique jucua. Turatu Yusuja quisarati cuejacuare micuana Yusuja biji eque ani ishuhama bahue juishuhama. Ejet-sunue ama micuana pureama juhua tura cuejayaque bacatsu.

³⁶ “Aniyatu peya eje bucha eque ique eje buchique bahue jutaquique. Riyaque tu era Yusuja casa tsehue ayaque. Arepa micuana Juan Ecuita Cuana Utsaquira ique eje buchique cuejacuare ama bucha, era cuitadya ayaque baatsu, pana ejenedya tuque micuana aya ique Mesiasque. Ecue Etatara amereyaque era ayaju baatsu tuque micuana pana ejene eau ique yuneridya Yusuja Ecuadishaque. ³⁷ Ecue Etata Ique Cuadishaquiratu tumebaedya ecue ishü jida quisarati aya. Jadya ama bucha micuana tura cuejayaque bacacarama aya, ni micuana bacara aya tudya cuitadya caadebameretiyaju. ³⁸ Arepa micuana tuja quisarati bacahua ama bucha, tuque micuana ejenehua ama, ni micuana tura amereya eque aniya. Adebataqui ama micuana baya, eaqueja catyaticarama juya tibu, tura cuitadya cuadishahua queja. ³⁹ Micuanaratu pana adeba acara tsehue isaraya Yusuja quisarati. Tuyudya tuque micuana adebaya isaratsu bahue micuana judadiya eje bucha anie tere baecua ishü jutaquique. Pana isara aatsu micuana bahue ejuu ique eje buchique. ⁴⁰ Jadya ama bucha micuana eaqueja catyaticarama juya. Eaqueja ni micuana ecatyatiu, Yusu queja micuana anidirubuque eje tupu jacanuca ishü ama.

⁴¹ “Eratu jidama ama inime baya ecuita cuanara ique muiya amaju. ⁴² Eratu adebaya eje bucha micuana inime cadujutiyaque. Eratu adebaya micuanara Yusu iyuhuedama bayaque. ⁴³ Ique riyaque yahuaju junahua ecue Etata Yusura cuatsashayaju. Jadya ama bucha micuanara jida ama batsahua ni micuana eaqueja catyaticara juhua. Ejeu ni peya tuja inime tacaquedya jutidya, tumeque camadya tuque micuana jida ebatsau. Tume micuana tuaqueja ecatyatiu. ⁴⁴ Micuana micuana eje buchadya camuimereticara juya ecuita cuana queja. Jadya ama bucha micuana Yusu queja eje buchadya camuimereticara juya ama. Jadique juatsu yuneridya micuana eaqueja catyatiya ama. ⁴⁵ Paju ama micuanaja inime era cuita camadya ecue Etataja yacuaju, “Riya cuanaque ri jucha metse”, jadya aya bucha. Yusura tuyu juyaju baya bucha micuana cabatiya, Moisésra cuatsashahua eque anicara juya cabatitsu. Jadya ama bucha micuana Moisésra cuitadya eaqueja catyaticarama juhuaque cuejabuque. ⁴⁶ Moisesratu huenecuare ique jadya ayaque. Yuneridya ni micuana ejenequena juhua Moisésra huenehuaque, tume micuana eaqueja catyatiyuena juhua. ⁴⁷ Ejeneya ama micuana tura huenehuaque. Yuneri cuitadya tuque micuana era cuejayaque ejeneya ama, —jadyatu Jesúsra acuare israelita cuanaja huaraji cuana.

6

Jesúsra pishica pan, beta jae jadya umanashacuareque pishica mil ecuita cuana mihua ishu

(Mt 14.13-21; Mr 6.30-44; Lc 9.10-17)

¹ Jadya juu jadya juatsutu Jesús cuacuare bei Galilea yueque macare. Tumeque beitu Tiberias bacani nucadya juacuare. ² Jesús tuhuaque bahue juatsutu jetiama ecuita cuana cuacuare tuaqueja, Yusuja casa tsehue ujejeda cuanaque chachaneyaju bachineque juatsu. “Peya ai cuana tujatu eau ejeque ecuitaja ataquiue ama”, jadya tunajatu inime juacuare. ³ Jesússtu ecuana tsehue emataju tsuracuare. Tsuratsu ecuana anibutecuare tuhuadya. ⁴ Tume patyatu israelita cuana chine catihuie juacuare. Tumeque chine bacanitu Pascua juacuare. ⁵ Tudyatu Jesúsra anibutetsu batsacuare jetiama ecuita cuana tuaqueja cuayaju. Tuna cuayaju batsatsu tujatu Felipe bacaduracuare:

—¿Ejuque tuque ecuana pan ebacau riya jetiama ecuitaja ara ishu?

⁶ Jadya tujatu bacaduracuare Felipe, Felipera eje bucha quemitsae ayaque bacacara aatsu. Jesússtu icueneta bahue juacuare eje bucha mihuae dutya eauque. ⁷ Feliperatu quemitsacuare:

—Juhua aba. ¿Ejuque cuana taa tuque yatse equemiu? Tupu ama taa tu ejuu ni beta ciento ficha, peadya ecuita shucuta badi mere ejuuque etsujequi tupu, peadya peadyaja riya piji riya piji ara ishu, —jadyatu Felipera acuare.

⁸ Andrés, ecue ecaretu Jesús tsehue quisaratiticuare. Tumequetu Simón Pedro tsehuequique juacuare.

⁹ —Rehuari ebacua pijija aniya pishica pan cebada eaque, beta jae jadya. Jadya ama bucha ejebu tupue ni tu juma, jetiamaque ecuita mihua ishu, —jadyatu Andrésra Jesús acuare.

¹⁰ —Necuejacue ecuita cuana; paanibute ecana dutya, —jadya tura ecuana acuare.

Iyabutyacuare ecuana ecuita cuana. Tume tuna dutya tuhua anibutecuare nutsa dyaque. Jetiama ecuitatu juacuare. Deca cuana cuita camadya epiyebaque tuna juacuare pishica mil ecuita; tumbaedyata jetiama epuna, ebacua cuana jadya juacuare.

¹¹ Tudyatu Jesúsra inaticuare pishica pan.

—Yusurupai mique aya, Tata, mira ecuana riyaque ara ishuque tyahua tibu, —jadya tujatu Yusu acuare.

Yusurupai au jadya aatsu tura ecuana pan cuesibaretsu tyabarecuare. Tura ecuana pan tyabareya tupu tujatu jetiama umanashacuare. Tume tuna ecuanara tyabarecuare dutya anibutebarehua cuanaque. Tumbaedyatu jae anucacuare. Yusu yusurupai aatsu, tura ecuana tyabarecuare,

ecuita cuana tyabare ishü. Tura ecuana tyabareya tupu tujatu jetiama umanashacuare. Tume tuque ecuana anibarehua cuanaque tyabarecuare. Dutya tuna araaracuare, pana jeque juya tupu. ¹² Amena dutya jequebarehuaju ecuana Jesúsra ihuaracuare:

—Ecuesi cuana nemepecue arabishahua cuanaque; ni peadya ecuesi paaputa ama, —jadya tura ecuana acuare.

¹³ Tudyá ecuana ejara cuana mepecuare. Mepetsu ecuana jequeshacuare peadya tunca beta earacana jiti arida cuanaque. ¹⁴ Amena ecuita cuana Jesúsra Yusuja casa bamere ishü pan umanashahuaju baatsu, tuna jadya jucuare:

—Pusha ama cuitadya ri riyaque ecuita Yusura riyaque yahuaju cuadisha ana ahuaque tuja quisarati ecuana cueja ishü. Riyaque ecuitadya tucue tuque ecuana ihuayaque, —jadya tuna jucuare.

¹⁵ Tunara casada tsehue ecuari juishu dujucara ayaque caadebatitsutu Jesús peya queja amaca netisicuacuare, riyaque yahuaju ecuari juishu ama junahua tibu. Tuta taca pijitu cuacuare emata dyaque barudaju.

Jesús ena dyaque eque ajecuareque

(Mt 14.22-33; Mr 6.45-52)

¹⁶ Ijeti nubihuaju, amena apunahuaju ecuana Jesúsra mepehua cuanaque bei jiruru butecuare. ¹⁷ Jesús tsehue ama ecuana jucuare. Tume ecuana anibutecuare cuabaju. Cuabaju anibutetsu ecuana carequeticara jucuare yueque macare, epu ebari Capernaum bacaniju judiru ishü. Ecuana amena carequetiyajutu apuna jida jucuare; dyaque apuda jucuare. ¹⁸ Tudyatu cuejipa casadaque jueticuare. Ena pacu casada muda jucuare. ¹⁹ Amena ecuana pishica jadya ama juatsu shucuta kilómetro cuana diruhaju tuque ecuana Jesús batsacuare ena dyaque eque ajetsu ecuana queja diruyaju. Mubatsacuare tuque ecuanara, yatanana bucha baatsu. ²⁰ Ecuana bajida juya baatsu ecuana Jesúsra quiquecuare:

—¡Bajida nejuume! ¡Idya ique! —jadya tura ecuana acuare.

²¹ Tuja etsuri bacatsu ecuana bajida jujacacuare. Jida pureama tsehue tuque ecuana iyabutyatsacuare cuabaju. Jadya juu jadya juatsu ecuana judirucuaré bei yueque macare Capernaum japadama.

Ecuita cuanara Jesús sarecuareque

²² Huecacanucatsutu Jesús sare juya cuanara Jesús tsurucuaré ama. Bei jiruru queja judirutsu, tuna bahue judirucuaré Jesúsra mepehua cuanaque Jesús tsehue ama cuahuaque, peadya cuabaju cuita camadya tumeque cuabaju

anibutetsu cuahuaque. ²³ Tuna Jesús eju cuahuaque bacadurani juyajutu Tiberias juque cuaba cuana junatibarecuare. Jaratsuracuare tuna riyabarepa buchaju pan tyahuaju Ecuana Cuatsashaquira yusurupai ahujaju, ecuita cuanara pan arachineju. ²⁴ Jadya equetu Jesús sare juya cuanaque tuque tuhuaque ama bahue jucuaire. Tumebaedya ecuanara mepehua cuanaque ecuanara tuhua amadya jucuaire. Tume tuna Tiberias juque cuaba ebari cuana junahuaju anibutebarecuare bei rique ishu. Capernaum ebuteju jaratsuratsu tuna Jesús sarera cuacuare.

Jesús earaqui buchique

²⁵ Bei yueque macare carequetitsu tunajatu Jesús banaticuare. Banatitsu tunajatu bacaduranaticuare:

—¿Eje tupumi junachine, Ebahuityaquique? Mique sare juyaque ecuanara riya, —jadya tunajatu anaticuare.

²⁶ —Pusha amadya micuana cuejaya. Riyabarepa micuana arachine pan jae jadya era tyahuaju. Jequeya tupu micuana arachine. Jadya juatsu micuanara iyacua sarenucaya ecue mihuanuca ishu. Era riyabarepa achineque eje buchique jadique pana adeba aatsu ama micuanara sareya. ²⁷ Inime tupuqui neaume earaqui masadama tereyaque, riyaque yahuaju jari tupu micuanara arayaque. Aniyatu peya micuanaja ishu earaqui buchique. Tumerá micuana iyacuaneya terenuca ishu ama ani ishu. Tumequetu IQUE ECUITARA tyayaque. Ecue Etata Yusu pureamaturayaque aniya tibu, tura cuejahua: “Tyacue ecuita cuana riyaque earaqui buchique, tuna tere baecua anisha ishuque”, —jadya tuna Jesúsra acuare.

²⁸ Tura jadya ayaju tunajatu bacaduracuare:

—¿Eje bucha anie ecuanara ejuu Yusu pureamaturajaca ishu ama? —jadya tunajatu acuare.

²⁹ —Yusura micuana tura cuadishahua queja catyatishacara aya. Idya tura cuadishahuaque. Jadya tibudyatu tuja bijida eaqueja micuana catyati ishu, —jadya tuna Jesúsra acuare.

³⁰ —Acue ecuanaja yatucaju ejeque ecuitaja ataquique ama, ecuanaja mique Mesiasque ejene ishu. ¿Ai tuquemi aya Yusuja casa tsehue ejeque ecuitaja ataquique ama? ³¹ Ecuanaja baba cuana japada midida ama anitaya cuanaju juneniyaju, tuna Moisésra dutya huecaca ara ishuque tyacuare, maná pan jiuque. Yusuja quisarati tu ehue: “Dutya huecaca tuna Moisésra tyacuare ara ishuque pan Yusura barepa juque cuadishayaque”, —jadya tunajatu acuare Jesús.

³²—Pusha amadya micuana cuejaya. Arepa ecuanaja baba cuana Moisésra maná tyacuare ama bucha, tyacuare ama tujatu ecana earaqui neri barepa juque. Ecue Etata tu tumeque earaqui neri tyaquique. Tuquetu tere baecua anisha ishunque tyaquique. ³³ Bérú Yusura barepa juque maná cuadishacuare bucha, tumbaedyá tura ique barepa juque cuadishahua. Riyaque yahuaju ani ishú arataquique bucha, tumbaedyá micuana eaqueja catyatitaqui Yusu tsehue maju baecua ani ishú, —jadya tuna Jesúsra acuare.

³⁴—Tumeque earaqui ecuana tyacue dutya huecaca, Ecuatsashaquique.

³⁵ Jesúsra tuna acuare:

—Idya earaqui neri buchique Yusuja ecuadishaque. Idya eanishaquique. Araaratsu micuana masadama aracara junucaya. Ijijitsu micuana masadama ijicara junucaya. Eaqueja nimee juyaju micuana era pureamatura neri aya. ³⁶ Jadya ama bucha micuana eaqueja catyaticarama juya, era micuana cuejahua baedyá. ³⁷ Dutya, ecue Etatara eaqueja amerehua cuanaque tu ecue cuanaque. Eaqueja catyaticara juya cuanaque tuque eaqueja ihuaraya. Bijidamadura nime ama tuna ecue. ³⁸ Ique barepa juque jehua ecue inime eque juishu ama, ecue Etataja inime eque juishu. Ique jehua Ique Cuadishaquija inime eque juishu. ³⁹ Ique Cuadishaquira narumerecara aya dutya tura eaqueja amerehua cuanaque. Jadya tibudya tunara jacaya ama. Era tuna chacha nityatsuranucabuque tere huecacaju Ique Cuadishaquija inime eque. ⁴⁰ Ecue Etataratu dutya ique adebaqui cuanaque, dutya eaqueja catyatiya cuanaque tere baecua anishacara aya. Eje tupu jacanuca ishú ama tujatu ecana tuaqueja amerecara aya. Era cuitadya tuna tere huecacaju chacha nityatsuranucabuque, —jadya tuna Jesúsra acuare.

⁴¹ Israelita cuanaja huaraji cuanatu cahuaiticuare jutidya tuque quisaratiyaju bacatsu. Quisaratibarecuare jutidya tuna Jesúsja ishú.

—Earaqui neri Yusura barepa juque cuadishahuaquepa tume, jadyatu juya. ⁴² Jeequedyá ri Jesús, Joséja ebacuaque. Adebaya tuque ecuana tuja etataque, ecuaque jadya. Tume jatsutu ¿eje bucha juatsu “Idya barepa juque ecuadishataque” jadya juya. Pusha pusha arida tuque, —jadya tuna jucuare.

⁴³ Tuna jadya quisaratiyaju, tuna Jesúsra jadya acuare:

—Jadya nequisaratiume. ⁴⁴ Ecue Etata Ique Cuadishaquiratu ecuita cuana eaqueja catyatishaya. Tura ni ecana jadya amereya ama, tume tuna eaqueja ecatyatiu amadya. Eaqueja catyatiya cuanaque tuna tere huecacaju emajuque nityatsuranucabuque. ⁴⁵ Icuene beru

Yusu equeque quisarati cuejaqui cuanaratu huenequere: “Yusura cuitadya tuna cuejabuque dutya eje bucha tujaque juishuque” jadya. Ecue Etatara cuejayaju bacaya cuanaque cuita camadya, tura cuejaya equedya aniya cuanaque cuita camadya tuna eaqueja catyatihaya.

⁴⁶ “Pusha ama cuitadya ni ejeque riyaque yahuajujatu bama ecue Etata. Ecue camadya tuque ecue Etata eba, ique tuaquejaquedya jehua tibu. ⁴⁷ Pusha amadya micuana cuejaya. Eaqueja catyatiyaque juatsu micuana terenucanime ama. Anisiribuque micuana Yusu tsehue. ⁴⁸ Idya cuitadya earaqui buchique Yusuja ecuadishaque. Idya tere baecua anishaquique. ⁴⁹ Egipto juque cuinanatsu ecuanaja baba cuanara aracuare maná barepa juque Yusura cuadishayaque. Jadya ama bucha tuna majucuaré. ⁵⁰ Aniyatu peya earaqui buchique barepa eque jecuareque. Tuaqueja catyatiyaque juatsu micuana terenuca ishú ama anibuque. ⁵¹ Idya cuitadya ique barepa juque junahuaque. Idya chacha anishaquique. Eaqueja catyatiya cuanaque tuna majunucabuque ama. Ique majudadiya, riyaque yahuaju cuanaque Yusu tsehue siri anisha ishú. Idya cuitadya catyatiibuque, riyaque yahuaju cuanaja earaqui bucha, —jadya tuna Jesúsra acuare.

⁵² Jadya bacatsutu israelita cuanaja huaraji cuana tuna cama caquemitsati caquemitsati jutibunecuaré:

—¿Eje bucha tyae tura ecuana eau tuja ecuita cuitadya ecuanaja ara ishú? ¡Eje bucha jadya juetu ejuu! —jadya tuna jubarecuare.

Adebataqui ama tunajatu bacuaré tura eje buchique jadya ayaque.

⁵³ Jesúsru bahue jucuaré eje bucha tuna tuna cama quisaratiyaque.

—Pusha amadya micuana cuejaya. Micuanara ni ecue erami araya ama, judirutaqui ama micuana Yusu queja tuque jacanuca ishú ama. ⁵⁴ Dutya micuana ecue erami ara juya cuanaque, ecue ami iji juya cuanaque micuana tere baecua anibuque, IQUE ECUITA juya tibu. Tere huecāju tuque emaju cuanaque cani juque ecuita iyacua tsehue nityatsurabuque. ⁵⁵ Ecue ecuita tu earaqui neri buchique. Ecue ami bacue eijiqui neri buchique. ⁵⁶ Ecue erami ara juya cuanaque, ami iji juya cuanaque tuna eatsehue peadya camadya bucha, ique tuna tsehue peadya camadya bucha. ⁵⁷ Ecue Etata Ique Cuadishaquiquetu chacha aniya. Maju baecua tuque. Tuque aniya tibu, ique dyadi aniyadya. Tumebaedyatu era ecue erami ara juya cuanaque anishaya. Era tuna eiyacuane amereya. ⁵⁸ Jadya tu earaqui neri barepa

juque junahuaque. Maná ecuanaja baba cuanara aracuare buchique ama tume. Arepa tuna aracuare ama bucha, dutya tuna majuterecuare. Ique barepa juque earaqui butecuare buchique. Dutya, ecue erami araqui juya cuanaque tuna maju baecua aninucabuque, —jadya tuna Jesúsra acuare.

⁵⁹ Jadya tuna Jesúsra bahuityacuare ecuita cuana Capernaumju caradati ishuque etareju.

Jesús eque cuita camadya ecuanaja maju baecua anibuqueque

⁶⁰ Jadique Jesúsra bahuityayaque bacatsutu jetiama tuque ijacabacaqui cuanara bijidamaduracuare tuja quisarati.

—Riyaque tura cuejayaque ri ibeda ejene ishu, adeba ishu jadya. Cujishaya cuita jutidya tura ecuanaja. Ni ejeratu eadebau ama, —jadya tuna jucuare.

⁶¹ Jesústu bahuedya jucuare tuna cama eje bucha cacuejatiyaque. Adebacuaredya tujatu ecana tunara tuja quisarati bijidamadurayaque. Jadya tibudya tujatu ecana bacaduracuare:

—¿Ecue quisarati tsehue ni taa micuana canimehualatishahua? ⁶² Iyacia micuana eaqueja catyaticarama juya. ¿Eaqueja ni micuana ecatyatiu, IQUE ECUITA ecue eaniqui juque butecuareque tsuranucayaju baatsu? ⁶³ Riyaque yahuaju cuanaquetu tere baecua eaniu, earaqui aratsu ama. Yusuja Espiritura camadya micuana maju baecua anishaya. Era cuejahaque ejenehua cuanaque cuita camadya tuna Yusuja Espiritu tsehue. Tuna cuita camadya tuna tere baecua anibuque. ⁶⁴ Jadya ama bucha micuana uma eaqueja catyatiama jari, —jadya tuna Jesúsra acuare.

Jesústu icuenetadya bahue jucuare eje cuanaque tuaqueja catyaticarama juhua cuanaque, ejera tuque ujeu baqui cuanaqueja inameredadiyaque jadya. ⁶⁵ Bahuityanucacuare tujatu ecana:

—Dutya ama micuana ecuique. Jadya tibudya micuana cuejanucaya. Ecue Etatara eaqueja nimee amereya cuanaque cuita camadyatu eaqueja catyatiya, —jadya tujatu ecana acuare.

⁶⁶ Jadique quisarati ayaju bacatsutu jetiama tuque quisaratiyaju pana baca juya cuanara Jesús jacacuare. Juneninucacuare ama ecana tuatsehue, tuque quisaratiyaju baca ishu.

⁶⁷ Tume ecuanaja Jesúsra bacaduracuare:

—¿Micuanara ni taa umaera aya bae jacacaradya aya? —jadya tura ecuanaja acuare.

⁶⁸ Simón Pedroratu quemitsacuare:

—Aijama, Ecuana Cuatsashaquique. Aijamatu peya ecuanaja Yusuja quisarati bahuityaquique. Mira peadya cuita camadya ecuanaja bahuityaya Yusu tsehue anisiri ishu eje bucha iyacuanetanaje juishuque. ⁶⁹ Miaqueja cuita

camadya ecuana catyatihua. Bahuedya ecuana mique cuita camadya Yusuja Ecuadishaque. Bahuedya ecuana mique cuita camadya juchama nerique, —jadyatu Pedrora acuare.

⁷⁰ —Era micuana mepehua, micuana peadya tunca beta earacana. Jadya ama buchatu peadya micuana ducunque Satanás merequi juya, —jadya ecuana Jesúsra cuejacuare.

⁷¹ Jadya quisarati ayaquetu Jesúsra yana acuare Simón Iscarioteja ebacuaque Judas bacani jadya ayaque. Tumeque Judasdy tu ecuana Jesús tsehue juneniya patya ecuana tsehue junenicuareque. Jadya ama buchatu Judasra cuitadya inamerecuare Jesús tuque ujeu baqui cuana queja.

7

Jesús tsehuequi cuanaque tuaqueja catyaticarama jucuareque

¹ Jadya juatsutu Jesús junenicuare Galilea yahua epu cuanaju. Israelita cuanaja huaraji cuana tuque iyecara jucuare cuanaque tuna Judeaju jucuare. Jadya tibudyatu tuqueja junenicarama jucuare. ² Israelita cuanaja chine ebaritu piji dyane jucuare. Riyaque chine juya tupu ecuana erere cuana catitsu tuhua ani bahue jucuare, ecuanaja baba cuana erere cuanaju béru anianinicuareque adebayaque. ³ Tuatsehuequi cuanaratu Jesús acuare:

—Rehua aniume. Judea yahuaaju dirucue; Jerusalénju dirucue chine ishu. Tuhuatu jetiama micue quisarati bacacara juya cuanaque. Tuhua adirucue Yusuja casa tsehue ni ejeque ecuitaja ataquique ama, tunaja dyadi mira aya cuanaque baishu. ⁴ Jetiamaja eadeba jucara juyaratu etehua bamere ama aya tuja casa. Jadya ejuuque tunajatu aya eje buchadya dutyara petayaju acara. Mira ecuanaja baishu ejeque ecuitaja ataquique ama aya tibu, acuedya jetiama ecuitaja yacuaju, —jadyatu tuatsehuequi cuanara acuare, tuque ijaribayaque.

⁵ Tuatsehuequi cuanaquetu tuaqueja catyatima jari jucuare. Ejeque ecuitaja ataquique ama aishuque camadya bucha tunajatu inime jucuare.

⁶ —Huecaca rique ecue juetima jari ecue casa dutya ecuita bamere ishuque. Micuanara camadyatu eau eje tupudya jutidya micuanara ai acara ayaque. Jerusalénju cuacara juatsu, micuana cuayadya. ⁷ Yusuja ama cuanaquetu micuana tsehue cahuaitiya ama. Eatsehue bacue ecana dyaque cahuaitiya, era tuna jidama aniyaque cuejajacaya amaju. Jadya tibu tunara ique ujeu baya. ⁸ Necuacue micuana Jerusalénju chine jutayaju. Ique cuaya ama jari. Juetima

jaritu huecaca tuhua ique casa cabameretiyaque, —jadya tuna Jesúsra acuare.

⁹ Tuque jadya au jadya juatsutu tuatsehuequi cuanaque Jerusalénju cuacuare. Jesús bacue ejetsunue cuita ama Galileaju aninucacuare.

Jesús chine ishu tuna erere cuana catiyaju cuacuareque

¹⁰ Eje uma huecaca tuatsehuequi cuanaque chine ishu cuahuaju amatu Jesús cuacuarenya. Batayaju amatu cuacuare, etehua cuau jipenee. ¹¹ Israelita cuanaja huaraji cuanaratu Jesús ujeu baatsu sarecuare. Chinera cuahua cuanaque ducu tunajatu bacaduranicuare:

—¿Bahua amami Jesús? —jadya tunajatu ecana bacaduranicuare.

¹² Tuhua jucuare cuanaque tuna Jesúsja ishu quisaraticuare. Etehua quisarati jipenee tuna jucuare.

—Jesús tu dyaque jidaque, —jadya tuna umae jucuare.

—Aijama, jidaque ama tume. Pusha pusha aridaque tume, —jadyatu jucuare peya cuana.

¹³ Arepa ecana jetiama Jesúsja ishu quisaratiya ama bucha, ejitaju cuita ama tunajatu quisarati acuare israelita huaraji cuanara ebacauju, tunara Jesúsja ishu jida quisarati ayaju bacatsu enerecaturauju caadebatitsu.

¹⁴ Amena chine patya patya dyane, chine terehuetu Jesús nubiticuare Yusuja etareju. Nubitsutu catibuticuare tuhua cuanaque bahuitya. ¹⁵ Israelita cuanaja huaraji cuanatu tuque jadya bacatsu anajacatacuare.

—¿Eje bucha juatsu jatsu ri riyaque dyaque inime adebabada cuita? Tuque taa tu ecuana cabahuityatihua bucha ama cabahuityatihua. Tujatu ecuita cuana bahuityataqui ama, —jadya tunajatu ecana acuare tuhua anibareya cuanaque.

¹⁶ Jesúsra tuna quemitsacuare:

—Ecue casa tsehue camadya ama tuque ecuita cuana bahuityaya, Ique Cuadishaquiya casa tsehue. ¹⁷ Ecue Etata Yusura cuatsashaya eqe juya cuanaque tuna bahue ique Yusuja inime eqe quisaratiyaque, ai ecue inime ama. ¹⁸ Aniyatu umae tunaja inime equedya jutidya ecuita cuana bahuitya juya cuanaque, Yusura casa tyaya tsehue ama. Tume cuanaque tuna jadya juya muita ishu cuita camadya. Peya cuana bacue jadya ama. Yusu Tuna Cuadishaquiya casa tsehue tunajatu ecana bahuityaya. Tuja cuanaque tuna jadya juya Yusu muimere ishu, tunadya jutidya camuimereti ishu ama. Tuna tuna yuneri quisaratiya. Tunaratu ni ejeque ijahue aya ama.

19 “Moisesratu huenecuare micuana dutya tuja cacuat-sashati equé ani ishú datse. Jadya ama bucha micuana ni ejequedya jutidya tume cuanaque cacuatsashati equé cuita aniya. ¿Eje bucha juatsu jatsu micuanara iyecara aya? — jadya tuna Jesúsra acuare.

20 Jetiama Yusuja etareju jucuare cuanaratu bacacuare Jesús jadya quisaratiyaju.

—Miquemi equijahuatique jutidya. ¿Aira jatsumi iyecara aya? —jadya tunajatu acuare.

21 Jesúsra tuna acuare:

—Icuene tuque ecue bamere pidya achine casa canajara huecacaju, ujejedaque chachanetsu. Ique jadya juya baatsu micuana eatsehue cahuaichine, canajara huecacaju mere juhua baatsu. 22 Béru tuna Moisésra deca nana ebacua cuana ecuita huitu biti catibutishacuare cuinana huecaca catsurutihuaju, achaacha equé israelita jadique adebataqui juishu. Riyaque cacuatsashati aijama jarijutu ecuanaja baba cuana ecuita huitu biti catubuti bahuedya jucuare. Arepa canajara huecaca ama bucha, tuque micuana ebacua nana cuana ecuita huitu tubutaqui tumeque huecaca, cuinana huecaca catsurutiya. 23 Canajara huecacaju micuana jubahuedya jadya, Moisésra cuatsashahua equé ama ejuu tibu. Micuana tumeque huecaca jadya juya tibu, ¿eje bucha juatsu jatsu micuana eatsehue cahuaitya era ujejedaque canajara huecacaju chachanechine baatsu? Micuanara ique aya íquepa Moisésja cacuatsashati equé ama juya jadya. 24 Masadama ejeque misida neaume pana bau amaque yuneridya tumeque inime metseque baecuaque. ‘Jidamatu juhua’ jadya neaume ejeque baatsudya jutidya. Cajuchatiya bucha datse ni tuque micuana ebau cajuchatiyaque ama. Micuanara ni ejeque jidama juya jadya aya, pana bahue nejucue yuneridya tumeque jidama juhuaque, —jadya tuna Jesúsra acuare.

Jesús “Yusu quejaque ique” jadya cacuejaticuareque

25 Tumetu umae Jerusalénju cuanaque tuna cama quisaratibunecuare:

—¿Jeequedya ama ri ecuanaja huaraji cuanara iyecara ayaque? 26 Nepetacue. Jee di taa junetiya. Ecuita cuana bahuitya juya dutyaja yacuaju. Ni ejeradya jutidya inatsu etare apudaju ishaya. ¿Cacuaretihua ni taa tu inime ecuanaja huaraji cuana? ¿Chamacama ni taa tunajatu ejenehua tumeque ecuita yuneridya Mesiasque? 27 Riyaque taa ri eje bucha jue juma Mesías. Bahuedya ecuanana riyaque ejuque jehuaque. Mesías neritu muya jutidya junabuque. Ni ejeque

buchiquetu bahue jubuque ama ejuque junayaque, —jadya tuna jucuare.

²⁸ Jesúsra tuna bahuityacuare jari Yusuja etareju. Tuna quisaratiyaque bacatsutu etsuri jebuda tsehue quisaraticuare:

—Micuanajatu inime juya ique adebaya bucha. Bahue bucha micuana cabatiya ique ejuque jecuareque. Cuji micuana juya. Ecue inime taca eque camadya ama jecuare, Ique Cuadishaquija inime eque. Tuquetu pusha pusha bae-cua; dutya tura quisarati ayaquetu ejenetaqui. Adebaya ama tuque micuanara. ²⁹ Era camadyatu pana adeba aya, ique tuaquejaquedya jecuare tibu, tura ique cuadishacuare tibu, —jadya tuna Jesúsra acuare.

³⁰ “Yusuja Ecuadishaquedya ique” jadya quisarati aya bacatsu tuna cahuaiticuare. Inatsu tunara tibene risi acara acuare. Jadya ama bucha ni ejeradya jutidya inacuare, eje uma huecaca tunaja tuque ina ishuque huecaca anicuare jari tibu. ³¹ Umaeratu ejenecuare tuque Mesiasque.

—Ebacadya tuque ecuanaja Mesías neri junatsu patu abuque ni ejeque ecuitaja ataquique ama Yusuja casa bamere ishu jadique. Jesúsra ecuitaja ataquique ama aya tibu, jutaquiju taa tu yuneri cuitadya tumeque Yusuja Ecuadishaque, —jadya tuna jucuare.

Fariseo cuanara Jesús inamere ishu ecuita cuana cuadishacuareque

³² Fariseo cuanara tuna jetiama, Jesúsra yuneridya Mesías neri jadya juyaju bacacuare. Jadya bacatsu tuna cuacuare pae cuanaja huaraji cuana tsehue quisaratira. Dutyara tupu inime bajejetsu tunajatu ihuaracuare Yusuja etare naruqui cuanaque.

—Neinaticue Jesús, —jadya tunajatu ecana acuare.

³³ Tuna tumeque inime bajeje juya tuputu Jesúsra ecuita cuana cuejaajecuarenya jutidya:

—Ejetsunue cuita ama micuana tsehue aninucaya. Masadama dirunucaya Ique Cuadishaqui queja. ³⁴ Sareya datse micuanara ique. Banucaya ama micuanara ique. Eju ique judiruyaju micuana judirutaqui ama, —jadya tuna Jesúsra acuare.

³⁵ —¿Eju jatsuri riyaque ediruu ecuanaja daditaquima baishu? ¿Ecuana ata cuana peya yahua cuana aniyaju ni taa ri dirucara juya? ¿Israelita cuana griego cuana ducuque ni taa ri anisicuaya? ¿Bahuityacaradya ni taa tujatu aya tumbaedy a israelita ama cuanaque dyadi? ³⁶ Ecuana patu sarebuque. Banucaya amapa tuque ecuanara. Ecuana judirutaqui ama eju tuque judiruyaju. Etehua buchique tume.

Adebaya ama tuque ecuanara, —jadyatu israelita cuanaja huaraji cuana tuna camadya jutidya jubarecuare.

Jesús tu ena cani juque ena ticu baecua buchique

³⁷ Jesústu ecuita cuana tsehue quisaratinucacuare. Amena ishucue chine huecacatu jucuare, huecaca dyaque muidaque. Netitsuratsutu Jesús quisaraticuare:

—Eaqueja necatyaticue, micuana majunuca baecua anicara juya cuanaque. Nejecue eaqueja, ijicaraque espereju ebutetiu bucha. ³⁸ Ehuene tu Yusuja quisarati: “Eaqueja catyatiya cuanaque tuna eiyacuane juya terenuca baecua ani ishú. Tuna ducudyatu jubuque ena cani ticu baecua buchique”, —jadya tuna Jesúsra acuare.

³⁹ Jadya cuajayaque tuna Jesúsra cuejacuare; Yusuja Espiritujatu jacanime ama Jesús queja catyatiya cuanaque. Ena cani ticu baecuaque bucha, jadidyatu Yusuja Espirituja jaca baecua juya Jesús queja catyatiya cuanaque. Jadyatu Jesús jucuare, Yusuja Espiritu riyaque yahua juunama jariju. Junataqui ama jaritu jucuare, Jesús Yusuja yacuaju muita ishú judirunucama jari tibu.

Ecuita cuanara bape bapedya jutidya Jesúsja ishú inime tupucuaque

⁴⁰ Jesús jadya quisaratiyaju bacatsutu tuhua jucuare cuanara bape bape inime tupucuaque Jesúsja ishú.

—Pusha ama cuitadya riyaquedya ri Yusu equeque quisarati cuejaquique. Mesías junabuque cuejaquiquedya tume, —jadyatu umae jucuare.

⁴¹ —Tuque ama tume, —jadyatu peya cuana jucuare.

—Tuquetu Mesías cuitadya.

Peya cuana bacue jadya jucuare:

—Aijama, tuque ama tu Mesías. ¡Eje bucha jadya jue ni tu juma! Tuque Galilea juque junahua tibu, eje bucha jue ni tu Mesías juma. Mesías neritu Galilea juque ama junabuque.

⁴² Yusuja quisarati ehue ne equetu Mesías David eque ejuracanaque jubuque. Belénjutu cuinanabuque, ecuanaja ebaba David emuique anicuare epu juque, —jadya tuna jubarecuare.

⁴³ Tumetu ecuita cuanaja juticuare amadya inime Jesús eje buchique. Caquemitsati caquemitsati jutidya ecana jucuare tuna cama. ⁴⁴ Umae cuanaratu inacara acuare. Jadya ama bucha ni ejera inacuaque.

Israelita cuanaja huaraji cuana Jesús queja catyaticarama jucuareque

45 Yusuja etare naruqui cuanaque tuna Jesusmadya judirunucacuare fariseo cuana queja, pae cuana queja jadya. Jesús dujuya ama baatsu, tunajatu ecana bacaduratsacuare:

—¿Eje bucha juatsu jatsu tuque micuana betihua ama?

46 Enaruqui cuanara tuna quemitsacuare:

—Dyaque jida ecuana bacahua tura quisarati cuana cuejayaque. Aijama tu peya, tuque bucha dyaque jida quisaratiyaque, —jadya tunajatu ecana acuare.

47 —¿Micuana dyadi tura micuana ijahuedya ahua?

48 Huaraji emuita cuanaque tuna tuaqueja catyatihua ama ni ejeque. Ni ejequedya jutidya ecuana fariseo cuana tuaqueja catyatihua ama. 49 Ecuaita jetiedya cuanaque cuita camadya tuna tuaqueja catyatihua. Jadya tuna juya, ecuanaja cacuatsashati pana adeba aya ama tibu. Tuna tuna aishuque ama. Yusura tuna nerecaturabuque, —jadyatu jucuare israelita cuanaja huaraji cuana.

50 Tuhuatu jucuare fariseo Nicodemo bacani. Tudyatu Jesús tsehue chineju quisaratira cuacuareque jucuare. Isaracuare tujatu fariseo cuana tuja ecare cuana:

51 —Dutyara tuque ecuana pana adeba aya ecuanaja cacuatsashati. Tumeque cacuatsashati eque tu tuyu ama ejeque jucha metse aishu, tumeque ecuita tsehue cuitadya quisaratimaque. Pana bahue ecuana jutaqui yuneridya tume jidama juchine jadya atayaque jidama juchineque. Jutaqui ju “jidamami juchine”, jadya amaquedya Jesús, neihuarara ecuanaja yacuaju tuque cuita quisaratisha ishü, —jadya tuna Nicodemora acuare.

52 Tunaratu acuare:

—Mira taa tu inime tupuya Galileaju cuanara inime tupuya baedya. Mique taa mi Yusuja quisarati adebayaque ama buchadya quisaratiya, —jadya tunajatu ijaribayaque acuare.

—Jesús pa Yusuja quisarati cuejaquique, jadya tuna juya. Isaracue Yusuja quisarati. Tumeque quisarati eque tu ni ejeque Yusuja quisarati cuejaquique Galilea eque junaya ama, —jadya tunajatu acuare pusha pusha ayaque.

53 Jadya juatsu tuna dirubarecuare tunaja etare cuanaju.

8

Fariseo cuanara epuna deca tsehue daditsu Jesús queja dujucuaque

1 Tudyatu Jesús tsuracuare uhua cuemusü Olivo Acui Quini bacaniju. 2 Peya huecaca apudajudyatu cuanucacuare Yusuja etareju. Jetiama ecuitaratu jipeticuare. Jipetihua-jutu Jesús anibutecuare. Anibute jadya juatsu tujatu ecana bahuityatibunenuacuare.

³ Tumidyatu cacuatsashati bahuityaqui cuanara, fariseo cuanara jadya dujuare Jesús queja peadya epuna. Arepa tuja yahuique neri aniya ama buchatu peya epuna cuanaja yahuique tsehue ani bijida jucuare. Fariseo cuanara patu peya deca tsehue jarayaju siraracuare. Tumepa tunajatu Jesús queja dujutsu, dutyaja yacuaju nityacuare tunaja peta ishu. ⁴ Tuhua iyabutyatsu tuna Jesús tsehue quisaratitibunecuaré:

—Ebhahuiyaquique, riyaque epuna tuque ecuana peya epunaja yahuique tsehue sirarahua. ⁵ Riyaque epuna tuque ecuana dyaque inime metse baya. Moisésra cuatsashahua equetu tumu tsehue iyetaqui epuna peya deca tuja caquemitiqueremaque jaraquereyaque. Mira bacue ¿eje bucha baya? ¿Tumu tsehue iyetaqui, iyetaqui ama ni taa? —jadya tunajatu acuare tuque nime adebayaque.

⁶ Tunaratu Jesús jidama quisaratishacara acuare, tuque jucha metse amerecara aatsu. Tura tuna quemitsacuare ama. Huipuchitanatsutu remecuaré jutidya. Reme jadya juatsu tujatu emetucu sapara tsehue yahuaju huenetibunecuaré. ⁷ Bacadurajacacuare ama tunaja tuque. Remehuaquetu netitsuranucacuare. Pana neti junucatsu tujatu ecaná acuare:

—Ejeque ni micuana cajuchatima cabatiya ni riya piji buchique, turadya riyaque epuna tumu tsehue maremetse paa, —jadya tujatu ecaná acuare.

⁸ Yudijidya remenucatu jucuare Jesús. Remenuca jadya juatsu tujatu huenenucacuare yahuaju. ⁹ Amena tuja quisarati bacatsu dutyadya ecaná juchaquique caadebatibarecuare, dutya jidama inime tupuhuaque adebatsu. Dutya ecaná peadya peadya cuinanabarecuare. Esiri cuanaque tuna icuene cuinanacuare, tupuju dutya ecuita cuana. Cuinanatsu tuna Jesús camadya epuna tsehue shanacuare. Amena dutya cuinanaterehuajutu Jesús neticuare. ¹⁰ Peya ecuita cuana cuinanaterehua baatsu tujatu epuna jadya acuare:

—¿Are mique jidama acara juhua cuanaque, mama? ¿Ni ejera buchiquemi tumu tsehue marehua?

¹¹ Tudyatu acuare epunara:

—Aama cuitadya, tata, ni ejera bucha. Dutya tuna cuinanaterehua.

Tudyatu Jesúsra acuare:

—Ni erami cuejaya amadya micue jucha tibu iyetanataquique. Dirucue. Cajuchatinucaume camadya, —jadya tujatu acuare.

Jesús tu hueca buchique

¹² Yudijidyatu Jesúsra isaranucacuare ecuita cuana Yusuja etareju:

—Ique hueca buchique. Yusuja quisarati micuana bahuityaya, micuana dyaque jida tuyu ani ishu. Eratu anishasiriya eaqueja nimee juya cuanaque. Jacaya amadya tuna era. Adebamereya tuna Yusu, tuna ni eje tupu apudaju juneniya cuanaque bucha juishu ama, —jadya tujatu ecana acuare.

¹³ Tura jadya ahujatu fariseo cuanara jadya acuare:

—Miquemi micue inime tacadya jutidya quisaratiya. Jadya tibudya tuque ecuana ejenetaqui ama baya mira cuejayaque, peya mique eje buchique micue ishu quisaratitaqui tibu, —jadya tunajatu acuare.

¹⁴ —Arep ecue inime tacadya jutidya quisaratiya ama bucha, era cuejayaquetu yunerique. Ique bahue ejuque ique junahuaque, eju diruyaque jadya. Micuanara bacue adebaya ama. ¹⁵ Arepa micuanara ique eje buchique adebaya ama ama bucha, micuanara “ecajuchati” jadya aya. Riyaque yahuaaju cuanaja inime tupudya jutidya tuque micuana aya. Era bacue ni ejeque buchique “Ecajuchati mique” jadya aya ama, arepa era dutya adebaya ama bucha. ¹⁶ Jadya ama bucha, era ni eau “Riyaque ri ecajuchati”, yuneri ecajuchatidya tuque. Era ni aya “Jeequeri ecajuchati”, era camadya amatu jadya aya. Ecue Etataratu tumbaedy aya. ¹⁷ Ecuanaja cacuatsashati Moisésra huenequareque tu jadya: “Beta ebaqui juhua ecatsera ni tume bae cuinetse aya quisarati, tatsera cuejayaque tu yuneri”. ¹⁸ Aniyatu beta ecue ishu jida quisaratiyaque, idya cuitadya, tumbaedy ecue Etata Ique Cuadishaquique. Tume bae cuinetse quisarati aya tibu, ejenetaquidya yatse, —jadya tuna Jesúsra acuare.

¹⁹ —¿Ejeque tuque micue Tata? —jadya tunajatu bacaduracuare.

—Ique micuanara adebaya ama. Yutsumadya ecue Etata adebaya ama tuque micuanara. Ique ni micuana eadebau, tumbaedy tuque micuana ecue Etata eadebau, —jadya tuna Jesúsra acuare.

²⁰ Jeeque tuna Jesúsra cuejacuare Yusuja etareju bahuityayaque. Tuquetu ecuita cuanara Yusuja ishu chipiru ishayaque equiniqui peque juneticuare. Tuque ujeu baqui cuanaratu tibene risi aishu inacara acuare. Jadya ama buchatu ni aira buchique inacuare ama, risita ishuque huecaca tuja juetima jari tibu.

“Eju ique diruyaju micuana judirutaqui ama” jadya Jesús jucuaque

²¹ Yudijidya bahuityanuca tuna Jesúsra acuare:

—Masadama rehuaque dirunucaya. Yanacana cuita micuanara sareya. Banucaya ama micuanara ique. Eju

ique dirunucayaju, micuana judirutaqui ama, —jadya tujatu ecana acuare.

²² Tumetu israelita cuanaja huaraji cuana cabacadurati-barecuare tuna cama:

—¿Tuta taca quiyeti ni taa ri juya? ¿Jadya tibu di taa ri jadya juya “Judirutaqui ama micuana eju ique dirunucayaju”? —jadya tuna jucuaré.

²³ —Micuana micuana rehuaque riyaque yahua juque. Ique bacue yunqueja barepa juque, riyaque yahua juque ama.

²⁴ Micuana micuana Yusuja jucha secamaque majubuque. Micuanara ni ique ejeneya ama Yusuja Ecuadishaque jadique, eaqueja nimee ama ni micuana juya, tume micuana majudadiya micuanaja jucha cuana apupashamaque, —jadya tuna Jesúsra acuare.

²⁵ —¿Ai jatsu mique? —jadya tunajatu bacaduracuare.

Tume tuna Jesúsra quemitsacuare:

—Bahuedya ni micuana. Eje uma cuejadya micuana ahua amena. ²⁶ Aniya jari tuque ecue jetiama micuana cuejacara ayaque. Adebamerecara micuana aya micuana ecajuchatique. Arepa micuanara ique ejeneya ama ama bucha, era cuejayaque tu yunerique, Ique Cuadishaquique pusha pusha baecua tibu. Tura ique bahue amerehuaqueri era cuejaya riyaque yahujaju cuanaque, —jadya tuna Jesúsra acuare.

²⁷ Jesusratu Etataque Yusu jadya ayaque jadya quisarati acuare. Jadya ama bucha israelita huaraji cuanara adebacuare ama. ²⁸ Jadya tibudya tujatu ecana pana cueja aajecuaredya jutidya.

—Iyacia micuanara adebaya ama ique aique. Ique curusuju tatameretsu eje umara micuanara adebabuque ique Yusuja Emepeque. Chamacama micuana umae bahue jubuque era ecue inime taca eque ama ayaque. Chamacama micuana bahue jubuque, era ecue Etatara cuita camadya bahue amereyaque era cuejayaque. ²⁹ Eratu ajacaya ama Ique Cuadishaquira amereyaque. Jadya tibudyatu tuque eatsehuedya. Jacanime ama tuja ique, —jadya tuna Jesúsra acuare.

³⁰ Jadya Jesúsra cuejayaju bacatsu tuna umada catyaticuare tuaqueja.

Yusuja cuanaque, Ijahuaja cuanaque jadya

³¹ Jesússtu israelita cuanaja huaraji cuana tsehue quisarat-inucacuare, tura cuejayaque ejenequi juhua cuana tsehue:

—Micuana ni era amereya eque juajeyadya jutidya, tume micuana yuneridya ecue cuanaque. ³² Yuneridya ni micuana ique eje buchique cabahuityatiya, adebadadiyadya tuque micuana yunerique era cuejayaque. Pana adeba aatsu

micuana einajacaque bucha. Metsequi bucha micuana jujacaya, —jadya tuna Jesúsra acuare.

³³ —¡Ecuana ecuana Abraham eque ejuracana cuanaque! ¡Ni eje tupu ecuana emetsene cuanaque bucha! ¿Eje bucha jutatsu jatsumi “Metsequi cuana bucha ecuana jujacaya” jadya juhua? —jadya tunajatu acuare Jesús.

³⁴ —Cajuchaticaraque cajuchatiya cuanaque tuna emetsene cuanaque bucha, cajuchatijacataqui ama cabatiya tibu. Tunaja ishutu eje bucha cajuchatijacataqui ama, emetseneja tuque metseque eje bucha jacataqui ama bucha. Satanás tu cajuchatiya cuanaque metseque. ³⁵ Metsequiquetu emechiqui jaque ejujacaudya, emechiquira catyati ahua. Emechiquija ebacuaque bacue, tuja ebacuaque jujacanime ama. Narujacaya amadya tuja tuque. ³⁶ Ique Yusuja Ebacuaque. Era micuana inajacamerehuaju tumetu Satanás ama micuana metseque. Amena micuana tura cuatsashaya eque jutaqui ama. Pana einajacadya micuana juya. ³⁷ Arepa micuana Abraham eque ejuracanaque ama bucha, micuanara ique iyecara aya, micuanara era bahuityayaque ejenecarama aya tibu. ³⁸ Ecue Etatara bahuityayaque micuana era bahuityaya. Satanás tu micuanaja tata. Micuanaratu tura cuatsashayaque ajacaya ama, —jadya tuna Jesúsra acuare.

³⁹ —¡Aijama! Abraham tu ecuanaja etata. Tuque anicuare bucha ecuana aniya, —jadyatu israelita cuanaja huaraji cuanara quemitsacuare.

—Arepa micuana Abraham eque ejuracanaque juya ama bucha, micuana tuque anicuare bucha ama aniya. Yuneridya ni micuana Abraham anicuare bucha anicara juya, tume taa micuana Yusura amereya eque eaniu tuque anicuare bucha. ⁴⁰ Jadya ama bucha, arepa era micuana yunerique ecue Etata Yusura bahuityahuaque cuejehua ama bucha micuanara iyecara aya. ¡Abraham tu jadya ejuu ama! Turatu ejenecuare Yusuja yunerique quisarati cuejayaju. ⁴¹ Satanás juya bae cuitadya micuana juya. Tuque tuque micuanaja tata buchique, —jadya tuna Jesúsra acuare.

—¡Aijama, jadya ama tuque! Yusuja biji eque ecuana aniya. Yusu peadya camadya tuque ecuanaja Tata, —jadya tunajatu Jesús acuare.

⁴² —Ique Yusu quejaque jehua. Tuja casa eque junahua riyaque yahuaju. Yuneridya ni micuanaja Yusu Tata ejuu, iyuhueda micuanara ebau. Ique jehua ecue inime taca camadya ama. Yusura cuadishaya tibu ique jehua. ⁴³ Ecue quisarati tu micuanaja ishuhua buchique, micuana tueque jucarama juya tibu. ⁴⁴ Micuanaja tata tu Ijahua jutidya.

Micuaana micuaana junenicara juya tuja biji eque. Ijahu-
 atu yuequedya quiyeti puji juhua. Tuquetu yuneri quis-
 arati baecua; pusha pushadya jutidyatu tuque juya, tuque
 pusha pusha arida tibu. Tuque equequedya tu dutya yuneri
 quisarati baecua cuanaque. ⁴⁵ Ique bacue pusha pusha
 baecua. Jadya ama bucha micuanara ejenecarama aya.
⁴⁶ Dutyara micuanara adebaya ique cajuchatimaque. Ni
 ejeja micuanaja “ecajuchati” jadya ataqui ama. Jutaqui ju
 jatsu micuanara ¿eje bucha juatsu ejenecarama aya era
 yunerique cuejayaju? ⁴⁷ Yusuja cuanaquetu tuja quisarati
 equedya juya. Yusu jaque ama micuaana. Jadya tibudya
 tuque micuaana Yusuja quisarati bacacarama aya, —jadya
 tuna Jesúsra acuare.

Jesús tu dyaque inime metseque Abraham bucha ama

⁴⁸ Israelita cuanaratu acuare:

—Yuneridya mique ecuana ijahua cuanara quijahu-
 atishayaque jadya achine. Masa dyadi mi Samaria juque,
 ecuanara quisarati ahua baedya, —jadya tunajatu acuare.

⁴⁹ —Ique equijahuatique ama. Ni ejeque ijahuara ique
 cuatsashaya ama. Eratu ecue Etata muiya. Micuanara bacue
 ique muiya ama. ⁵⁰ Arepa ique ita taca camuiticarama juya
 ama bucha, ecue Etatara ique muimerecara aya. Turatu
 nerecaturabuque ique muicarama juya cuanaque. ⁵¹ Pusha
 amadya micuaana aya. Ejeque era cuejaya eque aniyaque tu
 maju ishunque ama, —jadya tuna Jesúsra acuare.

⁵² Tumetu israelita cuanaja huaraji cuanara acuare:

—Jadya mira cuejayaju bacatsu, ecuana bahuedya mique
 equijahuatique. Abrahamtu Yusura amerehua eque an-
 icuare. Jadya ama buchatu majucuaré. Beru Yusuja quis-
 arati cuejaqui jucuaré cuanaque tuna Yusura amerehua eque
 anicuare. Jadya ama bucha tuna majucuaré. Tume jatsumi
 ¿eje bucha juatsu “Ejeque era cuejaya eque aniyaque tu maju
 ishunque ama” jadya juya? ⁵³ Abraham, Yusuja quisarati
 cuejaqui cuanaque jadya tuna majucuaré. ¿Ejetsunuetu micue
 tunaja bucha dyaque casa aniya maju ishuna? ¿Ai bucha
 jatsumi mique cabatiya? —jadya tunajatu acuare.

⁵⁴ Jadya tuna juyaju bacatsu tuna Jesúsra acuare:

—Ique ni ita tacadya jutidya ecasumitiu, tume taa ni
 aira buchique eejeneu ama. Jadya ama bucha ita taca
 ama camuimeretiya; ecue Etatara muimereya, tumeque
 micuanara micuanaja Tatapa Yusu ejuu jadya ayaquedya.
⁵⁵ Micuanaratu adebaya ama. Era camadyatu pana adeba
 aya. Ique ni “Yusutu era adebaya ama”, jadya ejuu, pusha
 pusha arida ejuu, micuaana bucha. Tume bacue eratu yuneri
 adebaya. Eratu aya tuja eje bucha quisarati juya equedya.

⁵⁶ Abrahamtu dyaque pureama jucuaré, ejeque huecaca ique, Einajacamerequique junaya jadya bahue juatsu. Ique baatsutu dyaque pureama jucuaré, —jadya tuna Jesúsra acuare.

⁵⁷ —¡Eje bucha jadya juemi ejuu! Aijama jari taa tuque micue ni pishica tunca mara. ¿Tume jatsumi eje buchique “Abraham tuque ecue eba” jadya juya? —jadyatu israelita cuanaja huaraji cuanara acuare.

⁵⁸ —Era cuejayaque tu yuneridya. Ique anihua Abraham ejitaju junime ama jariju, —jadya tuna Jesúsra acuare.

⁵⁹ Jadya ayaju tunajatu tumu inacuare, tuque iyecara aatsu. Tunara jadya ayajutu Jesús etehua cuinana jucuaré Yusuja etare juque.

9

Jesúsra yuequedya shuhuique capetatishacuareque

¹ Jesusratu badirucuaré ecuita yuequedya shuhui ecuinanaque.

² —Ebahuityaquique, pusha amadya ni ri riyaque aija juchaju cuana jadya cuinanahua. ¿Shuhui ri, ecuaque, etataque ecatase cajuchatihua tibu, tuja cuita juchajudya ni taa? ¿Aija juchajuri riyaque shuhui cuinanacuare? —jadya tuque ecuaana bacaduracuare.

³ Jesúsra ecuaana quemitsacuare:

—Micuana micuana dyaque cuji eju. Ni ejeja juchaju amatu tuque jadya cuinanahua. Jadyatu cuinanahua, ai tuja juchaju ama ni tuja etataque ecuaqueja juchaju ama. Riyaque ecuita tu shuhui, tuque capetatiya baatsu, peya cuana Yusuja dyaque casa aniyaque bahue juishu. ⁴ Yusura ique cuadishahua tuque cuarequi mere juishu. Huecada tupu camadya ecuaana mere juya bucha, jadidya tuque ecuanaja meretaqui emajaca aniya jari tupu. Apunahuaju bacue ecuaana amena mere jujacaya. Jadidyatu juetibuque huecaca ecuanara tuque merejadadiyaque. ⁵ Ique riyaque yahuaju aniya tupu, ique hueca bucha, era micuana Yusu adebamereya tibu, —jadya ecuaana Jesúsra acuare.

⁶ Jadya quisarati aatsu tujatu ecuedi pushacuare yahuaju. Uyuuyu pijitu acuare tuja ecuedi tsehue. Tumeque uyuuyu tsehuedya tujatu pepacuare shuhuija yatucaju, tuque capetatisa ishu.

⁷ —Cuacue. Cajibururutiticue enahuicuare Siloé bacaniju, —jadyatu Jesúsra shuhuique acuare. (Siloé jadique tu “ena jiriquini peya ejiri quiniju pacacadiruyaque”).

Cuaatsutu shuhuique cajibururutiticuare. Juetinucatsutu capetaticuare amena. ⁸ Jadya baatsutu tumeque ecuita aniya

peque aniya cuanara tumebaedya icuene tuque chipiru ba-caani juyaju baqui jucuare cuanara jadya acuare:

—Nepetacue. Rियाque ecuitadya ri chipiru baca juyaque anianicuareque, —jadya tuna jucuare.

⁹ —Tudya tume. Tumeque ecuitadya tume, —jadyatu umaera acuare.

—¡Aijama! Tumeque bataqui cuitadya tuque. Jeeque ecuita ri peya. Tuque ama tume, —jadyatu peya cuana jucuare.

Tumetu Jesúsra capetatishhuaque jadya cacuejaticuare:

—Idya ique; shuhui cuinanacuarequedya ique.

¹⁰ —¿Eje bucha capatatiemi juhua? —jadya tunajatu bacaduracuare.

¹¹ —Tumeque ecuita Jesús bacaniratu uyuuyu piji ahua. Tumeque uyuuyu tsehue pijidya tura yatucaju pepahua. Tuequedya tura ahua: “Cuacue Siloéju. Cajibururutiticue.” Jadya tura ahua judya ique cuahua. Cajibururutitihua. Cajibururutititsu amena capetatihua, —jadya tujatu ecana acuare.

¹² —¿Eje dyane jatsu tumeque ecuita? —jadya tunajatu acuare.

—Juhua aba. ¿Eje queja cuana taa rique? —jadya tujatu ecana acuare.

Fariseo cuanara ecuita shuhuique capetatihuaque bacadura bacadura acuareque

¹³⁻¹⁴ Canajara huecacajutu Jesúsra tuja ecuedi tsehue uyuuyu aatsu shuhuique capetatishacuare. Jadya tibudyatu umaera capetatihuaque fariseo cuana queja dujucuare. ¹⁵ Junatihua jutu fariseo cuanara bacaduratsacuare:

—¿Eje bucha capetatiemi juhua?

—Jesúsra pepahua uyuuyu tsehue yatucaju. Jadya ahua ju cajibururutitihua. Cajibururutititsu amena capetatihua, —jadya tujatu ecana quemitsacuare.

¹⁶ Tuequedya umae fariseo cuana jadya jucuare:

—Tuque capetatishaquiquetu canajara huecacaju mere juhua. Jadya tibudya ni tu Yusu equeque amadya, cacuat-sashati cuana eque ama juya tibu.

Peya fariseo cuana bacue jadya jucuare:

—Shuhui cuanaque capetatishaquiquetu juchamaque ejuu. ¡Eje bucha bameree ni tu ama Yusuja casa cajuchatiyara! —jadya tuna jucuare.

¹⁷ Adebataqui ama baatsu tunajatu yudijidya bacaduranuca acuare Jesúsra capetatishhuaque:

—¿Eje bucha tuquemi inime tupuya tumeque ecuitaju? Tura mique capetatishhua tibu, ¿ai bucha tuquemi adebaya? —jadya tunajatu acuare.

—Tudyatu Yusu equeque quisarati cuejaquique. Tuquetu Yusuja Ecuadishaque, —jadya tujatu ecana acuare.

18 Israelita cuanaja huaraji cuanaratu ejenecarama acuare.

—Shuhui ama tucuetu cuinanacuare, —jadya tuna jucuaire.

Jadya tibudya tunajatu ihuaracuare tuja etataque, ecuaque jadya bacadura ishu.

19-20 —¿Metseja bacuadya ri riyaque ecuita?

—Jejee, yatseja ebacuadya tume.

—¿Shuhui cuinanacuare?

—Jejee, shuhuidyatu cuinanacuare.

—¿Tume jatsuri iyacua eje bucha capetatie juya?

21 —Juhua aba. ¿Eje bucha capetatie cuana taa tu juhua? Baecua yatse aira tuque capetatishahuaque. Tuquetu amena esiri. Ebacua piji ama tuque. Ita nebacaduracue tuque. ¡Eje bucha cacuejatimaedyatu juma! —jadya tuna etataque ecatsera acuare.

22 Tatsejatu inime jucuaire:

—Ecuana huaraji cuanatu juchine: “Nubitaqui amatu caradati ishuque etareju ‘Jesús tu Yusuja Emepeque’ jadya ejenequi juyaque”.

Jadya tibudya tatse huaraji cuana mubatsu jadya caque-mitsaticuare. 23 Jadya tibudya tuna ecuaque etataque ecatsera jadya acuare: “Ita taa nebacaduracue. Tuquetu amena esiri. Ebacua piji ama tuque”.

24 Yudijidya ihuaranuca tuna anucacuare capetatihuaque.

—Tuyu ecuana cuejacue, Yusura mira dutya quisarati ayaque bacayaque adebatsu. Ecuana ecuana bahue mique capetatishaqui juhuaquetu jucha aridaque. ¿Jadidya?

25 —Ique baecua tuque juchaqui, juchama jadique. Camadya ique bahue. Ique yuequedya shuhui capetatiyaque ama tura capetatishahua, —jadya tujatu ecana acuare.

26 Yudijidya bacadura tunajatu anucacuare tumeque ecuita:

¿Eje bucha capetatishae cuita turami ahua? —jadya tunajatu acuare.

27 —Amena micuana cueja beta ahua. Ejenecarama micuana aya. ¿Aishu jatsu micuana yudijidya cuejanuca cuejanuca eau? ¿Micuana ni taa micuana junenicaradya juya tuatsehue? —jadya tuna ecuitara acuare.

28 Ecahuaiti tuna jucuaire tuatsehue. Ijillahuanacuare tunaja tuque.

—¡A, aijama! Ecuana ecuana tuatsehue junenicarama juya. Mique taa tuatsehue junenicue, ecuana aijama. Ecuana naratu ejeneya Moisésra huenecuareque camadya. 29 Ecuana ecuana bahue Yusu Moisés equé quisaraticuareque. Jesús bacue ecuana adebaya ama ni riyá piji buchique, ni ecuana bahue aira cuadishahuaque, —jadya tunajatu acuare.

³⁰ Ecuitara tuna jadya anucacuare:

—Micuana micuana dyaque inime adebabada cabatiya. Jadya ama bucha micuana baecua aira cuadishahuaque. Baecua micuana ejuque tuque jehuaque ique capetatishaquique. ¡Era taa bape baya, micuana tuque ejuque baecua baatsu! ³¹ Ecuana ecuana bahue, Yusura juchaquique tuatsehue quisaratiyaju bacayaque ama. Turatu bacaya tuja biji eque aniya cuanaque cuita camadya. Tuque muiqui cuanaque camadya tujatu ecana bacaya. ³² Yahua nanada equeque riyaque huecaca tuputu ni ejejadya jutidya ecapetatishau shuhui cuanaque. Jadya ama bucha Jesúsra iyacua capetatishahua. ³³ Tuque ni Yusuja Ecuadishaque ama ejuu, eje bucha capetatishaedya tura ama. Yusuja casa tsehueque ama tu ainya juma, —jadya tuna ecuitara acuare.

³⁴ —¡Miquemi peya cuana bucha dyaque jucha aridaque! Micue juchajudyami shuhui cuinanacuare. Mique jadya ama bucha, mira ecuana ecuana cuitadya bahuityacara aya, —jadya tunajatu acuare.

Cuinanashacuare tunajatu tunaja yacua juque.

Jesús queja catyaticarama juya cuanaque shuhui buchique

³⁵ Jesústu bahue jucuare tumeque ecuita tunara tunaja yacua juque cuadishahuaque. Tuequedya tujatu tsuruticuaere quisaratiquere ishu. Tsurutsatsu tujatu jadya bacadu-ratsacuare:

—¿Midyami ECUITA queja catyatihua? —jadya tujatu at-sacuare.

³⁶ —¿Ejeque tuquemi jadya aya, tata? Bamerecue ique, ique ejeque mira jadya ayaque bahue juishu, ique tuaqueja catyati ishu, —jadya tujatu acuare.

³⁷ —Tudya tuquemi iyacua cuita petaya. Tuatsehuedyami quisaratiya. Idya IQUE ECUITA.

³⁸ Jadya bacatsutu nuyucuaere Jesúsja yacuaju, tuque muiyaque.

—Iyacua ique miaqueja catyatiya, Ique Cuatsashaquique, —jadya tujatu acuare.

³⁹ —Ique riyaque yahuaaju jehua eaqueja catyatiya cuanaque jidaque tyaishu, ique bijidamaduraqui cuanaque nerecatura jadya aishu. Yusuja quisarati adebaya ama cuanaque tuna shuhuique bucha. Ique jehua tuna Yusuja quisarati adebamerera, tuna shuhuique bucha ama juishu. Peya cuanatu yanacana adebayapa tuna Yusuja quisarati jadya juya. Jehua ique tunara adebaya ama jadique bamerera, capetatiya bucha cuanaque shuhui amerera, —jadya tuna Jesúsra acuare.

⁴⁰ Jadya quisaratiyaju bacatsutu umae fariseo cuana tuque peque cuanaque jadya jucuaré:

—¿Ecuana ni taa mira ecuana shuhui buchadya baya? — jadya tunajatu acuare.

⁴¹ Jesúsra tuna acuare:

—Aijama ni micuanaja Yusu eje bucha adebae aishuque ejuu, dyaque cuita ama micuana ecajuchati ejuu. Tume micuana dyaque ecajuchati, tura cuatsashaya eque ama aniya tibu, arepa micuana pana adeba aya jadya juya ama bucha. Yusura micuana shuhuique bucha baya.

10

Jesúsra uhuisha naruquique cuatsabiji cuejacuareque

¹ Yume bucha isaranucadyatu Jesúsra acuare fariseo cuana:

—Peadya ecuitatu uhuisha taracaju etsecue eque ama nubicuare. Taraca dyaque eque tsuratsu jutidyatu nubicuare. Tumequetu emechiqui ama jucuaré, chiri puji jutidya. Uhuisha cuana ina, duju jadya aishu jutidyatu nubicuare. ² Anicuairetu peya ecuita. Tumetu etsecue eque nubicuare. Tuquetu uhuisha cuana metseque neri jucuaré. ³ Etsecue naruquiratu etsecue pacashaya uhuisha naruquique neri nubi ishu. Tume tujatu uhuisha tunaja ebacani eque cama ihuarabareya. Uhuisha cuanara tujatu etsuri adebaya. Tura tuna taraca juque etsecue eque cuinanashaya. ⁴ Tuna cuinanashatsu tuna turadya huidujuya. ⁵ Tunara adebayara ama huidujucara ayaju tunajatu tupujudya aya ama. Huanaya jutidya tuna, tuja etsuri adebaya ama tibu, — jadya tuna Jesúsra acuare.

⁶ Jadya cuatsabiji cuejayaque tuna Jesúsra acuare; tuja cuanaratu tuque adebaya, uhuisha cuanara enimetseque neri eadebau bucha. Jadya ama bucha tuna huecatanacuare ama tura cuejayaque. Ai ibeda buchiquetu tunaja ishu jucuaré.

Jesús tu uhuisha naruquique neri buchique, tuja cuanaque jida naruquique

⁷ Jadya tuna Jesúsra bahuityanucacuare:

—Pusha amadya micuana cuejaya. Ique etsecue buchique, uhuisha cuana nubiquique etsecue buchique. Ique equetu Yusu queja nubidirutaqui. ⁸ Ique junama jariju tuna jetiama junacuare. Yusuja ecuadishaquepa jadya tuna jucuaré; yuneri ama. Tunadya tuna chiri puji cuana buchique; uhuisha metsequi cuanaque dujucara juya buchique tuna. Eaqueja catyatihua cuanaque tunajatu eaquejaque nime huallacara datse aya. Ecue cuanara tunajatu quisarati bacaya ama, uhuisha cuanara tuna metseque ama bacacarama eau bucha. ⁹ Idya Yusu queja enubicuare. Uhuisha cuanatu

taracaju nubihuaaju aija eje bucha ataquí ama; jadidya tuque eaqueja catyatiya cuanaque inajacamerebuque. Uhuisha cuana nutsa jidaju araara ishú dujuta bahue bucha, jadidyatu era tyaya ecue cuanaque tunara sareya cuanaque.

¹⁰ “Chiri pujitu nubi bahue chirira, uhuisha cuana tsapetilla ishú, iye jadya aishu. Jadya ishú camadyatu nubi bahue taracaju. Ique bacue jecuare eaqueja catyatiya cuanaque dyaque jida, pureama ani ishú, tuna ani siri ishú. ¹¹ Ique uhuisha metseque uhuisha cuana jida canarutiyaque buchique. Uhuisha jida naruquique tuja uhuisha cuna jiteque equiyemeretiu bucha, jadidya ique iyetadadiya ecue cuanaque jiteque. ¹² Etsahuaquiratu uhuisha cuana naruya etsujequi ina ishú cuita camadya, ai tuna narucara aatsu ama. Tuquetu tuna naruquique ama ni tuna metseque. Jadya tibudya tujatu iba batsatsu, uhuisha cuana shanaya. Tujaque ama tibu, tujatu ecana icueneya ama. Tumetu ibara aracara ayaju uhuisha cuana dutya queja tsapetanatereya. ¹³ Jadya tu Yusuja ama ecuadisha cuanaque. Naruya ama tunajatu ecue cuanaque. Shanaya jutidya tunajatu ai mudaque baatsu.

¹⁴⁻¹⁵ “Ique uhuisha naruqui neri buchique, ecue cuanaque jida naruquique. Adebaya tuque ecue cuanaque. Ecue Etatara ique adebaya, iyuhueda jadya baya. Era dyaditu adebaya, iyuhueda jadidya baya. Tume bae nucadyatu era ecue cuanaque adebaya, iyuhueda jadya baya. Tunara bacue ique iyuhuedadya baya. Uhuisha naruquira tuja uhuisha cuana jida naruya bucha, tumbaedyá ique ecue cuana jiteque iyetadadiya. ¹⁶ Dutya uhuisha cuana tu peadya taracaju yuhua cama ama. Tumbaedyatu ecue cuanaque riyaque epuju camadya ama aniya; dutya queja tuna aniya. Tuna tuna eaqueja catyatidadiya. Tuna tuna era anishacara aya eque anidadibuque. Peadya camadya bucha tuna amereya, uhuisha cuana peadya cuareque camadya bucha. Ique peadya camadya tuna naruquique judadiya.

¹⁷ “Ique iyetanadadiya tuna Ijahua quejaque inajacamere ishú. Majutsu chacha netitsuradadinucaya. Tume ecue Etatara dyaque iyuhueda baya tuja inime juya eque ique tuna inajacamere ishú iyetanadadiya tibu. ¹⁸ Ique ecue inime taca eque iyetanadadiya eaqueja catyatiya cuanaque inajacamere ishú. Jadya jutaquique ama juatsu, ni aira buchique ique eiyeu ama. Aniya ecue inime iyeta ishú. Chacha netitsuranuca ishú ecue inime aniyadya. Jadyatu ecue inime tacaquedya jutidya, tumbaedyá ecue Etataja inime ique majutsu netitsuranucaya, —jadya tuna Jesúsra acuare.

¹⁹ Jadya cuejayaju bacatsutu israelita cuanaja huaraji cuanaja dutya tupu ama inime jucuaré Jesús bacanuca ishú.

²⁰—Tumequetu ijahua cuanara quijahuatishayaque. Equijahuatique tume. ¿Eje bucha juatsu jatsu tuque micuana bacayadya jutidya? —jadya tuna jucuaire jetiama.

²¹—Aijama, equijahuatique ama tume. Ni ejeque equijahuatiquetu tuque quisarati bucha jida piji equisaratiu ama. Eje bucha capetatishanucæ ni tu ama equijahuatira shuhui cuanaque, tura ahua bucha, —jadyatu peya cuana jucuaire.

Israelita cuanaja huaraji cuanara Jesús bijidamaduracuareque

²² Eje uma huecaca junucatsutu israelita cuanaja huaraji cuana tsehue Jesús quisaratitinuacuaire. Eje uma badi cuetihuaju tuna chine junucacuare Jerusalénju. Mara cuetihuie tuque ecuanaja chine abahue jucuaire, ecuanaja baba cuanara Yusuja etare asicada cuanaque pana cuinanasha acuareque adeba ishuque. ²³ Jesússtu junenicuaire Yusuja etare ehueji quinida emaque Salomón Adeba Ishuque bacaniju. ²⁴ Israelita huaraji cuanara baatsu tunajatu tabucuaire. Bacaduracuare tunaja tuque:

—¿Midyami Mesías Yusuja Emepeque? Ejitaju adebataqui ecuana cuejacue mique jadique juatsu, ecuanaja ejene piisi aishu. Beru mira ecuana amena cuejacuejanichine ecuanaja adebataqui ama, —jadya tunajatu acuare.

²⁵ Tudyá tuna Jesúsra quemitsacuare:

—Jadya datse micuana cuejehua ique aique. Ejenecarama micuanara ahua. Eje uma audya tuque ahua Yusuja casa bamere ishu. Tume cuanaque aatsudya micuana ejitaju bamerehua ique Mesiasque, Yusuja Emepeque. ²⁶ Micuanaratu ejeneya ama ique Mesiasque, micuana ecuique ama tibu. ²⁷ Ecue cuanara ique adebaya ique aique. Eratu adebaya eje cuanaque ecue cuanaque. Uhuisha cuana tuna naruquira amereya equue juya bucha, jadidyatu ecue cuanaque era amereya equedyá juya. ²⁸ Eratu ecue cuanaque majunuca baecua anishaya. Ni eje tupu jakanuca ishu ama tuna Yusuja yacuaju judirubuque. Aija secanime ama ique. ²⁹ Ecue Etatara tuna eaqueja nimee amerehua. Aijamatu peya tuque bucha casaeque. Ni aira buchique tuna ecue Etataja emetucu juque secaya ama. ³⁰ Ecue Etataja casa aniya bae cuita nucadyatu ecue casa aniya, —jadya tuna Jesúsra acuare.

³¹ Jadya tuque juyaju bacatsutu israelita cuanaja huaraji cuanara amena inaticuaire tumu, tuque iyecara aatsu.

³² —Eje uma audya tuque micuanaja yacuaju achine ai jidaque ecue Etataja casa tsehue. ¿Ai, eje buchique era achine baatsu micuanara tumu tsehue acara aya? —jadya tujatu ecana acuare.

³³ —Miquemi ecuita jutidya; miquemi Yusu tsehue beta tupu ama. Pusha pusha juyaquemi Yusu tsehue beta tupupa mique jadya juya. Miratu Yusu cahuaishaya micue quisarati tsehue. Jadya tibu mique ecuana tumu tsehue acara aya, ni mira ai jidaque ahua tibu ama, —jadya tunajatu acuare.

³⁴ Jesúsra tuna quemitsanucacuare:

—Micuanaja cacuatsashatiju tu ehue Yusu jadya jucareque: “Micuana micuana yusu cuana”. (Jadya tujatu quisarati ahua ecuatsashaqui cuanaque jadya ayaque, Yusuja casa eque ecana enaruqui juhua baatsu.) ³⁵ Bahuedya ecuana Yusuja quisaratiju ehueque pusha pushaque ama, ni riya piji buchique. Yusura cuitadyatu acuare tura tuja quisarati bacamerehua cuanaque “yusu cuana” jadya. ³⁶ Yusura cuitadya ique mepehua riyaque yahuaju cuanaque Ijahua quejaque inajacamere ishu. Turadya ique rehua cuadishahua. ¿Eje bucha juatsu micuana erapa Yusu cahuaishaya jadya aya, ique Yusuja Ebacuaque jadya juhua baatsu, beta tupu tuque yatseja casa aniya jadya ique juhua baatsu? ³⁷ Era ni ecue Etatara ayaque aya ama, jutaquiju nee-jeneumedy a ique tuaquejaque jehuaque. ³⁸ Era cuejahuaque bacatsu ni micuanara ejenecarama aya, era Yusuja casa bamere ishu ahua eque neejeneque. Micuanara ni yuneridya ejeneya ique Mesiasque, tume micuanara yuneridya ejeneya ecue casa ecue Etataja casa tsehue beta tupuque, —jadya tuna Jesúsra acuare.

³⁹ Jadya juyaju bacanucatsutu israelita cuanaja huaraji cuanara dujucara anucacuare risitsu. Jesúsra huananucacuare jutidya.

⁴⁰ Jesús, ecuana tura mepehua cuanaque jadya ecuana dirunucacuare Jordán cueri yueque macare. Tuhua ecuana judirunucacuare Juan ecuita cuana utsa icuene jucareju. ⁴¹ Umada ecuita cuanaratu baticuare tuque quisaratiyaju bacacara aatsu.

—Juan Ecuita Cuana Utsaquiratu acuare ama ni ai buchique ecuitaja ataquimaque. Jadya ama bucha tura ecuana cuejahua riyaque ecuita eje buchique. Dutyadya tujatu cuejahua riyaque ecuita eje buchique yuneridya, —jadya tuna jucare.

⁴² Tume tuna Jesús queja tuhuaque jetiama catyaticuare.

11

Lázaro majucareque

¹ Anicuretu ecuita Lázaro bacani. Cujejedaditicuare tuque. Tuquetu María, Marta jadya tsehuequique jucare. Betaniaju tuna anicure. ² Mariatu Ecuana Cuatsashaqui

ehuachiju etseri ijimedaque juratillaqui jucuareque jucuare, juratsu etsaru tsehue tillaqui jucuareque. ³ Tatse tsehuequique ujejeda juhuaju tatsejatu Jesús cuejamerecuare.

—Ecuana Cuatsashaquique, Lázaro micue iyuhuedaque tu dyaquene cuita, —jadyatu cuejamerehuara Jesús cuejaticuare.

⁴ Jadya quisarati bacatsutu Jesús jucuare:

—Jejee, ujejeda dyaquene cuita tuque. Yusu casa cabamereti ishutu jadya juya. Yusu, ique jadya muita ishutu jaya juya. Ai tuque maju ishü ama tu jadya, —jadyatu Jesús jucuare.

⁵ Iyuhuedatu Jesúsra Marta, María, Lázaro jadya bacuare.

⁶ Arepa tuna iyuhueda baya ama bucha, Lázaro ujejeda dyaquene cuita jadya bacaya ama buchatu yume cuau ama jucuare. Aninucacualetu tuhua beta huecaca.

⁷ Jadya juatsu ecuana Jesúsra acuare:

—Necuanucara iyacua Judeaju, —jadya tura ecuana acuare.

⁸ —Ecuana Bahuityaquique, amena ishü mique Jerusalénju jutihuaju taa mi israelita cuanaja huaraji cuanara tumu tsehue iyecara achine. ¿Tumemi eje bucha juatsu tuhua cuacara junucaya? —jadya tuque ecuana acuare.

⁹ —Cuayadya ique. Ijetira ecuana peadya tunca beta earacana ura udaya dutya huecaca. Ejeque huecadaju ajeyaquetu chicaya ama, tura riyaque yahua juque hueca eque petaya tibu. ¹⁰ Ejeque meta ajeyaquetu echicau, tuja hueca ama tibu, —jadya ecuana Jesúsra acuare.

(Jadiquetu Jesúsra quisarati jadya acuare. Tuquepa eje bucha iyetae juma Yusura huecaca iyahuaque juetimaju.)

¹¹ Yara tupu juatsu tura ecuana cuejanucacualetu:

—Ecuana iyuhuedaque Lazarotu tahuiya. Pacabatishati era, —jadya tura ecuana acuare.

¹² —Tahuiyaque juatsutu mejemeje juya, Ecuana Cuatsashaquique, —jadya tuque ecuana acuare.

¹³ Jadya quisarati ayaquetu Jesúsra “Lazarotu majuchine” jadique jadya acuare. Ecuana ratu cuji cuita juatsu “Lázaro tahuiya” cuana bucha jutidya bacuare. ¹⁴ Tume ecuana Jesúsra pana cueja acuare ecuana bahue ishü:

—Lazarotu amena majuchine. ¹⁵ Cuachine ama ique tuque ujedaque bahue juya tsehuedya. Iyacua micuana ecue casa bamereya, micuana eaqueja nimee juishu. Micuana ni eaqueja nimee camadya juya, tume ique dyaque pureama juya. Ita iyaja cuita emajuque nebatira, —jadya tura ecuana acuare.

16 —Ecuana dyadi tuatsehue necuaradya. Tuatsehue iyepee tuna neara, —jadya ecuana Tomásra acuare, pere cuinanacuare.

Jesús tu emaju cuanaque chacha amerequique

17-18 Junaticuare ecuana Betaniaju. Tumeque eputu Jerusalén japadama jucuaré, quimisha kilómetro jujeri. Lázaro aniyaju junatima jarijudyatu umae cuinanacuare Jesús cuejara.

—Lazarotu amena majuchine. Pushi huecaca tuque ecuana amena emajuque papachineque, —jadya tunajatu cuejatsacuare.

19 Enuque ecatsé Marta, María jadya tatse paya jadya jucuaré. Jetiama tatseja ata cuana peya cuana jadya tuna cuacuare tatse nime perera. 20 Marta tunajatu cuejacuare Jesús amena japadama juajeyaque. Bahue juatsu tujatu cuinanatsu tsurutsacuare. María bacue cuinanacuare ama etare juque. 21 Martatu juticuare ecuana queja.

—Ique Cuatsashaquique, mique rehua juchineque juatsu taa ecue enuu majuquena ama juchine. 22 Ique taa bahue Yusura mique mira dutya bacayaque tyayaque. Mira ni tuque eisarau ecue eatsehuequija ishú, Yusura taa tuque micue quisarati ebacau, —jadya tujatu atsacuare Jesús.

23 —Micue nuutu emaju jaraya ama, —jadyatu Jesúsra acuare.

24 —Jejee, adebayadya tuque era, tuque emaju jarasiriyaque ama. Bahuedya ique tuque dutya emaju cuanaque netitsuranucayaque huecaca chacha netitsuranucabuque, —jadyatu Martara Jesús acuare.

25 —Idya emaju cuanaque chacha amerequique. Idya emaju cuanaque nityatsuraquique. Eaqueja catyatiya cuanaque, arepa majuya ama bucha tuna chacha netitsuranucabuque. 26 Eaqueja catyatiya cuanaque tuna majutsu, chacha netitsuranucabuque. Yusuja yacuaju tuna chacha anibuque majunuca ishú ama. ¿Ejeneyadya mira? —jadyatu Jesúsra acuare.

27 —Jejee, Ique Cuatsashaquique. Ejeneyadya tuque era. Midyami Mesías, Yusuja Emepeque. Yusuja Ebacuaque mique. Midya mique ecuana ihuacuareque, —jadyatu Martara Jesús acuare.

Jesúsra Lazaroja uhuacuare enapacuareque

28 Jadya quisarati amena aatsutu Marta cuacuare ejanaque María cuejara. Inime equé piji tujatu cuejacuare peya cuanara ebacauju:

—Ecuana Cuatsashaquique ri rehua. Ihuaramerehua tura mique. Jecuepa, —jadya tujatu aticuare.

²⁹ Jadya bacatsutu nere netitsuraquena jucuare. Jadya juatsutu Jesús tsehue quisaratira cuacuare. ³⁰ Junatima jari ecuana Jesús tsehue epuju jucuare. Martara tsurutsahuaju jari ecuana jucuare. ³¹ Tuequedyatu tuja ata cuana María nime perera cuahua cuanaque tuque nere netitsura juatsu cuinanaquenayaju baatsu, tuna tupujudya acuare, tuque uhuacuareju enuuque enapara cuana cuaya bucha baatsu.

³² Tumetu Mariara ecuana queja junatitsu bacuare Jesús. Junatitsutu nuyunaticuare Jesúsja yacuaju.

—Ique Cuatsashaquique, mique rehua juchineque juatsu taa ecue enuu majuquena ama juchine, —jadya tujatu aticuare.

³³ Mariatu paya jadya jucuare. Tumbaedyata tuque tajiage juhua cuanara paquerecuaredya. Tuque dyaque peya inime baatsutu Jesús dyadi niju pau, peya inime jadya jucuare. Dyaque peya inime ishutu ecana acuare. ³⁴ Tume tujatu ecana bacaduracuare tuhua jucuare cuanaque:

—¿Eju tunajatu Lázaro emajuque ishachine?

—Banacue, Ecuana Cuatsashaquique, —jadya tunajatu acuare.

³⁵ Tuhua junatitsutu Jesúsra enapacuare.

³⁶ Paya baatsutu israelita cuana tuhua jucuare cuanaque jadya jucuare:

—¡Dyaque iyuhueda tujatu Lázaro yanume juchine!

³⁷ Umae cuana bacue jucuare:

—Riyajari casa aniya atucama cuanaque capetatisha ish. ¿Eje bucha amae di taa rejari aquena juchine Lázaro maju ish ama? —jadya tuna jucuare.

Jesúsra Lázaro emajuque chacha nityatsuracuareque

³⁸ Tumetu Jesús cuacuare Marta, María, peya cuana tuhua jucuare cuana tsehue Lazaroja uhuacuareju. Dyaquetu capeyainimeticuare. Lazarotu eisha jucuare tumu ebari caniju. Cani tsecuetu tumu ebari tsehue etumu jucuare.

³⁹ Tuhua junatitsu tuna Jesúsra cuatsashacuare:

—Nenityasicuacue tumeque tumu etsecue penequique, —jadya tujatu ecana acuare.

—Jadya juume, Ecuana Cuatsashaquique. Riya taa tu ecayuamati amena. Pushi huecaca tuque ecuana amena ishachineque, —jadyatu Marta majuchineja enuuquera Jesús acuare.

⁴⁰ —Yuneridya ni mi eaqueja nimee juya, Yusurami tuja casa bamereya micue yacuajudya. ¿Jadya ama jatsu mique ahua? Ique pana ejene acue, —jadyatu Jesúsra acuare.

⁴¹ Tura jadya ahaju tunajatu tumu nityasicuacuare. Ebarucue queja bajiyutsutu Jesús Yusu tsehue quisaraticuare:

—Ecue Etata, yusurupai mique aya, mira ique bacaya tibu.
 42 Adebaya tuque era, mira ique dutya huecaca era isarayaju bacayaque. Etsuri jebuda tsehuedya mique isaraya, rehua eatsehue cuanaja baca ishu, tunaja yuneridya ique micue ecuadishaque ejene ishu, —jadyatu Jesúsra Yusu acuare.

43 Jadya juu jadya juatsu tujatu isaracuare jebuda:

—¡Lázaro, cuinanacue tuhuaque!

44 Tumetu emajuque chacha netitsuracuare. Cuinanacuaretu caniju ishatanachineque. Chamacamatu cuinanacuare emetucu ecátse ehúachi ecátse jadya pirurichineque jirama tibu. Tuja ebutsequini bacue eraca tsehue edunu jadique.

—Pana jira neacue. Pabucucu, —jadya tuna Jesúsra acuare. Jadya ayaju tunajatu jiracuare.

Jesús ujeu baqui cuanara tuque inamere ishu inime bajeje-cuareque

(Mt 26.1-5; Mr 14.1-2; Lc 22.1-2)

45 Jadya Jesúsra ahuaque baatsutu umada israelita cuana María tajira cuahua cuanaque catyaticuare Jesús queja.

46 Peya cuana bacue cuacuare fariseo cuana queja, Jesúsra eje bucha ahuaque cuejara. 47 Tumetu fariseo cuanara pae cuanaja huaraji cuana cuejaticuare. Masadama tuna dutya israelita cuanaja huaraji cuana dyaque arida cuanaque casitaticuare.

—¿Eje bucha tuque ecuana Jesús eau? Dutyara bayaju taa tu aya Yusuja casa bamere ishuque. Jadya tibu taa ecana amena jetiama tuaqueja catyatiya. 48 ¿Eje bucha jatsu tuque ecuana eau, tuja tume cuanaque ajaca ishu? ¿Eje bucha jatsu tuque ecuana eau, ecuita cuana tuaqueja catyatijaca ishu? Tuja cuanara ni ecuari bacanishaya, tume taa tu ecuanaja enaruqui Romajura ecuadishau rehua sudaru cuana ecuanaja epu tilla ishu. Tume taa tunajatu Yusuja etare erihuishatillanau. Ecuanaja baba cuanaja bahue eque taa tunara ecuana eanishajacau, —jadya tuna tuna cama jucuaré.

49 Caifástu tumeque mara pae dyaque muidaque jucuaré. Tuquetu quisaraticuare:

—Micuana micuana baecua ni ai buchique. 50 Dyaque jida neiyera jutidya Jesús, dutya ecuana etillatau tibu. Dyaque jida peadya camadya pamaju, dutya ecuana emajuuju, —jadya tuna Caifásra acuare.

51 Turatu adebacuare ama eje buchique tura quisarati ayaque. Arepa tuque tumeque mara pae dyaque muidaque juya ama buchatu Jesús tsehue cahuaíticuare jutidya. Jadya ama buchatu Yusura adebamerecuare Jesús israelita cuanaja ishu majudadiyaque. Jadyatu quisaraticuare ai tuja

taca inime ama. Yusura adebamereyaque tujatu quisarati acuare. ⁵² Jesústu israelita cuanaja ishú camadya ama majudaditaquí jucuare. Tuquetu majudaditaquí jucuare dutya queja cuanaja ishú, dutya ecuana peadya camadya bucha juishu. ⁵³ Caifásja quisarati bacatsutu tumeque huecaca eque israelita cuanaja huaraji cuanara Jesús iye ishú inime bajetibunecuare.

⁵⁴ Jadya tibudyatu Jesús amena ejitaju cuita israelita cuanaja epu ebari cuanaju junenicarama jucuare. Tumetu Judea juque cuinanatsu, ecuana tsehuedya dirunucacuare Efraín bacani epuju. Tumeque eputu jucuare tsecada anitaya cuanaque japadama. Tuhuadya ecuana tuatsehue anidirucuaré.

⁵⁵ Jetiama israelita cuanatu epu cuana juque cuabarecuare Jerusalénju, amena Pascua chine japadama juajeya baatsu. Tumeque chine ishú tuna tunaja bahue cabajejetitaquí jucuare. ⁵⁶⁻⁵⁷ Fariseo cuanara, pae cuanaja huaraji cuanara patuna amerecuare:

—Ejeque ni micuana bahue juya Jesús ejuque, necuejacue ecuana, ecuanaja inati ishú —jadya.

Jadya tibudyatu Yusuja etareju ai jidamaque eaniu cuanaque cabajejetira cuahua cuanara sarecuare Jesús. Cabacaduratibarecuarepa ecana tuna cama:

—¿Eje bucha ni tu juya? ¿Ejeudyatu Jesús chine ishú, aijama ni taa? —jadya tuna jubarecuare.

12

Mariara Jesúsja ehuchiju etseri ijimedaque juracuareque (Mt 26.6-13; Mr 14.3-9)

¹ Shucuta huecaca Pascua chine aniya jariju ecuana Jesús tsehue cuacuare Betaniaju, Lázaro anicuareju, tura Lázaro chacha nityatsuranucachineju. ² Ecuana junatihujutu umae Jesúsja eadeba cuanara Betaniaju anicuare cuanara bajecuaré earaqui chineju tuatsehue araara ishú. Martara tuna tsahuacuare earaqui iya. Lazarotu mesaju Jesús tsehue araara anicuare, ecuana, peya cuana jadya. ³ Tumetu Mariara etseri ijimedaque becuare kilo patya jaque dyane, nardo bacani, ijimedaque eaque. Tumequetu tsuje aridaque jucuare. Tumeque nardodyatu Mariara Jesúsja ehuchiecatseju juracuare. Juratsu tujatu tillacuare etsaru tsehue. Ijimedaquetu etare quini pashutanacuare. ⁴ Judas Iscariote Jesúsra mepehuaquedyatu dyaque ecahuaiti jucuare María tsehue. Tumequedyatu Jesús ujeu baqui cuana queja inameredadiquí juyaque jucuare. ⁵ Cahuaititsutu jucuare:

—¿Eje bucha juatsu jatsutu tumeque epunara ijimedaque catyati ahua ama? Umada tujatu chipiru inaquina juhua,

quimisha ciento ficha dyaque. Peadya mara mere juatsu etsujequi einau tupu tuque. Jetiamatu nrecada cuanaque etsahuauque chipiru inatsu, —jadyatu Judas jucuare.

⁶Jadyatu quisaraticuare, ai nrecada cuanaque tsahuacara aatsu ama, chiri arida juatsudya jutidya. Tuquetu ecuanaja chipiru naruquique jucuare. Tuhuadya tujatu chirichirinicuare tuhua ishatanayaque tuja ishu.

⁷—Nereda María aume. Tujatu tumeque ijimedaque eiya juhua ique iyetahuaju papamajudya pepa ishu, —jadya tujatu Judas acuare.

⁸—Micuana ducutu jujacaya amadya nrecada cuanaque, ique bacue aijama. Ique micuana tsehue junenisiriya ama, —jadya tura ecuana acuare.

Lázaro tuna iyecara acuareque

⁹Umada israelita cuanatu Jesús Betania epuju junatihuaque bahue juatsu cuacuare tuaqueja. Cuacuare tuna ai Jesús jipidya baticara aatsu ama. Tumbaedy a tuna-jatu Lázaro bacara acuare, Jesúsra emajuque nityatsuranucacuareque. ¹⁰⁻¹¹Jesúsra Lázaro emajuque nityatsurachine tibutu umada israelita cuana Jesús queja catyaticuare. Jesús queja catyatitsu tunajatu pae cuanaja huaraji cuana amena bacacarama acuare, Jesús cuita camadya. Jadya tibudyatu pae cuanaja huaraji cuanara Lázaro dyadi iyecaradya acuare.

Jesús Jerusalénju judirucuaque

(Mt 21.1-11; Mr 11.1-11; Lc 19.28-40)

¹²Jesús ehuchiju pepatanahuaque peya huecaca nucatu jetiama Jerusalénju Pascua chine bacara cuaya cuanaque bahue jucuare Jesús amena tuhua junatihuieque, amena tuque edijiju juajeyaque. ¹³Bahue juatsu tuna ejaqui cuana rarubaretsu, ejaqui cuana inabaretsu cuinanabarecuare Jesús tsurutsa ishu. Jadyatu ecuanaja bahue jucuare ecuari junayaju ejaqui cuana inatsu tsurutsa. Quiqueaje-cuare ecana:

—¡Hosana! ¡Jida paju Yusuja ebacaniju jeyaque! ¡Jida paju ecuanaja ecuari, Israel eque ejuracana cuanaque naru ishu jeyaque! —jadya tuna jubarecuare quique eque.

¹⁴Ecuaita jetiamaque tsurutsamaquedya patu burruju anit-suratsu Jesús cuacuare. Yusuja quisarati béru cuejatacuare bae cuitadyatu jucuare:

¹⁵“Bajida nejuume, Siónju aniya cuanaque.

Micuanaja ecuaritu micuana queja junaya.

Burro dyaque equetu junaya”, jadyatu ehue

Yusuja quisarati. (Sion bacanidyatu Jerusalén jucuare.)

¹⁶Dutya tume cuanaque baatsu, bacatsu ecuana Jesúsra mepehua cuanara tuque ecuana adebacuare ama eje

buchique jadya juyaque. Ecuanaja ishutu etehuaque jucuare. Jesús emajuque netitsuranucahuaju, tuque Yusuja yacuaju judirunucahuaju ecuana chamacama huecatanacuare Yusuja quisarati jadya ehuenegue. “Jesús jadya judadihuaquetu Mesías jadya judadiya jadya ehuenegue cuitadya judadihua”, jadya tuque ecuanaja chamacama inime jucuare.

¹⁷ Jesús Jerusalénju cuama jarijudyatu tura Lázaro emajuque nityatsurayaju baqui juchine cuanara cuejacuare peya cuana eje bucha juchineque. ¹⁸ Jadique quisarati bacatsachine tibutu ecuita jetieque ama cuinanacuare Jesús tsurutsa ishü. Bacara tunajatu acuare emajuque chacha nityatsuranuca ishü casa aniyaque. ¹⁹ Jetiamara Jesús pureama ayaque bacatsutu fariseo cuana tuna cama quisaraticuare:

—¡Nebacacue eje bucha juyaque! ¡Eje bucha jatsu ecuana ejuu! Dutyara taa tuna tuque bacaya, ecuana ebacauque, —jadya tuna jucuare.

Griego cuanara Jesús sarecuareque

²⁰ Tuhuatu umae griego cuana jucuare Jerusalénju, israelita cuana tsehue Pascua chine cuetishara cuacuare cuanaque. Yusu muira tuna cuacuare. ²¹ Tunaratu jipeticuare Felipe. Felipetu jucuare Betsaida epu juque, Galilea yahua juque. Jipetitsu tunajatu isaraticuare:

—Jesús tsehue ecuana quisaraticara juya, tata, —jadya tunajatu Felipe acuare.

²² Jadya ahuajutu Felipe cuacuare Andrés queja.

—Griego cuana patu Jesús tsehue quisaraticara juya, —jadya tujatu Andrés aticuare.

Tuequedya tatse cuacuare Andrés tsehue Jesús queja.

—Griego cuana patu miatsehue quisaraticara juya, —jadya tatsejatu Jesús aticuare.

²³ Jadya bacatsu tatse Jesúsra acuare:

—Masadamatu juetiya huecaca IQUE ECUITA iyetanayaque, emajuque netitsuranucayaque. Jadya ejitaju jue tuque ecue casa, jidaque juya. ²⁴ Pusha amadya metse cuejaya. Ecaca ecuana uhuaya. Uhuahuajutu ecaca uhuahuaque pana cabapeti neri juya. Pana cabapeti juyaque ama juatsu, peadya ecaca camadya aniya. Cabapetiyaque juatsu, buraratsu, danetsutu umada ecaca juya. Tumbaedyaque ique majutaqui jetiama ecana eaqueja catyati ishü.

²⁵ Tumbaedyaque riyaque yahuaaju eje bucha tsehue ani dyaque bijida cuanara tunajatu majutsu Yusu dyaque japada babuque. Riyaque yahuaaju eje bucha tsehue ani bijidamaduraqui cuanaque tuna Yusu queja anidirubuque ni eje tupu jaca ishü ama. ²⁶ Yuneri cuitadya ecue inime

eque anicara juya cuanaquetu era cuatsashaya eque juya. Era cuatsashaya eque jujacaya ama cuanaque tuna eatsehue anisiribuque. Tuna tuna ecue Etatara muitsabuque, —jadya tatse Jesúsra acuare dutyaja ijacaju.

Jesús majyuaque cacuejaticuareque

²⁷ Jesússtu dutyaja ijacaju quisaratinucacuare:

—Bahuedya ique ejetsunue amatu amena ique iyetana ishucue. Dyaque taa peya inime cabatiya. ¿Eje bucha dyadi tuque era ecue Etata aya: “Tata, peya eje bucha eque micue inime eque jutaquique juatsu taa mique eau, ‘Jadya nerecaturae taa aume’”, jadya ni taa eau. Jadya ama bucha maju ishudya riyaque yahuaju junahua tibu, —jadya tujatu ecana acuare.

²⁸ Tumetu Jesúsra tuja Etataque acuare:

—Tata, micue dyaque casa, jidaque jadya aniyaque ique eje bucha juya eque pabamere, —jadya tujatu tuja Etataque acuare dutyaja ijacaju.

Jadya ahujatu barepa juque quisarati bacataqui jucuare:

—Amenatu era bamerehua ecue dyaque casa, jidaque, ique emui juishu. Bamerenucayadya tuna era, “Dyaque jida, casada jadya taa mi, Yusu”, jadya tuna juishu, —jadyatu Yusu barepa juque quisaraticuare.

²⁹ Tuhua ecuana tsehue jucuare cuanaratu bacacuare et-suri barepa juque. Umaeratu bacacuare tiritiya bucha.

—Tiritiya tuque.

—Aijama, tiritiya ama tuque. Barepa juque Yusu tsahuaquique jutidyatu quisaratiya, —jadyatu uma cuji cuita juatsu jucuare.

³⁰ Tume ecuana Jesúsra isaracuare, tumbaedy a peya cuana tuhua jucuare cuanaque:

—Ecue Etatatu barepa juque quisaratihua ique cuejayaque ama. Micuanadya tura micuana cuejahua. ³¹ Amenatu ejetsunue ama Yusuja tuaqueja catyatima cuanaque “Micuana micuana jucha metse” jadya aishu. Ejetsunue amatu bataqui ama ecue ama cuanaque cuatsashaquique ecue casa seca ishucue. ³² Ique curusuju tatatanaya maju ishucue. Ique tuhua curusuju etata badeya baatsu tuna jetiama eaqueja catyatiya, —jadya ecuana Jesúsra acuare.

³³ Riyaque quisarati tsehue tura ecuana cuejacuare eje bucha majue juyaque. ³⁴ Tuhua jucuare cuanaque tuna jucuare:

—Moisésra hueneacuare equetu Mesías patu anisiribuque. ECUITAPA curusuju tatatanaya maju ishucue. Jutaquiju ni taa tu ¿ECUITA, Yusuja Emepeque ecuanara ihuayaque? —jadya tunajatu Jesús acuare.

³⁵ Tume tuna Jesúsra quemitsacuare:

—Ique hueca buchique, micuana Yusuja quisarati adebamerera jehua tibu. Ejetsunue ama micuana tsehue rehua juneniya jari. Eaqueja micuana catyatitaqui, emajaca aniya jari tupu. Necatyaticue, canerecati ishuhu judiru ishuma. Apuda ducu juneniya cuanaque tuna baecua eju cuayaque; jadyatu eaqueja catyatiya ama cuanaque baecua canerecati ishuhu judiruyaque. ³⁶ Eaqueja necatyaticue ique micuana tsehue jari tupu. Eaqueja ni micuana catyatiya, tume micuana huecadaju juneniya cuana buchique juya, — jadya tuna Jesúsra acuare.

Jadya quisarati aatsutu Jesús ecuita jetiama ducuque cuinanacuare. Baecua tuna jucuaque eju tuque diruhuaque.

Israelita cuana Jesús queja catyaticarama jucuaque

³⁷ Arepa Jesúsra tunaja yacuaju Yusuja camadya ataqui que acuare ama bucha tuna dutya jujeri cuitadya tuaqueja catyaticarama jucuaque. ³⁸ Isaías Yusu equaque quisarati cuejaqira icueneta huene acuare equa cuitadyatu judadicuare: “Ecuana Cuatsashaquique, ecuanara tuna jetiama cuejaya micue quisarati yunerique.

Jadya ama bucha tuna eje umara piji camadya ejenehua.

Arepa tunara micue casa bahua ama bucha, eje umara piji camadyatu adebaya bahuaque” jadya.

³⁹ Jadya equetu dutya jujeri israelita cuana Jesús queja catyatihua ama, ecuanaja baba cuana béru jucuaque bucha. Dutya jujeri ecuanaja baba cuanaratu ejeneacuare ama Isaiasra quisarati cuejacuareque. ⁴⁰ Isaiastu jadya junucacuare beru:

“Yusura tuna adebamerehua ama tunara petahuaque.

Tura tuna adebamerehua ama.

Jadya tibu tuna tuaqueja catyatihua ama, arepa ecana Yusura tuja casa bamerehua ama bucha, arepa tuna tuja quisarati bacahua ama bucha.

Cacuaretihua ama ecana inime Yusu queja junuca ishuh,

Tuja tuna inajacamere ishuh”,

jadyatu Isaiasra hueneacuare béru.

⁴¹ Jadya tujatu hueneacuare, Yusura tuque Jesús eje bucha judadiyaque bahue amereacuare tibu. Riyaque bahue juat-sutu Isaiasra icuenetadya ahua quisarati Jesúsja ishuh.

⁴² Arepa dutyara jujeri israelita cuanara Jesús bijidamadurahua ama bucha, umae camadya tuna tuaqueja catyatihua. Umae dyaque inime metse cuanaque tuna tuaqueja catyatihua. Jadya ama buchatu tume cuanaque ejitaju ama cacuejaticuare Jesús queja catyatihuaque, fariseo cuana mubaya tibu, tuna Jesús queja catyatihuaque cacuejatiyaju fariseo

cuanara caradati ishuque etareju ecasitatiquereuque ama adebaya tibu. ⁴³ Tume bajida cuanaratu ecuita cuana purea-maturacara acuare, Yusu ama.

Yusura Jesúsja quisarati bijidamaduraqui cuanaque eca-juchati babuqueque

⁴⁴ Jesústu quisaraticuare:

—Ejeque eaqueja catyatiyaquetu eaqueja jipidya ama catyatiya, tumbaedy a Ique Cuadishaqui queja. ⁴⁵ Ejera ni ique yuneridya adebaya, tumbaedy tujatu adebaya Ique Cuadishaquique. ⁴⁶ Ique hueca buchique riyaque yahua ju nahua, eaqueja catyatiya cuanaja Yusuja quisarati adeba ishu. Jehua ique, tuna apuda ducu juneniya cuanaque bucha juishu ama, huecadaju juneniya cuanaque bucha juneni ishu. ⁴⁷ Micuanaratu ecue quisarati bacaya, era amereya eque juyaque ama, era ama micuana “jucha arida” jadya aya. Micuanaja juchajudya micuana canerecatibuque. Ique junahua riyaque yahua ju micuana “Ecajuchati micuana” jadya aishu ama, eaqueja catyatiya cuanaque inajacamere ishu. ⁴⁸ Arepa ecue inime ama tuna canerecatibuque ama buchatu aniya ique bijidamaduraqui cuanaque nerecaturaquique, ecue quisarati bacayaque ama juatsu. Tere huecaca juetihua ju Yusura cuitadya micuana abuque: “Micuana micuana ecajuchatique”. Jadya tujatu ecana abuque, tunara era cuejahuque ejenhua ama tibu. ⁴⁹ Ecue casa eque ama ique quisaratiya, mere jadya juya. Ecue Etata Ique Cuadishaquira casa tyaya tibu tuque mereya. Eratu cuejaya, bahuityaya tura ique amereya eque. ⁵⁰ Micuana ni ecue Etatara cuatsashaya eque aniya, tume micuana tuatsehue anisiribuque majunuca ishu ama. Riyaque tura ique bahue amerehuaque micuana era cuejaha, tura ique amerehua baedy, —jadya tuna Jesúsra acuare.

13

Jesúsra tura mepehua cuanaja ehua chi utsacuareque

¹ Tumequetu jucuare Pascua chine reeque tibene. Jesústu bahuedya jucuare masadama majuyaque, ejetsunue ama Etataque queja tsura ishuque bataqui amaque. Jesusratu dyaque iyuhueda bacuare riyaque yahua juque tuja cuanaque. Tume tura ecuana diruma jarira bamerehua dyaque tuja iyuhue aniyaque ecuana tuja cuana tsehue. ² Jesústu araaracuare ecuana tsehue. Judas, Simón Iscarioteja ebacuaqueratu Jesús israelita cuanaja huaraji cuana queja inamerecara acuare. Icuene patu Ijahuara jadya inime tupumerecuare. ³ Jesústu caadebaticuare tuque tuja Etataquera dutya casa tyacuareque. Bahuedyatu tuque jucuare tuque

Yusu quejaque jehuaque, Yusu quejadya dirunucayaque.
⁴ Ecuana araaraya jari tsunumeetu tuque netitsuracuare. Netitsuratsu tujatu dyaque jutuyaque tacacuare. Catacatit-sutu paño tsehue etimaju carisiticuare. ⁵ Carisititsu tujatu ena juracuare bañadorju. Peadya peadya tura ecuana huachi utsabarecuare. Icueneque utsatsu tujatu paño tsehue huachi tillacuare. Tuequedyatu beta ishuque utsatsu tillanucacuarenya. Jadidya tura ecuana dutya huachi utsatillacuare.

⁶ Simón Pedro queja judirutsutu Jesúsra huachi utsacara acuare. Pedrotu bahuedya jucuare mayurura tuja jetiedyaque huachi utsataquique ama. Jadya tibudya tujatu Jesús acuare:

—Ecuana Cuatsashaquique, ¿eje bucha huachi utsae mira eau?

⁷ —Utsaya tuque micue era. Iyaja cuita tuquemi adebaya ama eje bucha juatsu era jadya ayaque. Tupuju tuquemi adebaya, —jadya tujatu Pedro acuare.

⁸ —A, aijama. Ecue ehuaqui tuque micue utsanime ama.

—Era ni micue utsaya ama, tumemi ecuique ama, —jadyatu Jesúsra acuare Pedro.

⁹ Jadya bacatsutu Simón Pedrora jadya acuare:

—Jutaquiju ehuaquiju camadya ama utsacue, Ecuana Cuatsashaquique. Jutaquiju ecue utsacuedya emetucu, iyuca jadya.

¹⁰ —Ejeque iyaja cuita enahuiquetu utsataqui ehuaquiju camadya, ecuita jidadya asicadama tibu. Yusura micuanaja jucha cuana apupashahuaju micuana butseeju nahuihua bucha. Yusura tuque micuanaja jucha cuana amena apupashahua. Aniyatu rehua peadya tuja jucha cuana apupashamaque. Tumequedyatu asicadaque buchique, —jadya ecuana Jesúsra acuare.

¹¹ Jesússtu bahuedya jucuare ejera ecuana tuque ujeu baqui cuana queja inamereyaque. Jadya tibudyatu “Aniyatu peadya micuana ducu jucha cuana apupashamaque”, jadya jucuare.

¹² Ecuana dutya huachi utsatilla jadya aatsutu Jesús dyaque jutu ishuque cajututinucacuare. Cajututinucatsutu mesaju anibutenucacuare ecuana tsehue.

—¿Adebayadya micuana era eje bucha juatsu micuana ehuaquiju utsahuaque? ¹³ Micuanara ique “Ecuana Bahuityaquique, Cuatsashaquique” jadya isarae aya. Tuyudya micuanara jadya isarae aya, ique jadiquedyatu tibu.

¹⁴ Arepa ique Micuana Cuatsashaquique, Bahuityaquique ama bucha, era micuana huachi utsahua, peya cuana tsahua juyara aya bucha. Jadya tibudya micuana jadya

cutsatie ehuachi necaticue, peya cuana tsehue yurameta catsahuaticaraque cabamereti ishu. ¹⁵ Era micuana bamerehua micuana eje bucha jutaquique. Jutaquiju necatsahuaticue peya cuana tsehue, era micuana tsahuahua bucha. ¹⁶ Pusha amadya micuana cuejaya. Mere puji tunajatu patrón muibaya bucha mui bae ama aya. Ecuadishaque bacue tuque cuadishaquique bucha muie ama aya. ¹⁷ Micuanaratu bacayadya, jeeque era jadya ayaque. Micuanara ni peya cuana tsahuaya, era micuana tsahuahua bae, dyaque jida micuana judadiya.

¹⁸ “Dutya ama micuana Yusura dyaque jida amereya. Era micuana peadya peadya adebaya era mepehuaque. Peadyara micuanara ique ujeu baqui cuana queja inamereya. Yusuja quisarati ehue baedyatu juya: “Eatsehue ararayara ique bijidamadurabuque”. ¹⁹ Icueneta cuejadya micuana aya riyaque, ique inameretama jarijudya. Era cuejahua bae cuitadya juhuaju, tuque micuana ejeneya ique Mesiasque, era micuana cuejahua baedy. ²⁰ Ejera ni era cuadishayaque jida batsaya, tumbaedy tunara ique jida batsaya. Ejera ni ique jida batsaya, tumbaedy tunajatu Ique Cuadishaquique jida batsaya, —jadya ecuana Jesúsra acuare.

Jesús tuque ujeu baqui cuana queja Judasra inamereyaque cacuejaticuareque

(Mt 26.20-25; Mr 14.17-21; Lc 22.21-23)

²¹ Jadya ecuana cuejatsutu Jesús dyaque capeya inimeticuare.

—Yuneridya peadyara micuanara ique ujeu baqui cuana queja inamereya, —jadya tujatu quisarati acuare dutya ecuana baca ishu.

²² Jadya quisaratiyaju bacatsu ecuana yurameta capetatibare jucuar. Bape bapedya jutidya tuque ecuana inime tupucuar ejeque tura jadya ayaque. ²³ Ique Jesús aniya peque anicuare, ique Jesúsja dyaque iyuhuedaque jucuar. ²⁴ Tume ique Simón Pedrora tuja emetucu tsehue piyecuejacuar. Bacaduramerecara tura Jesús acuare ejera inamereyaque. ²⁵ Tume ique Jesús queja jipetanacuare. Tuqueja pana cajipeti juatsu tuque bacaduracuare:

—Ecuana Cuatsashaquique, ¿airami inamereya? —jadya tuque acuare.

²⁶ —Pan cuesi tuque enameju mullaya. Mullatsu micuana ejequedya tyaya. Ejeque era tyayaque, tudya tume, —jadya Jesúsra acuare.

Jadya juatsu tujatu mullacuare pan cuesi. Tume tujatu tyacuare Judas Iscariote, Simónja ebacuaque. ²⁷ Judasratu

pan cuesi inatsacuare Jesúsra tyayaque. Inatsahuajutu Ijahua tuaqueja nubicuare tuque tura amereya eque amere ishu.

Jadya ahua jutu Jesúsra Judas acuare:

—Mira eje bucha acara ayaque, acue iyaja cuitadya, —jadyatu Jesúsra acuare.

²⁸ Ecuánaratu adebacuare ama eje bucha juatsu Jesúsra jadya isarae ahuaque. ²⁹ Judastu jucuare chipiru quiniquique caja caca naruquique. Umaeja tuque ecuanaja inime jucuare:

—Jesusratu Judas jadya ahua, earaqui chine ishu ara ishu quemira cuaishu.

Peya cuanajatu inime jucuare:

—Jadya tujatu ahua, Judas queja nrecada cuanaque chipiru tyamerecara aatsu, —jadya tuque ecuaña cuji cuita juatsu inime tupucuare.

³⁰ Judastu pan inatsa jadya aatsu apuda ducu diruque-nacuare.

Iyacuaque cacuatsashati: “Yurameta iyuhueda cabati ishuque”

³¹ Judas cuinanahuajutu Jesús quisaraticuare:

—Masadama IQUE ECUITA munitaya. Ique eje bucha ataya equetu ecue Etata munitaya. ³² Era Yusuja casa dyaque aniyaque bamereya buchadya tura bamerenucayadya ecue casa dyaque aniyaque. Tsunutaya amatu jadya juyaque.

³³ Amena tsunudama micuana tsehue aniya, micuana ecue ebacua bucha cuanaque. Sareya datse micuanara ique. Iyacia micuana cuejaya, ecuanaja huaraji cuana icuene cuejachineque: “Ique eju diruyaju micuana judirutaqui ama”. ³⁴ Jeeque cacuatsashati iyacuaque micuana cuejaya: “Iyuhueda necabaticue micuana cama. Era micuana iyuhueda baya bucha iyuhueedya micuana necabaticue dutya peya cuana tsehue”. ³⁵ Iyuhueda ni micuana cabatiya dutya peya cuana tsehue, tume tuna dutya bahue judadiya micuana ecue emepeque.

Jesúsra Pedro “Adebaya ama tuque era” jadya juyaque cuejacuareque

(Mt 26.31-35; Mr 14.27-31; Lc 22.31-34)

³⁶ Simón Pedroratu Jesús bacaduracuare:

—¿Ejumi diruya, Ecuana Cuatsashaquique?

—Eju ique diruyaju, eje bucha tuputaqui ama micue ique iyacia. Tupujumi dirubuquedya ique eju diruyaju, —jadyatu Jesúsra acuare.

³⁷ —¿Eje bucha juatsu miatsehue dirutaqui ama, Ecuana Cuatsashaquique? Ique bajidama mique jiteque maju ishu, —jadyatu Pedrora acuare.

³⁸ —¿Pusha amadyami ique jiteque maju ishuque? Jeeque mique cuejaya. Riyaque meta, tacure quiquehuiemi catehuati quimisha juya. “Adebaya ama tuque era”, jadya aquimisha mira aya, —jadyatu Jesúsra acuare Pedro.

14

Jesús tu ecuanaja Etata queja judiru ishuque

¹ Jesúsra ecuana bahuityanucacuare:

—Inime tsape nejuume. Peya inime nejuume. Yusu queja nimee micuana amena juhua. Eaqueja nimee nejucuedya.

² Ecue Etata aniyajutu aniya dyaque umada ani ishu cuanaque. Yunerique ama juatsu taa micuana cuejaquena ama juquena juhua. Ique diruya tuhua micuanaja ani ishuque bajejediru ishu.

³ Dirutsu, micuanaja ani ishuque pabajejediru; amena aatsu, yudijiya junanucabuque micuana jiteque, micuana eatsehue diru ishu. Tuhua micuana aniqueredirubuque ique jacanuca ishu ama. ⁴ Bahuedya micuana ique eju diruyaque. Bahuedya micuana tuhua eje bucha judirue juishuque, —jadya ecuana Jesúsra acuare.

⁵ Tomástu quisaraticuare:

—Ecuana Cuatsashaquique, baecua ecuana mique eju diruyaque. ¿Eje bucha bahuee jatsu ecuana tuhua eje bucha judirue juishuque ejuu?

⁶ Jesúsra ecuana acuare:

—Idya Yusu Etata queja judiru ishuque. Idya yunerique adebamerequique. Idya eanisirishaquique. Eaqueja catyatiya cuanaque cuita camadyatu Etata queja judirubuque, peya cuana bacue aijama. ⁷ Micuanara ique adebayaque juatsu, tuque micuana adebayadya ecue Etata. Iyacua tuque micuana adebaya ecue Etatara ahua cuanaque, era ahua cuanaque micuanara bahua tibu, —jadya ecuana Jesúsra acuare.

⁸ —Ecuana Cuatsashaquique, bamerecucue dyadi ecuana Etata. Tumeque cuita camadya tuque ecuana bacara aya. Tume ecuana pureama juya, —jadyatu Felipera acuare.

⁹ —Felipe, ¿eje bucha juatsumi jadya quisaratiya? Ique amena tsunuda micuana tsehue junenihua. ¿Eje bucha juatsu dyadi tuquemi adebaya ama jari? Ejera ique bahuaratu bahuadya ecue Etata. ¿Eje bucha juatsu dyadimi “Bamerecucue ecuana Etata Yusu”, jadya juya? ¹⁰ Ique, ecue Etata Yusu, jadya yatse peadya camadya. Ique tuatsehue; tuque bacue eatsehue. ¿Ejeneya amami riyaque, Felipe? —jadyatu Jesúsra acuare.

Isaranucacuare tura ecuana:

—Era micuana cuejayaquetu ecue inime tacaque camadya ama. Ecue Etata tu eatsehuedya. Tudyá cuitadyatu ique eque mere juya. ¹¹ Neejenecue ecue quisarati. Ique, ecue Etata

jadya yatse peadya camadya. Micuanara ni ejenecarama aya ecue quisarati, neejenecue micuanara era Yusuja casa tsehue ai era ahuaque bahua tibu. ¹² Pusha amadya micuana cuejaya. Paju ama micuanaja inime eatsehue ama tibu ecue casa tsehue ama bucha. Dutya eaqueja catyatiya cuanaratu ayadya era ahuaque. Ecuetu amena aijama juya dyaque cuita emajaca ique cuita rehua riyaque yahuaju mere juishu, ique ecue Etata queja diruya tibu. Ecue cuanaja bacue dyaque emajaca aniya tuque mere aishu, era aya bucha dyaque aishu. ¹³ Dutya micuanara ecue ebacaniju bacayaju eratu aya, ecue Etataja casa, jidaque jadya ejitaju amere ishu. ¹⁴ Micuanara “Acue ecue micue ebacaniju” jadya ayaju eratu dutya micuanara bacayaque aya, —jadya ecuana Jesúsra acuare.

Jesúsra Yusuja Espíritu cuadisha ana acuareque

¹⁵ Jesúsra ecuana isaranucacuare:

—Micuanara ique iyuhueda bayaque juatsu, ecue yana equedya nejucue. ¹⁶ Ique ecue Etata queja bacabacaya, Micuana Tsahuaquique tuja cuadisha ishu. Junabuquetu micuana queja, micuana tsehue anisiri ishu; shananime ama tuja micuana. ¹⁷ Tuquetu Yusuja Espíritu cuitadya, Yunerique Ejitaju Amerequique. Yusuja cuanaque amatu riyaque Espíritura cuatsashaya eque ejuu ama. Tunaratu tuque adebaya ama, ni tuna adebaya tuque ai juyaque. Micuanara bacue tuque adebaya, micuana tsehue aniya tibu. Micuana peadya peadya tsehuetu anisiribuque. Shananime ama tuja micuana.

¹⁸ “Jacanime ama micuana ecue ejequeja tsahuamere-maque. Junanucabuque ique micuana tsehue anina ishu. ¹⁹ Ejetsunue juatsu ama ecue cuanara ama banucaya ama. Micuanara camadya masadamadya banucaya. Ique majutsu chacha netitsuranucaya tibu, micuana dyadi tumbaedy a majutsu chacha netitsuradinucaya. ²⁰ Ique, Ecue Etata jadya yatse peadya camadya. Micuana micuana peadya camadya bucha eatsehue, ique bacue micuana tsehue. Yusuja Espíritu micuana queja junahuaju tuque micuana pana adeba abuque riyaque. Ai etehua buchique amatu jubuque. ²¹ Era cuatsashaya eque juya cuanara yuneridya iyuhueda baya, ecue quisarati bacaqui cuanara. Ecue Etataratu ique iyuhueda baqui cuanaque iyuhueda baya. Era dyadi tuna tumbaedy iyuhueda baya. Era tuna pana adebamere aya ique aique, ique tunaja pana adeba aishu, —jadya ecuana Jesúsra acuare.

²² Jadya juya bacatsutu Judasra bacaduracuare: (Judas Iscariote amatu jucuaré, peya Judas.)

—Ecuana Cuatsashaquique, ¿eje bucha caadebameretiemi juya ecuana queja, peya cuana queja caadebamereti ama jadya? —jadya tujatu acuare.

²³ —Ique iyuhueda baqui cuanaquetu ecue yana equedya juya. Ecue Etatara tuna iyuhueda bayadya. Ique, ecue Etata jadya yatse tuna tsehue aninaya; jacanime ama tuna yatseja. ²⁴ Ique iyuhuedama baqui cuanara tuque ecue yana aya ama. Jadya micuana cuejaya, ecue casa eque jipidya ama, ecue Etata Ique Cuadishaquija casa. ²⁵ Riyaque micuana cuejaya, ique micuana tsehue jari tupu. ²⁶ Ecue Etataratu tuja Espíritu cuitadya cuadishaya micuana queja. Ecue inime juya equetu tura cuadishaya. Yusuja Espíritu cuitadyatu Micuana Icuenequique. Tura micuana yunerique bahuityaya. Dutya micuana era cuejaha cuanaque tura micuana huecashaya. ²⁷ Era micuana inime tsapema, dyaque jida amereya, ique bucha. Yusuja cuanara ama ni micuana eje bucha inime tsapema ameree ama, era micuana aya bucha. Era micuana inime tsapema anishaya, arepa eje buchadya jutidya inime jidama cuanaque aniya ama bucha. Tupupe tupupe inime neaume, era shanaya cabatitsu. Jidama inime nebaume. Bajida nejuume. ²⁸ Bacahuadya tuque micuanara, era “Ique ecue Etata queja dirutsu, junanucaya yudijidya micuana tsehue anisiri ishú”, jadya ayaju. Ecue Etata tu ique bucha dyaque emuique. Micuanara ique iyuhueda baya tibu, micuana pureama jutaqui ique ecue Etata queja diruyaju. ²⁹ Ique ecue Etata queja diruma jariradya micuana dutya riya cuanaque cuejaha. Tume jadya ique judadihuaju micuanara pana ejenedya aya era yuneridya quisarati ahuaque.

³⁰ “Tsunutaya amatu Yusuja ama cuanaque cuatsashaquique. Jadya tibudya tuque ecue aijama dyaque cuita emajaca micuana cueja ishú. Tura ique casa secacara aya; eje bucha casa secas ni tura ama. ³¹ Eratu aya ecue Etatara amereyaque cuita camadya, era tuque dyaque iyuhueda baya tibu. Dutyatu jutaqui eje bucha tura ecue ishú inime pihua eque, tuja ama cuanaque bahue juishu ique tuja inime eque juyaque.

“Nenetitsuracue. Nedirura rehuaque, —jadya tura ecuana acuare.

15

“Ique uva cunu buchique” jadya Jesús caticuareque

¹ Jesúsra ecuana isaracuare:

—Ique uva cunu neri buchique. Ecue Etata tu uva cunu naruquique buchique. ² Dutya eaqueja catyatiya cuanaque tuna era daneshaya buchique. Era cuatsashaya eque ama

juya cuanaque tuna cacacatiya ama bucha cuanaque. Tume cuanaque tuna Yusura ijehueya. Era cuatsashaya eque juya cuanaque tujatu ecana dyaquedya tsahuaya, tunaja jidamaque secatsu, era cuatsashaya eque amere ishu. ³ Ecue Etatara micuana amena secacuaredya jidama cuanaque, micuanara era cuejayaque bacahua tibu. Micuana micuana yaa cuana ebajejeque buchique. ⁴ Eatsehue ecadutyati neanicue. Eatsehue ni micuana ecadutyati aniya, tume ique micuana tsehue ecadutyati aniya. Yaa ni cunuju casipitima, ejebu cacacatie ni tu juma, ecasipitique juatsu camadya. Tumebaedya micuana ecue Etataja inime eque micuana ejuu ama eatsehue ecadutyatique ama juatsu.

⁵ “Ique uva cunu buchique; micuana micuana cunu yaa cuana buchique. Micuana ni eatsehue ecadutyati aniya, ique ni micuana tsehue ecadutyati aniya, tume micuana Yusuja inime eque juya. Yaa ecaca cuedaque bucha micuana juya. Eatsehue ni micuana ecadutyati ama aniya, eje bucha pureamaturae ni tuque micuana Yusu ama ni eje bucha eque. ⁶ Micuana ni eatsehue ecadutyati anicarama juya, Yusura micuana tee naruquira yaa cacacati baecuaque ebau bucha bae aya. Tumeque yaa cuanatu rarutaqui. Rarutsutu eijehuetara rara ishu. Rarahua baatsutu tee pujira mepe radanitya jadya aatsu pahuaya. Jadidyatu jubuque eaqueja catyatima cuanaque.

⁷ “Eatsehue cadutyatitsu neanicue. Era cuatsashaya eque nejucue, era bahuityahuaque nime aputama. Jadya ni micuana juya, Yusura micuana tyaya micuanara bacayaque. ⁸ Micuana ni Yusuja inime eque aniya, tume tuque micuana micuanaja ani jida eque bamereya Yusu jida casadaque. Tume tuna bahue juya micuana yuneri cuitadya ecuique. ⁹ Ique ecue Etatara iyuhueda baya bucha, iyuhuee micuana era baya. Jutaqui ju jida inime tsapema neanicue, era micuana iyuhueda bayaque adebatsu. ¹⁰ Ique ecue Etatara cuatsashaya eque jujacaya ama. Jadya tibudya ique inime tsapema, ique ecue Etatara iyuhueda bayaque caadebatitsu. Jutaqui ju micuana ni era cuatsashaya eque jujacaya ama, dyaque jida micuana judadiya, era micuana iyuhueda bayaque caadebatitsu.

¹¹ “Jadya micuana isarahua, micuana dyaque jida inime tsapema cuita juishu, era micuana jida inime tsehue amereya bucha. ¹² Jeeque cacuatsashati micuana cuejaya: “Iyuhueda necabaticue micuana cama. Era micuana iyuhueda baya bucha, iyuhueedya micuana necabaticue dutya peya cuana tsehue”. ¹³ Ecuana ni iyetacarama ama juya, peya eiyetauju, yuneridya ecuana cabameretiya

iyuhueda bayaque. ¹⁴ Micuana ni era cuatsashaya eque juya, yuneridya micuana ecue iyuhueda cuanaque. ¹⁵ Patronratu tuja mere puji cuana tura dutya inime pireyaque cuejaya ama, tuja iyuhueda cuanaque camadya. Era micuana aya “ecue mere puji cuana” jadya ama, “ecue iyuhueda cuanaque” jadya, era micuana ecue Etatara dutya ique cuejahaque cuejaha tibu. ¹⁶ Ique micuanara ama mepehua Micuana Cuatsashaquique juishu. Era micuana mepehua ecue iyuhueda cuanaque juishu. Era micuana mepehua Yusuja inime eque juishu, tuaqueja nimee jujaca ishü ama. Ecue Etatara micuana dutya tyaya ecue ebacaniju bacayaju. ¹⁷ Riyaque micuana amerenucaya: “Iyuhueda necabaticue peya cuana tsehue”, —jadya ecuana Jesúsra acuare.

Jetiera ama Jesúsra cuanaque ujeu babuqueque

¹⁸ Jesúsra ecuana bahuityanucacuare:

—Yusuja ama cuanara micuana ujeu bayaju, jidama inime nebaume. Neadebacue, ique tunara icuene ujeu bahuaque. ¹⁹ Micuana ni riyaque yahua juquedya jutidya ejuu, Yusu ujeu baqui cuana tsehue ni micuana jida ejuu, tume tunara micuana iyuhueda ebau. Era micuana mepehua micuana riyaque yahua juque cuita camadya juishu ama. Jadya tibudya micuana Yusuja ama cuanara ujeu baya, micuana tuna bucha ama aniya baatsu. ²⁰ Neadebacue micuana era icuene cuejahaque: “Mere puji tunajatu patrón muibaya bucha muie ama aya”. Ique tunara baya bae, baedya tunara micuana abuque. Ique jidama ijahue ijahue aqui juhua cuanara micuana tumbaedya ijahue ijahuedya aya. Ecue quisarati eque anihua cuanaque tuna micuanaja quisarati equedya aniya. ²¹ Jidama tunara micuana abuque, micuana ecuique baatsu, tunara Ique Cuadishaquique adebaya ama, tuaqueja nimee ama jadya juya tibu.

²² “Ique ni jequena ama juhua tuna Yusuja quisarati cuejara, tume tuna jucha metse ama ejuuque tunaja jucha cuanaju. Amena iyacua tuna ‘Jucha metse ama ecuana’ jadya jutaqui ama tunaja jucha cuanaju. ²³ Ique ujeu baqui cuanaratu ujeudya baya ecue Etata. ²⁴ Eratu dutyaja yacuaju ahua ejeque ecuitaja ataquique ama, Yusuja casa bamere ishü. Jadya ama bucha tunara dutyara jujeri bijidamaduraha. Era ni aquena ama juhua tunaja yacuaju, ‘Micuana micuana jucha metse, eaqueja catyatihua ama tibu, arepa ecue casa bahua ama bucha’ jadya tuna Yusura eauque ama. Amena tuna jucha metse, petatsu bijidamaduraha tibu. Tunara ique ujeu baya, tumbaedya ecue Etata. ²⁵ Riyaque jadya juyaqueri tunaja cacuatsashatiju ehüene equedya juhua: ‘Era tuna ni aiju buchique jidama ahua ama.

Jadya ama bucha tunara ique dyaque ujeu bahua' jadyatu icuenetadya huenetanahua Yusuja quisarati.

²⁶ “Eratu bacaya Etata tuja Espíritu cuadisha ishu. Turatu micuana tsahua ishu cuadishaya. Micuana yunerique cuejaratu junaya. Tura micuana ique eje buchique huecshanaya. ²⁷ Micuanaratu tumbaedy a cuejabuque peya cuana ique eje buchique. Micuana micuana eatsehuedya junenitibunehua, ique riyaque yahuaju mere juti-buneyaju. Jadya tibu tuque micuana ayadya quisarati micuanara bahuaque, bacahuaque jadya.

16

¹ “Jadya micuana cuejaya. Ecue cuanaque baatsu tunara micuana nerecaturadadiya. Icueneta cuejadya micuana aya, jadya juya cabatitsu micuana ecanimehuallatiuju. ² Micuana ujeu baqui cuanara micuana caradati ishique etare cuanaju nudyajabuque. Umae tunara micuana iyebuque. Micuana iyeyaque tuna Yusuja biji eque juya bucha cabatibuque. ³ Jadya tunara micuana abuque, ecue Etata, ni ique yuneri cuitadya adebaya ama tibu. ⁴ Icuenetadya micuana jadya cuejaya, tunara micuana ijahue ijahue ayaju, ‘Jesúsra cuejahua baedy taa tunara ecuana aya’ jadya micuanaja inime juishu, —jadya ecuana Jesúsra acuare.

Yusuja Espiritura eje bucha adadiyaque

Jesúsra ecuana bahuityanucacuare:

—Beru micuana riy a cuanaque cuejahua ama, ique micuana tsehue jari tibu. ⁵ Masadama judirunucaya Ique Cuadishaqui queja. Jadya ama bucha micuanara ni ejera ahua ama: “Pana cueja cuita ecuana acue mique eju diryaque” jadya. ⁶ Ique ecue Etata queja judirunucaya baatsu, eatsehue pureama ejuuque, dyaque peya inime micuana juya, rehuaque dirunucaya jadya bacatsu. ⁷ Pusha amadya micuana cuejaya. Micuanaja ishu dyaque jida ique dirunuca ishu. Ique ni ecue Etata queja ediruu ama, ejuetiu amatu Micuana Tsahuaquique, Nime Casaturaquique. Ique judirutsu tuque micuana queja cuadishadiruya. Jadya tibudya peya inime nejuume. ⁸ Eje tupu tuque junatsu “Micuana micuana ecajuchati”, jadya tujatu anaya riyaque yahuaju cuanaque. Bahue tujatu ecana amerenaya Yusura eje bucha tuyuque bayaque. Bahue tujatu ecana amerenaya Yusura ecajuchati cuanaque nerecaturabuqueque. ⁹ “Micuana micuana jucha metse, Jesús queja catyatihua ama tibu”, jadya tujatu ecana anaya. ¹⁰ Tura tuna bahue amereya Yusura ai tuyu bayaque. Jadyatu tura aya, ique rehua ama juya tibu. Ejetsunue juatsu

ama micuanara bajacaya, ique ecue Etata queja tsuraya tibu. ¹¹ Yusuratu amena cuejahuadya icuene: “Riyaque yahua ju cuanaque cuatsashaquiquetu canerecati ishuj ijuhuetanabuque”. Jadya tibudyatu Yusuja Espiritu junatsu, “Yusura ecajuchati cuanaque nerecaturabuque”, jadya tujatu ecana aya.

¹² “Umada tuque ecue aniya jari micuana cueja ishucue. Jadya ama bucha tuque micuana iyacua eadebau ama, micuana dyaque peya inime juya tibu. ¹³ Yusuja Espiritu tu Yunerique Ejitaju Amerequique. Tuque junatsu, tura micuana bamerenaya, bahuityanaya yunerique. Tuquetu tuja inime taca ama quisaratinaya. Etatara amereyaque camadya tujatu cuejanaya. Cuejanaya tujatu micuana eje bucha judadiyaque. ¹⁴ Tura ique muinaya. Tura ecue quisarati pana adeba aya tibu, tura micuana huecashanaya era micuana cuejahaque. ¹⁵ Eje bucha ecue Etatara quisarati aya, tume bae nucadyatu era aya. Jadya tibudya micuana ecue jadya cueja bahue juhua: ‘Yusuja Espiritu tura micuana ecue quisarati huecashanaya. Tume tura micuana dyaque jida cuitadya adebamerenaya’ —jadya ecuana Jesúsra acuare.

“Arepa micuana peya inime juya ama bucha, pureama micuana judadiya”

¹⁶ Jesúsra ecuana bahuityanucacuare:

—Ejetsunue juatsu ama micuanara amena bajacaya. Tuequedy micuanara ejetsunue juatsu ama banucaya. Amena diruya ecue Etata queja, —jadya ecuana Jesúsra acuare.

¹⁷ Umae ecuana tura mepehua cuanaque ecuana cabacaduratribarecuare:

—¿Eje buchique tujatu jadya aya? Ejetsunue juatsu amapa ecuana bajacaya. Tuequedyapa ecuana ejetsunue juatsu ama banucaya jadya. Etataque queja patu diruya. Jadya tibupa tuque ecuana banucaya ama. ¹⁸ ¿Eje bucha juatsu dyadi “Ejetsunue juatsu ama micuanara banucaya”, jadicue? Adebataqui ama tuque ecuana baya tura cuejayaque. Etehua buchique tu ecuanaja ishucue, —jadya ecuana jubarecuare.

¹⁹ Jesusratu adebacuare eje bucha ecuana bacaduracara ayaque. Jadicue adebatsu tura ecuana acuare:

—Era micuana ahua: “Ejetsunue juatsu ama micuanara amena bajacaya. Tuequedy micuanara ejetsunue juatsu ama banucaya”. ¿Riyaque tuque micuana adebataqui ama baya? ¿Riyaque micuanara bacaduracara aya? ²⁰ Pusha amadya micuana cuejaya. Dyaque peya inime, paya jadya micuana ique iyetahuaju juya. Yusuja ama cuanaque bacue dyaque pureama jutidya. Ejetsunue ama camadya micuana

peya inime juya. Tuequedya micuana dyaque jida cabatinucaya. ²¹ Ebacua cuinana ishu ujenahuajutu epuna dyaque peya inime juya, canerecati ishuque ura juetihua baatsu. Ebacua nana cuinanahuajutu epuna dyaque jida cabatinucaya. Amena tujatu ujera nerecaturahuaque adebajacahua. Ebacua nana camadya tujatu adebaya. ²² Jadidya micuana. Iyacua cuita micuana peya inime juya, era masadama shanaya cabatitsu. Amena ique micuana queja junanucahuaju, micuana dyaque pureama cabatinucaya, ni aija pureama amerejacataqui.

²³ “Micuana Tsahuaquique junatsu tura micuana bahuityanaya. Jadya tibudya tuque micuana sareya ama ecue bahuitya ishu, tura micuana bahuityanaya tibu. Pusha amadya micuana cuejaya. Micuanara ni ecue Etata ai bacaya ecue ebanijiu, tura micuana tyaya dutya micuanara bacayaque. ²⁴ Riya cama tuque micuanaja Yusu bacama ai ecue ebanijiu. Nebacacue. Jadya bacae aatsu tuque micuanaja juetiya bacahuaque. Micuanara bacayaque baatsu micuana dyaque pureama juya, —jadya ecuaña Jesúsra acuare.

Jesúsra Yusu adeba baecua cuanaque cuatsashaquique casa secabuqueque

²⁵ Quisaratínucatsutu Jesús jucuaré:

—Dutya ríya cuanaque micuana cuatsabiji eque bahuityahua. Ríyaque yahua juque ai cuana tsehue cuejapee micuana ahua, Yusu eje buchique micuana cuejacara aatsu. Masadamatu juetiya huecaca ecue Etata eje buchique micuana pana bahue juishuque. Ai etehuaque buchique amatu amena juya. ²⁶ Tumeque huecaca micuana ecue Etata tsehue piisidya quisaratitaqui, ecue ebanijiu bacabacayaque. Micuanaja ique saretaqui ama ecue Etata bacanuca bacanuca aishu, micuana cuita tuatsehue quisaratitaqui tibu. ²⁷ Ecue Etatara cuitadya micuana iyuhueda baya tibu, tura micuana bacayadya tuatsehue quisaratiyaju. Tura micuana iyuhueda baya, micuanara ique iyuhueda baya tibu. Tumbaedyá tura micuana iyuhueda baya, tuja yacua juque ique jecuareque micuanara ejeneya tibu. ²⁸ Yuneridya ique ríyaque yahua jujunahua ecue Etataja yacua juque. Masadama dirunucaya ríyaque yahua juque. Dirunucatsu judirunucaya ecue Etata queja, —jadya ecuaña Jesúsra acuare.

²⁹ Jadya bacatsu tuque ecuaña Jesús acuare:

—Amena mira ecuaña ejitaju cuejahua. ³⁰ Iyacua ecuaña bahue juhua mique dutya bahueque. Ecuanaja bacadurama jarijudya tuquemi adebahua ecuanara bacaduracara

ahuaque. Jadya tibudyami ni ejeja bacadurataqui amadya. Jadya tibudya rique ecuana ejeneyadya mique Yusura cuadishahuaque, —jadya tuque ecuana acuare.

³¹ —Arepa micuana ique Yusu equeque ejeneya ama ama bucha ¿iyacua tuque micuana adebayadya micuana dutya era cuejahuaque? ³² Masadama micuanara jacatillaya. Tsapetanatereya micuana. Peadya peadya micuana micuanaja etare cuanaju huanatereya eiyetauju. Arepa micuanara jacaya ama bucha, ita taca ama juya. Ecue Etataja ique jacanime ama. ³³ Cuejahuadya micuana era eje bucha juyaque, micuana inime tsapema juishu, micuana eatsehue peadya camadya juya tibu. Micuana riyaque yahuaju jari tupu micuana nrecada juya jari. Netsapeume inime. Bajida nejuume. Eratu casa sechua amena Yusu adeba baecua cuanaque cuatsashaquique, —jadya ecuana Jesúsra acuare.

17

Jesús tuja cuanaja ishu Yusu queja bacabacacuareque

¹ Quisarati amena juatsutu Jesúsra ebarucue queja petacuare, barepaju Etataque aniya queja

—Tata, masadama taa tunara iyeya, mira inime pirehua baedya. Ejitaju amerecue ique micue bacua emuique, ecue dyadi mique emuique bamere ishu. ² Jetiama riyaque yahuaju cuanaque tuquemi eaqueja nimee amerehua. Mira tyahua micue casa. Jadya tibudyatu ecue cuanaque anisiribuque terenuca ishu ama. ³ Maju baecua anibuque cuanaque tuna miaqueja nimee juya cuanaque, tumbaedya eaqueja nimee juya cuanaque. Mique peadya mi Yusu. Ique micue bacua mira cuadishahuaque.

⁴ “Ique riyaque yahuaju jari tupu tuque bamerehua mique emuique. Atillahua tuque mira ique amerehuaque. ⁵ Tata, ique miaquejaque jema jariju, ique emui juhua mique munitaya bae. Yatseja yahua iyama jarijutu jadya juhua. Ique miaqueja judirunucahuaju, ique muimerenucacie.

⁶ “Tata, era tuna bahue amerehua mique eje buchique, mira eaqueja nimee amerehua cuanaque. Tuna tuna micuiquedya juhua. Mira tuna eaqueja nimee amerehua. Era mique eje buchique quisarati aya bacatsu, tuna micue quisarati eque juhua. ⁷ Amena tuna bahue micue casa tsehue era dutya ai ayaque. ⁸ Dutya mira ique cuejamerehuaque tuna cuejahuadya. Tunaratu ejenecuaredya era bahuityahuaque. Jucuaire tuna ecue yana equedya. Tuna tuna bahue jutibunehua yuneridya ique miaquejaque jehuaque. Ejenetibunecuare tunajatu mira ique rehua cuadishahuaque.

⁹ “Tata, miaqueja ique bacabacaya tunaja ishu, micue ecana naru ishu. Bacaya mique, ique adeba baecua cuanaja ishu ama, mira eaqueja nimee amerehua cuanaja ishu cuita camadya. Tuna tuna micuiquedya. ¹⁰ Dutya eaqueja nimee cuanaque tuna micue cuanaque. Jadya tibudya tuna ecuiquedya. Ique emuiquetu ejitaju juya tuna eje bucha juya eque.

¹¹ “Masadama dirunucaya riyaque yahua juque, miaqueja judirunuca ishu. Jadya ama buchatu eaqueja catyatihua cuanaque riyaque yahua juque aniya jari. Tata, miquemi juchama nerique. Mira ecue amerehua cuanaque micue casa tsehue narucue. Peadya camadya bucha ecana amerecua, ique miatsehue bucha. ¹² Mira ique micue casa tyahua. Ique yahua juque tuna tsehue jariju tuna tsahuahua, micue casa tsehue, tuna eaqueja nimee ejujacaju. Peadya camadyatu eaqueja nimee jujacahua; umae cuana tuna eaqueja catyati-ajeya jari. Ehuenedya tu micue quisaratiju peadya eaqueja nimee jujacadadiyaque. Jadidyatu juhua, tuhua ehue bae cuitadya.

¹³ “Amena masadama judirunucaya miaqueja, Tata. Ique yahua juque jari tupu mique isaraya ecue cuanaja ishu, micue ecana dyaque pureama amere ishu, ique bucha. Era tuna pureama neri amerecara aya. ¹⁴ Era tuna cuejajacahua ama micue quisarati. Tuna tuna riyaque yahua juque mique adeba baecua cuanaque aniya bucha ama. Ique aniya bucha, tuna aniya. Jadya tibudya tuna micue cuanara ama ujeu baya. ¹⁵ ‘Cuinanashacue ecana riyaque yahua juque’ jadya ama mique aya. Bacaya mique, micue tuna naru ishu, Ijahuara ecana ecajuchatishauju. ¹⁶ Riyaque yahua ri ecue eaniqui neri ama. Mique adeba baecua cuanaque aniya bucha ama ique aniya. Riyaque yahua ri ecue cuanaja eaniqui neri ama; ni dyadi ecana mique adeba baecua cuanaque aniya bucha aniya. ¹⁷ Tata, micue inime eque ecana anishaajecuedya jutidya, micue quisarati yuneri eque. Micue quisarati camadya tu yunerique. ¹⁸ Mira ique riyaque yahua juque cuanaque micue quisarati cueja ishu cuadishahua bucha, tumbaedyatun eque ecue cuanaque cuadishaya micue quisarati cuejara dutya queja riyaque yahua juque. ¹⁹ Ique miaqueja catyatiya mira inime iyahua eque ani ishu, ecue cuanaque yuneridya micue amere ishu, tuna micue inime eque ani ishu.

²⁰ “Tata, riyaque miatsehue junenihua cuanaja jida ishu camadya ama miatsehue quisaratiya. Riyaque cuanara micue quisarati cuejayajutu peya cuana eaqueja catyatidadiya. Tume eaqueja catyatidadiya cuanaja jida ishu miatsehue quisaratiya. ²¹ Dutya tume cuanaque ecana tsahuacue,

peadya camadya bucha tuna juishu, Tata. Mique, ique jadya yatse peadya camadya. Miquemi eatsehue; ique bacue miatsehue. Tuna dyadi yatse peadya camadya buchadya paju. Tuna yatse bucha juyaque juatsu, eaqueja nimee ama cuanaque bahue paju mira ique cuadishahuaque. ²² Mique emui juhua bucha, jadidya tuna emui amereya, tuna peadya camadya juishu, yatse miatsehue bucha peadya camadya. ²³ Ique tuna tsehue peadya; miquemi peadya eatsehue. Jadya tibudya tuna yatse tsehue peadya cuita camadya. Yatse tsehue peadya camadya baatsutu eaqueja nimee ama cuanara ejeneya ique mira cuadishahuaque. Adebadadiya tunaja tuque mira ecue cuanaque iyuhueda bayaque, ique iyuhueda baya baedya. ²⁴ Tata, mira tuna eaqueja nimee amerehua. Era tuna eatsehue amerecara aya micue yacuaju, ique muitayaque bamere ishu. Yuequedyadya mira muimerehua; yatseja yahua iyama jarijudya mira iyuhueda bahua. ²⁵ Miquemi tuyu, Tata. Cajuchatima mique ni cajuchati pidya. Eaqueja nimee ama cuanarami adebaya ama. Era camadyami dyaque jida adebaya. Riya era mepehua cuanaratu pana ejene aya ique mira cuadishahuaque. ²⁶ Adebamerecuare mique era tuna queja. Adebamereajeyadya jutidya mique era. Cuejajacaya ama tuna era, mira ecana dyaque iyuhueda bayaque. Jadya tuna cuejahua, tuna peya cuana tsehue yurameta iyuhueda cabati ishu, mira ique iyuhueda baya bucha cuita tuna dyadi iyuhueda cabati ishu. Jadya tuna cuejahua, ique tuna tsehue peadya camadya juishu, —jadyatu Jesús quisaraticuare tuja Eataque Yusu tsehue.

18

Jesús erisique dujutanacuareque

(Mt 26.47-56; Mr 14.43-50; Lc 22.47-53)

¹ Jesús Etataque tsehue quisarati amena juhuaju ecuana Jerusalénju cuacuare. Cuacuare ecuana espere jiri quini eura eqe Cedrón bacani yueque macare. Tuhuatú olivo acui quini jucuare. Tuhua junatitsu ecuana nubinaticuare. ² Eje uma casitatidyatu Jesús jucuare tuhua dutya ecuana tura mepehua cuana tsehue. Jadya tibudyatu Judasra, arepa tuque ecuana tsehue ama ama bucha, pana adeba acuare tumeque acui quini. Tuhua tujatu Jesús tuque ujeu baqui cuana queja inamere ishu inime jucuare. ³ Tuhua ecuana ejetsunue ama cuita junatihuaajutu Judas juticuare, tuta ama. Pae cuanaja huaraji cuanara, fariseo cuanara jadya patu cuadishacuare peadya cuare sudaru cuana, tumbaedya umae Yusuja etare naruqui cuanaque, Jesús inati ishu. Acui,

cuchiru jadya tunajatu cati ishú dujuare. Tumebaedya lámpara, ude esapucaca jadya tsehue tuna cudatíajecuaré.
⁴ Jesústu caadebaticuaré tuque eje bucha juyaqué. Tsurutsatsu tujatu ecana bacaduratsacuaré:

—¿Ai tuque micuana sarenaya? —jadya tujatu ecana at-sacuaré.

⁵—Sareya tuque ecuana Jesús Nazaret juque.

—Idya ique, —jadya tuna Jesúsra acuaré.

Judas, tuque inamerequí juyaquetu tuhuadya juquare tuna jadya quisaratiyaju. ⁶ Jesúsra “Idya ique” jadya ayaju tuna tjerutanatsu yahua catsaqui juquare. ⁷ Tume tuna Jesúsra yudijidya bacadura anucacuaré:

—¿Ai tuque micuana sarenaya?

—Jesús Nazaret juque, —jadya tunajatu quemitsanucacuaré.

⁸—Cuejahuadya micuana era, “Idya ique” jadya. Ique micuanara sareyaqué juatsu, era mepehua cuanaqué nein-aume. Padiru ecana, —jadya tuna Jesúsra acuaré.

⁹ Jesústu bahuedya juquare canimehuallatima canere-catiyaqué idu ishú ecuanaja casa aijamaqué jari. Jadya tibudya patu juquare: “Era mepehua cuanaqué ecue nein-aume. Padiru ecana”. Tume tunara ecuana inacuaré ama, Jesúsra cuitadya quisarati achine eque juishu: “Tata, ni ejeque buchiquetu mira eaqueja catyatishahuaqué eaqueja nimee jujacahua ama”. ¹⁰ Tunara Jesús inaya baatsutu Simón Pedrora cuchiru baina juque jupucuaré. Juputsu tujatu pae dyaqué muidaja mere pujija ijaca pejuquare. Jida eque amaca eque ijaca peju tujatu Malco bacani acuaré.

¹¹—Cuchiru tsehue icuenecara aume, Pedro. Ishacue micue cuchiru bainaju. Pacanerecatidya ique, ecue Etatara jadya inime pihua tibu, arepa ique canerecatiyaqué ai patsedaqué iji ishúque bucha paju ama bucha, —jadyatu Jesúsra acuaré Pedro.

Anás queja Jesús dujutanacuaréque

(Mt 26.57-58; Mr 14.53-54; Lc 22.54)

¹² Sudaru cuanara, huaraji merequí cuanara, Yusuja etare naruquí cuanara jadyaratu Jesús inaticuaré. Inatsu tunajatu risicuaré. ¹³ Icuene cuita tunajatu dujuare Anásja etareju. Anástu Caifásja ehuaneequeja etataqué juquare. Caifástu juquare tume patya pae dyaqué muidaque. ¹⁴ Caifasradyatu icuene israelita cuanaja huaraji cuana jadya acuaré: “Dyaqué jida peadya camadya pamaju, ecuana dutya emajuju”.

Pedrora “Adebaya ama tuque era”, jadya acuaréque

(Mt 26.69-70; Mr 14.66-68; Lc 22.55-57)

¹⁵ Tunara Jesús dujuya baatsu tuque yatse Simón Pedro tsehue tupujudya aajecuare tunara Jesús dujuyaju. Ique pae dyaque muidaja eadeba jucuare. Jadya tibudya Jesús tupuju nubiticuare. ¹⁶ Pedrotu nubinaticuare etsecuetsauju camadya. Pedro eatsehue etare ducu nubihua ama baatsu, ique yudijidya cuinananuca jucuare etsecue naru juya tsehue quisaratira.

—Pedro ecue ecare nudyacue, —jadya tuque epuna aticuaire.

Era jadya ahuajutu epunara etsecue pacashatsu nudyacuare. ¹⁷ Tuque nubihuajutu epunara bacaduracuare:

—¿Aremi mique tumeque ecuita Jesús bacani tsehue junenihuaque ama? —jadyatu etsecue naruquiru acuare Pedro.

—¡Aijama! ¡Adebaya ama tuque era! Tuatsehue junenihuaque ama ique, —jadyatu catehuaticuare Pedro.

¹⁸ Bada tu jucuare. Jadya tibudyatu pae dyaque muidaque merequi cuanaque etiqui caruqueticuare. Etiqui cunu netibaretsu tuna etiqui bahui jucuare sudarru cuana tsehue. Pedrotu cajipeticuaredya etiquiju cuquenashati ishu.

Anásra Jesús bacaduracuareque

(Mt 26.59-66; Mr 14.55-64; Lc 22.66-71)

¹⁹ Anásja etarejutu pae cuanaja huarajira cacuejamereticara juatsu Jesús bacaduratibunecuare:

—Cuejacue ique mira mepehua cuanaque. ¿Eje cuanaque tuna? ¿Ai tuna juya? ¿Ai tuquemi ecana bahuityachine? —jadya tujatu acuare.

²⁰ Jesusratu quemitsacuare:

—Etehua quisarati ama juchine. Dutya jujerija ijacaju quisarati bahue juhua. Dutyaja ijacaju tuna bahuitya bahue juhua etehua ama ecuanaja caradati ishuque etare cuanaju, tumbaedyu Yusuja etareju, dutya ecuanaja ata cuana caradati bahueju. ²¹ Ique quisaratiyaju bacaqui juhua cuanaque tuna bahue jida era ai bahuityahuaque. ¿Aishu jatsu mira ique bacaduraya? Ique quisaratiyaju bacaqui juchine cuanque bacaduracue. Tuna tuna bahue ique eje bucha quisaratichineque, —jadyatu Jesúsra acuare Anás.

²² Peadya ecuita Yusuja etare naruquiquetu Jesús caque-mitsatiyaju bacatsu cahuaiticuare. Bahuapajacuare tuja tuque.

—Jadya ama tu pae dyaque muidaque equemitsata. ¿Eje bucha juatsu tuquemi muibaya ama? —jadya tujatu acuare.

²³ —Era muida tsehue ama quemitsahuaque juatsu, cuejacue rehua cuanaque ique jidama juhuaque. Muida tsehuedya tuque quemitsahua. ¿Tume jatsu mira eje bucha juatsu bahuapajaya? —jadyatu Jesúsra acuare.

²⁴ Tumetu Anásra cuadishacuare risimeretsu Caifás pae dyaque muida queja.

Pedrorra “Adebaya ama tuque era”, jadya anucacuareque
(Mt 26.71-75; Mr 14.69-72; Lc 22.58-62)

²⁵ Jesús, Caifás queja dujutanahuaju tucue patu Pedro etare tsecue etiqui bahuinya jucuare jari.

—¿Mique amami risitanahua tsehue junenihuaque? — jadyatu Pedro acuare tuhua etiqui bahui jucuare cuanara.

—¡Aijama! ¡Adebaya ama tuque era! ¡Ique tuatsehue junenihuaque ama! —jadyatu Pedro catehuatinucacuare.

²⁶ Yume isaranucadyatu pae dyaque muida que merequiera acuare. Tumeque ecuitatu Pedrorra ijaca pejucuareja ata jucuare.

—Pusha pushami juya. Erami bahua Jesús tsehue Olivo Acui Quiniju, —jadya tujatu acuare Pedro.

²⁷ —¡Ique ama! Peya dyadi ni tuquemi bahua. Adebaya ama tuque era, —jadya tujatu anucacuare.

Tuque jadya quisaratiyaju cuitatu tacure quiquecuare.

Jesús Pilato queja dujutanacuareque
(Mt 27.1-2, 11-14; Mr 15.1-5; Lc 23.1-5)

²⁸ Israelita cuanaja huaraji cuanara bacadura amena ahua-jutu Jesús Caifásja etare juque dujutanacuare. Turatu dujumerecuare Pilato queja. Pilatotu Roma juque enaruqui cuarequi jucuare. Apudajudya tunajatu enaruquiija etareju dujucuare. Israelita cuanatu nubicuare ama Pilatoja etareju, tuque israelita ama tibu. Nubiquena ni ecana jucuare, caasicatiquena tuna jucuare tunaja cacuatsashati eque. Pascua chine ishú araaratayaju ecana eararauque ama. ²⁹ Tuna nubicarama juya baatsutu Pilato tuja etare juque cuinanacuare tuna tsehue quisaratira.

—¿Eje bucha juatsu rique micuana risitsu beya riyaque ecuita? ¿Ai rejari jidama achine? —jadya tujatu ecana aticuare.

³⁰ —Jidama juhuaque ama juatsu, tuque ecuanana bequena amadya juquena juhua rehua miaqueja. Ecuanaja baba cuanaja cacuatsashati eque amatu juhua, —jadya tunajatu acuare.

³¹ —Micuanara nucadya nedujunucacue. Micuanaradya jutidya nenerecaturacue micuanaja baba cuanaja eje bucha cacuatsashati eque, —jadya tuna Pilatora acuare.

—Ecuanaja cacuatsashati equetu iyetaqui. Jadya ama bucha ecuanana israelita cuanajatu aijama inime ni ejeque curusuju tatatsu iye ishú. Micuana Romaju cuanaja camadyatu jadya ataqui, —jadya tunajatu acuare.

³² Icuenetadyatu Jesús cacuejaticuare tunara curusuju tatatsu iyedadiyaque. Arepa israelita cuanaja huaraji cuana tuque eje bucha cacuejatichineque baecua jucuare ama bucha, tunajatu acuare tuque cacuejatichine eque cuitadya. ³³ Jadya bacatsutu Pilato etare ducu nubitincuacuare. Ihuaramereticuare tujatu Jesús. Ihuaratsu tujatu bacaduracuare:

—¿Midyami israelilta cuanaja ecuari? —jadya tujatu acuare.

³⁴ —¿Micue adebadya jutidyami jadya quisaratiya? ¿Ejera cuana ni taa mi cuejahua? —jadyatu Jesúsra acuare.

³⁵ —Ecue adeba ama tume. Ique israelita ama. Micue yahuaju cuanara cuitadyami behua eaqueja. Israelita cuanaja huaraji cuanarami eaqueja menajetyahua. ¿Eje bucha jatsumi juchine? ¿Mique pami juya tunaja huaraji dyaque inime metseque jadya? —jadyatu Pilatora acuare Jesús.

³⁶ —Ique riyaque yahua juque ecuari ama. Riyaque yahua juque ecuari juatsutu ecue cuanaque ique icuenedyaque ecatiu, israelita cuanaja huaraji cuana queja ique menajetyata ishü ama. Ecuaridya ique, riyaque yahua juque ecuari cuana buchique ama, —jadyatu Jesúsra acuare.

³⁷ Jadya ayajutu Pilatora jadya acuare:

—¿Jutaquijumi mique ecuari?

—Jejee, jadidya ique, mira aya equedya. Quisarati yunerique cuejara ique jehua riyaque yahuaju. Dutya yunerique bahue jucara juyaratu ijaca bacaya era cuejayaque, —jadyatu Jesús acuare.

³⁸ —¿Eje bucha bahuee jatsu yatse ejuu ai yunerique? —jadyatu Pilatora acuare.

*Pilatora “Jesús pamajudya” jadya acuareque
(Mt 27.15-31; Mr 15.6-20; Lc 23.13-25)*

Jadya bacaduratsatu cuinananacuare Pilato israelita cuanaja huaraji cuana tsehue quisaratinuca ishü.

—Ecue inime ri riyaque ecuita eje bucha cajuchatie juma. Era taa ri dadiya ama ni riyá piji buchique eajuchati. ³⁹ Micuanaja bahue tuque Pascua chine ishü inajacaya peadya erisique micuanara inajacamerecara ayaque. ¿Inajacamerecaradya micuanara aya Jesús micuanaja ecuari? —jadyatu Pilatora acuare israelita cuanaja huaraji cuana.

⁴⁰ Jadya bacatsu tuna yudijidya quique junucacuare je-buda:

—¡Aijama! ¡Inajacamereume Jesús! ¡Ecuonaratu Barrabás inajacamerecara aya! —jadya tuna jucuare quique eque.

Barrabástu chiri piji, quiyeti puji jadya jucuare.

19

¹ Tumetu Pilatora tuja sudaru cuana cuatsashacuare:

—Catsacatsa neacue Jesús, —jadya tujatu ecana acuare.

Catsacatsadya tuna acuare. ² Catsacatsa amena aatsu tunajatu ecuari edujuta bucha dujue acuare, ijahue ayaquedya jutidya. Cunu cuijaquique tunajatu iyucaju jutumere ishu picacuare. Jadya aatsu tunajatu Jesúsja iyucaju jutumerecuare. Dyaque jutuyaque tacatsu tunajatu jutumerecuare una sehuesahuauque, ecuari arida cuanaja ejutuqui tsehue, tuque ijaribayaquedya jutidya. ³ Jadya tunajatu jipetitsu acuare:

—¡Emuitana paju israelita cuanaja ecuari muidaque!

Jadya aatsu tunajatu butsequini pajacuare.

⁴ Pilatotu cuinanancacuare israelita cuanaja huaraji cuana quejaque.

—Ihuamerenucaya tuque micuanaja yacuaju. Ecue inime tu tura ni ai buchique jidama ahua ama, —jadya tuna Pilatora acuare.

⁵ Tumetu Pilatora Jesús etare juque cuinanashacuare ecuita cuanaja yacuaju neticuina ishu. Cunu cuijaquique epicaquetu ejutumere jaridya iyucaju jucuare. Ecajututi jaritu jucuare dyaque eramaqui sehuesahuau tsehue.

—¡Nepetacue! ¡Jeedy a ri ecuita! —jadya tuna Pilatora acuare.

⁶ Pae cuanaja huaraji cuanara, Yusuja etare naruqui cuanara jadya tunajatu petacuare Jesús. Petatsu tuna quequeti-bunecuare:

—¡Curusuju tatamerecuel! ¡Curusuju tatamerecuel! ¡Tuhua pamaju! —jadya tuna jucuare.

—Micuanara jucha metse baya tibu, jutaquiju micuanara cuitadya neinacue. Micuanara cuitadya curusuju netatacuel. Ecue inimeju tu tuyu ama ecuanaja iyemere ishu. Turatu ai jidamaque ahua ama, —jadya tuna Pilatora acuare.

⁷ —Tuyudya tu iye ishu. Tuquetu ecuitadya jutidya. Jadya ama bucha tudya cuitadyatu “Yusuja Ebacaque ique” jadya juchine. Tuque jadya juchine tibu iyetaquidya tuque ecuanaja ebaba ecanaja cacuatsashati eque jadya tibu.

⁸ Pilatotu dyaque bajida jucuare, Jesús “Ique Yusuja Ebacaque” jadya juchineque bahue juatsu. ⁹ Educuju nudysu tujatu Jesús bacaduracuare:

—¿Ejuque mique? —jadya tujatu acuare.

Jesusratu quemitsacuare ama cuitadya.

¹⁰ —¿Eje bucha juatsu mira quemitsacarama aya? Ecuetu aniya casa mique era eje bucha amerecara aya eque aishu. Era ecana eau “Neinajacacue riyaque”; einajacaudya tunara mique. Era ecana eau “Curusuju netatacuel maju ishu”,

etataudya tunara mique. ¿Baecuami ecue tumeque casa aniyaque? —jadyatu Pilatora acuare.

¹¹—Micuetu casa aniya, Yusura tyahua tibu ademe. Yusura ni mi tyaquena ama juquena juhua tumeque casa, miquemi ni ai buchique ejuu ama. Mira ni ique iyemereya, Yusurami jucha metse baya. Dyaquedya tu ecajuchati ique miaqueja menajetyaqui juhuaque. Tumeque tu dyaque jucha arida, —jadyatu Jesúsra acuare Pilato.

¹² Amena Pilato Jesúsra jadya cuana ayaju bacatsu tujatu eje buchadya inajacacara datse acuare. Ecuaita cuanaratu adebacuaredya tura Jesús inamerejacacara ayaque.

—Jesús patu tudyá cuitadya ecuari dyaque aridaque jadya juchine. Roma juque enaruqui aridaquetu cahuaitiya ecuari arida jadya catiya cuana tsehue. Mira ni inajacamereya tumeque ecuari arida tsehue cahuaitihuaque, tumetu tuque dyaque ecahuaiti juya miatsehue, —jadya tunajatu acuare Pilato quique eque.

¹³ Jadya bacatsutu Pilato anibutenuacuare inime cuana bajeje ishucue eanicuareju. Tumeque jadya ishucuetu “Gabata” bacani jucuare, “Tumu jepedaque neti ishucue” jadique. ¹⁴ Barepatya tu jucuare, Pascua chine huecacape juyaju. Israelita cuanatu chine juishu cabajejeticuare.

—Jeedyá micuanaja ecuari, —jadya tuna Pilatora acuare israelilta cuanaja huaraji cuana.

¹⁵ —¡Pamaju! ¡Pamaju! ¡Curusuju tatamerecue! —jadya tuna jubarecuare quique eque.

—¿Micuanaratu micuanaja ecuari curusuju tatameretsu iye-merecara aya? —jadya tuna Pilatora bacaduracuare.

—¡Riyaque ama tuque ecuanaja ecuari! ¡César camadya tuque ecuanaja ecuari! ¡Aijama tu peya! —jadya tuna jubarecuare pae cuana cuatsashaqui cuanaque.

¹⁶ Tunara quisarati ayaju bacatsutu Pilato jucuare:

—Micuanara amerecara aya equedya paatana.

Tume tujatu Jesús menajetyacuare sudaru Romaju cuanaque, tunaja curusuju tata ishu.

Jesús curusuju tatatanacuareque

(Mt 27.32-44; Mr 15.21-32; Lc 23.26-43)

¹⁷ Inatsu tunajatu Jesús Pilatoja etare juque cuinanashacuare. Cadujutishacuare tunajatu curusu uhua cuemusú Emaju Iyuca Baeju. (Hebreo yanaju tu “Gólgata” bacani). ¹⁸ Tuhua tunajatu curusuju tatacuare. Tumebaedya tuna beta ecuita tatacuaredya curusuju, Jesúsja jida eque amaca, peya jani eque amaca jadya. ¹⁹ Pilatoratu huenemerecuare tauraju Jesúsja curusu iyucaju: “Riyaque ri Jesús Nazaret juque, israelita cuanaja ecuari” jadique.

²⁰ Jadiquetu ehue ne jucuare quimisha yana eque, hebreo, griego, latín jadya eque. Jesús tuna curusuju tatacuarequetu Jerusalén epu ebari japadama jucuare. Jetiama tuna tueque cuetiya, cuinanaya jadya jucuare epu ebari juque. Jadya tibudya tunajatu jetiera ama curusuju ehue neque isaracuare. ²¹ Pae cuanaja huaraji cuanaja biji ama tu ehue neque jucuare. Tume tunajatu Pilato acuare:

—¿Aishu tuquemi “Israelita cuanaja ecuari” jadya huene merehua? Dyaque jida “Riyarari quisarati achine. Tuquepa israelita cuanaja ecuari” jadya, jadya tuquemi huene merehua taqui ahua, —jadya tunajatu acuare.

²² —Aijama. Cuareya ama tuque era, era huene merehua que.

²³ Jesús curusuju tatatanama jarijutu sudaru cuanara tacacuare tura jutuyaque. Curusuju tata amena aatsutu pushi sudaru cuana tura jutuhua cuanaque cajuquetibarecuare. Anidadicua retu tura educuju jutuyaque, ejutuqui yuta tutsu eaque barudaque. Pushiradya jutidya tunajatu bijida bacuare.

²⁴ —Nechajara ama. Dadu jutidya ijahue neara. Dado cuana eje bucha cuinanaya eque ecua na bahue juya aija tura educuju jutuyaque juya que, —jadya tuna jucuare.

Jadya juatsu tuna ejeja masa ecuanaja juya jadya jucuare. Jadyatu jucuare, Yusuja quisarati ehue ne equedya.

“Cajuqueticuare ecana era jutuyaque.

Dadu ijahue ecana jucuare era educuju jutuyaque metsene ishu”.

Tumetu béru huene tanacuare bae cuitadya jucuare.

²⁵ Jesúsja ecuaquetu curusu peque neticuare. Ecuaque tsehuequiquetu tuhuadya jucuare. María, Cleofasja ehue nequetu tuhuadya jucuare, tumbaedy a peya María Magdalaju anicuareque. Tumeque pushi epuna cuana tuna curusu peque neticuare. ²⁶ Jesusratu ecuaque bacuare tuhua netiyaju. Tumbaedy a ique tuhua neticuare Jesúsja ecuaque peque. Jesúsra ique dya que iyuhueda bacuare.

—Mama, jeeque ri era mepehuaque. Tumeque micue, micue bacua neri bucha paju. Tura tuja ecuaque neri enaruu bucha narue acue, —jadya tujatu María acuare.

²⁷ Jadya juatsu tura isaracuare:

—Riyaque epuna micue, micue paju cuaa neri bucha. Micue cuaa enaruu bucha narue acue, —jadya Jesúsra acuare.

Tura jadya ahua ju tuque Jesúsja ecuaque ecue etareju baishu dujucuare.

Jesús curusuju majucuareque

(Mt 27.45-56; Mr 15.33-41; Lc 23.44-49)

²⁸ Jesústu bahuedyá jucuare tuque ameretahuaque amena atillayaque.

—Ijicara juya, —jadyatu jucuare, Yusuja quisarati ehue neque juishu.

²⁹ Tuhua tunajatu equiniquiju anicuare uva nacaca esanashaque patsedaque. Tume tunajatu mullaticuare uva nacacaju siji ishuque huapeje buchique. Mullatsu tunajatu risicuare acui hisopo bacani yaaju. Nityatsuratsu tunajatu jipemerecuare Jesúsja ecuatsa tuyu, tuja susu ishu. ³⁰ Jesusratu susucuare uva nacaca esanashaque patsedaque. Susuyaque cuitatu jadya jucuare:

—Dutya ecue mere tuque amena atillahua, —jadyatu jucuare.

Jadya quisarati ayaquetu Jesúsja iyuca huejitacuare. Amena ishu canajeti pidya juu, maju jadyatu jucuare.

Sudarura tsati tsehue Jesús epereju sacuacuareque

³¹ Israelita cuanaja huaraji cuanaratu curusuju eshura cuanaque tumeque meta ni huecacape jadya badeshacarama acuare, canajara huecaca chinequeja ijete nubiyaju catibutiya tibu. Jadya juatsu tuna Pilato enaruqui tsehue quisaratira cuacuare.

—Cuatsashacue micue sudaru cuana. Masadama maju ishu tuna etsaca cuanaju paraquebareti ijete dyaque cuita chinemajudya. Tuna pana maju juhua baatsu tuna pabutyabare curusuque emaju cuanaque, —jadya tunajatu aticuare.

Amena ijete nubidiruyaju Pascua catibutiya tibu tunajatu bacaticuare. ³² Tumetu Pilatora cuadishacuare tuja sudaru cuana. Cuacuarenya ecana Golgotaju. Junatitsu tunajatu raquecuare peadya curusuju etata badeyaja etsaca, tuque masadama maju ishu, Jesús tsehue tatatanapee juhuaque. Tuequedyá tuna peyaja etsaca ecitse raquenucacuare. ³³⁻³⁷ Amena Jesús queja judiritsu tunaja bacuare Jesús majuhuaaju. Tume tunajatu etsaca raquecuare ama. Icueneta huenedyatu ea jucuare Yusuja quisarati: “Raquedadiya ama tunajatu tuque micue ni peadya etsau”. Peadya sudaruratu pere sacuacuare tsati huitu cueruda tsehue. Sacuayaju cuitadya tujatu ami ena tsehue ujauja cuinanacuare. Peya tu Yusuja quisarati ehue neque: “Petadadiya tunajatu tsati tsehue esacuaque”. Jadidyatu Jesús jucuare, icueneta huene ea baedyá. Era cuitadyatu bacuare Jesús sudaru cuanara majuhuaaju eje bucha ayaju. Hueneya rique micuanaja era cuitadya bacuareque. Era hueneyaque ri yunerique. Yuneri cuitadya jadya jucuareque rique micuanaja hueneya, micuana dyadi Jesús queja catyati ishu.

Jesús emajuque tumu cani epuruju ishatanacuareque
(Mt 27.57-61; Mr 15.42-47; Lc 23.50-56)

³⁸ José Arimateaju anicuarequetu cuacuare Pilato queja. Arepa tuque Jesús queja ecatyati ama buchatu cacuejatima jucuare ni eje queja. Tuquetu bajida jucuare israelita cuanaja huaraji cuanara enerecaturauju.

—¿Ebutyamereu ama mira Jesús curusuju emaju badeyaque? Paishati caniju, —jadya tujatu Pilato aticuare.

—Jidadya, butyameretsu emaju papa ishu cani epuruju ishaticue, —jadyatu Pilatora acuare.

Tumetu José cuacuare Gólgataju. Butyameretsu tujatu emajuque dujuacuare tumu ebari cani epuruju. ³⁹ Nicodemotu cuacuaredya José tsehue. Tumequedyatu Jesús tsehue chineju quisaratira cuacuareque. Emaju caniju cuayaque tujatu arida ijimedaque dujumerecuare, quimisha tunca kilo cuana, emaju dyaque paque ishu. Tumeque ijimedaquetu acui madi ijimeda tsehue eujaque tsuje aridaque jucuare, mirra, áloe bacani. ⁴⁰ José, Nicodemo jadyara tatsejatu queticuare Jesús emajuque. Emajuque piruri ishu behuaque tatsejatu ijimeda tsehue nacatashacuare. Epiruriquique ijimeda tsehue nacatashatsu tatsejatu Jesús emajuque piruricuare. Jadya tuque ecuanaja bahue jucuare emajuque papatima jariju eraca arida tsehue piruri. ⁴¹ Jesús curusuju tatatanahuaque japadamatu jucuare olivo acui quini. Tuhuatu cani jucuare emaju cuanaque isha ishuque, butseeju epuruque. Ishamatu jucuare ni ejeque emajuque buchique. ⁴² Huecacape piji cuitadyatu amena canajara huecaca catibuticuare, mere jutaquique ama. Tumeque cani japadama juya tibu, tatsejatu tuhuadya Jesús ishaticuare, ebajarara juya tibu.

20

Jesús chacha netitsuranucacuareque
(Mt 28.1-10; Mr 16.1-8; Lc 24.1-12)

¹ Domico huecaca apudajudya cuitatu María Magdala juque cuahuecacuare Jesús emajuque tumu cani epuruju ishatanachineju. Tsunuda apuapu jariju cuitadyatu cuacuare. Tudyá tujatu junatiya tajira cuitadya banaticuare tumu ebari cani tsecue penequique etecu. Aira cuana tujatu emajuque chirihua bucha bacuare. ² Tumetu epuna tsajaja cama cuacuare yatse queja. Simón Pedro, ique Juan Jesúsja dyaque iyuhueda jucuare quejatu juticuare.

—Chirihua tunajatu Ecuana Cuatsashaquique emajuque. Adebataqui ama eju cuana taa tuna iyasicuahua, —jadya tura yatse aticuare.

³ Jadya tura ayaju yatse Pedro tsehue epu juque cuinanatsu caniju cuacuare. ⁴ Betadya yatse tsajaja cama cuacuare. Ique dyaque huenida cuita tsajajaajetsu icuene junaticuare emaju caniju. ⁵ Cani ducu peta ishu remecuare ique. Tume tuque remetsu cuajinaticuare. Bacuare tuque sahuana cuita camadya Jesús piruriqui juchineque cani ducu eiya. Nubicuare ama ique. ⁶ Tudyatu Simón Pedro ique tupujudya junaticuare. Junatitsutu Pedro nubinaticuare cani ducu. Tura batinucacuareadya sahuana tunara Jesús piruriqui achineque eiyaque. ⁷ Tumebaedyatu bacuare tunara Jesús iyuca dunuqui achineque. Tumeque eracatu tunara ecuita piruriqui achine tsehue ama jucuare. Peya queja amacatu piruri iya jadya ea jucuare. Emajuquetu tuhua ama jucuare. ⁸ Pedro tupuju junatihuaque nubinatihuaaju ique icuene junatihuaque tupuju nubicuare emajuque caniju ishachine ducu. Banaticuare tuque eje bucha juhuaque. Baatsu tuque ejenecuare yuneridya Jesús majutsu chacha junucahuaque. ⁹ Adebacuare ama jari tuque ecuana Yusuja quisarati: “Mesiastu majutsu chacha netitsuranucabuque” jadique. ¹⁰ Tume yatse cuinanatsu etareju dirunucacuare.

*María Magdalaju aniya queja Jesús cabamereticuareque
(Mr 16.9-11)*

¹¹ María Magdalaju aniyaquetu emaju caniju cuanucacuare yatse tuhuaque cuinanama jarijudya. Tuquetu neticuare cani tsecue peque, payaque. Paatsutu huipuchitanacuare cani ducu cuaji ishu. ¹² Tudy tujatu bacuare beta barepa juque Yusu tsahuaquique ecatsé. Ejutuqui pajada tsehue ecajututi tatse jucuare. Jesús emajuque jarahuaaju tatse juanicuare. Peadyatu anicuare Jesúsja iyuca juhua queja amaca. Peya bacue anicuare Jesúsja ehuaqui juhua queja amaca. ¹³ Tudyatu Yusu tsahuaqui ecatsé bacaduracuare:

—¿Eje bucha juatsumi paya, mama?

—Paya ique, Ique Cuatsashaquique emajuque tunara ejera cuana chirinahua baatsu. Ique baecua eju cuana taa tunara ecue iyatihua, —jadya tujatu ecatsé acuare.

¹⁴ Jadya juatsutu María cahuallaticuare. Tudy tujatu bacuare Jesús junetiyaju. Arepa petaya ama bucha tujatu cueyanecuare ama Jesús. ¹⁵ Turatu bacuare tumeque ecuita ehua cuanaque naruquique bucha jutidya. Tudyatu Jesúsra bacaduracuare:

—¿Eje bucha juatsumi paya, mama? ¿Ai tuquemi sareya? — jadyatu Jesúsra acuare.

—Ique Cuatsashaquique emajuque tuque sareya. Mira peya queja dujuhuaque juatsu, cuejacue ique eju mira iyatihuaque. Eratu emajuque caniju iyamerenucacara aya, —jadyatu Mariara acuare.

¹⁶ Tudyatu Jesúsra acuare:

—¡María!

Jadya bacatsu tujatu cueyanecuare tuque Jesúsque. Bajiyu tsuratsu tujatu acuare tuja yana eque, israelita cuanaja yana eque:

—¡Rabuni! —jadyatu Mariara acuare. (Rabuni tu “Ebahuityaquique” jadique.)

¹⁷ —Jipeume ique. Ecue Etata queja tsurama jari. Dirucue ecue eatsehuequi cuana queja, era mepehua cuana queja. Cuejadirucue ecana: “Jesús patu Etataque queja, tumbaedyá micuanaja Tata queja jadya tsuraya. Tsuraya patu tuja Yusu queja, tumbaedyá micuanaja Yusu queja”, —jadyatu Jesúsra cuejamerecuare María queja.

¹⁸ Tume ecuana María Magdalajura cuejaticuare. Ecuana queja jutitsu tura ecuana cuejaticuare:

—Eratu Ecuana Cuatsashaquique bahua. ¡Enetitsuranuca tuque!

Jadya ecuana aatsu tura ecuana cuejacuare tuque Jesúsra cuejamerehuaque.

Jesús tura mepehua cuana queja cabamereticuareque
(Mt 28.16-20; Mr 16.14-18; Lc 24.36-49)

¹⁹ Tumeque domicu huecacadya ecuana chineju casitaticuare ecuana Jesúsra mepehua cuanaque. Dutya etsecue cuanatu eteritilla jucuaré. Ecuana huaraji cuana tuque ecuana mubacuare. Arepa etsecue cuana eteri ama buchatu Jesús etsecue pacashama nubi jucuaré. Isaranaticuare tura ecuana:

—Banuchi. Are micuana bajida juya ama, —jadya tura ecuana anaticuare.

²⁰ Jadya aatsu tura ecuana bamerecuare tuja emetucu ecatse curusuju tatatanahuaque. Tumbaedyá tura ecuana bamerecuare tuja epere tsati tsehue esacuaque. Pureama ecuana jucuaré Jesús chacha banucaya tibu.

²¹ —Netsapeume inime. Pureama nejucue. Ique ecue Etatara riyaque yahua ju quisarati cueja ishucudishacuare. Jadidya micuana era dyadi cudishayadya jidaque quisarati cuejara, —jadya tura ecuana acuare.

²² Jadya yana au jadya aatsu tura ecuana jujacuare.

—Ecue Espíritu pajuna micuana queja. ²³ Ejeja ni micuana jucha cuana nercabaya, Yusratu apupashayadya. Ejeja ni micuana jucha cuana nercabaya ama, Yusura tunajatu apupashaya amadya, —jadya tura ecuana acuare.

Tomás Jesúsra cabamereti ishu acuareque

²⁴ Tomasjatu bama jari jucuare Jesús enetitsuranucaque. Tomástu Jesúsra mepehuaquedya jucuare. Jadya ama buchatu ecuana ecasitatiju tuhua ama jucuare, Jesúsra peya cuana cabamereti ishu ahuaaju. Tomasja peya ebacanitu jucuare “Pere Ecuinanaque”. ²⁵ Tuque tsurunucatsu, tuque ecuana cuejacuare:

—Bachine tuque ecuana Ecuana Cuatsashaquique. ¡Chachanuca tuque! —jadya tuque ecuana acuare.

—Ejeneya ama micuana era. Tuja emetucu tacua ecatseju tunara tatachineque cani baatsu, tuhua ecue emetucu sapara ishatsu, tumbaedyu tuja epere sacuatanachineju, tume camadya tuque chacha netitsuranucahuaque eejeneu, —jadya ecuana Tomásra acuare.

²⁶ Tudyu quimisacarucu huecaca juatsu ecuana casitatinucacuare yuhua cama. Tomástu ecuana tsehuedya jucuare. Dutya eteriqui cuana eteritilla jucuare. Jesússtu nubicuare etsecue pacashama. Netiticuare ecuana ducu. Isaracuare tura ecuana:

—Banuchi. Are micuana bajida juya ama, —jadya tura ecuana acuare.

²⁷ Tuequedya tujatu Tomás isaracuare:

—Tomás, jipenacue ique. Petacue ecue emetucu tacua ecatse. Ishanacue micue emetucu sapara tunara ique curusuju tatatsu caninechineju. Rirucue micue ebi. Ishacue micue emetucu tsati tsehue tura ecue epere sacuachineju, pana ejene micue ique chacha netitsuranucahuaque aishu. Yatananadya jutidya ama ique. “¡Eje bucha chacha netitsuranuca ni tu juma!”, jadya micue inime paju ama. Ejeneque mique tunara cuejahaque, —jadyatu Jesúsra acuare Tomás.

²⁸ —¡Miquemi Ique Cuatsashaquique! ¡Miquemi Yusu Neri! —jadyatu Tomásra acuare Jesús.

²⁹ —Tomás, mira ejenehua ique chachaque, ique cuita bahua tibu ademe. Peya cuanara ejenehua, ique ni riya piji buchique bamaque. Dyaque jida pureama tuna jubuque, —jadyatu Jesúsra acuare.

Eje bucha juatsu Juanra riyaque quirica hueneacuareque

³⁰ Riyaque yahuaaju jariratu Jesúsra jetiama ahua ai cuana ecuanaja yacuaju Yusuja casa bamere ishu. Jetiama tura ahua cuanaque tuque cuejaya ama riyaque quiricaju. ³¹ Eje uma cuana camadya rique huenehua. Riyaque quirica rique huenehua micuanaja Jesús Mesiasque ejene ishu, Yusuja Ebacuaqueque jadya. Huenehua rique era, micuana tu-
aqueja catyatitsu tuatsehue siri ani ishu.

21

Jesús pacarucu tura mepehua cuana queja cabamereticuareque

¹ Tume cuanaque jadya juu jadya juatsutu Jesús ecuana tura mepehua cuana queja cabamereticuare. Bei Tiberias jiruru ecuana jucuare. ² Pacarucu ecuana jucuare tuhua. Jadya ecuana jucuare: ique Juan, Simón Pedro, Tomás (Pere bacani jucuareque), Natanael (Caná Galilea yahua juque), ecue eatsehuequique, peya beta ecatse jadya.

³ —Ique jae derura cuaya, —jadya ecuana Simón Pedrora acuare.

—Ecuana dyadi ecuana cuayadya miatsehue, —jadya tuque ecuana acuare.

Anibutecuare ecuana cuabaju. Cuacuare ecuana jae derura. Tumeque meta ecuana acuare cuana ama cuita ni peadya jae. ⁴ Amena huecacayaju tibu pajatayajutu Jesús cabamereticuare bei jiruru. Ecuannaratu cueyanecuare ama tuque Jesúsque. ⁵ Tura ecuana quiquecuare:

—Tata ecana, ¿eje dyane micuana jae ahuaque?

—Aijama cuita. Ahua ama rique ecuana ni peadya buchique, —jadya tuque ecuana quemitsacuare.

⁶ —Nemarecue micuanaja jae deruquique cuaba jida eque amaca. Jadya ae tuque micuana jetiama jae eau, —jadya tura ecuana acuare.

Tura jadya cuejayaju ecuana tura cuejaya equedya jucuare. Jae deruquique tuque ecuana marecuare. Jadya ahuaaju, jae deruquique marahuejutu jae jetiama nubicuare. Repetaqui ama ecuana jae deruquique bacuare.

⁷ —¡Ecuana Cuatsashaquique tume! —jadyatu era Jesúsja dyaque iyuhedara Pedro acuare.

Jadya ayaju bacatsutu Pedro cajututicuare dyaque jutu ishucue. Cajututitsutu beiju pacacacuare Jesús queja masadama juti ishucue. ⁸ Japada cuita ama tuque ecuana mejiji bacuare, cien metro dyane camadya. Tume ecuana cuaba eque cajipeticuare, jae deruquique repeaje juyaque jae jetiama tsehue. ⁹ Jaratsuratsu tuque ecuana Jesús bacuare jae cuahuiani juyaju. Pan bacue tuja anicuaredya.

¹⁰ —Nebecue umae jae micuanara iyajacuita ahuaque, —jadya ecuana Jesúsra acuare.

—Tumidya tuque dujuya, —jadyatu jucuare Simón Pedro.

¹¹ Cuacuaretu cuabaju jae jiteque. Mejijiju tujatu repecuare jae deruquique equeque. Anicuaretu peadya ciento pishica tunca quimisha earacana jae. Arepa jae jetiama ama buchatu ederuquique chajatanacuare ama.

¹² —Nearaaranacue, —jadya ecuana Jesúsra acuare.

Chamacama tuque ecuana cueyanecuare tuque Jesúsque, Ecuana Cuatsashaquique. Jadya tibudyatu ni ejera buchique bacaduracuare ama tuque aique. ¹³ Tumetu Jesúsra queticuare jae etijaqui juque. Inaticuaretu pan. Tyabarecuare tura ecuana pan, jae jadya ecuana mihua ishu. ¹⁴ Tuequedya tura ecuana majutsu chacha netitsuranucatsu cabamereti quimisha ishu cabamereti ishu acuare ecuana tura mepehua cuanaque.

Jesús, Simón Pedro tsehue quisaraticuareque

¹⁵ Amena araara amena juatsutu Jesús, Simón Pedro tsehue quisaraticuare.

—Simón Jonásja ebacuaque, ¿ducuta mira iyuhueda baya, riyaque yahua juque iyuhueda baya bucha ama? —jadya tujatu acuare.

—Jejee, Ique Cuatsashaquique. Miratu adebaya era mique iyuhueda bayaque, —jadyatu Pedrora quemitsacuare.

—Bahuityacue ecue quisarati butseeju eaqueja catyatiya cuanaque. Uhuisha naruquira tuja uhuisha cuana naruya bucha, narue ecana acue, —jadyatu Jesúsra acuare Pedro.

¹⁶ Yudijidya bacaduranucatu Jesúsra acuare Pedro:

—Simón Jonásja ebacuaque, ¿ducuta mira iyuhueda baya?

—Jejee, Ique Cuatsashaquique. Miratu adebaya era mique iyuhueda bayaque.

—Bahuityacue ecue quisarati eaqueja catyatihua cuanaque. Uhuisha naruquira tuja uhuisha cuana naruya bucha, narue ecana acue, —jadya tujatu acuare.

¹⁷ Bacadura quimisha ishutu Jesúsra bacaduranucacuare:

—Simón, Jonásja ebacuaque, ¿iyuhuedadya mira baya? —jadya tujatu anucacuare.

(Bacadura quimisha ishutu Jesúsra bacaduracuare: “¿Iyuhueda mira baya?” jadya, “¿Ducuta mira iyuhueda baya?” jadya ama.)

Jadya bacadurayajutu Pedro peya inime jucuaque.

—Jejee, Ique Cuatsashaquique. Miratu dutya adebaya. Adebaya tuquemi mique era iyuhueda bayaque, —jadya tujatu acuare Jesús.

—A, jutaquiju bahuityacue ecue quisarati eaqueja catyatiya cuanaque. Uhuisha naruquira tuja uhuisha cuana naruya bucha, narue ecana acue. ¹⁸ Pusha amadya mique cuejaya, Simón. Mique ehue ebari jarijumi cuahuadya mique eju cuacara juyaju. Cajututitsumi cuahua mique eju cuacara juyaju camadya. Amena esiri juatsumi carirutibuque ebi ecatse, peya cuanaja mique risi ishu. Dujubuque tunara mique eju mique cuacarama juyaju, —jadyatu Jesúsra acuare Pedro.

¹⁹ Jadya quisarati tsehue ayaquetu Jesúsra Pedro acuare, Pedro eje bucha majue judadiyaque. Adebamerecuare tujatu Pedro aiju caadebameretiyaque tuque majuya eque Yusu eje bucha muitanae juyaque. Tuequedyatu Jesúsra Pedro anucacuare:

—Ecue inime eque jucue, Pedro.

²⁰ Ique Jesúsja iyuhueda jucuaqueque tatseja etibene queja neticuare. Idya jucuaque tuque inatama jariju chineju araarayaque Jesús peque araaracuareque. Idya tuque bacaduraqui jucuaqueque: “¿Airmi mique ujeu baqui cuana queja inamereya?” jadya. Etibene queja cabajiyuti juatsu Pedrora bacuare. ²¹ Ique baatsu tujatu bacaduracuare Jesús:

—Ique Cuatsashaquique, ¿eje buchari jubuque riyaque yatseja etibene queja netiyaque? —jadya tujatu acuare Jesús.

²² —Jidama inime baume tuque eje bucha judadiya tsehue. Era cuatsashaya eque juishuque camadya inime tupuqui acue. Tuque jidama inime ishuhue. Eratu ique junanucaya tupu chacha iyacara aatsu, eiyaudya. Tuja ishuhue jidama inime baume, —jadyatu Jesúsra acuare.

²³ Jadya tibudyatu Jesús queja catyatiya cuanaja ique majudadiya ama cuana bucha inime jucuaque. Jesúsratu Pedro cuejacuare ama ique majudadiyaque ama. Tuquetu jucuaque: “Eratu ique junanucaya tupu chacha iyacara aatsu, eiyaudya. Jidama inime baume tuque eje bucha judadiya tsehue”, jadya tujatu acuare.

Amena ishuhue quisarati

²⁴ Erari huenehua era cuitadya petahuaque, ecue ijaca tsehue bacahuaque jadya. Ique Jesúsra dyaque iyuhueda bacuaqueque. Dutya, ecuaña Jesús queja catyatiya cuanaque ecuaña bahue era huenehuaque yunerique. Era huenehua baedya tu dutya.

²⁵ Riyaque yahuaju jari tuputu Jesúsra jetiama ai cuana acuare. Dutya cuita ama rique cuejaya riyaque quiricaju. Era ni dutya huenehuena jucuaque Jesús jucuaque cuanaque, tura quisarati acuare cuanaque, dyaque jetiamari quirica ejuu. Aijamatu emajaca juquena jucuaque dutya quirica iya ishuhue.

Riya tupu camadya jari ri ehueque.

Juan

JESUSJA ECUADISHA CUANA EQUE YUSURA ACUAREQUE HECHOS

Riyaque quirica: ri Lucasra hueneacuareque. JIDAQUE QUISARATI LUCASRA HUENECUAREQUE huenequí jucuarera nucadyari hueneacuare. Hueneacuare rejari Jesús majutsu netitsuranucatsu jucuar cuanaque. Catibutiyaratu Lucasra hueneacuare Jesús Etataque queja tsuracuareque. Cuejacuare tujatu Jesús junanucabuqueque.

Jesusratu cuadishacuare tuja cuanaque, tunara cuitadya bacahuaque, bahuaque jadya cuejara cuaishu. Cuejamerecuare tujatu ecana tuja quisarati dutya ecuita riyaque yahuaju aniya cuanaque. Jerusalén equé tujatu ecana catibutishacuare israelita cuana equé, tuequedya peya queja israelita ama cuanaque.

Riyaque quiricaju ri tuna Jesúsra cuatsashaya equedya jucuaréque, dutya queja tuja quisarati cueja juyaque. Pedrora, peya cuanara jadyatu Jesúsja quisarati cuejacuare israelita cuana (capítulos 1-9). Pedrora, Pablora jadyara tatsejatu Jesúsja quisarati cuejacuare israelita ama cuanaque (capítulos 10-28).

Riyaque quiricajuri aniya Yusuja Espíritu riyaque yahuaju junacuareque. Tuque Jesús queja catyatihua cuana queja junahuaju tunajatu bajida tsehue ama Jesúsja quisarati cuejacuare. Acuare tuna Yusuja casa bamere ishu cuanaque jadya.

Tumebaedyari riyaque quiricaju aniya Jesús queja catyatimitse jucuar cuanaque tuna eje bucha anie jucuar cuanaque, tuna nrecada atacuare cuanaque jadya. Arepa canerecatiya ama bucha tuna canimehuallaticuare ama. Jesús queja nimee cuita camadya tuna jucuar. Jadya tuna baatsutu peya cuana tumebaedy tuaqueja catyaticuare.

Jesúsra Yusuja Espíritu cuadisha ana acuareque

¹ Era rique micue quirica cuadishaya, ecue eadebaque Teófilo. Riyaque ri beta ishuque quirica micue ishu cuadishayaque. Icueneque quiricaju mique cuejachine Jesús riyaque yahuaju jari tupu ai jucuaréque. Huenechine tuque era tuque ai jucuaréque, bahuityacuareque, tuque rehua mere catibuticuare equéque, ²⁻³ tuque barepaju tsurachineque huecaca equé tupu. Diruma jarira tujatu mepecuare peadya tunca beta earacana tuja quisarati cuejara cuadisha ishu. Curusujutu majucuar. Majutsutu

chacha nityatsuranucacuare. Nityatsuranucatsutu riyaque yahua juuneninucacuare jari pushi tunca huecaca tsuramaque jari. Tumeque pushi tunca huecaca juneniyaque jaritu eje uma cabamereti jucua tuja ecuadisha cuana queja. Jetiamadya tujatu ai acuare yuneridya tuque chachaque caadebamereti ishu. Eje uma cuejadya tujatu ecana ahua Yusura eje bucha narue dutya adadiyaque. Yusuja Espiritu eque tujatu ecana cuejahua eje bucha cuejae tuja quisarati aishuque.

⁴ Tuja ecuadisha cuana tsehue jarira tujatu ecana jadya acuare:

—Necuinanaume jari Jerusalén juque. Rehuadya neanicue jari Yusuja Espiritu micuana queja junaya tupu. Ecue Etataratu cuadishaya micuana queja tura cuadisha ana ahuaque. Icueneta cuejadya micuana ahua tumeque Espiritura micuana tsahuayaque. ⁵ Icuene tuna Juanra ena tsehue utsacuare inime cacuaretihua jadicue ejitaju juishu. Eje uma huecaca juatsu ama tuque micuanaja Yusura tuja Espiritu cuitadya cuadishaya micuana tuque mere ishu casa tyaishu, —jadyatu Jesúsra acuare tuja ecuadisha cuanaque.

Jesús barepaju tsuracuareque
(Mr 16.19-20; Lc 24.50-53)

⁶ Jesús tuja ecuadisha cuana tsehue ecasitati jucua. Casitatitsu tunajatu Jesús acuare:

—Ecuana Cuatsashaquique, ¿riyaque huecaca eque mi mira ecuana israelita cuana tyaya casa ecuana yahua canaruti ishu, romano cuanara ecuana enaruuju? —jadya tunajatu Jesús acuare.

⁷ Jesúsra tuna quemitsacuare:

—Ecue Etatara huecaca iyahuaque juetihuajutu tura adadiya tura eje bucha inime pirehua eque. Micuana bahue ishuque ama tu eje tupu, jadya ama juatsu ejeque huecaca jadya judadiyaque. Yusuja peadya camadyatu casa aniya tumeque bahue juishuque. ⁸ Yusuja Espiritu micuana queja junatsu, tura micuana tyanaya casa micuanaja ecue quisarati cueja ishu. Icuene cuita necuejacue ecue quisarati rehua Jerusalénju, tuequedya Judea epu cuanaju, Samariaju jadya. Dutya yahua epu cuana dyaque japada cuanaju ecue quisarati necuejaticue, —jadya tuna Jesúsra acuare.

⁹ Jadya Jesúsra cueja amena ahuaju tuna capetatinetibareyajutu Jesús huesatanatsu dirucua. Tsurayaquetu huani ducu aputacuare. Banuca ishu ama tuna bajacacuare. ¹⁰ Jesús tsurahuaque tunara ebarucue queja petanityabareyajutu beta Yusu tsahuayaquique ecatsé

cabamereticuare. Pajada tatsejatu una jucuare. Jesúsja ecuadisha cuana queja tatse junacuare.

¹¹ —Tata ecana Galileaju cuanaque, ¿ai tuque micuana ebarucue queja petanityabareya? Jesússtu diruhua micuana quejaque. Tuque micuana barepaju tsurayaju bahua bucha, jadya junanucaedyatu ejeque huecaca jubuque Yusu quejaque, —jadya tatsejatu ecana acuare.

Jesúsra mepecuare cuanaque casitaticuareque

¹² Tumetu Jesúsra mepecuare cuanaque Jerusalénju judirunucacuare, uhua cuemusu Olivo Acui Quini bacani juque butenucatsu. Tumeque uhua cuemusutu Jerusalén japadama jucuare, peadya kilómetro dyane. Eje japa amatu jucuare. Canajara huecacaju tunajatu cacuatsashati eque tume tupu eajeshataquetu jucuare. ¹³ Epu aridaju tuna judirucuare. Tuhua junatitsu tuna cuacuare tuna aninaticuare etareju. Tuna anidiruqui juyaju etareju tuna nubidirucuare. Tsuracuare tuna beta ishucue pisoju. Jucuare tuna: Pedro, Juan, Santiago, Andrés, Felipe, Tomás, Bartolomé, Mateo, peya Santiago, Simón, Judas jadya. Santiagotu Alfeoja ebacuaque jucuare. Simóntu jucuare Roma juque enaruquique bijidamaduraqui juyaque. Judastu Santiagoja ebacuaque jucuare, Jesús inamerequi jucuareque ama. ¹⁴ Casitacijacama tuna jucuare Yusu tsehue quisarati ishucue. Jesús tsehuequi cuanaque tuna tuhuadya jucuare. María, Jesúsja ecuaquetu tuhuadya jucuare. Peya epuna cuana tuhuadya jucuare. Tunadya tuna dutya casitati bahue junenicuare Yusu tsehue quisarati ishucue.

Jesús queja ecatyati cuanara Judas cuarequi Matías mepecuareque

¹⁵ Eje uma huecaca juatsu amatu Jesús queja ecatyati cuanaque ecasitati jucuare. Jetiama, peadya ciento beta tunca earacana tuna ecasitati jucuare. Pedrora tuna isarat-ibunecuare:

¹⁶ —Ecue eatsehuequi cuanaque, nebacacue ique. Béru eje uma maratu Davidra icueneta huene acuare Judas Iscariote judadiyaque. Yusuja Espirituratu huenemerecuare. Davidra Yusuja quisarati icueneta huene acuare bae cuitadyatu judadichine. Riyaque Judasradyatu Jesús inamerechine tuque ujeu baqui cuana queja. ¹⁷ Judastu ecuanaja ecare datse juchine. Ecuana tsehue mere jupee juishucue tucue patu emepe jucuare. ¹⁸ Jesús ujeu baqui cuana queja in-amereya tsuje tunajatu chipiru tyachine. Tuequedya tujatu ecana yudijidya tyanuca achine chipiru tura jidama tsehue inahuaque. Tumeque chipiru tsehue tunajatu uhua quemichine. Judastu tuta taca quiyeti juchine. Pacacatsu

tujatu pututachine edumijiti. Dutya tujatu esere cuana cuinanaterechine. Jadya majuetu juchine. ¹⁹ Jerusalénju aniya cuanaratu bacatsachine quisarati Judas juchineque. Bahue tuna judadichine tuque tuhua ami quijehuetitsu majuchineque. Jadya tibudya tunajatu tumeque yahua Acéldama jadya bacanishachine, “Quiyeti pujija chipiru tsehue equemique emajaca” jadique. ²⁰ Quirica Salmos bacaniju tu jadya ehue:

“Etaretu cashanatibuque.

Ni ejeratu isaanibuque ama”.

Tumebaedya tu ehue Salmosju:

“Peya tuque cuarequi paju”.

Jadyatu icueneta huenetanadya jucuare Yusuja quisarati.

²¹ “Aniyari rehua ecuana Ecuana Cuatsashaqui tsehue junenitibunecuaré patya eque junenicuaré cuanaque. ²² Junenicuaré tuna Jesús tsehue tuque Juanra utsacuaré patya equeque, tuque Etataque queja barepaju tsurachine tupu. Tunadya tuque ecuanaja peadya mepetaqui, ‘Jesús enetitsuranucaque’ quisarati cuejamere juishu, —jadya tuna Pedrora acuare:

²³ Dutya tupu tunajatu inime jucuare. Jadya tibu tunajatu beta mepecuaré. Peadyatu José Barsabás jucuare. (Peya tujatu ebacani jucuare Justo.) Peya tunajatu mepecuaré Matías. ²⁴⁻²⁵ Jadya juatsu tuna Yusu tsehue quisaraticuaré:

—Ecuana Cuatsashaquique, miratu adebaya peadya peadya eje buchique dutyaja inime tupu cuana. Bamerecue ecuana; ejeque riquemi ecatsé mepehua Judas cuarequi mique merequi juishuque. Judasrami amena merejacahua. Judiruhuatú eju tuque judiru ishujú, —jadya tunajatu acuare Yusu.

²⁶ Tunaja bahue tunajatu quemicuare dadoju ejeque ecatsé Yusura mepehua jadique bahue juishu. Jadya adebae tunajatu acuare Matías, Judas cuarequi emepeque. Tumeque huecaca equetu Matiasra Yusu merecuare peadya tunca peadya earacana Jesúsja ecuadisha cuana tsehue.

2

Yusuja Espíritu junacuareque

¹ Pentecostés chine juetihuajutu Jesús queja dutya ecatyati cuanaque ecasitati jucuare ecasitaticuaréju cama. Pentecostés chinetu jucuare israelita cuanara euhua cuanaque huesayaque chine. ² Muya jutidyatu Yusuja Espíritu tuna queja butecuare. Sicacada tunajatu barepa equeque buteyaju bacacuare, cuejipa casadaque tuuetibeya bucha. Dutya etareju cuanaratu bacacuare tumeque sicacadaque. ³ Tume tunajatu bacuare ai cuana

achaacha piji etiqui juju bucha. Etiqui buchiquetu tunaja iyuca cuana dyaque peadya peadyaju netibarecuare. ⁴Jadya junaetu Yusuja Espíritu jucuare tuna peadya peadya queja. Tuna queja butetsu tujatu ecana bape bape yana eque quisaratishacuare. Tunaja yana eque ama tuna quisaratitibunecuare, peya yahuaju cuanaja yana cuana eque.

⁵Tume patyatu jetiama israelita cuana jucuare Jerusalénju Yusu muijaca baecua jucuare cuanaque, Moisésja cacuat-sashati eque aniya cuanaque. Dutya yahua juque jujeri tuna juticuare. ⁶Eje bucha juyaque bacatsu tuna cuacuare Jesús queja ecatyati cuana queja. Tuhua junatitsu tunajatu Jesús queja nimee cuanaque quisaratibareyaju bacacuare. Bape bape yana eque tunajatu ecana quisaratiyaju bacacuare. Tuna quisarati cueja juyaju bacaqui cuanaja yana eque quisaratiyaju tunajatu bacacuare. Jadya bacatsu tuna eje buchadya jucara jucuare. ⁷Dyaque ejecutana tuna jucuare. Bape tunajatu bacacuare. Cacuejatibarecuare tuna tuna cama:

—¡Nebacacue! Dutya riya quisaratiya cuanaque taa rena Galileaju cuanaque. ⁸Jadya ama bucha taa rena Galileaju cuanaja yana eque ama quisaratiya, ecuanaja yana eque jutidya. ¿Eje buchique jatsu rique ecuana ecana ecuanaja yana eque quisaratiyaju bacaya ecuana nanada equedya quisaratihua eque? Ecuana taa ecuana eje uma peya yahua cuana juque. ⁹Umae ecuana Partia juque, peya cuana bacue Mediaju, Elamju cuanaque. Umae bacue ecuana Mesopotamiaju, Judeaju cuanaque. Umae ecuana Capadocia juque, Pontoju, Asiaju cuanaque jadya. ¹⁰Umae ecuana Frigiaju cuanaque, Panfiliaju, Egiptoju cuanaque jadya. Peya cuana bacue ecuana Africa juque, Libia yahua juque Cirene japadamaque. Umae bacue ecuana Romaju cuanaque. ¹¹Umae ecuana jechine Creta juque, Arabiaju cuanaque jadya. Umae ecuana Israel eque neri ejuracana cuanaque. Dutyaradya tuque ecuana Yusu Neri muiya israelita cuanara, israelita cuanara ama jadya. Dutyadya ecuana Moisésja cacuat-sashati eque aniya. Arepa ecuana umada peya yahua cuana juque ama bucha tuque ecuana ecana bacaya ecuanaja yana eque quisaratiyaju. Bacayadya ecuana ecana jida quisaratiyaju, —jadya tuna jubarecuare.

¹²Dutyara tunajatu bape bacuare eje bucha adebataqui ama jadya. Jadya tibudya tuna cabacaduratibarecuare:

—¿Eje buchique ri riya jadya juyaque? —jadya ecana jubarecuare.

¹³Umaera bacue ijaribacuare jutidya Jesús queja ecatyati cuanaque.

—Nijuqui tibu tuna jadya quisaratiniya, —jadyatu jucuare umaecuaana.

Pedroro ecuita cuana isaracuareque

¹⁴ Pedrotu netitsuracuare ecuita cuana isara ishü. Peadya tunca peadya earacana Jesúsja ecuadisha cuanaque tuna tumebaedyä tuhuadya jucuare. Etsuri jebuda tsehue tujatu isaratibunecuare israelita cuana, Jerusalénju aniya cuanaque tuhua jucuare cuanaque jadya:

—Tata ecana, nebacacue ique. Nebacacue jida era cuejayaque. ¹⁵ Nijuqui ama ecuana, micuanara inime tupuya bucha. Barepatya ama jari taa rique; las nueve pijidyä taa rique. Ecuana israelita cuanaja tuque ecuanaja uva nacaca sasadaque iji baecua apudajudyä cuita. Cuejaya micuana era, ecuana eje bucha juatsu jadya quisaratihuaque. ¹⁶ Riyaqueri jadya juya, Yusura icueneta cueja acuaqueque Joel tuja quisarati cuejaqui eque:

¹⁷ “Amena ishüque huecaca cuanaju tuque ecue Espiritu cuadishabuque yahuaju.

Israelita cuanaja ishü camadya ama, israelita ama cuanaja ishü tumebaedyä tuque cuadishabuque.

Micuana eque juracanaya cuanaratu ecue quisarati tsapebuque.

Ecuita cuanara, epuna cuanara jadyatu quisarati tsapebuque.

Tahuijutu ecue Espiritura bahue amerebuque quisarati yunerique ehue ebari cuana, tumebaedyä esiri cuanaque.

¹⁸ Tumeque huecaca cuanaju tuque ecue Espiritu cuadishabuque ique merequi cuana queja, ecuita cuana queja, tumebaedyä epuna cuana queja.

Tunaratu cuejabuque ecue quisarati, era ecana jadya quisaratishabuque tibu.

¹⁹ Barepaju tsehue tuna ecue dyaque casa aniyaque bamerebuque.

Tumebaedyä tuque ecue casa bamerebuque yahuaju cuana tsehue.

Amitu juribuque.

Etiquitu jujubuque.

Huani misidaquetu netitsurabuque.

²⁰ Ijetitu huecadama jubuque.

Baditu ami bucha pudee jubuque.

Jadyatu jubuque Ecuana Cuatsashaquique junanucama jariju, emiique, casadaque jadya cabameretima jariju.

²¹ Dutya tuaqueja catsahuamereti ishü tuque bacaqui cuanaquetu einajaca jubuque,”

jadyatu Yusura quisarati acuare tuja quisarati cuejaqui Joel eque.

²² Pedroratu tuhua jucuare cuanaque quisarati cuejanucacuare:

—Micuana Israel eque ejuracana cuanaque, nebacacue era cuejanucayaque. Cuejaya micuana Jesús Nazaret juque eje buchique. Tuque riyaque yahuaju jarira tujatu jetiama acuare ejeque ecuitaja ataqui que ama micuanaja yacuaju. Jetiama tujatu acuare micuanara bape bacuare cuanaque. Dutya riya cuanaquetu Yusura amerecuare tura tuque cuadishahuaque yunerinemere ishu. ²³ Jadya ama buchatu micuanaradya inamerehua. Micuanaratu ecuita jidama cuana queja curusuju tatamerehua tuque iye ishu. Dutya riya cuanaquetu jadya judadihua Yusura inime pirehua equedya. Tuquetu icuenetadya bahue juhua micuanara jadya adadiyaque. ²⁴ Jesús majuhuaaju emajuquetu Yusura chacha nityatsuranucahua. Emajuque tujatu nityatsuranucahua, Jesús emaju eje bucha jarasiritaquima tibu. ²⁵ Berutu ecuari Davidra huenecuare Jesús jadya ayaque:

“Ique bahue Ique Cuatsashaquique dutya huecaca eatsehueque.

Jacanime ama tuja ique.

Tuque eatsehue tibu, bajida ama juya.

²⁶ Jutaquijudya ique dyaque pureama juya.

Pureama tsehue tuque ajacaya ama quisarati Yusu jidaque.

Arepa ique majuya ama bucha, pana ejenedya tuque aya, dutya eje bucha judadiyaquetu ecue jida ishuque.

²⁷ Pana ejenedya tuque aya, Ique Cuatsashaquira ique emajusiri ama huanabuqueque.

Tuhuadya jutidya tura riri ishu huanasiribuque ama, ique tujaque, tuque merequique jadya juya tibu.

²⁸ Eratu Yusu aya:

‘Mira ique bahue amerehua maju baecua ani ishu.

Mira ique dyaque jida pureama amerehua, miatsehue ique anidirubuque tibu, Yusu’ ”,

jadyatu Davidra béru huenecuare.

²⁹ “Ecue ata cuana, pana cueja micuana aya Davidra huenecuareque. Tuta taca jadya catiyaque amatu jadya jucuare, ‘Huanasiribuque ama tura ique ecue ecuita riri ishu’ jadya huenetsu. Béru amena mara maratu ecuanaja ebaba David majucuareque. Majuhuajutu tuja ecuita ishatanacuare tumu caniju. Tuhuadya tujatu ecuita riricuare. Riya camatu narutanaya jaridya tuja uhuacuare tuque ishatanacuareque. ³⁰ Chacha aniya jari tuputu Yusuja quisarati cueja juhua. ‘Peadya mique eque ejuracanaquetu Mesías jubuque, Ecue Emepeque. Mira israelita

cuana naruya bucha, jadya naruedya tujatu ecue cuanaque abuque. Yuneridya mique jadya aya, era jadya adadiyaque' jadya patu Yusura acuare. ³¹ Jadya equetu David icueneta bahue jucuare Yusura Mesías cuadishadadiyaque. Tuquetu bahuedya jucuare Yusura Mesías emajuque nityatsuranucabuqueque. Jadya tibudyatu jucuare: 'Emajuque caniju eishaquetu jarasiribuque ama, ni tuja ecuita riribuque ama' jadya. ³² Yusuradyatu Jesús majuhuaque chacha nityatsuranucachine. Ecuannaratu bachine Jesús tuque netitsuranucahuaju. Iyacia micuana ecuanara yuneridya cuejaya tuque chachaque. ³³ Yusuratu barepaju dujunucahua tuja yacuaju. Iyacuatu tuque muita ishujú Etataqueja jida eque amaca. Yusu patu jucuare: 'Jesusratu ecue Espiritu cuadishaya tuaqueja catyatihua cuana queja' jadya. Riyaque Yusuja Espiritu equedya ecuanara iyacia quisaratiya. Micuanara petayaque, bacayaque jadyatu tura jadya amereyaque. ³⁴ Davidja ecuita barepaju tsurama jarijudya. Jadya ama buchatu Davidra quisarati anucacuare béru:

“Yusuratu Ique Cuatsashaquique jadya cuejacuare:

'Anibutecue ecue jida eque amaca muita ishú,

³⁵ era mique ujeu baqui cuanaque dutya ijahue atillaya tupu, Ique Cuatsashaquique' ”.

Jesús jadya ayaque tujatu jadya quisarati acuare.

³⁶ “Nebacacue jari ique, dutya micuana Israel eque ejuracana cuanara. Jesús, micuanara curusuju tatamerechinequetu Yusura Mesías amerecuare. Tumbaedyatu Ecuana Cuatsashaquique amerehua, —jadyatu Pedrora cuejacuare tuhua jucuare cuanaque.

³⁷ Jadya juya bacatsu tuna dyaque peya inime jucuare, jidama juhuaque caadibatitsu.

—Ecuannaja ata cuana, ¿eje bucha ecuanara jutaqui? —jadya tunajatu bacaduracuare Pedro, Jesúsja ecuadisha cuanaque peya cuana jadya.

³⁸ Tume tuna Pedrora quemitsacuare:

—Jesús queja catyatitsu necacuareticue inime, Yusuja biji eque ani ishú. Necutsamereticue Jesucristoja ebacaniju. Jadya nejudue Yusura micuanaja jucha cuana apupasha ishú. Turatu cuadishaya tuja Espiritu micuana tsehue anisiri ishú, micuana tsahua ishú. ³⁹ Yusuratu tuja Espiritu cuadisha ana ahua micuana queja, micuana eque ejuracana cuana queja, riyaque yahuaju dutya queja aniya cuana queja jadya. Jadya eque tujatu cuadishahua dutya tura tuaqueja ihuaraya cuannaja ishú, —jadya tuna Pedrora acuare.

⁴⁰ Nereda bucha cuejae tujatu ecana acuare yana muida tsehue:

—Dutya jujeri iyacua aniya cuanaque tuna jidamaque inime cadujutiya. Tuna tuna Yusu queja judirunime ama. Necacua reticue inime tuna nerecaturatadadiya bucha nerecaturatae ejudadiu tibu, —jadya tuna Pedrora acuare.

⁴¹ Pedrora cuejayaque bacatsu tuna jetiama inime cacua reticua re. Quimisha mil tuna inime cacua retitsu Jesús queja catyaticua re. Cutsamereticua re ecana Jesúsja cuanaque jadya cabamereti ishu. ⁴² Jesúsja ecuadisha cuanara bahuityayaque pana baca aatsu tunajatu ejenejacua re ama. Tunaja aniya cuanaque ecana dutya tupu catyatie jubarecua re. Casitatinicua re ecana Yusu tsehue quisarati ishu. Ecuana Cuatsashaquique adeba ishu araara ishu tuna yuhua cama casitati bahue jucua re.

Jesús queja ecatyati cuanaque eje bucha anie jucua reque

⁴³ Yusuja casa tsehuetu Jesúsja ecuadisha cuanara ejeque ecuitaja ataquique ama acuare. Jadya baatsutu Jesús queja catyatima cuanaque dyaque anajacatacua re. ⁴⁴ Jesús queja ecatyati cuanaque tuna yuhua cama nimee ecadutyati jucua re. Caradatijacama tuna junenicua re. Aiqui cuanaratu tyacua re tunaja ai aniyaque aima cuanaque. ⁴⁵ Catyati ecana caticua re tunaja aniya cuanaque. Tunaja ai cuana catyati aatsu tunajatu chipiru tsumecua re peya cuanara ai sareya cuanaque quemí ishu. ⁴⁶ Dutya huecaca ecana caradatinicua re Yusuja etareju. Tunaja etare cuanaju tuna caradatijacama junenicua re araara ishu, Jesús majuhuaque adeba ishu. Pureama epuri jadya tsehue tuna araaranicua re. Jida tuna cabatibarecua re peya cuana tsehue. ⁴⁷ Yusu tunajatu pureamaturajacua re ama. “Dyaque jida taa mique ecua na tsehue”, jadya tunajatu ajacua re ama. Dutya jujeri Jerusalénju cuanara tuna jida, iyuhueda jadya bacua re. Huecacaju huecacajutu Yusura peya cuana Jesús queja catyatishamereajecua re. Tume cuanaque Jesús queja catyati huaju tuna Yusura Ijahua quejaque inajacamerecua re. Jadya eque tuna Jesús queja nimeedya jutidya juajecua re. Tuque pureama aishu ecana casitatijacua re ama.

3

Ecuita yuequedya ruduruduque chacha jucua reque

¹ Pedro, Juan jadya tatse cuacua re Yusuja etareju las tres chinequeja, israelita cuana Yusu tsehue quisarati bahue uraju. ² Tuhuatu ecuita yuequedya rudurudu ecuinanaque juanicua re. Dutya huecaca tunajatu iyati bahue jucua re Yusuja etare tsecue. Tumeque etsecuetu “Etsecue Jida Pijique” bacani jucua re. Iya bahue tunajatu etsecuetsau junenicua re, chipiru cuana piji ecuita cuana etareju nubiya

cuanaque bacatsa bacatsa aishu. ³ Tumeque huecaca tujatu batsacuare Pedro, Juan jadya Yusuja etareju nubinatyaju. Batsatsu tujatu ecitse chipiru bacatsacuare. ⁴ Pedro, Juan ecatserratu petacuare.

—Petacue yatse, —jadyatu Pedrora acuare.

⁵ Rudurudura tatse petahuaquedy a peta acuare, tatsera chipiru tyaya bucha cabatitsu. ⁶ Pedroratu isaranucacuare:

—Aijama tuque ecue chipiru. Aijama tuque ecue oro ni plata. Jadya ama bucha mique tsahuaya. Jesucristo Nazaretjuja ebanijiu mique cuatsashaya: “Netitsuracue. Ajecue”, —jadya tujatu ruduruduque acuare.

⁷ Jadya aatsutu Pedrora emetucu jida eque amaca inaticuare nityatsura ishu. Muya jutidya tujatu cacasaticuare ehuchi, ehuchi tsuru ecitse jadya. ⁸ Tudyatu ecuita netitsurayaque putitanaquenacuare pureama tsehue. Amena ajetibunetsutu nubidirucuare Yusuja etareju Pedro, Juan ecitse tsehue. Tudyatu putitana putitana jadya junenicuare pureama juatsu.

—¡Dyaque casada, jida jadya taa mi eatsehue, Yusu! —jadyatu jucuar.

⁹ Dutya tuhua jucuar cuanaratu bacuar juneniyaju. Bacuar tunajatu Yusu pureama au juyaju. ¹⁰ Tuna camadya jutidya tuna quisaratibarecuare, bape baatsu.

—Adebaya tuque ecua tumeque rududuruque “Etsecue Jida Pijique” bacanijiu anibijida juchineque, cuetiy a cuanaque chipiru bacaqui juchineque. ¿Eje bucha ajee jatsutu ejuu? —jadya tuna jucuar.

Juneniya baatsu tunajatu eje bucha adebataqui ama bacuar.

Pedrora ecuita jetiama ecasitatuque isaracuareque

¹¹ Chacha juhuaratu jacacarama acuare Pedro, Juan jadya. Quimishadya tuna Yusuja etare ehueji quinida emaque jucuar, “Salomón Adebá Ishuque” bacanijiu. Pana anajacata ejuquetu dutya tuhua jucuar cuanaque tuna queja tsajaja jucuar. ¹² Tuna jadya umada cuita caradatiya baatsutu Pedro tuna tsehue quisaraticuare:

—Pana baca neacue, ecue ata cuana Israel eque ejuracana cuanaque. ¿Eje bucha juatsu jatsu micuana dyaque anajacataya riyaque baatsu? ¿Eje bucha juatsu jatsu micuana yatse petaya? ¿Tupuya tuque micuana inime yatsera yatseja casa tsehue cuana chachanehua bucha? A, aijama. Yatseja casa eque ama tuque yatse riyaque chachanehua. Tuquetu chachanetanahua, yatse jida juatsu ama. ¹³ Jesusja casa tshuetu chacha juhua. Ecuanaja Etata Yusratu Ebacuaque Jesusja casa tsehue chacha amerehua, Jesus emui

juishu. Riyaque Yusudya tu ecuanaja baba cuana Abraham, Isaac, Jacob ecanara muicuaque. Arepa Jesus Yusu Merequique juhua ama bucha tuque micuana huaraji cuana queja inamerechine, tuque iyemere ishu. Pilatoratu Jesus inamerejacacara achine. Jadya ama buchatu micuanara “Curusuju pamaju” jadya achine. ¹⁴ Jesússtu dyaque jidaque jucuare, cajuchatima nerique, tuyu nerique. Jadya ama bucha tuque micuana Pilato queja inajacamerecarama achine. Micuanaratu quiyeti puji inajacamerechine, Jesús einajacamereque. ¹⁵ Micuanaratu iyemerechine Ecuana Inajacamerequique. Jadya ama buchatu Yusura emajuque nityatsuranucachine. Ecuonaratu pana ejenedya aya Jesús chachaque, emajuque enetitsuraque, ecuanaradya bachine tibu. ¹⁶ Jesúsja casa tshuetu riyaque rudurudu juhuaque chachanetanahua. Bayadya tuque micuana jida juneniyaju. Micuanaratu adebayadya. Yatseratu pana ejenedya ahua tura echachaneuque. Micuanaja yatucajudyatu Jesusra pana chacha amerehua, yatsera tura eauque pana ejene aya baatsu.

¹⁷ “Ecue ata cuana, micuanara micuanaja huaraji cuana tsehue Jesús iyeya patya tuque micuana adebachine ama micuana eje bucha juyaque. Eratu adebayadya micuanara tuque Mesiasque adebayaque ama. ¹⁸ Icuene tuque equeque quisarati cueja puji cuana eque patu Yusura cuejacuare Mesías canerecatidadiyaque, majudadiyaque jadya. Achinedya tujatu tura amerecara ahua bae cuitadya, tura inime pirehua bae. ¹⁹ Iyacua necacuareticue micuanaja inime cuana. Necajuchatijacacue. Nejuetinucacue Yusu queja, tura micuanaja jucha cuana apupasha ishu. ²⁰ Micuana ni jadya juya, tume micuana Yusura inime tsapema amereya. Pureama tura micuana amereya, ijicaraque ena ijitsu ejuu bucha. Ejeque huecaca tujatu cuadishanucabuque Jesus riyaque yahuaju. Yuequedyadyatu tuque mepetanahua micuana inajacamere ishu. ²¹ Iyacuatu Jesus barepaju Etataque Yusuja yacuaju netiya. Berutu Yusu tuque equeque quisarati cuejaqui cuana eque jucuare: ‘Ejeque huecaca tuque dutya iyacuanebuque’. Tura jadya aishuque huecaca juetihuaaju tujatu Jesús cuadishanucabuque. ²² Moisésra quisarati acuare baetu judadibuque:

“Ecuana Cuatsashaquiquetu Yusura micuana queja cuadishabuque, micuanaja atadya.

Tura micuana Yusuja quisarati cuejadadibuque.

Ique tuja quisarati cueja ishu cuadishahua bucha, jadidya tujatu cuadishabuque tumeque.

Dutya tura cuatsashaya eque jajudadidya nejudue.

²³ Yusuratu bijidamadurabuque dutya tumera cuatsashaya
eque jucarama juya cuanaque.

Yusu jaque ama tuna judadibuque”,
jadyatu Moisés jucuare beru Jesús junama jariju.

²⁴ “Yusu equeque quisarati cuejaqui cuanaratu
cuejacuare Mesías junahuaju eje bucha judadibuqueque.
Jadyatu Samuel jucuare, tumbaedy dutya peya cuana.

²⁵ Micuana micuana tume Yusu equeque quisarati cuejaqui
cuanaque eque ejuracana cuanaque. Yusuratu quisarati
iyacuare ecuanaja baba cuana tsehue tura ecana jidaque
tyadadibuqueque. Tuna camadya ama tujatu ecana
jidaque tyaana acuire, ecuana tumbaedy. Neadebacue

Abraham béru tyatana ana atacuareque. ‘Peadya mique
eque juracanadadiya eque dyaque jida jubuque yahuaju
duty queja aniya cuana tsehue’ jadyatu Yusura Abraham
acuare béru. ²⁶ Jadya juatsutu Yusura tuja Ebacuaque Jesús
cuadishacuare ryaque yahuaju. Cuadishacuare tujatu
ecuana israelita cuana jida amere ishu. Cuadishacuare
tujatu ecuana inime cacuaresha ishu, ecuana jidamaque
amerejaca ishu, —jadyatu Pedrora tuhua jucuare cuanaque
acuare.

4

Pedro, Juan jadya huaraji cuana queja dujutanacuareque

¹ Pedro, Juan jadyara ecuita cuana isaraya jarijutu ju-
ticuare pae cuana. Tumbaedyatu juticuare Yusuja etare
naruqui cuanaja huaraji, tumbaedy saduceo cuana. ² Tuna
tuna dyaque ecahuaiti jucuare Pedro, Juan ecitse tsehue,
tatsera jadya quisarati ahua tibu: “Yuneridyatu Yusura
emaju cuanaque chacha nityatsuranucabuque, tura Jesús
emajuque chacha nityatsuranucachine tibu”. Jadya bacatsu
tuna dyaque cahuaicuare tatse tsehue. ³ Inameretsu tuna-
jatu ecitse risimerecuare. Risimeretsu tunajatu ishameretic-
uare etare apudaju peadya meta tupu, amena chinehua tibu.

⁴ Arepa Pedro, Juan ecitse etare apudaju eishatana ama
bucha, umada tatse quisaratiyaju bacaqui cuanaque tuna
Jesús queja catyaticuare. Pishica mil ecuita tuna tuaqueja
catyaticuare, epuna, ebacua jadya piyabamaque.

⁵ Huecacapetu huaraji cuana Jerusalénju cuanaque ca-
sitaticuare etare inime cuana bajeje ishuj. Casitaticuare
tuna israelita cuanaja huaraji cuana, emuiba cuanaque,
cacuatsashati bahuityaqui cuanaque jadya. ⁶ Anástu tuhua
jucuare. Tumequetu pae dyaque muidaque jucuare. Caifás,
Juan, Alejandro jadya tuna tuhua jucuare, tumbaedy pae
dyaque muidaja ata cuana. ⁷ Cuadishacuare tunajatu sudaru
cuana:

—Nequeticue Pedro, Juan ecatsé etare apuda juque.

Tunaja yacuaju nityatsu,

—¿Aira metse tyachine casa rudurudu juhuaque chachane ishú? ¿Aija casa tsehue tuque metse aya tume cuanaque? —jadya tunajatu ecatsé bacaduracuare.

⁸ Tumetu Pedro huaraji cuana tsehue quisaraticuare. Bajida tsehue ama tujatu ecana quemitsacuare, Yusuja Espiritura casa tyaya tibu:

—Isaraya micuana era, micuana epu juque huaraji cuana, tumbaedyá emuiba cuanaque. ⁹ Micuanara yatse bacaduraya eje bucha tsahuae yatsera yuequedyá rudurudu cuinanahuaque achineque. Eje bucha chachanee yatsera achineque micuanara yatse bacaduraya. ¹⁰ Yuneridya ni micuana bahue jucara juya, era micuana cuejaya, dutya israelita cuana bahue ishú. Rियाque ecuita iyacua cuita micuanaja yacua juqueri Jesúsja casa tsehue chacha juchine, Nazaretju anicuareja casa eque. Tumeque Jesúsdyá tuque micuana curusuju tatameretsu iyechine. Jadya ama buchatu Yusura emajuque chacha nityatsuranucachine.

¹¹ Micuanaratu bijidamadurachine. Etare puji cuanaja tumu eijehueque, dyaque saretanayaque judadihua bucha, jadidyatu micuanara bijidamadurahuaque dyaque inime metseque judadihua. ¹² Jesús peadya tu Einajacamerequique. Aijamatu peya jucha cuana tillaquique. Yusratu iyahua tuque peadya camadya ecuana Ijahua quejaque inajacamere ishú. Eje bucha inajacameree ni ecuana peyara ama, —jadya tuna Pedrora acuare.

¹³ Bajida tsehue amatu Pedro, Juan ecatsé israelita cuanaja huaraji cuana jadya isaracuare. Tatsé cuejayaju tuna anajacatacuare.

—¿Eje bucha juatsu tatsé ecuana bajida tsehue ama isaraya? Tatse taa tatsé dyaque jida ebahuityaque ama. Inime metseque ama taa tatsé. Jadya ama bucha ecatsé dyaque iyuca jararadaque equisaratiu bucha quisaratie juya. ¿Jadidyá tatsé ejuu, Jesús tsehue tsunuda junenihua tibu? —jadya tuna tuna cama jucuaré.

¹⁴ Ecuita chachanetanahuaquetu tuhuadya juneticuare. Eje bucha, “Tumeque ecuita tu chacha ama”, jadya ataqui ama tuna jucuaré, tuque Pedro, Juan ecatsé tsehuedya neticuare tibu. ¹⁵ Tume tunajatu cuinanashacuare tunaja yacua juque Pedro, Juan, echachaneque jadya. Tuna cuinanahuaaju tuna cacuejaticuare:

¹⁶ —¿Eje bucha ríque ecuana riyaque ecuita ecatsé eau? “Tumeque ecuitatu chacha ama” jadya ni ecuana ejuu, ecuita

cuanatu etsau ecuana tsehue. Dutya jujeri Jerusalénju cuanaque tuna bahue tatsera ejeque ecuitaja ataquique ama achineque, yuneridya tumeque ecuita chacha juchineque. Tehuataqui ama tuque ecuanaja. ¹⁷ Dyaquedya jutidya tatsesjatu Jesusja casa cuejaajeya. ¿Eje bucha cuejamerejae jatsu tuque ecuana ecatsé eau? Neihuamerenucara ecatsé; rehua ecatsé pajenuca. Jidama aana ecatsé neara. “Necuejajacacue Jesusja quisarati. Ecuana metse dyaque nerecatu-
raya, metsera Jesusja quisarati cuejajacayaque ama juatsu”, jadya ecatsé neara, —jadya tuna cacuejaticuare.

¹⁸ Tume tunajatu ihuaratsu ecatsé jadya acuare:

—Necuejanucaume ni ejeque buchique Jesusja quisarati. Nebahuityanucaume ni ejeque buchique, —jadya tunajatu acuare Pedro, Juan jadya.

¹⁹ Tatsera tuna acuare:

—Yusura cuitadya yatse cuadishahua Jesusja quisarati cueja ishu. Icuenetu Yusura cuatsashaya eque jutaqui, micuanara cuatsashaya eque ama. ²⁰ Yatsera cuitadyatu bahua tuque eje bucha juyaque. Yatsera cuitadyatu yatseja ijaca tsehue bacahua tura bahuityayaque. Jadya tibu tuque yatse cuejajacanime ama tuja quisarati, —jadya tuna Pedrora acuare.

²¹ Tume tatsé huaraji cuanara jidama aana acuare. Nereda tunajatu ecatsé acuare. Jadya aana aatsu tunajatu ecatsé inajacamerecuare. Ecuita cuanatu jucuaré:

—¡Dyaque jida, casada jadya taa Yusu, ruduruduque chachanehua tibu!

Tumetu huaraji cuanara nerecaturacuare ama Pedro, Juan jadya. “Ecuana ni ecatsé enerecaturau, ecuita cuanatu dyaque ecahuitiu ecuana tsehue”, jadya tunajatu inime jucuaré.

²² Ecuita Yusuja casa tsehue chachanetanahuajatu anicuare pushi tunca mara bare.

“Casaturacue ecuana mique mere ishu”, jadya Jesús queja ecatyati cuanara Yusu bacacuareque

²³ Tunara inajacahuajutu Pedro, Juan jadya cuacuare Jesús queja ecatyati cuana queja. Tuhua junatitsu tatsesjatu eana cuejanaticuare dutya tatsé eje bucha atanachineque. Cacuejaticuare ecatsé pae cuanaja huaraji cuanara, emuiba cuanara jadya ahuaque. ²⁴ Jadya bacatsu tuna dutya quisaraticuare Yusu tsehue:

—Ecuana Cuatsashaquique, miquemi Yusu. Miquemi Dutya Iyaquique. Miratu iyacuare barepa, yahua, cueri cuana jadya. Dutya aniyaque tu mira iyahuaque. ²⁵ Micue Espiritu eque tuquemi micue mere puji David queja huene-
mèrecuaré:

“¿Eje bucha juatsutu israelita ama cuanaque dyaque ec-
ahuaiti?

¿Eje bucha juatsutu ecuita cuanara inime tupuqui aya aishu
jidaque ama?

²⁶ Ecuari cuana tuna casitatiya epu juque huaraji cuana
tsehue.

Dutyara tupu inime tuputsu Ecuana Cuatsashaquique jidama
aishu.

Bajejeya tuna inime Mesías Yusuja Emepeque ijahue ijahue
aishu”,

jadyatu Davidra huenecuare beru.

²⁷ “Tumebae cuitadyatu judadichine, Tata. Huaraji cua-
natu casitatichine riyaque epu ebari juque. Herodes, Poncio
Pilato jadya tatse israelita cuana tsehue, israelita ama cuana
tsehue jadya casitatichine, micue Bacua Jesús jidama ijahue
ijahue aishu. Arepa tuque juchama neri juhua ama bucha,
arepa tuque mique merequi juhua ama bucha, taa ecana
casitatichine micue Emepeque Mesías ujeu baatsu. ²⁸ Dutya
tuna eje bucha juchinequetu mira icueneta iya inime achine
equedya judadichine. ²⁹ Tata, miquemi bahuedya huaraji
cuana ecuana tsehue dyaque cahuaityaque. Nerecaturacara
tunara ecuana aya. Ecuana ecuana mique merequi cua-
naque. Tsahuacue ecuana micue quisarati bajida tsehue ama
cuejajaca ishuhua. ³⁰ Casaturacue ecuana micue casa tsehue
ujejeda cuanaque chachane ishuhua. Tyacue ecuana micue casa
ejeque ecuitaja ataquimaque aishu, ecuita cuanaja mique
ecuana tsehueque adeba ishuhua. Amerecue ecuana Mique
Merequi juchama nerija casa eque, —jadya tunajatu Yusu
acuare.

³¹ Tuna Yusu tsehue quisaratijacahuaju tuna ecaradati jar-
ijutu Yusuja casara etare bucucushacuare, Yusuja Espíritu
tuna queja buteyaju. Tuna peadya peadya quejatu ju-
nacua. Tura tuna casaturacuare Jesusja quisarati bajida
tsehue ama cuejajaca ishuhua.

*Jesús queja ecatyati cuanaque peya cuana tsehue jida yu-
rameta cabati, catsahuati jadya jucuaque*

³² Jesús queja ecatyati cuanaque tuna dutya jida dutya
tupu cabatie jucuaque. Arepa jetima jucuaque ama bucha
peadya camadya inime tupu bucha ai acaraque jadya
tuna jucuaque. Inijeda ama tuna jucuaque. Yurameta
catyatie tuna jucuaque tunaja ai aniyaque peya cuana tse-
hue. ³³ “Ecuana Cuatsashaquiquetu chacha netitsuranu-
cachine. Ecuana radyatu bachine Jesús emajuque chacha
enetitsuranuacuaque”. Riyaque quisaratitu Jesúsja ecuadisha
cuanara cuejajacacuare ama. Yusura tuna dyaque casa ty-
acuare tuque mere ishuhua. Tuquetu dyaque jida jucuaque

ama Jesús queja dutya ecatyati cuana tsehue. ³⁴ Ni ejejada yutidya tunajatu ai aijama jucuare ama. Yahua, jadya ama juatsu etare tuna catyati caticuare. Tume cuanaque catyati aatsu chipiru inatsu tunajatu Jesusja ecuadisha cuana queja duju bahue jucuare. ³⁵ Jesusja ecuadisha cuana-jatu tumeque chipiru nrecada cuanaque tyabahue jucuare. Tunara sareya tupu tunajatu jaquetsu tyabahue jucuare. ³⁶ José bacani ecuitatu nrecada cuanaque tsahuaquique jucuare. Chipreju ecuinanaquetu jucuare. Leví eque ejuracanaquetu jucuare. Jesúsja ecuadisha cuanaratu bape bacani edya acuare “Bernabé” bacani, “Ecasaturaquique” jadique. ³⁷ Tujatu anicuare yahua. Catyati tujatu acuare. Catyati aatsu tujatu dujucuare chipiru, ecuadisha cuanaja peya cuana tyabare ishu.

5

Ananías, Safira jadyara Yusu ijahue acara datse acuareque

¹ Anicuaretu Jesús queja ecatyatique, Ananías bacani. Yusu tujatu ijahue acara datse acuare. Tuja ehuanquetu Safira bacani jucuare. Uhua tatse catyati caticuare. ² Chipiru inatsu tujatu ehuanque acuare:

—Uhua catyati aatsu chipiru inahuaque umae yatseja ishu nejaque. Ecuadisha cuanaque chipiru tyatiyaque, “Dutya etsujequi inachineque rique beya” jadya paati, —jadyapa tujatu ehuanque acuare.

Safiratu en cuita jucuare.

Tume tujatu chipiru tyatiyaque acuare Pedro:

—Dutya etsujequi inachineque rique beya, —jadya tujatu acuare pusha pusha.

³ Tumetu Pedrora yana casada tsehue atsacuare:

—¿Eje bucha juatsumi Satanásja biji eque juya, Ananías? ¿Eje bucha juatsu tuquemi Yusuja Espíritu ijahue acara aya? “Dutya etsujequi inachineque rique beya”, jadyami junaya, arepa metseja ishu ejaque iyasicuahua ama bucha. ⁴ Ni aira buchiquemi casada tsehue micue chipiru bemereya ama. Icuenetu micuquedya juhua yahua mira eje bucha amerecara aya eque aishu. Tuequedya etsujequi micuquedya juhua. Mique pusha pusha juhuaque tu amena jidama. ¿Eje bucha juatsu mira ecuana ijahue acara aya? Ecuana camadya ama mira ecuana pusha pusha aya, Yusu tumebaedya, —jadyatu Pedrora acuare.

⁵ Jadya yana ayaju bacatsutu Ananías rihuicare. Rihuitsutu majucuare. Dutya tuna Ananías eje bucha majue juhuaque bahue juatsu dyaque bajida jucuare.

⁶ Masadamatu juticuare umae ehue ebari cuana. Junatitsu

tunajatu pirurinaticuare emajuque. Piruri amena jadya aatsu tunajatu dujucuare caniju ishati ishu.

⁷ Quimisha ura juatsutu juticuare emajuja ehuanegue juhuaque. Tuquetu baecua jari jucuare yahuique majuhuaque. ⁸ Pedroratu bacaduratsacuare:

—Beru beru pijitu Ananías junahua metse uhua catyati catitsu chipiru inachineque tyara. ¿Tura chipiru behuaquetu dutya metsera inachinequedya?

—Jejee. Tura mique tyanahuaquetu dutya yatsera chipiru inachinequedya juhua, —jadya tujatu pusha pusha quemitsacuare.

⁹ —¿Eje bucha juatsu tuque metseja jadya inime juchine? ¿Eje bucha juatsu tuque metse Yusuja Espíritu ijahue acara aya? Petacue, micue ahue majuhuaque papara cuahua cuanaque juetibareyaju. Mique tunarami papatinucayadya, —jadya tujatu acuare.

¹⁰ Muya jutidyatu rihuicuare epuna majunuca ishu Pedroja yacuaju. Tudyatu nubidiruare ehue ebari cuana. Nubidirutsu tuna badirucuare epuna emajuque. Tume tunajatu epuna emajuque dujunucacuare caniju ishati ishu, yahuique eisha jiruru cuita nucadya. ¹¹ Jesús queja dutya ecatyati cuanaque, tumbaedya peya cuana peya queja epu ebariju cuanaque jadya tuna bahue jucuare Ananías, Safira eje bucha juhuaque. Bahue juatsu tuna dyaque bajida jucuare, tuna dyadi Yusura tumbaedya eauju.

Jesúsja ecuadisha cuanara Yusuja casa bamerecuareque

¹² Ecuadisha cuanaratu Yusuja casa tsehue Jerusalénju acuare jetiama ni ejeque ecuitaja ataquique ama. Inime tillaqui tunajatu acuare tunara tunaja yacuaju ayaque baatsu. Dutya tuna Jesús queja ecatyati cuanaque casitati bahue jucuare Yusuja etare ehueji quinida emaque “Salomón Adeba Ishuque” bacaniju. ¹³⁻¹⁴ Umanaajecuaredya jutidyatu Jesús queja ecatyati cuanaque. Ecuita, epuna jadya tuna tuaqueja catyaticuare. Jadya juyaque tuna peya cuana tsehue casitatinicuare. Dutya jujeri Jerusalénju cuanaratu jida quisarati acuare Jesús queja ecatyati cuanaja ishu, arepa tuna tuaqueja nimee ama cuana tsehue casitati ishu bajida jucuare ama bucha. ¹⁵ Jesúsja ecuadisha cuanaratu chachaneuare ujejeda cuanaque Yusuja casa tsehue. Pedro cuetiyaque bahue juatsutu ecuita cuanara tunaja ata ujejeda cuanaque epu patya ediji cuanaju cuinanshabarecuare. Tuhua tuna ujejeda cuanaque huesa ishu cuanaju jarabarecuare. Tuque cuetiyaju tuja aputa tuna dyaque equa cuetitsutu ujejeda cuanaque chacha jubarecuare. ¹⁶ Jerusalenjutu ecuita cuana

juna bahue jucuaire japadama epu cuana juque. Bebarecuare tuna ujejeda cuanaque Pedro queja. Tumbaedy a tuna becuare ijahua cuanara quijahuatishaya cuanaque. Dutya tujatu ecana chacha amerecuare Yusuja casa tsehue.

Jesúsja ecuadisha cuanaque jidama ujeda ujeda atacuareque

¹⁷Pae dyaque muidaque, saduceo cuana jadya tuna dyaque cahuaicuaire, ecuita cuanara tunara cuejayaque ebacauque, Ecuadisha cuanaque jutidya tunara ijacabacaya baatsu.

¹⁸Jesúsja ecuadisha cuanaque tuna inamerecuare. Etare apudaju tuna ishamerecuare, yuneri jidama ecajuchati cuana tsehue.

¹⁹Metatu junacuare Yusu tsahuaquique barepa juque etare apudaju. Junatsu tujatu pacashacuare etsecue ebari. Etare apudaju etsecue pacashatsu tujatu ecana cuinanashacuare.

²⁰—Nedirucue. Apudajudya necuacue Yusuja etareju. Tuhua necuejacue quisarati ecuita cuana Yusu queja eje bucha judirue juishuque, —jadya tujatu Pedro ecana acuare.

²¹Jadya bacatsu, peya huecaca apudajudya cuita tuna cuacuare Yusuja etareju. Junatitsu tuna nubicuare. Nubitsu tuna catibuticuare Yusu queja judiru ishique quisarati cueja. Pae dyaque muidara, tuatsehue cuanara jadya tunajatu dutya israelita emuiba cuanaque ihuaramerecuare. Dutya inime bajejequi cuanaque tunajatu ihuaramerecuare. Tume cuanaratu acuare sudaru cuana:

—Nequeticue ecana. Paje ecuanaja yacuaju Jesúsja quisarati cuejaqui cuanaque etare apudaju eisha cuanaque.

²²Jadya ahuajutu sudaru cuana etare apudaju cuacuare. Tuhua junatitsu tunajatu ecana banaticuare ama. Datse batitsu tuna pae dyaque muida queja dirunucacuare.

²³—Jesúsja quisarati cuejaqui cuanaquetu aijama etare apudaju. Junatitsu tuque ecuana eteriqui eyahue banatihua. Sudaru cuana tumidya eteriqui peque netiya narunaruya cuanaque. Pacashatsu ecuana nubihua. Datse ecuana ecana pana sare ahua. Dadihua ama ecuana ecana ni ejudya jutidya, —jadya tunajatu huaraji cuana cuejadirucuaire.

²⁴Jadya bacatsutu dutya huaraji cuanara dyaque cuita inime tsapecuare. Pae dyaque muidaque, Yusuja etare naruqui cuanaja huaraji, pae cuanaja huaraji cuana dutya tuna eje bucha jutaqui ama cabaticuare. Cabacaduratibarecuare tuna:

—¿Eje buchatu Jesúsja quisarati cuejaqui cuanaque juhua? ¿Eju tuna? —jadya tuna jubarecuare.

²⁵Tuna jadya juyaju cuitatu peadya ecuita junaticuare.

—Nebacacue. Ecuita cuana micuanara etare apudaju riabarepa ishamerechine cuanaque tuna Yusuja etareju.

Jesúsja quisarati bahuitya tuna juya, —jadya tujatu huaraji cuana acuare.

²⁶ Jadya bacatsutu Yusuja etare naruqui cuanaja huaraji cuacuare enaruqui cuana tsehue Jesúsja ecuadisha cuanaque jiteque. Inamerenucacuaretu ecana. Jadya ama bucha tunajatu ecana ujeda acuare ama, ecuita cuanara tumu tsehue eiyeuque bajida juatsu. Tume tunajatu eje bucha tsehue ama dujucuaré huaraji cuana ecasitatiju. ²⁷ Jesúsja ecuadisha cuanaque tunaja yacuaaju junatihuaaju tuna pae dyaque muidara isaracuare:

²⁸ —Ecuana micuana “Nebahuityajacacue ecana Jesúsja quisarati” jadya achine. Jadya ama bucha micuanara ecuana bacaya ama. Ecuejajacauque, micuana cuejaajeyadya jutidya. Dutya jujeri Jerusalénju cuanara amena bacachine riyaque quisarati. Ecuana rapa Jesús iyemerechine jadya aatsu micuanara ecuana jucha metse amerecara aya, —jadya tuna pae dyaque muidara acuare.

²⁹ Tumetu Pedrora, peya cuana Jesúsja ecuadisha cuanara jadya acuare:

—Ecuita cuanara cuatsashayaque, Yusura cuatsashayaque bucha ama tibu, jutaquiju ecuana Yusura cuatsashaya eque jutaqui, ecuita cuanara cuatsashaya eque ama. ³⁰ Micuanaratu Jesús curusuju tatamerechine. Jadya iyemeree tuque micuana amerechine. Yusura bacue nityatsuranucachine emajuque. Ecuana baba cuanara muicuareque Yusratu chacha nityatsuranucachine. ³¹ Tumequetu Yusura iyacua iyahua huaraji dyaque inime metseque. Iyacua tu tuque emuitaju Yusuja jida eque amaca. Jesús tu Ecuana Cuatsashaquique. Tuque tu Ecuana Inajacamerequique. Jadyatu Yusura ahua, tura Israel eque ejuracana cuanaque inime cacuareshacara aya tibu. Turatu israelita cuana Jesús queja catyatishamerecara aya, tunaja jucha cuana apupasha ishu. ³² Ecuana radyatu dutya riyá cuanaque pana adeba aya. Jadya tibudya micuana ecuanara jadya cuejaya. Yusradyatu tuja Espíritu cuita tura cuatsashaya eque juya cuana queja amereya. Tumeque Espirituradya ecuana dutya riyá ai cuana cuejamereya, —jadya tuna Pedrora acuare.

³³ Huaraji cuanatu jadya bacatsu cahuaiticuare dyaque. Ecuadisha cuanaque tuna eje buchadya iyecara acuare.

³⁴ Tumetu peadya tuna ducuque netitsuracuare. Tuquetu Gamaliel bacani jucuaré; inime cuana bajejequique tu jucuaré. Tumequetu fariseo jucuaré, israelita cuanaja cacuat-sashati bahuityaquique. Dutyaja emuitu jucuaré. Tuquetu tuatsehue huaraji cuana tsehue quisaraticuaré:

—Ecue ata cuana, pacuinana yaratupu ecuanaja yacua juque riya Jesúsja quisarati cuejaqui cuanaque. Ecuana cama nequisaratira jari, —jadya tujatu ecana acuare.

Tume tunajatu quisarati cuejaqui cuanaque tuhuaque cuinanashacuare. ³⁵ Tuna cuinanahuajutu Gamaliel quisaratinucacuare:

—Israel juque huaraji cuana, nebacacue ique. Pana tupu inime neara inime tsapema riyaque ecuita cuana ecuanara eje bucha acara ayaque. ³⁶ Neadebara ecuita Teudas bacani eje bucha jucuaque. Quisaraticuaretu “Ique dyaque inime metseque. Nebacacue era cuejayaque camadya”. Jetiama tuna tuatsehue junenicuare, tura quisarati cuana ayaque baca juyaque. Pushi ciento tuna tuatsehue casitaticuare. Jadya ama buchatu masadama iyetacuare. Tuque majuhujutu dutya tuatsehue junenihua cuanaque tsapetanateracuare. Judiruterecuare ecana tunaja etare cuanaju. Tura dutya acara ayaque aputaterecuare. ³⁷ Tuequedya peya aninucacuare Judas bacani. Tuquetu Galilea juque jucuaque. Roma juque enaruqira ecuita cuana piyebamereyaju turatu jetiama ecuita cuana tuatsehue junenishacuare tuja quisarati bacamereyaque. Tuequedya tumeque tumbaedy a iyetananucacuare. Tuque majuhujutu dutya tuatsehue juneniya cuanaque tsapetanateracuare. ³⁸ Jutaquijudya micuana jadya aya. Eje bucha neara ama tume cuanaque Jesúsja quisarati cuejaqui cuanaque. Neinajacaradya ecana. Nenerecaturara ama ecana. Tunara eje bucha ayaque ni tunaja casa tsehuequedya jutidya, tumetu dutya tunara acara ayaque teredadiya. ³⁹ Yusuja casa tsehue ni tuna aya, eje bucha aputashae ni tuque ecuanama. Yusu tsehue cuita di taa ecuanama ecatiu ecuanara yuamaturacara ayaque juatsu. Muda tu Yusu tsehue catuputi ishu, —jadya tuna Gamalielra cuejacuare.

Dutyaja tupu tunajatu inime jucuaque Gamalielra quisarati ahua eque. ⁴⁰ Ihuaramerenucacuare tunajatu ecuadisha cuanaque. Eiyemereuque, tunajatu ecana catsamerecuare jutidya. Catsacatsa amena aatsu tunajatu ecana acuare:

—Necuejanucaume ni ejeque buchique Jesúsja quisarati.

Jadya aatsu tunajatu ecana inajacamerecuare. ⁴¹ Cuinanatsu tuna dyaque pureama jucuaque.

—Yusutu ecuanama tsehue dyaque jida juhua. Canerecaticuare ecuanama, ecuanama Jesús queja nimee juya tibu. Turatu adebahuadya ecuanama canimehuallati nimeque ama, arepa ecuanama canerecaticuare ama bucha, —jadya tuna jucuaque.

⁴² Ecuadisha cuanaratu Jesúsja quisarati cuejajacacuare ama. Bahuitya bahuityanicuare ecana Yusuja etareju, etare cuanaju jadya. Cuejajacacuare ama tuna Jesús Mesiasque.

6

Jesús queja ecatyati cuanaque tsahua ishu mepetanacuareque

¹ Tume patya tuna Jesús queja umada catyatiajecuaredya jutidya. Griego eque quisaratiya cuanaquetu hebreo eque quisaratiya cuanaja ishu quisaratitibunecuare ai tyatayaju:

—Eahuemaju cuanaque dutya huecaca earaqui tyatanaya-jutu hebrea cuana dyaque umada tyatanaya, griega cuana bucha ama, —jadyatu griego eque quisaratiya cuanaque jucuare.

² Tumetu peadya tunca beta earacana Jesúsja ecuadisha cuanara ihuaracuare Jesús queja dutya ecatyati cuanaque. Tuna caradatihuaju tuna quisaraticuare:

—Ecuanaja mere tu Yusuja quisarati cueja. Tuyu ama tu ecuanaja riyaque mere ajaca ishu, earaqui ecuanaja cuita eahuemaju cuanaque jaquetsu tyabare ishu. ³ Jutaquiju micuana ducuque pacarucu ecuita nemepecue earaqui jaquebare ishu. Nemepecue micuanara ejeque ijahue cati baecua baya cuanaque. Nemepecue Yusuja Espiritura cuatsashaya eque juya cuanaque, dyaque bahue cuanaque. Jadya cuanaque nemepecue. Tumeque ecuita cuana netyara mere eahuemaju nrecada cuanaque earaqui tyabare ishu. ⁴ Ecuana tumeque mere eauque, Yusu tsehue nequisaratijacara ama, tuja quisarati necuejajacara ama. Riyaque mere camadya ecuanara neara, —jadya tuna acuare peadya tunca beta earacana ecuadisha cuanara.

⁵ Dutyaja tupudya tunajatu jadya inime jucuaré. Icuene cuita tunajatu mepecuare Esteban. Tuquetu dyaque Jesús queja nimeeque jucuaré. Yusuja Espirituja inime equetu ancuaré. Tuequedya tuna mepecuare Felipe, Prócoro, Nicanor, Timón, Parmenas, Nicolás jadya. Nicolástu Antioquía juque jucuaré. Israelita amatu jucuaré. Jadya ama bucha tujatu Jesús queja catyatima jarira ejenecuare israelita cuanara ejeneya bucha. ⁶ Riya cuanaque pacarucu mepetsu tunajatu dujucuaré Jesúsja ecuadisha cuana queja. Quisaraticuare tuna Yusu tsehue mepehua cuanaja ishu. Ebi rirutsu tuna mepehua cuanaja iyuca dyaque emetucu iyabarecuare, Jesús queja ecatyati cuanaque tsahua ishu mepetanahuaque jadique.

⁷ Jesúsja quisarati bacatsu tuna tuaqueja nimeedya jutidya jetiama juajecuare. Jetiama tuna Jerusalénju cuanaque tuaqueja catyaticuare, tumbaedya israelita cuanaja pae

cuana. Jesús queja catyatitsu tuna casitatinicuare tuja cuana tsehue.

Esteban risitanacuareque

⁸ Yusutu dyaque jida jucuare Esteban tsehue. Tyacuaretu tuja casa ni ejeque ecuitaja ataquique ama aishu. Tumeque Yusuja casa tsehue tujatu acuare pusha amadya Yusu tuatsehueque bamere ishuque. ⁹ Umae israelita cuanaratu ujeu bacuare. Tume cuanaquetu casitati bahue jucuare “Tsujema Mere Ijehue Ishuque Einajaca Cuanaja Caradati Ishuque Etare” bacaniju. Caquemitsati caquemitsati tuna Esteban tsehue jucuare. Cirene cuana tsehue jupee Alejandría, Cilicia, Asia yahuaju cuana tsehue tuna tuatsehue cati cati jucuare. ¹⁰ Anatsurutsataqui ama tunajatu bacuare Esteban dyaque bahue tibu. Jadyatu jucuare, Yusuja Espiritura huecashaya eque quisaratiya tibu. ¹¹ Esteban jucha metse acara aya tibu, tunajatu peya cuana acuare:

—“Bacahua tuque ecuana Esteban Moisésja ishu, Yusuja ishu jadya jidama quisaratiyaju”, jadya ni micuana juya, tsujetyaya micuana ecuanara, —jadya tunajatu ecana acuare.

¹² Jadyatu pusha pusha jucuare tumeque ecuita cuana Estebanja ishu. Jadya quisarati bacatsu tuna Esteban tsehue dyaque cahuaiticuare. Emuiba cuanaque, cacuatsashati bahuityaqui cuanaque jadya tuna dyaque cahuaiticuare tuatsehue. Tume tunajatu dutyara tabucuare. Tabutsu tunajatu inacuare. Inatsu tuna dujucuare israelita cuanaja huaraji cuana queja. ¹³ Tuhuadya tunajatu pusha pusha arida cuanaque dujucuare.

—Ecuanaarari bacachine riyaque ecuita Yusuja ishu jidama quisarati ayaju. Yusuja etareja ishu tujatu jidama quisarati anucachine. Moisésja cacuatsashatija ishu tujatu jidama quisarati achine. ¹⁴ Achine tujatu quisarati: “Jesús Nazaretju anicuarera patu Yusuja etare pana rihuishatilla eau” jadya. Tumebaedyapa “Jesúsra dutya cacuatsashati cuana Moisésra ecuana amerehuaque cuareya”. Jadyatu ecuanara cuitadya bacachine, —jadya tuna pusha pusha jucuare.

¹⁵ Jadya cuejayaju bacatsutu dutya huaraji cuana inime cuana bajejequi cuanara Esteban petacuare. Ebutsequini tujatu jucuare Yusuja yacuaju netiyaja ebutsequini bucha, Yusu tsahuaquija bucha. Jadyatu bacuare dutya tuhua jucuare cuanara.

7

Esteban huaraji cuanaja yacuaju catachiticuareque

¹ Tumetu pae dyaque muidara bacaduracuare Esteban:

—¿Yuneridya rena quisaratiya micue ishu?

² Estebanratu isaracuare dutya tuhua cuanaque:

—Tata ecana, nebacacue ique. Ecue ata cuana, nebacacue ique. Yusu Ecuanaja Etata tu dyaque casada. Tuquetu cabamereticuare ecuanaja ebaba Abraham queja, tuque Mesopotamiaju jucuare patya, Haránju anidiruma jariju.

³ “Cuinanacue micue yahua juque. Shanacue micue ata cuana. Dirucue era yahua bamereyaju”, jadya patu Yusura Abraham acuare béru.

⁴ Tumetu Abraham dirucua Caldea yahua juque. Anidirucua retu Haránju. Eje uma mara juatsu tujatu etataque majucuare tuhuadya. Tuque majuhuatu Yusura Abraham ihuaracuare riyaque yahuaju ecuanayacua aniyaju.

⁵ Arepa tuque rehua Canaánju anicuare ama bucha, metsenemerehua ama tujatu yahua ni riya piji buchique. Jadya ama bucha patu Yusura Abraham acuare: “Mique majuhua jutu dutya riyaque yahua jubuque mique eque juracanaya cuanaja ishu. Metsenebuque tunaja tuque”, jadyapa tujatu acuare, Abrahamja ni peadya ebacua aijama jariju.

⁶ Tumebaedyatu Yusura Abraham acuare: “Mique eque juracanaya cuanaque tuna Canaánju cuinanabuque peyaja yahuaju anidiru ishu. Tsunuda eje uma mara tuna anibuque tumeque yahuaju, pushi ciento mara. Tumeque yahua metse cuanaratu mique eque juracanaya cuanaque nerecada, ijahue ijahue jadya abuque. Tsujema tunajatu ecana mere amerebuque.

⁷ Jadya ama bucha tuque dyaque nerecaturabuque mique eque juranacaya cuanaque nerecaturaqui cuanaque. Tuequedyatu mique eque ejuracana cuanaque cuinanabuque tuhuaque. Junabuque tuna riyaque yahuaju; rehua tunara muinabuque”, jadya patu Yusura Abraham acuare béru.

⁸ Yusuratu Abraham tsehue inime bajejucua: “Mique, dutya mique eque juracanaya cuanaque jadya micuana ecuita huitu biti catubumeretitaqui Yusuja cuanaque jadya adebataqui juishu”, jadyatu Abraham Yusura cuatsashacuare. Tuequedyata tujatu ebacuaque Isaac cuinanacuare. Cuinana huecaca catsurutiya jutu Abrahamra ecuita huitu biti tubucuare Yusura amerehua equedyata. Tuequedyata Isaac esiri juhuaju, tuja ebacuaque Jacob cuinanahuaju, tubunucacuaredya tura inime iyahua equedyata. Jacob amena esiri juhuaju, anicuare tujatu peadya tunca beta earacana ebacua cuanaque. Dutyadya tujatu ebacua cuanaque ecuita huitu biti tububarecuare. Riya peadya tunca beta earacana ecuita cuana ri peadya tunca beta earacana cuare israelita cuana eque ejuracana cuanaque.

⁹ “Peadyatu Jacobja ebacuaque José bacani jucuare. Tuja tuatsehuequi cuanaratu José dyaque jishacuare, etataquera tunaja ejuque tuna iyuhueda baya bucha iyuhuee ama baya

bucha cabatitsu. Catyati tunajatu José acuare Egiptoju cuaya cuana queja. Tunaratu dujuare tuhua japada. Josétu Yusu tsehue junenicuare. Egiptoju Yusura José narucuaré. ¹⁰Nime casaturacuarétu peya inime juyaju. Yusratu dyaque bahue amerecuare. Jidatu anishacuare. Faraón Egipto juque ecuarí quejatu José iyuhueda bamerecuare. Egipto naruqitu Faraónra amerecuare, tuque iyuhueda baatsu. Dutya tuja etareju aniya cuanaque tujatu narumerecuare, —jadya tuna Estebanra cuejacuaré.

¹¹Cuejanucacuare tujatu ecana:

—Adebayadya micuana, José Egipto naruqui jucuaré patya dyaque mije jucuaréque. Tumebaedyá Canaánju ecana mije jucuaré. Daditaquí ama ecuanaja baba cuanara ara ishú cuanaque bacuaré. ¹²Jacobtu bahue jucuaré Egiptoju trigo aniyaque. Jadya bahue juatsu tujatu cuadishacuare tuhua tuja ebacua cuanaque, ecuanaja baba cuana jucuaréque. Cuadishacuare tujatu ecana trigo bacara. Cuametse juatsu tuna caadebaticuaré ama tuna tuatsehuequira trigo tyayaque. ¹³Tuna cuabeta ishú cuahuajutu José caadebamereticuaré euji cuanaque queja. “Idya ique, José, micuana tsehuequique”, jadya tujatu ecana acuare. Faraón tujatu cuejacuaré, tuja euji cuanaque adeba ishú. ¹⁴Tuatsehuequi cuanaque Canaánju dirunucahuie tuna Joséra acuare: “Nejeticue etata tsehue rehua, dutya ecuanaja ata cuana tsehue”. Tume tuna dutya Egiptoju anieticuare. Pacarucu tunca pishica earacana tuna anisicuacuare. ¹⁵Tuhudyatu Jacob majuya tupu anidirucuaré. Tuhua nucadya tujatu majucuaré dutya tuja ebacua cuanaque, ecuanaja baba cuana. ¹⁶Tsunuda eje uma mara cuetihuajutu ecuanaja ebaba ecanaja etsau cuana dujanacuare Siquemju Canaán yahua. Eje uma mara aniya jariradya patu Abrahamra yahua icueneta quemi acuare tuhua tuja ata cuana majuya cuanaque papa ishú. Hamorja ebacua cuanaquera patu catyati acuare chipiru tsuje. Tuhuatú papatanacuare ecuanaja ebaba ecanaja etsau cuana, —jadya tuna Estebanra acuare.

¹⁷Huecashaajecuarédyá jutídyá tujatu tunaja ebaba cuanaque jucuaré cuanaque.

—Egiptoju aniya jariquetu ecuanaja baba cuana umanaajecuarédyá jutídyá dyaque umada. Ejetsunue ama tuna Egipto juque cuinana ishúque bataquí amajutu Yusura icuenetadya Abraham jadya tuque adadiya jadya acuareque. ¹⁸Tuequedyatu peya ecuarí catibuticuare Egipto naru. Iyacuaque ecuariratu jidama acuare israelita cuana, arepa tuna José eque ejuracana cuanaque ama bucha. Bama tujatu

José jucuare, tuque amena tsunuda majuhaju ecuari jucuare tibu. ¹⁹ Tumeque ecuariratu dyaque nrecaturacuare ecuanaja baba cuana. Ijahue ijahue tujatu ecana acuare. “Ebacua cuana cuinanayaju, deca baatsu, etsecueju neihehuecue maju ishu”, jadya tujatu ecana casada tsehue ijehuemerecuare ebacua cuanaque butseeju cuinana cuanaque. Jadya tujatu ecana amerecara acuare ecuanaja baba cuana umanajaca ishu. ²⁰ Tume patyatu cuinanacuare Moisés. Tumeque ebacua nanatu Yusuja dyaque iyuhuedaque jucuare. Etataque ecatserratu etehua temusha acuare etareju quimisha badi tupu. ²¹ Tatseja etareju tatsejatu amena etehua naru ataqi ama bacuare. Jadya juatsu tatsejatu jitiju ishatsu enaju iyaticuare. Majucuare ama tuque. Tumetu ecuarija ebacujunaquera dadicuare. Daditsu tujatu tuja ebacuaque neri etemushau bucha temushae acuare. ²² Ecuarija yutsecuaque bucha juya tibutu Moisés Egipto juque dyaque bahue cuanara bahuityacuare. Jetiera amatu sumicuare. Dyaque jidatu quisarati bahue jucuare. Casa tsehuetu mere jucuare, —jadyatu Estebanra quisarati acuare.

²³ Cuejanucacuare tujatu ecana:

—Peya huecacatu Moisés cuacuare tuja ata israelita cuana cuajira. Ecuitatu amena jucuare. Pushi tunca mara tujatu anicuare. ²⁴ Tuque tuna tsehura tujatu bacuare peadya egiptojura israelita ujeda nrecada ayaju, arepa tumeque jidama juma ama bucha. Jadya baatsu tujatu icueneticuare. Tsahuaticuare tuja tuque. Iyecuaretu egicio, tuja ata israelita icueneaue. ²⁵ “Ecue ata cuanaratu adebayadya Yusura ique tuna inajacamere ishu iyahuaque”, jadya tujatu inime tupucuare. Tunaratu adebacuare ama. ²⁶ Huecacanucatsu piji cuitadyatu Moisés cuanucacuare israelita cuana aniyaju. Bacuare tujatu beta israelita ecatsé catiyaju. Catishajacacara tujatu ecatsé acuare catiyaue. “Metse taa metse ata. ¿Eje bucha juatsu jatsu metse catiya?” jadya tujatu ecatsé acuare. ²⁷ Tuja ecare ujeda aquiquetu cahuaiticuare Moisés tsehue, tura catishajacacara ayajudya jutidya. Itushacuare tuja tuque. “¿Aira jatsumi ecuanaja huaraji juishu bacanishachine? ¿Aira jatsumi iyachine ecuanaja inime jidama cuanaque bajejequi juishu? ²⁸ ¿Ique ni taa mira iyecaradya anucaya, riyabarepa egipcio achine bucha?” jadyapa tujatu acuare Moisés. ²⁹ Jadya bacatsutu Moisés bajida juatsu huanacuare. Dirucuairetu Madián bacani yahuaju. Tuhuadyatu caquemiticuare madianita tsehue. Ejitaju tatse acuare beta ebacua.

³⁰ “Pushi tunca mara juatsutu peya huecaca Moisés jecuare epu cuana tsecada anitayaju, emata Sinaí bacani

japadamaju. Peadya Yusu tsahuaquiratu cabamereti ishu acuare. Moisesratu bacuare acuihuija, acuihuija jujuyaju ai tiruyaque murutayaque ama. ³¹ Jadya tumeque baat-sutu Moisés dyaque anajacatacuare. Tume tujatu jipeticuare pana peta acara aatsu. Jipetitsu tujatu Yusura isarayaju cabacaticuare. ³² 'Ique Yusu micue baba ecanara muiyaque. Ique Yusu, Abraham, Isaac, Jacob jadyara muiyaque' jadya tujatu Yusu quisaratiyaju bacacuare. Jadya bacatsutu Moisés dyaque bajida jucuare. Bajida juatsutu tadadatibunecuare. Petataqui ama tujatu bacuare. ³³ Isaranucacuaretu Yusura: 'Mique ecue yacuaju tibu, catacaticue zapato, mira ique muiyaque cabamereti ishu. ³⁴ Ique taa bahue ecue cuanaque Egiptoju dyaque nerecaturatayaque. Ijahue ijahue tuna ataya. Bacajacaya ama tuque tuna payaju. Amena ique jehua tuna jida inimeju cuinanasha ishu, Egipto juque cuinanasha ishu. Iyacua mique cuadishaya tuna inajacamerera' jadya patu Yusura acuare Moisés béru.

³⁵ 'Yusuratu Moisés cuadishanucacuare Egiptoju, israelita cuana tsahua, inajacamere jadya aishu. Barepaju Yusu tsahuaquique acui huija jujuyaque tirucuare ama eque tujatu cuadishacuare. Arepa israelita cuanara bijidamaduracuare ama bucha, arepa tuna '¿Aira jatsumi ecuanaja huaraji juishu bacanishachine? ¿Aira jatsumi ecuanaja inime jidama cuanaque bajejequi juishu iyachine?' jadya acuare ama bucha, Yusuratu cuadishacuare tuna tsahua ishu. ³⁶ Moisesdyatu ecuanaja baba cuana Egipto juque cuinanashaquique jucuare. Tunaja yacuaju tujatu acuare Yusuja casa tsehue ni ejeque ecuitaja ataquique ama. Inime tillaqui tujatu ecana amerecuare. Egipto eque diruyaque, Bei Pudedaque riquequereyaque, pushi tunca mara tsecada anitaya cuana eque juneniyaquetu Moisésra tunaja yacuaju acuare ejeque ecuitara ayaque ama. ³⁷ Tumeque Moisesradyatu israelita cuana cuejacuare: 'Micuana eque ejuracana cuana quejatu Yusura cuadishabuque tunaja ata, tuna Yusuja quisarati cuejara. Ique micuana cueja ishu cuadishahua bucha, jadidya tujatu tumeque cuadishabuque' jadya tuna Moisésra cuejacuare. ³⁸ Riyaque Moisesradyatu huidujuacuare ecuanaja baba cuana epu cuana tsecada aniya eque junenicuare patya. Tuaqueja cuitadyatu junacuare quisarati cuejaquique Yusuja yacua juque. Emata Sinaíju tujatu cabamereti ishu acuare. Tudyatu barepajura cuejacuare Yusuja cacuatsashati cuana tuna eje bucha jutaquique. Moisesratu yudijidya cuejanuca acuare riyaque cacuatsashati cuana ecuanaja baba cuana. Huenecuare tujatu peadya peadya tata eque umanaetibeya cuanaque bahue amereetibe

ishu, ecuana tumebaedya iyacua, —jadya tuna Estebanra acuare.

³⁹ Cuejanucacuare tujatu ecana:

—Ecuanaja baba cuanaratu Moisésra cuejayaque bacacarama acuare. Bijidama tuna bacuare tuna naruqui juishu. Dyaque tuna inime tupuqui acuare Egipto juque ani. Yudijidya dirunucacara ebari ecana jucuare. ⁴⁰ Jadya tibu tuna Moisésja euji que Aarón bacani tsehue quisaratiticuare, Moisés emataju tsurahuaju: “Acue ecuanaja yusu jiu cuanaque oro. Tume cuanara ecuana pahuiduju ecuana Egiptoju dirunucayaju. Arepa ecuana Moisésra Egipto juque huidujuhua ama bucha, baecue ecuana eje bucha tuque juchineque”, jadya tunajatu Aarón aticuare. ⁴¹ Acuare tunajatu huaca cueya cueya oro. Iyecuare tuna uhuisha cuana cueya cueya cuatsaqui. Tudy a tunajatu pureama, mui jadya acuare. Chine tuna jucuare tumeque yusupa ejuu jadyaja ebaniju. Muicuare tuna, tunaradya jutidya tunaja emetucu tsehue cueya cueya aatsu. ⁴² Jadya juhua baatsu tuna Yusura narujaca jipenee acuare; icuene naruhua bucha ama tujatu ecana narunucacuare, tuna cueya cueya queja nimee juhua baatsu, tuaqueja nimee ejuuque. “Paadya tuna tunara jidamaque acara ayaque”, jadya tujatu inime jucuare. Tume tunajatu muicuare ijeti, badi, purari cuana jadya. Yusura tuja quisarati cuejaqui cuana eque quisarati acuare bae cuitadyatu judadicuare:

“Israelita cuana, micuanara ique ama tyahua uu eiye cuanaque, micuana pushi tunca mara epu cuana tsecada aniyaju juneniya patya.

⁴³ Ique emuique, micuanaradya jutidya cueya cueya ahuaque tuque micuana muihua.

Micuanaratu tume cuanaque yusu cuanapa jadya ahua.

Micuanaratu Moloc cueya cueya aatsu, tuque muiqui etare aatsu nityahua.

Tumeque etare tuque micuana eju micuana juneniyara aquerenihua.

Muicuare micuana purari Refán bacani.

Tume micuana tuja cueya cueya caticuare.

Jadya tibu micuana nerecaturabuque.

Micuanaja yahua juque micuana cuinanashabuque, japada. Babilonia yahua yueque tibene micuana cuadishabuque”, jadya patu Yusuja quisarati jucuare tuja quisarati cueja puji cuanara cuejacuareque, —jadya tuna Estebanra acuare.

⁴⁴ Isaranucacuare tujatu huaraji cuana:

—Epu cuana tsecada aniyaju juneniya patyatu ecuanaja baba cuanara aquerenicuare ebiti eju judirutsu etare caca nityadiru ish. Etare cacatu jucuare tuna Yusu mui ishucue.

Educujutu anicuare beta tumu jepedaque, bejedaque jadya. Tumeque tumu ecatsajutu ehue ne jucua re Yusuja cacuat-sashati cuana. Icuenetadya patu Yusura Moisés bamerecuare ebiti etare caca eje bucha ataeque, ai educuju iyayaque jadya. Tume tunajatu Yusura Moisés amerecuare bae cuitadya acuare. ⁴⁵ Egipto juque cuinanacuare cuanaque majutere-huajutu tunaja ebacua cuanaquera dujucua re tumeque etare caca Yusu mui ishuque Canaán yahuaju judirutsu, yahua Yusura tyaana acuareju judirutsu. Josuétu tuque tsahuaquique iyacuaque jucua re. Tuna tuhua judiruhua-jutu jetiama peya anae cuanaque tuhua jucua re. Yusratu ecuanaja baba cuana queja ecana cuinanashamerecuare, tuna cuitadya tuhua aniduru ishu. Tuhua tunajatu Yusu muicuare etare cacaju David ecuari jujacaya tupu. ⁴⁶ Yusuja iyuhuedaquetu David jucua re. Dyaque jidatu jucua re tuatsehue. “Eratu acara aya etare arida, jida piji mique tuhua ani ishu. Ecuanaja ebaba Jacob tu miaqueja nimee jucua re. Ique tumbaedy a miaqueja nimee nucadya. Jadya tibudya tuque micue etare aridaque acara aya”, jadya patu Davidra acuare Yusu. ⁴⁷ Yusratu David amerecarama acuare. Ebacuaque Salomonratu etare acuare, David majuhua ju.

⁴⁸ “Jadya ama buchatu Yusu ecuitaja etare eauju camadya ama aniya. Dutya Iyaquiquetu aniya ama ecuanara ‘Yusuja Etare’ jadya ayaju camadya ama. Neadebacue tura tuja quisarati eque cuejahaque:

⁴⁹ “Barepa tu ique aniqui buchique.

Yahua bacue ecue ehua chi iyabutya ishu buchique.

Eje bucha anie ni ique juma ejeque etarejudya jutidya micuanaja eaju.

Eje bucha anie ni ique juma peadya etareju camadya.

⁵⁰ Jutaquiju ¿ai jatsu tuque micuana eau ecue ishu?

Idya di taa dutya ai iyaquique”,

jadyatu Yusu jucua re, —jadya tuna Estebanra acuare.

⁵¹ Cuejaajecuareadya jutidya tujatu ecana:

—¡Micuana micuana cuejataqui ama! Micuanaratu Jesúsja quisarati ijacabacacarama aya. Jaraya ama tuque micuanaja iyucaju. Micuana micuana Yusu adeba baecua cuanaque bae jutidya. Yusuja Espíritu tuque micuana ijacabacaya ama. Micuanaja baba cuana baedy a jutidya micuana.

⁵² Tunaratu nerecaturacuare Yusuja quisarati cuejaqui cuanaque. Micuanaja baba cuanaratu iyecuare quisarati cueja puji cuana, “DYAQUE JIDAQUE tu junabuque”, jadya cuejaqui cuanaque. Tumeque DYAQUE JIDAQUE tu junahua. Tuja ebacanitu Jesús jucua re. Tuque junahuaju tuque micuana inamerechine tuque ujeu baqui cuana queja. Micuanaratu

curusuju tatameretsu iyemerechine. ⁵³ Micuanaja baba cuanatu Yusura tuja cacuatsashati cuana cuejehua barepaju tuque tsahuaqui cuana eque. Micuanaratu pana adeba aya. Jadya ama bucha micuana tumeque cacuatsashati eque ama juya, —jadya tuna Estebanra acuare.

Esteban iyetanacuareque

⁵⁴ Estebanra cuejehuaque bacatsu tuna dyaque cahuaicuare. Etse tari tuna jucuaire tuatsehue cahuaityaque. ⁵⁵ Yusuja Espirituratu Esteban dyaque nime arituracuare. Ebarucue queja atucatu jucuaire. Capetatiyara tujatu bacuare Yusuja hueca. Bacuaretu Jesús Yusuja jida eque amaca netiyaju.

⁵⁶ —¡Nepetacue! Yusuja eaniqui tuque baya. Baya tuque Jesús ECUITA Yusuja jida eque amaca netiyaju, —jadyatu Esteban jucuaire.

⁵⁷ Jadya bacatsutu huaraji cuana dyaque cahuaicuare. Tuna cuitadya tuna jebuda quiquecuare. Ijaca cani tuna catumuticuare tuque bacacarama aatsu. Casada quiquetsu tuna dutya tuaqueja tsajajaterere jucuaire. ⁵⁸ Inacuare tunara. Inatsu tunajatu epu ebari juque cuinanashacuare, tumu tsehue iye ishú. Camisa cuana ecana catacatibarecuare. Tume tunajatu ecuita Saulo bacani queja narumerecuare camisa cuana. Tuhua tunajatu Esteban tumu tsehue iye-cuare. ⁵⁹ Tunara tumu tsehue marereshayajutu Esteban Jesús queja bacabacuare:

—Ique Cuatsashaqui Jesús, batsacue ique miaqueja judiruyaju, —jadya tujatu Jesús acuare.

⁶⁰ Nuyucuare tuque. Nuyutsutu quiquecuare jebuda:

—Ique Cuatsashaquique, tillacue tunaja riyaque jucha iyaja cuita tunara abuyaque, —jadya tujatu Jesús acuare.

Jadya quisarati amena aatsutu majucuare.

8

¹⁻² Yusu muiqui cuanaratu papaticuare

Esteban emajuque. Enapacuare tunaja tuque.

Saulora Jesús queja ecatyati cuanaque jidama nerecaturat-ibunecuareque

Esteban iyetahuaju baatsutu Saulo dyaque jida cabaticuare. Esteban iyetanacuare equequetu Jesús queja nimee ama cuanara Jesús queja ecatyati cuanaque dyaque ijahue ijahue acuare. Jadya equetu ecatyati cuanaque dutya epu cuana queja tsapetanaterecuare. Umaetu huanacuare peya epu cuanaju Judea yahuaju. Peya cuanatu Samaria yahuaju

huanacuare. Jesúsja ecuadisha cuanaque tuna huanaterecuare ama. Anicuaredya tuna Jerusalénju. ³ Saulotu catibuticuare Jesús queja ecatyati cuanaque nerecatura. Dutya jujeri etare cuanajutu nubinubinicuare tuna ina juyaque. Inacuaretu ecuita, epuna cuana tumbaedy. Inatsu tujatu ecana etare apudaju ishacuare.

Jesúsja quisarati Samariaju cuejatanacuareque

⁴ Jerusalén juque tsapetanacuare cuanaratu cuejacuare Jesúsja quisarati dutya queja. Judeaju, Samariaju jadya tunajatu quisarati tsapecuare. ⁵ Jesús queja ecatyati cuanaque ijahue ijahue atayajutu Felipe huanacuare Jerusalén juque. Cuacuaretu Samariaju. Tuhuatu tura cuejacuare Jesús Mesías eje buchique. ⁶ Yusuja casa tsehue tujatu acuare jetiama ejeque ecuitaja ataquique ama. ⁷ Tume tujatu Yusuja casa tsehue ijahua cuanara quijahuatishaya cuanaja ijahua cuana ijehuecuinauare. Ijahua cuanatu quiquetereyaque cuinanacuare tuna quejaque. Tumbaedy tujatu chachanecuare jetiama ecuita maju cuanaque, rudurudu cuanaque jadya. ⁸ Jutaquijudya tuna dyaque pureama jucuare tumeque epuju cuanaque.

⁹ Tuhuatu anicuare maru Simón bacani. Ijahuepa tujatu ajacacuare ama Samaria juque ecuita cuana. Tuquepa ecuita dyaque inime metseque. ¹⁰ Dutya jujeri tuhua cuanaratu ejenecuare Simónra cuejayaque. Ecuita jetiedya cuanara, inime metse cuanara jadya tunajatu pana baca acuare. “Riyaque ecuitajatu aniya Yusuja casa”, jadya tunajatu Simónja ishú quisarati acuare. ¹¹ Eje uma maratu Simón maru jucuare. Jetiamaratu tura cuejayaque pana ejene acuare, tura dyaque ijahue ahua tibu.

¹² Feliperatu Jesúsja quisarati cuejaajecuaredya jutidya Samariaju. Cuejacuare tujatu ecana Yusura amena dutya narutibunehuaque. Cuejacuare tujatu ecana jidaque quisarati Jesucristo eje buchique. Cuejayaju bacatsu tuna Jesús queja jetiama catyaticuare. Jadya juatsu tuna cutsamereticuare “Jesús jaque ecuana” jadya cabamereti ishú. Jetiama ecuita, epuna jadya tuna cutsamereticuare. ¹³ Simóntu Jesús queja catyaticuaredya. Cutsamereticuare tuque. Junenitibunecuaretu Felipe tsehue. Ejeque ecuitaja ataquique ama ayaju bahue juatsu, tunajatu inime tillaqui acuare. Dutya tume cuanaque ayaju baatsutu Simón dyadi inime tilladya jucuare.

—¿Eje bucha ae tujatu aya riya cuanaque? —jadya tujatu inime tupucuare.

¹⁴ Jesúsja ecuadisha cuanaque tuna Jerusalénju jucuare jari. Bacatsacuare tunajatu quisarati Samariaju cuanarapa

Jesúsja quisarati amena ejeneya jadya. Jadya bahue juatsu tunajatu cuadishacuaré tuhua Pedro, Juan jadya. ¹⁵⁻¹⁶ Juticuare tatse Samariaju Jesús queja ecatyati cuana queja. Junatitsu tatse Yusu queja bacabacacuare tunaja ishu. Yusuja Espíritu tu junama jari jucuare tuna queja ni eje quejadya jutidya. Cutsamereticuare tuna Jesús Ecuana Cuatsashaquiya eba-caniju camadya.

Tumetu Pedro, Juan jadya Yusu tsehue quisaraticuare tunaja ishu:

—Tata, cuadishacue micue Espíritu Samariaju Jesús queja ecatyati cuanaja ishu, —jadya tatsejatu bacacuare.

¹⁷ Jadya Yusu queja bacabacatsu tatsejatu iyacuare emetucu tunaja iyuca dyaque. Jadya juyajutu Yusuja Espíritu junacuare tuna queja.

¹⁸ Simonratu bacuare Yusuja Espíritu junahuaque Jesúsja ecuadisha ecatsera emetucu tunaja iyuca dyaque ebi rirutsu emetucu iyayaju. Jadya baatsu tujatu ecatsé chipiru cuejacuare tuja tumeque casa ani ishu.

¹⁹ —Ecue dyadi paanidya tumeque metseja aniyaque. Metsera emetucu ejeja iyuca dyaque iyayajutu tuaqueja Yusuja Espíritu junaya. Tsuje tyaya metse era, metsera Yusuja Espíritu juna ishuque casa tyayaju, —jadya tujatu ecatsé acuaré.

²⁰ Jadya juyajutu Pedrora yana ujeda tsehue quemitacuare:

—Yusura pana aputasha acue. Micue chipiru tumbaedyatu pana aputasha paa. Cuji cuita juatsu tuquemi inime tupuya Yusuja Espíritu chipiru tsehue equemita bucha. Tsujematu Yusura tuja cuanaja ishu cuadishaya. ¡Eje bucha juetie ni tu juma chipiru tsuje! ²¹ Mira ni tu eje bucha meree ama Yusu ecuanara mereya bucha. Eje bucha tyae n imi Yusura tuja casa ama ecuaná tyahuaque. Miquemi jida ama Yusura baya. ²² Inime cacuareticue. Ajacacue mira jidamaque ayaque. Yusu queja canerecaticue: “Tata, eratu dyaque jidama inime tupuya. Apupashacue ecue jucha cuana”, jadya Yusu acue. ²³ Eratu adebaya micue eje buchique inime. Yusuja Espíritu era peya cuanaja ishu iyabutyayaju mira dyaque jishahua. Miratu jidamaque inime tupuqui ajacaya ama, —jadyatu Pedrora acuaré.

²⁴ —Nequisaraticue Ecuana Cuatsashaqui tsehue ecue ishu. Nebacacue; patilla tura ecue jucha, tura ique metsera cuejahua bae nerecaturae eau tibu, —jadya tatse Simónra acuaré.

²⁵ Jesúsja quisarati cueja amena aatsu, tatseja ishu eje bucha Yusura ahuaque cueja amena aatsutu Pedro, Juan ecatsé Jerusalénju yudijidya dirunuca jucuare. Yudijidya

dirunuca juyara tatsejatu Yusu queja judiru ishuque quisarati cuejaajecuare epu cuanaju Samaria yahuaju.

Felipe ecuita Etiopiaju aniya tsehue quisaraticuareque

²⁶ Jadya juatsutu Ecuana Cuatsashaquira cuadishacuare barepa juque etsahuaquique Felipe queja. Junaticuaretu Felipe queja. Junatitsu tujatu isaranaticuare:

—Cabajejeticie, Felipe. Cuacue beni diji queja amaca Jerusalén diji Gaza eque cuetiyaaju, —jadya tujatu Felipe anaticuare.

²⁷ —Pacua taa ique, —jadyatu Felipera acuare.

Tumetu masadama cabajejeticuare. Cabajejetitsutu cuacuare. Tume cuayaquetu catsuruticuare ecuita Etiopiaju tsehue. Tumeque ecuitatu tuja yahuaju inime metseque jucuare. Turatu merecuare ecuari epuna. Chipiru naruquiquetu jucuare. Tuque Jerusalénju Yusu muira cuachineque jetinucayara tujatu Felipe tsurutsacuare.

²⁸ Tuja yahuaju dirunucayaquetu jucuare. Caretu bae tsehuetu dirunucacuare. Diruyara tujatu isaraajecuare Yusuja quisarati etsuri jebuda tsehue. Isaraajecuare tujatu Isaías Yusuja quisarati cuejaquira béru huenecuareque.

²⁹ —Jipeticue. Tsurutsacue tumeque ecuita ediji eque jetiyaque, —jadyatu Yusuja Espiritura acuare Felipe.

³⁰ Tumetu Felipera tsajajatsurutsa acuare. Jipetsu tujatu bacacuare tura Isaiasra huenecuareque quirica isarayaju.

—¿Adebayadyami eje buchique isarayaque? ¿Adebayadyami ai jadya ayaque tume mira isarayaque? —jadyatu Felipera bacaduratsacuare.

³¹ —Aijama. ¿Eje bucha adebae jatsu rique eau? Aira cuejayaju jatsu rique eadebau. Jecue; tsuracue. Ique peque anibutecue, —jadyatu etiopera acuare Felipe.

³² Isaiasja quisarati Yusuja quisaratiju ehuenequetu jucuare riya cuanaque:

“Uhuisha iye ishu edujuta bucha dujutaetu jucuare iyeta ishu.

Uhuisha tunara eshu ayaju quiquetereya ama buchatu quicueneti queja inime ama jucuare.

Arepa tuna ujeta acuare ama bucha tujatu abacata idu acuare.

³³ “Tudyatu jucha metse’ jadya tunajatu acuare, arepa jadicue ama ama bucha.

Ni airatu icuenecuare ama.

Dyaque jidamatu ecuita cuana tuatsehue jucuare.

Daditaqui amatu quisatati eje bucha cuejae aishu.

Iyecuare tunaja tuque”,

jadyatu jucuare Isaiasja quisarati etiopera isaraajecuareque.

³⁴—Cuejacue ique riyaque quisarati. ¿Aija quisarati rejari cuejaya riyaque Yusu equeque quisarati cuejaquira? ¿Tujaquedya jutidya ni taa? ¿Peyaja quisarati ni taa rejari jadya aya? —jadyatu acuare etiopera Felipe.

³⁵Tumetu Felipera pana cueja acuare eje buchique jadicue. —Jesús rejari jadya aya, —jadya tujatu acuare.

Pana cueja ejitaju tujatu Yusuja quisarati acuare. ³⁶Ediji eque diruyaque tatse judirucuaré ena aniyaju. Tuhua judirutsutu etiopera Felipe bacaduracuare;

—Petacue. Rehua taa ri ena aniya. ¿Eutsaudya mira ique? —jadya tujatu bacaduracuare.

³⁷—Mique ni Jesús queja catyatiya dutya micue ducuta inime tsehue, tume mique eutsaudya, —jadyatu Felipera acuare.

—Eratu ejeneya Jesús Yusuja Ebacuaqueque. Iyaja cuitadya ique tuaqueja catyatiya, —jadyatu ecuitara acuare.

³⁸Yume nityamere cuitadya tujatu acuare caretu caretu dujuqui queja. Caretu juque butetsu tatse betadya enaju buteticuare. Tuhuadyatu Felipera utsacuare. ³⁹Tatse ena juque tsurahujutu Felipe Yusuja Espiritura huesatsu dujuacuare. Tumetu etiopera banucacuare ama. Dirunucacuaréti etiopé dyaque pureama tsehue, Jesús jaque amena juhua cabatitsu. ⁴⁰Epu Azoto bacanijutu Felipe ejitaju judirucuaré. Epu cuanajutu juajecuare, Jesúsja quisarati jidaque cueja juyaque, Cesareaju judiruya tupu.

9

Saulo inime cacualeticuareque (Hch 22.6-16; 26.12-18)

¹Saulotu cahuititibunecuare Jesús queja ecatyati cuana tsehue. Eje buchadya iyetillacara tujatu ecana acuare. Pae dyaque muida quejatu catsahuamereticara jucuare Ecuana Cuatsashaquija cuanaque nrecatura ishu. Jadya juatsutu tuatsehue quisaratira cuacuare.

²—Ique cuacara juya Damascoju Jesús queja ecatyati cuanaque sarera. Mira cuatsashayaju cuayaque ique jadicue quirica tyacue. Ique Damascoju junatitsu cuaya caradati ishucue etare cuanaju riyaque quirica huaraji cuana bamera. Quirica isaratsu tunara pacueja eje cuanaque Jesús queja ecatyati cuanaque. Bahue juatsu painanati ecana dutyadya jutidya ecuita, epuna cuana jadya. Pabeti ecana Jerusalénju, —jadyatu Saulora aticuare pae cuana cuatsashaquique.

³Jadya ahujutu Saulo cuacuare Damascoju. Ediji eque cuayaquetu Damasco epu ebari piji dyane juajecuare. Muya jutidyatu barepa eque huecara pana udatilla atsacuare.

⁴ Hueca baatsutu Saulo huipuchitanatsu yahuaaju rumucuta rihui jucuare. Rihuitsu jarayara tujatu etsuri bacacuare:

—Saulo, Saulo, ¿eje bucha juatsu mira nerecaturaya?

⁵ Jadya bacatsutu Saulora bacaduracuare:

—¿Aira isaraya?

—Ique Jesús, idya mira nerecaturayaque. Mira ique biji-damadurayaquemi mita tacadya jutidya jidama catiya. Juye tuta tacadya jutidya enimetsequera muyayaju acui tapatsu ujeda ecاتمereu buchique mique.

⁶ Jadya bacatsutu Saulo bajida juatsu tadadacuare.

—¿Ai mira amerecara aya, Ique Cuatsashaquique?

—Netitsuracue. Damascoju piisi tuyu cuau jucue. Tuhua tunarami cuejatsaya mique ai jutaquique, —jadyatu Ecuana Cuatsashaquira acuare.

⁷ Tumetu Saulo tsehue cuacuare cuanaque dyaque jecutanacuare. Inime tillaquí tuna acuare. Arepa tunara tumeque etsuri bacahua ama bucha, tunajatu bacuare ama ni ejeque buchique. ⁸ Tumetu Saulo netitsuracuare yahuaaju jujarayaque. Netitsuratsu tujatu busacuare yatuca. Busatsu capetatitaquí ama jucuaré. Shuhuitu jucuaré. Jutaquijudyatu tuque tajiáje juya cuanara ebiju inatsu dujucuaré. Junatiquerecuare tuna Damascoju. ⁹ Tuhuatu quimisha huecaca capetatitaquí ama jucuaré. Arama, ijima jadyatu jucuaré.

¹⁰ Tuhuatu anicuare ecuita Ananías bacani, Jesús queja ecatyatique. Cabamereticuaretu Jesús tahuiju tuaqueja. Cabameretitsu tujatu isaracuare:

—¡Ananías!

—Riyadya ique. Bacayadya mique era, Ique Cuatsashaquique.

¹¹ —Netitsuracue. Cuacue ediji “Tuyu” bacani eque, ecuita Tarso juque Saulo bacani sarera. Judasja etarejutu junachine. Iyacua cuitatu eatsehue quisaratiya. ¹² Tahuiju ebau bucha bae tujatu ejeque cuana ahua. Bahuadya tura mique tuhua nubitsu micue emetucu tuque dyaque iyayaju tuque capetatinuca ishú. Jadyatu Saulora bahua tahuiju bucha. Jadya tibudya baticue, —jadyatu Jesúsra acuare Ananías.

¹³ Jadya bacatsutu Ananías bajida jucuaré. Acuare tuja tuque:

—Ique Cuatsashaquique, eje umaja taa ique ecueja tumeque ecuita Saulo bacani eje buchique. Tura patu dyaque nerecaturaya Jerusalénju micue cuanaque, jida juya cuanaque. ¹⁴ Jechine patu rehua micue cuanaque risitsu duju ishú. Pae cuanaja huaraji cuanara patu cuatsashahua ecuaná jidama aishu, —jadyatu Ananiasra acuare Jesús.

15 —Cuacue. Baticue. Tumeque ecuita tu amena ique merequique. Eratu tuque mepehua ecue quisarati cuejaqui juishu. Cuejabuque tujatu ecana jetiama. Israelita ama cuanaque, tuna naruqui cuanaque, israelita cuana jadya tujatu ecue quisarati cuejadadiya. 16 Eratu bahue ameredadiya Saulo tuque dyaque canerecatidadiyaque ecue quisarati cuejayaque, —jadyatu Jesúsra acuare.

17 Tudyatu cuacuare Ananías Saulo junachineque etareju. Nubinatitsu tujatu emetucu ecatse iyacuare Sauloja iyuca dyaque. Isaracuare tuja tuque:

—Bandía, Saulo. Miquemi ecue eatsehuequique. Ecuana Cuatsashaquira cuadishahua miaqueja. Edijiju miaqueja cabameretichinera cuadishahua rehua mique capetatissha ishu. Tura ique cuadishahua, miaqueja Yusuja Espíritu iyabutya ishu, —jadyatu Ananiasra acuare Saulo.

18 Tuque quisaratiyaju cuitadya tujatu pacacacuare yatuca juque jae biti buchique. Jadya juatsutu jida capetatinucacuare. Tumetu netitsuracuare tuja etahuiqui juque. Cutsamereticuare tuque Jesús queja catyatihuaque jadique adeba ishu. 19 Jadya juatsutu chamacama amena araaracuare. Araaratsutu amena cacasatinucacuare. Eje uma huecaca pijitu anicuare Jesús queja ecatyati cuana tsehue tuhua.

Saulora Jesúsja quisarati Damascoju cuejacuareque

20 Damascoju jari tuputu Saulora Jesúsja quisarati cuejajacacuare ama. Cuacuaretu israelita cuanaja Yusu mui ishu caradati ishunque etare cuanaju.

—Jesús tu Yusuja Ebacuaque, —jadya tujatu ecana cuejaa-
jecuare.

21 Tuque jadya bacaqui cuanaquetu anajacatacuare.

—¿Jeeque ecuita ama jatsu ri Jerusalénju Jesús queja ecatyati cuanaque nerecaturaquique? ¿Jeeradya ama tuna iyetillacara achine? ¿Jesúsja cuanaque risitsu dujura ama jatsuri jechine? ¿Tuna risitsu duju pae cuanaja huaraji cuana queja Jerusalénju duju jadyara ama jatsuri jechine? —jadya tuna jubarecuare.

22 Saulora tuna baji tsehue ama cuejaajecuaredya jutidya Jesúsja quisarati. Israelita cuana Damascoju anicuare cuanaque tujatu cuejaajecuare Jesús Mesiasque, Yusuja Emepeque. Quisarati dyaque bahue tsehue tujatu ecana isaracuare. Anatsurutsataqui ama tuna bacuare.

Saulo israelita cuanaja huaraji cuana quejaque huanacuareque

23 Ejetsunue juatsu amatu israelita cuana Saulo tsehue dyaque cahuaicuare. Casitaticuare tuna tuque eje bucha

iyee aishuque inime bajeje ishu. ²⁴ Dutya huecaca tunajatu epu tsecue enubitaquiju narucuaire cuinanayaju iye ishu. Jadya ama buchatu ejera cuana cuejacuaire Saulo tunara eje bucha acara ayaque. ²⁵ Jesús queja ecatyati cuanaratu huanashacuare. Peadya meta tunajatu ishacuare jiti ebariju. Butyacuare tunajatu meta epu tachiqui tumu eaque dyaque eque. Jadya huanaetu Saulo jucuaire Damasco juque.

Saulo Jerusalénju dirucuaireque

²⁶ Damasco juque cuinanatsutu Saulo Jerusalénju judirucuaire. Judirutsu tujatu Jesús queja ecatyati cuanaque jipecara datse acuare. Dutyara tunajatu mubacuare, tuque Jesús queja ecatyatique ejenecuare ama tibu. ²⁷ Bernabéra peadyatu ejenecuare tuque Jesús queja ecatyatique. Dujucuaire tujatu Jesúsja ecuadisha cuana queja.

—Yuneridya tu Saulo Jesús queja ecatyatique. Ecuana Cuatsashaquiratu cabamereti ishu achine tuque Damascoju cuayaju. Jesusratu isarachine. Damascoju jari tuputu Saulora baji tsehue ama Jesúsja quisarati cuejachine, —jadya tuna Bernabéra acuare.

²⁸ Jadya bacatsutu Ecuadisha cuanara batsacuare pureama tsehue. Tuna tsehuedyatu baji tsehue ama Ecuana Cuatsashaquija quisarati cueja jucuaire. ²⁹ Caquemitsati caquemitsatitu jucuaire israelita cuana griego yana eque quisaratiya cuana tsehue. Ejenecarama tunajatu acuare tura cuejayaque. Dyaque jutidya tuna cahuaitsutu iyecara acuare. ³⁰ Jesús queja ecatyati cuanaque tuna bahue jucuaire tunara iyecara ayaque. Jadya bahue juatsu tunajatu Saulo dujucuaire Cesareaju. Tuhuaquedya tunajatu ena eque cuadishacuare Tarso epuju, tuque catemuticuare epuju. ³¹ Jida tunajatu bacuaire Jesús queja ecatyati cuanaque Judea, Galilea, Samaria yahua cuanaju aniya cuanara. Jesús queja ecatyati cuanaque tuna tuaqueja nimeedya jutidya juajecuaire. Cuatsashaya eque ecana jucuaire. Dyaque tuna muibaajecuaire. Yusuja Espirituja inime eque tuna aniajecuaredya jutidya. Tura bacue ecana tsahuajacacuare ama. Dyaque umadadya jutidya tuna Jesús queja catyatiajecuaire.

Eneas chacha nityatsuracuareque

³² Pedroratu Jesús queja ecatyati cuanaque cuajiajecuaire. Baticuaretu Lidaju aniya cuanaque. ³³ Tuhuatu anicuare ecuita Eneas bacani. Quimisacarucu mara patu ebucucujacaque jaracuare. Pedrora patu batitsu acuare:

³⁴ —Iyacua cuitadyami Jesucristora nityatsuraya, Eneas. Netitsuracue. Huesacue micue etahuiqui; ajecue, —jadyatu Pedrora acuare.

Jadya aya tsehuedyatu Eneas netitsuracuare. Bucucutaqui, ajetaqui jadyatu jucuare. ³⁵ Dutya jujeri tuna Lida juque, Sarón juque jadya aniya cuanaque jecuare Eneas aniyaju tuque bara. Banacuare tuna enetitsura juneniyaju jadya. Tuque jadya baatsu tunajatu ijehuecuare beruque tunaja quejeneti cuana. Cacuareticuare ecana inime. Catyaticuare ecana Ecuana Cuatsashaqui Jesús queja.

Yusuja casa tsehue Pedrora Dorcas emajuque nityatsuranucacuareque

³⁶ Tume patyatu epu Jope bacaniju anicuare epuna Tabita bacani. Griego cuanaja yanaju tu tumeque ebacani “Dorcas” jadique. Tuquetu Jesús queja ecatyatique jucuare. Tshua bahue tujatu nrecada cuanaque jucuare tunaja ai aijama juya cuana tsehue. Ajacuare ama tujatu jidaque peya cuanaja ishü. ³⁷ Pedro Lidaju jarijutu Dorcas ujejeda juti-bunecuare. Ujejeda juatsutu majucuare. Emajuque tunajatu utsatsu bajecuare papati ishü. Utsa amena jadya aatsu tunajatu emajuque ebarucue beta ishü pisuju tuna dujucuare. ³⁸ Jesús queja ecatyati cuanaque tuna bahue jucuare Pedro Lida juque, Jope japadama. Bahue juatsu tunajatu cuadishacuare beta ecuita Lidaju Pedro cuejara. Pedro queja junatitsu tatse cuejanaticuare:

—Pedro, mique jiteque yatse jehua. Dorcastu majuhua. Necuara Jopeju. Netsunutara ama, —jadya tatsejatu Pedro aticuare.

³⁹ Jadya yana bacatsutu dutya cabajejetitsu Pedro ebararara cuacuare tatse tsehue. Junaticuaretu Dorcas majuhuaque etareju. Tuhua junatihuaaju tunajatu dujucuare tumeque epuna emajuque jarayaju. Jetiamatu tuhua jucuare eahuemaju cuanaque majuhuaaja eadeba cuanaque, majuhuaque enapa juyaque. Bamerecuare tuna Pedro una cuana, camisa cuana jadya tunaja ishü Dorcasra achine cuanaque. ⁴⁰ Tudyu tuna Pedrora dutya cuinanashatillacuare. Tuna cuinanashatillatsutu Pedro amena nuyucuare. Nuyutsutu Yusu tsehue quisaraticuare. Petacuaretu epuna emajuque.

—Tabita, netitsuracue, —jadya tujatu acuare epuna emajuque.

Jadya ayaju tujatu busacuare yatuca. Tudyatu Pedro baatsu Tabita anitsuracuare. ⁴¹ Anitsurahuaju tujatu emetucuju inaticuare. Nityatsuracuare tura. Jadya juatsu tujatu ihuaracuare eahuemaju cuanaque, Jesús queja ecatyati cuanaque jadya:

—Nejecue. Nebanacue emaju juhuaque. Chachari junuchua, —jadya tujatu ecana acuare.

⁴² Dutya jujeri Jopeju cuanaratu bacacuare Dorcaspa emajuque netitsuranucahua jadique. Jadya bacatsu tuna jetiama Ecuana Cuatsashaqui Jesús queja catyaticuare. ⁴³ Pedrotu tsunudadya anicuaré Simónja etareju. Simóntu ebiti acui biti tsehue jinashatsu pudedá amerequique jucuare.

10

Pedro, Cornelio jadya

¹ Anicualetu Cesarea bacani epuju ecuita Cornelio bacani. Israelita amatu jucuare. Tuquetu cien sudaru cuana cuatsashaquique jucuare. Ryaque cuare sudaru cuanatu ebacanisha jucuare “Italiaju Cuanaque” jadya. ² Corneliotu ecuita jidaque jucuare. Yusu queja ecatyatitu jucuare, arepa israelita ama jucuare ama bucha. Tumebaedya tuja etareju cuanaque Yusu queja ecatyati jucuare. Turatu israelita nerecada cuanaque tsahuacuare chipiru tsehue. Yusu tsehue quisarati bahuetu jucuare dutya huecaca. ³ Peya huecaca las tres chinequejatu bacuare tahuju bucha barepa juque Yusu tsahuaquique. Tumequetu juticuare tuaqueja. Isaracuare tuja tuque:

—Bastare, Cornelio.

⁴ Jadya bacatsutu Corneliora pana peta acuare. Bajidatu jucuare. Bacaduracuare tuja tuque:

—¿Ai jitequemi jehua, tata? —jadyatu Corneliora acuare.

—Yusuratu mira tuque isarayaju bacajacaya ama. Tuquetu bahuedya mira israelita nerecada cuanaque tsahuajacayaque ama. ⁵ Cuadishacue mere puji cuana Jopeju, Simón Pedro ihuarati ishu. ⁶ Tuquetu peya Simónja etareju, ebiti acui biti tsehue jinashatsu pudedá amerequi queja. Etare tujatu cueri cuanaja ecaque peque. Turami cuejanaya mique eje bucha juishuque, —jadyatu barepa juque Yusu tsahuaquira acuare Cornelio.

⁷ Quisarati cuejaquique diruhujutu Corneliora ihuaracuare quimisha tuque tsahuaqui cuanaque. Beta tatse tuja etareju mere puji jucuare; peya bacue sudaru. Quimishadya tuna Yusu queja ecatyatique jucuare. ⁸ Cuejacuare tujatu ecana dutya eje bucha Yusu tsahuaquira cuejehua cuanaque. Cueja amena aatsu tujatu ecana cuadishacuare Jopeju.

⁹ Cuaatsu tuna apunanatitsu edijiju tahuinaticuare. Huecancanucatsu tuna cuanucacuare. Tuna Jope japadama junatihujutu barepatya Pedro tsuracuare etare camahua jepeda dyaque tuque Yusu tsehue quisarati bahueju. ¹⁰ Tuhua Yusu tsehue quisaratitsutu dyaque cuita aracara jucuare. Tunara tuja earaqui bajejeyaju cuitadya tujatu bacuare ai cuana

tahuiju bucha. ¹¹ Bacuaretu barepa pacashatanaya bucha. Bacuare tujatu ai cuana taa sahuana ebari buchaju. Pushi et-sucu cuanajutu sahuana etisune jucuaré. Yahuaju butyayaju tujatu bacuare. ¹² Tuaqueja butetu jucuaré. Sahuana ducu tujatu jetiama cuanubi cuana, uu cuana, bacua cuana, upati cuana jadya bacuare. Educujutu anicuare israelita cuanaja arata baecua cuanaque. ¹³ Tumetu Pedrora Yusu quisaratiyaju bacacuare:

—Netitsuracue, Pedro. Iyecue tume mira petaya cuanaque. Iyetsu aracue, —jadyatu Yusura acuare.

¹⁴ —¡Aijama, Ique Cuatsashaquique! Eje bucha arae tuque eau tume cuanaque asicada baatsu israelita cuanaja ara baecua cuanaque. Aranime ama tuque ecue Moisésra aramerecarama ayaque, —jadyatu Pedrora acuare.

¹⁵ Bacanucacualetu Yusu quisaratiyaju:

—Aracue. Asicada bucha baume ni ejeque earaqui buchique era mique aramereyaque, —jadyatu Yusura acuare.

¹⁶ Cueja beta ishutu Pedro Yusura

—Aracue, —jadya acuare.

Tuque bacue jucuaré:

—Aranime ama tuque ecue —jadya.

Quimisha ishujutu tumbaedyá jucuaré. Quimisha ishujutu sahuana buchique tsuranucacuare barepaju. ¹⁷ Pedroratu adebataqui ama bacuare eje buchique tura jadya bahuaque.

—¿Ai Yusura bahue amerecara aya riya tahuiju bucha eque?

Tupupe tupupe tujatu inime acuare. Tuque tumeque inime tupu tsehuejutu Corneliora cuadishaya cuanaque junaticuare epuju.

—¿Eje queja ri Simónja etare? —jadya tunajatu Jopeju aniya cuanaque bacaduraajecuare.

Junaticuare ecana etareju. ¹⁸ Tuhua junatitsu tuna bacaduracuare:

—¿Rehuadya ri ecuita Simón Pedro bacani?

¹⁹ Pedrotu ebarucue ecamahua jepeda dyaque jucuaré jari bahuaque inime tupu tsehue. Tumetu Yusuja Espiritura isaracuare:

—Quimisha ecuitatu junahua mique sare juyaque.

²⁰ Netitsuracue. Butecue. Cuacue tuna tsehue, arepa ecana israelita ama paju ama bucha. Cuacara cuacarama jadya juume tuna tsehue. Era cuitadya tuna cuatsashahua mique jiteque, —jadyatu Yusuja Espiritura acuare.

²¹ Tumetu Pedro butecuare, Corneliora cuadishahua cuanaque isarara.

—Idya ique micuanara sarenayaque. ¿Eje bucha juatsu micuana jehua? —jadya tujatu ecana acuare.

²² —Corneliora ecuana cuadishachine. Tuquetu ecuita inime metseque. Cien sudaru cuatsashaquique tume. Dyaque jidaque tume. Dyaque Yusu queja nimeeque tume. Dutya israelita cuanaratu jida juyaju baya. Barepa juque Yusu tsahuaquiquetu junachine tuaqueja. Tudyá tujatu achine: “Cornelio, cuadishacue mere puji cuana Jopéju, Simón Pedro ihuarati ishú. Paje micue etareju. Turami cuejanaya mique eje bucha juishuque”, jadya patu Yusu tsahuaquira Cornelio achine, —jadya tunajatu anaticuare Pedro.

²³ —Cuayadya ique metajudya micuana tsehue, —jadya tujatu ecana acuare.

Jadya aatsu tuna Pedrora ihuaracuare etareju nudya ishú. Tuhadya tuna tahuicuare tumeque meta.

Peya huecacatu Pedro cuacuare tuna tsehue. Umae cuana Jesús queja ecatyati cuanaque Jopeju anicuare cuanaratu tajiticuare Pedro. Edijiju tuna tahuidirucuaré. ²⁴ Peya huecaca tuna judirucuaré Cesareaju. Corneliora ihuayaju cuita tuna tuja etareju junaticuare. Tuna judiruma jarijutu Corneliora cuejamerebarecuare tuja etareju cuaishu tuja ata cuana, eadeba cuanaque jadya. Tuna tsehuedya tujatu ihuacuare Pedro junatiyaque. ²⁵ Pedro etareju junatihuajutu Corneliora cuinanatsu tsurutsacuare. Nuyunaticuaretu Pedroja yacuaju. ²⁶ Yume nityatsuratitu Pedrora acuare.

—Netitsuracue. Ique mique baeque ecuitadya. Yusu ama ique, —jadyatu Pedrora acuare Cornelio.

²⁷ Tuatsehue quisaratiyaque nubinatyaratu Pedrora banaticuare umada tuhua caradatihua cuanaque. ²⁸ Isaracuare tujatu ecana:

—Ique, ecue ecare cuana jadya ecuana israelita cuana; micuana bacue israelita ama. Ecuanaja cacuatsashati eque ecuana nubitaqui ama israelita ama cuanaja etareju. Casitatitaqui ama ecuana. Bahuedya micuana riyaque. Jadya ama bucha ique Yusura butseeju bahue amerechine, ecue ni ejeque buchique asicada bucha baishu ama, “Miquemi Yusura en ama aya tuaqueja jeyaju” jadya cueja ishú ama. Israelita ama cuana tsehue casitaticarama jadya jutaqui ama ique. ²⁹ Cornelioja mere puji cuanara ihuaratiyaju jechine ique. Tsunutachine ama ique, micuana israelita ama cuana queja juna ishú. Jecara jecarama jadya tsehue ama jechine, —jadya tujatu ecana acuare.

—¿Eje bucha juatsu mira ihuaramerechine, Cornelio? —jadya tujatu acuare.

³⁰ Cornelioratu quemitsacuare:

—Ique juchineque mique cuejaya amena pushi huecaca dyane riyaque ura nucadya. Rehua ecue etareju Yusu tsehue quisaratichine, ique jubahue buchadya, las tres chinequeja. Tumbaedy arama quibetichine Yusu muiyaque. Jadya juyajutu barepa juque Yusu tsahuaquique cabameretichine, Yusura cuadishayaque, una tiquidaque. ³¹ Eatsehuetu quisaratichine. “Cornelio, Yusratu mira tuque isarayaju bacajacaya ama. Tuquetu bahuedya mira israelita nerecada cuanaque tsahujacayaque ama. ³² Cuadishacue mere puji cuana Jopeju, Simón Pedro ihuarati ishu. Tuquetu peya Simónja etareju, ebiti acui biti tsehue jinashatsu pureda amerequi queja. Etare tujatu cueri cuanaja ecuaque peque”, jadya barepa juque quisarati bequiria cuejachine. ³³ Masadama tuque ecue mere puji cuana cuadishachine mique ihuarara. Yusrupai mique aya, mique junahua tibu. Yusura ecuana petaya tuja quisarati baca ishu casitatihuaju. Cuejacue ecuana dutya mique Yusura ecuana cuejamereyaque, —jadyatu Corneliora Pedro acuare.

Pedrorra ecuita cuana Cornelioja etareju Jesúsja quisarati cuejacuareque

³⁴ Tumetu Pedrorra isaracuare israelita ama cuanaque:

—Iyacia ique bahue Yusura ecuana dutya tupu bayaque israelita cuana, israelita ama cuanaque jadya. Ni ejeque buchique tura ecuana bape ama baya. ³⁵ Yusu tu jida ecuana tsehue, dutya ecuana tuja inime eque juya cuana tsehue. Turatu dutya jida tsehue baya tuque muiqui cuanaque, ejeque yahua juquedy jutidya. ³⁶ Yusratu israelita cuana quisarati jidaque Jesús eje buchique bacamerehua. Jesucristo queja catyatitsu cuita camadya ecuana Yusu tsehue ecajipeti ejuu. Jesús tu Dutya Cuatsashaquique. ³⁷ Micuana micuana bahuedya icuene cuita Juanra Yusuja quisarati dutya queja cuejacuareque. Israelita cuana anicuare cuanaju Galilea equetu catibutecuare. Turatu quisarati ajacacuare ama: “Necacuareticue inime. Necutsamereticue. Masadamatu junaya Yusuja Emepeque”. ³⁸ Yusratu tuja Espíritu cuitadya Jesús Nazaretju queja cuadishacuare. Tuja casa cuitadya tujatu tyacuare. Jesústu dutya queja junenicuare ai jidaque ayaque. Quijahuatishajacacuaretu ijahua cuanara quijahuatishaya cuanaque. Micuanaratu adebayadya riyaque. Jadyatu Jesús jucuaire, Yusu tuatsehue tibu. ³⁹ Ecuana cuitadyatu dutya bacuare Jesúsra Jerusalénju acuare cuanaque, Judea yahuaaju dutya queja acuareque. Jadya juatsu tunajatu iyemerecuare curusuju tatameretsu. ⁴⁰ Majuhuaque quimisha huecaca juatsutu Yusura chacha nityatsuranuacuare. Chacha junucatsutu Jesús cuitadya ecuana queja

cabameretinuacuaire ecuana tura mepecuare cuana queja. ⁴¹ Dutya queja ama, ecuana queja camadyatu cabamereticuaire. Yusura ecuana mepecuare, peya cuana Jesús eje buchique cueja ishu. Araara, iji ishuque iji jadya ecuana jucuare Jesús tsehue, tuque emajuque chacha netitsuranucahuaju. ⁴² Cuadishacuare tura ecuana ecuita cuana tuja quisarati cueja ishu. Acuare tura ecuana: “Tere juetihuaju tuque cuejabuque dutya eje bucha judadiyaque, emaju cuanaque, majuma cuanaque jadya. Yusura ique amerehua eque tuque abuque. Riyaque ecana necuejaticue”, jadya ecuana Jesúsra acuare. ⁴³ Béru yuequedyatu Yusu equeque quisarati cuejaqui cuanara icueneta cueja acuare Jesús eje buchique. Yusuja Emepequepa junabuque. Tumerapa tu dutya tuaqueja catyatihua cuanaja jucha cuana apupashabuque, — jadya tuna Pedrora cuejacuare.

Yusuja Espiritu israelita ama cuana queja junacuareque

⁴⁴ Pedrora riyaque quisarati cuejaya jarijutu Yusuja Espiritu junacuare tuja quisarati baca juya cuana queja. Israelita ama cuana quejatu junacuare. ⁴⁵ Yusuja Espiritu israelita ama cuana queja junaya baatsutu Pedro tsehue Jope juque junahua cuanaque anajacatacuare. Tuna tuna israelita cuana jucuare. Israelita cuana queja cuita camadya Yusuja Espiritu junaya bucha tunajatu inime jucuare. ⁴⁶ Israelita ama cuanaque tuna bape yana eque quisaratitibunecuare tunara cuita adebayaque amadya.

—Yusu, dyaque jida taa mique, —jadya tuna jucuare.

Jadya bahueetu israelita cuana jucuare Yusuja Espiritu israelita ama cuana queja junahuaque.

⁴⁷ —Yusuja Espiritu tu junahua tuna queja. Ecuana queja junahua bucha junaedyatu israelita ama cuana queja juhua. Aijama taa tu eje bucha eque riya cuanaque utsama aishu ama, —jadyatu Pedro jucuare.

⁴⁸ Acuare tujatu israelita ama cuanaque:

—Necutsamereticue micuana amena Jesucristo jaque jadya adebata ishu.

Jadya juatsu tunajatu acuare:

—Rehuadya ecuana tsehue eje uma huecaca cuana anicue jari, —jadya tunajatu Pedro acuare.

Tunara amereya equedyatu jucuare.

11

Pedrora Jesús queja ecatyati cuanaque eje bucha juyaque cuejacuareque

¹ Judeaju cuanaratu bacatsacuare quisarati Cesarea ju cuare cuanaque. Jesúsja ecuadisha cuanaque, tumbaedy

umae Jesús queja ecatyati cuanara bacacuare israelita ama cuanara Jesús eje buchique quisarati ejenechineque. ² Pedro Jerusalénju judirunucahuajutu umae Jesús queja ecatyati cuanara nereda atsacuare, Cesareaju cuanaque ecuita huitu biti catubutishahua ama tibu:

³ —¿Eje bucha juatsumi jidama juchine tuhua Cesareaju? ¿Eje bucha juatsumi catubutima cuanaja etareju nubichine? ¿Eje bucha juatsumi casitatitsu ararachine tuna tsehue? — jadya tunajatu Pedro acuare.

⁴ Tume tuna Pedrora pana cueja acuare eje bucha juchineque:

⁵—Ique Jopeju Yusu tsehue quisaratiyara tuque batsachine ai cuana tahuiju bucha. Bachine tuque ai cuana taa sahuana ebari buchaju. Pushi etsucu cuanajutu sahuana etisune juchine. Butechinetu barepa juque. Junachinetu eaqueja.

⁶ Pana peta tuque achine. Petatsu tuque bachine cuanubi cuana, uu cuana, bacua cuana, upati cuana jadya tuque bachine. Dutyatu juchine ecuanaja arata baecua cuanaque.

⁷ Tume tuque bacachine Yusu quisaratiyaju: “Netitsuracue, Pedro. Iyecue tume mira petaya cuanaque. Iyetsu aracue”, jadya Yusura achine. ⁸ “¡Aijama, Ique Cuashashaquique! Eje bucha arae tuque eau tume cuanaque asicada baatsu israelita cuanaja ara baecua cuanaque. Aranime ama tuque ecue Moisésra aramerecarama ayaque”, jadya tuque achine.

⁹ Tume Yusu quisaratinucachine barepa juque: “Aracue. Asicada bucha baume ni ejeque earaqui buchique era mique aramereyaque”, jadya tura achine. ¹⁰ Cueja quimisha ishuhua Yusura achine: “Aracue” jadya. “Aranime ama tuque ecue”, jadya achine. Quimisha ishujutu sahuana buchique tsuranucachine barepaju.

¹¹ Tuequedyatu quimisha ecuita junachine ecuanan aniyaju. Israelita ama cuanaque tuna juchine. Cornelio Cesareaju aniyara tuna cuadishachine ique sarera, ique tuja etareju cuaishu. ¹² Yusuja Espiritura cuejachine: “Cuacue tuna tsehue, arepa ecana israelita ama paju ama bucha. Cuacara cuacarama jadya juume tuna tsehue”, jadya tura achine. Riya Jesús queja shucuta ecatyati rehua eatsehue cuanara tajichine. Dutya ecuanan cuachine Cesareaju. Nubichine ecuanan Cornelioja etareju, israelita amaja etareju.

¹³ Nubihuaju tura ecuanan cuejachine: “Barepa juque Yusu tsahuaquiquetu eaqueja junachine. Bachine tuque rehua ecue etareju netiyaju. ‘Cuadishacue mere puji cuana Jopeju, Simón Pedro ihuarati ishuhua. ¹⁴ Turami cuejanaya Yusu queja judiru ishuhue quisarati, mique, micue etareju cuanaque jadya Yusu queja judiru ishuhua’”. Riyaque ecuanan Corneliora cuejachine ecuanan tuaqueja junatihuaaju. ¹⁵ Tura ique

jadya cuejahuajutu era isaratibunechine tume israelita ama cuanaque Jesús eje buchique. Era tuna quisarati jidaque cuejayajutu Yusuja Espíritu junahua tuna queja. Ecuana israelita cuana queja junachine bucha, jadya junaedyatu tume israelita ama cuana queja juchine. ¹⁶ Tume tuque adebachine Ecuana Cuatsashaqui Jesúsra jadya acuareque: “Icuene tuna Juanra ena tsehue utsacuare inime cacuaretihua jadique ejitaju juishu. Tuequedya tuque micuanaja Yusura tuja Espíritu cuitadya cuadishaya micuana ecue cuanaque ejitaju juishu”, jadya ecuana Jesúsra acuare icuene. ¹⁷ Ecuana Ecuana Cuatsashaqui Jesucristo queja catyatihuajutu Yusura tuja Espíritu cuitadya ecuana queja cuadishahua. Tume israelita ama cuana queja tujatu iyabutyahuadya tuja Espíritu ecuana queja iyabutyacuare baedya. Jida amatu Yusura cuitadya eje bucha achineque ecue bijidamadura yuamatura jadya aishu, —jadya tuna Pedrora acuare.

¹⁸ Tumetu Jesús queja ecatyati cuanaque Jerusalénju ancuare cuanara bacacuare tuque juchineque. Jadya cuejahuaju tunajatu terecuare cahuaiti. Abacatanacuare ecana. Pureama tuna acuare Yusu:

—¡Dyaque jida taa Yusu! Ecuana camadya ama ecuana Yusuja jutaqui, tumbaedya israelita ama cuanaque. Tuna ecuana juhua bucha inime cacuaretihuaju tuna anisiribuque tuatsehue, —jadya tuna jucuare.

Jetiama ecana Antioquiaju cuanaque Jesús queja catyaticuareque

¹⁹ Esteban tuna iyehuaajutu Jesús queja ecatyati cuanaque huanabarecuare eje uma epu cuanaju, Jesúsja ama cuanara ecana dyaque cuita nerecaturaya tibu. Umae cuana tuna huanacuare japada. Umaetu huanadiru jucuare Fenicia yahuaju, Chipreju, epu ebari Antioquía tupu. Tuhua tunajatu Jesucristoja quisarati cuejajacacuare ama. Israelita cuana camadya tunajatu Jesúsja quisarati cuejacuare, israelita ama cuanaque bacue aijama. ²⁰ Umae Jesús queja ecatyati cuanaque Chipre juque, Cirene juque jadya tuna Antioquiaju cuacuare. Tuhua junatitsu tunajatu cuejacuare israelita ama cuana Jesúsja quisarati. ²¹ Yusratu dyaque tsahuacuare Jesúsja quisarati cuejaqui cuanaque. Quisarati bacatsu tunajatu jetiamara ejenejacacuare tunaja ebaba cuanaquera ejeneacuare cuanaque. Tume tuna Ecuana Cuatsashaqui Jesucristo queja catyaticuare.

²² Tumetu Jesús queja ecatyati cuanaque Jerusalénju cuanara quisarati bacatsanucacuare jetiamapa Antioquiaju cuanaque Jesús queja catyatichine jadya. Tumeque bahue juatsu

tunajatu Bernabé tuhua cuadishacuare. ²³ Bernabétu Antioquiaju junaticuare. Yusura tuhua cuanaque dyaque jida tsehue baya baatsu dyaque pureama jucuare.

—Ecuana Cuatsashaqui queja nimee nejuajecuedya jutidya. Neejenejacaume tuja quisarati, —jadya tujatu ecana acuare.

²⁴ Bernabéra tuna tsahuacuare jetiama peya cuana Ecuana Cuatsashaqui queja catyati ishu. Bernabétu ecuita jidaque jucuare. Yusuja Espiritura cuatsashaya equetu jucuare. Ducuta Jesús queja catyaticuare.

²⁵ Bernabétu tuhuaque cuinanatsu cuacuare Tarsoju Saulo sarera. ²⁶ Tuque daditsu tatse yudijidya judirunuca jucuare Antioquiaju. Tuhua tatse anidirucuare peadya mara Jesús queja ecatyati cuana tsehue. Jetiama tatsejatu ecana Jesúsja quisarati bahuityacuare. Antioquiajutu ecuita cuanara Jesús queja ecatyati cuanaque “Cristoja cuanaque” jadya bacanishametse acuare.

²⁷ Bernabé, Saulo ecatsé Antioquiaju jarijutu Yusu equeque umae quisarati cuejaqui cuanaque tuhua jucuare. Jerusalén juque tuna junacuare. Jesús queja ecatyati cuana tsehue tuna casitaticuare. ²⁸ Peadya tuna tsehuequetu Agabo bacani jucuare. Yusuja Espiritura patu icuenetadya bamerecuare eje bucha judadibuqueque. Tume tuna netitsuratsu Agabora isaracuare:

—Mijetu jubuque dutya Judea yahuaju, —jadyatu jucuare.

(Claudio ecuari juyaque marajutu Agabora cuejacuare bae cuitadya judadicuare.)

²⁹ Agabora cuejahaque bacatsutu Antioquia juque Jesús queja ecatyati cuanara tsahuacacara acuare Jesús queja ecatyati cuanaque Judea yahuaju anicuare cuanaque.

—Necudadishara chipiru ecuana tsehuequi cuanaja ishu, tuna earaqui aniya jari tupu caquemiti ishu. Ecuana eja bucha tsahuataqui baya eque ecana netsahuara, —jadya tuna jucuare.

³⁰ Tume tunajatu sitacuare chipiru tunara eje uma tyataqui baya tupu. Dutya amena chipiru sitatsu tunajatu cuadishacuare Judea juque Jesús queja ecatyati cuanaja huaraji cuana queja. Bernabé, Saulo jadya tsehue tunajatu cuadishacuare.

12

Santiago iyetanacuareque, Pedro etare apudaju ishatanacuareque jadya

¹ Ecuari Herodestu catibuticuare Jesús queja ecatyati cuanaque nerecatura. ² Cuadishacuare tujatu sudaru cuana:

—Neiyeticue Santiago, Juan tsehuequique. Cuchiru tsehue neiyeticue.

Jadya ayaju tunajatu cuchiru tsehue piti tubuticuare. ³ Israelita cuana Jesús queja catyatima cuanaque tuna dyaque pureama jucuare Santiago iyetanahuaju. Tumetu Herodesra dujumerecuare risitsu Pedro. Ryaquetu jadya jucuare, Pascua bacani chine ishu cuita, israelita cuanaja pan levaduramaque ara bahueque huecacaju. ⁴ Tunara Pedro inahuajutu Herodesra ishamerecuare etare apudaju. Cuadishacuare tujatu peadya tunca shucuta earacana sudaru tuque naru ishu, pushira naru pushiradya cuare narunuca; jadya narue tunajatu acuare.

—Pascua chine cuetihuaju tuque ecuita cuanaja yacuaju nitya ishu ihuaramereya. Dutyaja yatucaju tuque iyemereya, —jadyatu Herodesra inime tupucuare.

⁵ Pana narutu sudaru cuanara acuare Pedro, tuque ehuanaju. Tuque tuhuajutu Jesús queja ecatyati cuanaque Yusu queja inime patya bacabaca jucuare tuja ishu. Bacabacajacuare ama ecana tuja ishu.

Yusura Pedro etare apuda juque cuinanashacuareque

⁶ Tumeque chineju, Herodesra tuque iye ishuque huecaca iyahuaque juetima jarijutu Pedro tahuicuare tuhua beta sudaru patya. Jidatu erisi jucuare beta cadena metal tsehue. Peya enaruqui cuanaquetu etsecueju neticuare etare apudaja eteriqui naru. ⁷ Muya jutidya cuitatu juticuare barepa juque Yusu tsahuaquique. Juticuaretu Pedro eishaju. Huecaratu huecatillacuare etare apuda ducu. Barepajuratu Pedro epereju pajacuare emetucu tsehue, tuque cabatisha ishu. Cabatishatsu tujatu acuare:

—Netitsuracue ebajarara, Pedro.

Cadena ecatsetu Pedroja ebi risiquique pacacacuare.

⁸ —Cajututihuishacue. Canaiticue. Jutucue micue chinela, —jadyatu barepajura acuare Pedro.

Tumetu tura cuejaya equedya jucuare. Tuque cajututi amena juhuaju tujatu acuare:

—Jutucue micue caramati ishuque. Cajututitsu ique tupuju jeticue, —jadyatu barepaju Yusu tsahuaquira acuare.

⁹ Tume tatse betadya Pedro eisha juque cuinanacuare. Pedrotu barepa juque tupuju cuinanayaque cuinanaya ama bucha cabaticuare. Tahuiju ama bucha tahuiju bucha jadya jutidyatu cabaticuare. ¹⁰ Barecuare tatse icueneque enaruquique. Tupuju tatse beta ishuque barenuacuare. Judirucuare ecatsa amena ishuque etsecueju. Tumeque etsecuetu fierro eaque jucuare. Dyaque arida, bicueda jadyatu jucuare. Amena ishuque etsecue epuju cuinana ishuquetu

jucuaré. Tatse tumeque etsecueju cajipetiyajutu Yusura tuja inime taca pacashatana amerecuare. Cuinanacuare ecatsé. Edijiju ajequerebacatsutu Yusu tsahuaquira jacacuare.

¹¹ Tumetu Pedro nime jueticuare. Adebacuaretu tahuiju ama jadya juyaque.

—Yuneridya tucue inajacameretahua. Yusuratu cuadishahua barepa juque tuque tsahuaquique ique etare apuda juque cuinanasha ishu, Herodesja ique eje bucha aishu ama. Arepa israelita cuanara iyecara aya ama bucha, Yusura taa inajacamerehua, —jadyatu Pedro jucuaré.

¹² Einajacaque pana caadebati juatsutu Pedro Mariaja etareju cuacuare. Tumeque Mariatu Juan Marcosja ecuaque jucuaré. Jetiamatu Jesús queja ecatyati cuanaque tuhua casitaticuare Pedroja ishu Yusu queja bacabaca ishu. Etare apuda juque cuinanashamere ishu tuna bacabacacuare. ¹³ Pedrotu etare tsecue judirucuare. Judirutsu tujatu dududirucuare eteriqui. Ihuaracuaretu etsecue capacashamereti ishu. Epuna ehue ebari Rode bacanitu etsecueju junacuare, aira eteriqui duduyaque cuajira. ¹⁴ Tura isarayaju cabacatitsu tujatu adebacuare Pedroja etsuri. Tuja etsuri bacatsutu dyaque pureama juatsu yume cuanucadya jucuaré peya cuana cuejara, Pedro nudya ishu etsecue pacashamaquedya.

—¡Pedrodya tu etsecueju! —jadya tuna Rodera aticuare.

¹⁵ —¡Aijama! ¡Eje bucha juetu tuque ejuu! Peta jida ama tuquemi ahua. ¡Eje bucha Pedro ni tu juma! —jadya tunajatu abarecuare.

—¡Pana petadya tuque ahua! ¡Pedrodya tume! —jadya tuna Rodera acuare.

—¡Tuque ama tume! Barepa juque Yusu tsahuaquique tu ejuu, Pedro naruquique, —jadya tuna jucuaré.

¹⁶ Pedroratu dudunityacuaredya jutidya eteriqui, capacashamereti ishu. Chamacama tunajatu eteriqui pacashaticuare. Bacuare tuna. Tuque baatsu tuna inime tsapema jucuaré. Inime tuputsu tuna tuna camadya jutidya cabacaduratibareya jadya jucuaré. ¹⁷ Emetucu ahua tsehuedya jutidya tujatu ecana cuejacuare tuna abacatana ishu. Cuejacuaretu ecana eje bucha cuinanashae Yusura ahuaque etare apuda juque.

—Necuejacue Jesús queja ecatyati cuanaque rehua casitathua ama cuanaque ique eje bucha juhuaque, Santiago neri neri Ecuana Cuatsashaqui tsehuequique, —jadya tujatu ecana acuare.

Jadya tuna aatsutu cuinanatsu dirucuare peya queja.

18 Huecacahuajutu sudaru cuanara Pedro etare apudaju datse sareticuare. Dadicuare ama tunara. Eje bucha adebataqui ama tunajatu bacuare Pedro eje bucha juhuaque.

—¿Eje bucha cuinanae jatsuri juhua rehuaque? —jadya tuna jubarecuare.

—¿Eju jatsuri cuahua?

19 Herodesratu saremereticuare. Dadicuare ama tuna. Ihuaracuaretu sudaru cuana.

—¿Eje bucha cuinanaetu Pedro juhua etare apuda juque? —jadya tujatu ecana bacaduracuare.

Eje bucha quemitsataqui ama tunajatu bacuare.

Tume tujatu ecana iyemerecuare, tunara erisique huanashahua tibu.

Jadya juatsutu Herodes cuinanacuare Judea juque. Dirutsutu anidirucuare Cesarea.

Herodes majucuarque

20 Herodestu ecahuaiti jucuar ecuita Tiro, Sidón jadyaju anicuare cuana tsehue. Tuna tsehue ecahuaiti juya tibu tujatu tunaja ara ishucuanaque cuadishajacacuare. Tumetu tumeque epu ecatejeju cuanara cuadishacuare Herodes tsehue inime bajejeti ishucuanaque. Ecuadisha cuanajatu dyaque eadeba jucuar ecuari merequique, Blasto bacani. Tumetu icuene cuita Blasto tsehue quisaratira cuadishatahua cuanaque cuacuare.

—Blasto, mique jiteque ecuana jehua. Ecuana ecuari isaraquereticue, tuque ecuana tsehue cahuitijaca ishucuanaque, earaqui ecuana tyatananuca ishucuanaque, —jadya tunajatu acuar.

21 Herodesratu iyacuare huecaca tuna tsehue quisarati ishucuanaque. Tumeque huecaca juetihuaajutu cajututicuare ejutuqui huecaca cuana dyaque inime metseju jutu bahue tsehue. Tumeque jututsutu anibutecuare huaraji muida cuanaja eaniquiju tuna isara. 22 Tuja quisarati bacatsu tuna quiquecuare:

—¡Miquemi ecuita ama! ¡Yusu mique! —jadyatu ecuita cuanara acuar quique eque.

23 Bacatsu tuna Herodesra nereda acuar ama ni abacashacuare. “Yusu camadya nemuicue, ique ama”, jadya cuana tujatu ecana acuar ama cuitadya. Jadya tibutu Yusura barepaju tuque tsahuaquique yume cuadisha cuitadya acuar tuque ujejeda amere ishucuanaque. Etsena queja tujatu educuju esere cuana aramerecuare. Masadama cuitatu majucuar.

24 Dyaque umada ecuitaratu bacacuare Jesúsja quisarati. Dutya queja Jesús queja ecatyati cuanaratu peya cuana cuejacuar tuja quisarati.

²⁵ Bernabé, Saulo jadyaratu Jesús queja ecatyati cuanaja huaraji cuana tyaticuare chipiru nrecada cuanaja ishu Jerusalénju. Tuque tyatitsu tatse dirunucacuare tuhuaque. Judirunucacuare tatse Antioquiaju. Juan Marcostu tatse tsehuedya cuacuare.

13

Bernabé, Saulo jadya tatse peya queja Jesúsja quisarati cuejati ishu mepetanacuareque

¹ Antioquiajutu Jesús queja ecatyati cuana ducu anicuare Jesúsja quisarati cueja, bahuitya jadya juya cuanaque. Jucuaré tuna Bernabé, Simón, Lucio, Manaén, Saulo jadya. Simonjatu peya ebacani anicuare; “Sehuedaque” bacanitu jucuaré. Luciotu Cirene juque jucuaré. Manaén patu Herodes Galilea naruqui jucuaré tsehue catemutipee jucuaré. ² Peya huecacatu Jesús queja ecatyati cuanaque eca-sitati jucuaré tuque mui ishu. Arama tuna equibeti jucuaré tuque muiyaque. Tuna tuhuaaju tuna Yusuja Espiritura is-aracuare:

—Eratu mepehua Bernabé, Saulo jadya. Iyacua ecatsé necuadishacue Yusuja mere aishu, —jadya tuna Yusuja Es-piritura acuaré.

³ Yusu tsehue quisarati ishu arama quibetitsu emajaca anitsutu Jesús queja ecatyati cuanara emetucu tatseja iyuca matina iyacuare tatse Yusura mepehuaque jadique bamere ishu. Emetucu iya amena aatsu tunajatu Yusuja mere aishu cuadishacuare.

Ecuadisha ecatsera Chipreju Jesúsja quisarati cuejacuareque

⁴⁻⁵ Yusuja Espiritura cuadishayajutu Bernabé, Saulo jadya cuacuare Chipre cububuju. Juan Marcos tatsejatu et-sahuaqui dujucuaré. Tumeque ecububuju junati ishu, tuna icuene cuita junaticuare Seleuciaju. Tuhuaquedya tuna cuaba ebariju anibutenuacuare Chipreju cuaishu. Junaticuare ecana Chipreju Salamina ebuteju. Junatitsu tuna Jesúsja quisarati cueja jutibunecuaré. Nubicuaré ecana israelita cuanaja caradati ishuque etare cuanaju Jesús eje buchique cueja ishu.

⁶ Batillacuare tuna dutya epu aniya cuanaque ecububuju. Judirucuaré ecana epu Pafos bacaniju. Tuhua tunajatu tsurucuaré israelita Barjesús bacani. Tuquetu maruhuisa jucuaré. Ijahue tujatu ecuita cuana acuaré. Pusha pusha tshuetu “Eratu quisarati cuejaya Yusu equeque cuitadya”, jadya jucuaré. ⁷ Tuquetu Sergio Pauloja etajiqui jucuaré. Sergio Paulotu dutya tumeque ecububuju anicuare cuana

naruquique jucuaré. Riyaquetu dyaque inime jararaquida cuita jucuaré. Ihuaramerécualetu Bernabé, Saulo jadya Jesúsja quisarati bacacara aatsu. ⁸ Barjesusjatu peya ebacani “Elimas” jucuaré griego yana eque. Enaruquique tujatu Jesúsja quisarati bacamerécarama acuaré. Tuquetu dyaque ecahuaiti jucuaré Bernabé, Saulo jadya tsehue. Sarecuare tujatu eje buchique enaruquique Jesús queja catyatisha ishuma.

⁹ Saulojatu beta ebacani anicuaré. Griegojutu “Saulo” bacani jucuaré, hebreoju “Pablo” jadicue. Tuquetu Yusuja Espirituja biji eque juneniyaque jucuaré. Petatsu tujatu maruhuisa Elimas isaracuare:

¹⁰ —Miquemi pusha pusha puji. Jidama cuita mique. Miquemi Satanás jaque. Miratu ujeu bajacaya ama dutya jidaque. Ecuana Cuatsashaqui queja catyatitsu ecuana juneniya ediji tuyu eque bucha. Miratu micue pusha pusha tsehue ecuita cuana ejenemerécarama aya tuja quisarati. Tu-aquejami ecana catyatishacarama aya. Ediji tuyu eque ama ajeshaya bucha tuquemi ecana amereya. ¹¹ Iyaja cuitami Yusura nerecaturaya. Shuhui turami amereya. Eje uma huecaca cuanami capetatiya ama. Ni ai buchique tuquemi petaya ama, —jadyatu Pablora acuaré.

Muya jutidyatu maruhuisa shuhui jucuaré. Dutya tuja ishuma apuda jucuaré. Ni ai buchiquetu petacuare. Jababanicuaré tuque ejeque dadicara aatsu ebiju inatsu carepemereti ishuma. ¹² Sergio Pauloratu bacuare Elimas jadya juhuaju. Jadya baatsutu Jesús queja catyaticuaré. Ecuana Cuatsashaqui ja quisarati bacatsu tujatu adebacuare yunerique. Bacamapa tujatu jucuaré jadya cuanaque bahuityayaque.

Pablo, Bernabé jadya Antioquiaju Pisidia yahuaju cuacuareque

¹³ Tuequedyatu Pablo tuatsehue juneniya cuana tsehue cuanucacuare Pafos juque. Ena eque tuna cuacuare Panfilia yahuaju. Junaticuaré ecana Perge ebuteju. Tuhua tatse shanatsutu Juan Marcos Jerusalénju judirunucacuare. ¹⁴ Pablo, Bernabé jadya tatse cuanucacuare Perge juque. Cuanucacuare tatse ediji eque Antioquiaju judiruya tupu. Tumeque Antioquiato Siria yahuaju ama jucuaré. Pisidia yahuajutu jucuaré. Canajara huecacaju tatse cuacuare israelita cuanaja caradati ishunque etareju. Nubitsu tatse anibutecuare. ¹⁵ Tunaja bahuetu israelita cuana tuhua cuanaque Yusuja quisarati isara jucuaré etsuri jebuda tsehue. Isaracuare tunajatu Moisésra, Yusu equeque quisarati cuejaqui cuanara jadya huenecuaré cuanaque. Tuequedyata tuna quirica isara amena jucuaré. Caradati ishunque etareju ecuat-sashaqui cuanaratu Pablo, Bernabé jadya cuejamerecuare:

—Tata ecátse, aniya ni metseja ai ecuana cueja ishúque, necuejacue. Aniya ni metseja ecuana casatura ishúque, necuejacuedya ecuana iyaja cuita, —jadya tunajatu ecátse acúare.

¹⁶ Tumetu Pablo netitsuracuare. Emetucu tsehue tujatu ahuaracuare ecuita cuana abacasha ishú. Jadya juatsutu quisaratitibunecuare:

—Ecue ata cuana israelita cuana, nebacacue ique. Micuana israelita cuana ama cuana Yusu Neri muiqui cuanaque, nebacacue ique quisaratiyaju. ¹⁷ Béru yuequedyatu Yusura ecuanaja baba cuana mepecuare, Israel eque ejuracana cuanaque. Tuna tuna tumeque Yusu Neri queja nimee jucuaré. Tuna tunaja yahuaju ama Egipto bacaniju aniya jariju tujatu ecana dyaque jetiama umanashacuare. Tuquetu tuna tsehue dyaque jida jucuaré. Tuja casa tsehue tujatu ecana cuinanashacuare Egipto juque. ¹⁸ Eje uma mara tuna epu cuana tseçada aniyaju junenicuare. Pushi tunca mara tuna junenicuare. Narujacacuare ama tujatu ecana, arepa tuna eje uma au ama tura cuatsashayaque acúare ama bucha. ¹⁹ Pacarucu bape bape yana cuana equeque tuna Canaánju anicuare. Yusura tuna pana aputashatilla acúare, tuja cuanaque tuhua ani ishú, ecuanaja baba cuana tuhua ani ishú. Tume anie cuanaque tuna aputashatillacuare, ecuanaja baba cuana tunaja epu cuana metsenemere ishú. ²⁰ Israel Egiptoju dirucuare equeque, tuque ejuracana cuanaque Canaánju yudijidya anidirunuca jucuaré equequetu 450 mara dyane jucuaré. Tuhua Canaánju tuna Yusura huaraji inime cuana bajeje puji cuana eque narucuare. Samuel tu amena ishúque inime cuana bajeje ishúque jucuaré enaruquique. Tuquetu Yusu equeque quisarati cuejaquique jucuaré.

²¹ “Samuel aniya patyatu ecuita cuana jucuaré: ‘Amena ecuana Yusu queja canarumereticarama juya inime cuana bajejequi cuana eque. Ecuari cuana queja ecuana canarumereticara juya, peya yahua cuanaju bucha’ jadyatu ecuita cuana jucuaré. Tumetu Yusura Saúl mepecuare ecuari juishu. Tuquetu Cisja ebacuaque; ecuanaja ebaba Benjamín eque ejuracanaquetu jucuaré. Pushi tunca mara tujatu israelita cuana narucuare. ²² Tupujutu Yusura bjiidama bacuare Saúl ecuari juishu. Turatu mepecuare David ecuari iyacuaque juishu. ‘Pana adeba tuque David aya, Isaíja ebacuaque. Tumeque ecuita tu ecue bijidaque. Turatu aya dutya era amereyaque’ jadya patu Yusu jucuaré, David jadya ayaque. ²³ Icuenetadya patu Yusu jucuaré: ‘Cuadishabuque tuque israelita cuana queja David eque juracanayaque tuna inajacamere ishú’. ²⁴ Jesús, Yusuja quisarati bahuitya catibutima jarijutu Juanra israelita cuana acúare: ‘Necacuareticue

inime. Necutsamereticue Yusu queja nimee jadique eji-taju juishu' jadya tujatu ecana acuare. ²⁵ Jucualetu Juan tuque Yusura amerehuaque atillahuie: 'Ique ama micuanara ihuayaque. Mesías ama ique. Tsunutaya amatu peya junayaque. Tujatu dyaque casa aniya, ecue bucha ama. Tuque baatsu ique ni aishuquedya jutidya; mere puji tuja patrón tsehue beta tupu ama ejuu bucha jutidya ique' jadyapa tuna Juanra acuare, —jadyatu Pablora isaracuare Antioquiaju cuanaque.

²⁶ Isaranucacuare tujatu ecana:

—Ecue ata cuana Abraham eque ejuracana cuanaque, nebacacue ique. Micuana israelita ama cuanaque Yusu neri muiqui cuanaque, nebacacue ique quisaratiyaju. Yusura micuana bahue amerecara aya eje bucha tuaqueja judirue juishuque. ²⁷ Dutya jujeri Jerusalénju cuanaque tuna baecua jucuares Jesús Ijahua quejaque inajacamere ishucuecuadishaque. Tunaja huaraji cuana tuna baecuadya jucuares. Canajara huecacaju cama tunajatu caradati ishucue etare cuanaju Yusuja quisarati isaranicuare. Isaracuare tunajatu Yusu equeque quisarati cuejaqui cuanara hueneacuare cuanaque. Jadya ama bucha tunajatu adebacuare ama isarayaque. ²⁸ Jerusalénju cuanaratu Pilato bacacuare tuja iyemere ishucue, arepa tuna eje bucha iyemere aishucue dadicuare ama ama bucha, arepa tuja ni equeque jucha aijama jucuares ama bucha. ²⁹ Icuenetadyatu Yusu equeque quisarati cuejaqui cuanara hueneacuare Jesús jadya ayaque. Yusuja quisaratiyaju tunajatu hueneacuare tuque eje bucha judadiyaque. Dutya judadacuare tunara cuejacuare eque cuitadya. Jesús curusuju majuhuajutu Joséra emajuque butyamereacuare. Butyatsu tujatu cani ducucue ishucue. ³⁰ Yusratu yudijidya nityatsuranuca acuare tuque quimisha huecaca majuhuaju. ³¹ Netitsuranucatsutu Jesús cabamereticuare tura mepecuare cuana queja. Tuque iyetanama jariju tuna junenicuare tuatsehue jetiama epucuanajuque bahuiya, Galilea eque Jerusalén tupu. Chacha netitsuranucatsutu tuna Jesúsra cabamereti ishucue acuare. Juneninucacuareadyatu tuna tsehue eje uma huecaca. Iyacuatu tuque enityatsuratanaque baqui jucuares cuanara tuja quisarati cuejaya dutya queja. Tunaratu tuja quisarati cuejaya Israel eque ejuracana cuanaque.

³² "Yatsera micuana tumbaedyacu cuejaya Jesús eje buchique quisarati. Tudyatu Yusura ecuanaja baba cuana cuadisha ana acuarequedya. ³³ Tura aana ahua bae cuitadyatu jucuares. Ecuana ecuanacuare tuna eque ejuracana cuanaque. Ecuana ishutu Yusura acuare

tura aana ahuaque Jesús yudijidya nityatsuranuca ahuaque. Yuequedyadyatu Yusu jucuare, Jesús emajuquepa nityatsuranucaya jadya. Tura quisarati acuareque tu ehueene Yusuja quisarati beta ishuque Salmosju:

“Miquemi ecue ebacua.

Iyacia tuquemi ecuita cuana bamereya, ique micue tataque”.

³⁴ “Tumebaedyatu béru Yusura cuejacuare emajuque patu nityatsuradadiya, tuja ecuita riri ishu ama jadya. Jadyatu Yusu jucuare, jadya quisarati ayaque:

“Jida tuque ameredadiya miatsehue.

David tsehue ique jida jucuare bucha, jadidya judadiya miatsehue.

Yuneridya jadidya judadiya”.

³⁵ Peya tu Salmo quiricaju ehueene jadya:

“Ririshabuque amami micue iyuhuedaja ecuita, mique merequi juhuaja ecuita”,

jadyatu Davidra quisarati acuare béru.

³⁶ “Adebayadya ecuana David tuta taca ama jadya caticuareque. Davidtu majucuare. Tuque majuma jarijutu Yusuja biji eque anicuare. Jida tujatu israelita cuana narucuare. Majuhuaaju tunajatu emaju caniju ishacuare. Tuja ebaba cuanaque majuhuaaju ishatanacuarejudya tunajatu ishacuare. Davidtu majutsu ririterecuare. ³⁷ Jesús bacue riricuare ama, Yusura yudijidya emajuque nityatsuranucacuare tibu, — jadya tuna Pablora cuejacuare.

³⁸ Pablora Antioquiaju cuanaque cuejanucacuare:

—Ecue ata cuana, bahue micuana yatsera amerecara aya; Jesús equetu Yusura jucha cuana apupashaya. Riyaque Jesúsdyá micuana cuejaya. ³⁹ Jesús queja catyatitsu cuita camadya tuque micuanaja jucha cuana etillatanau. Moisésja cacuatsashati eque juatsu amatu jucha cuana apupashatanaya, Jesús queja catyatitsu cuita camadya. ⁴⁰ Beru patu Yusu equeque quisarati cuejaqui cuanara quisarati acuare, tuque bijidamaduraquiquepa canerecatidadibuque jadya. Necanaruticue micuana, tunara cuejacuare eque ejuuju.

⁴¹ “Micuanaratu ecue quisarati ejeneya ama.

Micuana micuana quijaribati arida cuanaque.

Inime tilla nejucue.

Baji micuanaja paani.

Iyetanadadiya micuana, ecue quisarati ejenecarama aya tibu.

Idya Yusu.

Micuanaja yacuajudya tuque aya ejeja ataquique ama.

Jadya ama bucha micuanara ejenedadiya ama.

Peya cuanara era ahuaque cuejayaju tuque micuana ejeneb-
uque ama”,

jadyatu Yusura quisarati acuare béru tuja quisarati cuejaqui
cuana eque, —jadya tuna Pablora acuare.

⁴² Jadya aatsutu Pablo tuatsehue juneniya cuanaque jadya
tuna caradati ishuque etare juque cuinanacuare. Tuna
cuinanayaju tuna ecuita cuanara acuare:

—Peya canajara huecacaju ecuana Jesús eje buchique
necuejananucacue, —jadya tunajatu ecana acuare.

⁴³ Tume caradatihuaque diruterehuajutu umada israelita
cuanara tajicuare Pablo, Bernabé jadya. Tumebaedya tatse
jetiama israelita ama cuana Yusu muiqui cuanara tajicuare.
Tatsera tuna casaturacuare.

—Yusura micuana dyaque iyuhueda bayaque caadebatitsu
tuque pureamaturayaque neaniajecuedya jutidya, —jadya
tatsejatu ecana acuare.

⁴⁴ Semanape piji cuitadya tuna canajara huecacaju dutya
jujeri epu ebariju cuanaque casitaticuare Ecuana Cuat-
sashaquija quisarati baca ishu. ⁴⁵ Jetiama ecuita ecarada-
tique baatsutu israelita cuanaja huaraji cuana cahuitic-
uare Pablo, Bernabé jadya tsehue. Tuna cuita camadya
quisaratiyaju bacatacara tuna jucure tatse jetiama ecuitara
quisaratiyaju bacayaju. Tume tunajatu Pablo ecatsé dyaque
cuita jishatsu quemitsape ijillahuana jadya atibunecuare:

—Pablo ecatsera micuana pusha pusha cuejaya, —jadya
tunajatu ecana acuare.

⁴⁶ Tumetu Pablo, Bernabé jadya quisaraticuare casada tse-
hue, bajida tsehue ama:

—Micuanadya micuana ecuanaja icuene cuita Jesúsja quis-
arati bacameretaqui jucure micuana israelita cuana. Jadya
ama buchatu micuanara bijidamaduraya. Micuanaratu
micuanaja mere equedya jutidya Yusu queja judirutaqui
ejuu bucha adébaya. Jadya tibudya tuque tuque yatse iyacua
israelita ama cuanaque Jesúsja quisarati cuejaya. ⁴⁷ Yusratu
béru quisarati acuare:

“Micuana micuana era iyahua, ecue quisarati dutya que-
jaque cueja ishu.

Hueca bucha micuana jubuque, eje bucha inajacameree era
eauque cueja.

Dyaque japada micuana cuabuque, ique eje buchique bahue
amereyaque”,

jadyatu Yusura quisarati acuare béru.

Jutaquiju tuque yatse israelita ama cuanaque cuejaya, —
jadyatu Pablora israelita cuana acuare.

⁴⁸ Jadya bacatsutu israelita ama cuanaque dyaque
pureama cuita jucure.

—¡Dyaque jida taa Yusuja quisarati! —jadya tuna juti-bunecuare.

Yusura tuaqueja judiru ishü mepecuare cuanaquetu Jesús queja catyaticuare. ⁴⁹ Jadya equetu Jesús queja ecatyati cuanara cuejajacacuare ama dutya queja Ecuana Cuatsashaquija quisarati. Tumeque yahua dutya epu cuanaju tuna quisarati cueja jucuare. ⁵⁰ Israelita cuanatu Pablo, Bernabé jadya tsehue dyaque jutidya cahuaiticuare. Tunaratu ecuita cuana inime metse cuanaque tatse tsehue cahuaitishacuare. Cahuaitishacuare tuna epuna inime metse cuanaque. Tumeque epuna cuanatu Jesús queja catyatima jucuare, arepa Yusu muicuare ama bucha. Dutya tume cuanaque tunajatu ana cuejacuare Pablo, Bernabé ecitse tumeque yahua juque ijehuemere ishü. ⁵¹ Cuinanayaquetu Pablo ecitse ehüachi juque muru quitatatiqenacuare. Jadya tatsejatu ecana acuare, “Rehua cuanaque ri jucha metse” jadique, quisarati bacacarama juya tibu. Jadya juatsu tatse cuacuare Iconioju. ⁵² Jadya ama buchatu Antioquía juque Jesús queja ecatyati cuanaque pureama jucuare, Jesús jaque cabatitsu. Tuna tuna Yusuja Espirituja biji eque anicuare. Tuque bacue tuna tsehuedya jucuare.

14

Pablo, Bernabé tsehue Iconioju cuacuareque

¹⁻² Pablo, Bernabé jadya tatse Iconioju israelita cuanaja caradati ishü etareju nubidirucuare. Tuhuadya tatsejatu Jesús eje buchique quisarati cuejacuare. Jetiama tuna Jesús queja catyaticuare israelita cuana, israelita ama cuanaque jadya. Jadya baatsutu israelita cuana tuaqueja catyaticarama juhua cuanaque dyaque cahuaiticuare. Quis-araticuare ecana israelita ama cuana Jesús queja catyatima cuana tsehue. Pusha pusha ecana jucuare Pablo ecitseja ishü. Jidama tunajatu ecana inime tupumerecuare tatseja ishü, Jesús queja ecatyati cuanaja ishü jadya. ³ Jadya ama buchatu Pablo ecitse dirushacuare ama. Tsunuda tatse tuhua anicuare, jetiama ecana Jesús queja catyatihua baatsu. Cuejacuare tatse Ecuana Cuatsashaquija quisarati bajida tsehue ama.

—Yusura micuana dyaque iyuhueda baya, —jadya tatse ecuita cuana cuejacuejanicuare.

Yusuja casa tsehue tatsejatu ni ejeque ecuitaja ataquique ama acuare. Yusura tatse jadya amerecuare, ecuita cuana tuja quisarati yunerique bahue amere ishü. ⁴ Umada ecuita cuana tumeque epuju anicuare cuanara tatse ejenecuare ama. Dutyara tupu ama tuna inime tupucuare. Umaetu

israelita cuanara inime tupuya equé jucuare. Pe ya cuana bacue jucuare Pablo ecatséja inime equé.

⁵ Tumetu Iconioju cuanaque tuna cama quisaraticuare, israelita cuana, israelita ama cuanaque jadya. Huaraji cuana tsehue tunaja dutyaja tupu inime jucuare Pablo, Bernabé jadya jidama ijahue ijahue aishu.

—Neiyera ecatsé tumu tsehue, —jadya tuna jucuare.

⁶ Pablo, Bernabé jadya tatsé bahue jucuare tunara iye-cara ayaque. Bahue juatsu tatsé Listra, Derbeju jadya huanacuare. Tumebaedya tatsé cuacuare epu cuana japadama. Jeeque beta epu tu Licaonia yahua juque. ⁷ Tuhua tatséjatu cuejacuaredya jidaque quisarati Jesús eje buchique.

Pablo tuna Listraju tumu tsehue iyejericuareque

⁸ Tuhua Listrajutu anicuare ecuita ajebaecuaque. Huachi jidamaque cuinanacuare tibusu ajebaecua jucuare. ⁹ Jeeque ecuitaratu bacaanicuare Pablora Jesúsja quisarati cuejayaque. Pablora pana peta acuaire. Petatsutu Pablora inime tupucuare:

—Riyaque ecuitara taa ri ejeneya Yusura ajebaecuaque eajeshauque, —jadyatu Pablora inime tupucuare.

¹⁰ Tumetu Pablora jadya acuaire etsuri jebuda tsehue:

—Netitsuracue. Pana neti jucue.

Tura jadya ayajutu ecuita putitanacuare. Ajetibunecuare. Etsaca ecatsé tujatu jida ajetaqui jucuare. ¹¹ Umada ecuitaratu bacuaire Pablora ajebaecuaque ajeshahuaju. Baatsu tuna quiquetibunecuare tunaja yana equé, Pabloja yana equé ama:

—¡Yusu ecatsé ecuana queja cabameretihua! ¡Cacuitatitsu retse ecuaana queja cabameretihua! —jadya tuna jucuare.

¹² —Riyaque ecatsé rique ecuanaja yusu ecatsé. Tumeque tu Zeus, —jadyatu Bernabé petatsu jucuare.

—Tumeque tu ecuanaja yusudya. Riyaque ri Hermes, —jadyatu Pablo petatsu jucuare.

Jadya tuna Pablo, Hermes bucha adebacuaire, tuque dyaque quisaratihua tibu.

¹³ Tuna jadya quiquetereya tsunumetu pae Pablo, Bernabé ecatsé paera jipeticuare. Tuquetu Zeus merequique jucuare. Zeus mui ishucue etarejutu mere jucuare. Tumeque etare cacatu epu ejunacuareju jucuare. Quetimerecuare tujatu toro cuana, tatséja ebacaniju iyemere ishucue. Shasha cuanatu paera tatsé bajeje ishucue quetimerecuare. Paera, ecuita cuanara jadyatu Pablo, Bernabé jadya muicara acuaire; tunaja yusu cuana mui ea bucha tunajatu ecatsé muicara acuaire. ¹⁴ Ecuita cuanara Yusu mui ea bucha muicara ayajutu Pablo, Bernabé ecatsé dyaque pe ya inime jucuare.

Cachajaticuare tatse tatseja una, peya inime juya jadicue cabamereti ishu. Quiqueajecuaré tatse tuna queja:

¹⁵ —Tata ecana, ¿aishu micuana jadya juya? Yusu ama yatse, ecuitadya jutidya. Micuana buchique cuitadya yatse. Jidaque quisarati micuana cuejara yatse jechine, micuanaja yusu cueya cuana muijaca ishu. Yanacana tuque micuana muiya. Ni aishu buchique tuna jida ama. Tume cuana queja nimee nejujacacue. Yusu Neri queja nimee nejudue. Tuquetu Yusu Chachaque. Turatu barepa iyacuare. Yahuatu iyacuaredya. Cueri cuanaja ecuaquetu iyacuare. Dutya tume cuanaju aniyaque tujatu iyacuare. Jadya eque tu tuque dutya iyaquique. ¹⁶ Berutu ecuita cuana Yusu Nerija inime eque ama anicuare. Tunaja inime equedya jutidya tuna anicuare. Yusura patu quisarati acuare: “Eaqueja nimee jucarama juya cuanaque paani tuna eje bucha tunadya jutidya anicara juya eque”. ¹⁷ Jadya ama buchatu tuna tsehue jida jujacahua ama. Jadya bameree tujatu ecana ahua tuque peadya camadya Yusu nerique. Turadya tuque micuanaja tee cuana nei queja amereya, micuana cuhuatiya cuanaque jida huija ishu. Turadya micuana tyaya dutya micuanara ara ishu cuanaque sareyaque, micuana pureama juishu. Jadya bae tura micuana jida aya, micuana tuaqueja catyati ishu, — jadya tatsejatu ecana acuare.

¹⁸ Jadya tuna Pablo, Bernabé ecatsera acuare tunaja tatseja ebacaniju uu cuana iye ishu ama, tunara tatse cueya cueya cuana ebajejeu bucha bajejee eauju. Jadya ama bucha tuna eje bucha jadya amerejacataqui ama bucha jujericuare.

¹⁹ Judirucualetu israelita cuana Antioquía juque, Iconio juque jadya. Tuna tuna Jesús queja ecatyatique ama jucuaré. Cahuaitishacuare tuna ecuita cuana, tunaja Pablo, Bernabé jadya ujeu baishu. Tumetu ecuita cuanara Pablo tumu tsehue marereshacuare. Iyehua bucha tuna cabaticuare. Tume tunajatu epu juque repeajetsu ijehueticuare etsecueju. Tuhadya tunajatu shanacuare. ²⁰ Jesús queja ecatyati cuanaque tuna caradaticuare tuque jarayaju. Tunara tuhua petayajudyatu netitsuracuare. Yudijidya judirunucatu jucuaré epuju. Jadya juu huecaca nuca jadya juatsutu Bernabé tsehue cuacuare Derbeju.

²¹ Tuhua tatsejatu cuejatinucacuare quisarati jidaque Jesús jucha cuana tsujetyaqui majucuaréque. Jadya bacatsu tuna jetiama Jesús queja catyaticuare. Tuequedya tatse judirunucacuare Listraju, Iconioju, Antioquiaju jadya. ²² Tumeque epu cuana eque cuetiyara tatsejatu casaturacuare Jesús queja ecatyati cuanaque.

—Jesús queja nimeedya jutidya nejuajecue. Dyaquetu canerecati anibuque Jesúsja cuanaja ishu, —jadya tatsejatu ecana aeticuare.

²³ Dutya epu cuanaju tatsejatu Jesús queja ecatyati cuanaque naru ishu cuanaque iyabarecuare. Arama quibeti jucuaire, Yusu tsehue quisarati ishu emajaca ani ishu. Naru ishu cuanaque iyabaretsutu Pablo, Bernabé ecitse quisaraticuare tunaja ishu Jesús tsehue.

—Ecuana Cuatsashaquique, jida narucue micue cuanaque naruqui mira mepehua cuanaque. Miaqueja tuna catyatihua, —jadya tatsejatu Jesús bacacuare.

Pablo, Bernabé jadya Antioquiaju Siria yahuaju judirunucacuareque

²⁴ Pablo, Bernabé jadyatu cueticuare Pisidia yahua eque. Judirucuare tatse Panfilia yahuaju. ²⁵ Tueque cuetinucayara tatsejatu cuejaetibenuacuare Jesúsja quisarati Pergeju. Juetinucacuare ecitse Ataliaju. ²⁶ Tuequedya tatse dirunucacuare ena eque Antioquiaju judirunuca ishu. Riyaque epu juquedya tatse cuacuare Jesúsja quisarati cuejara. Tatse cuinanama jarijudyatu Jesús queja ecatyati cuanaque tuhua anicuare cuanaque Yusu queja bacabacuare tatseja ishu: “Narucue ecitse jida, tatsera mique mereya tibu, tatse micue quisarati cueja juyaju”, jadyapa tunajatu bacacuare icuenetadya. Tumeque mere amena aatsu patu Pablo, Bernabé ecitse Antioquiaju judirunucacuare. ²⁷ Tuhua Antioquiaju judirutsu tatsejatu sitacuare Jesús queja ecatyati cuanaque. Pablora tuna cuejacuare dutya tatse eque Yusura eje bucha ahua cuanaque:

—Yusura yatse tsahuachine dyaque yatse Jesúsja quisarati cueja juyaju. Yusuja jadya inime juya tibutu jetiama israelita ama cuanaque Jesús queja catyatichine tuja quisarati bacatsu, —jadya tuna Pablora cuejacuare.

²⁸ Pablo, Bernabé ecitsetu anidirucuare tuhua tsunuda Jesús queja ecatyati cuana queja.

15

Jesús queja ecatyati cuanaque naruqui cuanaque Jerusalénju casitaticuareque

¹ Tume patyatu umaecuita cuana judirucuare Judea yahua juque Antioquiaju. Judirutsu tunajatu Jesús queja ecatyati cuanaque cuejatibunecuare:

—Berutu Moisésra cacuatsashati iyacuare israelita decana nana cuana ecuita huitu biti catubuti ishu Yusu jaque jadya adeba ishu. Yusu queja ni micuana judirucara juya,

catubumeretitaquidya micuana, arepa micuana israelita cuana ama juya ama bucha. Catubutiya ama ni micuana, Yusura micuana Ijahua quejaque inajacamerebuque ama, —jadya tunajatu ecana cuejacuare.

² Jadya bacatsutu Pablo, Bernabé jadyara acuare ecuita cuana:

—Yuneri ama tuque; neejeneume ecana, —jadya tatsejatu ecana acuare.

Caquemitsati caquemitsati tatse jucuare Judeaju cuana tsehue. Tuna dutya cati cati juyajutu Antioquiaju cuanaque baecua jari jucuare ecuita huitu biti catubutitaquique, jadya ama juatsu catubitaqui ama jadique.

—Necudadishara eje uma ecuita Jerusalénju inime bajeje ishú. Jesúsja ecuadisha cuana tsehue ecana tuhua paquisaratiti. Emuiba cuana tsehue ecana paquisaratiti, —jadya tuna jucuare.

Jadya quisarati aatsu tunajatu mepecuare Pablo, Bernabé, umae peya cuana jadya.

³ Jesús queja ecatyati cuanara cuadishaya cuanaque tuna Antioquía juque cuacuare. Cuayaque tuna cueticuare Fenicia, Samaria yahua ecatsé eque. Cuayaque tuna epu cuanaju junatitsu Jesús queja ecatyati cuana tsehue caradatiajecuare.

—Jetiama israelita ama cuanaratu amena ejenejacachine tunara icuene ejenehua cuanaque. Jetiama tuna Jesús queja catyatichine, —jadya tunajatu ecana cuejaajecuare.

Jadya bacatsutu Feniciaju cuanaque, Samariaju cuanaque jadya dyaque pureama jucuare. ⁴ Cuadishataya cuanaque Jerusalénju junatihua jutu Jesús queja ecatyati cuanaque naruquira ecana jida batsacuare. Jesúsja ecuadisha cuanara, emuiba cuanara jadya ecana jida batsacuare. Pablora tuna cuejacuare Yusura tuna eque dutya ahuaque. ⁵ Umae fariseo cuana tuhua jucuare cuanaque tuna quisarati ishú netituracuare. Tuna tuna Jesús queja ecatyati cuanaque jucuare, arepa fariseo cuana ama bucha.

—Israelita ama cuanaque Jesús queja catyatitsu tuna Moisésra ecuana dutya cacuatsashati cuana iyahua eque anitaqui. Ecuana baedya tuna ecuita huitu biti catubumeretitaqui, Yusu jaque jadique adebataqui juishu. Jadya tuque ecuanaja ecana bahuityataqui, —jadya tuna quisaraticuare.

Jadya eque tunajatu Pablora inime tupuya bucha ama inime tupucuare.

⁶ Tumetu Jesúsja ecuadisha cuanara casitatuquerecuare Jesús queja ecatyati cuanaque naruqui cuanaque, riyaque inime bajeje ishú.

—¿Israelita ama cuanaque tuna ecuita huitu biti catubutitaqui, aijama ni taa? —jadya tuna cabacaduraticuare.

⁷Tsunuda tunajatu tumeque quisarati acuare dutyara tupu inime tupu ishu. Tuequedyatu chamacama Pedro netit-suracuare quisarati ishu:

—Ique amena beru Yusuja emepeque israelita ama cuanaque Yusu queja judiru ishuque quisarati cueja jucuaque. Micuanaratu adebayadya riyaque. Turatu Jesúsja quisarati bacamerecara aya. Tura tuna Jesús queja catyatishacara aya. ⁸Yusuratu dutyaja inime tupu adebaya. Israelita ama cuana queja tujatu tuja Espíritu cuitadya cuadishahua, ecuana queja cuadishahua bucha. Jadya bameree tujatu ahua tuna dyadi Jesús queja catyati ishu. ⁹Yusuratu dutya tupu baya, israelita cuana, israelita ama cuana tsehue. Tuna Jesús queja catyatiyaju tujatu ecana ecuanaja jucha cuana tillahua bae tillaedy aya. ¹⁰Yusura tujaque amerehua tibu ¿eje bucha juatsu jatsu tuque micuanara tura ahuaque yuamaturacara aya? Ecuana baba cuanaratu eje bucha ataqui ama bahua dutya cacuatsashati cuana ehue eque juishu. Iyacuatu ecuanara eje bucha ataqui ama neridya baya dutya cacuatsashati eque. Tume jatsu tuque micuana ¿eje bucha juatsu israelita ama cuanaquetu dutya cacuatsashati eque anitaqui jadya aya, ecuana israelita cuanaradya eje bucha ataqui ama bayaque? Riyaque tu micuanara cuitadya ai dyaque bicuedaque abumereya buchique. ¹¹Yusura ecuana tsujema inajacamere aya Ecuana Cuatsashaqui queja catyatitsu eque, ecuana israelita cuana, tumbaedy israelita ama cuanaque, —jadya tuna Pedrora cuejacuare.

¹²Tume tuna dutya abacatanacuare. Tuequedyatu Pablo, Bernabé ecatsera casitatihua cuanaque isaracuare:

—Yusura yatse cuadishahua Yusu queja judiru ishuque quisarati israelita ama cuanaque cueja ishu. Yatse equetu casa cabameretihua israelita ama cuana ducu, —jadya tatsetatu ecana acuare.

¹³Santiagoratu tatse tsehue tupupee inime acuare. Tatse tsehue quisarati amena juatsu tujatu tuhua cuanaque isarat-ibunecuare:

—Tata ecana, nebacacue ique. ¹⁴Bacahuadya micuanara Simón Pedrora cuejahuaque. Butseejupa Yusu cabameretichine tuja jidaque israelita ama cuana queja. Cuejahua tura ecuana, israelita ama cuanaquepa amena Yusuja jutaqui, Jesús queja catyatiya cuanaque. ¹⁵Jadyatu Yusura ahua, béru tuque eque quisarati cuejaqui cuanara jadya tujatu adadiya jadya acuareque. Ehuenedya tu Yusuja quisarati:

¹⁶“Ique Yusu.

Junanucabuque ique micuana queja.

Arepa David eque ejuracana cuanara jacacuare ama bucha tuna eaqueja nimee amerenucabuque.

Camuimeretinucabuque ique.

Ecue inime eque tuna anishanucabuque.

Etare erihuitereque era yudijidya nityatsuranuca aya buchatu jubuque.

¹⁷ Jadya tuna abuque dutya queja cuanaque eaqueja catyati ishu, israelita ama cuanaque eaqueja catyati ishu.

Dutya israelita ama cuanaque era ihuarahuaquetu ecuique jubuque.

¹⁸ Ique Micuana Cuatsashaquique juya tibu, riyaque micuana bahue amerehua.

Béru yuequedy a rique ecue inime jadique ejitaju ahua”, jadyatu Yusura quisarati iyahua tuja quisarati cuejaqui cuana eque.

¹⁹ Santiagora jadya cuejanucacuare:

—Ecue inime tupu tu riy a cuanaque. Israelita ama cuanaque tuna Jesús queja catyatihua. Beruque quejeneti cuana tunajatu amena iyahua. Tupupe tupupe ecana inime netupumerera ama. Casada tsehue ecana Moisésja cacuat-sashati eque anishacara neara ama. ²⁰ Quirica eque ecana jadya juishuque cuita camadya necuejara: “Nearaume erami yusu cueya cueya cuanaja yacuaju iyahuaque. Micuanaja caquemitiqeremaque nejaraquereume. Nearaume erami cuanubi, uu jadya pana sucucurusha ami amaque. Neijiume ami”. Riyaque cuita camadya ecana necuejara. ²¹ Béru yuequedyatu canajara huecaca cuanaju Moisésja cacuat-sashati cuana isaratanahua caradati ishuque etare cuanaju. Dutya epu cuanajutu aniya ejeque tumeque cacuat-sashati bahuitya juya cuanaque. Jutaquiju israelita cuana ecahuaitishau tibu, israelita ama cuanajatu ataqui riy a era cuejahua cuanaque, —jadya tuna Santiagora cuejacuare.

Israelita ama cuanaja Jesús queja ecatyati cuanaja quirica cuadishatanacuareque

²² Jesúsja ecuadisha cuanara, emuiba cuanara jadya tunajatu jida bacuare Santiagora cuejahuaque, tumbaedy a Jesús queja dutya umae ecatyati cuanara. Tumetu enaruqui cuanara hueneacuare quirica Antioquiaju Jesús queja ecatyati cuanaja ishu. Mepecuare tunajatu Judas, Silas jadya quirica duju ishu. Betadya tatse ecuita dyaque inime metseque ecats e jucuare. Judasjatu peya ebacani anicuare “Barsabás”. Tatse tunajatu cuadishacuare Pablo, Bernabé jadya tajira tuhuaque dirunucayaju. ²³ Tuna tsehue tunajatu quirica cuadishacuare. Jadya tunajatu hueneacuare:

“Ecuánara ríque micuanaja ríyaque quirica cuádishaya, ecuaná Ecuádishá cuánara, Jesús queja ecatyati cuanaque naruquí cuánara, tumbaedyá dutya tuaqueja ecatyati juhua cuánara jadya. Isaramereya micuana ecuanara israelita ama cuanaque ecuaná tsehuequí cuanaque. Micuana Antioquiaju, Siriaju, Ciliciaju cuanaque micuana ecuanara isaramereya. ²⁴ Ríya cuitari ejeque cuana cuachine micuana queja. Ecuánara cuatsashayaju ama rena cuachine. Tupupe tupupe tunara micuana inime amerechine. Adebataquí ama tuque micuana bachine tunara cuejachineque. ‘Yusu queja judirucara juatsu micuana ecuita huitu bití catubumeretitaquí israelita cuana bucha. Moisésja cacuatsashati eque cuita micuana anitaquidya’ jadya tunara micuana cuejatichine. ²⁵ Jadya bahue juatsu ecuaná casitatichine ríyaque inime bajeje ishú, dutyaja tupu ecuanaja inime juishu. Amena tuque ecuaná beta ecuita mepeya micuana queja cuádishá ishú. Pablo, Bernabé ecátse tsehue tatse cuaya. Ecuánaja iyuhueda ecátse tsehue tatse cuaya, ecuaná tsehuequí ecátse tsehue. ²⁶ Umada cuautu Bernabé, Pablo jucuare tuhua eiyetauju, muda aniyaju, Ecuana Cuatsashaquí Jesucristoja quisarati cuejara. ²⁷ Cuádishaya tuque ecuanara ecátse Judas, Silas jadya. Tatsera micuana pana cueja atíya dutya ecuanara inime tupuchine cuanaque, rehúa quiricaju ecuanara huenuaque. ²⁸ Ecuánara ní Yusuja Espiritura micuana amerecarama aya dyaque ibeda cuitaque. Micuanajatu ataquí ríya cuanaque cuita camadya: ²⁹ Nearaume erami yusu cueya cueya cuánaja yacuaju iyahuaque. Neijiume amí. Nearaume erami cuanubi, uu jadya pana sucuru-rusha amí amaque. Micuanaja caquemitiqueremaque ne-jaraquereume. Jadya camadya micuana ecuanara cuejaya. Ríya cuanaque cacuatsashati eque ní micuana aníya, tume micuana jida júya. Dutya micuanaja jida pajuaaje. Ríya tupu camadya”.

Jadya Jerusalénju Jesús queja ecatyati cuanaque naruquí cuánara quirica huenuaque israelita ama cuánaja ishú.

³⁰ Cuádishatahua cuanaratu quirica Antioquiaju duju-cuare. Tuhua junatitsu tunajatu radacuare Jesús queja dutya ecatyati cuanaque. Tyacuare tuna quirica. ³¹ Jesús queja ecatyati cuanaque naruquí cuanaratu etsuri jebuda tsehue isaracuare dutyaja baca ishú. Jadya bacatsutu dutya dyaque pureama jucuare. Dyaquepa tuna cacasaticuare Jerusalénju cuánara cuejahua cabatitsu. ³² Judas, Silas jadya tatse Yusu equeque cuitadya quisarati cuejaquiquedya jucuare. Tatsera Jesúsja quisarati cuejahujutu Jesús queja ecatyati cuanaque

cacasaticuare. Tatsera tuna nime casaturacuare. ³³ Tuhua tatse aniticuare eje uma huecaca cuana. Jadya juatsu tatse Jesús queja ecatyati cuanara isarayaque jadya acuare:

—Yusura nenarucue metse diruyaju, —jadya tunajatu ecate acuare.

Tatse cuadishaqui cuana queja judirunuca ishuhua tatse yudijidya judirunuca jucuaré. ³⁴ Silastu anicara datse jucuaré.

³⁵ Pablo, Bernabé jadya tatse anicuare jari Antioquiaju. Tatsera tuna cuejacuare jari quisarati Ecuana Cuatsashaquique eje buchique. Peya cuana tsehue bahuityapeedyata tatsejatu acuare tuja quisarati.

Pablo, Bernabé tsehue cajacaticuareque

³⁶ Eje uma huecaca junucatsutu Pablora jadya acuare Bernabé:

—Necuanuca Jesús queja catyaticuare cuanaque casaturara icuene yatse epu cuanaju junenicuare cuanaju. Bahue jucara juya tuna tuaqueja nimeedyata jari eje buchique, —jadya tujatu acuare.

³⁷ Bernaberatu dujucara ebari datse acuare Juan Marcos.

³⁸ Pablora bacue dujucarama acuare.

—Aijama, cuataqui amatu yatse tsehue. Icuene tura yatse jacacuare Panfiliaju. Merenucacarama tujatu Yusu acuare, —jadyatu Pablora Bernabé acuare.

³⁹ Arepa tatse cuinetse cuitadya dyaque quisaraticuare ama buchatu eje bucha bajejetaqui ama inime jucuaré. Jadya tibudya tatse cajacaticuare. Bernaberatu dujucuaré Marcos. Ebuteju junatitsu tatse anibutenaticuare cuaba ebariju. Cuacuare tatse Chipreju.

Cuabeta ishuhua Pablo Jesúsja quisarati cuejara cuanucacuareque

⁴⁰ Pabloratu Silas mepecuare tuja etajiqui juishuhua. Tatse cuama jarijutu Jesús queja ecatyati cuanaque Antioquiaju cuanaque Yusu tsehue quisaraticuare tatseja ishuhua:

—Tata, narucue micue iyuhue tsehue micue mere puji ecate, —jadya tunajatu Yusu bacacuare.

Yusu tsehue quisarati amena juatsu tatse cuacuare Pablo, Silas jadya. ⁴¹ Cueticuare tatse Siria, Cilicia jadya equé. Casaturaajecuaré tatse Jesús queja ecatyati cuanaque.

16

¹ Pablo, Silas jadya tatse yudijidya judirunuca jucuaré Derbe, Listra jadyaju. Listrajutu anicuare Jesús queja ecatyatique Timoteo bacani. Tuja ecuaquetu israelita jucuaré, Jesús queja ecatyatiquedya. Tuja etataque bacue israelita ama jucuaré, griego. ² Listraju, Iconioju cuanaque

Jesús queja ecatyati cuanaratu jida quisarati acuare Timoteoja ishu. ³ Pabloratu Timoteo tuque taji qui datse dujucara acuare. Jadya ama buchatu Timoteo ecuita huitu biti catubumeretima jucuaré, tuja etaque israelita ama jucuaré tibu. Tumetu tuna tsehue cuama jarijudya Pablora tubumerecuare israelita cuanaja bahue. Jadya tujatu amerecuare, tuna cuayaque epuju jetiama israelita cuana anicuare tibu. Tume cuanaratu pana adeba acuare Timoteo griego jabacuaque. ⁴ Jadya juatsutu Pablo, Silas, Timoteo jadya Litraju jetiama epu cuana eque cuetiajecuare. Isaracuare tunajatu quirica Jerusalén eque cuadishayaque ecatyati cuanaja huaraji cuana, emuiba cuanaque patya netitsu. ⁵ Tumetu Jesús queja ecatyati cuanaque cabahuityatiajecuaredya jutidya Yusu pureamatura. Umanaajecuaredya jutidyatu Jesús queja ecatyati cuanaque.

Pablora Macedonia juque ecuita tahuiju bucha bacuaque

⁶ Yusuja Espirituratu Pablo, Silas, Timoteo jadya cuejamerecarama acuare quisarati Asia yahuaju. Jadya tibu tuna cuacuare Frigia, Galacia jadyaju camadya. ⁷ Junaticuare tuna Misia yahua jiruru. Bitinia yahuaju tuna cuacara datse jucuaré. Jadya ama bucha tuna Jesúsja Espiritura tuhua cuejamerecarama acuare. ⁸ Tume tuna tuyu cueti Misia eque jucuaré. Junaticuare ecana ebute Troas bacaniju epuju. ⁹ Tuhuatatu Pablora tahuiju bucha bacuaque ecuita netiyaju. Tumequetu jecuare Macedonia juque.

—Carequetique Macedoniaju. Tshuaticue ecuana, — jadya tujatu Pablo acuare tahuiju.

¹⁰ Tume patya ique Lucas tuhuadya jucuaré Pablo tsehue Troasju. Yume cabajejetidya ecuana jucuaré Macedoniaju cuaishu, Pablo jadya tahui juhuaju. Pana caadebati ecuana jucuaré Yusura cuitadya ecuana tuhua cuadishayaque jidaque quisarati Jesús eje buchique cueja ishu.

Lidia Jesús queja catyaticuaque

¹¹ Cuinanacuare ecuana Troas juque cuaba ebari eque. Tume tuyu cuau ecuana jucuaré ecububu ebari Samotracia bacaniju. Peya huecaca ecuana judirucuare Neápolis epuju. ¹² Tuequedya ecuana Filiposju cuacuare. Tuhuatatu anicuare jetiama ecuita cuana epu ebari Roma juque ejueti cuanaque. Filipos tu epu dyaque aridaque jucuaré Macedonia yahuaaju. Tuhua ecuana tsunuda huecaca ama netinaticuare. ¹³ Canajara huecacaju ecuana cuacuare cueri jiruru queja israelita cuana Yusu tsehue quisarati bahueju. Tuhua ecuana tuna tsehue caradaticuare. Eje uma epuna cuanatu tuhua ecaradati jucuaré. Cuejacuare ecana ecuanara jidaque

quisarati Jesús eje buchique. ¹⁴ Tuhuatu anicuaire epuna Lidia bacani. Tuquetu jucuare Tiatiraju aniyaque. Tumeque epunatu ejutuqui sehuesahuau tsuje aridaque catyati puji jucuare. Yusu muiqitu jucuare. Quisarati bahueto jucuare Yusu tsehue. Bacacuare tujatu jida inime tsehue Pablora cuejayaque, Yusura pana bacamere aya tibu. Pana baca aatsutu Jesús queja catyaticuare. ¹⁵ Cutsamereticuare tuque, Jesús queja catyatihua jadique ejitaju juishu. Tumebaedya tuja etareju cuanaque cutsamereticuarenya. Jadya juatsu tura ecuana amena bacacuare:

—Micuanara ni ique Ecuana Cuatsashaqui queja ecatyatique ejeneya, nenubicue rehua ecue etareju, —jadya tura ecuana acuare.

Tura jadya ahuaju ecuana tuja etareju anibacacuare Filiposju anibacacuare jari tupu.

Pablo, Silas tsehue Filiposju etare apudaju ishatanacuareque

¹⁶ Ecuana Filiposju jarira tuque ecuana epuna ehue ebari ijahua cuanara quijahuatishayaque banaticuare. Ecuata cuana Yusu tsehue quisarati bahueju cuayara tuque ecuana banaticuare. Tumeque ijahuaja casa equetu tuja casa anicuaire eje bucha judadiyaque cueja ishu. Tura chipiru inayaquetu tuque metse cuanaja ishu jucuare, tuque metsequique jucuare tibu. ¹⁷ Tumeque epuna ehue ebarira ecuana tupu-judya aajecuare. Quiqueajecuairetu ecuana tupuju:

—Riyaque ecuita cuana rena Yusu merequi cuanaque. Yusu barepaju aniyaque renajari mereya. Ecuana Yusu queja eje bucha judirue juishuque quisarati cuejaqui cuana rena, —jadyatu epuna ehue ebari jebuda quiqueajecuare.

¹⁸ Jadyatu tumeque epuna dutya huecacadya jutidya jucuare. Amenatu Pablo ecahuaiti jipenee cuita jucuare. Jadya bacahuillatsu tujatu tibene bajiyu acuare epuna ehue ebari. Tume tujatu ijahua acuare:

—Jesúsja ebacaniju mique jadya aya. Tumeque epuna quejaque cuinanacue; jacacue tumeque epuna.

Pablora jadya cuinanashayajutu ijahuara pana jaca acuare. ¹⁹ Tumeque epuna ijahuara jacahua baatsutu epuna ehue ebari metse cuanaque dyaque cahuaiticuare Pablo, Silas jadya tsehue.

—Amena tujatu cuejanime ama eje bucha judadiyaque, tumeque ijahuara jacahua tibu. Amena tujatu chipiru inajacahua ecuanaja ishu, —jadya tunajatu inime tupucuare.

Jadya juhuaju tunajatu Pablo, Silas ecitse inamerecuare. Inameretsu tunajatu ecitse dujumerecuare ecuita cuana

tarepe jubahueju huaraji cuana queja. ²⁰ Inime bajeje puji cuana queja tunajatu bamereticuare.

—Riyaque ecuita ecitse ri israelita ecitse. Retserari bape bape inime tupumereya ecuanaja epuju cuanaque. ²¹ Tatsera ecuana bahuityacara aya tatseja bahuequedya jutidya. Tuyu ama tu ecuana peya yahuaju cuanaja bahue eque juishu. Tatsera amereya eque ecuana jutaqui ama, ecuana ecuana Roma juque enaruqira cuatsashaya eque camadya juya, —jadya tunajatu ecana acuare.

²² Tume tuna dutya tuhua jucuare cuanaque dyaque cahuaiticuare Pablo, Silas jadya tsehue. Tume tatse huaraji cuanara tacamerecuare tatsera jutuyaque. Tacameretsu tunajatu ecitse catsa catsa amerecuare acui tsehue. ²³ Catsa amena au jadya aatsu tunajatu ecitse ishamerecuare etare apudaju.

—Pana naru bacue ecitse neacue ecuinanauju, —jadya tunajatu etare apuda naruquique cuatsashacuare.

²⁴ Jadya bacatsu tujatu ecitse nudyacuare yuqueja educuju cuita. Tume tujatu ecitse pana calla cuita ehuchi ecitse acuare cepoju, tatse ehuanauju.

²⁵ Metapatyatu Pablo, Silas ecitse Yusu tsehue quisaraticuare. Jerucuare ecitse jida pureama tsehue Yusuja ishu. Tume peya cuana etare apudaju netiya cuanara tatse bacacuare jeruyaju. ²⁶ Tatse jadya juyajutu muya jutidya yahua bucucucuare. Dutya etare apudaquetu bucucucuare dudu cuana, esipi cuanaque jadya. Pacashatanacuare dutya eteriqui cuana. Eisha cuanaque risiqui ea cuanaquetu pana tibitanatere jucuare. ²⁷ Jadya juyajutu etare apuda naruquique cabaticuare. Cabatitsu tujatu bacuare eteriqui cuana epacashatanatere. Jadya baatsu tujatu inacuare tuja cuchiru cuerudaque tuta taca quiyeti juishu. Quiyeticaratu jucuare, etare apudaju eisha cuanaque huanaterehua bucha baatsu. ²⁸ Amena quiyeticara cuita juyajutu Pablo jebuda quiquecuare:

—¡Quiyetiume! Riyadya ecuana dutyadya. Ni ejeque buchique ecuana huanahua ama, —jadya tujatu acuare.

²⁹ Tumetu etare apuda naruqira ude bacacuare. Ude tyahuajutu ude inatsu nubiticuare. Tsajaja nubititu jucuare Pablo, Silas jadya queja. Tadadaya jadyatu jucuare bajida juatsu. Nuyucuretu tatseja yacuaju. ³⁰ Jadya juatsu tujatu ecitse dujucuare etare apuda juque. Tuja etarejudya tujatu ecitse dujucuare.

—Tata ecitse, ¿eje bucha ejuu Yusu queja judiru ishu? —jadya tujatu ecitse bacaduracuare.

³¹ —Yusu queja judiru ishu Ecuana Cuatsashaqui Jesús queja catyaticue dutya micue etareju aniya cuana tsehue, —jadya tatsejatu cuejacuare.

³² Cuejacuare tatsejatu tumeque ecuita Jesúsja quisarati, tumbaedyá tuja etareju aniya cuanaque jadya. ³³ Arepa metapatya juya ama bucha tatse etare apuda naruquirá cuinanaqueretsu utsacuare acui tsehue catsacatsa ayaque pucucushahua cuanaque. Tuhua dutya tuja etareju aniya cuana tsehuetu cutsamereticuare, Jesús queja catyatihuaque jadique ejitaju juishu. ³⁴ Jadya juatsu tujatu ecátse nubi-querenuacuare Pablo, Silas jadya tuja etareju, tatse mihua ishu. Tuja etareju cuana tsehuetu pureama jucuaré, Jesús queja catyatihua cabatitsu.

³⁵ Huecacatsu apudajudya cuitatu huaraji cuanara cuadishacuare sudaru cuana etare apuda naruqui queja.

—Inajacacue jeeque beta ecuita ecátse. Cuinanashacue ecátse etare apuda juque, —jadya tunajatu ecana cuejamerecuare. ³⁶ Sudaru cuanaratu cuejaticuare etare apuda naruquique huaraji cuanara cuejamerehuaque. Jadya cuejamerehuaju tujatu Pablo, Silas jadya cuejaticuare:

—Huaraji cuanara cuadishahua metse inajacamere ishu. Necuinanacue amena. Yusura nenarucue metse eju judiruyaju, —jadya tujatu ecátse aticuare.

³⁷ Pablótu etehua inajacatacarama jucuaré. Tume tujatu sudaru cuana cuejacuare:

—Jida yatse nebacue. Romaju cuanaque ebau bucha bae yatse neaacue, quirica yatseja tuhuaque enaruquiija ehuenéque aniya tibu. Roma juque enaruquirá cuatsashaya equedyá yatse juya. Dutyara petayaju yatse catsacatsa atanachine. Tunara yatse inime cuana bajejequi cuanaja yacuaju quicueneti ishu emajaca tyachine ama. Yuneridya ni yatse inime metse, inime metse ama jadique baecuaque tunara yatse etare apudaju ishámerechine. Iyacua tunara yatse etehua inajacamere acara aya. ¡Jadya tuna jutaqui ama! Huaraji cuitadyatu jetaqui yatse dutyaja yatucaju inajacana ishu, —jadyatu Pablora sudaru cuana atsacuare.

³⁸ Jadya atsayajutu sudaru cuana masadama yudijidya dirunuca jucuaré huaraji cuana queja. Cuejadirucuare tunajatu ecana Pablora quisarati ahuaque.

—Tumeque ecuita ecátseja patu aniya quirica cuana enaruqui Roma juque ebacani equiyatique. Tura cuatsashaya equedyapa tatse juya, —jadya tunajatu ecana cuejadirucuare.

Huaraji cuanatu dyaque bajida jucuaré, tatseja quirica cuana enaruqui dyaque aridaque Romajuja ebacani

ehueneque aniya jadya bacatsu. ³⁹Tume tuna cuacuare etare apudaju. Canerecatiticuare tuna Pablo, Silas ecatsé queja tatseja ecana nerecaba ishú:

—Nenerecabacue ecuana. Ecuana jucha metse jadya neaume, —jadya tunajatu ecatsé aticuare.

Cuinanashaticuare tunajatu ecatsé etare apuda juque.

—Necuinanacue riyaque epu ebari juque, —jadya tunajatu ecatsé acuare.

⁴⁰ Etare apuda juque cuinanatsu tatse cuacuare Lidiaja etareju. Tuhua tatse quisaratiticuare Jesús queja ecatyati cuana tsehue. Casaturaticuare tatsejatu ecana. Tuna casaturadiru jadya juatsu tatse dirucuare epu juque.

17

Pablo, Silas tsehue Tesalonicaju cuacuareque

¹ Filipos juque cuinanatsutu Pablo, Silas ecatsé cuacuare Anfipolisju, tuequedya Apoloniaju. Tuequedya ecatsé judirucuare Tesalonicaju. Tuhuatu anicuare israelita cuanaja caradati ishúque etare. ² Dutya canajara huecacaju tatse cuau cuau jucuare. Quimisha canajara huecacajutu Pablora ecuita cuana Yusuja quisarati eheneque bahuityacuare. ³ Cuejacuaretu ecana Yusuja quisarati Mesías eje buchique eheneque:

—Beru yuequedyatu Yusu equeque quisarati cuejaqui cuanara huenequere Mesías canerecatidibuqueque. “Majudadiya tuque. Majutsutu chacha netitsuranucabuque”, jadya tuna jucuare. Jadyatu judadicuare Jesús Nazaret juque tunara icueta huene acuare bae cuitadya. Tudyá micuana era cuejaya. Tumeque Jesúsdyá tu Mesías, Yusuja Emepeque, —jadya tujatu ecana acuare.

⁴ Jadya ayaju bacatsutu umae israelita cuana Jesús queja catyaticuare. Tuaequeja catyatitsu tuna Pablo, Silas ecatsé tsehue junenicuare. Tsahuatsahuanicuare tunajatu ecatsé. Tumebaedya ecana catyaticuare Jesús queja umada griego cuana Yusu Neri miqui cuanaque. Tumebaedya umada epuna cuana inime metse cuanaque tuna Jesús queja catyaticuare. ⁵ Israelita cuana tuaqueja catyatiya ama cuanaque tuna dyaque cahuaíticuare Pablo ecatsé tsehue. Cahuaíticuare tuna, umada tunaja ata cuana Jesús queja catyatihua baatsu. Sitacuare tuna jidama, dyai usi cuanaque ni aishu bucha jida ama cuanaque. Casitatisatsu tuna jidama quisaratishacuare Pablo, Silas eatseja ishú, tuna tumebaedya tatse tsehue cahuaítishi. Sicacaturacuare tuna ecuita cuana. Dutya jujeri tumeque epuju aniya cuanaque tuna tatse tsehue cahuaítishacuare. Jasónja etareju tuna Pablo,

Silas ecitse sarecticuare, tatse cuinanasha ishu. Inacara tunajatu ecitse acuire ecuita cuanaja yacuaju duju jidama amere jadya aishu. ⁶ Dadicuare ama tunajatu ecitse tuhua. Tume tunajatu inacuire Jasón. Tumbaedyia tuna inacuire peya cuana Jesús queja ecatyati cuanaque tuhua jucuire cuanaque. Inatsu tunajatu huaraji cuanaja yacuaju dujucuire. Quiquecuare ecana:

—¡Pablo, Silas ecitse tu ecuita cuana yuamaturaquique! Epu cuana tupu tatse juneniya dutya queja cuanaque yuamatura juyaque. Iyacia retse ecuanaja epuju tumbaedyia junachine. ⁷ Jasónra tatse tuja etareju nudyatsachine. Tatse tatse Roma juque enaruqira cuatsashaya equa ama juya. César patu ecuatashaquique neri ama. Peya patu aniya, Jesús bacani, jadya tatse juya, —jadya tunajatu epu juque huaraji cuana acuire.

⁸ Jadya bacatsutu ecuita cuanara, huaraji cuanara dyaque jidama inime bacuire. Dyaque ecahuaiti tuna jucuire. ⁹ Jasón queja, peya cuana queja jadya tuna chipiru catyamereticuire.

—Necuinanashacue Pablo, Silas jadya ecuanaja epu juque. Tatse cuinanahuaju piisi micuana ecuanara micuanaja chipiru tyanucaya, —jadya tunajatu ecana acuire.

Jasónra, peya cuanara jadya chipiru tsehue tsujetyahuaju tunajatu ecana inajacuire.

Pablo, Silas jadya Bereaju cuacuareque

¹⁰ Huaraji cuana Pablo, Silas jadya tsehue dyaque ecahuaiti baatsu tunajatu ecitse masadama tumeque chineju cuitadya Jesús queja ecatyati cuanara epu juque huanashacuire. Betadya tatse yume diru jucuire Berea queja amaca. Tuhua judírutsu tatse cuacuare israelita cuanaja caradati ishuque etareju. ¹¹ Tuhua cuanaquetu Pablora Jesúsja quisarati bahuityacuare. Bereaju cuanaque tuna Tesalónicaju cuanaque bae ama jucuire. Bacacarama ama tunajatu Pablora bahuityayaque acuire. Bacacara ebaridya jutidya tuna acuire. Dutya huecaca tuna isaracuare Yusuja quisarati, eje yuneri ri Pablo, Silas jadya quisaratiya jadique adeba ishu. ¹² Yusuja quisarati isaratsu, Pablora cuejayaque bacatsu tuna jetiama israelita cuana Jesús queja catyaticuire. Tumbaedyia griego cuana umada catyaticuire tuaqueja. Epuna inime metse cuanaque, deca griego cuana jadya tuna jadya jucuire. ¹³ Israelita cuana Tesalónicaju aniya cuanaratu bacuire Pablo Bereaju Jesúsja quisarati cueja juyaque. Tume bahue juatsu tuna tuhua cuacuare. Junatitsu tunajatu ecana capuritishanaticuire. ¹⁴ Jesús queja ecatyati cuanaratu Pablo masadama tsahuacuare tuhuaque cuinana ishu. Ena jiruru

queja tunajatu dujuare. Silas, Timoteo ecatsetu Pablo tsehue dirupee ama juare. Bereaju tatse anicuare jari. ¹⁵ Tuque huanayaju tsahuaqui juare cuanaratu Pablo Atenasju dujuare. Tuna Atenas juque cuinanama jariju,

—Necuejacue Silas, Timoteo ebajarara ecatsé paju. Pacat-suruti ecuana Atenasju, —jadya tuna Pablora cuejamerecuare.

Riyaque quisarati tatse cuejamereyaque cuejahuaaju tuna dirunucacuare.

Pablora Jesúsja quisarati cuejacuareque

¹⁶ Pablotu Silas, Timoteo jadya Atenasju ihua juare. Atenas epu ebariju dutyajupa tunajatu umada cueya cueya cuana neticuare. Jadya baatsutu Pablo dyaque capeya inimeticuare, ecuita cuanara peadyaque Yusu Neri ama muiya baatsu. ¹⁷ Dutya huecacatu tumeque epu ebariju cuana tsehue quisaraticuare. Caradati ishuque etare cuanajutu quisaraticuare israelita cuana tsehue, tumbaedyia israelita ama cuana Yusu Neri muiqui cuana tsehue. Dutya huecaca quisaraticuare ecuita cuana tarepe bahueju tura tuhua tsuruya cuana tsehue. ¹⁸ Anicuaretu umaé dyaque iyuca jararada cuanaque. Epicúreo cuana, estoico cuana jadya tunajatu ebacani juare. Pablo tsehue tuna caquemitsatijacama juare. Tumeque iyuca jararada cuanaque tuna quisaraticuare tuna cama Pablo eje buchique:

—¿Ai quisaratitu aya tume bahuepa ejuu jadyara? Tuquetu adebayaque ama quisaratiya, —jadyatu umaé juare.

—Quisarati bahue jiu taa tuque. Peya Yusu ecuanara adebayaque ama cuejacara aya bucha cuita tuque, —jadyatu peya cuana juare.

Jadya tuna juare, Pablora Jesús eje buchique quisarati ayajudya jutidya bacatsu. “Riyaque Jesús tu emajuque chacha netitsuranucacuare”, jadique quisaratitu tura ajacacuare ama. ¹⁹ Tumetu Pablo bahue cuanara dujuare tuna eje bucha inime iyacua cuanaque quisarati ishucasitati bahueju. Tumequedyatu Areópago bacani juare. Tuhua tunajatu bacaduracuare:

—¿Ai tu tumeque mira iyacuaque bahuityayaque? Cuejacue ecuana. ²⁰ Mira bahuityayaque tu bape iyacuaque. Ecuana jatu bacama neri mira cuejayaque. Pana cueja ecuana acue tumeque quisarati eje buchique jadya, —jadya tunajatu acua.

²¹ Atenasju anicuare cuanaratu bacacaradya jutidya acuaere ejuque iyacuaque bahuityayaque. Tumbaedyia peya yahuaju cuanara tuhuaque junaya cuanara bacacaradya jutidya tunajatu ai iyacuaque acuaere. Dutya jujeri tuna ai iyacuaque cueja bahuitya jadya camadya juare. Jetiama

ecuitatu tuhua Areopagoju jucuaire, dyaque bahue cuanaque camadya ama, tumbaedy a dutya tumeque epu ebariju cuanaque. ²² Tumetu Pablo netitsuracuare tunaja yacuaju Areopagoju tuna isara ishu:

—Tata ecana Atenasju cuanaque, isaraya micuana era. Nebacacue ique. Dyaque cuita cueya cueya ea cuanaque micuanaja epu ebariju baatsu, bahue ique micuanara dyaque yusu cuanaju inime tupuqui ayaque. ²³ Ique cueya cueya cuana petapetani juhua. Bahua tuque micuanara eju muiyaju. Bajiyutsu tuque bahua peadya tumu ebari riyaque quisarati ehuenegue: “Riyaque ri ecuanara Yusu adebayaque ama mui ishuque”. Yuneridyatu aniya peadya Yusu micuanara adebayaque ama, Yusu Neri. Riyaque Yusu micuanara adebayaque ama muiyaquedya micuana cuejacara aya. ²⁴ Tumeque Yusratu iyacuare riyaque yahua, dutya rehua aniya cuanaque jadya. Tuquetu barepa, yahua jadya metseque. Tuquetu aijama ama ni ejeque etare caca ecuitaja eaju. ²⁵ Ecuanara ni tu eje bucha tsahuae ama tuque. Turatu ni ai buchique sareya ama. Dutyatu tuja aniya. Tura cuitadya ecuana anishaya. Tura cuitadya ecuana ujejedama, jida jadya amereya. Tura ecuana tyaya dutya ai ecuanara sareya cuanaque. ²⁶ Turatu iyametse ahua icueneque deca, icueneque epuna. Dutya quejatu anibareya Yusura icueneque ecuita iyahua eque ejuracana cuanaque. Turatu iyabarehua emajaca peadya peadya cuareja ishu, peya cuana peya quejaque, peya cuana bacue peya quejaque jadya. Turatu iyabarehua ejeque badi, huecaca emajaca eju ecuana cuinanayaju cuinana ishu. ²⁷ Tura ecuana iyahua dutya ecuana, ecuanaja tuque sare ishu, tuaqueja ecuana catyati ishu. Riyaque Yusu tuque ecuana japada ama baya. Yuneridya ni ecuana dadicara aya, dadiyadya tuque ecuanara. ²⁸ Chacha ecuana aniya, tura anishaya ademe. Ajeya, bucucuya jadya ecuana juya, peya queja peya queja, tura casa tyayaju. Tura ecuana casa tyaya dutya ecuanara ai acara ayaque aishu. “Duty a ecuana Yusu jabacua cuana, tura ecuana iyahua tibu”, jadyatu umae micuanaja yahuaju cuanara huenecuare béru. ²⁹ Ecuana Yusu jabacua juya tibu, eje bucha jueni tuque ecuanaja Etata juma oro eaque, tumu, acui ea cuanaque. Eje bucha jueni tuque ecuanaja Etata juma cueya cueya ecuita cuanaja eaque, tunajadya jutidya inime tuputsu eaque. Yusu tu aidy a jutidya ecuitaja ai ea tsehue beta tupu ama. ³⁰ Beru yuequedyatu Yusura inime tupuhua: “Adebaya ama jari tunara ique. Jadya tibu tuna jucha metse aya ama” jadya. Iyacuatu dutyaja emajaca aniya tuque adeba ishu. Jadya tujatu quisarati iyacuare:

“Dutya ecana inime pacacuareti, cajuchatijaca ishu”, jadyatu Yusu juya. Jadya equetu Yusura dutya quejaque tuaqueja nimee amerecara aya. ³¹ Turatu iyahua huecaca dutya tuja yacuaju neticuina ishuque. Tumeque huecaca tura ecuana tuyu abuque ecuana peadya peadya eje bucha judadiyaque. Jadya tura ecuana adadiya tura casa iyahua eque. Jesucristo eque tujatu jadya adadibuque. Tumeque Jesús majuhuaajutu Yusura chacha nityatsuranucacuare. Jadya tujatu acuare, Jesús tu huaraji tuyuque jadique ejitaju amere ishu, —jadya tuna Pablora cuejacuare.

³² “Tumeque Jesús majuhuaajutu Yusura chacha nityatsuranucacuare” jadya bacatsutu umae cuanara ejenecuare ama. Ijaribacuare jutidya tunaja tuque. Peya cuanara bacue dyaquedya jutidya bacacara acuare Pablora cuejacara ayaque.

—Peya huecaca ecuana cuejanucacue, —jadya tunajatu acuare.

³³ Tumetu Pablo tuna shanatsu Areópago juque dirucuaré. ³⁴ Umae cuanaratu tupujudya acuare, tuja quisarati cuejayaque bacacara aatsu. Tunadya tuna Jesús queja catyaticuare. Peadyatu Dionisio bacani jucuaré. Tuquetu peya dyaque ecabahuityatiquedya jucuaré. Aeropagoju tujatu ecana bahuityajacacuare ama. Peadya epuna Dámaris tu Jesús queja catyaticuaredya. Tumbaedyá umada peya cuana catyaticuare tuaqueja.

18

Pablo Corintioju cuacuareque

¹ Jadya juatsutu Pablo dirucuaré Atenas juque. Cuacuaretu epu ebari Corinto bacaniju. ² Tuhua tujatu tsurucuaré israelita Aquila bacani, Pontoju ecuinanaque. Ehuaneque tujatu Priscila bacani jucuaré. Icuenepa tatse Italia yahuaju anicuare Roma epu ebariju. Cuinanacuare tatse Roma juque, enaruqui Claudiora dutya israelita cuana pacuinana Roma juque jadya cuatsashahuaju. Butseeju Corintioju ejuetique tatse jucuaré. Pablora tatse baeticuare. ³ Aquilatu ebiti etare puji jucuaré, Pablo jucuaré baedyá. Jadya tibutu Pablo anicuare tatse tsehue mere juishu. ⁴ Dutya canajara huecacajutu Pablo cuacuare israelita cuanaja caradati ishuque etareju. Quisaraticuaretu israelita cuana tsehue, israelita ama cuana tsehue jadya. Adebamerecara tuna tura acuare Jesús Ecuana Inajacamerequique.

⁵ Silas, Timoteo ecatsetu dirunucacuare Macedonia juque. Dirunucatsu tatse judirucuaré Corintioju Pablo queja. Tatse judiruhuaajutu Pablo Jesúsja quisarati cueja cuita camadya jucuaré. “Jesús tu Mesías. Tuquetu Yusuja Emepeque

micuanara ihuacuareque”, jadya tujatu israelita cuana cuejajacuare ama. ⁶ Jadya cuejayaju bacatsutu jetiama israelita cuana dyaque cahuañicuare Pablo tsehue. Jidamaque quisarati tuna acuare. Tumbaedy a tuna Jesús ijillahuanacuare. Tume tuna Pablora jacacuare. Tuna jacayaque tujatu tura jutuyaque itataquenacuare, tuque ama inime metseque jadique.

—Judirubuque ama micuana Yusuja yacuaju, micuana Jesús queja catyaticarama juya tibu. Jesúsja quisarati micuana cuejahua. Jadya ama bucha micuana ejenecarama ahua. Jadya tibu micuana micuana cuitadya micuanaja juchaju inime metse, ique ama. Riyaque huecaca equé tuque cuejaya Yusu queja judiru ishucue quisarati israelita ama cuanaque, —jadya tuna Pablora cuejacuare.

⁷ Jadya tuna cuejatsutu cuinanacuare caradati ishucue etare juque. Cuacuaretu Ticio Justoja etareju. Tuja etaretu jucuaré caradati ishucue etare peque. Arepa tuque israelita ama jucuaré ama bucha, turatu Yusu Neri muicuare. Pablotu tuja etareju cuacuare Jesúsja quisarati cuejara. ⁸ Crisporatu Pablora cuejayaju bacacuare. Bacatsutu Jesús queja catyaticuare. Riyaque Crispotu caradati ishucue etareju ecuat-sashaquique jucuaré. Tuja etareju cuanaque tumbaedy Jesús queja catyaticuare. Jetiama peya cuana Corintoju cuanaque tumbaedy catyaticuare Jesús queja, quisarati cuejayaju bacatsu. Tuaequeja catyatitsu ecana cutsamereticuare. ⁹ Ecuana Cuatsashaquiquetu meta tahuiju Pablo queja cabamereticuare.

—Bajida juume, Pablo. Cuejajacaume ecana ecue quisarati. Abacatanaume. ¹⁰ Ique miatsehuedya. Naruyadya mique era. Ni ejera buchiquemi jidama aya ama ni nerecaturaya. Era tuna jetiama riyaque epuju cuanaque eaqueja catyatishaya, mira cuejayaque bacatsu, —jadyatu Ecuana Cuatsashaquira cuejacuare Pablo.

¹¹ Tumetu Pablo Corintoju anicuare peadya mara, peya patya patya tupu. Tuhua aniyaque tujatu ecana bahuityacuare Jesúsja quisarati. ¹² Tuequedyatu umae israelita cuana Pablo tsehue cahuañicuare. Inacuare tunara. Inatsu tuna dujucuaré Galión queja. Galióntu Acaya yahua naruquique jucuaré.

¹³ —Riyaque ecuitatu Moisésra cacuatsashati iyacuare equé ama aniya. Arepa Yusu ecuanaja muitaqui jadya juya ama bucha, tuyu amapa ecuana muiya, jadyatu juya, —jadya tunajatu Galión aticuare.

¹⁴ Pablo quicueneti ishucue quisaratishauquetu Galiónra jutidya isaracuare israelita cuana:

—Tata ecana, nebacacue ique. Erari nereda aya ama riyaque ecuita. Tura ni Roma juque enaruquija cacuatsashati eje bucha aquena juhua, enerecaturau rique era. Tura ni ai dyaque jidama cuitaque aquena juhua, enerecaturaudya rique era, micuanara amerecara aya bucha. ¹⁵ Riyaqueri eje bucha juhua ama Romajuja cacuatsashati tsehue, micuana israelita cuanaja cacuatsashati tsehue camadya. Micuana micuana cati cati jucara juya ebacani cuana tibu, quisarati eje buchique jadya tibu. Eratu nerecaturaya ama. Eratu riyaque inime bacarama aya. Tuque ni micuanaja cacuat-sashati eque ama juya, jutaquiju taa micuanaradya nereda neacue. Eratu nerecaturaya ama, —jadyatu Galiónra acuare israelita cuana.

¹⁶ Jadya aatsu tujatu ecana casada tsehue cuinanashacuare inime bajeje ishuque etare juque. ¹⁷ Cuinanayajutu tuhua cuanara inacuare Sóstenes. Tumequetu caradati ishuque etareju ecuatsashaquique jucuaré. Miri miri tunajatu atibunecuare inime cuana bajeje ishuque etare tuyu. Galionratu icuenecuare cuana ama cuitadya.

Pablo Antioquía queja amaca yudijidya dirunuca jucuaréque

¹⁸ Pablotu tsunuda aninucacuare jari Corintoju Jesús queja ecatyati cuana tsehue. Tuequedyatu tuna isaraquenatsu dirunucacuare Corinto juque. Priscila, Aquila jadya tatse tutsehue dirucuare. Jueticuare ecana ebute Cencrea bacaniju. Cuahuietu Pablo iyuca tsaru pana cajeremereti jucuaré, “Aya tuque era jadya Yusu cuejachineque yana equedya juchineque” adeba ishuque. Cencrea juque tuna cuaba ebari eque dirunucacuare Siriaju judiru ishu. ¹⁹ Siriaju diruyaque tuna jueticuare Efesoju. Tuhua tujatu ecitse shanacuare Aquila, Priscila jadya. Pablotu cuacuare israelita cuanaja caradati ishuque etareju. Nubititsu tujatu tura tuhua jucuaré cuanaque Jesúsja quisarati cuejacuare. ²⁰ Efesoju cuanaque tuna tuaqueja canerecaticuare:

—Anicue jari rehua eje uma huecaca cuana ecuana tsehue.

—Aijama. Padirunuca jutidya ique. ²¹ Jerusalénju chine ishu Jesúsja quisarati cuejara cuataquique ique. Yusuja inime jadya juyaque juatsu, juetinucaya rehua micuana queja yudijidya, —jadya tujatu ecana acuare.

Jadya tuna isaratsutu Pablo Efeso juque cuacuare cuaba ebari eque. ²² Jueticuaretu Cesareaju. Tuhua juetitsutu Pablo cuacuare Jerusalénju Jesús queja ecatyati cuanaque isarara. Tuequedyatu dirunucacuare Antioquiaju. Tuhuatu eje uma huecaca cuana aniticuare.

Pablo cuaquimisha ishu Jesúsja quisarati cuejara cuanucacuareque

²³ Tuequedyatu cuanucacuare Jesús queja ecatyati cuanaque casaturara nuca. Uhua equetu cuacuare Galacia, Frigia yahua juque epu cuana cuajira. Bahuityacuare tujatu ecana Jesúsja quisarati. Nime casaturacuairetu ecana Jesúsja inime eqe anijaca ishu ama.

Apolos Efesoju Yusuja quisarati cueja jucuareque

²⁴ Tume patyatu israelita Apolos bacani jecuare Efesoju. Tuquetu Alejandría juque jucuare. Ecuitedyaque jida quisarati bahuequetu jucuare. Jidatu adebacuare Yusuja quisarati ehueneneque. ²⁵ Tuja patu riya piji ebaca jucuare Ecuana Cuatsashaqui Jesús eje buchique. Bahuedyatu jucuare Juan Ecuitedya Cuana Utsaquira Jesús eje buchique cuejacuareque. Bahuedyatu jucuare Juanra inime cacuairetiya cuanaque ut-sacuareque. Dyaque inime patya tsehuetu Apolosra bahuityacuare riya piji tuque Jesús eje buchique bahueque. ²⁶ Bajida tsehue ama tujatu bahuityacuare israelita cuanaja caradati ishique etare cuanaju, arepa tura adeba jida ama Jesús eje buchique acuare ama bucha. Aquila, Priscila jadyaratu quisaratiyaju tuhua bacacuare. Bacatsu tatsejatu dujucuare tatseja etareju, dyaque jida Jesús eje buchique pana bahuitya aishu.

—Jesús eqe tu Yusu queja judiru ishique, —jadya tatsejatu pana bahuitya acuare.

²⁷ Tumetu Apolos cuacara jucuare Acayaju. Jadya bahue juatsutu Jesús queja ecatyati cuanara casaturacuare tuque cuaishu. Huenecuare tuna quirica tuque tuna queja nubinati ishu, Jesús queja ecatyati cuana Acayaju cuanaja ishu, jida tunaja batsa ishu. Tuque judiruma jarijutu jetiama Acayaju cuanaja ebaca jucuare Yusura tunaja ishu jida ayaque. Cuejayaju bacatsu tuna Jesús queja catyaticuare. Tumetu Apolos tuhua junatitsu israelita cuana tsehue quisaraticuare. ²⁸ Dutyaja yacuajutu tuque caquemitsati caquemitsati jubahue jucuare. Yusuja quisarati ehueneneque tujatu tsumecuare tuna Jesús Mesiasque ejenemere ishu. Dyaque jidatu quisarati acuare. Israelita cuanaratu bape quemitsae ataqui ama bacuare.

19

Pablo Efesoju cuanucacuareque

¹ Apolos Corintoju jarijutu Pablo cueticuare emata cuana eqe jetiamaju epu cuana cuajiaje juyaque. Tueque cuetitsutu judirucuare Efesoju. Tuhua tujatu tsurucuare eje uma Jesús queja ecatyati cuanaque.

² —¿Butechinetu Yusuja Espíritu micuana queja, micuana Jesús queja catyatihuaju? —jadya tujatu ecana bacaduracuare.

—Juhua aba. ¿Ejeque tu tumeque Yusuja Espíritu mira ecuana cuejayaque? Ni eje tupu ecuanaja bacama tumeque, —jadya tuna caquemitsaticuare.

³ —¿Eje bucha eque micuana cutsameretichine? —jadya tuna Pablora bacaduranucacuare.

—Cutsameretichine ecuana inime cacuaretihuaque adeba ishu, Juanra bahuityahua eque.

⁴ —Yuneridyatu Juanra ecuita cuana utsacuare inime cacuaretihua jadique adeba ishu, cajuchatiyacacara juya jadique. Jadya ama buchatu tura quisarati ajacacuare ama: “Junaya queja micuana catyatitaqui” jadya. Junayaque jadya ayaque tujatu Jesús jadya acuare. Tuaequeja catyatihua jadique adebataqui juishu necutsamereticue, —jadya tuna Pablora acuare.

⁵ Jadya bacatsu tuna cutsameretinucacuare yuneri cuitadya tuna Ecuana Cuatsashaqui Jesucristo queja catyatihuaque caadebamereti ishu. ⁶ Pabloratu tuja emetucu tunaja iyuca dyaque iyacuare. Jadya ayajutu Yusuja Espíritu tuna queja butecuare. Quisaratibunecuare ecana peya yana tunara adebaya eque ama. Tunaratu cuejacuare Yusura quisaratishayaju quisaratihuaque. ⁷ Jucuaré tuna peadya tunca beta eracana ecuita tume patya cutsamereticuareque.

⁸ Quimisha badi tuputu Pablo cuau cuau jucuaré israelita cuanaja caradati ishuque etareju. Bajida tsehue ama tujatu ecana tuhua Jesúsja quisarati cuejacuare. Eje buchadya ejen-emerecara tujatu ecana acuare Jesús eque cuita camadya Yusura dutya naruyaju judirutaquique. ⁹ Umaetu dyaque ecahuaiti jucuaré Pablora cuejayaque bacatsu. Ejenecarama tunajatu acuare. Jidama tunajatu quisarati acuare Jesúsja ishu ecuita cuanaja ijacaju. Tume tuna Pablora jacacuare. Tuque, peya cuana Jesús queja ecatyati cuanaque jadya tuna cuacuare Tirano bahuitya bahuityayaju. Tumetu Pablora tuhua cuejatibunecuare Jesúsja quisarati dutya huecaca. ¹⁰ Beta mara tuputu Pablora tuhua Jesúsja quisarati bahuityacuare. Jutaquijudyatu jetiama Asiaju anicuare cuanara bacacuare Ecuana Cuatsashaqui Jesús eje buchique. Israelita cuanara, tumbaedyá israelita ama cuanara bacacuareadya.

¹¹ Yusuja casa tsehuetu Pablora ni ejeque ecuitaja ataquique ama acuare. ¹² Jutaquijudyatu eraca cuana Pablora inhuaque ecuita cuanara dujucuaré ujejeda cuana queja. Pablora inhuaque jabatsutu ujejeda cuanaque chacha jucuaré. Tume ijahua cuanara quijahuatishaya

cuanaque bacue chacha jucuaredya, ijahua cuana tuna quejaque cuinanatsu.

¹³ Anicuaretu peya ijahua cuana ijehuecuinaqui cuanaque. Israelilta cuana tuna jucuare. Epu cuanaju tuna junenicuare jadya ayaque. Arepa ecana Jesús queja catyatima jucuare ama bucha tuna Ecuana Cuatsashaqui casa tsumecara acuare ijahua cuana ijehuecuina ishu. Jadya tibudya tunajatu ijahua cuana abahue jucuare: “Jesúsja ebacaniju, Pablora cuejayaja ebacaniju micuana aya, ‘Necuinanacue riya cuana quejaque. Paquijahuatijaca ecana’”, jadya quisarati tsehue tunajatu ijahua cuana abahue jucuare.

¹⁴ Jadya tuna jubahue jucuare israelita Esceva bacanija pacarucu ebacua cuanaque. Escevatu tuhua pae cuanaja huaraji jucuare. “Jesúsja ebacaniju, Pablora cuejayaja ebacaniju micuana aya: ‘Necuinanacue riya cuana quejaque’”, jadya tunajatu abahue jucuare ijahua cuana. ¹⁵ Tunara jadya ayaju tuna ijahuara jadya apidya acuare:

—Adebaya tuque Jesús. Adebaya tuque Pablo. ¿Micuana jatsu micuana aí? Micuana micuana Jesúsja cuanaque ama, —jadya tuna ijahuara acuare.

¹⁶ Ijahuara jadya ahujatu ecuita ijahuara quijahuatishayara putiriquecuare tuna pacarucuque. Mirirshacuaretu ecana jahue atillaya tupu ebajararaque. Chamacama ecana huanacuare etare juque unamaque, ujeda eaque. Jadyatu Efesoju Escevoja pacarucu ebacua cuanaque jucuare.

¹⁷ Tuhua cuanaque tuna bahue jucuare pacarucu ecuita cuana jadya juhuaque. Israelita cuanara, israelita ama cuanara jadyatu bacacuare jadya juhuaque. Bahue juatsu tuna anajacatacuare. Dyaquedya jutidya tunajatu Ecuana Cuatsashaqui Jesúsja casa bacaajecuare. Jadya juatsu tunajatu pureama acuare.

¹⁸⁻¹⁹ Jetiama maruhuisa cuana tuna Jesús queja catyaticuare. Tuaqueja catyatitsu tuna dutyaja ijacaju cacuejatibarecuare tuna jidama juhua cuanaque. Sitacuare tuna dutya quirica cuana tuna maru cabahuityatiqui jucuare cuanaque. Sitatsu tunajatu pahuacuare dutyara petayaju. Pahuama jarijutu tumeque quirica cuanaja dyaque etsujequi anicuare, pishica tunca mil ficha tupu dyane. ²⁰ Dyaquedya jutidya tunajatu tuque amaca bacaajecuaredya jutidya Yusuja quisarati, Yusuja casa jadya.

Efesoju cuanaque capuriticuareque

²¹ Jadya juatsutu Pablora inime tupucuare:

—Pacua ique Jerusalénju. Pacueti epu cuana eque Macedonia, Acaya ecatsé yahua eque Jesús queja ecatyati cuanaque

cuajiaje. Jerusalénju cuaatsu, cuacara juya Romaju, —jadya tujatu inime tupucuaré.

²² Tumetu Pablora Macedoniaju cuadishacuare icueneta beta tuque tsahuaquique, Timoteo, Erasto jadya. Tuquetu anicuare jari eje uma huecaca cuana Asiaju.

²³ “Iyacuaque tu Jesús eque Yusu queja judiru ishuque”, jetiamatu Efesoju cuanaque jadique quisarati bacatsu cahuaitsu capuriticuare. ²⁴ Peadya ecuita Demetrio bacaniratu ecuita cuana cahuaitsishacuare. Tuquetu cueya cueya cuana mere puji jucuare. Yusu epuna Artemisa mui ishuque etare cueya cueya mere pujitu jucuare. Tsuje aridaque metal tujatu acuare. Catyati aatsu tujatu jetiama chipiru inacuare. Tumbaedyatauatsehue mere jucuare cuanara dyaque etsujequi inacuare. ²⁵ Demetrioratu tuja mere puji cuana sitacuare. Tumbaedyatu ihuaramerecuare dutya peya cuana cueya cueya mere puji cuana.

—Tata ecana, nebacacue ique. Micuanaratu adebaya ecuanara riyaque mere tsehue umada chipiru inayaque. ²⁶ Bachine micuana Pablora cuejahuaju eje bucha juchineque. Bacachine micuana tura cuejayaju. “Ecuita cuanara yusu cueya cueya ayaque tu Yusu ama”, jadyatu ajacachine ama ecuita cuana. Jadya tibutu eje umara Artemisa muijacaya. Artemisa tuna muijacaya ecuanaja epuju cuanara. Asiaju dutya queja cuanaratu muijacaya yusu cuana ecuanara mere aya cuanaque. ²⁷ Riyaque tu dyaque jidama ecuanaja ishu. Jadidya jutidya ni juajeya, mere tuque ecuanaja aijama ejuu. Chipiru tuque ecuanana einanucau ama. “Artemisaja etaretu ni aishu buchique ejuu”, jadyatu ecuita cuana ejuu. Jadya ni juya, peya epu cuanajura ni tu emuijacadadiu, Asiaju dutya yahuajura. Bijidamatu ebatau riyaque yusu epuna. Emuii ama tunaja tuque, —jadya tuna Demetriora acuare.

²⁸ Jadya bacatsu tuna dyaque cahuaiticuare. Quiqueterecuare tuna:

—¡Artemisa tuque ecuanaja esumique! ¡Tumeque yusu epuna ecuanara muiyaque, dutya Efesoju cuanara! —jadya tuna jubarecuare quique eque.

²⁹ Bape bapedya jutidyatu epu ebariju cuanara cueyanecuare. Gayo, Aristarco Macedonia juque ecatsé inaticuare. Pablo taji juyaque tatsé jucuare. Repeajetsu tuna ecatsé ani ishu cuanaque pataca pataca baruda eaque ducu repeajecuare. Tuhuatu ecuita cuana caradaticuare. ³⁰ Pablotu nubicara tuhua jucuare ecuita cuana isara ishu. Jesús queja ecatyati cuanaratu cuejamerecuare tuque nubi ishu ama. ³¹ Umae Asia juque huaraji cuanara

tujatu quisarati cuadishacuare. Tuna tuna Pabloja eadeba cuanaque jucuare.

—Panubi ama tuhua, —jadya tunajatu cuejamerecuare.

³² Ecuita ecapuritique tuna jucuare. Dutya jujeri baecua jucuare aishu casitatihuaque. Umaera bape, peya cuanara peya quisarati jadya jutidya ecana jucuare. Umae cuana quiqueya peya queja eje bucha quiqueya jadya tuna jucuare. Dutya tuna ecahuaiti jucuare Pablo tsehue, dutya israelita cuana tsehue jadya. ³³ Israelita cuanara tuna jetiamaque isaracara datse acuare. Jadya tibudya tunajatu Alejandro casada tsehue dutya ecuita cuana acuatsurumerecuare. Tuna israelita cuana tsehue cahuaitishajacacara aatsu tujatu ecana isaracara acuare. ³⁴ Tudy a cuitadya israelitaque adebatsu ecuita cuana dyaque jebudadya jutidya quiqueterecuare:

—¡Artemisa tuque ecuanaja esumique! ¡Tumeque tu yusu epuna ecuanara muiyaque, dutya Efesoju cuanara! —jadya tuna quiquecuare beta ura jujeri dyane.

³⁵ Tumetu epu juque huenehuene puji huarajira inime eque inime equetu ecana abacashacuare.

—Tata ecana, nebacacue ique. Ecuana riyaque epu ebari juquedya ecuana tumeque etare yusu epuna Artemisa mui ishuque etare naru ishuque. Tumbaedy a ecuanajadyatu narutaqui yusu epuna cueya cueya barepa juque epacacaque. Dutya quejaquetu bahue riyaque. ³⁶ Dutyatu bahue ecuanaja riyaque bataquique. Nebacatanacue. Jidama jumaradya jida inime netupura. ³⁷ Yanacana tuque micuana tumeque ecuita ecatsé behua. Ni ai buchique tatsejatu chirihua ama Artemisa mui ishuque etare juque. Jidama tatse quisaratihua ama yusu epuna ecuanara muiyaja ishu. ³⁸ Demetriora, peya cuana cueya cueya mere puji cuanara ni baya ai tatsera jidama ayaju, pacua ecana inime cuana bajejequi cuanaja yacuaju. Pacacuejatiti ecana tuna eje bucha juhuaque. Dutya peadya peadya ecana paquicuenetiti. Jadique tu tuyu. ³⁹ Aniya ni micuanaja tumeque inimeju quisarati aishuque, casitatitaqui ecuanaja, ecuanaja cacuat-sashati eque, jida tsehue inime bajeje ishu. ⁴⁰ Riyaque huecaca ecuana tuyu ama juhua ecuanaja cacuat-sashati eque ama. Ecuana eje bucha juhua equetu enaruquique Roma juque dyaque ecahuaitiu ecuana tsehue. Ecuana tuatsehue cahuaitihua bucha tura ecuana ebau. Bacaduraya ni tura ecuana “¿Eje bucha juatsu micuana Efesoju capuritichine?”, ai cuejataqui ama tuque ecuana ebau, —jadya tujatu ecana acuare.

⁴¹ Jadya quisarati amena aatsu tujatu ecana cuadishacuare tunaja etare cuanaju tuhua caradatihua cuanaque.

20

Pablo Macedonia yahuaju, Grecia yahuaju jadya cuacuareque

¹ Dutya ecahuaiti cuanaque tunaja etareju diruterehuajutu Pablora ihuaramerecuare Jesús queja ecatyati cuanaque, tuna tuja ai cuejataquique cueja ishu. Tuna cueja amena aatsu tujatu ecana macacatsu isarabarecuare. Tuna isarat-sutu cuinanacuare Macedoniaju cuaishu. ² Cueticuaretu epu cuana Macedonia yahua eque. Baticuare tujatu tura icuene cuita Jesús queja catyati tsahuacuare cuanaque. Dyaque tujatu ecana tuja quisarati tsehue casaturacuare. Jadya juu jadya juatsutu Grecia yahuaju cuacuare. Tumeque yahua nucadyatu Acaya bacani jucuare. ³ Tuhuatu anicuare quimisha badi. Cuahuietu amena jucuare Siriaju ena eque. Israelita cuanaratu Pablo iyecara acuare.

—Tuque cuaba eque cuayaju neiyera, —jadyapa tunajatu inime tupucuare.

Jadique bahue juatsutu Pablora inime tupucuare:

—Yahua eque padirunuca —jadya.

Yahua eque cuaatsutu cuetinucacuare Macedonia epu cuana eque. ⁴ Jesús queja ecatyati cuanaratu tajicuare. Jucuare tuna: Sópater, Aristarco, Segundo, Gayo, Timoteo, Tíquico, Trófimo jadya. Sópater tu Berea juque jucuare. Tuquetu Pirroja ebacuaque jucuare. Aristarco, Segundo jadya tatse Tesalónica juque jucuare. Gayotu Derbe juque jucuare. Tíquico, Trófimo ecatsetu Asia yahua juque jucuare. Riyaque pacarucuratu Pablo tajicuare tuque Filiposju cuayaju. ⁵ Jueticuare tuna Filiposju; ique Lucas riyaque quírica huenequi juyaque tuhuadya jucuare. Tume tuna pacarucu cueticuare ecuana Troasju ihuanati ishu. ⁶ Amena chine pan levaduramaque ara ishuque chine cuetihuaju ecuana ique Lucas, Pablo, peya cuana jadya cuacuare Troasju. Cuaba ebari tsehue ecuana ebute juque cuinanacuare. Pishica huecaca juatsu tuque ecuana peya cuana Troasju adadinucacuare. Tuhua ecuana pacarucu huecaca netinaticuare.

Pablora Jesús queja ecatyati cuanaque Troasju aniya cuanaque baticuareque

⁷⁻⁸ Domico huecaca ecuana Pablo tsehue cuacuare cuanaque ecuana caradaticuare Jesús queja ecatyati cuana tsehue. Casitaticuare ecuana pan ara ishu, Jesús majucuareque adeba ishu. Cuarto ebariju quimisha ishuque pisoju ecuana caradaticuare. Pablotu Jesúsja quisarati bahuitya jucuare. Huecacape pijidya cuanucaya tibu tura ecuana metapatya tupu bahuityacuare. Jetiamatu ude cuana jujunetibarecuare

tumeque cuartoju. ⁹ Peadya ehue ebari Eutico bacanitu juanicuare tuhua huetanaju. Tahuicaraqetu juanicuare, Pablo tsunuda quisaratiya tibu. Amena tahui tahui juyaquetu pacacacuare yahuaju, quimisha ishunque piso juque. Pacacahua baatsu ecuana butecuare tuque huesara. Emajuque tunajatu nityatsuraticuare. ¹⁰ Tumetu Pablo butetsu cuinanacuare etare juque. Majuhuaquetu baticuare. Emaju dyaquetu jarabutecuare. Macacanaticuare tura, Yusuja casa tsehue chacha nityatsuranuca ishü.

—Peya inime nejuume. Yusurari yudijidya chacha nityatsuranucaya, —jadya tujatu ecana acuare.

¹¹ Tume ecuana Pablo dutyadya ecuana jadya tsuranucacuare ecuana casitatihuaque cuartoju. Tsuradirunucatsutu Pablora pan cuesicuare. Cuesitsu tura ecuana peadya peadya ecuesi tyabarecuare. Aracuare tuque ecuana Jesús majucuaque adeva ishü. Amena ecuana pan araqueretsu ecuana Pablora Jesúsja quisarati cuejanucacuare huecaca japadama tupu. Huecacayajutu tuhuaque cuanucacuare ehüachi eque. ¹² Tumeque ehue ebari pacacatsu majuhuaquetu chacha junucacuare. Dujucua tuna etareju. Dutyaja tunajatu jida inime jucua, tuque chacha junucagua baatsu.

Pablo Troas juque, Miletoju cuacuareque

¹³ Ecuana ecuana icuene cuacuare. Cuacuare ecuana cuaba ebari tsehue Asón epu tupu, Pablo tuhua ihuara. Cuama jarira tura ecuana jadya acuare: “Ique ehüachi eque cuaya Asón tupu. Tuhüadya necatsurutira” jadya. ¹⁴ Tuhua ecuana catsuruticua Pablo tsehue. Cuaba ebari tsehue ecuana dutyadya Asón juque cuanucacuare. Cuacuare ecuana Militene epuju. ¹⁵ Tuhuaque cuinanatsu ecuana cueticua peya huecaca Quío tuyu eque. Huecacape ecuana jaratsuraeticua ebute Samos ecububuju. Canajaracuare ecuana Trogilioju. Peya huecaca ecuana jueticua Miletoju. ¹⁶ Cuanucacuare ama ecuana Efesoju, Pablo Asia yahuaju tsunutacarama juya tibu. Huenanacua retu Pentecostés chine ishü Jerusalénju jueticara juatsu.

Pablora Jesús queja ecatyati cuanaque naruqui cuanaque Efeso juque isaracuareque

¹⁷ Arepa Efesoju cuaishu emajaca aijama jucua ama buchatu Pablora quisarati cuadishacuare tuhua Jesús queja ecatyati cuanaja huaraji cuana queja:

—Nebanacue ique Miletoju ebajarara cuita, —jadya tujatu ecana cuejamerecuare.

¹⁸ Tuna junatihüajutu Pablo tuna tsehue quisaraticuare:

—Tata ecana, micuana micuana bahuedia ique eje bucha jucuareque Asiaju junametse jucuare eque riyaque huecaca tupu. ¹⁹ Dutya huecaca ique micuana tsehue jucuare patya tuque Ecuana Cuatsashaquique merecuare. Ique micuana ducu inime metse ama cabaticuare. Dyaque peya inime jucuare Efesoju cuanaque cajuchatiya baatsu; pacuare ique. ²⁰ Cuejajacacuare ama micuana tsahua ishü cuanaque quisarati, micuanaja jida ishü. Bahuityajacacuare ama micuana jidaque quisarati. Caradati ishü cuanaque etare cuanaju micuana dutyara bayaju bahuityacuare. Tumbaedia micuanaja etare cuanaju micuana bahuityacuare. ²¹ “Necacuaeticue inime Yusu iyuhueda banuca ishü. Ecuana Cuatsashaqui Jesucristo queja necatyaticue”, jadya micuana quisarati cuejajacacuare ama, israelita cuana, israelita ama cuanaque jadya.

²² “Iyacia cuaya Jerusalénju, Yusuja Espiritura cuadishayaju. Juhua aba eje bucha cuana taa tuhua jutiya. ²³ Camadya ique bahue tuhua dyaque canerecatidadiyaque. Bahue ique tunara etare apudaju ishadadiyaque. Jadya Yusuja Espiritura bahue amerechine ique epu cuana tupu juneniya patya. ²⁴ Jadya ama bucha ique bajida juya ama. Jidama ama tuque inime baya tunara ique iyeyaju. Eratu jida baya ecue mere atilla ishü, Ecuana Cuatsashaqui Jesúsra ique amerehuaque. Tura ique cuadishahua jidaque quisarati cuejara. Cuadishahua tura ique Yusura ecana iyuhueda bayaque cueja ishü. Ique pureama juya tura ique mere amerehuaque mere ahua cabatitsu.

²⁵ “Icuene ique cueticuare micuanaja epu cuana eque eje bucha narue Yusura dutya ecuita cuana ayaque micuana cueja juyaque, micuana Jesús queja catyati ishü. Ique caadebatiya micuana ni ejeque buchique riyaque yahuaju banucayaque ama. ²⁶⁻²⁷ Micuanaja epu cuanaju junenicuare patya micuana cuejacuare ejitaju micuana eje bucha inajacameree Ijahua quejaque Yusura eauque. Tehuacuare ama micuana Jesúsja quisarati. Dutya micuana pana cueja acuare. Jutaquiju ejeque ni Jesús queja catyaticarama juya, ique ama jucha metse. Micuanaratu adebayadya riyaque yunerique. ²⁸ Jutaquiju neaniajecuedya jutidya jida Yusuja biji eque. Nenaruajecuedya jutidya jida Jesús queja ecatyati cuanaque. Yusuja Espiritura micuana iyacuare, ecuatsashaque bucha tuna naruqui juishü. Uhuisha naruquira tuja uhuisha cuana naruya bucha narue ecana neacue. Tuna tuna Jesús jaque, tuque tuna jiteque ami quijehuetitsu majuhua tibu. ²⁹ Eratu adebaya ique amena micuana tsehueju ama dyaque jidama cuanaque junabuque micuana queja. Pusha pusha

tunara micuana abuque, Jesús queja nimee amerejacacara aatsu. Iba mureda cuanaque uhuisha cuana ducu ejuu bucha tuna jubuque. ³⁰ Arepa umae micuana tsehue casitatitsu Jesús pureama abahue ama bucha tunara cuitadya micuana pusha pusha bahuityabuque. Tunara micuana Jesús queja nimee amerejacacara abuque. ³¹ Jutaquijudya necanaruticue tunara micuana ijahue eauju. Mara mara micuana bahuityahua Jesúsja quisarati. Huecada tupu, meta tupu jadya micuana tuque eje buchique cuejajacahua ama. Dyaque iyuhueda micuana baatsu, micuana Jesúsja inime eqe ama juya baatsu, paana caca capajacashati bahue juhua.

³² “Inime netupucue era micuana cuejahuaaju, micuana ecue eatsehuequi cuanaque. Yusura nenarucue tuja quiyuhuebati tsehue. Yusuja quisarati dyaque inime tupuqui neacue. Micuanara ni quisarati inime tupuqui ajacaya ama, dyaque micuana cabahuityatiajeya Yusuja Espirituja biji eqe ani. Yusura micuana tyabuque dutya jidaque tura tuja cuanaque tyaana ahuaque tura cuatsashaya eqe aniya cuanaque. ³³ Eratu micuana tsehueju Ecuana Cuatsashaquique merehua. Bijiserihua ama tuque peyaja ai aniyaque, chipiru, ejutuqui ni ai buchique. ³⁴ Ecue emetucu tsehue cuitadya ebiti etare caca cuana mere juhua, era, ique tsahuaqui cuanara jadya sareya cuanaque cadaditi ishu. Adebayadya tuque micuanara. ³⁵ ‘Mere nejucue micuanara ai sareyaque cadaditi ishu. Netsahuacue nrecada cuanaque’ jadya micuana cuejajacahua ama. Neadebacue beru Ecuana Cuatsashaqui Jesucristo jadya jucuareque: “Dyaque jida tu peya ai tyau, ecuanaja tacaja ishu ai radanityaya bucha ama” jadya. Neadebacue riyaque, —jadya tuna Pablora acuare.

³⁶ Jadya quisarati amena aatsutu Pablo nuyucuafe Efesoju cuanaque Jesús queja ecatyati cuanaque naruqui cuana tsehue. Dutya tuna Yusu tsehue quisaraticuafe. ³⁷ Dutya tuna pacuafe, Pablora amena jaca ishu isaraya cabatitsu. Macaca, dyahua, isara jadya tunajatu Pablo acuare. ³⁸ Dyaque peya inime ecana jucuare, Pablora “Banucaya ama micuanara ique riyaque yahuaju”, jadya ayaju. Jadya aatsu tunajatu tajiticuafe cuaba ebari tupu ebuteju.

21

Pablo Jerusalén epu ebariju dirucuafeque

¹ Jesús queja ecatyati cuanaque naruqui cuanaque, ecuanara diruyara isaratsu ecuanara cuaba ebariju anibutecuare. Dirucuafe ecuanara Cosju piisi. Peya huecaca ecuanara judirucuafe

Rodasju. Tuhuaque dirunucatsu ecuana judirunucacuare Pataraju. ² Pataraju judirutsu ecuana dadinucacuare peya cuaba ebari Fenicia yahuaju cuayaque. ³ Cueticuare ecuana Chipre bacani ecububu peque eque. Diruyaque tuque ecuana jani eque amaca iya acuare. Dirucuaedy a jutidya ecuana cuaba tsehue Siria yahua tupu. Jaratsuradirucuaare ecuana Tiro ebuteju, cuaba aquereniqui cuanaja ai iyadirutaqui jucuare tibu. ⁴ Cuaba juque cuinanatsu ecuana cuacuare Jesús queja ecatyati cuanaque sarera. Tuhua cuana tsehue caturutitsu ecuana anicuare pacarucu huecaca. Yusuja Espiritura Pablo Jerusalénju canerecatidadiyaque bahue amerehuaju tunajatu

—Cuaume, —jadya acuare.

⁵ Jadya ama buchatu Pablo bahuedya jucuare tuque tuhua cuataquique. Pacarucu huecaca juatsu ecuana cuinanacuare. Ecuana amena cuita diruyaju ecuana Jesús queja dutya ecatyati cuanara ebuteju iyabutyaticuare. Deca cuana, epuna, ebacua jadya tuna ebuteju cuacuare ecuana tsehue. Tuhua enaja ecuaqueja mejijiju ecuana nuyucuare, Yusu tsehue quisarati ishu.

⁶ Yusu tsehue quisarati amena juatsu, tuque ecuana ecan isaracuare:

—Diruya ecuana, —jadya tuque ecuana ecan acuare Tiroju cuanaque.

—Nedirucue taa, —jadya tunara ecuana acuare.

Jadya juatsu ecuana anibutecuare cuaba ebariju. Anibutehuaju tuna dirubarecuare tunaja etare cuanaju.

⁷ Tiro juque ecuana cuinanacuare. Judirucuaare ecuana Tolemaidaju. Tuhua tupu ecuana ena eque dirucuaare. Cuaba ebari juque cuinanatsu ecuana cuacuare tuhua Jesús queja ecatyati cuanaque isarara. Tuna tsehue ecuana anicuare peadya huecaca. ⁸ Peya huecaca ecuana Pablo tsehue cuaya cuanaque cuinanacuare. Judirucuaare ecuana Cesarea epu ebariju. Cuacuare ecuana Felipeja etareju. Tudyatu Jesúsja ecuadisha cuanaque etsahuaquique jucuare tunara béru pacarucu etsahuaqui cuanaque mepecuare patya. Tuhuaqueja ecuana eje uma huecaca cuana piji aninaticuare. ⁹ Anicuare tujatu pushi ebacujuna cuanaque, ahuema cuanaque. Tumeque epuna cuanatu Yusu equeque quisarati cuejaqui cuanaque jucuare. ¹⁰ Tuhua ecuana eje uma huecaca cuana piji anicuare. Ecuana tuhujatu jueticuare ecuana queja peadya ecuita Agabo bacani. Judea yahua juquetu jueticuare. Tumequetu Yusu equeque quisarati cuejaquiedya jucuare. ¹¹ Eje uma cuejadyatu Yusura acuare

eje bucha judadibuqueque. Huicacuare tujatu Pabloja cinturu. Cinturu huicatsutu Agabo carisitacuare ehuachi ecatse, ebi ecatse jadya cinturu tsehue. Jadya carisititsu tujatu Pablo cuejacuare:

—Pablo, cuejaya mique era Yusuja Espiritura ique bahue amerehuaque mique eje bucha atayaque. Israelita cuanara pami Jerusalénju huachi risi birisi jadya aya. Ique ebi ecatse, ehuachi ecatse jadya carisitihua bucha, jadya risipa tunarami aya mique cinturu metseque. Inamereya tunara mique israelita ama cuana queja, —jadyatu Agabora Pablo cuejacuare.

¹² Jadya bacatsu ecuana Pablo tsehue quisaraticuare. Cesareaju cuanaque, ecuana jadya datse ecuana canerecaticuare tuaqueja:

—Cuaume Jerusalénju.

Enapacuare tuque ecuanara, tumebaedya Cesareaju cuanara Pablo tuhua eje bucha judadiyaque adebatsu.

¹³ —¿Eje bucha juatsu micuana paya? ¿Eje bucha juatsu micuanara nime huallacara aya Jerusalénju cuaishu ama? Ecuana Cuatsashaquira amerecara ayaque cuita camadya tuque acara aya. Risitana ishuhua camadya ama cuaya, tumebaedya iyeta ishuhua, tuja jadya inime juyaque juatsu, —jadya ecuana Pablora acuaire.

¹⁴ Tura ecuana bacacarama acuaire. Eje bucha abacashataquima baatsu, tuque ecuana cuejajacuare.

—Paju Ecuana Cuatsashaquija biji eque, —jadya ecuana jucuaire.

¹⁵ Eje uma huecaca tarepe juatsu ecuana cabajejeticuare abu ishuhua cuanaque. Cabajejetitsu ecuana cuacuare Jerusalén diji eque. ¹⁶ Jesús queja ecatyati cuanaque uma Cesareaju aniya cuanara ecuana tajiajecuare. Jerusalénju junatihuaaju tunara ecuana dujucucuare Mnasónja etareju. Tuquetu Chipre juque jucuaire. Amena eje uma maratu Jesús queja ecatyatique jucuaire. Tuaqueja ecuana anibacuare.

Pablora Santiago baticuareque

¹⁷ Ecuana Jerusalénju junatihuaaju ecuana Jesús queja ecatyati cuanara pureama tsehue batscuare. ¹⁸ Huecacatsutu Pablo cuacuare Santiago queja, Jesús queja ecatyati cuanaja huaraji queja. Ecuana ecuana cuacuarenya tuatsehue. Ecaradatinucadya tuna jucuaire tuhua Jesús queja ecatyati cuanaja huaraji cuana. ¹⁹ Pablora tuna isaracuare. Isara amena aatsu tujatu ecan cuejacuare:

—Ique equetu Yusura israelita ama cuanaque Jesús queja catyatishahua, —jadya tujatu ecan acuaire.

²⁰ Tuque jadya bacatsu tunajatu Yusu pureama acuaire:

—¡Dyaque jida taa Yusu!

Yusu pureama amena aatsu tunajatu Pablo isaracuare:

—Isaraya mique ecuanara, ecuanaja ecuana tsehuequique. Jetiamatu israelita cuana Jesús queja catyaticuare. Eje uma mil tuna catyatihua. Miquemi bahuedya. Arepa tuja cuanaque juya ama buchatu eje uma juya, dutyapa ecuana Moisésja cacuatsashati eque jutaqui jadya.²¹ Aniyari quisarati sicacada micue ishu. Mira patu bahuityaya israelita cuana israelita ama cuana ducu aniya cuanaque: “Moisésja cacuatsashati eque nejujacacue. Netubujacacue micuanaja bacua cuana, Yusu jaque jadique adeba ishuque. Ecuana bahue eque neanijacacue”, jadyapa tuquemi ecuanaja ata cuana bahuityaya. Jadyari israelita cuana micue ishu quisaratiya.²² Masadamadya tuna bahue juya mique junahuaque. Bahuedya ecana amerecue mira Moisésja cacuatsashati bijidamadurayaque ama, israelita juya tibu. ¿Eje buchami juya?²³ Ecuana cuejaya eque jucue. Riya rehua pushi ecuita Jesús queja nimee cuanaque, Yusu ai tyaana juhuaque. Baretaqui ama tunajatu quisarati.²⁴ Necuacue tuna tsehue pae cuana queja. Tuna tsehue apeedy acae cacuatsashati eque Yusu queja jida cajuchatima cabamereti ishuque. Tsujetyacue tunaja manu tunara aana eaque ahua tibu. Eshu ecana pacatimere, tunaja aana eaque ahua jadique caadebamereti ishu. Dutyaja yacuaju Moisésja cacuatsashati eque juyaque baatsutu rehuaque israelita cuana bahue juya tunara mique eje buchique bacatsahuaque pusha pushaque. Tume tuna bahuedya juya yuneridya mique Moisésja cacuatsashati eque juyaque.²⁵ Ecuana tuna amena cuejacuaredya israelita ama cuanaque eje bucha juishuque ama. Cuadishacuare tuque ecuana quirica israelita ama cuana Jesús queja ecatyati cuanaja ishu. “Nearaume erami yusu cueya cueya cuanaja yacuaju iyahuaque. Neijiume ami. Nearaume erami cuanubi, uu jadya pana sucururusha ami amaque. Micuanaja caquemitiqueremaque nejaraquereume”, jadya tuque ecuana quirica cuadishacuare icuene, —jadya tunajatu Pablo acuare.

²⁶ Tumetu Pablo huecacatsu piji cuitadya cuacuare pushi ecuita tsehue. Tuna tsehue apeedy tujatu acuare cacuatsashati eque Yusu queja juchama cabamereti ishu. Cuacuaretu Yusuja etareju. Tuhuatu pae cuana tsehue quisaratiticuare:

—Pacarucu huecacaju tuque ecuana Yusuja jida juchama baishuque atillaya. Tumeque huecaca tuque ecuana uu

cuana beya iyetsu micuanaja Yusu tya ishu, —jadyatu Pablora acuare pae cuana.

Israelita cuanara Pablo Yusuja etareju inacuareque

²⁷ Pablotu Yusuja etareju jucuare. Umae israelita cuana Asia yahuaju cuanaratu bacuare tuhua. Pabloja ishu tuna jidama quisarati acuare dutya tuhua cuanaque tuatsehue cahuaitishaya tupu. Tsajaja, inati tunajatu acuare. ²⁸ Quiquecuare ecana:

—¡Netsahuanacue ecuana, ata cuana! Neinara riyaque ecuita. Riyaquedya ri dutya queja ecuita cuana yunerique ama bahuitya juyaque. Riyaque ri ecuanaja baba cuanaja bahue juhua cuanaquepa jidama jadya juyaque. Moisésra cuatsashahua equipa jutaqui ama, jadyari juya. Jidama rejari quisarati aya Yusuja etareja ishu. Iyacia rejari rehua nudyahua peadya ecuana jaque ama, israelita ama. Jadya asicaturae tujatu Yusuja etare aya, —jadya tuna pusha pusha jucuare.

²⁹ Icuenedyapa tunajatu Pablo epuju Trófimo tsehue juneniyaju bacuare. Tumeque tu israelita ama. Efeso juquetu jucuare. Cahuaiticuare israelita cuana, Pablora tumeque ecuita israelitaque ama Yusuja etareju nubiquerehua bucha baatsu. ³⁰ Dutya jujeri cuitatu Jerusalén juque ecuita cuana cahuaiticuare. Masadama cuita tuna tsajajabecuare. Caradatitsu tuna inacuare Pablo. Inatsu tuna repetsu, cuinanashacuare etsecueju Yusuja etare juque. Repe cuinanashatsu tunajatu yume teri etsecue cuana acuare, tuque catachiti ishu nubitinuca ishu ama. ³¹ Ejera cuanatu mil sudaru romano cuana cuatsashaquique Jerusalén juque cuejaticuare:

—Dutya epu jujeritu capurutiya. Pablo tunajatu iyecara aya, —jadyatu ejera cuana cuejaticuare.

³² Jadya bacatsu tujatu ihuaracuare sudaru cuana, sudaru cuana cuatsashaquique jadya. Tuna tsehuetu Pablo queja tsajaja cama cuacuare. Banaticuare tuna tunara Pablo ebi tsehue ayaju. Mil sudaru cuana cuatsashaquique, tuja sudaru cuana tsehue baatsu, tunajatu ajacacuare Pablo. ³³ Tumetu mil sudaru cuana cuatsashaquira jipeticuare. Inamerecuaretu sudaru cuana queja Pablo. Beta sogá tsehue tunajatu ebi ecátseju risicuaré. Jadya aatsu tujatu caradati-hua cuanaque bacaduracuare:

—¿Ejeque ri riyaque ecuita? ¿Eje buchari juhua? —jadya tujatu ecana acuare.

³⁴ Tumetu ecuita cuana dyaque cuita quiqueterecuare. Umae cuanara bape, peya cuanara bape cueja jadya tuna

jubarecuare. Dutya tupu quisarati ayaque ama tuna qui-
queterecuare. Jadya tibutu mil sudaru cuana cuatsashaquira
adebataqui ama bacuare eje bucha juatsu tuna sicacada
juyaque.

—Nedujucue riyaque ecuita ecuana aniyaju, —jadya tujatu
tupa sudaru cuana acuare.

³⁵ Jadya ayajutu sudaru cuanara Pablo dujucuaré tuna
aniyaju. Ecuita jetiamaratu tupujudya aajecuaré. Patacaju
junatitsutu Pablo sudaru cuanara medequetsu dujucuaré
ecuita cuanara einaju. Dyaque cuita cahuititsu tunajatu
iyecara acuare. ³⁶ Dutya tuna tuque tupuju quiqueajecuaré:

—¡Neiyecue tumeque! —jadya tuna quiqueajecuaré.

Pablo ecuita cuanaja yacuaju quicueneticuaréque

³⁷ Tunara sudaru cuana aniquique etareju ishacara aya-
jutu tura jadya acuare sudaru cuanaja huaraji:

—¿Equisaratishaudya mira riyá piji? —jadyatu Pablora
acuare griego yana eque.

Huaraji ecuatsashaquiratu quemitsacuare:

—¿Griego yana ni taa mi bahuedya? ³⁸ ¿Mique ama mi
Egiptoju cati inime jucuaréque? Amena eje uma mara
cuanatu “Roma juque enaruquira cuatsashaya eque nejura
ama”, jadya jutibunecuaré. Tuquetu pushi mil ecuita quiyeti
puji cuana cuatsashaquique jucuaré. Riyá cuitadya tujatu
ecana anitaya amaju dujucuaréque. ¿Mique ama mi tumeque
ecuita?

³⁹ —Aijama, tuque ama ique. Ique israelita. Tarsoju
ecuinanaque ique. Cilicia yahua juque ique. Eratu isaracara
aya ecuita cuana. Nenerecabacue ique. Nequisaratishacue
ique, —jadyatu Pablora acuare.

⁴⁰ —Isaracuedya ecana, —jadya tujatu acuare.

Pablotu netitsuracuare patacaju tsura ishujú. Emetucu tse-
huetu ecana cuejacuaré ecuita cuana abacatana ishú. Tuna
abacatanahuaju tujatu ecana isaracuare israelita cuanaja
yana eque, hebreo bacani eque.

22

¹ —Tata ecana, nebacacue ique. Ecue ata cuana, nebacacue
ique, era ique quicueneti ishú quisarati ayaju, —jadya tujatu
ecana acuare.

² Tuque quisaratiyaju bacatsu tuna jucuaré:

—Nebacacue. Ecuana ja yana eque cuitadyatu quisaratiya,
—jadya tuna jubarecuare.

Tume tuna dutya abacatanaterecuare tuque pana baca
ishú. Pablora tuna isaranucacuare:

³ —Ique israelita. Tarso Cilicia yahuaju cuinanacuareque
ique. Catemuticuare rehua Jerusalénju. Gamaliel tu

ique bahuityaqui jucuaque. Turadya ique dyaque jida bahuityahua ecuanaja baba cuanaja bahue eque cuanaque. Dutya huecacatu era muicara acuaire ecue dutya ducuta inime tsehue Yusura cuatsashayaque, dutya micuana iyacua juya baedya. ⁴ Tume patya ique dyaque ecahuaiti jucuaire Jesús queja ecatyati cuana tsehue, iyacuaque quisarati ejenequi juhua cuana tsehue. Dyaque ecana ijahue ijahue acuaire. Inamerecuare ecana. Deca, epuna jadya ecana etare apudaju ishamerecuare. Iyemerecuare ecana. ⁵ Pae dyaque muidaquetu dyaque jida bahue ique eje bucha juhuaque, tumbaedya israelita emuiba cuanaque. Tunaradya tyacuare quirica Damascoju israelita cuana aniya cuana queja duju ishú, Jesús queja ecatyati cuanaque ina ishú. Cuacara jucuaire tuna rehua Jerusalénju risitsu beti ishú. Dyaque tuna nerecaturacara acuaire, —jadyatu Pablo cacuejaticuare.

Pablo eje bucha cacuairetie inime jucuaque cacuejaticuaque

(Hch 9.1-19; 26.12-18)

⁶ Isaranucacuare tujatu ecana:

—Damascoju cuayaque piji dyane juajecuaire. Barepatya huie muya jutidya barepa eque huecara pana udatilla atacuare. ⁷ Hueca baatsu ique huipuchitanatsu yahuaju rumucuta rihui jucuaire. Rihuitsu jarayara tuque etsuri bacacuare: “Saulo, Saulo, ¿eje bucha juatsu mira nerecaturaya?” ⁸ Jadya bacatsu tuque bacaduracuare: “¿Aira isaraya?” jadya tuque acuaire. “Ique Jesús Nazaret juque idya mira nerecaturayaque,” jadya tura acuaire. ⁹ Eatsehue cuaya cuanaque tuna dyaque jecutanacuare. Arepa hueca baya ama bucha tunajatu Jesús quisaratiyaju bacacuare ama. Adébataqui ama tunajatu bacuare. ¹⁰ “¿Ai mira amerecara aya, Ique Cuatsashaquique?” jadya tuque acuaire. “Netitsuracue. Damasco piisi tuyu cuau jucue. Tuhua tunarami cuejatsaya mique ai jutaquique”, jadya tura acuaire. ¹¹ Tumeque hueca dyaque huecadara atuca secacuare. Ique tajiaje juya cuanara dujucuaire ebiju inatsu, Damascoju junatiya tupu.

¹² “Tuhuatú anicuare Ananías. Tumeratu dyaque Yusu muicuare. Turatu muibajacacuare ama Moisésra cuatsashahua cuanaque. Dutya israelita cuana Damascoju anicuare cuanaratu “Ananías tu ecuita dyaque jidaque” jadya acuaire. ¹³ Tuquetu jecuaire eaqueja. ‘Bandía, Saulo. Miquemi ecue eatsehuequique. Ecuaná Cuatsashaquira iyacua cuita capetatinucacue’ jadya tura aticuare. Tura jadya ayaju cuitadya capetatinucacuare. Capetatitsu bacuare netiyaju. ¹⁴ Ananiasra isaranucacuare: ‘Yusu ecuanaja baba cuanara

muicuarerami mepechine. Turami mepechine tuja inime eqe dyaque jida juishuque adebamere ishü. Jesús cuitadya baishu turami mepechine. Tumeque Jesús mira bachineque: tu Tuyu Neri bacanique. Turami mepechine tuque micue quisaratijaju baca ishü. Bacachinedya tuquemi amena. ¹⁵ Jadyami Yusura ahua, micue dutya queja cuanaque cueja ishü, mira bacahuaque bahuaque jadya cueja ishü. ¹⁶ ¿Eje bucha juatsumi tsunutaya? Netitsuracue. Cutsamereticue Ecuana Cuatsashaquija ebacaniju, tuja micue jucha cuana apupasha ishü bacayaque. Jadya inime cacuaretie jucuaire, —jadyatu Pablo cacuejaticuaire.

Pablora tuna eje bucha cuadishatanae israelita ama cuana queja jucuaireque cuejacuaireque

¹⁷ Cacuejatinucacuare tuque:

—Juetinucacuare ique rehua Jerusalénju. Rehua juetitsu cuacuare Yusuja etareju Yusu tsehue quisaratira. Yusu tsehue quisaratiyaque tuque ai cuana tahuiju bucha bacuaire. ¹⁸ Bacacuare tuque Ecuana Cuatsashaquira isarayaju. “Ebararara cuinanahuishacue Jerusalén juque. Eejeneu ama tunajatu mira ecue quisarati cuejayaque” jadya. ¹⁹ “Ique Cuatsashaquique, eje bucha bijidamadurae ni tunara ama rehua cuanara, ique ecue inime cacuaretihuaque baatsu. Dutyara tunara adebaya. Tuna tuna bahue ique icuene dutya caradati ishüque etare cuanaju junenihuaque Jesús queja ecatyati cuanaque sare juyaque. Tunaratu adebayadya era Jesús queja ecatyati cuanaque inatsu ebi tsehue acuare cuanaque etare apudaju ishacuareque. ²⁰ Mique merequique Esteban iyetanayaju, ique tuhuadya jucuaire. Eratu jidadya jutidya bacuaire tunaja iye ishü. Eradyatu naru-cuaire Esteban tumu tsehue iyequi cuanaja tunara dyaque jutuya cuanaque catacatihuaaju”, jadya tuque Ecuana Cuatsashaquique acuare. ²¹ “Cuinanacue rehuaque, Pablo. Erami cuadishaya japada, israelita ama cuanaque ecue quisarati cuejara,” jadya Ecuana Cuatsashaquira acuare tahuiju bucha, —jadyatu Pablo cacuejaticuaire.

Sudaru cuanara Pablo inacuaireque

²² Yusura israelita ama cuanaque tuja quisarati cuejamerehuaque bacatsu tunajatu amena cuejayaju bacacarama acuare. Quiquetibunecuaire ecana:

—¡Neiyecue tumeque ecuita! ¡Pamaju! —jadya tuna quique eqe jucuaire:

²³ Quiquejacacuare ama tuna jadya. Dyaque ecahuaiti tuna Pablo tsehue jucuaire. Dyaque jutuyaque, muru jadya tunajatu ebarucue queja marecuare, Pablo tsehue cahuaityaque

cabamereti ishu. ²⁴ Jadya juya baatsutu mil sudaru cuana cuatsashaquira cuatsashacuare sudaru cuana Pablo sudaru cuana aniquique etareju isha ishu. Bahuetu jucara jucuare eje bucha juatsu ecuita cuana tuatsehue sicacada juyaque.

—Catsacatsa neacue, tuque jidama juhuaque cacuejati ishu. Tura ni ecuana ecuejau ecuita cuana eje bucha juatsu tuatsehue sicacada juyaque, —jadyatu sudaru cuana cuatsashaquira acuare sudaru cuana.

²⁵ Tumetu sudaru cuanara risicuaire. Tunaja catsacatsa ahuietu Pablo quisaraticuaire:

—Ique Roma juque enaruquira cuatsashaya eque aniyaque. Ecuetu aniya enaruquique quiricaju ebacani equiyatique. Micuanara ique catsa catsa acara aya, ique ni inime metse jadya ama juatsu aijama jadique baecuaque. Dujuhua ama micuanara ique jidama inime cuana bajejequi cuana queja, ique catachiti ishu. Tuyu amatu micuanaja ique jadya aishu, —jadyatu Pablora acuare.

²⁶ Jadya bacatsutu cien sudaru cuana cuatsashaqui juhuara cuejaticuaire mil sudaru cuana cuatsashaquique:

—Eje bucha tsehue ama bacue tumeque ecuita. Aniya tujatu quiricaju Romaju enaruquique ebacani equiyatique, —jadya tujatu aticuaire.

²⁷ Mil sudaru cuana cuatsashaquira Pablo bacaduraticuaire:

—¿Yuneridya tuque micue aniya Roma juque quirica cuana?

—Jejee, aniyadya tuque ecue, —jadya tujatu acuare.

²⁸—Jetiama ique chipiru quijehueticuaire Roma juque quirica cuana caquemiti ishu, —jadya tujatu Pablo acuare.

—Ecuetu tsujetyataqui ama jucuare, ique Romajuja quirica cuana aniyaja ebaequa tibu. Tuque jucuare baedya ique, —jadyatu Pablora mil sudaru cuana cuatsashaquique acuare.

²⁹ Jadya tuque juyaju bacatsutu Pablo catsacara juya cuanaque tuque peque netiya cuanaque netisicuacuare, tunara ejera cuana Pablo nerecaturahuaju ecuejauju. Mil sudaru cuana cuatsashaquiquetu dyaque bajida jucuare, Roma juque quirica cuanaquique cadena tsehue risimerehua tibu, jucha metse, jucha metse ama jadique baecuaque risimerehua tibu.

Pablo israelita cuanaja huaraji arida cuanaja yacuaju eje bucha jucuareque

³⁰ Mil sudaru cuana cuatsashaquiquetu baecua jari jucuare eje bucha juatsu israelita cuana Pablo tsehue dyaque ecahuaiti jucuareque. Huecacanucatsu tujatu casitatishanucacuare pae cuanaja huaraji cuana, dutya israelita cuanaja

inime cuana bajejequi cuanaque jadya. Casitatishatsu tujatu sudaru cuana acuare:

—Nebecue Pablo ecuana casitatihaju.

Pablo tuhua jutihujutu sudaru cuana cuatsashaquira israelita cuanaja huaraji cuanaja yacuaju nityacuare.

23

¹ Pabloratu huaraji cuana petacuare. —Ecue ata cuana, ique taa jida jujacahua ama. Jidaque inime ique cadujutijacaya ama Yusuja yacuaju, —jadya tujatu ecana acuare.

² Jadya bacatsutu pae dyaque muidaque Ananías bacani Pablo tsehue dyaque cuita cahuaicuare.

—Ecuatsaju neacue, —jadya tujatu tuque peque netiya cuanaque acuare.

³ Jadya quisarati bacatsutu Pablora acuare:

—Yusura mique dyaque nerecaturacuedya. Mique ecuita cuana ijahue aquiue. Miquemi espique eririque jida piji epepa baeque. Iquepa Moisésra cuatsashahua eque ama juya, jadya mira ique ahua. Tumbae cuitadyatu ejeque catsataqui ama jucha metseque baecuaque. Jutaquiju taa mi midya cuitadya Moisésra cuatsashahua eque ama juya, —jadyatu Pablora acuare.

⁴ —Miratu pae dyaque muidaque ijillahuanaya, —jadyatu tuhua jucuar cuanara acuare.

⁵ —Ecue ata cuana, nenerecabacue ique. Cueyanehua ama tuque era. Baecua ique juhua tuque pae dyaque muidaque. Bahue juatsu tuque quisarati jadya aguena ama juhua. Jaidya tu Yusuja quisarati ehue: “Jidama quisarati tsehue aume ecuatsashaquique” jadya, —jadyatu Pablora acuare.

⁶ Pablotu bahue jucuar uma huaraji saduceo cuana jucuarque, peya cuana bacue fariseo cuana cuare jadique. Jadya tibudya tujatu fariseo cuana petatsu etsuri jebuda tsehue jadya acuare:

—Ecue ata cuana, ique taa fariseodya. Ecue etatatu fariseodya jucuar. Jucha metse jadya tunara aya, era majutsu ecuana chacha netitsuranucaya jadique ejeneya baatsu, —jadya tujatu fariseo cuana acuare.

⁷ Jadya tura quisarati ahujutu fariseo cuana, saduceo cuana jadya tuna cama caquemitsati, caquemitsati jucuar.

—Ni ai buchiquetu Pablora jidama ahua ama, —jadyatu fariseo cuana jutibunecuar.

—Aijama, tudyatu jucha metse, —jadyatu saduceo cuana caquemitsaticuar.

Jadya equetu huaraji cuana dutya tupu nimee ama jucuar. ⁸ Saduceo cuanaratu ejeneya ama emaju cuanaque chacha netitsuranucayaque. Ejeneya ama tunajatu barepaju

Yusu tsahuaqui cuanaque aniyaque. Ejeneya ama tuna espíritu cuana aniyaque. Jadya tuna cuji cuita eju jucuare. Fariseo cuana bacue, jida bahue emaju cuanaque chacha netitsuranucabuqueque, barepaju Yusu tsahuaqui cuanaque aniyaque, espíritu cuana aniyaque jadya. Tuna tuna cuji ama jucuare. ⁹ Jutaquijudya tuna dutya caquemitsati caquemitsati jucuare. Bape bape tunajatu inime tupu jucuare. Quiqueterecuare tuna. Umae fariseo cuana tuna netitsuracuare quisarati ishu. Tunaratu pana adebadya acuare Moisésja cacuatsashati.

—Riyaque ecuitaratu ni ai jidama ahua ama. Ejeque espiritura cuana ni tu isarahua, jadya ama juatsu barepa juque Yusu tsahuaquira, —jadyatu fariseo cuana jucuare.

¹⁰ Jadya bacatsutu huaraji cuana dyaque casada caquemitsaticuare. Dyaque tuna ecahuaiti jucuare peadya cuare peya cuare cuana tsehue. Mil sudaru cuana cuatsashaquiquetu bajida jucuare, Pablo dyaque ujeda eauju. Jadya tibudya tujatu sudaru cuana cuatsashacuare:

—Necuinanashaticue Pablo ecuita ducuque. Nedunjucacue ecuana aniyaju tuhua icuenaquiju, —jadya tujatu ecana acuare.

¹¹ Tumeque metatu Pablo Ecuana Cuatsashaquira cabamereti ishu acuare.

—Banuchi, Pablo. Bajida juume. Cuejataqui tuque micue Jerusalénju cuanaque ique eje bucha juhuaque. Romaju cuanaque tumbaedy a micue ecana cuejataqui, —jadya tujatu acuare Pablo.

Israelita cuanara Pablo iyecara acuareque

¹² Huecacanucatsutu uma e fariseo cuana quisaraticuare Pablo eje bucha iyee aishuque:

—Neiyera Pablo. Arama, ijima jadya nejura tuque iyeya tupu. Iyeya ama ni ecuanara, Yusura nenerecaturara, —jadya tuna jucuare tuna cama.

¹³ Jetiama tuna en jucuare tuque iye ishu. Pushi tunca ecuita dyaque cuitadya tuna jucuare. ¹⁴ Pablo iye ana aatsu tuna cuacuare pae cuanaja huaraji cuana queja, tumbaedy israelita emuiba cuana queja, tuna tsehue quisaratira.

—Dutyara tupudya tuque ecuana inime tupuhua Pablo iye ishu. Tumeque iyetsu piisi araara, ijiji jadya nejura. Jadya ama ni ecuanara aya, Yusura nenerecaturara. ¹⁵ Jadya tuque ecuana inime bajejehua. Micuana uma huaraji cuanara jadyara nebacacue mil sudaru cuana cuatsashaquique Pablo ecuana queja cuadisha ishu. “Ecuana ratu Pablo quisaratiyaju bacacara aya jari”, jadya neacue. Ecuana ecuana ediji jiruru catehua juya tuque micuana queja junatimajudya

iyetsa ishu, —jadya tunajatu israelita cuanaja huaraji cuana aticuare.

¹⁶ Pabloja ebuqueratu bacacuare tumeque ecuita cuanara tuja ecucuque iye ana ayaque. Cuacuaretu ebajarara sudaru cuanaja eanicuareju, Pablo cuejara. Nubitsutu ehue ebari tuatsehue quisaraticuare. Cuejacuare tujatu ai tura bacahuaque. ¹⁷ Pablорatu jadya bacatsu ihuaracuare cien sudaru cuana cuatsashaquique:

—Dujucue riyaque ehue ebari mique cuatsashaqui queja. Aniya tujatu ai cueja ishuque, —jadya tujatu acuare.

¹⁸ Jadya ahuaaju tujatu ehue ebari dujucua Claudio Lisias queja.

—Pablo erisi netiyara ihuaramerehua. Bemerehua tura ique riyaque ehue ebari rehua miaqueja, ai tuja cueja ishuque aniya baatsu, —jadya tujatu acuare.

¹⁹ Tumetu Claudio Lisiasra ehue ebari peya queja duju acuare, tura cuejayaque peya cuanara ebacauju.

—¿Ai mira cuejacara aya? —jadyatu Lisiasra bacadu-racuare.

²⁰ —Israelita cuanaratu ecue ecucu Pablo iye ishu inime bajejehua. Era tuna bacahua tuna cama quisaratiyaju. Metajudya tunarami bacananucaya Pablo micue tuna queja cuadishanuca ishu. “Pabacanuca ecuana quisaratiyaju”, jadyami israelita huaraji cuanara anaya. ²¹ Ejeneume ecana. Jadya ijahuee tunarami acara aya. Pushi tunca cuana ni tuna catehua juya ediji jiruru, ecue ecucu cuetiyaque ihua. “Yusura nenerecaturara ecuana Pablo iyemaque araara, ijiji jadya juyaque juatsu”, jadya tuna jubarehua. Amena tuna ecabajeti. Mira cuadishayaque bahue juyaque camadya tunajatu ihuaya, —jadya tujatu acuare.

²² Tumetu Lisiasra isaratsu cuadishacuare:

—Cuejaume ni ejequedy a jutidya mira ique bahue amerehuaque.

Jadya cuejatsu tujatu cuadishacuare ehue ebari tuja etareju.

Pablo Félix queja cuadishatanacuareque

²³ Ehue ebari diruhuajutu Lisiasra ihuaracuare beta sudaru cuana cuatsashaquique ecatsé.

—Nebajejecue sudaru cuana Cesareaaju cuaishu. Las nueve chineju necuinanacue. Beta ciento sudaru nedujucue. Tumbaedy nedujucue beta ciento nucadya piya junudaque mare bahue cuanaque. Pacarucu tunca tuna cahuayu eque cuanucayadya. ²⁴ Nebajejecue cahuayu Pablo cahuayu dyaque eque cuaishu. Jida narutsu Félix queja nejunatiquerécue, Cesarea enaruqui queja. Chacha tuque Pablo junatishacara aya, —jadyatu Lisiasra acuare sudaru cuanaja huaraji ecatsé.

²⁵ Lisiasratu quirica huenecuare Felixja ishü, tuna tsehue cuadisha ishü.

²⁶ “Riya micue quirica cuadishaya, Félix. Miquemi ecuanaja emuique neri enaruquique. Ique Claudio Lisias. Isaramereya mique era. ²⁷ Cuadishaya rique miaqueja peadya ecuita erisique Pablo bacani. Israelita cuanaratu risimerechine. Iyejerichine tunaja tuque. Tuja quirica cuana Roma juque enaruquija e bacani equiyatique bahue juatsu, cuachine ecue sudaru cuana tsehue tuque inajacamerera. ²⁸ Ique bahue jucara juchine eje bucha juatsu tuna tuatsehue cahuitiyaque. Tume tuque dulumerechine israelita cuanaja huaraji cuana ecasitatiju. ²⁹ Tuque patu Moisésra israelita cuana cuatsashacuare eque ama juya. Jadya ama buchatu tura ni ai jidamaque achine ama ecuanaja cacuatsashati eque. Ecue ishü tu tuyu ama risi, etare apudaju isha jadya aishü. ³⁰ Tume tuque bacatsachine israelita cuanaja amena inime ebajejeque tuque iye ishü. Jadya bahue juatsu tuque miaqueja cuadishaya. Tuque ujeu baqui cuanaque tuna cuejachine: ‘Necuacue Félix queja. Necuejaticue Pablo eje bucha jidama juchineque’ jadya tuna achine tuque inacara juya cuanaque. Riya tupu camadya,”

jadyatu Lisiasra quirica Cesarea juque enaruquija cuadisha ishü huenecuare.

Jadya huenetsu tujatu sudaru cuana tyacuare quirica, Félix tunaja tyati ishü.

³¹ Tumetu sudaru cuanara Pablo dujuacuare tuna cuatsashaquira amerehua baedya. Inatsu tunajatu dujuacuare tumeque chineju Antipatriaaju. Cahuayu eque tuna cuacuare.

³² Peya huecacatu sudaru cuana ehüachi eque cuacuare cuanaque judirunucacuare tunaja eanicuareju. Pablo, cahuayu dyaque eque cuanaque jadya tuna cuacuaredya jutidya Cesareaju. ³³ Tuhua junatitsu tuna Félix enaruqui queja cuacuare. Tyacuare tuna quirica Lisiasra cuadishahuaque.

—Jeedya Pablo, miaqueja ecuanaja cuatsashaquira cuadishamerechineque, —jadya tunajatu acuare.

³⁴ Enaruquiratu quirica isaracuare. Quirica isara amena aatsu tujatu Pablo bacaduracuare:

—¿Ejeque yahua juque mique?

—Cilicia yahua juque ique, —jadyatu Pablora enaruquique acuare.

³⁵ Tuque jadya bacatsu tujatu jadya acuare:

—Mique ujeu baqui cuanaque junahuaju, mique ihuaramereya mique quicuenetiyaju baca ishü, —jadya tujatu Pablo acuare.

—Neiyacue Herodesja etare eaju. Tuhua nenarucue, tuque ehuanaju, —jadyatu Felixra acuare tuja sudaru cuana.

24

Israelita cuanara Felixja yacuaju Pablo eje bucha juhuaque cuejacuareque

¹ Pishica huecaca juatsutu pae dyaque muidaque Ananías bacani junaticuare Cesareaju. Umae israelita cuanaja huaraji cuanatu tuatsehue junaticuare. Tumebaedyatu juticuare peadya ecuita eje bucha juhuaque cuejaquique, Tértulo bacani. Tumeque ecuita cuanatu cuacuare enaruquique Félix queja, eje bucha juatsu ecana Pablo tsehue cahuitiyaque cuejara. Tuna junatihuajutu Felixra sudaru cuana queja Pablo quetimerecuare. ² Tunara Pablo junatiquerehuajutu Tertulora cuejatibunecuare Pablo eje bucha juhuaque. Isaracuare tujatu Félix:

—Isaraya mique era, enaruqui emuinerique. Mira ecuana dyaque jida naruya tibu, aniya ecuana rehua jida inime tsapema, jidama inime cuanaju nubima. Miquemi dyaque bahueque. Miratu dyaque ahua ecuanaja jida ishu. ³ Ecuana naruquique, muiya mique ecuanara. Yusurupai mique ecuana aya, dutya ecuanaja jida ishu mira aya tibu, jida ecuana mira naruya tibu. ⁴ Bahue ecuana mique dyaque cuita emajaca aijamaque ecuana quisaratiyaju baca ishu. Jadya tibudya nerecabacue ecuana. Riya piji cuita ecuana ijacabacacue. ⁵ Jeeque ecuita Pablo ri inime yuamaturaquique. Sicacatura bahue tujatu dutya. Turatu bahuityaya iyacuaque bapeque. Jadya juatsu tujatu israelita cuana dutya quejaque cahuitishaya. Tuquetu Jesús Nazaretju anicuar queja ecatyati cuanaque cuatsashaquique. ⁶ Turatu Yusuja etare asicaturachine, israelita amaque tuhua nudatsu. Ecuannaratu becara achine inime jidama cuanaque bajejequi queja, tudy a inime metse jadya ama juatsu aijama jadique bahue ishu. ⁷ Ecuannara bajejecara ayajutu sudaru cuana cuatsashaqui Lisias ecuana queja cuachine. Dyaque casada tsehue tura ecuana secatichine. ⁸ “Pablo ujeu baqui cuanaque tuna cuataqui Félix queja, tuja inime bajeje ishu”, jadyatu juchine. Jadya tibudya ecuana jehua miaqueja, enaruquique. Midya cuitadya tuatsehue quisaraticue. Tuque isaratsumi bahuedya juya tudy a inime metseque, ecuanara aya bae cuitadya, —jadyatu Tertulora Félix cuejacuare.

⁹ —Tertulotu yuneri quisaratiya, —jadya tuna jucuar dutya israelita cuanaja huaraji cuana tuhua jucuar cuanaque.

Pablo Felixja yacuaju quicueneticuareque

¹⁰ Tumetu enaruqaira tuja emetucu tsehue piye cuejacuare Pablo quisarati ishü. Jadya juatsutu Pablo quicuenetiti-bunecuare Felixja yacuaju.

—Isaraya mique era, emuique neri enaruquique. Ique pureama juya micue yacuaju quicuenetiya cabatitsu, mique ecuana naruquique eje uma mara jucuare tibu. ¹¹ Peadya tunca beta earacana huecaca piji di taa ique Jerusalénju Yusu maira cuachineque. Miquemi bahuedia riyaque yunerique. ¹² Arepa ique Yusuja etareju ama bucha, ni eje tsehue ique cati cati juhua ama. Ecuaita cuana sicacatura ique juhua ama. Ni ejeque buchique tuque Yusuja etareju eje bucha ahua ama, caradati ishüque etare cuanaju, ni eje queja buchique. ¹³ Arepa tunara erapa ecuita cuana sicacaturaya jadya aya ama bucha, yuneri ama tuque. Tunaratu ebamereu ama tunara erapa jidama ahua jadique. ¹⁴ Erami cuejayadya ique eje buchique. Eratu muiya Yusu ecuanaja baba cuanara muicuaque. Muiya tuque era iyacuaque inime eque. Dutya jujeri israelita cuanaratu jeeque iyacuaque inime jidama bucha adebaya. Jadya ama tuque. Eratu ejeneyadya dutya Moisésra hueneacuareque, tunara ejeneya baedyä. Tumbaedyä tuque ejeneya Yusu equeque quisarati cuejaqui cuanara hueneacuare cuanaque, tunara ejeneya baedyä. ¹⁵ Eratu ejeneya majutsu ecuana dutya chacha netitsuranucabuque. Jida cuanaque, jidama cuanaque jadya tuna chacha netitsuranucabuque. Israelita cuanaratu ejeneyadyä. ¹⁶ Jadya tibudyä eje bucha jida jucara juya Yusu cahuaisha ishü ama ni ecuita cuana.

¹⁷ “Eje uma mara cuana peya yahua queja Jesúsja quisarati cuejayaque junenitsu, juetinucachine Jerusalénju. Juetinucachine ique nrecada cuanaque tunaja ishü chipiru sitachineque tyara, tumbaedyä era tyaana ahuaque Yusu tyara. ¹⁸ Umae israelita cuana Asia yahuaju cuanara bachine Yusuja etareju, ique tuhua ecuanaja bahue quibetira cuahuaju. Casitishabarechine ama tuque ecuita cuana. Capuritishabarechine ama tuna era. ¹⁹ Eatsehue tuhua cat-surutichine cuanaque tuna iyacua cuita rehua ama. Tunara ique jidama juchineque cuejacara ayaque juatsu, tuna jetaqui micue yacuaju. Tunajadya ni aniya ique jidamaque juchineque cueja ishü, tunara cuitadya cuejacue. ²⁰ Ique Jerusalénju juchine patya tunara djujuchine israelita cuanaja huaraji cuana dyaque inime metse queja. Umae rena rehadya iyacua cuita. Tunarami iyacua cuitadya ecuejau tunara ique ni aiju buchique jucha metse bachineque ama. ²¹ Tunaja yacuajudyä ique quisaratichine. ‘Iyacua riyaque huecaca micuanara behua micuanaja yacuaju era emaju cua-

naque chacha netitsuranucabuqueque ejeneya baatsudya jutidya' jadya tuque huaraji ecuatsashaqui cuanaque achine. Era jadya ejeneya baatsu tunara iyacua iquepa jidama juchine jadya aya, —jadyatu Pablora Félix acuare.

²² Felixja patu eje uma baca ea jucuares Jesús queja ecatyati cuanara ejeneyaque. Jutaquijutu aijamadya tumeque huecaca cuejanuca ishucue.

—Neiyara jari riyaque quisarati iyacua. Lisias junahuaju tuque bacanucaya micuanara ique cuejacara ayaque, —jadyatu Félix jucuares.

²³ Tume tujatu acuare cien sudaru cuana cuatsashaquique: —Tachicue jari Pablo. Ujeda ujeda camadya aume. Bacuedya jutidya tuja iyuhueda cuanara bayaju. Patyadya tuna tura ai sareya cuanaque, —jadyatu Felixra acuare.

Pablo, Félix, Drusila jadyaja yacuaju quicueneticuareque

²⁴ Eje uma huecaca juatsu cuanatu Félix junatinucacuare tuja ehuanecue Drusila tsehue. Tumeque epunatu israelita jucuares. Felixratu Pablo ihuaramerecuare. Turatu bacanucacara acuare eje bucha catyatie Jesucristo queja juishucue. Tumetu Pablora pana cueja anucacuare Jesucristo eje buchique, eje bucha catyatie tuaqueja jutaquique.

²⁵ —Yusuja biji equa ecuana anitaqui. Ecuana taca pana canaruti ecuana jutaqui, tura cuatsashaya equa juishu. Yusura ecuana aya ecuana cuitadya jutidyapa ecuana capurea-maturatitaqui ama. Tuquepa tuque ecuanaja pureamaturataqui jadya. Ejeque huecaca ecuana dutya Yusuja yacuaju cabameretibuque. Tumeque huecaca tura ecuana abucue ejeque jida, jidama jadya, —jadya tujatu ecatse acuare.

Riyaque quisarati bacatsutu Felixra dyaque inime tupucuares, tuque eje uma jidama juhuaque caadebatitsu.

—Dirucue iyacua. Peya huecaca emajaca aniyaju mique ihuamerenucaya, —jadya tujatu acuare Pablo.

²⁶ Felixratu Pablo inajacamerecarama acuare. Eje uma ihuamere tujatu acuare tuatsehue quisarati ishucue. Quinajacamereti ishucue Pablora chipiru tsehue etsujetyau bucha tujatu inime jucuares. ²⁷ Beta mara junucatsutu Félix enaruqui jujacacuare. Enaruqui jujacatsu tujatu Pablo inajacamerecuare ama, israelita cuana tsehue jida jucara jucuares tibu. Porcio Festotu Cesareaaju enaruqui jutibunecuares Félix cuarequi.

25

Pablo Festoja yacuaju dujutanacuareque

¹ Tumetu Festo judirucuares Cesareaaju, tumeque yahuaju aniya cuanaque narutibuncue ishucue. Quimisha huecaca juatsutu cuinanacuare tumeque epu juque Jerusalénju

cuaishu. ² Tuque junatihua jutu pae cuanaja huaraji cuana tsehue, israelita cuana dyaque inime metse cuanara jadyatu Pablo jidamapa ejuu jadya cuejacuare, Pablo tsehue dyaque cahuaitya tibu.

³—Nerecabacue ecuana. Pablo quetimerrecue. Pajunanuca Jerusalénju, —jadya tunajatu Festo acuare.

Jadya tunajatu acuare, tunara Pablo Cesareaju, Jerusalén dijiju iyecara aya tibu.

⁴ Festora tuna acuare:

—Aijama, Pablo paani jari Cesareaju. Ejetsunue juatsu ama tuhua judirunucaya. ⁵ Umae huaraji cuanatu eatsehue cuataqui. Pablo ni aiju jidama juchine, necuejacuedya ique tuhua tuque eje bucha juchineque, —jadya tujatu ecana acuare.

⁶ Peadya tunca huecaca Jerusalénju aninucatsutu Festo Cesareaju dirunucacuare. Peya huecacatu nubicuare enaruquija inime bajeje ishuj. Nubitsutu tuhua anibuteacuare.

—Nebecue requeja Pablo, —jadya tujatu sudaru cuana acuare.

⁷ Israelita cuanaja huaraji cuana tuatsehue Jerusalén juque judiruhua cuanaque tuna tuhua casitaticuare. Sudaru cuanara Pablo juquerediruhua jutu israelita cuanara jipeticuare. Tunaratu Pablo jidama juchineque cuejatibunecuar:

—Pabloratu dyaque jidamaque ajacaya ama, —jadya tuna jubarecuare.

Jadya ama bucha

—¿Ai cuita jatsu tujatu jidama ahua? —jadya Festo juyaju, ai cuejataqui ama tunajatu bacuare.

⁸ Pablotu jadya jucuare tuta taca catachiti ishuj:

—Eratu ni ai jidamaque ahua ama. Ique israelita cuanaja cacuatsashati eque anijacahua ama. Ique Yusuja etareja ishujidama quisaratihua ama ni riya piji buchique. Eratu ni ai buchique jidama ahua ama Romajuque enaruqui tsehue, —jadya tuna Pablora acuare.

⁹ Fistoratu israelita cuana pureamaturacara acuare. Jadya tibudya tujatu Pablo jadya bacaduracuare:

—¿Cuacarami juya Jerusalénju, tuhua ecue yacuaju quicueneti ishuj? —jadyatu Festora acuare.

¹⁰—Aijama. Cuacarama juya tuhua. Riyadya ique micue yacuaju. Ique iyacua cuita Roma juque enaruquira mepehuaja yacuajudya. Rehuadya bacacue ique quicueneti ishuj quisaratiyaju, Jerusalénju ama. Ique ni riya piji buchique israelita cuana tsehue jidama juma. Miratu adebayadya riyaque. ¹¹ Ique ni huaraji cuanara cuatsashaya eque ama

juya, ique ni aiju jidama juhua, tume tunara paiyedyá. Majucarama amadya juya ique. Yuneri ama ni tunara ique eje bucha juhua jadya ayaque, jutaquiju taa ique aija buchique inatsu tuna queja tyataqui ama. Cuadishacue jutidya ique Roma juque enaruquique dyaque arida queja. César queja cuadishacue. Tura ique pacueja jucha metse, jucha metseque ama jadique, —jadyatu Pablora Festo acuare.

¹² Festotu quisaraticuare tuja dyaque bahue cuana tsehue. Quisarati amena juatsutu:

—“Cuadishacuepa ique César queja. Tura ique pacueja ique jucha metseque, jadya ama juatsu aijama jadique”, jadya mira ahua. Jutaquiju jadya mique aya. Tuequedyá mique cuadishaya, —jadya tujatu Pablo acuare.

Festo ecuari Agripa tsehue Pablo eje buchique quisarati aquerecuareque

¹³ Eje uma huecaca juatsu cuanatu ecuari Agripa, tuja enajique Berenice tsehue, junacuare Cesareaaju, Festo isarara. ¹⁴ Tuhadya tatse eje uma huecaca jucuare. Tuque tuhua-judyatu Festora cuejacuare Agripa, Pablo eje buchique:

—Rehuari aniya ecuita erisique Pablo bacani. Felixratu risimerecuare. Tuque enaruquique jujacayara tujatu inajacamerechine ama. ¹⁵ Ique Jerusalénju juchine patya pae cuanaja huaraji cuana, tumbaedyá israelita cuana emuiba cuanaque jadya tuna jechine eaqueja. Tunaratu Pablo bijidamadura neri aya. Tumeque ecuita patu jidama juchine. Iyemerecuepa. ¹⁶ Jadya bacatsu tuna jadya achine: “Tuyu ama tu ‘Pamaju’ jadya aishu, quicueneti ishú emajaca tyamaque jidamatu juchine jadya cuejaqui cuanaja yacuaju. Romajuja cacuatsashati eque tuque ecuanaja “Pamaju” jadya ataqui ama, tuque icuene quicueneti ishú quisaratishamaque. ¹⁷ Tume tuna jechine rehua. Tuna requeja jehuaju ique tsunutachine ama tuna baca ishú. Huecacape piji cuitadya cuachine ecue inime bajeje ishúju. Tuhua anibutetsu tuque ecuita quetimerechine. ¹⁸ Tume tunara cuejachine tuna ecahuaiti tibudya jutidya. “Riyaqueri Roma juque enaruquija cacuatsashati eque ama juhua”, tunara jadya aya bucha tuque ecue inime juchine. ¹⁹ Jadya eauque, tuna achine: “Pablóratu Yusu muiya ecuanaja baba cuanara ecuana amerecuare eque ama. Tuquetu ejeque Jesús bacani queja nimeeque cuana. Tumeque Jesústu majuhua. Pablora bacue aya: ‘Majuma tuque. Chacha tu enetitsuranuca’ jadya”, jadya ique israelita cuanara achine Pabloju. ²⁰ Eratu adebataqui ama cuita bachine dutya riya cuanaque. Jadya tibudya tuque Pablo bacadurachine: “¿Cuacarami Jerusalénju juya? ¿Catachiticarami juya tuhua ecue yacuaju?” jadya Pablo

bacadurachine. ²¹ Pablotu Jerusalénju cuacarama juchine. “Cuadishacue ique César queja. Tura ique pacueja ique jucha metseque, jadya ama juatsu aijama jadique”, jadya tura achine. Tume tuque ecue sudaru cuana cuatsashachine: “Jida nenarucue riyaque erisique. Tuequedya tuque Romaju César queja cuadishaya”, jadya tuque sudaru cuana achine, —jadyatu Festora Agripa acuare.

²² —Eratu bacacaradya aya quisaratiyaju tumeque ecuita, —jadyatu Agripa acuare.

—Jidadya. Metajudya tuquemi quisaratiyaju bacaya, —jadyatu Agripa acuare.

Pablo Agripa, Berenice jadyaja yacuaju nityatanacuareque

²³ Huecacatsutu juticuare Agripa, Berenice tsehue huaraji cuana jidamaque inime bajeje ishü caradati bahue etareju. Cajututicuarepa tatse ejutuqui jida tsuje arida tsehue. Sudaru cuanaja huaraji cuanara tatse tajicuare. Tumbaedyä epu ebariju ecuita cuana dyaque inime metse cuanaque tuna tatse tsehue nubiticuare. Festotu tuhuadya jucuaré. Turatu quetimerecuare Pablo. ²⁴ Festoratu dutya tuhua ecasitati cuanaque isaracuare:

—Isaraya mique era, ecuari Agripa. Isaraya micuana era, ecuita cuana ecuanaja epu aridaju inime metse cuanaque. Riyadya riyaque ecuita riyaquedya rique ecuana bacani bacachine. Ique Jerusalénju, eje uma israelita cuanatu eaqueja jutichine, riyaquepa jidama juchine jadique cuejara. Tuna tuna jechine rehua tuque jucha metse jadique cuejanuca ishü. Cuejajacama tunara aya tuque iyemere ishü. ²⁵ Quisaratiyaju bacatsu, ecuetu inime juya: “Turatu ni ai buchique jidama achine ama tuque iyetana ishü.” Tura cuitadya ique bacachine Romaju cacuadishamereti ishü, enaruqui Cesarja jucha metse, jucha metse ama jadique cuejatsa ishü. Jadya tura ique bacahua tibu, tuque cuadishayadya César queja. ²⁶ Cuadishataqui tuque ecue quirica, eje bucha juatsu tume erisique era cuadishayaque pana cueja aishü. Jadya ama bucha, ai eje buchique huentaqui ama era baya, ique tura ai jidamaque achineque baecua tibu. Jadya tibudya micuana ihuarahua casitati ishü, micuanaja tuque quisaratiyaju baca ishü. Miaqueja neri neri micue yacuaju rique bemerehua, ecuari Agripa. Micuanara dutyara bacahuaju ni tura ecuejau eje bucha ecue quirica Cesarja ishü cuadisha ishü. ²⁷ Eje bucha cuadisha ataquí ama ejeque erisique jidama ejuque ecuejaque, —jadyatu Festora huaraji cuana acuare.

26

Pablo Agripaja peya huaraji cuanaja yacuaju jadya quicueneticuareque

¹ Tumetu Agripa Pablo isaracuare:

—Iyacia cuita quicueneti ishü quisaraticue.

Jadya ayajutu Pablora ebi huesacuare ecuari isara ishü. Tuque jucuaereque tujatu quisarati atibunecuare:

² —Isaraya mique era, ecuari Agripa. Ique pureama juya, micue yacuaju quisaratiya cabatitsu. Miquemi huaraji dyaque emüique. Israelita cuanara achine, erapa jetiama ai jidama cuanaque achine jadya. Jidadya tu ique micue yacuaju quicueneti ishü, tunara ique eje bucha juchine jadya ayaque pusha pushaque mique bahue juishü. ³ Ecuari Agripa, miratu jida adebaya ecuanara israelita cuanaja bahue. Miratu adebaya ecuanara eje buchique caquemitsati caquemitsati ishü ayaque. Jutaquiju nerecabacue ique; ique quisaratiyaju cahuitima baca acue, —jadyatu Pablora Agripa acuare.

Pablo Jesús queja catyatimajariju eje bucha anie jucuaereque cacuejaticuareque

⁴ Pablotu cacuejatinucacuare:

—Dutya israelita cuanaratu adebayadya ique yuequedya Moisésja cacuatsashati eque jujacacuareque ama. Ecue epuju cuitadya, tumbaedya Jerusalénju jujacacuare ama ecuanaja baba cuanaja bahue cuana eque. ⁵ Riyaque israelita cuanara cuejacara aatsu, pacueja; ique quisaratiyaque tu yunerique. Tunaratu adebayadya ique yuequedya fariseo jucuaereque. Peya cuare israelita cuana bucha dyaquetu fariseo cuana cacuatsashati cuana eque ani ishü. ⁶ Béru yuequedya patu Yusura acuare israelita cuana: “Eratu emaju cuanaque chacha nityatsuranucabuque” jadya. Eratu pana ejenedya aya Yusura eje bucha aana acuareque adadibuqueque. Era jadique ejeneya baatsu tunara micuanaja yacuaju behua. ⁷ Dutya jujeri israelita cuanaratu ejeneya Yusura dutya emaju cuanaque chacha nityatsuranucabuqueque. Peadya tunca beta earacana Israelja ebacua cuanaque eque ejuracana cuanaratu jadique ejeneya. Jadya tibudyatu ecuanara israelita cuanara Yusu muijacaya ama. Huecada tupu, meta tupu jadya tuque ecuanara merejacatsu ama mereya. Amena iyacia, ecuari Agripa, riyaque israelita cuanara “Iquepa jidama juya” jadya aya, era Yusura emaju cuanaque chacha nityatsuranucabuque jadique ejeneya baatsu, —jadyatu Pablora Agripa cuejacuare.

8 —¿Eje bucha juatsu jatsu tuque micuana Yusura emaju cuanaque chacha nityatsuranucayaque ejeneya ama? — jadyatu Pablora tuhua cuanaque acuare.

9 Pabloratu Agripa cuejanucacuare, dutya tuhua cuanara quisaratijaju bacayaju:

—Icuenetu era Jesús queja ecatyati cuanaque dyaque jidama acuare. Eratu jida bucha bacuare, Nazaretju anicuare queja catyatiya cuanaque jidama au. ¹⁰ Ijahue jahue tuna era acuare Jerusalénju. Jetiama tuna etare apudaju ishamerecuare Jesús queja ecatyati cuanaque. Jadya tuna acuare pae cuanaja huaraji cuanaja yanaju. Jesús queja ecatyati cuanaque iyetanayaju, ique dyaque pureama jucuare. ¹¹ Eje uma nerecaturae tuna ahua Jesús queja nimee amerejacacara aatsu. Casada tsehue tuna “Jesús tu Mesías ama” jadya amerecara ahua. Nubinubini bahue juhua caradati ishuque etare cuanaju tuna sare juyaque. Dyaque nime jidama ecahuaiti ique juhua tuna tsehue. Japada epu cuanaju cuabahue juhua tuna sarera. Daditsu tuna ecue nerecatura bahue juhua, — jadya tuna Pablora acuare.

Pablo eje bucha cacuairetie inime jucuareque cacuejaticuareque

(Hch 9.1-19; 22.6-16)

¹² Pablo cacuejatinucacuareque:

—Peya huecaca ique cuacara jucuare Damascoju Jesús queja ecatyati cuanaque inamerera. Pae cuanaja huaraji cuanara cuatsashacuare jadya ique juishu. ¹³ Ique jadya jucuareque mique cuejaya, ecuari Agripa. Ediji equa cuayaque barepatya cuana ni barepa equa huecara pana udatilla at-sacuare. Tumeque huecatu jucuare ijeti bucha dyaque huecada. Udatsacuare tura ique, eatsehue cuaya cuanaque jadya. ¹⁴ Dyaque cuita bajida juya tibu ecuana huipuchitanatsu yahuaju rumucuta rihui jucuare. Tume Ecuana Cuatsashaquira isaracuare hebrea yana equa: “Saulo, Saulo, ¿eje bucha juatsu mira nerecaturaya? Mira ique bijidamaduraaquemi mita tacadya jutidya jidama catiya. Juye tuta tacadya jutidya enimetsequera muyayaju acui tapatsu ujeda ecatimereu buchique mique”, jadya tura acuare. ¹⁵ “¿Aira isaraya?”, jadya tuque acuare. “Ique Jesús, idya mira nerecaturayaque. ¹⁶ Netitsuracue. Erami mepehua ique merequi juishu. Mepehua mique era, peya cuana micue mira ique bahuaque cueja ishu. Cuejacue ecana mique era eje bucha ameredadiyaque. ¹⁷ Mira tuna ique eje buchique dutya queja cuejadadiya. Narubuque mique era, israelita cuanara, israelita ama cuanara jadya eiyēju. ¹⁸ Israelita ama cuana queja cuita mique cuadishaya, ecue quisarati

yunerique cuejati ishu. Cuadishaya mique era, tuna Yusura cuatsashaya eque jujaca ishu ama, tuna Yusuja biji eque anisha ishu. Cuadishaya mique era, tuna Satanásra cuatsashaya eque jujacatsu, Yusura cuatsashaya eque camadya ani ishu. Cuadishaya mique era, tuna eaqueja catyati ishu. Tuna eaqueja catyatiyaju tunajatu Yusura jucha cuana apupashaya. Tura tuna tyadadiya jidaque tura tuja cuanaque tyaana ahuaque”. Jadya eque Jesúsra cuadishacuare riyaque quisarati cueja ishu, —jadyatu Pablo cacuejaticuare.

Pablo Yusura amereya eque jucuaque cacuejaticuareque

¹⁹ Pablo quisaratinucacuareque:

—Acuaredya tuque Jesúsra barepa juque cabameretitsu tura amerecuareque, ecuari Agripa. ²⁰ Jadya juatsu catibuticuare Jesúsja jidaque quisarati, Jesús eje buchique cueja. Icuene cuita tuna Damascoju aniya cuanaque cuejacuare. Tuequedy tuque Jerusalénju aniya cuanaque, Judea yahuaju aniya cuanaque jadya cuejacuare. Israelita cuana, israelita ama cuanaque jadya tuna Jesúsja quisarati cuejaajecuare. “Necacuaeticue inime. Nebijiseriime cajuchati. Jesús queja necatyaticue. Jidaque neacue, peya cuanara yuneridya micuana Jesús jaque juishu inime cacuaetihuaque baishu”, jadya tuna cuejajacuare ama. ²¹ Jadya cuejae quisarati aya tibu, israelita cuanara inacuare Yusuja etareju. Iyecara ebari tunara acuare, era Jesús eje buchique cuejaya baatsu. ²² Jadya ama bucha Yusura tsahuajacahua ama, ni narujacahua ama. Iyacu ique Jesúsja quisarati cuejacuejani juya. Inime metse cuanaque tumbaedy ecuita jetiedya cuanaque jadya tuna era cuejaya. Cuejaya tuque Moisésra huenecuareque. Cuejaya tuque tumbaedy Yusu equeque quisarati cuejaqui cuanara huenecuareque. Era cuejayaque ri tunara, jadyatu judadiya, jadya acuareque. ²³ “Mesías patuna nerecaturadadiya. Iye jadya patuna abuaque”, jadya tuna jucua. Tuquepa icuene emajuque netitsurabuque, majunuca ishu ama. Turapa Yusu queja judiru ishuque quisarati tsapebuque israelita cuana, israelita ama cuanaque jadya. Ude tsehue udatsu ecuanara eje eque cuayaque ebau bucha, jadyapa tura ecuanara Yusu queja judiru ishuque bahue amereya, jadya tuna jucua. Jadya tunajatu béru yuequedyadya huenecuare, —jadyatu Pablora cuejacuare Agripa, tuhua jucua cuanaque jadya.

Pablora Agripa Jesús queja catyatishacara acuareque

²⁴ Festoratu baca anicuare Pablora quicueneti ishu quisarati ayaju. Tuque jadya quisaratiyajutu Festo jebuda quisaraticuare:

—¡Miquemi equijahuati, Pablo! Riya cuanaque dyaque inime tupurami quijahuatishaya, —jadya tujatu acuare.

²⁵ —¡Aijama. Equijahuati ama ique, ecue emuique enaruquique Festo. Era inime tupuyaque tu yunerique. Dyaque bahue cuanara inime tupuyaque tume. ²⁶ Riyadya rehua ecuari Agripa. Bajida tsehue ama tuja yacuaju quisaratiya. Turatu adebayadya ique yuneri quisaratiyaque. Turatu adebayadya Jesús eje bucha juhuaque. Etehua amatu jadya juhua, dutyaja yacuaju, —jadyatu Pablora Festo acuare.

²⁷ Tuequedyatu Pablora ecuari Agripa isaranucacuare:

—Ecuari Agripa, ¿ejenyadyami beru Yusu equeque quisarati cuejaquí cuanara hueneacuareque? Eratu adebaya mira ejenyaque, —jadyatu Pablora acuare.

²⁸ Agriparatu quemitsacuare:

—Riya piji bacameretsu Jesucristo jaque amereya bucha tuque micue inime juya, —jadya tujatu Pablo acuare.

²⁹ —Dyaque jidami Jesucristo queja catyatitaquí, iyacua cuita, jadya ama juatsu eje tupu. Dyaque jida taa mique cuita camadya ama, dutya rehua cuanaque tumbaedyatuaqueja ecana ecatyatiu. Ique Yusu queja bacabacajacaya ama dutya micuana tuaqueja catyati ishú, ique tuaqueja ecatyati bucha. Jadya ama bucha, era micuana ique bucha erisi amerecarama aya, —jadyatu Pablora acuare.

³⁰ Pablo jadya quisarati amena juhuajutu Agripa, Festo, Berenice, tuhua anibutecuare cuanaque jadya netitsuracuare, tuhuaque cuinana ishú. ³¹ Cuinanayaque tunajatu quisarati acuare dutya tunara quisarati bacahua cuanaque.

—Riyaque ecuita Pablo ri jidaque. Tuquetu eje bucha ama juchine iyetana ishú, ni etare apudaju ishataquí ama, —jadya tuna jucuaque.

³² —Juquena ama juchine “Roma juque enaruquira ique pacueja yuneridya ique jucha metse, jucha metse ama jadique”, era taa tu einajacamereu tumeque, —jadyatu Agripara Festo acuare.

27

Festora Pablo Romaju cuadishacuareque

¹ Bajecuaque tunajatu inime Pablo Italia yahuaju cuadisha ishú. Ique cuacuare tuna tsehue. Pablo, peya erisi cuanaque jadya tuna Julio bacani queja catyati atanacuare. Juliotu cien sudaru cuana cuatsashaquique jucuaque. Sudaru cuana tura cuatsashacuarequetu “Roma juque ecuaria sudaru cuana” bacani jucuaque. ² Cuacuare ecuana Andramito ebuteju. Tuhua junatitsu ecuana anibutecuare

cuaba ebariju. Tumeque cuaba ebaritu jaratsuraajetaqui jucuare eje uma ebute cuanaju Asia yahuaju. Tuequedya ecuana cuinanacuare ebute juque. Aristarcotu ecuana tsehue cuacuare. Tuquetu Tesalónica epu juque jucuare, Macedonia yahua juque.

³ Peya huecaca ecuana junaticuare Sidón epuju. Julioratu Pablo dyaque tuja canerecabati tsehue bacuare. Emajaca tujatu tyacuare tuque cuajiti ishu tuja eadeba cuana tsehue tumeque epuju, tura ai sareya cuanaque tunaja tyatsa ishu.

⁴ Tuequedya ecuana cuinanacuare Sidón juque. Tuhuaque cuinanayaquetu cuejiji jucuare ecuana queja peitana. Juttaquijudya ecuana cueticuare beni diji eque amaca eque ecububu Chipre bacani jiruru eque, cuejiji casadama jipenee juya eque. ⁵ Riquecuare tuque ecuana enaja ecuaque Cilicia, Panfilia jadya jiruru tuyu eque. Junaticuare ecuana epu Mira bacaniju, Licia yahua juque. ⁶ Tuhua ecuana tumeque cuaba juque cuinanacuare. Tuhuadyatu sudaru cuana cuatsashaquique bahue jucuare tumeque ebuteju peya cuana jarayaque, Alejandría juque junahuaque. Tumeque cuabatu Italia yahuaju cuayaque jucuare. Tuhuadya ecuana cuabaju iyabutyacuare Italiaju cuanuca ishu. ⁷ Cuejijira acuatsuruya tibu ecuana eje uma huecaca inime eque piji cuaba tsehue ajecuare. Dyaque masada tsehue ecuana Gnido barecuare tuhua jaratsuramaque. Cuejijija inime ecuana tuyu cuataqui ama cabaticuare. Jadya tibu ecuana cueticuare Creta ecububu beni diji eque amaca eque, cuejiji dyaque cuita ama juya eque. Salmón tuyu eque ecuana cueticuare. ⁸ Chamacama ecuana cueticuare tuyu cueti Creta jiruru eque. Chamacama ecuana jaratsuracuare ebuteju. Tumeque ebutetu “Capeneti Ishuque Ebute” bacani jucuare. Tumeque ebutetu jucuare Lasea epu peque.

⁹ Dyaque cuita ecuana tsunutacuare. Yusura jucha cuana apupashayaque adeba ishunque chinetu amena ecueti jucuare. Ena eque eju cuaishuque dyaque mudaque maratu jueticuare. Cuejipa cuana juyaque maratu amena jueticuare, nei tumebaedya. Mudaque adebaya tibu tuna Pablora jida cuejacuare:

¹⁰ —Tata ecana, eratu dyaque muda baya ena eque cuanuca ishu. Cuabatu enubiu. Dutya ai cuabaju dujuyaque tuque ecuana eaputashau cuana. Ecuana cuitadya ecuana huiditsu emajuu, —jadya tuna Pablora acuar.

¹¹ Cuaba metseque, tuque aquereniquique tatse jadya jucuare:

—Aijama. Mudamatu juya. Necuanucaradya riyaque ebute juque, —jadya tatse jucuare.

Sudaru cuana cuatsashaquiratu tatsera cuejayaque jutidya bacacuare, Pablora cuejayaque ebacauque. ¹² Ebute ecuana jaratsurayaquetu jidaque ama jucuaire cuaba jara ishu, dutya huecaca cuejipa cuana juya tibu. Jadya tibutu dutyajadya inime jucuaire:

—Dyaque jida necuinanaradya rehuaque. Necuanucara peya ebuteju riyaque ecububu juque. Fenice ebuteju necuara. Tuhua necuetishara cuejipa cuana badaque mara cuana, —jadya tunajatu inime tupucuaire.

Tumeque ebutetu nei diji, beni diji ecatse patya majaca jucuaire.

Cuejipa jueticuareque

¹³ Cuejiji casadara ama inime equera piji adadihuaju, tunajatu inime jucuaire:

—Necuaradya jutidya —jadya.

Tume ecuana cuanucacuare ebute juque Creta cububu jiruru eque.

Jadya tibudya tunajatu huesacuare metal bicuedaque ena ducu eque cuaba ina ishuque. “Capeneti Ishuque Ebute” juque cuinanatsu ecuana cuaba eque ajenuacuare Creta cububu peque eque. ¹⁴ Yaratupu juatsutu peya eque amaca eque cuejipa juetinuacuare. Acuatsuru jida tura ecuana acuare. Nei diji eque amacaquetu tabubu jueticuare. ¹⁵ Tumeque cuejipa casadaratu cuaba ebari tibene duju atibunecuare. Acuatsurutaqui ama ecuana bacuare cuejipa. Jutaquiju ecuana cuejipa queja cadujumereticuare. ¹⁶ Cueticuare ecuana ecububu ashaasha Clauda bacani jiruru eque. Tumeque ecububu beni diji eque amaca cuetiya-jutu cuejipa casada cuita ama judirucuare ecuana queja. Cuaba ebari tadajutu cuaba caca piji erisi jucuaire. Tumequetu cuaba ebari juque ai butyatsu mejijiju rada ishuque jucuaire. Chamacama tsehuetu cuaba ebariju mere juya cuanara cuaba caca piji huanasicuacuare epucutanatereuju. ¹⁷ Tsurashacuare tuna ebarucue educuju. Tuequedya tuna ebajarara cuaba ebari sogaa arida cuana tsehue huayucuare, cuaba ebari catsatanatsu epucutanatereuju. Anicuairetu emajaca deda cuita ama cuanaque, emajaca cuana patya mejijiquique. Tume cuanaque catsaqui juatsu cuaba ebari enubiuju tuna bajida jucuaire. Jadya tibudya tunajatu cuaba ajeshaquique eraca junuda misida jadique butyacuare, cuejipara cuaba ebari mejiji queja duju eauju. Jadya cadujumeretie ecuana jucuaire cuejiji queja. ¹⁸ Cuejipa netiya ama baatsu tunajatu huecacatsu ijehuetibunecuare tunara cuaba ebariju dujuya cuanaque. ¹⁹ Huecacanucatsutu cuabaju

³⁰ Cuaba ebariju mere juya cuanaque tuna huanacara jucuaire. Cuaba caca tunajatu enaju butyacuare, tuatsehue huana ishu. Ijahue acara tuna acuare tuna cuatsashaqui cuanaque.

—Cuaba huitu quejaque metal cuaba nityaqui que butyara ecuana cuaya, —jadya tunajatu acuare tuna cuatsashaqui cuanaque, pusha pusha ayaque.

³¹ Pablolu bahuedya jucuaire tuna huanacara juyaque. Jadya tibu tujatu Julio sudaru cuana cuatsashaqui que cuejaticuare:

—Tumeque cuabaju mere juya cuanaque tuna huanacara juya cuaba juque. Tuna ni cuinanaya, dutya micuana enaju majutereya, —jadya tujatu aticuare.

³² Jutajuyadyatu sudaru cuanara tubucuare soga cuaba caca risiquique. Tubuhuajutu cuaba caca enaju pacacacuare. Pacacahuajutu ejurira japada dujucuaire.

³³ Apudajudya tuna Pablora dutya cuejahuecacacuare tunaja ai cuana piji ara ishu:

—Amena micuana peadya tunca pushi earacana huecaca dyaque ai bijiseri juyaque. Ni ai buchique micuanaja tupu eara. ³⁴ Araarataqui micuana cacasati ishu. Tsapeume inime. Ni ejeque buchique ecuana majuya ama. Dutyadya ecuana chacha juya, —jadya tuna Pablora acuare.

³⁵ Tuna jadya aatsutu Pablora inacuare pan. Inatsu tujatu yusurupai acuare Yusu dutyaja yacuaju. Yusurupai aatsu tujatu cuesicuare. Cuesitsu tujatu aracuare. ³⁶ Tuque araaraya baatsu tuna cacasatitsu dutyadya araaracuare. ³⁷ Dutyaque ecuana jetiama ecuita cuaba ebariju jucuaire. Beta ciento pacarucu tunca shucuta earacana ecuita ecuana jucuaire. ³⁸ Araaracuare ecuana jequeya tupu. Araara amena juatsu tunajatu ijehuecuare enaju jetiama trigo bacani tunara dujuya cuanaque, cuaba jatatsusha ishu.

Cuaba ebari enaju nubicuareque

³⁹ Huecacahuajutu cuabaju mere juya cuanara ecuabata bacuare japada. Baecua tuna jucuaire ecuana ejuque. Adebataqui ama tuna yahua bacuare. Bacuare tunajatu mejiji camadya.

—Mejijiju cajipetishatsu quidutishacara neara cuaba, —jadya tuna jucuaire.

⁴⁰ Cuanuca ishu ecana cabajejeticuare. Tubucuare tuna soga cuana ena ducu eque cuaba inaquique metal tisu. Soga cuana tubuhuajutu metal bicuedaque enaja ecuaque dedaju pacacacuare. Pisubarecuare tuna etaruqui ecatsa cuaba tibu

quejaque tatse tsehuedya inaaajenuca ishu. Nityatsuranu-
 cacuare tuna cuejijiju eraca junuda misida icueneque cueji-
 jija cuaba bucucusha ishu. Tumetu cuaba jipetanaajecuare
 ejiruru queja. ⁴¹ Cuejijiratu cuaba ebari cuinanashacuare
 beta ejuri dijiju. Mejiji etihuesu catsaquitu jucuare. Cuaba
 ebari huitutu mejijiju caretacuare. Bucucunucataqui amatu
 cuaba jucuare. Cuaba ebari tibusu patsatana jida jucuare,
 ena pacu casadaradya jutidya. Jadya juhuajutu cuaba ebari
 inime eque nubiajecuare. ⁴² Sudaru cuanaratu erisi du-
 juya cuanaque iyecara acuare, betsayaque tuna ehuanau
 bucha adebatsu. ⁴³ Sudaru cuana cuatsashaquiratu Pablo
 iyemerecarama acuare. Jadya tibudya tujatu ecana iye-
 merecuare ama. Betsa bahue cuanaque tujatu enaju paca-
 cashamerecuare, uhuaju icueneta judiru juishu. ⁴⁴ Betsa
 baecua cuanaque tujatu cuaba juque taura cuana dyaque
 betsashacuare, tuna ehuidiuju. Jadya eque ecuana dutya
 chacha judirucuare uhuaju.

28

Pablo Malta bacani ecububuju eje bucha jucuareque

¹ Ecuana dutya yahuaju judiruyaju ecuana tuhuaque
 ecuita cuanara tsurutsacuare. Tunara ecuana cuejatsacuare
 tumeque ecububu Malta bacanique. ² Tunara ecuana jida
 inime tsehue batsacuare. Ruquenityacuare tuna jetiama
 etiqui, dyaque bada, nei jadya juya tibu.

—Nejecue. Nebahuinacue etiqui, —jadya tunara ecuana
 acuare.

³ Pablolu cuati urada cuanaque mepe jucuare. Etiquiju
 tujatu iyati iyati acuare. Cuati emaque tucue bacua dyaque
 ujedaque juanicuare. Tumetu etiqui uquera tuhuaque
 cuinanashacuare. Pabloja ebiju cahuyutitsu tujatu emetu-
 cuju acuare. ⁴ Tuhua aniya cuanaque tuna tuja ebiju bacua
 ecahuayuti baatsu jadya cacuejatibarecuare:

—Riyaque ecuita ni taa ri quiyeti puji. Enaju emajuuque
 chacha juhua ama bucha tume taa ri bacuara ahuaju majuya,
 —jadya tuna jucuare.

⁵ Pablóratu bacua itatacuare etiquiju. Eje bucha ama
 cuitadyatu jucuare. ⁶ Dutyara tunajatu bacuara ahuaju mu-
 jateretsu masadama majuya bucha bacuare. Tsunuda datse
 ihuatsu tuna eje bucha ama juyaju bacuare. Tuque jida
 baatsu tunajatu bape inime tupucuare:

—¡Riyaque taa ri ecuita ama! ¡Ejuudya ri yusu! —jadya tuna
 jucuare.

—Aijama. Ecuita maju aquiquedya ique, micuana baedya,
 —jadya tuna Pablora acuare.

⁷ Yume cuejadya ecuana Publiora acuare tuja etareju cuaishu. Tuquetu ecububuju dyaque inime metseque jucuare. Tura isaaniyaque yahuatu mejiji japadama jucuare ecuana etiqui bahui jucuare eque. Quimisha huecaca ecuana tuaqueja anibacacuare. Dyaque jida tura ecuana batsacuare. ⁸ Tuja etataquetu ujejeda jucuare. Jaracualetu baara tsehue, ami buju jadya juyaque. Pablora tu cuajiticuare. Tuaqueja jutitsutu Yusu tsehue quisaraticuare. Quisarati amena juatsu tujatu emetucu huanacuare tuque dyaque. Jadya chachanee tujatu acuare Yusuja casa tsehue. ⁹ Anicuaredya umae ujejeda cuanaque ecububuju. Publioja etataquepa chacha juhua jadya bacatsu tuna, tuna dyadi ujejeda cuanaque cadujiticuare Pablo queja. Yusuja casa tsehue tujatu ecana chachanecuare. ¹⁰ Jadya tibu ecuana tuhua cuanara dyaque jida bacuare. Tunaja cuitadya aniyaque tunara ecuana tyacuare ecuanaja ai ehuitiuj. Ecuana amena yudijidya cuinananucayaju tunara ecuana tyacuare dutya ecuanara ai sareya cuanaque.

Pablo Romaju junaticuareque

¹¹ Tumeque ecububuju ecuana quimisha badi jucuare. Tuhuatu ebuteju jaracuare cuaba ebari. Tumeque cuabatu Alejandría juque juticuare cuejipa catibutima jariju. Neticualetu cuaba huitu queja amaca yusu cueya cueya ecatsé Cástor, Pólux jadya. ¹² Tumeque cuaba ebari tsehuedya ecuana Malta juque cuanucacuare. Tuhuaque cuinantsu ecuana dirucuaire Siracusa ebuteju. Tuhua ecuana anibacacuare quimisha huecaca. ¹³ Cuacuare ecuana ena eque ejiruru eque Regioju judiruya tupu. Huecacape pijidyatu beni cuejiji jutibunenuacuare jida. Huecacanucatsu ecuana Puteoliju junaticuare. Tuhua tupu camadya tuque ecuanaja ena eque aje ishuque jucuare.

¹⁴ Tuhua tuque ecuana tsurucuare ecuana tsehuequi cuanaque. Tunara ecuana ihuamerecuare tuna queja anibaca ishu. Pacarucu huecaca ecuana tuna queja anibacacuare. Tuequedya ecuana ehuachi eque Romaju cuacuare. ¹⁵ Jesús queja ecatyati cuanaque tuna bahue jucuare ecuana Romaju ehuachi eque cuayaque. Umae cuanara ecuana ihuacuare “Mercadoju Ediji Apio” bacaniju. Peya cuanara ecuana ihuacuare “Quimisha Etare Eaniqui” bacaniju. Tuna baatsutu Pablo pureama jucuare. Dyaquetu cacasaticuare.

—Miquemi ecuana tsehue dyaque jida juhua, Tata, —jadya tujatu Yusu acuare.

¹⁶ Tuequedya ecuana Romaju junaticuare. Tuhua ecuana judiruhajutu Juliora menaje tyacuare erisi cuanaque Roma juque huaraji cuana. Huaraji cuanaratu Pablo etare apudaju

ama ishatsacuare, peya etareju jutidya. Jadya ama bucha tunajatu sudaru queja narumerecuare, tuque ehuanaju.

Pablora Jesúsja quisarati Romaju cuejacuareque

¹⁷ Quimisha huecaca juatsutu Pablora ihuaramerecuare israelita inime metse cuanaque Romaju anicuare cuanaque. Tuna caradatihuaju tujatu ecana jadya acuare:

—Ecue ata cuana, nequisaratishacue ique, ique quicueneti ishü. Ique eje bucha ama juhua ecuanaja ata israelita cuana tsehue. Moisésja cacuatsashati equedya anihua ecuanaja baba cuanaja bahue eque. Jadya ama bucha ecuanaja ata israelita Jerusalénju cuanaque dyaque cahuaicuare eatsehue. Inatsu tunara Roma juque huaraji cuana ecuadisha cuana queja menajetyacuare. ¹⁸ Huaraji cuanaratu bacacuare ique quicueneti ishü quisaratiyaju. Quisaratiyaju ique bacatsu tunara inajacacara acuare. Dadicuare ama tuna ni ejeque inimedya jutidya ique iye ishü. ¹⁹ Ecue ata cuanara bacue inajacamerecarama acuare. Jadya tibudya “Cuadishacue ique Romaju. Enaruqui dyaque aridara ique jucha metseque, jadya ama juatsu aijama jadique pacuejatsa”, jadya ique jucuaré. Jutaquiü riyadya ique quicueneti ishü, ecue ata israelita cuanatu jucha metse jadya cacuejati ishü ama. ²⁰ Jadya tibudya micuana ihuaramerehua, era micuana baatsu isaracara aya tibu. Bahuedya micuana, béru yuequedya ecuanaja baba cuanara ihuajacacuareque ama Yusuja Emepeque junayaque. Tumeque Yusuja Ecuadisha quejadya ique catyatihua, Jesús queja cuitadya. Tuaequeja catyatihua tibu, tunara risimerecuare, —jadya tujatu ecana acuare.

²¹ —Ecuana ecuana baecua cuita juhua riyaque inime cuana. Ecuanaja ata Judea yahuaju cuanara tuque ecuanaja cuadishachine ama quirica micue ishüque. Israelita cuana tuhuaque jechine cuanara ecuana cuejachine cuana ama cuita miqüe eje buchique. Ecuanaja yacuaju tuna quisaratichine cuana ama cuita micue ishü. ²² Bacacara tuque ecuana aya mira Jesús eje buchique cuejayaque. Bacaya tuque ecuana. Dutya quejapa tunajatu quisarati aya; yuneri amapa iyacuaque bahuityayaque jadya. Dyaque jida ecuana miaqueja pana cueja catimerecara juya mira bahuityayaque, —jadya tunajatu acuare.

²³ Jadya juatsu tunajatu iyacuare huecaca caradatinuca ishü. Tumeque huecaca juetihuaju tuna umada junaticuare Pablo aniya etareju. Tsunuda tuna Pablora isaracuare. Apudajudya catibutihuaque chineya tupu tujatu ecana bahuityacuare. Cuejacuaretu ecana Yusura dutya eje bucha narue adadiyaque. Cuejacuaretu ecana Moisésra,

Yusu equeque quisarati cueja puji cuanara Mesías jadya adadiyaque huenecuareque. Cuejacuaretu ecana Jesús cuitadya Mesiasque, Yusuja Emepeque. ²⁴ Umae israelita cuana casitatihua cuanaratu ejenecuare tura cuejayaque. Tuna tuna Jesús queja catyaticuare. Peya cuanara bacue ejenecuare ama tura cuejayaque. ²⁵ Caquemitsati caquemitsati juyaque tuna cuinanacuare, dutyara tupu ama inime tupuya tibu. Cuama jarira tuna Pablora acuare:

—Béru yuequedyatu Isaiasra cuejacuare yunerique ecuanaja baba cuana. Yusuja Espiritura tuna jadya cuejamerehua:

²⁶ “Cuacue micue ata cuana queja.

‘Bacaya tuque micuana Yusura cuejayaque adebayaque ama. Baya tuque micuana Yusura ayaque, adebayaque ama’ jadya ecana cuejaticue.

²⁷ Ejeneya ama tunajatu ecue quisarati, tunara ejenecarama aya tibu.

Bacaya ama tunajatu ecue quisarati, tunara bacacarama aya tibu.

Bacarama tunajatu aya era ayaque, tunara adebacarama aya tibu.

Ijaca cani catumutihua bucha, yatuca catumutihua bucha jadya tuna juhua.

Cacuareticarama ecana inime juya, ecue ecana tunaja jucha cuana apupuasha ishu”,

jadya patu Isaiás eque jucuare Yusu béru.

²⁸ Pablora tuna isaranucacuare:

—Era micuana bahue amerecara aya. Iyacuatu Jesúsja jidaque quisarati tsapetanaya israelita ama cuana queja. Cuejayaju bacatsu tuna Jesús queja catyatibuque. Tuna tuaqueja jadya catyatie juyaju tunajatu Yusura jucha cuana apupashabuque, —jadya tujatu ecana acuare.

²⁹ Pablora jadique cuejahujutu israelita cuana dirucuare, tuna cama caquemitsatiajeyaque.

³⁰ Pablotu anicuare beta mara Romaju. Tura cuitadyatu tsujetyacuare etareju ani ishu tuhua. Pureama tsehue tujatu ecana batsacuare dutya tuaqueja jutiya cuanaque, arepa sudarura naruya jari ama bucha. ³¹ Ecuaita cuanara batiyaju tujatu ecana Yusura dutya eje bucha narue ayaque cuejatsabarecuare. Bajida tsehue ama tujatu ecana cuejacuare. Dyaque tujatu quisarati acuare Ecuana Cuatsashaqui Jesucristo eje buchique. Huaraji cuanaratu cuejamerejacacuare ama jidaque quisarati.

Riya tupu camadya,

ROMAJU CUANAJA ISHU PABLORA QUIRICA CUADISHACUAREQUE ROMANOS

Pablorari huenequere riyaque quirica Jesús queja ecatyati cuanaque Romaju cuanaja cuadisha ishu. Huenequere rejari Jesús queja catyatitsu cuita camadya ecuana Ijahua quejaque quinajacamereti ishuque. Turatu quisarati acuare. Dutyapa ecuana jucha arida. Jadya ama bucha ecuana Yusura dyaque iyuhueda baya. Cuadishacuaretu Jesucristo ecuanaja jucha cuana tsujetyaqui maju ishu.

Capítulo 1-11 eque tupu tujatu bahuityacuare Jesús queja ecatyati cuanaja ejenetaquique. Capítulo 12-16 eque tupu tujatu bahuityacuare Jesúsja cuanaque eje bucha anie jutaquique. Tuequedyatu riyaque quiricaju aniya versículo dyaque saretanaya cuanaque: 1.16; 3.23; 5.8; 6.11, 23; 8.1, 14, 18, 28, 35-39; 12.1, 21; 15.2-3 jadya.

Pablora Jesús queja ecatyati cuanaque isaracuareque

¹ Era rique micuanaja quirica cuadishaya. Ique Pablo. Jesucristo merequique ique. Yusura ique mepehuaque, tuja yana atsaqui juishu. Cuadishahua tura ique, jidaque iyacuaque quisarati dutya queja tsape ishu.

² Beru yuequedyatu Yusura tuja quisarati dutya queja tsapemere ana ahua. Yusuja quisarati cuejaqui jucuar cuanarari riyaque quisarati cuejajachua ama. Yusuratu huenequere tuja quisarati. Riyaque quisarati ehuenequere ri Yusujaque; riyaque quisaratiju ri aijama pusha pushaque. ³ Riyaque quisarati jidara ecuana bahue amereya tuja Ebacuaque Jesucristo Ecuana Cuatsashaquique jadique. Cacuitatihuatu ecuita riyaque yahuaju cuinana ishu. Tuquetu ecuari David eque ejuracanaque. ⁴ Ecuita camadya ama tuque, Yusu tume. Tuquetu Yusu Etata buchique cuita nucadya. Yusuja biji eque neritu anihua, cajuchati baecua. Majuhujutu dyaque arida casa tsehue Yusu Etatara emajuque chacha nityatsuranucahua. Emajuque chacha nityatsuranucahua eque tujatu ejitaju bamerehua tuque tuja Ebacuaqueque. Riyaque Jesucristo tu Ecuana Cuatsashaquique. ⁵ Yusu eatsehue dyaque jida juhua. Ijahua quejaque tura ique inajacamerehua, arepa jucha arida juhua ama bucha. Tura ique cuadishahua tuque cuarequi:

—Cuacue dutya queja. Cuejaticue ecana; Yusura cuatsashaya eque ecana paju. Jesús queja ecana pacatyati, tuja

ecana Ijahua quejaque inajacamere ishu, —jadya tura cuejamerehua, Jesús dutya queja muimere ishu.

⁶ Micuana Romaju aniya cuanaratu Yusuja quisarati bacahua. Tura micuana mepehua Jesucristo jaque juishu. ⁷ Jadya tibudya rique hueneya ryaque quirica micuana dutyaja ishu. Yusura micuana dyaque iyuhueda baya. Tura micuana mepehua tujaque juishu. Yusu Ecuanaja Etatara, tumbaedy a Ecuana Cuatsashaqui Jesucristora jida tsehue nenarucue tatseja quiyuhuebati tsehue. Tatsera inime tsapema neanishacue.

Pablo Roma juque Cristo queja ecatyati cuana queja cuacara jucuareque

⁸ Dutya queja jujerira ecuana cuejaya; Romaju cuanaquepa Jesús queja catyatihua. Iyacuapa ecana tuja biji equ e aniya jadya. Jadya bacatsu tuque yusurupai aya ecuanaja Etata Yusu:

—Tata, Jesucristo equ mique isaraya. Dyaque jida taa mi Romaju micue cuana tsehue, —jadya isarae tuque Yusu aya.

⁹ Yusratu adebaya ique tuatsehue quisaratijacayaque ama micuanaja ishu. Ecue inime taca ique cacasatiya tuque mere ishu. Eratu cuejaya, tura Ebacuaque queja ejeque catyatiyaque Ijahua quejaque inajacamereyaque. ¹⁰ Eratu Yusu bacajacaya ama:

—Tata, beru taa cuacara juchine Romaju micue cuanaque cuajira. Cuataqui ama cabatichine. Micue jadya inime juyaque juatsu cuadishacue ique, —jadya tuque ajacaya ama.

¹¹ Cuacara ebari juya micuana queja. Cuejacara micuana aya Yusuja Espiritura ique bahue amerehuaque. Espiritura ejitaju ahuaque pana adeba aatsu micuana dyaque ecacasati ejuajeu Jesús queja catyatiaje ishu. ¹² Yurameta cacasaturatie ecuana juya. Micuana ique Jesús queja eje bucha nimeequ bahue juatsu, tumbaedy ique micuana Jesús queja eje bucha nimee juyaque bahue juatsu, dutya tupu cacasatie nejura dyaque tuaqueja catyatiaje ishu.

¹³ Bahue micuana amerecara aya; eje uma cuacara datse micuana queja juhua micuana cuajira, micuana ecue eatsehuequi cuanaque. Riya cama eje bucha cuataqui ama cabatiya. Aira cuana taa cuataqui ama amereya. Israelita ama cuanaque peya queja aniya cuanaque era Jesús queja catyati tsahuahua bucha, jadidya tuna tsahuacara ebari aya Romaju cuanaque. ¹⁴ Ique ecuejamereta cabatiya Yusuja quisarati dutya quejaque ecuita cuana. Maquei jucuare cuanaque amena jida atape cuanaque, tumbaedy maquei jari cuanaque jadya tuna ecue cuejataqui. Quirica isara bahue cuanaque, baecua cuanaque jadya tuna ecue cuejataqui.

15 Jadya tibudya micuana eje buchadya cuejacara ebari aya micuana Romaju aniya cuanaque.

Yusura Jesús queja catyatiya cuanaque cajuchati baecua bayaque

16 Eratu pana ejenedya aya Yusura Jesús queja catyatiya cuanaque Ijahua quejaque inajacamereyaque, Yusu queja judiru ishuque quisarati bacatsu ejenequi juhua cuanaque. Tuja casa tsehue tujatu ecana inajacamereya. Icuene cuitatu cuejatanahua riyaque quisarati israelita cuana, tuequedya israelita ama cuanaque. Jadya tibudya ique bisuya ama dutya queja aniya cuanaque cueja ishu. 17 Jidaque quisarati bacatsu ecuana bahuedya juya Yusura eje bucha eque cajuchati baecua bucha bayaque. Tujatu inime: “Jesucristo queja catyatiya cuanaque cuita camadya tuque cajuchati baecua bucha baya. Aijamatu peya eje bucha eque Ijahua quejaque quinajacameretie juishuque”. Ehuenedya tu tuja quisaratiju: “Cajuchati baecua bucha Yusura baya cuanaque tuna Yusu queja catyatijacaya ama. Jadya tibudya tuna tuatsehuedya anibuque”.

Yusura cajuchatiya cuanaque jucha metse bayaque

18 Yusu barepa juquetu dyaque cahuatiya dutya tuatsehue cahuaitiya cuana tsehue. Dyaque jidama tujatu ecana nerecaturabuque. Tunaratu Yusu muiya ama, ni ecana tura amereya eque jucara juya. Tunaratu dutya jidamaque ajacaya ama. Tunajatu bijidama Yusuja quisarati cuejayaju baca ishu, tunara jidamaque ajacacarama aya tibu. Ni tuna peya cuana bacamerecara aya, peya cuana Jesús queja catyatishacarama aya tibu. 19 Yusu cuitadyatu tuna queja caadebameretihua tuque eje buchique. Jadya tibudyatu dutya riyaque yahua juque bahue jutaqui tuja yunerique. Arepa eje bucha adeba ishuque aniya ama bucha, adebama jiu tuna juya. 20 Yusura yahua iyahua equeque dutya tuhua aniya equetu caadebameretihua. Arepa Yusu ejita juque ama bucha, yahua, barepa tura iyahuaque petatsu bahuedya ecuana tuja dutyaja casa ebare aniyaque, ni eje tupu teredadi ishuque ama. Baatsu ecuana bahuedya tuque Yusu nerique juya. Jadya tibudyatu jidama cuanaja “Eje bucha ama ecuana atabuque”, jadya inime jutaqui ama.

21 Yuequedyatu ecuita cuana bahue juhua Yusu aniyaque. Jadya ama bucha tunaratu jadya ahua ama: “Miquemi Yusu peadyaque; muiya mique ecuanara”, jadya tunajatu ahua ama. “Miquemi dyaque jidaque”, jadya tunajatu abaecua juhua. Masadama tunajatu inime juhua Yusu adebaya bucha. Tuquetu tunara eje bucha adebahua bucha ama. Eje bucha adebataquimadya jutidya tuna baajehua.

Meta ajeyaque adebataquima bucha, jadidya tunajatu adebataquima baya.

²² “Dyaque jida tuque ecuana adebaya Yusu. Dyaque jida tuque ecuana adebaya tuque pureamatura”, yanacana tuna jadya quisarati bahue juhua. Yusura tuna ai baecua bucha bahua. ²³ Yusutu maju baecua. Jadya ama buchatu ecuita cuanara Yusu ejita juque ama muicarama aya. Jadya tibudya tuna catihua ecuita maju aqui cuanaque cueya cueya cuana. Tumbaedy a tuna catihua upati, cuanubi cuana, yahua eque carepetiya cuanaque cueya cueya cuana. Huipuchitana bahue ecana juhua tunaradya jutidya ahua cuanaja yacuaju. Mui bahue tunaja juhua. Yusupa ejuu jadya juatsu tunajatu muihua. ²⁴ Tuna Yusura amerehua eque jucarama juya tibu, tuna Yusura jacahua. Tujatu inime juhua: “Tumeque ecuita cuanara ique bacacarama cuita aya tibu, paadya tuna ai tunara bisutadaque acara ayaque. Era tuna tachiya ama.” Jadya eque tunajatu ahua tunaja biji eque ai dyaque bisutadaque peya cuana tsehue. ²⁵ Yusu Neriratu dutya iyahua.

—Mique peadya mi Yusu; miquemi dyaque jidaque, — jadya tuque ecuanaja ajacataqui ama ni riya piji buchique.

Tumeque ecuita cuanara bacue Yusu muijacadua. Tuque emuique datse tuna, tunara yusu bucha adebaya cuanaque jutidya muihua. Tuna tuna ai cueya cueya ea cuanaja yacuaju jutidya huipuchitanahua. Dutya Iyaquique emuique, tunajatu muihua ai cueya cueya cuanadya jutidya, tunaja ea cuanaquedya jutidya.

²⁶ Tuna jadya juya baatsu tuna Yusura jacahua. Tujatu inime: “Paa tuna dyaque bisutada cuanaque tunara acara ayaque. Era tuna tachiya ama.”

Jadya eque tunajatu aya dyaque bisutadaque. Yusura amerehuaque ama tuna aya; amerehuaque tuna aya ama. Epuna cuanara bacue tunaja yahue cuanaque camadya jaraquerecarama aya. Epuna cuinetsedya jutidya ecana cabijiseritiya. ²⁷ Tumbaedy deca cuanara tunaja ehua cuanaque jaraquerecarama aya. Deca cuinetsedya jutidya ecana cabijiseritiya. Deca cuinetsedya jutidya ecatse bisutada juya. Yusuratu tumeque dyaque jidama baya. Yusura amerehuaque tuna aya ama; amerehuaque ama tuna aya. Jadya cayuamatie tuna juya tuna tacadya jutidya. Tunaja ecuita cuitadya jutidya tuna cayuamaturatiya. Dyaque tunajatu inime asicada cuanaque inime tupuajeyadya jutidya.

²⁸ Yusu nime adebatsu tunajatu inime juhua: “Yanacana jutidyatu Yusura amereya equeque. Neaniradya tuque-maque.” Jadya tibudya tuna Yusura jacahua. “Asicadaque,

bisutadaque tuna inime tupuqui paa. Tachiya ama tuna era”, jadya tujatu inime juhua.

Jadya eque tunajatu dyaque jidamaque ahua, arepa tunara cuitadya jadya jutaquique ama adebaya ama bucha. ²⁹Jadya tibu tuna ni ejequedya jutidya tuyu aniya ama. Yusura, huaraji cuanara jadya amerecarama aya eque tuna anijacaya ama. Yuamaturacaradya jutidya tunajatu peya cuana aya. Tunaja ishü cuita camadya tuna ai cadaditicara ebari juya. Nime jidama tuna. Peya jaque tuna ai tunaja ishü bijiseriya. Ecuiteda tunaja iye bahue. Canerebati arida ecana. Tuna ujeu baqui cuana tsehue masadama cahuaite tuna. Yurameta etsuje etsuje jutidya ecana catiya. Catacuariti arida tuna. ³⁰Cuejajacacarama tunajatu aya peya jidama juyaque. Yusu tuna ujeu baya. Quijillahuanati arida, casumiti arida jadya ecana. Yanacana tuna jadya jubahue: “Ique dyaque inime metseque, jidaque”, peya cuana tunaja ishü jida inime tupumere ishü. Eje bucha cajuchatinucae juishuquedya jutidya tuna inime tupuqui aya. Tunaja etata cuanaquera amereya eque ecana juya ama. ³¹Inimema tuna. Jidamaque tuna jidaque bucha baya; jidaque bacue jidamaque bucha. Tunara quisarati iyayaque tuna aya ama. Ni ejeque tunajatu iyuhueda baya ama. Ejera jidama ayaju tuna nime aputaya ama; cacuarehuanaticaraque tunajatu inime tupujacaya ama, tumeque jidamaque enime aputaque. Nerecabaya ama tuna peya. ³²Yusujatu cacuatsashati aniya: “Jidama anijacaya ama cuanaquetu canerecatibuque. Majutsu tuna ijahuaja etiquiju judirubuque ni eje tupu Yusu jipe ishü ama”.

Tumeque ecuita cuana jidama cuanaquetu bahue jida Yusura quisarati iyahuaque. Jadique bahue ama bucha ecana jadya aniedya jutidya juya. Tume ecana pureama jutidya juya, peya cuana jadya anie juyaju baatsu.

2

Yusura ejeque tuyuque, tuyuque ama jadique ejitaju adadiyaque

¹ Riya cuanaque quisarati bacatsu ni tuque micuanaja inime juya micuana jadique ama bucha: “Peya cuana tu dyaque jucha arida cuita. Canerecatitaqui tuna.” Jadya ama bucha micuana tuna bae cuitadya. Micuanara ni peya cuana jucha metse jadya aya, micuana dyadi micuana tumebaedya jucha metse. Yusuratu nerecaturabuque dutya tuja inime eque ama aniya cuanaque; pajudya datse israelita

cuana, israelita ama cuanaque. ² Yusuratu quisarati ajacaya amadya tuja biji eque ama aniya cuanaque nerecatu-radadibuqueque. Turatu aya dutya jidaque, tuyuque. Juttaquiju ecuana bahuedya; tuyudyatu Yusura tuja biji eque ama aniya cuanaque nerecaturadadiyaque. ³ Micuanaratu cuji ebari cuita juatsu inime tupuya. Peya cuanapa Yusura nerecaturaya, micuana cuitapa aijama jadya. Jadya ama bucha micuana tuna aniya bae cuitadya aniya. Jadya tibudya pana ejene neacue micuana dyadi nerecaturadaditayaque caadebatitsu peya cuana aya baedya. Ni eje bucha eque huanataqui ama micuana. ⁴ Micuanaja ni tu inime juya: “Yusuja ecuana nerecaturanime ama, tuque dutya tsehue dyaque jida juya tibu; tuque masadama cahuaitie ama tibu tujatu canerecabati aniya. Tuque jadya tibu tuque ecuanaja jidamaque ataquidya jutidya eje buchique ecuanara acara ayaque”, jadya micuana cuji cuita juatsu juya. Pusha ama cuitadyatu Yusu dyaque jida juhua micuana tsehue. Cacuareshacara tura micuana inime aya, micuana cajuchatijaca ishu.

⁵ Jadya ama bucha ejeque huecacatu Yusura tuja cahuaitie ejitaju abuque tura amerehua eque anicarama juya cuana tsehue. Tuquetu tuyu jujacaya ama. Tumeque huecaca tura micuana eje uma nerecaturadadiya. Jadya tura micuana adadiya, micuana tura anishacara aya eque anicarama juya tibu. ⁶ Tumeque huecaca ecuana Yusura cuejabuque peadya peadya ecuana riyaque yahuaju eje bucha juhuaque. ⁷ Umaetu Yusuja biji eque anijacaya ama. Eje buchadya Yusura cuatsashaya eque jucara ebari tuna juya. Eje buchadya cabapeticara tuna juya, Jesucristo bae juishu. Tuna tuna Yusu queja eje buchadya “Micuana micuana jidaque” jadya catimerecara juya. Eje buchadya Yusu queja maju baecua ishu cacuareshacacara tuna juya. Tume cuanaquetu Yusura tuatsehue anisirishabuque ni eje tupu tuque jaca ishu ama.

⁸ Peya cuana bacue Yusura cuatsashaya eque jucarama juya ni riyapiji buchique. Ejenecarama tuna aya yunerique, ni ecana tueque jucara juya. Yusu cahuaitisha camadya tunajatu bijida, tunaja biji eque cuita camadya tuna anicara juya. Yusutu cahuaitijacaya ama jadya anie juya cuana tsehue. ⁹ Yusuratu nerecaturabuque tura amereya eque jucarama juya cuanaque. Tunadya tuna dyaque peya inime jubuque. Israelita cuana neri neri tujatu dyaque canerecatishabuque. Tumebaedya tujatu israelita ama cuanaque dyaque nerecaturabuque. Jadya tsujetyae tujatu abuque Yusuja biji eque ama aniya cuanaque.

¹⁰ Amena tura amereya eque juya cuanaque bacue ecana

Yusura Jesucristo bucha cabapetishabuque.

—Micuana micuana jidaque, —jadya tujatu ecana abuque.

Tuna tujatu ecana dyaque inime tsapema amerebuque. Capeya inimetishabuque ama tujatu ecana. Israelita cuana neri neri tura amereya equé juya cuanaque tujatu jidaque tyabuque. Tumbaedyatu tyabuque israelita ama cuanaque. Jadya tsujetyae tujatu abuque tuja biji equé aniya cuanaque.

¹¹ Yusratu tura acara aya equé tuyu dutya abuque, israelita cuana, israelita ama cuanaque jadya. ¹²⁻¹⁵ Turatu nerecaturabuque dutya tura amereya equé juhua ama cuanaque, israelita cuana, israelita ama cuanaque jadya.

Israelita ama cuanaque tujatu tura cuatsashahuaque ehue ne equé ama bahue amerehua. Ijahuaaja etiquiju tujatu ecana nudyabuque tuna cajuchatihuaque tsuje. “Micuana micuana ecue cacuatsashati ehue ne equé ama juhua”, jadya tujatu ecana abuque ama, tuna cacuatsashati ehue ne equé ama bahue ameretahua tibu.

Tuna tunaja inime tupu equedya Yusuja biji equé aniyaque juatsu, tumeque cacuatsashati ehue ne equé aniya cuana buchadya tuna aniya. Arepa tuna tumeque quirica aijama paju ama bucha, cuejayaju yana equedya juya cuana buchadya tuna. Tunaja ducuta inimeradyatu adebaya eje bucha jutaquique, jutaquique ama jadya, arepa tunaja cacuatsashati ehue ne equé aijama paju ama bucha. Tuna eje bucha juyajudyatu adebataqui tuna Yusura cuatsashahua equé juyaque. Tuna cuitadya tuna bahue jida, jadya ama juatsu jidama eje bucha juyaque. Yusuja bijidamaque ai eje bucha aatsu tunajatu inime juya jadya: “Riya ique juyaque taa ri jidamaque.”

Yusuja biji equé juyaque tunajatu inime juya: “Riya ique juyaque ri jidaque.”

Amena israelita cuana bacuetu bahue amerehua Moisés equé tura cuatsashahuaque. Jadya ama bucha tuna tura cacuatsashati huenehua equé ama anihua. Yusura tuna ijahuaaja etiquiju nudyabuque.

—Micuana micuana ecue cacuatsashati ehue ne equé ama anihua, —jadya tujatu ecana abuque.

Yusratu jucha metse ama babuque cacuatsashati bacaqui cuanaque camadya ama, tura cuatsashaya equé aniya cuanaque.

¹⁶ Jadyatu judadiya tumeque huecaca Yusura peadya peadya eje bucha anie juhuaque cuejayaju. Turadya ecuana Jesucristo queja peadya peadya tsuje tyamerebuque ecuana riyaque yahuaju eje bucha anie juhuaque. Turatu dutya adebaya ecuana eje bucha juyaque, ecuanara inime tupuya

cuanaque. Jadya tibu tura ecuana tuyudya cuejabuque. Jadidyatu judadibuque era Jesúsja quisarati cuejaya bucha.

¹⁷ Micuana israelita cuana micuana, micuana micuana tacadya jutidya casumitiya. “Ecuana ecuana israelita cuana. Ecuana camadya ecuana Yusura cajuchati baecua bucha baya, ecuanadya tura ecuana Moisés eque cacuatsashati cuana huenecuare eque cuejahua tibu. Ecuana cuita camadya ecuana Yusuja emepeque”, jadya micuana jubahue.

¹⁸ “Ecuana cuita camadya ecuana bahue Yusuja biji eque ani ishucue. Ecuana cuita camadya ecuana bahue tuyucue, tuyucue ama jadicue, ecuana Yusuja cacuatsashati cuana bahuityatajacaya ama tibu”, jadya micuana jubahue.

¹⁹ “Ecuana cuita camadya ecuana ecueja Yusu eje bucha adebae aishucue. Yusu adeba baecua cuanara ecuana sareya caaquerenimereti ishuhui cuanaque ejuu bucha, apuda ducu ajeya cuanara ediji udamere ishuhui esareu bucha. Jadidya ecuana israelita ama cuanara ecuana sareya Yusu adeba ecuanaja tsahua ishuhui”, jadya micuana jubahue.

²⁰ “Ecuana cuita camadyatu ebahuityau Yusuja quisarati baecua cuana cuitaque, riya piji cuita Yusuja quisarati adebaqui cuanaque jadya. Yusura ecuana bahue amerehua tuja cacuatsashati ehuenecue. Jadya tibudya tuque ecuana adebaya yunerique”, jadya micuana jubahue micuana israelita cuana.

²¹ Micuanaratu cuejajacaya ama peya cuana eje bucha anie juishucue. Jadya ama bucha micuana micuanara peya cuana anishacara aya eque anicarama juya. “Chiri nejuume”, jadya micuana juya. Jadya ama bucha micuana chiri juya.

²² “Micuanaja caquemitiqeremaque nejabaume”, jadya micuana ecana cuejaya. Jadya ama bucha micuanaradya jutidya micuanaja caquemitiqeremaque jabaya. “Yusu cueya cueya cuanaja yacuaju chicucata nejuume”, jadya micuana ecana cuejaya. Jadya ama bucha micuana Yusu amadya jutidya muiya.

²³ Casumitiya micuana: “Ecuana cuita camadya ecuana Yusura bahue amerehua tuja cacuatsashati”, jadya tuque micuana ecana cuejaya. Jadya ama bucha micuana tura amerehua eque ama aniya. Micuana Yusuja biji eque ama aniya baatsutu israelita ama cuanara Yusu ijillahuanaya.

²⁴ Ehuenedya tu Yusuja quisarati jadya: “Israelita ama cuanaratu jidama quisarati tsehue aya Yusu, micuana israelita cuana jidama juyaque baatsu.”

²⁵ Micuana ni Yusura Moisés eque cuatsashaya eque aniya, dyaque jida tu ecuanaja bahue eque ecaturumereti juishuhui. Jadya ejitaju cabameretie micuana juya israelita cuana Yusuja emepe cuanaque. Micuana ni Yusura cuatsashahua

eque ama aniya, tume micuana yanacana catubumereti juhua ecuanaja bahue. Yusura micuana catubutima bucha baya. ²⁶ Israelita ama cuanaque tuna ecuanaja bahue bucha catubutima. Tuna ni Yusura cuatsashahua eque aniya, tume tuna Yusura ecaturbuti bucha baya, arepa tuna israelita cuanaja bahue catubutima ama bucha.

²⁷ Arepa Yusura cuatsashahuaque adebaya ama bucha, arepa micuana ecuanaja bahue catubutiya ama bucha, micuana israelita cuana Yusuja cacuatsashati eque ama aniya. Israelita ama cuanaque bacue ecana ecuanaja bahue catubutiya ama; arepa tuna ama cacuatsashati ehue cuanaque bahue ameretanahua ama buchatu umada israelita ama cuanara Yusu muibaya. Tuna tura amereya eque juyaque juatsu, tujatu ecana jucha metse ama baya. Micuana tura amereya eque juyaque ama juatsu, micuana Yusura baya jucha metse. ²⁸ Yusuja cuanaque ecuanaja, ai ecuanaja bahue ecuita huitu biti ecaturbuti juatsu ama, tura amereya eque juatsu. Umaetu yanacana cuita juya: “Yusu jaque ecuanaja”. Yanacana cuita tuna Yusuja cacuatsashati bahue ameretanahua. Yusura amereya eque ecana juya ama. Jadya tibudya tuna Yusura tuja cuanaque cuita ama baya. ²⁹ Yuneri cuita Yusuja cuanaque neritu inime ecacuaetique. Tunaja yuequedyaque ani cuaretanahuaque tuna. Tuna tuna juya: “Yusu jaque ecuanaja, Yusuja Espiritura inime cuarehua tibu. Arepa tuna catubutima ama bucha tujaquedyaja tuna. Yusratu adebaya tuna tuja cuanaque, arepa ecuita cuanara adebaya ama ama bucha. Tura cuitadya tuna aya: “Micuana micuana jida cuanaque” jadya.

Yusura dutya amereya eque juya cuanaque tuna tuja cuanaque, israelita cuana, israelita ama cuanaque jadya.

3

¹ “Yusratu israelita ama cuanaque tujaque amereya ecuanaja bucha. ¿Tume jatsutu aishu jida ejuu israelita juishu? Yanacana tubutana ecuanaja juhua ecuanaja bahue”, jadya ni tuque micuana inime tupuya. ² Jidadya tu israelita juishu. Jidadya tu Abrahamja ejuracanahuaque juishu. Icuene cuitatu Yusura isarahua ecuanaja baba cuana, tunaja tuque adeba ishuhua. Jadya tujatu acuare, ai tunaja camadya adeba ishuhua ama, tunaja dyadi tumbaedyaja peya cuana cueja ishuhua tuque eje buchique.

³ “Dutya jujeritu ecuanaja baba cuana Yusura cuatsashahua eque ama anicuare. Arepa Yusura Abraham jadya acuare ama bucha: ‘Tyabuque tuque jidaque mique eque juracanahua cuanaque’ ¿jida tsehue ama ni tura ecuanaja babuque, ecuanaja baba cuana tura cuatsashahua eque

jujacadhua tibu?”, jadya ni tuque micuanaja inime juya.
⁴ ¡Yuneri cuitadya tu jadya ama! Yusura ecuana tura aana ahua equedya aya. Turatu ama amadya aya tura eje bucha aana ahuaque. Aijamatu ecuita pusha pusha jubaecuaque. ¡Amena Yusu bacue jadya ama! Ehuenedya tu Yusuja quisarati:

“Yusu, mique cuita camadyami yuneri quisaratijacaya ama. Nime adebatsu tunarami dutyara aboque:

‘Miquemi pusha pusha baecua, ni mi cuji juya’ ” jadya.

⁵ “Ecuana jidama juyajutu ecuana petaqui cuanaque equisaratiu: ‘Ecuita cuana tucue tu jidama; Yusu cuita camadya tucue tu jida’. Tuyudya ni tu ecuana jidama juyaque, peya cuana bahuitya ishü Yusu camadya jidaque. Jadya tibudyatu Yusu tuyu ama juya, ecuana jidama juyaju nerecaturayaque”, jadya datse ni tuque micuana inime tupuya. Jadya inime tuputsu micuana cuji juya. Jadya jutidyatu Yusu adeba baecua cuanara inime tupuya. ⁶ Ni eje bucha eque tu jadya ama. ¡Yusura ecuana yunerijudyä eje bucha aya! Dutyadya ecuana bahue ejeque huecaca ecuana Yusura tsujetyabuqueque dutya ecuana rehua riyaque yahuaju eje bucha anie juhuaque. Tuque ni tuyu ama ejuu, tume tura ecuana ni eje tupu tuyu ama etsujetyau. Yuneri cuitadya tura ecuana jadya aboque.

⁷ “Ique tuyu ama quisariatijayutu ique ijacabacaqui cuanaque jadya ejuu: ‘Ecuita cuana tu pusha pusha arida; Yusu camadya tu pusha pusha baecua. Dyaque jida taa Yusu’ jadya tunara eau. Jutaquijutu jidadya ecuana pusha pusha juishu, tuna ‘Yusu tucue tu pusha pusha baecua’ jadya juishu. Jadique juatsu tu Yusu tuyu ama, ique pusha pusha juyaju nerecaturayaque”, jadya datse ni tuque micuanaja inime juya.

⁸ “Jidamaque neara, Yusu jidaque peya cuana adebamere ishü”, jadya tuque ecuanaja inime tuputaqui ama.

Umaetu ecue ishü jidama quisaratihua. “Pablora ecuana cuejaya jidama juishuque, Yusu adeba baecua cuanaque Yusu jidaque bahuitya ishü”, jadya tuna juya pusha pusha. Ni eje tupu tuque ecue jadique cuejama. Yusratu nerecaturabuque ecue ishü jadya pusha pusha juhuaque.

Dutyä ecuana jucha metseque

⁹ “Ecuana israelita cuana ni ecuana jucha aridama, Abraham eque ama ejuracana cuanaque bucha ama”, jadya ni tuque micuanaja inime juya. ¡A, aijama! Dutyä ecuana jucha arida, ecuana israelita cuana, tumbaedyä israelita ama cuanaque. Dutyä ecuana ecuanara taca eje bucha ajacae ni tuque

ecuana ama Yusuja bijidamaque. Jadyatu era huenehua.

¹⁰ Yusuja quisarati tu jadya ehue:

“Aijamatu ni ejeque buchique inime kujisha baecuaque ni peadya buchique.

¹¹ Aijamatu ni ejeque buchique jidaque, jidamaque jadique adebaquique.

Aijamatu ni ejeque buchique Yusu adebacaraque.

¹² Dutyaratu ujeu baya.

Dutya tuna jidama ni aishu buchique.

Ni ejera buchiquetu jidaque aya ama, ni peadyara buchique.

¹³ Tunaja quisarati tu cuauuda idutaqui ama, emajuque papamaque eihuinaque bucha jidama idutaqui ama.

Peya ijahue au, pusha pusha jadya ecana jujacaya ama.

Bacua dyaque cati ujedara enerecaturau bucha, jadidya tunajatu nerecaturaya tunaja quisarati tsehue.

¹⁴ Ijillahuanajacaya ama tunajatu peya cuana.

Jadya tsehue micuana ejitaju juya umae cuana ujeu bayaque.

¹⁵ Huenanaya ecana tuna tsehue cahuitiyaque iye ishu.

¹⁶ Peya cuana dyaque jida baatsu tunajatu cayuamatisha bahue.

Yuamaturaya tunajatu peya cuana.

¹⁷ Inime tsapema tuna eaniu ama, ni tuna peya cuana inime tsapema anishacara aya.

Tume tuna cahuitishaya jutidya tunaja eadeba cuanaque.

¹⁸ Ni eje bucha eque tuna Yusu muibacara aya.

Ni tuna eje tupu pureamaturacara aya”,

jadya tu ehue Yusuja quisarati.

¹⁹ Bahuedya ecuana peadya peadya cama, ecuana Yusura cuatsashaya eque anicara juyaque. Ehueneque isaratsu ecuana bahue eje bucha tura ecuana anishacara ayaque. Arepa bahue ama buchatu ni ejeque dutya cacuatsashati cuana eque juya ama. Jutaquijudyatu Yusura nerecaturabuque yana equedya ama juya cuanaque. Ni ejera buchiquetu tuque eau ama: “Ique ama jucha metse, jadya Yusura ique anishacara ayaque baecua juhua tibu”, jadyatu ni ejeja ataqi ama.

²⁰ “Mique taa mique jucha metse ama baya, era cuatsashahua eque anihua tibu”, jadyatu Yusura aya ama ni ejeque buchique. Cacuatshati tujatu ejitaju ahua, tume cuana eque ecuana jucha aridaque caadebati ishu.

Yusura ecuana Jesús queja catyatihuaju jucha metse ama bayaque

²¹ Iyacuatu Yusura ejitaju ahua eje bucha eque tura ecuana jucha metse ama bayaque. Berutu Moisésra, Yusu equeque

quisarati cuejaqui cuanara jadya cuejacuare, Yusura tu-
aqueja catyatihuaju Ijahua quejaque inajacamereyaque.
Jadya ama bucha tunajatu dutya jujerija inime juhua, cacuat-
sashati cuana eque juatsupa ecana quinajacamereya, jadya.

²² “Erami jucha metse ama baya”, jadyatu Yusura aya Je-
sucristo queja catyatiya cuanaque camadya. Jadya equetu
Yusura Ijahua quejaque inajacamereya israelita cuana, is-
raelita ama cuanaque jadya. Ecuana Jesús queja dutya caty-
atiya cuanaque tura ecuana jucha metse ama baya. ²³ Dutya
ecuana jucha aridaque. Aijamatu ni ejeque buchique Yusura
amerecara aya eque juyaque, ni peadya buchique. ²⁴ Jadya
ama bucha tu Yusu dyaque jida dutya tsehue, arepa ecuana
jucha arida ama bucha. Jesucristotu majuhua, ecuanaja
jucha cuana tsujetya ishu. Jadya tibudya ecuana Yusura baya
jucha metse ama, ecuana Jesús queja catyatihuaju. Tsuje
bacaya ama tura ecuana jucha metse ama baatsu, ecuana
iyuhueda baya tibu. ²⁵ Yusratu Jesús majushahua ecuana
emajuuque. Quijehuetihuatu ami. Ecuana tuaqueja caty-
atihuaju, Yusura tuque ecuanaja jucha cuana apupashaya.
Yusratu quisarati ahua; ejeque cuana tu majutaqui: “Ejeque
ni majuya ama, tumetu jucha cuana tsujetyatanaya ama”.

Yusura quisarati iyahua eque ama ni juquena juhua, tume
taa tu tuque tuyu ama juquena juhua. Yusura yahua
iyahua equetu ecuita cuana cajuchatihua. Dyaque cuitatu
tsunutacuare Jesús jucha cuana tsujetyaqui maju ishuque
cuadisha ishu. Dyaque cuita tsunutatsutu ecuita cuana ji-
dama juyaque amena nime aputahua bucha jucuare. Amena
Jesús canerecati, maju jadya juhuajutu ejitaju juhua Yusu
nime aputamaque. ²⁶ Amena iyacua tu Yusuja inime: “Nime
aputaya ama iyacua aniya cuanaque jidama juyaque. Ji-
dadya tu dutya peadya peadya ecue tsujetya ishu. Tuyudya
tu ecue ecana cajuchatiya cuanaque jucha seca ishu, tuna
Jesucristo queja catyatihuaju, tuque jucha cuana tsujetyaqui
majuhua tibu”, jadya tu Yusuja inime.

Jadya tibudya iyacua “Tuyu micuana baya, Jesús micuana
cuarequi majuhua tibu”, jadya ecuana Yusura aya tuja cua-
naque.

²⁷ Jadya tibudya ecuana casumititaqui ama. “Dyaque
jida baatsu ecuana Yusura Ijahua quejaque inajacamere-
hua”, jadya tuque ecuanaja inime tuputaqui ama, ni riya
piji buchique. Yusura ecuana jucha metse ama baya Je-
sucristo queja catyatihuaju cuita camadya, ai cacuatsashati
eque aniyaju baatsu ama. ²⁸ Tume ecuana yuneridya Yusura
jucha metse ama baya ecuana Jesús queja catyatihuaju cuita

camadya, ai cacuatsashati eque anihua baatsu ama. Jadya micuana era cuejahua.

²⁹ Yusu tu israelita cuanaja Yusu camadya ama. Tuquetu dutya queja aniya cuanaja Yusu. ³⁰ Jadya equetu Yusura dutya, dutya tupu bau aya. Ecuana israelita cuana Jesús queja catyatihuaaju, jucha metse ama tura ecuana baya. Israelita ama cuanaque Jesús queja catyatihuaaju, tura tuna jucha metse amadya baya. ³¹ Jutaqui ju ¿eje tsunu ecuana israelita cuana Jesús queja ecatyatique Yusuja cacuatsashati eque anijacataqui? Aijama. Jadya ejuuque, ecuana cacasatitaqui jutidya dyaque tuque pureamatura ishu, yuneri cuitadya ecuana tujaque juatsu.

4

Yusura Abraham tuaqueja catyatihuaaju tuyu bacuareque

¹ Ejera cuana ni tuque micuana Abraham inime tupuqui aya. Tuquetu dutya ecuana israelita cuanaja baba jucuaire, icuene Yusura ecuita huitu biti tubumerecuareque. ¿Yusura ni tu jucha metse ama bahua, Abraham cacuatsashati cuana ehue eque anihua baatsu? ² ¡Aama! Yusratu tuyu, jucha metse ama bahua Abraham, ai tuque jida juhua baatsu ama. Abraham ni tuque aiju jida juhuaaju Ijahua quejaque quina-jacameretiquena juhua, “Yusuja yatucaju taa ique dyaque jida”, jadya tujatu inime juquena juhua.

Ecuana aiju jida baatsu ecuana ecuita cuanara jida baya, Yusura bacue jadya ama. ³ Yusuja quisarati tu jadya ehue: “Abrahamtu pana catyati juhua Yusu queja. Jadya tibudyatu Yusura tuyu, jucha metse ama bahua”.

⁴ Mere juatsu tuque ecuana inaya etsujequi. Ecuana tsujetaquira ecuana yanacana tsujetya ama aya. Tuja tsujetyataqui tibu tura ecuana tsujetyaya. ⁵ Jucha metsequetu Yusura aya: “Jucha metse ama mique baya, Jesús queja catyatihua tibu” jadya. Jadya bae tura ecuana aya jucha metse ama, ai ecuana jida juyaju baatsu ama, ecuana tuaqueja catyatihua tibu. Arepa tuja ecuana casada teshue tsujema inajacamere ishuque aijama ama bucha, turatu ayadya. ⁶ Ecuana ebaba Davidratu adebacuareadya riyaque. “‘Mique mique baya jucha metse ama, ai mira jidaque aya baatsu ama, mique eaqueja catyatihua tibu’ jadyatu Yusu juya. Jadya tibudyatu dyaque jida Yusura jucha metse ama baya cuanaque”, ecuana ebaba Davidjatu jadya cueja bahue juhua. Turatu huene cuare:

⁷ “Yusura cuatsashaya eque jubaecua cuanaja jidama cuanaque tillahuaaju, dyaque jida taa tuna.

Dyaque jida taa Yusura tunaja jucha cuana tillahua cuanaque.

⁸Yusu ujeu anihua cuanaquetu pureama juya, Yusura tuna jucha cuana adebanucaya ama tibu.

Jucha metse ama tuna Yusura baya”, jadyatu ecuanaja ebaba Davidra huenecuare.

⁹¿Eje cuanaque tu dyaque jida juya? ¿Ecuana cuita camadya ecuana catubutiya ecuanaja bahue? ¡Aijama! ¡Jadya ama tuque! Tumbaedyatu israelita ama cuanaque Yusura dyaque jida amereya, catubutiya ama cuanaque. Neadebacue Abraham. Yusratu jucha metse ama bahua, tuque tuaqueja catyatihuaju cuita camadya. ¹⁰“Jucha metse ama mique baya”, jadya Yusura Abraham ahua, ¿ecatubumeretiju tujatu jadya acuare, catubumeretimaju ni taa? Icuene cuitadya tujatu jadya ahua. Yusura jadya Abraham isarahujutu Abraham ecuanaja bahue tubuma jari jucuare.

¹¹Tsunuda juatsutu ecuita huitu biti catubumeretihua. Jadyatu catimerehua, tuque jadya catimeremajudya Yusura jucha metse ama bahuaque adebataqui juishu, tuque Yusu queja catyatihua tibu. Tuquetu Yusura tuyu bahua, tuque catubumeretima jariju. Jadidyatu Yusura baya israelita ama cuanaque tuyu, tuna Jesús queja catyatihuaju. Jucha metse ama tujatu ecana baya, arepa ecana ecuanaja bahue tuna catubumeretima paju ama bucha. Jadya tibudyatu Abraham tunaja ebabaque bucha, tuna tuque juhua bucha, Yusu queja catyatihua tibu. ¹²Ecuita huitu biti ecatubuti cuanaja ebabaque camadya amatu Yusura baya Abraham, tumbaedyaya Jesús queja nimee cuanaja, Abraham Yusu queja nimee jucuare bucha. Abrahamtu Yusu queja nimee jucuare ecuita huitu biti catubumeretima jariquedyaya.

Yusura Abraham tuaqueja catyatihua baatsu jidaque tyaana acuareque

¹³“Miquemi dutya quejaque enaruquique jubuque. Mique eque juracanaya cuanaquetu tumbaedyaya jubuque dutya queja cuanaque enaruquique. Tyabuque mique jidaque”, jadya patu Yusura Abraham acuare béru. Jadya tyaana tujatu acuare, ai Abraham tuja cacuatsahati eque juhua baatsu ama. Abrahamtu tuaqueja catyaticuare. Jadya tibudya tujatu jucha metse ama bacuare. ¹⁴Jadya equetu Yusura tyaana ahua cacuatsashati cuana eque aniya cuanaja ishucamadya ama. Yusura tyaana ahuaque ni cacuatsashati cuana eque aniya cuanaja ishucamadya juquena juhua, tume taa tu aishu ama jida juquena juhua ecuana tuaqueja catyati ishuc. Yanacana tyaanadya tujatu aquena juhua, ni ejeque buchique cacuatsashati cuana eque eaniu ama

tibu. ¹⁵ Yusutu dyaque cahuaitiya tura cuatsashahua eque ama aniya cuana tsehue. Canerecatishabuque tujatu ecana. Tyaquena ama ni tura ecuana cacuatsashati juquena juhua, tume ecuana baecuadya juquena juhua ecuana tura amereya eque ama juyaque. Cacuatashati cuejahuaque ama juatsu, tura ecuana jadya aquena ama juhua: “Micuana micuana era cuatsashaya eque ama aniya”.

¹⁶ Yusu tu inijeda ama. “Tyaya mique jidaque”, jadya patujatu acuare Abraham. Yusratu ama amadya aya ai aana ayaque. Abraham jipidya ama, tumbaedy a dutya tuaqueja catyatiya cuanaque Yusura tyabuque jidaque. Tura cuatsashahua eque aniya cuanaque jipidya amatu Yusura jidaque tyabuque. Dutya tuaqueja catyatihua cuanaquetu Yusura jidaque tyabuque, israelita cuana, israelita ama cuana jadya. Abrahamtu tuaqueja catyatihua, tumbaedy a ecuana. Jadya tibu tura ecuana Abraham eque ejuracanaque bucha baya. ¹⁷ Yusuja quisarati tu ehue Yusura Abraham jadya ahuaque: “Duty a yana eque cuanaja ebabaque bucha mique babuque”, jadya patu Yusura cuejacuare. Yusratu Abraham jetieja ama ebabaque bucha bacuare, arepa tuque bacuama jari jucuare ama bucha. Abrahamratu pana ejene acuare Yusura cuejahuaque jadidya adadiyaque. Ejenecuaredya tujatu Yusura eje bucha ataqui ama buchique jadya adadiyaque. Yusratu chacha nityatsuranucaya emaju cuanaque. Tura cuatsashahuajutu icuene aijama juhuaque judadiyadya.

¹⁸ Abrahamratu ejenecuare tuque eque ejuracana cuanaque jetiama anidadibuqueque, Yusura aana ahua equedya. Ehue tu Yusuja quisarati: “Mique eque ejuracana cuanaquetu purari cuana bucha piyebatilla tupu ama judadiya”. Arepa cabacuatitaquima cabatiya ama buchatu Abrahamra pana ejenedya acuare Yusura cuejahua equedya judadiyaque. Jadidyatu judadicuare. ¹⁹ Esiritu jucuare; cien mara jujeri tujatu anicuare. “Ique taa esiri amena cabacuati ishu. Ecue ehue Sara bacue cabacuati baecua. Tuque bacue amena esiri. Arepa yatse jadya ama bucha, eratu jidama ama inime baya. Ejeneyadya tuque Yusura jadya adadiyaque, yatse cabacuatidadiyaque”, jadyatu Abrahamra inime tupucuare. ²⁰ Ejenejacadua ama tujatu Yusu. Ejenecara, ejenecarama jadya ama tujatu ahua cabacuatidadiyaque. Turatu ejeneajehuada jutidya dutya huecaca. Pureamatu Yusu acuare. “Dyaque jida taa mique eatsehue”, jadya tujatu ajacama acuare. ²¹ Turatu yuneri cuitadya pana ejene acuare Yusura ai aana ayaque eauque. ²² Jadya ejene Abrahamra ahua tibu, Yusu queja catyaticuare tibutu Yusura jucha metse ama bacuare.

²³ Yusuja quisarati tu ehue: “Jucha metse ama mique baya”, jadya patu Abraham Yusura acuare. ²⁴ Jadyatu huenetanahua; ai Abraham jadya juhuaque camadya ecuana bahue ishü amatu huenetanahua. Jadyatu huenetanahua ecuana dyadi Yusura jucha metse ama bayaque bahue ishü. Ecuana tuaqueja catyatihuaju, “Jucha metse ama mique baya”, jadidya tura ecuana dyadi abüque. Riyaque Yusratu Jesús Ecuana Cuatsashaquique emajuque chacha nityatsuranucacuare. ²⁵ Yusuja jadya inime juhua tibusu Jesús majucuar. Tuquetu majucuar ecuanaja jucha cuana tsujetyaqui. Yusratu Jesús emajuque chacha nityatsuranucahua, jucha arida cuanaque tunaja jucha cuana apupashatanahuaque adebataqui juishu. “Jucha metse ama mique baya”, jadya tura ecuana aya ecuana Jesús queja catyatihua cuanaque.

5

Yusura ecuana jucha metse ama bayaque

¹ Ecuana ecuana amena Yusura jucha metse ama baya, ecuana Jesús queja catyatihua tibu. Icuenetu Yusu ecahuaiti juhua ecuana tsehue, ecuanaja jucha cuana tibu. Ecuana Cuatsashaqui Jesucristoratu Yusu ecuana tsehue cahuaishajacahua. Bijidamaduraya ama tura ecuana amena. ² Ecuana ecuana Jesús queja catyatihua. Jadya tibudya ecuana cajipetitaqui Yusu queja. Jida tsehue tura ecuana baya, Jesús ecuana jiteque eje bucha juhua eque. Pureama ecuana juya, yuneri cuitadya ecuana, ejeque huecaca Yusu queja judirubuque tibu. Muitabuque ecuana tuja yacuaju.

³ Riyaque yahuaju jari tupu ecuana canerecetiya. Jadya ama bucha ecuana pureama tsehue aniya. Jadya cabahuityatiedya ecuana juya abacata tsehue idu canimehuallatitsu ama. ⁴ Nerecada juya cabatitsu canimehuallatima abacata idu ayaju baatsu ecuana Yusura jida baya. Yusura ecuana jida bayaju tuque ecuana pana ejenedya aya Yusura ecuana tyaana ahuaque tyadadiyaque. ⁵ Ejeneyadya tuque ecuana Yusura ecuana jidaque tyadadiyaque. Tura tuque ecuanaja cuadishahua tuja Espiritu tura tyaana ahuaque ecuana pana ejenemere aishu. Tuja Espiritura ecuana adebamereya Yusura ecuana dyaque iyuhueda bayaque.

⁶ Ecuana taca ecuana eje bucha quinajacameretitaqui ama juhua. Ecuana jadyajutu Cristo majuhua ecuana jiteque Yusura mara huecaca iyahuaju. Tuquetu majuhua ecuana jiteque, dutya ecuana Yusu muiba baecua cuanaque jiteque.

⁷ Ni ejeque buchiquetu majucara ejuu peya iyetayaque cuarequi. Arepa peya jida paju ama bucha, arepa tuque

dyaque jida paju ama bucha, majucarama ecuana ejuu peya iyetayaque cuarequi. ⁸ Cristotu tuja inime taca majuhua ecuana jiteque, arepa ecuana jucha arida baya ama bucha. Jadya eqe ecuana bahue tura dyaque iyuhueda bayaque. ⁹ Cristotu majuhua ecuana jiteque, curusuju ami quijehuetitsu. Tura ecuana Yusu queja jucha metse ama amerehua. Tuque ecuana cuarequi majuhua tibu, yuneridya ecuana Yusura ijahuaja etiquiju nudyabuque ama ecuanaja jucha cuana tibu. ¹⁰ Icuenetu Yusu dyaque ecahuaiti juhua ecuana tsehue, ecuanaja jucha cuana tibu. Tuja Ebacuaque tumeque tsujetya ishuhua majuhua jutu Yusuja cahuaiti terehua ecuana tsehue. Jadya tibu tura ecuana yuneridya tuaqueja judirushaya, tuja Ebacuaque ecuana naru ishuhua ecuana tsehue aniya tibu. ¹¹ Pureamadya ecuana juya, iyacua Yusu ecuana tsehue ecahuaiti ama tibu, Ecuana Cuatsashaqui Jesucristora ecuanaja jucha cuana tsujetyahua tibu.

Adán juhua baedya ecuana jucha arida; Cristo eqe ecuanaja jucha cuana eapupashaque

¹² Adán tu ecuita cajuchati metse jucuaque. Tuquetu dutyaja ebabaque. Tuque cajuchatihua tibu, ecuana Yusura baya ecuana dyadi dutya peadya peadya jucha arida. “Dutyajuchatiyaquetu majudadiya”, jadya patu Yusura Adán acuare. Jadya tibudyatu tuque jucuaque. Jadya tibudyatu dutya ecuita maju aqui; dutyadya ecuana cajuchatiya.

¹³⁻¹⁴ Moisésja cacuatsashati cuana huemema jariju anicuare cuanaque tuna cajuchaticuare. Jadya ama bucha tuna ni aira buchique cuejahua ama cacuatsashati eqe ama anihuaque, cacuatsashati aijama jari jucuaque tibu. Arepa tuna Adán cajuchatihua bucha cuita ama cajuchatihua ama bucha, tumbae majuedya tuna juhua. Adán eje bucha juhua equetu dutya ecuita maju aqui juhua. Jesús eje bucha juhua eqe ademe ecuana dutya anibuque terenuca ishuhua ama. ¹⁵ Adán cajuchatitsu eje bucha jucuaque tsehue tu beta tupu ama Yusuja canerecabati ecuanaja ishuhua aniya tsehue. Adán cajuchatimetse juhua jutu dutya ecuita cuana maju aqui jutibunehua. Jadya ama buchatu Yusu ecuana tsehue dyaque jida juhua. Turatu Jesucristo cuadishahua dutyaja juchaju maju ishuhua. Jesús maju pidya camadya juhua tibu ecuana jetiama Yusura tsujema inajacamereya Jesús queja catyatiya cuanaque. ¹⁶ Yusura ecuana jida tsehue bayaju eje bucha juyaquetu Adán cajuchatihua eqe eje bucha juhua bucha ama. Adántu ecuita cajuchatimetse jucuaque. Tuque cajuchatimetse juhua jutu Yusura dutya ecuita jucha metse baya, tuque eqe juracanahua cuanaque. Amena ecuana bacue eje uma cajuchati juhua. Yusu tu dyaque jida ecuana

tsehue. Ecuana tura ecuana jucha metse ama baya, Jesucristora Adánra yuamaturahuaque bajejehua tibu. ¹⁷ Peadya ecuita camadya cajuchatihua tibu ecuana dutya maju aqui. Amena peyadya majuhua ecuana jiteque. Jadya tibudyatu Yusu dyaque jida juhua ecuana jiteque, jucha cuana ecuanaja tillayaque. Tura ecuana jucha metse ama babuque. Tura ecuana yatseja ecuari amerebuque tuatsehue. Jesucristo ecuana jiteque eje bucha juhua eque, ecuana tuja yacuaju judirubuque.

¹⁸ Peadya ecuita tu cajuchatihua. Tuque cajuchatihua tibutu Yusura dutya ecuita jucha metse baya. Tumebaedyatu peadyara camadya jidaque tuyuque ahua. Jesucristo ecuana jucha seca ishuhua tibu, tuque ecuanaja Yusura jucha cuana apupashaya dutya ecuana Jesús queja catyatiya cuanaja. Tura ecuana jucha metse ama baya. Tura ecuana anishaya ni eje tupu tere ishuhua. ¹⁹ Peadya ecuita camadyatu Yusura cuatsashaya eque ama juhua. Jadya tibudyatu Yusura dutya ecuita jucha arida baya. Dutyadya ecuana cuatsashaya eque ama aniya, Adán juhua bucha. Amena peya bacue Yusura cuatsashaya eque anihua. Jadya tibudyatu Yusura jucha metse ama baya eje uma tuaqueja catyatiya cuanaque. Tuna tuna amena cuatsashaya equedy a niya, Jesús juhua bucha.

²⁰ Eje uma mara mara Adán cajuchatihuajutu Yusura Moisés cacuatsashati huenemerehua. Huenemerehua tujatu ecuita cuana tura amereya eque juyaque ama bahue amere ishuhua. Jadya ama buchatu dutya cajuchatiajehuada jutidya. Yusu bacue ecuana tsehue dyaque jidadya jutidya juayeya. Arepa ecuana cajuchatiya ama bucha, tura ecuana dyaque iyuhueda tsehue baya. ²¹ Icuenetu ecuita cuana cajuchati-jacahua ama. Jadya tibudya tuna maju aqui. Ecuana Cuatsashaqui Jesucristo ecuana jiteque majuhua tibu, ecuana Yusura dyaque iyuhueda tsehue baya, arepa ecuana jucha arida juhua ama bucha. Tura tuque ecuanaja jucha cuana apupashahua. Jadya tibudya, ecuana majutsu judirubuque tuaqueja ni eje tupu jacanuca ishuhua.

6

Cajuchaticaraque jacatsu Cristora amereya eque anitaquique

¹ Yusutu dyáque jidadya jutidya juajeya ecuana tsehue, arepa ecuana dyaquedy jutidya cajuchatiajeya ama bucha. Umaeja ni tu inime juya: “Jutaquiju ni tu cajuchatiajetaquidya jutidya, Yusuja ecuana iyuhuedadya jutidya baaje ishuhua”. ² ¡Aijama! Jadya tuque ecuanaja inime tuputaqui ama,

ni riya piji buchique. Jesús queja catyatitsu tuque ecuanaja cajuchaticaraque terehua. Emajuque amena cajuchaticaraque bucha, jadidya tuque ecuanana amena cajuchaticaraque jacahua. ³ Cutsameretihuaju ecuanana Cristo Jesúsra tuja inime eque juyaju baya. Emajuque canajetijacahua bucha, jadidya tuque ecuanana cajuchaticaraque jacahua. ⁴ Cristotu majuhua. Emajuque tumu caniju ishatanahuajutu Yusura tuja casa tsehue nityatsurahua, chacha aninuca ishu. Tuque ahua baedya tura ecuanana cuareya. Cutsameretihuaju ecuanana Cristora tuja inime eque juyaju baya, beruque inime ecuanana cuaretanahuaju. Ecuana ai bijiseri cuana, inime tupu cuana jadya tuque ecuanana cuaretanaya. Cajuchaticaraque tuque ecuanana jacaya.

⁵ Tuja inime taca equetu Cristo majuhua curusuju. Tumbaedya ecuanana ecuanaja inime taca equedya cajuchaticaraque cataqui, tuja inime juya eque ecuanana amena aniya tibu. Cristo emajuque netitsuratsu tujatu bamerehua Yusuja casa ni eje tupu jadya ecabameretique ama. Ecuana jatu aniya amena riyaque casa. Jadya tibudya tuque ecuanana cajuchaticaraque jacahua. Iyacua tuque ecuanana eje bucha jucaraque iyacuaque aniya. Yusuja casa tsehue ecuanana beru anihua bucha anijacahua. ⁶ Icuene ecuanana dutya jidamaque ayaque anihua. Tsujetyama mereta juyaja tuja patrón tuja merejacataqui ama bucha, jadidya ecuanana cajuchaticaraque cataqui ama juhua. Iyacua ecuanana amena cajuchaticaraque jacahua. Cristotu majuhua ecuanana jiteque, Yusuja ecuanana tuja casa tyaishu. Iyacua ecuanana icuene anicuare bucha ama aniya. ⁷ Ecuitatu majutsu cajuchaticaraque jacaya. Jadidya ecuanana cajuchaticaraque junucataqui ama. Yusura ecuanana jucha metse ama baya. ⁸ Cristotu tuja inime taca cuitadya majuhua. Tumbaedya ecuanana ecuanaja inime taca eque cuitadya ecuanana cajuchaticaraque jacahua. Ecuana tuja inime eque juya tibu, ecuanana bahue tuatsehue anidirubuqueque, tuque bucha judaditsu. ⁹ Yusuratu Cristo emajuque nityatsuranucacuare. Ni eje tuputu majunucabuque ama. Ni ejeja buchajatu aniya ama casa tuque majushanuca ishu. ¹⁰ Cristotu maju pidya camadya juhua. Tuquetu majuhua ecuanana jucha cuana tsujetyaqui. Tsujetyataquique tura tsujetyahua tibusu tuque ni eje tupu majunucabuque ama. Iyacuatu tuque aniya Yusu muimere ishu. ¹¹ Neadebacue riyaque. Cajuchaticaraque tuque ecuanana amena jacahua. Emajuque canajetijacahua bucha, jadidyatu ecuanana cajuchaticaraque jacahua. Iyacua tuque ecuanana inime pana cuaretana juhua. Iyacua ecuanana Yusuja biji eque aniya, Jesúsja inime juya eque cuita camadya ecuanana aniya

tibu.

¹² Arepa cajuchaticara tsehue aniya ama bucha, necajuchatieme. Bisutada cajuchaticaraque neaume. Jucha queja ijahue necatimereume. ¹³ Satanásra cajuchatishacara ayaju, nebacaume. Necatyatieme micuanaja ecuita tuja tsume ishü. Tuaqueja ecatyatiuque, Yusu queja jutidya necatyaticue; tura jidaque amere ishü netsumecue. Iyacuanetanahua micuana. Cajuchaticaraque tuque micuana jacahua. ¹⁴ Iyacuana ecuana Yusura jucha metse ama baya, ai ecuana cacuatsashati eque juyaju baatsu ama, ecuana Jesús queja catyatihua baatsu. Jadya tibudya ecuana Satanásra cuatsashaya eque jutaqui ama.

Yusu tu iyacuana ecuana metseque

¹⁵ Arepa ecuana jucha arida ama bucha, Yusura ecuana jida tsehue baya. Tura ecuana Ijahua quejaque inajacamereya, ai ecuana cacuatsashati cuana ehüene eque anihua baatsu ama. Jutaqui jadya juya tibu, umaeja ni tu inime juya: "Necajuchatiajeradya jutidya". ¡Aijama! Jadya tuque ecuanaja inime tuputaqui ama. ¹⁶ Ejeque ecuita peya queja catyatitsu ameretaya tibu, tujatu ataqui dutya tuque cuatsashatayaque. Micuana micuana bahuedya tumeque. Ecuandya ecuana tumeque ecuita buchique, peya queja tuque mere ishü catyatiyaque. Satanás queja catyatiya cuanaquetu casada tsehue cajuchatitaqui, tura cuatsashaya tibu. Majutsutu jadya juya cuanaque ijahuaja etiquiju judirubuque. Yusu queja catyatiya cuanaque bacue casada tsehue tura amereya eque juishuque. Casada tsehue Yusuja biji eque ani shuque tuna.

¹⁷ Yusurupai tuque aya Yusu, ecuanaja inime cuaretanahua tibu. Icuene ecuana Satanásja biji eque anijacahua ama. Iyacuana ecuana jadya anie ama juya. Yunerique quisarati bacatsu tuque ecuana ejenehua. Ecuana inime taca eque ecuana Yusura amereya eque juhua. ¹⁸ Yusura ecuana tuja casa tyahua, ecuanara cajuchati ebijiseriuju, tuja biji eque juishuque bijiseri ishü. ¹⁹ Cuejaya micuana era, ecuana ecuana ecuita metsequique buchique. Jadya micuana cuejaya micuanaja era bahüityayaque dyaque jida adeba ishü. Icuene ecuana Satanás queja catyatihua jidamaque aishü. Ecuana jatu abijida juhua jidamaque. Iyacuana Yusu queja pana catyati nejura jidaque aishü, Yusu queja ecatyati cuanaque aniya bae anie juishü.

²⁰ Icuene ecuana cajuchaticara tsehue juneniya jari patya ecuana anicarama juhua Yusu pureamatura ishü. ²¹ ¿Aishü jatsutu jida juhua ecuana jidama juyaque? ¡Ni aishü buchique! Iyacuana ecuana bisuya icuene eje bucha anie

juhuaque adebatsu. Jadya anie jujacahuaque ama juatsu ecuana Yusura ijahuaja etiquiju enudyauque. ²² Iyacia ecuana Satanás quejaque inajacameretanhua. Cajuchati-taqui ama ecuana amena. Yusu queja ecuana amena catyatihua. Tuaqueja catyatihuaju, tura ecuana anishaya tuja biji eque. Majutsu ecuana tuaqueja judirubuque ni eje tupu jaca ishuhua. ²³ Jucha arida tibu ecuana maju aqui, mere pujira mere juya tibu etsujequi inaya bucha. Yusura bacue ecuana tsujema neri Satanás quejaque inajacamereya ecuana, Ecuana Cuatsashaqui Cristo Jesús queja catyatihua baatsu. Tura ecuana inajacamereya majunuca ishuhua, tuatsehue ani ishuhua.

7

Yusuja Espiritu eque ecuanaja inime cuaretanayaque

¹ Micuanaratu pana adeba aya cacuatsashati ehuenegue, micuana ecuana tsehuequi cuanaque. Chacha aniya jari tupu camadya ecuana casada tsehue cacuatsashati eque anitaqui. Majutsutu eje bucha jadya junucataqui ama. ² Jadya cuejae micuana aya, micuanaja adeba ishuhua. Cacuatsashati equetu epuna ecaquemitique yahuique jaquedyu. Jacataqui ama tujatu peya tsehue ani ishuhua. Yahuique ni tuja majuya, tume tu ahuema neri. Caquemitinucacara juatsutu eahuemajuque caquemitinucataquidya cacuatsashati cuanara amereyaque cayuamatimaquedyu. ³ Epunara yahuique chacha jariju peya deca jaraquereyaque tumeque epunadya tu jucha metse. “Epunadyatu jidama juya yahuique tsehue”, jadya ni tu peya cuanaja inime juya. Yahuique ni tuja amena emaju, tumetu amena jidadya peya tsehue caquemitinuca ishuhua. Yahuique iyacuara tahuiqueretsu jabayaque juatsutu inime metse juya amadya.

⁴ Jadya micuana cuejaya, ecue eatsehuequi cuanaque. Ecuana Jesucristo queja catyatihuaque ecuana tumeque epuna buchique. Icuene tuque ecuana tuyu ama inime tupuhua: “Cacuatsashati cuana eque aniya tibudya ecuana quinajacameretibuque”, jadya ecuanaja inime juhua.

Iyacia tuque ecuana jadya inime tupujacahua, epunaja yahuique majuhuaaju tuja yahuique jujacahua bucha. Iyacia ecuana Cristo jaque. Epuna yahuique majuhuaaju yahuique iyacia jaque bucha, jadidya ecuana amena Cristo jaque. Yudijidya chachatu netitsuranucahua. Ecuana tujaque juya tibu ecuana Yusuja biji eque anicara juya. ⁵ Icuene ecuana ecuanaja biji eque anihua. Yusu cahuaitisha ishuhue ecuana ahua. Cacuatsashati eque Yusura amerecarama ayaque ehuenegue isaratsu tuque ecuana bijiserihuadya

jutidya cajuchati. Yusuja bijidamaque tuque cahuaitisha ishunque ni ecuana ajacacarama aya, japada tuque ecuana Yusu babuque ni eje tupu jipe ishuma. ⁶ Icuene ecuana eje bucha cajuchatijacataqui ama juhua. Etare apudaju erisi netiyaque cuinanataquima netiya bucha, jadidya ecuana ecuana taca quinajacameretitaquima cabatihua. Jesústu majuhua ecuana cuarequi. Amena ecuana inime cacuaretihua. Amena ecuana Yusuja biji eque anitaqui cabatiya. Amena ecuana Yusura amereya eque anicara juya, cacuatsashatiju ehue ne baatsu camadya ama ecuana jadya anie jutaqui, tuja Espiritura ecuanaja inime cuarehua tibu.

Cacuatsashati ehue neque isaratsu ecuana bahue ecuana jucha arida cuanaque

⁷ Umaera ni tu inime tupuya: “¿Jutaquiju ni taa tu cacuatsashati jidama?” jadya. ¡Aijama! Jadya inime netupura ama. Cacuat-sashati tu jidaque. Ehue neque isaratsu ecuana caadebatiya ecuana jucha aridaque. Cacuat-sashatiju tu ehue ne: “Peya jaque micue ishuma bijiseriume” jadya. Riyaque isarahuaque ama juatsu ecuana jucha metse ama cabatiquena juhua, peya jaque ai bijiseriyaque. ⁸ Cacuat-sashati ehue neque isaratsu, Yusura ecuana amerecarama ayaque bahue juatsu, dyaquedya jutidya tuque ecuana ecuanaja ataquimaque acara aya. Arepa jidamaque bahue ama bucha acaradya jutidya tuque ecuana jidamaque aya. Cacuat-sashati baecuaque juatsu tuque ecuana adebaquena ama juhua ejeque jucha, ejeque juchaque ama jadique. ⁹ Cristo queja catyatima jariju ique jucha aridama cuana bucha cabatihua. Yusura jida cuana baya bucha ique cabatihua. Jadya tuque ecue inime juhua, era cacuat-sashati adebataquima baya tibu. Adebatsu amena ique jucha aridaque caadebatiya. Caadebatiya ique Yusura japada emaju bucha bayaque. ¹⁰ Amena riyaque adebatsu tuque ecue inime juhua: “A, amena bahue juhua eje bucha anie juishuque Yusu pureamatura ishuma. Jadya ama bucha anitaqui ama cabatiya dutya cacuat-sashati eque. Ique jucha arida tibu tuque Yusu japada ebau. Majutsu tuaqueja ama ejudiruu”, jadya tuque ecue inime juhua. ¹¹ Yusura cuatsashahuaque bahue jida juatsu, ique caadebatiya Yusura jucha metse bayaque, yume tucue tuque ahua tuque cahuaitisha ishunque. Dyaque nerecada ique cabatihua. “Majutsu tuque Yusu japada babuque”, jadya tuque ecue inime juhua.

¹² Jadya ama bucha tu cacuat-sashati cuana jida. Yusura tuna cuejaha Moisés eque. Dyaque tuyuque tume. Dyaque jidaque tume. ¹³ Jadya ni taa ecue inime tupu ejuu: “Cacuatsashati cuana jidaque juatsu, jidaque adebadaditsudya ni

taa tuque Yusu japada badirubuque”. ¡A, aijama! ¡Jadya inime patupu ama! Yusuratu cacuatsashati cuana cuejahua, dutya ecuana dyaque cuita cajuchatiyaque bahue amere ishü, dutyara Yusu cahuaitisha ishü ayaque. Icuene ique jida cuana bucha cabatihua. Amena riyaque cacuatsashati cuana pana adeba aatsu dyáquedya jutidya caadebatiajeya ique jucha aridaque.

Jidaque acara ayaque aya amadya ecuanara; jidamaque acarama ayaque camadya ecuana ayaque

¹⁴ Bahuedya ecuana Yusura tuja Espíritu eque tuja cacuat-sashati cuana cuejahuaque. Arepa tume cuanaque tujaque ama bucha, ique bacue ecuita; ecue casa eque cuita camadya tuque ataquí ama baya jidaque tura cuatsashahuaque. Arepa eje bucha juatsu ecuita metsequira tuque metsera cuat-sashahuaaju acarama aya ama bucha, ataquidya tujatu tura cuatsashahuaque. Jadidya ique. Arepa ique cajuchaticarama juya ama bucha, cajuchatiyadya ique. ¹⁵ Yusuja bijidaque ama aatsu tuque inime tupuya: “¿Eje bucha juatsu tuque ahua ama jidaque era acara ayaque?” Cajuchatitsu tuque ecue inime juya: “¿Eje bucha juatsu tuque ahua riyaque era acarama ayaque?”

¹⁶ Eratu pana ejenedya aya Yusuja cacuatsashati cuana jidaque, arepa ique jidama paju ama bucha. ¹⁷ Jidamaque tuque aya, era cuitadya acara aatsu ama. Aya tuque era, ecue jucha aniya jari tibu. ¹⁸ Ique riyaque yahua juque ecuita jucha aridaque. Adebayadya tuque era ecue casa eque cuita camadya jidaque ataquí ama bayaque. Arepa jidaque acara aya ama bucha, ecue cuita camadya casa eque tuque ataquí ama baya. ¹⁹ Acara ebari datse tuque jidaque aya. Jadya ama bucha aya ama era. Jidamaque acarama ayaque cuita camadya aya. ²⁰ Era acarama ayaque tuque aya. Era cuita, cajuchati bijiserinucatsu ama, ique jucha arida jari tibu, tuque aya.

²¹ Jidaque era acara ayaque, eje bucha ataquí ama tuque baya ecue casa eque, educuju ecue jucha aniya tibu. Pana adebadya tuque aya riyaque. ²² Ecue ishutu dyáque jida Yusura cuatsashahuaque; tura amereya eque neridya jucara juya. ²³ Jidaque tuque acara ebari datse aya. Ecue tu inime: “Yusura amereyaque tuque acara ebari aya”. Arepa ecue inime jadya ama bucha, tuque ataquí ama baya. Educu equeque tuque ecue cajuchaticaraque. Erisi buchique ique. Etare apudaju erisi netiyaquetu eje bucha cuinanataquí ama, tunebaedya ique cajuchatijacataquí ama cabatiya. Aira cuana jadya jujacataquí ama amereya.

²⁴ ¡Dyaque nerecada, inime tupu baecua ique! ¿Aira piji jatsu dyadi einajacamereu, Ijahuaja tuja etiquiju ique duju ishü ama? ¿Aira jatsu dyadi cajuchati ebijiserimerejacau? ²⁵ Ecuana Cuatsashaqui Jesucristojatu casa aniya. Tura in-amerejacaya. Jadya tibudya tuque ecue Yusu jadya abahue:

—Tata, miquemi dyaque jida eatsehue, —jadya tuque ecue abahue.

Eje buchadya Yusura amereya eque anicara juya. Jesucristoja casa tsehueque ama jadya anitaqui ama cabatiya. Tuquemaque cajuchatijacataqui ama cabatiya.

8

Yusuja Espiritura cuatsashaya eque anitaquique

¹ Ecuana Cristo Jesús queja catyatihuaque ecuana Yusura nerecaturanime ama ecuanaja jucha cuana tibu. ² Icuene ecuana cajuchaticaraque jacayaque ama anihua. Iyacua ecuana Yusuja Espiritura tyahua tuja casa ecuana cajuchaticaraque jaca ishü, ijahuaja etiquiju ecuana judiru ishü ama. Aniya tuque ecuanaja riyaque casa, ecuana Cristo Jesúsja inime juya eque aniya tibu. ³ Eje bucha jutaqui ama cuita cacuatsashati ehüene eque juya tibu, eje bucha judirutaqui amatu Yusu queja cacuatsashati eque. Yusura tuja peadyaque Ebacuaque cuadishahuaju, tujatu anicuare ecuita, ecuana jucha arida cuanaja bucha. Ecuana jucha cuana tsujetyaqui majutsu tura ecuana tuja casa tyahua, ecuanaja cajuchaticaraque jaca ishü. ⁴ Jadyatu tuque juhua, ecuana Yusuja biji eque ani ishü, tura amereya eque ani ishü. Ecuana ecuana amena aniya Yusuja Espiritura amereya eque. Ecuana biji eque ama ecuana aniya. Jadya tibudya ecuana anitaqui cabatiya Yusura amereya eque.

⁵ Tunaja biji eque cuita camadya aniya cuanaratu inime tupuqui aya tunaja pureama ishüque cuita camadya. Yusuja Espirituja biji eque aniya cuanaratu inime tupuqui aya Yusu pureamatura ishüque. ⁶ Tunaja biji eque, cajuchati bijiseri eque anihua cuanaque tuna canerecatibuque. Eje tupu majutsu tunajatu Yusu japada babuque ni eje tupu jipe ishü ama. Ecuana Yusuja biji eque aniya cuanaque bacue ecuana aniya dyaque jida, inime tsapema tsehue. Majutsu ecuana Yusu queja judirubuque ni eje tupu jaca ishü ama. ⁷ Tunaja biji eque cuita camadya juishüque inime tupuqui aya cuanaque tuna Yusu ujeu cuanaque. Anicarama tuna juya tura amereya eque. Tunajatu ni eje bucha ataqui ama Yusuja biji eque ani ishü. ⁸ Tunaja biji eque cuita camadya aniya cuanaratu Yusu pureamaturaya ama.

⁹ Jadya ama micuana. Micuanaja biji eque ama micuana aniya, arepa peya huecaca micuanaja jadya anicaraque inime juetiya ama bucha. Yusuja Espiritura amereya eque micuana aniya. Cristora Espiritu cuadishahuaque micuana tsehue tibu, micuana tura amereya eque juya. Cristora Espiritu cuadishahuaque tu peadya peadya Cristoja cuana tsehue. ¹⁰ Cristo tuja Espiritu eque micuana tsehue aniya tibu, iyacuanehuadya tura micuana, Yusu tsehue ani ishuni eje tupu jaca ishuni ama. Majutsu tuque micuanaja ecuita riribuque, micuana cajuchatihua tibu. Arepa jadya juya ama bucha, Yusuja Espiritura micuana anishanucabuque, tura micuana jucha metse ama baya tibu. ¹¹ Yusura Jesús emaju caniju ishatanacuareque tuja ecuita cuitadya nityatsuranucacuaque bucha, jadidya tura ecuana ejeque huecaca eju ecuana epapatanaque ecuana nityatsurabuque. Ecuita maju baecuaque tura ecuana tyabuque. Tuja Espirituja casa eque tura ecuana jadya amerebuque.

¹² Jadya tibudya micuana cuejaya riyaque, micuana ecue eatsehuequi cuanaque. Yusuja bijidaque tuque ecuanaja ataqui. Ecuanaja biji equedya jutidya ai neaajera ama. Ecuana icuene cajuchatihua baedya jutidya nejuajera ama. ¹³ Cajuchatiajeyadya jutidya ni ecuana, ecuanaja biji, Yusura ecuana nerecaturabuque. Majutsu tuque ecuana jipebuque ama. Yusuja Espiritu eque ni ecuana cajuchatijacaya, tura ecuana Yusu tsehue anishabuque. Yusu tsehue ecuana aniya, riyaque yahuaju jari tupu camadya ama, majutsu tumbaedya. ¹⁴ Yusuja Espiritura amereya eque juya cuanaque tu Yusuja cuanaque. Yusura tuna tuja ebacua cuanaque bucha baya. ¹⁵ Icuene ecuana Yusura cuatsashaya eque jucara ebari juhua, tuque mubatsudya jutidya. Emetsenera tuque metsera amereya eque bajida juatsu ejuu bucha ecuana jucuaque. Jadya ama bucha tuque ecuanaja Yusura tuja Espiritu cuadishahua. Tumeque Espirituradya ecuana inajacamerhua. Jadya equedya ecuana bajidama, Yusura ecuanaja jucha cuana tibu enerecaturauju. Tuja Espiritura ecuana yunerineya Yusura ecuana tuja ebacuaque bucha bayaque. Jadya tibudya tuque ecuanaja Yusu tsehue quisaratiyaque jadya abahue, “Ecue Etata”, jadya.

¹⁶ Ecuana ecuana bahuedya Yusura ecuana tuja ebacua cuanaque bucha bayaque. Yusuja Espirituradya ecuana bahue amereya. “Miquemi Yusura baya tuja ebacuaque bucha”, jadya tura ecuana aya.

¹⁷ Yusura ecuana tuja ebacua cuanaque bucha baya tibu, tumbaedya tura ecuana tyabuque dutya jidaque tuja cuanaque tura tyaana ahuaque. Yusura Cristo tyaana ahuaque

ecuana dyadi tura ecuana tyabuquedya. Yusu adeba baecua cuanara ecuana jida ama aya, Yusura amereya eque ecuana juya baatsu. Cristo tunajatu tumbaedy a jida ama acuare riyaque yahuaju aniya jariju. Cristo tu jida, casada jadya. Eje tupu tuque dutyaja ecuari judadihuaju ecuana dyadi ecuana tuatsehue ecuaritya jubuque, arepa ecuana rehua canerecatiya ama bucha.

¡Dyaque jida ecuana Yusuja yacuaju judirubuqueque!

¹⁸ Riyaque yahuaju ecuana canerecatiya. Tuequedya ecuana Ecuana Cuatsashaqui queja judirubuque. Tuque bucha ecuana jubuque. Jadya tibudya ecuana inime tsapema anicara juya, arepa rehua canerecatiya ama bucha, Yusura ecuana dyáque jida ameredadiya tibu. Eratu pana ejenedya aya ecuana jadya judadibuqueque. ¹⁹ Yusura dutya iyahua cuanaratu eje bucha juetishacara tsehue ihuaya tumeque huecaca, eje tupu tura ecuana tuja Ebacuaque Jesucristo bucha amereyaque. ²⁰ Yahua iyatanahuajutu amena dutya cayuamatitibunehua. Iyahua cuanaja inime amatu jadya jutibunehua, “Adán cajuchatihua tibu, dutya era iyahua-quetu jidama juya, cayuamatiya”, jadya Yusuja inime juhua tibu.

Jadya ama buchatu Yusuja inime: “Ejeque huecaca tuque iyacuanebuque dutya era iyahua cuanaque”. ²¹ Dutya iyacua riyaque yahuaju aniya cuanaquetu cayuamati, tere jadya jubahue. Tumeque huecacatu Yusura tuja cuanaque, dutya tura iyahua cuanaque jadya tura amerecara aya bae amerebuque ni eje tupu cayuamatinuca ishuhua ama. Jadya iyacuane-tanaetu dutya jubuque. ²² Adán equeque tupu iyacua eque-quetu dutya canerecatiya. Epunara mari mari tsehue ebacua cuinanayaque eihuhua bucha, jadidyatu dutyara ihuaya dutya cuaretanayaque. ²³ Ecuana ecuana nerecadadya juya. Aracara, iijicara jadya ecuana jubahue. Castere bahue ecuana; ujejeda jubahue ecuana. Yusura tuque ecuanaja tuja Espíritu cuadishahua. Espíritu ecuana tsehuedya tibu, tuque ecuana pana ejenedya aya ejeque huecaca ecuana Yusura dutya tyaana ahuaque tyadadibuqueque. Dutyara tuque ecuana ihuaya tumeque huecaca ecuanaja ecuita riri baecua judadiyaque. Ecuanaja ecuita jadya ecabapetiju, ecuana Yusura ejitaju abuque tuja ebacua cuanaque jadya. Jadya canerecatie ecuana juya, tura ecuana cabapetishaya tupu. ²⁴⁻²⁵ Iyahua quejaque inajacameretsu ecuana Yusura tyaana ahua ecuita ecabapetique. Ihuaya jaridya tuque ecuana tumeque ecuita cabapetiyaque. Amena ni ecuana etyatana ejuu ecuana tyatana ana juhuaque, eihuhua ama jaridya tuque ecuanara. Ni ejeratu ihuaya jari ama amena

etyatanaque. Ecuana ratu ihuaya jari Yusura ecuanaja ecuita cabapetishadadiyaque. Ejeneyadya tuque ecuana ejeque huecaca Yusura cabapetishayaque. Canimehuallatinime ama ecuana, arepa riyaque yahuaju jari tupu nrecada juya ama bucha.

²⁶ Tumebaedy a ecuana Yusuja Espiritura casaturaya, ecuana casadama juyaju. Baecua ecuana eje bucha quisaratie Yusu tsehue juishuque. Yusu eje bucha cuejataquima baatsu, ataqui ama ecuana quisarati baya ecuanara educuju inime tupuyaque. Yusuja Espiritu tu ecuanaja ish u bacabacaya. Jadya tsahuae tura ecuana aya ecuana Yusu tsehue quisaratiyaju. ²⁷ Arepa ecuanara quisarati ataqui ama baya ama bucha, Yusratu adebaya ecuanara educuju inime tupuyaque. Jadya tibudya tujatu adebaya tuja Espiritura cuejacara ayaque tura ecuanaja ish u bacayaque. Yusuja biji equetu tuja Espiritura bacaya, ecuana tuja cuanaja ish u.

Ni aira buchique ecuana Yusu jacamereyaque ama

²⁸ Yusratu dutya ecuana eje bucha juyaque, ecuanaja jida ish u jadya amereya, tuque iyuhueda baqui cuanaja ish u. Turatu dutya eje bucha amereya ecuanaja jida ish u, tura tuja ish u mepehuaja. ²⁹ Yahua iyama jariradyatu Yusura adeba, iyuhueda bau jadya ahua tuja judadibuque cuanaque. Tunaja ish u tujatu inime tupuhua: “Riya cuanaque rique cuejabuque ecue Ebacua Jesucristo bucha tuna jida juish u. Tuque tunajatu tuna tsehuequique icueneque buchique jubuque. Jetiama era mepehua cuanaque tujatu jubuque tuja eju cuanaque bucha”, jadya patu Yusura inime tupucua.

Jadya ihuarae tujatu ecana ahua Ebacuaque Jesús bucha juish u. ³⁰ Tura mepehua cuanaque tujatu cuejahua: “Micuana micuana jucha metse ama baya”. Tura jucha metse ama bahuaquetu tura jida amerehua tuja Ebacuaque bucha. Jadya Yusuja inime juya tibu, ecuana tuja cuanaja ish u, dutya ecuana eje bucha juyaquetu ecuanaja jida ish uque.

Jesucristo eque ecuana Yusura bamereya tura iyuhueda bayaque

³¹ Yusu ecuana tsehue dyaque jida juya tibu, ¿eje bucha canimehuallatie jatsu ecuana ejuu? Yusura ecuana narujacaya ama. Jadya tibudya tuque ecuana jidama ama inime baya, arepa ecuana ujeu baqui cuanara jidama aya ama bucha. ³² Yusura ecuana dyaque iyuhueda baya. Turatu Ebacuaque iyuhuedama bahua iyeta ish u. Turatu cuadishahua ecuana eiyetauque. Tura etsujequi dyaque umada ecuana tujaque amere ish u tsujetyahua

tibu, yuneri cuitadya tujatu abuque dutya ecuanaja jida ishü. ³³ Ecuanaratu jidama ama inime baya peya cuanara jucha metse jadya ayaju ecuana Yusuja emepeque. Yusura cuitadya ecuana jucha metse ama jadya cuejaya, tura ecuanaja jucha cuana tillahua tibu. ³⁴ Cristo Jesústu majuhua ecuanaja jucha cuana tsujetyaqui. Emajuquetu chacha netitsuranucacuare. Iyacia tu tuque Yusuja yacuaju. Tuquetu Etataque tsehue enaruquique. Tuquetu quisaratiya Etataque tsehue ecuanaja ishü. Jadya tibudya ecuana ni ejeja buchique jadya ataqui ama: “Micuana jucha arida tibu, micuana canerecatitaqui. Yusu tuque micuana japada babuque ni eje tupu jipe ishü ama”, jadyatu ni ejeque buchique jutaqui ama.

³⁵ Cristora ecuana dyaque iyuhueda baya. ¿Aira jatsu ecuana iyuhueda ebamerejacau? ¡Ni airatu jadya eamereu ama! Yusu adeba baecua cuanara ni ecuana jidama eau. Eijehueu ni tunara ecuana ecuanaja epu cuana juque. Tunara ni ecuana ehuanashau. Tupu ama ni ecuanaja ara ishü cuanaque eaniu. Jutu ishü cuanaque ni ecuanaja tupu ama eaniu. Mudaju majutaqui ni ecuana ejuu. Cuchiru tsehue ni tunara ecuana eiyeu, jadya ama juatsu peya ai quiyeti ishü tsehue. Arepa ecuana jadya ejuu ama bucha, Cristora ecuana iyuhueda bajacaya ama ni tura ecuana narujacaya. ³⁶ Beru yuequedya Yusuja cuanaque jucuar baedya ecuana judadibuque. Ecuia dyaque nrecada atanacuarerari Yusuja quisarati huenecuare:

“Miaqueja ecuana catyatihua tibu, ecuana dutya huecaca ecuita cuanara iyecara aya.

Uhuisha cuana iye ishü edujuta bucha tunara ecuana aya”.

³⁷ Arepa ecuana jadya canerecatie juya ama bucha, ni aira ecuana canimehuallatishaya ama. Iduya tuque ecuana dutya pureama tsehue, Cristora ecuana iyuhueda baya tibu. ³⁸ Ni aira buchique ecuana Yusu iyuhueda bamerejacaya ama. Ecuanajatu amena inime etere pana adeba tuque ecuana aya. Ecuana chacha aniya jari tupu, majuhuaaju iyuhueda tura ecuana bajacaya amadya. Barepaju Yusu tsahuaqui cuanara ecuana iyuhueda bajacamereya ama. Ejitaju ama cuanaja casara ecuana iyuhueda bamerejacaya ama. Yatseja ecuari cuanaja casara ecuana iyuhueda bamerejacaya ama. Jida ni ecuana cuetishaya, jadya ama juatsu jidama, tura ecuana iyuhueda bajacaya ama. Mara cuana juetibeyaju tura ecuana iyuhueda bajacanime ama. ³⁹ Ebarucue equera ni emaque equera ecuana iyuhueda bamerejacaya ama. Jadya tibudya ni ai Yusura iyahuara ecuana tuque ejacamereu ama; ni aira buchique ecuana iyuhueda ebamerejacau ama.

9

Yuequedya Yusura israelita cuana tuja juishu mepecuareque

¹⁻² Dyaque jidama inime ishu tuque baya ecue ata israelita cuana. Dyaque jidama inime ishu ujeda jadya taa baya educuju. Pusha ama cuitadya jadya caadebatiya ique Cristoja inime eque juya tibu. Yusuja Espirituradya yunerineya ique pusha pusha ama juyaque. Tuna jiteque ique dyaque peya inime juya. ³ Eje buchadya Yusu queja bacatsu tuna Jesús queja catyatishamerecara tuna aya. Tuna tuna ecue ata cuana. Peadya ecuita eque camadya ejuracanaque ecuana.

—Tata, jadya jutaquique juatsu era Cristo japada pajaca, ecue ata cuana ijahuaja etiquiju nubidiru ishu ama, —jadya datse tuque Yusu cuejacara ahua.

⁴ Ecue ata cuana tu Israel eque ejuracana cuanaque. Yusratu tuja ebacua cuanaque amerehua. Tuna tshuetu tuque junenicuare tuja casa, jidaque tuna bamereyaque. Yahuatu quisarati tuna naru ishu. Moisés eque tujatu ecana cacuatsashati cuejaha. Bahue tujatu ecana amerehua eje bucha camuimeretie juishuque. Tuna tshue juneni ana, jidaque tyaana jadya tujatu ecana ahua. ⁵ Tunadya tuna Abraham, Isaac, Jacob eque ejuracana cuanaque. Peadya tunca beta earacana Israelja ebacua cuanaque eque ejuracana cuanaque tuna. Tuequedyatu cuinanacuare Cristo; tuquetu tumbaedy a Israel eque ejuracanaque. Pureama, emuita siri paju. Tuquetu Yusu, dutya ai aniyaque naruquique. Jadya tibudya pureama easiri paju.

⁶ Eje uma piji camadya tu ecue ata israelita cuana einajaque. Arepa jadya ama bucha, tuque ecuanaja inime tuputaqui ama, Yusura ahua ama tuja quisarati ecuanaja baba cuana tyaana ahuaque. Tura tuna tyahua tyaana ahuaque tura yuneri cuita mepehua cuanaque camadya. Tuna tuna israelita neri cuana bacani. Israel eque dutya ejuracana cuanaque ama tuna Yusuja emepe cuanaque. Umae piji cuita camadya tuna jadique. ⁷ Abraham eque dutya ejuracana cuanaque amatu Yusura mepehua tuja juishu, umae piji camadya. “Micue bacua Isaac eque ejuracanaque cuita camadya tuque jidaque tyaana aya. Tuna camadya tuna mique eque ejuracanaque neri baya”, jadya patu Yusura Abraham acuare beru.

⁸ Jadya bahuee ecuana dutya ama Abraham eque ejuracana cuanaque Yusura tuja ishu mepehuaque. Arepa Abrahamja peya ebacua cuanaque anihua ama bucha, tume cuana eque ejuracana cuanaquetu Yusura jidaque tyaana ama ahua. Isaac ecarecaniju aijama jariju patu Yusura

tyaana ahua Abraham tuque cuinanadadiyaque. Jadya equetu Yusura tyaana ahuaque cuinanahua. Tuque eque juracanahua cuanaque cuita camadyatu Yusuja cuanaque. ⁹“Arepa micue huane Sara eje bucha cabacuatie jutaqui ama bucha, carecani isaquitu juya. Riyaque mara juetiyajudya tujatu cuinanaya. Jadya cabameretie juya ecue casa aniyaque”, jadya patu Yusura Abraham acuare.

¹⁰ Tumebaedya micuana riyaque cuejaya micuana huecasha ishü, Abraham eque dutya ejuracana cuanaque ama tuna Yusuja emepeque. Yusuratu mepehua ecuanaja ebaba Isaac jipidya ama. Isaac, Rebeca ecatsejatu beta ebacua pere cuinanacuare. Yusuratu mepecuare peadya cuita camadya. ¹¹⁻¹² Tatse cuinanama jariju, ecuaqueja ecarecaniju jarijutu Yusura cuejacuare Rebeca: “Pere ecatse esiri juatsu, icuene cuinanahuaquetu ejuque merequique jubuque”, jadya patu Yusura Rebeca acuare. Jadya cuejaetu Yusura acuare, ejuque mepehuaque, euji que bijidamadurahuaque. Mepecuare tujatu Jacob, jadya tura icuenetadya inime pihua tibu. Mepecuaretu Jacob; bijidamaduracualetu Esaü, ai tatse eje bucha juhua baatsu ama. Jadya tujatu ahua, tura cuitadya jadya acara ahua tibu. ¹³ Jadya tu ehüene Yusuja quisarati, tura Rebeca, Isaacja ebacuaque ecatseja ishü quisarati acuareque: “Jacob tuque iyuhueda bahua; eradyatu mepehua. Esaü bacue bijidamadurahua”, jadya patu Yusujuare.

¹⁴ Umaera ni tu Yusu tuyu ama bucha baya, peadya camadya mepe, peya bacue bijidamadura jadya, jadya juhua baatsu. ¡Aijama! ¡Jadya ama tuque! Tuquetu tuyu neri, dutya tura eje bucha acara ayaque aya tibu. ¹⁵ Turadyatu Moisés cuejacuare béru: “Aniya tuque ecue canerecabati ejeque ecue jucara juya tsehue. Ecuetu aniya quiyuhuebati ejeque era jadya bae acara aya tsehue”, jadya patujatu acuare.

¹⁶ Jadya equetu Yusuja canerecabati aniya ecüana tsehue, ai tuque ecüanara ecüana tsehue jadya amereyaju ama. Tuquetu jida ecüana tsehue, ai ecüana tuatsehue jida baatsu ama. Tujatu canerecabati aniya ecüana tsehue, tuque jadya jucara juatsu cuita camadya. ¹⁷ Yusujuatu aijama juare canerecabati Egipto juque huaraji dyaque arida tsehue. Ehüene tu Yusuja quisarati: “Erami mepehua Egipto juque huaraji dyaque aridaque juishu. Ahua tuque micue yacuaju ni ejeque ecuitaja ataquique ama, ecue dyaque casa aniya tsehue. Jadya equetu dutya queja aniya cuanaque bahue judadiya ique dyaque casadaque”, jadya patu Yusura quisarati acuare Moisés eque.

(Arepa tumeque huarajija inime cacualetu ishü emajaca

anihua ama buchatu cacuaretihua ama.)¹⁸ Jadya equetu Yusuja aniya canerecabati eje tsehue tuja canerecabati anicara juya tsehue camadya. Tura amereya eque jucarama juya cuanaquetu Yusura inime cacuaretishaya ama.

¹⁹ Ejeja cuana ni tu inime juya: “Yusuratu mepeya; ecuita cuanatu bijidamaduraya. Jutaquiju tu tuyu ama ejequedya jutiyda jucha metse aya ama tibu. Ni ejeradya jutidyatu Yusura iyahuaque ecuareu ama”.²⁰ Era micuana jadya quemitsaya. Jadya taa inime netupuume, ique bacaqui cuanaque. Yusu tuque micuanaja jadya jutidyatu juya jadya ataquí ama. Pabejerere ni quisarati aquí ejuu, eje bucha jadya ae jatsu tujatu eau tuque cueyanequique: “¿Aishu mira pabejerere jutidya ahua, sura jida piji ehue ne eauque?” jadya? Eiyajatu tuque iyaquique eje bucha quisarati tsehue ataquí ama.²¹ Sura cuana pujiratu mechi tsumeya tura eje bucha acara aya eque aishu. Tumeque mechi eticaquedya tujatu eau sura jida piji ehue neque, shasha cuana nitya ishú, tumbaedyá sura jiji cuana ijehue ishú.

²² Mechi jaba bahueratu sura cuana aya tura eje bucha acara aya eque; jadidyatu Yusura israelita cuana aya tura eje bucha acara aya eque. Tura amereya eque ama juya cuanaquetu tura tuja cahuaiti, tuja casa bamerecara ahua. Jadya ama buchatu tuque dyaque tsunutahua tuna nerecatura ishú. Tunaratu tuque cahuaitishahua. Jadya tibutu tuja anyadya tuna nerecatura ishú. Jadya ama bucha tura tuna tyaaajehuadya jutidya jidaque. Pe ya cuana Jesús queja catyati ishú cuejamere juya tupu, turatu israelita cuejataquima cuanaque nerecaturahua ama.

²³ Ahua tujatu tuque dyaque jida casada ecuanaja ishú caadebamereti ishú. Yuequedyadyatu Yusuja inime juhua: “Jida tsehue tuque ecue cuanaque babuque”. Yuneridya iyuhue tsehuedya tura ecuana baya.²⁴ Yusura ecuana mepehua tujaque juishu. Ecuana israelita cuana camadya ama, tumbaedyá israelita ama cuanaquetu Yusura mepehua tujaque juishu.²⁵ Neadebacue Yusuja quisarati Oseasra huenecuareque:

“Era ecuique ama bucha bahua cuanaquetu ecue judadibuque.

Iyuhuedama bahua cuanaque tuna amena iyuhueda baya.

²⁶ Eje quejadya jutidya era jadya ahua cuanaque:

‘Micuana micuana ecue cuanaque ama’ era tuna abuque:

‘Micuana micuana ecue cuanaque.

Maju Baecua jaque micuana’ ”,

jadya patu Yusura quisarati acuare Oseas eque.

Jadya quisarati ayaquetu Yusura israelita ama cuanaque tuna ecue judadibuque, jadique jadya acuare.

²⁷ Tumbaedy nehuacatanacue Isaiasra huenequereque beru yuequedy israelita cuana jadya ayaque:

“Israel eque ejuracana cuanaque tuna jetie ama piyebatilla tupu ama, cueri cuanaja ecuaqueju mejiji bucha.

Arepa jetiama paju ama bucha, eje uma piji camadya tuna Yusu queja judirubuque.

²⁸ Yusura tuna nerecatura ana ahua jetiama tuque ujeu baqui cuanaque.

Masadamadya tujatu jadya adadibuque.

Tuyudya tujatu ecana jadya abuque, tura amereya eque ama juhua tibu.

Patrónra manu catsujetyamereti ishü patsunuta ama jadya eau bucha, jadyatu Yusu tsunutabuque ama dutya tura amereya eque ama juhua cuanaque nerecatura ishü”

jadyatu Isaiasra huenequere béru.

²⁹ Tumbaedyatu Isaiasra cuejanucacuare eje bucha judadiyaque.

“Berutu Yusura dutya iyemeretillacuare Sodomaju, Gomor-
raju anicuare cuanaque, tura amereya eque ama cuita juya baatsu.

Yusu dutya naruquija ecuana tsehue canerecabati aijama juquena juhua, tura ecuana iyetillaquena juhua, tumeque epu ecateju cuanaque acuare bucha”,

jadyatu Isaiasra huenequere.

(Jadyatu huenequere Yusuja quisarati, umae israelita cuana camadyatu Yusu queja judirubuque jadique ejitaju ayaque.)

Dutya jujeri israelita cuana Jesús queja catyaticarama juyaque

³⁰ ¿Eje bucha juatsu jatsutu umada israelita ama cuanaque Ijahua quejaque einajaque juya, israelita cuana eje uma piji einajaque? Riyaque micuana cuejacara aya. Israelita ama cuanaratu inime tupucuaré ama: “¿Eje bucha anie ecuana ejuu Yusuja biji eque cuita tuja ecuana jucha metse ama bucha baishu?” jadya tunajatu inime tupucuaré ama. Jadya ama bucha tuna Yusura jucha metse ama bahua, Jesús queja catyatihuaju. ³¹ Israelita cuanajatu inime jucuaré, dutya cacuatshati eque juyaju baatsu Yusura jucha metse ama baya bucha. Eje bucha cacuatshati cuana eque cuita jutaqui ama tuna cabaticuaré. ³² ¿Eje bucha juatsu tuna Yusura ecajuchati jari bacuaré? Tuna

cacuatsashati cuana eque juatsu Ijahua quejaque quinajacameretiya bucha jucuaré tibu, Jesús queja catyatitsu ama. Tuaequeja nimee jutaquique tuna inime kujisha ebari cuita aatsu ecana jida mere cuana tsehue jutidya ecana quinajacamereticara juhua. Tsajajacama cuayaque tumu ebari tsehue tsuru juatsu tuque tsajaja cama juticara juyaju ejunatiu ama bucha, jadidya tu dutya jujeri israelita cuana. Judirubuque ama tuna Yusu queja, tuna Cristo queja catyaticarama juya tibu. ³³ Cristodya tu tumu ebari buchique. Jadyatu Isaiasra huenecuare Yusuja quisarati tuque jadya ayaque:

“Eratu cuadishabuque israelita cuana chicashaqui buchique. Tuaequeja catyatiya ama tibu micuana yuamaturatanaterebuque, etihuesu eque pacacatsu ejuu bucha.

Tuaequeja catyatiya cuanaquetu ni eje tupu ecapeya inimeti juya ama”,

jadyatu Isaiasra huenecuare Yusuja quisarati cuana.

10

¹ Cuejaya micuana era, ecue eatsehuequi cuanaque. Eje buchadya einajacamere datse tuque ecue ata israelita cuana amerecara aya. Yusu queja bacabacayaque tuque ecue abahue:

—Ecue ata israelita cuana Jesús queja pacatyati, micue ecana Ijahua quejaque inajacamere ishú, Tata, —jadya tuque ajacaya ama.

² Adebayadya tuque era, tuna Yusuja biji eque jucara ebari juyaque. Tume tuna baecua eje bucha Yusuja biji eque juishuque. ³ Tunaratu adebaya ama Yusura camadya ecuana jucha metse ama amereyaque. Jadya tibudya tuna tuna cuita camadya jucha metse ama cabameretiya tunaja equedya jutidya. Ejenecarama tunajatu aya Yusura ecuana jucha msetse ama bayaque Jesús queja cuita camadya catyatitsu. Catyaticarama ecana juya tuaqueja. Bijidamaduraya tuna tueque cuita camadya Yusura inajacamere ishú iyahuaque.

⁴ Cristotu majuhua etsujetyaqui, ecuana Yusuja jucha metse ama baishu. Ecuana tuaqueja cuita camadya catyatihuaju, Yusura ecuana jucha metse ama baya. Jadya ama buchatu dutya jujeri ecue ata cuanara inime tupuya jadya: “Yusura ecuana jucha metse ama baya, ecuana cacuatsashati cuana eque cuita camadya juyaque juatsu”, jadya jutidya tunajatu inime tupuya.

⁵ “Cacuatsashati cuana ehue eque cuita aniya cuanaque tuna Yusu queja judirubuque”, jadyatu Moisésra huenecuare béru. ⁶ Paju ama ecuanaja inime Yusura dyaque ataquimaque inajacamere ishú amereya bucha. Yusura ecuana jucha

metse ama baya, ecuana Jesús queja catyatihuaju baatsu camadya. Tumebaedya tu ehue: “Paju ama micuanaja inime: ‘¿Ejequetu etsurau barepaju einajacamerequique sarera?’” Cristo cuitadyatu butehua riyaque yahuaju. ⁷Tumebaedya tu ehue: “Paju ama micuanaja inime: ‘¿Ejequetu ebuteu emaju cuanaque aniyaju einajacamerequique sarera?’” Cristo tu tuhua ama. Netitsuranucahua tuque.

⁸ “Ibeda ama tu eje bucha Ijahua quejaque inajacamere ishucueque bahue juishu. Micuanaratu amena bacahuadya cuejatayaju. Micuanaratu amena ahuadya bacahuadya riyaque quisarati. Micuanaratu amena riyaque inime tupu ishuhadya”, jadyatu ehue jucuare. Riyaquedya tuque ecuana quisarati cuejayaque. ⁹ Ecuana “Jesús tu Ique Cuatsashaquique”, jadya quisarati ayaju Yusura ecuana Ijahua quejaque inajacamereya. Ecuana yuneri cuitadya Jesús emajuque chacha netitsuranucahuaque ejeneyaju, Yusura ecuana inajacamereya. ¹⁰ Dutya ducuta Jesús queja catyatihuaju, ecuana Yusura jucha metse ama baya. “Jesús queja ique catyatihua”, jadya cacuejatiyaju, ecuana Yusura inajacamereya.

¹¹ Ehuenedya tu Yusuja quisarati: “Ecuana Cuatsashaqui queja catyatihua cuanaque tuna bisunime ama tuaqueja nimee juatsu”. ¹² Ejequedya jutidyatu Jesús queja ecatyatiu einajacacueque juishu. Paju israelita, israelita ama, Yusura ecuana inajacamereyadya. Peadya Ecuana Cuatsashaqui Jesucristo dutya naruquique. Tere tupu ama tura ecuana tyabuque jidaque eje uma tuque jidaque bacacueque cuanaque. ¹³ Jadidya tu ehue Yusuja quisarati: “Ecuana Cuatsashaqui queja tuja inajacamere ishuhacacueque cuanaque tuna einajacacueque juya. ¹⁴ ¿Eje bucha bacacueque jatsutunajatu jadya eau, ai tunajatu inajacamereyacuque ejeneya batu di taa? ¿Eje bucha jatsutunajatu eau, ai tunajatu, tuna jiteque tuque majuhacuque ebaca batu di taa? ¿Eje bucha bacacueque jatsutunajatu eau riyaque quisarati aira cuejatiya batu di taa? ¹⁵ ¿Eje bucha cuacueque jatsutunajatu Yusuja quisarati cuejatu puji cuana ejuu, aira ecuana cuacacueque batu di taa? Ehuenedya tu Yusuja quisarati: “Dyacuque jida tu jidaque quisarati cuejacueque cuanaque juna ishuhacacueque jadya.

¹⁶ Arepa ecuana cuejatu bacacueque ama bucha, dutyara amatu ejeneya ecuana cuejatu. Isaiasratu huene: “Eje umara piji camadyatu ecuana cuejatu bacacueque bacacueque, Ecuana Cuatsashaquique”.

¹⁷ Yusuja quisarati cuejatu bacacueque ecuana catyatiya Jesús queja. Yusuja quisarati bacacueque cuita camadya tuque ecuana Jesús acacueque.

18 Umaera ni tu inime tupuya: “Israelita cuanaja ni tu aijama emajaca juhua riyaque quisarati baca ishu.” ¡Jadya ama tuque! Tunaratu cuejayaju bacahuadya. Yusuja quisaratitu ehue:

“Dutya quejaratu quisarati bacahua cuejayaju.

Dutya epu cuanajutu riyaque quisarati cuejatanahua”, jadya tu ehue.

19 Umaeja ni tu inime juya: “Israelita cuana ni tu baecua juhua israelita ama cuanaque Yusura inajacamereyaque”. ¡Aijama, jadya ama tuque! Tuna tuna bahuedya juhua Yusura tuaqueja judirushadadiyaque israelita ama cuanaque. Moisésra cuitadyatu huenecuare Yusura cuejahuaque:

“Micuana micuana ecue cuanaque.

Jadya ama bucha, peya cuana tuque ecue amereya, icuene ecue ama juhua cuanaque.

Era ecana jadya ayaju, micuanara tuna ujeu babuque”, jadya patu Yusura israelita cuana cuejacuare.

20 Tuequedyatu Isaiasra bajida tsehue ama yunerique cuejacuare. Turatu huenecuare Yusura cuejahuaque:

“Ique sare juya ama cuanara adadibuque.

Ique cabameretibuque ique sarequi ama cuana queja”, jadyatu Yusu jucuare beru yuequedya. 21 Tumebaedyatu Isaiasra huenenuacuare Yusura quisarati acuaqueque israelita cuanaja ishu:

“Cuejajacaya ama tuque israelita cuana:

‘Eaqueja necatyaticue’.

Ijacabacacarama tunara aya era cuejayaju.

Tuna tuna eatsehue cahuaitijacaya ama”.

11

Dutya ama israelita cuana Yusu queja nimee jujacacuareque

1 Umaera ni tu inime tupuya: “Jacahuadya ni taa ecuana israelita cuana Yusura. Bijidamadurahua ni taa tujatu tura mepehua cuanaque”, jadya ni tunajatu inime juya. ¡Jadya ama tuque! Dutya ama tura ecuana jacahua. Ique, idya cuitadya israelita. Ique Abraham eque juracanaque. Ique tumeque cuare juquedya Benjamín eque juracanacuare cuana juque. 2 Yahua ejitaju ama jariradya tujatu mepehua ecuanaja baba cuana israelita cuana tujaque juishu. Iyacia tura ecuana jacahua ama. Micuanaratu adebayadya Elías eje bucha jucuareque, Yusuja quisarati ehuenecue tuque jadya ayaque. Turatu dutya israelita cuanara cuana Yusu muijacahua bucha bacuare. 3 Yusu tsehue patu quisaraticuare: “Ecue ata cuanatu mira amereya eque jujacahua, Ique Cuat-sashaquique. Tunaratu iyetillahua mique equeque quisarati

cuejaqui cuanaque. Tunaratu yuamaturatillahua mesa tumu ea cuanaque; tumeque mesa cuana mique tyayaque iya ishucuaque tunajatu rihuishatillahua. Ique cuita camadya mira amereya eque juyaque chacha aniya. Ique tunara iye-caradya aya”, jadya patu Eliasra Yusu acuare. ⁴Yusura patu quemitsacuare: “Mique camadya amami eaqueja ecatyatique chacha aniya jarique. Aniya jaritu umada era amereya eque juya cuanaque. Aniya jaritu pacarucu mil chichucata juma jari cuanaque cueya Baal mui ishucuaque eaja yacuaaju”, jadya patu Yusura acuare Elías. ⁵Elías anicuare patyatu umae israelita cuana Yusu queja nimee jujacacuare amadya. Tumbaedyatu iyacua aniya umae Jesucristo queja ecatyatique. Yusura ecuana mepehua tuque dyáque jida tibu. ⁶Mepehua tura ecuana, tuque ecuana tsehue canerecabati aqui jucara juya tibu. Mepequena tura ecuana juquena juhua ecuana inime jidaque cadujutiyaque baatsu, tume taa tu canerecabati ama ejuu. Tsujematu ejuu ama. ⁷Nebacacue era cuejayaju. Israelita cuanatu cacasatihua Yusu queja jucha metse ama cabamereti ishucua. Jadya ama bucha dutya jujeri tuna Yusura jadya ama bahua. Tura tuna jucha metse ama bahua umae piji tura icuenetadya mepehua cuanaque camadya. Dutya jujeri tuna isahue bucha juhua, Yusura Jesús queja catyati ishucua cuejayaju. ⁸Ehuenedya tu Yusuja quisarati:

“Yusura tuna tura amereya eque jucaramaque inime tyahua.

Arepa yunerique isaraya ama bucha, tuna adebaya ama.

Arepa yunerique bacaya ama bucha, tuna ejeneya ama.

Riyacama jaridya tu jadya.

Israel eque ejuracana cuanaque tuna tura amereya eque anicarama juya”.

⁹ Tumbaedyatu ecuanaja ebaba David emui juhuara hueneacuare:

“Tuna tacadya jutidya tuna ijahue catiya.

Tunaja jetiama ara ishucuaque, dutya tunara sareya cuanaque aniya baatsu tunajatu inime juya, Yusu tuna tsehue pureama juya bucha.

Tuna tacadya jutidya tuna ijahue catiya,

ecuanara cuanubi cuana armadillaju, jae cuana patuju jadya nudya ishucua ijahue eau bucha.

¹⁰ Tuna tuna caadebatiya ama Yusura masadama nerecatu-radadiyaque.

Atucamaque bucha tuna.

Ecabutijaraque bicuedaja eremeshaque bucha tuna”,

jadyatu Davidra hueneacuare Yusuja quisarati.

Yusura tuja ama juhua cuanaque tujaque amereyaque

¹¹ Umaeja ni tu inime juya: “Dutya jujeri israelita cuanara Jesús bijidamadurahua tibu, jutaqui ju ni taa tura ecuana pana jacadya ahua”. ¡Jadya ama tuque! Ecuana israelita cuana tuja yana equedya juhua ama tibu, tujatu israelita ama cuanaque tyahua emajaca tuaqueja judiru ishu. Yusuratu inime tupuya: “Israelita ama cuanaque Ijahua quejaque inajacameretanayaju bahua tibu ni tu israelita cuanaja bijidadya Jesús queja ecana catyati ishu, tuna dyadi inajacameretana ishu” jadya. ¹² Israelita cuana cuatsashaya eque ama juhua baatsutu Yusura inajacameretibunehua israelita ama cuanaque. Israelita cuana Jesús queja catyaticarama juya baatsutu Yusura israelita ama cuanaque tyahua jidaque. ¡Dyaque jida taa tu eju dutya jujeri israelita cuana Jesús queja catyatitsu! ¹³ Hueneya rique riyaque micuanaja ishu israelita ama cuanaque. Yusura ique cuadishahua tuja quisarati micuana cueja ishu. ¹⁴ Jadya tibudya ique cacasatiya micuana Yusuja quisarati cueja ishu, micuana Jesús queja catyati ishu. Tume ni tu eatsehue amie cuanaque Yusura israelita ama cuanaque inajacameretahua baatsu, micuana baedya jucara ejuu. Ejeque cuana ni tuna Jesús queja ecatyatiu quinajacamereti ishu. ¹⁵ Dyáque jida ni tu jubuque jetiama israelita cuana Jesús queja catyatihuaju. Tuna Yusura amereya eque ama juhuaju Yusura bijidamadurahuaju, israelita ama cuanajatu anihua emajaca Yusu tsehue jida junuca ishu. Dyáque jida ni tu jubuque israelita cuana Jesús queja catyatihuaju. Majucuaque cuanaque chacha netitsuranucahua bucha ni tu jubuque. ¹⁶ Catibutiya equeque ni ai Yusu jaque, tumetu dutya tueque catibutiyaque tumbaedya tujaque. Pan ishuque harina tu Yusu jaque, jadya ecuana eau. Jutaqui ju taa tu dutya pandya Yusu jaque tere. Acui tiri tu Yusu jaque, jadya ecuana eau. Jutaqui ju taa tu dutya acui yaadya tujaque. ¹⁷ Ita taa ejeja cuana tuja teeju eaniu acui olivo béru uhuacuareque. Olivo equiquejuja yaa cuana ni tu sipicara eau olivo acui euhuaju etubuudya tujatu umae yaa cuana euhua jaque. Tuque cuarequi tujatu esipiudya umae yaa cuana olivo equique juque. Peya juque catsucahuijati ishuque sipihuajutu raraya ama, etiri cuana aniya tibu, ecui euhuaju ena huarereya tibu. Micuana israelita ama cuanaque micuana olivo equique juque buchique. Israelita cuana tuna olivo euhua jaque yaa cuana etubu buchique. Israelita cuana tuna eje uma mara Yusu jacameretanhua, micuanaja einajacameretehua juishu emajaca ani ishu. Micuanajatu dutya jidaquedya juhua Yusura Abraham tyaana ahuaque, tumbaedya tuque eque juracanahua cuanaque. ¹⁸ Jadya ama bucha micuana casumititaqui ama micuana

taca. “Yusura ecuana mepehua tibu, tura ecuana dyaque iyuhueda baya, tuna iyuhueda baya bucha ama”, jadya micuanaja paju ama inime. Etiri cuana ademetu acui casada netiya, ai yaa cuana eque ama. Abraham eque, tuque eque ejuracana cuanaque ademe micuana Yusura tyahua jidaque; ai micuana eque ama tujatu ecana tyahua jidaque. ¹⁹ Ejeque cuana ni micuana jadya juya: “Yaa cuana yuequedyaque tubutanahua bucha, olivo equique juque yaa cuanaja sipitanabare ishu, jadidyatu israelita cuana bijidamadurahua, ecuana Yusu jaque juishu. Jutaquiju ni taa ecuana dyaque inime metseque”, jadya. ²⁰ Pusha amadyatu Yusura eje uma mara israelita cuana bijidamadurahua. Yuequedyaque yaa cuana tubutanahua bucha, jadidya tuna Yusura bijidamadurahua. Tuna Jesús queja catyaticarama juhua tibu, tuna Yusura bijidamadurahua. Tura micuana mepehua tujaque juishu, micuana Jesús queja catyatihua baatsu ademedy. Arepa Yusura micuana mepehua ama bucha, micuana taka casumiti nejuume. Yusu jutidya nemubacue. ²¹ Israelita cuana tu ehuaque etibu juque ecatsucahuijatique buchique. Yusura icuene cuita tuja juhua cuanaque nerecaturahua tibu, micuana ni Jesús queja nimee jujacaya, tumebaedya tura micuana nerecaturabuque. ²² Yusuatu canerecabati aniya. Jadya ama bucha tujatu tuja yana equedya ama juya cuanaque nerecaturaya. Israelita cuana Jesús queja catyatihua ama cuanaque tujatu nerecaturahua. Micuana tshuetu tuque dyaque jida juhua, micuana Jesús queja catyatihua cuana tshue. Tuquetu micuana tshue jida jujacaya amadya, micuana Jesús queja nimee jujacayaque ama juatsu. Micuana ni tuaqueja nimee jujacaya, tume tura micuana nerecaturabuque. Micuana micuana acui yaa tubu ijehue jadya eauque bucha jubuque. ²³ Israelita cuana ni Jesús queja nimee junucaya, tume tuna Yusu jaque judadinucaya. Yusura tuna yudijidya judirushanuca eau tuaqueja. Acui yaa tubutanacuareque tuhua nucadya sipinuca jadya eaque bucha tuna jubuque. ²⁴ Micuana micuana israelita cuana ama. Icuene micuana Yusu jaque ama juhua. Iyacua bacue micuana Yusuja cuanaque. Micuana micuana olivo equique juque yaa olivo ehuaja etibuju esipique buchique. Yusura micuana jadya ahua tibu, jutaquiju taa tu Yusuja ishu eje bucha ataquima amadya israelita cuana tuaqueja yudijidya amerenuca ishu. Ecuana baba cuanatu Yusura icuene cuita mepehua tujaque juishu. Tee mere pujira acui ehuaja yaa tumeque acuiju nucadya esipibarenucau bucha. Tuna Jesús queja catyatinucahuaju tuna Yusura abuque: “Israelita cuanatu ecuique nuca” jadya.

Jetiama israelita cuana Yusu queja judiru ishu Jesús queja catyatibuqueque

²⁵ Pana ijacobaca neacue riyaque, micuana ecue eatsehuequi cuanaque. Icuenetu adebataqui ama juhua Yusura israelita cuana eje bucha adadiyaque. Iyacua tura ecuana ejitaju bamerehua. Dyaque jida micuana adebamerecara aya micuana cuita camadya Yusura mepehua bucha micuanaja inime ejuu tibu. Dutya jujeri israelita cuanaratu Jesús bijidamadurabuque tuna inajacamerequique. Tunaratu bijidamaduraa jeya jari israelita ama cuanaque Jesús queja eje uma catyatidadiya tupu. Israelita ama cuanaque tujaque judadihuajutu jetiama israelita cuana inime cacuaretibuque. ²⁶ Jadya judadihuajutu jetiama israelita cuana Yusu queja judirubuque. Jadidya tu ehue ne Yusuja quisarati:

“Yusuja epu Sión bacani juquetu jebuque Einajacamerequique.

Jacob eque ejuracana cuanaque tujatu secabuque tunaja jidama cuanaque, Israelju aniya cuanaja jidama cuanaque.

²⁷ Apupashabuque tunaja tuque jucha cuana, tunaja ebaba cuanaque jadya aana ahua tibu”, jadya tu ehue ne Yusura quisarati acuaque.

²⁸ Jetiama israelita cuanatu Yusura baya tuque ujeuque bucha, tunara Jesúsja quisarati ejeneya ama tibu. Tunara Yusuja quisarati bijidamadurahua tibu, micuana israelita ama cuanaque aniya tuque micuanaja emajaca Jesús queja catyati ishu. Jadya ama buchatu Yusura israelita cuana iyuhueda bajacahua ama. Yuequedya tura ecuana mepehua tujaque juishu. “Micuana, micuana eque juracanaya cuanaque jadya micuana ecue cuanaque”, jadya patu Yusura acuaque ecuanaja baba cuana. ²⁹ Yusratu cuareya ama tura inime tupuyaque. Tura tyayaque tujatu secanucaya ama. Tura mepeyaque tujatu jacanime ama. ³⁰ Jadya tibudyatu Yusuja iyacua canerecabati aniya micuana tsehue, israelita cuana Jesús queja catyaticarama juya tupu. Tujatu canerecabati aniya micuana tsehue, arepa micuana icuene tuaqueja catyaticarama juhua ama bucha. ³¹ Tumbaedyatu tuna tsehue Yusuja canerecabati anibuque. Iyacuatu tuja canerecabati aniya micuana tsehue; jadidya tujatu canerecabati anibuque israelita cuana tsehue. Anibuque tujatu canerecabati, arepa iyacua tuna Jesús queja catyaticarama juhua ama bucha. ³² Aijamatu ni ejeque buchique Yusuja yana equedya cuita juyaque, israelita cuana ni israelita ama cuanaque. Yusura tuna dutya tupu baya jucha metse. Tumbaedy-

atu Yusuja canerecabati anibuque israelita cuana tsehue, israelita ama cuana tsehue jadya.

Yusu pureama aishuque

³³ Adaditilla tupu amatu Yusu ecuana tsehue jidaque. Aijamatu ni ai tuque baecuaque. Aijamatu ni ai tura adebayaque ama. Ni ejera buchiquetu adebaya ama Yusura inime tupuyaque. Ni aira buchiquetu adebaya ama tuque ai juyaque. ³⁴ Jadya tu ehue Yusuja quisarati:

“Ni ejeque buchiquetu bahue Yusura eje bucha inime tupuyaque, ni eje bucha juatsu. Aijamatu ni ejeque buchique Yusu dyaque bahueque cueja ishuque.

³⁵ Ni ejeja buchiquetu Yusu tyataqui ama, tuja cuaretyanuca aishu. Tujatu manu aijama ni eje tsehue”.

³⁶ Yusratu iyahua dutya ai aniyaque. Dutyadya tu tujaque. Dutya ai aniyaque tu Yusu mui, pureama jadya aishuque.

—Yusu, miquemi jida. Aijamatu peya mique buchique — jadya tuque ecuanaja ajacataqui ama.

Jadidya paju.

12

Yusu jaque juya tibu, tuja biji eque anitaquique

¹ Cuejaya micuana riyaque, ecue eatsehuequi cuanaque iyuhueda cuanaque. Yusu jatu dyaque canerecabati anihua dutya ecuana tsehue. Jadya tibudya pana catyati nejura tu aqueja. Ai emajuque bucha ama, Yusu queja necabameratira chacha bucha, tuja ecuana aiju tsume ishu. Necuejara Yusu: “Ique, dutya ecue aniyaque jadya tu micuique”. Yusuja biji eque neanira, Yusu pureamatura ishu. Jadya cabameretie ecuana jutaqui Yusu queja tuque mere ishu. ² Yusu adeba baecua cuanaque aniya bucha anie nejura ama. Yusura ecuanaja pacuare ecuana eje bucha anieque, ecuanaja inime tupu cuana jadya. Tura ecuana jadya cuaree ahuaju tume ecuana bahue juya Yusura ecuana eje bucha anishacara ayaque. Bahue ecuana juya jidaque aishuque. Bahue ecuana juya Yusuja eje buchique bijidaque. Pana bahue ecuana juya eje bucha anie juishuque. ³ Yusura ique cuatsashahua tuja quisarati cueja ishu. Jadya tibudya micuana cuejaya eje bucha anie tuja biji eque juishuque. Yusura cuitadya ecuana peadya peadya tyahua casa tuque mere ishu. Inime tupuqui neara eje bucha meree Yusu eauque. Tura casa tyahuaque pana adeba aatsu, jadya mereedya neara Yusu. ⁴ Peadya ecuitajutu aniya jetiama bucucu ishuque. Dutyaja tunajatu bape bape bucucu ishuque aniya. ⁵ Jadidya ecuana, arepa

Cristo queja ecatyati cuanaque jetiama ama bucha, dutya ecuana cuita pidya camadya bucha. Yuhua cama ecuana, Cristo merecara tsehue.

⁶ Yusura ecuana dyaque iyuhueda baya. Jadya tibudya tura ecuana casa tyabarehua peadya peadya bape bape. Jutaquiju nemerera tura ecuana casa tyahua tsehue. Umae ecuana Yusura casa tyahua tuja quisarati cueja ishu. Tunajatu cuejataqui tuyu cuji juma. ⁷ Umae ecuana Yusura tyahua casa peya cuana tsahua ishu. Tunajatu jida tsehue tsahuataqui. Peya cuanatu Yusura casa tyahua tuja quisarati yunerique bahuitya ishu. Tunajatu bahuityataquidya peya cuana. ⁸ Umaetu Yusura tyahua casa peya cuana casatura ishu. Tudyu tunajatu ataqui. Umaetu Yusura jetiama tyahua chipiru, ai cuana jadya. Tuna tuna injeda jutaqui ama. Tunara ecana pacajaquetiquere peya cuana tunaja ai aniyaque jida inime tsehue. Umae cuanatu Yusura casa tyahua peya cuana naru, cuatsasha jadya ishuque. Tunajatu jadya aque-retaqui, muida tsehue, ai dyaida tsehue ama. Umaetu Yusura casa tyahua nrecada cuana tsehue canerecabati aqui juishu. Jadya juya tibu tunajatu pureama tsehue ataqui.

Jesús queja catyatiya cuanaque eje bucha anie junenie jutaquique

⁹ Iyuhueda cabatiya jiu nejuume; yuneri iyuhueda necabaticue. Neaume ni ai buchique peya yuamatura ishuque. Jida nejura peya cuana tsehue. ¹⁰ Iyuhueda tsehue necabaticue peya cuana Jesús queja ecatyati cuana tsehue. Micuana tsehuequi cuana tsehue ecabatiu bucha, cabatie nejucue peya cuana tsehue. Nemuicue peya cuana, tuna queja camuimereticara juatsu ama. Yurameta camuibati nejucue peya cuana tsehue.

¹¹ Necacasaticue. Dyaida nejuume Ecuana Cuatsashaquira amereyaque aishu. Merecara tsehue nemerecua.

¹² Pureama nejucue, Yusura tyaana ahuaque eje tupu tura tyadadiyaque cahuecashatitsu. Neiducue abacata tsehue nrecada juya cabatitsu. Yusu tsehue nequisaratijacaume.

¹³ Jesús queja ecatyati cuanaja ai aijama baatsu, netyacue ecana micuanaja ai aniyaque. Ejeque micuanaja epu eque cuetiyaju ara ishuque, tahui ishuque aijama baatsu, ecana neihearacue micuanaja etareju.

¹⁴ Yusu adeba baecua cuanara micuana jidama ayaju, “Jida ecana bacue, Tata” jadya Yusu queja nebacabacacue. “Nrecaturacue ecana, Tata”, jadya neaume Yusu.

¹⁵ Pureama nejucue, peya cuana pureama juya cuana tsehue. Ejeque peya inime juyaju, neaquerecuedya peya inime.

¹⁶ Bape bape inime cadujutiya ama bucha pureama tsehue

peya cuana tsehue neanicue. Micuana cuita camadya dyaque inime metse bucha necabatiume. Nerecada cuana tsehue cajipeticarama nejuume. Necarenecue ecana. Dutya bahue bucha necabatiume.

¹⁷ Arepa peya cuanara eje bucha jidama aya ama bucha, tunara aya bae ecana neaume. Neanicue jida, dutyaja micuana jida tsehue aniyaque baishu. ¹⁸ Eje buchadya dutya tsehue jida pureama tsehue anicara nejucue. ¹⁹ Necacuarehuanatiume jidama atayaju, ecue eatsehuequi cuanaque iyuhuedaque. Yusu camadya tu jidama cuanaque nerecaturaquique. “Era cuitadyatu cuarehuanaya ecue cuanaque jidama aqui que. Nerecaturabuque tuna ecue cuanaque jidama ahua cuarequi”, jadya tu ehue Yusura quisarati acuareque. ²⁰ Tumbaedy a tu ehue peyaju Yusuja quisarati: “Mique ujeu baquique ni aracara juya, tyacue ara ishucue. Ijicara ni juya, tyacue iji ishucue. Mira jadya bae ayaju mique ujeu baquique pabisu. ‘Arepa era tuque jidama ahua ama bucha taa tura ique jida baya’ jadya tujatu inime juya”, jadya tu ehue Yusuja quisarati.

²¹ “Jidama neara ecuana jidama aqui cuanaque”, jadya inime netupuume. Tunara jidama ayaque cuarequi, jida jutidya ecana nebacue.

13

Jesús queja ecatyati cuanaque huaraji cuanara cuatsashaya eque jutaquique

¹ Huaraji cuanara cuatsashaya eque nejucue.

Yusuratu iyahua dutya huaraji cuana eju ecuana aniyaju, ecuana naru ishu. Jadya tibudya ecuana dutya huaraji cuanara naruya, Yusura casa tyahua tibu. ² Jadya tibudyatu huaraji cuanara cuatsashaya eque jucarama juya cuanara Yusura cuatsashayaque aya amadya. Yusura cuatsashaya eque juya ama cuanaque tujatu ecana nerecaturabuque.

³ Huaraji cuanatu iyatanahua jida juya cuanaque nerecatura ishu ama. Jidama juya cuanaque nerecatura ishu tuna iyatanahua. Jutaquiju micuana huaraji cuana tsehue bajida jucarama juya tibu, tunara cuatsashaya eque nejucue. Micuana jadya anie juyajutu huaraji cuanara micuanaja ishu jida quisarati aya. ⁴ Yusuratu iyahua huaraji cuana micuana tsahua ishu. Jidama ni micuana juya, mubataqui tuque micuanaja ecana, tunaja micuana jidama juyaju nerecatura ishucue inime aniya tibu. Tunaratu Yusu mereya, jidama juya cuanaque nerecaturayaque. ⁵ Jadya tibudya huaraji cuanara cuatsashaya eque nejucue. Cacuatshati eque neanicue, tunara enerecaturauju camadya ama, micuana

cuitadya jadya anitaquique bahue juya tibu. ⁶ Yusuratu iyahua huaraji cuana ecuita cuana tsahua ishu. Jadya tibudya tunara micuana “Netsujetyacue huaraji cuana”, jadya ayaju, ecana netsujetyacue. Tunaratu sareya tumeque chipiru ecuita cuana tsahuajaca ishu ama. Micuana naruyaque tunajatu Yusu mereya.

⁷ Netsujetyacue dutya micuanaja huaraji cuana tsujety-ataquique. Huaraji cuanara cuatsashayaju, mere nejudue epuju aniya cuanaja jida ishu. Huaraji cuanara jadya ayaju: “Netsujetyacue chipiru epuju aniya cuanaque tsahua ishu saretanayaque”, netsujetyacue chipiru tsehue. Huaraji cuanara cuatsashaya eque nejudue. Nemuibacue; neijaribaume ecana.

Jesús queja ecatyati cuanaque peya cuana tsehue eje bucha cabatie jutaquique

⁸ Manuqui nejuume ni eje tsehuedya jutidya. Patere micuanaja manu cuana; iyuhueda cabati ishuque camadya micuanaja patere ama. Peya cuana tsehue ecuana iyuhueda cabatiyaque tu ecuanara peya cuana manu etsujetya buchique. Peya cuana tsehue ni ecuana iyuhueda tsehue cabatiya, tume ecuana Yusura cuatsashahua eque juya.

⁹ “Peyaja ehuaneeque nejaraquereume. Quiyeti puji nejuume. Chiri nejuume. Peyaja ishu pusha pusha nejuume. Peya jaque micuanaja ishu nebijiseriume”, jadya ecuana Yusura cuejahua tuja cacuatsashati. Peya cacuatsashati cuanatu aninucayadya. Amena ishu tura ecuana cuatsashahua: “Iyuhue tsehue nebacue peya cuana. Micuana cuitadya iyuhueda cabatiya bucha iyuhuee peya nebacue”. Rियाque cacuatsashatiju dyari dutya cacuatsashati esabuttilla. Micuana ni tumeque cacuatsashati eque juya, tume micuana dutya peya cuana cacuatsashati equedy a juya. ¹⁰ Peya cuana yuneridya iyuhueda bayaque juatsu, tuque ecuana peya jidama aya ama. Ejera peya cuana iyuhueda bayaquetu Yusuja dutya cacuatsashati equedy a juya.

¹¹ Jadya tibudya Yusura cuatsashaya eque neanira, amena Ecuana Cuatsashaquique junanucayaque tsunutaya ama tibu. Jadya tibudya ecabatique bucha nejura, Yusuja mere juyaque emajaca aniya jari tupu. Masadamatu juetiya huecaca ecuana tuaqueja judiruyaque. Ecuana Jesús queja catyati metse juhuaju tumeque huecaca equetu japada jucuaire. Amena iyacua bacue japadama juetibeya tumeque huecaca.

¹² Iyacua ecuana aniyaque ri apuda bucha, dyaque cuita jucha, canerecati jadya aniya tibu. Ecuana Cuatsashaquique junayaque huecaca tu ijetei cuinanayaque bucha, tura dutya jidamaque secabuque tibu. Amenatu tuque tsunutaya ama.

Amena huecacayaju tibu pajatayaque bucha tuque. Bisutadaque neajacara, Ecuana Cuatsashaqui adeba baecua cuanara apuda ducu aya cuanaque. Yusuja biji equeque camadya neara, eje eque bisutaqui juishu ama. Cristoja casa tsehue nejunenira, Yusu cahuaishu ishucue ecuanau eau tibu; sudaru eiyetauju ai pajida tsehue ecajututi bucha nejura. ¹³ Jida neanira ecuanau peyara petayaju bisu ishucue ama. Ijijiji, nijucue mere jadya nejura ama. Chine jutayaju necuara ama ecuita cuana jidama jutayaju. Ecuanaja caque-mitiqueremaque nejaraquerera ama. Bisutadaque neara ama. Cahuaishi, cati jadya peya cuana tsehue nejura ama. Cajishati arida nejura ama. ¹⁴ Ecuanaja biji eque cuita camadya anitsu tuque ecuanau Yusuja bijidamaque aya. Ecuana cuita camadya capureamaturati ishucue neara ama. Jesucristo queja necatyatira tuja biji eque ani ishucue. Sudaru eiyetauju ejutuqui pajida tsehue ecajututi bucha, jadidya ecuanau Jesucristo queja ecuanau dyaquedya jutidya catyatiajetaqui, Satanásra ecajuchatishau tibu.

14

Jesús queja ecatyati cuanaque tacuaritaquique ama

¹ Umaeratu pana adeba aya ama jari eje buchique Yusuja bijidaque, arepa ecanau yuneridya Jesús queja catyatihua ama bucha. Casadamaque jari bucha tuna. Cati cati ecanau neaquereume, tuna inime cacuareshu ishucue. Micuanau tsehucuequi bucha bae ecanau neacue. ² Jesús queja umae queja ecatyati cuanajatu inime juya: “Arataquidya tuque ecuanau eramau, arepa tunara ai cueya cueya cuanau yacuaju iyahua ama bucha. Aratsu tuque ecuanau Yusu cahuaishu ama”, jadya tuna juya. Duya eramau tunajatu araya.

Peya cuanara bacue adeba jida ama aya Yusuja quisarati. “Arataqui ama tuque ecuanau tumeque eramau. Aratsu tuque ecuanau Yusu cahuaishu”, jadya tuna juya. Jadya tibudya tunajatu araya tuna cuhuatiya cuanaque, tunau teeju aniyau cuanaque cuita camadya.

³ Eramau ara bahue cuanara nebijidamaduraume eramau ara baecua cuanaque. “Micuanau micuanau inimemasi, jadya ejeneyau tibu”, jadya ecanau neaume. Acui caca ai cuhuatiya cuanaque camadya araya cuanaque jadya tunajatu ecanau ataqui ama eramau araqui cuanaque: “Micuanau eramau araqui cuanara tuque micuanau Yusu cahuaishu”, jadya ecanau neaume. Jadya ecanau neaume; Yusradya tuna tujaque amerehua eramau ara bahue cuanaque.

⁴ Jadya micuanau cuejaya, micuanau jidama bucha eramau ara ishucue bayaque. Eramau araqui cuanaque tu micuanau jaque

ama; Yusu jaque tuna. Jadya tibudya tuque micuanaja ecana eje bucha quisarati eque ataqui ama. Yusu mereya tibu, tuna jida juyaque juatsu, Yusura peadya tuna eau: “Micuanaratu jidaque aya” jadya. Jida juyaque ama ni ecana juneniya, Yusura cuitadya tuna eau: “Micuana micuana tuyu ama juya” jadya. Ecuana Cuatsashaquira ecuana tyaya tuja cuanaque tujaque cuitadya casa ecuana tuja biji eque cuitadya ani ishu. Turadya ecuana naruya ecuanara tuyuque ama eauju.

⁵ Jesús queja umae ecatyati cuanaque tuna juya: “Umae huecaca cuana tu dyaque muitaqui cuanaque. Tumeque huecaca ecuana mere jutaqui ama”, jadya tuna juya. Umae bacue juya: “Dutya huecacadya jutidya tu dutya tupu”, jadya tuna juya. Ni ejeja buchiquetu casada tsehue peya tura ejeneya bucha ejenemeretaqui ama huecaca mui ishuque adebamere, adebamere ama jadya. Peadya peadyaja camatu ataqui eje bucha tura inime tupuya eque riya cuanaque inimeju. ⁶ Riya cuanaque huecaca muida bucha baya cuanaratu huecaca cuana muiya, Ecuana Cuatsashaquira amereya eque jucara juya tibu. Ejera dutya huecacadya jutidya dutya tupu bayaquetu Ecuana Cuatsashaquira amereya equedya jucara juya.

Erami ara bahue cuanaratu dutya eramidya araya, Ecuana Cuatsashaquique mui ishu, yusurupai aatsu. Tumebaedya erami ara baecua cuanaratu erami araya ama, Ecuana Cuatsashaquique mui ishu. Tunaratu tumebaedya yusurupai aya Ecuana Cuatsashaquique, tura ara ishuque tyaya tibu.

⁷ Ecuana taca ama ecuana; aniyatu ecuana metseque. Yusu jaque ecuana. Chacha aniya jari tupu ecuana Yusura amereya eque jutaqui, ecuanaja biji eque ama. Majutsu ecuana tujaque jaridya. ⁸ Chacha aniyaque ecuana Ecuana Cuatsashaquija biji eque aniya. Majutsu ecuana tuaquejadya jubuque. Chacha aniya jari tupu aniyaque tu Ecuana Cuatsashaquira amereya eque ani ishuque. Tura huecaca iyahuajudya ecuana eje tupu majudadiya, tuatsehue anidiru ishu. Jadya tibudya ecuana chachaque, jadya ama juatsu emajuque, Yusu jaque ecuana. ⁹ Cristo majutsu, tuque chacha netitsuranucatsu tujatu tsujetyahua ecuana tujaque juishu. Jadyatu Yusuja inime jucuare. Jutaqui tu tuque Ecuatsashaquique dutya ecuana tuaqueja catyatihua cuanaque, arepa chacha, emaju jadya ama bucha.

¹⁰ Micuana, micuana cama bucha juya tibu, micuana Jesús queja catyatihua tibu, nequisaratiume jidama peya cuanaja ishu. Jadya tibudya micuana erami ara baecua cuanara “Erami araqui cuanaratu Yusu cahuaishaya. Jucha metse

tuna”, jadya neaume. Micuana erami ara bahue cuanara “Erami ara baecua cuanara ai adebaneriyia ama”, jadya ecana neaume. Necaadebaticue. Peadya peadya ecuana Yusuja yacuaju cabameretibuque, tuja ejeque “Miquemi jida juhua”, jadya ama juatsu “Miquemi jidama juhua”, jadya aishu. ¹¹ Jadya tu Yusura quisarati acuareque ehuene:

“Yuneridyatu eje tupu era quisarati ahua eque judadiya. Ecue yacuajutu dutya chichucata jubuque, ique huaraji dyaque aridaque jadya ayaque.

Dutyara tunara dutyaja ijacaju cuejabuque ique camadya Yusuque”,

jadyatu Yusu jucuare.

¹² Jadidya tuque ecuana peadya peadyara Yusu cuejabuque ecuana ai juhuaque, eje bucha juatsu ecuana jadya juhuaque.

Jesús queja ecatyati cuanaque cajuchatishataquique ama

¹³ Jadya tibudya ecuana quisaratitaqui ama jidama peya cuanaja ishu. “Paa ama ai peya cajuchatishacara aishuque, ni Yusu tuja cahuitishacara aishuque”, jadya tuque ecuanaja inime jutaqui.

¹⁴ Cuejaya micuana riyaque Ecuana Cuatsashaqui Jesúsra ique cuejahuque. Adebayadya tuque era Yusu ecuana cahuitishayaque ama erami ai cueya cueya cuana tyata bahue juhuaque aratsu. Peya cuana Jesús queja ecatyati cuanaja ni inime juya: “Araya ni ecuana erami Yusu cahuitisha ishuhue”, jutaqui ju tuna paara amadya. Tunara ni araya tunara arataquima adebayaque, jutaqui ju tunajatu aya amadya tuyuque, tunara arataquima bayaque araya tibu.

¹⁵ Cuejaya micuana riyaque, micuana erami ara bahue cuanaque. Micuanara ni araya erami, tumetu ecaca cuana camadya araqui cuanara erami arayadya, micuanara araya baatsudya jutidya. Aratsu tuna dyaque peya inime ejuu, tunara arataquimaque bayaque arahua tibu. Jutaqui ju, micuanara ni jadya aya, tume tuque micuana iyuhue tsehue ama baya tumeque micuana tsehuequi cuanaque. Neajacacue peya cuana Cristoja biji eque juya bucha baatsu amerejacaqui juya cuanaque. Cayuamati ishuhue ama micuanaja paju. Cristo tuna jiteque majuhua tibu, micuanajatu ajacataquidya micuanaja biji eque cuitaque, tunaja jida ishu.

¹⁶ Arepa micuana eje bucha juyaque jidadya bahue ama bucha, neajacaume, peya cuana jidama micuanaja ishu equisaratiu tibu. ¹⁷ Ecuana ecuana Yusuja cuanaque, tura ecuana mepehua tuja naru ishu. Tujaque ecuana, ai ecuanara araya, ijiya jadya eque ama. Jida ni ecuana tuja biji eque aniya, peya cuana tsehue catima, jida tsehue ni ecuana aniya, tume

ecuana caadebameretiya ecuana tujaque. Jadya anie ecuana jutaqui, Yusuja Espiritura ecuana casaturaya tibu. ¹⁸ Jadya anie ni ecuana juya, yuneri cuitadya ecuana Cristoja biji eque juya. Ecuana jadya anie juyajutu Yusu pureama juya. Ecuita cuanatu juya: “Riya cuanaque taa dyaque tuyu aniya” jadya.

¹⁹ Jadya tibudya ecuana jida cabatitaqui peya cuana tsehue, peya cuana tsehue cahuitima. Catsahuatitaqui ecuana peya cuana tsehue Jesús queja dyaque nimee juaje ishu, dyaque jida tuja biji eque aniaje ishu.

²⁰ Cuejanucaya micuana era, micuana erami ara bahue cuanaque. Jesús queja ecatyati cuanaque ai ara ishu cuanaque arataquima ejuu cuana eque nenimehuallaume. Neyuamaturaume Yusuja cuanaque. Yuneri dya tuque ecuana Yusu cahuitishaya ama erami aratsu ni peya earaqui cuana aratsu. Yusu tuque ecuana cahuitishaya, ecuana tsehuequique cajuchatishatsu. Jutaqui ju, peya ni cajuchatiya ecuanara araya tsehue, jidama tu ara ishu.

²¹ Inime ecuanaja paju: “Eje bucha eque cajuchatishacarama paa Jesús queja ecatyati cuanaque era araya eque, ijiya eque jadya. Panimehualla ama ecana tuaquejaque; eje bucha eque ecana patupumere ama inime, Yusu tuque cahuitishaya, jadya.

²² Ai earataque ara ishu jida adebaya tibu, Yusura ecuana jida baya ai arayaju. Jadya eque ecuana cati cati jutaqui ama tume cuanaque tibu. Ataqui tuque ecuanaja ecuana cuitadya jidaque bahueque. Jadya anie juyaque juatsu ecuana jida cabatiya, jucha metse ama. ²³ Ejera ni erami arataqui ama adebaya, tumeque aratsu ni cajuchatihuaju cabatiya, tura jadya juatsu ecajuchatiu, jadya inime tupuyaque ahua tibu. Pana bahue ama ni ecuana jida, jidamaque aishu, aya ni ecuanara, cajuchatihuadya ecuana, ecuanara ataquimaque adebayaque aya tibu.

15

Dutya neara peya cuana pureamatura ishu, ecuana pureama juishu ama

¹ Umaera tuque ecuana pana adeba aya eje bucha Yusuja biji eque ani ishuque. Cahuititaqui ama ecuana jidaque, jidamaque jadique pana adeba ama aya jari cuana tsehue. Tsahuataqui tuque ecuanaja tume cuanaque pana adeba aya ama jari cuanaque. Ecuanaja jida ishu cuita camadya neanira ama, tumebaedya peya cuanaja ishu.

² Nepureamaturara peya cuana Jesús queja ecatyati cuanaque, ai ecuana cuita camadya ama. Neara tunaja jida ishuque. Necasaturara ecana tuna Jesús tsehue nime aputa

ishu ama. ³ Cristotu tuta taca capureamaturati ama juhua. Peya cuana tujatu pureamaturahua. Tuquetu canerecathua Yusuja quisarati ehue ne equedya. “Ujeu tunara ique bahua, beru mique ujeu bahua bucha”, jadyatu Cristora tuja Etataque Yusu acuare.

⁴ Dutyatu beru Yusuja quisarati ecuana bahuitya ishuque ehue ne jucua. Tuja quisarati eque ecuana Yusura adembamereya ecuana canerecathyaque abacata idu ataquique. Tuja quisarati eque tura ecuana casaturaya. Tuja quisarati eque tura ecuana bahue amereya ejeque huecaca ecuana Ecuana Cuatsashaqui queja judirubunqueque ni eje tupu tuque jaca ishu ama. ⁵ Yusura ecuana tsahuaya canimehuallatima canerecathya cuana idu ishu. Tuquetu Ecuana Nime Casaturayaque. Tura netsahuacue Cristo Jesúsra anishacara aya eque ani ishu. ⁶ Ecadutyati ne jucue Ecuana Cuatsashaqui Jesucristoja Etataque pureama aishu. ⁷ Iyuhueda tsehue ne bacue peya cuana, Cristora micuana baya bucha. Micuana jadya cabatie juyaju, peya cuana jadya paju: “Yusu tu dyaque jida, tuja cuanaque peya cuana tsehue iyuhueda cabatiya tibu”.

Yusu queja judiru ishuque quisarati israelita ama cuana cuejatanacuareque

⁸ Riyaque micuana cuejacara aya. Berutu Yusura ecuanaja ebaba eana Einajacamererique cuadishadadiya jadya acuare. Jadya equetu Cristora junatsu bahue amerehua Yusura eje bucha quisarati iyatsu tuequedya ayaque. ⁹ Israelita cuana Ijahua quejaque inajacamereratu jehua. Tumbaedyatujatu inajacamererhua israelita ama cuanaque, tunaja dyadi tumbaedyat Yusu jadya aishu: “Micuetu dyaque quiyuhuebati anihua ecuana tsehue, Tata”. Ehue ne tu Yusura David “Huenecue” jadya ahua ju huenecuareque. “Israelita ama cuanaja ijacaju mique pureama abaque. Tunaja yacuaju mique pureama abaque jeru cuana tsehue, Yusu” jadya.

¹⁰ Moisesratu huenecuareadya Yusuja quisarati:

“Arepa micuana israelita ama cuana ama bucha, jida pureama micuana jubuque Yusuja emepe cuana tsehue” jadya.

¹¹ Davidratu huenecuareadya Yusuja quisarati:

“Micuana israelita ama cuanara tuque micuana jadya abaque:

‘Miquemi dyaque jida, Yusu’.

Micuana dutya anaera tuque micuana jadya abaque:

‘Miquemi dyaque jida, Yusu’ ”.

¹² Yusuja quisarati cuejaqui Isaiasratu huenecuare béru:

“Ejitajutu jubuque Isaí eque juracanayaque.

Israelita ama cuanaja ecuaitu jubuque.

Tuaqueja tuna catyatidadibuque”,

jadyatu Isaiasra huenequere Jesús jadya ayaque.

¹³ Yusura ecuana yunerineya ejeque huecaca ecuana tu-
aqueja judirubuque ni eje tupu jaca ishü ama. Tura jida
neamerecúe. Inime tsapematu neamerecúe, micuana tu-
aqueja catyatihua tibu.

Yusuja Espíritu tu micuana tsehúe. Tuquetu dyaque
casada. Tura cuitadya micuana ejenemerebuque ejeque
huecaca micuana Yusu queja judirubuqueque.

Pablo Yusura israelita ama cuana queja cuadishacuareque

¹⁴ Cuejaya micuana riyaque, micuana ecue eatsehuequi
cuanaque. Eratu pana ejenedya aya micuana peya cuana
tsehúe jida cabatiyaque. Bahue ique micuanara quis-
arati yunerique pana adeba ayaque, micuanara peya cuana
bahuityayaque. ¹⁵ Jadya ama bucha tuque ecue inime juhua:
“Arepa tuna pana adeba yunerique aya ama bucha, huene-
taquí tibu ríque huenehuadya dutya ríya cuanaque jida,
tuyu, mui cueja, tuna adebamerenuca ishü”, jadya tuque
inime tupuhua.

Pana cueja micuana ahua ecue cuejataquique, ni ríya piji
buchique ai tehuatsu ama. Yusura cuatsashayaju cuitadya
rique jadya huenehua. ¹⁶ Tura ique mepehua Jesucristo mere
ishü. Cuadishahua tura ique israelita ama cuanaque tuja
quisarati cueja ishü. Paera Yusuja quisarati ecuita cuana
ecuejau bucha, jadidya ique juya. Ecue mere tu israelita
ama cuanaque Jesús queja catyati tsahua. Tuna Jesús queja
catyatiyaju, Yusutu dyaque pureama juya tuna tsehúe. Tura
tuna jida baya, tuja Espiritura cabapetishahua tibu.

¹⁷ Jadya tibu ique casumitiya Cristo Jesúsra micuana ique
eque eje bucha amerehuaque baatsu. Ique pureama juya,
Yusu jadya meree aya cabatitsu. ¹⁸ Cristo ique eque israelita
ama cuana ducu eje bucha juhuaque cuita camadya quisarati
paa. Yusura tuja quisarati cuejamerehua tuna tuaqueja caty-
ati ishü, tuna tura amereya eque juishü. Era tuna cuejayaque
bacatsu, ique Yusuja biji eque aníya baatsu jadya tuna Jesús
queja catyatihua. ¹⁹ Turadya ique amerehua ejeque ecuitaja
ataquique ama, tuna ique Yusuja ishü mere juyaque bahue
juishü. Bape tunajatu bahua. Yusuja Espiritura ique amere-
hua. “Jesús queja ni micuana catyatiya, Yusura micuana
Ijahua quejaque inajacamereya”, jadya tuna dutya queja
cuejacuejaníhua. Icuene cuita tuque cuejahua Jerusalénju
aníya cuanaque. Tumeque epu arida juque cuinanatsu,
juneníhua ique epu cuanaju, quisarati cueja juyaque. Iliria

japada epu cuanaju ique cuejacuejaajehua. ²⁰ Dyaque bijida tuque ecue juhua Cristoja quisarati cueja ishü eju ecuita cuanaja quisarati bacama jariju. Bijida tuque ecue juhua quisarati icueneta cueja aishu eju peya cuanaja bacama jariju. ²¹ Berutu Yusura Isaías queja huenemerecuare:

“Yusuja Ecuadishaja quisarati bacama cuita cuanaratu bacabuque tuque cuejatayaju.

Tuque adebaya ama cuanaratu adebabuque”,
jadyatu Isaiasra huenecuare.

Eratu cuejahua riyaque quisarati bacama cuana cuita queja, riya ehüene equedya.

Pablo Romaju cuacara jucuaque

²² Aijama cuita tuque ecue emajaca juchine tumeque epu cuanaju quisarati cueja juyaque. Jadya tibudya cuataqui ama jari cabatiya Romaju micuana cuajira. ²³ Amena rique mere atillachine requeja. Chamacama cuataqui cabatiya micuana queja eje uma mara amena micuana queja cuacara cuacara juyaque. ²⁴ Españaju datse cuacara juya. Cuaatsu Roma eque cueticara juya. Eje uma huecaca cuana anaticara juya micuana queja. Tuequedya cueticara juya Españaju. Areque micuanara etsahuatsau ique tuqueja cuanuca ishü. ²⁵ Micuana queja cuamaquedya icuene Jerusalénju cuataqui jari Jesús queja ecatyati cuanaque chipiru tyara. ²⁶ Macedonia, Acayaju cuanaque Jesús queja ecatyati cuanaratu tunaja inime taca sita achine chipiru aiju nercada cuanaja Jerusalénju Jesús adebaqui cuanaja ishü. ²⁷ Macedoniaju, Acayaju cuanaque tuna israelita cuana ama. Tuna bacue ecana Jesús queja catyaticuare, israelita cuanara Yusuja quisarati cuejayaju. Jadya tibudya tuna iyacua israelita ama cuanara tsahuacara aya. Jidadya tu israelita ama cuanaja israelita cuana tunaja ai aijamaque tyaishu. ²⁸ Riyaque amena aatsu, tuna chipiru tyaatsu, cuacara juya Españaju. Cuetyara micuana banaticara aya. ²⁹ Tuqueja micuana queja junatitsu, pureama nejura peya cuana tsehue, dutya jidaque Cristora ecuanaja ishüque tyayaque adebatsu.

³⁰ Cuejaya micuana riyaque, micuana ecue eatsehuequi cuanaque. Micuana micuana Ecuana Cuatsashaqui Jesucristo queja catyatihua. Yusuja Espiritu eque micuanaja Yusuja cuana tsehue quiyuhuebati aniya tibu micuana Yusu queja bacabacataqui ecue ishü. Nebacajacaume ique tuja casatura ishü.

³¹ —Narucue Pablo, Judeaju Jesús queja catyatima cuanara ujeda eauju, Tata. Jerusalénju micue cuanara pureama tsehue chipiru painatsa Pablora dujuyaque, —jadya Yusu neacue.

³² Micuanara ni jadya bacae aya, Yusuja ni jadya inime, tume pureama tsehue junatiya micuana queja. Tuhua ni tuque ecue canajara ishü emajaca eaniu micuana batiya tupu. ³³ Yusu tu Ecuana Inime Tsapema Anishaquique. Tura dutya nenarucue. Jadidya paju.

16

Jesús queja ecatyati cuanaque

¹ Febe tuque cuadishaya micuana queja.

Tumeque epuna tu ecuana tsehuequique. Turatu dyaque tsahuahua Cencreaju cuanaque Yusuja quisarati baca ishü casitati bahue cuanaque. ² Micuanara Ecuana Cuatsashaquique iyuhueda baya tibu, jida nebatsacue. Yusuja cuanaque ecabatita bucha cabatie nejudue peya cuana tsehue. Netsahuacue dutya aiju micuanara tsahuataqui baya eque, tura dyaque peya cuana tsahuahua tibu, ique tumbaedyä.

³ Isaramereya tuque Priscila, tuja yahuique Aquila jadya. Tatsera ique dyaque tsahuahua Cristo Jesúsja ishü mere juyaju. ⁴ Tatse tatse ique eiyetauju icuenedyaque majujerihua. Jutaquiju “Yusurupai metse aya, metsera ique eiyetauque icuenedhua tibu”, jadya tatse aya. Tumbaedyä tatse israelita ama cuanaque Jesús queja ecatyati cuanara yusurupai amereya. ⁵ Isaramereya tuque tatseja etareju Yusuja quisarati baca ishü casitati bahue cuanaque. Tumbaedyä tuque isaramereya ecue iyuhuedaque Epeneto. Tuquetu Acaya juque Cristo queja catyati metse juhuaque. ⁶ Isaramereya tuque María. Tuquetu dyaque cacasatihua micuana tsahua ishü. ⁷ Isaramereya tuque Andrónico, Junias jadya. Tatse tatse israelitadya. Tatse tatse etare apudaju eatsehue nrecada jupee juhua. Jesúsra cuitadya cuadishahua cuanaratu jida quisarati aya tatseja ishü. Tatse tatse Jesús queja catyatihua ique catyatima jariju.

⁸ Isaramereya tuque Ampliato. Tuque tuque ecue eadebaque iyuhuedaque, Ecuana Cuatsashaqui queja catyatihuaque nucadya. ⁹ Isaramereya tuque Urbano. Tura ecuana dyaque tsahuahua Ecuana Cuatsashaqui mereju. Isaramereya tuque ecue iyuhuedaque Estaquis. ¹⁰ Isaramereya tuque Apeles. Eje uma cabameretitu juhua tuque, yuneridya Ecuana Cuatsashaqui queja ecatyati juyaque. Tumbaedyä tuque isaramereya Aristobuloja etareju cuanaque. ¹¹ Isaramereya tuque Herodión, ique buchique israelita. Tumbaedyä tuque isaramereya Narcisoja etareju cuanaque, Ecuana Cuatsashaqui queja ecatyati cuanaque. ¹² Isaramereya tuque Trifena, Trifosa

jadya. Tumeque epuna ecatse tu ecuana tsehuequique ecatse. Tatse tatse mere juyadya Ecuana Cuatsashaquija ishü. Isaramereya tuque Pérsida. Tumeque epuna tu ecuana tsehuequique iyuhuedaque. Tuquetu tumbaedyä dyaque mere juhua Ecuana Cuatsashaquija ishü. ¹³ Isaramereya tuque Rufo. Jesús queja dutya ecatyati cuanaratu Rufopa dyaque Ecuana Cuatsashaqui queja nimee jadya aya; jida patu mereya jadya. Tumbaedyä tuque isaramereya tuja ecuaque. Tumeque epunara ique tsahuahua; ecue ecuaa nerira etsahuau bucha tsahuae tura ahua. ¹⁴ Isaramereya tuque Asíncrito, Flegonte, Hermes, Patrobas, Hermas, tuna tsehue cuanaque Jesús queja ecatyati cuanaque. ¹⁵ Isaramereya tuque Filólogo, Julia, Nereo, Nereo tsehuequi epunaquique, Olimpás, dutya tuna tsehue cuanaque Jesús queja ecatyati cuanaque.

¹⁶ Casitatitsu quisaratibare, emetucuju quinati jadya ne-jucue peya cuana tsehue iyuhueda cabatiyaque cabamereti ishü. Jesús queja ecatyati cuanara micuana isaramereya eju pajudya jutidya Yusuja quisarati baca ishü casitatiya cuanara.

Camadya ishü cuejayaque

¹⁷ Cuejaya micuana riyaque, micuana ecue eatsehuequi cuanaque. Necanaruticue micuana Jesús queja nimee amerejacacara juya cuana tsehue, tumbaedyä micuana yume cama nimee amerejacacara juya cuana tsehue. Tunara bahuityayaquetu bape neri cuita micuana Cristo jaque bahuityatanahua bae ama. Necareneume ecana. ¹⁸ Tume cuanaquetu Ecuana Cuatsashaqui Jesucristora amereya eque ama juya cuanaque. Tunaja biji eque cuitadya jutidya tuna juneniya. Tunaja quisarati jida yuneri bucha datse, ai jidaque ama. Pusha pusha jutidya tuna juya. Baecua jida jari cuanaque adeba jidama Cristo queja ecatyati cuanaque tunajatu ijahue jutidya aya. ¹⁹ Cristo queja ecatyati cuanara peya epuju cuanara micuana aya, micuanapa Jesúsra amereya eque cuita juya jadya. Jadya quisarati bacatsatsu ique dyaque pureama juya. Inimequi, bahue nejucue yunerique quisarati bahue juishü. Jidamaque acara neaume; yunerique ama ijacabacacara neaume. ²⁰ Yusu tu Ecuana Inime Tsapema Anishaquique. Tsunutaya amatu Satanás casa secatana ishüque, tuja micuana ijahue anuca ishü ama. Ecuana Cuatsashaqui Jesucristora jida tsehue nenarucue tuja quiyuhuebati tsehue.

²¹⁻²³ Timoteora micuana isaramereya. Tuquetu eatsehue mere jupee juhua, Ecuana Cuatsashaquija mere ique juyaju.

Tumebaedyá Lucio, Jasón, Sosípater ecue ata israelita cuanara micuana isaramereya. Gayora micuana isaramereya. Tuja etareju ique. Rehuari Jesús queja ecatyati cuanaque casitatiya Yusuja quisarati baca ishu. Erastora micuana isaramereyadya. Tuquetu Corintuju huaraji cuanara chipiru sitayaque naruquique. Tumebaedyá micuana isaramereya Cuarto bacanira. Tuquetu Jesús queja ecatyati nucadya.

Ique Tercio. Ique, Pablo tsahuaquique, tura cuejaajeyaque huenequique. Era dyadi micuana isaramereyadya Ecuana Cuatsashaquija ebacaniju.

²⁴Ecuana Cuatsashaqui Jesucristora jida tsehue nenarucue tuja quiyuhuebati tsehue. Jadidya paju.

Pablora Yusu pureama acuareque

²⁵Iyacia Yusu pureama neara:

—Dyaque jida, casada jadya taa mique, —jadya neara.

Tura peadya ecuana ecasaturaajeudyá jutidya, Jesús queja ecuana dyaque nimee juaje ishu. Eratu cuejajacahua ama Ecuana Cuatsashaqui Jesucristoja quisarati. Yuequedyá yahua iyama jarijutu riyaque quisarati ejitaju ama juhua. Ai ibeda buchiquetu juhua, ni ejeja adeba ishuque ama. ²⁶Icuene Yusuja quisarati cueja puji cuanaratu cuejacuare ejitaju cuita ama, dyaque jida cuita adebaya ama tibu. Iyacuatu amena Yusura ejitaju aya riyaque quisarati. Tuquetu Yusu maju baecuaque; tere baecuatu anibuque. Tura cuitadyatu riyaque quisarati cuejamerehua dutya queja aniya cuanaque. Jadya tujatu amerehua, tunaja Jesús queja catyati ishu emajaca ani ishu, jadya juatsu tuna Yusuja biji eque ani ishu.

²⁷Yusu tu peadya cuita camadya. Aijama tu peya. Tura peadyatu yuneri cuita dutya pana adeba aya. Pureama neajacara ama tura ecuana Jesucristo eque eje bucha ahuaque adebatsu.

—Dyaque jida, casada jadya taa mique, —jadya neara.

Jadya neajacara ama ni eje tupu. Jadidya paju.

Riya tupu camadya.

Pablo

CORINTOJU CUANAJA ISHU PABLORA QUIRICA CUADISHAMETSE ACUAREQUE 1 CORINTIOS

Riyaque quirica ri Pablora Corintoju aniya cuanaja cuadisha ishu hueneacuareque. Riya tsehue tujatu Jesús queja ecatyati cuanaque nereda acuare, tuna jidama aniya jadya bacatsu. Umae cuana tuna dyaque jidaque bucha cabaticuare. Umaeratu tunaja caquemitiqueremaque jaraquerecuare. Umaetu Yusu mui ishu casitatitsu jidama eje buchadya jutidya jucuare.

Tuequedya tuna Pablora bahuityacuare Yusuja Espiritura bape bape casa tyahuaque peadya peadya Jesús queja ecatyati cuanaque, Yusuja biji eque ecuana peya cuana tsehue catsahuatibare ishu.

Capítulo 13jutu Pablora hueneacuare eje buchique iyuhue jadique. Dyaque patu saretanaya ecuana peya cuana tsehue yurameta iyuhueda cabati ishuque. Jadya ni ecuana cabatiya, tume ecuana dyaquedya aniajeya Yusu pureamat-urayaque.

Corinto juque Cristo queja ecatyati cuanaratu bape bape cueyaneedya jutidya acuare Cristora, tuaqueja ecatyati cuanaque emajuque nityatsuranucayaque. Capítulo 15ju tuna Pablora bahuityacuare Yusura ecuana emajuque eje bucha nityatsuranuca abuqueque.

Umae versículo cuana dyaque saretanaya cuanaque tu: 1.8; 2.14; 3.11; 6.19, 20; 9.24-27; 10.13, 31; 15.20, 22, 25-26, 53-54, 57-58.

Pablora Jesús queja ecatyati cuanaque quirica eque is-aracuareque

¹ Era rique micuanaja quirica cuadishaya. Isaraya micuana era. Ique Pablo. Yusura ique mepehua Jesucristoja yana atsaqui juishu, tuja inime jadya juya tibu. Ecuana tsehuequique Sóstenes bacani ri eatsehue. Tura micuana isaramereyadya. ² Cuadishaya rique quirica Corintoju Yusuja cuanaja ishu. Tura micuana mepehua micuanaja jidama cuanaque jaca ishu, tuaqueja camadya catyati ishu. Micuana Jesús queja catyatihua tibu, jadya mepee tura micuana ahua. Micuana camadya ama, tumbaedyadya dutya queja cuanaque 'Jesucristo tu Ecuana Cuatsashaquique' jadya juya cuanaque tuna Yusuja cuanaque. Jesucristo tu Ecuana Dutya Cuatsashaquique. ³ Yusu ecuanaja Etatara, tumbaedyadya Ecuana Cuatsashaqui Jesucristora jida tsehue

nenarucue tatseja quiyuhuebati tsehue. Tatsera inime tsapema neanishacue.

Jesús queja catyatihua tibu, tura ecuana dyaque jida amereyaque

⁴ Micuanaja ishu Yusu tsehue quisaratiyaque tuque ecue abahue:

—Yusurupai mique ecue ajacanime ama mique Corintoju cuana tsehue micue cuana tsehue dyaque jida juhua tibu, Tata. Mira tuna jadya bae aya, tuna Cristo Jesús queja ecatyati juya tibu, —jadya tuque ajacaya ama.

⁵ Micuana Cristo jaque tibu, micuana Yusura tilla tupu ama tyahua jidaque. Tura micuana tyahua dutya micuanara sareyaque tuja quisarati cueja ishu. ⁶ Micuanaratu pana ejenedya aya Cristoja quisarati yunerique ecuanara micuana cuejahuque. Tumeque quisarati equedya micuana aniya. ⁷ Jadya tibu tuque micuanaja aijama amadya jidaque Yusuja Espirituja tyabahueque. Ejeque huecacatu Ecuana Cuatsashaqui Jesucristo ejitaju junucabuque rehua. Micuanaratu eje buchadya junashahuishacara tsehue ihuaya. Tuque ihuaya tupu tuque micuanaja dutya jidaque aniya Yusuja Espíritu eque etyaque tuque mere ishu. ⁸ Yusura micuana narubuque tereya tupu. Casaturajacabuque ama tura micuana, micuana Jesús queja nimee jujaca ishu ama. Jadya tibu micuana Ecuana Cuatsashaqui Jesucristo junanucahuaju, ni aira buchique micuana jucha metse abuque ama. ⁹ Yuneri cuitadya micuana Yusura jidaque jadya tyae abuque, tura eje bucha aana ayaque cuareya ama tibu. Turadya micuana mepehua tura Ebacuaque Jesucristo jidaque tyana ahuaque micuanaja dyadi ani ishu.

Corintoju cuanaque peya cuana tsehue yume cama nimee ama anicuareque

¹⁰ Ecuana Cuatsashaqui Jesucristora jadya cuatsashaya tibu, micuana nereda bucha cuejae aya, micuana ecue eatsehuequi cuanaque. Peya cuana tsehue yume cama nimee nejucue. Ujeu cati cati jadique micuanaja paju ani. Dutyara yunerique neejenecue. Dutya yuneri eque neanicue. ¹¹ Jadya micuana cuejaya. Cloéja etareju cuanara ique cuejachine micuana cama ujeu cabatiyaque. ¹² Cuejachine tunara ique. Umaepa micuana juya: “Pablo cuita camadya tuque ecuana bacacara aya”. Peya cuanapa micuana juya: “Apolosra cuejayaque cuita camadya tuque ecuana bacacara aya”. Peya cuanapa micuana juya: “Pedro cuita camadya tuque ecuana bacacara aya”. Umaepa micuana juya: “Cristoja quisarati cuita camadya tuque ecuana bacacara aya, ejeque ecuitaja buchique ama”. ¹³ Pusha amadyatu Cristo dutya metseque,

peadya cuare juque piji camadya tuja cuanaque naruquique ama. Ique ama curusuju majuhua micuanaja jucha cuana tsujetyaqui. Ecue ebacaniju ama micuana cutsameretihua. Jadya tibudya cati cati nejujacacue.

¹⁴ Jidadya tucue tuque eje uma ama tuhua Corintoju ut-sahua. Crispo, Gayo jadya camadya tatse utsahua. ¹⁵ Era cuitadya ni ecana eje uma utsaquena juhua, tume tucue tuna “Pabloja ebacaniju ecuana cutsameretihua”, jadya ecana juquena juhua. ¹⁶ A, huecatanahua peya. Utsacuare tucue tuque Estéfanos, dutya tuja etareju cuana tsehue. Tuequedya tuque amena adebaya ama ni ejeque peya utsahuaque. ¹⁷ Cristora ique cuadishahua peya cuana dyadi Yusura eje bucha Ijahua quejaque inajacameree ayaque cueja ishu, ai tuna utsa ishu jipidya ama. Eratu aya quisarati ibeda adebataquima tsehue ama, Yusura ique adebamerehuaque camadya. Era ni cuejaquena juhua ecuitaja inime aniyaque, tume taa tu ique quisaratiyaju bacaqui cuanara ecue ishu dyaque inime tupu quena juhua, Cristo tunaja jucha jiteque majuhuaque inime tupuqui eauque. Ique jutidya ni tunara dyaque inime tupuqui aya, Cristo queja ecatyatiuque, tume taa tu Cristo curusuju yanacana maju juquena juhua.

Cristo eque, tuja inime dyaque bahue aniya eque jadya Yusu casa cabameretihuaque

¹⁸ Ecuana Yusuja einajacamere cuanaque “Cristotu majuhua curusuju ecuana jiteque”, jadya quisarati bacatsu tuque ecuanaja inime juya: “Tuja dyaque casa aniya tsehue ecuana Yusura inajacamerehua, tuja Ebacuaque ecuana jiteque curusuju majuhua tibu”, jadya tuque ecuanaja inime juya. Ijahuaaja etiquiju judiru ishu cuanaque tuna riyaque quisarati bacatsu tsaya jutidya. “¿Aishu rique ecuana riyaque quisarati eejeneu?” jadya jutidya tunajatu inime juya.

¹⁹ Ehuenedya tu Yusura quisarati acuareque: “Yanacanatu dyaque bahue cabatiya cuanara inime tupuya. Tuna cuitadya dyaque bahue juya tibupa ecana eaquejadya judirubunque jadya.

Arepa inimequi cuanaque ique adebaya jiu juya ama bucha, eratu tunara inime tupuya cuanaque yanacanaque ejitaju adadibuque”,

jadyatu Yusura quisarati iyahua yuequedyadya.

²⁰ Yusuratu inimequi bucha cabatiya cuanaque inimema baya, dyaque bahue bucha cabatiya cuanaque, jida quisarati yana muieque riyaque yahuaaju quisaratiya cuanaque. “Yusura ecuana jucha metse ama baya ecuana bahue baatsu”, jadya datse tunajatu inime juya. Jadya ama tuque. Yusuratu ejitaju amerehua ecuita cuanaja inime

tupu ishuque. ²¹ Yusu camadya tu dutya bahueque. Yuequedya tujatu inime juhua: “Riyaque yahuaju cuana queja tunaja ishu camadya inime tupuqui cuana queja caadebameretibuque ama. Dyaque jida tuna quisarati bacamerebuque ecue Ebacua tuna jiteque curusuju majuhuaque. Tuaqueja catyatiya cuanaque camadya tuna Ijahua quejaque inajacamerebuque, arepa peya cuanaja ishu riyaque quisarati aishu ama, paju ama bucha”, jadyatu Yusuja inime juhua.

²² Israelita cuanatu jadya quisarati bahue: “Eejeneu mique ecuana Yusura mique quisarati cueja ishu cuadishahuaque, mira Yusuja casa tsehue ni ejeque ecuitaja ataquique ama ayaju camadya”, jadya tuna quisarati bahue. Israelita ama cuanaque tuna jadya quisarati bahue: “Eejeneu mique ecuana Yusura mique quisarati cueja ishu cuadishahuaque, mira ecuana quisarati adebabada tsehue isarahuaaju cuita camadya”, jadya tuna jubahue. Jadya tibudya tunajatu dutyaja jujeri inime “Cristo ecuana inajacamere ishu majuhuaquepa aishu ama”, jadya aya. ²³ Ecuana jatu cueja bahue: “Mesias tu curusuju tatatanahua ecuanaja jucha cuana tsujetya ishu”. Jadique quisarati bacatsutu dutya jujeri israelita cuana cahuaitiya, Mesias curusuju eiyetau ama bucha adebatsu. Israelita ama cuanara bacatsu tunajatu inime juya, aishu buchique ama bucha. ²⁴ Ecuana ishu bacue Mesias ecuana jiteque majuhuaque quisarati jidaque quisarati. Pajudya datse ecuana israelita ama, israelita; ecuanaja ishu tu jida. Cristo curusuju majuhua equedya ecuana Yusura tuja casa bamerehua. Cristo jadya majue juhua equa ecuana Yusura tuque dyaque bahueque bamerehua. ²⁵ Yusu tu dyaque inimequique, ai ecuita cuana bucha ama, arepa tuna “Yusura inime tupuyaquepa aishuque ama”, jadya aya ama bucha. Yusura dutya ai ayaque tu dyaque casada, ecuita cuanara ayaque bucha ama, arepa tuna “Yusura ai ayaquepa casadama”, jadya aya ama bucha.

²⁶ Micuanara cuitadya eje buchique inime tupuqui neacue, micuana ecue eatsehuequi cuanaque. Riyaque yahuaju cuanaja ishu micuana eje uma piji camadya inimequi; eje umaja piji camadya tuque micuanaja casa aniya; eje uma piji camadya micuana inime metse. Micuana jadya ama bucha, micuana Yusura inajacamerehua. ²⁷ Dyaque bahue cuanaque emepeuque, Yusuratu mepehua tujaque amere ishu tuque adeba baecua cuanara aishu ama bucha cuana baya cuanaque. Dyaque casada cuanaque emepeuque, tujatu mepehua tuque adeba baecua cuanara casadama baya cuanaque. Tume cuanaque tujatu mepehua, bahue,

dyaque inime metse jadya cabatiya cuanaque bisutura ishu. ²⁸ Yusratu tujaque amerehua peya cuanara bijidamaduraya cuanaque, aishu ama bucha cuanaque. Aishu ama bucha cuanaque mepetsu tujatu aishu ama amerehua inime metse cabatiya cuanaque. ²⁹ Jadya equetu ni ejeque tuta taca casumiti jutaqui ama: “Ique dyaque jidaque inime metseque”, jadyatu ataqui ama Yusu ni ejeja buchaja. ³⁰ Micuana micuana Yusura tujaque amerehua. Yusura micuana baya Cristo Jesús queja ecatyati. Cristoratu Etataque Yusu ecuana queja adebamereya. Cristora ademedya ecuana Yusu queja jucha metse ama bamereya. Cristora ademedya ecuana anishaya Yusura anishacara aya bucha. Cristora ademedya ecuana naruya dutya ai jidamaque eauju. Jadyatu Yusura amerecara aya. ³¹ Jadya tibudya ecuana ecuana taca casumiti jutaqui ama. Jadya tu ehue ne Yusuja quisarati: “Ecuanaja ishudya jutidya jida quisarati neara ama. Ecuana Cuatsashaquija ishu camadya tuque ecuanaja jida quisarati ataqui, tura eje bucha ahua eque camadya”, jadya tu ehue ne Yusuja quisarati.

2

Cristo curusuju tatatanahuaque camadya ecuanaja cuejataquique

¹ Ique micuana queja Yusuja quisarati cuejara cuacuare patya iyucaqui cuanaque equisaratiu bucha ama quisaraticuare, micuana ecue eatsehuequi cuanaque. Ecuita cuanara inime tupuyaque ama micuana cuejaha. Yusura bahue amereyaque micuana cuejaha. ² Tuqueja cuahuie tuque ecue inime jucuaque: “Corintoju jutitsu tuna Jesucristoja quisarati cuita camadya cuejatiya. Tuque ecuana jiteque curusuju majuhuaque cuita camadya tuna cuejatiya”, jadya tuque ecue inime juhua. ³ Micuana queja juticuare patya casadama cabaticuare. Eje buchadya meree acara tuque Yusu ahua. Jadya juyaque tadadahua ique. ⁴ Quisarati yunerique micuana cuejaha. Micuana cuejayaque tuque cuejaha dyaque bahue cuanara bahuityaya bucha ama. Yusuja casa eque tuque cuejaha. Era micuana Jesús queja catyathacara ahua. Yusuja Espiritu eatsehueque bahue juatsu, tuja casa baatsu, tuque micuanaja inime jutihua era yuneridya Yusuja quisarati cuejahaque. ⁵ Jesús queja micuana catyatihua, ai ecuita riyaque yahuajuja ebahuityaque bahue juatsu ama, Yusuja casa baatsu cuita camadya.

Yusu tuja Espiritu eque caadebameretiaque

⁶ Jadya tibu tuque ecuana Yusuja quisarati cuejaya dyaque bahue tsehue, Yusuja Espiritura cuatsashaya eque juya

cuana tsehue quisaratiyaque. Jesús queja catyatima cuanara inime adebaya tsehue ama ecuana quisaratiya. Riyaque yahua juque enaruqui cuanaja quisarati tsehue ama ecuana quisaratiya. Arepa iyacua tumeque ecuita cuana emuita juya ama bucha, masadama tunajatu inime dyaque bahueque teredadibuque. ⁷ Yusura bahue amereya eque ecuana quisaratiya. Yahua iyama jariradyatu Yusura inime tupuhua: “Ecue Ebacua queja catyatiya cuanaque tuna tuque muitaya bucha anibuque”, jadyatu Yusura inime tupucua. Yuequedya ama tujatu ejitaju amerehua tura inime tupuyaque. Etehua buchiquetu juhua. ⁸ Ni ejeque riyaque yahua juque huarajiratu adebahua ama Yusuja inime, Yusura ecuita cuana Jesucristo eque Ijahua quejaque inajacamerecara ayaque. Adebayaque juatsu tunajatu Ecuana Cuatsashaquique curusuju tatamerequena ama juhua. Ecuana Cuatsashaquique tu jida, casada jadya. Aijamatu peya tuque buchique. ⁹ Yusuja quisarati ehue ne baedyatu juhua:

“Dyaque jidaque ejeja buchique bamaque, bacamaquetu Yusuja ebajeje aniya tuque iyuhueda baqui cuanaja ishu.

Tunajatu anibuque, ni eje tupu riyaque tuque ecuanaja anidadibuque jadya inime etupuque ama”.

¹⁰ Adebayadya tuque ecuana Yusura bamereyaque, tuja Espiritura cuitadya ecuana adebamereya tibu. Riyaque Espirituradyatu dutya baya. Jadya tibudyatu tura dutya adebaya. Arepa ecuana Yusura inime tupuyaque baecua paju ama bucha, tuja Espiritura camadyatu pana adeba aya. Jadya tibusu tura pana adeba aya Yusura inime pihuaque. ¹¹ Ecuita metsera peadya cuita camadyatu adebaya dutya tura inime tupuyaque, tuque eje buchique jadya. Jadya tu Yusuja Espiritu; tura peadya cuita camadyatu adebaya Yusura dutya inime tupuyaque, tuque eje buchique. ¹² Yusura tuque ecuanaja cuadishahua tuja Espiritu cuitadya, Yusu adeba baecua cuana tsehueque espiritu ama. Yusuja Espiritu tu ecuana tsehue, Yusura ecuana tsehue jidaque ahuaque adebamere ishu. ¹³ Aya tuque ecuana quisarati cuana ejeque riyaque yahuajuja ebahuityaque ama, Yusuja Espirituja ebahuityaque. Riyaque Espirituqui cuana tsehue quisaratiyara tuque ecuana cuejaya riyaque Espiritura bahuityayaque.

¹⁴ Yusuja Espirituja ama eiyacuane cuanaratu bijidamadura Espiritura bahuityayaque. Tunaja ishu tu aishuque ama bucha, riyaque Espiritu tuna tsehue ama tibu. Bahuedya ecuana Espiritura bahuityayaque jidaque; tuque ecuana tsehueju cuita camadya. Umae cuana ni tu eje bucha

bahuee juma ni riya piji buchique. ¹⁵ Yusuja Espíritu tsehue cuanara camadyatu adebaya ai jidaque, jidamaque jadique. Tumeque Espíritu tsehue ama cuanaratu adebaya ama Espíritu tsehue cuanaque eje buchique. ¹⁶ Ehuenedya tu jadya Yusuja quisarati:

“¿Aira jatsutu Yusura inime tupuyaque adebaya?

¡Ni aira buchique!

¿Ejeque tu dyaque bahue Yusu bahuitya ishu?

¡Ni ejeque buchique!”

jadya tu ehue.

Ecuana camadyatu adebaya Cristora inime tupuyaque, tuja Espíritu ecuana tsehue tibu. Jadya tibudyatu yuneri cuitadya tuja Espíritu tsehue ama cuanara eje bucha adebataqui ama baya.

3

Yusuja quisarati cueja juyaque tu Yusu merequique

¹ Riyaque micuana cuejaya, micuana ecue eatsehuequi cuanaque. Micuanaja biji eque cuitadya jutidya jari micuana aniya. Riya piji camadya micuana Yusuja Espiritura cuat-sashaya eque juya. Arepa micuana Cristo jaque juya ama bucha, tuque micuana pana adeba ama jari aya. Ebacua cuana bucha jutidya micuana. Jadya tibudya micuana isarataqui ama baya yuneri cuita Yusuja Espíritu eque aniyaque eisarata bucha. ² Icuene micuana ebacua cuana ebahuityau bucha bahuityae ahua, ai esirique ebahuityau bucha ama, micuanara ibedamaque camadya adebataqui baya tibu, ebacua nana butse eju ecuinanara atsuna esusu bucha, esiri cuanara erami earau bucha ama. Riya cama tuque micuana yuhuane yuhuane piji camadya adebaya Yusuja quisarati. ³ Micuanaratu adebaneriya ama jari Yusuja quisarati. Micuanaja biji eque cuitadya jutidya micuana aniya jari tibu, Yusuja Espíritu eque ama. Dyaque inimequi micuana cabatiya peya cuana Jesús queja ecatyati cuana ducu. Cahuaitiya micuana peya cuana tsehue. Jadya anie juyaque micuana Jesús queja catyatima cuanaque aniya bucha cabameretiya. Yusuja Espíritu tsehue ama aniya cuana bae jutidya micuana juya. ⁴ Micuana ducutu aniya jadya juya cuanaque: “Eratu Pablora cuejayaque cuita camadya bacaya”. Umae bacue juya: “Eratu Apolosra cuejayaque cuita camadya bacaya” jadya. Jadya juyaque micuana, Yusuja Espirituja iyacuanema cuanaque bucha juya.

⁵ Ique dyaque inimequique ama. Apolos tu dyaque inimequique ama. Yusu merequique camadya yatse. Micuana Jesús queja catyati ishucue, bahuitya ishucue

jadya ishuque camadya yatse. Ecuana Cuatsashaquira yatse cuatsashaya, cuejaya jadya aya tuque eje bucha meree aishuque. ⁶ Ique micuana Yusuja quisarati cuejatibune juhuaque, teeju uhuauhua puji buchique. Era micuana Jesús queja catyati ishuhua. Apolos tu euhua cuanaque jida dane ishuhua nasaqui buchique. Jadya ama bucha Yusura cuitadya micuana Ijahua quejaque inajacamerhua. Tuquetu euhuaque ehuijashaquique buchique. ⁷ Dyaque inime metseque tu Yusu, tuja quisarati cuejaqui cuanaque ama. Euhuaque ni huijaya ama, tume taa tu yanacanadya uhua, nasa jadya atanaya. ⁸ Ni ejeque ecuita Yusuja quisarati cuejaquique tu dyaque inime metseque ama. Yusura tuna tsujetyabuque peadya peadya tunara eje bucha meree ahuaque. ⁹ Micuana micuana Yusuja tee buchique. Tee metsera tuja tee jida enaruu bucha tura micuana naruya jida. Apolos, ique jadya yatse teeju mere puji buchique. Yatsera micuana cuejaya, bahuityaya jadya aya Yusuja quisarati.

¹⁰ Ejeque ecuita etare caticara ejuu. Icuene tujatu mere puji cuana queja tumu ebari cuana iyamereya etare nityatsura ishuhua, etare casada neti ishuhua. Tuequedya tujatu peya cuana queja etare amereya. Yusu tu etare metse buchique. Micuana micuana tuja etare buchique. Ique icuene cuita tumu ebari cuana iyamere ishuhua cuadishatanahua buchique. Yusura ique casa tyahua eque eradya micuana Jesucristoja quisarati cuejametse ahua, micuana tuaqueja catyati ishuhua. Eratu Yusuja biji eque cuita atibunehua. Apolos tuequedya peya cuana era quisarati cuejahua jenucahua cuanaque tuna tuna etare amena atillara jehua buchique. Tunara micuana tsahuanahua Yusuja quisarati pana adebamere aishuhua. Yusuja quisarati bahuitya juya cuanara jida inime patupu, tunara bahuityayaju micuana jida tuyu Yusuja biji eque bahuitya ishuhua. Etare mere juya cuanara peyara tibunehuaque inime eque yuamaturama eau bucha, jadidya tunajatu ataquí jidama ebahuityauju.

¹¹ Era micuana tuhua bahuityacuare patya, “Jesucristo queja peadya camadya necatyaticue einajaca juishuhua”, jadya micuana cuejacuare. Etare casada neti ishuhua tuque ecuanaja icuene iya bahue tumu arida cuanaque etare erihuiu tibu. Tumbaedyu ecuanaja Jesucristo queja catyatitiqui casada juishuhua, ijahuaja etiquiju enubidiruu tibu. ¹²⁻¹³ Umaeratu etare ishuhua tsumeya oro, jadya ama juatsu peya ai pajidaque plata, tumu jida tsuje aridaque jadya. Riya cuanaque tu tsunudaque. Peya cuanara bacue tsumeya acui, acui bití, jadya ama juatsu yachi nutsa jadya. Riya cuanaque tu tsunudama. Tirutsutu

ejitaju juya ejera pajidaque etare ahuaque, ejera pajidaque ama ahuaque jadya. Etare pajida tsehue ama ahuaquetu masadama murutaya, peya etare cuana bacue aijama. Yusuja cuanaque tuyuque bahuityaqui cuanaque tuna etare jida pajidaque aqui buchique. Jesús pana adeba ama tsahuaqui cuanaque tuna etare pajidaque ama aqui cuanaque buchique. Ecuana Cuatsashaquique junahua-jutu Yusura ejitaju abuque ejera yuneri, yunerique ama jadique bahuityahuaque. ¹⁴ Yunerique bahuityaqui juhua cuanara camadyatu Yusura etsujequi tyayaque babuque. Tuna tuna tiru baecuaque etare puji buchique. ¹⁵ Tuyuque ama bahuityaqui juhua cuanaque tuna tyatabuque ama ni ai. Tuna camadya ni tuna Yusu queja judirubuque; babuque ama tunajatu etsujequi. Etare tiruyaju huanahuaque bucha tuna jubuque, dutya murutaterehuaju mema ejuu bucha.

¹⁶ ¿Adebaya ama jatsu tuque micuana Yusu micuana queja aniyaque? ¿Adebaya ama jatsu tuque micuana tuja Espiritu micuana queja aniyaque? ¹⁷ Yusuja eaniqui tu tujaque, asicadaque ama. Micuanadya micuana tumeque eaniqui buchique. Jadya tibudya tuna Yusura dyaque nerecat-urabuque micuana pusha pusha bahuitya juya cuanaque, tunara tuja eaniqui asicaturaya tibu.

¹⁸ Umae micuana bahue cabatiya ecuita cuanara inime tupuyaque dyaque bahue cabatitsu. Micuana tacadya jutidya ijahue necatijacacue. Yuneri cuitadya ni micuana dyaque bahue jucara juya, inime tupuqui neajacacue riyaque yahua juque. Yusu inime tupuqui neacue, arepa micuana, Jesús queja catyatima cuanara ai baecua bucha baya ama bucha. ¹⁹ Yusu adeba baecua cuanajatu inime juya dyaque iyucaqui juatsu Yusu queja ejudiruu bucha. Yusratu jadique aishuque ama cuita baya. Ehuenedya tu Yusuja quisarati:

“Yusu adeba baecua cuanaque tuna dyaque bahue cabatiya. Yusura tuna inimema bucha baya.

Babi puji peyaja ishü escopeta nityatsu tudya jutidya ecate-cuameretiu bucha tuna”.

²⁰ Tumebaedya tu ehüene Yusuja quisarati: “Ecuana Cuatsashaquique tu bahue; dyaque iyucaqui cuanaja inime tupu tu aishuque ama”. ²¹ Ni ejeque buchique pacasum-iti ama jadya Yusuja quisarati cuejaqui cuanaque ijacaba-caqui cabatitsu. Dutya tuja quisarati cuejaqui cuanaque tuna iyatanahua micuanaja jida ishü. ²² Aijama amatu ai micuanaja jida ishüque. Pedro, Apolos, ique Pablo jadyara tuque ecuana Yusuja quisarati cuejahua micuana tsahua ishü. Yusratu ahua dutya ai riyaque yahuaaju micuanaja jida

ishu. Micuana chacha aniyaju, tura micuana jida naruya. Majuhuaaju tumbaedy tura micuana naruya. Iyacia eje bucha juyaque, eje bucha judadiyaquetu Yusuja cuanaja jida ishu jadya juya. Dutyadya tu micuanaja ishuque. ²³ Cristo tu Etataque Yusu Ejitaju Amerequique. Micuana micuana Cristo ejitaju amerequique. Jadya tibudyatu dutya micuanaja jida ishuque.

4

Cristo merequira peya cuana queja Cristo ejitaju amereyaque

¹ Ecuana Yusuja quisarati bahuityaqui cuanaque ecuana Cristo merequi cuanaque. Yusuja ecuadishaque ecuana yunerique bahuitya ishu Yusura ejitaju ahuaque. Dyaque inimequique bucha bae ecuana neaume, micuana merequi bucha bae ecuana neacue. ² Mayurumajatu ataqui tuja patrónra amereyaque ni riya piji buchique cuarema. Jadidyatu Cristoja quisarati bahuityaqui cuanaja bahuityataqui Yusura amerehua eque cuita camadya, ni riya piji buchique cuaretsu ama. ³ Micuanaja, ni ejeque huaraji maju aqui jatu aijama era Yusu jida merehua, jadya ama juatsu jidama merehua, jadique cueja ishuque. Ique cuitadya “Yusu jida merequi”, jadya catiya ama. ⁴ Merecarama ama ni tuque Yusu ahua ama, tura cuita camadya ique ecuejau era jida merehua, jadya ama juatsu aijama, jadique. ⁵ Jutaqui ju icueneta Yusuja huecaca iyama jariju, “Miratu aya ama mique Yusura amerehuaque”, jadya neaume ni ejeque buchique. Ecuannaratu adebaya ama peya cuanara inime tupuyaque, ni eje bucha juatsu tuna eje bucha juyaque. Ecuana Cuatsashaquira camadyatu adebaya. Tuque junanucatsu tura ecuana pana ejitaju anabuque ecuana ducuta eje buchique inime cadujutiyaque, tura ecuanaja inime tupu cuana eje buchique adebaya tibu. “Dyaque jida mique baya”, jadyatu Yusura quisarati abuque, ecuanara tura amerehuaque ahua baatsu.

⁶ Huenehua rique era, micuana ecue eatsehuequi cuanaja ishu. Apolosja ebacani tuque iyahua, ique Pablo tumbaedy quiyatihua, era micuana Yusuja quisarati bahuityayaque dyaque ejitaju amere ishu. Yusuja quisarati cuejaquique peadya camadya bacacara ebari, peya bacue bijidamadura jadya neaume. ⁷ Micuana micuana peya cuana bucha dyaque inime metseque ama. Dutya casa tuque micuanaja Yusura tyahuaque. Micuana jaquedy jutyadya ama tume. Jutaqui ju micuanara cuita micuanaja casa eque dadihua bucha casumitie nejuume.

⁸ Cristo amena pana adeba aya bucha micuana cabatiya. Yusura micuana tyayaque micuanaja amena dutya aniya bucha micuana cabatiya. Ecuana amena Cristo jaque bahuityataqui ama bucha tuque micuanaja inime juya. Ecuatsashaquique dyaque casadaque amena juhua bucha tuque micuanaja inime juya. Areque micuana ecuatsashaquique dyaque casadaque ejuu. Micuana amena enaruqui dyaque casada cuanaque bucha emui juhuaju ecuana dyadi tumbaedyu jubuque. ⁹ Emuita ejuuque ni ecuana Yusura dutyaja jetiedyaque iyahua, arepa ecuana tuja ecuadishaque juya ama bucha. Riyaque yahuaju huaraji cuanajatu iyetayaque dutyaja yacuaju cuetisha bahue, dutyaja peta ishuh. Tumbaedyu ecuana barepaju Yusu tsahuaqui cuanara, riyaque yahua juque ecuita cuanara ecuana petaya. Umaera bacue ecuana ijaribaya jutidya ecuana canerecatiyaju. ¹⁰ Ecuana Cristo mereya baatsutu tuaqueja catyatima cuanaque quisaratiya ecuanapa inimema jadya. Micuana bacue dyaque bahue cabatiya Cristo jaque cabatitsu. Ecuana tunara ecuana casadama baya, micuana casada cabatiyaju. Tunara ecuana bijidamaduraya, micuana bacue tuna muibaya. ¹¹ Riyacama ecuana canerecatiya. Riyaque huecaca ecuana ara ishuh, iji ishuh cuanaju nerecada juya. Ejutuqui siri cuana tsehuedya jutidya ecuana cajututiya. Catsacatsa ecuana ataya, Cristo queja ecatyati baatsu. Tarema ecuana epu cuana tupu anianiniya, Cristoja quisarati cueja juyaque. ¹² Castereya majaca ecuana ecuanaja ebi tsehue mere juya ara ishuh, jutu ishuh jadya cadaditi ishuh. Tunara ijillahuanayaju, ecuanara tuna quemitsaya: “Yusura nenarucue jida”. Tunara nerecaturayaju dutya tuque ecuana iduya etsuje acara tsehue ama. ¹³ Tuna ecuanaja ishuh jidama quisaratiyaju, ecuanara tuna jida tsehue quemitsaya. Yusu adeba baecua cuanara ecuana jiji bucha petae aya; ai eijehuetaque bucha petae tunara ecuana aya.

¹⁴ Jadya rique hueneya, ai micuana bisutura ishuh ama, micuana cuejatsu, huecasha ishuh. Dyaque iyuhueda micuana baya. Ecue ebacua neri buchique micuana. ¹⁵ Ique micuanaja tata buchique, eradya micuana Cristoja quisarati cueja metse ahua tibu. Era micuana tsahuahua tuaqueja catyati ishuh. Tuequedyu micuana umae cuanara tsahuahua Cristo dyaque jida adeba. Arepa tuna jetiama ama bucha, ique peadya micuanaja tata buchique. Jadya tibudya micuana cuejayaque huecashaya. ¹⁶ Ique micuanaja tata buchique juya tibu, ique juya baedyu nejudue. ¹⁷ Jadya tibudya tuque cuadishaya Timoteo. Tuque tuque ecue ebacua buchique. Dyaque iyuhuedaque tuque ecue. Turatu

dyaque jida, tuyu mereya Ecuana Cuatsashaquique. Tura micuana cuejatiya ique eje bucha anie juyaque, ique Cristora iyacuanehua tibu. Ique epu epu cuana tupu Yusuja quisarati ijacabaca ishuh casitatiya cuanaque cuajicuajini juyara, era tuna bahuityaya eje bucha anie Yusuja cuanaque jutaquique. Timoteo jutitsu tura micuana cuejatiya riya cuanaque Yusuja cuanaque era bahuityayaque.

¹⁸ Umae micuana dyaque bahue bucha cabatiya. “Eje bucha jee ni tu juma Pablo ecuana neredara”, jadya datse ni tunajatu inime juya. ¹⁹ Ecuana Cuatsashquiya jadya inime juyaju micuana masadamadya ebatu. Ique bahue eje bucha tume dyaque bahue bucha cabatiya cuanaque quisaratiyaque. Ique cuaatsu tuna nime adebatiya. Nime adebatiya tuna era, yuneridya tunaja Yusuja casa aniyaque, jadya ama juatsu ni tuna quisaratiniyadya jutidya. ²⁰ Yusura ecuana yuneri cuitadya naruyaju camadya ama tuque ecuana tuja quisarati cuejaya, tumebaedya ecuana tuja casa eque aniya cuanaque. ²¹ Micuanara ni Yusuja bijidamaque ajacaya ama, tume micuana batiya cahuaiti tsehue, micuana nereda ara, huaraji ejuta bucha. Micuana ni inime cacuaretiya, ajacaya ni micuana jidamaque, tume jutiya micuana queja micuana casatura ishuh jida inime tsehue. ¿Eje buchique tuque micuana bijida baya? ¿Ecue micuana acui tsehue ati ishuh ni taa, jida inime tsehue micuana casaturati ishuh ni taa?

5

Pablora bisutada cajuchatihuaaju eje bucha bae aishuque cuejacuareque

¹ Bacaya rique ecuana quisarati Corinto juquepa ejeque cuana etataqueja ehuaneeque tsehuedya jutidya jucha juyaque aniya jadya, arepa tumeque ecuita Jesús queja ecatyatique ama bucha. Yusuratu jadique dyaque asicada baya. Butsee Yusu adeba baecua cuanajatu jadya cuita cajuchati ishuh bisu aniya. ² Arepa peadya micuana ducunque dyaque jidama aniyaju baya ama bucha, micuana dyaque jidaque bucha cabatiya. ¡Ecasumitiuque, peya inime, bisu jadya jutidya nejucue! Tumeque ecuita ni cacuaretiya ama inime, necasitatiqereume micuana tsehue Yusu pureama aishu. ³ Arepa micuana era japada baya ama bucha, tuque jadya cajuchatichineque tuque dyaque inime tupuqui aya. Ique tuhua micuana tsehue cuitadya ejuu bucha rique ecue inime juya. Ique Ecuana Cuatsashaqui Jesús cuarequique. Tura ique cuatsashahua tibutu era inime tupuya micuana eje bucha ejuuque. Eratu dyaque jidama ecajuchati baya

tumeque dyaque bisutada cajuchatihuaque. ⁴ Necasitaticue tume cajuchatichineque inime bajeje ishü. Neacue era Ecuana Cuatsashaquija casa eque eauque, ique cuitadya micuana tsehue ejuu bucha. ⁵ Casitatitsu ejitaju neacue: “Ecuana Yusuja cuanara tuque ecuana narujacachine riyaque ecuita, Satanásra eje bucha tuque jucara juya eque amere ishü”. Arepa Satanásra majushaya ama bucha, judirubuquedyatu Yusu queja. Ecuana Cuatsashaqui Jesús junanucahuajutu chachadya netitsuranucabuque. ⁶ Jutaquijudyatu jidama “Ecuana ecuana jida”, jadya casumiti ishü, micuana ducu eje bucha cajuchatie juyaque aniya tibu. ¿Adebaya ama jatsu micuana quisarati: “Riya piji levaduraratu dutya esaca sasanashaya”, jadique? Tumbaedyä micuana peadya jucha aridaradya dutya micuana eyuamaturatillau. ⁷ Neanijacacue jidama micuana icuene anihua bucha. Ecuana israelita cuanara tuque ecuana dutya mara adebaya Yusura ecuanaja baba cuana Egipto juque cuinanashacuaque. Cuinanama jarira tunajatu uhuisha ami tsehue eteriqui pepacuare. Uhuishatu majuhua tuna emajuuju. Ecuana riyaque chine Pascua bacani aishu cabajejetiyaque tuque ecuanaja ijehue bahue juhua pan levadura tsehue ea cuanaque. Peya tuque ecuanaja abahue juhua levadurama nerique. Jadidyatu micuanaja jacataqui dutya jucha, peya cuanaja tumbaedyä cajuchati bijiseri ishü ama. Micuana micuana eiyacuane; beruque ani neijehuecue. Cristotu majuhua, ami quijehuetitsu, ecuana tere baecua ani ishü. ⁸ Cristo ecuana jiteque majuhua tibu neanira tuque pureamatura ishü. Jidamaque inime tupuqui neajacara. Necahuaitishajacara Yusu. Dyaque jida jucara nejura ni ejeque jahue acara tsehue ama. Yusuja biji eque jida jucara nejura. Jadya juatsu tuque ecuana adebaajeya Jesús ecuana jiteque majuhuaque, israelita cuanara uhuisha tuna cuarequi majuhuaque adebaya bucha. Nejacacue beruque, tunara pan levaduraquique arajacacuare bucha.

⁹ Era icuene quirica cuadishachine tsehue micuana cuejachine. “Necacarenetiume caquemitiqeremaque jaraquereya cuana tsehue. Necacarenetiume epuna decadeca arida cuana tsehue. Necacarenetiume ecuita cuana puna puna arida cuana tsehue ni deca cuinetse jucha juya tsehue, ni epuna cuinetse jucha juya tsehue”, jadya micuana cuejachine icuene quirica eque. ¹⁰ Jadya era quirica cuadishachine eque ai Yusu adeba baecua cuanaque tunaja biji eque aniya cuanaque pana jaca neacue, jadya juatsu ama tuque micuanaja quirica jadya cuadishachine. Umaeratu caquemitiqeremaquedyä jutidya jaraquereya. Umaeratu radanityacaradya

jutidya aya ai tunaja ishu. Umaetu chiri juya. Cueya cueya ea cuanaja yacuaju chichucata juyaque tunajatu tunaradya jutidya Yusu jadya ayaque muiya, Yusu Neri cuita camadya emuique. Riyaque yahuaju aniya jari tupu tuque ecuana eje bucha jacataqui ama baya riyaque yahuaju cuanaque. Tuna jaca ishu ecuana riyaque yahua juque cuinanataqui. ¹¹ Aniyatu umae yanacanadya jutidya ecuana tsehuequique jadya juya cuanaque Yusuja inime eque juneniyaque ama. Tuna tuna jara bahue eje tsehuedya jutidya. Tunaratu tunaja ishu cuita camadya ai radanityaajecara aya. Tunaratu muiya yusu cueya cueya ea cuanaque. Catacuariti arida tuna. Enajehue, tupari casadaque jadya tunajatu iji bahue nijuqui juya tupu. Chiri puji tuna. Necacarenetiime jadya anie juya cuana tsehue. Tuna tuna Yusu jaque ecuana jadidya datse juya. Jadya cuana tsehue ni araara cuana ishu necasitatiume.

¹²⁻¹³ Ecuetu cueja, huecasha jadya ataqui ama Jesús queja catyatima cuanaque. “Micuanadya micuana jucha metse”, jadya tuna aya ama. Yusura cuitadya tuna jucha metse babuque, ai era ama. Micuana tsehue casitati bahueque ni jidama juya, micuanaja jadyatu nereda ataqui. “Miquemi jida ama juya”, jadya neacue, Yusu jaquepa jadya juya cuanaque jidama juya cuanaque. Jadya tibudya tume jadya cajuchatie juchineque pacuanuca ama micuanara Yusu pureama ayaju.

6

Jesús queja ecatyati cuanaja jidamaque inime tunaja cuita camadya bajejetaquique

¹ Aniya ni micuanaja inime bajeje ishuque Jesús queja ecatyati cuana tsehue, nequisaratiticue Yusuja cuana tsehue, tunaja micuana jidamaque inime bajeje tsahua ishu. Micuana micuana jadya ama juya. Peya tsehue cahuaitsu micuana cuaya huaraji cuana Yusu adeba baecua cuana queja jutidya inime bajejera. ¿Eje bucha juatsu jatsu micuana bisuya ama jadya juyaque? ² Yusu jaque ecuana. Ejeque huecaca riyaque yahua terehuaju ecuanaradyatu narubuque dutya riyaque yahuaju cuanaque. ¿Adebaya ama jatsu micuana jadique? Jutaqui juajeque huecaca micuanara inime dyaque jidamaque bajejedadibuque tibu, jadya tibu taa tuque micuana iyacua ebajejeudya inime jidama cuitaque ama. ³ Ejeque huecaca ecuana barepaju Yusu tsahuaqui cuanaque naruqui jubuque. Ejeque huecaca micuana barepa juque ecuatashaqui dyaque arida cuanaque cuana naruqui jubuque tibu, jadya tibu taa tuque micuanaja iyacua riyaque yahuaju eje bucha juya cuanaque bajejetaquidya. ⁴ Jutaqui juajepeya tsehue cahuaitsu, necuaume Jesús queja ecatyati

cuanara muibaya ama cuana queja, micuanaja inime jidama cuanaque bajeje ishu. ⁵ Paani micuanaja bisu Yusu adeba baecua cuanaja micuanaja eje tsehue jidama inime aniyaque bajeje ishu. ¿Eje tsunu jatsu micuana aijama ejeque dyaque bahueque? Aniyadya tuque. Eje bucha ataqui ama amadya ni tu ejeque inime bajejequere. ⁶ Jadya ama bucha micuana Jesús queja ecatyati cuana tsehue cahuaitsu micuana cuabahue huaraji cuana queja. Micuanaratu sareya Yusuja ama cuanaque micuanaja inime jidamaque bajeje ishu.

⁷ Micuana cama huaraji cuana queja inime bajeje ishu cacuejati jadyajutu ejitaju juya micuana Yusuja cuanaque bucha ama aniyaque, Yusuja inime eque ama. Jadya nejuume. Peyara jidama ayaju, ¿eje bucha idutaquima jatsutu ejuu cacuarehuanaticarama tsehue? Ejera ai chirihuaju, ¿dyaque jida jatsutu abacatadya jutidya jutaqui ama? ⁸ Micuanara cuitadyatu jidama baya Jesús queja ecatyati cuanaque micuana jidama aqui juhua cuanaque. Ecuana Cuatsashaquira ecuana cuatsashahua ecuana jidama aqui cuanaque jida baishu. Micuana jidama aqui cuanaque huaraji queja dujutsu tuque micuana iyuhue tsehue ama ecana baya. ⁹ Jidama jujacaya amajudya tu ejitaju Yusuja ama cuanaque. Judirubuque amatu Yusu queja tuque enaruqui juhuaju. Neadebacue riyaque. Micuana tacadya jutidya jahue necatiume. Asicada, bisutada jadya inime cadujutiya cuanaque tuna tuaqueja judirubuque ama. Tunaja inime tacadya jutidya Yusu bucha baatsu muiqui cuanaque Yusu neri emuique, tuna tuna tuaqueja ama judirubuque. Caquemitiqueremaque epuna jabaquiquetu Yusu queja judirubuque ama. Deca cuana deca cuinetsedya jutidya jucha jyaque, epuna cuana epuna cuinetsedya jutidya jucha juya cuanaque tuna judirubuque ama Yusu queja. ¹⁰ Tumbaedyatu tuaqueja judirubuque ama chiri, peya jaque ai bijiseriqui cuanaque, nijuqui arida cuanaque, catacuariti arida cuanaque, casada tsehue peya ai secaqui cuanaque jadya. Eje tupu Yusu enaruqui judadihuaju ni ejeque jadya anie jyaquetu tuatsehue ama anidirubuque.

¹¹ Jesús queja catyatima jariju micuana umae jadya anie juhua. Iyacua tuque micuanaja Yusura jucha cuana tillahua. Turadya micuana tujaque amerehua, micuana tuja biji eque ani ishu. Yusura micuana jucha metse ama baya, micuana Ecuana Cuatsashaqui Jesucristo queja catyatihua baatsu. Jadya tura micuana baya, tuja Espíritu cuitadya micuana tsehue tibu.

Ecuanaja dutya ecuita tu Yusu jaque

¹² Ejera cuana ni tuque micuana inime tupuya: “Ique Jesús jaque juya tibu, ataquidya era ai acara ayaque”, jadya ni tuque micuana inime tupuya. Pusha amadya ataquidya tuque ecuanaja Yusura ecuana dutya ai ataquimaque amerehuaque. Jadya ama buchatu aniya umada ecuanaja ishu jidaque ama. Eratu inime tupuya: “Pacananaruti ique ita tacadya jutidya. Ajacaya tuque aïdya jutidya Yusu pureamaturajacaqui juyaque”. Ique Yusu pureamaturajacaqui juyaque tu ique casa secaqui buchique. ¹³ Umaera ni tu inime tupuya: “Arataquidya tuque ecuanaja ejeque earaquidya jutidya Yusu cahuaïtishama. Turadyatu iyahua dutya ara ishu cuanaque ecuanaja ara ishu. Turadya tuque ecuanaja iyahua ecarecani ecuanara arayaque jemi ishu” jadya. Yuneridya. Jadya ama buchatu ejeque huecaca saretanabuque ama ecarecani ni earaqui. Yusura tuque ecuanaja ecuita iyahua, ai ecuana ecuanaja caquemitiqeremaque jaraquere ishu ama. Tuque cameremereti ishu tura ecuana iyahua, tuja Espiritu ecuana tsehue ani ishu. ¹⁴ Arepa ecuana majuya ama bucha, chachadya ecuana aninucaya. Yusuratu emajuque chacha nityatsuranucacuare Ecuana Cuatsashaqui Jesucristo. Tumbaedy a tura ecuana emajuque chacha nityatsuranucabuque tuja casa tsehue.

¹⁵ Jesús queja catyatitsu tuque, ecuanaja dutya ecuita Jesús jaque. Tuja ecuita cuitadya ejuu buchique ecuana. Micuanaratu adebayadya riyaque. Micuanara ni jaraquereya ejeque micuana tsehue caquemitimaque, Yusuratu jidama baya. Eje bucha jipemeretaqui amatu Cristo emetsememereque, epuna decadeca arida tsehue. Ni riy a piji buchiquetu jadya ataqui ama. ¹⁶ Ejeque ecuita epuna deca deca arida tsehue cajipetihua jutu Yusura cuita pidya camadya bucha baya, betadya ecatse cajipetihua tibu. Ehuene tu Yusuja quisarati: “Caquemitihua jutu tatse, Yusura baya peadya camadya bucha”. ¹⁷ Ecuana Cuatsashaqui ya yana equedya aniyaque juatsu, ecuana peadya camadya bucha tuatsehue Yusuja Espiritu eque.

¹⁸ Nejabaume micuanaja caquemitiqeremaque. Peya jucha cuanara tuque micuanaja ecuita yuamaturaya ama, micuanaja caquemitiqeremaque jabatsu juya bucha. Jadya juyaque tuque micuana chiriya Yusu jaque, ecuanaja ecuita Yusu jaque tibu. ¹⁹ Ecuana peadya peadyajudyatu Yusuja Espiritu aniya. Yusuratu tuque cuadishahua ecuanaju ani ishu; tumeque Espiritu tu ecuana peadya peadyaju. Jadya tibutu ecuana jaque ama ecuita; Yusu jaque tume. ²⁰ Yusura ecuana tsuje aridaque quemihua. Jadya tibudya tuque ecuanaja ecuita tsehue Yusu muiba ishuque ataqui.

7

Pablora ecana carequi juishuque cuejacuareque

¹ Iyacua micuana cuejaya quirica cuadishaya patya micuanara ique bacadurachineque. Bacadurachine micuanara ique, “¿Jidadya tu ecuana carequi juishu, aijama ni taa?” Micuana taca canaruti bahueque juatsu, micuana jidadya carema siri ani ishu. ² Jadya ama bucha, eje uma carema cuanaque tuna tuna taca canaruti juya ama. Tunaratu jaraque-reya tunaja caquemitiqueremaque. Jadya jutidya ejuu tibu, deca cuanaja ehuanegue neri paani; epuna cuanaja tumbaedyahaique neri paani. ³⁻⁴ Micuanaja huane cuana ecuitaju atacara juyaju, nejabacuedya. Micuanaja ahue cuanara ecuitaju aishu bijida bayaju, nequenatiume. Micuana ama micuana micuanaja ecuita metseque, epuna ahuequi cuanaque. Micuanaja ecuita tu micuanaja ahue cuanaja emetseneque. Jadya tibudya nequenatiume. Ai micuanara cuita camadya bijida baatsu ama, micuanaja ahue cuanara bijida bayaju camadya. Micuana dyadi micuana micuanaja ecuita metseque amadya, huanequi cuanaque. Micuanaja ecuita tu micuanaja huane cuanaja emetseneque. Jadya tibu tuna ecuitaju atacara juyaju, nejabacuedya, micuanara cuita camadya bijiseritsu ama, micuanaja huane cuanara bijida bayaju camadya. ⁵ Micuanaja ecare cuana tsehue tuque micuanaja ajacataqui amadya cajipetitsuque inime. Peya jaque jabatsu tu amena chiri juya bucha jutidya. Betaradya ni tatse eje uma huecaca cajipetima cuetishacara aya Yusu tsehue quisaratiyaque. Betaradya ni tatse jadya inime tupuya Yusu tsehue quisaratiyaque cajacatibaca ishu, jadique juatsutu jidadya. Cajacatibaca jadya juatsutu junucataquidya icuene juhua bucha. Dyaque tsunuda cuita ni ecitse ecajacatiu, tume tatse Satanásra cajuchatishacara jutidya eau eje tsehuedya jutidya cajipeticara tsehue. Jutaquijudyatu masadamadya cajipetinucataqui Yusuja bijidaque ama eau tibu.

⁶ Casada tsehue ama micuana “Carequi nejucue” jadya aya. “Carequi juishu tu jidadya”, jadya tuque quisarati aya. ⁷ Ique huanema. Ecue ishu taa dyaque jida ejuu dutya micuana ique bae juishu carema siri. Dutya tupu ama ecuana. Umaetu Yusura cuatsashaya: “Miquemi carequi jutaqui ama” jadya. Umaetu Yusura cuatsashaya: “Miquemi carequi jutaqui” jadya. Jadya tsahuae ecuana Yusura tuja biji eque ani ishu amereya.

⁸ Riyaque micuana cuejaya carequi juma jari cuanaque, tumbaedyahai ehuanemaju, eahuemaju jadya cuanaque. “Jidadya tu carema siri ani ishu. Ique bucha, carema neanicue”,

jadya micuana cuejaya. ⁹ Caremara ni micuana cajipetit-suque inime bijiseriya, tume carequidya nejudue. Yusuratu jidadya baya micuana carequi juishu. Dyaque jidatu carequidya jutaqui, eje tsehuedya jutidya cajipeti ebijiseriu tibu.

¹⁰⁻¹¹ Tuequedya ri cacuatsashati aniya carequi cuanaja ishü. Riyaque cacuatsashati ri ecuique ama; Ecuana Cuatsashaqui jaque riya. Huanequi cuanara, neijehueume micuanaja huane cuana. Ahuequi cuanara, neijehueume micuanaja ahue cuana. Epuna ahuequiquetu yahuique tsehue cajacatitsu, caquemitinucataqui ama peya deca tsehue. Dyaque jidatu cajipetinucataqui tuja yahuique tsehue. Jadyatu jutaqui huanequique ahuequique ecatse Jesús queja ecatyatique.

¹² Tuequedya tuque cuejaya Jesús queja ecatyatique, peya bacue catyatima jadique eje bucha jutaquique. Riyaque micuana cuejaya ai Ecuana Cuatsashaquira cuita quisarati acuareque ama; tura ique adebamerehuaque micuana cuejaya. Umae micuana ecaquemiti epuna Jesús queja catyatima tsehue, micuana ecue eatsehuequi cuanaque. Arepa tuque Yusu adeba baecua paju ama bucha, tura ni mi jacacarama ebari aya, ijehueume. ¹³ Tumbaedyä umaepuna cuana Jesús queja ecatyatique deca Yusu adeba baecua tsehue ecaquemitique. Arepa tuque Yusu adeba baecua paju ama bucha, tura jacacarama ebari ayaju, jacaumedya. ¹⁴ Umae deca cuanaja ni tu inime juya: “Ecue ehüane Jesús queja catyatima tibu ni yatse Yusura enaruu ama, ni tura yatse jida tsehue ebau” jadya. Umae epuna cuanaja ni tu inime juya: “Ecue eahue Jesús queja catyatima tibu ni yatse Yusura enaruu ama ni jidaque etyau”. Jadya ama tuque. Mique Yusu jaque juya tibu, Yusurami naruya. Tyayadya turami jidaque, tuque adeba baecuaque, tumbaedyä mique tujaque. Jadique ama juatsu taa tujatu micuanaja bacua cuana enaruu ama; tuque adeba baecua cuanaja ebacua cuanaque ebau bucha tujatu ecana ebau. Jadya ama bucha tujatu ecana jidaque tyaya dutya tumeque etare juque, micuana tujaque juya tibu. ¹⁵ Yusuratu etareju cuanaque dutya tupu nimee anishacara aya. Jutaquiju epuna Yusujara ama yahuique Jesús queja ecatyatique jacacara ayaque juatsu, jacataquidya tuja tuque. Deca Yusujara ama ehüaneque Jesús queja ecatyatique jacacara ayaque juatsu, jacataquidya tuja tuque. Micuana Yusuja cuanara tuque micuanaja casada tsehue iyataqui ama. Eiyau ni micuanara, tume micuana pureama tsehue ama dutya tupu inime tsehue ama eaniu. ¹⁶ Nequijehuetiüme ecaquemitique, Jesús queja ecatyati cuanaque. Micuana nequijehuetiüme, epuna Yusuja cuanaque.

Quijehuetima juatsu tuque micuana micuanaja ahue cuana dyaque Jesús queja catyati ishuhetsahuau. Micuana nequijehuetiime, deca Yusuja cuanaque. Quijehuetima juatsu tuque micuana micuanaja huane cuana Jesús queja catyati ishuhetsahuau.

Yusura eje bucha casa tyahua eque anitaquique

¹⁷ “Jesús queja ique catyatihua tibu, dutya era ai ayaque, eje bucha meree juyaque dutyadya tuque ecue cuaretaqui”, jadyatu umaera inime tupuya, cuji cuita juatsu. A, jadya ama tuque. Eje bucha meree juyaju ni mi Yusura tuja ishuhuarahua, tumbae mereedya jutidya nejuque. Ecuana Cuatsashaquira tuja cuanaque casa tyahua equedya neanicue. Jadya tuque amereya dutya quejaque Jesús queja ecatyati cuanaque. ¹⁸ Jesús queja catyatima jariju ecuita huitu bititubutanahua cuanaque yudijidya ecuita huitu bitietubuque casipitimerenucacara nejuume. Jesús queja catyatimaju ecuita huitu biticatubutima juhua cuanaque tuna catyatitsu catubumeretitaqui ama. ¹⁹ Ecuita huitu biticatubumereti tu dyaque inime metseque juishuque ama, catubumeretimaque tumbaedy, Yusura cuatsashaya equedya juatsuque camadya. ²⁰ “Yusura tuja ishuhuarahua tibu, ique eje bucha meree, juyaque cacuaretitaqui”, jadya inime netupume. Tume cuanaque tuque micuanaja eje bucha cuaretaqui ama, amena Yusu jaque cabatitsu. ²¹ Yusura tuja ishuhuarahuaju umaaja micuanaja micuana metseque anicuaque. Jadique jidama inime ishuhnebaume. Nemerecue micuana metse cuanaque. Jadya ama bucha, micuana metsera ni micuana inajacacara aya, cuinanataquidyatu tuaquejaque, peyaja ishuhmere juatsu chipiru ina ishuh. ²² Metsequi cuanaque tuna tuna eje bucha jucara juya eque jutaqui ama, tuna metsera cuatsashaya eque. Mere puji cuana Ecuana Cuatsashaqui queja catyatihuaju, tura tuna tuque pureamaturaqui amereya. Yusura tuna metsema bucha baya. Mere puji cuana metsema cuanaque bacue ecana eje bucha tuna jucara juya eque juya. Ecuana Cuatsashaqui queja catyatitsu tuna amena tuna eje bucha jucara juya eque jujacaya, tura amereya eque camadya. Yusura tuna Cristo merequique baya. ²³ Tujaque juishu micuana Yusura quemihua. Jadya tibudya micuana tuja biji eque anitaqui, ai riyaque yahuajuja biji eque ama. ²⁴ Yusura micuana tujaque juishu ihuarahuaju, peadya peadyaja tuque micuanaja anihua mere, ecue eatsehuequi cuanaque. Tumeque meredya nejuque. Yusu tu micuana tsehuedya micuana tsahua ishuh.

Pablora eahuemaju cuanaque, carequi juma cuanaque jadya eje bucha jutaquique cuejacuareque

²⁵ Icuene micuanara ecue quirica cuadishachine patya micuanara bacadurachine: “¿Eje bucha tuque ecuana ecuejau carema cuanaque?” jadya. Ecuana Cuatsashaquira cuejaha ama cacuatsashati micuanara bacadurayaque cueja ishu. Era jida adebayaque micuana cuejaya. Ecuana Cuatsashaquique eatsehue dyaque jida juhua; turadya ique mepehua tuque mere ishu. Jadya tibudyatu era cuejayaque ejenetaqui. Nebacacue era cuejayaque. ²⁶ Iyacia ecuana Jesús queja catyatima cuanara nerecaturaya; eje buchadya jucara jadya tunara ecuana amereya. Jadya tibudya era jida adebaya carequi juma cuanaque carema siri ani ishu. ²⁷ Jadya ama bucha “Nequijehuetiame micuanaja huane tsehue”, jadya tuque cuejaya amena carequi cuanaque. “Carequi nejuume”, jadya tuque aya carema jari cuanaque. ²⁸ Huanema cuanaque ni huanequi juya, jucha ama tume, tumbaedy ahuema cuanaque ahuequi juishu. Jadyaratu Yusu cahuaishaya ama ni riyá piji buchique. Jadya ama buchatu caquemitiya cuanara dyaque inime tsapeya earaqui, jutu ishu cuanaque, tuja ehuanquera, ebacua cuanquera jadya sareya cuanaque dadi ishu. Dyaque jidama inimeju micuana nubibuque. Era datse micuana riyaque yahua juque jiteque inime tsape amerecarama aya ni jidama inimeju ishacara.

²⁹ Riyaque micuana cuejacara aya, micuana ecue eatsehuequi cuanaque. Riyaque yahua juque ishuetu masadama tereya. Masadamadya cuanatu Cristo ejunanucau. Jadya tibudya carequi juatsu dyaque cuita inime netsapeume micuanaja etareju cuanaja ishu; Yusu nemerecua. ³⁰ Dyaque cuita inime tupuqui neaume riyaque yahua juque. Pea inime juya cuanara tuna peya inime amerequique camadya inime tupuqui paa ama. Jida pureama tsehue aniya cuanara chine cuana cuita camadya inime tupuqui paa ama. Ai quemi juya cuanara tuna caquemitihuaque cuita camadya inime tupuqui paa ama. ³¹ Riyaque yahua juque ai dyaque tsumequi juya cuanara tumeque camadya inime tupuqui paa ama.

³² Eje buchadya riyaque yahua juque cuita camadya inime tupuqui amerecarama datse micuana aya. Deca caquemitimaque Jesús queja ecatyatiratu Ecuana Cuatsashaquique mere ishuetu camadya inime tupuqui aya. Jesús cuita camadya tujatu pureamaturacara aya. ³³ Deca ecaquemitique Jesús queja ecatyatiratu inime tsapequi aya, ehuanquera, ebacua cuanquera ai sareyaque dadi ishu, tuna naru ishu jadique. Pureamaturacara tujatu ehuanque aya. ³⁴ Jadya

tupue tujatu inime bape bape aya. Ecuana Cuatsashaquique tuna pureamaturacara aya, tumbaedy a ehuanegue. Tumbaedyatu epuna ecaquemitique Jesús queja ecatyatira inime tsapequi aya, tuja yahuique mere, ebacua cuanaque mere, tuja etareju ai ataqui aniyaque jadya. Yahuique cuita camadya tujatu pureamaturacara aya. Epuna caquemitimaque Jesús queja ecatyatira bacue Jesús dyaque inime tupuqui aya. Tujatu aniya emajaca tuque mere ishu.

³⁵ Jadya micuana cuejehua, micuana tsahuacara aya tibu, micuanaja ai ataquima ibeda jadya amere ishu ama. Dyaque jida tuyu datse micuana amerecara aya. Yusuja inime eque cuita micuana amerecara aya. Ecuana Cuatsashaquiju cuita camadya micuana inime tupumerecara aya, ai peya cuanaju ama.

³⁶ Tuequedya tuque hueneya deca, epuna jadya carequi juma jari cuanaja ishu, caquemiti ishu amena equisarati cuanaja ishu. Umae ecuitaratu inime tupuya: “Carequi ni yatse juya ama, tume taa tuque pureamaturaya ama eatsehue caquemiticara juyaque. Amena tuque dyaque cuita bijiseriya epuna jipe ishunque. Dyaque jida yatse carequi jutaquidya”, jadyatu umaera inime tupuya. Jadya inime tupuya cuanajatu ataquidya tunara eje bucha inime tupuyaque. Carequidya ecitse paju. Carequi juatsu tunajatu Yusu cahuaishaya amadya. ³⁷ Peya cuanara bacue inime tupuya: “Eratu tuyudya adebaya yatse carequi juishu ama”. Jadya cuanajatu tunaja tacaquedya jutidya inime caquemiticaramaque. Jadya cuanaratu bijitsuruya ama cajipeti ishunque. Jutaquiju jadique ecuita cuanatu carequi jutaqui amadya tura quemicara ahua tsehue. ³⁸ Caquemiticara juhua tsehue carequi juyaratu jida aya. Carequi juyara amatu dyaque jida aya.

³⁹ Tuequedya micuana cuejanucaya eahuemaju cuanaque eje bucha jutaquique. Yahuique chacha jarijutu epunaja jacataqui ama tuja yahuique. Jida ama tu deca jaca ishu. Yahuique tuja emajuque juatsu, jidadya tu peya tsehue tura bijida baya tsehue carequi juishu. Ecuana Cuatsashaqui queja ecatyati tsehue camadyatu carequi jutaqui. ⁴⁰ Jadya ama bucha ahue majutsu carequi junucayaque ama juatsu tu dyaque jidadya. Ryaquetu era jida baya. Ecuana Cuatsashaqui Espíritu tu eatsehue; jadya tibudya era cuejayaque pana baca neacue.

8

Pablora ecana ai cueya cueya cuanaja yacuaju eiyaque erami ara ishunque cuejacuareque

¹ Quirica cuadishaya patya micuanara bacadurachine: “¿Jidadya tu cueya cueya cuanaja yacuaju iyahuaque erami ara ishu?” jadya. Yuneridya tuque ecuana dutyara jujeri adebaya jida eje bucha atae jida tuyuque ataquique. Jadya ama bucha dyaque inime metseque bucha necabatira ama. Iyuhueda tsehue dutya necabatira. Peya cuana tsehue iyuhueda cabatitsu ecuana ecatsahuatiu Yusuja biji eque anijaje ishu. ² Ni ejera buchiquetu pana adeba aya ama Yusuja eje buchique dutya bijidaque. Jutaquiju ecuana cuji eju: “Ecuannaratu pana adeba aya Yusuja bijidaque”, jadya juyaque. ³ Tuque dyaque iyuhueda baqui cuanaquetu Yusura aya: “Riya cuanaque ri ecue cuanaque. Adebaya rena era”.

⁴ Jutaquiju iyacua micuana cuejaya yusupa ejuu jadya cuanaja yacuaju eiyaque erami eje bucha ataquique. Adebayadya ecuana peadya Yusu Neri camadya. Aijamatu peya yusu cuana. Arepa tunara cueya cueya eaquepa yusu jadya aya ama bucha, yuneri cuitadyatu aijama peya yusu ejuuque. ⁵ Umadara Yusu Neri adebaya ama cuannaratu jetiama yusu cuana aniya bucha adebaya. Tunajatu inime juya jetiama ecuana cuatsashaquique aniya bucha. Tunajatu inime juya tume cuanaque yusu cuana riyaque yahuaaju, barepaju jadya aniya bucha. ⁶ Ecuana bacue bahue peadya Yusu camadya aniyaque. Tuque camadya tuque ecuanaja Etata. Turatu iyahua dutya ai aniyaque. Ecuana ecuana aniya, tuque adeba, mere jadya aishu. Peadya camadyatu aniya Ecuana Cuatsashaquique; tuquetu Jesucristo. Tuque equedyatu dutya iyatanahua. Tuque eque ademedya ecuana aniya.

⁷ Jesús queja umae ecatyati cuannaratu pana adeba ama jari aya peya yusu cuana aijamaque. Icuene tuna dyaque ecabahueneti juhua ai cueya cueya cuana mui, Yusu neri eata bucha. Jadya tibu tuna iyacua ai cueya cueya cuana cuatsaqui earaqui eiyaque aratsu tunaja inime juya: “Riyaque erami ri ai cueya cueya cuana ecuanara muijacadua cuatsaqui eiyaque. Aratsu taa ecuana yudijidya mui anucaya bucha ejuu”, jadya tunajatu inime tupuya. Adebanneriya ama tunajatu jidaque, jidamaque jadique. Casadama bucha jutidya tuna cabatiya. Tunaja arataquimaque cuana arahua bucha cabatitsu, tuna cajuchatihua bucha cabatiya. ⁸ Neadebacue riyaque. Yusuratu jidama ama inime baya ecuanara tumeque erami arayaju, jadya ama juatsu araya amaju. Cueya cueya cuana cuatsaqui eiyaque erami arahua amaju ecuana Yusura baya ama, tumeque erami araya ama cuanaque dyaque jida ama.

⁹ Bahuedya micuana tumeque erami aratsu ecuana Yusu cahuaitishayaque ama. Necannaruticue tume cuanaque

aratsu. Peya cuana neyuamaturaume, tunara arataqui ama bayaque aratsu. Necajuchatishaume Yusuja quisarati pana adeba aya ama jari cuanaque. ¹⁰ Bahuedya micuana yusupa ejuu jadya cuatsaqui cuanaja eiyaque erami arataquique. Jadya juatsu micuana nubiya ai cueya cueya cuana eaque aniyaju. Tuhua nubitsu tuque micuana araya tumeque erami yusupa ejuu jadya cuanaque cuatsaqui eiyaque. Micuanara tumeque erami arayaju ni ecuetiu ejeque Jesús queja ecatyatique. Ebau tura micuana tumeque erami ara juyaju. Turatu eje bucha arataqui ama baya tumeque erami. Jadya ama buchatu micuanara araya baatsu tuja inime ejuu: “Era dyadi paaradya” jadya. Tuja ishü tu eje bucha arataqui ama yusu neri ama cuana aniya jari bucha tujatu inime juya. ¹¹ Tura ni tumeque erami araya, ecajuchatitu cabatiya. Arayaque tuque micuana adebaya ama cajuchatiyaque. Jadya ama bucha micuana peya ecajuchati cabatishaya, tura mubayaque micuanara aramerehua tibu. Micuana tsehuequique tuque micuanaja. Cristotu majuhua tuque jiteque. Tuquetu amena jida tsehue ama aniya, tura micuana eje bucha juyaju bahua tibu. ¹² Tumeque ecuitara ni cajuchati baya erami ara, micuanara araya baatsudya jutidya ni tu araya, tumetu micuanaradya jutidya micuana tsehuequique yuamaturaya. Tuque yuamaturayaju, Cristora micuana jucha arida baya. ¹³ Jutaquiju tuque ecue cajuchatishataqui ama eatsehuequi cuanaque. Tunara ni cajuchati erami ara baya, jutaquiju tuque ecue arataqui amadya tuque, tuna ecajuchatishau tibu.

9

Arepa Pablo Cristoja ecuadishaque juhua ama buchatu tuja biji eque ama jucuaereque

¹ Ique Cristoja ecuadishaque. Jadya tibudyatu era eaudya era eje bucha jida bayaque. Jadya ama bucha ique eje bucha jucara juya eque tuque ecue eatsehuequi cuanaque ecajuchatishau. Jadique juatsu, paajaca era cuitadya eje buchique acara ayaque, ecue ecana cajuchatisha ishü ama. Icuenetu era bahua Ecuana Cuatsashaqui Jesús. Jadyajudyatu ejitaju ique tuja ecuadishaque. Era Jesúsja quisarati cuejahuaju, micuana tuaqueja catyatihua. Tume tuque micuanaja ani cuaretanahua. Jadyajutu ejitajudya ique Ecuana Cuatsashaqui ique ecuadishaque. ² Umaeratu ejeneya ama ique Cristoja ecuadishaque. Micuanara bacue adebaya ique tuja ecuadishaque. Iyacua micuana aniya Cristoja biji eque,

era Yusuja quisarati cuejahua tibu. Micuanaja ani cacuareti-hua tibu, tuhuadyatu ejitaju ique Cristora tuque cuarequi cuadishahuaque.

³ Peyara ecue ishü quisarati ayaju, ita tacadya ique catachitiya. “Ique Cristoja ecuadishaque”, jadya tuna era quemit-saya. ⁴ Ique Yusuja quisarati cuejara jeyaju tyataquidya micuanaja ique tsujema ara ishüque, emajaca tahui ishüque jadya. ⁵ Peya cuana Cristoja ecuadisha cuanaque tuja quisarati cuejara cuayaque tunajatu ehüane cuanaque duju bahue Jesús queja ecatyatique. Jadyatu juya Pedro, tumebaedya Ecuana Cuatsashaqui tsehuequi cuanaque. Ique ni huanequi ejuu, ecue ehüane Jesús queja ecatyatique ejuu, eaquereniudya tuque era. ⁶ ¿Micuanajatu inime juya ique, Bernabé yatseja cuita camadya yatsera ai sareya cuanaque Yusu mereya tupu ai tyataqui ama bucha? ⁷ Sudaru cuanaratu inaya etsujequi. Yatseja ecuari mere juyaque tuna tsujema tyatanaya earaqui, ejutuqui. Tee mere juya cuanaratu tunaja tee cuhuatiyaque araya, uhuayaque tsuje. Uhuisha naru juya cuanaja atsuna tisiyaque ijitaqui, naruya tsuje.

⁸ Jadya eque tu tuyudya ecuana earaqui cuana, ai ecuanara sareya cuanaque jadya tyata ishü, Yusuja quisarati cuejaya tsuje. Jadyatu inime tupuya ecuitara jipidya ama; ehüene tu Yusura Moisés cacuatsashati huenequereju. ⁹ “Trigo biti tacamereyaque micue juye huimumu risiüme. Paara ara juye mere juya tibu”, jadyatu Yusu juhua Moisés eque. Ecuana jadya cuejae ayaquetu Yusura juye camadya ama inime tupuqui ahua. ¹⁰ Turatu ecuana inime tupuqui ayaquedya jadya ahua. Yusuja quisarati cueja juya cuanaque tuna tsujetyataquidya jadya juyaque tujatu jadya quisarati ahua. Riyaque yahuaju tuque ecuana tee cuana uhuaya; tuhua uhuayaque aradadiyaque adebatsu ecuana mere juya. ¹¹ Tee uhua juya cuanaratu uhuatsu ecaca juhujaju piisidya baya amena earaqui. Tumebaedya micuana ecuanara tsahuahua, Yusuja Espíritu eque micuana ani ishü. Jadya eque micuanaja ecuana tsahuataqui ecuanara riyaque yahuaju ai sareya tsehue. ¹² Peya cuanara micuana Yusuja quisarati cuejahua tuque micuana tyahua tunara ai sareyaque. Tuyudya tu jadique. Dyaque tuyu tu micuanaja ecuana ai ecuanara sareyaque tyaiüshu, ecuanara micuana icuene cuita Jesús queja catyati ishü tsahuahua tibu.

Jadya ama bucha micuana ecuanara ni eje tupu buchique bacahua ama tsujema ai ecuanara sareya cuanaque, arepa micuanaja ecuana tyataqui ama bucha. Ecuana ecuana mere juhua ecuanara ai sareyaque cadaditi ishü. “Ecuana ni micuana ebacau etsujequi, tume tuque micuana Cristoja

quisarati bacacarama eau”, jadya tuque ecuanaja inime juhua. Jadya tibudya micuana ecuanara bacaya ama ni ai. ¹³ Yusuja etareju mere juya cuanaque tuna araaraya ecuita cuanara Yusuja ishü beya cuana tsehue. Uu cuana pahuama jarijudyatu pae cuanara riya piji tuhuaque eramidya inaya. Micuanaratu adebayadya riyaque. ¹⁴ Jadidyatu Ecuan Cuatsashaquira cuatsashahua: “Ecue quisarati cueja juya cuanajatu inataquidya etsujequi, ai tunara sareya cuanaque cadaditi ishü”, jadyatu Cristora cuatsashacuare.

¹⁵ Arepa ique Yusuja quisarati cueja juya tupu micuana queja casada tsehue ai era sareya cuanaque ecatyameretiü ama bucha, era micuana bacahua ama ni ai buchique. Riyaque quirica cuadishayaque micuana bacaya ama ni ai. Eratu Yusu mereya pureama tsehue micuana casada tsehue bacamaque. Areque emajuu jutidya ique, micuana queja casada tsehue chipiru yanacana catyamereti jumaquedya. ¹⁶ Eratu Cristoja quisarati cuejaya, peya cuanaja ecue ishü jida inime tupu ishü ama. Ecue cuejataqui juya tibu tuque cuejaya, Cristora cuatsashahua tibu. ¡Nerecapane ique, era Cristoja quisarati cuejayaque ama juatsu! ¹⁷ Ita taca ni ique riyaque mere catyatiquena juhua, tume taa tu tuyudya ecue etsujequi inataqui ejuu, quisarati cuejaya tsuje. Yusura ique mepehua, peya cuana Cristoja quisarati cueja ishü. Tumeque mere aatsutu era aya tura amerehuaque. Ecue aishuque tibu tuque ayadya. ¹⁸ Ique jadya tibu, ¿ai etsujequi jatsu tuque inaya? Cristoja quisarati cueja juyaque tuna tsuje bacaya ama ique quisaratiyaju bacaqui cuanaque, arepa ecana tuyudya tsuje bacataqui ama bucha. Ique pureama juya jadya juyaque. Ique pureama cabatiyaque tu ecue etsujequi buchique.

¹⁹ Ni ejeque ecuitara ama ique casada tsehue peya cuana cuejamerehua Cristoja quisarati. Ecue inime taca eque tuque aya, dutyaja jida ishü. Jesucristo queja ecana eje uma catyati ishü tuque jadya aya. ²⁰ Israelita cuana Cristoja quisarati cueja juyaque ique tunaja bahue eque juya, tunaja era quisarati cuejayaque bacacara aishü. Ique casada tsehue ama eamere, jadya ama bucha, Moisésra cuatsashahua eque aniya, tunaja bahue eque. Tuna tsehueju ique jadya juya, tuna Jesús queja catyatisha ishü. ²¹ Tumbae nucadya juya. Israelita ama cuanaque Cristoja quisarati cueja juyaque tunaja bahue equedya ique juya. Tuna Moisésra cuatsashahua eque ama aniya tibu, ique tumbaedyä juya, tuna Jesús queja catyati ishü tsahua ishü. Arepa ique tuna tsehueju Moisésra cuatsashahua eque ama juya ama bucha, jujacaya amadya ique Yusuja biji eque. Cristora cuatsashahua eque ique juya.

²² Yusuja biji eque juishuque pana adeba aya ama jari cuana tsehueju amereya ama tuna tunara cajuchati adebayaque jari. Jadya ique juya, tuna tunaja Yusuja biji eque ani pana adeba amere ishu. Jadya eque ique eje tsehueju tuna juya equedya ique juya, eje bucha equedya tuna Jesús queja caty-atisha ishu.

²³ Jadya ique juya, riyaque yahuaaju cuanaque cueja ishu, Jesús queja catyatiyaju Yusura ecana Ijahua quejaque inajacamere ishu. Yusuja quisarati jidaque cuejayaque tu era cuejaya cuanaja camadya jida ishu ama, ecue ishu tumbaedy. ²⁴ Arepa umada tsajajayaque aniya ama bucha, icuene junati ishu cacasatiyara cuita camadyatu inaya etsujequi tyatayaque. Micuana necacasaticue Yusuja biji eque ani ishu, Yusura tuja cuanaque jidaque tyayaque micuanaja dyadi ina ishu. ²⁵ Peya cuana tsehue cabareti ishu ijahue juishu cabahuityatiya cuanaratu ijehueya dutya tuque perequi ejuu cuanaque. Jadya tuna juya, ejaqui epicaque masadama manunuyaque tyata ishu. Ecuana bacue dutya huecaca cacasatiya Cristoja biji eque ani ishu. Ejeque huecaca ecuana tuaqueja judirubuque ni eje tupu tuque jaca ishu ama. Tura ecuana jidaque tyayaque tu tere ishuque ama. ²⁶ Tsajajayaquetu tuyu eje tupu tuque tsajajaya tupu icuene juti ishu cacasatiya. Tuyu ama ni tsajajaya, tumetu yanacanadya tsajajahua. Ebi tsehue catiyaratu tuatsehue catiyaque jida ebi tyaya ijehuebutya ishu. Jida ama ni tu ebi tsehue aya, icuayaya jutidya ni tura, tumetu yanacanadya catiya. Ique tumbaedyaca cacasatiya Jesúsja biji eque ani ishu, Yusu yanacana meree eau tibu. ²⁷ Jutaquiju ique pacacasati Yusura cuatsashaya eque ani ishu. Pajaca dutya ique cajuchatishaquique. Pabijiserijaca era peya huecaca jidama juishuque bijiseri bahueque. Tsahuahua tuque amena eje uma ecuita Jesús queja catyati, tuna Yusu queja judiru ishu. Era cuitadya umae eje bucha anie juishuque cuejahua ama bucha, bisutapane ique juma, Jesúsra “Miquemi ecue biji ama anihua”, jadya ahuaju.

10

Yusu neri camadya ecuanaja muitaquique

¹ Neadebacue ecuanaja baba cuana Moisésra dujuquare patya jucuaque, ecue eatsehuequi cuanaque. Dutya ecuita Egipto juque cuinanacuare cuanaque tuna Yusura huidujuquare tscada anitaya cuana eque etiqui huani bucha eque. Dutyara tunajatu Bei Pudedaque riquecuare ediji urada eque. ² Etiqui huani bae eque cahuidujumeretitsu, Bei Pudeda eque carequetitsu tuna Moisésra cuatsashaya eque

jucuaré, ecuaná cutsameretitsu Cristora cuatsashaya eque juya bucha. ³ Dutyara tunajatu aracuare Yusura barepa juque cuadishayaque. Tumeque earaquitu maná bacani jucuaré. ⁴ Dutyara tunajatu ijicuaré Yusura tyayaque. Turadyatu tumu ebari juque ena cuinanashacuare. Cristotu tuhua jucuaré, tuna ijira emajuuju. ⁵ Arepa Yusu tuna tsehue dyaque jida ama bucha, dutya jujeri tuna tura cuatsashaya eque ama jucuaré. Tuna tsehue dyaque ecahuaiti juya tibu tujatu ecana majushahua. Anitaya ama cuana eque diruyaque tuna dutya jujeri majuhua.

⁶ Tuna jadya juhuaque bahue juatsu tuque ecuaná adebaya, iyacua Yusuja yana equedya ama juya cuanaque, tuna juhua baedya ejuuque. Bijiseritaqui ama tuque ecuanaja tunara jidamaque bijiserihuaque. ⁷ Muitaqui ama tuque ecuanaja ai cueya cueya ea cuanaque. Umae israelita cuanatu Yusu Neri muijacatsu ai cueya cueya cuana catihua tumeque muiyaque chine juishu. Jadya juhuaque tu Yusuja quisarati ehue: “Cueya cueya eaja yacuaju tuna anibutehua, araara ijiji jadya juishu. Araara amena juatsu tuna jahue catibutihua. Jadya tuna chine jubahue jucuaré cueya cueya cuana muiyaque”. ⁸ Ejeque ecuanaja caquemitiqueremaque tuque ecuaná jaraqueretaqui ama, israelita cuana juhua bucha. Umae tuna anihua peyaja ehuanéque tsehue, peyaja yahuique tsehue jadya. Jadya juatsu tunajatu Yusu cahuaishahua. Peadya huecacaju tuna Yusura jetiama majushahua. Beta tunca quimisha earacana mil tuna majucuaré tumeque huecaca. ⁹ “Ecuana Cuatsashaquique yume cahuaítí ecuaná tsehue juya ama tibu, nejuradya eje buchique jidama ecuanara acara ayaque, tura ecuaná nrecaturaya ama tibu”, jadya tuque ecuanaja inime tuputaqui ama. Israelita cuanara jadya inime tupuhua jutu Yusu cahuaishahua tuna tsehue. Jadya cahuaítie juatsu tujatu cuadishahua bacua cuana dyaque ujeda cuanaque, tuque ijacabaca baecua cuanaque carubare ishu. Jetiama tuna majuhua tume cuanara abarehuaju. ¹⁰ “Yusutu jidama”, jadya quisarati neaume, ni riya piji buchique. Umae israelita cuanatu Yusuja ishu béru quisaratihua. Tuna jadya juhua jutu Yusura barepa juque tuque tsahuaquique cuadishacuare tuna iye ishu.

¹¹ Jadyatu jucuaré ecuanaja baba cuana, ecuaná iyacua jadya tuna jucuaré jadya juishu, ecuaná ecuanaja baba cuana juhua bae juishu ama. Ehuene tu ecuaná adebamere ishu, Yusura cuatsashayaque ama aatsu ecuaná dyadi jadya ejuuju. Yahuatú masadama terebuque. Jadya tibudya ecuaná ecuanaja baba cuana anihua bae anitaqui ama.

Ecuana Cuatsashaqui jaque jadya ama bucha ijahua cuana jaque jadya. Araara, ijiji jadya ni ecuana ejuu tuna ijahua cuana mui juyaque chine jutayaju, jadya juya ama bucha ecuana araara ijiji jadya ejunucáu Ecuana Cuatsashaqui majuhuaque adebayaque, jadya juyaque tuque ecuana muicara aya ijahua cuana, Jesús jadya. ¡Eje bucha jadya jutaqui ama tuque! Jadya juyaque ecuana ecuana tacadya jutidya cayuamatiya; Jesús queja nimee cuita camadya jujacaya. ²² Ecuana Cuatsashaquique ni ecuana muijacaya, ijahua cuana mui ishu, tume tuque ecuana cahuaitishaya Jesús ecuana tsehue. ¿Cahuaitishacara ni taa tuque ecuana Yusu aya? ¿Tuque bucha dyaque casada ni taa ecuana?

Peya tsahua ishuque ataquique

²³ “Cristo jaque tibu, tuque ecuanaja ataqui eje buchiquedya jutidya”, jadyatu umae juya, cuji ebari cuita juatsu. “Jadya ama bucha dutya ama tu jida ecuanaja ishu”, jadya tuque quemitsaya. “Ataquidya tuque ecuanaja ecuanara acará ayaque”, jadya tuna juya. “Jadya ama buchatu aniya ecuana Yusuja biji equé ama aniaje ishuque pana adeba eaajeuque. Neara ama tume cuanaque, arepa ataqui amaque paju ama bucha”, jadya tuque quemitsaya. ²⁴ Ecuanara peadya peadyara ecuanaja ishu cuita camadya inime netupura ama. Peyaja jida ishuque netupunucaradya.

²⁵ Icuene cuita micuana cuejaya erami mercado juque catyati eaque arataquique. Arepa jetiama erami cueya cueya cuanaja yacuaju catyati ishuque mercadoju eiya ama bucha, tuhuaque erami quemitsu, inime tupuqui neaume ejuque jadique. Quemitsu nearacuedya. “¿Mui ishuque cueya cueya cuanaja yacuaju eiyaque riya, aama ni taa?” jadya bacadurataqui ama tuna. ²⁶ “Ecuana Cuatsashaqui jaquedya tu dutya yahua, dutya tuhua ai aniyaque”. Turadyatu iyahua dutya earaqui ecuanaja jida ishu.

²⁷ Jesús queja catyatimara ni micuana tuja etareju araara ishu cuejaya, cuacara juatsu, necuacue. Nearaticue tura araquereyaque. Bape inime tupuma nearacue. “¿Riyaque erami ri cueya cueya cuanaja yacuaju eiyaque, aijama ni taa?” jadya nebacaduraume micuana mihuaquique.

²⁸⁻²⁹ Ejeque cuana ni tuhua ejuu Jesúsja quisarati pana adeba ama ayaque, arepa tuque Jesús queja ecatyati ama bucha. Tura ni micuana aya: “Riyaque erami ri cueya cueya cuana etyaque”, tura jadya ayaque juatsu, nearaume. Nearaume ai micuana cuita baecua juatsu ama, peya jidama inime etupumereuju jutidya. Micuana micuana bahuedya aratsu eje bucha juyaque; peyaja bacue inime eje bucha ejuu bucha. Micuanara araya baatsu tujatu earaudya. Tura

ni araya, tumetu ecajuchati cabatiya. Jutaquiju nearaume, tuque ecajuchatiuju tsahua ishu.

Arepa eradya arataqui adebaya ama bucha, paara amadya era, era aratsu peya ecajuchatishau tibu. ³⁰ Eratu Yusu ahua: “Yusurupai mira ique riyaque erami tyahua tibu”, jadya ama bucha, peya cuana ni jidama quisaratiya ecuanara arahua baatsu, jutaquiju nearajacara, tuna, ecuanara Yusu yusurupai ahuaque arahua baatsu, jidama equisaratiu tibu.

³¹ Yusu emuita paju micuana eje bucha anie juya eque. Nemuicue Yusu, micuanara araya, ijiya eque, dutya micuana eje bucha juya cuana eque. ³² Jida Yusuja biji eque neanicue dutyara bayaju. Jadya anie nejucue ejeque ecuita, israelita cuana, israelita ama cuanaque Jesús queja catyatisha ishu. Jadya anie nejucue, Yusuja cuanaque Yusu pureamaturayaque aniaje ishu. Jadya tsehue tuque micuana cahuaitishaya ama ni ejeque. ³³ Ique aniya bae neanicue. Dutya ique eje bucha juya eque tuque dutyaja ishu jidaque acara aya. Ecue jida ishunque peadya camadya ama tuque inime tupuqui aya, peya cuanaja ishu tumbaedy. Jadya anie juya, peya cuana Jesús queja catyatisha ishu.

11

¹ Ique Cristo anihua bucha anie jucara juhua; jadya tibu ique aniya bucha anie jucara nejucue.

Epuna ahuequique yahuiquera cuatsashaya eque juishuque

² Eje bucha anie jida juishuque adebataquima baatsu, micuanara ique bacadurajacaya ama, ecue micuana cueja ishu. Eje bucha anie juishuque era micuana cuejaya eque micuana anijacaya ama. Jadique tu dyaque jida. ³ Jadya ama bucha aniyatu era micuana huecashacara ayaque. Epunatu yahuiquera cuatsashaya eque jutaqui. Tumbaedyatu dutya deca cuana Cristora cuatsashaya eque jutaqui, Cristo Etataque Yusura cuatsashaya eque juhua bucha. ⁴ Deca cuana dutyaja yacuaju Yusu tsehue quisaratiyaque, tuna Yusuja quisarati cueja juyaque, jututaqui ama tunajatu iyucaju ni ai. Tunara ni iyucaju ai jutuya dutyaja yacuaju Yusu mui juyaque, tume tunajatu Cristo muiya ama. ⁵ Epuna cuana camadyatu iyuca caramatitaqui casitatiya cuanaju. Tuna dutyaja yacuaju Yusu tsehue quisaratiyaque, Yusuja quisarati peya cuana cueja juyaquetu epuna cuana iyuca caramatitaqui. Jadya juyaque tuna ejitaju juya amena tuna yahuiqueja cuatsasha ishunque. Tuna ni iyuca caramatiya ama Yusu mui juya tupu, tume tunajatu yahuique muibaya ama. Tuna iyuca caramatiyaque ama juatsu tuna epuna cuana bisutadaque eshu eatillaque juneniyaque bucha juya.

⁶ Umae epunara ni inime tupuya: “Peya cuana tsehue Yusu mui ishu casitatiyaque ique iyuca caramatiya ama”, jutaquiju tumeque epuna pana catubuti paju etsaru, jadya ama juatsu pana cajeretillati paju iyuca juque etsaru. Bisutada ni tu adebaya eshu pupi catimere ishu, inime ni tuja juya; “Eshu pupi caatillameretiya ama”, jutaquiju iyuca pacaramati Yusu mui ishu peya cuana tsehue casitatiyaque.

⁷ Yusura icueneque deca iyatsu tujatu ahua dutya eiya cuanaja huaraji juishu. Yusu Dutya Cuatsashaquique juya tibu, jadidyatu iyahua deca cuana peya cuana naru ishu, tura cuatsashaya eque juishu. Jadya tibudyatu dutyaja yacuaju Yusu muiyaque, deca cuana iyuca caramatitaqui ama. Icueneque epuna iyatsu tujatu yahuiquera cuatsashaya eque amerehua. Jadya tibudyatu dutyaja yacuaju Yusu mui juyaque, epuna cuana iyuca caramatitaqui. ⁸⁻⁹ Decatu Yusura icuene iyahua; tuequedya tujatu icueneque epuna iyahua deca iyametse ahuaaja jida ishu. Adán iyametseque deca ejitaju ayaquetu Yusura epunaja tsehue ama cueyanehua. Eva iyametseque epuna iyayaquetu Yusura deca juque quemihua epuna cueyane ishu. ¹⁰ Jadya tibudyatu Jesús queja ecatyati cuanaque tuque mui ishu casitatiyaju epuna cuana iyuca caramatitaqui, barepaju Yusu tsahuaqui cuanara ecuana petaya tibu. Epuna cuanatu iyuca caramatitaqui, tuna yahue cuanaquera cuatsashaya eque juyaque cabamereti ishu. ¹¹ Jadya ama buchatu Ecuana Cuatsashaquira deca, epuna jadya iyahua catsahuati ishu. ¹² Yahua iyatanahua equequetu epuna iyametseque deca iyametse eque cueyanetanahua. Jadya equetu tuequequedya deca cuana epuna eque ejitaju juetibeya. Yusu tu Dutya Iyaquique.

¹³ ¿Eje bucha micuana inime tupuya jadyaju? ¿Tuyudya ni taa tu epuna cuana dutyaja yacuaju Yusu muiyaque iyuca caramatima juishu? ¡Aijama! ¡Jadya ama tuque! ¹⁴ Ecuana cuitadyatu adebaya deca cuana tsaru baruda jutaquique ama. Bisutada tu deca cuana tsaru baruda juishu, epunadya cabaticara ecana juya tibu. ¹⁵ Epuna cuana tuque ecuana tsaru barudaju, jida piji baya. Epuna ni tsaru baruda, tumetu iyuca ecaramati buchadya. ¹⁶ Umae cuanaja ni tu inime juya jadidya tuque jadya ama. Umaeja ni tuque micuanaja inime juya epuna cuanatu dutyaja yacuaju Yusu mui juyaque iyuca caramatitaqui ama jadya. Era micuana cuejaya jadya: “Caramatitaquidya tuna iyuca; riyaque tu tuyu”. Tumbaedyatu dutya queja aniya cuanaque tuequedya jubahue Yusuja quisarati cuejayaque baca ishu casitati bahue cuanaque.

Corintoju cuanaque Jesús majuhuaque adeba ishu casitatitsu jidamaque chine bucha jutidya jucuaque

17 Iyacua micuana cuejaya Yusu mui ishu casitatitsu micuana eje bucha jutaquique. Yusu pureama aishu eca-sitatita bucha ama micuana juya. Casitatitsu, Jesús queja catyatiaje ishu peya cuana tsehue dyaque catsahuatiaje-ta-quique, micuana peya cuana tsehue cajuchatiajeyadya ju-tidya. 18 Corintoju cuanaque patu Yusu mui ishu casitatitsu cati cati jutidya jubareya. Cajaquetibareya patuna. Yuner-ique quisaratidya ni tuque bacaya. 19 Micuanaja ni tu inime juya: “Jidadya tu ecuana cajaquetibare ishu. Jadya cajaque-tibareyajudyatu adebataqui ejeque ecuana Yusuja biji eque aniyaque, ejeque Yusuja biji eque ama aniyaque jadique”, jadya ni tuque micuana cuji cuita juatsu inime tupuya. Yusu-jatu jadique bijidama peya cuare tuja cuanaque, tuja cuanaque cuare nucadya dyaque inimequi bucha cabati ishu. 20 Casitatitsu micuana, “Araaraya ecuana Ecuana Cuat-sashaquique majuhuaque adeba ishu”, jadya datse micuana jubahue. Jadya inime tsehue ama micuana casitatiya araara ishu cuita camadya. 21 Ai aniyaque dutya tuhua cuana tse-hue dutya tupu ecajaquetibareuque, araara ishu micuana cajaquetibareya. Micuana cabetihuaque cama micuana arabareya. Umae bacue arama juya, aijama tunaja ai cadu-juti ishuque juya tibu. Umae jequeya tupu araaraya, nijuqui juya tupu ijijiyi jadya juyaju. Dutyaja tupu ama tuque micuanaja dutya ai aniya. 22 Tuyu ama cuita micuana juya. Aracara juatsu, nearaaracue, neijijicue icuene micuanaja etareju. Micuana jadya araarae juya cuanaque tuyu ama micuana. Jadya juyaque tuque micuana bijidamaduraya umae cuana Yusu mui ishu casitatiya cuanaque. Bisuturaya tuque micuana nrecada aima cuanaque. Ecue inime equetu era dyaque jidama baya micuana casitatiya cuanaque jadya juyaque. “Dyaque jida micuana juya”, jadya micuana ataqui ama baya, “Ecajuchati micuana” jadya camadya micuana ecue ataqui.

Jesúsra ecuana tuque majuhuaque adeba ishu cuatsashahuaque

(Mt 26.26-29; Mr 14.22-25; Lc 22.19-20)

23 Ecuana Cuatsashaquira cuitadyatu quisarati iyahua eje bucha adebae ecuanaja tuque majuhuaque ataquique. Tura cuitadya bahue amerehua, era micuana icuene cue-jachineque tuque majuhuaque adeba ishuque. Tumeque chineju, Jesús tuque ujeu baqui cuana queja inamere-tanama jarijutu tuque tura mepecuare cuana tsehue ec-asitati jucuaire. Tumeque meta araarayaque tujatu pan inacuaire. 24 Pan inatsu tujatu “Yusurupai mique aya, Tata”, jadya acuare. Yusurupai jadya aatsu tujatu pan

cuesicuare. Cuesitsu tujatu acuare tuatsehue anibareya cuanaque: “Riyaque rique ecue ecuita, micuana jiteque maju ishucatyatiyaque. Micuana jadya araarae juyaque, neadebacue ique micuana jiteque majuhuaque”, jadya patujatu ecana acuare.²⁵ Araara amena juatsutu Jesúsra canecu juque uva nacaca esasanashaque inanucacuare. Canecu inatsu tujatu ecana acuare: “Riyaque rique ecue ami, micuana jiteque quijehuetiyaque. Ique ecue ami quijehuetitsu majuhujutu Yusura iyaya iyacuaque inime tuaqueja judiru ishucue. Jadya jujacama juyaque neadebacue ique micuana jiteque ami quijehuetitsu majuyaque”, jadyapa tuna Jesúsra acuare. Jadya ique Ecuana Cuatsashaquira bahue amerehua.²⁶ Pan ara, uva nacaca iji jadique chine jujacama juyaque tu “Ique Cuatsashaquiquetu majuhua ique jiteque” jadique cacuejatiyaque. Jadya ecuana jutaquí tuque junanucaya tupu.

Jesús majuhuaque adebayaque eje bucha jutaquique

²⁷ Tuque majuhuaque adebayaque ni ecuana muiya ama Ecuana Cuatsashaquique, cajuchatiya jutidya ecuana tuatsehue. Muiya ama ni Ecuana Cuatsashaquique pan arayaque jadya ishucue ijiaque jadya juyaque tu jadique buchique jutidya: “Ératu jidama ama inime baya Cristo ique jiteque majuhuaque; eratu jidama ama inime baya tuque ique jiteque ami quijehuetihuaque”.²⁸ Jutaquíju Jesús majuhuaque adeba ishucasitatiyaque, icuene cuita ecuana cuitadya canimeadebatitaquí. Pan aramaque jari, uva nacaca ijimaque jari, pana adeba, ejene jadya tuque ecuanaja ataquí Jesús ecuana jiteque majuhuaque.²⁹ Adebaya ama ni micuana Jesús curusuju eje bucha juatsu majuhuaque, nearaume pan; neijume uva nacaca tuque ecuana jiteque majuhuaque adebamere ishucue. Micuana ni araaraya, iji-ijia jadya juya eje buchique adebamaquedya jutidya Yusura micuana ecajuchati baya. Nerecaturabuque tura micuana.³⁰ Umae micuana casadama, ujejeda jadya jutidya. Arahua micuana pan; uva nacaca esasanashaque iji jadya micuana juhua, eje bucha juatsu jadya juyaque jadique baecuaquedya jutidya jadya juhua tibu. Jadya jutidya juya tibusu uma majuhua.³¹ Pana canimeadebati ni ecuana juya, juchacuana cacuejati ishucue, Yusuja ecuana nerecaturanime ama.³² Cajuchatihua ju ecuana Ecuana Cuatsashaquira nerecaturaya ecuana huecasha ishucue. Tuja yana abaecua cuana tsehue ecuana ijahuaja etiquíju ejudiruuju tura ecuana jadya aya.

³³ Cuejaya micuana era, micuana ecue eatsehuequí cuanaque. Jesús ecuana jiteque majuhuaque adeba ishucue.

chine juyaque, nequihuatibarecue. Dutya casitatuaju camadya nearaaracue. ³⁴ Ejeque aracara juyaque juatsu, tunaja etarejudya ecana paaraara, Jesús majuhuaque adeba ishunque chine jutayaju cuamaque jaridya. Ecuana Cuatsashaquique inime tupuqui aishu micuana casitatiya. Yusura micuana ujejeda eamereu micuanara casitatsu muibama pureama ayaju. Batitsu micuana pana cueja atiya peya ai cuana micuanara ique bacadurachine cuanaque.

12

Yusuja Espiritura tuque mere ishupedyapedyacasyabarecuareque

¹ Micuanara ecue quirica cuadishachine patya micuanara bacadurachine Yusuja Espirituja casara casa tyayaque. Iyacia micuana cuejaya, micuanaja pana adeba aishu, micuana ecue eatsehuequi cuanaque. ² Caadebatiyadya micuana eje bucha anie icuene juhuaque. Jesús queja catyatima jarira tuque micuana ai cueya cueya ea cuanaque muihua. Cuji cuita juatsu tuque micuana ai cueya cueya ea cuanaque yusu jadya ahua. Micuanara muihua cuanara micuana ni ai buchique bamerehua ama; anama tuna. Ijahue atahua tibu tuque micuana muihua. ³ Yusuja Espiritura bacue ecuana eisarau. Eje uma tuna juya: “Eratu quisarati aya Yusuja Espiritura cuejahuaque”, jadya tuna jubahue. Cuejaya micuana era eje bucha adebae ecuana eauque Yusuja Espiritu tsehueque, jadya ama juatsu aijama jadique. Yusuja Espirituja casa eque quisaratiya cuanaratu Jesúsja ishujidama quisarati aya ama. Eje bucha ijillahua-nae ni tunajatu Jesús ama. Tuja Espirituja casa eque quisaratiya cuanara cuita camadyatu quisarati aya: “Jesús tu Ique Cuatsashaquique” jadya. Yusuja Espiritu tsehue ama cuanaratu quisarati aya ama riyaque. Jadya adebataquietu ejeque Yusuja Espiritu eque quisaratiyaque, tuque eque ama quisaratiyaque jadya.

⁴ Arepa bape bape casa Yusu mere ishupedyapedyacasyabarecuareque. Tuquetu Yusuja Espiritu. ⁵ Arepa bape bape casa eque Yusu mere ishunque anyia ama bucha, peadya Ecuana Cuatsashaquique camadya tuque ecuana mereya. ⁶ Arepa bape bape eque Yusu ecuanaju mere juya ama bucha, tumeque Yusu camadyadyatu mere juya ecuana peadya peadyaju.

⁷ Peadya peadya cama tuja cuanaquedu Yusuja Espiritura tyaya casa Yusu cameremereti ishupedyapedyacasyabarecuareque. Jadya tyae tura ecuana aya, ecuana tuja biji eque ani ishupedyapedyacasyabarecuareque ishupedyapedyacasyabarecuareque.

⁸ Umaetu Yusuja Espiritura tyaya yunerique pana adeba aishu, tura cuitadya adebameretsu peya cuana cuejamere ishu. Peya cuanatu tyaya casa tuja quisarati jida ejitaju cueja, pana adebamere aishu. ⁹ Peya cuanatu riyaque Espiritura casa tyaya eje bucha ataquima buchique quejeneti anitsu cuita camadya aishuque. Peya cuana tujatu casa tyaya ujejeda cuanaque chacha amere ishu. ¹⁰ Umae cuanatu tyaya casa ni ejeque ecuitaja tuja tacaja ai ataquimaque aishu. Peya cuanatu casa tyaya Yusuja quisarati cueja ishu. Peya cuanatu tyaya casa ejeque Yusuja Espiritu equere mere juyaque, ejeque tuja casa equedyta jutidya mere juyaque jadique adeba ishu. Peya cuana tujatu casa tyaya bape bape yana cuana equere quisarati ishu. Peya cuanatu casa tyaya ejeque yana equere quisarati ahuaque yatseja yana equere pana cueja aishu. Jadya tyae tura ecuana aya casa tuja Espiritu equere tuque mere ishu. ¹¹ Arepa bape bape meree Yusu ataquique aniya ama bucha, peadya Espiritura camadya ecuana tyaya casa jadya ishu. Turadya ecuana tyaya casa tuque cuitadya eje bucha cameremereticara juya equere ecuanaja Yusu mere ishu.

Yuhua cama ecuana cuita pidya buchique

¹² Peadya camadya tuque ecuanaja ecuita, arepa bape bape bucucu ishu cuanaque aniya ama bucha. Dutya ecuanaja ecuitaju bucucuyaratu peadya camadya ecuanaja ecuita yutaneya. Jadya ecuana Cristoja cuanaque. Yusura ecuana baya peadya camadya bucha tuatsehue, arepa ecuana umada paju ama bucha, arepa ecuanaja tuque bape bape meree aishuque aniya ama bucha. ¹³ Dutya ecuana iyacuanetanahua tumeque Yusuja Espiritu equere, Jesús tsehue yuhuacama juishu. Dutya ecuana Jesús queja nimee tere juatsu, Yusura ecuana cuita pidya camadya baya. Israelita cuanatu Jesús queja catyatihua; tumbaedyatu juhua israelita ama cuanaque. Tsujema mere juya cuanaque tuna Jesús queja catyatihua; tumbaedyata catyatihua etsujequi jiteque mere juya cuanaque. Bape bape ecuana juya ama bucha, peadya Espiritu equere ecuana Yusura casaturaya.

¹⁴ Ecuitaju bucucutereyaque yuhua camaque inime tupuqui neara; jadya adebae tuque micuana eau. Ecuanaja ecuita tu peadya camadya ama; umada tujatu bucucu ishuque aniya. Dutya bape bape bucucuyaquetu dutya tupu meree juya, dutya ecuitaju jida ishu. ¹⁵ Ehuachi, emetucu jadya tu peadya ecuita juque camadya, arepa beta tupu bucucue ama juya ama bucha. Arepa ehuchira quisarati eau ama bucha: “Eje bucha juatsu ique emetucu bucha bucucue ama juya; riyaque ecuita juque ama tucue ique”,

jujacaya amadyatu tuhuaque. ¹⁶ Ijaca, yatuca jadya tatse tumeque ecuita juque cuinetse, arepa beta tupu bucucue ama juya ama bucha. Arepa ijaca jadya ejuu ama bucha: “Eje bucha juatsu ique yatuca bucha capetati ishucue ama; jutaquiju riyaque ecuita juque ama ique”, tuhuaquetu jujacaya amadya. ¹⁷ Ita taa ecuanaja dutya ecuita peadya camadya ejuu. Dutya ecuanaja ecuita ni yatuca tere ejuu, eje bucha quijacabacatie jatsu ecuanaja ejuu. Dutya ecuanaja ecuita ni ijaca cani ejuu, eje bucha jirue tuque ecuanaja ai eau. ¹⁸ Yusuratu dutya ecuanaja ecuitaju bucucuyaque dutya tupu ama iyahua. Ecuanaja ecuita cueyaneyaquetu Yusura iyabarehua bape bape bucucubare ishucue cuanaque, tura eje bucha bucucushamerecara aya eque bucucubare ishucue. ¹⁹ Ecuanaja ecuita ni peadya camadya ejuu, tume taa tuque ecuanaja ecuita neri ama ejuu. ²⁰ Yusuratu iyahua bape bape bucucu ishucue tsehucue; tucuanaradyatu cuita pidya camadya amereya. Tumebaedya arepa ecuanaja jetiama paju ama bucha, peadya Ecuanaja Cuatsashaqui queja camadya ecuanaja catyatihua.

²¹ Ecuanaja ecuitaju bucucuya cuanaquetu dutya tupu bucucue juya ecuanaja ecuitaju jida ishucue. Emetucu aijamaque juatsu tuque ecuanaja einau ama yatuca tsehucue petayaque. Huachimaque juatsu ecuanaja eajeu ama eju ecuanaja cuacara juyaju. Dutya tume cuanamaque, tuque ecuanaja ecuita ebucucuu ama jida. Tumebaedya ecuanaja yurameta catsahuati jutaqui. ²² Ita taa ecuanaja ecuita inime tupuqui neanucara. Aniya tuque ecuanaja casadama buchique. Jadya ama buchatu dyaque saretanaya; tume cuanamaque ecuanaja emajuju. ²³ Aniya tuque ecuanaja ecuitaju ai jida piji buchique ama. Jadya ama bucha tuque ecuanaja jida naruya, peneya, bajejeya jadya ecuanaja aya. Bisuya ecuanaja ejeque ecuanaja ecuita ramama cabatitsu. Jadya ama bucha ecuanaja jida naruya; ramajacaya ama ecuanaja. ²⁴ Ecuanaja ecuita juque dyaque jida pijique tuque ecuanaja dyaque cuita ama bajejeya. Yusuratu ecuanaja ecuita iyahua, ecuanaja ecuitaju casadamaque, bisutadaque jadya jida piji tsehucue jutu ishucue. ²⁵ Yusura tuque ecuanaja ecuita iyahua dutya ecuita ecuanaja bucucutere ishucue yuta ecuitaja jida ishucue, ai aijama juatsu ama. Tumebaedya ecuanaja anitaqui tumeque inime tsehucue, peya cuana tsahua ishucue. ²⁶ Dutya ecuitaju tuque ecuanaja uje jutiya aiju ecuitaju ujeda juyaju. Ai bahucue baatsutu ecuitadya sumitanaya. Tumebaedya, Jesús queja catyatihuaque ni canerecariya, dutya ecuanaja peya inime juya tuque jiteque. Ejera ni tuja ishucue jida quisarati aya, dutya ecuanaja pureama juya, tumeque muitaya baatsucue.

²⁷ Dutya ecuana Jesucristo queja catyatihua cuanaque ecuana Yusura Jesús tsehue cuita pidya camadya baya. Jesucristoja ecuita buchique ecuana. ²⁸ Jadya equetu Yusura dutya tuja cuanaque casa tyahua peya cuana tsehue catsahuatibare ishuhue, Jesús queja nimeedya jutidya juaje ishuhue. Icuene cuitatu aniya Cristora cuitadya tura ejitaju ahuaque cueja ishuhue cuadishahuaque. Tuequedyatu aniya Cristoja quisarati cueja juya cuanaque. Tuequedyatu aniya Cristoja quisarati bahuitya juya cuanaque, peya cuanaja pana adeba aishuhue cuejaqui cuanaque. Umaetu aniya Yusuja casa equete ni ejeque ecuitaja ataquimaque au juya cuanaque. Aniyatu ujejeda cuanaque chachane juya cuanaque. Umaejatu aniya casa peya cuana tsahua ishuhue. Umaejatu aniya casa peya cuana naru, cuatsasha jadya aishuhue. Aniyatu peya yana equete quisaratiya cuanaque. Jadyatu Yusura tyahua casa tuja cuanaque yurameta catsahuati dyaque jida aishuhue. ²⁹ Dutya ama ecuana Cristoja cuita ecuadishaque. Dutya ama ecuana Yusuja quisarati cueja ishuhue. Dutya ama ecuana Yusuja quisarati bahuitya ishuhue. Dutya ama tuque ecuanaja casa aniya Yusuja casa tsehue ni ejeque ecuitaja ataquique ama aishuhue. ³⁰ Dutya ama tuque ecuanaja casa aniya ujejeda cuanaque chachane ishuhue. Dutya ama ecuana yana bape equete quisaratiya. Dutya ama ecuana bahue ecuanaja yana equete yana bape equete cuejahuaque pana cueja aishuhue. Jadya equete ecuana Yusura tyahua bape bape equete tuque cameremereti ishuhue. ³¹ Jadya ama bucha eje buchadya catyamericara casa nejudue Yusu queja, Jesús queja catyatihua cuanaja dyaque jida judadi ishuhue.

13

Iyuhue tsehue peya cuana bajacataquique ama Cuejayadya micuana era, Yusu mere ishuhue eje buchique dyaque jidaque.

¹ Aijama ni ecuanaja iyuhue peya cuana tsehue, ecuana quisaratiyaque tu aishuhue ama cuita. Arepa ecuana ecuita cuanaja bape bape yana equete quisaratiya ama bucha, arepa ecuana Yusu tsahuaqui cuanaja yana equete equisaratiu ama bucha, peya cuana ni ecuana iyuhueda tsehue ama baya, dutya tupu catsahuati ama ecuana juya ni riya piji buchique. Iyuhueda tsehue ama ni ecuana cabatiya, Yusura tuque ecuanaja quisarati bacaya, peja duduyaque, jadya ama juatsu ai metal duduyaque sicacada ejuu bucha jutidya. ² Ecuejaudyadya datse ecuana quisarati Yusu equete cuitadya. Pana adebadya datse ni ecuana eau Yusura dutya ejitaju ahuaque. Eadebadya datse ni ecuana dutya dyaque ibeda cuanaque. Enityasicuadya datse ni ecuana emata cuana, ecuanara

dyaque ejeneya tibu. Jadya ama bucha, peya cuana ni ecuana iyuhue tsehue ama baya, Yusura ecuana ni aishu buchique jida ama baya. ³ Etyabareu datse ecuana dutya ecuanaja ai aniyaque nrecada cuanaque. Cristo queja catyatima cuanara ni ecuana epahuau. Jadya ama bucha, iyuhueda tsehue ama ni ecuana ebau peya cuana, yanacana cuita ecuana Yusuja ishupa mere juya jadya ejuu.

⁴ Yuneri cuitadya ni ecuana iyuhueda tsehue baya peya cuana, tume ecuana tunara jidama ayaju etsuje jucarama juya. Dutya tuque ecuana tunaja jida ishucue aya. Cajishatiya ama ecuana tunaja ecuanaja bucha ama ai aniya baatsu. Tuna bucha dyaque inimequi ama ecuana cabatiya. Ecuana camadya dyaque muita, tuna bacue aijama, jadya ama tuque ecuana inime tupuya. ⁵ Camuibati aqui ecuana. Ecuana camadya jida ishucue ama tuque ecuana inime tupuqui aya, tuna pureamatura ishucue. Quijillahuanatiya ama ecuana. Peyara eje bucha jidama ayaque camadya ama tuque ecuana inime tupuqui aya. ⁶ Peya cuana jida juyaque bacatsu, ecuana pureama juya. Peya cuana jidama juyaque bacatsu, ecuana peya inimedya juya. ⁷ Peya cuana iyuhue quetitsu, ecuana masadama nime aputaya tunara jidama aya cuanaque. Ejeneyadya tuque ecuana tunara cuejaya cuanaque. Tuna cajuchatihua baatsu tuque ecuana ihuajacaya amadya tuna inime cacuaretitsu Yusuja biji eque anidadinuca ishucue. Cahuaitima tuque ecuana iduya tunara jidama ayaju. ⁸ Ejeque huecaca Yusura tyajacabuque casa yana bape cuana eque quisarati ishucue, tuja quisarati cueja ishucue, dyaque ibedaque adeba ishucue. Ecuana iyuhue peya cuana tsehue aniyaque bacue teredadi ishucue ama. ⁹ Iyacua dyaque ibedaque adeba ishucue casa aniyaratu dutya ama adebaya. Iyacua Yusuja quisarati cueja ishucue casa aniya cuanaratu adebaya ama dutya tuque eje buchique. ¹⁰ Yusu queja judirutsu piisi tuque ecuana tura amerecara aya bae, pana adeba neri jadya abucue.

¹¹ Ebacua jariju ecuana ebacua cuana quisaratiya bucha quisaratie juhua. Ebacua cuanara inime tupuya bucha ecuana inime tupuhua. Ebacua cuana aniya bucha, ecuana anihua. Iyacua bacue ecuana amena ecapajiti esiri. Amena capajiti esiri jadya juatsu ecuana ebacua cuana bucha anie jujacahua. Tumebaedya ecuana Yusu queja judirutsu jubucue iyacua juya bucha ecuana jujacabuque. ¹² Espejo bape jutidya capetatishaquiju capetatitsu ecuana eje buchique cuita ecuana capetatitaqui ama cabatiya. Tumebae cuitadya tuque ecuana iyacua pana adeba ataqui ama baya Yusu eje buchique. Bape bape jutidya tuque ecuanaja inime

juya. Ejeque huecaca tuaqueja judirutsu tuque ecuana badirubuque, tuque eje buchique. Tura ecuana pana adeba aya bucha, adebaedya tuque ecuana adirubuque.

¹³ Cristo queja nimee ecuana jujacanime ama. Ihuajacanime ama tuque ecuanaja tura tyaana ahuaque. Iyuhueda tuque ecuanaja bajacanime ama. Tuque iyuhue baudya tu dyaque inime metseque; catyatinime ama, ihuanime amadya tuque ecuanaja, iyuhue aniyaque ama juatsu.

14

Yana cuana bape eque quisarati, Yusuja quisarati cueja jadique ecatsé bapeque

¹ Eje buchadya iyuhueda tsehue bacara peya cuana neacue. Tumbaedya eje buchadya catyamereticara Yusuja Espíritu queja nejudue casa Yusu mere ishú. Eje buchadya catyamereticara nejudue casa peya cuana tuja quisarati cueja ishú. ² Peya yana eque quisarati ishú casa aniya cuanara Yusu camadya paisara. Ecasitati cuanaque tujatu cuejataqui ama Yusuja quisarati, ni ejera buchique tuna quisaratiyaque adebaya ama tibu. Arepa tuna quisaratiyaju bacaqui cuanara quisaratiyaju bacaya ama bucha tunajatu adebaya ama ni riyá piji buchique. Yusuja Espíritu eque tuna quisaratiya. Tuna quisaratiyaju bacaqui cuanaratu etehua bucha jutidya bacaya. ³ Yusuja quisarati cueja ishú casa aniya cuanara bacue bahuityaya tuna bacaqui cuanaque Cristo pureamaturaaje ishudyá jutidya. Casaturaya tunajatu ecana bajida juyaju. Nime casaturaya tujatu ecana peya inime juyaju. ⁴ Yusu pureama aishu casitatitsu, bape yana eque quisaratiya cuanaque tuna jadya juya tunaja jida ishú cuita camadya. Yusuja quisarati cueja juya cuanara bacue tsahuaya Yusuja cuanaque Jesús queja nimee camadya juishu.

⁵ Umaera ni tu jidama bucha baya Yusu pureama aishu casitatitsu yana bape cuana eque quisarati ishú. Ni riyá piji buchique tu jidama ama. Areque micuanaja dutyaja eaniu casa jadya quisaratie juishu. Dyaque micuana Yusuja quisarati cuejaqui dutya amerecara aya. Quisarati cueja juya cuanaratu dyaque tsahuaya Jesús queja ecatyati cuanaque; yana bape eque quisaratiya cuanara tuna riyá piji camadya tsahuaya. Jadya ama bucha, yana bape eque quisaratitsu, ejera ni ecuana pana cueja eau ecuanaja yana eque, casatitihua cuanaja ishutu dyaque jidadya, cuejahuaque amena pana baca ahua tibu. ⁶ Baticara datse micuana aya, ecue eatsehuequi cuanaque. Micuana queja jutitsu taa micuana tsahuatiya ama ni riyá piji buchique, yana bape

eqe cuita camadya micuana isaratiyaque juatsu. Ebacau ama tuque micuana era peya yana eqe isarayaju. Era ni micuana ecuejau micuanaja yana eqe Yusura ique bahue amerehuaque, tume micuana etsahuau dyaque jida tuque adeba ishu. Tumebaedya micuana etsahuau, tura ique cuejahuque bahuitya, tura cuitadya ejitaju bamerehuaque, ebahuityau micuana yunerique bahuitya ishuque. Jadya tsahuae micuana eau Jesús queja nimee cuita camadya juaje ishu.

⁷ Yanacana tu sicacadaque adebataquique ama. Riya piji inime tupuqui neara ai meya, dudu jadya ishu cuanaque. Rauta, guitarra jadya ni ecuana eduduu, jida ejitaju ama ni ecuana eduduu, ni ejera buchiquetu eadebau ama eje buchique ecuanara duduyaque. ⁸ Cuartelju cuanaja ishu corneta dudu pujira tuna cabajejeti ishuque adebataqui ama eduduu, tumetu sudaru cuana baecuadya ejuu amena catira cuaishuque. ⁹ Tumebaedyatu micuana yana bape eqe quisaratiyaque juatsu, micuana quisaratiyaju bacaqui cuanaratu ecueyaneu ama. Ni aishu buchique tuque micuanaja quisarati jida ama. Isahue cuanaque isaraya bucha jutidya tuna ejuu micuanara isarayaju. ¹⁰ Aniyatu jetiama bape bapeque yana cuana. Ecuanaja yana cuita camadya tuque ecuana jida pana cueyane aya. ¹¹ Jadya ama bucha ejera ni ique isaraya era yana bacaya eqe ama, ecue ishutu tuque quisaratiyaque aijama ai jida cuejayaque; ique quisaratiyaque bacue tu jadidya baya. ¹² Eratu adebaya micuana Yusuja Espiritu queja eje buchadya casa catyamereticara juyaque Yusu mere ishu. Eje buchadya jida merree acara neacue. Yusuja Espirituja casa eqe acara neacue. Jesús queja catyatihua cuanaque Yusuja biji eqe aniaje ishu, tsahua ishu neacue.

¹³ Peya yana eqe quisarati ishuque casa aniya cuanajatu Yusu bacataqui: “Tyacue ecuana casa ecuanaja yana eqe quisarati ahuaque pana cueja aishu, riyaque yana ecuanara quisarati ahuaque, dutyaja cueyane ishu”, jadya neacue. ¹⁴⁻¹⁵ Yana bape eqe Yusu tsehue quisaratiyaque, pusha ama cuitadya ique ecue educuju Yusu tsehue quisaratiya. Jadya ama bucha tuque cueyaneya ama eje bucha ique quisaratiyaque. Peya yana eqe jeruyaque tuque pureama aya ducuta. Jadya ama bucha tuque cueyaneya ama era jeru ayaque. ¿Jadya ni taa jujacaya peya yana eqe? Aijama. Paquisaratidya pajerudya ique peya yana cuana eqe, tumebaedya ecue yana eqe, era cuitadya ique quisaratiyaque cueyane ishu. ¹⁶ Micuanara ni pureama, yusurupai jadya aya Yusu yana bape eqe, tumeque yana baecua cuanaratu micuana tsehue pureama apee aya ama. “Yuneridya, jadidya

paju”, jadya tuna juya ama, micuana quisaratiyaque bacaya ama tibu. ¹⁷ Yusu jadya yusurupai ayaque ni micuana jidaque quisarati aya. Jadya ama bucha tsahuaya ama tuque micuana peya cuana micuana tsehue casitatihua cuanaque. ¹⁸ Ique Yusura tyahua casa yana bape cuana eque quisarati ishu. Ecuetu aniya ni ejeja micuanaja aniya bucha ama casa bape yana eque quisarati ishu. “Yusurupai mira ique riyaque casa tyahua tibu”, jadya tuque ecue Yusu abahue. ¹⁹ Peya cuana tsehue Yusu pureama aishu casitatitsu, dyaque jida tuna tunara yana bacaya eque isarataqui. Ecuanaja yana equedya quisaratiya tuna bahuitya ishu. Ique ni tsunuda equisaratiu yana ejera bacaya ama eque, ni ejeque buchique tuque tsahuaya ama Yusu adeba ishuque. Ique ni ecuanaja yana eque cuita equisaratiu, tume tuque etsahuau ique quisaratiyaju bacaqui cuanaque, arepa pishica quisarati piji ahua ama bucha.

²⁰ Riyaque micuana cuejaya, micuana ecue eatsehuequi cuanaque. Ebacua cuanaratu adebaya ama jida Espirituja casa etyaque eje buchique. Esiri cuanara camadyatu jida adebaya. Esirira inime tupuya bucha inime netupucue. Ebacua cuanaratu jidamaque inime tupuqui aya ama; esiri cuanara camadyatu jidamaque inime tupuqui aya. Jidamaque inime tupuqui neajacacue; ebacua cuana bucha nejudue. ²¹ (Israelita cuana quijacabacati baecua cuanara Yusuja quisarati bacacarama ahujutu Yusura cuadishahua peya yahuaju cuanaque tuna nerecatura ishu.) Isaiasratu huenehua Yusura cuejahuque: “Peya yahuaju cuana eque tuque ecue cuanaque jidama juyaque huecashamerebuque. Peya yana cuana eque tuna nerecaturabuque. Jadya ama bucha tunara ijacababuque ama”, jadyatu Ecuana Cuatashaquira quisarati ahua Isaías eque. ²² Jadya quisaratie ecuana juya bape yana cuana eque ecuana quisaratiyaju bacaqui cuanara adebayaju ama Jesús queja catyatima cuanaque Yusuja casa bamere ishu, ai tuaqueja catyatihua cuanaque bamere ishu ama. Yana adebaya eque tuque ecuana Yusuja quisarati cuejaya, Jesús queja ecatyati cuanaja ishu. Jesús queja catyatima cuanaja ishu tu Yusuja quisarati ai etehua buchique. ²³ Jesús queja catyatima cuanaque, jadya ama juatsu bape yana eque quisarati ishuque casa aniyaque adebayaque ama, enubiu micuana Yusu pureama aishu casitiatiyaju, micuana equijahuatique bucha tunajatu inime ejuu, dutya quisaratiya cuanara bape yana eque tere quisarati ayaju bacatsu. ²⁴ Dutyara ni micuana quisarati cuejaya micuanaja yana eque, tumetu Jesús queja catyatima cuanara nubitsu, eadebau micuana eje bucha juyaque. Yusuja quisarati bacatsu tuna juya, “Jucha arida ique”, jadya tuna juya.

Tume quisarati cuejayaju icuene yana bacahuaque ama. Tuna tuna, tuna taca caadebati juatsu, caadebatiya Yusura juchaqui bayaque. ²⁵ Ducuta inime tsehue tunajatu adebadadiya tuna Yusuja biji eqe ama neri juhuaque. Huipuchitanadadiya tuna Yusu mui ishu. “Pusha ama cuitadya tu Yusu micuana tsehue”, jadya tuna judadiya.

Yusu mui ishu casitatitsu eje bucha jutaquique

²⁶ Yusu pureama aishu casitatitsu eje bucha jutaquique micuana cuejaya, micuana ecue eatsehuequi cuanaque. Casitatitsu necatsahuaticue peya cuana tsehue Jesús queja nimee cuita camadya juaje ishu. Umae pajeru Yusu pureama ayaque. Umaera Yusuja quisarati pacueja. Umaeja ni aniya casa Yusuja Espíritu eqe yana bape cuana eqe quisarati ishu, paquisaratidya ecana. Ecuanaja yana eqe pana cueja paa jadya aishuque casa aniyara, peyara peya yana eqe cuejahaque. Jadya micuana jutaqui peya cuana tsehue yurameta catsahuati juishu, Yusu dyaque jida adeba ishu. ²⁷ Aniya ni Yusuja Espíritu eqe bape yana eqe quisaratiya cuanaque, eje uma ama ecana jadya paquisarati. Beta, jadya ama juatsu quimisha camadya ecana jadya paju. Peadya peadya ecana jadya pajubare. Ejera cuana pacuejaajenuca micuanaja yana eqe tuna quisaratihuaque. ²⁸ Micuana ecasitatiju, bape yana eqe quisaratima jariradya ejera micuanaja yana eqe ecuejaajeuque nesarecue. Aijama ni ejeja cuejaaje ishucue, tume paquisarati amadya peya yana eqe quisarati bahue cuanaque. Paabacatana ecana. Educuju camadya ecana Yusu tsehue paquisarati. ²⁹ Micuana casitatihuaju, beta jadya ama juatsu quimisha jadya camadyatu Yusura bahue amerehuaque cuejataqui. Umae cuana jatatu jida inime tuputaqui tume quisaratiya cuanaque yuneri, yuneri ama jadya quisaratiyaque pana adeba aishu. ³⁰ Ejeque quisaratiyaju, Yusura ai bamerehuaque cacuejatiyaju ni Yusura peya ai bamereya, icueneque quisarati amena juhuajutu peyaja cuejataqui iyacua bamerehuaque. ³¹ Jadya juatsu tuna dutyadya Yusura huecashahuaque, quisarati cueja ishu casa aniya cuanaque equisaratibareu. Tunara riyaque quisarati cuejayaju dutyadya micuana bahue ejuu Yusu eje buchique; ecacasatiudya micuana. ³² Tume Yusura bahue amerehuaque cueja juya cuanara inime tsapema pacueja. Abacatadyatu jutaqui tuna quisaratiyaque pana baca aishu, amena tuque quisaratitaquiju quisarati ishu. ³³ Dutya jutidya ni micuana peadya quisaratiyaju quisaratiya, tumetu eje bucha adebataqui ama juya. Jadya quisaratie ni micuana juya, tume micuana Yusura amadya quisaratishaya. Turatu eje bucha adebataquima ama amereya ai.

Cristo queja catyatihua cuanaque casitativajutu epuna cuana quisaratitaku ama. ³⁴ Ejudyá jutidya ecuana casitativaju epuna cuana paquisarati ama. Tuna tuna quisaratitaku ama. Tunajatu deca cuana tunara amereya eque ameretaku ama, jadya cacuatsashatiju ehue tibu. ³⁵ Epuna cuanara ni quisarati adebataku ama baya, tunaja etareju judirutsu tuna pabacaduradiru yahue cuanaque umadaja ijacaju ama. Jida ama tu epuna cuana umadara bacayaju tunara inime tupuyaque cueja ishú.

³⁶ Neadebacue micuanara camadya amatu adebaya Yusuja inime eque juishuque. Micuanara amatu Yusuja quisarati bacametse ahua. Jutakuju peya cuana dyaque inimequi bucha necabatiume. ³⁷ Yusuja quisarati cuejaku cabatiya cuanaque, Yusura tuja Espiritu eque aquereniyaju cabatiya cuanaque tuna bahue judadiya era hueneyaque Ecuana Cucatsashakuja cacuatsashati. ³⁸ Era cuejayaque bacacara aatsu nebacue. Bacacarama aatsu nebaume.

³⁹ Eje buchadya Yusu queja casa catyamereticara nejuque tuja quisarati cueja ishú, micuana ecue eatsehuequi cuanaque. “Micuana nequisaratiume Yusuja Espiritu eque yana bape cuana eque”, jadya ecana neume ni riya piji buchique. ⁴⁰ Micuana Yusu mui ishú casitativaque, neacue dutya jida inime tsehue, bape bape inime tsehue ama.

15

Yusura Cristo emajuque chacha nityatsuranucacuareque

¹ Tuequedya micuana adebamerecara aya Yusu queja judiru ishúque quisarati micuana era icuene cuejahuque, micuana ecue eatsehuequi cuanaque. Cristotu majuhua ecuanaja jucha cuana tsujetyaku jadya cuejayaju bacatsu tuque micuana ejenehua. Ejenetsu micuana tuaqueja catyatihua. Riyaque quisarati cuejatahua eque micuana iyacua aniya. ² Riyaque quisarati jidaque bacatsu, Jesús queja micuana catyatihua jadya juhuaju micuana Yusura Ijehua quejaque inajacamerehua. Einajacadya micuana, era cuejahuque quisarati ejenejacaya ama tibu. Jadya ama juatsu ni micuana ejuque cuana ebajarara cuita “Ique Jesús queja catyatiya”, jadya juhua adebamaquedya jutidya; yanacanadya ni micuana jadya juhua.

³ Cuejehua micuana era ique ejitaju bahue amerehuaque. Riya yunerique bahuityataya cuanaquedya ecuana dyaque bahue jutakuque. Cristotu majuhua ecuanaja jucha cuana tsujetyaku. Tuquetu majuhua Yusura tuja quisarati eque jadyatu judadiya jadya ahua equedya. ⁴ Majuhujaju tunajatu Jesús emajuque cani ebari

epuruju ishacuare. Tuque emaju caniju ishatanahuaju, quimisha huecaca emajuque cani ducu jarahuajutu Yusura chacha nityatsuranucacuare. Yusuja quisarati ehueene equetu jadya jucuare. ⁵ Chacha netitsuranucatsutu Pedro queja cabamereticuare. Tuequedyatu cabamereticuare peadya tunca beta earacana tura mepecuare cuana queja. ⁶ Ejetsunue junucatsu amatu cabameretihua jetiama tuaqueja catyatihua cuanaque ecaratitiju. Tuna dutya quejatu cabameretihua. Tume patya tunajatu pishica cientora dyaque umadara chacha bacuare. Dutya jujeritu tume cuanaque chacha aniya jaridya, arepa umae majucuare ama bucha. ⁷ Tuequedya tujatu Santiago cabamereti ishucacuare. Jadya juu jadya juatsu tujatu dutya tuja ecuadisha yuhua cuanaque cabamereti ishucacuare.

⁸ Camadya ishucacuare eje uma mara dutya peya cuana queja cabameretitsutu tumbaedyu cabamereticuare eaqueja. Tuequedya ique tupuju Jesús queja catyatihua, umae cuana tura cabamereti ishucacuare cuanaque tsunuda eje uma mara jadya juhuaju. Jadya eque ique ebacua nana nana cuinana ejuque bucha. ⁹ Ique Cristoja ecuadisha cuanaja dyaque jetiedya inime metseque. Ique bisuya jipenee “Cristoja ecuadishaque” jadya cati ishucacuare, era icuene dyaque jidama Cristoja cuanaque ahua tibu. ¹⁰ Arepa ique jadya jutidya juhua ama bucha, Yusura ique jida tsehue bahua. Tura ique iyacuanehua ique Cristoja ecuadishaque juishu. Yanacana ama tura mepehua ecue jadya meree aishu. Ique cacasatihua tuque mere ishucacuare. Dutya ecuadisha cuanaque dyaque casada ique mere juhua. Ique equetu Yusura Jesús queja jetiama catyatishahua. Era ama tuna Jesús queja catyatishahua; Yusura cuitadyatu ahua ique eque, eatsehue tuque dyaque jida cuita juya tibu. ¹¹ Jutaquijutu jidama inime bataqui ama ejera Cristo emajuque enetitsuranuca jaque quisarati cuejayaque, era jadya ama juatsu peya cuana Cristoja ecuadisha cuanara. Era, umae cuanara jadya tuque ecuana cuejajacaya ama jadya; riyaque quisarati rique micuana ejenehua.

Pusha ama cuitadya emaju cuanaque chacha netitsuranucabuqueque

¹² “Majutsutu Cristo chacha netitsuranucahua ecuita ecabapeti”, jadya tuque ecuana cuejajacaya ama. Micuanaratu ejenehua ecuanara cuejayaque. Jadya ama bucha micuana umae juya: “Arepa Yusura Cristo emajuque chacha ecuita iyacua tsehue nityatsuranucahua ama bucha, tura ecuana ni eje tupu emajuque chacha nityatsuranucaya ama”, jadya micuana umae jubahue. Inimema cuana jaque

tu jadique inime tupu. ¹³ Eje bucha cuinananucataquima cuitadya ni emaju cuanaque tuna eju ishatanahua juque, jutaqui ju ni taa tu Cristo majuhaju caniju ishatanahuaque tuhua jaridya. ¹⁴ Yusura ni Cristo yudijidya nityatsuranuca ahua ama ecuita iyacua tsehue, jutaqui ju taa tuque ecuana yanacana Yusuja quisarati micuanara ejenehuaque cuejahua. ¹⁵ Cristo ni emajuque netitsuranucahua ama, jutaqui ju taa ecuana pusha pusha arida, “Yusuratu Cristo emajuque chacha nityatsuranucahua”, ecuanara jadique quisarati ajacaya ama tibu. Micuanara quisarati aya baedya ni, tume ecuana pusha pusha quisaratihua Yusuja quisarati cueja juyaque. Yuneri ama ni emaju cuanaque tunaja ecuita eiyacuane tsehue netitsuranucabuque, jutaqui ju taa tu yuneri amadya Yusura Cristo emajuque nityatsuranucahuaque. ¹⁶ Emaju cuanaque ni Yusura nityatsuranucabuque ama, jutaqui ju tujatu Cristo emajuque chacha nityatsuranucahua amadya. ¹⁷ Yusura ni Cristo nityatsuranucahua ama, jutaqui ju taa tu catyatitaiqui ama didya tuaqueja. Cristo ni emaju jari, tume taa tuque micuanaja jucha cuana apupashama jaridya. ¹⁸ Cristo ni emajuque chacha netitsurahua ama, jutaqui ju taa tu tuaqueja ecatyati cuanaque majuhua cuanaque ijahuaja etiqui ju; jacahua tuna Yusu ni eje tupu jipenuca ishuhua ama. ¹⁹ Riyaque yahuaju aniya jari tupu tunara ecuana jidama aya, Jesús queja ecuana catyatihua baatsu. Canimehuallatitsu ama tuque ecuana iduya, ejeque huecaca ecuana Yusu queja judiruyaque bahue tibu. Majutsu ni ecuana Yusu jacabuque ni eje tupu jipenuca ishuhua ama, tume ecuana dutyaja dyaque nercadaque jubuque. Jadyatu inime tupuya Cristo majutsu netitsuranucahuaque ejeneya ama cuanara.

²⁰ Yuneri dya tu Cristo chacha. Emajuque chacha nityatsuranucatsu, ecuana Yusura yunerinehua tura tumbaedya dutya tuja cuanaque emaju cuanaque nityatsuranucabuqueque. Cristo tu icueneque earaqui euhuaque ehuesaque buchique; ecuana ecuana tupuju amena ishuhua earaqui euhuaque huesa ishuhua buchique. ²¹ Peadya ecuita Adán bacanitu cajuchatihua. Tueque ecuana dutyadya maju aqui. Tumbaedya peadya ecuita camadya Yusuja biji eque juhua tibu, tueque ecuana dutyadya chacha netitsuranucabuque majutsu. ²² Dutyadya ecuana maju aqui, Adán eque ejuracanaque tibu. Jadidya ecuana dutya yudijidya aninucabuque majutsu, Cristo tsehue ecuana yuhua cama tibu. ²³ Yusuradyatu jadya ecuana yudijidya iyanucabuque tuque cuitadya jadya juhua tibu. Icuene cuitatu Cristo emajuque netitsuranucacuare. Tuequedya

tuque junanucahuaju dutya ecuana tuja cuanaque yudijidya netitsuranuca jubuque ecuita eiyacuane tsehue. ²⁴ Yahua teredadi ishü ni tu jadya jubuque. Cristoratu Yusu tsehue dutya cahuaitiya cuanaque casa secabuque. Turatu casa secabuque jidama ejitaju ama cuanaque. Turatu casa secabuque ecuatsashaqui cuanaque. Casa secabuque tujatu dyaque casada cuanaque. Jadya casa secas tujatu dutya jidama cuanaque abuque. Secatsu tujatu Etataque Yusu abuque: “Ahua tuque amena mira amerehuaque. Amena mi dutya ai aniyaja ecuari dyaque aridaque”, jadya tujatu Yusu abuque. ²⁵ Cristotu huaraji dyaque aridaque jutaqui, tura dutya casada cuanaque tuatsehue cahuaitiya cuanaque casa secaya tupu. ²⁶ Dutya jadya judadihuaaju ecuana majunucabuque ama. Cristoratu amena ishü secadadibuque casa ecuana maju aqui amerequique. ²⁷ “Yusuratu cuatsashahua dutya casa seca ishü; dutyatu tura cuatsashaya eque jubuque”, jadya tu ehüene Yusuja quisarati. Arepa Cristora dutya casa secabuque ama bucha, secabuque ama tujatu casa Etataque Yusu. Etataqueradyatu cuatsashahua dutya casa seca ishü. ²⁸ Cristora dutya cuatsashaya eque juhuajutu tudya cuitadya tuja Etataque Yusu queja catyatibuque. “Miradya cuatsashahua ecue dutya naru ishü. Iyacu ecue inime taca eque, idya cuitadya miaqueja catyatiya, tumbaedy dutya era naruyaque, mira cuatsashaya eque ecana juishü”, jadyatu Cristora abuque Etataque Yusu.

²⁹ Umae cuanajatu bahue aniya majuhua cuana cuarequi cutsamereti. Emaju cuanaque ni aninucabuque ama ecuita eiyacuane tsehue, umaera ejeneya bucha, jutaqui ju ¿eje bucha juatsu tuna jadya juya? Emaju cuanaque ni netitsuranucabuque ama, ¿eje bucha juatsu tuna cutsameretiya tuna cuarequi? ³⁰ Ecuana ecuana pereu cabatiya ejeque uradya jutidya eje bucha eatauque ecuanara Yusu merehua tibu. Ajacaya amadya tuque ecuanara eje tupu ecuana majutsu aninucabuqueque bahue juya tibu. ³¹ Yuneri cuitadya dutya huecaca jujeri ique pereu eiyetauju, micuana ecue eatsehuequi cuanaque. Riyaque ri yuneri cuitadya. Tumbaedyatu yuneridya ique dyaque pureama juyaque, micuana Ecuana Cuatsashaquira cuatsashaya eque aniya baatsu. ³² Eiyetauju ecuana pereu ecabatiu bucha iba mureda tsehue catiyaque earauju pereu ecabatiu bucha, jadya ique pereu cabatihua eiyetauju rehü Efesoju, Yusuja quisarati cuejahua tibu. Jidaque camadya ni ecuana riyaque yahuaju baya, jutaqui ju ¿aishu tu jida jutaqui ique jadya canerecatie juyaque? “Araara, ijiji jadya nejura, masadama

ecwana teredadibuque”, jadyatu Yusu adeba baecua cuanaque jubahue. Majutsu ecwana aninucabuque amaque juatsu, jutaquiju taa tu dyaque jida dutya ecwana cuitadya camadya capureamaturati jida juhua.

³³ Ijahue necatimereume jadya quisaratiya cuana queja. Ecadutyati ecwana ejuu emaju cuanaquepa netitsuranucabuque ama jadya juya cuana tsehue, tume ecwana jidama juya, tuna juya bucha. Micuanaratu adebayadya jadique quisarati: “Jidama tsehue ecacareneti cuanaratu yuamaturaya jida tunaja bahue cuana eque aniya cuanaque”.
³⁴ Umaera tuque micuana Yusuja ishu jida ama inime tupuya. Cuejaya micuana riyaque, micuana bisu adebamere ishu. Inime netupunucacue Yusura micuana inime tupumerecara aya bucha. Necajuchatijacacue.

Eje bucha ecuanaja ecuita majutsu netitsuranucatsu jubuqueque

³⁵ Ejera cuana ni bacaduraya: “¿Eje bucha nityatsuranucaetu Yusura abuque emaju cuanaque? ¿Papatanahuaque baedya ni taa tuque ecuanaja ecuita jubuque?” jadya ni umaera aya. ³⁶ Micuana micuana inimema ecuanaja ecuita eriri baatsu ecwana netitsuranucabuque ama bucha inime tupuya cuanaque. Ecaca euhuaque eje bucha juyaque neadebacue. Ecaca euhuaque ni cabapetiya ama, tumetu huijaya amadya. ³⁷ Huijayaque tu uhuatanaya buchique ama. Ecacadya jutidyatu uhuatanaya, paju trigo jadya ama juatsu peya. ³⁸ Tuequedyatu Yusura huijashaya tura huijashaya eque. Ecaca equedyatu bapedya huijabareya. ³⁹ Dutya maju aqui que Yusura cuitanehuaque tu dutya tupu ama. Ecuita, cuanubi, upati, jae cuana bape bapetu Yusura iyahua. ⁴⁰ Tumbaedyatu aniya barepaju aniya cuanaque, yahuaju aniya cuanaque jadya. Bape bapequedya tuna, barepaju jida pijique, tumbaedya yahua juque. Jadya ama bucha barepaju jida pijique, riyaque yahuaju jida piji tsehue beta tupu ama. ⁴¹ Ijeti, badi, purari cuanaja huecatu bapedya juya, arepa dutya tiquida ama bucha. Purari cuana dyadi tu dutya tupu amadya; bape bapedya tuna. ⁴² Tumbaedya majutsu netitsuranucatsu, tumbaedya tuque ecuanaja ecuita jubuque; papatanahua bucha amadyatu jubuque ecabapeti. Majuhuaaju tuque ecuanaja ecuita papatanaya ecaca uhuayaque bucha. Papayaquetu ririyadya. Netitsuranucatsu bacue ecuanaja iyacuaque ecuita riri baecua jubuque. ⁴³ Papatanayaquetu asicada, casadama jadya. Yudijidya aninuca juatsu bacue ecuanaja ecuita jida piji, casada jadya jubuque. ⁴⁴ Epapatanaque tuque ecuanaja

ecuita riyaque yahuaju ani ishuque. Yusura ecuana anishanucahuaju tuque ecuana ecuita ecabapeti jubuque. Yusuja Espirituja tuque ecuanaja eiyacuane jubuque, barepaju anidiru ishu. Yuneridya tuque ecuanaja aniya ecuita riyaque yahuaju ani ishuque. Tumbaedy tuque ecuanaja anibuque ecuita Yusuja yacuaju judiru ishuque.

⁴⁵ Riyaque ri ehue ne Yusuja quisarati: “Yusuratu icueneque ecuita iyahua Adán bacani. Jadya aatsu tujatu cuitanehua, riyaque yahuaju ani ishu, maju aqui juishu. Tuequedyatu anishahua” jadya tu ehue ne. Tupujuque Adántu Ecuana Nityatsuraquique judadihua. Tuja Espiritu eque tura ecuana nityatsuranucaya. Tupujuque Adán tu Jesucristo bacani. ⁴⁶ Yuequedyaquedya jutidya tuque ecuanaja aniya, Yusuja Espirituja tyamaquedya jutidya. Icuene cuita ecuana Yusura tyahua riyaque yahuaju ani ishuque ecuita. Tuequedya tura ecuana tuja Espiritu eque tyabuque ecuita ecuana tuaqueja judiru ishuque. ⁴⁷ Adán icueneque ecuitatu mechidya jutidya atanahua. Cristo bacue butehua Yusuja yacua juque. ⁴⁸ Maju aqui cuanaja ecuita tu riyaque yahua juque jutidya, Adánja ecuita buchique jutidya. Cristo queja ecatyati cuanajatu ecuita iyacuaque anibuque majutsu, Jesucristo barepa juque jehuaja buchique.

⁴⁹ Iyacuatu ecuanaja ecuita ea riyaque yahuaju ishuque jutidya, Adánja ecuita juhua baedya jutidya. Tuequedya tuque ecuanaja ecuita eiyacuane jubuque barepaju anidiru ishu, barepa juque junahuaja Cristoja bucha ecuita eiyacuaneque.

⁵⁰ Riyaque micuana cuejaya, micuana ecue eatsehuequi cuanaque. Riri aquiquetu Yusu queja ejudiruu ama. Jadya tibudya Yusura dutya naruhuaaju ecuita maju aqui tsehue ni tuque ecuana eje bucha jipee ama. Anitaquitu cacuareti ishuque. Riri aquiquetu tuaqueja eje bucha judiruedya juma. Ecuita riri baecua tsehue cuita camadyatu judirutaqui.

⁵¹ Pana baca neacue. Cuejaya micuana beru etehua bucha juhuaque. Dutya ama ecuana Jesúsja cuanaque emaju jubuque. Amena ishuque huecacajutu chacha anibuquedya tuaqueja ecatyati cuanaque. Jadya ama bucha ecuana dutya cabapetibuque. ⁵² Yatuca tapiyaque tsunumee piji ecuana Yusura cabapetishabuque. Barepa juquetu corneta meyanabuque amena ishuque huecaca juetihuaju. Tume tura ecuana cabapetishabuque. Tumeque corneta meyanayajutu Yusura nityatsuranucabuque dutya emaju cuanaque. Tumeque tsunumee piji cuitadya tujatu ecana ecuita iyacuanebuque, ni eje tupu majunuca ishu ama. Dutya tura ecuana cabetishabuque; ecuita ririnuca baecuaque tura ecuana tyabuque. ⁵³ Yusuratu cuatsashahua.

Ecuita maju aquiquetu cuaretanataqui, ecuita riri baecua tsehue, barepaju anidirutaquique. Maju aqui cuanaque tuna cabapetishataqui ni eje tupu majunuca ishu ama.⁵⁴ Ecuanaja ecuita cayuamati aquiquetu cayuamati baecuaju cuaretanabuque; ecuanaja ecuita maju aqui que maju baecuaju cuaretanahuaju, jadya judadibuque Yusuja quisarati ehue ne equedya: “Ni ai, ni eje que buchiquetu majunucaya ama. Satanásja casatu amena pana apupasha atanaya maju aqui eamerequique”.

⁵⁵ Ajipa etima cuija ejupuque tu amena mudama, tuja ujeda cati ishucue ejuputana tibu. Tumbaedyatu Yusura ecuana pana cabapetisha ahuaaju, bajidama ecuana maju ishu jubuque, amena ecuana ecuita iyacua tsehue tibu. Mubaya ama tuque ecuana amena maju, ecuanaja ecuita iyacuara ni ai uje buchique adebanucaya ama tibu”.⁵⁶ Jesús queja catyatima jariju ecuana bajida juhua maju ishu, ecuanaja jucha cuana tibu Yusura nerecaturayaque bahue juya tibu. Yusuja cacuatsashati cuana cuejatayaju bacatsu ecuana caadebatihua jucha aridaque, cacuatsashati cuana eque ama juyaque. Yusura ecuanaja jucha cuana apupashahua tibu, tura ecuana amena nerecaturabuque ama, ajipa tima cuijama eje bucha ama eau bucha.⁵⁷ “Aijamatu peya mique bucha dyaque jidaque. Yusrupai mique ecuana aya, Ecuana Cuatsashaqui Jesucristo eque mira ecuana anishanucabuque tibu, arepa ecuana majuya ama bucha”, jadya tuque ecuana Yusu ataqi.

⁵⁸ Jadya tibudya micuana cuejaya riyaque, micuana ecue eatsehuequi iyuhueda cuanaque. Necanimehuallatiume. Neejenejacaume eje que huecaca ecuana Yusura ecuita iyacua tsehue nityatsuranucayaque. Nemerejacaume Ecuana Cuatsashaquique. Bahuedya micuana; Ecuana Cuatsashaquija casa eque ayaque tu yanacana ama.

16

Peña cuana tsahua ishu ecuanaja chipiru sitataquique

¹ Quirica cuadishaya patya micuanara ique bacadurachineque: “¿Eje bucha sitae tuque ecuana chipiru eau Judeaju Jesúsja cuanaque aniya cuanaja ishu?” jadya micuanara bacadurachine. Iyacua micuana cuejaya micuanara bacadurachineque. Neacue era Galacia yahuaju Jesús queja ecatyati cuanaque cuatsashachine bucha.² Dutya dumicu micuanaja eje uma piji chipiru neiyasicuacue, eje uma piji micuanara inayaque adebatsu camadya. Chipiruda cuanara dyaque umadadya paiya. Nerecada cuanara eje uma amadya paiya. Iyasicuayaque juatsu nesitacue ique

jutiya tupu. Masadamadya neiyatibunecue. Ique jutihuaju paanidya amena chipiru esitaque. ³ Ejeque micuanara cuadishacara aya tsehue necuadishacue tumeque chipiru. Ique tuhua jutitsu tuque cuadishatiya Judeaju tumeque chipiru tsehue. Ejeque cuayaque tuque quirica tsehue cuadishaya dutya ecana tumeque chipiru dujuquique bahue amere ishu. ⁴ Ique dyadi cuataqui cabatiyaque juatsu, dutya cuaudya ecuana paju.

Pablora Corintoju cuanaque baticara acuareque

⁵ Icuene cuita cuetiya Macedonia yahua cuana eque. Tueque cueti jadya juatsu micuana batiya Corintoju cuanaque. ⁶⁻⁷ Cuetiyara camadya ama micuana badirucara aya. Eje uma huecacadya micuana queja judirucara juya, Ecuana Cuatsashaquija jadya inime juyaque juatsu. Beni mara cuana cuetishayaque ni tuhua Corintoju micuana queja anidiruya jari. Tuequedya netsahuanucacue eju ique judiruyaju judiru ishu. ⁸ Rehua Efesojudya aniya jari Pentecostés chine cuetishaya tupu. ⁹ Aniya rique ecue eje bucha cuejae Yusuja quisarati aishuque. Jetiera amari bacacara aya. Umae cuana bacue eatsehue cahuaitiya era cuejaya baatsu.

Timoteo, Apolos ecatsa cuacuareque

¹⁰ Timoteo junatihuaju jida nebatsacue, tuque micuana tsehue pureama juishu. Ique baeque nucadya tume Ecuana Cuatsashaquique merequique nucadya. ¹¹ Jadya tibudya batsacarama ama neatsacue, arepa tuque esiri cuitaque ama jadya juya ama bucha. Jida nebatsacue, tuque tuhua dirunucayaque pureama tsehue dirunuca ishu. Netsunutashatsaume cuita bacue, ique, tuatsehue cuaya cuanaque ihua juyaquedya.

¹² Quirica cuadishaya patya micuanara bacadurachine: “¿Eje tuputu Apolos junaya Corintoju?” jadya. Tuequedya micuana cuejaya Apolos ecuana tsehuequique eje buchique. “Riya yatse tsehuequi cuanaqueri Corintoju cuaya. ¿Eje bucha juatsumi cuaya ama tuna tsehue?” jadya tuque eje uma au achine. Quemitsachine tura ique: “Iyacua cuita cuacarama juya. Ecue emajaca anihuaju piisi cuaya”, jadya jutidya tura achine.

Amena ishuque quisarati

¹³ Necanaruticue ejera Cristo queja catyatishamerejacacara eaju. Neejenejacaume yunerique bahuityayaque. Ni ejeque buchique bajida nejuume. Casada nejuque. Necanimehuallatiume. ¹⁴ Ai juyaque iyuhue tsehue neacue peya cuana tsehue.

¹⁵ Eratu adebaya micuanara Estéfanos tuja etareju aniya cuanaque jadya adebayaque. Tunadya tuna Acayaju Jesús queja catyatimetse juhua. Tunajatu mere Yusuja cuanaque tsahua cuita camadya. Riyaque micuana cuejaya, ecue eatsehuequi cuanaque. ¹⁶ Nemuibacue ecana. Tumbaedy a nemuibacue tuna bucha juya cuanaque, peya cuana tsahuaquique, merequique jadya.

¹⁷ Dyaque pureama ique juya Estéfanos, Fortunato, Acaico jadya junahua baatsu. Arepa micuanara ique tsahuataqui ama bahua ama bucha, rehua ama tibu, tunara ique tsahuahua micuanara etsahuauque. ¹⁸ Tunara ique dyaque casaturahua. Icuene tunara micuana dyadi dyaquedya casaturahua. Nemuicue ecana.

¹⁹ Asiaju cuanaque Jesús queja ecatyati cuanara micuana isaramereya. Aquila, Prisca ecatsera micuana isaramereya; tumbaedy a micuana isaramereya tatseja etareju Yusu pureama aishu casitati bahue cuanara. Tunara micuana iyuhueda baya, tuna baedy a micuana Ecuana Cuatsashaqui tsehue yuhua cama baatsu. ²⁰ Dutya rehua ecuana tsehuequi cuanara micuana isaramereya. Casitatitsu quisaratibare, emetucuju quinati jadya nejudue peya cuana tsehue iyuhueda cabatiyaque cabamereti ishu.

²¹ Idya cuitadya ebacani quiyatiya rehua micuana isara ishu: PABLO.

²² Yusura dyaque jidama panerecatura Ecuana Cuatsashaquique iyuhuedama juya cuanaque. Neadebacue: Maranatha, “Ecuana Cuatsashaquiquetu amena junanucaya” jadique.

²³ Ecuana Cuatsashaqui Jesucristora nenarucue tuja quiyuhuebati tsehue. ²⁴ Era micuana iyuhueda baya Jesucristo queja dutya ecatyati cuanaque. Dutya riya cuanaque micuana cuejahua.

Riya tupu camadya.

CORINTOJU CUANAJA ISHU PABLORA QUIRICA CUADISHA BETA ISHU CUADISHACUAREQUE 2 CORINTIOS

Riyaque quirica ri Pablora huenetsu Corintoju aniya cuanaja ishu cuadishacuareque. Riyaque beta ishuque quiricajutu Pablora hueneacuare icuene quiricaju iyachineque nucadya. Jesús queja umae ecatyati cuanaque tuna Yusuja biji eque ama jari anicuare. Umaeratu ejeneacuare ama Pablo Yusuja casa etyaque tuja quisarati cueja ishu.

Riyaque quiricajuri Pablora cuejacuare dyaque tuque canerecaticuareque. Isaratsu ecuana caadebatiya ecuana bahuedia jutidya ama ecuana canerecaticuareque, ai cajuchatitsu ama. Canerecati eque ecuana Yusura bahuityaya dyaque tuaqueja nimee juaje ishu.

Tumebaedyatu Pablora cuejacuare, Jesús queja ecatyati cuanaja Yusu chipiru tyataquique nrecada cuanaque tsahua ishu.

Umae versículo cuana dyaque saretanayaque tu: 2.14; 3.5; 6.14; 8.9; 9.6-7; 12.7-9.

Pablora Jesús queja ecatyati cuanaque quirica eque isaracuareque

¹ Era riqe micuanaja cuadishaya quirica Corintoju Yusuja cuanaja ishu, tumebaedyaya Acayaju dutya epuju cuanaja ishu. Isaraya micuana era. Ique Pablo. Yusura ique mepehua Jesucristoja yana atsaqui juishu, tuja inime jadya juya tibu. Timoteo ecuana tsehuequique ri eatsehue. Tura micuana isaramereyadya. ² Yusu ecuana Etata, tumebaedyaya Ecuana Cuatsashaqui Jesucristora jida tsehue nenarucue tatseja quiyuhuebati tsehue. Tatsera inime tsapema neanishacue.

Pablora tuque nrecada atayaju naruhua cabatitsu Yusu yusurupai acuaque

³ “Miquemi dyaque jida”, jadya neajacara ama Yusu, Ecuana Cuatsashaqui Jesucristoja Etataque. Tuque tuque ecuana Etata Yusu, ecuana tsehue jida jujacayaque ama, ecuana nime casaturajaca baecuare. ⁴ Yusura ecuana nime casaturajacaya ama ecuana canerecaticuareque. Jadya tibudya tuque ecuana peya cuana canerecaticuareque casaturataquidya. Bahuedya ecuana tuna eje bucha nime casatura aishuque, ecuana dyadi Yusura nime casaturajacaya ama tibu. ⁵ Cristo jaque ama cuanaratu

Cristo nerecaturahua; tumbaedy tunara ecuana iyacua nerecaturaya, ecuana Cristo queja ecatyatique baatsu. Arepa dyaque nerecada juya ama bucha, Cristora ecuana dyaque nime casaturaya. ⁶ Ecuana ecuana dyaque nerecada juhua, micuanaja Cristo adeba, Satanás quejaque einajaca jadya juishu, micuana Yusura nime casaturayaque caadebati ishu. Jadya juyaju ecuana Yusura dyaque nime casaturahua. Ecuana jadya canerecatie juhua tibu, micuana ecuanaja bahuityataqui, micuana dyadi tumbaedy canerecatiedya juyaju Yusura nime casaturayaque caadebati ishu. ⁷ Ecuana panu aya micuana Cristo tsehue nime aputajacayaque ama. Micuana dyadi ecuana canerecatihua bucha canerecatie juya tibu, tuque ecuana adebayadya Yusura micuana nime casaturajacayaque ama, ecuana aya bucha.

⁸ Adebamereya micuana era yatse Asiaju eje bucha canerecatie juchineque, micuana ecue eatsehuequi cuanaque. Dyaque yatse canerecatichine castere ni eje bucha idutaqui. Dyaque bicueda cabutitsu eremeu bucha yatse cabatichine. Majuya bucha yatse cabatichine. ⁹ Maju ishu cuana amena inatahua bucha yatse cabatichine. Adebachinedya tuque yatse ecuana cuitadya jutidya eje bucha cacuinanashatie jutaquique ama, Yusura cuita camadya yatse ecuinanashauque. Tuquetu Emaju Cuanaque Nityatsuranucaquique. ¹⁰ Yusura yatse tsahuatsu chachanehua yatse eiyetauque. Tumbaedy tura yatse chachanehua yatse iyacua canerecatiyaju. Pana ejenedya tuque yatse aya tura yatse narudadiyaque jari, arepa yatse nerecada juya ama bucha. ¹¹ Jadyatu judadiya, yatse Yusu queja bacabacayaju, micuanara dyadi bacabaca tsahuayaque juatsu. Tumetu Yusura dutya micuanara bacaya equedya adadiya. Tura yatse tsahuadadiya. Jetiamara tunajatu Yusu yusurupai abaque. “Dyaque jida taa Yusu, tura Pablo ecatse naruhua tibu”, jadya tuna jubuque.

Eje bucha juatsu Pablo Corintoju cuacuareque ama

¹² Yusuja cuanaque eanita bucha anicara tsehue yatse anihua, ni eje bucha ni ijahue tsehue riyaque yahuaju. Micuana queja neri neri ecuana jadya anie juhua. Yatse yatse jida tuyu baya equedya aniya, ai yatse dyaque bahue juatsu ama, Yusura yatse jadya anie juishu tsahuaya tibu ademedya. Dyaque pureama yatse juya jadya anie juya cabatitsu. ¹³ Dutya era micuanaja ishu huenehuquetu ibeda ama adeba ishu juhua. Jida ejitaju adebataqui tuque. Isaratsu, cuejayaju bacatsu, tuque micuana cueyanehua era micuana cuejacara ayaque. Areque micuana panu

cueyaneaje era quisarati cuejayaque eau. ¹⁴ Jadya juyaju, Ecuana Cuatsashaqui Jesucristo junanucahuaju ecuana pureama jubareya peya cuana tsehue. Jadya pureamae micuana jubuque, era micuana Jesús queja catyati ishu tsahuahua tibu. Tumebaedya ique pureama jubuque, micuana era cuejahua eque anihua baatsu.

¹⁵⁻¹⁶ Eratu adebayadya micuanara ique jida pureama tsehue ebatsauque. Jadya tibudyatu ecue inime juhua micuana ique Macedoniaju cuayara cuajinati ishuque, tumebaedya jetinucayara. Micuana cuajiti beta aatsu tuque ecue ani beta emajaca ejuu Yusuja quisarati cuejayaque micuana pureamatura ishu. Tuequedya micuanara Judeaju cuanuca ishu etsahuanucau. ¹⁷ Tume jadya ama juhua. Ique micuana queja junahuishahua ama baatsu, ¿tuque micuana era muida tsehue ama cuana jadya ahua bucha inime tupuya? ¿Micuanajatu inime juya ique “Jejee” jadya, tumeque ura nucadya “Aijama”, jadya juya bucha? ¹⁸ Arepa era inime tupuyaque cuare bahue ama bucha, Yusuja quisaratitu cuaretaqui ama ni riya piji buchique. Cuarehua ama tuque riyaque quisarati. Era “Jadidyatu juya” jadya ayaquetu jadidya juya. Era “Jadya ama tuque” jadya ayaquetu jadya amadya juya. ¹⁹ Jesucristo tu Yusuja Ebacuaque. Cuejachinedya micuana era tuque eje buchique. Tumebaedya micuana Silvano, Timoteo ecatsera cuejachine. Jesucristotu ni riya piji buchique cacuaretiya ama. Tuquetu yuneri cuita yunerique. Tuquetu bape bape inime tupuquique ama. Dutyatu juhua, tura quisarati iyahua eque. ²⁰ Tuque equedyatu Yusura dutya aya tura aana ahuaque. Cristo eque tu Yusu pureama ea. “Dyaque jida taa mique, Cristo eque mira aana ahua cuanaque ahua tibu”, jadya tuque ecuanaja Yusu abahue. ²¹ Yusura cuitadya ecuana Cristo tsehue nime aputashajacaya ama, ecuana camadya ama, micuana tumebaedya. Tura cuitadya ecuana mepehua tujaque juishu. ²² Yusura tuque ecuanaja cuadishahua tuja Espíritu cuitadya tujaque adeba ishuque, ecuana aiju ebacani cahueneti bahue bucha ecuanajaque jadique adeba ishuque bucha. Ecuana ai bijida baatsu icueneta tsujetya riya piji au tupuju bacue tsujetyatilla jadya eau bucha, jadya bae tuque ecuanaja Yusura tuja Espíritu cuadishahua, tupuju dutya tura ecuana tyacara ayaque tyadadi jadya ishu.

²³ Yusratu adebaya era micuanaja ishu yunerique hueneyaque. Ique Corintoju cuachineque juatsu, riya micuana era nereda atiquena juchine. Jadya tibudya cuama jari. Ique jutitsu micuana peya inime amerecarama aya. ²⁴ Casada tsehue ama micuana ejenemerecara aya micuanaja

ejenetaquique. Iyacua micuana jida Jesús queja nimee. Jadya ama bucha micuana dyaque pureama juya ama. Dyaque pureama juishuque micuana tsahuacara aya.

2

¹ “Pacuanuca ique Corintoju”, jadya ama tuque ecue inime juhua, micuana nereda ayaque peya inime ejuuque adebaya tibu. ² Era ni micuana ecapeya inimetishau nereda aatsu, tume taa ni ejera buchique ique epureamaturau ama. ³ Jadya tibudya micuana icuene era quirica cuadishachine eque hue-cashachine micuana jidama juyaque, ique junatimajudya micuanaja inime jidama cuanaque bajeje ishuhue. Ique tuhua junatitsu tuque acarama aya ique capeya inimetisha ishuhue. Ique peya inime ejuuque, era taa dyaque jida adebaya micuanaja ique dyaque pureama amere ishuhue. Ique pureama juyaju, micuana dyadi micuana pureamadya juya. ⁴ Micuana eje bucha anie juyaque bahue juatsu peya inime cuita juatsu tuque micuanaja quirica cuadishachine. Micuana jidama inime ishuhue baatsu tuque cuadishachine. Micuana eje bucha anie jutidya juyaque bahue juatsu tuque micuanaja payaque quirica aatsu cuadishachine. “Areque ecana dyaque peya inime ejuu ama quirica inatsatsu. Jadya tunaja quirica pacuadisha tuna era iyuhueda bayaque caadebati ishuhue”, jadya tuque quirica huene yara inime tupuchine.

Iyuhueda tsehue nebacue ecajuchatique

⁵ Ique camadya ama, micuana tumebaedya micuana peya inime juchine, tumeque cajuchatichineju. Eje umadya ecuana peya inime juchine. Dutya micuana cajuchatichine jadya ama micuana aya tuque jadya juchineju. Ujeda quisarati tsehue amadya tuque aya. Nerecabayadya tuque era, micuana dutya jida pureama tsehue ani ishuhue tsahua ishuhue, Cristora ique petayaque caadebatitsu. ⁶ Dutya jujeriradya tuque micuana amena nereda achine, tuque inime cacuareti ishuhue. Tume tupu camadya amena tupudya tuque micuana nerecaturachine. ⁷ Nereda eauque jari, dyaque jida nenerecabacue jutidya tuque jidama juhuaque. Iyacua netsahuacue jutidya. Nenime casaturacue jutidya tuque pana canimehuallati ejuuju, tuque “Tillahua ama taa ecue Yusura jucha”, jadya ejuuju. ⁸ Jida tsehue nebacue tuque yuneridya micuanara iyuhueda bayaque caadebati ishuhue. Jadya ique tuja ishuhue micuana queja canerecатиya. ⁹ Cuadishachinedya tuque micuanaja icuene quirica micuana nime adeba ishuhue, micuana eje bucha era cuejaya equedya juyaque bahue juishuhue. ¹⁰ Icuene tume cajuchatichinera peya inime amerechine. Micuanara

ni nrecabaya tuque jidama juhuaque, era dyaditu nrecabayadya. Micuana jida juya tibu tuque nrecabahua, Cristora ique petayaque caadebatitsu. ¹¹ Jadya tuque aya, Satanásra ecuana tuja biji eque eaju. Bahuedya ecuana tura Yusu ecuana queja cahuitishamerecara ayaque.

Pablo Troasju peya inime jucuaque

¹² Riya cuitadya cuachine Troas epu ebariju Cristoja quisarati cuejara. Ique tuhua junatihuaaju Ecuana Cuat-sashaquira dyaque jida emajaca tyachine ecue ecana tuja quisarati cueja ishu. ¹³ Junatitsu tuque Tito ecue eatse-huequique tuhua ama banatichine. Dyaque jidama, peya inime jadya cabatichine. Jadya tibu tuhuaque Cristo queja ecatyati cuanaque isaraquenatsu masadama cuetinucachine Macedoniaju, tuque sarera.

Cristora ecuana casa tyahua casada juishu

¹⁴ ¡Dyaque jida taa Yusu ecuana tsehue! Ejera peya catiju ijahue aatsu tuatsehue casada juhua cuanaque dutyaja baishu edujuu bucha, jadya tyaedy a ecuana Yusura casa aya ecuana Cristo Jesús queja catyatihuaque ejitaju juishu. Ecuana equetu Yusura tuja quisarati adebamereya ai ijimedaque dutya queja epashutanau bucha. ¹⁵ Pae cuanara Yusuja bijidaque muru ijimedaque pahua bahue jucuaque bucha, tumbaedy a ecuana Cristoja biji eque aniya baatsutu Yusura tuja biji eque baya. Huani etsapetanau bucha dutyaja jiru ishu, tumbaedyatu ecuana eque Cristoja quisarati dutya bahue ejudadiu, Yusu queja judirushabuque cuanaque, tumbaedy a ijahuaja etiquiju judirubuque cuanaque. ¹⁶ Cristoja biji eque ecuana aniya baatsu, ecuana ijahuaja etiquiju judirubuque cuanara ai ihuidaque bucha baya, ai emajuque ihui bucha. Yusu queja judirubuque cuanara bacue ecuana ai ijimedaque bucha baya, ai esamaqui dyaque jida ijimedaque bucha. Inime tupuqui ni micuana aya aira Cristoja quisarati peya epuju cuanaque ecuejauque, era micuana cuejaya. ¹⁷ Yusura cuadishaya cuanara cuita camadyatu ecuejau. Jadique ecuana. Cuejaya ecuana Yusuja quisarati cuarema ni riya piji buchique. Ecuannaratu cuejaya ai chipiru ina ishu ama, ni jahue peya aishu ama, yunerique ama bahuitya puji cuanara aya bucha. Jesús tsehue ecuana yuhucama tibu, tuque ecuana cuejaya, Yusura ecuana quisarati tsape ishu cuadishahuaque bahue tibu.

3

Yusura ecuana quisarati iyacuaque cuejara cuadishayaque

¹ Ejera cuana ni tu inime tupunucaya ecuana ecuana taca casumiti juya bucha. Jadya ama tuque. Tuyuque ama bahuityaqui cuanaque bucha ama ecuana. Micuanara, peya cuanara jadya ecuana pana adeba aya. Sareya ama tuque ecuana, ecuana taca cadujuti quirica juishu micuanaja jida batsa ishu. Tumbaedy a tuque ecuana sareya ama, micuanaja quirica tyadadi ishu, ecuana peya epu cuanaju tunaja batsa ishu. ² Micuanaradya ecuana adebamereya ecuana eje buchique, ai juhuaque. Micuanadya micuana ecuanaja quirica caadebamereti ishique buchique. Eratu ejeneyadya micuana Jesús queja catyatihuaque. Micuana Yusuja biji eque aniya baatsu, “Pusha amadya tucue tu Pablo jida. Jida taatu Corintoju cuanaque bahuityahua”, jadya tuna ejuu dutya. ³ Micuana micuana Cristoja quirica ehue ne buchique. Ai tinta tsehue ehue ne buchique ama. Ai tumuju ehue ne buchique ama tume, Moisésra beru Yusuja inime huenecuare buchique ama. Yusuja Espiritu tu micuanaja educuju inimeju mere juhua ecuanara micuana quisarati cuejahuaju. Yusu Chachaja Espiritura micuana Cristo queja catyatishahua. Jadya tibudya tuque micuanaja ani iyacua Cristoja quirica ehue neque buchique.

⁴ Pana ejenedya tuque ecuana aya Cristora cuitadya ecuana tuque mere ishu mepehuaque. Yusura cuitadyatu adebaya yuneridya jadique. ⁵ Yusura tsahuayaque ama juatsu tuque ecuana eje bucha cuejataqui ama ebau Cristoja quisarati. Casada ecuana riyaque mere aishu, tura tsahuayaque juatsu camadya. Yusu equeque cuitadya tuque ecuanaja tuque mere ishique casa. ⁶ Yusura ecuana Ijahua quejaque inajacamere ana ahua, tuja Espiritu eque, ai cacuatsashati ehue ne eque juatsu ama. Cacuatsashati ehue neque isaratsu ecuana bahue ecajuchatique, ecuana majudadiyaque jadya. Jesús queja catyatihuaju bacue ecuana Yusuja Espiritura anishanucaya.

⁷⁻⁸ Berutu Yusu caadebamereticuare Moisés queja tumu tauraju cacuatsashati cuana huenemerecuare patya. Yusutu hueca dyaque tiquidaque cabamereticuare; Moisésja ebutsequini tumbaedy a tiquida jucuar. Dyaque tiquida juhua; israelita cuanara mubatsu eje bucha petataqui ama bahua. Tuequedya tujatu hueca aputsuajehua. Ni ejequetu tumeque cacuatsashati eque Ijahua quejaque einajaca ejuu ama. Yusuja Espiritura ecuana iyacuaque inime eque inajacamerenucaya. Casa tsehuetu Yusura bamerehua cacuatsashati cuana ehue ne cuanaque. Dyaque casa tsehuedya tujatu bamereya tuja quisarati tsapequi cuanaque tuja Espiritu eque tuque ecuanaja iyacuaque ani aninucaya.

⁹ Eje bucha ae ni tu ama ejera dutya cacuatsashati cuana. Jadya tibudya ecuana Yusura ecajuchati baya. Jadya ama bucha tu cacuatsashati jidadya. Dyaque jida tu iyacua inime aniya eque einajaca juishuque. Jesús queja catyatihuaju ecuana Yusura jucha metse ama baya. ¹⁰ Moisesratu bacuare Yusuja casa dyaque aridaque tura cacuatsashati cuejaya patya. Tumeque cacuatsashatitu dyaque jida juhua. Iyacua ecuana Yusura jucha metse ama baya, ecuana iyacuaque quisarati eque aniyaju. Iyacuaque tu dyaque inime metse, beruque bucha ama. ¹¹ Cacuatshatitu tsunuda ishūque ama juhua. Iyacua inime aniya eque Yusu queja judiru ishūque tu tere ishūque ama. ¡Dyaque jida, casada jadya taa tere ishūque ama!

¹² Ecuanaja ishū tu Cristoja quisarati yuneri cuitadya dyaque cuitaque, Moisésra cacuatsashati huenequare buchique ama, ni riya piji bajida teshue ama tuque ecuana cuejaya. ¹³ Moisésstu ebutsequini eraca teshue caramatihua, israelita cuanaja tuja hueca aputayaque baishu ama. Ecuana ratu Yusuja quisarati cuejayaque ni ai buchique tehuaya ama. Tuyudya tuque ecuana quisarati aya. ¹⁴ Israelita cuana ratu Moisésja ebutsequini pana peta ataqui ama bahua. Tumbaedyā tunajatu pana adeba ataqui ama bahua Yusura bahue amerecara ahuaque. Ejeque ebutsequini ecaramatique buchatu juhua. Iyacua tumbaedyā israelita cuanaja ishū tu dyaque ibeda Yusuja quisarati adeba ishū, arepa tuna isaraya ama bucha. Tunaja ishū tu beru ehūneque etehua buchique. Cristo queja catyatitsu cuita camadya tunajatu eadebau. ¹⁵ Riya cama tunajatu Moisésra huenehuaque isarayaque adebataqui ama baya. Aira cuana tunaja inime tupu epeneu bucha jutidya tuna. ¹⁶ Ejeque ecuita ni Ecuana Cuatsashaqui queja catyatiya, tume tujatu adebaya quisarati. Yusratu inime yuamaturaque secaya, ebutsequini ramaquique ejera equemiu bucha quemie. ¹⁷ Ecuana Cuatsashaqui queja catyatitsu ecuana tumbaedyā Yusuja Espiritu queja catyatiya. Tuja Espiritura ecuana pana iyacuane aya, Yusu pureamatura ishū. Tuque eque cuita camadya, cacuatsashati eque ama ecuana einajaca. ¹⁸ Adebaya tuque ecuana Ecuana Cuatsashaquique eje buchique. Ni aira buchique tuque ecuanaja inime tachiya ama, eraca petayaque epeneu bucha. Ejeque huecaca tuque ecuana tudya cuitadya adebahuque. Iyacua cuita tuque ecuana espejoju cuana epetau bucha jutidya baya; pana peta cuita ama tuque ecuana ebutsequiniju aya. Tuja Espiritu eque tura ecuana cabapetishaajeyadya jutidya ecuana tuque baedyā juaje

ishu.

4

Yusu mere ishu ecuana canimehuallatitaquique ama

¹ Yusura ecuana quisarati iyacuaque cueja ishu cuadishahua, tuque ecuana tsehue dyaque jida juhua tibu. Jadya tibudya ecuana ni riya piji buchique canimehuallatiya ama. ² Ecuonaratu jidamaque etehua au aya ama peya cuanara aya bucha. Aya ama ecuana bisutadaque, ni riya piji buchique. Ecuonaratu ni ejeque buchique ijahue aya ama, Jesús queja catyatisha ishu. Cuareya ama ecuana Yusuja quisarati ni riya piji buchique. Ecuareuque, ecuana aniya yuneri eque. Jadya ecuana juya, Yusura petayaque caadematitsu. Eje buchadya Yusuja biji eque anicara jadya ecuana juya, dutya ecuana petaqui cuanaque ecuana jida aniyaque bahue juishu. ³ Ecuana tuna cuejajacaya ama iyacuaque quisarati. Jadya ama buchatu ijahuaja etiquiju judiruya cuanara adebaya ama. Tunaja ishu tu etehua buchique jutidya. ⁴ Tunaratu adebaya ama, Satanás, Yusu adeba baecua cuanaque cuatsashaquira adebamereya ama tibu. Atuca ramahuaju capetatitaquima ejuu bucha, jadidya tuna Satanásra baecuashaya Jesúsja quisarati iyacuaque, adeba ishu ama. “Emuique Jesús eque tuque ecuana Yusu adebaya”, jadya cuejayaju bacatsu, tunajatu adebaya ama. ⁵ “Jesucristo queja micuana catyatitaqui. Tuque Micuana Cuatsashaqui neamerecue”, jadya tuque ecuanaja cueja bahue. Quisarati cuejayaque tuque ecuanaja abaecua ecuana eje buchique. Ecuana ecuana micuana Jesús queja catyati tsahuaquique cuita camadya. Tura ecuana tuja quiyuhuebati tsehue naruya tibu tuque ecuana mereya. ⁶ Yuequedyatu Yusura quisarati ahua: “Apuda ducu huecara pahueca”. Tumeque Yusudyatu Jesucristo eque caadabameretihua, ecuanaja tuque eje buchique adeba ishu. Jesucristo ecuanaja adebatsuquetu Yusuja ecuana ducuta inimeju eudau buchique.

Arepa ecuana canerecatiya ama bucha, Yusura ecuana jacyaque ama

⁷ Arepa ecuana casadama paju ama bucha, arepa ecuana maju aqui ama bucha, Yusura ecuana casa tyaya tuja quisarati jidaque cueja ishu. Riyaque quisarati tu ai tsuje aridaque tere baecua buchique. Ecuana ecuana mechi emaricaca buchique, tsunuda ishucue ama. Jadya eque, tuque ecuana ejitaju amereya Yusuja casa ai ecuana jacue ama. ⁸ Jujacaya ama ecuana jidama inimeju, peya inime jadya. Jadya ama bucha ecuana Jesús queja catyatijacaya ama. Eje

uma jue ecuana inime dyaque jidamaju jubahue. Jadya ama bucha ecuana jidaque inime ihuajacaya ama, Yusura ecuana naruyaque caadebatitsu. ⁹ Arepa ecuana ujeu baqui cuanara ecuana jidama aya ama bucha, ejaca ama ecuana. Eje uma iyejeri tunara ecuana aya miririshatsu. Jadya ama bucha tunara ecuana aputashaya ama. ¹⁰ Dutya huecaca ecuana ecuana ujeu baqui cuanara iyecara aya, Jesús ujeu baqui cuanara tuque iyecara acuare bucha. Jadya ama bucha ecuana petaqui juya cuanaque tuna bahue Jesús emajuque enetitsuranuque ecuana tsehueque. ¹¹ Ecuana chacha aniya jarique ecuana pereu eiyetauju Jesús mere juyaque. Ecuanaja ecuitatu riritsu pana aputa jubuque. Jadya ama buchatu Jesús emajuque enetitsuranuque cabameretiya ecuana tsehue aniyaque. ¹² Jesucristoja quisarati cuejaya tibu ecuana pereu jujacaya ama eiyetauque. Riyaque quisarati micuana ecuanara cuejaya tibu, micuana majutsu anidirubuque Yusu tsehue ni eje tupu jaca ishü ama, micuanara quisarati ejenehua tibu.

¹³ Salmo quirica huenequi jucuaque canerecatiya patya tujatu Yusuja quisarati huenequere: “Eratu ejeneyadya Yusura ique naruyaque. Jadya tibudya tuque cuejajacaya ama tuja quisarati”. Iyacia tuque ecuana pana ejenedya aya Yusura ecuana naruyaque. Jadya tibudya tuque ecuana tuja quisarati cuejajacaya ama, arepa ecuana umaera iyecara aya ama bucha. ¹⁴ Ecuana Cuatsashaqui Jesús tu Yusura emajuque nityatsuranucahua. Jesús nityatsurahua baedya tura ecuana emajuque nityatsuranucabuque. Dujubuquedya tura ecuana tuatsehue anidiru ishü. Micuana tsehue dujupedyä tura ecuana abuque. ¹⁵ Ecuana nrecada juyaque tu micuanaja jida ishüque, micuanaja Yusuja quisarati baca ishü. Micuana Yusura dyaque jida tsehue bayaju, tumetu jetiera amadya yusurupai eau. “Dyaque jida casada taa mique”, jadya tunajatu eajacau ama.

¹⁶ Jadya tibudya ecuana canimehuallatinime ama. Arepa ecuanaja ecuitaja casatereajeya ama bucha, Yusura tuque ecuanaja casa iyacuaneajeya tuque mere ishü. ¹⁷ Arepa iyacia dyaque nrecada juya ama bucha, idutaquidya tuque; ai abu ishüque bicuedamaque buchique tume, tsunudaque ama jadique juya tibu. Yusura ecuana bajeajeya tuaqueja judiru ishü. Dyaque jidaque ecuana Yusura tyadadibuque. Tere baecua tura ecuana pureama anishabuque. ¹⁸ Jadya tibudya tuque ecuana jidama inime ishü baya ama iyacia riyaque yahujaju eje bucha juyaque. Ecuana ratu ejitajuque ama inime tupuqui aya, ai bataqui ejitajuque ama. Ejitajuque tu tsunuda ishüque ama. Ejitajuque ama bacue teredadi

ishuque ama.

5

¹ Ecuanaja ecuita tu ani tsunudama ishuque buchique, erere buchique jutidya. Anisicuayaque ecuana erere erihuishaquenau bucha, jadidya tuque ecuanaja ecuita jubuque majutsu. Jadya ama bucha tuque ecuanaja majutsu ecuita iyacuaque aninucabuque barepaju Yusuja yacuaju. Yusuja cuitadya eaque tume, ai ejeque ecuitaja eaque ama Tere ishuque ama, ni ejeja iye ishuque ama tu riyaque ecuita iyacuaque. ² Riyaque yahuaaju aniya jari tupu ecuana nrecada juya. Peya huecaca ecuana canajeti ebari juya ecuanaja iyacuaque eaniqui barepa juque adebatsu. Jutu ishuque iyacuaque jutu bahue bucha, jadya tuque ecuanaja anibuque iyacuaque eaniqui. ³ Iyacuaque ecuita anitsu ecuana ecatacati bucha ama cabatibuque, jida ecajututi bucha. ⁴ Riyaque yahuaaju jari tupu ecuana erere cuanaju anianiniya bucha. Nrecada ecuana jujacaya ama. Ujejeda ecuana jujacaya ama. Majucarama ecuana juya. Jadya ama bucha ecuana iyacuaque ecuita tsehue amena junenicara juya. Amena iyacua tsehueju ecuana ni eje tupu majunucanime ama. Chacha ecuana anibuque. Beru sirique iyacuaque dadi ishu eijehueu bucha tuque. ⁵ Yusura cuitadya ecuana bajejehua ecuita iyacua tsehue tuatsehue ani ishu. Turadya tuque ecuanaja tuja Espiritu cuadishahua, yuneridya ecuana ejeque huecaca ecuita iyacua tsehue amere ishu.

⁶ Jadya tibudya ecuana ni eje tupu buchique canimehuallatiya ama. Adebayadya ecuana, ecuana riyaque yahuaaju riyaque ecuita tsehue jarira ecuana Ecuana Cuatsashaquique japada bayaque. ⁷ Bahuedya ecuana tuaqueja judirubuqueque ai petaya eque ama, ecuanaja quejeneti eque. ⁸ Jadya tibudya ecuana canimehuallatiya ama, arepa tunara ecuana iye ana aya ama bucha. Eje buchadya rehua anijacacara ecuana juya Ecuana Cuatsashaquija yacuaju anidiru ishu. ⁹ Eje buchadya pureamaturacara tuque ecuana aya Ecuana Cuatsashaquique. Rehua ecuanaja ecuita beru siri tsehue tuque ecuana pureamaturacara aya, tumbaedy a tuja yacuaju judirutsu. ¹⁰ Peadya peadya ecuana Cristoja yacuaju cabameretibuque. Ecuana jadya ameretsu tura ecuana cuejabuque ecuana eje bucha judadiyaque. Ecuana rehua riyaque yahuaaju eje bucha anie juhua eque cuitadya tura ecuana tsujetyabuque. Jida anihua cuanaque tujatu jidaquedya tyabuque. Jidama anihua cuanaque tujatu nerecaturabuque.

Yusu ecuana icuene ujeu bahuaque; Cristo eque ademe ecuana iyacua tuatsehue jidaque

¹¹ Mubaya tuque ecuana Ecuana Cuatsashaquique, tuque dyaque casadaque juya tibu. Jadya tibudya tuque ecuana cuejaya, tuna Jesús queja nimee amere ishü. Yusu ama tuque ecuana ijahue aya. Tuquetu bahuedya ecuana eje buchique. Areque micuana dyadi bahue ejü. ¹² Ecuana taca casumiti ecuana jucarama juya. Ecuana tsehue pureama micuana ecuanara amerecara aya. Umae micuana ecuanaja ishü pusha pusha cuejaya, tuna peya cuana queja dyaque jida cuitaque bucha cabamereticara juya tibu, Yusu adebaqui cuita datse cabatitsu. Jadya ama bucha tu tunara inime tupuya cuanaque jida ama. Ecuana bacue ni ejeque buchique ijahue aatsu ama aniya, tuna ecuanaja ishü pusha pusha quisaratijaca ishü, micuana ecuana tsehue pureama amere ishü. ¹³ Ecuana quisaratiyaju umaera ecuana equijahuati jadya aya. Yusu iyuhueda baya tibu ecuana jadya juya. Micuana tsehue ecuana quisaratiyaju, micuana iyuhueda baya tibu ecuana jadya juya. ¹⁴ Cristotu majuhua dutya emajuuque. Tuque majuhua jutu Yusura bahua ecuana dutya majuterehua bucha. Jadique bahue juatsu tuque ecuana tuque pureamaturacara aya, ai ecuanadya jutidya ama, tura ecuana dyaque iyuhueda bahua tibu. ¹⁵ Cristotu majuhua dutya ecuanaja ishü. Tuquetu majuhua dutya chacha aniya cuanaque tuque pureamaturayaque ani ishü, ai tuna cuita camadya ama. Tuquetu majuhua dutya ecuana jiteque. Netitsuranucahua ecuanaja jida ishü.

¹⁶ Jadya tibu tuque ecuana iyacua inime tupuya peya cuanaja ishü, Yusu adeba baecua cuanara inime tupuya bucha ama. Icuene tuque cuji cuita juatsu inime tupuhua Cristo ejeque ecuita cuana buchadya jutidya. Iyacua tuque adebaya; jadya ama tucue tuque. ¹⁷ Cristo queja catyatitsu ecuana pana eiyacuane juya. Beruque ani juhuaque tuque ecuanaja terehua. Iyacuaque ecuita ecuana. ¹⁸ Yusura ecuana iyacuanehua. Cristo ecuana jiteque majuhua tibu, ecuana Yusura iyuhue batsanucahua. Jadya juhuaju tura ecuana cuadishahua dutya tura eiyuhue quetinucau cuanaque quisarati cuejara. ¹⁹ Cristotu majuhua ecuanaja jucha cuana tsujetyaqui. Jadya tibudya tuque ecuanaja Yusura jucha cuana tillahua. Riyaque tuque ecuana quisarati cuejaya. “Jesús queja catyatihuaju micuana Yusura cabapetishaya, tuque iyuhueda cabamereti ishü”, jadya tuque ecuana ecan cuejaya, Yusura jadya ishü cuadishahua tibu. ²⁰ Ecuana Cristoja quisarati cueja juyajutu Yusu cuitadya quisaratiya ecuana eque. Jutaquiju ecuana Cristoja

yana atsaqui juya tibu, micuana ecuanara “Yusu tsehue jida nejunucacue”, jadya aya. ²¹ Cristotu ni eje tupu buchique cajuchatihua ama. Tuquetu tuyu neri. Jadya ama buchatu tuque ecuana emajuuque majuhua jucha cuana tsujetya ishü. Jadya juhuajutu Yusura jucha arida bucha bahua. Iyacia ecuana tuaqueja catyatihuaju, ecuana Yusura jucha metse ama baya.

6

¹ Ecuana mereya baedya micuanara Yusu mereya tibu, micuana ecuanara cuejaya riya cuanaque. Icuene micuana Yusura Ijahua quejaque inajacamerehua, micuana tsehue jida juya tibu. Iyacia neaniume Yusu adeba baecua cuanaque bucha. Jadya anie ni micuana juya, tume taa micuana yanacana inajacatanahua. ² Neadebacue Yusuja quisarati ehueque:

“Micuana tsehue jida juishuque huecaca juetihuaju, micuana eaqueja bacabacayaju, micuana era bacahua.

Micuana einajaca juishuque huecaca juetihuaju, micuana era inajacamerehua”,

jadyatu Yusura quisarati ahua.

¡Ita nebacue! Iyacia cuitadyatu Yusu micuana tsehue jida jucara juya. Iyacuadya tu huecaca Yusura micuana inajacamerecara ayaque.

³ Ecuana ecuana jida tuyu anijacacara ama amadya juya, ni ejeque buchique ecuanara Yusu mereyaque baatsu tsaishu ama. Bijidama tuque ecuana peya cuana “Catyatiya ama ecuana Jesús queja, tuja cuanaque jida ama aniya tibu”, jadya quisarati ishü baya. ⁴ Eje buchadya jida tuyu anicara ecuana juya, peya cuana queja caadebamereti ishü ecuana yuneri cuitadya Yusu merequique. Sicacada tsehue ama tuque ecuana dutya eje bucha juyaque iduya. Arepa dyaque canerecatiya ama bucha, arepa dyaque jidamaque inime cuana aniya ama bucha, arepa ecuana pereu eiyetau cuanaju cabatiya ama bucha, abacata tsehue tuque ecuana dutya iduya. ⁵ Catsacatsa tunara ecuana ahua. Apuda etareju tunara ecuana ishahua. Jetiama ecuita ecahuaitija ecuana acuatsuru bahue juhua. Mere casada ecuana jubahue juhua. Tahui idu, ara idu jadya ecuana Yusu mereyaque juhua. Jadya ecuana nrecada juhua. ⁶ Tumbaedya ecuana ejitaju ecuana Yusu merequique ecuanaja eje bucha aniju. Aya ama tuque ecuana ai bisutadaque. Yusu adebaqui ecuana; adebaya ecuana tuja quisarati. Tunara jidama ayaju tuque ecuana cahuititsu ama iduya. Jida tsehue tuque ecuana peya cuana baya. Tumbaedya tuque ecuana ecana bamereya Yusuja Espiritu ecuana tsehueque, tura

ecuana aquereniyaque. Yuneridya tuque ecuana peya cuana iyuhueda baya. ⁷ Yunerique tuque ecuana cuejaya. Yusura ecuana casa tyaya tibu, tuque ecuana tuque mereya. Sudarura tuja quiyeti ishü cuanaque catiyaque quicueneti ishü etsumeu bucha, tumbaedyä ecuana aniya cajuchaticara tsehue ama, peya cuana eje bucha anie juishuque bamere ishü, tuna ecuanaja ishü pusha pusha quisaratijaju abacasha ishü. ⁸ Umaera ecuana muibaya. Peya cuanara bacue ecuana bji-damaduraya. Umae bacue ecuanaja ishü pusha pusha quisaratiya. Umae cuanara bacue ecuanaja ishü jida quisarati aya. Yusu merequique neridya ecuana, arepa peya cuanara ecuana ejenecarama aya ama bucha. ⁹ Umaera ecuana adabamaque eata aya, aishuque ama bucha. Peya cuanara bacue jida pana adeba ea bucha, dyaque inime metseque bucha. Eje buchaju ecuana dyaque pereu eiyetauju, jadya ama bucha ecuana chacha jaridya. Dyaque jidama tunara ecuana aya, iyema jaridya datse tunaja ecuana. ¹⁰ Eje uma peya inime tunara ecuana amereya; jadya ama bucha ecuana Yusura pureama amerejacaya ama. Ecuana ecuana nrecada cuanaque. Jadya ama bucha tuque ecuana Yusuja quisarati cuejaya, peya cuana Yusura ecana dutya ai tunara sareyaque tyanityayaque bahue ishü. Aima bucha datse ecuana; jadya ama bucha ecuana Yusura baya dutya metseque bucha.

¹¹ Dyaque iyuhueda micuana baya, micuana Corintoju aniya cuanaque. Micuana eje buchique tehuatsu amadya rique huenehua. Micuana eje buchique cuitadya micuana adebamerehua era inime tupuhuaque ecue inime juhuaque. ¹² Era micuana dyaque iyuhueda baya. Micuanaja bacue dyaque bataqui ama quiyuhuebatsati eatsehue ishü. ¹³ Cuadishaya rique micuanaja quirica huenetsu ecue ebacua neri cuanaja ecuadishau bucha. Era micuana dyaque iyuhueda baya bucha, iyuhueedya ique dyadi nebacue. Ecue micuana tsehue iyuhue aniya bucha micuanaja dyadi paani.

Yusu peadya peadya tuja cuana tsehue aniyaque

¹⁴ Pana cacarenetrie cuita nejuume Jesús queja catyatima cuana tsehue. Cacarenetiya ni micuana tuna tsehue, tume micuana juye, cahuayu tsehue yubunehua bucha ejuu. Jida tuyu aniyaquetu tuyu ama aniya tsehue cacarenetitaqui ama. ¿Eje bucha ecare jue jatsutu tuyuque, tuyu amaja ecare ejuu? Yusu adebaquijatu ecare neri ejuu ama Yusu adeba baecuaque, huecadaque apuda tsehue cajipetiya ama bucha. ¹⁵ Eje bucha dutya tupu inime tupue ni tu ama Cristoja cuanara Ijahuaaja cuana tsehue. Jesús queja ecatyati cuanaratu dutya tupu ama inime tupuya tuaqueja catyatima cuana tsehue. ¹⁶ ¿Yusu ecuanara muiyaja etare tu ai cueya

cueya cuana pureama aishuque? ¡Aijama! Tumebaedya tu tuatsehue aniya cuanaque; dutya tupu nimee amadya tu tuatsehue aniya ama cuanaque. Yusu Chachaja ani ishunque ecuana, Yusura cuitadyatu quisarati ahua:

“Ique anibuque ecue cuana tsehue.

Tuna tsehuedya anibuque.

‘Miquemi Yusu’, jadya tunara abunque.

‘Ecue cuanaque micuana’, jadya tuna abunque”.

¹⁷ Jadya tibudyatu Ecuana Cuatsashaquique jadya jucuaré:

“ ‘Necuinanacue tuna quejaque.

Nejacacue ecana.

Ique cahuitishaqui cuanaque aniya bucha anie nejuume.

Tume micuana era batsabuque.

¹⁸ Ique micuanaja Tata paju; micuana bacue ecue ebacua, ebacujuna jadya’, jadyatu Ecuana

Cuatsashaquira quisarati acuare, ecuana dutya naruquira”.

7

¹ Jadya ecuana Yusura aana ahua, micuana ecue iyuhueda cuanaque. Jadya tibudya nejacara dutya ecuana asicaturaquei juya cuanaque. Jidama nejujacara. Jidamaque inime tupuqui neajacara. Eje bucha Yusura amerecara aya eque, nejuajeradya jutidya. Jadidya nejura, tuque cahuitisha ishucuanara mubaya tibu.

Pablo Corintoju cuanaque inime cacuaretichine jadya bacatsu pureama jucuaréque

² Yudijidya cuejanuca, canerecati jadya junucaya micuana queja. Neiyuhuequetinucacue ecuana. Ni ejeque buchique micuana ecuanara jidama tsehue bahua ama, jida tsehue camadya. Ni ejeque buchique tuque ecuana jidama ahua ama. Ni ejeque tuque ecuana yuamaturahua ama. Ni ejeque tuque ecuana ijahue ahua ama. ³ Jutiya ama tuque ecue inime micuanara ecuana iyuhueda ebajacauque. Yudijidya cuejanuca micuana aya, era icuene cuejachineque. Dyaque iyuhueda micuana ecuanara baya. Majutsu, jadya ama juatsu chachara micuana ecuanara iyuhueda bajacaya ama. ⁴ Eratu ejeneyadya micuana jida tuyu aniyaque. Adebajacaya amadya micuana era, eje tsehue quisaratiyaque micuana jidaque. Arepa ique canerecatiya ama bucha, canimehuallatiya ama ique; pureama jutidya juya micuana adebatsu, micuana eje bucha juyaque bacatsu.

⁵ Macedoniaju juetichine equeque rique ecuanaja canajara aijama. Dutya queja ecuana eje bucha ataqui ama bucha baya. Yusu adeba baecua cuanaquetu cahuitichine ecuana tsehue. Catiyaque ejuu bucha ecuana cabatichine. Jidama

inime ishü tuque bachine Cristo queja ecatyati cuanaque, ecuanaja mere yanacana ejüu tibu. ⁶ Yusuradyatu nime casaturajacaya ama peya inime juya cuanaque. Tito junachine eque ecuaña Yusura nime casaturachine. ⁷ Tuque junatsu tura ecuaña cuejanachine micuaña eje bucha anie juyaque. Micuanara patu tuque dyadi nime casaturatsachine tuhua micuaña queja jutichine patya. Micuanarapa ecuaña bacara ebaridya aya. Dyaque peya inimepa micuaña juchine micuaña eje bucha juchineque adebatsu. Cuejachine tura ecuaña micuanarapa era cuatsashachineque acara ebari aya jadya. Titora cuejaetiayaju bacatsu, dyaque pureama juchine.

⁸ Quirica era cuadishayaque isaratsu micuaña ejetsunueque ama peya inime juchine, ecue micuaña nereda ataqui juchine tibu. Icuene tuque jidama inime ishü bachine micuaña quirica eque nereda aishü. Ecue jadya ataqui juya tibu micuaña jadidya achine. Jadya tibudya tuque jidama amadya inime baya amena quirica cuadishatsu. ⁹ Yusu cahuaítishahuaque caadebatitsu micuaña peya inime juchine. Jadya cabatitsu micuaña inime cacuaretichine, Yusura ecuaña amerecara aya bae. Jadya tibudya ique pureama juya, micuaña peya inime juchine baatsu ama, micuaña inime cacuaretichine baatsu. Jadya tibutu jidadya juchine ecue tumeque quirica cuadisha ishü. Tumeque quirica cuadishatsu micuaña ni riyá píji buchique yuamaturachine ama. ¹⁰ Yusu cahuaítishatsu peya inime juya cabatitsu, inime jutidya ecuaña cacuaretitaqui. Inime cacuaretihuaju ecuaña Yusura Ijahua quejaque inajacamereya, tuaqueja amere ishü ni eje tupu jacanuca ishü ama. Pureama ecuaña juya, einajaca cabatitsu. Yusu adeba baecua cuanaque bacue peya inime cabatitsu, inime cacuaretiya ama. Japada jutidya tunajatu Yusu babuque majutsu ni eje tupu jipe ishü ama. ¹¹ Yusura micuaña peya inime cabatishahua micuaña jidama juchineju. Jadya cabatitsu tuque micuaña Yusu pureamaturanucacara aya. Amena micuaña caadebatiyadya jidama juchineque. Jadya juatsu micuaña Yusu queja canerecatichine tuja micuanaja jucha cuaña apupasha ishü. Amena micuaña educuju cahuaíti, bisu jadya juya tume micuaña tsehueque cajuchatichineque baatsu. Iyacia micuaña amena bajida juya Yusu micuaña tsehue ecahuaitiüju. Amena micuaña bacacara aya era jida cuejayaque. Amena micuaña bacara ebari aya. Amena micuaña nerecaturamerecara aya ecajuchatique. Jadya cuanajudya micuaña ejitaju juhua amena micuaña ama jucha metseque. ¡Dyaque jidadya taa micuaña Yusu tsehue cajuchatitsu peya inime juyaque!

¹² Riyaque quirica riqe huenehua jidama juhuaque camadya micuanaja nerecatura ishü ama, ecahuaitishaqui juhuaque camadya tsahua ishü. Huenehua tuque era micuanaja ecuana tsehue iyuhue aniyaque ejitaju amere ishü, era amerehua eque juyaque. Yusuratu adebaya riyaque yunerique. ¹³ Ecue quiricara micuanaja inime cacuaretishahua tibu, ecuana dyaque cacasatihua, micuanara ecuana iyuhueda bayaque bahue juatsu.

Titotu pureama juchine, micuanara jida batsachine cabatitsu. Micuanara patu tsahuachine tuque inime tsapema juneni ishü. Tuque rehua juetinucatsu tura cuejaetihuaju ecuana dyaque pureama juchine. Nime casaturachine camadya ama tura ecuana; pureama ecuana juchine. ¹⁴ Tito micuana queja cuama jariju tuque “Corintoju cuanaque tuna jida. Jida tunarami batsaya”, jadya achine. Pusha amadya, tuque jutihuaju tuque micuana jidadya batsachine, era tuque “Jida tunarami batsaya”, jadya achine eque cuitadya. Tunara jida batsahuajudyatu ejitaju ique pusha pusha ama juyaque. ¹⁵ Titora micuana dyaque iyuhueda baya, tuque micuana queja junenitichine patya micuana tura amereya eque juchine baatsu. Dyaque micuana muibachine. Ni aiju buchique cahuaitishacarama micuana achine. Tume cuanaque adebatsu tujatu micuana tsehue dyaque iyuhue aniya. ¹⁶ Ique micuana tsehue pureama juya micuana era cuejaya equedya juya baatsu.

8

Pureama tsehue ecuanaja Yusu chipiru tyataquique

¹ Peya micuana cuejaya, ecue eatsehuequi cuanaque. Yusutu dyaque jida juhua Macedonia yahuaaju aniya cuana tsehue Jesús queja ecatyati cuana tsehue. ² Dyaque nerecada tuna atahua tuna Jesús queja catyatihuaju. Jadya ama bucha tuna dyaque pureama juya. Dyaque umada tunajatu nerecada cuanaque tyahua, arepa tuna cuitadya nerecada juya ama bucha. ³ Eratu adebayadya tunara eje uma tyataqui bayaque tyachineque. Tyataquique bare cuitadya tunajatu tyachine. Tunaja inime taca tyau tunajatu achine. ⁴ Cuejanuca cuejanuca tunara ecuana achine: “Ecuana ratu tyacara ebari aya chipiru Judeaju nerecada cuanaque Jesús queja ecatyati cuanaque. Nedujucue tunaja”, jadya tunara ecuana achine. ⁵ Cuji cuita juatsu tuque ecuana inime tupuchine tunara riya piji camadya chipiru etyau bucha. Tunara bacue dyaque umada tyachine. Icuene cuita “Ecuana miaqueja catyatiya mira cuatsashaya eque cuita juishu”,

jadya tunajatu Ecuana Cuatsashaquique achine. Tumebaedya tunara ecuana achine: “Micuanara cuatsashaya equedya dyadi ecuana jucara juya” jadya. Jadya tuna juchine, Yusuja inime equé camadya jadya juyaqué adebatsu. ⁶ Tito micuana quejaju tuque chipiru sitameretibunechine nrecada cuanaja ishu, micuanaja canerecabati tuna queja aniyaqué caadebamereti ishu. Macedoniaju cuanara tunaja chipiru tyacara ayaju tuque Tito achine: “Cuacue Corintoju. Tsahuaticue ecana nrecada cuanaja ishu chipiru sitatilla”, jadya tuque achine. ⁷ Micuana micuana dyaqué casaturatahua Yusu mere ishu, peya cuana bucha ama. Micuana micuana Jesús queja nimee juajeya, tura eje bucha aana ahuaqué adadibuqueque ejeneya tibu. Micuanaratu jida cuejaya Yusura cuejamereyaqué; pana adeba micuana aya tujaqué. Eje buchadya tsahuae acara micuana peya cuana aya. Dyaqué iyuhueda micuanara ecuana baya. Dutya riya cuanaju Yusura jidaqué tyahua tibu tuque micuanaja ini-jeda tsehue ama Jesúsja cuanaqué nrecadaqué tsahua ishu chipiru tyataqui.

⁸ Era ama micuana casada tsehue jadya tsahuameree aya nrecada cuanaqué. Peya cuanara tuna tunaja taca inime tsehue tyaya chipiru. Nime adebaya micuana era. Micuanara ni ecana tume bae tyaedya aya chipiru, tume micuana ejitajudya juya yuneridya micuanara peya cuana Jesús queja ecatyati cuanaqué iyuhueda bayaqué. ⁹ Micuana micuana bahuedya Ecuana Cuatsashaqui Jesucristo ecuana tsehue jida jujacayaqué ama. Dutya metseque ama buchatu tuque nrecada aima juhua ecuana jitequé. Jadyatu juhua, ecuana ecuanara dutya ai tuja biji equé ani ishu sareyaqué tyaishu.

¹⁰ Cuejaya micuana era inime tupuyaqué nrecada cuanaja ishu chipiru sitayaqué. Juchinequé maraju tuque micuana sitatibunechine chipiru nrecada cuanaja cuadisha ishu. Dyaqué pureama tsehue tuque micuana ecana tsahua ana achine. Peya cuanaja jadya tsahuae ama jariju tuque micuana tsahuacara achine. ¹¹ Jutaquiju iyacua neatillacue micuanara atibunechinequé. Pureama tsehue micuana chipiru sitatibunechine; tumebaedya pureama tsehue nucadya nesitatillacue nrecada cuanaja cuadisha ishu. Ntupuume inime: “Chipiruiqu juatsu piisi tuque nrecada cuanaja ishu chipiru iyasicuaya” jadya. Neiyacue micuanaja eje uma piji aniyaqué. ¹² Yuneridya ni micuana tsahuacara aya, Yusuratu jidama ama inime baya eje uma micuanaja aniyaqué tyaishu. Tura ecuana bacaya ama ecuanaja aijamaqué.

¹³ “Micuanaja ai aniyaqué tereya tupu peya cuana nety-

acue tunaja umada ani ishu”, jadya ama micuana aya.
¹⁴ Iyacua cuita tuque micuanaja jetiama aniya. Judeaju Jesúsja cuanaque bacue nrecada. Jadya tibudyatu micuanaja tyataqui chipiru tuna tsahua ishu. Peya huecaca ni micuanaja aijama ai, tume micuana tunara etsahuaudya. Jadya catsahuatie juatsu tuque micuanaja dutyaja tupu ai eaniu. ¹⁵ Jadidya tu Yusuja quisarati ehue: “Jetiama huesahua cuanajatu anidadihua ama; umadama huesahua cuanaja bacue aijama juhua ama”. Jadyatu quisarati aniya dutya tupu catsahuatie juya cuanaja ishu.

Titora, tuatsehue cuacuare cuanara nrecada cuanaque chipiru tyau, casatura jadya aticuareque

¹⁶ Ecuana micuana tsahuacara aya bucha, tsahuaedya micuana Titora acara aya. Jadya tibudya tuque ecue abahue: “Yusurupai Yusu, mira Tito riyaque inime tyaya tibu”, jadya tuque ecue Yusu abahue. ¹⁷ Corintoju micuana queja cuanuca ishu ecuana quisaratinucachine patyatu tuque en cuitadya juchine. Ecuana tuque cuaishuque bacadura-maju cuitadyatu tuque cuacara ebari juchine tuja inime tacadya jutidya. ¹⁸ Tuatsehuedya tuque ecuana cuadishaya peya ecuana tsehuequique. Tuquetu jida mere juya Yusuja quisarati cueja juyaque. Dutya queja Jesús queja ecatyati cuanaratu pana adeba aya; muibaya tunaja tuque. ¹⁹ Tunaradyatu mepechine ecuana Jerusalénju chipiru iyara cuayaju ecuana taji ishu. Dujuya tuque ecuana chipiru nrecada cuanaja ishu, tuna ecuanara iyuhueda bayaque adebamere ishu. Dujuya tuque ecuana Jesúsja cuanaque peya cuana tsehue catsahuatiyaque bamere ishu. Jadya baatsu tunajatu Ecuana Cuatsashaquique pureama adadiya.

²⁰ Jetiama tuque ecuana chipiru dujuya. Ni ejeque buchique tuque ecuana quisaratisacarama aya: “Tunaja ishudya jutidya tunajatu chipiru dujuya, nrecada cuanaja ishu ama” jadya. Jadya tibudya ita taca ama cuaya, ecuita cuana jida eadeba tsehuedya, ecuanaja ishu ecana jidama equisaratiu tibu. ²¹ Ecuana Cuatsashaquiratu ecuana inime cadujutiyaque adebaya. Areque ecuana ecuita cuanara dyadi tume bucha adebaedya eau.

²² Tatse tsehuedya tuque cuadishaya peya ecuana tsehuequique. Bahuedya ecuana riyaque dyaque jidaque, peya tsahuacara juyaque. Eje uma nime adebadya tuque ecuana ahua. Ejeneyadya tuja tuque micuanara nrecada cuanaque chipiru tyacara ayaque. Jadya tibudya tura micuana baticara ebari aya. ²³ Tito tu ique Ecuana Cuatsashaquique mere juyaju ique tsahuaquique. Tuatsehue cuayaque ecitse tu ecuana tsehuequique. Macedoniaju cuanaque Jesús queja

ecatyati cuanaja ecuadishaque tatse. Tatse jida inime cadu-
jutiya eque tatsejatu peya cuana Cristo muimereya. ²⁴ Jida
iyuhueda tsehue ecana nebatsacue. Era cuejahua equedya
nejucue. Micuanara jadya batsae ahuaju, Cristo queja ecaty-
ati cuanaque tuna cuadishaqui juchine cuanara paadeba
micuanara ecana jida batsachineque.

9

*Pablora ecana "Icuenetadya nrecada cuanaque tsahua
ishu chipiru nesitacue" jadya acuareque*

¹ Eje uma cueja jatsu micuana eau. Judeaju nrecada
cuanaque Jesús queja ecatyati cuanaque chipiru tyaishu.
² Eratu adebaya micuanara nrecada cuanaque dyaque
tsahuacara ayaque. Icuene ique quisaratichine Macedonia
juque Jesús queja ecatyati cuana tsehue. "Corintoju cua-
nara tumeque epu japadama aniya cuanara jadya tuna tu-
naja inime taca tyau acara aya chipiru Judeaju cuanaque
tuna tsahua ishu. Rियाque mara cuetichine equeque tu-
najatu ecana jadya tsahuae acara aya", jadya tuna cueja-
chine. Micuanara tsahua ana ayaju bahue juatsutu Mace-
doniaju cuanara dyadi tsahuacaradya achine. ³ Icuene tuna
cuejachine micuana Corintoju cuanara nrecada cuanaque
tsahua ishu chipiru tyacara ayaque. Aijama ni chipiru
esitaque ecuana jutihuaju, tume taa micuana yanacana
sumi achine. Jadya tibudya rique icueneta cuadishadya
aya riyaque ecuita cuana micuanaja amena chipiru esita
juishu. ⁴ Ique Macedoniaju cuana tsehue junatitsu ecuana
ebisunatiu, micuanaja chipiru sitama jari banatitsu, micua-
naja amena esita bucha baya tibu. Micuana bacue tume-
baedya ebisuu. ⁵ Jadya tibudya tuque icuenetadya Tito
peya cuana tsehue cuadishaya ique junatimajudya micuana
chipiru sita tsahua ishu. Nesitacue micuanara aana achine
baedya. Ique jutihuaju amena dutya esita paju. Esita ni
micuanaja amena chipiru aniya, tume micuana peya cua-
nara pana adeba aya yuneridya micuanara ecana micuanaja
chipiru tsehue nrecada cuanaque tsahuacara ayaque. Tume
tuna bahue judadiya micuanara casada tsehue tyamereyaju
ama tyayaque, micuanaja inime taca tyau ayaque.

⁶ Neadebacue riyaque: "Ejera ni umadama ai uhuaya,
tumbaedya tujatu huesaya umadamadya. Ejera ni uhuaya
jetiana, jetiamadya tujatu huesaya". ⁷ Icuenetadya pana
tupu inime neacue eje uma chipiru tyacara ayaque. Peya
inime tsehue ama netyacue chipiru ni ejera casada tsehue
tyamereyaju ama. Pureama tsehue netyacue. Yusratu
iyuhueda baya ejera pureama tsehue chipiru tyayaque.

⁸Yusujatu casa aniya micuana jetiama chipiru tyanitya ishu. Dutya jidaque tura micuana etyau. Dutya ai micuanara sareyaquedy a tuque micuanaja aniajeya. Jadya aatsu tuque micuanaja anidadiya pureama tsehue nrecada cuanaque tsahua ishu tunaja jida ishu. ⁹Jadidya tu ehue Yusuja quisarati: “Tilla tupu amatu Yusuja tyabahue aima cuanaque. Jida tsehue tujatu eana bajacaya ama”. ¹⁰Yusuratu tyaya tee puji ecaca uhua ishucue. Turatu ehuacue ehuijacue daneshaya, ecuanaja ara ishucue ani ishu. Turadya micuana tyaya dutya sareyacue. Umaneshayatu dyacue umada micuanaja ai aniyacue, micuanaja aima nrecada cuanaque tsahua ishu. ¹¹Jadya tyae micuana Yusura aya jetiama micuanaja nrecada cuanaque jetiama tyaishu. Micuanara sitachineque ecuanara Jerusalénju dujuhuaju, tuhucue nrecada cuanaratu yusurupai aya Yusu, micuanara dyacue tsahuahua tibu. ¹²Jadya tsahuacue nrecada cuanaque aatsu tuque ecuanaja eana tunara sareyacue jipidya ama tyaya. Tumbaedy a tuque ecuanaja eana Yusu yusurupai pureama jadya amereya. ¹³Micuanara cuadishayacue inatsatsu tunajatu Yusu pureama aya. “Corinto jucue micue cuanara ecuanaja dyacue tsahuahua. Pusha ama cuitadya tuna Cristo queja catyatihua, tura cuatsashaya ecue eana jucua tibu. Ecuana tsahuayaju tuna ejitaju jucua Cristo queja yuneridya catyatihucue”, jadya tunajatu Yusu aya. ¹⁴Yusu queja tuna bacabacajacaya ama micuanaja ishu, micuana dyacue iyuhueda baya tibu. Yusurupai tunajatu Yusu aya, “Miquemi Corintoju cuana tsehue dyacue jida juhua”, jadya tunajatu Yusu aya. ¹⁵Yusura ecuanaja dyacue jida iyuhue tsehue naruya. Tura ai tsujema tyau ahua buchique; tumeque etsujequi piyebatilla tupu ama buchique tume. Jadya tibudya neara. “Miquemi dyacue jida ecuanaja tsehue”, jadya tuque ecuanaja ataqui.

10

Yusura Pablo Jesúsja quisarati cueja ishu cuatsashacuareque

¹Ique Pablo. Yusura cuatsashaya tibu micuana micuanaja jida ishu cuejaya. Cristora ecuanaja jida inime tsehue cuejaya tibu, micuana era cuejacara aya. Tura ecuanaja jida tsehue baya. Jadidya micuana era bacara aya. Jadya ama bucha umaera aya erapa micuana mubaya jadya. Erapa micuana quirica ecue camadya nereda aya, japada equera camadya jadya. Amena micuana tsehuejupa ique bají usi, jadya tunara aya. ²Ique tuhua jutitsu micuana casada tsehue nereda aticarama aya, Yusura ique cuadishahucue ejitaju

cabamereti ishu. Jadya ama bucha tuque jadidya atiya, jida ama aniya jari cuanaque. Umaera aya iquepa Yusuja ama ecuatsashaque. Erapa ecue casa eque cuitadya jutidya ecana era amereya eque jucarama juya cuanaque nerecaturaya, jadya tunara aya. Ique tuhua jutitsu tuque Yusuja cacuatsashati casada tsehue nereda atiya ecue ishu jadya quisaratiya cuanaque. ³ Rehua riyaque yahua ju ecuana Yusu adeva baecua cuana ducu aniya. Jadya ama bucha ecuanajadya jutidya casa tsehue ama tuque ecua ecana Cristo queja catyatishamerecara aya. ⁴ Riyaque yahua juque casa tsehue ama ecua aniya, Yusuja casa tsehue. Riyaque casa tsehue ademe tuque ecua Cristo tsehue cahuaitiya cuanaque casa secaya. Yusuja casa tsehueju tunara ecua ijahue ataqui ama baya. Sudaru cuanara etare jida eaque eyuamaturau bucha jadidya tuque ecua tunaja casa pana yuamaturatilla aya. ⁵ Tunara ecua ejenemerecara aya tunara yunerique ama ejeneyaque. Dyaque bahueque bucha cabatitsu, tunara ecua Yusu adevamerejacacara aya. Tunaja inime taca eque, Cristora cuatsashaya eque juma juatsu cuana Ijahua quejaque einajaca ejuu bucha tunajatu inime juya. Peya enubiuju etare epene buchique tuna. Jadya ama bucha tuque ecua ecana Yusuja casa tsehue jadya quisaratishajaca inime tupumerejaca jadya aya. Sudaru cuanara etare pene ishunque eyuamaturatillau bucha, jadyatu ecuanara yuamaturatillaya tunaja casa eje umaja Cristo adeva ishu, tura cuatsashaya eque tuna juishu. ⁶ Tuhua junatitsu bahuedya junatiya eje cuanaque era amereya eque juyaque, eje cuanaque era amereya eque ama jadique. Cuatsashaya eque ama jubaecua cuanaque tuna emajaca tyaya inime cacuareti ishu. Dutya ecana inime cacuareticarama juya cuanaque tuna era nerecaturadadiya.

⁷ ¿Eje bucha juatsu jatsu umaera ecuepa aijama ejeque casada tsehue cueja ishunque jadya aya? Umae tuhua cuanaque tuna juya tuna cuita camadyapa Cristoja ecuadishaque jadya. Ique, eatsehue juneniya cuanaque jadyapa ecua Cristoja ecuadishaque ama. Tuna yuneridya Cristoja ecuadishaque caadebatiya tibu, paadebadya tunara ecua dyadi tumbaedy a Cristoradya cuadishahuaque. ⁸ Icuene micuana cuejahua ique Ecua Cuatsashaquira mepehuaque tuja quisarati cuejaqui juishu. Bisutsu ama micuana cuejanucaya, yuneriquedy tibu. Yuneridya ique jadique. Turadya ique cuatsashahua. Turadya ique mepehua ai micuana yuamaturatilla ishu ama, Yusuja Espiritura micuana amerecara aya eque juaje ishudy jutidya tsahua ishu. ⁹ Bajitura ishu era quirica cuadishaqui nereda bucha

cuejae jadya ahua bucha micuana inime tupumerecarama aya. ¹⁰ Era quirica cuadishaya eque camadyapa micuana casada tsehue nereda aya. Huarajira cuana ehuenue buchapa hueneya. Micuana tsehue cabatitsupa micuana bajida tsehue isaraya. Aishupa tuna ique quisaratiyaque bacahuanama. ¹¹ Jadique quisarati tu pusha pusha. Era quirica eque nereda ahua bucha, neredaedya micuana atiya micuana queja jutitsu.

¹² Umae tuna tuna tacadya jutidya casumitiya, tuna tacadya jutidya cacuatsashati cuana quiyatihua eque anitsu. Inimema tuna, peya cuana bucha dyaque jida bucha cabatitsu. Ique ita taca casumitinime ama. Peya cuana bucha dyaque jida cabatinime ama ique. ¹³ Yusura ni ique cuatsashaquena ama juhua, tume jadya ama ique equisaratiu: “Yusura cuatsashayajudya ique cuaya”. Yusuradya ique cuadishaya. Turadya ique cuejahua eju ecue tuja mere ataquique, eju ecue tuja mere ataquimaque jadique. Turadya ique cuadishahua micuana Corintoju cuanaque tsahua ishuh. ¹⁴ Yusuradya ique cuatsashahua micuana queja cuaishu. Jadya juyara tuque Yusura ique amerehuaquedya aya. Eradya micuana cueja metse ahua jidaque quisarati Cristora micuana Ijahua quejaque einajacamereuque. ¹⁵ Umaera micuana cuejahuadya Yusuja quisarati. Jadya tibudya “Pablo tuatsehue juneniya cuanara peadyatu Corintoju cuanaque Yusuja quisarati bahuityahua”, jadya ejeja buchaja inime paju ama. Era micuana eje buchadya Cristo queja nimeedya jutidya amerecara aya. Jadya tibudya ique micuana queja cuanucacara juya micuana tsahuatinuca ishuh. Micuanara amena Yusuja quisarati pana adeba ahuaaju, tuque ecuana peya cuana ecuejanucau. Ique cuaya eju ique Yusura cuadishayaju cuita camadya. ¹⁶ Tume micuana amena tsahua amena aatsu ecuana ecuaeu Cristoja quisarati cuejara, Corinto yueque tibene aniya cuanaque Yusu queja judiruh ishuhque quisarati cuejara. Eju peya cuanaja cuejamaju camadya ecuana cuaya. Tee metsequi juque ehuahueq earaqui huesaya bucha ecuana juya ama. ¹⁷ Jadya tu ehueene Yusuja quisarati: “‘Ecuana ecuana dyaque jida’ jadya ecuana jutaqui ama. ‘Ecuana Cuatsashaquique peadya camadya tu jidaque’ jadya camadya ecuana jutaqui”. ¹⁸ Jida ecuana Ecuana Cuatsashaquira sumiyaju camadya, ai ecuana taca casumiti juatsu ama.

11

Pablo pusha pusha quisarati cuejaqui cuanaque bucha ama jucuareque

¹ ¡Arequé micuanara ebacaudya jutidya ique inimemaque equisaratiu bucha quisaratie juyaju! Nebacacuedya jutidya ique. ² Yusujatu jadique bijidama tumbaedyá ecue micuanara Cristo jacayaque juatsu, peya queja catyati ishú. Era micuana Cristo queja cuita camadya catyatishahua. Epuna ehue ebari yahuíque juya tsehue camadya caquemiti ishúque buchique tume. Epunajatu tumeque deca camadya iyuhueda bataqui, ai peya ama. Tumbaedyá micuana Cristo jaque cuita camadya jutaqui. Tuque junanucahuaju micuana bameretsacara aya tuque iyuhueda bajacahua ama cuanaque. ³ Era micuana jidama inime ishú baya micuana ijahue eatauju. Satanásra Eva ijahue ahua bucha, jaidyatu aniya micuana Cristo pureamaturamerejacacara juya cuanaque. Iyuhueda tunara micuana bamerejacacara aya. ⁴ Ique tuhua juticuare patya micuana cuejacuaredya Cristo eje buchique. Cuejacuare micuana era Yusuja Espíritu tu micuana queja junaya jadya. Cuejacuare micuana Yusu queja judíru ishúque quisarati. Jadique ejenetsu micuana Cristo queja catyatihua. Yusuja Espíritu tu micuana queja junahua. Iyacua bacue micuana pusha pusha bahuityaqui cuanara bape cuita bahuityaya, Jesús pa era micuana cuejahua bucha ama. Aniyapa bape eje bucha Yusu queja judíru ishúque. Aniyapa peya Espíritu, jadya tunara micuana cuejaya. Jida pureama tsehue tuque micuana ecana ijacabacaya. Bacatsu micuana ecana ejeneya.

⁵ Tunapa quisarati cuejaquique dutya ebareque jadya tuna catiya. Jadya ama tuna. Era tuna ejeneya ama tuna ique bucha dyaque ejuuque. ⁶ Iquepa cabahuityatihua ama umadaja yacuaju jida quisarati ishú. Pajudya datse jadya eratu jidadya adebaya era ecana bahuityayaque. Etehua bahuitya bahuitya ama juya, dutyaja yacuajudya. Jadya eque ique dutyaradya adebaya ique eje buchique.

⁷ Jadya ama buchatu umae quisaratiya: “Pablora tuna tsuje bacahua ama, Yusuja quisarati neri ama cuejahua tibu”. Ique mere juhua ecue emetucu tsehue ecuita dyaque nerecadaque bucha Cristoja quisarati cuejayaque tsuje bacatsu ama. Jida tuyu di taa tu tsujema cueja ishú. ⁸ Ique Corintoju Yusuja quisarati cueja juyaju, peya epu cuanajura Jesús queja ecatyati cuanara tuque ecue chipíru cuadishacuare. Peya cuanara tuque ecue chipíru cuadishacuare, ecue micuana ni riya piji buchique tsuje bacama tsahua ishú. ⁹ Ique micuana queja jucuare patya ecue ai aijama juhuaju ni ai buchique micuana bacacuare ama ni ejeque. Macedonia juque ecuana tsehuequi cuanara tyacuare dutya ecue ai aijamaque. Ni eje tupu micuana bacaya amadya micuana jaque ecue ishú; bacanime

amadya micuana ecue. ¹⁰ Ni ejeque buchique tuque tsuje bacaya amadya Yusuja quisarati cuejayaque. Acayaju dutya queja ique junenitiyara tuna bacatiya amadya tunaja ique etsujequi tyaishu. Riyaque ri yuneridya. Ique pusha pusha arida ama, Cristoja inime eque ique aniya tibu. ¹¹ “Pablora ecuana chipiru bacaya ama, ecuana iyuhuedama baya tibu”, jadya ni tu umaeja inime juya. Jadya juatsu ama. Dyaque iyuhueda micuana baya. Yusratu adebaya.

¹² Tsuje bacaya amadya micuana era Yusuja quisarati cuejaya tsuje. Pusha pusha cueja juya cuanara micuana tsuje bacaya bahuityaya tsuje. Era ni micuana etsujebacau, “Dutya tupudya ecuana Pablo tsehue; tura dyadi micuana tsuje bacayadya tibu”, jadya tuna ejuu. ¹³ Pusha pusha tsehue tuna Yusuja ecuadishaque. Tuquepa mereya jadya juya. Ijahue tunajatu ecana aya, Cristoja quisarati cuejaquique neripa ecana jadya tuna ejenemere ishu. ¹⁴ Butseejuque amadya tu tumeque tunara peya cuana jahue acara ayaque. Satanás cuitadyatu ecabapetiu barepa juque Yusuja quisarati cuejaqui bucha. Ecuana jahue aishutu tuque ecabapetiu ai jida piji bucha, hueca jida piji bucha. ¹⁵ Satanásra ni ecuana jadya jahue acarae aya, jutaquiju taa tu bape ama didya tuque merequi cuanaque ecuana jahue aishu ecuita dyaque jida bucha cabapeti ishu. Ejeque huecaca tuna jidama atabuque tuna cuitadya jidama juhua tibu. Tuna eje bucha juhua eque cuitadya tuna Yusura tsujetyabuque.

Pablo Yusuja ecuadishaque neri juya tibu canerecaticuareque

¹⁶ Cuejanucaya micuana era. Ique inimema bucha micuanaja inime paju ama. Jadya ama bucha, arepa micuanara ique ai baecuasi baya ama bucha, nebacacue ique quisaratiyaju. Riya piji micuana cuejanucacara aya ique eje bucha juhuaque, nerecada juhuaque jadya, Cristoja quisarati cuejaqui neri juya tibu. ¹⁷ Ita taca casumiti juatsu, Ique Cuatsashaquique juhua bucha ama ique juya, inimemasique bucha jutidya. Ecuana Cuatsashaquira ique ni riya piji buchique casumitishahua ama ni aiju. Jadya ni juya, tume inimema buchadya jutidya juya. ¹⁸ Umaetu tuna taca casumitidya jutidya juya, peya cuana queja casumimereticara juatsu. Cacuejatijacaya ama tuna aique, eje buchique jadique. Tumbaedy aique cacuejatiya ique aique, eje bucha juhuaque jadya. ¹⁹ Micuana micuana dyaque inimequi cabatiya. Jadya ama bucha micuana pureama tsehue ijacabacaya tume inimema cuanaque. ²⁰ Micuanara tuna jiyuya Yusuja ecuadishaquepa ejuu jadya juya cuanaque. Tuna tuna casada tsehue micuana queja cameremeretiya. Tunara

micuana secaya micuanaja aniyaque, micuana aima amere ishu. Ijahue tunara micuana aya. Tunara micuana bacaramaque eata bucha bae aya. Bahuapajaya tunara micuana. Arepa tunara jadya aya ama bucha tuque micuana ecana jida tsehue batsaya. ²¹ Ique bacue bisuhua micuana jadya bae aishu. Casadama juatsu peya jida tsehue bau, jutaquiju taa ique dyaque casadama juhua micuana tsehue.

Cuejajacaya ama tunara micuana tuna cuitadya jutidya eje bucha juhuaque. Casumiti tu inimema cuana jaque. Jadya ama bucha era dyadi micuana cuejayadya ique Yusu mere juyaque, eje bucha juhuaque. ²² Hebreo neripa ecana. Ique tumbaedy. Israel eque ejuracanaquepa ecana. Ique tumbaedy. Abraham eque ejuracanaquepa ecana. Ique jadiquedy. ²³ Cristo merequiquepa ecana. Eratu dyaquedy merehua, tunara merehua bucha ama. (Ique inimema bucha quisaratiya.) Cristoja quisarati cueja tibu eje uma ishatana etare apudaju juhua, tuna bucha ama. Eje uma catsacatsa atana juhua huaca biti epica tsehue. Eje uma iyetajeri juhua. ²⁴ Israelita cuanaja huaraji cuanara catsacatsa amere pishica ahua ebebacuaju, huaca biti epicaque huitu pajida tsehue. Eje uma nrecatura tunara jadya catsacatsae aatsu ahua. Dutya catsacatsaju tunara quimisha tunca puscurucu earacana cama acuare. ²⁵ Catsacatsa amere quimisha acuare acui tsehue Romaju cuanaja huaraji cuanara. Maremaresha pidya tunara tumu tsehue acuare. Huidijeri quimisha jucuar cuaba aridaque ique dujuquique nubitsu. Jupidya jucuar cuaba aridaque enaju nubihuaju ena patya dedaju peadya meta, huecaca juchinepe nuca jadya. ²⁶ Epu cuana tupu juneniyaque eje uma pereu cabatihua majutaqui. Eje uma rique ahua cueri espere epesitana cuanaque. Junenihua ique chiri puji cuana casada tsehue ai secaqui cuana juneniya eque. Ecue ata israelita cuanara eje uma iyecara ahua, tumbaedy israelita ama cuanara. Eje uma acuatsuru ahua epu cuanaju ecuita cuana dyaque ecahuaiti cuanara. Ecuita tsecada anitaya cuanaju juneniyaque, enaja ecuaque eque cuaba arida cuana eque juneniyaque majutaqui pereu tsehue junenihua. Eje uma iyecara ahua ique iyuhueda bucha baqui cuanara. ²⁷ Dyaque casada mere juhua casteretsu rihuiya tupu. Eje uma cuetishae meta ahua tahuimara. Ara idu, iji idu jadya nrecada juhua. Eje uma aijamae ecue juhua ara ishuque, jutu ishuque, eju tahu ishuque. ²⁸ Rियाque camadya ama, tumbaedy tuque jidama inime ishu baya dutya epu cuanaju Jesús queja ecatyati cuanaque. Era tuna eje bucha Yusuja biji equedy jutidya anishacara aya. ²⁹ Jesús queja ecatyatique jidama inime cuanaju baatsu, ique tume-

baedya peya inime juya; ique cuitadya tumeque inime cuanaju nubihua bucha tuque ecue inime juya. Tunara Yusu cahuitisha ishunque ayaju ique cahuaitiya. ³⁰ Ique ni ita taca casumiticara ejuu, tume ique canerecaticuareque ecasumitiu, ai era inimeradya jutidya ahua cuanaju ama. ³¹ Yusura ique adebaya pusha pusha ama juyaque. Tuquetu Ecuana Cuatsashaqui Jesucristoja Etataque. “Dyaque jida, casada taa tuque”, jadya neajacara ama. ³² Yusura ique naruhua ecue quicueneti ishucasa aijama juhuaju. Tume patya ique anicuare Damascoju. Anicuaretu ecuita huaraji Aretasja tuhua cuanaque naru ishucasa eiyaque. Tumeque ecuitara ique iyecara acuare. Jadya tibudya tujatu nityacuare epu ebari etsecue naruqui cuanaque, ique cuinanayaju inatsa ishucasa. ³³ Ecue ecare eadeba cuanara tsahuacuare. Jiti ebariju tunara tehuacuare. Epu ebari penequi dyaque ecue emajaca ecue tunara jiti ebari sogatsehue tisunetsu butyacuare. Jadya huanae ique jucuar.

12

Jesúsra Pablo petamerecuareque, tuque cuitadya eje buchique cabamereticuareque

¹ Ecue ishucasa tu jidama ita taca casumiti ishucasa. Jadya ama bucha micuana cuejaya ique eje bucha juhua cuanaque. Eje uma bau tuque ahua tahuiju buchique ejitajuque ama cuita, ejeja bamaque. Ecuana Cuatsashaquira bamerehua ique bahuitiya ishucasa. Bamerehua tura ique etehua neri cuitaque. ² Amena peadya tunca pushi earacana mara ique Yusura tuja yacuaju yume duju acuareque. Yuneri cuitadya ique jadya juhua Cristo queja ecatyatique. ¿Riyaque inime ecue cuitadya tura dujucuar? ¿Tahuiju bucha ni taa tura dujucuar? Caadebatiya ama ique. Yusura camadyatu adebaya. ³ Muya jutidya tura dujucuar tuja yacuaju, tuque aniyaju. Cuejanucaya rique era. Eje bucha dujutanae cuana taa ique jucuar, riyaque inime ecue cuitadya ni, tahuiju ni. Yusura peadya camadyatu adebaya. ⁴ Tuhua tuque bacahua dyaque muida, mudaque cuejataquique ama. Cuatsashatahua ama ique peya cueja ishucasa. Tuhua tuque bacahua quisarati dyaque etehuaque peya cueja ishucasa. ⁵ Jadya ique jucuar, ecue casa ecue ama, Ecuana Cuatsashaquija casa ecue. Jadya tibudya ique casumitiya ama. Eratu casumiti ishucasa Jesúsra tuja casa ique casadama ecue bamereyaque camadya. ⁶ Ique ni ecasumitiu, Cristora ique bamerehuajudya jutidya, eje buchique ama di taa; tume ique jadya juhuaquedya. Pusha

pusha ama ique juya. Casumitiya ama ique jadyaju. Micuanara ique bahuadya ique eje buchique. Micuanaratu bacahuadya era quisarati cuejayaju. Quijacabacamereticara juya, era tahuiju bucha bahua equeque ama, Yusuja quisarati equeque, micuanara era cuejayaju bacahuaquedya.

⁷ Cristora ique eje buchique bamerehua cuanaju dyaque inime metseque ecabatiuju, tura ique jidama inime cuana eque cuetishahua. Acuijara tatahua bucha jee; jadya ujeedya tuque inimeju camadya bahua. Yusuratu Satanás cuatsashahua ique jidama inime cuanaju amere ishü. Yusura jadya amereya tibu, tuque ecue jidama inime cuana aniya, ique ejeque ecuita baequedya jutidyaque enimeaputauju. ⁸“Patero taa eaqueja inime jidama cuanaque”, eje uma jadya au tuque ahua Ecuana Cuatsashaquique. Jadya aquimisha tuque ahua. ⁹ Quemitsa quimisha Ecuana Cuatsashaquira ahua: “Secaya ama mique jidamaque inime cuana. Jadya ama bucha narujacaya ama mique era iyuhue tsehue. Riyaque camadya tuquemi sareyaque. Mique casadama cabatiyaju, ecuetu aniya mique dyaque casa tyaishuque”, jadya Yusura cueja cueja achine. Tume tuja ique uje jarasha ishü ebacaajeuquedya jutidya, pureama jutidya juya. Cristora ique dutya huecaca casaturaya tibu. ¹⁰ Pureama ique jujacaya ama, arepa ique casadama cabatiya ama bucha, arepa tunara ique ijillahuanaya ama bucha, arepa ecue ai aijama paju ama bucha, arepa tunara ique Cristo jaque baatsu jidama aya ama bucha, arepa ique jidama inime cuanaju nubiya ama bucha. Jadya canerecatie juya Cristoja inime eque ique aniya tibu. Jadya ama bucha ique pureama juya. Dyaque casadama cabatiyaju, Cristora ique casaturaya.

Pablora Corinto juque Jesús queja ecatyati cuanaque jidama inime ishü bacuareque

¹¹ Ique inimemasi bucha juhua, ecue ishüdyä jutidya jida quisarati aatsu. Micuanaradya jadya amerehua. Micuanara ni ecue ishü jida quisarati aquena juhua, jadya ama juquena juhua. Micuanaratu jida quisarati aya tume Yusuja quisarati cuejaquipa ejuu jadya cuanaja ishü camadya. Ique tunaja jetiedyaque ama. ¿Ai jatsu tuna juya, ecue dyadi ataqui ama baishu? Ecue casa tsehue amadya datse tuque aya. ¹² Ique micuana queja juticuare patya, eje uma audya tuque acuare Yusuja casa bamere ishü. Tuja casa tuque dutyaja yacuaju eje uma bamere ahua ni ejeque ecuitaja tuja casa eque ataquique ama. Jadique baatsu micuana bape baatsu yatsanaca quisha juhua. Baatsu micuana adebahua era Yusuja dyaque casa tsehue ayaque. Jadya adebae micuanara ique ahua yuneri cuitadya Yusuja quisarati cuejaquique, era

cuita camadya Yusuja ecuadisha cuanara ayaque baatsu. ¹³ Peya epu cuanaju ique junenicuare patya Jesús queja ecatyati cuanara tsujema tyabahue jucuare ai era sareya cuanaque. Corintoju bacue micuana ni baca pidya acuare. ¿Jadya tibudya ni taa micuana era peya cuana iyuhueda baya bucha iyuhuee ama cuana baya bucha cabatiya? Cahuaitishahua ni micuana era chipiru bacama aatsu, nenerecabacue ique.

¹⁴ Bati beta micuana acuare amena. Iyacia micuana batinucacara aya. Tuhua jutitsu micuana bacatiya ama chipiru. Micuana micuana era sareya, micuanaja chipiru ama. Micuana micuana ecue ebacua cuana buchique. Ebacua cuanaquera amatu etata cuanaque baya, etata cuanaquera. ¹⁵ Pureama tsehue patsume dutya ecue aniyaque micuanaja jida ishu. Cacasati neri juya micuana tsahua ishu. Jida iyuhueda tsehue micuana ecue bajaca nime amadya, arepa ique micuanara iyuhue apushaaiejyaju cabatiya ama bucha.

¹⁶ Bahuedya ique umaera quisarati aya cuanaque: “Jejee, pusha amadya ecuana Pablora rehua jucuare patya tsuje bacacuare ama ni riya piji buchique. Jadya ama bucha tura ecuana inime adebabada tsehue sechua etsujequi etehua seca, babi pujira cuanubi armadillaju etehua iyemere eau bucha”, jadya micuana umae pusha pusha juya. ¹⁷ Ni ejeque buchique tuque cuadishahua ama micuana chipiru ecue ishu micuana seca ishu. ¹⁸ Canerecatihua ique Tito queja micuana cuajimere ishu. Tuatsehuedya tuque peya ecuana tsehuequique cuadishahua. Micuana micuana bahuedya tatsera micuana ni riya piji buchique jahue ahuaque. Tito tsehue yatse beta tupu. Jida tuyu yatse inime cadujutiya. Beta tupu yatse inime cadujutiya micuana tsahuacacaraque.

¹⁹ Ejeja cuana ni tuque micuanaja inime juya: “Pablo ni tu quicueneticara juya, ecuita dyaque inime metseque jucara juya tibu”, jadya ni tuque micuanaja nime juya. ¡Jadya ama tuque! Yusu tuque ecue pureamaturataqui, micuana ama. Riyaque micuana cuejaya Cristora cuatsashaya tibu. Dyaque iyuhueda micuana baya, micuana ecue eatsehuequi cuanaque. Dutya ique eje bucha juyaque tu micuanaja Cristo dyaque adebaaje ishuque. ²⁰ Era micuana dyaque jidama inime ishu baya. Ique tuhua jutihuaju ni micuana era anishacara aya bucha ama aniyaju batiya. Nereda bucha cuejae ni micuana atiya casada tsehue, arepa micuanara ique bajida jadya aya ama bucha. Umae ni micuana cahuaiti arida jari. Peyaja ai aniyaque bijiseri, peya cuana tsehue masadama cahuaiti jadya ni micuana juya. Umaera ni tuque micuana micuanaja jida ishuque camadya inime tupuqui aya, peyaja ishu pusha pusha, peyaja ishu quisarati jadya

ni micuana juya. Umae ni micuana casumiti arida. Umae ni micuana inime yuamaturaquique. Jadya anie jutidya ni micuana juya jari. ²¹ Eje uma micuana cajuchatijacacarama juya ni micuana inime cacuareticara juya. Eje uma decaratu caquemitiqueremaque jaraquerehua; tumbaedy aye uma epunara caquemitiqueremaque jaraquerehua. Bisutada micuana juhua, jadya jujacatsu ama. Peya huecaca cuanucatsu dyaque peya inime, capeyati jadya ique paju micuana eje bucha anie juhuaque adebatsu. Cristo era adebamerehua cuanaque jadya anie juya jari baatsu, Yusura ique dyaque pabisutura micuana jadya anie juyaju.

13

Pablora inime cacuareti ishuque cuejacuareque

¹ Riya micuana cuaquimisha ishu cuajitinucaya. Tuyu ama anihua cuanaque tuna nerecaturatiya. Jadya tuque atiya quimishara (jadya ama juatsu betara) jadya tuque eje bucha juyaque cuejatsayaque juatsu camadya. Ehuenedya tu Yusuja quisarati: “Ejeque nerecaturama jarijudyatu tume betaja jadya ama juatsu quimishaja tuque jidama juchineque cuejataqui”. ² Cuejacara micuana aya micuana cajuchatihuaque, dutyadya micuana. Ique cuabeta ishu cuacuare patya micuana cuejacuare inime cacuaretiya ama cuanaque tuna nerecaturatibuque jadya. Iyacu micuana cuamadya cuejanucaya. “Jidama juya cuanaque tuna casada teshue nerecaturatiya” jadya. ³ Micuanara ique Cristoja ecuadishaque ejitaju cabameretishacara aya. Era casada teshue nereda ayaju micuanara adebadadiya Cristo ique eque quisaratiyaque. Micuana ducudya micuana Cristora adebamerehua tuque casadaque, ai casadamaque ama. ⁴ Casadamaque emajuu bucha majuetu Cristo jucua curusuju. Iyacuatu tuque chacha aniya. Yusuja dutya casa tujatu aniya. Tumbaedy ique casadama; ecue cuitari aijamadya casa. Cristo queja ique ecatyati tibu, rique ecue casa aniya. Yusuja casa rique ecue aniya. Ejetsunue tupu ishu ama buchatu Cristo casa cabameretijacahua, tume baenucadya ejetsunue ama micuana ecue nereda aishuque casa bamerejacahua. Iyacu bacue micuana queja jutinuatsu micuana Yusuja casa eque nereda atiya.

⁵ Micuana taca canimeadebati nejudue, ique nenime adebaume. Micuana taca cabacadurati nejudue jadya: “¿Ecuana eje bucha anie juyaque ecuana ejitaju caadebameretitaqui Jesús queja ecatyatique? ¿Jesucristoja casa equedy ecuana aniya? ¿Cristo queja ecatyatique jadya ecuana juya, jadiquedy? Tuaequeja ni micuana inime

catyatijacaya ama, tume tuque micuana pana adebadya aya, tuque micuana peadya peadya tsehue aniyaque. ⁶ Areque micuana eadebau ecuana Jesús queja nimee jujacayaque ama. Ecuana ecuana Cristoja quisarati eque aniya. ⁷ “Tshahuacue micue cuanaque Corintoju cuanaque tunara ai jidamaque eauju”, jadya tuque ecuanaja Yusu abahue. Micuana ni inime cacuaretiya, tume micuana Yusuja casa tsehue nereda anatiya ama. Jadya ni juya, tume tunajatu inime juya, yuneridya ique bajida jadya. Paquisarati ecana tuna eje bucha quisaraticara juya eque. Eratu jidama ama inime baya. Micuana Yusuja biji eque ani ishuque camadya tuque jidama inime ishu baya. ⁸ Yusuja quisarati eque neri aniya cuanaque tuna bijidamaduraya ama. Dyaque jida tuna tshahuaya jutidya. ⁹ Micuana Yusuja biji eque aniyaque juatsu ecuana pureama juya, arepa peya cuanara ecuana casadama baya ama bucha. Jutaquijudya tuque ecuana Yusu bacajacaya ama, micuana tura amerecara aya bae cuita juishu. ¹⁰ Icuenetadya rique micuanaja quirica cuadishaya, micuana inime cacuareti ishu ique tuhua jutimajudya. Cuejaya bae ni micuana juya, tume micuana ique jutitsu casada tsehue nereda aya amadya. Ecuana Cuatsashaqira tyahua casa micuana casatura ishu, ai micuana yuamatura ishu ama, tumebaedya micuanaja tuja Espíritu pureamaturajaca ishu ama. Tura ique daneshaaje ishuque bucha amerehua, aijama daneshajaca ishuque bucha ama.

Camadya ishuque quisarati

¹¹ Amena ishu rique riyaque quisarati aya, ecue eatsehuequi cuanaque. Yusura eje bucha amerecara aya eque jucara ebari nejudue. Nebacacue era micuana cuejahuaque. Ecadutyati nejudue Cristo iyuhueda baishu, cuatsashaya eque juishu. Eje bucha ani cayuamati, cati cati tsehue ama neanicue peya cuana tsehue. Micuana tuyu jadya anie juyaju tu Yusu micuana tsehuedya. Tura micuana bahuityaya peya cuana iyuhue tsehue baishu. Anishaya tura micuana dutya tupu nimee peya cuana tsehue, pureama jadya.

¹² Casitatitsu quisaratibare, emetucuju quinati jadya nejudue, peya cuana tsehue iyuhueda cabatiyaque cabamereti ishu.

¹³ Dutya rehua Jesúsja cuanara micuana isaramereya.

¹⁴ Ecuana Cuatsashaqui Jesucristora nenarucue tuja quiyuhuebati tsehue. Ecuana Etata Yusura tuja iyuhue nebamerecue. Yusuja Espiritura netajijacaume.

Riya tupu camadya.

GALACIA YAHUAJU CUANAJA ISHU PABLORA QUIRICA CUADISHACUAREQUE GALATAS

Riyaque quirica ri Pablora Galacia yahuaaju aniya cuanaja ishu cuadishacuareque. Tuhua tunajatu jetiama yunerique quejeneti ama bahuityacuare. “Yusu queja ni micuana judirucara juya, Moisésra israelita cuana dutya cuatsashahua eque micuana anitaqui. Ecuíta huitu biti micuana catubuti-taqui”, jadya tunajatu ecana cueja bahue jucuaire.

Riyaque quirica tsehue ecuana Pablora bahuityaya Yusura ecuana Jesús queja catyatihuaju Ijahua quejaque inajacamereyaque, ni ejeque cacuatsashati eque juatsu ama. Tura ecuana bahuityaya, Yusupa ecuana pureamaturaya, tura tuja Espíritu eque cuatsashaya eque ecuana aniyaju, ai ecuanaja baba cuanaja bahue eque ani eque cacasatitsu ama.

Umae versículo cuana cabahuityati ishu jida cuanaque tu riyá cuanaque: 2.20; 5.22-23, 25; 6.7,9.

Pablora Jesús queja ecatyati cuanaque isaracuareque

¹ Era ríque micuanaja quirica cuadishaya. Isaraya micuana era. Ique Pablo. Jesucristoja yana atsaquique ique. Ni ejeque ecuíta riyaque yahuaajura ama mepehua Jesúsja yana atsaqui juishu. Yusuratu cuadishahua ama ni ejeque ecuíta buchique ique Jesús merequi cuadisha ishu. Jesucristora cuitadya mepehua. Tura cuitadya cuatsashahua tuja ecuadishaque juishu. Tumbaedyá tuja Etataquera ique mepehua, Jesús majuhuaaju chacha nityatsuranucaqui juhuara. ² Era camadya ama, tumbaedyá dutya eatsehue cuanaque Jesús queja ecatyati cuanara micuana isaramereya. Dutya micuana Galacia yahuaaju cuanaque micuana ecuanara isaramereya, Yusu pureama aishu caradati bahue cuanaque. ³ Yusu ecuanaja Etatara, tumbaedyá Ecuana Cuatsashaqui Jesucristora jida tsehue nenarucue tatseja quiyuhuebati tsehue. Tatsera inime tsapema neanishacue. ⁴ Jesucristo cuitadyatu majuhua ecuanaja jucha tsujetyaqui. Tuquetu majuhua ecuanaja ishu, ecuana Yusu adeba baecua cuanaque jidama cuanaque aniya bucha anie ejuuju. Tuja inime tacatu majuhua. Riyaquetu juhua inime ecuanaja Etata Yusuja jadya inime juya tibu. ⁵ ¡Dyaque jida casada taa Yusu! ¡Muitanajacaya ama tuque! Jadidya paju.

Aijamatu peya eje bucha eque Ijahua quejaque einajaca juishuque, Cristo eque camadya

⁶ Era taa jidama baya micuanara masadama cuita Yusu jacayaque. Ique tuhua micuana tsehue jucuaire patya micuana cuejacuaire arepa micuana jucha arida ama bucha Yusura iyuhueda bahaque. Cuejacuaire micuana era, Cristo queja camadya catyatijaju micuana Yusura Ijahua quejaque inajacamereyaque. Cuejayaju bacatsu tuque micuana ejenequa. Tume tuque micuana masadama Yusu iyuhueda bajacacuaire. Masadama micuana quisarati yunerique ejenejacacuaire era bahuityacuaireque. Tume micuana amena ejenenucaya peya quisarati peya cuanara jida jadya ayaque.

⁷ Yuneri cuitadyatu aijama peya eque einajaca juishuque; aijamatu peya quisarati Cristoja ecuejaque. Umae cuanara micuana cujishaya. Tunara micuana cuejaya: “Yusu queja micuana judirubuque Moisésja cacuatsashati eque cuita camadya anitsu, ai Cristo queja cuita camadya catyatitsu ama”. Jadya pana cuare tunajatu quisarati yunerique acara aya dyaque bape cuita. ⁸ Icuene micuana ecuanara cuejahua Yusu queja judiru ishucuaire quisarati. Ejera ni micuana bapeque cuejaya, jadya cuejaquique ijahuaja etiquiju panubidiru, ni eje tupa cuinana ishucuaire ama. Ecuanara cuitadya ni, jadya ama juatsu barepaju Yusu tsahuaqui cuanara ni ecuanara bape cuejae aya, ijahuaja etiquiju neijehuetanara. ⁹ Ecuanara micuana cuejahuada; cuejanucayadya micuana era. Micuanaratu bacatsu ejenehua Cristo eque camadya Ijahua quejaque einajaca jutaquique. Ejera ni micuana cuejaya Yusu queja peya judiru ishucuaire quisarati, tume jadya cuejaquique Yusura ijahuaja etiquiju paijehue.

¹⁰ Jadya quisarati aatsu, ¿micuanajatu inime juya era ecuita cuana pureamaturaya bucha? Jadya quisarati aatsu tuque Yusu cuita camadya pureamaturaya, ecuita cuana ama. Ecuita cuana ni pureamaturacara aya, tume taa ique Cristo merequique ama ejuu.

Yusura Pablo eje bucha eque quisarati tsape ishucuaire

¹¹ Bahue nejucue riyaque, micuana ecue ebacua bucha cuanaque. Quisarati era cuejayaque tu ni ejeque ecuita riyaque yahuaaju inime equeque ama. ¹² Ejeque ecuita riyaque yahuaajura ama cuejahua; ecuitara ama bahuityahua. Jesucristora cuitadya bahue amerehua.

¹³ Ique ecue ebaba ecanara israelita cuanaja bahue eque anicuaire jari patya tuque dyaque nerecaturacuaire Jesús queja ecatyati cuanaque. Micuana micuana bahuedya ique eje bucha juhuaque. Era tuna dyaque ujeu bahua. Ecue

casada tsehue tuna era acara aya eque ahua; iyecara ebari tuna ahua. ¹⁴ Ique ecue ebaba ecanaja bahue eque anicara ebari juhua. Isarahua tuque ecuanaja cacuatsashatira cuat-sashayaque. Dyaque jidatu era adebaajehua. Peya eatsehue capajiti cuanatu jadya bahuee ama juhua. Ecueta bijidama juhua ecuanaja bahue cuana cuaretana ishu. Ecueta cuana tuque tumeque bahue eque amerejacacarama ahua.

¹⁵ Yusura iyuhueda bahua, arepa ique jucha aridaque juhua ama bucha. Tura ique mepehua tujaque juishu. Ique ejitaju juma jariju tura mepehua. “Pablotu ecuique; meredadibuque tura ique. ¹⁶ Eratu adebamerebuque Jesús ecue Ebacua”, jadyatu Yusuja inime juhua. Jadya bameree tura ahua Jesús. Bameretsu tura cuadishahua israelita ama cuanaque Yusu queja judiru ishuque quisarati cuejara. Jadya cuadishae ahua, ni ejeque ecuita tsehue ama quisaratihua. Cuejatihua ama tuque ni ejeque: “Pana cueja acue Jesús eje buchique; cuejacue ique ecue eje bucha cueja ishuque”, jadya tuque ahua ama ni ejeque. ¹⁷ Ni cuahua Jerusalénju Cristo queja ecatyati cuanaque cuatsashaqui cuana tsehue quisaratira. Arepa Jesusradya tuna ique cuatsashama jariju cuatsashahua ama bucha, cuahua ama ique tuna queja cacuejameretira. Tsunutahua ama ique Arabia yahuaju cuaishu. Tuequedya Damascoju juetinucahua.

¹⁸ Quimisha mara juatsu chamacama cuacuare Jerusalénju Pedro queja. Peadya tunca pishica earacana huecaca tu-aqueja juticuare. ¹⁹ Bacuare ama tuque ni ejeque; quisaraticuare ama ique ni ejeque peya cuana Cristoja ecuadisha cuana tsehue, Santiago tsehue peadya camadya Ecuana Cuatsashaqui tsehuequi tsehue. ²⁰ Yuneridya micuana aya, ique pusha pusha ama juyaque. Yusuratu adebaya era hueneyaque. ²¹ Pedro tsehue quisarati jadya juatsu cuacuare Siria, Cilicia jadya yahuaju. ²² Cristo queja ecatyati cuana Judea yahuaju aniya cuanara ique adebacuare ama jari, ique peya epu cuana eque cuetiya tibu. ²³ Tunara cuita camadyatu bacacuare peya cuana jadya juyaju. “Pablotu inime cacuaetichine. Icuene tura ecuana dyaque nerecaturahua ecuana Jesús queja ecatyati cuanaque. Iyecara ebari tura ecuana ahua. Jesús queja catyatishajacacara tura ecuana ahua. Iyacua bacue tura cuitadya quisarati yunerique cuejaya. Tura cuitadya iyacua cuejaya Jesús queja catyati-taqui que Yusu queja judiru ishu”. ²⁴ Ryaque ecue quisarati bacatsatsutu Judeaju cuanara Yusu pureama acuare:

—Tata, miquemi dyaque jida, mira Pabloja inime cuarehua tibu, —jadya tunajatu Yusu acuare.

2

Pablo Jesúsja ecuatsasha cuana tsehue quisaratira cuacuareque

¹ Peadya tunca pushi earacana mara juatsu yudijidya cuanuca jucuaere Jerusalénju Bernabé tsehue. Tito tuque yatse dujucuaeredya. ² Cuacuare tuhua Yusura ique tuhua cuaishu bahue amerehua tibu. Ique casitaticuare Cristo queja ecatyati cuana cuatsashaqui cuana tsehue cuita camadya. Cuejacuare tuna:

—Eratu israelita ama cuanaque cuejachine, “Jesús queja catyatiyaju micuana Yusura Ijehua quejaque inajacamereya”, —jadya tuna cuejacuare Cristo queja ecatyati cuanaja huaraji cuana.

Era ni ecana jadique pana cueja ama aquena jucuaere, dyaquedy a ni tunara cuejamerejacaquena jucuaere, tume ni dutya era mere achine cuanaque, aya cuanaque yanacana ejuuque. ³ Tunaratu jidadya bacuare era ai eje bucha ahuaque. Titotu eatsehue junenicuare. Casada tsehue ama tunajatu ecuita huitu biti catubutishacuare, griego jucuaere tibu, israelita ama.

⁴ Tuequedyatu umae ecuita cuana cuejatamaquedy a jutidya nubiticuare ecuana ecasitatiju, ecuana quisaratiyaque ijacabacara aatsu. Nubititsu tuna jucuaere: “Jesús queja ecatyatiquedy a ecuana”. Jadya juya tsunumee tuna Tito griegoque, ecuanaja bahue tubutanamaque bahue juatsu quisaraticuare:

—Tuquetu ecuita huitu biti catubumeretitaqui ecuanaja baba cuanaja bahue. Tuyu amatu ecuanaja baba cuanaja bahue juhua cuanaque ajaca ishuhua. Arepa ecuana Jesús queja catyatihua ama bucha, eje bucha ajacae ni tuque ecuana ama —jadya.

⁵ En ama ecuana jucuaere ni riya piji buchique. Dutyaja tupu ni ecuanaja inime juquena juhua, tume taa tuque ecuana cuarequena juhua Yusuja quisarati yunerique. Tume taa tuque ecuana cuejaquena juhua ama tuyu cuita Yusu queja judiru ishuhue quisarati. Icuene cuejatanahua bae amatu ecuejatanau. Ecuanara ni tumeque pusha pusha ari cuanaja quisarati bacaquena juhua, tume micuana ecuanara ijahue aquena juhua micuana israelita ama cuanaque.

⁶ Jesús queja ecatyati cuanaque cuatsashaqui cuanara cuejahua era cuejayaque cuare ishuhua ama. Tunara ique bahuityahua ama ni ai iyacuaque. Ecuita cuanaratu tumeque ecuita cuana dyaque muibaya. Jadya ama bucha, ique Yusura cuadishahua, tunara ama. Yusura tuque ecuanaja inime tupu cuana adebaya. Tuquetu bahuedya

ique tuyu juyaque. Jadya tibudya tu dyaque jida tuque pureamatura ishu, ai ecuita cuana ama. ⁷ Ai iyacuaque ique ebahuityamereuque, ecuatsasha cuanaratu jidadya bahua era bahuityayaque.

—Yusuratu cuatsashahua Pablo Yusu queja judiru ishuque quisarati israelita ama cuanaque cuejara. Pedro bacuetu cuatsashahua israelita cuana cuejara, —jadya tuna cacuejat-ibarecuare.

⁸ Tuna jadya quisaratima jariju, Yusura ique casaturahua israelita ama cuanaque tuja quisarati cueja ishu. Ique israelita ama cuana queja ecuadishaque. Pedro bacuetu casaturahua israelita cuana cueja ishu. Tuquetu tuna queja ecuadishaque.

⁹ Santiago, Pedro, Juan jadya tuna Jesús queja ecatyati cuanaque naruquique.

—Yuneridyatu Pablo Yusura mepehua israelita ama cuanaque tuja quisarati cueja ishu, —jadya tuna quisaraticuare.

Jadya quisarati aatsu tunara yatse emetucuju inacuare ique, Bernabé jadya. Jadya tunara yatse acuare:

—Dutya ecuana tumeque Yusu camadya merequi cuanaque peadya tatae camadya buchique ecuana. Metsera ecana necuejacue jidaque quisarati israelita ama cuanaque. Ecuana israelita cuana pacueja, —jadya tunara yatse cuejacuare.

¹⁰ Ryaque camadya tunara cuatsashacuare:

—Tshuajacame camadya israelita nerecada cuanaque Jesús queja ecatyati cuanaque. Chipiru cuana piji ni tunaja tuquemi ecuadishau aima cuana cuitaja —jadya.

Jadya tunara ahuaaju ique pureama jucuare. Jadidya ecue inime jucuare, era ecue ata nerecada cuanaque dyaque tshuacara aya tibu.

Pablora Pedro Antioquiaju nereda acuareque

¹¹ Pedro Antioquiaju cuahuajutu eratu tudya cuitadya nereda acuare, tuja inimedya tura israelita ama cuanaque jida iyuhue tsehue ama bahuaju. ¹² Badirumetse aatsutu ecana jida badirucuare. Tuna tshuedya araaracuare, arepa tuna ecuita huitu biti catubutima ama bucha. Tuque eje uma huecaca judiruhuaajutu junacuare Antioquiaju israelita cuana Santiagoja ecuadisha cuanaque. Tuna junahuajutu Pedrora jacatibunecuare israelita ama cuanaque. Tumetu araarajacuare tuna tsehue. Israelita ama cuanaque tuna ecuita huitu biti catubutitaqui jadique ejenequi cuanaque tujatu cahuaitishacarama acuare.

¹³ Pedrora israelita ama cuanaque jacahua baatsu, peya israelita cuanara ecana tumbaedy a jacabarecuare. Arepa

tunara quisarati ahua ama bucha, “Ecuanaja baba cuanaja bahue equé nejura ama”, jadya ama bucha, ecana cajacaticuare israelita ama cuana tsehue. Jadya baatsutu Bernabé eatsehue juneniyaque dyadi cajipetijacacuare israelita ama cuana tsehue, arepa tuque cuitadya tuna queja cuadishatahua ama bucha. ¹⁴ Tuna jidama aniyaque bahue juatsu, Yusuja quisarati tuyu equé ama juya baatsu, tuque Pedro nereda acuare Jesús queja dutya ecatyati cuanaque ecasitatija ijacaju:

—Miquemi israelita neri micue tata micue cuaa jadya equé. Jadya ama buchami israelita ama cuana tsehue casitatitsu, tuna tsehue araaratsumi israelita cuana ejuta bucha ama juhua. Mique jadya juhuaque, ¿tume tuquemi aishu israelita ama cuanaque ecuanaja baba cuanaja bahue equé casada tsehue anishacara aya? Miquemi tuyu ama juhua, —jadya tuque Pedro acuare.

Caadebaticuare dyatu era yuneriju jadya ayaque.

Yusura israelita cuana, israelita ama cuanaque jadya dutya tupu inajacamerée Ijahua quejaque ayaque

¹⁵ Ique, ecue ata cuana jadya ecuana israelita yuequequedya. “Jucha arida ama ecuana israelita ama cuanaque bucha ama”, jadya ecuana jubahue datse. “Moisésja cacuatsashati equé juya cabatitsu, tuque ecuana Yusu cahuaitishaya ama tunara aya bucha”, jadya ecuana quisarati bahue datse. ¹⁶ Jadya ama bucha ecuana israelita cuana Jesús queja ecatyati cuanaja tuque ecuanaja inime cuaretanahua. Bahue ecuana ni ejeque buchique Yusura jucha metse ama bayaque Moisésra cacuatsashati cuana huenehua equé anitsu. Jesucristo queja ecatyati cuanaque cuita camadya tujatu jucha metse ama baya. Jadya tibudya ecuana Jesús queja catyatihua, Yusuja jucha metse ama baishu. Ni ejeque buchiquetu Yusura jucha metse ama baya ama cacuatsashati equé aniyaju baatsu, Jesucristo queja catyatihuaju cuita camadya. ¹⁷ Ecuana israelita cuana ecuana bahue amena Jesús queja catyatitsu cuita camadya ecuana jucha juque cuinanashatayaque, arepa ecuana ecuanaja baba cuanaja bahue equé aniya ama bucha. Israelita ama cuanaque bucha dyaque inimequi bucha ecabatiuque, amena ecuana bahuedya tuna bucha jucha aridaque. Aniyatu yanacana jadya juya cuanaque: “Icuene micuana cacuatsashati equé anicuare patya tuque micuana ejenequere micuana jucha aridamaque. Iyacia bacue Jesús queja catyatitsu, ‘Jucha arida ecuana israelita ama cuana tsehue dutya tupu’ jadya micuana juya. Micuanara jadya inime tupuya tibu, jutaquiju ni taa micuana Cristora cuitadya

cajuchatishahua, arepa micuana icuene jadya ama juhua ama bucha”, jadyatu umaera quisarati aya, cuji cuita tuna eju.

¡Aijama, jadya ama tuque! ¡Cristoratu ni ejeque buchique cajuchatishaya ama!

¹⁸ Cuareya ni ecue inime, era ni cuejaya, “Jucha metse ama bucha bata ishü, ecuana anitaqui ecuanaja baba cuanaja cacuatsashati eque”, tume taa tu era ecuejajacau quisarati yunerique. Tume taa tu era Yusu ecahuaitishau. Tume taa ique rihuishatillahuaque nityatsuranucayaque bucha ejuu. ¹⁹ Ecuanaja baba cuanaja cacuatsashati pana adeba aatsu, ique huecatanahua tumeque cacuatsashati eque ique ni riya piji buchique eaniuque, dyaque masada eje bucha ataquimaque. Adebahua era Jesús queja catyatitsu jucha metse ama ebata ejuuque. Chamacama bahue juhua tume cuanaque cacuatsashati eque jutaquimaque. Ecuaita emajuque amena huaraji cuanaja cuatsashataquima bucha, jadya ique amena tumeque cacuatsashati tsehue jida ama cabatiya. Yusuja biji eque ique jida cabatitaqui. Ique emajuque netitsuranuca Yusuja biji eque ani jadya buchique.

²⁰ Tuja inime tacatu Cristo curusuju majuhua ecuana jiteque. Ique tuaqueja catyatitsu, amena ecue biji eque ama aniya, yuequedyaque ani ecue terehua tibu. Iyacuatü Cristoja Espiritu eaqueja aniya. Iyacuata ique aniya Yusuja Ebacuaque queja nimee. Tuja inime tacatu tuque majuhua, era Yusu japada ejacau tibu, jadya eque tuque Yusu jipehua ni eje tupu jaca ishü ama. Tura ique dyaque iyuhueda bahua tibu, tuquetu majuhua ique jiteque. ²¹ Yusura ecuana dyaque iyuhueda baya, jucha arida ama bucha. Era ni ejenequena juhua Yusura ique iyuhueda bayaque ecuanaja baba cuanaja bahue eque aniya baatsu camadyaque, tume taa ique equisaratinü: “Tata, eratu jidama ama inime baya mira ique iyuhueda bayaju, mira ique narucara ayaju jadya”. ¡Ecue tu jadya ama inime! Jucha jida catillatitaqui ni ecuana juquena juhua ecuanaja baba cuanaja cacuatsashati eque juatsu, tume taa tu Cristo yanacana majuquena juhua.

3

Cacuatsashati eque anira ecuana Yusu queja judirushaya ama, Jesús queja catyatitsu cuita camadya

¹ ¡Ai bijiteque micuana Galaciaju aniya cuanaque! ¡Inimema micuana! ¿Aira jatsu micuana jahue ahua, yunerique ejenejaca ishü? Ecuana tuhua juticuare patya micuana ecuanara pana cueja acuare Yusuja quisarati. Cuejahua

micuana ecuanara Jesucristo curusuju majuhuaque ecuanaja jucha cuana tsujetyaqui. Cuejayaju bacatsu tuque micuana jidadya adebahua. Jesús queja micuana catyatihua. ² Micuana jadya baatsu tuque micuanaja Yusura tuja Espíritu cuadishahua. Yusratu tuja Espíritu cuadishahua micuana queja, ai micuana cacuatsashati eque anihua baatsu ama. Cuadishahua tujatu tuja Espíritu micuana Jesúsja quisarati bacatsu tuaqueja catyatihua baatsu. ³ ¡Inimema cuita micuana! Yusura micuana tujaque amerehua, micuanaja taca inime eque ama, tuja Espíritu eque. Jadya anitibunee micuana tuja biji eque juhua. Cuji cuita juatsu tuque micuana inime tupuya: “Ecuana cuitadya ecuana Yusuja biji eque eaniu”. ⁴ Dyaque micuana canerecatihua Cristo queja catyatitsu. Iyacua ni micuana amena cacuatsashati eque quinajacamereticara juya, tume taa micuana yanacana canerecati juhua Jesús queja nimee jujacaya einajaca juishu, tume micuana yanacana canerecati juhua. Eratu ejeneyadya micuana tuaquejaque canimehuallatiyaque ama. ⁵ Yusura micuana tyahua tuja Espíritu, casa jadya tuja quisarati bacatsu micuana tuaqueja catyatihua baatsu, ai micuana cacuatsashati eque anihua baatsu ama.

⁶ Abraham einajaca juhua bucha einajacaedya micuana atanahua. Abrahamratu Yusu ejenehua tura tyaana ahuaque. Jadya juatsutu tuaqueja catyatihua. Jadya tibudyatu Yusura jucha metse ama bahua. ⁷ Yuneri cuitadya Jesús queja catyatihua cuanaque, Abraham catyatihua baedya, Yusura tuna Abraham jaque buchadya baya, arepa tuna israelita ama cuana paju ama bucha. Micuanaratu adebayadya riyaque. ⁸ Yuequedyatu Yusuja inime juhua: “Dutya eaqueja catyatibuque cuanaque tuque jucha metse ama babuque, arepa tuna israelita ama juya ama bucha”, jadya tu ehue ne Yusuja quisaratiju. Jadya tibudya jadya juma jarijudyatu Yusura cuejahua Abraham riyaque quisarati: “Erami jida baana ahua mique eaqueja catyatihuaju. Tumbaedya tuque jida abuque dutya yahuaju aniya cuanaque, dutya yana eque quisaratiya cuanaque eaqueja catyatibuque cuanaque”, jadya tujatu cuejacuare. ⁹ Abrahamtu ducuta tuja inime tuaqueja catyaticuare. Jadya tibudya tujatu tyacuare tura jidaque tyaana ahuaque. Tumbaedyatu Yusura tyabuque jidaque Jesús queja dutya ecatyati cuanaque.

¹⁰ Ni ejeque buchiquetu ecuanaja baba cuanaja cacuatsashati eque cuita camadya eaniu ama. Ehuenedya tu Yusuja quisarati jadya: “Yusratu baya ai asicadaque tuque jipetaquimaque bucha dutya cacuatsashati cuana eque ama

aniya cuanaque”. Tumetu jadya inime tupu juya cuanaque: “Yusura ecuana tuaqueja judirushabuque ecuana cacuat-sashati eqe aniya tibu”, tuna tuna pana cuji cuita eju. Asicadaque bucha juya tibu tunajatu jipebuque ama Yusu.

¹¹ Ni ejeque buchiquetu dutya cacuatsashati cuana eqe cuita eaniu ama. Pusha amadya ni ejeque buchiquedyatu Yusura jucha metse ama baya cacuatsashati cuana ehue ne eqe aniya baatsu. Ehue ne tuja quisarati: “Yusura ecuana jucha metse ama baya ecuana tuaqueja catyatihuaju camadya. Eaniajeudyu jutidya ecuana tuja biji eqe, tuatsehue nime aputama juatsu camadya”.

¹² Ejeja ni jadya inime juya “Yusura tuaqueja judirushabuque cacuatsashati eqe anihua tibu”, Cristo queja camadya amatu catyatiya. Yanacanatu tuque jida juya eqe tuaqueja judirucara juya. Yusuja quisarati tu ehue ne: “Dutya cacuatsashati cuana eqe ni micuana aniya, tume micuana Yusuja yacuaju judirubuque ni eje tupu jaca ishuhua”. Jadya ama buchatu ni ejeque buchique eaniu ama dutya cacuatsashati cuana eqe.

¹³ Icuene ecuana Yusura asicada bucha bahua, ai tuque jipetaquique ama bucha. Dutya tuja cacuatsashati cuana muibataqui ama tura ecuana bahua. Cristotu curusuju tatatanahuaju majuhua. Ecuandya asicada bucha ebauquetu Yusura Cristo asicada bucha bahua, ecuanaja jucha cuana tsujetya juya tibu. Tuquetu canerecatihua ecuana nerecada ejuuque. Ehuenedya tu Yusuja quisaratiju: “Ecabisuti, ebijidamadura jadya tu acuiju eshura majuyaque”. ¹⁴ Yuequedyatu Yusura Abraham cuejahua: “Mique eaqueja catyatihua tibu, mique jucha metse ama baya. Jidaque tuque adadiya dutya queja cuanaja ishuhua”, jadya tujatu aana acuare. Israelita cuana camadya ama tumbaedyu israelita ama cuanaque Cristo Jesús queja catyatitsu tuque micuana babuquedyu jidaque Yusura tyaana ahuaque. Cristo micuanaja jucha cuana seca ishuhua curusuju majuhua tibu, micuana Yusura jidaque tyaya. Ecuana Jesús queja catyatihua tibu tuque ecuanaja Yusura tuja Espíritu cuadishaya tura tyaana ahuaque.

Yusura tyaana ahuaque ni aira buchique eapupashauque ama

¹⁵ Huecashaya micuana riyaque yahuaju aniya cuanaque eje bucha juyaque, micuana ecue eatsehuequi cuanaque. Ecuita cuana yume cama juatsu tunajatu quirica huene ebacani quiyati jadya jubahue. Quirica huene, amena aatsu tuna ebacani cahueneti bahue. Ebacani huene amena ahua-jutu ni aira buchique quirica ecuareu, ni acarama ama eau. ¹⁶ Yusura Abraham tyaana ahuaque tu quiricaju ecuita

cuana ebacani equiyati buchique. “Mique, mique eque juracanayaque jadya metse jidaque tyabuque”, jadya tu ehue Yusura tyaana ahuaque. Acuare ama tujatu “mique eque ejuracana cuanaque”. “Mique eque ejuracanaque”, jadya tujatu quisarati acuare. Jetiama tuna jidaque tyaya jadya amatu Yusu jucuare. Abraham eque peadya juracanayaque camadya tujatu jidaque tyaana ahua. Cristo tujatu tyaana ishu ahua.

¹⁷ Abrahamtu Yusura jidaque tyadadiya jadya ahua. Tyama ama adadiya jadyatu juhua. Quiricaju ecuana ebacani quiyati bahue bucha ecuanara ai tyaana ayaque yuneri juyaque bahue amere ishu, jadyatu Yusura cuejacuare Abraham yuneridya tura tyaana ahuaque tyadadiyaque. Tura amena jadya tyaana ahua, 430 mara cuetihua, tujatu chamacama cuejacuare Moisés cacuatsashati cuana, tuja peya cuana cueja ishu. Cacuatsashati cuana cueja amena aatsutu Yusura quisarati acuare ama: “Iyacia riyaque huecaca eque tuque cuarehua Abraham tyaana ahuaque”, jadya tujatu quisarati ahua ama, ni riyá piji buchique. ¹⁸ Yusratu Abraham tyaana ahua jidaque tuque tuaqueja catyatihua baatsu. “Pusha amadya mira tsujetyatsu ama tuque abuaque”, jadyatu jucuare. Tura ni ecuana tuaqueja judirushaquena juhua cacuatsashati eque juyaju, tume tura ecuana Abraham tuaqueja judirushahua bucha ama aquena juhua. Yusratu tura aana ahua equedya aya.

¹⁹ Micuanaja ni tu inime juya: “Cacuatsashati eque ama tura ecuana tuaqueja judirushaya tibu, ¿eje bucha juatsu jatsu tujatu Moisés cuejacuare? ¿Aishu tu jida?” Cuejaha tujatu eje buchaju ecuana tura amereya eque ama juyaque bahue juishu. Yusura patu Abraham tyaana acuare jidaque dutya queja cuanaque tuque eque ejuracana eque. Riyaque tuque eque ejuracanaquetu Cristo Jesús. Tuque amena junahuajutu saretanahua ama cacuatsashati cuana. Amena ecuita cuana cacuatsashati cuejayaquetu Yusura cuita ama ecana cuejaha. Icuene cuitatu Yusura tuja cacuatsashati cuejacuare barepa juque tuja quisarati cuejaqui cuanaque. Tuequedya tunajatu Moisés cuejacuare. Moisés tu Yusuja yana atsaqui buchique jucuare israelita cuana cueja ishucue. ²⁰ Yusura Abraham jidaque tyaana aya patya, tujatu tuque cuitadya isarahua. Tura jadya tyaana Abraham ahua tibutu aijamadya juhua ejeque peya etsahuaquique. Tudyá cuitadya, tuque peadya camadyatu quisaratihua. Turatu jadya aana ahua. Tura aana ahuaque tujatu ama amadya aya.

Cacuatsashati cuana pana bahue juatsu ecuana bahue juya

ecuana jucha aridaque

²¹ ¿Micuanajatu inime juya, Yusura Moisés cacuatsashati cuejahuaque, Yusura Abraham tyaana ahuaque tyamere ishunque ama bucha? ¡Aijama, jadya ama tuque! Ni ejera bucharatu dutya eau ama. Dutya cacuatsashati cuana eque ni ecuana eaniu, tume taa ecuana Yusura jucha metse ama baquena juhua cacuatsashati cuana eque aniya baatsu. ²² Yusu tuja quisaratiyu jadya juya equetu ni ejeque buchique cacuatsashati cuana eque eaniu ama. Jadya tibudya ecuana dutya jucha arida. Ecajuchati ecuana juhua, etare apuda ducu erisique netiyaque bucha. Peadya camadyatu Yusu queja judiru ishunque aniya, Jesús queja catyati. Jadya juya cuanara peadya cuita camadyatu Yusura tyaana ahuaque babuque.

²³ Cristo junama jarijutu ecuanaja ebaba ecanaja inime juhua: “Cacuatsashati eque ni ecuana aniya, tume ecuana Yusura jucha metse ama baya”. Yanacana cuita tunajatu jadya inime juhua. Jesús queja catyatima jariyu ecuana ecajuchati juhua, etare apuda ducu erisique netiyaque bucha. ²⁴ Cristo junama jari tupu ecuana ebacua cuana bucha jucua, ebacua cuana naruquira naruya bucha. Ebacua cuana naruquira ebacua cuana ecuejau bucha tuna eje bucha jutaquique, eje bucha jutaquique ama jadique; jadidya ecuana cacuatsashati cuana isaratsu bahue juhua eje bucha ataquique, ataquimaque jadique. ²⁵ Iyacia bacue amena Cristo junahuaju, tuaqueja catyatihuaju ecuana Yusura jucha metse ama baya. Amena ecuana bahue cacuatsashati eque juatsu ama ecuana Yusura jucha metse ama bayaque. Amena ecuana ebacua cuana naruquira naruyaque bucha ama; esiri bucha ecuana.

Yusuja cuanaque

²⁶ Micuana Cristo Jesús queja catyatihua tibu micuana Yusuja ebacua cuanaque. Tura micuana tuja ebacuaque bucha baya. ²⁷ Cutsameretitsu micuana Jesús queja catyatihuaque ejitaju juhua, Yusu jaque jadique. Jesús queja ecatyati baatsu micuana Yusura jida, asicadama bucha baya. Micuanara asicadaque ijehue, jidaque iya jadya ahua buchique tume. ²⁸ Yusura ecuana jucha metse ama baya, ecuana Cristo Jesús queja catyatihua tibu, jadya juatsu tuja biji eque aniya tibu. Israelita cuana, tumbaedyia israelita ama cuana tura ecuana jucha metse ama baya Jesús queja ecatyati baatsu; tumbaedyia tsujema mere juya cuanaque, tsujetyataya cuanaque; tumbaedyia deca cuana, epuna cuana. Jidamatu inime bataqui ama ecuana eje baeque; Yusura ecuana dutya tupu baya. Tumbaedyia tura ecuana

amereya tujaque. ²⁹ Micuana Cristo jaque juya tibu, micuana Yusura Abraham eque ejuracanaque baya. Yusura micuana jidaque tyabuque, Abraham, tuja cuanaque jadya tyaana ahuaque.

4

¹⁻² Tumeque quisaratidya neara jari. Ita taa peadya ebacua piji etata majuque eaniu. Majuma jarira etataquera quisarati eau: “Eje tupu ique majuhuaju, dutya ai ecue aniaque tu ecue ebacua jaque. Tuque nanada jari tupu tuque peya queja narumerecara aya. Tunaradya tuja ai juya cuanaque panaru, tuque eje tupu esiri judadiya tupu” jadya. Tumetu iyacua dutyadya ebacua piji jaque. Arepa tuque dutya metseque paju ama buchatu tuja muibataqui tuque naruqui cuanaque. Tuque esiri judadiya tupu tujatu ecana muiba, tunara cuatsashaya eque jadya jutaqui. ³ Ecuana ecuana tumeque ebacua piji bucha jucua. Eje bucha canarutitaqui ama ecuana ai aniaque cabaticuare, jadidyatu ecuanaja aijama jucua Yusuja casa. Yusu ujeu cuanaque ania bucha ecuana anicuare. Yusuja casa ecuanaja aijama juhua tibu, ecuana eje bucha anijacataqui ama cabaticuare ecuanaja bahue eque, arepa ecuana jadya anijacacacura juya ama bucha. ⁴ Yusura huecaca iyahuaque juetihuajutu Yusura Ebacuaque cuadishahua. Tuquetu cuinanacuare epuna juque, ecuana cuinanahua baedya. Tuquetu Moisésra cuatsashacuare eque anicuare, tuque israelita juya tibu. ⁵ Tuquetu jehua ecuana inajacamere ishuque tsujetyara. Jehuatu inajacamere ishu yanacana ecuana cacuatsashati cuana eque anitsupa einajaca eju jadya juyaju. Tuquetu majuhua, ecuana Yusu jaque juishu, Yusuja ecuana tuja ebacua cuanaque baishu.

⁶ Yusratu tuja Ebacuaqueja Espíritu ecuana tsehue amerehua, ecuana tuja ebacua cuanaque juyaque bahue amere ishu. Ebacuaqueratu “Tata” jadya Yusu aya; ecuanara taa tu “Tata” jadidya eau. Tura tuja Espíritu cuitadya cuadishahua tibu, ecuana israelita cuanara, tumbaedya israelita ama cuanara tuque ecuana ataqui “Ecuana Etata” jadya. ⁷ Iyacua ecuana Yusura baya tuja etare juque mere puji cuana bucha ama; tuja ebacua cuanaque ebau bucha bae tura ecuana aya, tujaque ecuana juya tibu. Jutaquiju taa tu dutya jidaque Yusura tyaana ahuaque tuja cuana jaque-dya; tume baequedya tume. Ecuaita chipirudajatu dutya ai ebacuaqueja ishuque, tuja mere puji cuanaja ishuque ama.

Pablora Cristo queja ecatyati cuanaque jidama inime ishu bacuareque

⁸ Icuene tuque micuana adebacuare ama Yusu Neri, micuana israelita ama cuana tibu. Micuanaratu peya aidya jutidya muicuare, Yusu bucha baatsu. Micuanaratu tume cuanaque jutidya merehua, mere pujira tuque cuatsashaquique emereu bucha. ⁹ Jadya jutidya ejuuque tuque micuana iyacua Yusu mepehua micuanaja Tata juishu. Pusha ama cuitadya micuanara amatu Yusu mepehua. Yusura micuana mepehua tuja ebacua cuanaque juishu. ¿Tume jatsu micuana eje bucha juatsu yudijidya quinajacamereticara junucaya cacuatsashati cuana eque? Cacuatashati cuana tu ai casadamaque buchique, ai aya jiu buchique. Erisique einajacaque bucha juya ama bucha micuana erisi bucha junucacara juya. Micuana micuana quirica isara bahueque yudijidya quirica isara cabahuityatinucaya buchique. ¹⁰ Micuana micuana israelita cuanaja bahue eque anitibunehua. Yanacana cuita tuque micuana inime tupuya: “Canajara huecacaju israelita cuana juya bae juatsu, tunara dutya badi chine cuana ayaque aatsu, tunaja chine arida cuanaque aatsu, tunara mara cuana dyaque jidaque ayaque aatsu, tume ecuana Yusura jucha metse ama baya”. ¹¹ Jidama inime ishuh micuana baya. Yanacana jutidya ni mere juhua micuana ducu, micuana Jesús queja catyatijacayaque juatsu. ¹² Ique micuana ducu aniticuare patya ique anijacacuare ecue baba cuanaja bahue eque, Yusura ecuana jadya eque ama inajacamereyaque adebatsu, ecue eatsehuequi cuanaque. Iyacua micuana cuejaya. Ecuana israelita cuanaja bahue eque eaniuque, Jesús queja cuita camadya necatyaticue, ique juhua bucha. Ique tuhua juticuare patya micuanara ni riya piji buchique eje bucha acuare ama. ¹³ Jida, iyuhueda tsehue micuanara batsahua. Ujejeda juatsu micuana queja anietitsu tsunutaetihua. Tuhua juetitsu micuana Yusu queja judiru ishuhue quisarati cuejaetihua. Micuanaratu adebayadya jadicue. ¹⁴ Ecuetu inime jucuar: “Ique dyaque cuita ujejedaque bahue juatsu ni tunara bijidamaduratsu ijehueya tunaja epu juque” jadya. Bijidamaduracuare ama micuanara ique, ni micuanara ijehuecuinacuare micuanaja epu juque. Ebijidamadurauque, micuanara jida batsacuare. Narucuare micuanara ique barepa juque Yusu tsahuaquique Yusuja ecuadishaque bucha. Jesucristo cuitadya ebatsau bucha batsae micuanara acuare. ¹⁵ Era cuejayaque bacatsu, micuana dyaque jida cabaticuare, ique micuana tsehue baatsu. Caadebatiyadya ique micuanara muibacuareque. Adebayadya tuque micuanara inime tupucuarque. “Dyaque iyuhueda taa ecuana baya Pablo. Ecuanaja dyaque jidaque aniyaque

tyaatsu tsahuacara, ecuana yatuca caquemititaquique juatsu quemitsu tyacara jadya tuque ecuana aya.” Iyacia bacue micuanaja aijama era cuejayaque jida tsehue baca ishu. ¿Eje bucha juatsu? ¿Eje bucha micuana juchine? ¹⁶ Era micuana yunerique cuejacuare. ¿Tume ni taa micuanara jadya tibudya ujeuque ebataque bucha bae aya?

¹⁷ Tume micuana pusha pusha bahuityaqui cuanaquetu iyuhuedapa tunara micuana ebau. Inime patyapa tunara micuana eau jadya juya. Tunara micuana ique ujeu bamerecara aya, era cuejayaque micuanaja bacacarama aishu. Tunajatu bijida micuanaja tunara bahuityayaque cuita camadya baca ishu. ¹⁸ Ique cahuaitiya ama yuneri cuitadya micuana iyuhueda tsahuacara jadya juya cuana tsehue. Dutyaja tuque ecuanaja peya cuana inime patya ajacataqui ama. Tume pusha pusha bahuityaqui cuanaquetu juya, iyuhuedapa tunara micuana baya. “Ecuana micuana iyuhueda tsahuacara jadya aya”, jadya juya, ai jida inime tsehue ama.

¹⁹ Era micuana dyaque iyuhueda baya, ecue ebacua neri ejuu bucha iyuhuee. Ebacua cuinanayajutu ecuaquera jidama inime ishu baya. Jadidya micuanara ique jidama inime bamereya, micuana era bahuityahua eque ama antibuneya baatsu. Bajacaya amadya micuana jidama inime ishu, micuana Cristora amerecara aya eque judadiya tupu, micuanara tuja biji inime tupudadiya tupu. ²⁰ ¡Eje bucha micuana queja jue cuana ejuu iyacia cuita micuana tsehue quisarati ishu, tume micuanaja quirica cuadishahuaque ama! ¡Eje bucha tuputillataqui ama tuque inime baya micuanaja ishu!

Agarja ebacuaque buchique ama ecuana,

Saraja ebacuaque buchique

²¹ ¡Pana ijacobaca neacue! Micuanara ecuana aya Moisésra huenecuare equempa ecuana anitaqui jadya. Micuana bacue juya Abrahamja ebacua cuanaque buchapa micuana anicara juya jadya. ²² Neadebara Abrahamja ebacuaque ecatse Yusuja quisaratiju cuejatanayaque. Peadyatu Agarja ebacuaque jucuaque; tumeque epunatu Abrahamja etareju tsujema mere juyaque jucuaque. Peyatu Saraja ebacuaque jucuaque; tumeque epunatu Abrahamja ehuanee neri jucuaque. ²³ Agartu ehue ebari juhua bacuaqui jutaquique. Tuja ebacuaquetu Yusuja tyaana eaque ama juhua. Amena Sara bacue epuna esiri juhua, cabacuati baecua. Arepa tuque amena cabacuati ishu esiri ama buchatu Yusura cabacuatisa ana ahua: “Miratu peadya ebacua ejitaju

adadiya”. Yusura jadya amereya tibu tatsejatu peadya ebacua ejitaju acuare.

²⁴Cuejacara micuana aya tatse eje bucha juhua eque. Riyaquetu ejitaju beta inime eque Yusura ecuita tsahuayaque.

Anicuaretu beta epuna Sara, Agar jadya. Tumebaedyatu Yusu quisaratihua beta ecuita tsehue, Abraham, Moisés jadya tsehue. Icuene cuitatu Yusura Abraham ahua. Turapa jucha metse ama baya tuaqueja catyatihua cuanaque jadya. Saradya tu Yusura quisarati iyahuaque baeque.

Tuequedya tujatu cuejacuare Moisés emata Sinaí bacaniju: “Eratu israelita cuana riyaque cacuatsashati cuana eque amerecara aya”. Agar tu riyaque quisarati Yusura iyahua buchique. Agartu tuja inime taca eque juneniyaque ama jucuaré. Tuquetu Abrahamja etareju tsujema mere juyaque jucuaré. Tumebaedyatu cacuatsashati cuana eque tuyu bucha cabatiya cuanaque tunaja inime taca eque ama juneniya.

²⁵Sinaí bacani ematajutu Yusura Moisés cacuatsashati cuana cuejahua. Riyaque emata tu Arabiaju, Agar eque ejuracana cuanaque aniyaju. Tumeque epunatu cacuatsashati cuana eque quinajacamereticara juyaque jadya adeba ishuque. Tuque tuja patrónra casada tsehue cuatsashayaju jutaqui jucuaré bucha, jadidya tuna cabatiya cacuatsashatira cuatsashaya eque einajaca jutaqui. Jadya tu dutya jujeri riyaque yahuajuque Jerusalénju aniya cuanaque. Tuna tuna Satanásja inajacama. ²⁶Ecuana Jerusalén barepaju anidirubuqueque ecuana Satanás quejaque einajacamere. Tuhua ecuana Yusura narubuque. ²⁷Jadiquetu jadya acuare Yusu equeque quisarati cuejaqui Isaiasra:

“Pureama jucue, mama, arepa mique cabacuati baecua juya ama bucha.

Pureama jucue.

Arepa mira ebacua uje adebaya ama ama bucha, tuque micue jetiama anibuque, arepa mira ama ejitaju ahua ama bucha.

Epuna decara jacacuarejatu dyaque umada ebacua anibuque, decara jacacuare amaja bucha ama”.

²⁸Ecuana ecuana Yusu jaque, micuana ecue eatsehuequi cuanaque. Isaactu Yusura Abraham tyaana ahuaque juhua; jadidya ecuana Yusura tujaque amere ana ahuaque.

²⁹Yusuja Espiritura cuatsashaya eque Isaac ejitaju juhua bucha, tumeque Espíritu equedya ecuana Yusura cabapetishahua. Cacuatsashati eque tuyu aniya bucha cabatiya cuanara jidama ayaju, jidama inime nebaume. Abraham anicuare patyatu Agarja ebacuaquera Isaac Saraja ebacuaque ijaribacuare jutidya. Ujeudya jutidyatu bacuaré. Riya cama jaridyatu Yusuja Espíritu eque ecabapeti

cuanaque Yusu adeba baecua cuanara jidaama aya.
³⁰ Bahuedya micuana jadya Yusuja quisaratiju ehuenque: “Cuinanashacue Agar micue etare juque. Tuja ebacuaque tsehue cuinanashacue. Agarja ebacuaquejatu jubuque ama micue ai aniyaque. Micue huane nerija ebacuaqueja camadyatu jubuque”, jadyatu Yusura acuare Abraham.
³¹ Cuejaya micuana riyaque, ecue eatsehuequi cuanaque. Netupucue inime Agar, Sara jadyaja ebacuaque ecateja cuatsabijiju. Cristo queja catyatitsu ecuana Abrahamja ehuanque nerija ebacuaque bucha, epuna tsujema mere ijehueñe ishujaja ebacuaque bucha ama. Inajacatanahua ecuana.

5

Jida inimeju ecuinanasha bucha anijacataquique ama

¹ Cristo tu Ecuana Inajacamerequique. Tura ecuana tyahua casa Yusu pureamaturayaque ani ishu. Aijama ama tuque ecuanaja juya tumeque casa. Micuana micuana amena Yusu jaque ni aira buchique micuana casada tsehue cacuatsashati cuana eque amereya ama. Micuana inajacatanahua tibu, netupunucaume inime: “Cacuatsashati cuana eque neanira, Yusuja ecuana jucha metse ama baishu”. ² ¡Pana ijacobaca neacue! Era micuana jadya cuejaya. “Yusuja ecuana jucha metse ama baishu, catubutitaqui ecuana israelita cuana bucha”, jadya ni micuanaja inime juya, micuana ni catubutiya, tume micuana ejitaju juya Cristo queja cuita camadya ama einajaca juishu catyatihuaque. Catubutiya ni micuana, tume micuana yanacanadya juya: “Cristo queja ecatyatique ique” jadya. ³ Cuejanucaya rique era. Yusratu quisarati iyahua: “Israelita cuanatu catubumeretitaqui Moisésra dutya cacuatsashati cuana huenehua eque ecuana aniya jadique ejitaju juishu” jadya. Jadya eque micuana ejeque jadya catubumeretie juyaque casada tsehue anitaqui dutya cacuatsashati cuana eque. ⁴ Umaeja tuque micuanaja inime juya: “Ecuana ecuana Yusuja yacuaju jucha metse ama, cacuatsashati cuana eque aniya tibu”. Micuanaratu Cristo japada baya. Jacahua tuque micuanara. Jadya ni micuana, tume tuque micuana bijidamaduraya Yusuja tuja iyuhue tsehue naru ishunque. Tyaya amadya tura micuana tsujema tyau aana ahuaque.

⁵ Amena ecuana bacue bahue Yusura jucha metse ama bayaque, ecuana Jesús queja catyatihua tibu. Ecuana tuja yacuaju judiruhaju, “Micuana micuana jucha metse ama baya”, jadya ecuana bahue tura jadya abunque.

Tuja Espírítu eque ecuana bahue yuneridya ecuana jadya judadiyaque. ⁶Ecuana Cristo Jesúsra cuatsashaya eque aniyajutu Yusura jidama ama inime baya ecuana israelita cuanaja bahue eque ni ecuana ecaturumereti, catubumeretimaque jadique. “Jesús queja tuna catyatiya baatsu, era tuna jida bucha baya, tunara iyuhue tsehue peya cuana bayaju”, jadyatu Yusura inime tupuya ecuana Cristoja cuanaju. ⁷Ejetsunue ama ri micuana Jesús queja cuita camadya catyaticuareque einajaca juishu. ¿Aira jatsu tuque micuanaja cuarehua inime tupu cuana? ¿Eje bucha ejenemerejae jatsu tunara micuana yunerique ahua? ⁸Yuneri cuitadya tuque micuanaja Yusura ama inime cuarehua. Turadya micuana mepehua Jesús eque micuana tujaque juishu. ⁹“Riya piji levaduraratu mujashaya dutya pan ishucue”, jadya ecuanaja quisarati abahue. Jadidyatu peadya yunerique ama bahuityaquira umadaque yunerique eejenemerejacau. ¹⁰Eratu ejeneyadya micuana Ecuana Cuatsashaqui queja catyatijacahuacue ama. Yusratu nerecaturabuque micuana pusha pusha bahuityaqui juya cuanaque. Arepa ecuita cuanara muiyaque ama bucha, Yusura tuna nerecaturabuque.

¹¹Jadya micuana cuejaya, micuana ecue eatsehuequi cuanaque. Umae ique ujeu baqui cuanaque tuna ecue ishucue pusha pusha juya. “Pablora cuitadya tuna cuejaya israelita cuanaja bahue eque catubumeretitaquique”, jadyatu umaecue ishucue pusha pusha juya. Jesús queja catyatimara tuna jadya bahuityahua ecue ata israelita cuana. Tume tunara ujeu bahua ama. Ique cacuaretihua inime. Iyacua tuna bahuityaya: “Jesústu majuhua curusuju ecuana jiteque. Micuana micuana einajaca ejuu, Jesús queja catyatitsu cuita camadya”, jadya tuna ecue bahuitya bahue. Jadique bacatsutu israelita cuana cahuaitya. Jida ama tunara aya. Era ni ecana ecuejau jari: “Catubutitaqui jari micuana israelita cuanaja bahue”, tume tuna eatsehue ecahuitiu ama. Ique tunara jidama aya jari tibu, tuhuadyatu ejitaju era amena jadique ama bahuityayaque. ¹²Areque tume jadya micuana ijahue aqui cuanaja casa eaputajarau. Ecuita ecaca quemique amena cabacuati baecua bucha, areque jadya casa tereadya ejujarau yunerique ama bahuityaqui cuanaque.

¹³Peja micuana cuejanucaya, micuana ecue eatsehuequi cuanaque. Inajacatanahua micuana cacuatsashati eque anitaqui ama micuana amena Yusu queja judiru ishucue. Jadya ama bucha einajaca cabatitsu jadya inime netupume: “Cacuatsashati eque ama aniya tibu, ecue bijidya jutidya pajuneni. Ecue jida ishucue ique eje bucha jucara

juya eque paju”, jadya inime netupuume. Netsahuacue peya cuana. Iyuhueda tsehue ecana nebacue. Jadya anie micuana jutaqui, Cristora micuana inajacamerehua tibu. ¹⁴Jadya tu Moisésra huenecuareque: “Iyuhue tsehue nebacue peya cuana. Micuana cuitadya iyuhueda cabatiya bucha iyuhuee peya nebacue”. Peya cuana ni micuana jida tsehue baya, tume micuana dutya cacuatsashati cuana eque juya. ¹⁵Micuana ni catiya peya cuana tsehue cahuaitsu, iyuhueda cabatijaca jadya juya. Cuanubi cuana muredaque bucha cacaruti, ujeta, cati jadya, peya cuana tsehue catillatiya tupu; jadidya micuana, micuana dyadi jidama catiya, jidama cabatiyaque juatsu.

Tunaja biji eque aniya cuanaque, Yusuja Espirituja biji eque aniya cuanaque jadya

¹⁶Riyaque micuana cuejaya. Yusuja Espiritura inime huecashaya eque neanicue. Jadya anie ni micuana juya, tume micuana micuanaja jidamaque bijiseri eque ama aniya. ¹⁷Ecuana cuitadya jutidya eje bucha jucara juyaque, jadya juyaque ecuana Yusuja Espirituja biji eque ama neri cuita juya. Ecuana Yusuja biji eque ama anicara juyaju, ecuana tuja Espiritura cuejaya: “Tumeque neaume”, jadya. Ecuana jidaque aishu tura ecuana cuejayaju, ecuana jidama jucara juyaju tura ecuana nereda ayaju, ecuana jaquedya jutidya tu inime tupu: “Nebacara ama tura cuejayaque. Ecuana eje bucha jucara juya eque nejura” jadya. Ecuana biji equeque, Yusuja Espirituja biji equeque jadya tatse catiya. Yusuja Espiritura ecuana casaturaya ecuana ecuanaja biji eque ama ani ishu. ¹⁸Ecuana Yusuja Espiritura cuatsashaya eque aniyaque juatsu, tuque ecuanaja israelita cuanaja cacuatsashati saretaqui amadya Yusuja biji eque ani ishu.

¹⁹Tunaja biji eque cuita camadya aniyaratu jidamaque aya. Jadya anie juatsu tunajatu caquemitiqueremaque jaraquere ishu bijiseriya. Asicadaque tunajatu inime tupuqui aya. Bisutadaque tunajatu inime tupuqui aya; ayadya tunara. ²⁰Ai cueya cueya ea cuanaque tuna muiya yusupa ejuu jadya cuanaque. Jatsura, marura jadya ecana catiya. Peya cuana ujeu, cati jadya tsehue ecana aniya. Peya cuanaja ai aniyaque tuna bijiseri ebari aya. Masadama cahuaitie ecana. Ai bayaquedya jutidya tuna bijiseriya tunaja ishu cuita camadya, peyaja ishu bacue aijama. Peyaja ishu ecana jidama quisaratiya, tuna jacaqui juhua cuanaque tuyu ama juya bucha baatsu. Tuna tsehue beta tupu ama inime tupuyaque tuna jida tsehue ama baya. ²¹Bacarama, ujeu jadya tuna peya cuana baya tunaja ai aniyaque baatsu. Bijiseriya tuna tunaja ai aniya cuanaque. Nijuqui ecana juya. Eje uma huecaca

ecana chine juya. Castere baecua ecana araara, ijijii jadya juyaque. Bisu baecua ecana peya cuanara petayaju. Era jidama cuanaque ebacaniju ahua cuanaque camadya ama tunajatu jidamaque aya. Dutya ai jidamaque tunajatu aya. Jadya anie tuna juya tunaja biji eque cuita camadya aniya cuanaque.

Cuejanucaya micuana era, era icuene ahua baedya. Jadya anie juya cuanaquetu Yusu queja ama judirubuque; tuque dutya naruqui juhuaju tuatsehue ama tuna anidirubuque. Tuna tuna tyatanabuque ama Yusura tuja cuanaque tyaana ahuaque.

²² Bape neri cuita tuque ecuanaja ani juya, Yusuja Espiritura amereya eque juatsu. Iyuhueda tsehue tuque ecuana peya cuana baya. Pureama tsehue ecuana aniya. Inime tsapema ecuana juneniya peya cuana tsehue. Abacata tsehue ecuana iduya etsuje jucara juatsu ama. Nime jida, epuri, nime jatada jadya ecuana. Peya cuana tsehue ecuana jida. Ayadya ecuana ai ecuanara aana ahuaque. ²³ Peya queja casumimereticarama ecuana juya. Jidamaque acaraque inime juetihuaju, ecuana tacadya ecuana canarutiya, jidamaque aishu ama. Jadya ecuana juya, Yusuja Espiritura amereya eque anitsu. Jadya anie juatsu, pusha ama cuitadya ecuana Yusura eje bucha bijida baya eque aniya.

²⁴ Ecuana ecuana Cristo Jesús jaque. Ecuana tujaque juya tibu, tuque ecuanaja jidamaque aishu bijiseritaqui ama. Cristo curusuju majucuaru tibu, ecuana dyadi ecuana curusuju emaju buchadya. Emajuratu amena riyaque yahua juque ni ai buchique cuejayaju bacaya ama; jadidya ecuana. Ecuanaratu bacaya amadya cajuchaticaraque inime juetihuaju. ²⁵ Yusuja Espiritura ecuana Jesús queja catyatishahua, ecuana iyacuaque ani eque ani ishu. Tuja casa eque ecuana aniya tibu, dutya tura eje bucha amereya eque nejura. ²⁶ Necasumitira ama. Peya cuana necahuaitishara ama. Ujeu nebara ama, ecuanara bijida bayaque peyaja aniya baatsu. Cajishati arida nejura ama peya cuana tsehue.

6

Peya cuana tsehue catsahuatitaquique

¹ Jesús queja ejeque ecatyatira Yusuja bijidamaque ayaju, necuejacue jida, micuana ecue eatsehuequi cuanaque. Micuana Yusuja Espiritura amereya eque juyara netsahuacue Yusuja biji eque aninuca ishu. Jida inime tsehue, cahuaity tsehue ama jadya neacue. Jadya tuque micuanaja inime tuputaqui: "Era cuitadya ni taa Yusuja bijidamaque aya eje tupu. Ique jidama juyaju peya cuana

queja jida tsehue cacuejamereticara juya. Jadya tibudya ique dyadi peya tsehue jida jutaqui". ² Necatsahuatira peya cuana tsehue. Bicueda ecabutique etsahuau bucha, tsahuaedya peya cuana neara tuna jidama inime cuanaju nubihuaju. Jadya ayaque tuque micuana peya cuana jida tsehue baya Cristora bahuityaya eque.

³ Ejeja ni inime juya: "Ique dyaque inime metseque. Tume cajuchatiya ama peya cuana bucha. Jadya tibudya cajuchatiya cuana tsehue jida jutaqui ama", yanacana tujatu jadya inime tupuya. Tuta tacadya jutidyatu ijahue catiya.

⁴ Ecuana tacadya ecuana caadebatitaqui ecuana cuitadya jida, jidama jadya ecuana juyaque. Ecuana jida juyaque juatsu, ecuana pureamadya juya. Ecuana cuitadya ni pana caadebati juya ecuana jida juyaque cabacaduratitaqui ama ecuana: "¿Eje bucha ni Yusura baya dyaque jida, jidama?" jadya. ⁵ Peadya peadya ecuana Yusu queja jucha cuana cacuejatitaqui, "Peyara jadya amerehua", jadya juatsu ama.

⁶ Ejera ecuana Yusuja quisarati bahuityayaju tuque ecuanaja tyataqui ai tura sareyaque, jadya ama juatsu etsujequi. Ecuanaja aniyaque jaquetsu tuque ecuanaja tyataqui tsujetya ishu.

⁷ Micuanadya jutidya ijahue necatiume. Yusutu eje bucha ijahue ataqui ama. Turatu baya dutya ecuana eje bucha juyaque. Ecuana peya cuana eje bucha baya equedya tura ecuana abuque. Quisarati jadique bucha: "Ecuana uhuayaquedya tuque ecuana huesaya". ⁸ Ecuanaja biji equedya jutidya ni ecuana aniya, Yusratu baya ecuana eje bucha juyaque ai jidama, eririque bucha. Eje tupu Yusuja yacuaju netitihuaju tura ecuana abuque: "Ai eririque bucha mique baya. Eatsehue amami aniya; jipenime ama micue ique".

Yusuja Espirituja biji eque ecuana aniyaque juatsu, dutya ecuana eje bucha juyaque tu Yusura ai jida pijique bucha babuque. Eje tupu ecuana majutsu tuja yacuaju judiruhaju tura ecuana abuque: "Ai jidaque bucha mique baya. Miquemi eatsehue aniya, ique eje tupu jaca ishu ama".

⁹ Jadya tibudya jadya inime netupujacara ama: "Jidaque neajacara ama." Ecuana canimehuallatiyaque ama juatsu ecuana Yusura jidaque tyabuque. Tee metsera ni tuja tee jida narujacaya ama, tume tujatu jidadya ecaca huesaya; jadidya ecuana tyatabuque Yusuja Espiritura cuatsashaya eque jujacayaque ama juatsu. ¹⁰ Jadya tibudya tuque ecuanaja dutya jida tsehue bajacataqui ama. Jesús queja ecatyati cuanaque neri neri tuque ecuanaja dyaque jida tsehue bataqui, tuna ecuana tsehuequi cuanaque juya tibu.

Cuejayaque, amena ishuque quisarati jadya

¹¹ Era cuitadyari hueneya amena ishuque quisarati cuana. Letra arida tsehue tuque huenehua. ¹² Micuana casada tsehue catubumeretishacara juya cuanaratu ecuita cuana cuita camadya jida quisaratishacara aya. Tunajatu inime juya: “ ‘Einajaque ecuana Cristo curusuju majuhua queja catyatihuaaju cuita camadya’ jadya ni ecuana juya, tume ecuana riyaque quisarati bacacarama juya cuanara enerecaturadadiu” jadya. ¹³ Tuna cuitadya tuna ecuita huitu bitu tubu israelita cuanaja bahue. Arepa tuna jadya ama bucha, dutya cacuatsashati cuana eque ama tuna aniya. Tunara micuana israelita cuanaja bahue catubutishacara aya, tuna casumiti ishu: “Ecuana cuejayaque camadya tunajatu bacaya”, jadya datse tuna casumitiya.

¹⁴ Arepa tuna jadya ama bucha, ecue bacue jadya inime: “Cristo ique jiteque curusuju majuhua tibu, tuaqueja cuita camadya catyatiya. Ique jadya juyaju baatsu Yusura jucha metse ama baya”. Ique amena einajaca juya tibu, Yusu adeba baecua cuanaque aniya bucha amena anicarama juya. Tuna aniya bae ani ishu tuque ecue bijidama; Yusu adeba baecua cuanaque bacue ique aniya bucha anicarama juya. Tunajatu bijidama ique aniya bae ani ishu.

¹⁵ Cristoja biji eque ecuana aniyajutu Yusura jidama ama inime baya ecuana israelita cuanaja bahue etubutanaque, tubutanamaque jadique. Yusratu jidama inime ishu baya ecuana inime cacuaretima eaniuque.

¹⁶ Yusura inime tsapema paanisha Cristoja biji eque aniya cuanaque. Pabameretu eana tuja canerecabati. Jadyatu paa dutya tuja cuanaque.

¹⁷ Jadya tilladirue rique ecue riyaque quirica aya. Ni ejera buchique inime patupu ama: “Nebacara ama Pablo; tuque amatu Ecuana cuatsashaquique”. Nebacacue ecue quisarati, era Ecuana Cuatsashaquique mereya tibu. Ujeda ahuaaju ecue ecuitaju jipi aniya cuanaradya ejitaju amereya ique tuja ecuadishaque.

¹⁸ Ecuana Cuatsashaqui Jesucristora jida tsehue nenarucue tuja quiyuhuebati tsehue, micuana ecue eatsehuequi cuanaque. Jadidya paju.

Riya tupu camadya.

Pablo

EFESOJU ANIYA CUANAJA ISHU PABLORA QUIRICA CUADISHACUAREQUE EFESIOS

Riyaque quirica ri Pablora Efesoju aniya cuanaja ishu cuadishacuareque. Rehuari Pablora cuejacuare Yusura yahua iyama jariju inime pirecuareque. Cuejacuare rejari Yusuja inime patu jucuare. Jesús queja dutya catyatiya cuanaquetu Yusu queja judirubucue israelita cuana, israelita ama cuana jadya.

Cuejacuare rejari, dutya ecuana Cristo tsehue peadya camadya bucha anitaquique. Capítulo 3-6ju tura ecuana jida cuejaya Jesús queja ecatyati cuanaque dutya tsehue iyuhue tsehue anitaquique. Cuejaya tura ecuana, ecuanaja etareju cuana tsehue ecuana eje bucha anie jutaquique.

Umae versúlo cuana cabahuityati ishuque jidaque ri jee cuanaque: 1.8; 2.8-10; 3.20-21; 4.30-32; 5.18-20; 6.10-17.

Pablora Jesús queja ecatyati cuanaque isaracuareque

¹ Era rique micuanaja quirica cuadishaya. Ique Pablo. Jesucristoja yana atsaquique ique, Yusuja jadya inime juya tibu. Cuadishaya rique quirica Efesoju Yusuja cuanaja ishu. Cuadishaya rique Cristo Jesús queja ecatyati cuanaja ishu. ² Yusu ecuanaja Etatara, tumbaedyu Ecuana Cuatsashaqui Jesucristora jida tsehue nenarucue tatseja quiyuhuebati tsehue. Tatsera inime tsapema neanishacue.

Yusu pureama ataquique, tujaque tura ecuana amerehua tibu

³ Yusu Ecuana Cuatsashaqui Jesucristoja Etataque pureama neara:

—¡Dyaque jida taa mique! ¡Dyaque jida taa mira dutya ai ayaque! Tyahua taa mira ecuana jidaque. Micue Espíritu taa dyaque jida juhua ecuana tsehue. Ecuana Jesucristo jaque tibu, mira ecuana ihuarahua micue yacuaju barepaju judiru ishu. Mira tuque ecuanaja tuhua ani ishuque bajejeya, — jadya tuque ecuanaja ataqui.

⁴ Tuja yahua ejitaju ama jariju ecuana Yusura mepehua tuja juishu. Yusutu bahuedya juhua Jesús ecuana jiteque majudadibuqueque. Bahuedyatu juhua ecuana Jesús queja caty- atidadibuqueque. Jadya tibudya tujatu inime juhua: “Ecue cuanaque tuque ecue eje bucha eque jucha metse ataqui ama jubuque. Jucha metse ama tuna baya, era tunaja jucha cuana tillahua tibu” jadya. ⁵ Yusura ecuana dyaque iyuhueda bahua. Jadya tibudya tujatu jadya inime jucuare: “Jesucristo

queja catyatiya cuanaque tuna ecue ebacua cuana jadya abuque” jadya. Tuja inime taca eque tura ecuana mepehua eje bucha tura inime tupuhua eque. ⁶ Jadya tibudya jadya Yusu pureama neara:

—Dyaque jida taa mi mique, mira ecuana iyuhue tsehue baya tibu, arepa ecuana jucha arida paju ama bucha. Mira tuque micue Bacua dyaque iyuhueda baya. Ecuana tuaqueja catyatihua tibu, jadya eque mira ecuana dyaque iyuhueda baya. Dyaque jida iyuhue tsehue mira ecuana baya, —jadya neara.

⁷ Cristotu curusuju majuhua; tuhuatu ami quijehuetihua. Ecuana tuaqueja catyatihuaju, Yusura ecuana Ijahua quejaque inajacamerehua. Dyaque iyuhueda tura ecuana baya, arepa ecuana jucha arida baya ama bucha. Jadya tibudya tura ecuanaja jucha cuana tillahua. Amena tura ecuana jucha metse ama baya. Aijamatu peya ecuana tsehue dyaque jida ejuuque. ⁸ Tuquetu injeda ama ecuana dutya jidaque tyaishu. Tura ecuana piyebatilla tupu ama tyaya dutya ai jidaque. Tura ecuana adebamereya yunerique, yunerique ama jadya. Tura ecuana adebamereya, ecuana eje bucha anie jida jutaquique.

⁹⁻¹⁰ Icuene yuequedy a patu Yusura jadya inime tupucua: “Eje buchadya sitae acara taa aya ecue cuanaque. Barepaju cuanaque, yahuaju cuanaque jadya taa sitacara aya ecue cuanaque. Ecue Emepe Cristora tuna narubuque”, jadya tujatu inime tupucua. Icuenetu ni ejeque buchique bae-cua jucua Yusura eje bucha judirushae tuja cuanaque barepaju abuqueque. Amena iyacua bacue tura ecuana bamerehua. Bahue tura ecuana amerehua Cristo queja catyatitsu Yusu queja judiru ishucue. Ejitaju tujatu amerehua tura ecuana dutya narudadibuqueque. ¹¹ Dutyatu Yusura amereya eque juajeya, tura icueneta tupu inime ahua eque. Yahua iyama jari equequedy ecuana Yusura mepehua tuja juishu. Bahuedyatu ecuana Jesús queja catyatidadiyaque jucua. Jadya tibu turadya ecuana tuja ebacua cuanaque juishu mepecua. ¹² Beru yuequedyatu ecuana israelita cuanara ihuahua Yusuja Emepeque. Tuquetu amena junahuadya. Tuque junahuaju eje umadya ecuana tuaqueja catyatihua. Jadya tibutu peya cuanara Yusura ecuana eje bucha ahuaque baatsu abuque: “¡Dyaque jida taa mique! ¡Aijamatu peya mique buchique!” jadya. ¹³ Jadya juatsu chamacama micuana quisarati yunerique cuejatanahua. Micuanadya micuana cuejatanahua Yusura micuana inajacameradiyaque, micuana Jesús queja catyatijaju. Ryaque jadique bacatsu micuana dyadi micuana catyatihua tuaqueja. Tuaqueja micuana catyatihuaju tuque

micuanaja Yusura Espiritu cuadishahua juchamaque neri. Ecuana ebacani equiyatiu bucha, ecuana ebacani eque adeba ishu, jadya ishudyatu Yusura tuja Espiritu cuadishahua, micuana tuja cuanaque jadique adeba ishu. Jadidya tujatu tuja cuanaja peadya peadyaja ishu cuadisha ana ahua. ¹⁴ Yusuja Espiritu tu ecuana tsehuedya; bahuedya ecuana Yusuja cuanaque. Ecuana tuja cuanaque juya tibu, tuque ecuana pana ejenedya aya, tura ecuana tuja cuanaque dutya ai jidaque tyaana ahuaque tyadadiyaque. Ejeque huecacapa ecuana tuja yacuaju judiruya. Tuhua ecuana cajuchatinuca nime ama. Tuhua ecuana tura eje bucha amerecara aya eque anidirubuque. Jadya tibudya Yusu jadya neara:

—¡Dyaque jida taa mique! ¡Aijamatu peya mique buchique!
—jadya.

Pablo Jesús queja ecatyati cuanaja ishu Yusu queja bacabacacuareque

¹⁵ Bacaya tuque quisarati. Micuanapa Ecuana Cuatsashaqui queja nimeedya jutidya juajeya, tumbaedyu micuana Yusuja cuanaque iyuhueda cabatiyaque. ¹⁶⁻¹⁷ Rianzaque quisarati bacatsu tuque Yusu Ecuana Cuatsashaquique Cuadishaquique jadya ajacaya ama:

—Tata, miquemi dyaque jida. Aijamatu peya mique bucha dyaque jidaque. Yusurupai mique aya, mira Efeso juque micue cuanaque jida tsahuaya tibu. Micue Espiritu queja ecana jacamereume. Paadebamereajedya jutidyatu ecana micue bijida, bijidamaque jadique. Pabahuityaajedya jutidyatu ecana, tunaja mique dyaque jida adebaaje ishu, —jadya tuque ajacaya ama.

¹⁸ Tumbaedyu tuque ecue Yusu abahue micuanaja ishu:

—Tata, adebamerecue ecana mira ejitaju ayaque. Pana ejenemere ecana acue ejeque huecaca ecana Jesúsja yacuaju judirubuqueque. Bahue ecana amerecue, micue cuanaja ishu micue dyaque jidaque aniyaque. Adebatilla tupu ama tuquemi ecana tyabuque. ¹⁹ Bahue ecana amerecue micue casa aniyaque. Aijamatu peya casadaque mique buchique. Bahuityacue ecana rianzaque casa tsehue mira ecana Jesús queja catyatihuaju Ijahua quejaque inajacamerehuaque. Rianzaque casa tsehue tuquemi ecana anishaajeyadya jutidya mique pureamatura ishu. Dutya riya cuanaque ecana adebamerecue, —jadya ique Yusu queja bacabaca bahue micuanaja ishu.

²⁰ Rianzaque casa tsehuedyatu Yusura Jesús emajuque chacha nityatsuranucacuare. Chacha amerencatsu tujatu tsurashanucacuare barepaju tuja yacuaju rianzaque casa tsehue. Turatu muihua, tuja jida eque amaca iyabutyatsu.

²¹ Iyacua tu Cristo tuhua ecuari enaruqui. Aijamatu ni ejeque buchique dyaque cacuatsashati tsehue, tuque peadya camadya. Tudyatu dutya umae ecuari cuanaja inime metseque. Huaraji cuanaja dyaque inime metseque tume. Casada cuanaja, ecuatsashaqui cuanaja inime metseque tume. Iyacuatu riyaque yahuaju jetiama aniya emuita cuanaque. Anidadibuquedyatu jetiama tumbaedy a emui cuanaque. Jesús tu tume cuanaque dyaque inime metseque. Jadya tu tuque ni eje tsehue beta tupu ama ejeque aniya tsehue ni ejeque anibuque tsehue. ²² Yusratu dutya ai aniya queja muimerehua. Tuquetu ecuatsashaqui aniya cuanaque dyaque aridaque. Jesúsra ecuana naruya, cuatsashaya jadya aya dutya ecuana Yusuja cuanaque. Tuquetu iyuca buchique. ²³ Ecuana Yusuja cuanaque ecuana tuja ecuita buchique. Iyuca ecuita tsehue camadya ecajipetique bucucuyaque mere juishu bucha; jadya ejitaju juedyatu juya Cristoja mere riyaque yahuaju ecuana eque ademe. Ecuana equetu Cristo Yusuja biji eque juya riyaque yahuaju.

2

Arepa ecuana jucha arida juhua ama bucha, ecuana Yusura Ijahua quejaque inajacamerehua

¹ Jesús queja catyatima jariju micuana, Yusu adeba baecua cuanaque aniya bucha anihua, cajuchatiyacatsu ama. Emajuratu amena ni ejeque buchique bacaya ama; jadidya tuque micuana Yusu bacacarama ahua. ² Icuene micuana anihua Yusu adeba baecua cuanaque bucha, dutya cajuchati-judya jutidya. Satanás ijahua cuana cuatsashaquique tuque micuana merehua, Yusura cuatsashaya eque juya ama cuanara aya bucha. ³ Dutyadya ecuana jadya anie juhua. Ecuana capureamaturati ishucuita camadya ecuana jadya ani juhua. Ai ecuanara jidamaque inime tupuqui ayaque ai jidamaque acara ayaque ahudya tuque ecuanara. Anihua amatu ni ejeque Yusura anishacara aya eque. Cajuchati ecuanaja bijida juhua. Pusha ama cuitadya ecuana Yusuja nerecatura ishucuita juhua.

⁴ Arepa dutya ecuana jidama juyaque Yusuja bijidama paju ama bucha, iyuhueda tura ecuana bajacaya ama. Tujatu dyaque quiyuhuebati aniya ecuana tsehue. ⁵ Ecuana ecuana jucha arida juhua. Emajuquetu ni ai jutaqui tuja ishucuita, jadidya ecuana quinajacamerehueti queja juhua ecuana taca. Jadya ama bucha ecuana Yusura iyuhueda bahua. Tura ecuana Ijahua quejaque inajacamerehua. Ecuana Jesús queja catyatiyahuaju, Yusura ecuana iyacuanehua.

⁶ Ecuana Jesús queja catyatihuaju tuque ecuanaja Yusura inime iyacuanehua, ecuana icuene anihua bae eaniuju, tuque pureamaturayaque ecuana ani ishü. Ejeque huecaca tura ecuana dujubuque tuja yacuaju, barepaju ecuana tuatsehue enaruqui juishu. ⁷ Jadya ecuana Yusura ahua tuque ni eje tupu pureama ajaca ishü ama, peya cuanaja jadya ajaca ishü ama: “¡Dyaque jida taa Yusu! Tuquetu dyaque jida Cristo Jesús queja ecatyati cuana tsehue. Tura tuna jida narujacaya ama. Canerecabati tsehue tujatu ecana baya”, jadya tuna juya.

⁸⁻⁹ Yusura ecuana Ijahua quejaque inajacamereya ecuana Jesucristo queja catyatihuaju. Inajacamereya tura ecuana ecuanara ai jida ahua baatsu ama, ecuana tsehue dyaque jida juatsudya jutidya. Aijamatu ni ai ecuanaja jida aishuque Yusuja ecuana tuaqueja judirusha ishü. Jadya ama juatsu ecuana ecasumitiu jutidya, ecuana aiju jida baatsu Yusura inajacamerehua bucha cabatitsu. Yusura ecuana inajacamerehua tsujema neri. Ai tura ecuana yanacana tyau ahuaque buchique tume. ¹⁰ Yusura ecuana iyacuanehua peya cuana tsehue dyaque jida juishu. Ecuana ecuanaja inime Cristo Jesús queja catyatihua baatsu, Yusuja jadya inime juhua tibu ecuana peya cuana tsahua juyaque aniya. Yuequedyatu Yusuja inime juhua: “Jesús queja catyatihua cuanara jida pabajaca ama peya cuana”. Ai jidaque mere aatsu einajaca ejuuque, Yusura ecuana jida amerecara aya, ecuana einajaca juhuaque bahue juishu.

Jesús queja catyatitsutu israelita cuana, israelita ama cuana tsehue dutya tupu

¹¹ Dutya jujeri micuana israelita ama. Micuanaja tata cuana eque micuana israelita ama cuinanahua. Micuana micuana anihua ama dutya ecuana israelita cuanaja bahue cuana eque. Icuene micuana ecuanara bijidamadurahua, ecuana juya bucha ecuita huitu biti catubutiya ama baatsu. ¹² Micuana micuana tuna bucha ecuanaja ebaba Israel emui juhua eque ejuracanaque ama. “Ecuanaja ata ama micuana. Micuana ama micuana Yusura mepehua. Micuana ama micuana Yusura jidaque tyaana ahua, ecuana cuita camadya”, jadya ecuana juhua. Yuneri cuitadya tuque micuana icuene Yusu neri adebahua ama. Anihua micuana riyaque yahuaaju Yusura jidaque tyadadiyaque bahueque ama ni Jesús queja catyatidadi ishü. Baecua micuana juhua ejeque huecaca Yusuja yacuaju judiru ishüque ni eje tupu jakanuca ishüque ama.

¹³ Amena iyacua micuana jadya ama. Catyatihua micuana Cristo queja. Iyacua tu Yusu micuana japadama; tuatsehue

micuana. Jesucristotu ami quijehuetitsu majuhua micuanaja jucha cuana tsujetya ishu. Jadya tibudya micuana tujaque.

14-16 Cristo tu ecuanaja cahuaiti cuana apushaquique. Icuene ecuana israelita cuana dyaque ecahuaiti juhua micuana israelita ama cuana tsehue, micuana cacuatsashati cuana eque anicarama juya baatsu. Ecuannaratu inime tupuhua: “Dutyatu Moisésra cuatsashaya eque anitaqui, Yusuja Ijahua quejaque inajacamere ishu” jadya. Ecuana micuana tsehue equisaratiuju, aira patya majaca etachiu bucha tuque ecuana micuana tsehue quisaratitaqui ama ni micuana jida tsehue bataqui ama; micuana bacue ecuana tsehue cabatitaqui ama, jadya juhua. Jesús tu curusuju maju ishu catyatihua dutya ecuana jiteque. Tuque majuhua jutu Yusuja inime juhua: “Iyacua tuna inajacamereya cacuatsashati cuana eque anihua baatsu ama, Jesús queja cuita camadya catyatihua baatsu”. Jutaqui ju iyacua ecuana Jesús queja catyatiyaju tura tuque ecuanaja peya tsehue cahuaiti apushaya. Ujeu ecabatiuque bacue ecuana dyaque iyuhueda jutidya cabatiya peya tsehue. Tura ecuana cuare pidya camadya bucha amerehua. Yuhua cama tura ecuana amerehua tsape tsape ama.

17 Cristo riyaque yahua ju junatsu tura ecuana Yusu tsehue jida ani ishuque quisarati cuejanahua. Micuana israelita ama cuanaque tura micuana cuejanahua, micuana Yusu japada juhua cuanaque. Tumbaedy tura ecuana israelita cuana cuejanahua, ecuana Yusu japadama juhua cuanaque. 18 Cristo eque ecuana dutya ecajipetiu Yusu queja, ecuana israelita cuana, micuana israelita ama cuana jadya. Dutya ecuana Yusuja Espiritura cuitadya tsahuaya Tata Yusu queja catyati ishu.

19 Micuana icuene jucua bucha ama micuana. Peya anae bucha ama micuana. Peya yahua juque ecuana queja tarepe junaya bucha ama micuana. Jadya ejuuque, micuana ecuana israelita cuanaja ata buchique. Yusura ecuana mepemetse ahua tujaque juishu. Iyacua micuana dyadi micuana tujaquedy. Tata pidyaque cama buchique ecuana. 20 Ecuana Yusuja cuanaque ecuana etare tuque aniquique buchique. Etare ayaque tuque ecuana tibuneyaque tumu arida cuanaque iya tibuneya aija bucucushataquima etare neti ishu. Jesúsra cuitadya cuadishahua cuanaque tu tumbaedy. Tuja quisarati cuejaqui cuanaque jadya tuna tumu icuene eiyaque buchique, tunadya icuene Jesús queja catyatihua tibu. Tuequedy tunajatu peya cuana Yusuja quisarati bahuityahua. Etare ayaque tuque ecuana tumu aridaque iyabahue, umae tumu cuana casada bucucutaquima neti ishu. Jesucristodya

tu tumeque tumu buchique dyaque inime metseque. Iyacuana tuja cuanaque ecuana etare sipitilla ishuque bucha.
²¹ Tumeque tumuradyatu uma tumu cuana bucucushaya ama etare jida tuyu bucucutaquima neti ishu. Tumbaedyatu Cristora tuaqueja catyatiya cuanaque dyaque jida anishaa jeya. Tura ecuana iyuhueda cabatishaya peya cuana tsehue ecuana Yusu pureamatura ishu, ecadutyati juishu.
²² Micuana dyadi micuana Yusu aniqui buchiquedya, arepa israelita ama juya ama bucha. Yusutu aniya dutya tuja cuana queja; tuja Espiritu equetu aniya ecuana tsehue.

3

Pablo Yusu queja judiru ishuque quisarati israelita ama cuanaque cuejara cuadishatanacuareque

¹ Ique rehua etare apudaju erisi netiya, micuana israelita ama cuanaque Cristo Jesúsja quisarati cuejahua tibu. Israelita ama cuanaquetu Yusura tua queja judirushaya jadique cuejahuaaju, israelita cuanara ishamerechine rehua.
² Micuanaratu pana adebadya aya ique jadya ata ishu Yusura mepehuaque. Tura ique cuadishahua micuana cueja ishu micuana tura dyaque iyuhueda bayaque.

³⁻⁶ Yuequedya patu Yusura jadya riyaque inime iyahua. “Ecue emepe cuanaque tuque jidaque tyaana ahua Israel eque ejuracana cuanaque. Cristo Jesús queja catyatiya cuanaquetu era jidaque inime tyadadiya. Israelita ama cuanaque Jesús queja catyatiyaju tuna tumbaedyadya jidaque inime tyadadiya. Israelita cuana, israelita ama cuanaque tuque cuare beta ama baya; cuare pidya camadya. Dutya tupu tuna baya. Jidaque tuque aya israelita ama cuanaja ishu, tumbaedyadya israelita cuanaja ishu”, jadya patu Yusura inime tupucua. Yuequedya tujatu ni ejeque bahue amerehua ama. Ai etehua buchiquetu jucua, ni ejeja adeba ishu ama. Iyacuana bacuetu ejitaju ahua. Tura cuitadya cuadishahua cuanaque, tuja quisarati cuejaqui juhua cuanaque jadya tujatu bahue amerehua. Tuja Espiritu eque tujatu ecana bahue amerehua. Ique tura tumbaedyadya bahue amerehua. Erari cuejahuadya riya piji riyaque quiricaju. Riyaque ehuenegue isaratsu yuneridya micuana bahue jubuque tura ique bahue amerehuaque. Bahue micuana juya Jesús queja catyatitsu Yusu queja judiruyaque, israelita cuana, israelita ama cuana jadya.

⁷ Jesucristora ique mepehua tuque mere ishu. Arepa era icuene tuque ujeu bahua ama bucha, tuquetu dyaque jida juhua eatsehue. Dyaque iyuhueda baatsu tura mepehua. Bahuityahua tura ique jidaque quisarati tsape ishu. Tuja

casa eque tura bahuityahua. ⁸ Ique Jesús queja ecatyati cuanaque dyaque jetiedya cabatiya. Ique jadya baya ama bucha Jesucristora mepehua jidaque quisarati israelita ama cuanaque cueja ishu. Cuadishahua tura ique ecuanaja jidaque aniyaque cueja ishu ecuanaja Jesús queja catyatihua tibu. Pana adeba ataqui ama ecuanaja baya ni ecuanaja pana adebatilla ataqui baya tuque ecuanaja tsehue jidaque. Adaditilla tupu ama tuque. Jadya ique Yusura cuejamerehua.

⁹ Yuequedyatu tura ni ejeque bahue amerehua ama tura micuana israelita ama cuanaque tuaqueja judirushabuqueque. Etehua buchiquetu jucuare. Amena iyacua bacue tura cuejamerehua Jesús queja dutya catyatiya cuanaque tura tuaqueja judirushadadiyaque. Jadya Dutya Iyaquira cuejamerehua. ¹⁰ Icuenetu barepa juque casada cuanaque cacuatsashati puji cuana jadya baecua jucuare eje bucha Ijahua quejaque inajacameree Yusura riyaque yahuaju cuanaque ameredadiyaque. Amena iyacua tuna bahue. Ecuana Yusura tuja ishu ihuarahua cuanaque baatsu, “¡Dyaque bahue taa Yusu, jadya inime iyahua tibu! ¡Tuque taa bahue dutya; ni aidya jutidya tura adebaya ama!”, jadya tuna juya.

¹¹ Yuequedyahua yahua iyama jarijutu Yusuja inime juhua: “Ecue Emepe queja catyatiya cuanaque tuque inajacamerebuque”. Jadidya tujatu iyacua aya. Tura ecuanaja inajacamereya, ecuanaja Cuatsashaqui Cristo Jesús queja catyatihuaju. ¹² Ecuana jadya juhua tibu, Jesús queja ecuanaja catyatihua tibu, ecuanaja bajida tsehue ama, bisuma ecuanaja cajipetiya Yusu tsehue quisarati ishu. Yuneri cuitadya tuque ecuanaja ejeneya, tura ecuanaja bijidamadurayaque ama. ¹³ Iyacua ique canerecatiya era Jesúsja quisarati micuana israelita ama cuanaque cuejahua tibu. Necanimehuallatiume. Paju ama micuanaja inime: “Dyaque jidatu Jesús queja catyatijacataqui, tunara ecuanaja dyadi jidama ayaque juatsu”, jadya inime netupuume. “Yuneri cuitadya ecuanaja Yusura tuja quisarati bacamerecara ahua. Jadya ama ni juquena juhua, tume taa tujatu Pablo dyaque ama canerecatishaquena juhua”, jadya inime netupucue.

Pablo Efesoju cuanaja ishu

Yusu queja bacabacacuareque

¹⁴ Yusutu dyaque jida juhua dutya ecuanaja tsehue. Tuque jidaque adebatsu, chichucata juatsu tuatsehue quisaratiya. ¹⁵ Tuque tuque Ecuana Etata. Tuquetu dutya tuja cuanaja etataque. Barepa juque tuja cuanara, yahuaju cuanaque tuja

cuanara jadyatu “Tata” jadya aya. ¹⁶ Jadya quisarati tsehue bacabacaya micuanaja ishu:

—Tata, miquemi dyaque jida, casada jadya. Aijamatu peya mique buchique. Micue casa tu adaditilla tupu ama. Bacaya mique era. Efeso juque micue cuanaque casaturacue. Micue Espíritu eqe ecana casaturacue, tuna mique purea-maturayaque aniaje ishu. ¹⁷ Peya mique bacaya. Cristo tuna tsehue paju. Tura ecana panaru dutya tuna eje bucha juyaque, dutya tunara inime tupuyaque. Tuaqueja nimeedya jutidya ecana pajuaje. Tumbaedya mique bacajacaya ama mique tunaja iyuhueda bajaca ishu ama, tumbaedya peya cuana. Acui ni tiri casada, tumetu acui pajida casada majuma netiya. Dudu cuana ni pajida casada, tumetu etare casada rihuitaquima netiya. Jadidya tuna juya tuna iyuhueda cabatijacayaque ama juatsu, dyaque casada, masadama canimehuallati jadya ama tuna juya. ¹⁸ Peya mique bacaya. Casaturacue Efeso juque micue cuanaque, Cristora tuna eje bucha iyuhuee bayaque tunaja adeba ishu. Tuna camadya ama, tumbaedya dutya queja micue cuanaque casaturacue ecana. Bahue ecana pajudadi Cristora ecana dyaque iyuhueda bayaque. Cristoja iyuhue ecuana tsehue aniyaque tu ai dyaque aridaque tuputillataquima buchique. Ai dyaque quinida, junuda, deda, baruda jadya buchique tume. Paadeba tuna Cristora tuna jadya iyuhuee bayaque. ¹⁹ Arepa tuna Cristora iyuhueda bayaque eje bucha pana adebataqui ama baya ama bucha, caadebatishacue ecana tura dyaque iyuhueda bayaque. Jadya caadebatie juyaque juatsu, tuna mique bucha dyaquedya juajeya. Anibuque tunajatu dutya mira tunaja anishacara ayaque. Jadya mique bacaya Efesoju micue cuanaja ishu.

²⁰ “Tata, miquemi ecuana tsehue. Miratu eau dutya. Adadi tupu ama tu mira ai eauque. Ecuana ai bacayaju, miratu aya dyaque ecuanara ai bacaya tupu ama. Micue casa dyaque aniya eqe tuquemi aya dutya ecuanaja jida ishuque, ai dyaque ecuana inime juya tupu ama. ²¹ Tata, ecuana micue cuanara mique ecuana pureama aya. Ecuana Cristo Jesús queja catyatihua cuanara: ‘¡Dyaque jida taa mique! ¡Aijamatu peya mique buchique!’ jadya tuque ecuanaja abahue. Jadya mique ecuana aya jadya ajacatsu ama. Jadidya paju, —jadya tuque ecue abahue.

4

Peadya Yusu jaque camadya juya tibu, ecuana cuare pidya camadya

¹ Ique rehua etare apudaju, Ecuana Cuatsashaquique era mereya tibu. Nebacacue era cuejayaju. Yusuja biji eque neanicue. Yusura tuja ishü mepehua tibu, tuque purea-matura ishü neanicue. ² Netupuume inime ni riya piji buchique: "Ique peya cuana bucha dyaque inimequique". Peya cuanara jidama ayaju, etsuje jucara nejuume. Jida inime tsehue jutidya ecana nebacue. Jidama inimeju nubitsu, tunara jidama ayaju, cahuitima idu neacue. Jida tsehue nebacue peya cuana, arepa tunara micuana cahuitishacara aya ama bucha, arepa tunara micuana pereya ama bucha. Jadya ejitaju jue micuana peya cuana tsehue iyuhueda cabatiyaque juya.

³ Arepa ecuanaja bape bape inime tupu aniya ama bucha, Yusuja Espiritura ecuanä cuare pidya camadya amereya. Necacasaticue Espiritura tsahuatsu yuhua cama ani ishü. Jadya juatsu micuana jida eje bucha tsehue ama aniya peya cuana tsehue cahuitima.

⁴ Cuita pidya camadya bucha tu Jesús queja dutya ecatyati cuanaque. Aniyatu peadya Espiritu camadya ecuanä peadya peadya tsehue aniyaque, Yusuja Espiritu. Aniyatu peadya camadya ecuanä dutyara ihuayaque; dutyadya ecuanä bahue ejeque huecaca ecuanaja anibuqueque dutya ecuanä Yusura tyaana ahua cuanaque. ⁵ Peadya cacuatsashati pujira cuatsashaya eque camadya ecuanä aniya. Dutyara tuque ecuanä ejeneya peadya quisarati yunerique. Cutsameretitsu ecuanä ejitaju juya ecuanä Peadya jaque camadyaque. ⁶ Aniyatu peadya Yusu camadya ecuanaja dutyaja Tata. Tuquetu dutyaja ecuari. Tura ecuanä dutya tachiya, ecuanä eque tuja inime eque juishu. Tuquetu ecuanä peadya peadya tsehue aniya.

Yusura tuque cameremereti ishü peadya peadya bahuityahuaque

⁷ Dutya ecuanä bahuityatanahua Yusu mere ishü. Cristora eje bucha bahuityacara ahua equedya tura ecuanä bahuityahua. Yanacana tyau buchique tume ni ai tuque ecuanaja tyataqui ama ecuarequi. ⁸ Ehuene tu Yusuja quisarati:

"Tuquetu tsurahua ebarucue Yusuja yacuaju.

Tsuratsu tujatu dujuhua tuatsehue tura casatillahua cuanaque.

Tuquetu jidaque tyatanahua.

Tyatanahuaju tujatu ecuita cuana tyahua".

⁹⁻¹⁰ Riyaque ri Jesúsra adadibuqueque. Jesús cuitadyatu butehua riyaque yahuaju. Bute jadya juatsutu tsuranuc-ahua barepa dyaque barudaju Yusuja yacuaju. Tuquetu

tsurahua dutya barepaju, yahuaju jadya aniya cuanaja mui ishu. ¹¹ Turadyatu tyaya tuja casa tuja cuanaque riyaque yahuaju cuanaque tunaja eje bucha meree aishu. Umaetu tura cuitadya Yusu queja judiru ishuque quisarati cuejara cuadishahua quisarati ni ejeja buchaja cuejama jari cuanaju. Peya cuana tujatu casa tyaya tuque equeque quisarati cueja ishu. Peya cuana tujatu casa tyaya tuque adeba baecua cuanaque Yusu queja judiru ishuque quisarati jida cueja ishu. Peya cuana tujatu casa tyaya tuja quisarati cueja, pana bahuitya jadya aishu. ¹² Cristora ecuana dutya casaturaya peya cuana tsehue catsahuati ishu, tuaqueja nimeedya jutidya juaje ishu. Casaturaya tura ecuana, tumbaedya ecuana peya cuana tuaqueja catyati tsahua ishu. ¹³ Casaturacara tura ecuana aya peya cuana tsehue quisarati yunerique ecuanaja ejene ishu. Dutyaja tupu tuque ecuanaja inime juya Yusuja Ebacuaqueju. Ebacua nanajatu aijama casa. Daneajeyadyatu esiri judadiya tupu. Jadidya tura ecuana amerecara aya. Butseeju Jesús queja catyatitsu, adeba jida ama tuque ecuana aya. Tura ecuana adembamereajecaradya jutidya aya tura ecuana anishacara aya eque anidadiya tupu. ¹⁴ Ebacua cuanaratu masadama inime cuareya; ejeneya tuna dutya cuejayaju bacayaque. Cuejiji casada juyaratu ebacua cuana cueri patya cuaba tsehue juneniyaque peya queja duju peya queja duju jadya eau; eje bucha jutaquima ecana ejuu. Jesús pana adeba eaque ecuana ebacua cuana cuaba eque cuejijira aquereniya bucha ama. Neejenera ama ejeque peya iyacuaque ejera bahuityacara ayaju. Tuna pusha pusha juyaju ecana neejenera ama, arepa ecana ejenetaqui juya ama bucha. Tunara tuyuque ama cuejayaju, neijacabacara ama.

¹⁵ Yunerique quisarati neara peya cuana tsehue. Iyuhueda necabatira peya cuana tsehue, peya cuana jida tsehue bau. Jadya juatsu ecuana Cristora eje bucha amerecara aya eque juajeya. ¹⁶ Ecuanaja ecuitajatu aniya bape bape bucucu ishuque, yuhua cama ecasipitique. Iyuca tu dutya ecuita bucucushatilla ishuque. Dutya bucucu juyaju, dutya quejaque jida bucucuyaju, ecuana jida cabatiya, jida ecuana daneya. Jadidya ecuana, ecuana Jesús queja ecatyatique. Cristo tu Ecuana Cuatsashaquique. Tura ecuana casa tyahua peya cuana tsehue cacasatibare ishu, dyaque jida Cristo caadembamereti ishu. Aniajebuque ecuana tuja biji eque. Iyuhue batsabuque ecuana peya cuana, peya cuana jida inime tsehue bayaque.

Cristo queja catyatihuaju tura ecuanaja inime cuareyaque

17 Riyaque micuana cuejaya. Ecuana Cuatsashaquira micuana jadya cuejae amereya. Neaniume Jesús queja catyatisa cuanaque bucha. Tunaratu inime tupuqui aya aishuque ama, masadama cuetiyaque. 18 Baecua tuna ni riya piji buchique Yusu ai juyaque ni tura inime tupuyaque. Tuna tuna apuda ducu juneniya buchique baecua eju cuayaque. Yusura amereya eque ecana jucarama juya. Yusu queja ecana jidamaque casecamereticarama juya. Yusu queja quinajacamereticarama juya tibu tuna emajuque bucha. 19 Jidamaque aishuquedya jutidya tunajatu bijiseriya. Jidama tuna inime tupujacaya ama. Jidamaque aatsu tuna bisu batsaya ama. Pureama jutidya ecana juya jidamaque asicadaque aatsu.

20 Bahue ique, micuana jadya anie juyaque ama. Micuanaratu amena Cristo adebaya. Bahue micuana amena eje bucha tura anishacara ayaque. 21 Jadya bahuee micuana, era quisarati cuejahuque pana baca ahua tibu. Jesúsra yunerique bahuityahuque nucadya riya.

22 Neanjacacue micuana icuene anihua bucha. Icuene micuana anihua bisutada. Aidya jutidya aya tsehue tuque micuana sarehua jidamaque aishu. 23 Iyacia micuana jadya ejuque, eiyacuane bucha neanicue. Micuanaja inime tupu, cabijiseriti cuana jadya micuanaja iyacuque paju. 24 Neijehuecue beruque ani. Eiyacuane nejucue; camisa iyacia tsehue cajututitsu ejuu bucha nejucue. Nebacue jida tsehue peya cuana. Ni eje bucha eque Yusu necahuaitishaume. Nepureamaturacue jutidya. Yusura micuana casaturanucaya tuja biji eque ani ishu.

25 Micuana micuana iyacuanetanahua. Jadya tibudya pusha pusha nejunucaume. Dutya ecuna peadya cuitae buchique; pusha pusha neara ama peya cuana, ecuna cuita ijahue catima.

26 Jidadya tu Yusuja bijidama tsehue cahuaiti ishu. Jadya cahuaitie juyaque juatsu, ujeu nebaume ejeque ni etsuje jucara nejuume. Tsunuda necahuaitiume. Chineju jaradirumaquedya necahuaitijacacue. 27 Masadama cahuaitijaca baecua ni micuana juya, tume micuana Satanásra cajuchatishaya. Netyaume emajaca, tura micuana ecajuchatishauju.

28 Micuana icuene chiri arida juhuaque, chiri nejujacacue. Mere nejucue; necacasaticue ai aijamaque cadaditi ishu. Micuanaja ishu camadya ama mere nejucue; tumbaedy a nrecada cuanaque tsahua ishu.

29 Neaume quisarati peya cahuaitisha ishuque. Jida quisarati camadya neacue peya tsahua ishu. Micuana quis-

aratiyaju bacaqui cuanaque nepureamaturacue micuanaja quisarati tsehue.

³⁰ Yusratu tuja Espíritu micuana queja cuadishahua, micuana tujaque jadya adeba ishu. Tuque ecuana tsehue tibu, ecuana bahue ejeque huecaca Cristo junanucatsu ecuana Yusu tsehue anidirubuqueque, tura eje bucha amerecara aya bucha ecuana jubuqueque. Jadya tibudya jidama nejuume; tuque necapeya inimetishaume.

³¹ Peya huecaca ishu cahuaiti neiduume. Yume cahuaiti nejuume. Cahuaititsudya jutidya peya cuana quiquetere ishu neaume. Eje bucha jumaquedya jutidya peya, jadyatu juya; jadya cuatsabiji neaume. Jadya jidama nejuume ni eje tsehue. ³² Netsahuacue jutidya peya cuana, tuna tsehue jida ani ishu. Jida quiyuhuebatsati aqui peya cuana tsehue nejucue. Peyara jidama ahuaaju, nenerecabacue tunara eje bucha ahuaque. Cristotu majuhua ecuanaja jucha cuana tsujetya ishu. Jadya tibudyatu Yusura ecuanaja jucha cuana apupashahua. Tumbaedy a etsuje jucara nejuume peyara jidama ahuaaju.

5

Eje bucha anie Yusuja cuanaque jutaquique

¹ Peya micuana cuejaya. Micuana micuana Yusuja cuanaque. Dyaque iyuhueda tura micuana baya. Tura micuana iyuhueda baya buchadya tuque micuanaja peya cuana iyuhueda bataqui. ² Dyaque iyuhueda tuque ecuanaja peya cuana bataqui tuna ejera iyecara ayaju ecuana tuna cuarequi quiyemeretitaqui. Neadebacue Cristo ecuana jiteque jadya majue juhuaque. Icuene uhuisha iye Yusu tyau jadya juhua bucha, jadyatu tuque juhua Yusu pureamaturayaque. Yusu jatu pureama ishuhuedya micuana peya cuana tsehue iyuhueda cabati ishu.

³ Micuana micuana Yusuja cuanaque. Jadya tibudya tuque micuanaja jipetaqui ama micuanaja caquemitiqueremaque jaraquere ishu. Necaasicatiume tumeque juchaju. Micuanaja ishu camadya dutya ai nebijiseriume. ⁴ Bisutadaque, asicadaque jadya cuatsabiji neaume. Jidamaque aishuque cuatsabiji neaume. Bisutada, urecada nejuume. Jadya jutidya equisaratiuque, quisarati neacue Yusura jidaque ahuaque, tuque yusurupai ayaque. ⁵ Tuja ehuaneeque ama jaraquereyaquetu judirubuque ama Cristora, ecuanaja Etata Yusura jadya naruyaju. Jadya bisutada juyaquetu judirubuque ama Yusu queja. Tunaja ishu cuita camadya dutya ai radanityacara juya cuanaquetu Yusu queja judirubuque ama. Jadya cuanaque tuna yusu ama muiya bucha jutidya juya. Yusu

adebaya ama cuanaque tuna yusu cueya cueyaja yacuaju jutidya chichucata juya, Yusu Nerija yacuaju chichucata ejuuque. Jadidya tu ai bijiseritsu tuja ishü cuita camadya dutya ai radanityacara juyaque Yusu Neri emuiü ama bucha. Micuanaratu pana adebadya aya riyaque.

⁶ Yusuratu dyaque nerecaturabuque tura amereya eque ama juya cuanaque. Dyaquetu cahuitibuque tuna tsehue. Jutaquiju neejeneume pusha pusha puji cuana tunara micuana Yusu cahuitisha ishüque amerecara ayaju. ⁷ Jadya tibudya Yusura cuatsashaya eque jucarama juya cuana tsehue necacarenetiume.

⁸ Icuene micuana meta juneniya cuanaque bucha juhua. Iyacia bacue micuana huecadaju ajeya cuanaque bucha, micuana Ecuana Cuatsashaqui queja catyatihua tibu. Jadya tibudya micuana Yusu adebaqui cuanaque eanita bucha anie nejucue. ⁹ Jadya cuanaratu peya cuana ai tsahuajacaya ama. Tunaratu peya cuana jida tsehue baya. Tuna tuna Yusura cuatsashahua eque aniya. Tunaratu yunerique camadya quisarati aya, ejeque ijahue aatsu ama. Yusu adebaya tibu tuna jadya anie juya, huecadaju ajeya cuanaque buchique tuna. ¹⁰ Ecuana Cuatsashaquiija biji eque anicara nejucue. ¹¹ Yusu adeba baecua cuanara jidama aishuque ayaju baatsu, necareneume ecana. Tuna jidama juyaque tunajatu etehua au aya ejeque bahue ejuuju. Tunadya tuna meta ajeya buchique. Micuanajatu riyä cuanaque bahuityataqui. ¹² Tunaratu aya dyaque bisutadaque, ni ebanijü cuanadya jutidya tuque acara aya. ¹³ Ejeque huecaca dutya ejitaju juhuaju, tuna bahue jubuque dyaque jidama juhuaque. Ai eudau bucha jadidyatu ejitaju jubuque tuna eje bucha juhuaque. ¹⁴ Cristo queja catyatitsu ecuana huecadaju ajeya bucha. Riyaque jadya ayaquedya tu jadya ehüene: “Cabaticue etahui buchique.

Emaju buchique, netitsuracue.

Jadya juhuajumi Cristora cueyanemereya tuque eje buchique”.

¹⁵ Jutaquiju necacuejaticue jida eje bucha juma ani ishü. Inimema nejuume. Jesús adebaya ama cuanaque aniya bucha anie nejuume. ¹⁶ Tsunuda ama ecuana riyaque yahuaju aniya. Jadya tibudya Yusuja mere aishuque emajaca aniyaju, necacasaticue tuja mere aishu, arepa jetiama jidama tsehue aniya cuanaque aniya ama bucha.

¹⁷ Ecuana jadya anie jutaqui tibu, Ecuana Cuatsashaquiija inime baecua bucha nejuume. Jadya Nebacajacume: “Bahue amerecue mira ique ai amerecara ayaque”, jadya neajacume. ¹⁸ Nijuqui nejuume. Nijuqui juatsu micuana

cayuamatiya jutidya. Pureama jucara juatsu, Yusuja Espiritura amereya equé neri nejucue. ¹⁹ Jeru cuana equé Ecuana Cuatsashaquique pureama neacue. Espiritura jerushaya equé pureama neacue. Jesús eje buchique, tuque ai juyaque jeru neacue. Jadya pureama neacue jeru cuana equé, ai duduya cuana tsehue. Jadya nejucue, ai peya cuana jadya juya baatsu jipidya ama; pureama neacue, yuneri cuitadya micuanara pureama ebari acara aatsu. ²⁰ Ecuana Etata Yusu yusurupai neajacaume, Micuana Cuatsashaquira micuana narujacaya ama tibu. Micuana dutya aiju jidaju, tumbaedyá jidamaju, tura micuana narujacaya ama. Jadya tibudya yusurupai neajacaume.

Epuna, deca jadya caquemititsu eje bucha anie jutaquique (Col 3.18–4.1)

²¹ Dutyara tuque micuana muibaya Cristo. Jadya tibu tuque micuanaja camuibati anitaqui peya cuana tsehue.

²² Mama ecana ahuequi cuanaque, micuanaja ahue cuanara cuatsashaya equedya nejucue. Ecuana Cuatsashaquira cuatsashayaju juya baedyá nejucue.

²³ Yahuique tu ehuanegueja huaraji, Cristo tuaqueja ecatyati cuanaja huaraji bucha. Cristo tu Tuja Cuanaque Inajacamequique; tunadya tuna tuja ecuita buchique.

²⁴ Ecuana Cristo queja catyatihua cuanaque bucha tura cuatsashaya equé ecuana jujacataqui ama, jadidyatu epuna cuana yahue cuanaquera cuatsashaya equé jujacataqui ama.

²⁵ Tata ecana huanequi cuanaque, jida iyuhueda tsehue micuanaja huane cuana nebacue. Micuana cuita camadya aiju inime patya necatiume. Cristora ecuana dyaque iyuhueda bahua; tudya cuitadyatu majuhua ecuana Ijahua quejaque inajacamere ishu. Jadidya micuanara micuanaja huane cuana iyuhueda nebacue. ²⁶ Jadyatu Cristo juhua ecuana Yusuja ishu amere ishu. Jucha tillatsu tura ecuana jida, asicadama bucha baya, ecuana inime tupu cuana jida eutsa bucha, tura bahuityahua equé ecuana aya tibu. Jutu ishuque asicadaque ecuana eutsau bucha, jadya pajatashae tuja tuque ecuana asicadaque ahua. ²⁷ Cristora ecuana jucha sechua ecuana tujaque amere ishu. Ecuana tuja yacuaju judiruhuaaju tura ecuana abuque: “Dyaque jida piji bucha micuana baya”. Aijama tuque ecuana jidamaque jubuque; dyaque jida ecuana jubuque. Ahuequi juishu ecabajejetique bucha ecuana jubuque. Ni ai buchique tujatu aijama asicadaque. Peya cuanatu carenejacaya yahuique juyaja cuita camadya juishu. ²⁸ Tata ecana, micuanajatu micuanaja huane cuana jida narutaqui, micuana micuanaja ecuita canarutiya bucha. Micuanara

ni micuanaja huane cuana jida naruya, jadiquetu micuana cuitadya jida canarutiya buchique. ²⁹ Ni ejequetu tuja ecuita canarutijacaya ama. Enarujacauque, ecuana tacadya ecuana araraya. Canarutiya ecuana jida ecuanaja ecuita. Tumebaedya ecuana Cristora naruya dutya tuaqueja catyatihua cuanaque, ³⁰ ecuana tuja ecuita bucha cuitadya juya tibu. ³¹ Jadidya tu Yusuja quisarati ehue: “Jadya tibudyatu decaja jacataqui etataque, ecuaque, carequi juatsu. Caquemiti-huaju tatse Yusura baya peadya camadya bucha”.

³² Riyaque isaratsu ecuana bahuedya ecuana cuitadya Cristoja ecuitaque. Ecaquemitique ecatse tu cuita pidya camadya bucha, tumebaedya ecuana Cristoja ecuita bucha. Icuene tunajatu riya cuanaque adebacuare ama. Iyacia ecuana Yusura bahue amerehua. Riyaque ri dutya bahue jutaquique. ³³ Jutaqui ju iyacia micuana bahue eje bucha anie jutaquique. Dutya micuana huanequi cuanaja tuque micuanaja huane cuana jida narutaqui, micuana micuanaja ecuita canarutiya bucha. Micuana ahuequi cuanaja tuque micuanaja ahue cuana muibataqui.

6

¹ Ebacia cuana, micuanaja tatara, micuanaja cuara cuatsashayaju yana equedya nejucue. Micuanara Ecuana Cuatsashaquique iyuhueda baya tibu, tunara cuejaya equedya nejucue. Jadya micuana Yusura amereya. ²⁻³ Yuequedyatu tura cuatsashahua: “Nemuibacue micuanaja tata cuana. Jadya ni micuana juya, jida micuana judadiya. Tsunuda micuana anibuque micuanaja yahuaju” jadya. Pusha ama cuitadya micuana riyaque cacuatsashati eque cuita jutaqui. Yusratu tyaana aya jidaque ejeque riyaque cacuatsashati eque aniyaque.

⁴ Tata ecana bacuaqui cuanaque, necahuaitishaume micuanara baya cuanaque. Nebahuityacue ecana tunaja Ecuana Cuatsashaquique pureamatura ishucue, tuna cuitadya jida canaruti bahue juishu.

⁵ Micuana etsujequi inama mere juya cuanaque, micuanaja patrón cuanara cuatsashaya equedya nejucue. Nemuibacue ecana. Nemuibacue tunara micuana ebijidamaduraju. Inime micuanaja paju: “Jida ecue patrón pamere, tura casada teshue mere amereyaju camadya ama. Era tuque merecara aya tibu pamere jida ijahue aatsu ama” jadya. Cristo cuitadya mereya bucha meree ecana neacue.

⁶ Jida mere nejucue. Micuanaja patrón cuanara petayaju camadya ama mere nejucue. Tunara petaya amaju tumebaedya mere nejucue. Paju ama micuanaja inime: “Ecue patrónja jida baishu camadya mere paju. Tura petayaju

camadya casada mere paju. Tura petajacahuaju mere paju-jaca” jadya. Jida mere jucara tsehue ecana nemerecue; Cristo emereu bucha mereedy a ecana neacue, Yusuja biji equ micuana anicara juya tibu. ⁷ Jadya micuanaja inime paju: “Ique rehua cuatsashaquique camadya ama tuque mereya, tumbaedy tuque mereya Cristo. Jadya tibudya ecue inime taca equ, pureama tsehue jadya mere paju”. ⁸ Neadebacue riyaque. Ecuana Cuatsashaquira ecuana peadya peadya tsujetyabuque tsujema mere juya cuanaque, tumbaedy tsujequi mere juya cuanaque. Tyatanabuque ecuana dutya aiju ecuana jida juhua tibu.

⁹ Micuana patrón cuana, jida tsehue micuanaja mere puji cuana nebacue. Eje buchadya jutidya aana ecana neaume. Neadebacue riyaque. Arepa micuanara micuanaja mere puji cuana cuatsashaya ama bucha, micuanaja dyaditu Micuana Cuatsashaquique aniyadya barepaju. Turatu jida tuyu tsehue baya mere puji cuana, tumbaedy micuana mere puji cuatsashaqui cuanaque.

Yusura ecuana Ijahuara eje bucha ayaju catachiti ishu tyahuaque

¹⁰ Amena ishu micuana cuejaya dutya micuana. Necasaticue, Satanásra eje bucha ayaju catachiti ishu, micuanaja casa tsehue ama, Ecuana Cuatsashaquija casa tsehue. ¹¹ Sudaru cuana cuatsashaquira tuna tyaya pajidaque eiyetauju catachiti ishu. Jadidya ecuana Yusura tyaya tujaque cuita casa, ecuana ecanimehuallatiuju. Micuana micuana tumeque casa tsehue anitaqui, Satanásra ijahue eau tibu, tura micuana cajuchatishacara ayaju micuanaja baca ishu ama. ¹² Sudaru cuanatu catiya, riyaque yahuaju aniya cuanaja casa ijahue aishu. Ecuana bacue aputashatillacara aya casa ejitaju ama cuanaque Yusu tsehue cahuaitiya cuanaque. Ecuana ecuana catiya riyaque yahuaju maju aqui cuana tsehue ama. Ijahua cuana riyaque yahuaju ejitaju ama cuana tsehue ecuana catiya. Jadya tibudya tuque ecuana sareya Yusuja casa. Tumeque ijahua cuana tuna dyaque casada. Tuna tuna dyaque jidama. Piyebatilla tupu ama tuna. Dutya queja tuna riyaque yahuaju aniya.

¹³ Jutaquijudya nebacacue Yusu, micuana casatura ishu. ¡Nebacacuedya iyacua cuita! Yusuja casa netsumecue sudarura ai pajidaque quicueneti ishu etsumeu bucha. Jadya ni micuana juya, tume micuana Satanásra cajuchatishacara ayaju, micuana jidama juatsu, tume micuana Jesús tsehue nime aputajacaya ama. ¹⁴ Sudaru catira cuaishu ecabajejeti ejuu bucha nejecue. Pana adeba neacue yunerique ijahue

eatauju; sudaru tuja una junudara echicashauju pana caque-
reti ejuu bucha nejudue. Jida tuyu neanicue, jucha metse
ejuu tibu; sudaru ujeda eatauju ai jida pajida tsehue yacua
ecapenetiu bucha nejudue. ¹⁵ Dutya queja Yusu tsehue jida
inime bajeje ishucue quisarati necuejacue; sudaru zapato
cajututitsu ejeque ediji equedya jutidya ejuneniu bucha ne-
judue. ¹⁶ Dutya ai inime tupuqui eauque, Jesús queja nimee
jutidya nejudue, Satanásra eajuchatishauju, sudaru ai pajida
aridaque yacua catachiti ishucue cadujuti bahue bucha. Tu-
atsehue catiyara piya jujuya tsehue maretsu tujatu eje bucha
ama aya. Ticutiya jutidyatu piya cuana yacua penequiju.
¹⁷ Pana ejene neri neacue Satanás quejaque Yusura inaja-
camerehuaque, Satanásra inime tupu cuana ecuarenucau
tibu, sudaru ai pajida tsehue iyuca ecapenetiu bucha. Yusuja
quisarati netsumecue, Satanásra eje bucha eauju capeneti
ishu, sudaru tuja cuchiru beta eque jacua ea tsehue catachiti
bae bucha. Yusuja Espirituja casa tsehue netsumecue.

¹⁸ Yusu queja nebacabacajacaume micuana tuja tsahua
ishu. Tuja Espiritura micuana adebamereya Yusu eje bucha
isarae eauque. Tuatsehue quisaratiyaque, Yusu queja nimee
cuita camadya nejudue. “Tahuacue dutya micue cuanaque,
Tata. Satanásra eje bucha eauju ecana tachicue. Casaturacue
ecana”, jadya Yusu neajacaume. ¹⁹⁻²⁰ Iyucua ique rehua etare
apudaju eisha, era tumeque quisarati cuejahua tibu. Jadya
tibudya Yusu queja nebacabacacue ecue ishu.

—Tata, casaturacue Pablo micue quisarati tuja bajida tse-
hue ama cuejanuca ishu. Paanucatu mira amereya eque.
Yuequedya tunajatu adebahua ama mira Jesús queja ecatyati
cuanaque inajacamereyaque. Iyucua tuquemi ejitaju ahua.
Tahuacue Pablo, umae cuana tuja cueja ishu, —jadya Yusu
necuejacue.

Amena ishucue quisarati

²¹ Tiquicora micuana cuejatiya ique eje buchique, micuana
ique eje bucha juyaque bahue juishu. Tuque tuque ecuanaja
ecuanaja tsehuequique dyaque iyuhuedaque. Turatu mere-
jacaya ama Ecuana Cuatsashaquique. Nime casada tsehue
tujatu mereya. ²² Cuadishaya tuque micuana queja riyaque
quirica tsehue. Cuadishaya tuque micuana queja micuana
ecuanaja eje buchique cuejati ishu, tumbaedy a micuana
casatura ishu.

²³ Yusu ecuanaja Etatara, tumbaedy a Ecuana
Cuatsashaqui Jesucristora inime tsapema neanishacue
micuana ecuanaja tsehuequi cuanaque. Tatsera dyaque
iyuhueda peya cuana tsehue necabatishacue. Tatsera
netsahuacue Jesús queja nimeedy a jutidya juaje ishu.

²⁴ Yusura jida tsehue nenarucue tuja quiyuhuebati tsehue, Ecuana Cuatsashaqui Jesucristo iyuhueda bajacacarama juya cuanaque.

Riya tupu camadya ri quirica.

Pablo

FILIPOSJU CUANAJA ISHU PABLORA QUIRICA CUADISHACUAREQUE FILIPENSES

Riyaque quirica ri Pablora Filiposju aniya cuanaja ishu cuadishacuareque. Tuquetu dyaque pureama cabaticuare Jesús queja catyatitsu. Tumebaedya tura ecuana Jesúsja cuanaque pureama amerecara aya. Arepa Pablora riyaque quirica etare apudaju netiyara huenecuare ama bucha, tuquetu peya inime ama jucuare. Ecanimehuallati amatu jucuare. Jadya ejuuquetu pureama jutidya jucuare Jesús jaque cabatitsu. Arepa eje bucha jidama inime cuanaju ama bucha, ecuana pureama jutaqui, jadyatu jucuare.

Umae versículo cuana jida cabahuityati ishuque tu riyacuanaque: 1: 18, 21; 2.5-11; 3.7-14; 4.4, 6-8, 11, 13, 19.

Pablora Jesús queja ecatyati cuanaque isaracuareque

¹ Era rique micuanaja quirica cuadishaya. Ique Pablo. Timoteo ri eatsehue. Isaramereya micuana yatsera. Yatse yatse Jesucristo merequique. Cuadishaya rique quirica Filiposju Yusuja cuanaja ishu, Cristo Jesús queja cuita camadya ecatyati cuanaja ishu. Micuana neri neri micuana isaraya Jesús queja ecatyati cuanaque cuatsashaqui cuanaque, tumebaedya Jesús queja ecatyati cuanaque tsahuaqui cuanaque. ² Yusu ecuana Etatara, tumebaedya Ecuana Cuatsashaqui Jesucristora jida tsehue nenarucue tatseja quiyuhuebati tsehue. Tatsera inime tsapema neanishacue.

Pablo Jesús queja ecatyati cuanaja ishu Yusu queja bacabacacuareque

³⁻⁵ Ejeque uradya jutidya micuana adebatsu tuque pureama tsehue Yusu jadya aya:

—Ecue Etata Yusu, yusurupai mique aya, mira Filiposju aniya cuanaque mira naruhua tibu. Yusurupai dutya tunaja ishu. Tunara micue quisarati bacametse ahua eque, riyaque huecaca tupu, tunara ique tsahuajacahua ama Ecuana Cuatsashaquija mere. Yusurupai mique aya, tunara ique tunaja ai aniya tsehue tsahuahua tibu, —jadya tuque Yusu aya, micuana adebatsu.

⁶ Micuana Jesús queja catyatihuaju micuana Yusura iyacuanehua. Tura micuana tura amerecara aya bucha amereajeedya jutidya aya. Eratu pana ejene aya Yusura eje bucha tibunehuaque tura tuequedya adadiyaque. Jesucristo junanucahuaju, micuana tura amerecara aya eque jubuque.

⁷ Era micuana dyaque iyuhueda baya. Jadya tibudya tuque

ecue micuanaja ishu jadya inime tuputaqui. Yusura ique casaturahua, dutya eje bucha juyaque pureama tsehue idu ishu. Ique etare apudaju netichine patya, huaraji cuanaja yacuaju quicuenetitaquiju, era Yusuja quisarati cuejayaju jadya tura jida tsehue bachine. Tsahuajacacuare ama micuanara ique canerecatiyaju. Jadya tibudya micuana Yusura baya jida tsehue.

⁸ Yusuratu adebaya eje bucha iyuhuee micuana era bayaque. Era micuana iyuhueda baya, Jesucristora iyuhueda baya bucha iyuhueeya. ⁹ Yusu queja micuanaja ishu bacabacayaque tuque jadya ajacama aya:

—Tata, Filiposju micue cuanaja miatsehue peya cuana tsehue jadya iyuhue paaniajedya jutidya. Paadebaajedya jutidya tuna mique eje buchique. Micue iyuhuedaque tuna iyuhueda paba. Mira ujeu bayaque tuna ujeu paba, —jadya tuque ecue abahue Yusu micuanaja ishu.

¹⁰ Jadya juatsu micuana jida bahue judadiya ejeque jidamaque, jidaque jadya. Jidaque tuque micuana eadadiu. Jadya juatsu tuque micuana aya amadya asicadaque, bisutadaque jadya. Cristo junanucatsu tura micuana banabuque ai tibu nereda ataqui ama, jucha metse ama jadya. ¹¹ Yusuja biji eque micuana anibuque, Jesucristora jadya amereya tibu. Micuana jida tuyu jadya anie juyaju, peya cuanara Yusu pureama, mui jadya paa.

Pablo etare apudaju eishatana ama buchatu Yusuja quisarati cuejatanajacacuare ama

¹² Umaeja ni tu inime jucuaire: “Pablo etare apudaju eishatana tibu, peya cuanara amena Yusuja quisarati bacaya ama cuana bucha”. Bahue micuana amerecara aya; jadique ama tume, micuana ecue eatsehuequi cuanaque. Dyaquedya tunajatu Yusuja quisarati bacacuare. ¹³ Dutya sudaru Romaju dyaque inime metse cuanaque ique etare apudaju ishaqui juchine cuanaratu bacachine Jesúsja quisarati. Bahuedya tuna juchine ique Jesús queja nimeeque tuja quisarati cueja puji tibu etare apudaju ishatanachineque. Tumbaedyatu jetiama peya ecuita cuana riyaque epu ebariju aniya cuanaque bahue ique eje bucha juatsu rehuaque.

¹⁴ Tumbaedya dutya jujeri rehua Cristo eque ecue eatsehuequi cuanaja aijama baji Yusuja quisarati cueja ishu. Tunaratu bachinedya ique Yusura jida inime tsapema amereyaju, arepa ique etare apudaju ama bucha. Jadya tibu tuna bahuedya Yusura dyadi tuna naruyaque, tuque mere juyaju jida inime tsapema amereyaque.

¹⁵⁻¹⁷ Eje umara Cristoja quisarati cuejaqui cuanara ujeu baya. Ni tuna Cristo eje buchique cuejacara aya. Nerecatura,

tsapetillaya jadya jutidya tuna aya ecuita cuana. Tunaja quisarati bacaqui cuana queja tuna casumimereticara juya. Tunara cuejayaque camadya tunajatu ecuita cuana queja ijacabacameretacara aya, era cuejayaque bacue aijama. Tunajatu inime juya: “Pablo ni tu cahuaitiya ecuanara cuejayaque camadya ecuita cuanara bacaya baatsu”. Jadya tunajatu quisarati cuejaya jidama tsehuedya jutidya.

Peya cuanara bacue Cristoja quisarati cuejaya jida inime tupu tsehue. Quisaratiya tuna, tuque iyuhueda baya tibu, tumbaedy a ique. Tunaratu adebayadya huaraji cuana Cristoja quisarati cueja ishucue emajaca ani ishucue Yusura ique rehua iyahuaque. Bahuedya tuna tunajadya Cristoja quisarati cuejataquique, ique tumeque cuejara cuinanataqui ama tibu.

¹⁸ Arepa eje umara Cristoja quisarati jidama tsehue cuejaya ama bucha, cahuaitishaya ama tunara ique. Ecahuaitiuque, pureama jutidya juya, peya cuanara Cristoja quisarati bacaya baatsu. Jadya tibudya, eratu jidama ama inime baya, quisaratiya ni ecanacue ecuita cuana pureamatura ishucue, jadya ama juatsu Yusu pureamatura ishucue. Pureama ique jujacaya ama, tunara Cristoja quisarati cuejajacaya ama tibu.

Cristo ecuanaja emajura, chachara jadya pureamaturataquique

¹⁹ Adebayadya tuque ique eje bucha juyaque, ecue jida ishucue judadiyaque, micuana ecue ishucue Yusu queja bacabacaya tibu. Tumbaedy Espiritu Jesúsra cuadishahuara tsahuaya. ²⁰ Eje bucha acara ebari, eje buchadya ama amadya acara jadya tuque aya ecue ataquique. Bisutaqui amatu Cristo eje buchique cueja ishucue, iyacua neri neri. Jadya jucara juya dutya ique eje bucha juya eque Cristo pamuitana. Iyetana ishucue ni, inajacata ishucue ni, eratu Cristo muimerecara aya. ²¹ Ique chacha jari tupu, ecue: tu bijida Cristo pureamatura ishucue, ai ecue biji eque juishucue ama. Iyacua cuita ique tuque aniyaju amadya datse. Majuya ni ique, tuja yacuajudya judiruya ni eje tupu jaca ishucue ama. Ecue ishucue dyaque jida ique maju ishucue.

²² Huaraji cuanara inajacamereyaque juatsu, tume tuque ecue emajaca aniyadya Ecuanacue Cuatsashaquiija quisarati cuejanuca ishucue. Tumbaedy peya cuana tsahuanucaya tu- aqueja catyati ishucue. Jadya tibu ejeque inime mepetaqui ama cabatiya, Jesús queja judiru, rehuadya tuque mere, eje bucha cuana taa. ²³ Ejeque inime mepetaqui ama juya. Majucara, majucarama jadya jutidya juya. Eje buchadya majucara juya Cristo queja judiru ishucue. Jadique ni tu dyaque jida ejuu riyaque yahuajudya jutidya mere ejuuque. ²⁴ Micuanaja

ishutu dyaquedy a saretanaya ique rehuadya ani ishutu jari, ecue micuana tsahua ishutu, Jesús dyaque jida micuana adebamere ishutu.

²⁵ Jadique juatsu taa majunime ama jari. Cuanucaya ique micuana queja, Jesús micuanaja dyaque jida adeba tsahuara. Tume ni micuana dyaque pureama juya, Yusuja biji eque ani dyaque jida bahue juya tibu. ²⁶ Ique micuana tsehue Jesús pana adebamere aishu junucatsu taa micuana dyaque jida ejuu. Tume micuana equisaratiu jida Jesúsja ishutu tura ique eje bucha ahuaque adebatsu.

Pablora Jesúsja cuanaque eje bucha anie jutaquique cuejacuareque

²⁷ Cristoja quisarati ejenehua cuanaque aniya bucha anicara nejudue. Yusu pureamatura ishutu cuita camadya, yuhucama ecadutyati tuque merecara tsehue cuita camadya neanicue. Jutaquiju era cuitadya ni micuana batiya, rehuadya bahue judadiya micuana peya cuana tsehue iyuhueda cabatiyaque Yusu pureamatura ishutu. Sudaru cuana tuna tsehue catiyaque ijahue aishu ecadutyatiu bucha, jadidya micuana ecadutyati jutaqui peya cuana cueja ishutu Jesús queja catyatitsu Ijahua quejaque einajaca juishuque.

²⁸ Nemubaume micuana Jesús queja nimee juya baatsu micuana ujeu baqui cuanaque. Tuna jadya juyajudyatu adebataqui tunara Yusu adebayaque ama. Tume tuna inime cacuaretiya amaju, Yusu tuna jacameretabuque ni eje tupu jipenuca ishutu ama. Amena micuana bacue Jesúsja quisarati micuana bajida tsehue ama cuejaya ni micuana tuaqueja nimee jucaya, jadique tu ejitajudya micuanara Yusu adebayaque. Tume micuana Yusu queja judirubuque ni eje tupu tuque jaca ishutu ama.

²⁹ Jadya ama bucha, paju ama micuanaja inime riyaque yahuaaju canerecatiya ama jadya. Yusradya jadique inime iyahua tibu catyatiya camadya ama ecuana Cristo queja, tumbaedy a ecuana nerecada juya, tujaque juya tibu. ³⁰ Yusu adeba baecua cuanara micuana ujeu babuque, ique acuare bucha. Sudaru casadara canerecati cuana iduya bucha jetiedya juatsu ama, jadyatu era iduhua pureama tsehue, ique Jesús jaque baatsu tunara jidama ayaju. Ique tuhua Filiposju jucua patya bacuaedy a micuanara era iduyaju tuatsehue nime aputajacatsu ama. Iyacia micuana bahuedya riyaque quirica eque, Epafrodito eque era pureama tsehue iduyaque jari, arepa tunara ique jidama aya ama bucha.

2

Peya cuana jida aishuque inime tupuqui ataquique, ai ecuanaja ishu camadya ama

¹ Micuana Cristo queja catyatihua tibu, iyuhueda tsehue necabaticue peya cuana tsehue. Cristora micuana dutya peadya peadya iyuhueda baya tibu, iyuhueda necabaticue peya cuana tsehue. Yusuja Espiritu dutya micuana peadya peadya tsehue tibu, iyuhueda tsehue necabaticue peya cuana tsehue. Micuana peya cuana tsehue quiyuhuebatsati aqui juya tibu, iyuhueda tsehue necabaticue. ² Pureama tsehue neanicue. Peya cuanaja jida ishu dutya neacue, micuanaja ishu camadya ama. Peadya inime tsehue camadya ai acara neacue. Dutya tupu micuanaja inime tupu paju. Jadya anie juatsu micuana ejitaju juya yurameta iyuhueda cabatiyaque. Jadya anie ni micuana juya, pana pureama micuana juya. ³ Micuanaja pureama ishu cuita camadya ai neaume. “Ique dyaque jida, dyaque inime metseque, peya cuana bucha ama”, jadya micuanaja inime paju ama. Micuana tacadya jutidya peya cuana bucha inime metse ama necabaticue. Tuna pureamaturacara neacue, ai micuana taca ama. ⁴ Eje buchadya tsahuajacacarama peya cuana neacue. Peya cuanaja jida ishu neacue; micuanaja ishu camadya ama.

Arepa Yusu ama bucha Jesús ecuita jucuaque

⁵ “Eje buchadya merecara neacue peya cuana micuana ecameremeretiuque. Cristo Jesúsra inime tupucua bucha inime netupucue. ⁶ Riyaque yahuaju junama jarijutu Cristoja inime juhua: “Ique ecue Etata Yusu jadya yatse beta tupu. Jadya ama bucha, ique yahuaju jari tupu, ecue Etata emui bucha ique muitajacaya”, jadyatu Jesúsra inime tupucua. ⁷ Tumetu emui ejuuque, tuja inime taca cuitadya aima bucha jucua. Arepa ecuatsashaqui aridaque paju ama buchatu riyaque yahuaju junahua peya cuana mere ishu. Cuinanacuare maju aqui. Arepa tuque Yusu jujacacuare ama buchatu ecuita jucua. ⁸ Etataque Yusuja yana equedyatu dutyaju jucua. Majucua ecuana jiteque. Curusuju tatahuajutu majucua. Jadya bisutada iyee tunajatu quiyeti puji cuana abahue jucua. Jadidyatu Jesús jucua tuta taca, peya cuana mere ishu.

⁹ Jesús majuhajutu Yusura chacha nityatsuranucua. Tuaqueja tsurashanucatsu tujatu huaraji aridaque amerecuare, dyaque inime metseque aniyaju. Eadeba tujatu amerehua “Ecuana Cuatsashaquique” jadya ebacani tsehue. ¹⁰ Dutya eiyaquetu chichucata jubuque Jesús mui ishu. Barepaju cuanaratu muibuque barepaju Yusu tsahuajacacarama

cuanara, tumbaedyá Jesús queja ecatyati cuanaque majucuaré cuanara. Ryaque yahuaju chacha aniya jari cuanaratu muibuque. Ijahua cuana, tumbaedyá Jesús queja catyatima majucuaré cuanaque tuna chichucata jubuque tuja yacuaju, “Ecuana bjidamaduracuaréquetu huaraji dyaque aridaque”, jadya juyaque. ¹¹ “Miquemi Ecuana Cuat-sashaquique, huaraji dyaque aridaque, Jesús. Emuitu Etata Yusu juya”, jadya tuna jubuque Jesúsja yacuaju chichucata juatsu.

Peya cuana Jesús adebamerequi jutaquique

¹² Ique tuhua micuana tsehue jucuaré patya, era bahuityaya eque micuana jujacuaré ama, micuana ecue iyuhueda cuanaque. Iyacia micuanaja inime paju: “Arepá Pablo rehúa ecuana tsehue aijama paju ama bucha, tura bahuityahua eque neanijacara ama” jadya. Yusura micuana Ijahua quejaque inajacamerehuaque ejitaju cabameretiyaque neanicue, Yusu pureamatura ishú. Cahuaitishacarama jadya neanicue. ¹³ Tura cuitadya micuana nime casaturaya tuja yana equedyá juishu; casaturaya tuja biji eque ani ishú.

¹⁴ Dutyá neacue abacata tsehue. “Yusura taa jidama aya. Juya amadya ique tura amerecara aya eque”, jadya inime netupuume. ¹⁵ Arepá micuana ryaque yahuaju Yusu adeba baecua cuana ducu aniya ama bucha, tuna aniya bucha anie nejuume. Tuna tuna tuyu ama inime cadujutiya. Tuna tuna Yusura anishacara aya eque ama cuita aniya. Neanicue dutyaja micuana Yusu jaque bahue juishu. Tuyu inime necadujuticue. Nejuume ni eje bucha peya cuanaja micuana “Miquemi jucha metse”, jadya aishu. Purari equetu bahue ejeque meta ajeyaqué eju tuque cuayaju junati ishú; tume bae nucadyatu umae cuana bahue juya micuana eque Yusu queja eje bucha judirue juishuque. ¹⁶ Micuanaratu peya cuana cuejaya Yusu queja judiru ishúque quisarati. Tsajajayaque icueneta junati juishu ecacasatiu cuita bucha, jadidya ique cacasatihua micuana Jesús dyaque jida adebamere ishú. Tuja biji eque neanijacaume. Tume ique amena pureama jubuque Jesúsja yacuaju netitsu. Casumitibuque ique micuanaju, yanacana ama Filiposju mere ahuaque adebatsu.

¹⁷ Pae cuanaja Yusu uu cuana eieyque etya bucha, jadidya micuana micuana taca catyatihua Yusu queja, Jesús queja catyatitsu. Ique ni majutaquí micuana Jesús queja catyati tsahuahua tibu, pureamadya juya, arepá tunara ique papitubu ama bucha. Jadique juatsu ecue ami pajuridya, uva nacaca esasanashaque pae cuanara Yusuja ebacaniju

paquehuaju jurihua bucha. Pureamadya juya, Jesúsja quisarati cueja ishü ecue emajaca anihua tibu. Bahuedya ique micuana dyadi pureama juyaque Jesús queja catyatihua tibu. ¹⁸ Jutaquiju, peya inime nejuume, tunara ique iyeyaque juatsu. Pureama jutidya nejuque Yusura ecue ishü ahuaque, micuanaja ishü jadya.

Pablora ecana Timoteo cuayaque cuejacuareque

¹⁹ Juhua aba eje bucha cuana taa tunara aya. Bahuedya ique Ecuana Cuatsashaqui Jesúsja biji eque judadiyaque. Ebajarara datse tuque Timoteo Filiposju micuana queja cuadishacara aya. Tuque juetinucatsu, tura ique micuana eje buchique cuejaetihuaju ique pureama juya. ²⁰ Timoteo tuque cuadishaya tura micuana dyaque iyuhueda baya tibu; era micuana tumbae iyuhueedya baya. Tura micuana bacara aya, etataquera ebacuaque ebau bucha. Aijamari peya micuana queja ecuadishauque micuana tsahuacara ebari ejuuque. ²¹ Umae rehua eatsehue cuanaque rena cuacarama juya Filiposju. Tunaja ishüque cuita camadya tuna dyaque inime tupu ishü aya; Jesucristo mere ishü bacue aijama.

²² Micuanaratu adebayadya Timoteo. Micuanaratu adebayadya tura tuja ishü inime tsapeyaque ama Jesús mere ishü camadya. Timoteoratu Jesús merehua eatsehue beta tupu peya cuana Yusu queja judiru ishüque quisarati cueja. Ebacua etataqueja yana equedya ejuu bucha, jadya tsahuae tura yana equedya juatsu achine. ²³ Jutaquiju huaraji cuanara inime bajejeyaque paba jari. Iyeya, inajacaya eje bucha tunara ique ayaque bahue juatsu, tuque Timoteo cuadishaya Filiposju micuana cuejamere ishü tunara inime bajejeyaque. ²⁴ Jadya ni Yusuja inime, inajacayadya tunara ique. Inajacaya ni tunara ique, tume masadamadya ique dyadi cuayadya micuana cuajira.

Timoteo cuamaju

Epafrodito Filiposju judirunucacuareque

²⁵ Juhua aba eje tsunu cuana taa yatse Timoteo tsehue ecuaü tuhua. Ecuetu inime juya cuadishanucataqui ni tu Epafrodito ebajarara cuita. Tuque tuque ecue eatsehuequique. Tuquetu eatsehue mere juhua Jesúsja quisarati cueja. Sudaru cuanara tuna ujeda nrecaturayaju eiduu bucha, jadidya tuque yatse tura era jadya iduchine Yusu adeba baecua cuanara ijahue ijahue ayaju. Tura tuque ecue chipiru bechine micuanara ique tsahua ishü sitachineque. Tuquetu tsahuatsahuaya eje bucha tura tsahuataqui baya eque, tuque rehua tupu, micuanara amerehua

equedya. ²⁶ Rehua junatsutu ujejeda junachine, micuanara quisarati bacatsachine baedya. Micuanara tuja ishujidama inime bayaque adebatsu, tura micuana ebajarara badirunucacara aya, micuanaja amena tuque mejemejeque batsa ishujidama. ²⁷ Pusha amadyatu dyaque cuita ujejeda juchine. Majujerichine rique. Yusura nerecabatsuri chachajunucachine. Tuque chachanetsu, Yusuja dyadi canerecabati anichinedya eatsehue. Epafrodito majuchineque juatsu taa ique dyaque peya inime ejuuque.

²⁸ Jutaquiju tuque masadama cuadishaya micuana queja, micuana tuque banucatsu pureama juishu, tuque adebatsu micuana peya inime ejuu tibu. Era micuana tumbaedya jidama inime ishudyabachine, micuanara Epafrodito bacarabari eauque adebatsu. Tuque judiruhuaque adebatsu micuana jidama inime ishujidama. ²⁹ Nebatsacue pureama tsehue; micuana tsehuequi cuanaque ebatsau bucha batsaeneacue. Dyaque iyuhueda nebacue. Iyuhueda tuque ecuanajayusu merequi cuanaque bajacataqui ama Epafrodito juhua bucha. ³⁰ Cristo mere juyaquetu tuque ujejeda juatsu majujerihua. Arepa emajuu cuanaque adebaya ama buchaturajacahua ama micuanara tuque amerehuaque. Micuanarehua eatsehue juatsu ebau bucha baedya tura aya.

3

Yusura ecuanajahua quejaque inajacamereya Jesús queja catyatihuaju, jidaque mere ayaju ama

¹ Peya micuana bahue amerecara aya, micuana ecue eatsehuequi cuanaque. Pureama nejudue, micuana Ecuanacuatsashaqui jaque tibu. Icuene micuana cuejahua pusha pusha bahuityaqui cuanajamicuana jahue aishu ama. Eje buchadya eje uma cueja acara micuana aya. Jesús quejanimeedya jutidya juaje ishujidama nebacame tume pusha pusha ari cuana.

² Necanaruticue tume bahuanatacarama juyacuana tsehue, chapa mureda bucha cuana tsehue. Jidamadya jutidya tuna juya. Ecuita huitu biti tuna catubumeretiya, jadyajuatsu Yusu queja ejudiruu bucha adebatsu.

³ Tunaratu inime tupuya tuna Yusu jaque bucha, tuna ecuita huitu biti ecatubumereti tibu. Ecuanabacue pusha ama cuitadyayusu jaque. Ecuanajesús queja catyatihuajitibu, tuque ecuanadebaya ecuanayusu jaque, Yusradya ecuanatujaque amerehua tibu. Tuja Espiritura ecuanayusu muimereya. Ecuanacuanacasumitiya Cristo Jesús jaque cabatitsu. Ecuanataca ama ecuanajahua quejaque

quinajacameretihua israelita cuanaja bahue ecuita huitu biti catubumeretitsu, ni peya eje bucha eqe ai aatsu ama.

⁴ Ecuana taca quinajacameretitaqui ni ejuu, ique taa quinajacameretitaquidya juhua, ique datse jida juhua tibu. Aijamatu ni ejeque buchique ique bucha jida anihuaque. ⁵ Ique datse ecasumiti ejuu. Ique Israel eqe ejuracanaque. Israelita cuanaja bahue tunara tubucuaire ecue cuinana huecaca catsurutihuaju, Yusura israelita cuana amerecuare bae. Benjamín eqe ejuracanaque ique. Ique hebreo. Ecue etata, ecue ecuaa ecatsetu hebreodya jucuare. Ique fariseo jucuare. Cacasaticuaire ique cacuatsashati eqe ani ishú, tumbaedyá ecuanaja baba cuanaja bahue eqe ani ishú. ⁶ Ique taa Yusu pureamaturacara datse jucuare. Jadya tibudya tuque Jesús queja ecatyati cuanaque jidama acuare, tuna Yusuja biji eqe ama juya bucha baatsu. Dutya cacuatsashati cuana eqe datse anihua jida anicara juatsu.

⁷ Pusha amadya icuene ique casumitihua dutya tume cuanaju, Yusura ique jida baya bucha cabatitsu, ique jadya anie juhua cabatitsu. Yume tucue jadya ama. Jesús queja catyatitsu ique casumitijachua ique icuene eje bucha anie juhuaque. Yusura ique tujaque amerehua ique Cristo queja catyatihuaju ademe. ⁸ Ryaque camadya ama, dutyadya tuque jacahua Jesucristo Ique Cuatsashaqui queja catyati ishú. Tujaque juishuquetu dyaque saretanayaque, peya ai ryaque yahuaju saretanaya bucha ama. Jiji ai asicadaque ebijidamadurata bucha, jadya bijidamadurae tuque ecue beruque ani aya, Cristo cuita camadya adeba, pureamatura jadya aishu. ⁹ Eje buchadya tuaqueja cuita camadya inime teshue anicara juya. Jadya tuque ecue inime cacuat-sashati cuana eqe anitsu ama, Cristo queja catyatihuaju Yusura ique jucha metse ama baya tibu. Yusratu jucha metse ama baya Jesucristo queja ecatyati cuanaque. ¹⁰ Eje buchadya pana adebaajecaradya jutidya tuque Cristo aya. Majuhuaque, enetitsuranuaja casa eqe ique anicara juya. Turatu Yusuja biji dutya ahua, arepa canerecatihua ama bucha; jadidya ique jucara juya. Canerecatitsutu curusuju majuhua. Jadidya ique nime aputacara juya ecue biji eqe juishu, Yusu pureamaturayaque cuita camadya ani ishú, ¹¹ majutsu ique Yusu queja judiruyaque bahue juya tibu.

Yusura ecuana amerecara aya eqe jucara ebari jutaquique

¹² Ique Jesucristora cuatsashaya eqe ama jari cuitadya juya. Yusura ique amerecara aya eqe cuita ama jari juya. Canimehuallatiya ama ique. Jadya ejuuque, eje buchadya Yusura amereya eqe jucara ebari juya. Tsajajayaque catuputiyaque ejeque icuene judiru ishú ecacasatiu bucha,

jadidya ique cacasatiya Yusura ique eje bucha amerecara aya eque juishu. Icuene Cristo Jesúsra tujaque amerehua ique jadya anie juishu.

¹³⁻¹⁴ Jadya micuana cuejaya, micuana ecue eatsehuequi cuanaque. Idya cuitadya bahue Yusura ique eje bucha amerecara aya eque juyaque ama jari. Jadya tuque inime tupuya: “Arepa era eje uma mara Yusu merehua ama bucha, tura cuatsashaya eque ique juajetaquidya jutidya. Peya bacue ique nime aputataqui dutya ique eje bucha juhua cuanaque. Yusuratu ihuarahua tuja yacuaju Cristo Jesús queja dutya ecatyati cuanaque. Tsajajyaratu etibene queja petaya ama; icuene tujatu petaya, tuja judiru ishucue eje buchadya adadicara tsehue. Jadidya ique juya, Yusura ique amerecara aya eque juishu. Jadya judirue ique ejeque huecaca tuaqueja jubucue. Tyabucue tura ique jidaque dutya tuja cuanaja ishucue”, jadya tuque inime tupuya.

¹⁵ Dutya ecuanara Cristora cuatsashaya eque juya cuanaja tuque ecuanaja inime tuputaqui jadya. Bahuedya ecuanara Yusu pana pureamatura ayaque ama aniyaque jari. Umaera ni micuana jadya ama inime tupuya, Yusura micuana adebamereya yunerique. ¹⁶ Jadya ama bucha ecuanara anitaqui eje bucha ecuanara Yusura adebamerehua eque, ecuanara anihua bucha aninucatsu ama.

¹⁷ Ique, ecue ecare cuana jadya ecuanara Filiposju jucuaré patya Yusu pureamaturacara ecuanara jucuaré. Neanicue ique aniya bucha, micuana ecue eatsehuequi cuanaque. Jetiamatu aniya micuanaja epuju ecuanara bucha anie juya cuanaque. Necatsahuaticue peya cuana tsehue jadya anie juishu.

¹⁸ Jetiamatu aniya Yusuja biji eque ama aniya cuanaque, arepa “Jesús queja ecuanara catyatihua” jadya juya ama bucha. Amena eje uma cueja micuana ahua tuna eje buchique. Yudijidya cueja micuana anucaya. Tuna eje bucha anie juya tsehue tunara dyaque peya inime amerehua. Arepa “Jesús quejatu catyatitaqui, curusuju majuhua queja” jadya juya ama bucha, tuna, tunaja anijudya adebataqui yuneri cuitadya ecana tuaqueja peadya camadya ama tuna catyatiyaque. ¹⁹ Tuna tuna Yusu queja ama judirubucue; jaquebucue tujatu ecana ni eje tupu jipenuca ishucue ama. Tuna tuna eje buchadya jutidya juya tuna eje bucha jucara juya equedyá jutidya, Yusu Neri pureamaturayaque ama. Ai bisutadaque aatsu ecana casumitiya, jida juya bucha cabatitsu. Inime tsapequi tuna aya ama ai Yusu jaque. Riyaque yahua juque camadya tura inime patya aya.

²⁰ Ecuanara ecuanara jadya ama. Arepa ecuanara riyaque yahua eje uma huecaca piji aniya ama bucha, ecuanara

eaniqui neritu barepaju Yusu aniyaju. Tuhuaquetu Ecuana Cuatsashaqui Jesucristo junanucabuque. Eje buchadya junashahuishacara tsehue tuque ecuana ihuaya Ecuana Inajacamerequique. ²¹ Jesús junanucatsu tujatu ecuanaja ecuita cabapetishanabuque tuja ecuita bae cuitadya. Ecuanaja ecuita tu casadama, riri aqui jadya. Amena Jesúsja ecuita bacue cabapeticuare ni eje tupu riri aqui juishu ama. Jadidya tujatu abuque ecuanaja ecuita. Casa tujatu aniya dutya ai aniya cuanaque cuatsasha ishu. Tumeque dyaque casa tsehue tura ecuana cabapetishanabuque.

4

Ecuana Cuatsashaqui jaque cabatitsu pureama juajetaquique

¹ Ejeque huecaca ecuana Jesús tsehue anibuque adebatsu necanimehuallatiume, micuana ecue eatsehuequi cuanaque. Ecuana Cuatsashaqui queja nimee nejujacaume. Dyaque iyuhueda micuana baya. Eje buchadya bae acara micuana aya. Micuanara ique dyaque jida amerehua. Yusura micuanaju eje bucha ahuaque inime tuputsu, tuque adebaya yanacana ama tuja quisarati era micuana cuejahuaque.

² Quisarati tuque cuejacara aya Evodia, tumebaedya Síntique. Ique bahue juchine metse ujeu cabatiyaque. Metse cuinetse buchique metse Jesús queja betadya catyatihua tibu. Jadya tibu cati cati nejujacacue; betara tupu jida inime netupucue.

³ Tumebaedya mique cuejaya, Suyugos. (Riyaque ebacani ri “tuhua cuinetse mere juyaque” jadique.) Nerecabacue ique; tsahuacue tumeque epuna ecatse ecahuaitique. Jida ecatse quisaratishanucacue. Tatse tatse ecuana tsehuequique epuna ecatse. Ique tuhua Yusuja quisarati cueja jucuare patya tatse betadya mere jucuare eatsehue. Tumebaedya Clemente, umae cuana ique Yusu mere tsahuaqui jucuare cuanaque. Tunaja ebacani cuana tu amena ehue Yusuja cuanaja ebacani cuana ehueju. Ehuene tuna Yusura dutya tuaqueja judirushabuque cuana tsehue.

⁴ Pureama nejujacaume, Ecuana Cuatsashaquira micuana jacayaque ama caadebatitsu. Cuejanucaya micuana era. Pureama nejujacaume, arepa jidama inimeju ama bucha.

⁵ Peyara jidama ahuaaju necacuarehuanatiume. Jida tsehue jutidya ecana nebacue dutya. Ecuana Cuatsashaquiquetu tsunutaya ama. Tume tura ecuana cuarehuananaya.

⁶ Inime tsapequi ai neaume. Jidama inimeju, ujejeda jadya cabatitsu Yusu tsehue nequisaraticue. Micuanara ai sareyaque juatsu, Yusu nebacacue. Necuejacue micuanara

ai bijida bayaque. “Yusurupai dutya mira ahua cuana eque”, jadya neajacaume. ⁷ Ecuana jadya juyaju, ecuana Yusura jida inime tsapema amereya, Cristo Jesús queja catyatihua tibu. Arepa ecuana inime jidama cuanaque bajeje ishū ecacasatiu ama bucha, ai ama ecuana ejuu. Yusura peadya camadyatu dutya eau.

Dutyajidaque inime tupuqui ataquiue

⁸ Micuanaja ishū quirica huenetillama jariradya micuana cuejacara aya riyaque, micuana eatsehuequi cuanaque. Jidama inime cuanajudya jutidya jidama inime ishū ebauque, jidaque inime tupuqui neacue. Jida juatsu peya cuana ai etyauque inime tupuqui neacue. Inime tupuqui neacue yunerique, camuibati jadya. Tuyuque inime tupuqui neacue, ai micuana cajuchatishaquiju ama. Jida inime tsapema ishūque inime tupuqui neacue, pureama ishūju jadya. Jadya cuanaque inime tupuqui neacue.

⁹ Era bahuityahua eque neanicue. Ique micuana queja juticuare patya micuana bahuityacuare Yusuja biji eque ani ishū. Micuanaratu adebayadya ique micuana ducu Yusuja biji eque anicuareque. Jutaquiju jadya aniedya nejucue. Tumetu Yusu micuana tsehue aniya. Yusuradya micuana inime tsapema anishaya.

Pablora Filiposju cuanaque chipiru cuadishahuaju yusurupai acuareque

¹⁰ Ecuana Cuatsashaquira micuana queja tsahuamerehua. Jadya tibudya ique dyaque jida. Yusurupai micuana aya. Adebayadya tuque era micuanara ique tsahuajacacarama ahuaque. Tsunudatu eje bucha jadya jutaqui ama juhua. ¹¹ Paju ama micuanaja inime: “Pablotu quisaratiya, canerecaticuare tibu” jadya. Aijama, jadya ama tuque. Ecue ai aniya tsehue piji pureama cabahuenetihua, riya piji, jadya ama juatsu umada jadya tsehue. ¹² Amena ique cabahueneticuare eje bucha juyaju jidadya jutidya cabati. Ique bahue ai aijamaju eje bucha anie jutaquique jetiama aniyaju, jadya ama juatsu riya piji aniyaju. Ecue riya piji ara ishūque aniyaju, adebayadya tuque ique Yusura tyayaque. Ecue earaqui umada aniyaju, yusurupai tuque Yusu aya. Ai eje uma ama aniyaju, jadya ama juatsu umada aniyaju, canimehuallatiya ama ique. Yusurupai jutidya tuque Yusu aya. ¹³ Eiduudya tuque dutya ique eje bucha juyaque canimehuallatitsu ama, Jesús eatsehue tibu. Turadya ique casaturaya; ita taca ama. ¹⁴ Jadya ama bucha micuanara jidadya tsahuahua ique jidama inimeju nubihuaju.

15-16 Rियाque amari micuana Filiposju cuanara ique tsahuametse ayaque. Ique Macedonia epu cuanaju Yusuja quisarati cuejatibune jucuaire patya micuanara tsahuacuare. Ique Tesalonicaju jariju micuanara ecue chipiru cuadishacuare ique tsahua ishu micuanara cuadishacuareque. Jadya apidya ama micuanara acuare. Micuanara tyacuare tumeque chipiru, ique tsahua ishu, ique Yusuja quisarati cueja peya epu cuanaju juneniyaju. Micuana Filiposju cuanara Jesús queja catyaticuare cuanara micuanara peadya jadya acuare.

¹⁷ Ecuetu inime juhua ama: “Ita tunara ecue ai ecuadishau” jadya. Micuanaja inime tacadya tuque micuanara ecue cuadishahua. Micuana micuana injeda ama juhua eat-sehue. Jadya tibudyatu Yusu dyadi injeda amadya juya micuana tsehue. ¹⁸ Amena rique ecue aniya dutya era sareyaque. Epafrodito tsehue micuanara cuadishachineque rique ecue aniya tupu ai. Jadya tsahuae micuanara ique achine, Yusu etyau bucha tyae micuanara achine. Tuja biji tu jadique. Yusu jatu bijida muru ijimedaque tuja etareju pahuayaju; jadyajudyatu ejitaju juya tuque muiqui cuanaque. Tumebaedyatu Yusura bijida baya micuanara ique tyachineque; ejitajudya micuana juchine Yusu muiyaque. ¹⁹ Micuanara ique ecue aijama tsehue tsahuahua; ecue Etata Yusura micuana tyadya micuanaja dutya ai aijamaque. Dutya ai aniyaque tu tujaque. Tuquetu injeda ama. Tujatu tyabahuedia dutya ai Cristo Jesús queja ecatyati cuanaque.

²⁰ ¡Dyaque jida, casada taa ecuanaja Etata Yusu! ¡Muitanajacaya ama tuque! Jadidya paju.

Pablora Yusuja cuanaque isaramerecuareque

²¹ Isaramereya micuana dutya tuhua Yusuja cuanaque, micuana Cristo Jesús queja ecatyati cuanaque. Eatsehue cuanara micuana tumebaedya isaramereya; tuna dyadi tuna Jesús queja ecatyati cuanaquedya. ²² Eatsehue cuanara camadya ama micuana isaramereya. Tumebaedya dutya jujeri riyaque epu ebariju Yusuja cuanara micuana isaramereya. Aniyari Jesús queja umada ecatyati cuanaque; tuna tuna huaraji aridaque jetiama epu cuanaju merequi cuanaque. Tunara neri neri micuana isaramereyadya.

²³ Ecuana Cuatsashaqui Jesucristora jida tsehue nenarucue tuja quiyuhuebati tsehue. Jadidya paju.

Riya tupu camadya.

Pablo

COLOSASJU CUANAJA ISHU PABLORA QUIRICA CUADISHACUAREQUE COLOSENSES

Riyaque quirica ri Pablora Colosasju aniya cuanaja ishu cuadishacuareque. Umae yunerique ama bahuityaqui cuanara patu Colosaju cuanaque acuare: “Barepaju Yusu tsahuaqui cuanaque nemuicue, tumbaedy peya cuana ai ejitaju cuanaque ama”. Acuare tujatu ecana: “Jesús queja ecatyati cuanaque ecuita huitu biti necatubumereticue. Aniyatu uma eeraqui arataquima cuanaque. Moisésja cacuatsashati eque cuita micuana anitaqui” jadya. Pabloratu tume cuanara bahuityayaquepa pusha pusha jadya acuare. Tura tuna acuare: “Cristo tu dutyaju inime metseque jadya, ejitaju ama cuanaju, ejitaju cuanaja jadya.

Bahuityacuare tura ecuana. Cristotu aniya peadya peadya tuja cuana queja, ecuana Yusu pureamaturayaque cuita ani ishu. Huenecuaretu ecuana etareju cuanaque ecuana eje bucha bae ataquique.

Riya cuanaque versículo cuana tu jida cabahuityati ishu: 1.17; 2.6-7, 10; 3.14, 15-17, 23; 4.5-6.

Pablora Jesús queja ecatyati cuanaque isaracuareque

¹ Era rique micuanaja quirica cuadishaya. Isaraya micuana era. Ique Pablo. Jesucristoja yana atsaquique ique, Yusuja jadya inime juya tibu. Tumbaedy micuana Timoteora isaramereya. Tuquetu ecuana tsehuequique.

² Cuadishaya rique quirica Colosasju Yusuja cuanaja ishu. Micuana micuana ecuana tsehuequi cuanaque. Bahue ique micuana Cristo queja nimeedya jutidya juajeya. Yusu ecuana Etatara jida tsehue nenarucue tuja quiyuhuebati tsehue. Tura inime tsapema neanishacue.

Pablora Colosasju cuanaja ishu Yusu yusurupai acuareque

³⁻⁴ Cuejaya tunara ecuana micuana Cristo Jesús queja nimeedya jutidya juajeya, tumbaedy micuanara peya cuana Jesúsja cuana jida inime tsehue bajacayaque ama. Jadya tibudya tuque ecuana Yusu micuanaju jadya aya:

—Yusurupai mique ecuana aya, mira Colosas juque micue cuanaque ahuaque baatsu, —jadya tuque ecuana ajacaya ama Yusu, Ecuana Cuatsashaqui Jesucristoja Etataque.

⁵ Icuene tuque micuana bacahua quisarati jidaque yunerique. Bacahua micuana Yusura tuja cuanaque barepaju tuatsehue aniquere ana ahuaque. Cuejayaju bacahua tibu tuque micuana pana ejenedya aya Yusura micuanaja

ishu jidaque iyahuaque tyabuqueque. Jadique ejeneya tibu, micuana Jesús queja nimee jucacaya ama. Jadique ejeneya tibu, tuque micuana Yusuja cuanaque iyuhueda bajacaya ama. ⁶ Quisarati jidaque cuejayaju bacatsu, Yusura micuana iyuhueda bayaque bahue juatsu, arepa micuana cajuchatihua ama bucha, adebahuadya tuque micuana yunerique. Jesús queja catyatitsu, tuque micuana dyaque jida eadebaajeu. Adebaajehuadya jutidya micuana tuque eje buchique, tumbaedy a peya cuana iyuhue micuana adebaha. Micuana camadya ama tumbaedy uma peya epuju cuanaque tuna cuejatanaya riyaque quisarati. Jadya bacatsu tuna dyadi Jesús queja catyatiyadya. Tunara dyaditu peya cuana iyuhuedadya baya.

⁷ Epafrastra micuana icuene cuita cuejehua riyaque quisarati jidaque. Turatu Cristodya mereya, yatsera mereya baedy a. Tuquetu dyaque jida mere juya. Dyaque iyuhueda tuque yatseja. Tuquetu micuana queja yatse cuarequique. ⁸ Juetitsu tura yatse cuejaetihua micuana eje buchique.

—Colosasju Jesucristoja cuanaque tuna dyaque iyuhueda cabatibareya peya cuana tsehue, Yusuja Espiritura jadya anishae aya tibu, —jadya tura ecuana cuejachine micuana eje buchique.

⁹ Jadya tibudya ecuana Yusu queja bacabacajacaya ama micuanaja ishu. Micuanaja quisarati bacatsametse achine eque ecuana jadya Yusu queja bacabacaya:

—Ecuanaja Etata, Colosasju micue cuanara pana adeba paa mira ecana eje bucha anishae acara ayaque. Bahuityacue ecana mira jida bayaque, jidama bayaque jadique adeba ishu. Dyaque caadebameretiajecue. Micue Espíritu eque ecana jadya amerecue, —jadya tuque ecuanaja Yusu abahue.

¹⁰ Riyaque pana adeba aatsu, micuana Ecuana Cuatashaquija biji eque eanijacau ama. Tuja biji eque micuana jucacaya ama. Jida inime tsehue tuque micuana peya cuana baya, micuanara eje bucha tsahuataqui baya eque tsahua jadya. Dyaque jida tuque micuana Yusu eadebau. ¹¹ Tumbaedy a ecuana Yusu queja bacabacaya micuanaja ishu:

—Tata, miquemi dyaque jida. Micuetu dyaque casa aniya. Micue dyaque casa eque casaturacue Colosasju micue cuanaque. Casaturacue ecana tunaja dutya eje bucha juyaque idu ishu. Mira ecana jadya casaturae ahuaju tunajatu cahuaaitibatsaya ama. Canimehuallatiya ama, arepa eje buchique idutaquima baya ama bucha, —jadya tuque ecuanaja Yusu abahue.

¹² Tura jadya nime casatura ahuaju micuana casada juya. Tume tuque micuana ecuanaja Etata pureamaturaya. “Yusurupai, miq̄ue ecuana tsehue tibu”, jadya tuque micuana aya. Turatu tyaana ahua ai jidaque peadya peadya cama tuja cuanaque. Yusura cuatsashahua eque aniyaque juatsu, micuana micuana huecadaju ajeya cuanaque buchique. Huecadaju ajeya cuanaque tuna bahue eju cuayaque; jadidyatu micuana adebaya Yusu. Turadyatu quisarati iyahua micuana tuja yacuaju judirubuqueque, tuque dutya naruqui juhuaju. ¹³ Icuene ecuana Satanásra cuatsashaya eque anihua. Satanás tu Yusu ujeu cuanaque cuatsashaquique, meta juneniya cuanaque buchique cuatsashaquique. Yusura ecuana inajacamerehua Ijahua quejaque. Iyacia tu Satanás ama ecuana cuatsashaquique; Yusuja Ebacuaque dyaque iyuhedara ecuana cuatsashaya. ¹⁴ Tuja Ebacuaquetu majuhua ecuana inajacamere ishu. Jesús tu majuhua ecuanaja jucha cuana tsujetyaqui. Tuaeja catyatihuaju, tuque ecuanaja Yusura jucha cuana tillahua.

Jesús ecuanaja jucha cuana seca ishu catyatihua tibusu Yusu jida nuca ecuana tsehue

¹⁵ Cristo tu ecuanaja Etata Yusu baeque cuita nucadya. Arepa Yusu ejitaju ama paju ama bucha, Cristotu junahua ejitaju. Tuquetu Yusuja Ebacuaque, Yusura dutya iyahua cuanaque dyaque inime metseque. Yusuja riyaque yahua dutya ai aniyaque iyama jarijudyatu Cristo anihua. ¹⁶ Tuatsehuedyatu Yusura iyahua dutya ai barepaju, yahuaju aniyaque. Ejitaju amaque ejitajuque jadya tatsejatu iyahua. Tatseratu iyahua barepaju Yusu tsahuaqui cuanaque casaju ijahue catimere baecua cuanaque, enaruqui cuana casada cuanaque, ecuatashaqui cuanaque jadya. Cristo tsehuedyatu Yusura dutya barepa juque Yusu tsahuaqui cuanaque iyahua. Cristora ademetu dutya iyahua. Tuja ishutu dutya iyatanahuadya. ¹⁷ Cristo tu dutya iyama jariju anicuareque. Tura ademedyatu dutya ai aniyaque jida iyaya. ¹⁸ Cristoradyatu cuatsashaya tuaqueja ecatyati cuanaque. Tudyu tuque ecuanaja iyuca buchique; ecuana tuja ecuana ecuita buchique. Tuquetu Ecuana Maju Baecua Anishaquique. Tuquetu chacha netitsuranucahua Dutyu Cuatsashaqui juishu, dutya ai aniyaque ebaretilla juishu.

¹⁹ Yusuja jadya inime juya tibudyu tu Cristo Ebacuaque Yusu cuitadya; beta tupu tatse. ²⁰ Jadyatu Yusura inime tupucuaru: “Yahuaju cuanara, barepaju cuanara jadya muiya ama. Ujeu tunara baya. Era cuatsashaya eque ama tuna aniya. Era tuna eaqueja amerecara aya, ecuique juishu. Ecue Ebacua eque tuna ecue amerecara anucaya”, jadya tujatu

inime tupucuaré. Jadya eque tujatu Ebacuaque curusuju majucuaré. Ami quijehueticuare jucha cuana tsuje. Yusuja tu amena cahuaiti etere. Jadya juhuajutu amena anihua emajaca yahuaju aniya cuanaja, barepaju aniya cuanaja jadya Yusu jipenuca ishu.

²¹ Icuene tuque micuana tuque ujeudya bahua. Tuque jipetaqui ama bucha micuana anihua. Jidamaquedya jutidya micuana inime tupuqui ahua. Jidamaquedya jutidya micuana ajacahua ama. ²² Iyacua bacue Yusuja cahuaiti terehua micuana tsehue. Tuja Ebacuaquetu cacuitatitsu riyaque yahuaju junahua. Junatsutu curusuju majuhua. Tuaequeja catyatihuaju, Yusura micuana tuja cuanaque amerehua, micuanaja jucha cuana tillatsu. Asicada buchique tura micuana secahua. Jadya eque micuana tuja yacuaju judirubuque; jucha metse ama tura micuana babuque. Jadya tura micuana amerehua tuaqueja amere ishu. ²³ Yusuja yacuaju jadya cabamereti ishu, Jesús queja nimeedya jutidya nejuajecue. Quisarati jidaque ejenetsu, micuana pana ejene ahua Yusura tura aana ahuaque adadiyaque, ejeque huecaca ecuana tuaqueja judirubuqueque jadya. Etare ayaquetu saretanaya dudu cuana aridaque; dedatu puchatanaya, etare cuejiji casadara edaduaju. Jadidya tuque micuanaja quisarati yunerique ejeneajetaquidya jutidya, peya cuanara yunerique ama cuejayaju bape bape inime etupuu tibu. Baya quejeneti arida nejuume. Riyaque quisarati yuneriquedyatu era, peya cuanara jadya cuejaya dutya queja.

Yusura Pablo tuja cuanaque tsahua ishu, tuque dyaque jida adebaquere ishu jadya mepecuareque

²⁴ Ique etare apudaju ishatanachine, era Yusuja quisarati israelita ama cuanaque cuejahua tibu. Arepa jadya nerecadae ataya ama bucha, ique pureama juya. Cristo ujeu baqui cuanara ecuana ijahue ijahue aatsu nerecaturaya ecuana Cristoja cuanaque. Ecuana jadya nerecadae atayaquetu Cristo cuitadya canerecatiya bucha, ecuana tuja ecuita buchique juya tibu. Ique canimehuallatima canerecatiya cabatitsu areque umae cuana pacacasati Jesús tsehue nime aputa ishu ama. ²⁵ Ique Yusura cuatsashahua Jesús queja ecatyati cuanaque tsahua ishu. Jadya meree juishu tura cuatsashahua micuanaja jida ishu. Cuejamerehua tura ique tuja quisarati dutya queja.

²⁶ Yuequedyatu ni ejera adebahua ama eje bucha inajacameree Yusura ecuita cuana Ijahua quejaque eauque. Yusratu cuejahua ama ni ejeque. Amena iyacua bacue tura tuaqueja catyatiya cuanaque bahue amereya. ²⁷ Yusratu inime pirecuare. “Cristo israelita cuana queja camadya ama

paju, tumbaedy a israelita ama cuana queja. Jadya tuque ecue bijida ecue cuanaque riyaque bahue amere ishu”. Jadya tibu tu Cristo micuana tsehue, arepa micuana israelita ama juya ama bucha. Jadya tibu tuque micuanaja pana ejene aya micuana eje tupu Yusuja yacuaju judirubuqueque. Dyaque jida taa tuque ecuaana tsehue.

²⁸ Jadya tibudya tuque ecuaana dutya cuejaya Cristoja quisarati, israelita ama cuanaque, israelita cuana jadya. Cuejaya tuque ecuanara eana jidamaque tunaja jaca ishu. Yusura dutya bahuityahua eque tuque ecuaana aya. Jadya ecuaana juya, Cristora cuatsashaya eque dutya ani ishu. Jadya ecuaana juya, Yusuja yacuaju judirutsu ecuaana tura amerecara aya eque cuita judiru ishu. ²⁹ Tuna jadya amere ishu ique dyaque cacasatiya. Cristora cuitadya ique cacasatishahua ique castereya tupu mere juishu. Dutya casa tura ique tyahua tsehue tuque mereya.

2

¹ Pusha ama cuitadya ique inime patya juya micuanaja ishu, Laodiceaju cuanaja ishu, dutya tumeque yahuaju ecue ebutsequini bama cuanaja ishu, tuna pusha pusha bahuityaqui cuana queja ijahue ecatimereuju. Micuana micuana bahuedy a ique micuana jiteque casada mere juyaque. ² Jadya juya, micuana canimehuallatima Yusu pureamatura ishu, iyuhueda tsehue micuana peya cuana tsehue cabati ishu. Jadya juya, micuanaja quisarati yunerique pana ejene aishu, pusha pusha bahuityaqui cuanara micuana ijahue eauju. Yuequedyatu ejeque bahue juhua ama Cristo eque ecuita cuana Yusu queja judirubuqueque. Etehua buchiquetu juhua. Amena iyacuatu Yusura ejitaju ahua. ³ Turadya ecuaana adebamereya Yusuja bijida, bijidamaque jadique. Educuju eteri aniyaque peta ishu yahue tsehue epacashau bucha, jadidyatu Yusura Cristo eque ejitaju amerehua ai jidaque, jidamaque jadique.

⁴ Jida inime netupucue, quisarati pusha pusha bahuityaqui cuanara micuana ijahue eauju. Tunara cuejayaque tu ejentaqui buchique; yunerique ama tume. ⁵ Arepa ique micuana tsehue ama ama bucha, era micuana inime tupuqui ajacaya ama. Micuanapa Yusuja cuanaque eanita bucha aniya. Micuanapa canimehuallatima Jesús queja nimee jujacama. Jadya bahue juatsu ique dyaque pureama juya.

Yusura ecuaana iyacuanehuaque

⁶ Micuana Ecuaana Cuatsashaqui Cristo Jesús queja catyatihua tibu, peadya camadya bucha nejudue tuatsehue. ⁷ Tuaequeja nimeedy a jutidya nejuajecue. Acui aridaquetu

casada netiya, etiri arida deda ecua tibu. Etaretu casada aija bucucushataqui ama netiya, dudu cuana arida deda epucha tibu. Jadidya ecuana casada jutaqui, Jesús tsehue ecadutyati juatsu. Tuaequeja catyatihuaju tura ecuana casaturaya tuaqueja nimeedya jutidya juaje ishü. Quisarati yunerique neejenajacame micuana cuejatanahuaque. Yusurupai neajacame Yusu.

⁸ Jida inime netupucue, ni ejera buchique micuana Jesús queja nimee amerejaca ishü ama, micuana Ijahua quejaque Inajacamerequique. Micuana ni tuaqueja nimee jujacanicaya, tume micuana ina risi jadya eataque bucha junucaya. Tumeque pusha pusha arida cuanara bahuityayaque tu ecuitara inime tupuyaque jutidya. Yanacana cuita tunajatu bahuityaya. Pusha pusha jutidya tunajatu bahuityaya. Cristoja quisarati ama tunajatu bahuityaya. Tumeque ebahuityaque, tunajatu baba cuanara cuejahuaque jutidya tunajatu bahuityaya. Ibedaque ama cuita jutidya tunajatu cuejaya. Arepa tuna bahue cuanara cuita camadya tunara bahuityayaque eadebau jadya aya ama bucha, pusha ama cuitadya tunajatu ibedaque ama cuita bahuityaya. Neejeneume ecana.

⁹ Cristo tu Yusu tsehue beta tupuque. Yusu dutya eje buchique Cristo tu tume bae cuita nucadya. Tuquetu junahua riyaque yahuaju cacuitatitsu ecuana Yusu bamere ishü, Yusu ai juyaque, eje bucha quisarati ayaque jadya bamere ishü. ¹⁰ Yusura ecuana Cristo tsehue yuhua cama bucha baya tibu, tuque ecuana sareya ama peya ecuana inajacamere ishü, ecuanaja ai aijama juyaque tyaisü jadya. Tuquetu ejitaju ama cuanaque dyaque casadaque. Tuquetu barepaju etsahuaqui cuanaque dyaque casadaque. Tuquetu ijahua cuana, yatanana cuana jadya dyaque casadaque. Jadya tibudya tuque ecuanaja barepa juque Yusu tsahuaqui cuanaque muitaqui ama. Mubataqui ama ecuanaja ijahua cuana, yatanana cuana jadya.

¹¹ Cristo tsehue ecadutyati juatsu, tuque micuanaja Yusu jaque adeba ishüque aniya. Arepa tunara micuana israelita cuanaja bahue ecuita cuanaja tubuma ama bucha, Cristora micuana iyacuanehua, cajuchaticaraque bijiserijaca ishü. ¹² Cutsameretitsu tuque ecuanaja beruque inime jidamaque terehua; iyacuanetanahua ecuana Jesús queja ecuana catyatihua tibu. Majutsu chacha enetitsuranucaque buchique ecuana. Iyacuanetanahua ecuana, Yusuja ecuana iyacuane ishüque casa aniyaque ejenehua tibu. Turatu tuja casa tsehue Cristo emajuque chacha nityatsuranucahua.

¹³ Yuequedyaquedya tuque micuanaja cajuchatijacacaramaque. Yusuja cacuatsashati eque ama micuana anihua, micuana israelita ama juya tibu. Yusura micuana emaju bucha jutidya bahua. Iyacia micuana Yusura iyacuanenucahua. Cristo bucha juishu tura micuana iyacuanehua. Yusratu Cristo nityatsuranucahua; tumbaedyia tura ecuana iyacuanehua ecuana tuaqueja catyatihuaju. Dutya jucha cuana tura ecuanaja tillahua. ¹⁴Yusratu jetiama cacuatsashati iyahua; dutya tume cuana eque ecuana anitaqui ama cabatihua. Ecuana jucha cuanatu Yusu queja manu buchique juhua. Cristotu curusuju tatatanahua. Tuquetu majuhua ecuanaja jucha cuana tsujetya ishuhua. Patrónra ecuanara manu tsujetyahuaju dutya eapupashau bucha, jadyatu Yusura apupashahua dutya ecuanaja jucha cuana. “Cacuatsashati eque ecuana equinajacameretiu”, jadya ecuanaja inime paju ama. ¹⁵Cristo curusuju majutsu tujatu Satanás casa secahua, tumbaedyia dutya ijahua cuana casada cuanaque. Dutyaja yatucaju tujatu ecana bisuturahua, ecuarira dutya tura inamerehua cuanaque petata ishuhua ejunenishau bucha.

¹⁶ Nebacaume yanacana jadya quisaratiya cuanaque: “Aniya tuque ecuanaja ai arataquima cuanaque, ijitaquima cuanaque, Yusu ecahuaitishau tibu. Aniyatu chine arida cuanaque ecuanaja ataqui cuanaque. Dutya badi nana ishuhua chine jutaqui. Chine huecacaju eje bucha jutaqui eque nejura. Jadya juyaque ama juatsu tuque ecuana Yusu cahuaitishaya”, jadya tuna jubahue yanacanadya jutidya. ¹⁷Cristo junama jaryu ecuana tume cuanaque cacuatsashati eque anihua. Tume cuanaquetu aputa buchique jutidya juhua, Yusura jadyatu judadiya jadya ahuaque. Iyacia bacue Cristo junahua. Amena ecuana tume cuanaque cacuatsashati eque anitaqui ama; tuja biji eque camadya ecuana anitaqui.

Cristo camadya tuque ecuanaja muitaqui, barepaju Yusu tsahuaqui cuanaque ama

¹⁸ Nebacaume “Yusura micuana nerecaturabuque micuana ecuana bucha ama juya tibu”, pusha pusha bahuityaqui cuanaque jadya juyaju. Tuna cuitadya tuna, tunapa aishuque ama jadya juya; tunara bacue ejeneya ama. Tunaratu barepaju Yusu tsahuaqui cuanaque muiya. Tuna bacue juya; Yusrapa ecana ejitaju bamerehua peya cuana ejitaju bameretahuaque ama jadya juya. Tuna tacadya jutidya tuna dyaque casumitiya. Tunaja inime tuputu Yusu jaque ama, ecuita cuana jaquedya jutidya tume. ¹⁹Tunajatu jutiya ama inime Cristo eque camadya einajaca ejuuque. Tuquetu dutyaja iyuca buchique; ecuana bacue tuja ecuita

buchique. Ecuanaja ecuita cuanatu daneya Yusuja inime eque. Tsuru cuana, ejaruna cuana, etsau cuana eque tuque ecuanaja ecuita cayutatiya, temuda, casada jida bucucu ishü. Tumebaedya ecuana Yusura Cristo eque casaturaya ecuana dyaquedya jutidya tura amerecara aya bae juaje ishü. Tuaqueja catyatitsu tuque ecuana Yusu dyaque jida adebamereajedya jutidya.

Eiyacuane tibu, ecuana icuene anicuare bucha anitaquique ama

²⁰ Cristo queja catyatihuaju tuque ecuanaja beruque ani juhua cuanaque terehua. Majutsu ecuanaja ecuita eaputau bucha, jadidya tuque ecuanaja beruque ani juhua cuanaque terehua. Yusura ecuana iyacuanehua, Satanásra, ijahua cuanara jadya amereya eque junuca ishü ama. Iyacuanelanahua tibu, ¿tume jatsu micuana eje bucha juatsu Yusu ujeu cuanaque aniya bucha aniya? Tuna juya bae nejuume; neba-caume tunara cuejayaque. ²¹ Tunara “Tumequetu jabataqui ama. Tumeque earaquitu arata baecua, Yusu ecahuaitishau tibu”, jadya ayaju, neba-caume. ²² Dutyatu tsunuda ama juya; earaquitu aratsu tereya. “Ai arataquimaque arama aatsu, ijima aatsu tuque Yusu pureamaturaya”, jadya micuanaja inime paju ama. Tunara bahuityayaque tu ecuita jaque jutidya, Yusu jaque ama. ²³ Tumebaedya tuna juya: “Jadya bahuity-atahua eque aniya cuanaquepa dyaque bahue” jadya. ¡Jadya ama tuna! Tunaratu Yusu muiyadya datse, tunara eje bucha acara aya equedya jutidya, Yusura amerehua eque ama. Tuna tuna juya: “Ecuana ecuana ai ama” jadya. Jadya ama bucha tuna peya cuana bucha dyaque cabatiya. Tuna tacadya jutidya tuna ecuita jidama catiya, jidama bucha baatsu. Cuji cuita juatsu, tunajatu inime tupuya: “Ecuana jadya juya tibu, ecuana Yusura jida bucha baya” jadya.

Tuna eje bucha juya eque ni ecuana aniya, tume tuque ecuana jidamaque inime tupuqui ajacaya ama, ni ecuana Yusu cahuaishajacaya.

3

Cristo pureamatura ishü ecuana anitaquique

¹ Jesucristo queja catyatihuaju micuana iyacuanelanahua. Tuque majuhuajutu Yusura anishanucahua. Iyacuatu tuque muidaque eaniquiju aniya Yusuja jida eque amaca. Jadya tibudya Cristo eje buchadya pana adebacara ebari neacue.

² Amena micuana iyacuanelanahua tibu, Cristo eje bucha pureamatura aishuque inime tupuqui neacue. Riyaque yahua juque inime tsapequi neaume, Cristo cuita camadya.

³ Emajuratu jidama inime ishü baya ama riyaque yahua

juque; jadidyatu micuanara dyadi jidama inime ishu baya ama riyaque yahua juque aiju. Cristo tsehue ecadutyati tibu, Yusura micuana naruya. ⁴ Micuanaja yuequedyaque inime jidamaquetu iyacuanetanahua, Cristo tsehue ecadutyati aniya tibu. Tuque eje tupu junanucayaju ecuana dyadi ecuana tuatsehuedya junanucabuque. Tuquetu dyaque jidaque; ecuana ecuana tuque baedya jubuque.

Beru ecuana anihua bucha aninuca ishuque ama

⁵ Necacasaticue micuana beru anihua bae aninuca ishu ama. Ai mudaque iyehua buchique tume. Nejaraquereume micuanaja caquemitiqueremaque. Nebijiseriume jadique. Asicadaque inime tupuqui neaume. Bisutadaque inime tupuqui neaume. Eje bucha bisu cuana apusha jadya nejuume aiqui jucara juatsu. Riyaquetu Yusura dyaque jidama baya. Dutya riya cuanaque inime ri cueya cueya cuana muiya buchique nucadya, Yusu camadya emuiuque. ⁶ Tuquetu dyaque cahuaitiya jadya anie juya cuana tsehue, tura amereya eque ama juya tibu. Canerecatishabuque tujatu ecana. ⁷ Icuene micuana anihua jidamaque acaraque bijiseri tsehue. Eje bucha ajacataqui ama tuque micuana bahua.

Cristoja biji eque ani ishuque

⁸ Iyacua micuana beru jucuare bae nejujacacue. Necahuaitiume. Cahuaitira nebareume peya cuanara ujeu bayaju. Peya jidama au inime tupuqui neaume. Peya eje bucha jumaquedya jutidya peya cuana queja cuatsabiji neaume. Cuatsabiji neaume bisutadaque ni cueja pidya. ⁹⁻¹⁰ Pusha pusha jutidya necatieme peya cuana tsehue. Iyacua micuana micuana icuene jucuare bae ama juya. Amena tuque micuana ijehuehua beruque inime tupu cuana. Yusura tuque micuanaja inime tupu cuana cuaretsu iyacuanehua. Camisa siri jutuyaque jidama baatsu ijehue, iyacua tsehue cajututi jadya ecuana jubahue; tumbaedya micuana aniya iyacuaque inime tsehue, beruque inime ijehuetsu. Jadya iyacuaneajee tuque ecuanaja inime tupu Yusura aya, tujaque bucha juishu, tuque pana adebaaje aishu.

¹¹ Iyacuaque inime tupu anitsu tuque ecuana jidama ama inime baya israelitaque, israelitaque ama; israelita cuanaja bahue ecuita huitu biti ecatubumeretique, catubumeretimaque; peya yahuaaju anapeque; maqueique; tsujema mere juyaque, jadya ama juatsu chipiru metseque. Inime tupuqui neara Cristo queja ejeque ecatyatique, catyatiamaque jadique camadya. Cristora ecuana dutya tupu iyuhuee baya. Tuquetu dutya tuja cuana tsehue.

¹² Micuana micuana Yusuja cuanaque. Tura micuana dyaque iyuhueda baya; tujaque juishu tura micuana mepehua. Jadya tibudya tuque pureamatura ishü neanicue. Camisa siri tacatsu iyacuaque jututsu ejuu bucha, jadidya neanicue micuanaja inime iyacua eque, beruque amena ije-huehua tibu. Canerecabati aqui nejuque. Dutya huecaca peya cuana jida tsehue nebacue. Necasumitiume; “Ai ique dyaque inimequique”, jadya nejuume. Peya cuana ujeu tsehue nebaume; jida tsehue ecana nebacue. Necahuaitiume, peyara cahuitishacara ayaju. ¹³ Jida tsehue peya cuana nebacue, arepa tunara micuana jidama tsehue baya ama bucha, arepa tunara micuana pereya ama bucha. Nenerecabacue tunara jidama ahuaaju. Ecuana Cuatsashaqui Jesúsra ecuanaja jucha cuana tillahua bucha, ni eje tupu adebanuca ishü ama; jadidya etsuje jucara nejuume. ¹⁴ Dyaquetu saretanaya ecuanaja peya cuana iyuhueda baishu. Iyuhueda peya baatsu tuque ecuana peya jacaya ama, beta esipique sirarataquima bucha. ¹⁵ Peya cuana tsehue ni micuanaja dutya tupu ama inime, Cristo nebacacue, tuja micuanaja inime yuhua cama amere ishü. Tura micuana tsahuaya inime jidamaque bajeje; tura micuana yume cama nimee anishacara aya. Turatu tuja cuanaque cuita pidya bucha camadya amerecara aya, peya cuana tsehue catsahuatibare ishü. “Yusurupai mique ecuana aya, mira dutya ecuanaja ishü jida ahua tibu”, jadya neajacaume:

—Yusurupai mique ecuana aya, mira dutya ecuanaja ishü jida ahua tibu.

¹⁶ Cristoja quisarati inime tupuqui neajacaume. Tuque bae nejuque. Jadya juatsu micuana bahue judadiya peya cuana tsehue Cristo pana adeba eje bucha catsahuatie juishuque. Nebahuityajacaume peya cuana tuque eje buchique. Necasaturatibarecue peya cuana tsehue, tuja biji eque ani ishü. Jeru cuana eque Yusu pureama neacue. Tuja Espiritura jerushaya eque pureama neacue. Yusu eje buchique, tuque ai juyaque jeru neacue. Jadya tsehue yusurupai neacue; yuneri tsehue pureama neara. ¹⁷ Ecuana Cuatsashaqui Jesúsja inime eque neanijacaume. Tuja biji eque nequisaratijacaume. Riyaque quisarati eque Yusu yusurupai neajacaume:

—Yusurupai mique ecuana aya, Ecuana Cuatsashaqui Jesús ecuana jiteque majuhua tibu —jadya.

Jesús queja ecatyati cuanaque eje bucha anie jutaquique
(Ef 5.22–6.9)

¹⁸ Mama ecana ahuequi cuanaque, micuanaja ahue cuanara cuatsashaya equedya nejuque. Jadya micuana Ecuana

Cuatsashaquira amerecara aya epuna cuana tuaqueja ecaty-ati cuanaque. ¹⁹ Tata ecana huanequi cuanaque, jida iyuhueda tsehue micuanaja huane cuana nebacue. Micuana cuita camadya aiju inime patya necatiume. Jidama tsehuedya jutidya eje bucha cahuaiti tsehuedya jutidya ecana nebaume. ²⁰ Ebacua cuana, micuanaja tatara, micuanaja cuaara cuatsashayaju yana equedya nejucue. Micuanara Ecuana Cuatsashaquique iyuhueda baya tibu, tunara cuejaya equedya nejucue. Jadique tu Yusuja bijida. ²¹ Tata ecana bacuaqui cuanaque, necahuaitishaume micuanara baya cuanaque, tuna ecanimehuallatishau tibu.

²² Micuana etsujequi inama mere juya cuanaque, micuanaja patrón cuanara cuatsashaya equedya nejucue. Jida mere nejucue, micuanaja patrón cuanara petayaju camadya ama mere nejucue. Tunara petaya amaju tumebaedya mere nejucue. Paju ama micuanaja inime: “Ecue patrónja ique jida baishu camadya mere paju. Tura petayaju camadya casada mere paju. Tura petajacahuaju mere pajujaca”. Nemerecue ecana jida inime tsehue, micuana micuana bahuedya jadique tuyuque. Micuanara Ecuana Cuatsashaquique muitsu, tura cuatsashaya eque jucara juya tibu, jida micuanaja patrón nemerecue. ²³ Micuanaja patrón cuanara ai amereyaju neacue jida inime tsehue. Inime micuanaja paju: “Ecue patrón camadya ama rique mereya, tumebaedya Ique Cuatsashaqui Jesús. Jadya tibudya ecue inime eque, ecue pureama tsehue mere paju” jadya. ²⁴ Cristo tu Ecuana Cuatsashaquique neri. Tudyatu ecuanara mereyaque. Tura ecuana tsujetyabuque ecuanara eje bucha meree ahua eque. Neadebacue riyaque. Jida ni ecuana mere juya, tuyu, tume tura ecuana tyabuque jidaque tura tuja cuanaque tyaana ahuaque. ²⁵ Ecuana ni jidama mere juya, tume tura ecuana tyabuque ama jidaque. Yusura ecuana tyabuque peadya peadyara ecuanara eje bucha meree ahua eque.

4

¹ Micuana patrón cuana, jida inime tsehue micuanaja mere puji cuana nebacue. Tuna queja micuana camuibamereticara juya tibu, micuana dyadi tumebaedya tuna tsehue tuyu nejucue, micuanara tume bae mereedya barepa juque Micuana Cuatsashaquique aya tibu. Neadebacue bacue riya era cuejehua cuanaque.

Pablora ecana bahuityanucacuareque

² Yusu tsehue nequisaratijacaume. Tuatsehue
quisaratiyaque inime tupuqui neacue. Yusurupai

neajacaume dutya huecaca. ³ Micuana Yusu queja bacabacayaque, ecuanaja ishü dyadi nebacacuedya.

—Tata, tyacue emajaca Pablo tuatsehue juneniya cuanaque Cristoja quisarati cueja ishü. Icuenu tu ni ejeque buchique bahue juhua ama Cristo equé mira ecua mi-aqueja judirushabuqueque. Iyacu amena ejitaju juhua tibu, tsahuacue ecana Cristoja quisarati cueja ishü, —jadya Yusu neacue.

Ique amena rehua etare apudaju era israelita ama cuanaque quisarati cuejahua tibu. ⁴ Tumbaedy nebacacue Yusu ecue ishü:

—Tata, tsahuacue Pablo micue quisarati ejitaju pana cueja aishu, tuque ijaca bacaqui cuanaja pana adeba aishu. Tsahuacue tuja quisarati cuejataquique cueja ishü, —jadya Yusu neacue.

⁵ Eju cuejataqui baatsu, casada tsehue necuejacue Jesúsja quisarati tuque adeba baecua cuanaque. Jidama ejuuque canaruti tsehue neanicue, tunara micuanara Jesúsja quisarati cuejayaju bacacarama eau tibu. ⁶ Tuna tsehue quisaratiyaque ecana ujeda quisarati tsehue neaume. Neijillahuanaume ecana. Jida tsehue ecana yunerique necuejacue. Jida bijitaju ara ishü ecuanaja earaqui ju banu iya bahue bucha, jadidya ecana micuanara neisaracue jida, tunaja micuanara Jesúsja quisarati cuejayaque bacaajecaradya jutidya aishu.

Amena ishüque quisarati

⁷ Ecuana tsehuequique Tíquico micuana queja jutitsu tura micuana cuejatiya ique rehua eje buchique. Ecuana tsehue jida merepee tujatu ahua Ecuana Cuatsashaquique Jesús. ⁸ Jadya tibudya tuque cuadishaya micuana casatura ishü, ecua rehua jidaque micuana cueja ishü.

⁹ Tuatsehuedya tuque cuadishaya ecua tsehuequique dyaque iyuhuedaque Onésimo, micuanaja epu juquedya. Tuquetu jida mere juhua ecua tsahuayaque. Tatsera micuana cuejatiya dutya rehua eje bucha juyaque.

¹⁰ Aristarcora micuana isaramereya. Tuque ri rehua eatsehuedya etare apudaju. Tumbaedy Marcos, Bernabéja etatiinequeja ebacuaquera micuana isaramereya. Tuque micuana queja Colosasju jutiyaque juatsu, jida nebatsacue, icuene micuana cuejatanahua equedya. ¹¹ Tumbaedy micuana Jesúsra isaramereya, tunara “Justo” jadya ayara. Marcos, Aristarco, Justo quimisha cuita camadya ri israelita cuana eatsehue mere juyaque. Eatsehuedya rena mere juya peya cuana Jesús queja catyati ishü, Yusu tunaja dyadi huaraji ecuari juishu. Riyaque ecuita cuanara dyaque tsahua, nime casatura jadya tunara aya.

¹² Epafrastra micuana isaramereyadya, micuanaja epujura. Tuquetu Cristo merequique; tura cuatsashaya equedya juyaque riya. Quisaratijacaya amatu tuque Yusu tsehue micuanaja ishu. “Tata, Colosas juque micue cuanaque Jesús queja nimeedya jutidya ecana pajuaje. Pacanimehuallati ama ecana. Mira amerecara aya eque ecana paju. Micue biji eque ani tuna pana adeba paa”, jadya tujatu Yusu abahue micuanaja ishu. ¹³ Dyaque tujatu inime tsapeya micuanaja ishu, Laodiceaju cuanaja ishu, Hierapolisju cuanaja ishu jadya, micuana pusha pusha bahuityaqui cuanara jahue eauju. Era huenehuaque tu yunerique. Era cuitadyatu bacahua tuque Yusu queja micuanaja ishu bacabacayaju.

¹⁴ Tumbaedyu micuana Lucasra isaramereya. Tuquetu casamati puji ecuanaja dyaque iyuhuedaque. Demasra micuana isaramereyadya.

¹⁵ Laodiceaju cuanaque tuque ecuanu isaramereya Jesús queja ecatyati cuanaque, Ninfa neri neri tumbaedyu Yusu pureama aishu tuja etareju casitati bahue cuanaque. Dutya tume cuanaque tuque ecuanaja ecuanu tsehuequi cuanaque.

¹⁶ Riyaque quirica micuanara isaratillatsu, necuadishacue Laodicea epuju, tuhuaque Jesús queja ecatyati cuanaja isaranuca ishu. Tunaja ishu dyadi tuque cuadishayadya quirica. Tunara isaratsu tunajatu Colosas equeque cuadishayadya, micuanaja dyadi isara ishu. ¹⁷ Necuejacue jeeque Arquipo: “Ajacaume mere mique Ecuanu Cuatsashaquira amerehuaque”.

¹⁸ Ecue emetucu tsehue rique hueneya riyaque micuana isara ishu: PABLO. Yusu queja nebacabacajacaume ecue ishu, ique rehua etare apudaju erisi netiya tibu. Yusura jida tsehue nenarucue tuja quiyuhuebati tsehue. Jadidya paju.

Riya tupu camadya micuana isaraya.

Pablo

TESALONICAJU CUANAJA ISHU PABLORA QUIRICA CUADISHAMETSE ACUAREQUE 1 TESALONICENSES

Riyaque quirica ri Pablora Tesalonicaju aniya cuanaja cuadisha ishu huenemetse acuareque. Pablotu Corintoju jucuare. Tuhuaquedyatu Timoteora cuejacuare tudya cuitadya Tesalonicaju Jesús queja ecatyati cuanaque eje buchique.

Arepa ecana Jesucristoja inime nrecada juhua ama bucha, tuna tuaqueja nimee jujacacuare ama. Jadya baatsutu Pablora dyaque pureama juatsu quirica huenetsu cuadishacuare, Ecuana Cuatsashaquira cuatsashaya eque anijaca ishu ama. “Jesucristoratu tuja cuanaque tere baecua anishaya”, jadya tujatu ecana cuejacuare. Ejeque huecacatu Jesúsra yudijidya chacha nityatsuranucabuque tuja cuanaque. Jadya tujatu ecana cuejacuare.

Umae versículo dyaque saretanaya cuanaque ri: 4.15-18; 5.16-18, 24.

Pablora Jesús queja ecatyati cuanaque isaracuareque

¹ Quirica rique cuadishaya, Tesalonicaju Yusu pureama aishu caradati bahue cuanaja ishu. Ique Pablo. Silvano, Timoteo jadya retse eatsehue. Micuana micuana ecuanaja Etata Yusu jaque, tumbaedyu Ecuana Cuatsashaqui Jesucristo jaque. Yusura jida tsehue nenarucue tuja quiyuhuebati tsehue. Tura inime tsapema neanishacue.

Tesalonicaju cuanaque Yusu jaque jadique ejitaju cabamereticuareque

² Yusu tsehue quisaratiyara micuana ecuanara dutya adebajacama aya.

—Ecuanaja Etata, yusurupai mique ecuana aya, micue cuanaque Tesalonicaju cuanaque mique pureamatura ishu aniya tibu, —jadya tuque ecuanaja abahue.

³ Tumbaedyu tuque ecuanaja jadya Yusu abahue:

—Ecuanaja Etata, micue cuanaque Tesalonicaju cuanaque tuna Jesús queja catyatihua. Jadya tibudya tunarami merehua. Tunajatu dyaque iyuhue aniya Jesús tsehue. Jadya tibudya tuna cacasatiya tuja biji eque ani ishu. Tunaratu pana ejene aya tuque junanucayaque, tura quisarati ahua equedyu. Jadya tibudya tuna canimehuallatiya ama, ni tuna Ecuana Cuatsashaqui queja catyatijacaya, —jadya tuque ecuanaja abahue Yusu.

⁴ Micuana ecuanaja ecuana tsehuequi cuanaque, Yusura micuana dyaque iyuhueda bayaque. Bahuedya ecuana,

micuana tura tuja juishu mepehuaque. ⁵ Ecuana tuna Yusu queja judiru ishucue quisarati cuejaya. Arepa ecuanara cuejahua ama bucha, Yusuja casa eque, tuja Espirituja casa eque jadya ecuanara quisaratihua. Jadya tibudyatu ecuanara ija-cabacaqui cuanara pana ejenedya aya yunerique. Micuana micuana bahuedya ecuanara jadya juhuaque.

⁶ Micuana bacue jidadya aniya, Ecuana Cuatsashaquique bucha. Ecuana cuejayaque bacatsu tuque micuana ejehua. Yusuja Espiritura micuana dyaque pureama amerehua, arepa micuana Jesús queja catyatitsu nerecada jutaqui ama bucha. ⁷ Macedoniaju cuanaque, Acayaju cuanaque Jesús queja ecatyati cuanaque tuna bahue juchine micuana Yusuja biji eque aniyaque. Jadique bahue juatsu tuna micuana aniya baedy a nicara juchine.

⁸ Umaera tuque micuana peya epu cuana eque cuetiyara cueja bahue juhua Ecuana Cuatsashaquija quisarati. Macedonia, Acayajura peadya ama, tumbaedy dutya quejaratu bacachine micuana Yusu neri queja catyatichineque. Jutajuiju tuque ecuanara peya cuana cuejataqui ama micuana eje bucha juchineque, tuna amena bahuedya tibu.

⁹ Dutya queja tunara micuana cuatsabiji aya micuana eje buchique. Ecuana micuana queja Yusuja quisarati cuejara cuahuajupa micuanara ecuanara dyaque jida batsachine. Micuanapa inime cacuaretichine. Micuanarapa amena cueya cueya ea cuanaque muijacachine. Yusu Neri Chachara amereya equepa micuana aniya. Yusu Neripa micuana muiya. ¹⁰ Pana ejenepa micuana aya, Yusuja Ebacuaque barepa juque junanucayaque Etataqueja yacua juque. Ihuayadyapa micuana tuque. Jadya tunara ecuanara cuejaya.

Yusuratu Jesús emajuque chacha nityatsuranucacuare. Jesúsra ecuanara Ijahua quejaque inajacamerehua. Ejeque huecacatu Yusura canerecatishaya dutya tuque bijidamadurajui juhua cuanaque. Ecuana ni Jesús queja catyatihua, tumetu Yusu ecuanara tsehue cahuaitya ama.

2

Pablora Tesalonicaju Yusu eje bucha meree acuareque

¹ Micuanadya micuana bahue Yusuja quisarati ecuanara yanacana ama cuejachineque tuhua Tesalonicaju, micuana ecuanara tsehuequi cuanaque. Umae micuanara ecuanara jidadya batsachine. Jesús queja micuana catyatichine. ² Micuana micuana bahuedya ecuanara micuana queja juetima jariju epu ebari Filiposju eje bucha juchineque. Ijillahuanachine tunara ecuanara. Jida ama tunara ecuanara achine.

Arepa ecana ecuana tsehue dyaque cahuaitihua ama bucha, canimehuallatitsu ama tuque ecuana ecana Yusu queja judiru ishucue quisarati cuejajacachine ama. Ecuanaja Etata Yusura ecuana casaturachine.

³ Cuejachine micuana ecuanara yunerique; pusha pusha ama micuana ecuanara cuejachine. Ni riya piji buchique tuque ecuanaja inime juchine ama: “Necuejara Yusuja quisarati, ecuita cuanaja ecuana chipiru tyaishu, tunaja mui ishucue”. Aijama, ni eje tupu tuque ecuana jadya inime tupuchine ama. Ni eje tupu ecuana micuana ijahue aishu jadya juchine ama. ⁴ Ijahue eauque, Yusura ecuana cuadishachine jidaque quisarati cuejara. Cuejaya tuque ecuana tura cuejamerecara ayaque. Tura ecuana jida bucha baya tumeque mere aishu. Ecuanajatu inime: “Yusura bijida bayaque tuque ecuana cuejacara aya, ecuita cuanara bacacara ayaque camadya cueja jadya ama. Tunara ni bacacarama aya ecuanara cuejayaque, ecuanaratu jidama ama inime baya” jadya. Yusratu adebaya ecuanara inime tupuyaque. Tuquetu bahue ecuana eje bucha juatsu jadya quisaratiyaque.

⁵ Micuana micuana bahuedya ecuanara ni eje tupu yuneriju amadya jutidya sumiyaque. Yusura peadyatu ecuanara inime tupuyaque adebaya. Turatu adebaya ecuanara ni eje tupu jadya inime tupuyaque: “Ecuana sumiyaju tunara ecuana dyaque chipiru netyara”. Yusratu adebaya ecuanaja inime jadique ama. ⁶ Camuimeretihua ama ecuana micuana queja ni peya cuana queja. ⁷ Ecuana micuana achine ama: “Netyacue ecuana ecuanaja ai aijamaque. Micuanaja ecuana muibataqui ecuana Cristoja ecuadishaque tibu”. Aijama, jadya quisarati tsehue anime ama micuana ecuanaja. Arepa ecuanaja micuana jadya bacae aishucue aniya ama bucha, micuana ecuanara jida tsehue bachine. Ecuquera ebacua cuanaque enaruu bucha, narue micuana ecuanara achine. ⁸ Ecuana micuana dyaque iyuhueda baya. Jadya tibudya micuana ecuanara cuejacara achine Yusura micuana eje bucha Ijahua quejaque inajacameree ayaque. Ai jadya camadya ama. Dyaque iyuhueda micuana ecuanara baya; eje buchadya tsahuae acara micuana ecuanara achine. Arepa jadya tibu eiyetau ama bucha, micuana ecuanara tsahuajacachine ama. ⁹ Micuana micuana bahuedya ecuana micuana tsehueju casada mere juhuaque, micuana ecue eatsehuequi cuanaque. Huecada tupu meta tupu ecuana mere juhua ecuanara sareya cuanaque cadaditi ishucue, micuanaja ecuana ai tyaishu ama. Yusuja quisarati cueja juyaque ecuana jadya meree juchine. ¹⁰ Ecuana tuhua juchine patya ecuana Yusuja biji eque mere juchine. Huaraji cuanara cuatsashaya

eqe ecuana juchine, peya cuana tsehue jida juyaque. Ni aija nereda ataquí ama ecuana juchine. Micuana Jesús queja ecatyati cuanaque micuana bahuedya ecuana jadya anie juchineque. Yusuratu adebaya riyaque, tumbaedyá ecuana eje bucha juatsu jadya anie juchineque. ¹¹ Ecuánara micuana dutya casaturahua Jesús queja catyatijaca ishú ama. Nime casaturahua micuana ecuanara. Etataquera ebacua cuanaque jida ebau bucha, jadya ecuana micuana tsehue juhua. ¹² Cuejachine micuana ecuanara, Yusuja biji eqe micuana ani ishú, Yusuja cuanaque eanita bae micuana ani ishú. Turadyatu iyahua micuana tuaqueja judiru ishúque tura dutya naruhaju, tuque dutyaja esumi juhujaju.

¹³ Jadya tibudya,

—Yusurupai mique ecuana aya. Tesalonicaju cuanaratu jida micue quisarati bacachine ecuanara cuejayaju, —jadya tuque ecuana ajacaya ama Yusu.

Bahuedya micuana ecuanara cuejahuaque ecuanaja inimedyá jutidya ama, Yusu jaque tume. Bacatsu micuana Jesús queja catyatihua. Jadya juhujaju micuana Yusura casaturati-bunehua tuja biji eqe ani ishú. Ajacaya amadya tuja tuque.

¹⁴ Tuequedyá micuana micuana tsehue anae cuanara jidama achine micuana ecuana tsehuequi cuanaque. Ujeu tunara micuana bachine, micuana Jesús queja ecatyatique baatsu.

Tumbaedyatu icuene atanacuare israelita Judeaju cuanaque tuna Jesús queja catyatihuaju. Peya israelita cuanara tuna Jesucristo mui ishú caradati bahue cuanaque nerecat-uracuare. ¹⁵ Israelita cuanaja huaraji cuanaratu Ecuana Cuatsashaquí Jesús iyemerecuare. Tunaja baba cuanara tuna Yusu equeque cuitadya quisarati cuejaquí juhua cuanaque iyeetibehua. Arepa tuna tsehue anae ama bucha tunajatu ecana iyeetibecuare.

Tume patya equeque iyacua tumbaedyá ecuana israelita cuanaja huaraji cuanara ecuana jida ama aya. Cuinanashaya tunara ecuana tunaja epu cuana juque, ecuanara Jesúsja quisarati cuejacara ayaju. Jesúsja biji eqe ama tuna juya. Tsahuacarama tuna peya cuana aya. Bacamerecarama tuna peya cuana aya Jesúsja quisarati. ¹⁶ Ecuánaratu cuejacara achine tumeque quisarati israelita ama cuanaque, Yusuja tuna Ijahua quejaque inajacamere ishú tuna Jesús queja catyatihuaju. Tume ecuana tumeque israelita cuanara cuejamerejacacara achine. Jadya juyaque tunajatu Yusu bijidamaduraya. Dyaquedyá jutidya tuna cajuchatiajeya. Jadya tibusu Yusu tuna tsehue ecahuaiti. Ejeque huecaca tujatu ecana dyaque nerecaturabuque.

Pablora Tesalonicaju cuanaque batinucacara acuareque

¹⁷ Ecuana cajacatchine equeque ecuana cabatinucama micuana tsehue. Ecuana tsehuequi cuanaque bucha iyuhuee micuana ecuanara baya. Arepa micuana ecuana tsehue ama ama bucha, ecuanara micuana adebajacaya ama. Eje buchadya micuana bacara ebari tsehue ecuana cuacara junucaya micuana cuajira. ¹⁸ Cuacara datse ecuana juya. Ique Pablo neri neri eje uma cuacara datse juya. Satanásra ecuana perejacama aya, cuacara juyaju. Jadya tibudya eje bucha cuataqui ama cabatiya micuana cuajira. ¹⁹ Ecuana Cuatsashaqui Jesucristo junanucahuaju micuana ecuana tsehuedya jubuque tuja yacuaju. Pureama ecuana jubuque micuana tujaque juya tibu. “Riyadya Tesalonicaju cuanaque. Ecuana micue quisarati cuejayaju tuna miaqueja catyatihua. Arepa peya cuanara jidama aya ama bucha, tuna miaqueja catyatijacahua ama, ejenejacahua ama”, jadya tuque ecuana Jesús abuque. Jadya cuejayaju, “Micuanara ique jida merehua”, jadya ecuana Jesúsra abuque. Jadya tura ecuana abuque, ecuanara micuana tsahuaya tibu, tumbaedy a peya cuana tuaqueja catyati tsahuaya tibu. ²⁰ Micuanara ecuana pureama amereya, micuana Jesús queja catyatihaju. Micuana Ecuana Cuatsashaqui queja bameretsu ecuana dyaque jida jubuque.

3

¹ Eje buchadya bahue jucara ecuana juchine micuana eje buchique. Tuequedy ecuana eje bucha idutaqui ama bachine micuanaja quisarati cuana baecuaque. Tume tuque ecuanaja inime juchine: “Ecuana mere aniya tibu, jutaquiju Atenasjudya ecuana neanira. ¿Eje bucha juatsu jatsu tuque ecuana ejeque cuana cuadishaya ama Tesalonicaju aniya cuanaque cuajira?”

² Jadya juatsu tuque ecuana cuadishachine ecuanaja ecuana tsehuequique Timoteo. Tuquetu jida Yusu merequique. Tuquetu ecuana tsehue mere jupee juchine ecuana Cristoja quisarati cueja juyaju. Cuadishachine tuque ecuana, micuana casaturati ish u, micuana Jesús queja nimeedya jutidya juaje ish u. Cuadishachine tuque ecuana micuana tsahua ish u, Yusuja quisarati micuanaja jida jida cuita adebaaje ish u. ³ Micuana cueja, casatura jadya aishu tuque ecuana cuadishachine, micuana nrecada juya cabatitsu ecanimehuallatiuju, beruque inimeju micuana eaninucauju. Micuana micuana bahuedya Yusuja inimedya ecuana nrecada juyaque.

⁴ Ecuana micuana tsehue jariju, “Jesús adebaya ama cuanaque tuna cahuitidadiya micuana tsehue. Jidama tunara

micuana adadiya”, jadya micuana cuejachine icuenedya. Jadidya tunara micuana aya era micuana cuejachine equé cuitadya. ⁵ Jadya tibudyatu era inime tupuchine: “Tesalonicaju cuanaque ni tu canimehuallatichine, jadya canerecatie juya cabatitsu. Ecuana cajuchatishacara aquira ni tuna beru anihua bae anishanucagua jadya. Ecuana taa ecuana casada mere juchine tuna Yusuja quisarati cueja juyaque. Yanacana mere ni taa juchine” jadya.

Micuana eje buchique bahue jucara ebari cuita juatsu tuque Timoteo cuadishachine micuana queja, micuana Jesús queja nimeedya jutidya juajeyaqué bahue juishu.

⁶ Ejetsunue ama ri micuana quejaque juetichineque. Jidaque cuatsabiji ecuana bacatsachine micuana jaque. Micuanapa Jesús queja nimee jaridya. Canimehuallati-madyapa micuana. Iyuhuedapa micuana peya cuana tsehue cabatijacaya ama. Micuanarapa iyuhue apushaya ama. Bacara ebaripa micuanara ecuana aya. Jadya tura ecuana cuejaetichine. Ecuana dyadi micuana eje bucha bacara ebaridya aya. ⁷ Dyaque micuana ecuanara inime tupuqui achine. Micuanaja cuatsabiji cuana bacatsatsu tuque ecuanaja jida inime juchine, micuana ecuana tsehuequi cuanaque. Rehuari Yusu adeba baecua cuanaque cahuaiya jari ecuana tsehue. Canerecatiya ecuana. Micuana Jesús queja nimeedya jutidya juajeyaqué bahue juatsu, ecuana cacasatinucachine. ⁸ Micuana Jesús queja nimeedya jutidya juajeyaqué bahue juatsu, tuque ecuana eiduu pureama tsehue eje buchique jidamaque inime. ⁹ Jadya tuque ecuanaja Yusu abahue:

—Ecuanaja Etata, dyaque mique ecuana yusurupai aya Tesalonicaju micue cuanaja ishü. Pureama ecuana cabatiya tuna Jesús queja catyatijacama bacatsu. Eje bucha quisarati tsehue yusurupai ataqui ama ecuana cabatiya. Mira ecuana dyaque pureama amerehua, Tata, —jadya tuque ecuanaja abahue.

¹⁰ Bacani huesajacama micuana ecuanara aya Yusu queja bacabacayaqué. Huecada tupu, meta tupu ecuana tuaqueja canerecatiya:

—Tata, pacabatinuca taa ecuana Tesalonicaju cuana tsehue. Aniya jari taa tu tunara mique eje buchique adebayaqué ama. Baticara ebari tuque ecuana ecana aya tuhua, tuna tsahua ishü, dyaque jida tunaja mique adeba ishü, —jadya tuque ecuanaja abahue.

¹¹ —Tata, tsahuacue ecuana Tesalonicaju tuna cuajira cuaishu, —jadya tuque ecuanaja abahue ecuanaja Etata Yusu, Ecuana Cuatsashaqui Jesucristo jadya.

¹² —Yurameta iyuhueda tuna cabatiya. Jida tsehue tuna cabati bahue peya cuana tsehue. Tsahuacue ecana dyaque iyuhueda tsehue cabati ishu. Tsahuacue ecana mique adebaya ama cuanaque iyuhueda baishu. Ecuana tuna iyuhueda baya bucha jadidya ecana tsahuacue iyuhueda cabati ishu. ¹³ Casaturacue ecana tuna mique pureamaturayaque anicara juishu. Mique adeba baecua cuanaque aniya bucha ecana paani ama. Jadya tuna ecuanaja Etata Yusura jucha metse ama babuque mique micue cuana tsehue junanucayaju, Ecuana Cuatsashaqui Jesús, —jadya tuque ecuana Jesús aya.

4

Eje bucha anie Yusuja biji eque jutaquique

¹ Peya micuana cuejaya, ecue eatsehuequi cuanaque. Ecuana micuana tsehueju micuana ecuanara bahuityachine Yusu muiba, tuque pureamatura jadya aishu. Pusha amadya jadidya micuana anihua. Riyaque micuana iyacua cuejaya. Tura amereya eque nejujacaume. Dyaque jida nemerecue, tuque pureamatura ishu. Jadya micuana ecuanara cuatsashaya, Ecuana Cuatsashaqui Jesúsra jadya cuatsashahua tibu.

² Icuene micuana ecuanara bahuityachinedya eje bucha anie Yusu pureamatura ishu jutaquique. Bahuityachine micuana ecuanara ai ecuanaja taca inime ama, Ecuana Cuatsashaqui Jesúsra jadya cueja ishu cuatsashahua tibu.

³ Yusura micuana tujaque amerehua. Tura micuana tuque cahuaitisha ishuque amerecarama aya. Jutaquiju micuanaja caquemitiqueremaque nejaraquereume. ⁴⁻⁵ Yusu adeba baecua cuanaque tuna caquemitiya, epuna jaraquere ishu bijiseri ebari aya tibu. Micuana bacue caquemitiya, micuanara caquemitiqeremaque iyuhue tsehue baishu, ai tuque jaraquere ishu camadya bijiseritsu ama. Iyuhueda micuanaja huane cuana nebacue, jida bau, muiba jadya ecana neacue. Jadya juyaju micuana Yusura, tumbaedy a peya ecuita cuanara jadya baya jida.

⁶ Nebijiseriume Jesús queja ecatyatija ehuanegue ni peya epuna micuanara caquemitiqeremaque ama. Ejera tuja ehuanegue ama jadya aquereyaque tu chiri juya bucha. Jadique tu dyaque bisutada. Ecuana Cuatsashaquiratu nerecaturabuque ejeque tuja ehuanegue ama jipequique. Icuenedya micuana cuejaha riyaque. ⁷ Yusura ecuana ihuarahua tuja juishu. Tura ecuana amerecarama aya tuque cahuaitisha ishuque. Tujatu bijida, ecuana jida tuyu ani ishu.

⁸ Jadya micuana cuejaya Yusura jadya cuatsashaya tibu. Tume ejeque bahuityatahua eque anicarama juyaratu ejeque ecuita ama bijidamaduraya. Yusu cuitadya tujatu biji-damaduraya. Yusura ecuana bahuityahua tuque purea-matura ishu. Tuja Espíritu cuitadya tuja tuque ecuanaja cuadishahua. Tumeque Espíritu tu cajuchati baecua. Tura ecuana tsahuaya ecuana Yusu cahuitishama ani ishu.

⁹ Micuana iyuhueda necabaticue. Tuna tsehuequi cuana tsehue ecabatita bucha cabatie nejucue. Micuana micuana bahuedya amena. Yudijidya cuejanuca ataqui ama micuana baya, Yusura cuitadya micuana jadya anie juishuque bahuityahua tibu. ¹⁰ Bahuedya ique micuana jadya anie juyaque, micuanara jida iyuhueda tsehue dutya bayaque, dutya Macedonia yahua juque Jesús queja ecatyati cuanaque. Cuejanucaya micuana ecuanara. Dyaque jida iyuhueda tsehue ecan nebacue. Jadya micuana ecuanara aya. ¹¹ Jida inime tsapema anicara nejucue. Peya cuana eje bucha jutaquique cueja micuanaja bahue paju ama. Dyaque jida micuana micuana taca necanaruticue. Dyaida nejuume. Mere nejucue micuanara ai sareyaque cadaditi ishu, micuana peya cuana queja ai aijamaque canerecatitsu catyamereti ishu ama. Jadya micuana ecuanara icuene amerechine. ¹² Micuana jadya anie juyaju, micuana Yusu adeba baecua cuanara muibaya. Tume micuana peya cuana queja canerecatitaqui ama ai tyata ishu.

Jesús junanucayaju eje bucha judadibuqueque

¹³ Cuejaya micuana era Jesús queja ecatyati cuanaque majutsu eje bucha judadiyaque, ecue eatsehuequi cuanaque. Cuejaya micuana, micuana dyaque peya inime juishu ama Jesús queja catyatima cuanaque bucha. Majutsu Yusu queja ama judirubuque caadecatitsu tuna dyaque peya inime juya ejeque majuhaju. ¹⁴ Yuneri cuitadyatu Jesús majucua. Majutsutu chacha netitsuranucua. Jadya tibudyatu yuneri cuitadya Jesús queja ecatyatique majucua cuanaque Jesús junanucayaju tuna Yusura chacha nityatsuranucabuque.

¹⁵ Ryaque micuana era cuejayaque ri Ecuana Cuatsashaquira ique bahue amerehuaque. Tuque junanucayaju dutya tuja cuanaque ecuana tsurabuque tuatsehue catsuruti ishu. Ejeque ecuana chachaque emaju cuana tsehue ecuana cabaretibuque ama. ¹⁶ Ecuana Cuatsashaqui Jesússtu Yusuja yacua juque butebuque. Huaraji dyaque aridaque ejunau bucha, jadya junaetu Jesús jubuque. Etsuri jebuda tsehue tujatu tuja cuanaque sitanabuque. Icueneque barepaju Yusu tsahuaquiquetu quiquebuque.

Yusuratu meyamerebuque corneta Jesús junayaque bahue amere ishü. Icuenu Yuſura nityatſurabuque emaju cuanaque Jesús queja catyatihua cuanaja ecuita. Cuinanashabuque tujatu ecana. ¹⁷ Ecuana tuque junahuaju chacha jubuque cuanaque ecuaña tuna tſhuedya dujutanabuque huani ducu eque. Ecuana Cuatsashaqui tſhue catsuruti ishü ecuaña dujutanabuque cuejijiju. Jadya casitatie ecuaña jubuque dutya tuatſhue, ni eje tupu jaca ishü ama. ¹⁸ Jutaquiju riya era cuejahuaque inime tupuqui neacue; necacasaturaticue.

5

¹ Dyaque bahuedya micuana; baecuatu ni ejeque buchique eje tupu riyaque jadya judadiyaque. ² Ecuana Cuatsashaqui-quetu muya jutidya junabuque. Bahuedya micuana amena. Chiri puji etare metſera ihuayaju ama meta ejunau bucha, jadyatu Jesús junabuque, dutyara jujeri ihuayaju ama. ³ Jesús queja catyatima cuanaja ni tu inime juya: “Dutyaa jida. Ni aira buchique ecuaña canerecatishanaya ama”. Tuna jadya inime tſhuejutu Jesús masadama junabuque. Epuna maquija muya jutidya ebacua cuinana ishüque uje ejuetiu bucha, jadyatu tuque junabuque muya jutidya tunara ihuayaju ama. Huananime ama tuna canerecati ishü juque. ⁴ Ecuana ecuaña bahue Jesús junanucayaque, arepa ejeque huecaca junayaque adebaya ama ama bucha. Chiri puji meta ejunau bucha muya jutidya ama tujatu etare metſeque anaya tahuiyaju ama, jadya Ecuana Cuatsashaquira neanara tuque junanucatsu muya jutidya ama; ecuanara ihuayajudya pajuna. ⁵ “Ecuana ecuaña huecadaju juneniya cuanaque buchique”, jadya ecuaña juya, ecuaña Jesús jaque tibu, tura cuatsashaya eque juya tibu. “Meta juneniya cuana buchique ama ecuaña”, jadya ecuaña juya, ecuanaja tuque cahuaítiſha bijidama tibu. Meta juneniyaquetu muya jutidya ataqui capetatiya ama tibu. Ecuana ecuaña jadya ama. Ecuannaratu adebaya Ecuana Cuatsashaquique junanucayaque. Equihuatidya ecuaña. ⁶ Ecuana ecuaña huecadaju ajeya buchique. Jadya tibudya nequihuatira, eje tupu tuque junayaque ihua. Jesús queja catyatima cuanaque tuna tahuiya bucha, tuque junanucayaju ishü quihuatitiya ama tibu. Tuna bae nejura ama. Jida tuyuque inime netupujacara ama.

⁷ Yusu adeba baecua cuanaque tuna apuda ducu ajeya buchique. Tuna tuna quihuatitiya ama. Nijuquique tahuiya bucha tuna. Tunaratu Yuſuja biji eque ani ishüque inime tupuqui aya ama.

⁸ Ecuana huecadaju ajeya bucha cuanaque ecuaña ecanimeti anitaqui. Sudaru ai dyaque pajida tſhue

eiyetauju yacua ecapeneti ejuu bucha, jadinya tuque ecuanaja Jesús iyuhueda baajetaqui tuaqueja cuita camadya catyatiaje, ecuana ecajuchatiuju.

⁹ Yusura ecuana mepehua ijahuaja etiquiju nudya ishuma. Tura ecuana mepehua tuaqueja judirusha ishuma, ecuana jadya canerecati juishu ama. Jadya Ijahuaja quejaque inajacameree tura ecuana ahua ecuana, Ecuana Cuatsashaqui Jesucristo queja catyatihuaju. ¹⁰ Tumeque Jesucristodyatu majuhua ecuana jiteque, ecuana Yusu teshue ecajacatiuju. Majuhuatutu tuque ecuana tuatsehue anisiri ishuma. Arepa ecuana tuque junanucama jariju majuya ama bucha, jacabuque ama tuque ecuanara. ¹¹ Jadya tibudya necacasaturaticue peyacuana teshue. Necacasaticue Jesús queja nimeedya jutidya juaje ishuma. Bahuedya ique micuana jadya juyaque.

Pablora Jesús queja ecatyati cuanaque eje bucha anie ju-tauique cuejacuareque

¹² Peya micuana cuejaya, micuana ecuana teshuequi cuanaque. Nemuibacue Jesús queja catyatihua cuanaque naruqui cuanaque. Tuna tuna cacasatiya micuana tsahua ishuma. Ecuana Cuatsashaquira tuna cuatsashahua, micuana naruqui juishu. Cueja bahue tunaja micuana jida tuyu ani ishuma. Nereda bucha cuejae tunaja micuana abahue micuanaja Yusu muiba ishuma. ¹³ Iyuhueda ecana nebacue. Jida ecana nebacue. Micuana tsahua ishuma tuna mere juya. Dutya jida eje bucha teshue ama neanicue.

¹⁴ Tumbaedy a micuana cuejaya, micuana ecuana teshuequi cuanaque. Mere jucarama juya cuanaque ecana nereda neacue: “Dyaida nejuume. Mere nejuque micuanara ai sareyaque cadaditi ishuma”, jadya ecana neacue. Necasaturacue ecanimehuallati cuanaque. Netsahuacue Satanásja casa idutaquima baya cuanaque, tura ecana ecajuchatishauju. Necahuaitiume ni eje teshue; abacata idu neacue dutya.

¹⁵ Arepa peya cuanara jidama aya ama bucha, ecana etsuje neaume. Jida inime teshue jutidya necabaticue. Tumbaedy a jida nebacue Jesús queja catyatima cuanaque.

¹⁶ Pureama nejujacaume. ¹⁷ Yusu teshue nequisaratijacaume. ¹⁸ “Yusu, miquemi dyaque jida”, jadya neajacaume, dutya jida cabatitsu, tumbaedy a jidama inimeju cabatitsu. Yusujatu micuana jadya juishu bijida, micuana Jesús queja catyatihua tibu.

¹⁹ Neacue Yusuja Espiritura amereya eque tura cuejayaju. ²⁰ Yusuja Espirituja ecuatashaque quisaratijaju nebijidamaduraume tura cuejayaju. ²¹ Ejeque ni “Yusuja quisarati ri riyaque” jadya tuna juyaju, micuanaja inime

paju: “¿Yuneridyari riyaque quisaratiya?” jadya. Nenime adebacue. Yuneridya ni tu Yusu jaque cuejaya, pana ijacabaca neacue. ²² Neaume ni eje bucha ni jadya apidya.

²³ Yusura jida tuyu tuque pureamaturayaque neanishajacaume. Jadya neacue Ecuana Inime Tsapema Anishaquira. Yusura nenarujacaume Ecuana Cuatsashaquira junanucatsu micuana jucha metse ama bana ishu. ²⁴ Yusura micuana mepehua tuja juishu. Turadya micuana tsahuaya tuja biji eque ani ishu. Turatu ama amadya aya tura eje bucha aana ayaque.

Amena ishuque quisarati

²⁵ Ecuanaja ishu Yusu queja nebacabacacue, ecuana tsehuequi cuanaque.

²⁶ Quisaratibare, emetucuju quinati jadya nejudue peya cuana tsehue, micuana iyuhueda cabatiyaque caadebamereti ishu.

²⁷ Jesús queja dutya ecatyati cuanaja ijacaju neisarcue riyaque quirica. Jadya micuana amereya, Ecuana Cuatsashaquira ique jadya amerehua tibu.

²⁸ Ecuana Cuatsashaqui Jesucristora jida tsehue nenarucue tuja quiyuhuebati tsehue.

Riya tupu camadya.

Pablo

TESALONICAJU CUANAJA ISHU PABLORA QUIRICA CUADISHA BETA ISHU CUADISHACUAREQUE 2 TESALONICENSES

Riyaque ri beta ishuque quirica Pablora cuadishacuareque Tesalónicaju aniya cuanaja ishu. Riyaque quiricajuri Pablora huenequere Ecuana Cuatsashaquique junanucama jariju riyaque yahujaju eje bucha judadibuqueque. Junabuque patu ecuita cuana bajituraquique, Yusuja cuanaque dutyadya jutidya ujeu baquique. Jesús queja ecatyati cuanaquepa dyaque nerecada judadibuque tere japadama Jesús junanucahuie. Jadya tujatu huenequere.

Umae versículo cuana cabahuityati ishu jidaque ri: 2.16-17; 3.3, 13.

Pablora Jesús queja ecatyati cuanaque isaracuareque

¹ Cuadishaya rique quirica Tesalonicaju Yusu pureama aishu caradati bahue cuanaja ishu. Ique Pablo. Silvano, Timoteo jadya retse eatsehue. Micuana micuana ecuanaja Etata Yusu jaque, tumbaedyá Ecuana Cuatsashaqui Jesucristo jaque. ² Yusu ecuanaja Etatara tumbaedyá Ecuana Cuatsashaqui Jesucristora jida tsehue nenarucue tatseja quiyuhuebati tsehue. Tatsera inime tsapema neanishacue.

Cristo junanucahuaju Yusura jucha arida cuanaque nerecaturabuqueque

³ Yusu tsehue quisaratiyaque tuque ecuanaja jadya aya:

—Yusurupai mique ecuanaja aya, Tesalonicaju micue cuanaque jida aniya tibu. Dutya huecaca tuna Jesús queja catyatiajeyadya jutidya. Tuna tuna yurameta iyuhueda cabatiajeya. Dyaque jidadya jutidya tuna cabatiajeya, —jadya tuque ecuanaja abahue Yusu.

Jadidya tuque ecuanaja Yusu ataqui micuanaja ishu, micuana yuneri cuitadya Yusu pureamaturayaque aniya tibu, micuana ecuanaja tsehuequi cuanaque. ⁴ Cuejajacama tuque ecuanaja aya peya epuju cuanaque Yusuja quisarati baca ishu caradati bahue cuanaque: “Tesalonicaju cuanaque Jesús queja ecatyati cuanaque tuna Yusuja biji equé aniya. Yusu adeba baecua cuanara tuna jida ama aya, tuna Jesús queja catyatihua tibu. Jidama inime tsehue tuna. Arepa ecanaja jadya canerecatie juya ama bucha, tuna canime huallatiya ama. Tunaratu pana ejene aya yuneri cuitadya Yusura naruyaque”. Jadya micuana ecuanara sumiya. ⁵ “Arepa

ecuana nrecada juya ama bucha, ecuana Jesús queja caty-
atiajeya”, jadya tu micuanaja inime.

Jadya tibudyatu Yusu jadya jubuque: “Tesalonicaju cua-
naque tuque jucha metse ama baya. Eaqueja ecana paju”
jadya. Jadya ejitajuetu Yusu juya dyaque tuyuque. Arepa
micuana iyacua nrecada juya ama bucha, Yusu dutya
naruqui juatsu tura micuana tuaqueja amerebuque.

⁶ Yusujatu abahue tuyu cuitaquedya. Jadya tibudya tujatu
nrecaturabuque micuana nrecaturaqui juya cuanaque.
⁷ Ecuana bacue nrecada juya cuanaque Yusura ecuana
nrecada amerejacabuque. Barepa juque tuque tsahuaqui
casada cuanaratu tajibebuque. Ecuana Cuatsashaqui Jesús
Yusuja yacua juque rehua junanucahuaju ecuana Yusura
nrecaturajacabuque. Tuque etiqui jujuja hueca ducu ju-
nanucatsu tujatu nityabuque canerecati cuana. ⁸ Yusu adeba
baecua cuanaque nrecaturaratu jebuque. Tume Ecuana Cu-
atsashaqui Jesucristo queja catyaticarama juhua cuanaque
tujatu ecana nrecaturanabuque. ⁹ Nrecaturabuque tujatu
ecana nrecaturajaca ishü ama. Jipebuque ama tunajatu
Ecuana Cuatsashaquique ni eje tupu jipe ishü ama. “¡Eje
casau cuita dyadimi, Yusu! ¡Emui taa mique!”, jadya tuja
cuanaque juyaju, tuja cuanaque ama tuna tuque jipenime
ama jubuque.

¹⁰ Ecuana Cuatsashaquique junanucahuaju dutya tuja cua-
nara tuque ecuana muibuque. Dutya tuaqueja ecatyati cua-
nara tuque ecuana jadya abuque: “¡Miquemi dyaque jidaque,
Jesús! ¡Miquemi dyaque casadaque! Pureama mique ecuana
aya” jadya. Micuana micuana tuhuadya jubuque tuatse-
hue, Yusuja quisarati ecuanara cuejayaque ejenetsu micuana
catyatihua tibu.

¹¹ Jadya tibudya ecuana Yusu tsehue quisarati jacaya ama
micuanaja ishü. Bacaya tuque ecuana:

—Ecuana Etata Yusu, mira tuna mepehua Tesalonicaju
cuanaque micue ishü. Tsahuacue ecana micue cuanaque
eanita bucha anie tuna juishu. Tuna tuna micue yana
equedya anicara juya. Tsahuacue ecana micue casa tsehue,
tunaja peya cuana jida tsehue baishu. Tuna Jesús queja
catyatihua tibu tunarami mereya. Casaturacue ecana tuna
micue ishü mere jujaca ishü ama, —jadya tuque ecuanaja
Yusu abahue.

¹² Micuana ni ejitaju Yusu jaque cabameretiya, tumetu
peya cuana jadya ejuu: “Jesucristo tu jida, tuja cuanaque jida
tura amereya equé cuita aniya tibu”. Tumbaedya ni tu Yusu
jubuque: “Jida bucha taa baya Tesalonicaju cuanaque ecue
cuanaque” jadya. Eje bucha jida jue ni ecuana juma ecuana
taca cuita. Ecuana Etata Yusura, Ecuana Cuatsashaqui

Jesucristora jadya ecuana baya jida bucha, tatsera ecuana jida tsehue naruya tibu.

2

Dyaque jidama cuitaque Jesús junanucama jariju ejitaju jubuqueque

¹ Cuejacuaredya micuana ecuanara, Ecuana Cuatsashaqui Jesucristo junanucabuqueque. Cuejacuare micuana ecuanara, Jesús queja dutya catyatihua cuanaque ecuana dutya tuatsehue casitatibuqueque. Pana ijacabaca neacue era iyacua cuejayaque.

² Aira cuejatsu ama micuana Jesús junanucahuaque bahue jubuque. Bacaya ni micuana quisarati: “Jesústu amena junanucachine”, jadya cuejayaju necajidamatiume. Bape bape inime netupuume. Yunerique ama tume. “Yusura ique bamerehua Jesús junanucahuaque”, jadya cuejayaju neejeneume. Ejeque ni quisaratiya: “Bacachine tuque Jesús junanucachineque”, jadya cuejayaju neejeneume. “Inatsachine tuque Pabloja quirica. Tuhuadyatu Jesús pa riyaque yahujaju nucadya”, jadya juyaju ecana neejeneume.

³ Jida inime netupucue, tumeque pusha pusha ari cuanara ijahue eauju. Jadidyatu jubuque Jesús junanucahuie. Icuenetu ecuita cuana dutya jujeri Yusu tsehue pana cayuamati jubuque. Yana equedya jujaca camuibatijaca jadya tuna jubuque. Jadya juyajutu cuinanabuque ejeque jucha aridaque neri. Ejetsunue ejitaju juhuaju amatu Yusura nerecaturabuque. Beru patu Yusura quisarati iyacuare: “Tumeque ecuita dyaque jidamaque neri tuque ijahuaja etiquiju nudyabuque. Tura ique jipebuque ama ni riyá piji buchique”. ⁴ Riyaque yahujaju jari tuputu tumeque dyaque jidamaque Yusu neri tsehue ecahuaiti jubuque, tumbaedyá dutya ecuitará muiya cuana tsehue. “Ique nemuicue; peya ai nemuiume”, jadya tujatu ecana abuque. Ecuita cuanara Yusu neri muiyajutu anibuque. Tuequedyatu dutya yahua juque ecuita naru jutibunebuque ejetsunue ama. Dutya bahue ishutu jubuque: “Ique peadya yusu. Nemuicue ique”, jadyatu jubuque pusha pusha.

⁵ Beru ique tuhua micuana tsehue jucuaré patya micuana cuejacuaredya. ¿Adebaya ama jatsu micuanara? ⁶ Tumeque dyaque jidamaque tu ejitaju juma jari. Huecaca eiyajudyatu junabuque. Micuana micuana bahuedya aira riyaque jidamaque tachiyaque huecaca juetimaju ejunauju. ⁷ Iyacuatu riyaque ecuita Yusu dyaque bijidamaduraquira jidamaque etehua aya. Jadya ama bucha iyacua tuque tachiquira tachijacahuaju, tumetu tuja jidama cuanaque dutyara badadiya.

⁸ Riyaque amena ejitaju juhuaju, tsunutabaca jadya juat-sutu Ecuana Cuatsashaqui Jesús ejitaju jubuque tuja dyaque casa tsehue. Riyaque casa tsehue tuja ecuatsa tsehue ju-jatsutu Jesúsra secabuque dutya tuja casa pana cayuamata-tisha aishu. ⁹ Cayuamatima jarijudyatu tumeque jidamaque ejitaju jubuque, Satanásja casa tsehue ecuita cuana ijahue aishu. Dutyaja yacuaju tujatu abuque ni ejeque ecuitaja ataquique ama. Tuque petaqui cuanaque tuna banetere-buque bape baatsu. Jadyatu jubuque Satanásja casa eque. ¹⁰ Turadyatu ijahue abuque ijahuaja etiquiju judiruya cuanaque. Tura dutya ai jidamaque aya baatsu tunajatu inime jubuque: “Riyaque ri jidaque. Aya taa tu jidaque”, jadya tuna jubuque, tura ijahue ahua tibu. Tunaja inime tunajatu Yusu jacabuque ni eje tupu jipe ishu ama. Tume cuanaratu yunerique quisarati bacacarama ahua. Yunerique ejenehuae juatsu tuna Yusura tuaqueja judirushaquena juhua. ¹¹ Tunara tuque bijidamadurayadya jutidya tibutu Yusura cuadishabuque pusha pusha aridaque tura pusha pusha cuejayaque tunaja ejene ishu. ¹² Jadya tibudyatu Yusu jubuque: “Duty yunerique ejenecarama juya cuanara jipebuque ama. Tunadya tuna ijahuaja etiquiju judirubuque, jidama juyaque ecana pureama juhua tibu”, jadyatu Yusu jubuque.

Yusura mepehua cuanaque Yusu queja judirubuque

¹³ Ecuana Cuatsashaquira micuana iyuhueda baya, micuana ecue eatsehuequi cuanaque. Yahua iyama jariradya micuana Yusura mepehua tujaque juishu, micuana Ijahu quejaque inajacamere ishu. Tuja Espiritu tuja tuque micuanaja cuadishahua micuana tuja biji eque ani ishu. Micuanaratu ejenehua quisarati yunerique. Jadya tibudya micuana Yusu jaque. Jutaquijudya tuque ecuana Yusu tsehue quisaratiyaque yusurupai ajacaya ama, micuana jida tsehue aniya tibu. ¹⁴ Yuequedyadya micuana Yusura tujaque amerecara ahua. Mepehua tura micuana, Jesús bucha juishu. Jesús queja micuana catyatihua, ecuanara micuana Yusuja quisarati cuejahuaju. Jadya tibu micuana Ecuana Cuatsashaqui Jesucristo tsehuedya jubuque. Tuatsehue muitapeedya micuana jubuque.

¹⁵ Yusu jaque tibu necanimehuallatiume, ni bajida neju-ume. Neejenejacaume yunerique. Neanijacaume ecuanara micuana tsehueju bahuityahua eque, tumebaedya quirica eque cuejahua eque. ¹⁶ Ecuana Cuatsashaquira ecuana dyaque iyuhueda baya, tumebaedya ecuanaja Etata Yusura. Tatsera ecuana nime casaturajacaya ama; ni eje tupu tatsejatu ajacaya amadya. Tatsera ecuana adebamerejacaya ama

ecuana ejeque huecaca Yusuja yacuaju judirubunque. Tattera ecuana jida tsehue naruya, arepa ecuana jidama paju ama bucha.

¹⁷ Yusura necasacuinashacue. Netsahuacue tura, jidaque quisarati micuanaja ajaca ishü ama. Netsahuacue tura, micuanaja jidaque ajaca ishü ama.

3

Peya cuanaja ishü Yusu queja bacabaca ishüque

¹ Peya micuana cuejaya, micuana ecue eatsehuequi cuanaque. Ecuanaja ishü Yusu queja nebacabacacue:

—Ecuanaja Etata Yusu, tsahuacue Pablo tumebaedya tuatsehue cuanaque. Ebajarara tuna pacueja dutya epu cuanaju Jesúsja quisarati. Tsahuacue quisarati cuejayaju bacaqui cuanaque miaqueja catyati ishü, micue quisarati eque ecana ani ishü. Ecuana ejenehua bucha, ejeneedya tuna paa. ² Tata, jidama, cuejataquima cuanara Pablo tuatsehue cuanaque jadya ujeda paa ama. Jetiama tuna Jesús queja nimee ama cuanaque, —jadya Yusu queja nebacabacacue ecuanaja ishü.

³ Ecuana Cuatsashaquiratu ayadya tura aana ahuaque. Tura micuana casaturaya ecanimehuallatiuju. Satanás dyaque jidamara cajuchatishacara ayaju, tura micuana naruya ecajuchatiuju. ⁴ Ecuana Cuatsashaquiratu ayadya tura ai atibunehuaque. Bahuedya ecuana tura micuana tsahuayaque. Bahuedya ecuana micuana, ecuana cuatsashaya eque juyaque, ni micuana ajacayaque. ⁵ Bacaya tuque micuanaja ishü:

—Tata, miratu Tesalónica juque micue cuanaque dyaque iyuhueda baya. Tsahuacue ecana mira iyuhueda bayaque caadebati ishü. Tata, Cristo riyaque yahuaju junatsu taa tu iduhua canerecati cuana canimehuallatitsu ama ni cahuaitsü. Tsahuacue micue cuanaque tuna canerecatiyaque canime huallatitsu ama idu ishü, —jadya Yusu queja bacabacaya micuanaja ishü.

Mere jujacataquique ama

⁶ Micuana ecue eatsehuequi cuanaque, Ecuana Cuatsashaqui Jesucristora cuatsashahuaju micuana jadya aya. Aniyatu tuhua umae mere jucarama juya cuanaque. Arepa Jesús queja catyatihua ama bucha tuna dyaida. Ecuana bahuityahua eque ama tuna aniya. Necacarenetiume tuna tsehue. Eje bucha tuna juya eque ecana neaquereume. ⁷ Micuana micuana bahuedya ecuana micuana tsehueju eje bucha junenie juhuaque. Jadidya micuana dyadi nejuque. Cadyaititsu ama ecuana casada mere juhua. ⁸ Ejera ecuana ai ecuana sareyaque tyahuaju, tsujetyahua tuque

ecuanara. Meredyu ecuanu juhua casada huecada tupu meta tupu, micuanara ecuanara ai sareyaque yanacana tyau eauju. ⁹ Jesúsja ecuadishaque tibu, micuana ecuanaja ai bacataquidya datse juhua: “Micuanaja ecuanu tyataqui juhua ai tsujema ecuanara sareyaque”. Jadya ama bucha ni bacapidya micuana ecuanara ahua ama. Ebacauque, ecuanu casada mere juhua, “Pablo, tuatsehue juneniya cuana tsehue mere juya tunaja emetucu tsehue. Ecuana dyadi tumebaedyu mereedyu nejura”, micuanaja jadya inime juishu. ¹⁰ Ecuana micuana tsehue jariju micuana ecuanara jadya cuatsashahua: “Ejeque mere jucarama juyaque netyaume ara ishuque”.

¹¹ Jadya rique ecuanu quirica cuadishaya micuanaja quisarati jidamaque bacatsachine tibu. Umaepa micuana dyaida. Merepa micuana jujacachine. Umaera patuna cuejaya mere jujaca ishu, Jesús junanucayaque japadama cuita tibu. Jadya tunara ecuanu cuejaya. ¹² Ecuana Cuatsashaqui Jesucristora ecuanu cuatsashamereya tumeque dyaida cuanaque: “Nepereume peya cuana. Yusuja biji equeneanice. Mere nejucue ai sareyaque cadaditi ishu”, jadya tuque ecuanu ecana cuejaya.

¹³ Ecue eatsehuequi cuanaque, necastereume jidaque aishu. ¹⁴ Dutyaja ijacaju ebacaniyu neacue ecuanara riyaque quirica equene cuejayaque bacacarama juya cuanaque. Necacarenetijacacue tuna tsehue. Pabisu ecana tunaja jucha cuanaju, inime cacuareti ishu. ¹⁵ Nejacaume ecana. Micuana tsehue cahuaitiyaque ebau bucha bae ecana neaume. Nereda bucha cuejae jutidya ecana neacue. Ecuana tsehuequi cuanaque nereda eau bucha neredae ecana neacue.

Camadya ishuque quisarati

¹⁶ Ecuana Cuatsashaquique tu Ecuana Inime Tsapema Anishaquique. Tura inime tsapema neanishacue jida inimeju jadya ama juatsu jidama inime cuanaju. Tuque dutya micuana tsehue pajuneni.

¹⁷ Ecue emetucu tsehue rique huenehua riyaque micuana isara ishu: PABLO. Jadyatu ecue bahue era huenemerehuaque tilladiru ishu ecue ebacani quiyati.

¹⁸ Ecuana Cuatsashaqui Jesucristora jida tsehue nenarucue tuja quiyuhuebati tsehue. Jadidya paju.

Riya tupu camadya.

Pablo

TIMOTEOJA ISHU PABLORA QUIRICA CUADISHAMETSE ACUAREQUE 1 TIMOTEO

Riyaque quirica ri Pablora Timoteoja ishu cuadishametse acuaque. Pabloratu Timoteo tsahuacuare Jesús queja catyati ishu. Jesús queja catyatitsu tujatu Pablo tajicuare, peya queja japada Jesúsja quisarati cuejacuejani juyaju. Eje buchaju cuanatu Pabloja shana bahue jucuare eje uma epu cuanaju butseeju Jesús queja ecatyati cuanaque tsahua ishu. Timoteotu Jesús queja ecatyati cuanaque naruqui jucuare.

Riyaque quiricajutu Pablora cuejacuare Jesús queja ecatyati cuanaque eje bucha narue aishuque, tuna tsahuacui juishuque. Dyaque tujatu cuejacuare yunerique ama bahuityacui cuanaque tuja baca ishu ama, dyaque cuita chipiru bijida baishu ama jadique.

Versículo jida cabahuityati ishu cuanaque ri: 1.15; 2.5; 4.12; 6.6, 11-12.

Pablora Timoteo isaracuareque

¹ Riya micue quirica cuadishaya, Timoteo. Ique Pablo. Jesucristoja yana atsaquique ique. Turadya ique cuadishahua tuja quisarati cueja ishu. Tumebaedya Yusu Ecuana Inajacamerequirea cuadishahua. Ejeque huecaca ecuana tu- aqueja judirubuque ni eje tupu jaca ishu ama. ² Timoteo, miqumi ecue ebacua neri buchique, Jesús queja nimee juishu era tsahuahua tibu. Yusu ecuanaja etatara, tumebaedya Ecuana Cuatsashaqui Jesucristora jida tsehue narucue tatseja quiyuhuebati tsehue. Tatseja miatsehue canerecabati paani. Tatsera inime tsapema anishacue.

Yusuja cuanaja pusha pusha bahuityacui cuanaque bacataquique ama

³ Tuhuadya Efesoju anicue. Cuejahuadya mique era Macedoniaju ique cuahuie. Tuhuadya anicue, pusha pusha bahuityacui cuanaque “Nebahuityajacacue yunerique ama”, jadya aishu. ⁴ Cuejacue ecana: “Neajacacue ecuanaja baba cuana eje bucha juhuaque, tunara cuejahua cuanaque”, jadya acue pusha pusha bahuityacui cuanaque. Riya cuanaque inime tupuqui ajacaya ama cuanaque tuna masadama cati cati, cahuaiti cati jadya juya. Tsahuaya ama tunajatu peya cuana Jesús queja catyati ishu, Yusura ecuana amerehua bucha.

⁵ Tunara ni aya Yusura amerehuaque, tume tuna iyuhueda cabatiya peya cuana tsehue. Iyuhueda tsehue cabatitsu

tunajatu jidaque inime tupuqui aya. Jidaque tuna adadiya, ecajuchati cabati ishü ama. Yuneri cuitadya tuna Jesús queja ecatyati judadiya. Jadya tuna eanidadiu yuneri cuitadya peya cuana tsehue iyuhueda cabatiyaque.

⁶ Jadya anijacae juatsutu umae cati cati jujacaya ama aishu amaju. Edijiju cuji eju buchique tuna. ⁷ Tuna tuna casumiticara juya, Moisésja cacuatsashati bahuityqui jadya juatsu. Dyaque cuita tuna quisaratiya. Cacuatsashati bahuityaqui ecana jucara juya ai jida adebayaque ama. Pusha ama cuitadya tunajatu adebaya ama tunara cuitadya eje buchique quisarati ayaque.

⁸ Ecuanaratu adebaya Yusura Moisés queja ecuita cuana cuejamerecuareque. Adebatsu ecuana bahue eje bucha jida anie juishuque. ⁹ Yusuratu iyahua tuja cacuatsashati ai jida juya cuanaque bahuitya ishü ama. Iyahua tujatu jidama juya cuanaque cueja ishü, jee cuanaque jucha cuana caadebati ishü: tunaja biji eque cuita camadya aniya cuanaque ejeque ijacabacacarama; Yusuja yana equedya ni ejeque huarajija yana equedya jucarama juya cuanaque; Yusu muicarama juya cuanaque; cajuchatiya cuanaque; Yusuja biji eque ama aniya cuanaque; Yusu ijillahuanatsu ijaribaqui cuanaque; etataque, ecuaque iyequi cuanaque; quiyeti puji cuanaque; ¹⁰ caquemitiqueremaque jaraquereya cuanaque; deca cuinetse, jadya ama juatsu epuna cuinetse cajaraqueretiya cuanaque; ecuita chiriqui cuanaque; peya cuana inatsu uu bucha catyatie apuji cuanaque; pusha pusha arida cuanaque; ejenetacara juatsu, “Yusu bahue shasha camaque” jadya quisarati abahue cuanaque; Yusura amerecarama ayaque apuji cuanaque. Jadya anie juya cuanaque tuna jida ama aniya. Riya cuanaque cueja, huecasha jadya aishutu Yusura cacuatsashati iyahua.

¹¹ Yusuratu cacuatsashati cuana eque ecuita cuana bahuityahua eje bucha anie tuna jutaquique. Tura ique iyacua quisarati iyacuaque cuejamerehua tsehue beta tupudya tuque. Yusu tu yuneri cuitadya tuyu dutya casa tsehue. Aijamatu peya tuque buchique.

Yusura Pablo arepa dyaque jucha arida ama bucha iyuhueda bacuareque

¹² Jesucristo tuque isaraya:

—Ique Cuatsashaquique, yusurupai mique aya. Miquemi jida eatsehue. Miradya tyahua casa mique eaqueja cameremereiti ishü. Miquemi bahuedya juhua era mira amereyaque adadibuqueque. Jadya tibudya mira mepehua ecue peya cuana miaqueja catyati tsahua ishü. Jadya tibudya mique yusurupai ajacaya ama, —jadya tuque Jesús aya.

¹³ Icuene ique Jesús tsehue cahuitinicuare. Ijillahuananicuare tuque era. Eratu canerecatishahua tuja cuanaque. Ique tuna tsehue dyaque jidama juhua. Era tuna iyuhueda tsehue ama bahua. Jadya ama bucha Yusuja canerecabati anihua eatsehue. Ique jadya baya ama bucha, tura ujeu bahua ama. Ique bacue Jesús queja catyatima jari juhua. Jadya tibudya ique Yusu pureamaturaya bucha cabatihua. Yuneridya ique jadya juyaque baecua juhua; dyaque jidama ique juhua. ¹⁴ Ecuana Cuatsashaqui Jesucristora tuja dyaque jida tsehue tura naruhua. Tura cuitadya tuaqueja catyatishahua. Tuaqueja iyuhue tura amerehua tumebaedya peya cuanaque. Jadya anie ecuana juya, tuaqueja catyatitsu. Tuque bacue ecuana tsehue.

¹⁵ “Jesucristotu junahua jucha arida cuanaque Ijahua quejaque inajacamerera”, jadya tuque ecuanaja cueja bahue. Yuneriquedya tume. Dutyajatu ejenetaqui ejenecarama tsehue ama. Tura ique inajacamerehua, arepa ique peya cuana bucha dyaque jucha arida juhua ama bucha. ¹⁶ Arepa eje uma mara Jesucristo era ujeu bahua ama bucha, Yusuatu canerecabati eatsehue dyaque anihua. Jesús queja ique catyatihuaju Yusura inajacamerehua. Yusura bijidamadurahua ama. Tura ique inajacamerehua tibu, yuneridya tujatu tumebae inajacameedy aya Jesús queja dutya catyatiya cuanaque. Jadya juatsu tuna judirubuque tuaqueja ni eje tupu tuque jaca ishuhua. ¹⁷ Nesumijacara ama Ecuari Anisiriyaque. Nemuijacara ama. Tuquetu maju baecuaque. Ejitajuque amatu tuque. Tuque peadya tu Yusu. Aijamatu peya. Jadique tu Yusu.

¹⁸ Timoteo, miquemi ecue ebacua buchique. Jadya tibudya mique cuejaya jadya. Icuene Yusuja quisarati cueja jucuar cuanaratu cuejacuare: “Yusuratu Timoteo mepecuare tuja quisarati peya cuana cueja ishuhua”. Adebacue bacue tunara mique Yusura cuadishahuaque jadya ahuaque. Sudaru cuanaja eiyetauju catachiti ishuhue eaniu bucha, jadyatu micue adebataqui Yusu miatsehueque, mique ecanimehualatiuju. ¹⁹ Jesús queja nimeedya jutidya juajecue. Ajacaume mique cuitadya tuyuque bahueque. Mique jadya jujacaume.

Umae bacue jadya jujacahua. Jidama eana juhua, arepa tuna cuitadya tuyu ama juyaque bahue ama bucha. Jadya juyaque tuna Jesús queja nimee jujacahua. Cuaba rumutanatsu dutya eaputateru bucha, tumebaedya tuna aputatereya, Jesús tsehue nime aputahua tibu. ²⁰ Jadya ejenejacaedyatu Himeneo, Alejandro ecatsera acuar yunerique quisarati. Jadya tatse nereda acuar:

—Satanás metse cuatsashaquique paju, —jadya tatse acuar.

Jadya canerecatie tatse judadiya. Nerecada juya cabatitsu, ecatse jidama juhuaque pacacuejati. Tume tatse Yusu paijil-lahuanajaca.

2

Yusu pureama aishu caradatitsu eje bucha jutaquique

¹ Peya micuana cuejaya. Icuene cuita micuana cuejaya eje bucha bacabacae ecuana Yusu queja jutaquique dutya queja aniya cuanaja ishu. “Tata, tyacue ecana tunaja ai aijamaque”, jadya tuque ecuanaja Yusu ataqui. “Narucue ecana jida”, jadya tuque ecuanaja bacataqui. “Tata, miquemi bahuedya tuna eje bucha juyaque. Miquemi tuna tsehuedya; narucue ecana”, jadya tuque ecuanaja ataqui. “Yusurupai mique tuna tsehue jida juhua tibu” jadya. Jadya tuque ecuanaja ataqui dutya queja aniya cuanaque. ² “Tata, tsahuacue ecuatsashaqui cuanaque, tumbaedy dutya huaraji cuana”, jadya tuque ecuanaja ataqui. Tunara jida naruhuaju, ecuana peya cuana tsehue ujeu ecabatibareu ama. Tume ecuana jida inime tsapema eaniu. Tunara ecuana jida naruhuaju, tume ecuana Yusuja biji eqe eaniu. Tumbaedy ecuana eaniu jida eje bucha tsehue ama peya cuana ecuanaja epuju cuana tsehue. ³ Jidadya tu jadya anie juishu. Jadiquedy tu Yusuja dyaque bijida, Ecuana Cuatsashaqui. ⁴ Yusuja inime datsetu juhua: “Areque ecana dutya jipe Jesús queja ecatyatiu, ecue ecana eaqueja judirusa ishu. Areque tuna dutyara eadebau jida quisarati yunerique”, jadya datsetu Yusuja inime juya.

⁵ Aniyatu peadya Yusu camadya. Peadya camadyatu aniya Yusuja ecuita cuana tsehue cahuaiti anihuaque tillaquique. Tumeque tu Jesucristo, ecuita cacuitatihuaque. ⁶ Tudy a cuitadyatu tuja inime taca majuhua, dutyaja jucha cuana tsujetyaqui. Tuquetu majuhua, dutya tuaqueja ecatyati cuanaque Satanás quejaque einajaca juishu. Jadya majuetu Jesús juhua, Yusuja ecuita cuana tuaqueja judirusa ishu. Jadya ejitajuetu Yusuja inime juhua, dutya tuaqueja judirushacaraque. ⁷ Yusuratu dutya tuja quisarati bacamere-cara aya. Jadya tibudya tura ique mepehua israelita ama cuanaque cueja ishu. Ique tura cuadishahua tuna Jesús queja catyati ishuque cueja ishu. Pusha pusha ama juya; yuneridya quisaratiya.

⁸ Cuejaya micuana Yusu pureama aishu casitatitsu eje bucha jutaquique. Eje queja pajudya jutidya ecuana caradatiyacataqui ama Yusu tsehue quisarati ishu. Yusuja biji eqe aniya cuanaque camadya jadya paju. Peya tsehue ecahuaiti cuanaque, peya cuana tsehue jidama inime

tupuyaque, jadya cuanaque tuna Yusu queja bacabacataqui ama ecasitatiju. ⁹ Yusu pureama aishu casitati ishutu epuna cuana petataju ejiyu cajututitaqui. Cajututi tunaja paju peya queja capetamereti ishu ama, deca cuana jidamaque inime tupumere ishu ama. Capetameretitsu peya queja cabijiserimereticara ecana paju ama callutiju, oro tsehue cabajejetitsu tiquida cuana tsuje arida cuana tsehue cabajejetiju, una tsuje arida cuanaque jutu tsehue. Cabajejeti tunaja paju caradatihua cuanaque Yusu inime tupuqui aishu, ai tuna queja nimee ama. ¹⁰ Epuna cuana Yusuja cuanara jidaque ai paa. Tumetu peya cuanara iyuhueda baya, peya cuana tsahuaqui baatsu, ai tunaja cabajejetiju baatsu ama. ¹¹ Yusuja etareju caradatitsu, epuna cuanara abacata tsehue pajjacabaca, cabahuityati ishu. “Ique dyaque bahue Yusuja quisarati cueja juya bucha ama”, jadya tunaja inime paju ama. ¹² Epuna ama tuque dutyaja yacuaju bahuityamereya. Deca cuana tuque Yusuja quisarati jadya bahuitya ishu cuatsashaya. Epuna cuanatu abacata jutaqui Yusuja etareju. ¹³ Epunajatu deca cuana cuatsashataqui ama, deca icuene iyatanahua tibu; ai epuna amatu icuene iyatanahua. Adántu Yusura icuene iyahua; tupuju tujatu Eva iyahua. ¹⁴ Evatu Satanásja quisarati bacatsu cajuchatihua. Turadyatu Yusuja yana ahua ama. ¹⁵ Jadya tibudyatu epuna cuana deca cuanaja huaraji jutaqui ama. Tunajatu ebacua cuana jida narutaqui. Epuna cuana ni Jesús queja catyatiya, Yusura tuna Ijahua quejaque inajacamereya, deca cuana inajacamereya bucha. Epuna cuanajatu peya cuana jida tshuedya bataqui. Tuna dyadi tuna tumbaedy Yusuja biji eque anitaqui. Tunajatu jidadya inime tuputaqui. Jadya pureamaturae tunajatu Yusu eau.

3

Jesús queja ecatyati cuanaque cuatsashaqui cuanaque eje bucha jutaquique

¹ Peya mique cuejaya, eje buchique micue Jesús queja ecatyati cuanaque cuatsashaqui bacanishataquique. “Mique ni Jesús queja ecatyati cuanaque cuatsashaqui jucara juya, jidaque meredy tuquemi acara aya”, jadya tuque ecuanaja ecana ataqui. Ryaque quisarati ri ejene ishuque. ² Jesús queja ecatyati cuanaque cuatsashaqui cuanaquetu jadya jutaqui. Tunadya jutidya peyaja nereda ataquique ama, peya cuana Jesús queja ecatyati cuanaja iyuhuedaque. Ejeque deca ecaquemitique, huane pidya camadya paju; peya epunatu pajaraquere ama. Jida inime tupuqui ecana paju. Tuna taca canaruti ecana paju. Emuita ecana paju.

Tunaja etareju jutiya cuanaque batsaqui ecana paju. Bahue, inime adebabada jadya ecana peya bahuitya ishu paju. ³ Nijuqui arida ecana paju ama. Nime junudama juatsu yume cabahuapajati jadya ecana paju ama. Cahuaiti arida ecana paju ama. Canerecabati aqui ecana peya cuana tsehue paju. Eje buchadya cachipiruticaraque tuna inime tupuqui paa ama ni peya jaque bijiseri. ⁴ Tunaja etareju cuanaque jida naruqui ecana paju. Ebacua cuana camuibati aqui juishu ebacua cuejaqui ecana paju, tunara cuatsashayaju yana equedya juishu. ⁵ Tunara ni tunaja etare juque cuitadya jida narutaqui ama baya, ¿tume jatsu tunajatu Yusuja cuanaque eje bucha jida narue eau? Eje bucha narutaqui ama di taa. ⁶ Jadya mere ishuque amena beru Jesús queja ecatyati cuanaque, bacanishacue, ai butseeju Jesús queja ecatyati cuanaque ama. Mepeya ni mi butseeju Jesús queja ecatyatique, tumequetu tuta taca casumiti jutidya ejuu. “Ique dyaque inime metseque”, jadya jutidyatu ejuu. Satanás equeque ri riyaque inime tupu, tuta taca inime metseque cabatihua tibu. Jadya tura inime tupuhujutu Yusura nerecaturacuare. Jadidyatu Yusura enerecaturau butseeju inime ecacuaretique casumitiyaju. ⁷ Jesús queja ecatyati cuanaque cuatsashaquiquetu jutaqui Jesús queja ecatyati cuanaja camadya muibataquique ama, tumbaedya Yusu adeba baecua cuanaja muibataquique. Tuja ebutsequinijudya tunajatu tuque eje bucha juyaque ejitaju eau. Jesúsja cuanaque jidama juyajutu Satanás pureama juya. Tuquetu ecuita armadilla nitya puji buchique; ai armadillaju juhua baatsu pureama juya buchique tume.

Eje buchique Jesús queja ecatyati cuanaque mere tsahuaqui cuanaque

⁸ Iyacua mique cuejaya eje buchique micue Jesús queja ecatyati cuanaque mere tsahuaqui bacanishataquique. Riyaque ri emerequi cuanaque eje bucha jutaquique. Emuiba tuna jutaqui. Dyaque cuita tupari iji, jadya ama juatsu ai nijuqui ishuque bijiseri jadya tuna jutaqui ama. Yunerique quisarati tunajatu ajacataqui ama, umae bape cueja peya cuana bacue bape cueja jadya ama. Eje buchadya cachipiruticaraque tuna inime tupuqui paa ama, ni peya jaque bijiseri. ⁹ Yunerique quisarati bahuityayaque tuna paejene. Icuenetu pana adeba ataqui ama juhua; amena iyacuatu Yusura ejitaju ahua. Tunara cuitadya jida tuyu baya eque tuna anitaqui, ni aiju buchique jucha metse cabati ishu ama. ¹⁰ Nime adebacue Yusuja cuanaque mere tsahuaqui jucara juya cuanaque. Nime adebatsu, era huenehua eque

amereya eque ni ecana juya, tume ecana chamacama Jesús queja ecatyati cuanaque mere tsahua ishü paju.

¹¹ Jesús queja ecatyati cuanaque mere tsahuaqui cuanaja ehüane cuanaque emuitadya paju. Peyaja ishü quisarati arida ecana paju ama. Jida inime tupuqui ecana paju. Yüneri quisarati aquí ecana paju. Jadyatu Jesúsja cuanaque mere tsahuaqui cuanaja ehüane cuanaque jutaqui.

¹² Jesúsja cuanaque mere tsahuaquique ecaquemitique juatsu, peadya camadya tunaja ehüaneque paju; peya epunatu pajaraquere ama. Tunaja ebacua cuanaque, umae tunaja cuitadya etareju aniya cuanaque jida naruqui, cuejaqui jadya ecana paju. ¹³ Etsahuaqui cuanara ni peya cuana jida mereya, emui tuna judadiya. Tume tunajatu bajida tsehue ama Yusu queja judiru ishüque quisarati cuejaya, Cristo Jesús queja nimee neri juya tibu.

Yünerique Yusuja ejitaju eaque

¹⁴ Arepa ebajarara mique bacara aya ama bucha, riyá micue quirica cuadishaya, Timoteo. ¹⁵ Ique tsunutayaque juatsu, tuque micue icuenetadya cuadishaya, era cuejayaque mique bahue ishü. Quirica inatsatsumi bahue juya Yusuja cuanaque eje bucha junenie jutaquique. Maju Baecua Aniya jaque ecüana. Ecüana tsehuedyatu aniya. Ecüanara tujatu yünerique quisarati adebaya; cuejataqui tuque ecüanaja peya cuana. Etareja dudu tishira jadya buchique ecüana. Tunaratu etareja ejaqui rihuitsu eaputauju iduya, jadyadyatu ecüanara Jesucristoja quisarati cuejaya peya cuana tuaqueja catyatitsu ecayüamatiuju. ¹⁶ Dyaque emuique tu Jesús, ecüanara quisarati cuejaqui ayaque. Tuaqueja catyatitsu ecüana Yusu pureamaturayaque eaniu. Icuenetu riyaque ni ejeque bahue juhua ama. Iyacua ecüana Yusura bamerehua.

Riyaque Jesúsütu cacuitaticuare, riyaque yahüaju anina ishü. “Jesús juchama nerique”, jadyatu Yusuja Espiritura quisarati acüare.

Jesúsütu cabamereticuare barepa juque Yusu tsahuaqui cuana queja.

Tuque eje buchique quisaratitu dutya yana eque cuanaque cuejatanacuare.

Jetiama tuna tuaqueja catyaticuare.

Riyaque yahua juquetu Jesús dirunucacuare.

Tsuracüaretu barepaju, Yusuja yacuaju anidirunuca ishü.

4

Aniyatu quisarati yünerique ama cuejaqui cuanaque

¹ Peyá mique cuejaya. Yusuja Espirituratu yüneridya quisarati acüare: “Yuquejane tunajatu quisarati yünerique

ejenejacabuque Yusuja cuanara ejeneyaque. Yunerique ee-jeneuque tunajatu ijahua cuana jutidya ejenebuque, ijahue cati bahue cuanaque jutidya”, jadyatu Yusuja Espiritura quisarati acuare. ² Tume cuanaque ijahue cati puji cuanaratu quisarati pusha pushaque ajacaya ama. Arepa Yusu cahuaitishaya ama bucha, ecana ecajuchati cabatiya ama. Yatseja ebiti pana tiru ejuque aputahuaju eadebanucau ama bucha, tumbaedy a ecana ecajuchati pacabati ama. ³ “Jidama tu carequi juishuque. Umae earaquitu arata baecua. Aratsu tuque ecuana Yusu ecahuaitishau”, jadya tuna pusha pusha jutidya jubahue. Yusuratu dutya ara ishu iyahua. Dutyadya tuque ecuanaja arataqui, ecuana Jesús queja ecatyati cuanaja, ecuana yunerique ejenehua cuanaja. Yusurupai aatsu tuque ecuanaja arataqui. ⁴ Yusura dutya ayaque tu jidaque. Jadya tibusu aijamadya earaqui arataquimaque. Bijidamadurataqui ama tuque ecuanaja ni ejeque earaqui. Jadya tibudya ecuana araara ishu anibutetsu jadya jubahue: “Tata, yusurupai mique ecuana aya, mira ecuana earaqui tyahua tibu” jadya. ⁵ Cahuaitishaya ama tuque ecuana Yusu ainya jutidya aratsu. “Duty tu jida ara ishu”, jadyatu Yusura quisarati acuare. Araara ishu anibutetsu tuque ecuana Yusu yusurupai aya. Jadya tibu tuque ecuanaja ejeque earaquidya jutidya arataqui.

Jesucristo yuneri merequique eje bucha jutaquique

⁶ Bahuityacue quisarati yunerique micue miatsehuequi cuanaque. Jadya juyaque tuquemi Jesucristora amerehuaque aya. Riyaque quisarati bacatsumi Jesús queja catyatihua. Jidaque bahuityayaque bacatsumi jida aniajeya. Riyaque quisarati micue earaqui ejuu buchique paju. ⁷ Micue baba cuana eje bucha jucuaquedy jutidya inime tupuqui aume. Yusuja ama cuanajatu bijida baca jadya aatsu yudijidya atinuca atinuca ishu. Tucua inime tupuqui eauque, cabahuenetiajecue Yusu mere ishu, ijahue puji jida ijahue juishu tuja ecuita ecabahuenetiajeu bucha. ⁸ Jidadya tu yatseja ecuita casada amere ishu cabahuenetiaje ishu. Dyaque jida tu Yusuja biji eque ani ishu cabahuenetiaje ishu. Yusura cuatsashaya eque anitsu ecuana dyaque jida inime tsapema jadya riyaque yahuaju aniya. Majutsu ecuana Yusu queja judirubuque ni eje tupu jaca ishu ama. Tuatsehue ecuana anibuque. Jadya tujatu quisarati ecuanaja ishu iyacuare. ⁹ Riyaque tu yunerique; dutyajatu ejenetaqui. Ni ejera ejenecara ejenecarama jadya paa ama.

¹⁰ Yusu pana ejene cuita ahua tibu tuque ecuana ejeneyadya tura ecuana eje bucha aana ahuaque adadiyaque. Turatu dutyadya naruya, Jesús queja ecatyati

cuanaque neri neri. Jadya tibudya ecuana casada mere juya, tuque mereyaque. Jadya cuejacue Jesúsja cuanaque riya amereyaque bahuityayaque jadya.

¹¹ Timoteo, bahuityacue peya cuana mique era cuejahuacue. Cuatsashacue ecana era amerehua equa ecana paju. ¹² Ejera buchique bacacarama aume mique esiri ama baatsu. Mique anicue jida Yusuja biji equa, peya cuanaja mique muiba ishu. Jidaque quisarati acue. Jida tsehue bacue peya cuana. Yusura mique naruyaque ejenejacaume. Jesús queja nimeedya jutidya juajecue. Aume Yusu cahuaishua ishuque ni riya piji buchique. Jadya ni mi juya, tumetu peya cuana Jesús queja ecatyati cuanara bijiseriya mique aniya bucha anie juishu. ¹³ Ique tuhua jutiya tupu, isarajacaume Yusuja quisarati dutyaja ijacaju. Caradatiya cuanaja baca ishu isaracue. Casaturacue ecana riyaque quisarati tsehue. Bahuityacue ecana riyaque quisarati. ¹⁴ Jadya meree jujacaume. Mira Yusu meretibuneyajumi Jesús queja ecatyati cuanaque cuatsashaqui cuanara iyuca dyaque emetucu iyahua. Jadya tunarami ahua, Yusuja emepeque jadique ejitaju juishu. Tunara jadya ahuaajumi Yusura casa tyahua tuque miaqueja cameremereti ishu.

¹⁵ Inime tupuqui ajacaume mique Yusura aishu mepehuaju. Jadya jujacaume. Jadya ni mi aya micue ataquique, tumemi peya cuanara baya mira dyaque jida Jesúsja ishu mere ayaju. ¹⁶ Mita tacadya jutidya bacue canaruticue. Bahuityajacaume quisarati yunerique. Anijacaume jadya. Jadidya jutidya ni mi juajeya, tumetu Yusu miatsehuedya juya riyaque yahuaaju. Majutsumi tuaquejadya judirubuque ni eje tupu jaca ishu ama. Mique quisaratiyaju bacaqui cuanaque tuna Yusu quejadya judirubuque.

5

Jesús queja catyatihua cuanaque peya cuana tsehue eje bucha cabatitaquique

¹ Ejeque ni eje bucha jidama juya, cuejayaque cahuaishua tsehue ama isaracue. Nereda aume esiri cuanaque. Jida inime tsehue jutidya cuejacue; micue tata ecuejau bucha cuejae jutidya acue. Tumbaedya ehue ebari cuana micue miatsehuequique ebau bucha bae ecana acue. ² Epuna esiri cuanaque micue cuaa ebau bucha bae ecana acue. Peya epuna cuana micue miatsehuequique ebau bucha bae ecana acue. Dyaque jidaque tunaja ishu inime tupuqui acue.

Jesús queja ecatyatique tunaja eahuemajuque eje bucha bae ataquique

³ Iyacua mique cuejaya eahuemajuque eje bucha bae ataquique. Netsahuacue eahuemaju cuanaque yuneri cuita atama cuanaque. ⁴ Eahuemajuja ni aniya ebacuaque, jadya ama juatsu yutsecuaque, tunaradya paba. Jesús queja ecatyati cuanara ebauque, ebacuaquera jadya ama juatsu yutsecuaqueradya paba. Pacabahuityatidya ecana tunaja cuitadya bataquique. Yusujatu bijida ecuanaja ecuna baqui esiri cuanaque naru ishu, ecuna tunara nanadaju naruhua bucha narue aishu. ⁵ Aniyatu eahuemaju cuanaque atama cuitaque, tuta taca nerique. Jesús queja ecatyati cuanaque tuna bahuedya tunara ai sareyaque Yusura tyayaque. Huecada tupu, meta tupu jadya tuna Yusu bacaya, tuja ai sareyaque tyaishu. Jadique eahuemaju cuanaque tuque micuanaja tyataqui earaqui ejutuqui tunara ai sareya cuanaque.

⁶ Aniyatu eahuemaju cuanaque Yusuja biji eque ama aniya cuanaque. Tuna tuna aniya tunaja biji eque cuita camadya. Arepa tuna chacha ama bucha tuna Yusura emaju bucha baya. Jadique eahuemaju cuanaque nebaume, ni ai netyaume.

⁷ Cuejacue Yusuja cuanaque riyaque mique era cuejaya cuanaque. Jadya ni ecana aniya, tume tuna eje bucha nereda ataqui ama: “Yusuja cuanaquetu jidama tuyu ama aniya. Tyaya ama tuna eahuemajuque ni ai buchique”, jadya tuna ni ejeque buchique juya ama. ⁸ Tunaja etareju cuita tunaja ata cuana bayaque amatu tuyu ama aniya. Jesús queja catyatihua jadya juya ama bucha, Yusura amerehua eque ama tuna aniya. Jesús queja ecatyati cuanara ni tunaja ata cuana naruya ama, tume tuna Yusu adeba baecua cuanaque bucha dyaque jidama aniya, Yusu jaque ama cuanara tunaja ata cuana jida bayadya tibu.

⁹⁻¹⁰ Tuequedya mique cuejaya eahuemaju cuanaque eje buchique micue quiricaju ebacani huenetaquique, Yusu merequi cuanaque. Ni ejeque buchique eahuemajuque ebacani huenema jarijudya icuene Yusuja cuanaju jida inime tupucue tumeque epunaju. Shucuta tunca mara aniya equeque; yahuique adebaqui juhuaque, peya deca tsehue ijahue aatsu ama; peya cuanara tuque jida jujacayaque ama adebayaque; ebacua cuanaque jida catemushatihuaque; tuja etareju jutiya cuanaque jida batsahuaque; Jesús queja ecatyati cuanaque tsahuaqui juhuaque; tsahua bahue ni tuja juhua jidama inime tsehue peya inime juya cuanaque; eje buchadya tsahuacarae peya cuana ahuaque. Tuque ni jadya juhua, tume tuja ebacani huenecue eahuemaju cuanaja ebacani eiyaju.

¹¹ Hueneume eahuemaju cuanaque ebacani ehue ne quiricaju shucuta tunca mara adadima jarique. Esiri cuitaque amatu jadya ejuu. Masadama tujatu ahuequi juishuque inime tupuqui aya. Ahuequi jucara ebaritu juya, Cristo camadya emereuque. ¹² Tumeque epunara ni Cristo cuita camadya mere ana aya, tuque ahuequi junucahuajutu, peya cuana equisaratiu: “Yanacana tujatu Cristo cuita camadya mere ana ahua. Jucha metse tu tumeque epuna”, jadya tuna equisaratiu. ¹³ Esiri cuitaque ama eahuemajuquetu ahuequi jipidya ama jucara juya. Etare cuana tuputu tarepe mere cabahuityaticara juya, mere ejuuque. Dyaida jutidyatu juya. Dyaida camadya ama, catacuariti arida, peya cuana eje bucha juyaque bahue jucara ebari juatsu cabacadurati arida. Quisarati ataquique ama tujatu aneniya.

¹⁴ Jadya tibudya mique cuejaya, micue peya cuana cueja ishu. Shucuta tunca maraque ama eahuemajuque ahuequi pajunuca. Ahuequi junucatsu, cabacuatnucatsutu patesmusha ebacua cuanaque. Etare juque meretu paa. Tuque ni jadya juya, tumetu ecuana ujeu baqui cuanaque jidama quisaratiya ama. ¹⁵ Umae eahuemaju cuanaque tuna Yusuja biji eque anijacachine; iyacua tuna Satanásja biji eque aniya. Cuejaya mique riya cuanaque, eahuemaju cuanaque eje bucha anie juishuque bahue juishu.

¹⁶ Jadya cuejacue Jesús queja ecatyati cuanaque: “Aniya ni micuanaja ata eahuemajuque, netsahuacue. Netyacue tunara ai sareyaque, tunaja ata cuanara ama ebau tibu. Jesús queja ecatyati cuanajatu tsahuataqui eahuemaju cuanaque yuneri cuitadya atama cuanaque”, jadya cuejacue Jesúsja cuanaque.

¹⁷ Tuequedya mique cuejaya Jesús queja ecatyati cuanaque cuatsashaqui cuanaja ishu. Muibataqui tuque ecuanaja ecuana Yusu adeba tsahuacui cuanaque. Tunara ecuana Yusu pana adeba aishu tsahuaya tibu tuque ecuana ecan tsujetyataqui tupu, tuna tunara ai sareyaque cadaditi ishu. Muiba, jida tsujetya jadya jujacaya cuanaque ama neri neri. ¹⁸ Yusuja quisarati tu ehue ne: “Trigo biti tacamereyaque micue juye huimumu risiime. Paaraara juye mere juya tibu” jadya. Tumebaedya tu ehue ne Jesúsra quisarati acuareque: “Mere pujitu tsujetyataqui” jadya. Jadidya tu Yusuja bijida, ecuana Yusu adeba tsahuacui cuanaque ecuanaja tsujetya ishu.

¹⁹ “Cristoja cuanaque cuatsashaquiuetu jidama ahua”, jadya peadyara camadya ayaju, ejeneume, Timoteo. Betara, jadya ama juatsu quimishara ni yuequedya cuejaya, tume ejenecue. ²⁰ Jesús queja ecatyati cuanaque cuatsashaquique

ni jidama jujacacarama juyaju, Jesús queja dutya ecatyati cuanaja ijacaju nereda acue. Jadya ecana acue, umae Jesús queja ecatyati cuanaque cuatsashaqui cuanaque jidama juyaju bajida amere ishü, “Ecuana necajuchatira ama; dutyaja ijacaju tura ecuana nereda eau”, jadya tunaja inime tupu ishü.

²¹ Era huenehua equé bacue mique amereya. Dutya tupu bae Jesús queja ecatyati cuanaque acue. Nime aputaume Yusu Etatara, Jesucristora jadya petajacayaque ama, tumbaedyá barepaju Yusu tsahuaqui cuanara. Jadya tibudya acuedya era cuatsashayaque.

²² Nime adebacue Jesús queja ecatyati cuanaque naruqui jucara juya cuanaque. Mepeume ni ejeque buchique, jida inime tupumaque. Ecajuchatiu ni ejeque mira mepehuaque. Midya bacuemi jucha metse ejuu, cajuchatihuaque bucha. Canaruticue dutya aiju Yusu cahuaítisha ishüque eauju.

²³ Ecareca ni ujera juya cabatitsu, ena camadya ama ijicue. Tumbaedyá casamati ishü juatsudya juatsudya uva nacaca esanashaque ijicue.

²⁴ Jutaquiju icuene jida inime tupucue, Jesús queja ecatyati cuanaque naruquique bacanishama jarijudya. Adebacue umae etehua ama cajuchati bahueque; dutyara tuna baya tuna jidaque ama. Bahuedya ecuana tuna ama jadya ishü ejuuque. Umaetu etehua cajuchati juya. Dutyara jujeri tunajatu jida bucha baya. Tupujutu amena ejitaju judadiya tuna jidama juyaque. ²⁵ Tumbaedyá bijidamaduraume ejeque jida inime tupumara. Aniyatu jida juya cuanaque; tume tuna dutyaradya adebaya jida juya cuanaque. Umae bacue jida juyaque ejitaju ama juya. Ni ejera buchique tuna adebaya ama tuna jida juyaque. Tupujutu amena ejitaju juya tuna jida ishü jetiama mere juhuaque. Jadya tibudya tuque micue icuene nime adebataqui Jesús queja ecatyati cuanaque cuatsashaqui cuanaque bacanishamaque.

6

¹ Metsequi cuanajatu tuna metse cuanaque muiba mere ataqui, Yusuja ishü ecana jidama equisarátishau tibu, tumbaedyá Jesúsja quisarati ecuanara cuejayaja ishü. ² Tuna metse cuanaque Jesús queja ecatyati cuanaque merequi cuanajatu inime tuputaquí ama: “Ecuetu muibataqui ama ique metseque, ecue eatsehuequique juya tibu”. Jadya inime etupuunque, tunajatu ecana dyaque jida jutidya muibataqui. Tuna metse cuanaque tu Yusuja cuanaque. Yusura tuna iyuhueda baya. Jadya tibudyatu mere puji cuanaja dyaque jida meretaqui. Tuja tuatsehuequi cuanaque tsahua juya tibu, tunajatu ecana jida meretaqui.

Yunerique ama bahuityaqui cuanara Yusuja mere yuamat-urayaque

Timoteo, bahuityacue riyaque era cuejahuaque Jesús queja ecatyati cuanaque. Cuatsashacue ecana tuna yuneri eque ani ishu. ³ Aniyatu ecuanara bahuityayaque bape cuita bahuitya juya cuanaque. Tunaratu Jesúsra yunerique bahuityahuaque ejeneya ama. Tunaratu bijidama baya yunerique bahuityayaque, Yusu pureamatura ecuana bahue juishuque. ⁴ Tuna taca casumiti tuna juya. Arepa tunaja inimeju Yusuja quisarati pana adeba aya jadya ama bucha, yuneri cuitadya tunajatu adebaya ama. Tuna tuna riy cuana tibu caticara jutidya juya, tunara camadya pana adeba aya bucha cabatitsu. Ujeu tuna cabatiya peya cuana tsehue dutya ecana peya cuana dyaque jidaque bucha cabatitsu. Ejeque eje bucha quisaratiyaju, peya cuanara bacue quemitsape jutidya aya. Quijillahuanatiya jutidya ecana peya cuana tsehue. Peyara yuamaturacara aya bucha tunajatu inime juya. ⁵ Cati cati peya tsehue ujeu cabati jadya ecana juya peya cuana tsehue. Jadya tuna juya, tunaja inime ecayuamati tibu. Arepa icuene yunerique adebahua ama bucha, ejenejacadhua tunara. “Jesús queja ecatyati juatsu ecuana cachipirutiya”, jadya tunajatu yanacana inime tupuya. ⁶ Pusha amadya Jesús queja catyatitsu ecuana pureama juya, chipirudaque tuja ai aniya tsehue pureama ejuu bucha. Umada ecuanaja aniyaque juatsu, jadya ama juatsu umadama ecuanaja aniyaque, pureama ecuana juya; Yusutu ecuana tsehue jida jujacaya ama. ⁷ ¿Ai jatsu ecuana cabetihua cuinanayaque riyaque yahuaju? ¡Mema ecuana cuinanahua! ¿Ai jatsu ecuana cadujutinucaya majutsu? ¡Mema ecuana dirunucaya! ⁸ Arepa ecuanaja ai umadama paju ama bucha, pureama nejura ecuanaja earaqui, jutu ishuque jadya aniya tsehue.

⁹ Dyaque cachipiruticara juya cuanara bacue sareajeyadya jutidya eje bucha chipiruiquijuajecaraque, tuja ai aniya tsehue pureama juyaque ama. Bijiseriya tuna jida inime tupuqui cuanara bijiseriyaque ama. Tunadya jutidya yuamatura ishuque tunajatu bijiseriya. Cuanubi armadil-laju nubitsu jidama juatsu cuinanataquima ejuu bucha tuna. ¹⁰ Cachipiruticara juatsutu ecuita cuanara dutya ai jidamaque aya. Dyaque umadadya jutidya tunajatu chipiru bijiseriajeya. Jadique bijiseritsu tunajatu yunerique quisarati ecuanara ejeneyaque ejenejacadhua. Arepa chipiruda ama bucha, tuna tuna pureama tsehue ama aniya, Jesús tsehue ecana nime aputahua tibu.

Timoteo eje bucha junenie juishuque cueja cuareque

¹¹ Mique bacue jadya anie jutidya juume, Timoteo. Miquemi Yusu jaque. Tuque merequique mique. Jadya tibudya nime aputacue jidamaque. Jidaque ani bijisericue. Yusuja bijidaque acue. Jesús queja nimeedya jutidya juajecue. Peya cuana iyuhueda tsehue bacue. Arepa Jesús queja catyatima cuanara nrecaturaya ama bucha canimehuallatiume. Cahuaitiume mique ujeu baqui cuana tsehue; dutya tsehue jida jucue. ¹² Cacasaticue Jesús queja nimeedya jutidya juaje ishu. Ejeque tuja bahue eje tupu tuque tsajajaya tupu tsajaja ishu cacasati bahue bucha, jadidya cacasaticue Yusuja yacuaju judiru ishu. Icuenemi jetiamaja yacuaju cacuejatihua mique Jesús queja catyatihuaque. Mique jadya quisaratihua jumi Yusura Ijahua quejaque inajacamerehua. Jutaqui ju tura mique tuja juishu ihuarahua tibu, eje tupu majutsu Yusu quejadyami judirubuque ni eje tupu jaca ishu ama. ¹³ Cuatsashaya mique era; acue Jesúsra amerehuaque. Adebacue Yusura mique petayaque. Turatu chacha anishaya, naruya jadya aya dutya aniyaque. Cristo Jesusrami tumbaedy a petaya. Tuquetu bajida tsehue ama Poncio Pilatoja yacuaju cacuejatihua tuque Yusu jabacua jadique. Jetiamaque ecuita cuana camadya ama, tumbaedy ecuanaja Etata Yusu, Jesucristo jadya tuna bahue mique eje bucha juyaque. ¹⁴ Jadya tibudya mique cuatsashaya mique canimehuallati ishu ama. Anicue aija nereda aquima. Jadya anie jutidyatu juya jadya tuna aume. Jadya anie jucue Ecuana Cuatsashaquique Jesucristo junanucaya tupu.

¹⁵ Ecuanaja Etata Yusuratu ejitaju amerenucabuque tura huecaca iyahuaque juetihuaju. Yusu tu dutya casa tsehueque. Turatu naruya dutya ai aniyaque; aijamatu peya tuque baeque. Turatu naruya dutya peya cuana naruqui cuanaque. Turatu cuatsashaya dutya peya cuana cuatsashaqui cuanaque. ¹⁶ Tuque peadya tu maju baecuaque. Tuquetu dyaque jidaque. Ejeque buchiquetu riyaque yahuaaju dyaque jida juya ama tuque bucha. Bama tu ni ejeja. Bataqui amadya tuque. Tuque emui paju muijaca ishu ama. Pacabameretijaca ama tuja dyaque casa aniyaque. Jadidya paju.

Chipiruda cuanaque cueja ishuque

¹⁷ Jadya mique cuejaya, Timoteo, chipiruda cuanaque micue jadya cuejae aishu. “Necasumitiume, chipiruda cabatitsu. Nrecada cuanaque dyaque jidaque bucha necabatiume. Neadebacue riyaque yahua juque tsunuda ama juyaque. Nrecadama cabatitsu Yusu queja judiruya bucha necabatiume. Jesús queja necatyaticue; tume micuana Yusura Ijahua quejaque inajacamereya. Yusura ecuana

tyanityaya dutya ai ecuanara sareyaque. Tura ecuana tyaya dutya ecuanara sareyaque ecuana pureama tsehue ani ishu. ¹⁸ Jidaque neacue. Micuanaja jetiama chipiru aniya tibu, netsahuacue peya cuana. Inijeda nejuume. Dyaque jida peya cuanara sareyaju netsahuacue ecana. Necaja-queticue micuanaja ai aniyaque. ¹⁹ Tsahuaya ni micuana nrecada cuanaque, tume micuana ejitaju juya yuneridya micuanara Jesús queja ecatyati cuanaque bayaque. Tume micuana majutsu Yusu queja judirubuque. Tuhua tuque micuanaja anibuque dutya jidaque Yusura tuja cuanaque tyaana ahuaque. Tumeque tu ni eje tupu tere ishucue ama. Tuja yacuaju judiruhaju, Yusura micuana yuneri cuitadya pureama amerebuque. Tuatsehuedya micuana anibuque ni eje tupu jaca ishu ama”, jadya cuejacue chipiruda cuanaque.

Amena ishucue quisarati

Timoteo cuejatanacuareque

²⁰ Timoteo, miquemi mepetanahua quisarati yunerique cueja ishu. Bacaume cati cati arida cuanaque. Tunaratu Yusuja quisarati ama cuejaya, riyaque yahua juque jutidya. Tsahuaya ama tunajatu ni ejeque Yusu adeba. Yanacana jutidya tuna, tunarapa dyaque jida adebaya Yusu adeba jadya juya. Arepa yuneri bucha quisaratiyaju cabatiya ama bucha, pusha pusha tuna juya. ²¹ Dyaque jidapa tuna Yusu adeba ishucue adebaya. Tunaratu yunerique quisarati ejenejac-ahua. Cuji juatsu ediji ejacau bucha jutidya tuna.

Yusura jida tsehue nenarucue tuja quiyuhuebati tsehue, tumbaedy dutya mira quirica isarayaju bacaqui cuanaque. Jadidya paju. Jadya mique cuejaya.

Riya tupu camadya.

Pablo

TIMOTEOJA ISHU PABLORA QUIRICA CUADISHA BETA ISHU CUADISHACUAREQUE 2 TIMOTEO

Riyaque quirica ri Pablora Timoteoja cuadisha beta ishu cuadishacuareque. Riyaque hueneya patyatu Pablo amena maju japadama cabaticuare. Riyaque quirica eque rejari casaturacuare dutya tuja casa tsehue tuja Yusu merejaca ishu ama. Cuejacuare tuja tuque, arepa Cristoja inime canerecатиya ama bucha, tuque casada juishu. Cuejacuaretu ecuita cuana terehuie eje bucha judadibuqueque. Umae versículo cuana cabahuityati ishu jidaque ri: 1.7, 12; 2.1-6, 15; 3.12, 16-17; 4.7-8.

Pablora Timoteo isaracuareque

¹ Riya micue quirica cuadishanucaya, Timoteo. Ique Pablo. Jesucristoja yana atsaquique ique, Yusuja jadya inime juya tibu. Turatu Jesús queja ecatyati cuanaque tu- aqueja judirusha ana ahua, tuque jacanuca ishu ama. Turadya ique cuejamerehua riyaque quisarati. ² Miquemi ecue ebacua buchique, Timoteo. Dyaque iyuhuedaque mique ecue. Yusu ecuanaja Etatara, tumbaedy a Ecuana Cuatsashaqui Jesucristora jida tsehue narucue tatseja quiyuhuebati tsehue. Tatseja miatsehue canerecabati paani. Tatsera inime tsapema anishacue.

Pablora Yusu yusurupai acuarque Timoteo

Jesús queja catyatihuaju

³ Mique adebatsu tuque Yusu yusurupai aya. Huecada tupu, meta tupu Yusu tsehue quisaratiya micue ishu. Riyaque Yusudyari era mereya, tura cuatsashaya eque aniya tibu. Adebayadya tuque era ique tuja biji eque anicara juhuaque, ecue baba cuana anihua bucha. ⁴ Eje buchadya banucacara ebari jadya mique aya. Adebayadya tuque era, mira ique sareya iyuhueda jadya bayaque. Era shanayajumi pacuare. Tudy a tuque ecue nime aputataquima ishu. Eatsehue caba- tinucatsumi dyaque pureama ejuu. ⁵ Adebayadya tuque era, mique Jesús queja nimeedy jutidya juajeyaue. “Jesús jaque ique” jadya camadya amami quisaratiya; yuneridyami tujaque. Nanada equedyami micue anu Loidara, micue cuaa Eunicera jadya cuejehua Yusu Neri anyaque. Jesúsja quisarati bacatsu tatse tuaqueja catyatihua. Tuequedyami tatse

catyatihua baedya catyatinucahua. Ecue inime ni mi riyá tuaqueja catyatijacamadya.

⁶ Jadya tibudya mique cuejaya riyaque. Icuene tuque ecue emetucu micue iyucaju iyahua, Yusurami tuque merequi mepehua jadicue mique caadebati ishu. Era jadya ayaju tuque micue Yusura tuja Espiritu cuadishahua, micue tuque mere ishu casa ani ishu. Nime aputaume riyaque. Yusu merejaca ishu ama cacasatiajecuedya jutidya. ⁷ Espiritu ecuanaja ishu Yusura cuadishahuara ecuana bajida ama amereya. Tura ecuana casaturaya ecuana jidama inime cuanaju nubitsu ecanimehuallatiuju. Tura ecuana peya cuana iyuhueda bamereya. Turadya ecuana jida inime tupumereya ecuanaja ecuanara jida adebayaque aishu, jidama adebayaque aishu ama. ⁸ Bisu adebama cueja acue Yatse Cuatsashaquija quisarati. Arepa ique etare apudaju netiyaju baya ama bucha, bisuume ique jadya baatsu. Ique rehua erisi netiya Jesúsja quisarati era peya cuana cuejaya tibu. Mique ni mi tumbaedya nerecada atadadibuque. Iducue canimehuallatima Yusuja quisarati mira cuejaya baatsu tunara eje bucha aya cuanaque. Yusura mique casa tyahua tsehue iducue dutya. ⁹ Yusura ecuana Ijahua quejaque inajacamerehua. Tura yatse mepehua tujaque juishu, tuque pureamaturayaque ani ishu. Jadidya tujatu ahua, ecuanara cuita ai jidaque ahujaju baatsu ama. Jadya tujatu ahua, tuja jadya inime juhua tibu. Tura ecuana iyuhueda bahua tibu, tujatu ahudya, arepa ecuana tuque ujeu juhua ama bucha. Riyaque yahua ejitaju juma jarijutu Yusura quisarati acuare: “Inajacamerebuque tuque Jesucristo queja catyati-buque cuanaque” jadya. ¹⁰ Icuene ecuana baecua juhua tura ecuana dyaque iyuhueda bahuaque. Ejitaju tujatu ahua Jesús ecuana inajacamere ishu majuhujaju. Tuaqueja catyatitsu tuque ecuanaja aijama baji maju ishu, Jesús ecuana emaju-que majuhua tibu. Iyacuaque quisarati bacatsu, ecuana bahuedya juhua majutsu Yusu queja judiruyaque ni eje tupu jaca ishu ama. Bahuedya ecuana cacuitatinucatsu netit-suranicabuqueque yuta jida, arepa ririterehua ama bucha.

¹¹ Yusura ique cuadishahua riyaque quisarati cueja ishu. Cuatsashahua tura ique tuja yana atsaqui juishu. ¹² Yusura amerehua eque juhua tibu, nerecada netiya etare apudaju. Jadya tibudya ique bisuya ama jadya canerecatie juya cabatitsu. Bahuedya ique ai queja catyatihuaque; tuquetu casada. Turadya ique cuejamerehua Yusu queja judiru ishucue quisarati. Arepa tunara ique iyebuque ama bucha, ecue inimetu yuneri cuitadya riyaque quisarati cuejatana-jacabuque ama. Jesús eje tupu junanucaya tuputu riyaque

quisarati cuejatanabuque.

¹³ Icuene mique bahuityahua yunerique Jesúsra bahuityahuaque, mique peya cuana bahuitya ishu bahue juishu. Bahuityaume bapeque quisarati. Jesús queja nimeedya jutidya juajecue. Peya cuana iyuhueda bajacaume. Jadya anie juatsutu ejitaju juya Jesús ecuana tsehueque, ecuana bacue tuatsehue jadique. ¹⁴ Yusurami cuadishahua Jesúsra bahuityahuaque yunerique cueja ishu. Bape bape cuejae aume. Peya cuana queja bape cuejameree aume. Yusuja Espíritu micuana tsehura micuana tsahuaajeyadya jutidya jadya juishu.

¹⁵ Aniyatu ique jacaqui juhua cuanaque. Dutya jujeri Asiaju cuanaque Jesús queja ecatyati cuanara tsahuacarama ahua; Figelo, Hermógenes ecatsera bacue tumbaedya. Miratu dutyadya adebaya. ¹⁶⁻¹⁸ Onesíforo bacue jadya ama juhua. Tujatu bisu aijama juhua eatsehue, arepa ique etare apudaju netiyaju baya ama bucha. Romaju junatiya tajira tura sarehua. Ique dadiya tupu tura sarehua. Daditsu tura casaturahua. Rehua junama jarira tujatu Efesoju cuanaque dyaque tsahuahua Jesús queja ecatyati cuanaque. Miquemi dyaque jidadya bahue tura ecana eje bucha tsahuae ahuaque. Ecuana Cuatsashaquija canerecabati paani Onesiforoja etareju aniya cuana tsehue, tumeque ecuitaja eatsehue dyaque canerecabati anihua tibu. Jadya tibudya Jesúsra Onesíforo dyaque canerecabati tsehue pabana tuque junanucatsu.

2

Pablora Timoteo yunerique quisarati bahuitya ishu cuejacuareque

¹ Timoteo, miquemi ecue ebacua buchique. Cristo Jesusra tuja dyaque quiyuhuebati tsehue baya tibu, turami tyahua casa mira sareyaque tuque mere ishu. Tura casa tyahua tsehue merecue. ² Miratu quisarati bacahua era jetiamaja yacuaju cuejayaju. Tuna tuna bahuedya era yunerique cuejahuaque. Riyaque quisarati nucadya bahuityacue peya cuana bahuityaqui juishu. Tume cuanara peya cuana cuaretsu ama pabahuitya.

³ Miquemi Jesucristora cuatsashaya eque jutaqui, sudaru tuque cuatsashaquira cuatsashayaju ejuu bucha. Sudarura huanama canerecati eiduu bucha, jadidyatu micue idutaqui canerecatiyaque juatsu, canimehuallatitsu ama. ⁴ Jidaque sudaruratu tuque cuatsashaquique camadya pureamaturacara aya. Jadya tibudya tujatu bacaya ama tuque cuatsashaquira

ama cuatsashayaque ni tu inime tupuqui aya sudaruju nubiyara shanahua cuanaque. Jadidya tuque micue Jesús cuita camadya meretaqui, dutya tuque pureamatura ishü au jadya. ⁵ Ejeque dyaque huenida tsajajayaque camadya tunajatu ejaqui cuana epicaque iyucaju jutumereya. Tuque eje bucha tsajajatae ejuta eque tsajajahuaque juatsu camadya tunajatu jutumereya. Jadidya jucue; Jesúsra mique amerehua eque cuita camadya jucue. ⁶ Tee pujitu ara ishüque ani ishü casada mere juya. Jadidyami mique casada mere jutaqui Jesús mere ishü. ⁷ Jida inime tupucue riya era micue huenehuaju. Ecuana Cuatsashaquirami jida adebamereya.

⁸ Jesucristo inime tupuqui ajacaume. Arepa majuhua ama buchatu netitsuranucahua. Chachadyatu iyacua. Ecuari David equetu juracanacuare. Tuque equeque quisarati ique Yusura cuejamerehuaquedya riya. ⁹ Tumeque quisarati era cuejehua tibu, iyacua canerecatiya etare apudaju quiyeti puji bucha. Arepa ique erisi ama bucha Yusuja quisaratitu cuejatanajacaya ama. Ai erisi bucha ama tuque. Peya cuanajatu cuejataquidya. ¹⁰ Jutaqui ju tuque nerecada juyara iduya, Yusura mepehua cuanaque jidaque quisarati cueja ishü. Dyaque canerecatiya tuna Jesucristo queja catyatisha ishü. Yusura tuna Ijahua quejaque inajacamerebuque, tura ecuana inajacamerehua bucha. Tuna tuna Yusu quejadya judirubuque, ecuana judiruya bucha. Emuijacata ama ecuana tuatsehue anidirubuque.

¹¹ Riyaque quisarati ri ejene ishüque. Jesúsra amereya eque cuitadya jutidya ni ecuana juya majuya tupu, tuatsehuedya ecuana anisiribuque.

¹² Iduya ni ecuana canerecatiyaque canimehuallatima, tuatsehuedya ecuana enaruqui jubuque.

“Jesús jaque ama ique”, jadya ni ecuana juya,
 “Tume cuanaque tu ecuique ama”, jadya tujatu Etata Yusu abuque.

¹³ Arepa ecuanara tuja ishü ai aana ayaque eajacau ama bucha, turatu ayadya tura ai aana ayaque.

Tuquetu pusha pusha baecua.

Tuquetu ejuu amadya tuque eje buchique ama.

Dyaque jida juishu Yusu meretaquique

¹⁴ Timoteo, mique Yusuja quisarati bahuitya juyaque, ecana adebamerecue riya era huenehuaque. Jadya ecana cuejacue: “Cati cati nejuume. Cati cati juyaque tuque micuana tsahuaya ama micuana quisaratiyaju bacaqui cuanaque. Jesús queja catyatishacarama jutidya tuque micuana ecana aya. Riyaque micuana amereya, Ecuana Cuatsashaquira era cuejayaque bacayaque adebatsu”, jadya

ecana cuejacue. ¹⁵ Cacasaticue Yusu pana pureamatura aishu. Jida mere puji que tuja patrónra mere petayaju ebisuu ama bucha jucue, mere puji ediji jida tuyu paruquique bucha. Jadidya tuque micue jida tuyu Yusuja quisarati cuejataqui, cuarema. Tumemi Yusura abuque: “Mira merehua jida. Erami pureama aya” jadya. ¹⁶ Yanacana cuitatu umae cati cati juya. Yusuja quisarati tuna bacacarama aya. Ujeudya jutidya tuna Yusu bamereajeya tuna quisaratiyaju bacaqui cuana queja. Cati cati juume tuna tsehue. ¹⁷ Quisarati yunerique ama tu muda. Ujeje caririshati aqui que dutya ecuitaju tsapetanaya bucha tuque. Quisarati yunerique ama bacaqui cuana que tuna tuna tacadya jutidya cayuamaturatiya. Jadidiatu jucua Himeneo, Fileto jadya ecitse. ¹⁸ Ejeque ediji jacatsu cuji ejuu bucha, jadidiatu tatsera yunerique ejenejacacuare. Tatseratu bahuityaya: “Yusuratu amena nityatsuranucahua Jesús queja ecatyati majuhua cuana que. Nityatsuranucabuque ama tura ecuana emajuque”, jadya tuna juya pusha pusha. Jadya bahuityatsu tunajatu Jesús queja ecatyati cuana que cujishaya. ¹⁹ Ecuana bacue tu aqueja nimee jujacahua ama, quisarati yunerique ejeneya tibu. Etare pana au eaquetu rihuiya ama. Tumebaedya ecuana yunerique ejenetsu, Jesús queja nimee jujacaya ama. Ehuenedya tu Yusuja quisarati: “Ecuana Cuatsashaquiratu adebaya tuja cuana que” jadya. Tumebaedya tu Yusura jadya cuatsashahua que: “Duty yuneri jadya juya cuana que ‘Yusu ja que ecuana’ ni riyá piji buchique tuna jidama jutaqui ama” jadya.

²⁰ Etarejutu aniya pajida que equiniqui ea cuana que, oro, plata jadya. Tumebaedyatu aniya acui, mechi jadya ea cuana que. Umae equiniqui cuana tunajatu eje bucha juatsu cuana camadya tsumeya. Peya cuana bacue tuna dutya huecaca tsumeya. ²¹ Ecuana cajuchaticahua ju ecuana Ecuana Cuatsashaquira jida baya. “Eatsehue micuana anibuque, ique mere ishú. Ique micuana tsehue dya que pureama juya”, jadya tura ecuana abuque. Ecuana asicadama bucha juya tibu, jidama que ecuana jacahua tibu, jadya tura ecuana abuque.

²² Timoteo, bijiseriume ai bisutada que aishu, ehue ebari cuanaja bijiseritaquique ama. Tuna bucha ejuu que, cacasaticue Yusuja biji eque ani ishú. Jesús queja nimeedya jutidya juajecue. Iyuhue batsacue peya cuana. Eje bucha tsehue ama anicue peya cuana tsehue cahua itima. Jadya anie jucue Jesúsja cuana tsehue, jida que inime cajuchaticarama jadya inime tupuqui cuana tsehue. ²³ Caquemitsati caquemitsati aquereume aishu que ama quisarati aya cuana tsehue,

tunara cuitadya adebayaque ama quisarati aya cuana tsehue. Miquemi bahuelya tume cuanaque peya cuana tsehue catijacatsu ama catiyaque. ²⁴Ecuana Cuatsashaquique merequiquetu cahuititaqui ama. Dutya tshuetu jida jutaqui. Tumbaedyatu tuque bahue jutaqui peya bahuitya ishu. Tujatu jida, inime tsapema jadya cuejataqui tuatsehue cahuaitiya cuanaque. ²⁵Tumequetu cahuititaqui ama jidama juya cuana tsehue. Tsahuataqui tujatu ecana yunerique quisarati adeba. Yusura tunajatu inime ecuareu, tunaja yunerique ejene ishu. ²⁶Icuenetu Ijahua ijahue ahua, erisique bucha, cuanubi trampaja einaque bucha. Iyacia tuna tura cuatsashaya eque juya. Masadama cuana tuna ecaadebatiu tuna eje bucha juyaque. Eje buchadya tura cuatsashaya eque junucacarama ni tuna ejuu, cuanubi trampaja eicuayaque bucha.

3

Jesús junanucahuie eje bucha ecuita cuana jubuqueque

¹ Adebacue bacue riyaque. Jesús junanuca ishuque japadamatu Yusuja cuanaja ishu dyaque masada idutaquima bucha jubuque; Yusu adeba baecua cuanaque tuna dyaque jidama anibuque. ² Yusu adeba baecua cuanaque cuita camadya tuna inime patya catibuque, peya cuana pureamatura ishu inime etsapeuque. Eje uma tunajatu chipirusitanityacara abuque tunaja ishu cuita camadya. Tuna tacadya jutidya tuna casumitibuque. Peya cuana dyaque inimequi bucha tuna cabatibuque. Ijillahuanabuque tunajatu Yusu, peya ecuita cuana jadya. Etata cuanaqueja yana equedya ama tuna jubuque. Tuna tsahuaqui cuanaque yusurupai abaecua tuna jubuque. Ijaribabuque jutidya tunajatu dutya ai Yusuja cuanaque. ³ Iyuhuedama tunajatu peya cuana babuque. Etata cuanaqueratu ebacua cuanaque iyuhuedama babuque, ebacua cuanaquera bacue etata cuanaque. Peya cuanara jidama ahuaaju tuna nime aputabuque ama tunara eje bucha ahuaque. Catacuariti arida tuna jubuque. Tunara ai eje bucha acara aya equedya tunajatu abuque, tuna taca canaruti baecua tibu. Dyaque jidama tuna jubuque cuanubi muredaque bucha. Dutya jidaque tunajatu ujeu babuque. ⁴ Tuna iyuhueda baqui cuanaque tunajatu ijahue abuque. Jida inime tupumaradya jutidya tunajatu ai abuque. Ni aija cuejataqui tuna jubuque, tuna dutya bahue bucha cabatitsu. Yusu tuna pureamaturacarama abuque, tuna cuita camadya. ⁵ Yusu adebaqui cuanaja bahue equedya datse tuna anibuque. Jadya ama bucha tuna Yusuja Espiritu queja cacasaturamereticarama jubuque. Jadya cuana tsehue

cacarenetiume. ⁶ Etare cuana tupu juneni camadya tunajatu bahue, anitaya cuana tsehue quisarati ishü, epuna cuana tsehue neri neri. Epuna cuanaratu eje bucha cuejayaque pijidya jutidya ejeneya. Tunaratu dutyadya jutidya bacaya, arepa yanacanaque paju ama bucha. Tuna tuna pusha pusha bahuitya puji cuanara bahuityaya eque aniya. Arepa tuna tunaja jucha cuana ai dyaque bicuedaque bucha cuita adebaya ama bucha, juetiya ama tunajatu casa cajuchatiyaca ishü. Dyaque tunajatu bijiseriya tunaja bijiseritaquique ama. ⁷ Peyara iyacuaque bapeque quisarati cuejayaju tunajatu eje buchadya bacacara aya, ai inime cacuaretiyaque ama. Tuna tacadya jutidya tuna ijahue catiya, yunerique quisarati adeba jida aishu ama. ⁸ Moisesratu quisarati yunerique cuejacuare beru Yusura cuatsashayaju. Jadya ama buchatu Janes, Jambres ecatsera bacahua ama Moisés. Tatse baedyatu iyacua Yusu ujeu baqui cuanara peya cuana ijahue aya, tunaja quisarati yunerique baca ishü ama. Tume cuanaque tu inimemasi. Jesús tsehue tuna nime aputahua. Yusura tuna baya tuaqueja nimee ama juya cuanaque bucha. ⁹ Ijahue asiri ishü ama tunajatu peya cuana ijahue aya, yaratupu ishü camadya. Tuequedya tunajatu adebabuque tuna ai baecuaque. Jadya adebadadietu ecuita cuanara ahua Janes, Jambres ecatsé.

Pablora Timoteo cuejanucacuareque

¹⁰ Timoteo, miratu pana adebadya aya era yunerique bahuityahua cuanaque, ique eje bucha anieque, era Jesús ducuta muicara ayaque. Adebayadyami ique Jesús queja nimeeque, ique ujeu baqui cuana tsehue cahuitiyaque ama, iyuhue tsehue tuna bayaque, canimehuallatima canerecatiyaque iduyaque. Bahuityahuadya mique era eje bucha anie jutaquique. ¹¹ Adebayadyami ique jidama atahuaque, ique Jesús queja ecatyatique juya tibu dyaque canerecatihuaque. Adebayadyami ique Antioquijaju, Iconioju, Listraju eje bucha jucuaque, Jesús jiteque dyaque canerecaticuaque. Jadya ama bucha Ecuana Cuatsashaquira narujacuare ama. Tura ique jida inimeju cuinanashahua. ¹² Ryaque tu yuneridya. Jesús pureamaturayaque anicara juya cuanaque tuna jida ama atabuque, dutya tuaqueja nimee juhua cuanaque. ¹³ Jidama juya cuanaque tuna jidamadya jutidya juajebuque, yunerique ama peya cuana ejenemerequi juya cuanaque. Tunaratu peya cuana ijahue abuque; peya cuanara bacue tuna tumebae ijahuedya abuque.

¹⁴ Jadya jutidya ejuuque mira ejenejacaume Yusuja quisarati bahuityatahuaque. Miratu amena pana ejenedya aya

riyaque Yusuja quisarati yunerique. Miratu adebayadya mique riyaque quisarati cuejaqui juhua cuanara pusha pusha ahuaque ama. ¹⁵ Nanada equeradyatu mira Yusuja quisarati isarahua. Miratu adebayadya riyaque quisarati. Tuque isaratsu ecuana bahue juya Yusura ecuana Jesucristo queja catyatiyaju Ijahua quejaque inajacamereyaque. ¹⁶ Yusratu huenemerehua dutya tuja quisarati. Yusuja quisarati tu jida yunerique bahuitya ishu. Jida tu cajuchatiya cuanaque tuna Yusu cahuaishayaque caadebatitsu capeya inimetisha ishu. Jida tu jucha arida cuanaque cajuchatishajaca ishu. Jida tu Yusuja biji eque ecuana ani ishuque cueja ishu. ¹⁷ Riyaque quisarati ehue neque anitsutu Yusu mere juya cuanaque ecabahuityati dutyaju jida juishu. Tumeque quirica equedya ecuana ecabahuityati.

4

¹ Timoteo, cuejaya mique era. Yusu merecue. Ecuanaja Yusu, tumbaedy a Jesucristo jadyatu bahue mique era jadya cuejayaque. Ejeque huecacatu Jesús junanucabuque dutyaja huaraji aridaque juishu. Turatu cuejanabuque emaju cuanaque, chacha cuanaque jadya eje bucha judadiyaque. Jida tujatu amerebuque yana equedya juhua cuanaque. Nerecatu urabuque tujatu yana equedya ama juhua cuanaque. Jadya tibudya acue riyaque era amereyaque. ² Cuejacue Yusuja quisarati. Cuejajacaume; arepa tunara bacacarama aya ama bucha, tsapecue quisarati jidaque. Cajuchatiya cuanaque ecana huecashacue tuna jidama juya cuanaque. Nereda acue cajuchatiya cuanaque. Casaturacue ecanimehuallati cuanaque. Jadya bahuityae ecana acue yunerique ni eje bucha cahuaitya tsehue ama. ³ Tsunutaya amatu huecaca ecuita cuanara quisarati yunerique bacacarama ayaque. Tunara bacacara ayaque cuita camadya tunajatu ijacabacabuque. Ihuarabuque tunajatu ebahuityaqui cuanaque tunara bacacara ayaque cuita camadya baca ishu. ⁴ Bacajacabuque tunajatu quisarati yunerique. Yusuja quisarati ebacauque, tunajatu baba cuana cuatsabiji camadya bacabuque. ⁵ Mique bacue inime tsapema junenicue, jida inime tupu tsehue, Timoteo. Peya cuanara jidama ayaju, iducue tuna tsehue cahuaitya. Yusu queja judiru ishuque quisarati cuita camadya cuejacue. Miquemi Yusu merequique. Jadya tibudya acue dutya mique Yusura amerehuaque.

⁶ Masadama tunara iyedadiya. Beru tunaja uu Yusuja yacuaju iye bahue juhua, jadidya tunara ique iyedadiya. Amena ri japadama ique majuyaque. ⁷ Sudaru jidaratu

tuque cuatsashaquique merejacaya ama; jadidyatu era Jesucristo merejacadua ama. Jidaque tsajaja pujitu tsajajacaya ama tuque tsajajaya tupu jutimaque; jadidya ique Jesúsra cuatsashaya eque jujacadua ama. Catyatiajehua tuaqueja cuita camadya. ⁸ Etsajajashaqui metseratu dutyaja yatucaju dyaque huenida tsajajahuaque ejaqui pica jutumereya. Tumbaedy a ique dutyaja yatucaju Ecuana Cuatsashaquira abuque: “Miquemi jida Yusuja yatucaju, tura mique tuyu amerehua tibu”, jadya tura tuque junanucatsu anabuque. Tuquetu dyaque tuyu. Ique camadya ama tura jidaque tyabuque. Tumbaedy tujatu tyabuque dutya tuque iyuhueda baqui cuanaque, tuque eje buchadya junashahuishacara juya cuanaque.

Pablora umae tuja eadeba cuanaque eje buchique cuejacuareque

⁹ Riyaque quirica inatsatsu tsunutaume; banacue ique, Timoteo. ¹⁰ Sareya mique era. Eatsehue juneniya cuanaqueri dutya jujeri diruchine. Crescenteri diruchine Galaciaju. Tito bacue diruchine Dalmaciaju. Demasra bacue jacachine. Tujatu dyaque bijida riyaque yahua juque. Jadya tibudya tujatu Yusu mere jacachine. Tesalonicajutu diruchine. ¹¹ Lucas peadya camadya ri eatsehue. Marcos tsuruyaque juatsu becue. Paje tuque miatsehuedya. Betaradya yatse Yusu pamere. ¹² Tíquico tuque cuadishachine Efesoju, mique tuhuaque cuare ishu. ¹³ Badaju jutu ishuque tuque ecue shanachine Carpoja etareju. Jeyaque, Troas eque cuetiyaque ecue quemiacue; becue ecue. Tumbaedy ecue becue quirica piruri; ebiti ehuenecue neri neri tumeque ecue becue cuita.

¹⁴ Alejandrora dyaque jidama yuamaturachine, metal cueya cueya apujira. Tura Yusuja cuanaque nerecaturahua tibu, tuquetu tumbaedy Yusura nerecaturabuquedy. ¹⁵ Tumeque ecuitatu Yusuja cuanaque ujeu. Ecuana quisarati yunerique cuejayajutu masadama ecuana tsehue cahuaitiya. Jadya tibu canaruticue tuatsehue.

¹⁶ Huaraji cuanaja yacuaju tunara ique ihuarahuaju era ecana ai bahuityachineque, ai ique juchineque jadya ique bacadura ishu, ni ejeque buchiquetu ique tachi ishu quisaratichine ama. Dutyara ique jacatillachine. Jadya ama bucha “Tata, nerecaturaume ecana, tunara ique jacahua tibu”, jadya tuque Yusu aya. ¹⁷ Arepa ique dutya ecuita cuanara jacatillahua ama bucha, Ecuana Cuatsashaquiquetu eatsehuedya juhua. Tura ique jacahua ama ni yara tupu. Tura ique casaturahua, tuhua Yusuja quisarati tsape ishu

dutya queja israelita ama cuanaque aniyaque. Ecuana Cuatsashaquira ique tachihua ecuita dyaque jidama cuanaju, león cuana mureda bucha ducuque. ¹⁸ Tura ique ni riya piji buchique jacachine ama tibu, eratu pana ejenedya aya tura ique dutya jidamaju naruyaque. Ique narujacama aatsu tura dujubuque tuque huaraji arida aniyaju. Tuquetu dyaque jida jujacaya ama. Aijamatu peya tuque buchique.

Quirica huenetilladirutsu ecana Pablora isaracuareque

¹⁹ Prisca, Aquila isaramereya micuana Timoteo tsehue, tumebaedya Onesiforoja etareju cuanaque. ²⁰ Erastotu Corintoju anichine. Trófimo tuque Miletoju shanachine, ujededa baatsu. ²¹ Eubulo, Pudente, Lino, Claudia jadyarami isaramereya. Tumebaedya dutya rehua cuanara Jesús queja ecatyati cuanarami isaramereya.

Sareya mique, Timoteo. Ebajarara cuita tuhuaque cuinanacara jucue, cuejipa cuana pacacama jarijudya.

²² Ecuana Cuatsashaquique miatsehue paju, Timoteo. Yusu ecuanaja Etatara nenarucue tuja quiyuhuebati tsehue. Jaididya paju

Riya tupu camadya.

Pablo

TITOJA ISHU PABLORA QUIRICA CUADISHACUAREQUE TITO

Riyaque quirica ri Pablora Titoja ishu cuadishacuareque Titotu israelita ama jucuare. Jadya ama buchatu tuque Jesús queja catyaticuare. Pablo tujatu tsahuacuare. Cretajutu Pablora shanacuare Jesús queja butseeju ecatyati cuanaque tsahua ishu. Jadya tibudyatu Tito Jesúsja cuanaque naruquique jucuare.

Pabloratu cuejacuare tuhua Jesús queja ecatyati cuanaque eje bucha narue aishuque. Tumbaedyatu huenecuare Jesús queja ecatyati cuanaque naruqui cuanaque eje bucha jutaquique.

Umae versículo cuana cabahuityati ishuque ri: 1.9; 2.11, 14; 3.3-4.

Pablora Tito isaracuareque

¹ Riya micue quirica cuadishaya, Tito. Ique Pablo, Yusu merequique. Jesucristoja yana atsaquique ique. Cuadishahua tura ique Yusura mepehua cuanaque bahuitya ishu, tunara Jesús queja catyatitsu pana adeba aishu. Jadya adebae tunajatu quisarati yunerique eadadiu. Eadebadadiu tunajatu dyaque jida Yusuja biji eque ani. ² Yusuja biji eque ecuana aniya eje tupu ecuana tuque jakanuca ishu ama tuaqueja judirubuque tibu. Yuequedya Yusuja yahua ejitaju ama jarijutu Yusura quisarati acuare: “Ecue cuanaquetu eatsehue anibuque, ique jacatsu ama” jadya. Bahuedya ecuana jadya judadiyaque, Yusu pusha pusha baecua tibu. ³ Iyacia riyaque huecaca ecuana Yusura bamerehua riyaque quisarati. Yusu Ecuana Inajacamerequiri riyaque quisarati dutya queja cuejamerehua. Jadidya tuque ahua. ⁴ Tito, isaraya mique era. Miquemi ecue ebacua neri buchique, Jesús queja nimee juishu era tsahuahua tibu. Yusu ecuanaja Etatara, tumbaedyu Ecuana Inajacamerequi Jesucristora jida tsehue narucue tatseja quiyuhuebati tsehue. Tatsera inime tsapema anishacue.

Jesús queja ecatyati cuanaque naruqui cuanaque eje bucha anie jutaquique

⁵ Tito, ique tuhua Creta cububuju jucuare patya tuque yatse Yusuja mere atillacuare ama. Micue tumeque mere atilla ishudya mique shanacuare. Micuedyatu bacanishataqui ecuita cuana epu cuanaju Jesús queja ecatyati cuanaque naru ishu, cuatsasha ishu jadya. Cuejacuaredya mique era

eje buchique ecuita micue riyaque mere aishu bacanisha ishucue. Acue era mique amerehua bae. ⁶ Jesús queja ecatyati cuanaque naruqui cuanaquetu jida tuyu anitaqui, eje bucha eque nereda ataquí ama juishu. Ecaquemitique juatsu, huane pidya camadya paju, peya epuna jipe ishú ama. Ebacua cuanaque tunajatu Jesucristo queja nimee jutaquí, camuibati aquí jadya. Huarají cuanara cuatsashaya eque tuna jutaquí. ⁷ Jesús queja ecatyati cuanaque cuatsashaquí cuanaque tuna Yusuja emepe cuanaque, naru, tsahua jadya ishucue. Jadya tibudya tuna jida tuyu anitaquí dutyaja baishu, ni ejeque buchique jidama quisarati ishú ama. Paju ama ecana tunara cuita camadya ai ayaque acara, peyara cuejayaque bacacarama. Masadama cahuaitie ecana paju ama. Nijuquí arida, cati arida, dutya ai tunaja ishú bijiseri arida ecana paju ama. Cachipiruti ishucue camadya inime tupuquí paju ama, Yusuja quisarati cueja camadya. ⁸ Tuna queja tarepe juya cuanaque jida batsaquí ecana paju. Peyaja jida ishucue abahue ecana paju. Jida inime tupu bahue ecana paju jida tuyu ani ishú. Peya cuana tunajatu bataquí jida tsehue, huarají cuanara cuatsashahua eque anitsu. Yusuja biji eque tuna anitaquí. Tuna taca canaruti aquí ecana paju, peya huecaca jidamaque aishu bijiseri bahueque eau tibú. ⁹ Quisarati yunerique tunajatu pana ejene ataquí ni eje tupu ejenejaca ishú ama. Riyaque quisarati equedya ecuana dutya anitaquí. Enaruquí cuanaque ni riyaque quisarati eque aniya, tume tunajatu Jesús queja ecatyati cuanaque casaturaya. Tumbaedyá tunajatu ecuejau Jesús adebaya ama cuanaque tuna inime cacuareti ishú. Jesús queja ecatyati cuanaque naruquí cuanaque tuna jadya anie jutaquí era huenehua eque.

Yunerique ama bahuityaqui cuanaque tuna casada tsehue nereda ataquí

¹⁰ Aniyatu jetiama huarají cuanara cuatsashaya eque jucarama juya cuanaque. Yana equedya ecana jucarama juya. Arepa ecana Jesús queja catyatihua ama buchatu umae israelita cuanara inime tupuya: “Anitaquidyatu ecuanaja baba cuanaja bahue jucuaré eque Yusuja ecuana jida baishu”, jadyatu umae yanacana cuita juya. Jadya ijahuee tunajatu ecana aya tunaja inime equijahuati tsehue. ¹¹ Bahuityataquique ama bahuityayaque tunajatu ecana umae familia cuana bape bape jutidya inime tupumereya. Jadyatu juya pusha pusha bahuityaquí cuanaque, cachipiruticará juatsu, tuna Jesús queja ecatyati cuanaja chipirutyáishu. Mira, Jesús queja ecatyati cuanaque naruquí cuanara jadya nequisaratishaume tumeque pusha pusha arida

cuanaque. ¹² Adebayadya tuque ecuana Creta juque eje buchique ecuita cuana. Tumeque ecububuju aniyaque ecuita jida quisarati bahuequedyatu jadya jucuare tuja ata cuanaja ishu: “¡Eje pusha pusha ariu cuita dyadi tu Cretaju cuanaque! Cuanubi muredaque bucha tuna aniya. Dajicada, dyaida jadya tuna”, jadyatu Cretaju aniyaque jucuare. ¹³ Yuneridyatu tumeque ecuita quisaraticuare. Jadya aniedya tuna juya. Jadya tibudya ecana yana casada tsehue nereda acue, yunerique bahuityayaque tunaja ejene ishu. ¹⁴ Quisarati tuna paajaca tunaja baba cuanaja bahue jucuare cuanaque. Quisarati yunerique bijidamaduraqui juhua cuanara cuatsashayaju tuna pabaca ama.

¹⁵ Jidamaque tillatanahua cuanajatu aijama ai jidamaque. Tillatanama cuanaja bacue dutya jidama tere, quisarati yunerique ejenehua ama cuanaja ishu. Tunaratu Yusu cahuaishaya inime tupuya tsehue, tuna eje bucha juya tsehue jadya. Jidama ecana juya, jida juya bucha cabatitsu. Aya ama tuna jidaque, jidamaque bucha baatsu. ¹⁶ Tunapa Yusu jaque, jadya tuna juya. Tuna eje bucha juyajudya tuna ejitaju tujaque ama. Peya cuana tuna ujeu bajacaya ama. Peya cuanara jida cuejayaju, tunajatu bacacarama aya. Ni ai tunaja jidaque abahue. Jadyatu anibahue pusha pusha bahuityaquid cuanaque.

2

Tuyu bahuityaya eque anitsu

Yusu pureamatura ishuque

¹ Tito, cuejajacaume jidaque bahuityahuaque. Bahuityajacaume ecana Yusu pureamaturayaque ani ishuque. ² Jadya ecana cuejacue ecuita esiri cuanaque: “Jida inime netupucue. Necamuibamereticue peya cuana queja. Jida inime netupucue Yusuja biji eque ani ishu. Jesús queja necatyatijecue. Iyuhueda nebacue Yusu, Jesús queja ecatyati cuanaque, dutyadya jutidya. Peya cuana micuanaja ishu jidama quisaratiyaju, tumbaedy a nrecada juya cabatitsu necanimehuallatiume”, jadya cuejacue esiri cuanaque.

³ Riya bae cuejaedy a nucacue epuna esiri cuanaque: “Yusuja biji eque neanicue, Yusu iyuhueda bayaque caadebamereti ishu. Catacuariti arida nejuume. Nijuqui juya tupu tupari nejiime ni peya ai casadaque nijuqui juishuque. Nebahuityacue epuna amena capunatiya cuanaque tuna Yusu pureamaturayaque ani ishu. ⁴ Necuejacue epuna ecapunati cuanaque; yahue cuanaque ebacua cuanaque tuna iyuhueda tsehue paba. ⁵ Necuejacue ecana tunaja jida inime tupu ishu. Necuejacue ecana; pajaraquere ama tuna peya

deca cuana, tunaja yahue cuanaque cuita camadya. Tunaja etare naru, bajeje jadya aishu ecana dyaida paju ama. Tuhua aniya cuanaque tuna jida tsehue paba. Yahue cuanaquera cuatsashaya eque ecana paju”, jadya esiri cuanaque cuejacue. Tuna jadya anie juya baatsu Yusu adeba baecua cuanaja jadya inime paju: “Yusuja quisarati taa tu ejuu yunerique. Jee taa Yusura cuatsashahua eque aniya cuanaque jida tuyu dutyaju aniya” jadya.

⁶ Tito, riyae bae cuejaedy a nucacue ehue ebari cuana: “Jida inime netupucue Yusu pureamaturayaque ani ishu”, jadya cuejajacaume deca ehue ebari cuana.

⁷ Pureamaturacue Yusu dutya mique ai juya tsehue, inime tupu tsehue, peya cuana mique juya baedy juishu. Yusuja quisarati bahuityayaque ecana pusha pusha aume. Jida ejitaju adebataqui ecana bahuityacue, peya cuanaja pana adeba aishu. ⁸ Yusuja biji quisarati acue, ni ejeja buchaja “Midya jutidyami jidama juya”, jadya eaju. Tume mique ujeu baqui cuanaque pabisu yuneriju ama quisarati ahuaque adebatsu. “Jesús queja ecatyati cuanaque taa jida tuyu tunaja quisarati. Jidama quisarati tsehue tucue ecana neara ama”, jadya tunaja inime paju. Tume ecana pabisu yuneriju ama quisarati ahuaque adebatsu.

⁹ Jadya cuejae mere puji cuana acue: “Micuanaja patrónra cuatsashaya eque nejudue. Nejudacaume micuanaja patrónra biji eque. Micuanaja patrónra cuatsashayaju, nejuume: ‘A, aijama. Aya ama tuque era’ jadya. ¹⁰ Nechiriume ni ai buchique micuanaja patrónra que. Micuanaja ishuna jida quisarati paa: ‘Ecue mere puji cuanara ni ai jidama ahua ama’ jadya. Jadya anie micuana juyajutu peya cuanaja inime ejuu: ‘Jesús queja ecatyati cuanaque dyaque jida cuita dutyaju juya. Yusu Tuna Inajacamerequija quisarati taa tu ejenetaquique’ jadya”, jadya cuejacue mere puji cuana.

¹¹ Yusura ecuana tuja iyuhue bamerehua, arepa ecuana jucha arida ama bucha. Tura ecuana Ijahua quejaque inajacamereya Jesús queja dutya catyatiya cuanaque. ¹² Ecuana tsehue dyaque jida juya tibu, tura ecuana bahuityaya riyaque yahuaju ecuana eje bucha anie juishuque. Yusura ecuana cuejaya: “Ecue bijidamaque ajaca ishunque inime tupuqui neajacaume. Nejacacue Yusu adeba baecua cuanara bijseri ebari aya cuanaque. Jidaque aishu inime tupuqui neacue. Era bamereya eque nebacue peya cuana. Era cuatsashaya equedya nejudue, dutya ecue biji eque ai aatsu”, jadya ecuana Yusura cuejaya. ¹³ Jadya ecuana anitaqui Jesucristo junanucayaque ihuayaque. Pana ejenedya tuque ecuana aya tuque junanucayaque. Dyaque jida ecuana

inime juya riyaque bahue juatsu. Tuque tuque ecuanaja Yusu casadaque, Ecuana Inajacamerequique jadya. Tuque junanucahuaju tuna jubuque: “¡Dyaque casada taa tuque! ¡Aijama taa peya cuana tuque buchique!”¹⁴ Tuja inime taca neri taa majuhua ecuana jiteque. Tura ademe taa ecuana Yusu cahuaishajacama juyaque cuinanashahua. Tuquetu majuhua, tuque Yusuja ecuana tuyu bucha baishu. Tuquetu majuhua ecuana tujaque amere ishu. Tuquetu majuhua, ecuanaja jidaque acaraque aishu.

¹⁵ Tito, micuedyatu Jesús queja ecatyati cuanaque bahuity-ataqui. Cuejacue ecana eje bucha jutaquique, eje bucha jutaquique ama jadya. Tuna jidama aniyaque juatsu, ecana nereda acue. Mira bahuityayaque ni aira buchique pabijidamadura ama. “Jesucristora jadya cuatsashahua tibu, jadya quisaratiya. Era cuejayaque ri ecue inime tacaque ama, Jesucristora cuatsashahua”, jadya ecana cuejacue, dutyaja mira quisarati ayaque baca ishu.

3

Jesucristo queja ecatyati cuanaque eje bucha anie jutaquique

¹ Tito, jadya cuejacue Jesúsja cuanaque: “Neadebacue micuana icuene cuejatanahuaque. Nejudue gobiernoja yana eque, tumbaedy a dutya huaraji cuanara cuatsashaya eque. Huaraji cuanara peya cuana tsahua ishu cuatsashayaju ecana jida inime tsehue netsahuacue. ² Neijillahuanaume ni ejeque buchique. Cati sare nejuume ni eje tsehue. Jida nejudue peya cuana tsehue; netsahuajacaume ecana. Jida jutidya nejudue dutya tsehue”, jadya ecana cuejajacaume.

³ Jida nejura Jesús queja catyatima cuana tsehue. Icuene ecuana tuna aniya baedy a anicuare. Aishu ama ni ecuana adebacuare Yusu jaque ni tura ejitaju ahuaque. Muibacuare ama ecuana Yusu ni ejeque huaraji buchique. Eje bucha anie jutaquique bahue bucha ecuana cabaticuare, tume taa pusha pusha pana ejene ayaque. Dutya jidamaque bijiseritsu ecuanaja abahuedya jucuaré. Dutya ecuana acuare ecuana cuita camadya pureama juishuque. Jidama ecuana acuare peya cuana. Cajishati arida ecuana jucuaré; ecuanara ai ecuanaja ishu bijiseriyaque jidama ecuana bacuare peyaja aniyaju. Ecahuitidya jutidya ecuana jucuaré peya cuana tsehue; tuna bacue ecuana tsehue. Jadya aniedya jutidya ecuana jucuaré icuene.

⁴ Yusu Ecuana Inajacamerequira ecuana bamerecuare tura eje bucha iyuhuee bayaque. Bamerecuare tura ecuana ecuana tsehue tuque ejejuque. ⁵ Inajacamerecuare tura

ecuaná, ecuanara ai jidaque ahua baatsu ama, ecuaná tsehue quiyuhuebati anitsu. Iyacuanehua tura ecuaná, ecuanaja júcha cuana ai utsaya bae utsae aatsu. Tuja Espíritu eque tura ecuaná yudijidya cananatisha anucahua. ⁶ Ecuaná Inajacamerequi Jesucristo queja catyatihuaju, Yusura tuque ecuanaja tuja Espíritu cuadishahua. Inijeda juatsu ama tuja tuque ecuanaja cuadishahua. ⁷ Jadya tujatu ahua, tuque jidaque ecuaná bamere ishú, arepa ecuaná júcha arida júhua ama bucha. Tujaque tura ecuaná amerehua. Tuaqueja judirusha ana ni eje tupu jaca ishú ama jadya tura ecuaná acuare. Pana ejenedya tuque ecuaná aya jadya judadiyaque.

⁸ Riyaque era hueneyaque tu yunerique. Jesús queja catyatihua cuanaque era huenehua eque anishacue. Mira ni ecaná cuejajacaya ama, tume tunajatu peya cuana tsahujacaya ama. Tuyudya tu jadya juishu. Tuna jida júyaju baatsutu peya cuana tuna aniya baedya anicara ejuu. ⁹ Dutya ama tuna jadya anie júya. Aniyatu umae yanacana cati cati júya cuanaque. Aniyatu ebaba cuanaque eje bucha júhuaque inime tsapequi júya cuanaque. Júya tunajatu inime peya cuana dyaque jida bucha, ecuita cuana dyaque inimequi eque ejuracanaque cabatitsu. Aniyatu Moisésra cuatsashahua tibu cati cati júya cuanaque. Cati cati ishú tunajatu aya eje bucha anie ecuaná tumeque cacuatsashati eque ejuuque.

Dutya riya cuanaque tu aishuque ama. Dyaque jida ama tura ecuaná Yusu adebamereya. Peya cuana tsehue ujeu jutidya tura ecuaná cabatishaya. Miquemi jadya jútaqui ama, Tito.

¹⁰ Peya cuanara bacue Jesús queja ecatyati cuanaque dutya tupu nimee amerecarama aya. Jadya ameretsu tunajatu ecaná cahúaitishaya jutidya. Yusuja cuanaque cahúaitishaqui júya cuanaque nereda acue. Tunara bacayaque juatsu, jida. Bacaya ama ni tunara mique, nereda anucacue. Nereda abeta acue. Nereda abeta aatsu, tunara bacaya amaju tume ecaná jacacue. Tunara ni jidamaque bahúityajacaya ama, tume ecaná yatse tsehuequi bucha ama bacue. ¹¹ Bacacarama ni turami aya, adebayadya tuquemi tumeque ecuita cuejataquimaque. Arepa nereda atanahua ama bucha, arepa cajuchatiyaque bahue ama buchatu tumeque ecuita cajuchatijacacarama júya. Tura cuitadyatu Yusuja quisarati bijidamadurahua. Jadya tibudyatu Yusura nerecaturabuque.

Pablora Tito amerecuareque

¹² Inime tuque bajejeya Artemas Cretaju cuadisha ishú, jadya ama juatsu Tíquico. Cuadishaya tuque peadya ejeque

cuana Jesús queja ecatyati cuanaque naru ishu mique aijama tupu. Era cuadishayaque jutihuaju, jecue ebajarara. Necatsuruti Nicopolisju. Tuhuadya amena aninatiya cuejipa cuana juyaque cuetiya tupu. ¹³Zenas, Apolos jadya tuhuaque cuinanahuaju, ecatse tsahuacara acue. Zenasratu cacuat-sashati pana adeba aya. Tsahuacue ecatse dutya tatsera ai sareya tsehue tatse cuayaque etsunutanatiuju. Pahuiti ama tatseja ai. ¹⁴Jadya cuejae Jesús queja ecatyati cuanaque acue: “Jida nejura. Netyara ai ecuanaja aniyaque aima cuanaque. Netsahuara ecana. Dyaida tsehue neanira ama. Yanacana juneni ejuu tibu, netsahuara peya cuana”, jadya tuque micue ecana cuejataqui.

Tito Pablora amena ishu isaracuareque

¹⁵Duty a eatsehue cuanarami isaramereya. Isaracue tuhua cuanaque Jesús queja ecatyati cuanaque. Tuna tuna yatseja eadeba cuanaque iyuhueda cuanaque. Yusura jida tsehue nenarucue tuja quiyuhuebati tsehue. Jadidya paju.

Riya tupu camadya.

Pablo

FILEMONJA ISHU PABLORA QUIRICA CUADISHACUAREQUE FILEMON

Riyaque quirica ri Pablora Filemonja ishu cuadishacuareque. Riyaque quiricaju ri Pablora Filemón, “Micue tsujetyama mere ishuque Onesimo jida batsacue”, jadya acuareque. Onésimotu Filemónja tsujema mere ishuque jucuaré. Tuque metse quejaquetu huanacuare. Juneniyaquetu chamacama Pablo tsehue catsuruticuare, etare apudaju erisi netiyaju. Pabloratu tsahuacuare Jesús queja catyati ishu. Jesús queja catyatitsu tujatu Pablo dyaque tsahuacuare. Pablotu bahue jucuaré Onésimo, Filemón queja dirunucataquique. Tumetu Onésimo dirunucayaju Pablora tudya quirica cadujutishacuare tuque metseja ishu, tuque merequi bucha camadya tuja batsa ishu ama, tumbaedyá tuatsehuequique, betadya ecatse amena Jesús queja ecatyati que tibu.

Pablo Filemón queja Onésimo jida inime tsehue bamerecara aya bucha, tumbaedyatu Yusuja dyaque canerecabati aniya ecuaná tsehue. Tura tuque ecuanaja jucha cuana nerecabaya, Pablora Filemón queja Onésimo nerecabamerecuare bucha.

Pablora Filemón isaracuareque

¹ Era rique micue quirica cuadishaya, Filemón. Ique Pablo. Ique rehua etare apudaju netiya, Cristo Jesúsja quisarati cuejaya tibu. Timoteo ecue eatsehuequique ri rehuadya eatsehue. Isaramereya tura mique. Miquemi yatseja jida eadebaque. Mira yatse tsahuahua yatse Jesúsja quisarati cueja juyaju. ² Tumbaedyá tuque yatse isaramereya Jesús queja ecatyati cuanaque micue etareju Yusu pureama aishu caradati bahue cuanaque. Tumbaedyá tuque yatse isaramereya Apia. Tumeque epuna tu yatse tsehuequique. Tumbaedyá tuque yatse isaramereya Arquipo. Sudarura tuque cuatsashaquique emereu bucha, jadya mereedyatu Arquipora Jesús aya, yatsera aya baedyá. ³ Yusu ecuanaja Etatara, tumbaedyá Ecuana Cuatsashaqui Jesucristora jida tsehue nenarucue tatseja quiyuhuebati tsehue. Tatsera inime tsapema neanishacue.

Filemónra Yusuja cuanaque iyuhueda bacuareque, Jesús queja nimee jucuaréque jadya

⁴⁻⁵ Eratu bacaya tunara jadya ayaju, “Filemonrapa Yusuja cuanaque iyuhue apushaya ama, nipa Jesús queja nimee

jujacaya ama” jadya. Rियाque quisarati bacatsatsu, micue ishу Yusu queja bacabacayaque, jadya jujacama juya:

—Ecue Etata Yusu, yusurupai mique aya, Filemón eje bucha anie juyaque bacatsatsu. ⁶ Tuquetu dyaque jida micue cuanaja ishу; ni eje tupu pijidya jutidyatu tsahuajacaya. Jutaquijudya mique bacaya, tuja dyaque Cristo adebaaje ishudyа jutidya, Jesús queja nimeedya jutidya juajetsu muibajaca ishу ama. Tuque jadya anie juya baatsumi, peya cuanara pureama aya, tura jidaque inime aya tibu, —jadya tuque bacajacama aya Yusu micue ishу.

⁷ Miratu dyaque iyuhueda baya Jesús queja ecatyati cuanaque. Miquemi tuna tsahuamique. Tsahuayami ecana, tuna eje bucha juyaju, tuna eje bucha jidama inimeju nubihuaju. Rियाque bacatsu ique ecue pureama tsehue netiya. Dyaque mira nime casaturaya, ecue eatsehuequique.

Pablo Filemón queja tuja Onésimo jida tsehue batsa ishу canerecaticuareque

⁸⁻⁹ Ique Pablo, amena esiri. Iyacua etare apudaju netiya, Cristoja quisarati cuejahua tibu. Ique Cristoja yana atsaquique juya tibu, mique ecue casada tsehue ameretaqui mique ai jutaquique. Jadya ama bucha mique amereya ama casada tsehue. Acue mira ique iyuhueda baya tibu; nerecabacue ique. ¹⁰ Ique taa miaqueja canerecatiya micue Onésimo dyaque jida tsehue batsa ishу. (Tumeque ebacani tu “Catsahuati aquique” jadique.) Tuque taa tuque ecue ebacua buchique. Tura ique rehua etare apudaju banahuaju tuque tsahuahua Jesús queja catyati ishу. ¹¹ Ique bahue tura mique tsahuajacabacahuaque, micue etare juque huana diru juatsu. Amena tura ique dutyaju tsahuaya. Jadya tsahuaedya turami eadirunucau, miaqueja judirunucatsu. ¹² Jutaquijudya tuque miaquejadya cuadishanucaya. Arepa tuque ecue ebacua bucha juya ama bucha, tuque cuadishanucaya. Batsacue, ique micue batsa bahue juhua bucha batsaedlya acue.

¹³ Ecue datsetu inime juhua: “Eje buchadya rehua eaqueja iyacara datse tuque aya Onésimo, ique tuja tsahua ishу, Filemónra etsahuau bucha tsahuae tura ahuaque. Filemónra ique eje bucha tsahuataquima baya tibu tuque, tuque cuarequi datse eiyau”. Jadya tuque inime tupuhua ique rehua etare apudaju netiyara Jesúsja quisarati cuejahua tibu. ¹⁴ Jadya inime tuputsu, tuequedya tuque adebatinucaya ecue tuque rehua mique baecuaque iyataquimaque. “Tsahuataqui juya tibu patsahua Pablo”, jadya micue inime paju ama.

Mira ique tsahuamerecara ayaque juatsu, jutaquiiju tsahuamerecuedya ique micue jadya inime juyaque juatsu camadya.

¹⁵ Arepa Onésimo micue etare juque huanadiru juhua ama bucha, Yusratu jida amerehua tuja ishü, tumbaedyä micue ishü. Tuquetu dirubacahua miaquejaque. Jesús queja catyatitsu turami badirunucaya; meredirunucayadya, tura mique amena jakanuca ishü ama. Beta neti metse juya Yusu tsehue cajacati ishü ama. ¹⁶ Iyacia tu tuque mique mere ishüque camadya ama. Micue miatsehuequique tume, betadya metse Jesús queja catyatihua tibu. Eratu tuque dyaque iyuhueda baya. Dyaquedyatu mira iyuhueda baya. Tuque Jesús queja catyatihua tibu, turami dutya tuja casa tsehue tsahuadiruya. Iyuhueda necabaticue mique micue miatsehuequi tsehue iyuhueda ecabatiu bucha. ¹⁷ Ecue, micue jadya tuque yatseja inime aniya Jesús mere ishü. Yatse jadya anie juya tibu, batsacue Onésimo jida tsehue, ique micue batsa bahue bucha. ¹⁸ Mira ni batsacarama aya, tura mique eje bucha jutidya ahua tibu, chirihua ni tura micue ai, jidama inime baume. Eaqueja paju inime. Erami tsujetyaya.

¹⁹ Riyaque quiricaju ique ebacani quiyatiya, mique era tsujetya ana ayaque micue ejene ishü. Micue ecue tsujetyama jarijudya, adebacue era mique eje bucha tsahuae ahuaque. Eradyami tsahuahua mique Jesús queja catyati ishü. Arepa micue ique dutyaju tsahuataqui ama bucha, erami casada tsehue ama cuatsashaya tuja manu aniyaque apupasha ishü. Acue micue inime eque. ²⁰ Mique ecue eatsehuequique tibu, batsacue Onésimo, ique miaqueja canerecatiya tibu. Jadya mira tuque ahujaju, mira casaturaya, mira peya cuana casaturaya bucha.

²¹ Jadya era quirica cuadishahuaju tuquemi eaudya Jesúsra bijida baya bucha. Eratu adebayadya, ique tuja ishü mi-
aqueja canerecatihuaju mira tuque nerecaba ebari ayaque.

²² Micue tuque jida batsa ishü jipidya ama mique jadya aya, tumbaedyä ique aniti ishüque etare micue bajeje ishü. Adebayadya tuque era micuana Yusu queja bacabacayaque: “Tata, Pablora ecuana pabanauca” jadya. Jadya tibu masadama cuana tunara einajacau. Masadama cuana micuana ebatu.

Camadya ishü isarayaque

²³ Epafasrami isaramereya. Tuqueri rehuadya eatsehue etare apudaju netiya. Tuquetu Jesús queja nimee jujacaya ama. Turatu dyaque inime tupuya Jesús eje bucha meree

aishuque. ²⁴ Tumbaedyami Marcos, Aristarco, Demas, Lucas jadyara isamereya. Tuna rena rehua riyaque epuju Yusuja quisarati cuejaqui cuanaque.

²⁵ Ecuana Cuatsashaqui Jesucristora jida tsehue nenarucue tuja quiyuhuebati tsehue. Jadidya paju.

Riya tupu camadya.

Pablo

HEBREO CUANAJA ISHU QUIRICA CUADISHATANACUAREQUE HEBREOS

Riyaque quirica ri israelita cuana Jesús queja ecatyati cuanaja ishu cuadishatanacuareque. Adebataqui amari aira hueneacuareque, arepa eje umara Pablora hueneacuareque bucha baya ama bucha.

Umae cuana Jesús queja nimee jujacacara juyaju tujaque tibu dyaque canerecatiyaju cuadishacuareque bucha rique. Tunaja baba cuanaja quejeneti cuanaju yudijidya judirunucacara juyaju cuadishacuare bucha rique. Riyaque huenequirari hueneacuare, Cristopa ni aija beta tupu aque-retaqui ama israelita baba cuanara ejeneacuare cuana tsehue, acuare cuana tsehue jadya. Dyaque tujatu “Cristo tu ecuanaja pae dyaque muidaque”, jadya acuare. Icuene pae dyaque muidara uu iye, ami Yusu tyau jadya acuare buchatu Cristo curusuju majucuaré ami quijehuetitsu, ecuanaja jucha cuana tsujetya ishu. “Necanimehuallatiume. Ecuana eiyetauju majuhua queja nimeedya jutidya nejuajecue”, jadyatu jucuaré.

Umae versículo cuana jida cabahuityati ishu cuanaque ri: 2.3; 4.12, 14-16; 6.10; 7.25; 9.22; 10.23; 11.1-40; 12.1-2, 5-6; 13.8.

Yusu Ebacuaque eque caadebamereticuareque

¹ Beru mara cuana cuetietibehuajutu Yusura tuja quisarati adebamerehua ecuanaja baba cuana tuequeque quisarati cuejaqui cuana eque. Eje uma cueja bape bape eque adebamere tujatu ecana aetibehua. ² Amena iyacua bacue tura ecuana eje buchique adebamerehua tuja Ebacuaque neri eque. Tuja Ebacuaque tsehuedyatu Yusura iyahua dutya ai aniyaque. Tudyatu Yusura mepehua dutya ai aniyaque naru ishu. ³ Tuquetu jida casada Yusu bae cuitadya. Tura ecuana pana ejitaju adebamere aya Yusu eje buchique. Tura jadya amereya tibutu turadya inimeradya jutidya dutya tura iyahuaque inaya, naruya jadya aya, Yusura iyahua baedya aniaje ishu. Tuquetu majuhua ecuanaja jucha cuana apupashatsu pana bajeje aishu tsujetyaqui. Jadya juatsutu tuque Yusu Dutya Naruquija yacuaju anidiruhua Yusuja jida eque amaca. Emuitaque yahua naruquija jida eque amaca eiyabutyatau bucha, tumbaedyatu tuque muitahua.

Yusuja Ebacuaquetu dyaque emuitaque, barepa juque Yusu tsahuaqui cuanaque bucha ama

4 Yusuja Ebacuaquetu barepa juque Yusu tsahuaqui cuanaque dyaque inime metseque judadihua. YUSUJA EBACUAQUE ebanidya tu dyaque emuique, “Yusu tsahuaquique” jadya buchique ama.

5 “Mique mique ecue Ebacua.

Ique micue Tata”, jadyatu Yusura Jesús ahua.

Ni ejeque tuque tsahuaquique tujatu jadya ahua ama. Tumebaedyatu Yusu jucuare beru Jesús jadya ayaque:

“Ique tuja Etataque.

Tuque tuque ecue Ebacua”.

Ni eje tupu tujatu ahua ama quisarati ni ejeque tuque tsahuaqui ishu riya bucha. 6 Riyaque yahua ju Ebacuaque peadyaque cuadishahuietu Yusu jucuare:

“Dutya barepaju ique tsahuaqui cuanara pamui ecue Ebacua”, jadyatu juhua.

7 “Eratu ecue quisarati barepa juque bequi cuanaque cuejiji bucha huenie amereya, ique barepaju merequi cuanaque bacue casada etiqui ai yuamaturaquique bucha”,

jadyatu Yusu jucuare barepa juque tuque tsahuaqui cuanaque jadya ayaque.

8 Tuja ebacuaquetu Yusura jadya acuare:

“Yusu, dyaque casadaque jujacanime ama mique.

Narubuque tuquemi tuyu neri micue cuanaque.

9 Jida tuyuque tuquemi iyuhueda baya.

Amena jidama tsehuemi cahuaitya.

Jadya tibudya, ique Yusu juya tibu, erami mepehua peya cuana bucha dyaque emui juishu.

Jutaquijudyami mique dutya dyaque jidaque judadiya”,

jadyatu Yusura ahua tuja Ebacuaque. 10 Tumebaedyatu Yusura acuare beru tuja Ebacuaque:

“Yuequedya tuquemi iyahua yahua, Dutya Cuatsashaquique.

Micue emetucu tsehue tuquemi iyahua barepa.

11 Yahua barepa jadyatu teredadibuque.

Amena miquemi tere ishucue ama.

Dutya eiaquetu esiri judadiya.

Ecuanaja ejutuqui siri buchatu judadibuque.

12 Ejutuqui siri iyacuaque cadadititsu eijehueu bucha, tumebaedya tuquemi iyabuque yahua iyacuaque beruque cuarequi, barepa iyacuaque beruque cuarequi.

Mique bacue ni riya piji buchique esiri jubuque ama.

Mique eje bucha, jadidyami jusiribuque”,

jadyatu Yusura Ebacuaque ahua.

13 “Anibuteque ecue jida eque amaca muita ishu, era mique ujeu baqui cuanaque dutya ijahue atilla tupu”,

jadyatu Yusura ahua tuja Ebacuaque cuita camadya, ai ejeque barepaju tuque tsahuaquique ama.

¹⁴ Barepaju etsahuaqui cuanaque tuna espíritu cuana. Tunadya tuna Yusu merequi cuanaque. Tunadya tuna barepa juque cuadishaya tura tuaqueja judirushabuque cuanaque tsahua ishu. Jesús, Pedro tsehue quisaraticuareque

2

Nebijidamadurara ama Yusura tuaqueja judirusha ana ayaque

¹ Yusuja Ebacuaque dyaque emui juya tibu, barepaju Yusu tsahuaqui cuanaque bucha ama juya tibu, tuque ecuanaja ecuanara Yusuja quisarati bacahuaque dyaquedy a ejenetaqui, ecuanara eejenejacau tibu. Ejenejacaya ni ecuana, tume ecuana cuaba ejurira dujuyaque bucha jutidya ejuu.

² Beru yuequedyadyatu Yusura Moisés cuejehua cacuat-sashati cuana barepa juque quisarati bequi cuana eque. Cacuat-sashati eque ama anihua cuanaque, yana equedy ama juhua cuanaque tuna dyaque nerecaturatanahua, tuna jidama juhua tibu. ³ Beru yuequedy yana equedy ama juhua cuanaque jadya canerecatie juhua tibu, ¡dyaque jidama di taa ecuana nerecaturatabuque Ecuana Cuatsashaquija quisarati cuitadya bacaya ama que juatsu! Dyaque jida ri riyaque quisarati. Icuene cuitatu tura cuitadya cuejehua: “Yusuratu tuaqueja judirushabuque eaqueja ecatyati cuanaque” jadya. Tuequedy ecuana tuque quisaratiyaju bacacui juhua cuanara cuejehua tumeque quisarati nucadya, pusha ama cuitadya yunerique ecuana bahue amere ishu.

⁴ Yusura cuitadyatu yunerinehua tunara cuejehuaque pusha ama cuitadya yunerique. Tuque tuna tsehueque bamere ishuque tujatu ecana amerecara ahua. Amerehua tujatu ecana ecuita cuanaja bape baishuque. Amerehua tujatu ecana tuja casa tsehue ni ejeque ecuitaja ataquique ama. Tuja Espíritu eque tujatu ecana tyahua casa tuja biji eque bape bape cameremeretie juishu. Jadya adebamereetu Yusura ahua Jesús quisaratiyaju bacacui juhua cuanara cuejehuaque pusha amadya yunerique.

Jesucristo cacuitaticuareque

⁵ Tuequedyatu Yusura yahua iyacuaque iyanucabuque. Riyaque iyacuaque bahue juishuque rique micuanaja huenehua. Ni ejeque buchique barepaju tuque tsahuaquique tujatu iyahua ama yahua iyacuaju cuanaque naru ishu. ⁶ Yusuja quisarati tu ehue:

“Arepa riyaque yahuaju cuanaque micue yacuaju aishuque ama paju ama bucha, mira tuna sareya, Yusu.

Arepa maju aqúi cuanaque muita ishúque ama júya ama bucha, mira tuna jida narúya.

⁷ Icuene tuquemi ecuita cuana ejetsunue ishú ama barepaju mique tsahuaquí cuanaja jetiedyaque iyahua.

Jadya ama bucha tuquemi ecuita cuana esumi, emui jadya amerehua, enaruquique casadaque bucha esumita, emuita jadya.

⁸ Dutya mira iyahua cuanaque cuatsashaquí tuquemi ecana iyahua”,

jadya tu Yusuja quisaratiju ehúene.

Jutaquíjutu aijama amadya ecuita cuanara cuatsashaya eque judadi ishúque. Jadya ama buchatu ecuita cuanaja aijama jari casa riyaque yahuaju dutya ai aniyaque naru ishú. ⁹ Arepa ecuita cuana jadya muie atama jari ama bucha, Jesús tu iyacua dutya iyaquique emuita jadya. Cacuitatitsu ejetsunue amatu tuque barepaju Yusu tsahuaquí cuanaja jetiedyaque juhua ecuita cuana jiteque maju ishú. Yusuratu jida tsehue bahua cajuchatiya cuanaque; turatu Jesús iyahua dutya tunaja jida ishú. Iyacua tu Jesús esumi, emui dutya casa tsehueque enaruquique, Yusura inime pihueaque ahua tibu. ¹⁰ Yusuratu iyahua dutya ai aniyaque. Turatu baya dutyaju dutya ai tuja jida ishú. Yusuatu bijida dutya tuja ebacua cuanaque tuatsehue pureama ata ishú. Jesúsja canerecati eque cuita camadya tuna jadya ejudadiu. Jutacíju tu tuyudya Yusura tuja Ebacuaque nerecatura ishú, tura inime iyahua eque eje uma tuaqueja amere ishú. Jesúsra ademedia ecuana Yusu queja judirushaya. Tura ademedia ecuana Yusu queja judiru ishú huidujuya. Tuquetu peya cuana judiruquere ishú ediji pacashaaje júya buchique.

¹¹ Jesúsra tuque ecuanaja júcha cuana tillahua ecuana Yusu jaque amere ishú. Ecuana júcha tillacíja, ecuana júcha etillatana cuanaja jadya tuque ecuanaja peadya camadya Tata, Yusu. Jadya tibudyatu Jesús bisuya ama ecuana tuatsehuequique jadya aishu, arepa tuque ecuanaja dyaque inime metseque paju ama bucha. ¹² Jadya tu ehúene Yusuja quisarati:

“Pacueja era ecue eatsehuequí cuanaque mique eje bucha júhuaque.

Tuna tsehue casitatitsu mique pureama abúque” jadya.

¹³ Tumebaedya patu Jesús júcuare:

“Yusu queja ique catyatihua” jadya.

Tumebaedyatu júcuare:

“Rehua ique ecue ebacua cuana bucha tsehue,

Yusura ique ecue naru ishú tyahua cuana tsehue” jadya.

¹⁴ Ecuana Yusuja cuanaque ecuana maju aqui cuanaque, ramiqúi, amiqúi jadya. Jadya tibudyatu Jesús ecuana baedya maju aqui juhua. Jadyatu juhua majutaquí juishu. Tuquetu majuhua Satanás casa seca ishu, ecuana maju mubamerejaca ishu. ¹⁵ Icuene tuque ecuana dyaque mubahua maju. Metsequi cuanajatu ataquí tunara eje bucha cuatsashayaque, arepa tunara acarama aya ama bucha. Jadya ecuana juhua. Bajida juatsu tuque ecuana abahue juhua Satanásra amereyaque, arepa acarama aya ama bucha. ¹⁶ Yuneri cuitadyatu Jesús ecuita cuana Ijahua quejaque inajacamerera junahua, Abraham eque ejuracana cuanaque, barepaju Yusu tsahuaquí cuanaque ama. ¹⁷ Jesústu ecuana tuja tuatsehuequí cuana bae cuitadya juhua, Yusuja inime juya eque. Jadyatu juhua, ecuanaja pae dyaque muidaque Yusuja yacuaju juishu, Yusu tuyu mere ishuque juya tibu. Jadyatu juhua, ecuana jida inime tsehue naru ishu, tuyu Yusu mere ishu. Jadyatu jucuaire tuta taca catyati juishu, ecuanaja jucha cuana tsujetyaquí juishu. ¹⁸ Jesús cuitadyatu canerecatihua. Yanacana cuitatu Satanásra cajuchatishacara ahua. Jadya tibudya tura ecuana tsahuaya Satanásra cajuchatishacara ayaju.

3

Jesús tu Moisés bucha dyaque inime metseque

¹ Jutaquíju dyaque inime netupucue Jesús eje buchique, micuana ecue eatsehuequí cuanaque. Yuequedya cuitadya micuana Yusura mepehua tujaque amere ishu, tuque purea-matura ishu jadya. Tuquetu Yusuja Ecuadishaque. Tuquetu ecuanaja pae dyaque muidaque Yusuja yacuaju. Ejeneyadya tuque ecuana tuque jadique. ² Icuenetu Yusura Moisés mepecuare tuja cuanaque naru ishu, tuque cuarequí tuna cuatsashaquí juishu. Turatu dutya tuque cuatsashatahuaque acuaire. Tumbaedyatu Jesús mepetanahua Yusu cuitadya ecuita cuana queja ejunauque. Tuque ameretahua eque cuitadya tujatu ahua. ³ Etare metseque tu dyaque emuique, tuatsehue etareju aniya cuanaque bucha ama; tumbaedyatu Jesús dyaque emuique, Moisés bucha ama. ⁴ Dutya etarejatu emechiqui aniya; Yusu tu dutya metseque. ⁵ Tuyudyatu Moisésra ahua Yusura cuatsashahuaque, Yusuja cuanaque naruyaque. Yusu merequiquetu juhua. Tuja meretu juhua tuna Yusura eje bucha adadiyaque cueja. ⁶ Cristo tu dyaque inime metseque, Moisés bucha ama. Cristo tu Yusuja Ebacuaque. Turatu jida tuyu naruya Yusuja cuanaque, tuque Yusuja Ebacuaque juya tibu, mere pujira cuatsashaya bucha

ama. Yusuja cuanaque ecuana, Jesús queja nimeedya jutidya juajeya que juatsu, Yusura tyaana ahuaque pureama tsehuedya jutidya ihuaajeya que jari juatsu.

Yusuja neri cuanaque Yusu queja judirubueque

⁷ Jadya tibudyatu ehue Yusuja quisarati tuja Espiritura jadya ayaque:

“Iyacia micuanara Yusura cuejaya que bacatsu,

⁸ bacacarama ama neacue, micuanaja baba cuana israelita cuanara ahua bucha.

Tunaratu Yusura amerehua que ahua ama.

Anitaya ama cuanaju juneniyara tunajatu Yusu nime adebahu tuna cuejataquima juyaju, tura nerecaturama idu aya que adeba ishu.

⁹ Tuhuatú micuanaja baba cuana, erapa jidama baya, jadya juhua, arepa ecana era pushi tunca mara jida tsehue bahua ama bucha.

Nime adebajacahua ama tunara ique.

Era nerecaturaya ama bucha tuna cabatihua.

¹⁰ Jadya tibudya cahuitihua dya que tume que ecuita cuana tsehue, tuna era cuatsashaya eque tuyu jucarama juhua tibu.

Arepa ecana ecue cacuatsashati cuana bahue ama bucha, acarama tunara ecue yana aya.

Tunaja inime tacadya jutidya cuji juya buchique tume.

¹¹ Tuna tsehue dya que cuita cahuititsu tuna jadya ahua:

‘Nubidirubue que ama tuna era ecue cuana que canajara ishu bajejehua ju’ ”,

jadyatu Yusu jucua reberu.

¹² Cuejaya micuana riyaque, micuana ecue eatsehuequi cuana que. Necanaruticue ejera micuana Jesús tsehue enime aputashaju. Micuanara ni Yusu dutya casa tsehue que bijidamaduraya, jidama que ni micuana inime tupuqui aya, tume tu que micuana tuja quisarati bacacarama aya. ¹³ Dutya huecaca peya cuana tsehue necacasaturaticue ijahue ecatimereu tibu, cajuchati ebijiseriu tibu. “Iyacia era cuatsashaya eque neanicue”, jadyatu Yusura acua re ecuanaja baba cuana. Tumebaedya tura ecuana iyacia aya: “Era cuatsashaya eque neanicue” jadya. Tura ecuana jadya aya jari tupu, yurameta cacasaturati nejuce peya cuana tsehue Jesús queja catyatiaje ishu. ¹⁴ Jesús queja catyatimetse juatsu tu que ecuana pana ejenedya ahua tura ecuana naruyaque, ecuana yudijidya ecanimehuallatiuju. Tu aqueja nimeedya jutidya ni ecuana juajeya tere juetiya tupu, tuatsehue tyatanapeedya ecuana jubu que tyatana ana juhua que.

¹⁵ Jadya tu ehue Yusuja quisarati: “Iyacua micuanara Yusura cuejayaque bacatsu bacacarama ama neacue, micuanaja baba israelita cuana jucuaré bucha ama. Tura cuatsashaya eque anicarama tuna jucuaré”. ¹⁶ Egipto juque huanacuare cuanaratu eje uma baca acuare Yusu tuna tsehue quisaratijaju, Moisésra dujucuaré cuanara. Jadya ama bucha tuna cuatsashaya eque anicarama jucuaré. ¹⁷ Eje uma mara tunajatu Yusu tuna tsehue cahuitishahua; pushi tunca mara tuna jadya jucuaré. Cahuaiticuaretu cajuchati-jacacuare ama cuana tsehue. Jadya cajuchatie juatsu tuna majuafehua anitaya ama cuanaju juneniyaque. ¹⁸ Tuna cuitadya tujatu ecana ahua: “Judiruya amadya ni micuana ni ejeque buchique era ecue cuanaque canajara ishú bajejehua. Jadya micuana aya ai quisarati cuaretsu ama”, jadya patu acuare Yusura quijacabacati baecua cuanaque. ¹⁹ Jutaquiju ecuana bahuedya tuna Yusura emajaca bajejehua judirutaquimaque, tunara Yusura tyaana ahuaque ejenehua ama tibu.

4

¹ Yusratu tuja cuanaque tuatsehue canajarasha ana ahua. Judiruma jari ecuana tumeque emajaca canajara ishú. Jadya tibudya ecuana necanarutira, ejeque quijacabacati baecua ejuuju, ejeque cuana ecuana ejudiruu ama tibu. ² Ecuonaratu Yusuja quisarati jidaque bacahua, ecuanaja baba cuanara bacahua baedya. Ni aishu buchiquetu tunaja ishú jida juhua ama, tunara ejenehua ama tibu, arepa bacahua ama bucha. ³ Ecuana quejeneti aniya cuanaque cuita camadya ecuana judirubuque Yusu tsehue canajara ishú, tura amere ana ahua bucha. Beru patu Yusura quisarati acuare quejeneti baecua cuanaja ishú: “Ique tuna tsehue dyaque ecahuaiti. Ahua tuque quisarati: ‘Judirubuque ama tuna ni eje tupu ecue cuanaque canajaradiru ishúque era bajejehua’”. Jadya patu jucuaré, ai canajaradiru ishúque bajejema jarique juatsu ama. Riyaque canajara ishúquetu beru yahua iyama jarijudya ebajeje juhua, Yusura yahua iyahua equequedya riyaque mere amena ahua tibu. ⁴ Jadya tu ehue Yusuja quisaratiju pacarucu huecaca ishú jucuaré.

“Yusutu canajaracuare pacarucu ishúque huecacaju, tura ai acara ayaque au amena aatsu”.

⁵ Tumbaedya patu Yusu jucuaré, cuatsashaya eque ama juya cuanaja ishú:

“Tuna tuna judirubuque ama canajara ishú”.

⁶ Yusratu tumeque canajara ishúque emajaca bajejehua yanacana ama. Judirubuquedyatu eje uma tuhua, jidaque

quisarati bacametse juhua cuanaque ama. Cuatsashaya eque ama anihua tibu tuna nubidiruhua ama tuhua. ⁷ “Iyacua micuana dutya cuatsashaya eque neanicue”, jadyatu Yusura acuare béru ecuanaja baba cuana japada anitaya ama cuanaju juneniyaju. Tuna bacue cuatsashaya eque anicarama jucuaire. Eje uma mára juatsutu Yusura quisarati anucacuare: “Riyaque huecaca ri ecue quisarati ejene ishunque”.

Butseeju rique ejitaju ahua Davidra huenehuaque:

“Iyacua micuanara Yusuja quisarati bacatsu bacacarama ama neacue”.

⁸ Josueratu cuatsashaya eque anicarama jucuaire cuanaja ebacua cuanaque Canaán yahuaju huidujucuaire. Canaán amatu dutya tyata ana juhua cuanaja canajara ishunque jucuaire. Jadique juatsutu Yusu quisarati quena ama juhua eje uma mára cuetihuaju: “Iyacua tu canajara ishuhu nubi ishunque” jadya. ⁹ Jutaquiju taa tu yuneridya Yusuja cuanaque canajara ishuhu nubidirubunque, Yusura amerecara ayaque atillatsu, Yusu cuitadya pacarucu ishunque huecacaju dutya ai aniya cuanaque iyatillatsu canajarahua bae. ¹⁰ Yusura canajara ishunque tyaana ahuaaju nubitsu, tuque ecuanaja dutya mere cuana terebunque riyaque yahua juque, Yusuja mere yahua iyatillatsu juhua bucha. ¹¹ Necacasatira Yusura cuatsashaya equedya jutidya aniaje ishuhu, Yusura canajara ishunque iyahuaju judiru ishuhu. Yana equedya nejura bijidamadurata ishuhu ama, ecuanaja baba cuana bijidamaduratacuare bucha. ¹² Yusuja quisarati tu ai chacha ejitaju buchique, Yusura eje bucha amerecara ayaque ejitaju amere ishunque, cuchiru beta eque jacua ea buchique. Cuchiru tsehue ecuitaju sacuatsutu etsauju jutiya. Tumbaedyu ecuanaja Yusuja quisarati isaratsu caadebatiya ecuanaja eje buchique. Ejitaju tura ecuanaja amereya Yusuja inime eque eje bucha ecuanaja juyaque. Isaratsu Yusura yatse adebamereya eje bucha jucaraque, inime tupu peya huecaca yatsera cuitadya adebayaque ama. Pana ejitaju tura yatse aya eje buchique inime cadujutiyaque. ¹³ Ni ai buchiquetu Yusu Dutya Iyaquija yatucaju tehuataqui ama. Turatu dutya baya. Turatu baya yatse eje bucha juneniyaque. Adebayatu yatsera inime tupuyaque. Tuque tuque ecuanaja pana cueja abunque inime tupuyaque, eje bucha juhuaque jadya.

Jesusdyatu Yusu queja ecuanaja pae dyaque muidaque bacani

¹⁴ Jesús, Yusuja Ebacuaque tu Etataque queja ecuanaja pae dyaque muidaque. Iyacua tu Yusuja yacuaju. Jadya tibudya tuaqueja nimee nejujacara ama. ¹⁵ Jesús ecuanaja pae dyaque muidajatu quiyuhuebatsati aniya ecuanaja

canerecatiyaju, Satanásra cajuchatishacara ayaju. Ecuana juya bae cuitadyatu juhua. Tuquetu canerecatihuadya. Tumbaedyatu Satanásra cajuchatishacara datse ahua. Jadya ama buchatu tuque cajuchatihua ama ni cajuchati pidya. ¹⁶ Jadya tibudya bajida nejura ama Yusu tsehue quisarati ishü. Iyuhueda tura ecuana baya. Aniya tujatu canerecabati ecuana tsehue. Jida tsehue tura ecuana bajacaya ama tibu, tsahuajacaya ama tura ecuana, ejeque uradya jutidya ecuanara sareyaju.

5

¹ Moisésja cacuatsashati equetu pae dyaque muidaque ecuitadya jutidya jucuare. Tuquetu ebacanisha jucuare Yusuja yacuaju ecuita cuanaja yana atsaquique juishu. Tujatu Yusu bamere bahue juhua ecuita cuanara tuque ai euune cuanaque tyayaque. Turatu tyacuare Yusu uu eiye cuanaja ami ecuita cuanaja jucha cuana tsuje. ² Ecuita cuana Yusuja inime eque juishuque pana adeba ama aatsu cajuchatihua-jutu pae dyaque muidajaanicuare canerecabati tuna tsehue, tuque tumbaedyadya ecuita jucuare tibu. ³ Tuque cuitadya jucha arida cabatiya tibu, bameretaquidya tujatu Yusu uu eiye cuanaja ami jucuare peya cuanaja jucha cuana tsuje camadya ama, tumbaedyadya tuja jucha tsuje. ⁴ Ni ejequedya jutidyatu tuta taca cabacanishameretie ejuu ama pae dyaque muidaque amereta ishü. Yusuja cuita camadyatu mepe bahue jucuare tura pae dyaque muida cuanaque amerecara ayaque amere ishü, béru Aarón acuare bucha icueneque amere ishü. ⁵ Tumbaedyadya Cristo tuta taca ama camepetihua pae dyaque muidaque amereta ishü. Yusratu jadya muie acuare. Jadya tu ehüene Yusuja quisarati: “Miquemi ecue Ebacua. Ique micue Tata”. ⁶ Peyaju tu tuja ehüene quisarati jadya: “Miquemi pae jujacaya ama. Melquisedec buchami judadiya”.

⁷ Cristo riyaque yahuaju aniya jari tuputu nerecada jutaqui jucuare. Payaque etsuri jebuda tshuetu Yusu queja canerecaticuare, tuque maju ishü ama inajaca ishü casa aniya queja. Yusuja inime eque juya tibutu Yusura tura bacayaque bacacuare. ⁸ Arepa tuque Yusu jabacua juya ama buchatu tuque canerecatitaquidya juhua, yuneri cuitadya Yusura cuatsashaya eque jucara juyaque caadebamereti ishü. ⁹ Jadya tibudyatu majutsu cabameretihua tuque Yusuja biji eque cuitadya juhuaque. Jadya juatsutu tuque dutya tura cuatsashaya eque aniya cuanaque inajacamererique judadihua. Terenuca ishü ama tujatu ecana Yusu tsehue anishaya. ¹⁰ Yusura cuitadyatu bacanishahua pae dyaque muidaque

juishu. Melquisedec pae jucuaré bucha beru amena eje uma mára, jadya buchiquedya tu tuque.

Cristo tsehue nime aputa ishu pereinque

¹¹ Aniya jaritu Melquisedec eje bucha judadie pae jucuaréque micuana cueja ishúque. Jadya ama buchatu eje bucha dutya cuejatilla tupu ama, micuanara yume adeba ama aya tibu. ¹² Amena micuana eje uma mára Jesús queja catyaticuaréque. Jadya tibudya micuana Jesús queja butseeju ecatyati cuanaque bahuityaqui jutaqui. Jadya ama bucha, peya cuana ebahuityauque, tuque micuana sarenucaya peya cuanaja pana cueja anuca ishúque ibedamaque Jesúsja quisarati bahuitya ishu. Dyaque ibedaque eadebauque, cabahuityatitaqui jari micuana ibedamaque. Micuana micuana ebacua nana buchique, erami earauque, atsuna piji camadya susuyaque. ¹³ Ebacua atsuju jari cuanaratu adebaya ibedamaque cuita camadya. Tumbaedyá micuana adebaya ama jari tuque micuana Yusuja bijidaque, bijidamaque jadique. ¹⁴ Yusuja biji equedya jutidya juajeyaratu adebaya dyaque ibedaque, amena ari ari cuita cuanara erami araya bucha. Jadique adebaajehua tibu, butseeju bacametse ayaque, tunajatu adebayadya jidaque, jidamaque jadya.

6

¹ Inime tupuqui neajacacue Cristo eje buchique ibedamaque bahuitya ishúque cuita camadya. Amena esiri bucha nejuque. Tuja quisarati dyaque ibedaque necabahuityatiajecue. Etare puji cuanara dudu cuana sipimaquedya jutidya cuarenuca cuarenuca eau bucha nejuume. Butseeju Cristo jaque bahue juya cuanaque tuque ecuanaja abahue: “Cacuairetitaqui micuana. Jidamaque tuque micuanaja ajacataqui. Jesús queja micuana catyatitaqui jadya. ² Cutsameretitaqui micuana. Esiri cuanajatu micuana dyaque emetucu iyataqui Yusuja Espíritu micuana tsehueque adeba ishu. Emajuque micuana Yusura chacha anishanucabuque. Yusuja cuanaque tuna tuatsehue siri anidirubuque; tuja cuanaque ama tuna nerecada jujaca ishú ama canerecatidadibuque”, jadya tuque ecuanaja bahuitya bahue butseeju Jesús queja ecatyati cuanaque. Dutya riyá cuanaque ecuanara cuejaya cuanaquetu ibeda cuanaque ama. ³ Necabahuityatiajera yunerique dyaque ibeda cuanaque. Jadya ecuaná juya, Yusura ecuaná huecashayaque juatsu.

⁴ Umaetu Jesús tsehue nime aputahua. Ecuánara ni tuna eje bucha yudijidya tuaqueja nimee amerenucae ama. Icuene

tunajatu pana baca ahua Yusuja quisarati. Tsujema tunajatu inatsahua Yusuja jidaque barepa equeque. Icuenu Yusuja Espíritu tuna tsehue juhua. ⁵ Tuna tuna Jesúsja quisarati equedya anicuare. Tunapa tuna Jesucristora casa tyacuare. ⁶ Jadya ama bucha tuna Jesús queja nimee jujacahua. Jesús curusuju tataqui juhua cuanaja inime jucuare bucha, Tuquepa aishuque ama, jadidya tunajatu inime tupuya Yusuja Ebacuaque queja nimee jujacahua cuanara. Dutyaja yacuaju tuna tsahua tuatsehue. Jadya tibu tuna eje bucha yudijidya Jesús queja nimee amerenucataqui ama. ⁷⁻⁸ Rियाque cuatsabiji eque micuana huecashaya. Anicuaretu beta tee. Eje uma autu neira acuare. Yahua bacue jida nacatacuare. Peadya teejutu jetiama catyaticuare mere puji cuanaja ara ishuhua cuanaque. Peya teeju bacue huijacuare acuija, jiji cuitadya jutidya, aishuque ama. (Teeju ai baya ama tibusu emechiquira shanacuare.) Jesús bijidamaduraya ama cuanaque tuna teeju jetiama earaqui catyatiya buchique. Tume cuanaquetu Yusura jidaque tyabuque. Jesús bijidamadurauqui cuanaque tuna teeju acuija cuita camadya ehuijaque buchique. Tume cuanaquetu Yusura nerecatuabuque. Ijahuaaja etiquiju tujatu ecana ishahuque.

Jesús queja nimee jari cuanaque

⁹ Arepa era Jesús tsehue nime aputahua cuanaque eje buchique huenehua ama bucha, ecue inime micuana micuana dyadi tuaqueja nimee juya jari, micuana ecue iyuhueda cuanaque. Bahuedya ique micuana Yusura jidaque tyaajeyaquejadya jutidya, turadya micuana Ijahua quejaque inajacamerehua tibu. ¹⁰ Eje uma tsahuadya tuque micuana ahua Jesús queja ecatyati cuanaque. Adebayadya tuque ecuanara micuanara ecana tsahuajacayaque ama. Tuna jadya tsahuae ayaque micuana ejitajudya yuneridya Jesús iyuhueda bayaque. Yusu tu dyaque tuyu. Tuquetu nime aputabuque ama micuanara tuja ishuhua ayaque. Tura micuana tyabuque jidaque. ¹¹ Ecuana micuana peadya peadya cama tereya tupu yurameta iyuhueda cabatishacara aya. Tume tuque micuanaja anibuque micuanara ihuahuque. ¹² Ecuana micuana dyaidama Yusu mere ishuhua amerecara aya. Jesús queja nimeedya jutidya juajeya cuanara, canimehuallatima dutya iduya cuanara jadyatu babuque Yusura jidaque tyaana ahuaque. Tuna bae nejucue.

Yusura aana ahuaque adadiyaque

¹³ Neadebacue Yusura Abraham tyaana ahuaque. Yusu cacuaretiya ama. Pusha pushatu juya ama. Aijamatu peya tuque bucha casadaque. Jadya tibudyatu jadya juhua: "Ique

Yusu juya tibu, ayadya tuque era eje bucha aana ahuaque cuarema ni riya piji buchique. ¹⁴ Pusha ama cuitadya mique tyabuque dyaque jidaque. Tyabuque mique ebacua. Tuque equedya tuque micue jetiama mique equé juracanaya cuanaque anibuque”, jadya patu Yusura Abraham acuare. ¹⁵ Abrahamratu pana ejenedya Yusu acuare tura tyaana ayaque tyadadiyaque. Yuneridya ihuacuare tujatu tupupe tupupe inime tsehue ama. Tuquetu chacha anicuare tuja ebacuaque cuinanacuare tupu, beta yutsecuaque ecatsé. Jadya aetu Yusura atibunecuare tuque tyaana acuareque. ¹⁶ Ecuana quisarati yunerique ayaque cabamereti ishu, tuque ecuanaja sare bahue ejeque ecua bucha dyaque inimequija yunerine ishu. Jadya juatsutu amena eje bucha quisaratitaqui ama. ¹⁷ Jidaque inatsaqui judadiya cuanaquetu Yusura ejitaju bamerecara ahua tura aana ahuaque adadiyaque. Jadya tibudyatu juhua: “Ique Yusu juya tibu, ayadya tuque era eje bucha aana ahuaque cuarema ni riya piji buchique”, jadyatu jucuare. ¹⁸ Yusura aana ahuaque tu ecua einajaque. Yunerinehuadya tura. Jadya ae abeta tujatu acuare. Ecuana ratu Jesús sareya ecua Yusu queja judirusha ishu. Yusu cacuaretiya ama tibu, ni pusha pusha jadya juya ama tibu, ecua canimehuallatinime ama; bahuedya ecua, tura tuja yacuaju duju ana ahuaque juya tibu. ¹⁹ Tura ecua Yusu queja judirushayaque pana ejene cuitadya aya tibu, tuque ecua jacacaramadya aya, cuaba pana risi ahua jarasicuama ejarau bucha. Tupu pidya camadya ecua inime aya. Tupupe tupupe ama ecua inime aya; Yusu queja judirubuque, judirubuque ama jadya ama ecuanaja inime juya. Berutu pae dyaque muidaque eraca erihua equé cuetitsu nubicuare Dyaque Muidaju Yusu tsehue catsuruti ishu. Iyacia tuque ecua pana ejenedya aya barepaju Yusu tsehue catsuruti ishu judirubuqueque. ²⁰ Jesúsra ecua huidujuhua Yusuja yacuaju, ecua judirutaqui juishu. Tudyatu Yusuja yacuaju ecua bameretsa ishuque. Pae dyaque muidaque tume; ni eje tupu pae jujaca ishuque ama tume, pae Melquisedec jucuare baeque.

7

Jesús tu pae Melquisedec jucuare baeque

¹ Melquisedectu huaraji dyaque aridaque jucuare epu ebari Salem bacani juque. Tuquetu pae jucuare, Yusu dyaque emuitaque merequique. Ecuana ebaba Abraham peya epu cuana juque catiju jahue aatsu juetinucayajutu Melquisedecra tsurutsacuare. Tuque judirunucaya baat-sutu Melquisedecra cuinanatsu tsurutsacuare. Tsuratsatu

tujatu atsacuare Abraham: “Yusura jida tsehue bacue”.² Abrahamratu adebacuare Melquisedec Yusu Neri cuarequique. Jadya tibudya tujatu tyacuare riya piji tura huaraji cuana ijahue aatsu secahuaque. Tyacuare tujatu peadya tunca cama tura ai secahua cuanaque. Ebacani Melquisedec tu “Ecuari tuyuque” jadique. Tuquetu epu ebari Salem bacani naruquique jucuare. Salem ebacani tu “Inime tsapema ani ishuque” jadique. Jutaquiju tu ebacani Melquisedec “Tuja ecuita cuana narutsu dyaque jida inime tsapema amerequique” jadique.³ Aijamatu ehuenegue ni ejeque quiricaju tuja etataque, ecuaque jadya ni ebaba cuanaque. Bae-cua ecuana eje bucha ejitajue, majue jadya tuque juhuaque. Atanaya amatu ebacaniju peya pae Salem juque tuque yueque tibene ni reeque tibene, Yusuja Ebacuaque bucha tuque peadya camadya pae dyaque muidaque juhuaque.

⁴ Neadebacue Melquisedec dyaque emui juhuaque. Abrahamtu dutya ecuana israelita cuanaja baba jucuare. Emuitu juhua. Jadya ama bucha tujatu tyahua Melquisedec peadya tunca cama dyaque jidaque tura huaraji cuana secahua cuanaque. Ejitajudyatu Melquisedec dyaque emui juhuaque, Abraham bucha ama; peadya tunca cama ai tyayaque inatsaqui tu mayuru, etyaquique bucha ama.⁵ Moisesratu huenehua Yusuja cacuatsashati: “Israelita cuanajatu tyataqui ejaque piji tunaja aniyaque Leví eque ejuracana cuanaque, pae cuana. Peadya tunca cama tunaja ai aniyaque tunajatu tyataqui”, jadya tujatu cuatsashahua. Tunaja ata cuana jaquedya tunajatu inatsacuare tunaja tsume ishu.⁶ Melquisedec bacue Leví eque ejuracanaque ama jucuare. Jadya ama buchatu Abrahamra tunca cama ai ejaque tuja aniyaque tyacuare. Inatsatsu tujatu acuare: “Yusura narucue jida tsehue”, jadya tujatu acuare Abraham. Abrahamtu dyaque emuique juhua, “Mique equedyatu dutya israelita cuana juracanadadibuque”, jadya Yusura tuque ahua tibu.⁷ Jadya ama buchatu Melquisedec Abrahamja muitaqui juhua. “Yusura jida tsehue narucue”, jadya ejeque aquique tu muitaquique.⁸ Israelita pae cuana ecuita cuanara tyayaque inatsaqui juhua cuanaque tuna ecuitadya jutidya jucuare; maju aquique tuna jucuare. Melquisedec bacue majuma jarique bucha. Yusuja quisaratira cuejaya eque taa tu Melquisedec chacha aniya jari bucha, tuque majucuaque ni ejeque buchique baecua tibu.⁹ Levítu dutya israelita pae cuanaja ebabaque jucuare, ecuita cuanara Yusuja ishu dutya tyaya cuanaque inatsaqui jucuareque tibu. Quisaratí tuque ecuana eaudya’ tsujetyacuare dyatu Levíra Melquisedec peadya tunca cama tuja aniya tsehue

Abraham eque. ¹⁰ Arepa Leví ejitaju ama jari juhua ama bucha, tuque ejitaju judadiyaquetu ebabaque Abrahamja ecuitajudya juhua, Melquisedec peadya tunca cama tsujetyaque tsujetyayaju.

¹¹ Pae cuanara ecuana cuejaya Yusura cuatsashaya eque ani ishuque. Tume Leví eque ejuracana cuanara ecuana eje bucha tyataqui ama bahua casa Yusuja biji eque cuita ani ishuque. Ataqui ni tuna baquena juhua, tume taa tu Yusura cuadishaquena ama juquena juhua peya ecuana Yusu queja bamerequique tuna cuarequi. Cristotu turadya cuadishahua. Aarón eque ejuracanaque amadyatu Cristo pae jucuare, tuque bucha ama, Melquisedec bucha. ¹² Moisésja cacuatsashati equetu Aarón eque ejuracana cuanaque cuita camadya pae jutaqui jucuare. Iyacuatu Yusura iyahua peya tuja cuanaque tuja yacuaju bamere ishu. Cacuatsashati beruque cuaretaqui juhua tibu, iyacua ecuana aniya Jesúsra cuatsashaya eque. ¹³⁻¹⁴ Ecuana Cuatsashaquique tuque ecuanaja iyacuaque ecuana Yusuja yacuaju bamere ishuque. Tuquetu Judá cuare eque ejuracanaque juhua, Leví eque ama. Moisésra cacuatsashati beru huenecuare eque ni ejeque Judá eque ejuracanaquetu pae juhua ama. Ni ejeque buchique tuna Yusuja etareju mere juhua ama pae ejuta bucha.

¹⁵ Amenatu dyaque ejitajudya Yusura iyacua eque cuarehuaque. Amenatu juhua peya pae juishuque, Melquisedec jucuare baeque. ¹⁶ Cacuatsashatitu aniya, Leví eque ejuracana cuanaque cuita camadya pae jutaquique. Jesúsra pae judadihua, ai cacuatsashati jadya aniya tibu ama. Majutsutu tuque chacha netitsuranucahua, majunuca ishu ama. Tujatu aniya casa tuaqueja ecatyati cuanaque yudijidya nityatsuranuca aishu. Jadya tibudyatu tuque pae judadihua. ¹⁷ Riyaquedyatu Yusura quisarati ahua tuja ishu: “Miquemi pae maju baecuaque, Melquisedec jucuare baeque cuitadya”. ¹⁸ Cacuatsashati eque anihua cuanajatu aijama casa juhua Yusura cuatsashaya eque cuita ani ishu. Tumeque cacuatsashatitu ecuita cuana Ijahua quejaque inajacamere ishuque ama juhua. Jutaquiju ecuana cacuatsashati beru eque ama amena anitaqui, iyacua eque. ¹⁹ Moisésra cuatsashahua eque anitsutu ni ejeque buchique cajuchatima jutaqui ama cabatihua ni riya piji buchique. Iyacuatu amena aniya inime iyacuaque. Iyacua tuque ecuana ecuanaja pae Jesús eque yuneri cuitadya ejipeu Yusu. ²⁰⁻²¹ Yusradyatu tuque camadya jadya ahua Jesús pae dyaque muidaque tere baecua ishuque. “Ique Yusu juya tibu, ayadya tuque era eje bucha aana ahuaque”, jadyatu Yusu jucuare. Ehuenedya tu Yusuja quisarati:

“ ‘Miquemi pae jujaca ishucque ama’ jadyatu Yusu jucuare. ‘Judadibuquetu eje bucha era aana ahuaque, ique Yusu juya tibu.

Cuarenime ama tuque ecue inime ni riya piji buchique’ ”, jadya tu ehucene Jesús jadya ayaque.

Leví eque ejuracana cuanaque pae ameretsutu Yusura riyaque quisarati ahua ama ni riya piji buchique. ²² Jesús tu judadihua ecuana Yusuja yacuaju bamere ishucque. Turadya ecuana pana ejenemere aya Yusuja quisarati ahua eque dutya juajeyaque. Riyaque iyacuaque inime tu dyaque jida, beru jucuareque bucha ama. ²³ Jetiamatu pae cuana anihua, Aarón eque juracanahua cuanaque. Majuetibeya tibu tuna pae jusiritaqui ama juhua. ²⁴ Jesús bacue jadya ejuuque, chacha anisiriya. Maju baecua tibutu tuque pae jujacanime ama. Sareya ama tujatu peyaja cuare ishucque. ²⁵ Jesús maju baecua aniya tibu tujatu ecana Ijahua quejaque inajacamereyadya dutya “Inajacamerecue ique, ique Jesús queja catyatihua tibu”, jadya Yusu cuejaqui cuanaque. Tuquetu Yusuja yacuaju ecuanaja ishuc bacabacaya, tuja ecuana tsahuajaca ishuc ama.

²⁶ Jesús dya tu pae dyaque muidaque, ecuanara sareyaque. Tuquetu Yusuja inime eque cuita jujacaya ama. Tujatu aijama jidamaque ni riya piji buchique. Tuquetu caasimatima ni riya piji buchique. Arepa juchaqui cuana ducu anihua ama buchatu ni riya piji buchique cajuchatihua ama. Tuquetu Yusuja yacuaju; ai aniyaque dyaque emui tuque. ²⁷ Riyaque yahua juque pae cuanajatu dutya huecaca uu cuana iye bahue juhua Yusuja yacuaju pahua ishuc. Jadya tunajatu ahua tunaja jucha cuana cuita icuene nerecaba ishuc, tuequedya peya cuanaja jucha cuana. Jesús bacue maju pidya camadya juhua ecuanaja jucha cuana tsujetya ishuc. Tuque taa ni riya piji buchique juchaquique ama. Ecuana jiteque majuhua tibutu majunuca nime ama. ²⁸ Moisésra cacuatsashati cuejahua equetu juhua pae ecuita cuana tuyu cuanaque ama, jucha arida cuanaque. Jesús bacue tuyu neri anihua, juchama neri. Moisés eque cacuatsashati cueja, tsunuda junucatsu patu Yusu jucuare:

“Ecue Ebacuatu pae dyaque muidaque jusiribuque.

Ique Yusu juya tibu, yuneridya tuque abucque era quisarati ahua eque.

Cuarenime ama tuque ecue”,

jadya patu Yusu jucuare.

8

Jesús tu Yusuja yacuaju ecuana bamerequique

¹ Icueneque quisarati dyaque jidaque ecuanara ahuaque tu Jesús tuque ecuanaja pae dyaque muidaque. Ecuana bamerequique juya tibutu tuque Yusu Dutya Casa Tsehueja yacuaju anibutehua eaniqui muidaju Etataque peque. ² Moisés anicuare patyatu pae cuanara Yusu merecuare ebiti etare ecuita cuanaja eaju jutidya. Jesús ecuanaja pae dyaque muidaque bacue mereya Yusuja eanicuare neriju cuita Yusuja eaju.

³ Pae dyaque muida cuanaja mere tu Yusu ai tyau. Ecuita cuanara beyaque tunajatu tyabahue juhua. Uu cuana eiyeja erami, ami jadya tunajatu tyabahue juhua. Ecuana pae dyaque muidajatu tumbaedy aanitaqui juhua ai tyaishuque. ⁴ Tuque ni judiruquena ama juquena juhua Yusuja yacuaju, rehua riyaque yahuaju jaridya ni ejuneni jari, tume taa tu pae amadya juquena juhua. Rehua ri aniya Leví eque ejuracana cuanaque camadya Moisésja cacuatsashati eque ai cuana Yusu bamere ishucuaque. ⁵ Ecuita cuanaja Yusuja etare ahuie patu Yusura cuitadya Moisés bamerecuare emata dyaque tuja eje bucha ae aishuque. Bamerecuare tujatu etare emeya emeya eaque cuitadya tume bae cuitadya tuja aishu. “Acue mique era bamerehua bae cuitadya”, jadya tujatu acuar. Moisésra amerehuaque etare tu barepajuque Yusuja eaniqui nerija jetiedyaque; jadidyatu pae cuana eje bucha juya cuanaque ecuanaja pae dyaque muidaja jetiedyaque tuna. Tuna eje bucha juetibehuaquetu Jesús eje bucha judadiyaque bamere ishucue juhua. ⁶ Jesús mere tyatanahuaque tu dyaque inime juque, Leví eque ejuracana cuanaque tyatanahua buchique ama. Tura ecuanaja Yusu tsehue pana cajipetisha anucahua. Tura, Yusu, ecuita cuana jadya tsehue inime bajejehuaquetu inime juque tunara ahua buchique ama; Yusura ecuanaja eje bucha aana ayaque tu dyaque inimeju, tura ecuanaja baba cuana eje bucha aana ahua bucha ama.

⁷ Beru Moisésra cuatsashahua eque ni ecuanaja Yusu queja judiruquena juhua, tumetu Jesucristo jequena ama juquena juhua peya inime bajeje ishucue. ⁸ Yusutu bahue jucuare tuja cuanaque Moisés eque tura cuatsashahua eque cuita ama anibuqueque. Jadya tibudya tujatu ecana ahua tuja quisaratiju:

“Juetibuquetu huecaca iyacuaque inime eque Israel, Judá eque ejuracana cuanaque Yusu

⁹ Tunaja baba cuana jida iyuhue tsehue Egipto juque huanashacuare bucha ama tuque inime bajejedadiya.

Etataquera ebacuaque emetucuju inatsu edujuu bucha, jadya dujue tuna ahua iyuhue tsehue.

Jadya ama bucha tuna era cuatsashaya eque jujacahua.

Jadya tibudya tuna narujacahua.

¹⁰ Riyaque tu inime iyacuaque era adadinucayaque Israel eque ejuracana cuana tsehue, beru icueneque terehuaju.

Jadya micuana cuejaya Micuana Cuatsashaquira.

Pana adeba tuna amerebuque era cuatsashayaque.

Era cuitadya tunaja inimeju hueneya buchatu jubuque.

Tunaja inime taca eque era cuatsashaya eque juishuque tuna tyabuque.

Era cuitadya tunaja ducuta ecue inime eque anicaraque iyaya buchatu jubuque.

Ique Yusu juya tibu tuna narubuque.

‘Riya cuanaque ri ecue cuanaque’ jadya tuna abuque.

¹¹ Ni ejera buchiquetu bahuityabuque ama ni ejeque ique eje buchique.

‘Pabahuitya micuana Yusuja inime eque juishuque’ jadya cuejataqui amatu jubuque ata cuana ni ecuana tsehue anae cuanaque.

Dutyatu era cuatsashaya eque anibuque, ebacua cuana, esiri cuanaque jadya.

¹² Tillabuque tunaja tuque jucha cuana.

Pana nime aputa ni adeba pidya tuque abuque tuna icuene jidama juhua cuanaque”,

jadya tu ehue Yusuja quisarati.

¹³ Icueneque inime Yusura ahuaque tu ai beruque buchique, ecuetique. Adebanucataqui ama tuque. “Iyacua inime eque neanicue, beru eque ama”, jadya ecuana Yusura aya iyacua.

9

Riyaque yahuaju Yusu ejitaju amaja eaniqui, barepaju tuja eaniqui neri jadya

¹ Yusura Moisés eque ecuanaja baba cuana cacuatsashati cuejahuaju, eje bucha mui eauque tujatu ecana amerecuare. Tumbaedyu tujatu ecana amerehua etare tuque mui ishuque cuita camadya. ² Amereya equedyu tunajatu acuare ebiti etare. Etsecue enubicuarejutu eraca tsehue epene jucuaré. Etaretu patya jaque ea jucuaré. Pae cuana nubinati metse ishú jucuaréquetu “Muida Cuitaque Ama” bacani jucuaré. Tuhuadyatu ude nityaqui oro eaque jucuaré. Tumbaedyu anicuare mesa oro tsehue dyaque epepaque. Tumeque mesajutu anicuare pan cuana, Yusu tuja cuana ducu jadya adeba ishúque. ³ Educuju cuitaquetu “Dyaque Muidaque” bacani jucuaré. Tumeque etare jaque ishúquetu

eraca erihua epenequi jucuaré. ⁴ “Dyaque Muidaque” bacaniyutu anicuare mesa oro eaque muru ijimedaque pahua ishúque. Tumebaedyatu anicuare caju “Quisarati Eiyaque Yusu Cabamereti Ishúque” bacani. Tumeque caju taura eaquetu jucuaré, pana pepa oro tsehue eaque. Caju ducutu anicuare jarra caca piji oro eaque maná cuesi quiniquique. Maná tshuetu Yusura ecuanaja baba cuana mihuahua tscada eje uma piji anitaya cuanaju juneniyaju. Tumebaedyatu caju ducu anicuare Aarónja sari catsucahuiticuareque. Tumebaedyatu anicuare beta taura bejedaque Yusuja cacuatsashati ehúene jucuaréque. ⁵ Caju etumuqui dyaquetu neticuare beta barepajuque cueya cueya ecátse, querubín bacani ecátse. Tuhuadyatu Yusu cabamereti bahue jucuaré. Pae dyaque muidajatu sequi bahue jucuaré etumuqui uu eiye cuanaja ami tsehue, jucha cuana nerecaba ishú. Querubín ecátsetu etumuqui dyaque neticuare etumuqui apu ishú. Iyacuari aijama emajaca dyaque jida cuita riya cuanaque cueja ishú.

⁶ Dutya ecabajejetiquetu pae cuana tunaja bahue Muida Cuitaque Amaju nubi bahue jucuaré cacuatsashati eque juishu. Dutya huecaca tuna tuhua nubi bahue jucuaré Yusu mere ishú. ⁷ Educuju cuita Dyaque Muidaju bacue pae dyaque muidaque camadya nubi bahue junenicuare. Marajutu peadya camadya nubi pidya jubahue jucuaré. Uu eiyeque ami tshuetu nubi bahue jucuaré. Caju tumuquique tujatu ami tsehue sequi bahue jucuaré. “Nerecabacue ecue jucha cuana, peya cuanaja jucha jadya. Cajuchaticaraque ama ecuanaja cajuchatihua”, jadya tujatu Yusu abahue jucuaré, ami sequi yaque. ⁸ Dutya riya cuanaque inime tupuqui aatsu ecuanaja Yusuja Espiritura huecashaya. Beruque inime aniya jariju dutyadya tuna eje bucha nubitaqui ama juhua Yusu queja; pae cuana cuita camadya Yusuja yacuaju nubi bahue juhua. ⁹ Iyacuana ecuanaja Yusu queja nubitaqui ecuanaja jucha cuana tsehue ama. Cacuatashati eque anicuare cuanaque bacue ecana ecajuchati tunaja juchaju cabatijacacuare ama, arepa Yusu tyashu uu cuana iye pahua jadya acuaré ama bucha. ¹⁰ Cacuatashati equetu umae ara ishú cuanaque arataquima jucuaré, tumebaedyaya umae iji ishú cuanaque. Cutsati bahue tuna juhua tunaja bahue cuana eque. Tumebaedyaya tunajatu utsa bahue juhua tunaja ai cuana Yusuja yacuaju juchama bucha cabamereti ishú datse. Jadya ama bucha, jadya cuana cutsatie juyaque, tunaja ecuita cuita camadya tuna asicadaque cutsatinicuare. Cacuaretishahua ama tuna inime jadyara. Jadya tuna jucuaré, Yusura peadya eque cuita camadya jucha cuana apu-

pashayaque ejitaju aya tupu.

¹¹ Junacuare dyatu amena Cristo. Tudy a tuque ecuanaja pae dyaque muidaque ecuanaja Yusuja yacuaju bamerequique, iyacua inime equetu jidadya amena Yusura jadya catibutishahua. Iyacua tura Yusuja yacuaju ayaque tu dyaque jida, Leví eque ejuracana cuanara ebiti etareju acuare bucha ama. Turatu aya Yusura eje bucha bijida baya eque cuita. Yusuja eaniqui neri Jesús aniquiquetu ecuita cuanara ama ahua; riyaque yahua juque ama tume. ¹² Cristotu nubihua tuhua siri ishu Yusuja yacuaju. Tuhua nubidiruyaque tujatu chivo ami ama nubiquerediruhua; huaca eijeja ami ama tujatu dujuhua ecuanaja jucha cuana tsujetya ishu. Tuquetu curusuju majuhua etsujetyaqui ami quijehueta ishu. (Majutsutu Yusuja yacuaju neri nubihua, pae dyaque muidaque icuene Dyaque Muidaju nubicuare bucha.) Jadya tsujetyae tujatu ahua ecuanaja tuaqueja ecatyati cuanaque Ijahua quejaque einajaca neri juishu, tuque ecuanaja jiteque ami quijehueta tibu. ¹³ Beruque inime equetu pae cuanara chivo, huaca ami cuana tsehue sequi bahue jucuare ecajuchati cuanaque. Huaca rami cuana pahuatsu tunajatu ena tsehue dusha bahue jucuare muru. Jadya edusha tsehue tunajatu sequi bahue jucuare cacuatsashati eque tunara asicada bayaque. Sequihuajutu ecuita cuanaja ecuita asicadama jucuare cacuatsashati eque. ¹⁴ Uu cuanaja ami tsehue ecuita cuanaja ecuitadya jutidya dyaque eque tillahua tibu, iyuneri cuita di taa tu Cristo curusuju ami quijehueta eque ecuanaja jucha cuana apupashatanaya! Arepa Cristo anisiri ishuque ama bucha, tuquetu tuja inime taca eque catyatihua Yusu queja ecuanaja jucha cuana jiteque maju ishu, ecajuchatique ama. Tuquetu ami quijehueta curusuju majutsu. Tume tuque ecuanaja educujuque inime tillatanahua, Yusu Chachaque mere ishu. Bahuedya ecuanaja ecuanaja eje bucha juya eque chacha jutaquique ama.

¹⁵ Jesús tu Yusu, ecuita jadya tsehue inime bajejequique, iyacuaque inime eque amere ishu. Tuque majuhua tibutu icuene inime eque anihua cuanaque cajuchatihua cuanaque etillatanaudya. Tuque majuhua tibutu Yusuja eihuara cuanaja ejuudya jidaque tura tyaana ahuaque, jidaque tere baecuaque. ¹⁶⁻¹⁷ Ejeque ni juya: "Ique majuhua, ecue ai aniya cuanaquetu jubuque era 'Tujatu juya' jadya ayaja camadya", emechiqui majuhua camadya tujatu judadibuque. Tuque majuhua piisidyatu tura quisarati ahuaque judadiya. Emechiqui chacha jarijutu ejeque tyaana eaja juya amadya ni ai buchique. ¹⁸ Tumbaedyatu icueneque in-

ime catibutihua uu iyehua cuanaque ami ijehumeretsu cuita camadya. ¹⁹ Icuene cuitatu Moisésra casitativahua dutya ecuita. Casitativahua tujatu ecana cuejahua Yusura dutya cuatsashahua cuanaque. Iyemerehuatu chivo cuana, huaca jabacua ehue ebari cuana jadya. Amitu ena tsehue dushamerecuare. Inacuare tujatu yaa piji esapucaca hisopo bacani. Rajutsu tujatu eduqui pude tsehue huayucua. Huayutsu tujatu mullacuare ami ena tsehue edushaju. Mullatsu tujatu sequicuare ami cacuatsashati cuana ehuenegue quirica dyaque. Tumbaedyatu sequicuare ecuita ecasitati cuanaque tuja bahue eque. ²⁰ Jadya aatsu tujatu ecana acuare: “Riyaque ami tsehue sequi ri, ‘Yusura micuana tsehue inime bajejehuaquetu yuneriquedya’ jadique, jadya tujatu ecana acuare. ²¹ Tumbaedyatu Moisésra sequicuare ebite etare eaque pae cuana Yusu mere juyajuque, tumbaedyatu tunara tuhua dutya ai tsumecuare cuanaque. ²² Cacuatashati equetu ami tsehue dutya jujeri jidamaque tillatanataqui. Ami quijehuetimaque majuratu jucha cuana apupashaya ama.

Ecuana jucha cuanatu eapupasha Cristo ecua jucha seca ishu majuhua tibu

²³ Jutajudiyatu “Dyaque Muidaque” etare uu, ami cuana tsehue pana sequitilla ataquí jucuare. Tumbaedyatu dutya ai tuhua etare ducu aniya cuanaque tsumema jarijudya sequitillataqui jucuare. Riyaque etare tu barepaju Yusu aniquique buchique cuitadya. Ecuana jidamaque tillatsu, Yusu yacuaju ecua nubitaqui juishutu Jesús catyatitatu jucuare dyaque jida uu cuana ami bucha ama. ²⁴ Tuquetu nubihua Yusu eaniqui ecuita ecua eaju ama. Nubihuatu barepaju Yusu eaniqui neriju. Tuhua tu tuque Yusu yacuaju, ecua Etaque tsehue quisarati ishu. ²⁵ Eje uma bameretu israelita pae dyaque muidaja ataquí juhua uu eiye ecua ami; nubi pidyatú maraju juhua Yusu tsehue catsuruti ishu. Cristo bacue maju pidya camadya juhua, ami quijehutihua, ecua jucha cuana tsuje tyashu. ²⁶ Eje uma catyatie juishuque ni juquena jucuare, tume taa tu eje uma maju juquena juhua yahua iyatanahua eque. Eje uma emajuquetu tuque maju pidya camadya juhua, ni eje tupu majunuca ishu ama. Yusura huecaca iyahuajudyatu Cristo tuta taca catyati juhua jucha cuana tsujetyaqui maju pidya ishu. ²⁷ Maju pidya cuita camadya ecua juya. Tuequedya ecua Yusura cuejabuque eje bucha judadiyaque ecua riyaque yahuaju eje bucha juhua eque. ²⁸ Tumbaedyatu Cristo maju pidya camadya juhua ecua jetiamaque jucha cuana tsujetyaqui. Juna beta

ishutu junabuque. Juna beta ishunu junanucatsutu jucha cuana tillara ama junabuque. Tuque ihua juya cuanaque Yusu queja judirusharatu junabuque.

10

¹ Moisésja cacuatsashati equé anicuare cuanaratu emajacaju emajacaju camadya yunerique adebacuare. Riya piji camadya tunajatu adebacuare Yusura tuja cuanaque jidaque tyadadibuqueque. Cacuatsashati equetu adebataqui jucuare ai dyaque jidaque junabuqueque. Dutya maratu cacuatsashati equé aniya cuanaque uu cuana quietinicuare, Yusuja tunaja uu ami baatsu jucha cuana nerecaba ishú. Jadya ama buchatu Yusu pureamara jeya cuanaque Yusura amerecara aya equé cuita jutaqui ama cabaticuare. Juchaquique ecana eje bucha nime aputataquima jucuare. ² Yuneridya ni tunaja jucha cuana apupashatanaquena juhua, tume tuna juchaqui cabatiquena ama juhua. Pana tillatana ni ecana ea juquena juhua, iyejacuena tuna juquena juhua uu cuana tunaja jucha seca ishú. ³ Eiyejacauque, tuna dutya mara uu cuana iye ishú cabetiyaque, dyaquedya ecana caadebatiajehua tuna jucha aridaque. ⁴ Eje bucha secas ni tu chivo, huaca jabacua cuanaja amira ama jucha cuana. ⁵ Jadya tibudyatu riyaque yahuaju jeya que Cristora Yusu jadya acuare:

“Pureamaturaya amami chivo, huaca jabacua jucha tsujetyaqui iyeya cuanara, ni peya ai buchara ecuita cuanara tyaya cuanara. Jutaquijudya mira cacuitatishahua ique miaqueja catyati-taqui juishu.

⁶ Tunara micue etareju uu rami cuana pahuayaju, tunara uu ami cuana bamereyaju, micue jucha cuana nerecaba ishú, micue biji amadya tuque.

⁷ Jadya tibudya ique junahua yahuaju micue biji equé juishu, Yusu, micue quisarati ehúene bucha equé ique judadi ishú”, jadyatu Jesúsra Yusu acuare.

⁸ Riya era huenehuarari cuejaya; Yusu jatu bijidama ecuita cuanara acara ayaque tunara tsujetyatsu jucha cuana apupashacara ayaque, tunara tuja ishú dujuya cuanaque, uu eiye cuanaja ami cuana, erami epahua cuanaque jadya. Pureamaturaya ama tunaja tuque, arepa cacuatsashati jadya huenetanahua ama bucha. ⁹ Tumbaedya “Riya ique jeya micue biji equé juishu, Tata”, jadyatu Jesúsra Yusu acuare. Riyara ecua cuan cuejaya. Iyacu ecua Yusu tuja inime equé anishacara aya, Jesús amerehua bucha; tura ecua cacuatsashati siri equé anishacarama aya ecuanaja baba

cuana juhua bucha. Yusuratu secahua icueneque inime, iyacuaque iyanuca ishú,¹⁰ Jesucristo Yusuja inime eque juhua tibu. Maju pidya camadyatu juhua, ni eje tupu majunuca ishú ama. Jadya tibudya tuque ecuanaja jucha cuana pana tillatana juhua.

¹¹ Dutya huecacatu israelita pae cuana neti bahue juya Yusu mere juyaque. Pahuaajeyadya jutidya tuna uu rami cuana. Jadya ama buchatu Yusura jucha cuana eje bucha apupashataquima baya tuna juya cuana eque.¹² Jesús bacue maju pidya camadya juhua, ni eje tupu maju nuca ishú ama. Jadya juatsutu tuque Yusu queja tsurahua. Tsurat-sutu anidiruhua tuja yacuaju tuatsehue enaruqui juishu.¹³ Tuhadyatu tuque ihuaihuaya, tuque ujeu baqui cuanaja casa pana secatana juya tupu.¹⁴ Maju pidya camadyatu tuque juhua ecuanaja jucha cuana tilla ishú. Maju pidya juatsu tujatu jucha metse ama amerehua Yusura amerecara aya bucha ameretahua cuanaque.¹⁵ Yusuja Espiritura ecuana tumebaedya yunerineyadya ecuanaja jucha cuana apupashatanahuaque Jesús majuhua eque, Yusuja quisaratiju jadya ehúene tibu:

¹⁶ “Riyaque tu inime iyacuaque era ecue cuana tsehue adadinucayaque.

Tunaja inime taca eque era cuatsashaya eque anicaraque tunaja tuque inimeju iyaya.

Era cuitadyatu jadya iyaya riyaque tuna ducuta jadya anicaraque.

Jida tuna adebamereya era amereyaque.

Era tunaja inimeju ehúeneu buchatu jubuque”, jadya patu Yusu jucuaque.

¹⁷ Jadya juatsutu juya:

“Ni eje tupu tuque tunaja jucha cuana adebanucaya ama, ni tuna jidama juhua cuanaque.

Pana etillatana tunajatu jubuque”.

¹⁸ Ecuanaja jucha cuana apupashatanahua tibusu iyenucataqui amadya uu cuana jucha cuana tsujetyaqui. Jesús majuhua jutu tupudya juhua tsujetyatilla ishú.

Bajida tsehue ama Yusu tsehue cuitadya quisaratitaquique

¹⁹ Riyaque micuana cuejaya, ecue eatsehuequi cuanaque. Aniya tuque ecuanaja aija eje bucha aquima Yusu tsehue quisarati ishúque, ecuanaja jucha cuana Jesúsja ami tsehue apupashatanahua tibu. Pae dyaque muidaque Dyaque Muidaju Yusu tsehue catsuruti ishú nubihua bucha, jadidya ecuana iyacua Yusu tsehue cuitadya quisaratitaqui.²⁰ Icuenetu eraca epenequira nubitaquima amerehua ecuana Dyaque Muidaju nubi ishú. Pae dyaque

muidaque cuita camadyatu tuhua nubitaqui juhua. Iy-
 acua bacue ecuana Yusu tsehue cuitadya quisaratitaqui.
 Jesús ecuana jiteque maju ishucatyatihua tibu, ni aira
 buchique ecuana quisaratitaquima amereya ama. Tura
 iyacuaque nubi ishucue pacashahuaque tu eje tupu teri-
 tananuca ishucue ama. ²¹ Jesús tu Yusuja yacuaju ecuana
 tachiquique; ecuanaja pae dyaque muidaque tume. Naru,
 cuatsasha jadya tujatu aya Yusuja cuanaque. ²² Jadya
 tibudya ecuana Yusu tsehue cuitadya quisaratitaqui muida
 tsehue. Ejene neri cuitadya tuque ecuana aya tura eje bucha
 aana ayaque adadiyaque. Pana ejenedya tuque ecuana
 aya Yusura ecuana jucha metse ama bayaque, dutya ecua-
 naja jucha cuana apupashatanahuaque. Ecuanaja ecuitatu
 ena pajada tsehue utsatanahua inime ecuana cacuaretihua
 jadique. Jadya tibudya bajida tsehue ama tuque ecuanaja
 isarataqui. ²³ “Ejene neridya tuque ecuana aya Yusu queja
 ecuana judirubucueque ni eje tupu jaca ishucue ama”, jadya
 ecuana cacuejatihua. Jadya tibudya jadya neejeneajera,
 ejenecarama tsehue ama. Yuneridya ecuana Yusura tu-
 aqueja judirushabuque, tura aana ahua baedya. ²⁴ Inime
 tupuqui tuque ecuanaja ataqui eje bucha tsahuae ecuana
 peya cuana eauque Yusuja biji eque ecana ani ishucue.
 Catsahuatitaqui ecuana peya cuana tsehue dyaque iyuhue ani
 ishucue. Yurameta catsahuati ecuana jutaqui peya cuanaja jida
 ishucue. ²⁵ Umae tuna canimehuallatihua Jesús queja ecatyati
 cuanaque casitativaju casitati ishucue ama. Ecuana ecuana
 tuna bae jutaqui ama; necasitatijacara ama tuque purea-
 matura ishucue. Yurameta cacasaturatijadya jutidya nejura
 peya cuana tsehue, Ecuana Cuatsashaquique junanuca ishucue
 tsunutaya ama tibu.

²⁶ Ejeque ni quisarati yunerique amena adebaya ama
 bucha cajuchaticaraquedya jutidya, cajuchatiajeya, tumer-
 atu Yusu queja judiru ishucue bijidamaduraya. Cristora
 peadya camadya ecuana jucha cuana esecau. Cristo ni
 tu bijidamadurahua, aijamatu peya tuque jiteque emaju-
 uque. ²⁷ Jesús jadya bijidamadurae juya cuanaque tuna
 bajida jutaqui eje bucha judadiya tsehue. Yusutu dyaque
 ecahuaiti jubucue tuna tsehue. Ijahuaaja etiquiju tujatu ecana
 nudyabuque, tura cuatsashaya eque ama juya cuanaque.
²⁸ Berutu jucua; ejeque ni Moisésra cuatsashaya eque ama
 juya iyetana bahue tuna jucua. Betara jadya ama juatsu
 quimishara ni baya jidama juyaju cueja bahue tunajatu
 huaraji cuana jucua. Jadya juyaque tunajatu nercabama
 iye abahue jucua. ²⁹ Jadya canerecatietu juhua Moisésja
 cacuatsashati bijidamadurahuque juhua cuanaque; ¡dyaque di

taa tu judadibuque Yusuja Ebacuaque bijidamaduraqui juya cuanaque! “Ecue Ebacuatú curusuju majuhua ami quijehuetitsu jucha cuana tsujetya, apupasha jadya aishu”, jadya patu Yusura quisarati acuare. Jadya ama bucha tuna “Ni aishu buchique tu jida ama Jesús curusuju ami quijehuetitsu majuhuaque”, jadya tuna juya. Icuenetu Yusu tuja Espíritu eque tuna tsehue juhua, tuja jidaque cabamereti. Jadya ama bucha tunajatu tumeque Espíritu ijillahuanaya. Tume cuanaque tuna dyáque nrecada jubuque. ³⁰ Bahuedya ecuana Yusura quisarati acuareque: “Ique dutya canerecatishaquique. Era micuana tsujetyabuque micuana jidama juhua eque”, jadyatu jucuare. Tumebaedya tujatu quisarati acuare: “Ecue cuanaque ni ecana era amereya eque ama juya, nrecaturanucabuque tuna era. Era amereya eque ni ecana juya, tuna nrecaturaqui cuanaque tuna nrecaturabuque”. ³¹ Cuatsashaya eque anicarama juya cuanaque tuna Yusu Maju Baecuara dyaque nrecaturayaju, dyaque bajida jubuque.

³² Neadebajacaume icuene micuanara yunerique ejenemetse aatsu micuana dyaque jida cabatihuaque. Arepa micuana Jesús queja catyatima cuanara jidama ahua ama bucha, canimehuallatihua ama micuana. Cacasatihua jutidya micuana tura cuatsashaya eque juaje ishu. ³³ Eje buchaju micuana ijillahuanatahua, jidama atahua dutyaja yatucaju. Jadya ama bucha micuana tuaqueja nimee jujacahua ama. Peya huecacatu micuanaja cuitadya peta bahue juhua Jesús queja nimee cuanaque nrecaturatayaju. Petatsu tuque micuanaja inime juhua, micuana cuitadya tuna tsehue nrecaturatanapee juya bucha. ³⁴ Bati bahue micuanaja juhua Jesús queja nimee cuanaque etare apuda ducu eisha cuanaque tuna tsahua ishu. Jesúsja ama cuanara micuanaja ai aniyaque chiriyaju, tuque micuana adebahua ni aija buchique micuanaja barepaju aniyaque tere baecuaque secataquimaque. Jadya tibudya tuque micuana iduhua dutya pureama jujacatsu ama. ³⁵ Jesús queja nimee nejujacaume. Yusura micuana tyabuque jidaque tilla tupu ama micuana Jesús queja nimee jujacahua ama tibu. ³⁶ Neiduajecuedya jutidya canerecatiyaque canimehuallatima Yusuja biji eque juishu. Tuja biji eque anitsu tuque micuana babuque tura jidaque tyaana ahuaque. ³⁷ Neadebacue Yusuja quisarati ehuenegue:

“Masadamatu junanucabuque junataquique.

Tsunutaya ama tuque.

³⁸ Era jida tuyu baya cuanaque tuna eatsehue anisiribuque.

Jadya ama bucha tuna ni eaqueja nimee jujacaya, ecue quisarati baca baecua aniya cuanaque bucha anie juishu, era tuna nerecaturadadiya”, jadya patu Yusura quisarati acuire.

³⁹ Amena ecuana bacue Jesús queja nimee jujacaya ama. Bajida cuanaque bucha ama ecuana ai muda baatsu yudijidya diru jadya ama. Ijahuaja etiquiju ecuana judirubuque ama. Jesús queja nimeeya jutidya ecuana juajeya. Yusu queja ecuana judirubuque.

11

Beru Yusu queja ecatyati jucuare cuanaque eje bucha jucuaque

¹ Jesús queja catyatitsu tuque ecuana pana ejenedya aya tura ecuana tyaana ahuaque tyadadiyaque. Tuaequeja nimee juatsu tuque ecuana inime juya: “Arepa iyacua ejitaju ama ama bucha Yusura tyaana ahuaque, pana ejenedya tuque aya Yusura tyadadibuqueque”. ² Yusu pureama jucuare ecuanaja baba cuana tsehue tura aana ahuaque yuneridya adadibuqueque ejeneya baatsu.

³ Yusu ejeneya tibu tuque ecuana yuneridya ejeneya tura iyahuaquedya dutya aniyaque. Arepa ai aijama juhua ama buchatu tura cuatsashayaju ejitaju juhua ejitajuque ama.

⁴ Abelratu pana ejenedya ahua Yusura tura aana ahuaque adadiyaque. Jadya tibudyatu Yusura bahua tura tyahuaque dyaque jida, Caínra tyahuaque bucha ama. “Mique mique tuyu baya, mique eaqueja catyatihua tibu. Mira ique tyahuaque tu dyaque jidaque”, jadya patu Yusura Abel acuire. Jadya eque, arepa Abel majuhua ama bucha, bahuedya ecuana Yusura tuaqueja ecatyati cuanaque tuaqueja judirushayaque.

⁵ Enocratu pana ejenedya ahua Yusura tura aana ahuaque adadiyaque. Ehuenedya tu Yusuja quisarati Enocra Yusu dyaque pureamaturacuareque. Jadya tibudyatu Yusura muya jutidya riyaque yahua juque barepaju iyasicuacuare majumaque. Banucacuare amatu ni ejera, Yusura barepaju dujucuare tibu. ⁶ Pana ejene ama ni ecuana aya Yusura aana ahuaque ayaque, eje bucha pureamaturae ni tuque ecuana Yusu ama. Yusu tsehue ni ecuana quisaraticara juya, ejenetaqui tuque ecuanaja tuque aniyaque. Tumebaedya tuque ecuana ejenetaqui tura tuja cuanaque naruyaque.

⁷ Noeratu pana ejenedya ahua Yusura quisarati iyahua equedya judadiyaque. “Ena eque tuque tillabuque riyaque yahuaju aniya cuanaque. Acue cuaba aridaque mique micue etareju cuanaque jadya ani ishú”, jadya patujatu acuire.

Ejenecarama ama tsehuetu tura cuatsashaya eque jucuaré, arepa tuja nei bama jucuaré ama bucha. Acuaretu cuaba ebari; tuequedya tuna chacha jucuaré tuque, tuja etareju cuanaque jadya. Yusu ejenecarama juhua cuanaque tuna tillatanacuare. Tuhuadyatu ejitaju juhua Noéra yunerique ejenehuaque, peya cuanara ejenehuaque ama. Tuaqueja catyatihuajutu Yusura Noé inajacamerehua.

⁸ Abrahamratu pana ejenedya ahua Yusura quisarati iyahua equedya judadiyaque. “Cuinanacue micue epu juque. Dirucue yahua era mique, mique eque juracanaya cuanaque jadya tyaana ayaju”, jadya patu Yusura acuare. Jadya ihuarae ahuaajutu Abraham yana equedya jucuaré. Cuinanacuaretu tuja epu juque, eju diruyaque baecuaque.

⁹ Yusura yahua tyaana ahuaaju judirutsutu anidirucuaré tarepe juneniya bucha. Aijama tujatu etare neri jucuaré. Etare caca peya queja iyasicua iyasicua ataquiju jutidyatu anianinicuaré. Tuja ebacuaque Isaac, tuja yutsecuaque Jacob jadya tatse tyatana anadya juhua tumeque yahua. Arepa tatse tuhua anicuare ama bucha tatse ama tatse emechiqui jucuaré. ¹⁰ Abrahamtu canimehuallatihua ama, Yusu queja ani ishucue neri aniyaque adebatsu. Bahuedyatu Yusuja eaju ebajejeju judiruyaque jucuaré, eaniqui tere baecuaju.

¹¹ Sararatu tumbaedyá pana ejene acuare Yusura eje bucha aana ahuaque adadiyaque. Saratu esiri juhua carecani isaqui judadi ishú. Jadya ama bucha tujatu ejenehua bacuaqui judadiyaque, Yusura jadyami judadiya jadya ahuaaju. Ejenehua tibusu carecani isaquidya judadihua. ¹² Jadya equetu Abrahamja anihua piyebatilla tupu ama tuque eque juracanahua cuanaque. Arepa tuque cabacuati ishú esiri juhua ama buchatu tuque eque ejuracana cuanaque dyaque jetiama juhua purari cuana bucha, mejiji tsucaca cuana bucha jadya.

¹³ Riya cuanaque tuna majuhua Yusu queja nimee jujacamaque —Abraham, Isaac, Jacob jadya. Yusura patuna acuare: “Riyaque yahuari micue jubucue”. Jadya ama buchatu tunajaque amadya jucuaré. “Ecuánaja utsecua cuánajatu jubucue”, jadya tunajatu inime jucuaré. Jadya tibu tuna canimehuallaticuaré ama. “Tarepe juyaque ecuaña. Peya yahuaju diruyaque cuetiyaque ecuaña”, jadya tuna jucuaré. ¹⁴ Jadicue inime tupuqui aatsu tunajatu Yusu queja eaniqui neriju inime jucuaré Canáñju ama. ¹⁵ Tunaratu bijiserihua ama tuna diruhuaque epuju judirunuca ishú. Tuna dirunucacaraque juatsu tuna masadamadya judirunucaquena juhua. ¹⁶ Dyaque jida tuna Yusu quejadya judirucara ebari juhua. Jadya tibudya tuna

Yusura bisu bahua ama. Tuna, “Miaqueja ecatyati ecuana”, jadya juyaju, bisuhua amatu tuque tuna, “Ecuique micuana”, jadya aishu. Tuja patu amena ebajejedya juhua emajaca tunaja ishu tuque peque.

17-18 Abrahamratu Yusu ni riya piji buchique ejenejac-ahua ama. “Abraham, Sara tsehue tuque metseja ebacua anibuque. Metse eque juracanayaque tu tuque; tuque eque cuita camadya juracanaya cuanaque tuna ejuracanaque neri babuque”, jadya patu Yusura quisarati acuare. Jadya ama bucha Isaac ehue ebarijutu acuare: “Iyetsu micue bacua; ecue yacuaju pahuacue”, jadya patu Yusura Abraham acuare, yuneridya tuque tuaqueja nimee juyaque nime adeba ishu. Abrahamja ebacuaque iyehuejeu cuitatu Yusura, “Iyeume”, jadya acuare. ¹⁹ Abrahamjatu inime juhua; “Isaac majuyaque juatsutu Yusura nityatsuranucaya” jadya. Jadya equetu tuja etareju chacha dujunucayaque juhua, emajuque enityatsuranucaque judiriqueraya bucha.

²⁰ Isaacratu pana ejenedya ahua Yusura tura aana ahuaque adadiyaque. Jadya tibudya tujatu, “Yusura narucue dyáque jida tsehue”, jadya acuare ebacuaque Jacob, arepa tuque tupujuque ama bucha. Tuequedya tujatu ebacuaque icueneque Esaú acuare: “Yusura jida tsehue narucue” jadya.

²¹ Jacobratu pana ejenedya ahua Yusura aana ahuaque adadiyaque. Jadya tibudya tujatu majuyaque ahua: “Yusura jida nenarucue”, jadya tujatu yutsecuaque ecatsé acuare, Joséja ebacuaque ecatsé. Majuyara tujatu Yusu muihua, tuja sariju quidutitsu.

²² Joseratu pana ejenedya ahua Yusura aana ahuaque adadiyaque. Tuque amena majuhue tujatu israelita cuana acuare: “Israel eque ejuracana cuanaquetu ejeque huecaca Egipto juque cuinanabuque. Rehuaque cuinanayaque ecue etsau cuana nedujucue yahua ecuana tyatanayaju papadiru ishu”, jadya patu jucuare.

²³ Moisésja etataque ecuaque ecatsératu pana ejenedya ahua Yusura aana ahuaque adadiyaque. Egipto juque ecuari aridaratu israelita cuana cuatsashacuare: “Deca nana cuinanaya baatsu israelita jabacua cuana yume iyetsadya neacue” jadya. Moisés cuinanahuajutu Moisésja etataque ecuaque ecatséra mubacuare ama ecuari. Tura amereya eque ama tatse jucuare. Quimisha badi tatsejatu ebacuaque tehuacuare eiyetanauju. Yusu pureamaturadadiquique adebaya tibu tatsejatu tehuacuare.

²⁴ Moisesratu tumbaedyá pana ejenedya ahua Yusura aana ahuaque adadiyaque. Amena ecuita juatsutu tuja ata israelita cuana tsehue cuitadya junenicara juhua, arepa

ecuarija ebacujunaquera temushahua ama bucha. “Egipto juque ecuarija ebacujunaqueja ebacuaque riya”, jadyatu atacarama juhua. ²⁵Tujatu inime juhua: “Egipcio cuana tsehue ni eaniu, ejetsunue ama tuna tsehue pureama jupee ejuu Yusuja biji eqe ama aniyaque. Dyaque jida Yusuja cuana tsehuedya pajuneni, arepa tuna tsehue nrecada jupee pajuneni ama bucha”. ²⁶Tujatu educuju inime juhua: “Ique taa jida ejuu dutya chipiru cuana Egipto juque metseque juatsu. Jadya ama bucha dyaque jida, pureama judadiya, Yusura amereya eqe juyaque juatsu, arepa Yusuja emepe cuana tsehue nrecada jutaqui ama bucha”. Tuquetu bahuedya jucuaire Yusura tuque dyaque jidaque tyadadibuqueque cuatsashaya eqe juyaque juatsu. Dyaque tujatu inime tupuqui ahua jidaque ihuayaque, tumeque ura canerecatiyaque ama.

²⁷Pana ejenedya Yusura eje bucha aana ahuaque adadiya tibutu Moisés Egipto juque cuinanahua. Arepa ecuari dyaque aridaque dyaque ecahuaiti tuatsehue juhua ama buchatu bajida tsehue ama cuinanahua. Arepa masada inime jidama anihua ama buchatu yudijidya dirunuca juhua ama, Yusu Ejitajuque Ama tuatsehueque adebaya tibu. ²⁸Tura Egipto juque cuinanama jarira, Yusu ejenehua tibu, tujatu chine ametse ahua Pascua bacani. “Yusuratu cuadishaya barepaju Yusu tsahuaquique bametseque ebacua cuana dutya etare juque iye ishü, ami tsehue eteriqui pepama juque. Jadya tibudya neiyera uhuisha. Tuja ami tsehue nepepara etareja eteriqui, ni ejeque buchique israelita maju ishü ama”, jadya tujatu cuejacuaire tuja ata cuana.

²⁹Israelita cuana Moisésra dujuya cuanaratu pana ejenedya acuare Yusura aana ahuaque adadiyaque. Egipto juque cuinanatsu, Bei Pudedaju tuna judiruhua jutu Yusura ena jaquecuare. Jaquehuaju tuna yahua urada eqe carequeticuare. Egiptoju cuanaque israelita cuana tupujudya carequetiyajutu ena tumutanacuare. Tumutanahuaju tuna dutya majuterecuare.

³⁰Josuéra dujuya patyatu israelita cuana tumebaedya Yusura aana ahuaque adadiyaque pana ejene acuare. Jericó epu ebariju cuita tuna jutitaqui ama cabaticuare, etachiquique baruda misida jadya tibu. Pacarucu tibarilla tunajatu huecacaju cama acuare. Pacarucu huecaca tunajatu tibarillati tibarillati acuare. Tuna jadya juyajutu Yusura epu tachiquique rihuishatillacuare. ³¹Rahab decadeca arida paju ama bucha, tujatu pana ejene ahua Yusura aana ahuaque adadiyaque. Israelita cuana Jericóju judiruma jariratu Josuéra cuadishacuare beta epu ebari petati ishü. Tumeque epunara tatse tsahuacuare. Yusu queja catyatihua tibutu

tuque majucuaire ama. Umae cuejahanataquima cuanaque israelita cuanara iyeyajutu tumeque epuna majucuaire ama.

³² Tumbaedyatu aniya peya cuana Yusura umada eje bucha aana ahuaque adadiyaque pana ejene juhua cuanaque. Aijamatu emajaca micuana dutya cuita adebatillamere ishucue. Adebayadya tuque micuana, Gedeón, Barac, Sansón, Jafté Yusu queja nimee juatsu eje bucha jucuaire cuanaque. Tumbaedyadya tuque micuana adebaya David, Samuel, peya cuana Yusu equeque quisarati cuejaqui jucuaire cuanaque Yusu ejenetsu eje bucha jucuaire cuanaque. ³³ Dyaque tuna ejenehua Yusura eje bucha aana ahuaque adadiyaque. Catitsu tuna tuna tsehue cahuaitiya cuanaque ijahue acuare. Eje buchadya dyaque jida narue acara tunajatu tunaja epuju cuanaque acuare. Tunaratu bahua Yusura tuna tyaana ahuaque. Cuanubi cuana dyaque mureda cuana tsehue catsurutiya cuanaju tuna Yusura tachihua tume cuanaque cuatsa tumutsu tunara ecana earauju. ³⁴ Yusratu ticuahua etiqui juju, tuna emajuju. Peya cuanara cuchiru ebari tsehue iyecara ayaju tuna huana bahue juhua. Casadama cabatijaju tuna Yusura casaturahua. Catitsu tunajatu ecana jetiama iye bahue juhua. Huanasha bahue tunaja juhua peya yahuaju cuanaque, tuna tsehue catira jehua cuanaque. ³⁵ Tunaja etata cuanaque Yusu queja nimee juhua tibu umaehua tunaja ebacua cuanaque tuna majutsu chacha aninucacuare.

Peya cuana bacue dyaque canerecatishatatsu majucuaire. Canerecatishayaque tunajatu ecana acuare: “Micuana Yusu queja nimee jujacayaju camadya micuana ecuanara inajacaya”, jadya tunajatu ecana acuare tuna ujeu baqui cuanara. Tunaratu tuna quemitsacuare: “Arepa micuanara ecuana iyeya ama bucha, Yusura cuatsashaya eque ecuana jujacanime ama”. Bahuedya tuna jucuaire Yusura chacha tuja yacuaju dyaque jida anishanucayaque. ³⁶ Peya cuanatu dyaque jidama ijillahuanatacuare Yusu queja catyatihua tibu. Umaetu catsacatsa atahua huaca biti huitu ai pajida eshura tsehue. Umaetu cadena tsehue risitanahua. Etare apudaju tuna ishatanahua. ³⁷ Umae Yusu queja nimee cuanaque tuna tumu tsehue iyetanahua. Umae tuna patya patsa atanahua. Umaetu cuchiru ebari tsehue iyetanahua. Umaetu tunaja epu juque ijehuetanahua. Peya queja peya queja jadya tuna junenihua. Uhuisha biti, cabra biti cuana tsehue camadya tuna ecadunuti juhua. Dyaque nrecada tuna junenihua. Yusuja cuanara ama tuna dyaque jidama acuare. ³⁸ Baya juneni tuna juhua dyaque japada emata cuana queja. Emata cani, yahua cani cuanaju tuna aninucacuare. Yusratu tumeque ecuita cuana dyaque inime metseque bahua, tuna ijehuequi cuanaque bucha ama.

³⁹ Yusutu tuna tsehue dyaque pureama juhua, tuna tu-
aqueja nimee baatsu. Jadya ama bucha tunajatu bahua
ama jari riyaque yahuaju aniyaque dutya jidaque tuna
Yusura tyaana ahuaque. ⁴⁰ Yusujatu inime juhua: “Tunaratu
babuque ama jari dutya jidaque era tyaana ahuaque, iy-
acuaque inime dyaque jida era iyaya tupu”. Tujatu bijida
juhua dutya tuja cuanaque Cristo eque tunaja jucha cuana
tillatana ishu, beru anicuare cuanaja jipidya ama, tume-
baedya ecuana iyacua aniya cuanaja ishu.

12

Jesús camadya inime tupuqui aishuque

¹ Beru yuequedya Yusura tyaana ahua cuanara Yusura
yuneridya tyadadiyaque pana ejene ahua cuanaque in-
ime tupuqui aatsu, ecuana iyacua cacasatiya Jesús queja
nimeedya jutidya juaje ishu. Tsajajaya buchique ecuana.
Ejeque tsajajayajatu jacataqui tuque tsajajayaju perequi eju-
uque. Jaca bahue tunajatu tuna chicashaqui ejuuque. Tuque
petaqui cuanara casaturayajutu tsajajaya icuene eju tuque
tsajajaya tupu judiru ishu. Tumebaedya tuque ecuanaja ja-
cataqui dutya eje buchara ecuana Jesús queja nimee eamere-
jacauque. Necajuchatijacara. Necacasatira Yusura amereya
eque juishu, Yusu queja judiru ishu. ² Peya ai inime tupuqui
ajacatsu, Jesús cuita camadya inime tupuqui neara, ejeque
tsajajayara eje tupu tuque tsajajaya tupu camadya inime
tupuqui aya bucha. Icuene ecuana Jesús queja catyatitsu
Yusu jaque jutibunehua. Tuaqueja nimeedya jutidya juajet-
suquetu ecuana Yusura amerecara aya eque judadi ishuque.
Arepa curusuju maju dyaque bisutada juhua ama bucha,
Jesústu jadya majue juhua, tuja Etataqueja biji eque juishu,
jadya juatsu dyaque pureama judadiyaque adebatsu. Iyacu-
atu Jesús aniya Etataque Yusu tsehue enaruqui.

³ Micuana amena canimehuallaticara cabatitsu, Jesúsra
cuatsashaya eque jucarama juya cabatitsu, inime netupu-
cue tura canimehuallatitsu ama jucha arida cuanara dutya
jidama ayaju iduhuaque. ⁴ Arepa tunara micuana ujeda
ujeda ahua ama bucha, Cristo canerecatihua bucha micuana
canerecatima jari. Tuque iyetahua bucha micuana iyetama
jari. ⁵ Yusura ecuana isaraya tuja quisarati eque etata-
quera ebacua cuanaque eisarau bucha. Enime aputa ni taa
micuana amena tura cuejahaque:

“Ebacua ecana, Micuana Cuatsashaquira eje bucha ani juishu
cuejayaju, bacacarama ama neacue, eje bucha tura
cuejayaque.

Tura bahuityayaque nereda ayaju, necanimehuallatiume.

⁶ Tura iyuhueda bayaque tura amereya eque juya amaju, Ecuana Cuatsashaquiratu nerecaturaya, tuna tuja biji eque cuita juishu.

Turatu tuja cuanaque nereda aya, bahuitya ishu”.

⁷ Canimehuallatima neiducue canerecatiyaque. Micuanaja Tata micuana iyuhueda baquira micuana nerecada amereya bahuityayaque tuja biji eque cuita anisha ishu. Yusura micuana jadya nerecaturae ayaju tuja ebacua cuanaque ebau bucha bae tura micuana aya. Dutyaja tuque ecuana ecuanaja ebacua neri nereda au, catsa jadya abahue, tunaja jida ishu. ⁸ Tura amereya eque ama juyajutu Yusura tuja cuanaque cuejamereya. Tuja biji eque cuita ani ishu tujatu ecan bahuityaya. Tura ni micuana bahuityaya ama, tuhuadyatu adebataqui micuana tujaque ama jadique; tume tura micuana amena baya amadya. ⁹ Ecuana nanada jariju, rehua riyaque yahuaju ecuana baqui cuanara ecuana catsa, nereda au, jadya ahua, ecuana jidama juyaju. Tunara ecuana catsahuaju ecuana yana equedya juhua. Jadya juhua tibu, jdyaque di taa ecuana ecuanaja Etata barepajura cuatsashaya eque jutaqui, tuatsehue ani ishu! ¹⁰ Eje uma mara ama ecuana nanada jariju, ecuana ecuana baqui cuanara jidama juyaju nereda au, catsa jadya acuare. Ecuana jida tuyu ama juyaju baatsu tunara ecuana nereda ahua. Yusura bacue ecuana nerecaturaya ecuanaja jida ishu, ecuana cajuchati-jaca ishu, ecuana tuque bae juishu. ¹¹ Ecuana jidama juhuaju nerecaturayaque ura ecuana jida ama cabatiya, peya inime. Jadya ama bucha ecuana Yusura bahuityacara ayaque bahue juatsu, ecuana jida inime, tsapema, tuyu jadya ecuana cabatiya.

Pereu tu Yusura cuatsashayaque bijidamadura ishu

¹² Tsajaja catuputiyaque casteretsu yudijidya cacasatinuca juatsu etsajajanucau bucha, jadidya micuana cacasatitaqui Jesúsra cuatsashaya eque juaje ishu. ¹³ Tupupe tupupe inime tsehue ama, tuyu piisi neanicue, Jesúsja quisarati adebaya ama jari cuanaja tuja inime pana adeba aishu, ruduruduque aquereniqui cuanara aiju chicama pana aquereni eau bucha.

¹⁴ Eje buchadya dutya tsehue jida anicara nejucue. Yusu pureamaturayaque anicara nejucue cajuchatimaque. Ecuana Cuatsashaquique ni ecuana pureamaturaya ama, tume tuque ecuana babuque ama. ¹⁵ Yusura ecuana jida tsehue bacara aya. Yurameta catsahuati nejucue ni ejeque buchique Jesús queja nimee jujaca ishu ama. Acuihuija venenuquiratu evenuneu peya acuihuija cuana. Tumbaedy a ejeque micuana Jesús queja nimee jujacahuaju, tumbaedy tujatu peya cuana tuaqueja nimee eamerejacau.

Jadya tibudya tura cuatsashaya eque anicarama ama jadya nejucue. ¹⁶ Yurameta catsahuati nejucue, ejera tuatsehue caquemitimaque ejabauju. Ni ejera buchara dyaque iyuhueda paba ama riyaque yahua juque, Yusu iyuhueda ebauque. Jadyatu Esaú jucuare Isaacja ebacuaque icueneque. Yusuratu dyaque jidaque tyaana acuare ebacuaque icueneque cuita. Jadya ama bucha aracaraque etareju juetitsutu Esaúra ejuque aeticuare: “Mira earaqui peja pidya tyahuaju mique etyau dutya jidaque ecue ishu ejudadiuque, ique icueneque ebacuaque juya tibu”. Jadidyatu jucuare. ¹⁷ Pana adebadya tuque micuana aya Esaú eje bucha jucuareque. Jutaquiju “Ique bametseque juya tibu, tyacue ique ecue ishuque”, jadya tujatu acuare etataque. Etataqueratu quemitsacuare: “Eje bucha tyataqui ama mique baya. Amena tuque ecue jau jaque”, jadyapa tujatu acuare. Arepa tuja paanacaca tsehue etataque bacayaque, canerecaticuare ama bucha, eje bucha cuarenuataqui amatu jucuare tura cuitadya cuarehuaque.

¹⁸ Yusura ecuanaja baba cuana tsehue inime iyahuaju tuna dyaque bajida jucuare. Emata Sinaí peque tuna jucuare. Petacuare tunajatu tumeque emata Yusu caadebamereticuareque. Pupipupiyaju tajita jadyara tibarillayaju tunajatu bacuare emata matina. Huani sehuedara dyaque huaniratu apuda dyaque amerecuare. Cuejipa dyaque casadaquetu jucuare. ¹⁹⁻²⁰ Corneta tsuri tunajatu bacacuare. Yusu quisaratiyaque tuna bacacuare. “Eje bucha bae ni micuanara ama. Ejeque ni riyaque emataju tsuracara juya, neiye-cue tumu tsehue. Ejeque paju ecuita, jadya ama juatsu uu pamaju”, jadya patuna Yusura cuatsashacuare. Jadya bacatsupa tuna tuaqueja canerecaticuare: “Ecuana tsehue cuita quisaratinucaume”, jadya tunajatu cuejacuare, idutaqui ama, bajida jadya juatsu. ²¹ Dyaque muda tunajatu bacuare. Jadya tibutu Moisés jadya jucuare: “Dyaque bajida juatsu ique tadadaya”.

²² Amena micuana bacue Yusura isarayaju bajida juya ama. Micuana micuana peya emata Sión bacaniju cajipetihua. Micuana micuana Yusu epu ebariju aniya juque, Jerusalén barepa juque bacani juque. Tuhuatu aniya piyebatilla tupu ama Yusu tsahuaqui cuanaque. ²³ Tuhuatu anidirubuque Yusuja cuanaque dutya. Tunaja ebacani cuanatu quiricaju ehue ne barepaju. Tuhua tu Yusu. Tura cuitadya ecuana cuejabuque peadya peadya eje bucha judadiyaque riyaque yahuaaju eje bucha juhua eque. Tuhuatu judirubuque Yusura jucha metse ama baya cuanaque, Yusura amerecara aya bucha cuita juajeya cuanaque.

24 Micuana micuana juetihua Jesús queja, Iyacuaque Inime Iyaqui queja. Tuquetu majuhua ami quijehuetitsu ecuanaja jucha cuana tsujetyatsu apupasha ishu. Yahua nanadajutu Caínra iyecuare Abel tuatsehuequique, ami quijehuetishatsu. Riyaquetu cuarehuanatacuare. Amena Cristo bacue majuhua ecuanaja jucha cuana etillatana juishu.

25 Jadya tibudya tuque ecuanaja Yusu bijidamadurataqui ama, tura ecuana quisarati cuejayaju. Yusura ecuanaja ebaba ecana tuna tura cuatsashaya eque ama aniyajutu ecana riyaque yahuaju jariju nerecaturacuare. ¡Dyaque jidama di taa tura ecuana nerecaturadadiya, tura barepa juque quisarati cuejayaju ecuana cuejaya eque ama aniyaju! 26 Yusu emata Sinaíju quisaratitsutu tuja etsurira yahua tadadashacuare. Iyacia tujatu jadya aana ahua: “Tadadashanucabuque tuque yahua. Tumbaedyu tuque barepa tadadashabuque”. 27 “Anucabuque tuque era”, jadya tujatu quisarati. Jutaqui ju tujatu cuarebuque tura bucucu aqui iyahuaque. Eje bucha cuaretaquimaque cuita camadyatu anisiribuque iyacia bucha. 28 Yusura eje tupu dutya naruhaju, tuque tuque ecuanaja ecuana naruquiquedyu jubuque. Cuaretanabuque ama tujatu casa. Jadya tibudya tuque ecuanaja ataqui: “Miquemi dyaque jidaque” jadya. Tuja biji eque ecuana anitaqui. Mui, muba jadya tuque ecuanaja ataqui. 29 Tuaequeja nimee cuita ecuana jutaqui. Etiquira pana murutasha eau bucha, jadya tujatu dutya pana tilla abuque tura yana amereya eque juya ama cuanaque.

13

Yusu eje bucha pureamatura amere ishuque

1 Yurameta iyuhuedae necabatijacaume peya cuana tsehue, micuana, micuana cama bucha juya tibu, Cristo queja micuana catyatihua tibu. 2 Jida nebatsacue ejeque micuanaja etareju junayaju. Meta tahui ishuque ecana netyacue, arepa ecana adebama cuanaque paju ama bucha. Umaeratu jadya batsae aatsu ejeque eju cuayaque buchadya jutidya bucha baatsu jida tsehue batsacuare; tume taa yuneri cuitadya barepa juque Yusu tsahuaqui cuanaque.

3 Netsahuacue Jesús queja ecatyati cuanaque etare apudaju netiya cuanaque. Nebacue ecana micuana cuitadya batacara ejuu bucha, micuana cuitadya tuhua ejuu bucha. Netsahuacue ijahue ijahue ataya cuanaque; micuana cuitadya jadya jidama ijahue ijahue eatau bucha ecana nebacue. 4 Dyaque emuiba jida jadya tu caquemiti. Ni

ejera buchara inime patupu ama tuja ecaquemitiquireque jaca ishu. Micuanaja ecaquemitiquireque cuita camadya nejaraquerecue, ecuitaju acara aatsu, ai peya tsehue ama. Yusuratu nerecaturabuque ejera caquemitiqeremaque jaraquereyaque. Turatu nerecaturabuque ecuita peyaja ehuanegue jabaquique. Tumbaedyu tujatu nerecaturabuque epuna peyaja yahuique queja cajabameretiyaque.

⁵ Micuana cachipiruti ishuque cuita camadya dyaque cuita inime tupuqui neaume. “Ni riya piji buchique mique aiju bajacaya ama. Jacanime ama mique ecue ni riya piji buchique”, jadyatu Yusu jucuaré. Jadya tibudya pureama nejucue micuanaja ai aniya tsehue. ⁶ Yusuja ecuana jacanime ama tibu ecuana inime tsapema jutaqui.

“Ecuana Cuatsashaquique tu ique tsahuaquique.

Jadya tibu ique bajidama.

Ni ejeque ecuitara ique eje bucha eau ama”,

jadya ecuanaja inime paju.

⁷ Neadebacue micuana Jesús queja nimee tura cuatsashaya eque ani ishu jadya tsahuaqui juhuaque. Tunara micuana Yusuja quisarati pana cueja ahua. Tuna tuna Jesúsra cuatsashaya eque juhua majuya tupu. Inime tupuqui ecana neacue. Jesús queja nimeedyu jutidya nejuajecue tuna juhua bucha.

⁸ Jesucristotu cacuaretiya ama. Tuque beru jucuaré bae cuitadyatu iyacua. Tudyu cuitadyatu juajeya jari. ⁹ Eje umara bapeque bahuityayaju nebacaume. Ediji baecuara peya queja peya queja jadya edujuu bucha nejuume. Aniyatu umae ai aratsu jadya ama juatsu arama aatsu ejepa Yusu pureamaturaya jadya juya cuanaque. Jadya ama tuque. Yusura cuitadya ecuana iyuhueda baya. Casaturaya tura ecuana tuque pureamatura ishu.

¹⁰ Uu cuana iye, Yusu tyau jadya juhua bucha, jadya iyetanaetu Jesucristo juhua ecuanaja jucha cuana tsujetyatsu apupasha ishu. Israelita pae cuanajatu ara bahue juhua ejaque tumeque uu cuana eiyeque Yusuja etareju. ¹¹ Jadya ama buchatu uu cuana Dyaque Muidaju ami tsehue sequi ishu iyetana bahue juhua cuanaque arata baecua juhua. Iye, ami quemi jadya aatsu tunajatu uu eiyeque epu juque duju bahue jucuaré jiji bucha ijehuetti ishu. Tuhua tunajatu pana pahua abahue juhua. Amitu pae dyaque muida cuanaja duju bahue jucuaré Yusuja etare Dyaque Muidaque bacaniju. ¹² Tumbaedyatu Jesús majuhua curusuju epu ti-pare, tuja ami quijehuetitsu, tuaqueja ecatyati cuanaja jucha cuana apupasha ishu. ¹³ Majucarama amatu juhua epu

tipare, arepa tuna dyaque jidama ijahue ijahue ahua ama bucha. Tumbaedyu ecuana iyacua tura cuatsashaya eque jucarama ama jutaqui, arepa ecuana peya cuanara jidama ijahue ijahue aya ama bucha. ¹⁴ Ecuana anisiri ishuque tu rehua riyaque yahuaju ama. Ecuana eaniqui neri tu yuqueja Yusu aniyaju. ¹⁵ Jesús eque ecuanaja jucha cuana tillatanahua tibu, tuque ecuana ajacaya ama Yusu: “Dyaque jida casada taa mique”. Uu cuana tyaatsu eque ama iyacua Yusu nepureamaturara. Jeru cuana eque nepureamaturara. Necuejajacara ama ecuana dutya jiteque dutya jidaque tura ahua cuanaque. ¹⁶ Iyuhue tsehue peya cuana tsehue necabatijacara ama. Nerecada cuana tsehue bapee neara ecuanaja ai aniyaque piji. Ecuana jadya juyaju baatsutu Yusu pureama juya.

¹⁷ Micuana Jesúsra amereya eque juishu tsahuaqui cuanara cuatsashaya eque nejudue. Jida inime tsehue neacue tunara cuejaya cuanaque. Yusuja yacuaju judirutsu tuna cacuejatidirubuque riyaque yahuaju tuna eje bucha meree juhuaque. Jadya tibudya tuna cacasatiya micuana tsahua ishu, micuana Jesús queja nimeedyu jutidya juaje ishu. Micuana ni tunara amereya eque juya, tumetu micuanaja jida ishudya judadiya. Tume tuna pureama tsehue mere juya. Micuana ni tunara amereya eque ama juya, tume micuana canerecatiya. Tuna bacue peya inime tsehue jutidya mere juya.

¹⁸ Yusu tsehue quisaratiyaque, ecuanaja ishu nebacabacue. Yusura cuatsashaya eque juhuaque tuque ecuana adebaya. Yusuja biji eque ecuana aniajecara juya. ¹⁹ Dyaque micuana queja canerecatiya ecue ishu nebacabacue, Yusuja ique ebajarara micuana queja cuanuca ishu emajaca tyaishu.

Amena ishuque quisarati

²⁰⁻²¹ Ecuana Cuatsashaquique Jesús tu dutya tuaqueja ecatyati cuanaque naruquique, uhuisha naruquira tuja uhuisha cuana enaruu buchique tume. Majuhuaquetu Yusura yudijidya nityatsuranuca acuare, tuque ecuana jiteque majuhua tibu, iyacua ecuana aniya Yusuja iyacuaque inime eque. Riyaque iyacuaque inimetu teredadibuque ama. Yusu tu Ecuana Inime Tsapema Anishaquique. Tura netyacue dutya jidaque tuja inime eque ani ishuque micuanara sareyaque. Turadya paa Jesucristo eque micuanaju tuja yacuaju tuja biji equeque. Ni eje tupu muijaca ishuque ama tu Cristo paamere. Jadidya paju.

²² Isarayaju pana baca neacue era huenehuaque, micuana ecue eatsehuequi cuanaque. Huenehua rique riyaque quirica micuana nereda bucha cuejae ayaque micuana Jesús queja nimee ejujacaju. Junudama ehue tibu, jida inime tsehue nebacacue. ²³ Era micuana bahue amerecara aya. Timoteo ecuana tsehuequiqueri etare apuda juque inajacatanachine. Tuque ni rehua ebajarara juetiya, dujuya tuque micuana queja cuayaque.

²⁴ Isaraya tuque ecuana Jesús queja dutya ecatyati cuanaque naruqui cuanaque, Yusuja cuanaque jadya. Italiaju aniya cuanara micuana isaramereya.

²⁵ Yusura jida tsehue nenarucue tuja quiyuhuebati tsehue. Jadidya paju.

Riya tupu camadya.

SANTIAGORA QUIRICA HUENECUAREQUE SANTIAGO

Riyaque quirica ri Santiagora huenecuareque, Jesús tsehuequirá. Santiagotu israelita cuana Jesús queja ecatyati cuanaque naruquique jucuare.

“Yusura cuatsashaya eque aniyaju ecuana yuneridya Jesús queja ecatyatique cabameretiya”, jadyatu jucuare. Jidamapa chipiruda cuanaque camadya jida bau, nrecada cuanaque bacue jidama. Jadya bae eauque patu dutya tupu iyuhuee bataqui, jadyatu jucuare. Huenecualetu ecuanara peya cuana ecuanaja quisarati tsehue jidama eauque.

Umae versículo cuana dyaque saretanayaque ri: 1.2-8, 12, 25; 2.10; 3.17; 4.7, 17; 5.16.

Jesús queja ecatyati cuanaque

Santiagora etsapetana cuanaque isaracuareque

¹ Era ríque micuanaja quirica cuadishaya. Ique Santiago. Yusu merequique ique, tumbaedyá Ecuana Cuatsashaqui Jesucristo. Micuana Yusuja cuanaque micuana isaraya, micuana Israel eque ejuracana cuanaque dutya queja etsapetana cuanaque.

Yusuja cuanara eje bucha idue jidamaque inime cuana eauque

² Jetiama inime jidama cuanaque masada cuanaque baatsu, pureama nejudue, Yusura micuana tura amerecara aya bae amereya cabatitsu, ecue eatsehuequi cuanaque.

³ Yusura micuana nime adebaya, Jesús queja nimeedya jutidya juaje ishú. Neadebacue riyaque. Inime jidama cuanaque juetiyaju tume micuana cabahuityatidyá eje bucha idue canimehuallatitsuque ama. ⁴ Neiducue eje bucha inime masada baatsu, Jesús queja nimee jujacama. Tume micuana Yusura amereya eque cuita camadya juya. Yusuja biji eque cuita micuana aniya. Aniyadya tuque micuanaja dutya ai sareyaque eje buchique inime idu ishúque.

⁵ Baecua ni micuana Yusuja biji eque cuita ani ishúque, “Tata, bahue amerecue jidaque, jidamaque jadique”, jadya nebacacue. Bahuedya tura micuana amereya. Arepa ecuanara bacanuca bacanuca aya ama bucha, tuquetu cahuaitya ama ecuanara jadya bacae ayaju. ⁶ Yusu tsehue quisaratiyaque ai bacatsu, pana ejenedya neacue bacahuaque tura tyayaque. Ejenecara aya ama bucha ejenecarama jadya neaume. Jadya juya cuanaque tuna inime tsape tsehuedya

jutidya, cueri cuanaja ecuaqueju enapacu bucha, cuejijira peya queja, peya queja jadya eamereu bucha. ⁷⁻⁸Yusu purea-matura ishucue tuna inime tupuqui aya; jadya juya ama bucha tuna riyaque yahua juque inime tupuqui aya. Iyacia ecana tuyu aniya, peya huecaca piji bacue jidama. Jadya anie juya cuanara inime patupu ama, ai bacahuaque Ecua Cuatsashaquira tyaya bucha.

Nerecadaque chipirudaque jadya Yusu jaque cabatitsu pureama jutaquique

⁹Yusuja cuanaque tuna pureama jutaqui. Nerecada cuanaque tuna pureama jutaqui, dutya aniya cabatitsu Yusuja tujá cuanaja ishucue aniyaque baatsu. Arepa riyaque yahua juque cuanara bijidamaduraya ama bucha, Yusura tuna muiya. ¹⁰Chipiruda cuanaque pureama paju Yusu jaque cabatitsu. Anisiribuque ama tuna riyaque yahua juque. Ejeque huecaca tuna riyaque yahua juque aputaterebuque, yachi shasha masadama aputatereya bucha. ¹¹Ijeti uqueratu shasha masadama manunushatsu rarashaya. Pacacaya; aputayadya tujatu jida pijique. Tumbaedyatu chipiruda cuanaque, arepa tuna dyaquedya jutidya ai sareajeya ama bucha, masadama tuna majudadiya. Chacha ecana, peya huecaca bacue emaju jadya.

Yusura ecua cajuchatishacarama ayaque

¹²Dyaque jida taa ecua ejuu, jidamaque inime cuanaju nubitsu, Jesús queja nimee jujacatsu ama, abacata idu aatsu. Tume cuanaque iduhua baatsu ecua Yusura muibuque, emuique ecua ejaqui picatsu ejutumereu bucha. Majunuca ishucue ama tura ecua tuatsehue iyabuque, tura dutya tuque iyuhueda baqui cuanaque ahua baedya. ¹³Ai jidamaque ni ecua acara ayaju cabatiya, paju ama ecuanaja inime: “Yusura ecua jidama amerecara aya” jadya. Yusuratu ni riya piji buchique jidamaque aya ama. Tura ecua ni riya piji buchique cajuchatishacara aya ama. ¹⁴Cajuchatitsu Yusura cajuchatishahua bucha ecuanaja inime paju ama. Ecuanaja inimedya ecua cajuchatiya. Ecuanajadyatu cajuchaticaraque inime juetiya. Huicamutya juyara jae tsetatsu eau bucha, jadidya ecua ecua tacadya jutidya ijahue catiya jidamaque aatsu. ¹⁵Icuene cuita ecua ecarecani juque cuinanaya; tueque ecua daneya; majudadi jadya ecua juya. Tumbaedyatu tuque ecua icuene cuita cajuchatibijiseriya; cajuchatidadiyadya ecua, amena Yusu jaca ishucue. Ecua inime cacuaretiaque ama juatsu tuque ecuanaja jipenime amadya.

¹⁶ Ijahue necatiume, ecue inime ama cajuchatihua jadya inime tuputsu. ¹⁷ Yusratu iyahua, ijeti, badi, purari jadya. Tume cuanaja huecatu cabapetiya. Eje bucha juatsu dyaque huecada, peya uraju bacue eaputsu jadyatu juya. Yusu bacue cacuaretiya ama ni riya piji buchique. Tudyatu dutya ai jida cuanaque cuinanashaquique. Tsujema neri tura ecuana tyaya dutya ai jidaque. Barepaju Aniyara ecuana jida tsehue bajacaya ama. ¹⁸ Tuja inime taca eque tura ecuana tujaque amereya, tuja quisarati yunerique ejenehuaju. Ecuandya ecuana icuene eiyacuaneque. Tumebaedyatu eje uma eiyacuane juajeya. Ecuana ecuana icuene tee juque ehuesa buchique.

Yusuja quisarati bacatsu ecuana tura amereya equedya jutaquique

¹⁹ Neadebacue riyaque, micuana ecue eatsehuequi cuanaque. Pana baca neacue peya cuana quisaratiyaju. Pana baca amaquedya jutidya quisarati, cahuaiti jadya nejuume. ²⁰ Cahuaitiya ni ecuana, Yusuja biji eque amadya ecuana juya. ²¹ Jutaquiju nejacacue asicada jidamaque eje bucha acaraque. Eje bucha eque bacarama ama jadya neaume Yusuja quisarati tura micuanaja inimeju iyahuaque. Tura nereda bucha cuejae ayaju necahuaitiume. Riyaque quisarati ejenehuaju tura micuana Ijahua quejaque inajacamerehua.

²² Yusura eje bucha amereyaque neara cuita. Tuja quisarati cuejatayaque bacaqui camadya ama nejura. Quisarati cuejayaju bacahua eque ama ni ecuana juya, ecuana tacadya jutidya ecuana jahue catiya, Yusu pureamaturaya bucha cabatitsu. ²³ Ejera Yusuja quisarati cuejayaque ijacabacayaque camadya, cuejaya eque jucarama juyaque: tu ecuita cuetiayaque espejoju capetatiya bucha. ²⁴ Pana capetatiyu juya. Cabatiyatu ebutsequini bujequique; jadya ama buchatu masadama nime aputaya. Tumebae cuitadyatu umaera Yusuja quisarati bacaya. Masadama tuna nime aputaya cuejayaju bacahuaque. Tume ecana juya amadya bacahua eque. ²⁵ Yusura ecuana amereyaquetu dyaque tuyuque. Tura cuatsashaya eque ecuana juya, peyara casada tsehue jadya amereyaju ama, ecuanaja inime taca equedya jutidya. Espejoju pana capetati juya bucha, ecuana juya nime aputaya ama eje bucha capetatihuaque. Cuejaya eque ni ecuana juajeyadya jutidya, nime aputama ecuanara bacahuaque, tume ecuana Yusura dyaque jida ameredadiya dutya ai ecuanara ayaju.

²⁶ Canarutitaqui ama ni ecuana quisarati cabatiya, quisarati ataquique ama ni ecuana quisarati aya, yanacanadya

ecuana Cristo jaque jadya catiya. Ijahue ecuana catiya, “Cristo queja ecatyatique ique” jadya juyaque. ²⁷ Yusu tu ecuanaja Etata. Tura ecuana bahuityaya eje bucha anie jutaquique. Quiyuhuebatitaqui ecuana etatamaju cuana tsehue, tunaja ai aijamaque tyau jadya, tumbaedy aahuemaju nercada cuanaque. Ataqui ama tuque ecuanaja jidamaque Yusuja cuanara ama ayaque, ni apidya. Yusu cuita camadya tuque ecuanaja pureamaturataqui, tuja ecuana tuyu baishu.

2

Nercada cuanaque ecuanaja bijidamadurataquique ama

¹ Peya micuana cuejaya, ecue eatsehuequi cuanaque. Dutyadya jutidya dutya tupu bau neacue, chipirudaque, nercadaque jadique. Ecuana Cuatsashaquique tu jida, casada jadya. Tuaquejadya micuana catyatihua.

² Ejutiu ejeque micuana Cristo mui ish u ecasitatitaju. Umae cuana bacue chipirudaque ejuu. Ejutuqui jida piji tsehue ecajututique, metara tsuje aridaque jutu jadya. Peya cuana bacue nercada cuanaque ejuu, ejutuqui siri tsehuedya jutidya ecajututique. ³ Chipiruda cuanaque camadya ni micuana jida ebatsau, nercada cuanaque jida batsayaque ama. Jadya ni tuque micuana chipiruda cuanaque eatsau: “Rehua neanibutecue eaniqui dyaque jidaju”. Nercada cuanaque ni micuana eau: “Tuhuadya etibene queja neanibutecue”, jadya ama juatsu “Tuhuadya yahuaju neanibutecue” jadya. ⁴ Jadya ayaque juatsu tuque micuana dutya tupu bau ama aya micuana tsehuequi cuanaque. Tuyu ama micuana juya. Micuanaratu inime tupuya peadya ecuita petatsu peya dyaque jida bucha tunaja ejutuquiju petatsudya jutidya.

⁵ Pana baca neacue, ecue eatsehuequi iyuhueda cuanaque. Dutya jujeri Yusura tuja ish u ihuarahua cuanaque tuna nercada. Tura tuna mepehua jetiama tuaqueja catyatisha ish u. Tura tuna mepehua dutya tura jidaque tyayaque inatsa ish u, tuque iyuhueda baqui cuanaque tyaana ahuaque. Tunadya tuna tuaqueja jubuque tuque dutya naruqui juhuaju. ⁶ Arepa nercada cuanaque Yusuja emepeque baya ama bucha tuque micuana ecana bijidamaduraya. ¿Eje bucha juatsu jatsu tuque micuana ecana jadya bae aya? Chipiruda cuanara, nercada cuanara ama micuana jahue jahue aya. Chipiruda cuanara micuana huaraji cuanaja yacuaju repeajetsu jidama amereya. ⁷ Ecuana ecuana “Cristiano” bacani, “Cristoja cuanaque” jadique. Ecuonaratu tuque muiya. Eje uma chipirudaque bacue tuja ish u jidama quisaratiya. Ijil-lahuanaya tunara.

⁸ Ecuanaja Huaraji Dyaque Aridara cuatsashayaque tuque micuanaja ataqui: “Iyuhueda nebacue peya cuana; micuana iyuhueda cabatiya bucha, iyuhuee ecana nebacue”. Riyaque cacuatsashati dyaque saretanayaquetu ehue ne Yusuja quisaratiju. Riyaque cacuatsashati eque ni micuana aniya, jidadya tuque micuana aya. ⁹ Chipiruda baatsu camadya ni micuana umae muiya, peya cuana ni micuana nerecada baatsu bijidamaduraya, tume taa micuana Yusura cuatsashahua eque ama aniya. Cajuchatiya di taa micuana; Yusura micuana jucha metse baya. ¹⁰ Moisés equetu ecuanaja baba cuana Yusura jetiama cacuatsashati cuana cuejacuare. Peadya ni ecuana Yusuja cacuatsashati aya ama, jucha metse tura ecuana baya, arepa ecuana dutya peya cacuatsashati cuana eque aniya ama bucha. ¹¹ Yusuja cacuatsashati: “Jaraquereume micue caquemitiqueremaque”. Tuja cacuatsashati nucadya: “Quiyeti puji juume”. Ejera ni peya iyeya, cajuchatiyadya tuque. Yusratu juchaqui baya, arepa tuja caquemitiqueremaque jaraquerema ama bucha. ¹² Ejeque huecaca ecuana Yusura abuque ecuanara Cristora cuatsashaya eque anihuaque, anihuaque ama eje buchique. Jadya tibudya tuque ecuanaja quisarati ataqui tuja biji eque. Tuja biji equeque tuque ecuanaja ataqui. Jadya anie ecuana jutaqui, Yusura ecajuchati ebau tibu. ¹³ Peya cuana tsehue ni ecuanaja canerecabati aijama juya, Yusujatu ecuana tsehue aijamadya canerecabati juya. Peya cuana tsehue ni ecuanaja quiyuhuebati aniya, Yusujatu quiyuhuebati aniyadya ecuana tsehue. Pana ejenedya tuque ecuana ataqui tura nerecaturadadiyaque ama.

Jesús queja catyati neri ejuque tu ejitaju tura cuatsashaya eque aniyaque

¹⁴ Aya ecuana quisarati: “Cristo queja ique ecatyati”. Riyaque tu aishu buchique jidaque ama, tura amereya eque aniyaque ama. Tura amereya eque anitsu camadya ecuana cabameretiya yuneridya ecuana tuaqueja ecatyatique. Jidaque ni ecuana aya ama, tuhuadya ecuana ejitaju tuaqueja catyati nerimaque. Tume ecuana Yusura tuaqueja judirushabuque ama. ¹⁵⁻¹⁶ Ita taa ecuana peque Cristo queja ecatyatique eaniu, epuna, jadya ama juatsu deca nerecadaque. Ara ishunque tunaja tupu ama eaniu, tumbaedy jutu ishunque. Ecuana jadya tuna tyataqui tunaja ai aijamaque. Ita taa ecuanaja eaniu ejutuqui, earaqui jadya tuna tyaishunque. Jadya camadya ni ecuana ecana eau: “Jidama inime nebaume. Pabacabaca Yusu queja netyacuetu ai ara ishunque, jutu ishunque” jadya, ai tyamaque, tume tuque ecuanaja quisarati aishunque ama. Yusura ecuana

tyahuadya amena earaqui, jutu ishuque jadya tuna tyaishu. ¹⁷ Peya cuana ni ecuana tsahuaya ama, tuhuadya ecuana ejitaju Jesús queja catyati nerimaque. Emajuratu amena peya tsahuaya ama, tumebae cuitadya tuque, yuneri ama ni ecuana Jesús queja catyatihua, tsahuaya amadya tuque ecuana peya.

¹⁸ Ejeque cuana ni tuna juya: “Umaetu Yusu queja judirubuque, Jesús queja catyatihua tibu. Peya cuana bacue, arepa Jesús queja catyatima ama bucha, Yusu queja judirubuque, tunara jida tsehue peya cuana baya tibu”, jadya ni tu umae juya cuji cuita juatsu. Quemitsaya micuana era: “Peya cuana jida tsehue ama bayaque ni ecuana eje bucha cabameretie juma yuneridya Jesús queja catyatihuaque. Peya cuana jida tsehue bau eque cuita camadya ecuana peya cuana queja ecaadebameretiu Jesús queja ecatyatique”, jadya micuana era cuejaya. ¹⁹ Micuanaratu ejeneya Yusu aniyaque, tuque peadya camadya Yusuque. Micuanaja quejeneti ri jida, tuyuque. Jadya ama bucha peya cuana ni micuana jida tsehue ama baya, jahua cuana dyaque jida ama micuana. Butsee tunara dyaditu ejeneyadya peadya Yusu aniyaque. Pana ejene tuque aniyaque aatsu ecana dyaque bajida juya tuatsehue. ²⁰ Micuana micuana inimema, peya cuana jida tsehue ama bataquique ejeneajeya tibu. Jutaquiiju taa micuana yanacanadya Jesús queja catyatihua, ai micuana tura amerecara aya eque juya batudya. ²¹ Adebamereya micuana ecuanaja baba Abraham, micuanaja pana adeba aishu. Tuque eje bucha juhuaque baatsutu Yusura tuyu bahua. Abraham Yusura amerehua eque juhujaju, tura tuja ebacuaque Isaac tumu mesa ea dyaque Yusu tyaishu huanahuajutu Yusura acuare: “Cabameretihuami yuneridya eaqueja catyatihuaque”. ²² Tuquetu Yusura amereya eque juhua, tuque tuaqueja catyatihua tibu. Dyaquedya jutidyatu Yusu ejeneajehua, Yusura amereyaque tura dutya acara ahua tibu. ²³ Yusuja quisarati tu ehue: “Abrahamtu Yusu queja catyaticuare. Jadya tibudyatu Yusura jucha metse ama bacuare”. Abrahamtu “Yusuja iyuhuedaque” bacani jucuar.

²⁴ Jesús queja catyatitsu, ayadya tuque ecuana tura cuatsashayaque. Tume tura ecuana jucha metse ama baya. Tura cuatsashaya eque ni ecuana aniya ama, tume ecuana yuneridya tuaqueja catyatima. ²⁵ Rahab decadeca aridaquetu cabamereticuare tuque eje bucha juhua equedya Yusu queja catyatihuaque. Yusura tuja quisarati ama ama ayaque ejenetsu tujatu tsahuacuare beta israelita ecatsé yahua petara cuahuaque ecatsé. Tehuacuaretu ecatsé tuja etareju. Tuequedyatu ecatsé cuinanashacuare epu ebari tachiqui

dyaque eque. Jadya juhuajutu tumeque epuna Yusura jucha metse ama bacuare, tuque eje bucha juya eque tuque tu-
aqueja nimeeque cabameretiya tibu. ²⁶ Yatanana ni ecuanaja
aijama, tume tuque ecuanaja ecuita ni aishu buchique jida
ama. Emajudya ecuanaja. Tumbaedy tuque, Yusuja biji eque
ama ni ecuanaja aniya, tume tu aishu buchique jida amadya
“Jesús queja ique catyatihua”, jadya ecuanaja juishu. Yusura
ecuanaja emaju bucha baya.

3

*Yusu pureamatura ishu ecuanaja adebatsu quisarati
ataquique*

¹ Peya micuana cuejaya, ecue eatsehuequi cuanaque.
Yusuja quisarati bahuityaqui juishu nebijiseriume. Neade-
bacue Yusura tuja quisarati jidama, tuyu ama bahuityaya
cuanaque dyaque nerecaturadadiyaque. ² Dutya ecuanaja
cuji aqui cama. Jadya ama bucha, cahuaitishaya ama
ni ecuanaja ecuanaja quisarati tsehue, tume ecuanaja tura
amerecara aya baedy juya. Ecuanaja taca canarutitaqui ni
ecuanaja cabatiya jidama equisaratiuju, tumbaedy ecuanaja
ecanarutiu peya jidama cuanaque aishu ama. ³ Ita taa
neadabacue. Cahuayu ecuanaja freno ecarumereu ecuat-
saju. Tumetu cahuayu cuaya eje eque ecuanaja djujucara
aya equedy. Jadya aquerenie tuque ecuanaja eau tumeque
uu isaani ishique, casadaque shuma ama ebarique ama,
freno eje ari tsehue ama. ⁴ Tumbaedyatu cuaba dyaque
aridaque; eje ari tsehue amatu tuque tibu inaquira djujuya.
Cuejiji casadara itushaya. Jadya ama buchatu tuque tibu
inaquira eje ari tsehue ama tibu inaya, tura eju djujucara
ayaju duju ishu. ⁵ Tumbaedy tuque ecuanaja yana, ecua-
naja ecuitaju eje arique ama. Jadya ama bucha tura ecuanaja
dyaque jidama eau ecuanaja jidama quisarati tsumeyaju.
Riya piji etiqui tasasayara etijaqui maretsutu yachi ari-
daque etirutereu. Shumaumaque ama, equiquetu eje ari
etiquira ama eyuamaturau. ⁶ Jadya eque tuque ecuanaja ecua-
naja yana eje ari tsehue ama dyaque jidama eyuamaturau
ai. Etiqui bucha mudaque tume. Dutya jidamaque tuque
ecuanaja quisarati aya, Yusu dutyaju cahuaitisha ishique.
Tee tuchatsu ecuanaja dutya acui cuana easicaturau bucha,
tumbaedy cuitadya tuque ecuanaja asicaturaya dutya ecuanaja
educu juque inime, dutya inime tupu cuana jadya jidamaque
quisarati aatsu. Ecuanaja nanada equeque, esiri judadiya
tupu ecuanaja ecuanadya jutidya ujeda catiya ecuanaja jidama
quisaratiya tsehue. ⁷ Dutya cuanubi muda cuanaque tuque
ecuanaja euuneu, dutya upati cuana jadya. Dutya mapisi

bacua cuana tuque ecuana euuneu. Enaju dutya aniya cuanaque tuque ecuana inatsu euuneu. Dutya riya eiya cuanaquetu ecuitara uuneya. ⁸ Ecuanaja quisarati bacue ecuana eje bucha canarutitaqui ama cabatiya, jidamaque asicadaque quisarati eauju. Asicadaque quisarati ecuana ajacataqui ama baya, arepa ecuana jadya asicada jidama quisarati acarama aya ama bucha. Ecuanaja jidamaque quisarati tu bacujaja cati uje buchique. ⁹ Ecuanaja yana tsehue ecuana pureama aya ecuanaja Etata Yusu. Tumeque yana tsehuedya ecuana jidamaque quisarati aya peya cuanaja ishu. Yusuja ishu jidama quisarati eau bucha cuitadya tuque turadya ecuana tuque bae cuita iyahuaque tibu. ¹⁰ Ecuanaja ecuatsa equedyatu cuinanaya quisarati sumi ishuque, yuamatura ishuque jadya. Jadyatu jutaqui ama, ecue eatsehuequi cuanaque. ¹¹ Peadya ena cani juquetu ena ecuinanau ama ijitaquique, ijitaquimaque jadique. ¹² Tumbaedyatu narasaju jipamu juya ama, mangoju bacue cashi. Jadidyatu ena ijitaquimaque, ena ijitaqui tsehue cuinanaya ama jadique ena peadya cani juque. Ecuanaja ecuatsa juque quisarati jidamaque pacuinana amadya. Riyaque tu jidama, ecue eatsehuequi cuanaque.

Yusuja biji eque anitsu ecuana ejitaju cabameretiya ecuana Yusujaque

¹³ Jida neanicue, micuana ecue eatsehuequi cuanaque. Yusuja biji eque neanicue. Jida tsehue nebacue peya cuana. Micuana taca casumiti nejuume. Jadya anie juyaju micuana peya cuanara adebaya bahueque dutya inime adebayaque. ¹⁴ Micuanara inime tupuyaque ni micuana eje buchadya cuejacara ebari aya, peya quisaratiyaju baca jida amaque, cajishati arida ni micuana, peya ni micuana cahuaishaya, tume taa tuque micuana pana adeba ama aya Yusuja quisarati yunerique. Necasumitiume “Dyaque bahue ique” jadya, ai micuana jadique batu. Dyaque bahue ni micuana cabatiya, pusha pusha micuana juya. ¹⁵ Dyaque bahue cabatiya cuanaja inime tupu tu Yusujaque ama; riyaque yahua juquedyu jutidya tume. Tuna bahueque tu Yusuja Espiritu jaque ama, Ijahua jaque jutidya. ¹⁶ Ecuana Yusuja cuanaque ni ecuana cajishati arida, ecuanaja jida ishu camadya ni ecuana aya, tumetu ni ai buchique jida juya ama. Dutya ai jidamaquedyu jutidyatu juajeya. ¹⁷ Yusura bahuityaya eque ni ecuana juya, jidama asicadaque tuque ecuana aya ama. Nime jidama ecuana juya ama. Ecuana Yusu adeba tsahuaqui cuanara cuatsashaya eque ecuana juya. Quiyuhuebati aqui ecuana juya peya cuana tsehue. Jida tsehue ecuana baya peya cuana. Masadama inime

cuarequi ecuana juya ama. Riyaque huecaca peadya inime tupu tsehue, peya huecaca bape jadya ecuana juya ama. Jidadya cabaticara ecuana juya, peya cuana ecujishau tibu, yuneri cuitadya ecuana jadya anie jucara juya tibu. Jadya anie ecuana ejuu Yusu equeque cabahuityatiyaque juatsu. ¹⁸ Ecahuaiti cuanaque jida quisaratishacara aya cuanaque tuna jida tuyu aniya. Jadya eque tunajatu peya cuana tumbaedy a inime tsapema anishaya. Huesadadi ishu ecuana ai uhuaya; jadidya ecuana anitaqui ejeque cahuitisha ishu ama dutya tupu nimee peya cuana tsehue.

4

Yusu pureamatura, riyaque yahuaju cuanaque pureamatura jadya jutaquique ama

¹ Educuju tuque micuanaja aniya micuana cuita camadya capureamaturaticaraque. Jadya tibudya micuana dutya tupu nimee ama aniya, arepa Yusu jaque ama bucha. Catiya, cati cati jadya micuana juya. ² Jetiama tuque micuanaja ai anicara juya. Ai bijida bayaque daditaquima baatsu micuana peya cuana iyecara aya, tunaja ai aniyaque seca ishu. Micuanaratu jishaya peya cuana ai qui baatsu. Datse dadicara aatsu tuque micuana peya cuana catiqueraya. Aijama tuque micuanaja ai micuanara bijida bayaque, Yusu bacaya ama tibu. ³ Yusura micuana ai bacayaju tyaya ama, jida inime tsehue ama bacaya tibu. Micuana cuita camadya capureamaturati ishu tuque micuana bijida baya. ⁴ Riyaque yahuaju cuanaque camadya ni ecuana pureamaturacara aya, tume tuque ecuana Yusu cahuitishaya. Yusu pureamaturaya ama bucha riyaque yahuaju cuanaque pureamatura jadyatu jutaqui ama ni riya piji buchique. Riyaque yahua juque ai ni ecuana iyuhueda baya, tume tuque ecuana yuneridya Yusu iyuhuedama baya. ⁵ Yanacana amari riyaque Yusuja quisarati huenetanahua: “Yusuratu tuja Espiritu ecuana tsehue anishahua. Tuquetu ecuana queja iyuhueda cabamereticara juya, ni peya ai ecuana iyuhueda baya bucha ama. ⁶ Yusu tu dyaque jida ecuana tsehue; jida tura ecuana naruya. Ehuene tu Yusuja quisarati: “Yusu tu ecahuaiti dyaque inimequi cabatiya cuana tsehue. Yusuja tsahuataquique caadebatiya cuanaque bacuetu ecana jida tsehue baya”.

⁷ Jutaquijudya Yusura amereya eque nejudue. Ijahuara cajuchatishacara ayaju, nebacaume ni riya piji buchique. Micuanara bacacarama ayajutu tuque huanaya. ⁸ Yusu tsehue quisarati, tuque inime tupuqui jadya nejudacaume. Jadya ni micuana juya, tumetu tuque micuana tsehuedya. Jucha arida cuanaque, jidamaque neajacacue, Yusuja biji

eqe cuita ani ishu. Jidamaque inime tupuqui neajacacue. Yusu iyuhueda baya ama bucha, riyaque yahua juque dyadi iyuhueda bau jadya nejuume. ⁹ Yusu cahuaishatsu, necapeya inimetice. Pau, aishu piji cajuchatihua jadya nejucue cajuchatitsu. Etsauque, nepacue jutidya micuana jidama juhuaque caadebatitsu. ¹⁰ Necuejacue Ecuana Cuat-sashaquique tuja biji eqe juishuque casadamaque. Tura micuana tsahuaya.

Jesúsja cuanaque peya cuanaja ishu jidama quisarati-taquiique ama

¹¹ Necatacuaritime, micuana ecue eatsehuequi cuanaque. Yusura ecuana “Peyaja ishu jidama nequisaratime” jadya cuatsashahua. Jutaquiiju peyaja ishu ni micuana jidama quisaratiya, tume taa tu “Yusuja cacuatsashati jida ama. Ni aishu buchique tu jida ama”, jadidya micuana juya. Jadya ni micuana juya, tume taa micuana Yusuja cacuatsashati eqe ama aniya. Tume micuana jidama jutidya tumeque cacuatsashatija ishu quisaratiya. ¹² Yusura peadya camadya ecuana cuejaya eje bucha anie jutaquiique. Tuja cuita camadyatu casa aniya ecuana tuaqueja judirusha ishuque. Tura peadyatu cuejataquima cuanaque ijahuaja etiquiju ecuadishau. Jutaquiiju yurameta catacuariti nejuume. Yusu peadya camadyatu bahue ejeque jucha metseque, ejeque bacue jucha metse ama jadique. Micuanajatu aijama ni ejeque buchique jucha metse jadya aishu.

Ni ejequetu bahue metajudya eje bucha juyaque

¹³ Pana baca neacue. Umaeja tuque micuanaja inime juya pana bahue eje bucha judadiyaque bucha. “Iyacia, jadya ama juatsu metajudya necuara epuju. Peadya mara neanidirura. Catyati, quemí quemí jadya nejudirura, jetiama chipiru ina ishu” jadya. ¹⁴ Ecuana ecuana baecua metajudya eje bucha ejuuque, jida, jadya ama juatsu jidama. Baecua ecuana eje tupu majuyaque. Sise huani masadama aputaya bucha, jadidya ecuana masadama majudadibuque. ¹⁵ Jadya tibudya tuque ecuanaja quisarati jutaqui: “Ecuana Cuat-sashaquija jadya inime juyaque juatsu camadya metajudya chacha juya. Tuja jadya inime juyaque juatsu camadya ecuanara inime pirehua eqe paju”, jadya ecuanaja quisarati paju. ¹⁶ Jadya ama buchatu micuanaja inime juya, dutya micuanara inime pirehua eqe eje bucha judadiyaque. Casumitiya micuana ai ayaque. Jadique tu Yusuja bijidama.

¹⁷ Aya ama ni ecuana Yusuja inime eqe jutaquiique bahueque, tume ecuana cajuchatiya.

5

Chipiruda cuanaque cueja ishucue

¹ Pana baca neacue riyaque quisarati, chipiruda cuanaque. Micuana nrecada cuanaque nrecaturaqui cuanaque, pana baca neacue. Paya, peya inime jadya nejucue, dyaque canerecatidadiyaque caadebatitsu. ² Jetiama micuanaja ishucuita camadya pana iya eaquetu ririya. Ai bia cuanara tuque micuanaja ejutuqui jida piji cuanaque yuamaturaya. ³ Dutya chipiru tuque micuanaja ejitsutere, oro amena murutaajeya. Chipiru ejitsuque baatsutu peya cuanara adebaya micuanaja ishucuita camadya chipiru quiyatihuaque, nrecada cuanaque tsahua ishucuita etsumeuque. Etiquiju rihuitsu ecayumatiu bucha, jadidya micuana cayumati-buque. Radanityaajeyadya jutidya micuana chipiru micuanaja ishucuita camadya. Jadya ama bucha amena huecaca japadama juetibeya micuanaja aniya tsehue pureama juishuque masadama tereyaque. ⁴ Micuanaratu micuanaja teeju earaqui huesa juya cuanaque ijahue ahua. Jidama tuque micuana ecana mere huecaca tsujetyahua. Yusuratu adebaya micuanara tuna etsujetyauque micuanaja ishucuita camadya iyahuaque. Turatu bacaya micuana queja catsahuamereticara juatsu tunara quisarati ayaque. Yusu Dutya Casa Tsehueratu bacaya tunaja quisarati micuana queja tuna catsahuamereti ishucuita bacayaque. ⁵ Rehua riyaque yahuaju tuque micuanaja aniya dutya capureamaturati ishucuita. Pureama micuana, dutya pureama juishuque micuanaja aniya tibu. Earaque dyaque jida uuda cuana tsehue micuana pana jeque juya. Uu iye ishucuita tsericuinashaya buchique micuana. Ejeque huecaca micuana Yusura dyaque nrecaturabuque. ⁶ Micuanaratu huaraji cuana queja jidama cuejahua eje bucha juma cuanaque. Iyemerehua tuque micuana ecana. Tunaratu iduhua dutya micuanara jidama aya cuanaque cacuarehuanatitsu ama.

Jesús junanucaya tupu tuaqueja nimee jujacataquique ama

⁷ Necanimehuallatiume, Ecuana Cuatsashaquique junanucayaque ihuayaque, micuana ecue eatsehuequi cuanaque. Tee mere juyara tee uhuatsu eihuau bucha ihuae neacue. Trigo uhuatsu tujatu inime tsapema ihuaya nei jumetse juyaque, judadiyaque jadya. Canimehuallatitsu ama tujatu ihuaya, ejeque huecaca trigo jahuaneyaque adebaya tibu. ⁸ Tumbaedy a inime tsapema neihuacue Ecuana Cuatsashaquique. Necanimehuallatiume. Masadamatu junanucaya.

⁹ Nequisaratiume jidama peya cuana Jesús queja ecatyati cuanaja ishucuita, ecue eatsehuequi cuanaque. Tunaja ishucuita

ni micuana quisaratiyadya jutidya, Yusura micuana jucha metse baya. Amenatu junahuie ecuana jucha metse, jucha metse ama jadya aquique. ¹⁰ Canimehuallatima neiducue canerecatiyaque, ecue eatsehuequi cuanaque. Beru yuequedya Yusuja quisarati cuejaqui cuanara iducua bucha idue neacue. Arepa ecana Yusuja quisarati cuejayaju dyaque jidama atahua ama bucha, Yusu queja nimee tuna jujacahua ama. ¹¹ Ecuana ecuana bahue Yusura dyaque jida adadibuque abacata tsehue canerecatiyaque iduqui juya cuanaque. Neadebacue Job jucuaque. Turatu dyaque canerecatiyaque abacata idu acuare Yusu queja nimee jujacatsu ama. Jadya juhuajutu Yusura dyaque jida tsehue bacuaque. Arepa Jobja tuja ai aniyaque dutya aputaterejerihua ama bucha, Yusratu tyanucahua tuja anihuaque dyaque jetiama. Ecuana Cuatsashaquiquetu dyaque canerecabati aqui ecuana tsehue. Jida tsehue tura ecuana tsahuaya iyuhueda tsehue.

¹² Peya micuana cuejaya, ecue eatsehuequi cuanaque. Pana ijacabaca neacue. Pusha pusha ni micuana juya ama, tume tuque micuanaja quisarati ataqui ama “Yusu bahue” jadya, micuana quejenemereti ishü. Yunerique quisarati camadya ni micuana aya “Barepaju Aniyaque tu bahue”, jadya ama juatsu “Riyaque Yahua Iyaquique tu bahue”, jadya quisarati neaume quejenemereti ishü. Ataqui ama cuitadyatu quisarati jadya. Paju micuanaja quisarati “Jejee” jadya ama juatsu “Aijama”, micuanaja quisarati quejenemereticara juatsu. Yunerique quisarati ni micuana ajacaya ama, tumetu Yusu micuana tsehue cahuaitya ama.

Eje bucha inimeju paju ama bucha Yusu tsehue quisaratijacataquique ama

¹³ Jidama inimeju ni ecuana, Yusu tsehue nequisaratiacara ama tuja tsahua ishü. Pureama ni ecuana, nejerura Yusu jeru eque sumiyaque. ¹⁴ Ujejeda cabatitsu tuque ecuanaja ihuarataqui Jesús queja ecatyati cuanaja huaraji cuana, ecuanaja etareju bati ishü. Etareju jutitsu ecana ujejedaja ishü Yusu queja pabacabaca. Etseri tsehue tuna patedi. “Ecuana Cuatsashaquiija ebacaniju mique ecuana tediya”, jadya tuna ujejedaque paa. ¹⁵ Jadya bacae ni tuna Yusu aya, tura chachaneyaque ejeneyaque, jadidyatu juya. Ecuana Cuatsashaquiratu ujejedaque chachaneya. Ujejedaque ni cajuchatihua, Yusura tujatu jucha cuana apupashadadiya. ¹⁶ Cajuchatitsu ecuana peya cuana queja necacuejatira, tuna ecuanaja ishü Yusu queja bacabaca ishü. Peya cuana cajuchatitsu cacuejatijaju ecuana tunaja ishü Yusu queja bacabacataqui, tunaja jucha cuana apupasha ishü. Yurameta

cabacati ecuana Yusu queja jutaqui, ujeje cachachanemereti ishu. Jida cuanaque ni Yusu queja bacabacaya, bacayadya tujatu ecana. Yusuratu ayadya tunara eje bucha bacahua eque. ¹⁷ Neadebacue Elías béru yuequedyá Yusuja quisarati cuejaqui juhuaque. Tuquetu ecuana bucha cuitadya jucuaire. Yusu tsehue quisaratiyaque tujatu bacacuare: “Nei jujacashacue”, jadya tujatu Yusu acuare. Yusura tujatu quisarati bacacuare. Tsunuda eje uma maratu nei jucuaire ama ni riya piji buchique. Quimisha mara shucuta badi tuputu nei jucuaire ama. ¹⁸ Jadya juatsutu Eliasra Yusu bacanucacuare: “Nei amerenucacue”, jadya tujatu bacanucacuare. Yusuratu nei amerenucacue. Euhua cuanaque huijanucacuare. Aninucacuare ara ishu cuanaque. Eliasra ihuacuare bae, neihuacue yuneri cuitadya micuanara Yusu bacahuaque tyayaque ejeneya tibu.

¹⁹ Ejeque cuana ni micuana yuneri eque anijacahua, Ecuana Cuatsashaquira bahuityahua eque. Necuejacue ecana riyaque quisarati eque aninuca ishu. ²⁰ Micuanara ni ecana Yusu cahuaishajaca tsahuaya, Yusura micuana jida baya. Turatu apupashaya tuna jidama juhua cuanaque. Majutsu ijahuaja etiquiju ejudiruuque, Yusuja yacuaaju tuna judirubuque tuque ni eje tupu jakanuca ishu ama. Jadya apupashatanae tunajatu jucha cuana juya, Ecuana Cuatsashaquira cuatsashaya eque junucaya tibu.

Riya tupu camadya.

Santiago

PEDRORA QUIRICA HUENEMETSE ACUAREQUE 1 PEDRO

Riyaque quirica ri Pedrora Jesús queja ecatyati cuanaque japada etsapetana cuanaja ishu cuadishametse acuareque. Riyaque quirica eque tujatu ecana casaturacuare tuna casada, canimehuallatima jadya Jesús queja juishu. Casaturacuare tujatu ecana dutyaju canerecatiya cabatitsu canimehuallati ishu ama.

Umae versículo cuana cabahuityati ishu jidaque ri: 1.15, 24, 25; 2.20, 24; 5.6-11.

Pedrora Jesús queja ecatyati cuanaque etsapetana cuanaja ishu quirica cuadishacuareque

¹ Era riqe micuanaja quirica cuadishaya. Ique Pedro; Jesucristoja yana atsaquique ique. Micuana dyadi micuana Yusu jaquedya. Micuana micuana, micuanaja yahuaju ama aniya. Dutya queja micuana tsapetanahua —Pontoju, Galaciaju, Capadociaju, Asiaju, Bitiniaju jadya. ² Ecuanaja Etata Yusura micuana mepehua. Yuequedyadyatu tuque bahue juhua micuana tujaque judadiyaque. “Ecue ebacua Jesucristora cuatsashaya eque tuna anibuque. Ecue Espiritura tunajatu dutya jidama cuanaque tillabuque, tuna jiteque ecue Ebacua ami quijehuetitsu majudadibuque tibu”, jadyatu Yusuja inime juhua yuequedyadya.

Yusura jida tsehue nenarucue tuja quiyuhuebati tsehue. Tura inime tsapema neanishacue.

Yusu queja judirutsu ni eje tupu jacanuca ishuque ama

³ ¡Dyaque jida taa Yusu, Ecuana Cuatsashaqui Jesucristoja Etataque! Dyaque tujatu ecuana tsehue quiyuhuebati anihua, arepa ecuana inijeusi, jucha arida jadya juhua ama bucha. Iyacuaner neri tura ecuana ahua. Pana ejenedya tuque ecuana aya tura aana ahuaque tura adadiyaque. Turatu yudijidya chacha nityatsuranuca ahua Jesucristo emajuque. Jadya tibudya tuque ecuana pana ejene aya, tura ecuana emajuque yudijidya chacha nityatsuranucabuqueque. ⁴ Yusura tuja cuanaque dyaque jidaque tyaana ahuaque tuque ecuana ihuaya. Tere baecuaque, cayuamati baecuaque tuque ecuana ihuaya. Cacualeti baecuaque tuque ecuana ihuaya. Jadya ihuae tuque ecuana aya Yusuja barepaju ecuanaja ishu eiyaque. ⁵ Jidaque ecuana tyatanayaque tu amena ebajjedya Yusu queja. Ecuana Jesús queja catyatitsu ecuana Yusura

narujacaya ama, eje tupu ecuana tuaqueja judiruya tupu. Dutya amena terehuaju ecuana Yusura bamerebuque dutya, ecuana amena Ijahua quejaque einajacaque, tuaqueja ecuana judirubuqueque ni eje tupu jaca ishü ama.

⁶ Jadya tibu pureama jutidya nejucue, jidaque tyatanadadibuqueque caadebatitsu. Arepa bape bape inime cuanaju peya inime judadiya ama bucha, pureama nejujacaume. ⁷ Canerecatiya ni micuana, Yusura micuana nime adebaya, yuneridya Jesús queja nimee jidique nime adeba ishü, oro etiquiju tirushatsu oro neri eadebau bucha. Arepa oro epuritanatereu ama bucha, micuana micuana Jesús queja nimeeque juatsu aputatere ishüque ama. Jadya tuaqueja nimee ni micuana juya, Yusura micuana muibuque Jesús junanucahuaju. “Jida taa micuana”, jadya tura micuana abuque.

⁸ Iyuhueda micuana Jesucristo baya, arepa micuanaja bama ama bucha. Tuaqueja nimee micuana juya, arepa micuanaja bama jari ama bucha. Tuaqueja catyatiya tibudya micuana dyaque pureama juya, pureamaque quisarati eje bucha cueja adebatilla jadya ataquique ama. Yusuja yacuaju cuanaque pureama juya bucha, jadidya micuana pureama juya. ⁹ Micuana micuana Jesús queja catyatihua, Yusuja tuaqueja judirusha ishü. Iyacua micuana pureama juya, Yusura Ijahua quejaque inajacamereya tibu.

¹⁰ Yuequedya Yusu equeque quisarati cuejaqui cuanaratu dyaque inime tupuqui ahua eje bucha inajacameree Yusura ecuita cuana eauque. “¿Eje bucha ejitaju juetu juya Yusuja quiyuhuebati ecuita cuana queja?” jadya tuna cabacadurati-jacama juhua. Arepa adeba jida cuita aya ama majaca tunajatu cuejacuare Yusura ecuana iyuhue tsehue babuqueque. ¹¹ Cristoja Espíritu tu tuna tsehue jucuaré. Tuquetu tuta taca cacuejatidya jutidya jucuaré. Icueneta cuejadya tujatu acuare Yusuja Emepeque nerecada judadiyaque. Bahue tujatu ecana amerehua nerecada juatsu tuque dyaque emui judadiyaque. Jidique bahue juatsu tunajatu riyaque dyaque inime tupuqui ahua. “¿Ejequetu Yusuja Emepeque jubuque? ¿Eje tuputu tuque junabuque?” jadya tuna cabacaduratibarecuare. ¹² “Micuana chacha jariju ama tuque ecue Emepeque nerecada jubuque, eje uma mara juatsu piisi”, jadyatu Yusura cuejacuare tuja quisarati cuejaqui cuanaque. Cuejajacacuare ama tunajatu Yusuja quisarati. Riyari micuana amena Yusuja quisarati cuejatanahua. Tumeque Espíritu equedya micuana riyaque quisarati cuejatanahua, barepa juque Espíritu ecuadishaja casa eque. Riya cuanaque yuneriquetu Yusu tsahuaqui cuanara cuitadya pana adeba acara

datse acuare.

Yusura ecuana tuque cuita camadya pureamatura ishu anishacara ayaque

¹³ Necanimeticue. Micuana tacadya pana canaruti neju-cue. Jesucristo junanucahuaju micuana Yusura tyabuque dyaque jidaque. Neihuajacaume junanucayaque. Tuque cuita camadya inime tupuqui neacue. ¹⁴ Ebacua cuana meretaqui ejuu bucha tsehue nemerecua Yusu. Yusu adabama jariju tuque micuana ajacahua ama Yusu cahuaitisha ishuque. Iyacua bacue jadya anie nejuume. ¹⁵ Neaume Yusu cahuaitisha ishuque. Tujaque juishu tura micuana mepehua. Tuquetu jidama juhua ama ni jadya jupidya. Jutaqui ju tuque bae nejuce. ¹⁶ Ehuenedya tu Yusuja quisarati: "Ique jidama juma ni riya piji buchique. Jutaqui ju micuana dyadi jadidya nejuce".

¹⁷ Micuana micuana juya, Yusupa micuanaja Tata; micuanapa tujaque jadya. Jadique juatsu, nemubacue. Ebacua cuanaquera etata cuanaque mubaya bucha, mubae neacue riyaque yahuaju aniya jari tupu. Ecuana eje bucha anie juhua eque tura ecuana tsuje tyabarebuque. Jidaque tujatu tyabuque tuja biji eque anihuaque cuita camadya, tuque jida camuiti aqui juhuaque etsujequi buchique. Tuja biji eque ama anihua cuanaque tujatu nerecaturabuque, tunaja jida camuibati aijama juhuaque etsujequi buchique. Jadya tibudya neaume ni riya piji buchique tuque cahuaitisha ishuque. ¹⁸ Icuene micuana anicuare micuanaja baba cuanaja bahue eque. Ni eje bucha jida inimeju cuinanataquidya jutidya. Yusu queja micuana judirutaqui ama juhua jadya anie juatsu. Yusuratu tsujetyacuare micuana jidaju cuinanasha ishu. Oro tsehue ama tujatu tsujetyahua ni metal tsuje arida tsehue. Arepa riya cuanaque tsuje arida ama bucha, tere baecuaque ama tume. ¹⁹ Cristodyatu catyatihua ecuanaja jucha cuana tsuje tyashu, tuja ami curusuju quijehuetitsu. Dyaque tsuje aridatu etsujequi juhua. Beru icuene cuanajatu iye bahue juhua uhuisha jucha tsujetyaqui. Uhuisha jidaque ni eje buchique ama tunajatu iye bahue juhua. Jadidyatu Cristo majuhua ecuana emajuju, arepa tuque cajuchatima ama bucha ni cajuchati pidya. ²⁰ Yahua iyama jarijudyatu Yusura inime tupuhua: "Cuadishabuque tuque Cristo maju ishu ecuita cuana Ijahua quejaque inajacamere ishu". Eje uma mara juatsu tujatu chamacama cuadishahua. Ejitajutu junahua ecuana inajacamere ishu. ²¹ Cristo majuhua jutu Yusura nityatsuranucacuare. Muimerecuare tuja tuque. Cristo eje bucha juhua eque micuana iyacua dyaque Yusu

queja nimee juya. Tuque equedya tuque micuana iyacua pana ejene aya Yusura micuana jidaque tyaana ahuaque tyadadiyaque.

²² Micuana micuana yunerique quisarati eque aniya. Jadya tibudya micuana Yusura asicadama, cajuchati baecua jadya bucha baya. Tumebaedya micuana umae cuana Jesús queja ecatyati cuana tsehue dyaque iyuhueda cabatiya. Eje buchadya iyuhueda cabaticara nejudue peya cuana tsehue, dyaque iyuhueda tsehue. “Iyuhueda mique baya”, jadya camadya ama necaticue; ejitajudya necabamereticue iyuhueda cabatiyaque. ²³ Cuinanametse ecuana juhua ecuana baqui cuanaque maju aqui eque. Tuna tuna maju aqui que. Jadya tibudya ecuana majubuque. Amena iyacua bacue ecuana ecuinananuca, Yusura ecuana tujaque amerehua tibu. Tuque maju baecuaque juya tibu, tujatu quisarati chacha buchique. Aputabuque amatu riyaque quisarati.

²⁴ Ehuenetu Yusuja quisarati:

“Ecuíta cuana tu yachi juque acuí huija baeque.

Dutya tuja casumiti aniyaque tu yachi juque shasha baeque jutidya.

Masadamatu acuí huija raratsu, shasha pacacaya.

Jadidya tu ecuíta cuana.

Ecuítatu tsunuda ishúque ama.

²⁵ Yusuja quisarati bacue aputa ishúque ama”. Riyaque quisaratidya rique micuana bacahua jidaque quisarati micuana cuejatanaya patya.

2

¹ Jadya tibudya nejacacue dutya jidamaque. Pusha pusha nejuume. Micuana aique amadya jutidya aidya cabamereticara ebari nejuume. Peya jaque micuanaja ai aijamaque aniya baatsu ujeu nebaume. Neijillahuanaume peya. Yusu adebamaque micuana jadya anie juhua. Iyacua nejacacue dutya riyá jidama cuanaque. ² Ebacua nana ecuaqueja atsuna cuita camadya ebijiseriu bucha, jadidya nebijisericue Yusuja quisarati yuneri eque cuita camadya ani ishú. Jadya juyaque, micuana Jesús queja nimeedya jutidya juajeya. Tume micuana ijahuaja etiquiju ama judirubuque, Yusuja yacuaju. ³ Tume micuana Ecuana Cuatsashaquique micuana tsehue dyaque jidaque adebatsu amena jadya anie ejuu.

Yusuja cuanaque tuna Yusu aniquique buchique

⁴ Ecuana Cuatsashaquí queja micuana catyatihua. Etare ayaque tuque ecuanaja iya bahue tumu, etare sipi ishú saretanaya cuitaque, etare esipique aruhue ada ishúque. Ecuana

Cuatsashaquique tu tumeque tumu buchique, chacha, imequique. Yusu adeba baecua cuanaratu bijidamaduraya. Yusratu iyuhuedadya baya. Yusratu mepehua ecuana tuaqueja judirusha ishu. ⁵ Ecuana tumu etare eaju aniya bucha, jadidyatu Yusu aniya ecuanaju. Tura ecuana ani iyacuaque tyahua. Yusuja eaniqui buchique ecuana, tuja Espiritu ecuanaju aniya tibu. Micuana micuana tujaque tuque merequique, pae cuana buchique. Tuja Espirituja casa eque tuque micuana mereya. Micuanaratu tyaya Yusu tuja bijidaque. Jesucristo queja micuana catyatihua tibu, micuanara Yusu tyayaque tu tuja biji. ⁶ Jadya tu Yusuja quisarati ehuene:

“Etare pujira dyaque saretanayaque tumu etare esipi tsucu cuanaju eadabareu bucha, tumbaedyatu era tuque mepehua.

Tuquetu Siónju jubuque eju ique aniyaju.

Tuque tuque iyahua dutya cuatsasha ishu.

Dyaque iyuhueda tuque ecue.

Tuaqueja catyatihua tibutu tuja cuanaque peya inime ama jubuque.

Pureama jutidya tuna jubuque”,
jadya tu ehuene.

⁷ Tuaqueja micuana catyatihua. Micuanaratu dyaque jida piji baya. Tuaqueja catyatima cuanaratu jadya ama baya. Bijidamadurabuque tunajatu Yusuja quisarati ehuene equedya:

“Tumu ebari, etare puji cuanara tsumecarama acuarequetu tumu dyaque saretanayaque judadicuare”.

⁸ Tumbaedyatu tu ehuene:

“Tumeque tumu ebari tsehue tsuru juatsu tuna tyanatanabuque.

Etihuesu juque tumu dacatanatsu tuna aputabuque” jadya.

Jesús queja catyatima cuanaratu Yusuja quisarati acarama cuitadya aya. Yusura cuejaya eque anicarama juya tibu, aputabuque tuna; ejeque tumu ebarira tyanahuaju ejuu bucha tuna jubuque. Yuequedyadyatu Yusura quisarati ahua; cuejaya eque juya ama cuanaque tuna terebuque. Tume tuna judadibuque Yusura amerehua baedya.

Yusuja cuanaque aique, eje buchique jadique

⁹ Micuana micuana Yusuja emepe cuanaque tuja etareju cuanaque buchique juishuque. Pae micuana, Dutya Cuatsashaquique merequi cuanaque. Cuare pidya camadya micuana Yusuja biji eque aniya cuanaque. Yusuja eiyaque micuana. Tura micuana mepehua tura micuanaja ishu

jidaque ahuaque cueja ishu. Tura micuana mepehua jidamaque micuanaja jaca ishu, tuja biji eque micuana ani ishu. Icuene tuque micuana apuda ducu jidamaque ayaque ahua. Iyacia tuque micuana amena huecadaju jidaque ayaque aya. ¹⁰ Icuene micuana Yusu jaque ama jucua. Iyacia micuana tujaque. Icuene micuana eje buchadya jutidya jucara juhua, Yusu queja canarumereticarama juya tibu. Iyacuatu Yusuja micuana tsehue iyuhue aniya.

¹¹ Dyaque iyuhueda baya tibu micuana cuejaya, ecue eatsehuequi cuanaque. Micuana riyaque yahuaju jari tupu micuana tarepe juyaque buchique, tunaja yahuaju ama japada aniyaque ejuu bucha. Jadya ama bucha tuque micuana eje buchaju bijiseriya riyaque yahuaju cuanaque eje bucha juya cuanaque. Ecuandya jutidya capureamaturaticaraque bijiseriyaque, Yusu pureamaturacara tsehue catiya bucha tuque. Cuejaya micuana era. Yusu nepureamaturacue, micuana camadya ama. ¹² Yusu adeba baecua cuanara micuana jidama quisarati tsehuedya jutidya aya. “Cristo queja ecatyati cuanaque tuna jidama aniya”, jadya tuna pusha pusha juya. Tuna ducu aniyaque jida tuyu neanicue. Micuana jida aniya baatsutu micuanaja ishu jidama quisaraticara juya cuanaque juya: “Pusha ama cuitadya micuana jida aniya”. Cristo junahuaju tunajatu, “Dyaque jida taa mique”, jadya tunajatu Yusu abucue.

¹³ Ecuana Cuatsashaqui jaque micuana juya tibu, huaraji cuanara cuatsashaya eque nejudue, Yusu adeba baecua cuanaque Ecuana Cuatsashaquiija ishu jidama equisaratiu tibu. Riyaque yahuaju huaraji cuanara cuatsashaya eque nejudue, Ecuana Cuatsashaquiija jadya inime juya tibu. Huaraji dyaque aridara cuatsashaya eque nejudue, tuque dutya epu cuana juque cuatsashaquique juya tibu. ¹⁴ Nemuibacue epu cuana narucui cuanaque. Tuna tuna huaraji dyaque aridaja ecuadishaque. Turadya tuna cuadishahua jidama juya cuanaque nerecatura ishu, jida juya cuanaque dyaque jida amere ishu jadya. ¹⁵ Yusu adeba baecua cuanara, tuja quisarati adebaya ama cuanara micuana jidamapa juya jadya aya. Micuana ni jida juya, tume tuna micuanaja ishu jidama quisaratiya amadya. Jadya tibudya micuana Yusura jida anishacara aya.

¹⁶ Ejeque amena inajacatanahuaque tu peyara cuatsashaya eque juishuque ama. Jadya inajacameree micuana Yusura ahua. Jutaquiiju, “Amena einajaca ama bucha, nejura ecuana eje bucha jucara juya eque”, jadya inime netupuume. Yusuja inime eque neri neanicue. ¹⁷ Dutya nemuibacue. Iyuhueda tsehue nebacue Jesús queja catyatihua cuanaque.

Nemubacue Yusu. Nemuibacue huaraji dyaque aridaque.

Jidama atayaju Cristora iduhua bucha abacata idue ataquique

¹⁸ Peya micuana cuejaya, mere puji cuana. Micuanaja patrón cuanara cuatsashaya eque nejudue. Nemuibacue ecana. Jida cuanara tuyu cuanara cuatsashaya eque camadya ama nejudue, tumbaedyá canerecabati baecua cuanara cuatsashaya eque. ¹⁹ Eje bucha juyaju ama micuana jidama atabuque. Yusura micuana jida baya abacata tsehue iduya baatsu, micuanara tuque pureamaturacara aya tibu. ²⁰ Cuatsashaya eque ama juyaju ni micuana nerecaturataya, Yusura micuana jidaque ebau bucha ama baya, arepa canerecatiyaque abacata idu aya ama bucha. Jida juyaju atanayaque camadyatu Yusura dyaque jida baya, abacata tsehue iduyaque. ²¹ Yusujatu bijida micuana eje bucha atayaju abacata idu aishu. Cristotu, micuana nerecada eatauju, nerecada atahua. Nerecadatu juhua micuana ijahuaja etiquiju ejudiruuju. Aiju jidama juhua baatsu ama tunajatu nerecaturahua; abacata idutu ahua. Tumbaedyá micuana Yusura amerecara aya. ²² Cristotu ni cajuchati pidya juhua ama; ni ejequetu ijahue ahua ama. ²³ Ejera ijillahuanayaju tujatu ni ejeque etsuje ijillahuanahua ama. Tuque ujeu baqui cuanara nerecaturayajutu, “Pacacuarehuanati ique”, jadya ama juhua, ni riya piji buchique. Ecacuarehuanatiuquetu tuque Yusu queja catyatihua. Tuquetu bahuedya juhua Etataque tuyuque, tura ecana peadya peadya eje bucha adadiyaque eje bucha tuna riyaque yahuaju juhua eque. ²⁴ Curusuju majuyaquetu Cristo nerecada juhua ecuanaja jucha tsujetya juyaque. Ecuana nerecada ejuuquetu tuque nerecada juhua. Tuquetu majuhua ecuanaja jucha cuana pana jacamere aishu, ecuanaja Yusuja biji eque ani ishú. Cuchiru tsehuetu sacuatánahua, ecuanaja einajaca juishu. ²⁵ Icuene micuana uhuisha cuana aija naruquima juneniyaque bucha juhua. Cristo queja catyatitsu micuana Micuana Naruqui queja, Micuana Penequi queja juetinucahua.

3

Carequi cuanaque eje bucha anie jutaquique

¹ Peya micuana cuejaya, ahuequi cuanaque. Micuanaja ahue cuanara cuatsashaya eque nejudue, Jesús queja ecatyatira, jadya ama juatsu Jesús queja catyatimara cuatsashayaju. Micuana ni dyaque jida aniya, tume tuna Jesús queja ecatyatiudya. Aijamadyatu ni ejeque quisarati tsehue cacuaretisha ishúque. ² Micuanara ai jidamaque asicadaque aya ama baatsu, jida aniya baatsu dutyara muiyaque bahue

juatsu, tuna dyadi tuna Jesús queja ecatyatiudya. ³ Cabajejeti tsehue capetamereticara nejuume. Petata ishü calluti, irine, metara, una ai tsuje arida tsehue cabajejeticara nejuume. ⁴ Dyaque jidatu capetameretitaqui jidaque camuibati ani educu juque juetiya tsehue. Necahuaitishaume peya cuana. Inime tsapema neiducue peya cuanara cahuaishacara ayaju. Jadya anie ni micuana juya, tume micuana yuneri cuitadya Yusura jida piji baya. Arepa ecuitaju jida piji cabajejeti ishüque masadama terebuque ama bucha, pureamaturanime ama tuque micuanaja Yusu jadya anie juyaque juatsu. ⁵ Béru yuequedya epuna cuana Yusuja jucuare cuanaratu Yusu pureamaturacuare jida ani, camuibati jadya tsehue anitsu. Yusu queja tuna catyaticuare. Yahue cuanaquera cuatsashaya eque ecana jucuare. ⁶ Jadyatu jucuare Sara, Abrahamja ehuanegue. Tumeque epunatu yahuiqueja yana equedya jucuare. “Ique Cuatsashaquique”, jadya isarae tutatu yahuique acuar. Jida juyaque juatsu micuana tumeque epuna baedya. Tume tuque micuana eiduu ni ai buchique mubatsu ama.

⁷ Tuequedya micuana cuejaya, huanequi cuanaque. Nenarucue micuanaja huane cuana micuanaja canerecabati tsehue, epuna cuana deca cuana bucha casae ama adebaya tibu. Nemuibacue ecana. Micuana tsehue tyatanapeedya tuna atanabuque Yusura jidaque tyaana ahuaque. Yusu tsehue micuana tere ishü ama anibuque; jadidya tuna tuna dyadi anidirubuque. Jutaqui ju jida tsehue micuanaja huane cuana nebacue, Yusu tsehue bisuma quisarati ishü.

Jida juyaju nerecaturatayaju eje bucha jutaquique

⁸ Jutaqui ju dutya neanicue pureama tsehue, cahuaishi tsehue ama. Peya cuana tsehue canerecabati aqui nejuque. Iyuhueda nebacue Jesús queja ecatyati cuanaque; micuana tsehuequi cuanaque iyuhueda baya bucha, iyuhuee necabaticue. Quiyuhue batsati aqui nejuque. Micuana cuita camadya dyaque inime metse bucha necabatiume. ⁹ Mepeyaque micuana Yusura ahua: “Dyaque tuque ecue quiyuhuebati aniya micuana tsehue”. Jutaqui ju riyaque adebatsu, peyara jidama ayaju, etsuje ecana neaume. Ejera ijillahuanayaju ecana etsuje neaume. Neiyuhue batsacue jutidya ecana. ¹⁰ Neadebacue Yusuja quisarati ehuanegue: “Jida eje bucha tsehue ama ni ecuana anicara juya, ani jidaque bijida baatsu, jidama nequisaratijacara.

Pusha pusha nejujacara.

¹¹ Jidamaque neajacara.

Jida tsehue peya cuana nebara.

Necacasatira peya cuana tsehue pureama tsehue ani ishü.

Jidamaque inime aniyaque juatsu, masadama eje buchadya ebajarara bajejicara neara.

¹² Ecuana Cuatsashaquiratu narujacaya ama tuja biji eque aniya cuanaque.

Bacayadya tujatu tunara isarayaju.

Jidama juya cuana tsehuetu cahuaiya jutidya”, jadya tu Yusuja quisarati ehue.

¹³ Ni ejera buchique micuana jidama abuque ama, micuana ecana jida tsehue aniquerayaju. ¹⁴ Jadya ama bucha micuana eje buchaju jidama atabuque, arepa jida tuyu juya ama bucha. Jida nejucue, Yusura micuana jidaque tyabuque tibu. Bajida nejuume ni eje tsehue. Micuana eje bucha atayaju inime necujishaume. ¹⁵ Nemuibacue Cristo. Yana equedya nejucue, tuque Micuana Cuatsashaquique juya tibu. Ejera ni micuana aya: “¿Eje bucha juatsumi Jesús queja catyatihua?” nebisuume quemitsa ishü. ¹⁶ Bahue nejucue tuna cahuai tsehue ama, muiba quemitsa jadya aishu. Jidaque neajacume ni aiju buchique ecajuchati cabati ishü ama. Micuana jadya juyajutu micuana ijillahuanahui cuanaque bisuya. “Cristoja cuanaque tuna tuyu ama aniya”, jadya quisarati yunerique ama aatsu tuna bisuya.

¹⁷ Jida juyaju ni tunara ecuana nerecaturaya, ecuanaja ishü tu jidadya, Yusuja jadya inime juya tibu. Jidama juyajudya ni tunara ecuana canerecatishaya, ecuanaja ishü tu jidama. ¹⁸ Cristo cuitadyatu nerecada juhua, arepa tuque ni riyá piji buchique jidama juma ama bucha. Ecuánaja jucha cuana tsujetyaquitu majuhua. Maju pidyatu juhua, ni eje tupu majunuca ishü ama. Jidaquetu majuhua jidama cuanaque cuarequi. Ecuana Yusu queja judirusha ishutu majuhua. Tuque ujeu baqui cuanaratu curusuju tatatsu iyehua. Emajuquetu Yusuja Espiritura yudijidya anishanuca ahua. Arepa yuneridya majuhua ama bucha, tuja espíritu tu majuhua ama. ¹⁹ Yusura tuque tuja Espíritu eque chacha nityatsuranucahuaju tujatu espíritu erisi netiya cuanaque quisarati cuejaticuare. ²⁰ Riya cuanaquetu jucuaré Noé aniya patya anicuare cuanaque. Tuque cuaba ebari mere juyara tujatu ecana cuejacuare datse Yusuja quisarati. Ejenecuare ama tunaja tuque. Iducuare jari datsetu Yusura tuna tsehue cahuai. Tyacuare datse tujatu ecana emajaca inime cacuareti ishü. Umaera piji camadyatu bacacuare. Cuaba ebariju nubitsu tuna quimisacarucu camadya chacha jucuaré, peya cuana tsehue terepee ejuuque. ²¹ Noé, tuja familia cuana tsehue chacha juishu cuaba ebariju enaju cuetihua bucha, jadidya ecuana iyacua ena tsehue eutsatana ecuana jida inimeju ecuinana cuanaque. Ecuíta asi-

cada cabatitsu ama ecuana cutsameretiya. Cutsameretiya ecuana Yusura Ijahua quejaque inajacamerehua jadique ejitaju juishu. Jadya juyaque tuque ecuana aya dutya: “Iyacua Yusura baya jucha metse ama bucha. Tuja inime eque iyacua aniya”. Einajaca ecuana ejuu, Jesucristo emajuque netitsuranucahua eque. ²² Rianzaque Jesucristodyatu barepaju nubihua, Yusuja yacuaju. Tuja jida eque amacatu anidirucua eaniqui dyaque muidaju ebarucue. Tuhua cuanaratu muiya. Barepa juque Yusu tsahuaqui cuanaque tuna tuja yana equedya juya. Tuhuaque huaraji cuanatu tuja yana equedya juya. Casada cuanaque tumbaedy a yana equedya juya. Dutya tuna tura cuatsashaya eque juya.

4

Yusu pureamatura ishu ani ishuque

¹ Cristo nrecada juhuaque inime tupuqui neacue. Ecuana jitequetu majuhua. Tujatu inime juhua ama ni riy a piji buchique: “Canerecatinime ama tuna jiteque” jadya. Jadya tibudya micuanaja inime paju ama: “Canerecatinime ama ecuana” jadya. Cristo queja nimee jujacamaque ni ecuana nrecada juya, tumetu ecuana cajuchatishacara juyaque casa buteya. ² Jutaquiju rianzaque yahuaaju aniya jari tupu micuana Yusuja biji eque anitaqui, ecuita cuanaja biji eque ama. Tunaratu dutya jidamaquedya jutidya acara aya. ³ Yusu adeba baecua cuanaque juya bae cuitadya micuana icuene juhua. Jaraquerehua micuana ejeque micuanaja caquemitiqeremaquedya jutidya. Bijiserihua micuana dutya bijiseritaquique ama. Nijuquidya jutidya micuanaja bahue juhua. Emetucu paja paja tsehue micuana pureama juhua. Chine cuana ishu micuana peya cuana bare micuana ijiji bahue juhua, peya cuana bucha dyaque nijuqui cabati ishu. Asicada micuana juhua chine cuana ishu cueya cueya cuana mui juyaque. Jadya anie micuana icuene juhua. ⁴ Iyacua bacue micuana jadya ama. Jesús queja catyatima cuanaratu bape inime tupuya tunara bisutadaque ayaju micuanara tajicarama ayaju. Ejeradya jutidya ijillahuanaya jadya tunara micuana aya, micuanaja amena iyacuaque ani baatsu. ⁵ Ejeque huecaca tuna Yusuja yacuaju netibuque, rianzaque yahuaaju eje bucha anie juhuaque etsujequi tyata ishu. Yusuja biji eque anihua cuanaque tujatu jidaque tyabuque. Yusuja biji eque ama anihua cuanaque tujatu nrecaturabuque. Chacha aniya jari cuanaque tujatu tyabuque, tumbaedy a emaju cuanaque. ⁶ Majucua e cuanajatu anihua emajaca Yusuja quisarati baca ishu. Cuejayaju ejenehua cuanaque

tuna Yusuja Espiritura Yusuja yacuaju judirushahua, arepa ecuitaque majucuaire ama bucha.

Yusura casa tyahua tsehue ecuanaja meretaquique

⁷ Amena tu japadama yahua tere ishucue. Jida inime netupucue. Yusu tsehue nequisaratijacaume. ⁸ Iyuhue tsehue necabatiajecuedya jutidya peya cuana tsehue. Yusratu dyaque jida baya, ecuana jadya iyuhueda cabatiyaju. Yuneridya ni ecuana iyuhueda cabatiya, tume nenime aputara peyara jidama ayaque. ⁹ Nebatsacue jida; netyatsacue emajaca micuanaja etareju ejeque junayaju, eje bucha quisarati tsehue ama. ¹⁰ Yusratu tyahua casa tuja cuanaque bape bape inime eque tuque mere ishu. Jutaquiju necatsahuaticue peya cuana tsehue Yusura micuana eje bucha ishu cuita camadya inime tyaya eque. Mayurumaja tuja patrónra tyahuaque jida tsumetaqui ejuu bucha, jadidya tuque ecuanaja dyadi tsahuataqui peya cuana, Yusura ecuana casa tyaya tsehue. ¹¹ Aniya ni micuanaja casa peya cueja ishu, necuejacuedya ai micuanara camadya inime tupuyaque ama; Yusuja quisarati necuejacue. Peya cuana tsahua ishu Yusura inime tyahuaque juatsu, neacuedya dutya casa Yusura tyahua tsehue. Jadya micuana jutaqui micuana petaqui juya cuanaque jadya juishu: “¡Dyaque jida taa Yusu! ¡Jesucristo eque tura ayaque tu dyaque jida!” jadya. “Mique camadya mi dyaque jidaque; mique camadya mi dyaque casadaque”, jadya tuque ecuanaja ataqui Yusu, jadya ajacatsu ama. Jadidya tuque.

Yusuja cuanara canerecatiyara eje bucha idue ataquique

¹² Peya micuana cuejaya, ecue iyuhueda cuanaque. Necujishaume inime jidama atayaju. Nime adeba ishucue jutidya tume, yuneridya Jesús queja nimee jadique. Micuana jadya juyaque: tu butseejuque ama. ¹³ Arepa canerecatiya ama bucha, pureama nejuque. Cristo canerecatihua bucha, jadidya micuana canerecatiya. Tuque junanucatsu, tuja casa cabameretihua, tume micuana dyaque pureama jubuque. ¹⁴ Yusu adeba baecua cuanara micuana yuamaba, ijillahuana jadya aya, Cristoja cuanaque baatsu. Pureama jutidya nejuque, Yusuja Espíritu micuana tsehue aniya baatsu. Tuja Espíritu equetu Yusu casa ejitaju cabameretiya. ¹⁵ Quiyeti puji, ni chiri arida nejuume. Huaraji cuanara cuatsashaya eque nejujacaume. Peya etareju aniya cuanaque tuna eje bucha anie jutaquique cueja nejuume; epereu jutidya tuque micuana ecana. Jadya cuana juatsutu dyaque bisutada. Jadya ni micuana juya, yuneridya tunara micuana nerecaturaya. ¹⁶ Cristo jaque juatsu nerecada juyaque tu bisutada ama. “Tata, pureama ecuana juya, ecuana Cristo jaque tibu,

arepa ecuana canerecatiya ama bucha”, jadya jutidya Yusu neacue.

¹⁷ Amena tu piji dyane Yusura dutya ecana rehua eje bucha anie juhuaque tsujetyayaque. Ecuana riyaque yahuaaju jari tupu tura ecuana nerecaturaya ecuana tuja cuanaque, tura cuatsashaya eque ama juyaque juatsu. Butsee ecuanadya ecuana rehua nerecada juya, yutsumadya Yusura cuatsashaya eque jucarama juya cuanaque dyaquedya tuna nerecada jubuque, tuja quisarati jidaque bacacarama juhua cuanaque. ¹⁸ Jadya tu Yusuja quisarati ehue: “Masada tshuetu Yusuja biji eque aniya cuanaque tuaqueja judirubuque. Yutsumadya tuque cahuaishuqui cuanaque, tuque bijidamaduraqui cuanaque jadya tuna Yusu queja judirubuque ama”. ¹⁹ Nerecada ni ecuana juya, Yusuja jadya inime juya tibu, eje bucha narumaedya tura ecuana ama. Jida nejujacara ama. Tuquetu Ecuana Iyaquique. Eje bucha tura acara ayaque ayadya tuja tuque.

5

Cristo queja ecatyati cuanaque cueja ishique

¹ Peya micuana cuejaya, micuana esiri cuanaque. Pana baca neacue era cuejayaque. Ique Jesús queja ecatyati cuanaque naru, tsahua jadya aishuque micuana baequedya. Era cuitadyatu bahua Cristo curusuju etataque majuyaju. Tumebaedya ique tuatsehue jubuque tuque casa cabameretidihuaju, tuque emui judadihuaju. ² Uhuisha naruqaira uhuisha cuana enaruu bucha, naruedya neacue micuanara Jesús queja ecatyati cuanaque, Yusura micuana narumereya cuanaque. Jida inime eque ecana nenarucue, ai peyara cuatsashayaju jipidya ama. Chipiru inatsacara aatsu ama ecana nenarucue. Neacue micuanara Yusu eje buchadya merecara ebari aya tibu. ³ Emechiquira eau bucha nereda nereda tsehue ama ecana nebacue. Micuanaja ani eque ecana nebamerecua tuna eje bucha anie juishuque. ⁴ Cristo tu Ecuana Naruquique. Tuquetu Dutya Naruquique. Tuque junanucahuaju micuana dyadi micuana emuitadya jubuque tuatsehue, ni eje tupu muitajaca ishuhua ama. Ejeque muitayaque ejaqui epicaque iyucaju ejutumere-tau bucha, jadidya micuana tyatabuque muitaya jadique. Tumeque ejaqui epicaquetu masadama manunuya; micuana tyatayaque tu tere ishuhua ama.

⁵ Tuequedya micuana cuejaya, ehue ebari cuana. Esiri cuanara cuatsashaya eque nejuque. Dyaque inime metse bucha necabatiume. Necatsahuaticue jutidya peya cuana tsehue. Yurameta camuibati nejuque. Jadya tu ehue Yusuja quisarati:

“Yusutu cahuaiyiya, ‘Ique dyaque inime metseque’ jadya juya cuana tsehue.

Turatu tsahuajacaya ama dutya jetiedya cabatiya cuanaque”.

⁶ Jutaquiju neiducue Yusura dutya eje bucha amereyaque, aidya cabaticara tsehue ama. Tujatu dutya casa aniya. Eje tupu tura huecaca iyahuaque juetihuaju tura micuana muimereya. ⁷ Airadya jutidya ni micuana bape bape inime tupumereya, nebacacue Yusu, tuja micuana inime tsapema anisha ishu. Jadidya tura micuana amereya, tura micuana jida tsehue narujacaya ama tibu.

⁸ Necanaruticue bacue. Satanás tu ecuana yuamatu-raquique. Iba caraticara juatsu emarimariniu buchatu Satanás juneniya ecuana Jesús queja nimee amerejacacara aatsu. Jadya tibudya necanarutijacame. ⁹ Tura cajuchatishacara ayaju, “A, aijama; bacaya ama mique ni riyá piji buchique”, jadya neajacame. Jesús queja nimeedya jutidya nejuajecue. Neadebacue; micuana camadya ama micuana nerecada ataya. Dutya queja aniya cuanaque Jesús queja ecatyati cuanaque tuna micuana ataya baedya nerecada. ¹⁰ Yusura micuana jida tsehue baya. Tura micuana mepehua tuatsehue amerejaca ishu ama, muita ishu, micuana Cristo queja catyatihua tibu. Ejetsunue ama micuana nerecada juya. Tura micuana iyacuanejacaya ama. Tsahuaya tura micuana Jesús queja nimeedya jutidya juaje ishu. Cayuamati baecua tura micuana amerebuque, etare pana au eaque bucha cuejipa cuanara aetiyaju cayuamati baecua bucha. ¹¹ Terenime ama tu Yusuja casa. Dutya tu tura cuatsashaya eque juishuque. Jadidya paju.

Amena ishuque quisarati

¹² Silvano eque tuque huenehua riyaque quirica eje junuque ama. Eratu tuque baya ecue eatsehuequi bucha jida. Tuquetu jida Ecuana Cuatsashaquira amereyaque mere aishu. Huenehua rique micuanaja riyaque quirica micuana casatura ishu. Era micuana yuneri cuitadya ejenemerecara aya Yusura tuja quiyuhuebatsati tsehue micuana bayaque. Tuaqueja nimee nejujacaume.

¹³ Babiloniaju cuanara Jesús queja ecatyati cuanara micuana isaramereya, micuana bucha Yusura tuja ishu mepehua cuanara. Tumebaedya Marcosra micuana isaramereya. Ecue ebacua bucha iyuhueeque tuque ecue. ¹⁴ Casitatitsu quisaratibare, emetucuju quinati jadya nejuque peya cuana tsehue iyuhueda cabatiyaque cabamereti ishu. Yusura inime tsapema neanishacue, dutya micuana Cristoja cuanaque.

Riya tupu camadya.

Pedro

BETA ISHUQUE QUIRICA PEDRORA HUËNECUAREQUE 2 PEDRO

Riyaque ri beta ishuque quirica Jesús queja ecatyati cuanaja ishu Pedrora cuadishacuareque. Cuejacuare tujatu ecana Jesús eje buchique cuejaqui cuanaque tuyuque ama junabuque cuanaque. Jesús queja ecatyati cuanajatu yunerique ama ejenetaqui ama ni canimehuallatitaqui, jadya tujatu ecana cuejacuare. “Yuneri cuitadyatu Ecuana Cuatsashaquique junanucabuque”, jadyatu jucuare.

Umae versículo cuana jida cabahuityati ishuque ri: 1.3-8, 21; 2.9; 3.9, 14.

Pedrora Jesús queja ecatyati cuanaque isaracuareque

¹ Era rique micuanaja quirica cuadishaya, micuana Jesús queja ecatyati cuanaja ishu. Simón Pedro ique, Jesucristo merequique. Tuja yana atsaquique ique. Tuque tuque ecuanaja Yusu, Ecuana Inajacamerequique. Tuquetu dyaque tuyu nerique. Tura micuana tuaqueja catyatishahua, ecuana tuaqueja catyatihua bucha. Ecuana tuaqueja ecatyatique tu ai dyaque tsuje arida buchique. ²Yusura jida tsehue nenarucue tuja quiyuhuebati tsehue. Tura inime tsapema neanishacue. Jadya micuana ejuu Yusu, Ecuana Cuatsashaquique Jesús jadya dyaque adebaajetsu.

Cristoja cuanaque eje bucha anie jutaquique

³Yusura ecuana tuja casa tyahua ecuanara dutya tuja biji eque ani ishuque sareyaque ecuanaja ani ishu. Jesús pana adeba aatsu, jadya ecuana aniya. Tura ecuana mepehua tuque bae juishu, emui jadya juishu. ⁴Riyaque casa equedya tura ecuana tsujema tyahua dutya ai jidaque tura ecuana tyaana ahuaque. Dyaque iyuhuedaque tura ecuana tyaana ahua, dyaque jida saretanayaque. Tura tyaana ahuaque tyadadiyaque ejeneya que tuque ecuana jidamaque ama inime tupuqui aya. Riyaque yahuaju Yusuja cuanara ama bijiseriyaque ama tuque ecuana inime tupuqui aya. Jida tuyu ecuana judadibuque Yusu bucha. ⁵Jadya tibudya Yusura amerecara aya bucha nejuajecuedya jutidya. Jesús queja catyatitsu, necacasaticue jida tuyu ani ishu. Jida tuyu anitsu, pana adebaajedy a jutidya neacue dyaque Yusuja biji eque juaje ishu. ⁶Dyaque Yusuja biji eque aniaje ishu adebaajetsu, micuana tacadya necanaruticue jidamaque aishu ama. Micuana taca canaruti juatsu neiduajecuedya eje bucha

juyaque canimehuallatitsu ama. Iduajeyaque, Yusura inime tupuya bucha tupue neacue. ⁷ Jadya inime tupuyaque, Jesús queja ecatyati cuanaque jida nebacue, micuana tsehuequi cuanaque ebau bucha bae ecana neacue. Jadya cabatie juyaque, dutyadya ecana iyuhue tsehue nebacue, arepa ecana Jesús queja catyatima paju ama bucha.

⁸ Jadya anie micuana jutaqui. Jadique ni micuanaja inime aniajeya, tume tuque micuana Ecuana Cuatsashaqui Jesucristo adebaajeyadya jutidya. Tuja yana equedya micuana juajebuque, acui caca cueda jubahue bucha. ⁹ Ejeque jadya anie ama juyaque tu atucamaque bucha, japadama capetatiya bucha. Nime aputahuatu Yusura tuja jucha cuana tillahuaque. ¹⁰ Yusura micuana ihuarahua, mepehua jadya ahua. Jadya tibudya juneni, camuibati jadya tsehue pana yunerine neacue micuana tujaque, ecue eatsehuequi cuanaque. Jadya anie juatsu micuana Yusu queja judiribuque. Tsajaja catuputiyaque rihuima eju tuque tsajajaya tupu etsajajau bucha. ¹¹ Micuana ni tuja yana equedya jujacaya ama, tume micuana aija peretsu ama nubidirubuque Ecuana Cuatsashaqui Jesucristo enaruqui jusiriyaju. Micuana bacue tumbaedya enaruqui jubuque Ecuana Cuatsashaqui tsehue jupee.

¹² Icuene tuque micuana bacahuadya quisarati yunerique. Ejeneyadya tuque micuanara. Riyaque yuneri equedya micuana aniya. Jadya ama bucha micuana era bacamerejacaya ama dutya riya cuanaque, micuana nime aputa ishuhua. ¹³ Ique majuma jariradya micuana ecue dutya riya cuanaque adebameretaqui jari. ¹⁴ Bahuedya ique masadama majudadiyaque; Ecuana Cuatsashaquira bahue amerehua. ¹⁵ Dyaque jida micuana adebamerecara aya dutya riya cuanaque tumbaedya ique majuhuaaju micuanaja adeba ishuhua.

Pedroro Cristo emui, pureama ea jadya bacuareque

¹⁶ Era micuana cuejahua Ecuana Cuatsashaqui Jesucristoja casa. Junanucabuque tuque. Jadya micuana cuejahua. Jadya micuana cuejahua; ai ecuedya jutidya cuatsabiji ama tuque yudijidya cuejanuca cuejanuca ahua. Neejenecue taa ique, ique cuitadya tuatsehue junenihua tibu. Ecue yatuca tsehue cuitadya tuja tuque dyaque casa aniyaque bahua. ¹⁷ Jesús Etataque Yusura mui, pureama jadya ayajutu eradya bahua. Eradyatu bacahua Dutya Casa Tsehueque jadya quisaratiyaju: “Riyaque rique ecue ebacua dyaque iyuhuedaque. Ique dyaque pureama juya tuatsehue”, jadya juyaju. ¹⁸ Ecuana cuitadyatu bacacuare riyaque etsuri barepa equeque. Ecuana ematajudyatu Jesús cabameretihua.

19 Icuene tuque ecuana bacahua Yusuja quisarati cueja juya cuanara cuejayaju. Amena iyacua barepa juque Yusuja etsuri bacatsu, dyaque ejenedya tuque ecuana aya Yusuja quisarati yunerique. Micuanajatu pana ijacobaca ataqui Yusuja quisarati cuejaetibe juhua cuanara cuejahua cuanaque. Tunaja quisarati tu apuda ducu ude tiquida juya buchique. Huecacayaju purari ebari cuinanayaque ecuana eihuau bucha masadama huecacayaque adeba ishü, jadya ihuae tunajatu acuare Yusuja Emepeque junabuqueque, Yusuja quisarati cuejatayaque pana adebamere anayaque adebatsu. 20 Riyaquedya tu dyaque saretanayaque. Beru tuna eje bucha judadiyaque cuejaetibehuaque tunaja adebadya jutidya ama tunajatu Yusuja quisarati cuejahua. Ecuana bacue tumebaedya eje bucha adebataqui amadya baya ecuanaja inime taca. 21 Yusu equaque quisarati cuejaqui cuanaque tuna tunaja bahue ama quisaratinicare. Yusuja Espiritura huecashayaju tunajatu hueneajecuaré Yusura ecuana bahue amerecara ayaque.

2

Pusha pusha bahuityaqui jucuaré cuanaque (Judas 4-13)

1 Berutu anicare israelita cuana yunerique ama bahuitya juya cuanaque. Tume patya jucuaré baedyatu aniya iyacua micuana yunerique ama bahuityacara juya cuanaque. Tunaja pusha pusha bacatsu tuque micuana yunerique bucha bacaya. Bacaya ni micuana ecana, tume micuana pana cayuamati judadiya. Ecuana Cuatsashaquiquetu majuhua tunaja jucha cuana tsujetya ishü. Jadya ama bucha tunajatu bijidamaduraya. Tunaja inime cuitadya jutidya tuna Yusura ijahuaja etiquiju nudyabuque. “Nerecaturataya ecuana”, jadya tunaja inime juyaju ama tuna nerecaturatabuque. 2 Eje uma tuna tume pusha pusha ari cuanara asicada bahuityahua equé aniya. Tunaja jidama ani baatsu tuna Cristoja ishü eje uma jidama quisaratiya, tuna Jesús queja ecatyatique bucha baatsu. 3 Tume pusha pusha bahuityaqui cuanaratu chipiru dyaquedya jutidya bijiseri-ajeya. Jadya tibudya tunara micuana eje buchadya jutidya cuejaya, micuanaja ecana tsujetya ishü. Jidama inime nebaume. Berutu Yusura inime iyacuare tuna nerecada juishuque. Tuquetu bahuedya tuna eje bucha juyaque. Ejet-sunue juatsu ama tuna Yusura ijahuaja etiquiju nudyabuque.

4 Yusratu nerecada amerema ama aya tuque baca bae-cua cuanaque. Neadebaradya barepa juque Yusu tsahuauqui cuanaque cajuchatihua cuanaque. Yusu-jatu aijama juhua

canerecabati tuna tsehue. Ijahuaja etiquiju jutidya tujatu ecana ijehuecuare. Apuda ducu tujatu ecana ishacuaré. Cadena tsehue risi, iya jadya tujatu ecana acuare, tura ecana icuene tuna eje bucha juhuaque tsujetyayaque huecaca juetiya tupu. Jidaquetu tyatanabuque tuyu anihua cuanaque. Tuyu ama anihua cuanaque tuna nerecaturatabuque. ⁵ Neadebaradya Noé aniya patya jidama cuanaque anicuaré cuanaque. Yusura tunajatu jucha cuana apupashahua ama. Ena eque jutidya tujatu ecuita cuana tillacuaré. Noé, tuja etareju cuanaque jadya cuita camadya tujatu ecana chachanehua tuna ehuidiuju. Enaja tillama jarijudya tuna Noéra cuejajacacuaré ama tuna jidama jujaca ishucue. ⁶ Neadebaradya ecuita jidama cuanaque Sodomaju, Gomorraju anicuaré cuanaque. Yusuratu tirushacuaré tumeque beta epu ebari ecatsé; pana murutatu amerehua. Dutya tuhua aniya cuanaque tujatu ecana iyetil-lahua. Pana aputasha tujatu tumeque epu ecatsé acuare; riyá camatu ni aira buchique nityatsuranucataqui ama baya. Jadya tujatu acuare, ecuita Yusu adeba baecua cuanaque jidama cuanaque tume bucha adadiyaque caadebati ishú.

⁷ Sodoma pana aputasha ama jarijudyatu Yusura Lot cuinanashacuaré. Tumeque ecuitatu Yusuja biji eque aniyaque jucuaré. Eje buchadya jucaratu jucuaré amena tuja epuju aniya cuanaque Yusuja quisarati bacacarama juya cuanaque jidama juya baatsu. ⁸ Dutya huecacatu Lotra bacuaré, bacacuaré ecuita cuana jidama juya cuanaque. Tuquetu amena ecajijiti jucuaré jidama juyaque bau, baca jadya aya tibu. ⁹ Ecuana Cuatsashaquijatu Ijahuá quejaque inajacamere bahue tuaqueja ecatyati aniya cuanaque. Tuna nerecada juyaju tujatu ecana naruya. Tumebaedya tujatu jidama cuanaque nerecatura bahue. Nime aputaya amatu tuque tuna nerecatura ishú, tuna peadya peadya rehua eje bucha anie juhuaque tsujetyayaque huecaca. ¹⁰ Tunaja jidama abahue eque cuitadya jutidya bisutada anie juya cuanaque neri neri, Ecuana Cuatsashaquira amereyaque bijidamaduraqui cuanaque neri neri dyaque tuna Yusura nerecaturabuque. Yunerique ama bahuityaqui cuanaratu muibaya ama Yusu, ni riyaque yahua juque huaraji cuana. Cuejataqui ama tuna. Muibaya ama tunajatu ejitaju ama casa tsehue cuanaque. Ijillahuanaya jutidya tunajatu ecana. ¹¹ Barepa juque etsahuaqui cuanaque tuna dyaque casada, yunerique ama bahuityaqui cuanaque bucha ama. Tunajatu dyaque cacuatsashati aniya, pusha pusha bahuityaqui cuanaja bucha ama. Arepa Yusuja yacuaju jidama cuanaque tuna jidama juyaque cueja ishú tuyudya ama bucha,

aya amadya tuna jadya. Jadya ama buchatu pusha pusha bahuityaqui cuanara jida cuanaque ijillahuana tsehue eje bucha cuejataqui ama baya.

¹² Cuanubi cuana tu ina, iye, arahuana jadya ishuque jutidya. Pusha pusha bahuityaqui cuanaque tuna tumeque cuanubi cuana baeque. Eje bucha tuna jucara juya equedya jutidya tuna juya, eje bucha ejudadiuque inime tupuma. Tuna tuna tsaya jutidya tunara adebaya ama tsehue. Ecuana cuanubi cuana iyeya bucha, jadidya tuna Yusura tillabuque. ¹³ Tuna tuna canerecatibuque, peya cuana canerecatishahua cuarequi. Bisutadaque ayaque tuna pureama juya, meta jipidya ama, huecada tupu tumbaedy. Micuana iyuhueda cabatiyaque cabamereti ishu yuhua cama ararayaju, tuna dyadi tuna tuhuadya juya micuana tsehue, arepa tuna dyaque jidama aniya ama bucha. Jida asicadamaju asicadaque bucha jutidya tuna.

¹⁴ Dutya epunadya jutidya tunajatu baatsu bijiseriya. Yurameta cajabatijacacarama ecana juya epuna ahuequi cuana tsehue. Ajacacarama tuna aya Yusu cahuitisha ishuque pusha pusha bahuityaqui cuanara. Huica mutya pujira jae emihuaqui tsehue tsetatsu eau bucha, tunajatu ijahue acara aya Yusuja quisarati adeba jidama aya jari cuanaque, cajuchatisha ishu. Dyaque chipiruidya jutidya tuna juajecara juya. Peya cuana yuamatura tsehue tuna aniya; eje tupu cuana tuna yuamaturatanadadibuquedya. ¹⁵ Cuji ejura ediji cujishahua bucha tuna, jadidya tuna Yusura amereya eque jujacahua. Balaam Beorja ebacuaque jidama juhua eque cuitadya jutidya tuna juya. Tatseratu Balac tsehue betara tupu inime tupuhua jidama tsehue chipiru ina ishu. ¹⁶ Tuja jidamaque inime tibutu nereda atanacuare. Yusuratu tura asna isaaniyaque quisaratishacuare ecuita quisaratiya bucha. Jadya amerejacaetu tuja asnara acuare tuque equijahuati cuita jucara juyaque.

¹⁷ Ena cani euraque badirutsu, yanacana tuque ecuana ena esareu. Barepa huani sehuedaque masadama cuetihuaque; yanacanadya tuque ecuana nei ejuuque ihuaya. Tumbaedy tu pusha pusha bahuityaqui cuanaque. Bahuitya bahuityaya baatsu tuque ecuana ecana yunerique cuana bahuityaya bucha ebau. Tume taa jadique ama. Yusuratu quisarati iyahua. Nerecada tuna jubuque dyaque apuda ducu ni eje tupu cuinana ishu ama. ¹⁸ Tunaja quisarati tu yuneri aishuque ama, arepa tuna quisarati dyaque junuda aya ama bucha, arepa tuna quisaratiyaju bacaqui cuanara dyaque bahue taa ecana jadya aya ama bucha. Tuna tuna juya: "Yusutu pureama juya ecuanara asicadaque ayaque

pureama juyaju, bisutadaque ecuanara ayaju” jadya. Jadya tsehue tunajatu ijahue aya butseeju amena Yusu adeba baecua cuanaque aniya bucha anijacacara juya cuanaque. Huicamutya puji jae emihuaqui tsehue etsetau bucha, jadya tsetae tunajatu aya tuna bahuitya bahuityayaju bacaqui cuanaque. ¹⁹“Arepa micuana Yusura cuatsashaya eque ama juya ama bucha, eaniudya tuque micuanaja casa jidamaque ajaca ishu”, jadya tuna pusha pusha juya. Jadya ama buchatu tunaja cuitadya aijama casa tuna yuamaturaqueique ajaca ishu. Metsequique emechiquira jacataqui ama ebau bucha, jadya tunajatu ajacataqui ama baya tuna yuamaturaqueique. Ecuanara ajacataqui ama bayaque tu ecuanara metseque buchique. ²⁰ Ecuanara Cuatsashaqui Jesucristo queja catyatitsu tuque ecuanara ajacaya bisutadaque tuaqueja catyatima cuanara aya cuanaque. Cuanubi trampa juque huanashahua bucha ecuanara. Umaeratu yudijidya anuca aya bisutada ayaque ajacahuaque. Cuanubi trampaju inatana beta ejuque bucha tuna, tuna taca cuinanataqui ama. Jesús queja catyatima jariju tuna jidamaju anihua. Iyacia yudijidya anuca jidamaque aatsu tuna juhua bucha dyaque jidamaju. ²¹ Dyaque jida taa tunaja adebataqui ama juhua Cristo. Tuna anihua bae aninucagua tibu tuna Yusura dyaque nerecaturabuque. ²² Micuanaratu adebayadya dyaque jida riyaque quisarati: “Cadacatitsutu chapara yudijidya aranca aya. Nahuiyaquetu cuchi uyu uyu asicadaju yudijidya mee mee junucaya”. Jadya tu quisarati yunerique ejenetsu, yudijidya icuene anihua bucha anie junucayaque.

3

Yuneridya Ecuanara Cuatsashaquique junanucabuqueque

¹ Cuadisha beta ishu rique micuanaja quirica cuadishaya, micuana ecue iyuhueda cuanaque. Riyaque quirica ecatse eque micuana huecashanucagua icuene micuana bahue juhuaque. Jidaque cuita camadya micuana inime tupumerecara aya. ² Neadebacue Yusura huecashahuaju eje bucha judadiyaque cuejaqui juhua cuanara cuejahua cuanaque. Tunaratu Yusu merecuare. Tumebaedya neadebacue Ecuanara Cuatsashaqui Inajacamerequirira amerehuaque. Tura cuitadya cuadishahua cuana eque tuque micuana bacahua tuja quisarati.

³ Cristo junanucayaque inime tuputibunetsu neadebacue riyaque. Terehuetu anibuque jidama juya tsehue eje bucha jucara juya tsehue pureama jubuque cuanaque. Ijaribuque jutidya tunara micuana. ⁴ Abuque tunara micuana: “¿Eje bucha juatsu tuque micuana ejeneya Jesús junanucaya

jadique? Inimema tibu jadicue neejenecue. Junanuca ana juhua tibu, ¿jutaquiju jatsutu eje bucha juatsu tsunutaya junanuca ishü? Ecuanaja baba cuana tura junanuca ana ahua cuanaque tuna majuhua. Yahua iyatanahua equeque tumebae teredya jutidya”, jadyatu quijaribati puji cuana jubuque. ⁵ Huecatanaya ama tuna yahua iyatanahua equeque juhua bae ama dutya juetibeyaque. Tuja quisarati equedya jutidyatu Yusura barepa yahua jadya iyahua béru, iyacua ama. Ena juque tujatu yahua cuinanashahua. Ena tura pacacashajacaya ama eque tujatu naruya dutya ai riyaque yahuaju aniyaque. ⁶ Tsunuda eje uma mara juatsu tujatu tillahua ena eque dutya aniyaque. Enatu dyaque arida amerehua tuna huidishatilla ishü. ⁷ Yusura jadya amerehua tibutu iyacua barepa yahua jadya aniya. Tura nucadyatu iyahua etiqui eque tere ishüque. Jadya tu eiya, Yusura ejeque huecaca peadya peadya eje bucha ani juhua eque tsujetyaya tupu. Tumeque huecaca tuna Yusura nerecaturabuque tuatsehue cahuaítihua cuanaque. Quijaribati arida cuanaquetu riyacuanaque nime aputaya.

⁸ Yusuratu huecaca piye baya ama ecuita cuanara piye baya bucha. Tuja ishü tu peadya huecaca, peadya mil mara tsehue beta tupu. Nenime aputaume riyaque, ecue iyuhueda cuanaque. ⁹ “Ecuana Cuatsashaquique junanuca ana juhuaque dyaque cuita tsunutahua tibu, juya amatu tura quisarati ahua eque”, jadyatu umaera inime tupuya. Jadya ama tuque. Tuja datsetu bijidama ni ejeque buchique ijahuaja etiquiju nudya ishü. Jadya equetu junanucama jari. Tyaya jari tujatu emajaca jucha arida cuanaque inime cacuareti ishü.

¹⁰ Yuneridyatu Ecuana Cuatsashaquique junanucabuque. Muya jutidya, ihuayaju amatu junanucabuque, chiri puji meta ejunau bucha. Tumetu barepa puritanaterebuque, yachi tiruya bucha sicacae. Barepaju aniya cuanaquetu etiquira pana tilla abuque. Yahuaju dutya ai aniyaquetu etiquira pana tilla abuque.

¹¹ Yusura dutya riyacuanaque tillaya tibu, tuque cahuaítisha ishüque neaume ni riyacuanaque piji buchique. Yusuja biji eque jutidya neanicue. ¹² Eje buchadya juetishahuishacara neacue huecaca Yusura Jesucristo masadama cuadishanuca ishüque. Inime tupuqui neacue tumeque huecaca pureama ishüque. Tumeque huecacatu barepa ejita juque etiquira aputashabuque. Dutya aniya cuanaque tuna etiquija jujura urishatillabuque. ¹³ Yusuratu iya ana anucahua iyacuaque barepa, iyacuaque yahua jadya. Tuhuatu dutya jida jubuque, Yusuja inime eque.

¹⁴ Jadya tibudya dutya riyaque inime cuana judadiya tibu, necacasaticue Yusu cahuaisha ishü ama, ecue iyuhueda cuanaque. Jadya anie ni micuana juya, tume “Jucha metse ama micuana baya. Ai asicadamaque bucha micuana baya. Ique pureama juya micuana tsehue”, jadya tura micuana abuque. ¹⁵ Ecuana Cuatsashaquique tu junanucama jari; jetiama tujatu ecana Ijahua quejaque inajacamerecara aya jari. Neadebacue riyaque. Pablóratu huenehuadya dutya riyá cuanaque micuana cuejayaque. Tuquetu ecuana tsehuequique dyaque iyuhuedaque. Yusura cuitadyatu adebamerehua, micuana cueja ishü. ¹⁶ Dutya tura quirica huenehua cuanaju tujatu cuejaya riyá cuanaque. Eje buchaju: tu ibeda adeba ishü tura huenehuaque. Jadya tibudyatu Pablora huenehuaque Yusuja Espiritura ama bahuityaya cuanara tuyu ama cuejaya. Cuareya jutidya tunaja tuque. Tumebaedyatu aya Yusuja quisarati adeba jidama aya jari cuanara. Jidama tunajatu cuejaya Pablora huenehuaque camadya ama. Tumebaedya tunajatu dutya Yusuja quisarati pana cueja ama aya. Tunaja inimedya tuna Yusura majuhaju nerecaturabuque.

¹⁷ Micuana micuana amena icuenetadya bahue yunerique ama bahuityaqui cuanaque eje bucha judadiyaque, ecue iyuhueda cuanaque. Jadya tibudya necanaruticue tumeque ecuita cuejataquima cuanara ijahue au, kujisha jadya eauju, Yusuja quisarati tunara eejenemerejacau tibu. ¹⁸ Ecuana Cuatsashaqui Jesucristo Ecuana Inajacamerequija biji equedya jutidya neaniajecue. Neadebaajecuedya jutidya tuque eje buchique. ¡Dyaque jida casada taa ecuanaja Etata Yusu! ¡Muitanajacaya ama tuque! Jadiya paju.

Riya tupu camadya.

Pedro

JUANRA QUIRICA HUENEMETSE ACUAREQUE 1 JUAN

Riyaque quirica ri Juan Jesúsja emepera huenemetse acuaque. Amena esiri cuitara rejari huenecuare. Turatu huenecuare etataquera ebacua cuanaque jida ecuejau bucha cuejae. Bahuityacuare tujatu yurameta iyuhuedapa ecuana peya cuana tsehue cabatijacataqui ama jadya. Cuejacuare rejari ecuana amena Yusu jaque tibu eje bucha anie jutaquique. Riyaque yahuaju cuanaque bucha ama ecuana. Yusura cuatsashaya eque juyaque ama bucha ama ecuana. Pana ejenedyapa tuque ecuanaja ataqui Yusu tsehue tere baecua anidirunucabuqueque, Jesús queja catyatihuaque juatsu.

Umae versículo cuana jida cabahuityati ishuque ri: 1.7, 9; 2.15, 28; 3.2-3; 4.10-12; 5.13-15.

*Yusu eje bucha caadebameretie ecuita cuana queja ju-
cuareque*

¹ Quirica rique micuanaja cuadishaya micuana Jesús queja ecatyati cuanaja ishu. Ique Juan. Jesucristo eje buchique rique micuanaja hueneya. Tuquetu Yusu Adebamerequique. Tudyatu Ecuana Anisirishaquique. Yahua iyama jarijutu anicuare. Tuque riyaque yahuaju junahuaju ecuana tura mepecuare cuanara tuque ecuana bacacuare tuque quisaratiyaju. Ecuana yatuca tsehue cuitadya tuque ecuana bacuare. Bacuare ecuana tuque ai juyaju. Ecuana cuitadyatu ecuanaja emetucu tsehue jabacuare. ² Riyaque ecuana ani tere baecuaque tyaquiquetu ecuana queja cabameretihua. Bacacuare tuque ecuanara. Jadya tibudya micuana iyacua ecuanara tuque eje buchique cuejaya. Tuque maju baecua siri aniyaque micuana ecuanara cuejaya. Icuene cuitatu tuque Etataque tsehue anicuare. Tuequedyatu ecuana queja cabamereticuare. ³ Ecuana bacuareque, bacacuareque jadya micuana ecuanara cuejaya, ecuanara ejeneyaque micuanaja ejene ishu, ecuana tsehue micuana peadya camadya bucha juishu. Tume tuque ecuanaja dutya micuana tsehue ecadutyati aniya ecuanaja Etata Yusu tsehue, tuja Ebacuaque Jesucristo tsehue jadya. ⁴ Micuanara ni pana baca aya era riyaque quiricaju cuejayaque, tume micuana dyaque jida juya ecuana bucha. Jadya juatsu rique micuanaja quirica cuadishaya.

Dyaque jidaque juya tibu Yusu hueca buchique

⁵ Riyaque quisarati ri Jesucristora ecuana bahuity-acuareque. Cuejaya micuana ecuanara. Yusu tu dyaque jidaque; hueca buchique tume. Aijama tujatu jidamaque; ni apidya tujatu jidamaque aya ama. Apuda buchique ama tume. ⁶ “Yusu tsehue ecadutyati ecuana aniya”, jadya ni ecuana juya, arepa Yusu adeba baecua cuanaque aniya baedya jutidya ecuana aniajeya ama bucha, tume ecuana pusha pusha arida. ⁷ Yusu tu hueca buchique, tuque jida jujacaya ama tibu. Tuque bucha tuyu ni ecuana aniya, tume tuque ecuanaja cacareneti ishuque aniya peya cuana tsehue. Tume tura tuque ecuanaja dutya jucha apupashaya, tuja Ebacuaque Jesucristo ecuana jiteque curusuju ami quijehueta, maju jadya juhua tibu.

⁸ “Juchama ique”, jadya ni ecuana pusha pusha juya, ecuana tacadya jutidya ecuana ijahue catiya. ⁹ Jucha cuana ni ecuana Yusu queja cacuejatiya, tillayadya tuja tuque ecuanaja, tura aana ahua baedya. Dutya jidama cuanaque tuja tuque ecuanaja tillaya. Ayadya tuja tuque, tuque tuyu jujacaya ama tibu. Ayadya tujatu tura aana ahuaque ayadya tibu. ¹⁰ Aya ni ecuana quisarati: “Ique ni riya piji buchique cajuchatima”, tume taa tuque ecuana Yusu pusha pusha ariju aya, tura ecuana dutya juchaqui jadya aya tibu. Ejeneya ama di taa tuque ecuana tuja quisarati yunerique, ai ecuana tuja quisarati yuneri eque aniya batudya.

2

Cristo tu Ecuana Icuenequique

¹ Peya micuana cuejaya, ecue ebacua bucha cuanaque. Cuadishaya rique micuanaja riyaque quirica, micuana ecajuchatiuju tsahua ishu. Jadya ama bucha cajuchatiya ni ecuana, Jesucristotu ecuana icuene ishu quisaratijacaya ama ecuanaja Etata Yusuja yacuaju. Jesucristo tu tuyuque neri. Tuquetu juchama nerique. ² Tudyá cuitadyatu majuhua ecuanaja jucha cuana tsujetyaqui. Jadya tibudya tuque ecuanaja Yusura apupashaya. Ecuana jaque camadya ama tujatu apupashaya, tumbaedya dutya queja Jesús quejaque catyatiya cuanaja.

³ Yusura cuatsashaya eque ni ecuana aniya juneniya, tume tuque ecuanaja yuneridya tuatsehue cacareneti ishuque aniya. ⁴ “Yusuja ecare dyaque jida iyuhuedaque ique”, jadya ni ecuana juya, tura cuatsashaya eque aniyaque ama, jutaqui ju ecuana pusha pusha arida. Aishu ama tuque ecuanaja quisarati. ⁵ Tura amereya eque ni ecuana juya, tume tuque ecuana yuneri cuitadya dyaque iyuhueda baya. Tume ecuana yuneri cuitadya Yusu tsehue ecadutyati aniya, Yusuja

biji eque aniyaque juatsu. ⁶ Aya ni ecuana quisarati: “Yusu tsehue ecuana ecadutyati aniya”, jutaquiju ecuana Jesucristo anicuare bucha anitaqui.

Cacuatsashati iyacua eque ecuana anitaquique

⁷ Hueneya rique micuanaja quirica Jesucristora ecuana amerehuaque micuana huecasha ishu, ecue iyuhueda cuanaque. Tuja cacuatsashati tu cacuatsashati ri butseejuque ama. Tuaequeja butseeju catyatitsu tuque micuana baca-jacahua ama. Riyaque cacuatsashati beru sirique micuana bérú bacahuaquedyá. ⁸ Jadya ama bucha riyaque cacuatsashati era micuana huecashayaque ri iyacuaque; beru sirique buchique ama riyá. Butseeju ecuana Cristora riyaque yahuaju junatsu bamerenahua peya cuana ecuanaja iyuhue tsehue bataquique. Iyacua ecuana tumbaedyá peya cuana tsehue iyuhue tsehue cabatiya. Jesucristo yahuaju junahuajutu apudaque cuetiyaju, hueca iyacuaque neri huecacinaya bucha juhua.

⁹ Aya ni ecuana quisarati: “Huecaju juneniya buchique ecuana”, peya cuana Jesús queja ecatyati cuanaque ujeu bayaquedyá jutidya, pusha pusha arida ecuana. Apuda ducu aniya cuanaque jari buchique ecuana. ¹⁰ Yuneri cuitadya ni ecuana iyuhueda baya Jesús queja ecatyatique ecuana tsehuequi cuanaque, jadya juyaque aniyadya ecuana huecaju bucha, Yusuja quisarati equedyá ecuana aniya tibu. Ecuana huecaju bucha aniya tibu, tuque ecuana peya cajuchatisha ishucue aya ama. ¹¹ Ujeu ni ecuana baya ecuana tsehuequi cuanaque, apuda ducu bucha jari ecuana aniya. Apuda ducu juneniyaque tu atucama buchique; baya amatu eju cuayaque. Tumbaedyá ecuana dyadi caadebatiya amadya ecuana jidama juyaque.

¹² Umae micuana butseeju Jesús queja catyatihua, micuana ecue ebacua bucha cuanaque. Quirica rique micuanaja cuadishaya, Yusura micuanaja jucha cuana apupashahua tibu. Tura tuque micuanaja apupashahua, Jesucristo majuhua tibu. ¹³ Tata ecana, umae micuana amena bérú Jesús queja ecatyatique. Quirica rique micuanaja cuadishaya, micuanara yuneri cuitadya Jesús adebahua tibu. Yahua iyama jarijutu tuque anihua. Ehue ebari cuana, umae micuana ejetsunue ama Jesús queja ecatyatique. Quirica rique micuanaja cuadishaya, micuana Satanásra cuatsashaya eque jujacahua tibu.

¹⁴ Micuana butseeju Jesús queja ecatyati cuanaja ishu rique quirica cuadishaya, micuanara yuneridya Etata adebaya tibu. Tata ecana, quirica rique micuanaja cuadishaya, micuana Jesús yahua iyatanama jariju anicuareja eadebaque

juya tibu. Ehue ebari cuana, quirica rique micuanaja cuadishaya, micuana Yusuja biji eque ani ishucacasatijacaya ama tibu, micuana Yusuja quisarati eque aniajeya tibu, micuana Ijahuara cuatsashaya eque amena jujacahua tibu.

¹⁵ Iyuhueda nebaume Yusucahuaitishaqui cuanaque. Nebijiseriume jidama cuanaque Yusuja ama cuanara bijiseriya cuanaque. Iyuhueda ni ecuana baya Yusucahuaitishaqui cuanaque, tume taa tuque ecuana eje bucha iyuhueda bataqui amadya baya ecuanaja Etata Yusu. ¹⁶ Yusuja ama cuanaratu aya Yusucahuaitisha ishucacasatijacaya ama tibu, micuana Yusuja quisarati eque aniajeya tibu, micuana Ijahuara cuatsashaya eque amena jujacahua tibu. ¹⁵ Iyuhueda nebaume Yusucahuaitishaqui cuanaque. Nebijiseriume jidama cuanaque Yusuja ama cuanara bijiseriya cuanaque. Iyuhueda ni ecuana baya Yusucahuaitishaqui cuanaque, tume taa tuque ecuana eje bucha iyuhueda bataqui amadya baya ecuanaja Etata Yusu. ¹⁶ Yusuja ama cuanaratu aya Yusucahuaitisha ishucacasatijacaya ama tibu, micuana Yusuja quisarati eque aniajeya tibu, micuana Ijahuara cuatsashaya eque amena jujacahua tibu. ¹⁷ Dutya ecuanara riyaque yahuaju bayaque, dutya ecuanara riyaque yahuaju bijiseriya cuanaque tu tereyaquedya jutidya. Ecuana Yusuja biji eque aniaque juatsu bacue ecuana ni eje tupu tere ishucacasatijacaya ama. Yusu tsehue siri ecuana anibuque.

Cristo dyaque ujeuque juetibuqueque

¹⁸ Tere tu amena japadama, micuana ecue ebacua bucha cuanaque. Ebacadya micuanaja quisarati, terehuiepa Cristo dyaque ujeuque juetibuque jadique. Amenatu jetiama cuinanahua Cristo dyaque ujeu baqui cuanaque. Jadya tibudya tuque ecuana adebaya amena tere japadamaque. ¹⁹ Icuenu tume Cristo ujeu cuanaque ecuana tsehuedya casitatinicuare Yusu pureama aishu datse. Amena tuna ecuana tsehue casitatijacahua. Yuneri cuitadya tuna Cristo queja catyatima juhua. Tuna Cristo jaque juatsu tuna ecuana tsehue ecaradatiu jaridya. Tunara ecuana jacahuajudya tuna dyaque ejitaju juhua yuneri cuitadya tuna Jesús queja catyatima juhuaque.

²⁰ Cristora micuana mepehua; Yusuja Espiritu tura micuana tyahua. Riyaque Espiritura micuana bahue amereya ejeque yunerique, ejeque yunerique ama jadique. ²¹ Cuadishaya rique micuanaja riyaque quirica, micuanara yunerique ejeneya baatsu, ai micuanara ejeneya ama baatsu ama. Micuanaratu adebayadya; ni ejeque yuneriquetu pusha pushaque ejuu ama.

²² Cuejayadya micuana era eje cuanaque pusha pusha arida cuanaque. “Jesús tu Yusuja Emepeque ama”, jadya juya cuanaque tu pusha pusha arida. Tuna tuna Cristo ujeu cuanaque. Tuna tuna juya, Yusupa Jesúsja Etataque ama, jadya. Tumbaedy a ecana juya, Jesús spa Yusuja Ebacuaque

ama, jadya. ²³ Dutyaja yacuaju jadya juya cuanaque: “Jesús tu Yusuja Ebacuaque ama”, pana caadebati ama tatse juya ecuanaja Etata Yusu tsehue. Jadya juya cuanaque: “Ique bahue Jesús Yusuja Ebacuaqueque”, pana caadebati tatse juya ecuanaja Etata Yusu tsehue.

²⁴ Neejenejacaume yunerique quisarati micuanara Jesús queja catyatimetse juatsu bacametse ahuaque. Riyaque ni micuana inime tupuquidya jutidya aajeya, riyaque quisarati equedya jutidya ni micuana juajeya, tume micuana ecuanaja Etata Yusu tsehue, tuja Ebacuaque tsehue jadya cajacatiya ama. ²⁵ Jesúsra cuitadya ecuana tuaqueja ecatyati cuanaquepa ecuana tuatsehuedya anisiribuque jadya acuare.

²⁶ Cuadishaya rique micuanaja riyaque quirica, micuana ujeu yunerique ama ejenemerecara juya cuanara ijahue eauju. ²⁷ Cristora tuque micuanaja Yusuja Espíritu cuadishahua. Riyaque Espíritu tu micuana tsehue. Tura micuana adebamereya yunerique. Dutya tura cuejayaque tu yunerique. Tuquetu pusha pusha juya ama. Tura micuana dutya bahuityaya; sareya ama tuque micuana peyaja bahuitya ishuque. Eje bucha tura adebamereya equenejucue. Peadya camadya micuanaja inime tupu paju Cristo tsehue.

²⁸ Cuejanucaya micuana, ecue ebacua bucha cuanaque. Peadya camadya micuanaja inime tupu paju Cristo tsehue. Ejeque huecacatu junanucabuque. Tuatsehue ni ecuanaja cacareneti ishuque aniya, bajida tsehue ama ecuana tuja yacuaju cabameretibuque, tuque junanucahuaju. Tume tuque micuana bisutsu catehua ishu acara abuque ama. ²⁹ Micuana micuana bahuedya Jesucristo jida tuyuque. Jutaquiju tuyu neri ni ecuana juya, jadya equa ecuana cabameretiya tujaque, micuana micuana bahuedya jadique.

3

Yusuja ebacua cuanaque ecuana

¹ Inime netupucue Yusu Etatara ecuana eje bucha iyuhuee bayaque. Dyaque iyuhueda baatsu tura ecuana tuja ebacua cuanaque amerehua. “Micuana micuana ecue cuanaque”, jadyatu juhua. Pusha ama cuitadya ecuana tujaque. Tuja cuanara amatu adebaya ama eje bucha anie ecuana juyaque, Yusu eje buchique adebaya amadya tibu. ² Iyacia ecuana pureama juya, ecuana tuja ebacua cuanaque juya tibu, ecue iyuhueda cuanaque. Butsee rehuadya ecuana jida cabatiya, jadyaquedya ecuana judirubuque tuaqueja judirutsu! Iyacia cuita tuque ecuana pana adeba ama aya eje bucha ecuana tumeque huecaca jubuqueque. Jesucristo junanucahuaju

tuque ecuana pana petatsa abuque tuque eje buchique cuita. Bahuedya ecuana tumeque huecaca tura tuque bae juishu cabapetishabuqueque. ³ Ecuana ratu dyaque ihuaya Jesús bae judadi ishu. Turatu asicadaque ni riya piji buchique ahua ama ni apidya. Turatu Yusu pureamaturajacahua ama. Jadya tibudyatu ecuanaja dyadi ataqui ama cuitadya asicadaque. Yusu tuque ecuanaja pureamaturajacataqui ama.

⁴ Dutya cajuchatiajeyadya jutidya cuanaratu aya ama Yusura cuatsashahuaque. Jucha tu Yusura cuatsashaya eque ama juyaque. ⁵ Micuanaratu adebayadya Jesucristo cajuchatihuaque ama ni cajuchati pidya. Micuanaratu amena adebayadya tuque riyaque yahuaaju ecuanaja jucha cuana tsujetya, seca jadyara jehuaque. ⁶ Cristo tsehue ecadutyati camadya aniya cuanaque tuna cajuchatiya ama tunaja bahuedya jutidya. Cajuchatijacaya ama cuanara bacue adebaya ama Cristo eje buchique; ni tuna tuque adebaya. ⁷ Neejeneume, “Cajuchatiajetaquidya jutidya ecuana ecuanaja bahue, arepa ecuana Yusu jaque juya ama bucha”, jadya juya cuanaque. Yusuratu jida tuyu baya, Cristo jucuare bucha jida tuyu cuita aniya cuanaque camadya. ⁸ Cajuchatiajeyadya jutidya cuanaque bacue ecana Ijahua jaque. Ijahuatu yuequedya cajuchatijacahua ama. Yusuja Ebacuaquetu junahua riyaque yahuaaju Ijahua ai juyaque apupashara.

⁹ Ecuana Yusuja cuanaque ecuana cajuchatiajeyadya jutidya ama, Yusu ecuana tsehue tibu. Eje bucha ecuana cajuchatihua bucha cajuchatiajeedya jutidya ni ecuana juma, Yusu ecuanaja Etata juya tibu. ¹⁰ Dyaque ibedama tu eje cuanaque Yusuja cuanaque, Ijahuaaja cuanaque jadya adeba ishu. Tunaja bahue cuitadya jutidya jidama aniya cuanaque tuna Yusuja cuanaque ama. Tumbaedya iyuhue tsehue ama peya cuana bayaque tuna Yusuja cuanaque ama; Ijahuaaja cuanaque tuna.

Dutya tupu iyuhueda necabatira

¹¹ Cacuatshati micuanara bacahuaque butseeju Jesús queja catyatitsu bacahuaque ri riyaque: “Yurameta iyuhueda necabacaticue peya cuana tsehue”. ¹² Caín jucuare bucha nejura ama. Tuquetu Satanás dyaque jidama cuita jaque jucuare. Iyuhueda ebauque, tujatu ejuque Abel iyecuare. Abeltu jida jucuare. Caín bacue inime jidamaque cadujuticuare. Jadya tibudya tujatu jishatsu ejuque iyecuare.

¹³ Bape nebaume Yusuja ama cuanara ujeu bayaju, ecue eatsehuequi bucha cuanaque. ¹⁴ Iyacia tuque ecuana iyuhueda baya ecuana tsehuequi cuanaque; caadebatiyadya ecuana amena iyacuanetanahuaque. Icuene tuque ecuanaja

Yusu queja judiruya jadya ama inime juhua; emaju bucha ecuana anihua. Iyacua bacue ecuana emaju ama. Peya cuana iyuhuedama bayaque jari tuna emaju bucha. Japada tunajatu Yusu baya. ¹⁵ Yusuratu tuja inimeju tuatsehuequique ujeu baquique equiyeti bucha baya. Quiyeti puji ni inime cacuaretiya ama, majutsutu Yusu queja judirubuque ama. Micuana micuana bahuedya jadique. ¹⁶ Cristo ecuana jiteque majuhuaque inime aatsu tuque ecuana adebaya iyuhue yunerique neri. Tumbae iyuhueedya tuque ecuanaja bataqui tuaqueja ecatyati cuanaque, ecuana tsehuequi cuanaque. Tuna iyetacara juya baatsu ecuanadya ecuana quiyemeretitaqui tuna iyeta ishü ama. ¹⁷ Iyuhue tsehue tuque ecuanaja bataqui nerecadaque Jesús queja ecatyatique. Tu puni ecuanaja ai aniya, tyataqui tuque ecuanaja ai. Tsahuaya ama ni ecuanara ecana eje bucha iyuhueda bae ni tuque ecuana yuneri Yusu ama. ¹⁸ Yurameta iyuhueda ecuana peya cuana tsehue cabatiya jadya camadya ama nejura. Yurameta catsahuati peya cuana tsehue nejura. Netyara nerecada cuanaque tunara ai sareya cuanaque. Jadya bameree tuque ecuana ecana aya, yuneridya ecuanara iyuhueda bayaque.

Bajida tsehue ama, bisuma jadya ecuana Yusu queja judirubuque

¹⁹ Yuneridya ni ecuana peya cuana tsehue iyuhueda cabatiya, caadebatiyadya ecuana quisarati yuneri eque juyaque. Jadya tibu taa ecuana pereu tsehue ama Yusuja yacuaju cabameretitaqui. Aijama tuque ecuanaja baji jutaqui ni riya piji buchique tuatsehue catsuruti ishü. ²⁰ Yusura ecuana pana adeba aya ecuana eje buchique, ecuanaja cuita inime tupu cuana. Arepa ecuana ecajuchati cabatiya ama bucha, adebataqui tuque ecuanaja tura iyuhueda bajacayaque ama. ²¹ Cajuchatima ni ecuana cabatiya, bajida amadya ecuana cabatiya Yusu tsehue quisarati ishü. ²² Tura cuatsashaya eque ni ecuana juajeya, tuja biji eque ni ecuana aniya, tume tura ecuana tyaya dutya ecuanara bacayaque. ²³ Yusuja cacuatsashati tu: "Ecue Ebacua Jesucristo queja necatyaticue. Yurameta iyuhueda necabaticue, tura micuana cuatsashahua bucha". ²⁴ Yusura cuatsashaya eque ni ecuana aniya, tume ecuana Yusu tsehue, tuque bacue ecuana tsehue jadya. Bahuedya ecuana Yusura jacayaque ama, tuja Espiritu ecuana tsehuedya tibu.

4

Yusuja Espiritu tsehueque, Cristo ujeuja espíritu tsehueque jadique eje bucha adebae ataquique

¹ Jetiamatu ijahue cati puji cuana aniya riyaque yahuaju, Yusuja quisaratipa ecuejau jadya juya cuanaque. Pusha pusha arida tuna. Neejeneume ecana. Ejeque ni, “Yusuja quisarati tuque cuejaya” jadya juya, nenime adebacue, ejepa tuque quisaratishaquique, Yusuja Espíritu, jadya ama juatsu tuque ama jadique. ² Cuejaya micuana era eje cuanaque yuneri cuitadya Yusuja Espíritu eque quisaratiya jadique. Yusuja Espíritu tu, “Jesús tu Mesías. Cacuitatitsutu ecuana cuinanahua baedya cuinanahua”, jadya juya cuana tsehue. ³ Yusuja Espíritu tu, “Jesús tu Mesías ama. Ecuata bucha amatu cuinanacuare”, jadya juya cuana tsehue ama. Cristo ujeu baqui espíritu eque tuna quisaratiya. Micuanaratu cuejayaju bacahuadya, tumequetu Cristo ujeu junabuque jadique. Yuneridya amenari jetiama aniya riyaque yahuaju tumeque junayaque cueja juya cuanaque.

⁴ Micuana micuana Yusu jaque, ecue ebacua bucha cuanaque. Micuana micuana Jesús queja nimee jujacama, arepa micuana tume pusha pusha arida cuanara tuaqueja nimee amerejacacara aya ama bucha. Micuanaratu casa butyahua tume cuanaque. Yusuja Espíritu micuana tsehueque tu dyaque casadaque, Yusuja ama cuanaque tsehueque bucha ama. ⁵ Tume pusha pusha arida cuanaque tuna Yusuja ama cuanaque. Jadya tibudya tunajatu Yusu jaque amadya quisarati aya. Yusuja ama cuanaja tuna bijida ijacobaca ishu. ⁶ Ecuana ecuana Yusuja cuanaque. Yusuja cuanara ecuana pana ijacobaca aya. Yusuja ama cuanara ecuana ijacobacacarama aya. Quisaratijaju bacaqui cuana equedya tuna adebataqui Yusu equeque, jadya ama juatsu Yusu equeque ama jadique. Jadya ejitajuetu juya ejeque yuneri quisaratiyaque, yuneri ama quisaratiyaque jadique.

Yusura dutya ayaque tu ecuana tuja iyuhue bamere ishuedya jutidya

⁷ Iyuhuedadya jutidya peya cuana tsehue necabatiajera, Yusura ecuana iyuhueda cabatishaya tibu, ecue iyuhueda cuanaque. Iyuhueda tsehue cabatiya cuanaque tuna Yusura iyacuanehua; Yusu jaquedya tuna. Tuja pana adeba eaque tuna. ⁸ Iyuhuedama ni ecuana peya cuana Cristo queja ecatyati cuanaque baya, jutaquiju tuque ecuanaja Yusu pana adeba ama jari ea, Yusura ecuana tuja iyuhue bamere jacaya ama tibu. ⁹ Tuja Ebacuaque peadyaque riyaque yahuaju ecuana jiteque maju ishu cuadishatsu, ecuana Yusura bamerehua ecuana queja tuja dyaque iyuhue aniyaque. Ecuana jucha cuana tsujetyaqui tujatu cuadishahua, tuatsehue siri ecuana anidiru ishu. ¹⁰ Icuene tuque ecuana Yusu iyuhueda ama bahua. Tura bacue ecuana dyaque

iyuhueda bahua. Ecuana dyaque iyuhueda baatsu tujatu Ebacuaque ecuana jiteque maju ishü cuadishahua. Ecuana jucha cuana tsujetyaqui tujatu cuadishahua. Jadya bameree tura ecuana ahua ecuanaja peya cuana iyuhueda baishuque.

¹¹ Yusura ecuana dyaque iyuhueda bahua, ecue iyuhueda cuanaque. Tura ecuana eje bucha iyuhuee baya bucha, jadidya tuque ecuanaja peya cuana iyuhueda bataqui. ¹² Eje bucha bae ni tuque ecuana Yusu ama. Jadya ama bucha, peya cuana tsehue ni ecuana iyuhueda cabatiya, bamereya tuque ecuana Yusuja iyuhue eque tura ecuana amerecara aya bae amerehuaque. Bamereya tuque ecuana, tuque ecuana tsehueque. ¹³ Pana ejenedya tuque ecuana aya, Yusu ecuana tsehueque, ecuana tuatsehueque, tura tuja Espiritu cuitadya ecuana queja ani ishü cuadishahua tibu. ¹⁴ Ecuana Jesúsra mepecuare cuanara tuque ecuana bacuare Ebacuaque Yusura riyaque yahuaju cuadishacuareque. Cuejajacaya ama tuque ecuana tuja Etataque Yusura riyaque yahuaju aniya cuanaque Ijahua quejaque inajacamerera cuadishahuaque. ¹⁵ Dutyaja ijacaju ni ecuana, “Jesús tu Yusuja Ebacuaque”, jadya aya, tume ecuana Yusu tsehue, tuque bacue ecuana tsehue.

¹⁶ Jadya bahuee, ejenee jadya tuque ecuana aya Yusura iyuhueda bayaque. Yusura ecuana tuja iyuhue bamerejacya ama. Tuque iyuhueda, peya cuana iyuhueda jadya ni ecuana baya, tume ecuana Yusu tsehue aniya, Yusu bacue ecuana tsehue. ¹⁷ Iyacia ecuana Yusura peya cuana iyuhueda bamereya, tura iyuhueda bamerecara aya bucha. Jutajudya ecuana ni riyá piji buchique bajida jubuque ama Yusura cuatsashaya eque ama aniya cuanaque nerecaturayaju. Peya cuana ni ecuana iyuhueda baya Cristora iyuhueda baya bucha, bisuma neri ecuana tuja yacuaju judirubuque. ¹⁸ Bajida juatsu ama tuque ecuana ecuanara iyuhueda baya cuanaque jipeya. Eje buchadya jacacarama tuque ecuana aya ecuanaja iyuhueda cuanaque. Ecuana nerecaturaqui cuanaque bacue ecuana jipecarama aya. Jadya tibudya, bajida ni ecuana Yusu jipe ishü juya, tuque iyuhuedama cuita baatsudya tuque ecuana jipecarama aya.

¹⁹ Ecuana ratu Yusu iyuhueda baya, tumbaedyá peya cuana, icuene cuita ecuana Yusura iyuhueda bahua tibu. ²⁰ Pusha pusha tu, “Yusu tuque iyuhueda baya” Jesús queja ecatyatique ujeu bayaquedyá jutidya. Bama tuque ecuanaja Yusu. Ecuana tsehuequi cuanaque camadya tuque ecuana bayadya. Iyuhueda ama ni ecuana baya dutya huecaca baya cuanaque, eje bucha iyuhueda bae jatsu tuque ecuana eau bayaque ama cuitaque. ²¹ “Micuanara ni ique yuhueda

baya, tumbaedyá micuana tsehuequi cuanaque iyuhueda nebacue”, jadya ecuana Yusura cuatsashahua.

5

Yusuja casa eque tuque ecuana eiduu riyaque yahuaju cuanara cajuchatishacara ayaju

¹ Yusuratu tuja ebacua cuanaque bucha baya dutya, “Jesús tu Mesías Yusuja Emepeque”, jadya ejenequi cuanaque. Iyuhueda ni ecuana baya Yusu Etata, tumbaedyá tuque ecuanaja iyuhueda bataqui Jesús queja ecatyati cuanaque, tuna dyadi tumbaedyá Yusu jabacua cuana juya tibu.

² Ecuana Yusu iyuhueda baatsu, tura cuatsashaya eque anitsu, ecuana bahue juya tumbaedyá ecuanara tura ebacua cuanaque bucha bayaque iyuhueda bayaque. ³ Yuneridya ni ecuana Yusu iyuhueda baya, tura cuatsashaya equedyá ecuana aniya. Masada ama tu tuja cacuatsashati cuana eque ani ishu; ai jataque abu ishu buchique jutidya tume.

⁴ Yusuja cuanajatu aniya casa Yusuja ama cuanara tura cuatsashaya eque juyaju tunara amerejacacara ayaju idu ishu. Ecuana Jesucristo queja catyatihua tibu, tura ecuana tsahuaya Yusuja ama cuanaque juya bae ejuuju. ⁵ Jesús Yusuja Ebacuaqueque ejeneya cuanaque cuita camadyatu aniya Yusu adeba baecua cuanaque bucha ama.

Jesús Yusuja Ebacuaque jadique ecuana queja yuneri adebamere ishuque

⁶ Jesús riyaque yahuaju junahuajutu ejitajudya juhua tuque Yusuja Ebacuaqueque. Ejitajutu juhua tuque ena tsehue cutsameretihuaju. Tumbaedyatu ejitaju juhua tuque curusuju ami quijehuetitsu majuhuaju. Cutsameretihuaju camadya ama, tumbaedyá tuque curusuju ami quijehuetihuajutu ejitaju juhua tuque Yusuja Ebacuaqueque. Riyaquedyá ecuana Yusuja Espiritura adebamereya. Tuquetu pusha pusha baecua. ⁷⁻⁸ Aniyatu quimisha, “Jesús tu Yusuja Ebacuaque”, jadique ejitaju amerequi cuanaque. Yusuja Espiritura ecuana ejitaju amereya. Jesús ena tsehue cutsameretihuajutu ejitaju jucuaré. Tuque curusuju ami quijehuetihuajutu ejitajudya jucuaré. Jadya equetu quimisharadya ejitaju amereya Jesús Yusuja Ebacuaqueque; quimishara tunajatu dutyara tupu adebamereé aya. ⁹ Yusu cuitadyatu, “Jesús tu ecue Ebacua”, jadya juhua. Ecuaita yuneri aquí cuanaque ejeneya tibu, dyaque di taa tuque ecuanaja Yusura cuejayaque ejenetaquí, tuque dyaque inime metseque juya tibu. ¹⁰ Yusuja Ebacuaque queja catyatihua cuanaque tuna Yusuja Espiritu eque pana quejeneti eju yuneridya Jesús Yusuja Ebacuaqueque. Yusu ejeneya

ama cuanaratu cuji cuita juatsu Yusu pusha pusha ar-
 iju aya. Tunaratu ejenecarama aya tura “Jesús tu ecue
 Ebacua”, jadya acuareque. ¹¹ Rियाque tu Yusura cue-
 jacuareque: “Era micuana tere baecua anishaya. Micuana
 ecue ebacua queja catyatihua tibu, era micuana tere baecua
 anishaya”. ¹² Yusuja Ebacuaque queja ni ecuana catyatihua,
 tume ecuana iyacuanetanahua. Majutsu ecuana Yusu queja
 judirubuque ni eje tupu jaca ishuhua. Yusuja Ebacuaque
 queja ni ecuana catyatima, iyacuanema ecuana. Tume
 ecuana Yusu tsehue anidirubuque ama.

Amena ishuhua quisarati

¹³ Micuana era quirica cuadisha ishuhua ayaque Yusuja
 Ebacuaque queja micuana catyatihua. Jadya tibudya
 micuana iyacuanetanahua. Majutsu micuana Yusu queja
 judirubuque ni eje tupu jakanuca ishuhua. Cuadishaya
 rique micuanaja quirica, micuana pana adebamere aishuhua.
¹⁴ Tuja biji eque ni ecuana bacaya, tume tuque ecuana pana
 ejene aya Yusura ecuana ijacabacayaque. Jadya tibudya
 ecuana bajida tsehue ama quisarati bahue tuatsehue.
¹⁵ Bahuedya ecuana, ecuanara isarayaju tura bacama ama
 ayaque. Turatu ijacabacayadya ecuanara ai bacayaque.
 Jadya tibu ecuana bahuedya amena ecuanara ai bacahuaque
 tyayaque.

¹⁶ Ejeque ecuana tsehuequique cajuchatihuaaju, bacaba-
 cataqui ecuana Yusu queja tuja ishuhua, tuque inime cacuareti
 ishuhua. Tuque ni inime cacuaretiya, Yusura tujatu jucha cuana
 apupashaya. Tumetu majutsu Yusu queja judirubuque.
 Jadya tuque ecuanaja bacataqui maju ishuhua ama ca-
 juchatihua cuanaja ishuhua. Aniyatu jucha majudadi ishuhua.
 Tumeque ni jadya cajuchatie juhua, cuejaya micuana era.
 Tumeja ishuhua Yusu queja nebacabacaume. ¹⁷ Dutya ji-
 damaque tu jucha. Jadya ama buchatu aniya jucha majudadi
 ishuhua ama.

¹⁸ Ecuana Yusuja cuanaque ecuana cajuchati bahue juhua
 eque cuita ama cajuchatiya, Yusuja Ebacuaquera naruya
 tibu. Tura ecuana naruya, dyaque jidama bacaniya ecuana
 yuamatura ishuhua ama.

¹⁹ Bahuedya ecuana, ecuana Yusuja cuanaque. Dutya
 riyaque yahuaju cuanaque bacue ecana Ijahuara cuat-
 sashaya eque aniya.

²⁰ Bahuedya ecuana Yusuja Ebacuaque riyaque yahuaju
 junahuaque. Tura ecuana bahuityahua Yusu eje buchique.
 Tuque peadya tu Yusu neri. Amena tuque ecuana pana adeba
 aya. Iyacua ecuana peadya camadya bucha Yusu tsehue,
 peadya camadya bucha Ebacuaque Jesucristo tsehue bucha

juya tibu. Tuquetu Yusu neri cuitadya. Tura ecuana anishaya tere baecua. ²¹ Necanaruticue, micuana ecue e bacua bucha cuanaque. Nejacacue ejeque micuana Yusu jacamerequi ejuuque.

Riya tupu camadya.

Juan

BETA ISHUQUE QUIRICA JUANRA CUADISHACUAREQUE 2 JUAN

Riyaque quirica ri Juan, Jesúsja emepera cuadisha beta ishu cuadishacuareque. Amena esiri cuitara rejari huenequere. Jesús queja ecatyati cuanaja ishu Yusuja emepe cuanaja ishu jadya rejari cuadishacuare. Quisarati yuneri eque ani ishu tujatu ecana cuejacuare. Cuejacuare tujatu ecana iyuhue tsehue yurameta cabati jujaca ishuque ama. “Juetibuquetu Jesúsja cuanaque pusha pusha tsehue ijahue aqui jubuque cuanaque”, jadyatu jucuare. Bacataqui amapa tuque ecuanaja tume yunerique ama bahuityaqui cuanaque.

Umae versículo cuana jida cabahuityati ishuque ri: 3, 4, 9 jadya.

Catibuti ishuque quisarati

¹ Cuadishaya rique micue quirica, mama. Miquemi Yusuja emepeque epuna. Tumbaedyaya rique cuadishaya micue bacua cuanaja ishu. Ique esiri, Jesús queja ecatyati cuanaque naruquique, yuneri cuita juya cuanaque naruquique. Pusha ama cuitadya micuana iyuhueda baya. Era camadya ama, tumbaedyaya Yusuja quisarati yuneri eque aniya cuanara micuana iyuhuedadya baya. ² Era micuana iyuhueda baya, micuanara dyadi era yunerique quisarati ejeneyaque nucadya ejeneya tibu. Yuneri eque ecuananijacanime ama. Tumequedyaya tuque ecuananime tupuqui aya.

³ Ecuana Etata Yusura, tuja Ebacuaque Jesucristora jida tsehue nenarucue tatseja quiyuhuebati tsehue. Tatseja canerecabati micuana tsehue paani. Tatsera inime tsapema tsehue neanishacue. Jadyatu micuana tsehue jubuque, micuana quisarati yuneri eque aniyaque juatsu, micuana peya cuana tsehue iyuhueda tsehue cabatiyaque juatsu.

Quisarati yuneri eque ecuananiquique, iyuhue tsehue ecuananiquique

⁴ Caturutichine ique micue bacua cuana tsehue. Dyaque ique pureama juchine, tuna quisarati yuneri eque aniya baatsu. Ecuana Etata Yusura cuatsashahua bae cuitadya tuna aniya. ⁵ Mama, “Yurameta iyuhueda necabaticue peya cuana tsehue”, jadya mique cuejaya. Riyaque cacuat-sashati ri iyacuaque ama. Jesús queja catyatimetse juatsu tuque ecuananibacahua. Jadya ecuananijataqui, micuana ecue iyuhueda cuanaque. ⁶ Pusha amadya ni ecuananipeya cuana

tsehue yurameta iyuhueda cabatiya, tume ecuana Yusura dutya cuatsashahua eque aniya. Jesús queja catyatimetse juatsu tuque micuana cuejayaju bacahua, tura ecuana yurameta iyuhueda cabatishacara ayaque.

Ijahue necatimereume pusha pusha bahuityaqui cuana queja

⁷Jetiama ijahue cati puji cuanatu dutya yahua queja anibareya. Cuji cuita juatsu tuna juya: “Jesucristotu ecuita ama jucuaré”. Jadya quisaratiya cuanaque tuna ijahue cati puji cuana. Tuna tuna Cristo ujeuque. ⁸Pana tupu inime neacue, tunara ijahue eauju. Ijahue ni tunara micuana aya, tume tuque micuanaja jubuque ama Yusuja tuque jida merequi cuanaja ishuaniaque. Ejeneajeyadya jutidya ni micuana yunerique, Yusura micuana dyaque jida tsujetyabuque, tuque merehua tibu. Micuanajadyatu jubuque tura dutya tyacara ayaque.

⁹Aniyatu Cristora bahuityahuaque camadya ama bahuitya juya cuanaque. Tunaja adebadya jutidya tunajatu bahuityaya. Tume cuanaque tuna Yusu tsehue peadyaque camadya ama. Cristora bahuityahuaque ejeneajeyaquedya jutidya bacue ecananaja Etata Yusu tsehue peadya camadya bucha, tumbaedyatija Ebacuaque tsehue. ¹⁰Juetiya ni Cristoja quisarati bape bahuityaqui cuanaque, nebatsaume micuananaja etareju. “Yusura nenarucue”, jadya ecananahme. ¹¹Micuananara ni ecananajida batsaya, “Yusura nenarucue”, jadya tsehue batsatsu, tume tuque micuana ecananatsahuaya tuna jidama juyaque. Yusura micuana bayamicuana cuitadya jidama juya bucha.

Amena ishucue quisarati

¹²Aniya jari tuque ecue micuana cuejacara ayaque. Jadya amabucha micuana cuejaya amaquirica eque. Micuana cuitadya micuana cuejaticara aya. Cuacara juyamicuana isarara, ecuana dutya cabatitsu jidapureama juishu.

¹³Miatsehuequi epunaja ebacua cuanaquera micuana isaramereya. Tuquetu Yusuja emepequedya.

Riya tupu camadya.

Juan

QUIMISHA ISHUQUE QUIRICA JUANRA CUADISHACUAREQUE 3 JUAN

Riyaque quirica ri Juan, Jesúsja emepera quimisha ishu cuadishacuareque. Amena esirira rejari huenecuare. Cuadishacuare rejari Jesús queja ecatyati cuanaque naruquiya Gayo bacaniya ishu. Gayora, Demetriora jadyatu jida Yusu mereya. Diotrefespa jidama aniya jadya tujatu cuadishacuare quirica. Riyaque quirica eque ecuana bahue juya Yusu ecuanaja meretaquique, tuque ecuanaja ani tsehue pureamaturataquique.

Versículo ecuatse jida cabahuityati ishuque ri: 3, 11.

Catibuti ishuque quisarati

¹ Quirica rique micue cuadishaya, Gayo. Ique esiri, Jesús queja ecatyati cuanaque naruquique. Iyuhueda mique baya, mira yunerique ejeneya bucha ejenee era dyadi aya tibu.

² Arequemi dutyaju jida ejuu; jidami ejuneni, ecue iyuhuedaque Gayo. Ique bahue mique Yusuja biji eque aniyaque. Bacatsahua tuque micue quisarati. ³ Jesús queja umae ecatyati cuanaque rena tuhua miaquejaque junachine. Cuejachine tunara ique miquepa yuneri eque aniya jadique. Yusuja biji eque cuita pami aniya. Jadya bacatsu ique dyaque pureama juchine. ⁴ Era Jesús queja catyati tsahuahua cuanaque yuneri eque juyaque quisarati bacatsatsu, ique dyaque pureama juya. Ni peya aira ique pureama amereya ama.

Gayo sumitanacuareque

⁵ Ecue iyuhuedaque Gayo, cuejachine tunara ique mique eje buchique. Mirapa dyaque tsahuaya micue miatsehuequi cuanaque, micue epuju jutyaju. Arepa peya epuju cuanaque ama buchami ecana jida batsaya. Jadya mique juyaque tu dyaque tuyuque. ⁶ Cristo queja ecatyati cuanaque ecasitatija yacuajutu cuejachine mira tsahuachine cuanara: “Gayora ecuana dyaque iyuhueda tsehue tsahuachine”. Micue epu eque tuna cuetinucayaju ecana tsahuanucacue, tunara ai sareya tsehue tuna eju cuayaju. Tunara Yusu mereya tibu, ecana batsacue; Yusu cuitadya ebatsau bucha batsae ecana acue. ⁷ Jesucristo merera tuna cuachine. Bacachine ama tunajatu Jesús queja catyatima cuanaque tuna tsahua ishu. ⁸ Jadya tibudya tuque ecuanaja ecana tsahuataqui, ecuana Jesús queja ecatyati cuanara. Ecuana ecana jadya tsahuae ayaju, Yusura ecuana baya ecuana cuitadya tuja quisarati

cueja juya bucha, arepa ecuana tuna tsehue ama juneniya ama bucha.

Diótfes jidama jucuaque

⁹ Cuadishachinedya tuque quirica eje junu ehuenegue ama Jesús queja ecatyati cuanaja ishu. Diótfestu juya; tuja quisarati cuita camadyapa ecuita cuanara pabaca, jadya peya cuana jaque bacue aijama. Jadya tibudya, tujatu quirica isarayaju bacacarama achine. Turatu bacacarama achine era cuatsashachineque. ¹⁰ Ique jutitsu tuque dutyaja ijacajudya cuejaya tuque eje bucha juyaque. Ecue ishutu pusha pusha juya. Yuamaturacara tura aya tuja quisarati tsehue. Ecue ishu camadya ama tujatu jidama quisarati aya. Tumebaedya tujatu jidama peya cuana aya. Yusu merequi cuanaque tuja epuju junayaju tujatu ecana batsaya ama tuja etareju. Peya cuanara batsacara ayaju tujatu ecana batsamerecarama aya. “Micuanara ni ecana micuanaja etareju nudyatsaya, tume micuana ecuana tsehue casitatitaiqui ama Jesús pureama aishu”, jadya tujatu ecana aya.

¹¹ Ecue iyuhuedaque Gayo, jida cuanaque juya bae jucue, jidama cuanaque juya bucha ama. Jidaquedya jutidya aajeya cuanaque tuna Yusuja cuanaque. Jidamaque jutidya aajeya cuanaque bacue ecana, tuja cuanaque ama.

Demetrio jida jucuaque

¹² Dutyara tunajatu Demetrioja ishu jida quisarati aya. Tuquetu yunerique quisarati eque jujacaya ama. Era dyaditu ejeneyadya tuque jidaque ecuitaque. Miratu ejeneyadya era quisarati yunerique ayaque.

Amena ishuque quisarati

¹³ Bataqui ama tuque ecue jetiama mique cuejacara ayaque. Jadya ama bucha mique cuejaya ama quirica eque. Midya cuitadya mique cuejaticara aya. ¹⁴ Masadama mique bacara aya. Tume yatse cuitadya nequisarati.

Yusura inime tsapema amerecue. Rehua mique adebaqui cuanarami isaramereya. Isaracue dutya tuhua ecue eadeba cuanaque.

Riya tupu camadya.

Juan

QUIRICA JUDASRA CUADISHACUAREQUE JUDAS

Riyaque quirica ri Judas, Jesús tsehuequira cuadishacuareque. Cuejacuare rejari Pedrora beta ishuhue quiricaju cuejacuareque nucadya. Huenecuare rejari terehuie judadibuqueque. Huecashacuare tujatu ecana yunerique ama bahuityaqui cuanaque aniyaque. Casaturacuare tujatu ecana quisarati tsehue Jesús queja nimee juaje ishuhue, arepa canerecati, jidamaque inime cuana aniya ama bucha. Tumeque huecaca juetihuajutu Jesucristo cuita camadya, casada, tuaqueja nimee cuita camadya juishu ecuana tsahua ishuhue.

Umae versículo jida cabahuityati ishuhue cuanaque ri: 20-22; 24-25.

Judasra Yusuja cuanaque quirica eque isaracuareque

¹ Era rique micuanaja quirica cuadishaya. Ique Judas. Jesucristo merequique ique; Santiagoja ejuque ique. Cuadishaya rique quirica micuana dutya queja Yusuja cuanaja ishuhue. Dyaque iyuhueda micuana Ecuanaja Etata Yusura baya. Jesucristora micuana tachiya, micuana tuaqueja nimee jujaca ishuhue ama tuque junanucaya tupu. ² Yusuja micuana tsehue dyaque canerecabati paani. Tura inime tsapema neanishacue. Yusura micuana iyuhueda tsehue bayaque dyaque jida neadebaajecue.

Pusha pusha bahuityaqui eque bucha judadiyaque (2 Pe 2.1-7)

³ Ecue eatsehuequi cuana iyuhueda cuanaque, micuanaja ishuhue quirica huenema jarira eque buchadya cuadishacara tuque micuanaja ahua quirica, Yusura ecuana eque bucha Ijahua quejaque inajacameere ayaque datse.

Iyacia micuana peya cuejanucacara aya. Jetie ama pusha pusha bahuityaqui cuanaque aniya tibu, cuejataquidya micuana ecue tuna eque buchique. Casaturacara micuana aya, micuanara yunerique eejenejacauju quisarati cuaretanayaque ama Yusura tuja cuanaque bahue amerehuaque. Cuejacara micuana aya, bajida tsehue ama micuanaja Yusuja quisarati yunerique cuarecara juya cuanaque quemitsa ishuhue.

⁴ Micuanaratu adebahua ama tumeque ijahue cati puji cuana micuana ducuque. Tuna tuna dyaque jidama cuita. Dyaque bisutada cuita tuna juya. “Yusu dyaque jida cuita juya tibu, nerecaturanime ama tuja ecuana, arepa ecuana bisutadaque, jidamaque aya ama bucha”, jadya tunajatu

yanacana cuita inime tupu bahue. Tuna eje bucha juya eque, quisaratiya eque jadya tuna ejitaju Ecuana Cuatsashaqui jaque ama. Pusha ama cuitadya tuna Yusura nerecaturabuque. Tura béru jadya huenemerehua eque cuitadyatu judadiya.

Yunerique ama bahuitya juya cuanaque nerecada judadibuque

⁵ Arepa micuana amena bahue ama bucha, micuana huecashionucacara aya béru Yusura cuatsashaya eque anicarama jucuaré cuanaque. Neadebacue icuene cuita ecuanaja baba cuana israelita cuana. Tuna Egiptoju canerecetiayaju tuna Yusura tsahuacuare huanayaju. Arepa jadya cuinanashae ahua ama bucha, cuinanashatsu tujatu ecana aputashacuare tura cuejahuaque ejenehua ama cuanaque, tura amereya eque juhua ama cuanaque jadya.

⁶ Tuequedya neadebanucacue barepa juque Yusu tsahuaqui cuanaque tura amereya eque ama jucuaré cuanaque. Icuene cuita tuna anicuare Yusuja yacuaju, tuja yana equedya juyaque. Tuequedya tunajatu merecarama ahua. Dyaque inime metse ecana cabatihua. Jadya baatsu tuna Yusura tuja yacua juque ijehuecuinahua japada. Dyaque tujatu ecana nerecaturaya, nerecaturadadiya. Eje bucha huanataqui ama tuna. Iyacia tuna erisique etare apuda ducu eishaque bucha. Jadya tuna eiya jubuque Yusura tuque dutya muiba baecua cuanaque nerecaturaya tupu.

⁷ Tumebaedya neadebacue Sodomaju, Gomorraju, umae epu cuana japadamaju anicuare cuanaque. Yusu tsahuaqui cuana jidama cuanaque jucuaré bucha tuna Yusura amereya eque juhua ama. Jaraquere bahue tunaja juhua tunaja caquemitiqueremaque. Dyaque bisutadaque tunaja abahue juhua. Deca cuanaja jaraquere bahue juhua deca cuinetsedya jutidya, epuna cuana, epuna cuinetsedya jutidya. Jadya tibudya tuna Yusura dutya tumeque epuju cuana tsehue etiqui dyaque arida tsehue pana tilla acuare. Tuna etiqui tsehue tillatacuare tibu, tuequedya tuque ecuana adebaya dutya Yusuja yana equedya jucarama juya cuanaque ijahuaja etiquiju ishatanabuqueque ni eje tupu cuinana ishuhua ama. Jadya ejitajuetu Yusura amereya tura dutya tuja yana baca baecua cuanaque nerecaturadadiyaque.

Pusha pusha bahuityaqui cuanaque jidama jujacayaque ama

⁸ Arepa Yusuja yana equedya jucarama juya cuanaque Yusura canerecatishabuqueque bahue ama bucha, pusha pusha bahuityaqui cuanaratu Ecuana Cuatsashaquique

muibacarama ebari aya. Tahuijupa ecana Yusura cuejahua tuna eje bucha anie juishuque. Jadya tuna pusha pusha jubahue. Tunaja caquemitiquerema cuanaque tuna jaraquereya. Ai bisutadaque tunajatu ajacaya ama. Ijillahuanaya tuna barepaju dyaque casada cuanaque. ⁹ Bahuedya ecuna dyaque casa aniya cuanaque ijillahuana jidamaque. Arepa Miguel barepa juque Yusu tsahuaqui dyaque casadaque paju ama bucha, turatu Satanás ijillahuanahua ama. Tatse Moisés yanumeja ecuita eje bucha judadiyaque cati cati ishü ayaquetu Miguelja inime juhua: “Jidama tuque ecue Ijahua eje bucha juyaque cueja ishü, ijillahuana ishü jadya”. Jadya tibudya tujatu Ijahua isarahua: “Yusura nereda acue”, jadya camadya tujatu acuare. ¹⁰ Tume pusha pusha bahuityaqui cuanaque bacue tsaya jutidya tunara Yusu jaque adebaya ama tsehue. Inimema tuna. Cuanubi cuana bucha jutidya tuna aniya tuna cuita camadya capureamaturatiyaque. Jadya anie juyaju tuna Yusura canerecatishabuque.

¹¹ ¡Dyaque jidama taa tumeque ecuita cuana! Pusha ama cuitadya tuna Yusura nerecaturadibuque. Tuna tuna Yusura amereya eque jucarama juya ni tuna peya cuana iyuhueda bacara aya. Caín buchique tuna ejuque iyequi jucuareque. Tunaratu yunerique ama bahuityajacaya ama, tuna cuita camadya cachipiruti ishü. Balaam jucuare buchique tuna. Huaraji cuanara cuatsashaya eque jucarama tuna juya, Coré béru Moisésra cuatsashaya eque jucarama jucuare bucha. Majudadibuquedya tuna. Jacabuque tunajatu Yusu ni eje tupu jipe ishü ama. ¹² Tumeque ecuita cuana tuna bisutada. Pajadaju asicadaque bucha tuna. Micuana iyuhueda cabatiyaque cabamereti ishü peya cuana tsehue casitatitsu ararayaju, tuna dyadi tuna tuhuadya. Jadya ama bucha tuna tuna cuita camadya capureamaturaticara juya. Bisu baecua tuna dyaque cuita ijijiji nijuqui, araara jadya juatsu. Uhuisha cuana naruquique jidamaque buchique tuna, tunadya jutidya ecana canarutiya, uhuisha cuana buchique enaruuque. Tuna nime ama bucha tuna. Barepa huani sehuedaque nei juyaque ama cuejijira aque-reniyaque bucha tuna. Acui tuja maraju cacacatiyaque ama bucha tuna. Cacama batitsu tuna emechiquera mutsumereya. Jadya aatsu yuneri cuitadya tu acui aishu ama jida, cacama; ni eje tuputu cacacatiya amadya. Jadidya tu tume cuanaque. Aishu buchique tuna jida ama; ai jidaque tunajatu aya ama. ¹³ Tumeque ecuita cuanaratu aya ai asicadaque bisutadaque. Tuna tuna cueri cuanaja ecuaqueja ena pacura mejijiju uba asicadaque iyatiya buchique. Tuna

tuna purari cuana tunaja eanicuareju ama buchique. Eju juticara juyaque tumeque purari cuana petaajetsu juticara juyaque ejutiú ama, tumbaedyatu bahuitya bahuityaqui cuanaque Yusu queja judirubuque ama. Yusratu yunerique ama bahuityaqui cuanaque tuque japada nityabuque ni eje tupu jipe ishú ama. Erisique etare apudaju netiya bucha tuna jubuque.

¹⁴ Neadebacue Enocra quisarati acuaque. Tuquetu anicuare yahua nanada jariju. Tuquetu Adán eque ejuracanaque jucuare. Tuquetu Adán equeque pacarucú juracana ejuque jucuare. Beru Enoc aniya patyatu Yusura bamerecuare eje bucha teree judadiyaque. Baatsutu Enoc jucuare: “Bahua tuque Ecuana Cuatsashaquique junayaju. Barepa juque Yusu tsahuaqui cuanara piyebatilla tupu amaratu tajibuque. ¹⁵ Junatsu tujatu cuejanabuque dutya eje bucha judadiyaque. Jida cuanaque tuja cuanaque tujatu jida abuque. Jidama cuanaque tujatu abuque: ‘Micuana micuana eaqueja catyatihua ama. Era cuatsashaya eque ama micuana juhua, dutya ai jidama juyaque. Cahuaitihua micuana eatsehue. Ijillahuanahua micuanara ique. Jadya tibu micuana micuanadya inime metse. Necanerecaticue’ jadya tuna abuque Ecuana Cuatsashaquira”, jadya patu Enoc jucuare tahuiju baatsu.

¹⁶ Tumeque yunerique ama bahuityaqui cuanaratu dutyadya jutidya jidama bajacaya ama. Tunaratu ai jidamaque ajacaya ama. Tuna tacadya jutidya tuna casumitiya. Ana cueja, dyahua, isara jadya tunajatu aya chipiruda cuanaque, tuna camadya ai jidaque tyata ishú.

Judasra Jesús queja ecatyati cuanaque cuejacuareque

¹⁷ Jadya micuana cuejaya, micuana ecue iyuhueda cuanaque. Neadebacue Ecuana Cuatsashaqui Jesucristoja ecuadisha cuanara micuana cuejacuare cuanaque. ¹⁸ “Tere piji dyanetu jetiama cuinanabuque Yusu ijaribaqui cuanaque, tunaja biji eque cuitadya jutidya aniya cuanaque. Ai jidamaquedya jutidya tunajatu abuque”, jadyatu jucuare Jesucristoja ecuadisha cuanaque. ¹⁹ Tunaradyatu Jesúsja cuanaque cajuquetishabareya. Umae bape ejenemere, peya cuare bape jadya tuna ejenemerebareya. Tunaratu ai jidamaquedya jutidya aya tunaja abijidaque. Tuna tuna Yusuja Espiritu tsehue ama.

Jesús queja ecatyati cuanaque eje bucha anie jutaquique

²⁰ Tuna juya bae nejuume, micuana ecue iyuhueda cuanaque. Yusuja biji eque neaniajecuedya jutidya. Yunerique bahuityayaque micuanara pana adeba aatsu, jida ejenetsu, micuana bahue juya jida Yusuja biji eque ani

ishuque. Tuja Espirituja casa eque nequisaraticue Yusu tsehue. ²¹Nemuibacue Yusu, micuanaja tura iyuhueda bayaque adeba ishu. Jadya anie micuana jutaqui canimehuallatima Ecuana Cuatsashaqui Jesucristo junanucaya tupu. Junanucatsu tujatu dyaque quiyuhuebati anibuque ecuana tsehue. Nityatsurananucabuque tura ecuana tuja yacuaju ani ishu ni eje tupu jakanuca ishu ama.

²² Yunerique ejenecara, ejenecarama jadya juya cuanaque netsahuacue yunerique camadya ejene ishu. ²³ Necacasaticue yunerique tuna ejenemere ishu. Etiquiju etiruuju micuana nere inadadi eau bucha, jadya tsahuaedya tuque micuanaja ataqui tunaja yunerique ejene ishu, tuna Yusu queja judiru ishu. Paani micuanaja canerecabati jucha arida cuana tsehue. Tunara jidamaque ayaque ujeu nebacue. Necanaruticue tunara jidama ayaque micuanara dyadi eauju.

¡Dyaque jida tu Yusu ecuana tsehue!

²⁴ Yusu tu dyaque jida tuja cuana tsehue. Tura micuana narujacaya ama, Ijahuara amerecara aya eque ejuuju, cajuchatishacara ayaju micuanaja baca ishu ama. Tura micuana judirushabuque tuja yacuaju jucha metse amaque, tura micuanaja jucha cuana apupashahua tibu. ²⁵ Tuque peadya tu Yusu; aijamatu peya. Tura ecuana Ijahua quejaque inajacamereya Ecuana Cuatsashaqui Jesucristo ecuana jiteque majuhua eque. Tuquetu dyaque jida; aijamatu peya tuque buchique. Tuquetu dutya ai aniyaque inime metseque. Turatu dutya naruya. Turatu cuatsashaya dutya. Jadyatu tuque juhua, yuequedyadya yahua ejitaju juma jari equeque. Iyacua tu jadya jaridya. Jadyatu jujacabuque amadya. Jaidya paju.

Riya tupu camadya.

Judas

APOCALIPSIS – “EJE BUCHA JUDADIBUQUEQUE” JADIQUE APOCALIPSIS

Riyaque quirica ri Juan, Jesúsja emepera huenequereque. Patmos cububuju erisi neticuare patya rejari huenequere. Tuhua patu ijehuetanacuare Jesucristoja quisarati cuejahua tibu.

Riyaque quiricaju ri ehueene eje bucha judadibuqueque. Yusuratu Juan bamerecuare tuja huene ishu. Terehuie patu dutyadya jutidya dyaque jidama judadibuque. Jadya tibusu Cristo cuitadya junanucabuque. Tuquetu tuja casa tsehue dutya jidama cuanaque ijahue eatilla junabuque. Turatu Satanás pana ijahue dutyaju anabuque.

Capítulo 2-3ju tu Jesús queja ecatyati cuanaque pacarucu epuju aniya cuanaja ishu cuadishatanacuareque. Bahuetu ecana amerecuare jucha cuana, tunaja jucha aniyaque caadebatitsu tuna Yusu queja canerecati ishu. Capítulo 4-5jutu Juanra huenequere Cristo, Yusuja yacuaju pureama atanadadiyaque. Cristo tu UHUISHA BUCHA IYETAE ATAHUAQUE bacani. Baba cuanara uhuisha iye bahue jucuare bucha jucha cuana tsujetyaqui, jadidyatu Cristo majucuare ecuanaja jucha cuana tsujetyaqui.

Capítulo 6-18ju tujatu riyaque yahuaju eje bucha nerecadae judadiyaque cuejaya. Capítulo 19-20ju tujatu bahuityaya Cristo ECUARI DYAQUE ARIDAQUE, Satanás tuja casa tsehue ijahue ara junanucabuqueque. Capítulo 21-22ju tujatu cuejaya Cristoja cuanaque dyaque jida, pureama jadya barepaju judadibuqueque, yahua iyacuaju tuque ecuanara muiyaque.

Umae versículo cuana jida cabahuityati ishuque ri: 2.10; 3.20; 5.9-10, 12; 7.10, 12; 12.10-11; 19.6-8; 20.6, 14-15; 21.4, 8, 22-27; 22.20.

Jesucristora Juan eje bucha judadibuqueque cuejacuareque

¹ Ecuanaja Etata Yusura ecuanana tuque merequi cuanaque bahue amerecara acuar masadama riyaque yahuaju judadibuqueque. Ique Juan Jesucristo merequique. Riyaque quirica ri Jesucristora eje bucha judadiyaque cuejacuareque. Yusuratu bahue amerehua ecuanana bahue amere ishu. Jesucristoratu cuadishacuare etsahuaquique barepa juque ique bahue amere ishu. ² Era micuana cuejaya riyaque yuneri cuitadya era bahuaque, micuana eje bucha judadibuqueque bahue juishu. Riyaque rique ecue yuneriye Yusuja ecuejaque Jesucristo eque ejitaju eaque.

³ Dyaque jida paju ejera riyaque Yusuja quisarati isarayaque. Tumbaedy dyaque jida paju Yusuja ecuejaque quisarati isarayaju bacaqui cuanaque. Tumbaedy dyaque jida paju riyaque quiricaju isaratsu ehue ne eque aniya cuanaque. Dutya ecana jida paju, dutya riya cuanaque masadama jadya judadiyaque adebatsu.

Juanra, Jesús queja ecatyati cuanaque pacarucu epuju aniya cuanaja ishu huenecuareque

⁴⁻⁵ Ique Juanra rique micuanaja quirica cuadishaya Jesús queja ecatyati cuanaque Asia yahuaju pacarucu epu cuanaju aniya cuanaja ishu. Yusura, pacarucu espíritu cuanara, Jesucristora jadya jida tsehue nenarucue tunaja quiyuhuebati tsehue. Tunara inime tsapema neanishacue. Yusu tu yuequedy anihuaque dutya ai eiyaque bucha ama. Aputabuque amatu ni eje tupu. Pacarucu espíritu cuana tu Yusuja yacua Judy. Jesucristoradyatu peya cuana Yusu eje buchique cuejajacaya ama. Tudyatu emajuque netitsurametse juhuaque ni eje tupu majunuca ishu ama. Turadyatu cuatsashaya dutya riyaque yahua juque cuatsashaqui cuanaque. Cristora ecuana iyuhueda baya. Yusura tuque ecuanaja jucha cuana apupashaya Cristo curusuju majuhua tibu, ecuana jiteque ami quijehuetihua tibu. ⁶ Jesucristora ecuana ihuarahua tuja yana atsaqui juishu, tuja Etataque Yusu mere ishu. Ecuandadya ecuana enaruqui jubuque tuatsehue tuque enaruqui juhuaju. Neajacara ama Jesucristo riyaque quisarati tsehue: “Miquemi dyaque jida, dutya ai aniyaque dyaque casadaque”. ¡Jadidy paju!

⁷ Nebacacue. Cristotu junanucabuque barepa huani ducu eque. Dytaratu batsabuque. Dutya tuque iyequi jucuaru cuanaratu batsabuquedy. Dutya ecuita riyaque yahuaju aniya cuanaquetu pabuque tuque batsatsu. Bajida tuna jubuque tuque tuna nerecaturara cuana jeya bucha baatsu. Jejee, jadidyatu jubuque. ⁸ Yusuja tu quisarati: “Ique dutya ai iyametsequi juhuaque, dutya ai tilladadiqui juyaque jadya. Ique letra A-Z buchique”, jadya tu Ecuana Cuatsashaquiya quisarati. Tuquetu Yusu. Tujatu dutya casa aniya. Tuquetu yuequedy anicuare. Iyacuatu aniya. Anisiribuque tuque.

Juanra Cristo bacuareque

⁹ Ique Juan; micuana tsehuequique ique. Yusu tu ique metseque, tumbaedy micuana metseque. Jesús tu ecuana jiteque nerecada juhua. Tumbaedy micuana ique jadya ecuana nerecada juhua tuaqueja nimee juatsu. Dutya rique ecuana iduya abacada tsehue tuaqueja catyatijacatsu ama. Huaraji cuanara ique ijehuecuare ecububu Patmos bacaniyu ique nerecatura ishu, era Yusuja quisarati tsapeya baatsu,

yunerique Jesúsja ecuejaque. ¹⁰ Dumicu huecaca tuque ecuique inime ama inime tupuqui acuare, Yusuja Espiritura inime tupumereyaque. Ecue etibene queja tuque bacacuare etsuri jebudaque, corneta tsurí bucha.

¹¹ —Ique dutya ai iyametsequi juhuaque, dutya ai tilladadiqui juyaque jadya. Ique letra A-Z buchique. Hueneajecue mira petayaque. Tume cuadishacue tumeque quirica mira hueneyaque Jesús queja ecatyati cuanaja pacarucu epuju aniya cuanaja ishú, Efesoju, Esmirnaju, Pergamoju, Tiatiraju, Sardisju, Filadelfiaju, Laodiceaju jadya, —jadya ecue etibenejura acuare, yume tucue Jesúsra.

¹² Huarerecuare ique eatsehue quisaratiyaja etsuri bacatsu, tuque bacara aatsu. Tume huareretsu tuque bacuare pacarucu ude cuana nityaqui cuanaque oro eaque. ¹³ Tumeque ude cuana nityaqui cuanaque patyadyatu neticuare peadya ecuita jiuque. Tura jutuyaquetu jucuare junuda ehúachi eque cuita. Jucuare tujatu cinturú oro eaque quinida yacua eque cuita. ¹⁴ Etsaru tuja tuque bacuare dyaque pajada. Yatuca bacue tuja etiqui juju bucha. ¹⁵ Ehuachi tuja tuque metal tiquidaque bucha bacuare. Etsuri tujatu dyaque jebuda jucuare tiritiya bucha. ¹⁶ Jida eque amaca tujatu inacuare pacarucu purari cuana. Tuja yatsanaca eque bacue cuinanacuare quiyeti ishúque beta eque jacuaque. Ebutsequini tujatu jucuare ijeti casada tsehue pujetanayaque bucha.

¹⁷ Jadya tuque baatsu rihuicuare tuja ehúachiju emaju bucha. Ique jadya juhúaju tura tuja emetucu jida eque amaca tsehue jabacuare. Jabatsu tura jadya acuare:

—Bajida juume. Ique dutya ai iyametsequi juhuaque, dutya ai tilladadiqui juyaque jadya. ¹⁸ Ique chacha. Yuneridya ique majucuare. Majutsu chacha netitsuranucacuare, ni eje tupu majunuca ishú ama. Ecuetu casa aniya majuja ishú. Ecuetu casa aniya ecuita cuana majuhúaju tuna eju cuadisha ishúque cueja ishú. ¹⁹ Erami bahue amereya iyacua ecue cuanaque eje bucha juyaque, judadiyaque jadique. Huenecue dutya mique era ejitaju petamereyaque. ²⁰ Bahuadyami era pacarucu purari jida eque amaca eque era inayaju, tumbaedyá pacarucu ude nityaqui cuanaque oro eaque. Arepa petahua ama bucha, tuquemi adebaya ama eje buchique. Erami pana cueja aya tumeque eje buchique. Pacarucu purari cuanatu pacarucu epuju ecue quisarati cuejaqui cuanaque buchique. Pacarucu ude nityaqui oro ea cuanaque tuna, pacarucu epuju cuanaque eaqueja ecatyati cuanaque buchique, —jadya tura cuejacuare.

2

Efeso epuju Jesús queja ecatyati cuanaja ishuque quisarati

¹ Jesúsra ique isaranucacuare:

—Jadya huenecue Efesoju eaqueja ecatyati cuanaque naruquiya ishu.

“Idya ique pacarucu purari jida eque amaca inaquique, pacarucu ude nityaqui oro ea cuanaque ducu netiyaque. Riyaque ecue quisarati tuque Efesoju ecue cuanaque cuejacara aya:

² ‘Ique bahue dutya micuana eje bucha anie juyaque. Ique bahue dutya huecaca micuana mere juyaque. Eratu adebaya eaqueja nimee jujacama micuanara dutya abacata idu ahuaque. Adebayadya tuque micuanara ecuita jidama cuanaque eiduuque. Micuanaratu nime adebahua ecue yana atsaquipa ejuu jadya juya cuanaque. Adebayadya tuque micuanara ecana tuna pusha pusha arida cuanaque. ³ Iduhua micuana dutya ique jiteque. Peya cuanara micuana dyaque nerecaturahua, micuana era amereya eque juya tibu. Arepa dyaque nerecada ataya ama bucha, micuana eatsehue nime aputahua ama. ⁴ Jadya ama bucha, micuana ahua ique dyaque cahuaitisha ishuque. Iyacia micuanara iyuhuedama baya, micuana eaqueja catyatimetse juatsu juhua bucha ama. ⁵ Jadya tibudya necaadebaticue eje bucha iyuhuee micuanara ique batibunehuaque. Neajacacue Yusu cahuaitisha ishuque. Neiyuhue batsanucacue ique micuanara icuene ahua bucha. Ique masadama junanucaya. Micuanara ni ique icuene iyuhueda bahua bucha iyuhuee banucaya ama, tume micuana peya cuana bahuityaqui amerejacaya. Apudaju lamparina jujuyaque esecau bucha, micuana amerebuque, tume micuana ni eje tupu ecue quisarati bahuityaqui junucaya ama. ⁶ Jadya ama bucha, jidadya tu micuanaja ujeu baishu Nicolás bacaqui cuanaque jubahue cuanaque. Eratu ujeudya baya tunaja jidamaque beruque inime cuana. ⁷ Micuana quijacabacati aqui juatsu, nebacacue Yusuja Espiritura ique eque eaqueja ecatyati cuanaque cuejayaque. Ijahua queja cacuatsashameretiya ama cuanaque tuna tyadadiya inime acui caca earau bucha, ACUI CACA CHACHA JUISHUQUE bacani Yusuja yacua juque’ ”,

jadya Jesúsra huenemerecuare Efesoju tuaqueja ecatyati cuanaque naruquiya ishu.

Esmirna epuju Jesús queja ecatyati cuanaja ishuque quisarati

⁸ Jesúsra isaranucacuare:

—Jadya huenecue Esmirnaju eaqueja ecatyati cuanaque naruquiya ishu.

“Idya dutya ai iyametsequi juhuaque, dutya ai tilladadiqui juyaque jadya. Idya majutsu chacha netitsuranucahuaque. Riyaque quisarati cuejacue Esmirnaju eaqueja ecatyati cuanaque:

⁹ ‘Ique bahue dutya micuana eje bucha anie juyaque. Adebaya tuque era micuana canerecatihuaque, nrecada jadique. Jadya ama bucha tuque micuanaja aniya dutya ai cuana Jesús queja ecatyati cuanaque tyatanayaque. Bahuedya ique micuanaja ishu jidama quisaratiya cuanaque. Tume cuanaque tuna “Yusuja cuanaque ecuana. Israelita neri ecuana”, jadya juya. Ecue cuanaque ama tuna. Tuna tuna Satanásra cuatsashaya eque juya. ¹⁰ Bajida nejuume jadya nrecada cabatitsu. Umae micuana etare apudaju ishatanabuque. Ijahuara micuana canerecatishabuque nime adebayaque yuneridya micuanara ique muibayaque, jadya ama juatsu aijama jadique adeba ishu. Ejetsunue ama micuana nrecada jubuque, peadya tunca huecaca tupu cuana camadya. Majuya tupu eaqueja nimee nejujacaume. Eaqueja nimee ni micuana jujacaya ama, tume micuana Yusu tsehue siri anishaya ni eje tupu jacanuca ishu ama, era quisarati iyahua eque. ¹¹ Micuana quijacabacati aqui juatsu, nebacacue Yusuja Espiritura ique eque eaqueja ecatyati cuanaque cuejayaque. Eaqueja nimee jujacaya ama cuanaquetu, arepa majutsu tunaja ecuita ririhua ama bucha, tuna chacha netitsuranucabuque ni eje tupu majunuca ishu ama’ ”,
jadya Jesúsra huenemerecuare Esmirnaju tuaqueja ecatyati cuanaque naruquiya ishu.

Pérgamo epuju Jesús queja ecatyati cuanaja ishuque quisarati

¹² Cuejanucacuare tura ique:

—Jadya huenecue Pergamoju eaqueja ecatyati cuanaque naruquiya ishu.

“Eradyatu quiyeti ishuque beta eque jacuaque inaya. Riyaque quisarati Pergamoju eaqueja ecatyati cuanaque cuejacue:

¹³ ‘Ique bahue dutya micuana eje bucha anie juyaque. Ique bahue micuana dutya jujeri Satanás merequi cuana ducu aniyaque. Arepa micuana tuhua aniya ama bucha, micuana era bahuityahua equedya jutidya anijacaya ama. Bahuedya ique micuana dyaque nrecada juhuaque. Arepa micuanaja epuju Satanás merequi cuanara Antipas

iyehua ama bucha, ecue quisarati bajida tsehue ama cuejaqui juhuaque, micuana eaqueja nimee jujacahua ama, arepa nrecada juya ama bucha. ¹⁴Jadya ama bucha micuana ahua ique dyaque cahuaishua ishucue. Aniyatu eje uma micuana ducu beru Balaamra bahuityacuare eque anijacacarama juya cuanaque. Berutu Balaamra Balac cuejacuare: “Bahuityacue israelita cuana. Yusu cahuaishua ishucue tuna paa. Cuejacue ecana. Paara tuna yusu cueya cueya ea cuana cuatsaqui eaque. Tunaja caquemitiquerema cuanaque tuna pajaraquere. Tunaja biji ecana pacajuchati” jadya. ¹⁵Tumebaedy micuana umae Nicolásra jidama bahuityahua eque jujacacarama juya. Eratu tumeque tunaja bahue juya cuanaque ujeu baya. ¹⁶Jutaquijudya necacuaretinucacue inime. Masadama junanucaya micuana queja. Junatsu micuana nrecaturanaya inime cacuareticarama juya cuanaque. Catinabuque micuana tsehue quiyeti ishucue ecue ecuatsa eque cuinanaya tsehue. ¹⁷Micuana quijacabacati aqui juatsu, nebacacue Yusuja Espiritura ique eque eaqueja ecatyati cuanaque cuejayaque. Eaqueja nimee jujacaya ama cuanaque tuna tyadadiya iyacuaque earaqui maná Yusura bérú tyacuare buchique. Tumebaedy tuna tyadadiya tumu pajadaque. Tumujutu ehue ne jubuque tunaja ebacani iyacuaque ni ejera adebayaque ama. Tuque inatsaquira camadyatu adebabuque’ ”, jadya Jesúsra huenemerecuare Pergamoju tuaqueja ecatyati cuanaque naruquija ishu.

Tiatira epuju Jesús queja ecatyati cuanaja ishucue quisarati

¹⁸Cuejanucacuare tura ique:

—Jadya huenecue Tiatiraju eaqueja ecatyati cuanaque naruquija ishu.

“Idya Yusuja Ebacuaque. Ecue yatucadya tu etiqui juju bucha, ehuaichi bronce dyaque jida ebajeje bucha. Rियाque quisarati Tiatiraju eaqueja ecatyati cuanaque cuejacue:

¹⁹‘Ique bahue micuana dutya eje bucha anie juyaque.

Adebaya tuque era eje bucha iyuhuee micuanara bayaque.

Adebaya tuque micuana eaqueja nimee jujacayaque ama,

dyaque micuanara mere ayaque jadya. Bahuedya ique

micuanara abacata idu ayaque, arepa micuana eje bucha

jutidya ataya ama bucha. Bahue ique micuanara iy-

acua dyaque ayaque, catibutiyaque jucuaque bucha ama.

²⁰Jadya ama bucha, tuque micuana ahua ique eje bucha

cahuaishuae aishucue. Micuanaratu tyahua emajaca

tumeque epuna, Jezabel bae nimeeque pusha pusha

bahuityaquique. Tuquetu jadya juya: “Iquepa Yusu

eqeque cuitadya quisarati cuejaquique” jadya. Tura tuna ijahue jutidya aya ique merequi cuanaque. Tumeque epunara micuana bahuityaya pusha pusha. Tura micuana cuejaya jidadya caquemitiqeremaque jaraquere ishu, yusu cueya cueya cuanaque etyaque ara ishu jadya. ²¹ Eratu tyahua dyaque emajaca tuque inime cacuareti ishu. Tumetu tuque cacuareticarama juhua. Ijehue-caramatu aya tuja beru jidamaque ani. ²² Ique merequi cuanaque ni jidama anijacaya ama, riyaque epuna juya bucha, tume tuque tumeque epuna majutaqui ujejeda amereya. Canerecatishabuque tuque era tuatsehue jidama juya cuana tsehue. ²³ Tumbaedy a tuque iyedadiya tuque anihua bucha anie juhua cuanaque. Era jadya ahujutu dutya ecue cuanara adebabuque era inime tupu cuana adebayaque, peadya peadyara ai bijiseriya cuanaque. Micuana jidama juhua tibu, micuana nerecatu-radadibuque. ²⁴ Umae micuana Tiatiraju cuanara tuque micuana ahua ama jidama ebahuitya cuanaque. Tumbaedy micuana dyadi Satanásra amereya eque ama aniya. Ni Satanásja yana eque juya cuanaratu adebaya ama dutya tuja bahue eque juishuque. Jidama cuanaque aniya bucha camadya neaninucaume. Riyaque camadya micuana amereya. ²⁵ Eaqueja nimeedya jutidya nejuajecue ique junanucaya tupu. ²⁶⁻²⁷ Ecue Etatara ique dutya yahua juque cuatsashaqui amerehua. Micuana ni eaqueja nimee jucacaya ama, micuana ni ecue biji eque anijacaya ama tereya tupu, tume micuana era ecuatsashaqui eatsehue amereya. Yahua Naruqui nejura dyaque muída cacuatsashati tsehue dutya era amereya eque jucarama juya cuanaque pana aputasha aya tupu, mechi sura epuririshau bucha. ²⁸ Tumbaedy micuana tyadadibuque purari ebari huecacayaju jeyaue. ²⁹ Micuana quijacabacati aqui juatsu, nebacacue Yusuja Espiritura ique eque eaqueja ecatyati cuanaque cuejayaue’ ”,

jadya Jesúsra huenemerecuare Tiatiraju tuaqueja ecatyati cuanaque naruquija ishu.

3

Sardis epuju Jesús queja ecatyati cuanaja ishuque quisarati

¹ Jesúsra ique cuejanucacuare:

—Jadya huenenucacie Sardisju eaqueja ecatyati cuanaque naruquija ishu.

“Ecuetu pacarucu espíritu Yusu jaque, pacarucu purari jadya. Riyaque quisarati cuejacue Sardisju eaqueja ecatyati cuanaque:

‘Ique bahue dutya micuana eje bucha anie juyaque. Adebayadya tuque micuana eje uma era amereya eque anicarama juya cuanaque, arepa micuana eje umara ecue inime eque aniya bucha baya ama bucha. Era micuana majutaquique bucha baya. ²Nimequi nejudue. Majuhuieja riya piji camadya casa aniya bucha, jadya micuana iyacua riya piji camadya eaqueja nimee. Necacasaticue eaqueja nimee juishu. Micuana micuana Yusura anishacara aya eque ama aniya. ³Neadebacue ecue quisarati cuejaqui cuanara micuana bahuityahuaque. Neanicue ecue quisarati eque. Necacuaretinucacue inime. Masadama junanucaya micuana queja. Micuana ni inime cacuaretinucaya ama, tume micuana nerecaturanaya. Nimemaju micuana banaya. Chiri puji aira ihuayaju ama ejutiu bucha junae ique jubuque. ⁴Tuhua Sardis epuju aniya eje uma ecuita cuana ecue yana equedya juya cuanaque. Tuna tuna eatsehue junenidadibuque ejutuqui paja tsehue ecajututi, tuna yuneri juya tibu. ⁵Eaqueja nimee jujacaya ama cuanaque tuna una pajaquitere jubuque. Apupashabuque ama tuque tunaja ebacani quiricaju aniyaque Yusu queja dutya judirubuque cuanaja ni eje tupu jacanuca ishuhua. Tume tuna adebamerebuque ecue Etataja yacuaju, tuque tsahuaqui cuanaja yacuaju jadya. Abuque tuna: “Jee cuanaque ri ecue cuanaque”. ⁶Micuana quijacabacati aqui juatsu, nebacacue Yusuja Espiritura ique eque eaqueja ecatyati cuanaque cuejayaque’ ”, jadya Jesúsra huenemerecuare Sardisju tuaqueja ecatyati cuanaque naruquija ishuhua.

Filadelfia epuju Jesús queja ecatyati cuanaja ishuhua quisarati

⁷Cuejanucacuare ique Jesúsra:

—Jadya huenenucacue Filadelfiaju eaqueja ecatyati cuanaque naruquija ishuhua. “Ique juchamaque. Ique Yusu neri. Idya Yusu queja judiruya cuanaque naruquique. David tuja epuju aniya cuanaque naruqui juhuaque buchique ique. Era pacashahuajutu ni aira eteriu ama. Era terihuajutu ni aira epacashau ama. Riyaque quisarati cuejacue Filadelfiaju eaqueja ecatyati cuanaque:

⁸‘Ique bahue dutya micuana eje bucha anie juyaque. Tyahua micuana emajaca ecue quisarati cueja ishuhua, ni aija micuana cuejamerejacataqui ama. Arepa micuana eje uma piji, nerecada juya ama bucha, ecue quisarati equedya micuana juhua. Eaqueja nimee micuana jujacahua ama. ⁹Aniyatu “Yusuja cuanaque ecua. Israelita neri ecua”, jadya juya cuanaque. Pusha pusha

arida tuna. Satanás jaquedya jutidya tuna. Micuana Filadelfiaju cuanaque micuana huaraji amereya. Tume ique adeba baecua cuanaque tuna era micuana iyuhueda bayaque bahue amereya. Micuanaja yacuaju tuna chichucata amereya. ¹⁰ Micuana micuana eaqueja nimee jujacama anihua. Tume micuana ni ejeque buchique eje bucha abuque ama era dutya eje bucha juhuaque adadiyaque cuejahuaju. Nerecaturadadiya tuna Satanásra dutya cuatsashaya eque juya cuanaque. ¹¹ Masadama junanucaya. Eaqueja nimee nejujacaume, Yusura micuana tyaana ahuaque aija seca ishuhua. ¹² Eaqueja nimee jujacaya ama cuanaque tuna Yusuja yacuaju anishasiriya ni eje tupu jaca ishuhua. Tuna tuna Yusuja yacuaju dudu buchique, aija nityasicua ishuhua. Tuna quejadya tuque ecue Yusuja ebacani huenebuque, ecue ebacani iyacuaque, tumebaedyá “Iyacuaque Jerusalén Yusuja epu ebari barepa eque buteya juque” jadya. ¹³ Micuana qui-jacabacati aquí juatsu, nebacacue Yusuja Espiritura ique eque eaqueja ecatyati cuanaque cuejayaque’ ” jadya Jesúsra huenemerecuare Filadelfiaju tuaqueja ecatyati cuanaque naruquija ishuhua.

Laodicea epuju Jesús queja ecatyati cuanaja ishuhua quisarati

¹⁴ Cuejanucacuare Jesúsra:

—Huenenucacue Laodiceaju eaqueja ecatyati cuanaque naruquija ishuhua.

“Ique yunerique neri. Ique tuyu quisaratiya. Ique equequedyatu dutya ai riyaque yahuaju aniyaque. Riyaque quisarati cuejacue Laodiceaju eaqueja ecatyati cuanaque:

¹⁵ ‘Ique bahue dutya micuana eje bucha anie juyaque. Micuana micuana eaqueja nimee cuitaque ama; ni micuanara pana bijidamadura aya. Ena uque jahua jahua buchique micuana; uqueda cuita, ni bada cuita. Areque micuana ducuta eaqueja nimee ejuu; jadya ama juatsu pana jaca apiisi neacue. ¹⁶ Micuana micuana eaqueja nimee neri ama; ni micuanara bijidamaduraya. Jadya jutidya micuana juya tibu, ijehueya micuana era. Ena uque jahua jahuaque ecuatsa juque epushau bucha, jadya ijehuee micuana adadiya micuana inime cacuaretiaque ama juatsu. ¹⁷ Jadya micuana juya: “Chipirui ecuanara. Jida ecuanara aniya. Ni aidya jutidya ecuanara bataqui ama juya”. Arepa micuanaja riyaque yahua juque ai aijama paju ama bucha, micuana ijahue catiya, Yusura jida baya bucha cabatitsu. Yusura micuana baya nereca usi, ini-jeda, aima, atucama, ecatacati. Shuhui bucha micuana

juhua ecatacati, Yusuja biji eque juishu adebahua ama tibu, ni tuja biji eque ani ishu. ¹⁸ Anicara ni micuanaja juya dutya micuanara sareya cuanaque, ique nebacacue. Era micuana tyadadiyaque tu dyaque tsuje aridaque oro neri buchique. Era micuana Yusuja yacuaju bisu bae-cua amereya, ecatacatiju cajututi ishu era ejutuqui paja etyau bucha. Yusu eje bucha pureamatura aishuque bahuitya, yatucaju esamaqui iyatsu ecapetatishau bucha micuana amereya. ¹⁹ Eratu nereda aya dutya era iyuhueda bayaque, tuna jidama juyaju. Era tuna cuejaya tuna inime cacuaretiyaque ama juatsu. Jutaquiju ducuta inime necacuareticue. ²⁰ Era micuana cuejaya; eaqueja nimee nejucue. Ique nudyatacara juyaju, eteriqui peque netiya buchique. Micuana ni eaqueja catyatiya, ique micuana tsehue junenijacaya ama, ni micuana eatsehue. ²¹ Eaqueja nimee jujacaya ama cuanaque tuna iyabutyabuque ique peque, ique huaraji epu cuana naruquique juatsu. Ique casada juatsu tuque jahue ahua Yusu ujeu cuanaque. Iy-acua ique anibutehua ecue Etata Yusu peque enaruqui juishu. Ique baedyatu judadibuque eaqueja nimee jujacaya ama cuanaque. ²² Micuana quijacabacati aqui juatsu, nebacacue Yusuja Espiritura ique eque eaqueja ecatyati cuanaque cuejayaque' ”,
 jadya Jesúsra huenemerecuare Laodiceaju tuaqueja ecatyati cuanaque naruquija ishu.

4

Tunara Ecuana Cuatsashaquique pureama barepaju acuareque

¹ Jadya tume cuanaque bau jadya juatsu tuque banucacuare Yusu queja nubidiru ishuque. Tume tuque bacanucacuare corneta tsuru icuene ique isaraqui jucuare buchara isaranucayaju. Jadya tura acuare:

—Tsuracue requeja. Bamereya mique eje bucha judadibuqueque, —jadya tura acuare.

² Tura ique isaraya tsunumee Yusuja Espiritura bamerehua eje bucha judadiyaque. Bacuare tuque Huaraji Dutya Casa Tsehueque. Bacuare tuque tuja eaniquiju aniyaju.

³ Ryaque Huarajitu dyaque jidaque jucuare. Bacuare tuque jida, tiquida, huecada. Casharina bucha tiquie tuque bacuare. Tajina jiuque patya aniyaque tuque tumu esmeralda tiqui bucha sahuae tuque bacuare. ⁴ Peya bacue tuja eaniqui cacuatsashati ishuque jiruru bacuare beta tunca pushi earacana eaniqui cacuatsashati ishu cuanaque. Tuhadyatu anicuare beta tunca pushi earacana ecuita

cuana Yusu mui juya cuanaque. Tunaja unatu jucuaré pajada. Iyucaju tunajatu anibarecuare puja oro eaque.
⁵ Eaniqui cacuatsashati ishuque Ecuana Cuatsashaquique aniya juquetu cuinanacuare pupipupiyaque, sicacadaque, tiritiyaque bucha. Tuja yacuaju tuque bacuare pacarucu ude jujunetibareyaju. Riya cuanaque tu pacarucu espíritu cuana baeque Yusuja yacua juque. ⁶ Yusuja yacuajutu tumebaedya anicuare ai cuana pajadaque napajada, huecada buchique.

Enaruqui dyaque aridaja eaniqui tuque bacuare pushi bape bape butsequinie cuanaja etabu, peadya peya eque amaca, peya bacue peya eque amaca jadya pushi eque amaca. Atuca umada tuna bacuare. ⁷ Icuenequetu jucuaré iba jiuque. Peya tuque bacuare toro jiuque. Quimisha ishuque tuque bacuare ecuita butsequini jiuque. Pushi ishuque tuque bacuare huihuipa jiuque. ⁸ Tumeque pushi bape bape butsequinie cuanaja tuque bacuare shucuta yajapara cama peadya peadyaja. Junu badebare tujatu jucuaré yatuca cuana dyaque eque yajapara cuanaju, educu eque bacue yajapara cuana riya piji quishayaju, ecuita patya jaque tupu dyane. Jadya tuna jeruchinepe, jerusisa jadyajucuaré: “Miquemi juchama neri, Ecuana Cuatsashaquique, Yusu. Miquemi dutya casa tsehueque, Miquemi yuequedya animet-seque.

Iyacuami aniya. Aputanime ama mique”,
 jadya tunajatu ajacacuare ama Ecuana Cuatsashaquique.

⁹ Tumetu bape bape butsequinie cuanara pureama, mui, yusurupai au jadya acuare emuita eaniquiju aniyaque. Pureama tuna acuare Anisiriyaque Maju Baecuaque. ¹⁰ Tuna jadya Yusuja ishu jerujacahuajutu beta tunca pushi earacana Yusu mui juya cuanaque nuyubarecuare Yusuja yacuaju. Tume cuanaratu mui, naru jadya acuare Anisiriyaque Maju Baecuaque. Tume tunajatu tuja yacuaju puja oro eaque iyabarecuare.

¹¹ “Miquemi Ecuana Cuatsashaquique.

Mique peadya mi Yusu ecuanara muiyaque.

Mique peadya camadya mi yuneri cuita jidaque.

Mique peadya mi muitaquique.

Mique peadya mi dutya casa tsehueque.

Pureama mique ecuana aya, mira dutya ai aniyaque iyahua tibu.

Dutyai iyacua aniyaquetu mique eque iyatanacuare, mira jadya bijida bahua tibu”,

jadya tuna jucuaré.

5

Jesucristora quirica epirurique siraracuareque

¹ Tume eaniqui cacuatsashati ishujū aniyaja jida eque amaca emetucuju tuque bacuare quirica epirurique, educu eque, dyaque eque jadya ehueque. Tumeque quiricatu dyaque eque pacarucu sipibare ea jucuarē. ² Bacuare tuque Yusu tsahuaqira casada jebuda etsuri tsehue bacadurayaju:

—¿Ejequetu quirica esipibareque sirara, isara jadya aishu ecuatsasha? —jadyatu jucuarē.

³ Ni barepaju ni riyaque yahuaaju ni yahua emaque jadyatu aijama jucuarē quirica sirara ishūque; ni tu ejeque anihua tumeque isara bahueque. ⁴ Ique dyaque pacuare, ejeque tumeque quirica sirara, isara jadya aishūque aijama baatsu. ⁵ Tume peadya ecuita Yusu mui juyara jadya acuare:

—Paume dyaque cuita. Aniyatu peadya; tura camadyatu esirarau. Tumequetu Judá eque ejuracanaque. Tumequetu ecuari David eque ejuracanaque nucadya. León bucha casae tuque. Tura peadya camadyatu esipibareque sirarabaretsu epirurique ejirau, —jadya acuare Yusu mui juyara.

⁶ Tume tuque bacuare Dutya Cuatsashaquija yacuaju ecuanaja jucha cuana tsujetyaqui majucuarēque, UHUISHA BUCHA IYETAE ATAHUAQUE. Pushi bape bape butsequinie cuana ducu, Yusu mui juya cuanaja etabutu neticuare. Ejitajudya tujatu jucuarē ecuita cuanaja jucha tilla ishū iyetahuaque mecuare. Tujatu anicuare pacarucu edana, pacarucu yatuca jadya. Tumeque yatuca cuana tu pacarucu espíritu cuana, Yusuja baeque dutya yahua queja tura cuadishahuaque. ⁷ Tumeque UHUISHA BUCHA IYETAE ATAHUARAtu inaticuare tumeque quirica epirurique Dutya Cuatsashaquija eaniquiju aniyaja emetucu jida eque amaca equeque. ⁸ Tura quirica inatihuaaju tuna pushi bape bape butsequinie cuanaque, beta tunca pushi earacana Yusu mui juya cuanaque nuyucuarē UHUISHA BUCHA IYETAE ATAHUAja yacuaju. Dutya Yusu mui juya cuanajatu anicuare dudu ishūque, arpa bacani. Inacuare tunajatu equiniqui oro eaque, atsaca madi muru huani bucha tsehue ejequeshaque, dyaque ijimedaque. Tumeque muru ijimedaque tu Yusuja cuanaque tuatsehue quisariatiyaju adeba ishūque. ⁹ Riyaque jeru iyacuaque tunajatu acuare:

“Jesucristo, miquemi jida quirica epirurique ina ishū, tuja esipi cuanaque sirara ishū, mique iyetanahua tibu.

Majutsu micue ami quijehuetitsu, tuquemi dadihua Yusuja ishū ecuita cuana dutya yahuaaju, dutya anae cuanaque.

¹⁰ Miradyatu iyahua huaraji cuana dyaque arida cuanaque. Cameremeretihua mique.

Narubuque tunajatu riyaque yahuaju cuanaque”,
jadya tuna jerucuaré.

¹¹ Jadya juatsu tuque petanucacuare. Bacacuare Yusu tsahuaqui tumeque eaniqui cacuatsashati ishucue jiruru aniya cuanaque, tumbaedyá tuhua pushi bape bape butsequinie cuanaque, Yusu mui juya cuanaque jadya. Anicuare tuna jetiama piye batilla tupu ama. ¹² Tunadya tuna etsuri jebuda tsehue jadya juyaju bacacuare:

“Dyaque jida taa mique, UHUISHA BUCHA IYETAE
ATAHUAQUE.

Miquemi dyaque casadaque. Micuetu dutya aniya.

Miquemi dutya bahueque. Micuetu dutya ai ataqui.

Muiya mique ecuanara. Dyaque jida, casada jadya taa mique. Pureama mique ecuanara aya”,

jadya tunajatu UHUISHA BUCHA IYETAE ATAHUAQUE
acuare.

¹³ Tumbaedyá tuque bacanucacuare Yusura dutya iyacuare cuanaque, barepaju cuanaque, yahua emaque cuanaque, riyaque yahuaju aniya cuanaque, cueri cuanaja ecuaqueju aniya cuanaque, dutya anicuare cuanaque jadya juyaju:

“Pureama metse ecuanara aya.

Muiya metse ecuanara.

Dyaque jida, casada jadya taa metse.

Metsejatu dutya ai ataqui.

Jadya metse ecuanara pureama aya, Dutya Cuatsashaquique,
tumbaedyá Jesucristo UHUISHA BUCHA IYETAE
ATAHUAQUE”,

jadya tunajatu acuare.

¹⁴ Pushi bape bape butsequinie cuanara tuna quemitsacuare:

—¡Jadidya paju!

Tumetu beta tunca pushi earacana Yusu mui juya cuanara nuyutsu yusurupai acuare. Tunaratu muicuare maju baecua aniyaque.

6

UHUISHA BUCHA IYETAE ATAHUARA quirica pacarucu sipibare eaque sirarabaretsu, jiracuareque

¹ Tume tuque bacuare UHUISHA BUCHA IYETAE ATAHUARA icueneque esipique sirarayaju. Tume tuque bacacuare peadya bape butsequinieque tiriti bucha etsuri tsehue jadya juyaju:

—¡Cuinanatsu, petacue! —jadya tura acuare.

² Tume tuque bacuare cahuayu pajadaque ebajeje netiyaju. Tumeque cahuayu isaaniquiratu inacuare etununu. Tuquetu

tyatanacuare dyaque jida pijique oro eaque iyucaju jutu ishu, tuque umada tsehue catiju dyaque casadaque adebataqui juishu. Tuquetu casada. Jujacaya amadyatu casada.

³ Beta ishuque esipique UHUISHA BUCHA IYETAE ATAHUARA sirarahuaju tuque bacacuare beta ishuque bape butsequinieque jadya juyaju:

—¡Cuinanatsu, petacue! —jadya tura acuare.

⁴ Tumetu cuinanacuare peya cahuayu pudedaque. Tumeque cahuayu isaaniquijatu anicuare casa dutya ecuita cuanaja jidaque inime cuana seca ishuque, amena ecuita cuana riyaque yahuaju aniya cuanaque quiyetibare ishu. Tyatanacuaretu quiyeti ishuque dyaque aridaque, peya anae cuana tsehue catiyaque, tuna jetiama majubuque jadique.

⁵ UHUISHA BUCHA IYETAE ATAHUARA quimisha ishuque esipique sirarayaju jucuarque tuque bacacuare quimisha ishuque bape butsequinieque jadya juyaju:

—¡Cuinanatsu, petacue! —jadya tura acuare.

Petatsu tuque bacuare cahuayu sehuedaque. Tumeque cahuayu isaaniquiratu inacuare tuputupu ishuque. ⁶ Tume tuque bacacuare etsuri ejeque cuana bape bape butsequinie cuanaque patya jadya juyaju:

—Trigo, ijique jadyatu dyaque daditaqui ama jubuque. Peadya kilo trigo, jadya ama juatsu quimisha kilo ijique jadya piji tuna caquemitibuque peadya huecaca mere tsuje. Jadya ama buchatu etseri, uva nacaca jadya tilla tupu ama anibuque, —jadyatu jucuar.

⁷ UHUISHA BUCHA IYETAE ATAHUARA pushi ishuque esipique sirarayaju jucuarque tuque bacacuare pushi ishuque bape butsequinieque jadya juyaju:

—¡Cuinanatsu, petacue! —jadya tura acuare.

⁸ Petatsu tuque bacuare cahuayu jahuadaque. Tuque isaaniquija ebanitu jucuar Maju. Tuque tupujutu jecuar emaju cuanaja yatanana naruquique. Cahuayu jahuada isaaniquiquetu tyatanacuare casa jetiama ecuita cuana iye ishu. Riyaque yahuaju dutya ecuita aniyaque patya jaqueque patya jaque nucadya iye ishuque casatu tyatanacuare. Jetiama tuna catitayaju majubuque, mije juatsu, umae ujeje casadara inahuaju. Peya cuanatu cuanubi mureda cuanara arabuque.

⁹ UHUISHA BUCHA IYETAE ATAHUARA pishica ishuque esipique sirarayaju jucuarque tuque bacuare mesaju muru ijimedaque pahua ishu emaque yatanana cuana, Yusuja quisarati cuejaqui cuanaque yunerique cuejajacaya amaju iyetacuare cuana jaque. ¹⁰ Tume cuanaquetu quisaraticuare etsuri jebuda tsehue:

—Yusu, miquemi juchama neri. Miratu ayadya mira eje bucha aana ayaque. ¿Eje tupu mira ecuana cuarehuanadadiya, mique adeba baecua cuanara ecuana jidama ahuaque? —jadya tunajatu Ecuana Cuatsashaquique acuare.

¹¹ Tume tuna tyatanacuare una pajadaque.

—Micuana micuana iyetanahua Jesúsja quisarati cueja, tuque merequi jadya juhua tibu. Jetiama tuja quisarati cueja juhua cuanaque tuna iyetanadadiyadya. Necanajaracue jari micuana iyetanacuare tupu, ique merequi cuanaque iyetanadadinucaya jari tupu, —jadya tujatu ecana cuejacuare.

¹² UHUISHA BUCHA IYETAE ATAHUARA shucuta ishuque esipique sirarayaju jucuaque tuque bacuare yahua bucucuyaju. Ijetitu sehuedaque jucuaque, ejutuqui sehuedaque bucha. Baditu jucuaque ami bucha pudee. ¹³ Purari cuana bacue pacaterecuare yahuaju, manga caca cuejijira casada huicuyaju epacacau bucha. ¹⁴ Barepatu piruritanacuare quirica epiruritanau bucha. Dutya emata cuana, ecububu cuana jadyatu peya queja iyasicuatanacuare. ¹⁵ Dutya ecuita Yusu adebacarama juhua cuanaque tuna tumu ebari majaca cuanaju emata cuana equiqueju catehua jucuaque. Riyaque yahua juque ecuari cuana tuna catehua jubarecuare. Arida, casada cuanaque tuna catehua jubarecuare. Sudaru cuana cuatsashaqui cuanaque tuna catehua jubarecuare, tumbaedy chhipirui, ecuatsashaqui cuanaque jadya. Tsujetyatama mere juya cuanaque, tsujetyataya cuanaque tuna catehua jubarecuare. Jadya eque tuna dutya catehua jubarecuare. ¹⁶ Tuna tuna jucuaque:

—Catehua nejura rehua emata cuanaju, Yusu Epu Cuana Naruquira ecuana epetau tibu. UHUISHA BUCHA IYETAE ATAHUAQUEtu dyaque ecahuaiti ecuana tsehue, tumbaedy dutya tuque muibacarama juya cuana tsehue. ¹⁷ Tuque tuja cahuaiti cabameretiyaque huecaca juetihuajutu ni ejeque buchique chacha juya ama. Dutya ecuana majuterebuque, —jadya tuna jubarecuare.

7

Yusuja cuanaque equetiju huenetanacuareque

¹ Jadya juu jadya juatsu tuque bacuare Yusu tsahuaqui cuanaque. Bacuare tuque pushi yahuaju pushi emajaca eque cuejiji cuinanaya eque junetibareyaju. Tunaradyatu tachicuare cuejiji, ni ejequeja yahuaju cuejiji juishu

ama, enaja ecuaque pei ishu ama. Bucucushacuare amatu ni ejeque acui buchique cuejijira. ² Yusura tuna cuatsashacuare yahua, cueri cuanaja ecuaque jadya yuamatura ishu. Tumbaedy a tuque peya banucacuare Yusu tsahuaquique ijetei cuinanaya eque amaca equeque jeyaju. Yusu Neri jaque jadya ehene bacuare junetiyaju. Jeeque Yusu tsahuaquiradyatu peya cuana casada quiquecuare yahua, cueri cuanaja ecuaque jadya yuamatura ishu ecuat-sasha cuanaque:

³ —¡Neihuacue jari! Neyuamaturaume jari yahua ni cueri cuanaja ecuaque ni acui cuana jadya. Icuene tuque ecuanaja huenetaqui jari ai equetiju Yusuja cuanaja, tuja cuanaque jadique adeba ishuque, —jadya tujatu ecana acuare.

⁴ Bacacuare tuque cuejayaju eje uma ehuenetana cuanaque. Israeljatu anicuare peadya tunca beta earacana ebacua cuanaque. Tuna eque ejuracana cuanaquedy a tuna israelita cuana. Anicuare tuna 144.000 ehuenetana cuanaque. 12.000 peadya ebacuaque cama eque juracanahua cuanaque.

⁵ 12.000 tuna huenetanacuare Judá eque ejuracana cuanaque,

12.000 Rubén eque ejuracana cuanaque,

12.000 Gad eque ejuracana cuanaque,

⁶ 12.000 Aser eque ejuracana cuanaque,

12.000 Naftalí eque ejuracana cuanaque,

12.000 Manasés eque ejuracana cuanaque,

⁷ 12.000 Simeón eque ejuracana cuanaque,

12.000 Leví eque ejuracana cuanaque,

12.000 Isacar eque ejuracana cuanaque,

⁸ 12.000 Zabulón eque ejuracana cuanaque,

12.000 José eque ejuracana cuanaque,

12.000 Benjamín eque ejuracana cuanaque.

Jadya tuna jucuaré.

Jetiama ecuita una pajaquí cuanaque bacuareque

⁹ Jadya juu jadya juatsu tuque petacuare. Bacuare ecuita cuana jetiama. Dutya epu cuana juque, yahua juque jadya tuque jeyaju batsacuare. Anicuaretu dutya yana eque quisaratiya cuanaque. Jetiama piyebatilla tupu ama tuna jucuaré. Bacuare tuna Yusu Dutya Cuatsashaquija yacuaju, tumbaedy UHUISHA BUCHA IYETAE ATAHUJA yacuaju jadya netibareyaju. Pajada una tsehue ecajututi tuna bacuare. Ejaqui cuana inatsu tuna netiyaju bacuare pureama juyaque. ¹⁰ Jadya tuna quique eque jucuaré:

“Miquemi Yusu ecuanara muiyaque.

Miratu cuatsashaya dutya.

UHUISHA BUCHA IYETAE ATAHUA eque mira ecuana Ijahua
quejaque inajacamerehua ecuana miatsehue anidiru
ishu”,

jadya tuna jerucuaré.

¹¹ Yusu tsahuaqui cuanaratu tabucuaré eaniqui cacuat-
sashati ishujú anibutehuaju, Yusu mui juya cuanaque, pushi
bape bape butsequinie cuanaque jadya. Dutya riya cuanaque
barepaju Yusu tsahuaqui cuanaque tuna yahua queja huipu-
chitanabare jucuaré eaniqui cacuatsashati ishujú anibute-
huaja yacuaju. Pureama tuna acuare Yusu.

¹² “¡Jadidya mique!

Pureama mique ecuana aya.

Dyaque jida, casada jadya taa mique.

Miquemi dutya bahueque.

Yusurupai mique ecuana ajacaya ama.

Muiya mique ecuanara.

Miquemi dyaque casadaque.

Micuetu dutya ai ataqui.

Miquemi Yusu ecuanara muiyaque.

Jadya mique ecuanaja ajacanime ama.

¡Jadidya paju!”

jadya tunajatu Yusu acuare.

¹³ Tume Yusu mui juyara bacaduracuare:

—¿Adebayadyami riya cuanaque una paja jutu jadya cua-
naque? ¿Bahuemi ejuque tume cuanaque jeyaqué? —jadya
tura acuare.

¹⁴—Aijama, tata. Midyami bahue, —jadya tuque acuare.

—Riya cuanaque ri Jesús queja nimee jujacahua cuanaque
ama, arepa peya cuanara tuaqueja catyatihua baatsu dyaque
nerecaturahua ama bucha. Yusura tunajatu jucha cuana
apupashahua, tunara Jesús majuhuaque, tuque tuna jiteque
ami quijehuetihuaque ejenehua tibu. Iyacia tuna una pa-
jaqui, jucha metse ama jadique adeba ishunque. ¹⁵ Jadya
tibudya tuna eaniqui cacuatsashati ishujú aniyaja yacuaju
netibareya. Huecada tupu, meta tupu jadya tunajatu Yusu
mereya. Tuque tuja eaniqui cacuatsashati ishujú aniyara tu-
jatu eana naruya ni eje tupu narujaca ishú ama. ¹⁶ Aracara,
ijicara jadya juatsu tuna nerecada junucaya ama. Ni eje tupu
tuna ijetija uquera nerecaturanucabuque ama. ¹⁷ UHUISHA
BUCHA IYETAE ATAHUAQUE Yusuja eaniqui cacuatsashati
ishu tuyu netiyara tuna naruya, tachiya jadya aya. Uhuisha
naruqira tuja uhuisha cuana enaruu bucha, narue tujatu
ecana aya. Tura tuna ijimereya ecuana chacha anishaqui
juyaqué. Yusura tuna nime aputashaya dutya tuna nerecada
juya cabatitsu pacuaré cuanaque, —jadya Yusu mui juyara
acuare.

8

UHUISHA BUCHA IYETA E ATAHUARA pacarucu ishuque esipique sirarahuaju jucuareque

¹ UHUISHA BUCHA IYETA E ATAHUARA tu siraracuare quirica camadya ishuque esipique. Tura sirarahuajutu barepaju dutya yaratupu abacatanaterecuare. ² Jadya juatsu tuque bacuare pacarucu, barepa juque Yusu tsahuaqui cuanaque Yusuja yacuaju netibareyaju. Tunadya tuna tyatanacuare pacarucu corneta meya ishuque, eje bucha judadiyaque cueja ishuque. ³ Tuequedyatu junanucacuare peya barepa juque Yusu tsahuaquique. Junatsutu netinacuare mesaju muru ijimedaque pahua ishu peque. Tyatanacuaretu umada muru ijimedaque. Huesacuare tujatu muru ijimedaque quiniquique mesa oro eaque dyaque iya ishu, Yusuja eaniqui cacuatsashati ishu pequeque. Pahuacuare tujatu muru ijimedaque Yusuja ishu, Yusuja cuanaque Yusu queja dutya bacabacaya cuana tsehue apee. ⁴ Tumetu muru ijimedaja huani tsuracuare Yusu queja barepaju Yusu tsahuaquija emetucu juque, Yusu queja ecatyati cuanaja quisarati cuana tsehue tsurapee. ⁵ Tumetu barepaju Yusu tsahuaquira jequeshacuare muru ijimedaque quiniquique etijaqui tsehue mesaju aniyaque. Dacashacuaretu yahuaju. Tura jadya ayajutu tiriticuare. Sicacada, pupipupiya, yahua bucucu jadyatu jucuare.

Yusu tsahuaqui cuanara corneta meyacuaque

⁶ Pacarucu, barepa juque Yusu tsahuaqui cuanaque tuna cabajejeticuare corneta meya ishu.

⁷ Icueneque Yusu tsahuaquiratu corneta meyacuaque. Tura corneta meyayajutu yahuaju pacacacuare nei juya bucha cuita bise etiqui ami tsehue ecujatique. Aridatu yahua tirucuaque. Patya jaque jujeritu yahua tirucuaque. Tumbaedyatu tume tupu nucadya acui, acuihuija cuana jadya tirucuaque. Aijamatu jucuare yachi nutsa ni euhua cuanaque yahua etiruju.

⁸ Beta ishuque Yusu tsahuaquiratu meyanucacuare tuja corneta. Tura meyayajutu pacacacuare cueri cuanaja ecuaqueju ai cuana emata ebari buchique jujuyaque. Patya jaque jujeritu cueri cuanaja ecuaque ami cabapeticuaque, emata buchique jujuyaque pacacahuaju. ⁹ Patya jaque jujeritu cueri cuanaja ecuaqueju aniya cuanaque majucuare. Patya jaque jujeritu cuaba ebari cueri cuanaja ecuaqueju cuanaque aputacuare.

¹⁰ Quimisha ishuque Yusu tsahuaquiratu meyacuaque tuja corneta. Tura corneta meyayajutu purari dyaque aridaque pacacacuare barepa juque jujuyaque. Jetiama cueri cuanaju,

cueri huitsana cuanaju jadyatu pacacacuare. Patya jaque jujeri cueri cuanaju cueri huitsana cuanaju jadyatu pacacacuare. ¹¹ Tumeque purari bacanitu jucuaré “Patsedaque”. Dutya ena cuanaju purari pacacahuajutu ena cuana patseda jubarecuare. Umadatu ecuita majucuaré tumeque ena patsedaque ijitsu.

¹² Pushi ishuque Yusu tsahuaquiratu meyacuaré tuja corneta. Tura corneta meyayajutu patya jaque jujeri ijeti, badi, purari cuana jadya huecada jujacacuare. Quimisacarucu ura tupu dyanetu ijeti ja hueca riya piji cuita jucuaré. Tume tupu ura nucadyatu riya piji badija, purari cuanaja hueca riya piji jucuaré. Quimisacarucu uradyatu dutya pana apunatere jucuaré.

¹³ Jadya juatsu tuque petanucacuare huihuipa barepa patya jetajetaniyaju. Jadya tuque quiqueyaju bacacuare:

—¡Ay, ay, ay! ¡Dyaquetu canerecatidadibuque riyaque yahuaaju aniya cuanaque, peya quimisha barepa juque Yusu tsahuaqui cuanara tunaja meya ishuque meyayaju! — jadyatu jucuaré.

9

¹ Pishica ishuque Yusu tsahuaquiratu meyacuaré tuja corneta. Tura corneta meyayaju tuque bacuaré ai cuana purari bucha barepa juque yahuaaju pacacayaju. Purari jiuquetu cuatsashatanahua, emajaca dyaque aridaque espíritu jidama cuanaque eteritana cuanaque pacasha ishu, tuna Yusura canerecatishadadiyaque ihua juya cuanaque. ² Yara tupu juatsu tujatu pacashacuare. Pacashahuajutu cuinanacuare jetiama huani, tee tiruyaju ejuu bucha. Tumeque huaniratu ijeti aputashacuare. Tumetu aijama jucuaré cuejiji canajeti ishuque. ³ Tumeque huani juquedyatu cuinanacuare tsei cuana baeque, ai cuana dutya yuamaturaque. Jetajeticuare ecana yahuaaju. Tume cuanaquetu jucuaré cati aquique tima cuijaqui ajipa bucha cuanaque.

⁴ —Nutsa, ni euhua cuanaque ni acui cuana jadya neyuamaturaume. Yusuja cuanaque adeba ishu ehue ne cuanaque ujedá neaume. Equetiju huenema cuanaque camadya ujedá neabarecue. ⁵ Arepa micuana jadya ujedá ishu ecuatsasha ama bucha, neiyéume ecana. Dyaque cuita camadya ama ecana neujejeshacue, pishica badi tupu camadya, —jadya tuna ai cuana barepajura cuatsashacuare.

Tunaja ujetu jucuaré ajipaja uje tupu camadya. ⁶ Tumeque huecada tume ujedá cuanara aya cuanaque tuna dyaque nerecada jubuque, majuyaque ama, arepa ecana tuna taca camajusareti juya ama bucha.

⁷ Tsei cuanatu cahuyau cuana catira cuaishuque bucha ebajeje jucuare. Iyucaju tunajatu puja anicuare oro eaque. Ecuita butsequini bucha tuna jucuare. ⁸ Etsaru tunajatu jucuare baruda epunaja bucha. Etse tunaja muda cuanubi mureda jaque bucha jucuare. ⁹ Yacua tunajatu epene jucuare fierro tsehue, catira cuaishu bucha, piya enubiuju penequique. Yajapara tunajatu dyaque sicacada jucuare. Caretu cuana cahuyura catira cuayaque repeyaque tsajajaquereyaque ejuu bucha tuna jucuare. ¹⁰ Ihua bacue tunaja ajipa jaque bucha tima cuijaqui. Etima cuija tsehuedya tunajatu ecuita cuana nerecaturacuara pishica badi tupu. ¹¹ Tsei cuanajatu anicuare peadya tuna cuatsashaquique. Tudyatu huaraji tuna cuatsashaquique tumeque emajaca dyaque aridaju aniyaque. Tudyatu icuene beru Yusu tsahuaquique jucuareque. Ijehuetanacuretu emaque emajaca dyaque aridaju. Ebacani tujatu israelita cuanaja yana eque “Abadón”; griego cuanaja yana eque bacue “Apolión”. Riyaque ebacani tu “Catillati puji” jadicue.

¹² Amenatu cueticuare peadya inime jidamaque dutya yuamaturaquique. Bataqui amatu beta jadya junuca ishucue.

¹³ Shucuta ishucue Yusu tsahuaquiratu corneta meycuare. Tura corneta meycayaju tuque bacatsacuare etsuri jeyaju mesa oro eaque pushi etsucu equeque. Tuhuadyatu muru ijimedaque pahuatanacuare. Riyaque mesatu Yusuja yacuaju neticuare. ¹⁴ Etsuriratu acuare shucuta ishucue Yusu tsahuaquique cornetaquique:

—Pisuticue pushi ijahua cuana dyaque casada cuanaque cueri Eufrates dyaque arida jiruru erisi cuanaque, —jadyatu etsurira acuare shucuta ishucue Yusu tsahuaquique.

¹⁵ Jadya pisutanaetu jucuare pushi ijahua cuana, jetiama ecuita iye ishucue. Patya jaque emaque dyane tunajatu ecuita iyecuare. Tumeque ijahua cuanatu peya huecaca ama inajacatanacuare. Tumeque ura, huecaca, badi, mara camadya tuna inajacatanacuare. ¹⁶ Jadya juatsutu ejitaju jucuare sudaru cuana tumeque pushi ijahua cuana jaque. Jetiamapa ecana aniya. Jadya tuna cacuejaticuare. Beta cientos millonespa tuna.

¹⁷ Jadya tuque bacuare cahuyau cuana tahuiju bucha. Cahuyau dyaque aniya cuanaquetu yacua ecapeneti jucuare. Riyaque yacua capeneti ishucuetu jucuare pureda etiqui juju bucha, sahuada zafiro bucha, jahuada asufre bucha. Cahuyau cuana tuque bacuare iba muredaque iyuca bae. Tunaja ecuatsa equetu cuinanabarecuare etiqui, huani, asufre jadya. ¹⁸ Era micuana cuejahua baedya, jetiamatu ecuita iyetanacuare. Etiqui, huani, asufre jadya cahuyau cuanaja

yatsanaca eqe cuinanayara tuna iyecuare. Jadya majuetu patya jaque emaque dyaque ecuita jucuare. ¹⁹ Tumeque cahuayu cuanatu quiyeti ishuffledya jucuare tunaja ecuatsa eqe cuinanaya tsehue, tumbaedyia ihua tsehue. Tunaja ihua cuanatu bacua iyuca bae jucuare. Tunaja ihua tsehue tunajatu ecana dyaque ujeda abarecuare.

²⁰ Arepa canerecatitsu majuyaju bahua ama bucha, tuna umae ecuita cuana riyaque jidamara iyehua cuanaque ama tuna jidama jujacacuare ama. Muijacacarama tuna acuare ijahua cuana, yusu jiu oro ea cuanaque, plata, bronce, tumu, acui jadya ea cuanaque. Riya cuanaque cueya cueya cuanatu capetatiya ama ni quijacabacatiya ni ajeya. ²¹ Ecuita jidama cuanaque tuna quiyetijacahua ama. Cabijiseritijacahua ama ecana. Marura ecana catijacahua ama. Cabijiserititsu ecana tunaja biji eqe jujacahua ama. Chiri ecana jujacahua ama.

10

Yusu tsahuaquique quirica ina jadique

¹ Tume tuque peya bacuare Yusu tsahuaquique casadaque barepa juque buteyaju. Barepa juque huani ducutu jucuare. Iyuca tajinaqui ecuejiquini ijete bucha huecae, etsaca bacue tuja etiqui bucha huecae jadyatu jucuare. ² Quirica piji epirurique ejiraque tujatu inacuare. Tapacuare tujatu jida eqe amaca tsehue cueri cuanaja ecuaque, jani eqe amaca tsehue bacue yahua. ³ Tumetu quiquecuare jebuda etsuri tsehue, iba mariyaque juya bucha. Tumeque marijahuaju tuque bacacuare peya cuanaja etsuri pacarucu tiriti juya bucha. ⁴ Pacarucu tiriti quisaratihujutu era huene cara acuare tunara quisarati ahuaque. Tume tuque bacacuare etsuri barepa juque.

—Hueneume mira bacahua cuanaque, —jadya aira cuana acuare barepajura.

⁵ Tumetu barepaju Yusu tsahuaquique cueri cuanaja ecuaque, yahua jadya tapatsu netiyaju bahuara emetucu jida eqe amaca huesacuare barepaju.

⁶ —“Tere patu amena japadama”, jadya Yusu Maju Bae-cuara cuejamerehua. Turadyatu barepa, yahua, enaja ecuaque jadya iyahua. Turadyatu iyahua dutya, dutya queja aniyaque. ⁷ Beru yuequedyatu Yusura cuejacuare tuque equeque cuitadya quisarati cuejaqui cuanaque. Iyacuatu ejetsunue ama Yusura amena ishuffled inime ejitaju aya. Pacarucu ishuffled Yusu tsahuaquira corneta meyatibuneya-jutu amena Yusuja inime etehuaque juhua, —jadyatu jucuare.

⁸ Bacanucacuare tuque barepaju ejeque cuana quisaratiyaju.

—Cuacue, ique tsahuaquique casadaque yahujaju, cueri cuanaja ecuaqueju jadya netiya queja. Inacue quirica piji tura inayaque, —jadya tura acuare.

⁹ Jadya juatsu cuacuare Yusu tsahuaqui queja. Jadya juatsu tuque bacaticuare tura quirica piji inayaque.

—Jeedy micue. Inacue. Aracue. Micue ecuatsajutu huajada juya huaja bucha. Micue ecarecaniju camadyatu patseda juya, —jadya riyaque Yusu tsahuaquira acuare.

¹⁰ Inatsacuare tuque Yusu tsahuaquija emetucu juque. Inatsatsu tuque aracuare. Ecue ecuatsajutu huajada jucuar huaja bucha. Buijitsu tuque patseda bacuare ecarecaniju.

¹¹ Ejera cuana taa jadya acuare:

—Cuejanucataqui tuque micue Yusura eje bucha juya jadya ayaque jetiama epu cuanaju aniya cuanaque, eje uma anae cuanaque, tumbaedy tunaja ecuari cuana, —jadya tura cuejacuare.

11

Eje bucha judadiyaque cuejaquique ecatse

¹ Tume tyatanacuare tuputupu ishuque acui buchique.

—Cuacue. Yusuja etare tuputicue, tumbaedy mesa muru ijimedaque pahua ishuque. Tumbaedy piye bacue eje uma ecana tuhua Yusu muiqui cuanaque. ² Etare tsecue camadya tupuume etsecue juque. Tumequetu Yusu mui bae-cua cuanaja ishuque. Tunaratu yuamaturabuque Jerusalén epu ebari emuique. Tunaradyatu epu ebari tapapashaya quimisha mara peya patya patya tupu. ³ Cuadishabuque tuque beta ique merequique ecatse tumeque epuju ecue quisarati cuejara. Cuejabuque tatsejatu eje uma huecaca ama — 1.260 huecaca tupu. Jutubuque tatsejatu una sehuedaque, ecuita cuana inime cacuareti ishuque adebamere ishu, — jadya barepajura acuare.

⁴ Tume tuque bacuare Yusuja yacuaju enitya beta acui olivo bacani, beta ude nityaquique ecatse jadya. Riyaquetu Yusura tachibuque beta tuque merequique ecatse jadique.

⁵ Ejera jidama acara ayaju, tatsejatu ecuatsa equé etiqui pushaya. Pana tirusha tatsejatu aya tatse ujeu baqui cuanaque. Jadya iyetanae tuna jubuque ejera tatse jidama acara aya cuanaque. ⁶ Riyaque quisarati cuejaquique ecatsejatu casa aniya barepa teri ishu, Yusuja quisarati cuejatanaya tupu nei pacaca ishu ama. Tumbaedy tatsejatu casa aniya ena ami cabapetisha ishu. Eamereudya tatsejatu eje buchique ujeje, eje uma tatsera amerecara aya tupu.

⁷ Quimisha mara peya patya patya Yusuja quisarati cueja juhuajutu Ecuita Cuanubi Bucha Mureeque emajaca dyaque arida juque cuinanayara tatse catiquerebuque. Ijahue tujatu ecitse abuque. Tura tatse casa secabuque. Iyebuque tujatu ecitse. ⁸⁻⁹ Ecuita Cuanubi Bucha Mureeratu quisarati cuejaquique ecitse iyetsu papamerecarama abuque quimisha huecaca peya barepatya tupu. Epu ebari ediji cuanaju Ecuana Cuatsashaqui Jesucristo curusuju tatatanacuareju tatse emajuque jarabuque. (Tumeque epuju aniya cuanaque tuna dyaque jidama jubuque Sodomaju, Egiptoju jadya anicuaque cuanaque bucha.) Dutyara tunajatu ecitse emajuque babuque; peya yahuaju cuanara tumbaedy a tunajatu ecitse banabuque. ¹⁰ Yusu adeba baecua cuanaque tuna pureama jubuque quisarati cuejaquique ecitse emajuque bahue juatsu, tatsera ni eje tupu nereda anucaya ama cabatitsu. Chine tuna jubuque. Dyaque pureama tuna jubuque, quisarati cuejaquique ecitse majuhua tibu, aija nereda aquima juhua cabatitsu. ¹¹ Quimisha huecaca peya barepatya tupu juhuaju tatse Yusura chacha nityatsuranucabuque. Dutya tumeque petaqui juhua cuanaque tuna bajida, inime tilla jadya jubuque. ¹² Tuequedy a quisarati cuejaqui ecatsera etsuri casadaque bacacuare barepa equeque tatse ihuara juyaju.

—Netsuracue requeja ebarucue, —jadya tujatu ecitse acuaque.

Jadya ayaju tatse tsuracuare barepaju huani ducu eque, tatse ujeu baqui cuanara petayaju. ¹³ Tumeque ura cuitadyatu yahua casada bucucucuaque. Umae etare arida cuanaquetu rururuterecuare. Jetiamatu ecuita majucuaque, pacarucu mil, yahua bucucutsu. Ecuita majucuaque ama cuanaque tuna bajida juterecuare. Pureama tunajatu Yusu barepa juque acuaque.

¹⁴ Jadya tereetu jucuaque beta ishuque inime jidamaque. Tsunutaya amatu quimisha ishuque.

Pacarucu ishura corneta meyacuaque

¹⁵ Pacarucu ishuque Yusu tsahuaquiratu corneta meyacuaque. Tura corneta meyayaju tuna bacacuare etsuri cuana jebuda barepa juque jadya juyaju:

“Yusu, miquemi dutya naruquique.

Miquemi dutya yahuaju cuanaque cuatsashaquique.

Dutyara tuque micue bacua Jesucristo muisiribuque, muijatsu ama”,
jadya tunajatu Yusu acuaque.

¹⁶ Tume beta tunca pushi earacana Yusu muijuya cuanaque tunaja eaniqui cacuatsashati ishujuyaju.

aniya cuanaque netibarecuare. Yusuja yacuaju tuna huipuchitanatsu nuyubarecuare. Pureama tuna Yusu acuaire.

¹⁷ “Yusu, miquemi Ecuana Cuatsashaquique.

Miquemi dutya casa tsehueque.

Miquemi beru yuequedyadya anihua.

Iyacuami mique anisiriyaque.

Yusurupai mique ecuana aya, mira ecuana micue dyaque casa bamerehua tibu.

Yusurupai mique ecuana aya, mique amena enaruqui juti-bunehua tibu.

¹⁸ Mique adeba baecua cuanaquetu cahuaitya miatsehue.

Jadya ama buchatu juetihua huecaca mira ecana nerecatu-rayaque.

Juetihuatu huecaca emaju cuanaque micue yacuaju netititsu eje bucha juyaque bahue juishu.

Iyacua tuquemi tyaya dutya mique merequi juhua cuanaque dutya jidaque mira ecana tyaana ahuaque.

Micue quisarati cuejaqui juhua cuanaque tuquemi ecana jidaque tyaya.

Dutya micue cuanaque, dutya mique muiqui juhua cuanaque tuquemi jidaque tyabuque.

Esiri cuanaque, ehue ebari cuana, ebacua cuana jadya tuquemi ecana tyabuque.

Micue cuanaque riyaque yahuaaju jidama ujeda ujeda aqui juhua cuanaque bacuemi ecana pana aputashatilla abuque”,

jadya tunajatu Yusu acuaire.

¹⁹ Jadya juhuajutu pacashatanacuare Yusuja etare mudaque barepa juque etsecue Yusu aniquique. Tumetu ejitaju jucuare caju Yusura tuja cuanaque narucuare cuanaque adeba ishucuaque. Casada pupipupiya, tiritiya jadyatu jucuare. Jadya juyajutu yahua casada bucucucuare. Tumebaedyatu jetiama bise pacacacuare.

12

Matuja Ebari Jiura epunaja ebacuaque iyecara acuaireque

¹ Jadya juatsutu barepaju ejitaju jucuare mudaque adeba ishucuaque. Eje bucha inime judadiyaque adeba ishucuaque jucuare. Ejitaju jucuare peadya epuna. Tuja unatu jucuare ijettija hueca bucha. Badi jiu dyaquetu neticuare. Iyucaju tujatu anicuare puja oro eaque. Tuhuaadya tujatu peadya tunca beta earacana purari anibarecuare. ² Riyaque epunatu maquique jucuare. Cuinahuiequetu jucuare. Cuinayaque uje bucharatu quiqueshatillacuare. Dyaque nerecadatu jucuare.

³ Jadya juatsutu ejitaju junucacuare peadya adeba ishucuaque.

Matuja Ebari Jiuquetu pudedá jucuare. Anicuare tujatu pacarucu iyuca, peadya tunca edana jadya. Iyucaju tujatu puja oro eaque anibarecuare. ⁴Repecuare tujatu patya jaque emaque dyane barepa juque purari cuana tuja ihua tsehue. Pacacashacuare tujatu purari cuana yahuaju. Matuja Ebari Jiuquetu netinaticuare epuna cuinacara juyaja yacuaju, tuja ebacua cuinanaya tsehuedya aratsa ishu. ⁵Epunajatu ebacua cuinanacuare deca. Dutya yahuaju aniya cuanaque tujatu dyaque muida tsehue narudadibuque dutya jidama cuanaque. Amena tuja ebacua cuinanahuajutu secatanacuare. Dujutanacuaretu Yusu queja tuja eaniquiju. ⁶Epunatu huanacuare epu cuana aijamaju. Tuhuatu Yusura emajaca bajehua tumeque epunaja ishu. Tuhuadyatu 1.260 huecaca narutana, mihuatana jadya jucuare.

⁷Jadya juatsutu barepa juque Yusu tsahuaqui cuanaque cuatsashaquique Miguel bacani, tuque tsahuaqui cuana tsehue, tuna caticuare Matuja Ebari Jiu tsehue, barepaju icuene Yusu tsahuaqui jucuare cuanaque Yusu tsehue cahuaiticuare cuanaque. ⁸Tumetu Matuja Ebari Jiuja, tuque tsahuaqui cuanaja jadya casa terecuare. Tume tuna barepa juque ijehuetanacuare. Yusura tuna barepaju iyanucacarama acuare. ⁹Jadya ijehuetanatu jucuare tumeque Matuja Ebari Jiuque, Ijahua Satanás bacani, dutya yahua juque Yusu adeba baecua cuanaque jahue aquique. Satanás, dutya tuque tsahuaqui cuana tsehuetu ijehuetanacuare yahuaju.

¹⁰Tume tuque bacacuare etsuri jebudaque barepa juque. “Yusuratu inajacamerehua tuja cuanaque emajutereuque. Iyacuatu Yusu tuja cuanaque inajacamere ishu mepehuaque cabameretihua tuja cacuatsashati.

Satanás, ‘Caana cuejati puji’ bacani jucuarequetu jidama quisaratihua ecuana tsehuequi cuanaja ishu huecada tupu, meta tupu Yusu ecuanara muiyaja yacuaju.

Tuquetu amena ijehuetanahua.

¹¹Ecuana tsehuequi cuanaque tuna bajida ama juhua iyeta ishu.

Arepa iyetaya ama bucha tuna Jesús queja nimee jujacahua ama.

Ejenejacahua ama tunajatu UHUISHA BUCHA IYETA
ATAHUAQUE ecuana jiteque ami quijehueti, maju
jadya juhuaque.

Cuejajacahua ama tunajatu quisarati yunerique.

Tume tunajatu jadya secas casa acuare tunaja ishu quisarati tere baecua jucuareque.

¹²¡Pureama nejucue, micuana barepaju aniya cuanaque!

¡Nerecapane yahuaju, cueri cuanaja ecuaqueju aniya cuanaque, Satanás micuana queja butehua tibu!

Tuquetu ecahuaiti ejetsunue ama tuque jucara juya eque juishu aniya baatsu”, jadyatu ejeque cuana jucuare.

¹³ Matuja Ebari Jiuque yahuaju ijehuetanahuaque caadebatitsu, tujatu nerecaturatibunecuare epuna ebacua nana ijehuecuinaqui juhuaque. ¹⁴ Epunatu tyatanacuare beta yajapara aridaque huihuipaja buchique. Jetatsu tujatu jacacuare Matuja Ebari Jiuque. Tuquetu judirucuare anitaya amaju. Anidirucuaretu quimisha mara peya patya patya tupu camadya. Tumeque epunatu naru, mihua jadya atanacuare. Matuja Ebari Jiuratu eje bucha ama acuare. ¹⁵ Tumetu Matuja Ebari Jiura ijehuetibunecuare ena ecuatsa eque. Cueri bucha jurishae tujatu acuare epuna huidisha ishu. ¹⁶ Yusuratu yahua burishacuare. Tume tujatu Matuja Ebari Jiura yatsanaca eque ena pushahuaque caniju ishacuare. Buijihua buchatu jucuare. ¹⁷ Jutaquijudyatu Matuja Ebari Jiuque dyaque cahuaiticuare epuna tsehue. Jadya juatsutu catira cuacuare tumeque epuna eque ejuracana cuana tsehue. Turatu aputashacara acuare Yusuja cacuatsashati eque juya cuanaque, yunerique quisarati Jesucristora cuejahuaque ejenejacaya ama cuanaque.

13

Juanra Mapisi Ebari Jiuque, Cuanubi Jiuque Bape Ebari jadique bacuareque

¹ Ique cueri cuanaja ecuaque mejijiju junetiyara tuque batsacuare ena juque mejijiju tsurayaju peadya Mapisi Ebari Jiuque. Anicuare tujatu pacarucu iyuca, peadya tunca edana jadya. Dutya edana cuanaju tujatu oro eaque jutubarecuare, ecuari juishu casa aniya jadique caadebamereti ishu. Iyuca cuanajutu Yusu cahuaitisha ishunque quisarati ehue jucuare. ² Tumeque Mapisi Ebari Jiuque bahuaquetu ducueri iba bae jucuare. Huachi meshuru baruda, iba bucha tsebaruda jadyatu jucuare. Matuja Ebari Jiuratu tyacuare tuja casa Mapisi Ebari Jiuque, dutya tuja ataqui juishu, huaraji dyaque casadaque juishu jadya. ³ Peadya iyucaju Mapisi Ebari Jiuque anicuare ujeda eaque majutaqui buchique. Tumequetu chachanetanacuare. Ujeda eaque chacha juhua baatsutu Yusu adeba baecua cuanara bape inime tupucuare, tuque majutaqui ujeda atanahuaque majuhua ama baatsu. ⁴ Tume tuna huipuchitanacuare Matuja Ebari Jiura yacuaju tuque muiyaque, tura Mapisi Ebari Jiuque casa tyahua baatsu. Tumebaedyu tuna Mapisi Ebari Jiuque chichucata ishu acuare.

—¡Aijama tuna ejeque riyaque Mapisi Ebari Jiu buchique!
 ¡Ni ejeradya jutidyatu ijahue eau catiju! —jadya tuna jucuaire.

⁵ Tumbaedyatu Mapisi Ebari Jiuja Yusu cahuaite ishucue quisarati aishucue anicuare. Huarajitu ameretacuare pushi tunca beta earacana badi tupu. ⁶ Tumetu jadidya jucuaire. Quisaraticuaretu jidama Yusuja ishu. Ijillahuanacuaretu Yusu. Tumbaedyatu ijillahuanacuare Yusuja etare. Tumbaedyata barepajuque Yusuja cuanaquetu ijillahuanacuare. ⁷ Tumbaedyatu Mapisi Ebari Jiuque emajaca tyatanacuare Yusuja cuana tsehue cati ishu tuna ijahue aya tupu. Tudyatu tyatanahua cacuatsashati riyaque yahua juque epu cuana, peya yana eque cuanaque cuatsasha ishu. ⁸ Tumeque Mapisi Ebari Jiuquetu yahuaju aniya cuanara muicuare. Muicuaretu UHUISHA BUCHA IYETAETAHUAJA quiricaju ebacani huenetanama cuanara. (Tura inajcaamerehua cuanaja ebacaniu huenetanahua tumeque quiricaju yahua iyatanahua equeque.)

⁹ Micuana quijacabacati aqui juatsu, nebacacue. ¹⁰ Ejera ni peya cuana risitsu dujuya, tumbaedyatu tuna dyadi risitanabuquedya. Cuchiru tsehue quietiya cuanaquetu tumbaedyata iyetanabuque cuchiru tsehuedya. Jadya tibudyatu Yusuja cuanara iduya dutya canerecatiyaque, canimehuallatitsu ama, ni Jesús queja nimee jujacatsu.

¹¹ Jadya juatsu tuque banucacuare Cuanubi Jiuque Bape Ebarique yahua juque tsurayaju. Arepa uhuisha deca bucha dana beta juya ama buchatu matuja ebari jiu bucha tsurie jucuaire. ¹² Riyajatu anicuare Mapisi Ebari Jiuja cacuatsashati bae cuita nucadya. Mereya, tachiya jadya tujatu acuare. Riyaque Cuanubi Jiuque Bape Ebariratu cuatsashacuare dutya riyaque yahuaju aniya cuanaja Mapisi Ebari Jiuque mui ishu. Turadyatu ujeda eaque ujera iyehuaju chacha nityatsuranacuare. ¹³ Acuaretu ni ejeque ecuitaja ataquique ama. Etiquitu barepa juque pacacashacuare yahuaju ecuita cuanara petayaju. ¹⁴ Inimeradya jutidya ai aya tsehue tujatu riyaque yahua juque ecuita cuana ijahue acuare. Mapisi Ebari Jiura amereya equetu ecana mui, mere jadya acuare.

—Mapisi Ebari Jiuja cueya neacue, cuchiruja esacuaque majutaquique chacha jucuaireja cueya, —jadyatu cuatsashacuare Cuanubi Jiuque Bape Ebarira ecuita cuana.

¹⁵ Tuequedyatu Cuanubi Jiuque Bape Ebarique tyatanacuare casa Mapisi Ebari Jiuja cueya eaque chacha amere ishu, tumeque cueya quisaratitsu dutya tuque muicarama juya cuanaque iyetillamere ishu. ¹⁶ Jadya ahua ama bucha tujatu cuatsashacuare jadya:

—Nehuenecue emetucuju jida eque amaca, jadya ama juatsu ecuita cuanaja equetiju, ecue yana equedya juya cuanaque jadique adeba ishu. Dutya ecana nehuenecue. Pahuenetana achaacha cuanaque, ehue ebari cuana, eca-pajiti cuanaque, chipiriqui cuanaque, nrecada cuanaque, tsujema mere juya cuanaque, tsujequi mere juya cuana jadya. ¹⁷ Nehuenecue Mapisi Ebari Jiuja ebacani, jadya ama juatsu número. Riyaque ehuenecue aijama cuanajatu aijama juya ni ai quemitaqui ni catyati ataqui, —jadya tujatu cuat-sashacuare.

Jadidyatu jucuaré. Dutya huenetanama cuanaque tuna canerecaticuare, tunara ai sareya cuanaque daditaquima baya tibu. ¹⁸ Riyaque tu iyucaquija ishucue. Ejeque bahue juyaratu adebaya número Mapisi Ebari Jiuja. Tuja número tu 666. Riyaque número tu ecuitadya datse. Micuanara ni número adebaya, tume tuque micuana adebaya ejeque ecuitaque.

14

144.000 jerucuaré cuanaque

¹ Jadya juatsu tuque petacuare. Bacuare tuque UHUISHA BUCHA IYETAÉ ATAHUAQUE, Sión bacani emata dyaque netiyaju. Tuatsehuedya tuna neticuare 144.000 ecuita cuana. UHUISHA BUCHA IYETAÉ ATAHUAJA ebacani, Etataqueja ebacani jadyatu ehue jucuaré tunaja equeti cuanaju. ² Jadya juatsu tuque bacacuare tuuuyaque barepa juque buteyaju. Sururu tuuuya bucha tuque bacacuare jebuda tiritiyaju enara quemitsaya bucha. Jucualetu etsuri umada arpa dudu puji cuana tunaja arpa dudu juyaque bucha. ³ Tumetu 144.000 cuanaque jerucuaré Yusuja yacuaju, pushi bape bape butsequinie cuanaja, Yusu mui juyaja jadyaja yacuaju. Iyacuaque jeru tunajatu acuare. Ni ejequetu bahue jucuaré ama, 144.000 cuanaque camadya, ni ejeque bahue juishu ama. Riya cuanaquetu jucuaré yahuaju aniya cuanaque ducu echachaneque. ⁴ Riya cuanaquetu epuna tsehue cajipetihua ama cuanaque. Jucha juma tuna ancuaré. UHUISHA BUCHA IYETAÉ ATAHUA tsehue tuna juneniya eju tuque cuayaju. Tunadya tuna icuene jucuaré Yusura, UHUISHA BUCHA IYETAÉ ATAHUARA jadya tuja ishu mepecuareque. ⁵ Pusha pusha baecua tuna. Yusura tuna jucha metse ama baya.

Barepa juque quimisha etsahuaqui cuana cueja jucuaré

⁶ Tume tuque bacuare barepa juque peadya etsahuaquique barepaju jetayaju. Yusratu cuadishhua dutya epu cuana

juque dutya cueja ishü Yusu queja judiru ishüque quisarati cueja ishü. Riyaque quisaratitu cuaretananime ama. Yusuratu cuadishahua dutya queja aniya cuanaque cuejara, riyaque yahua ju dutya yana eque quisaratiya cuanaque. ⁷ Jadyatu jucuaré barepa juque Yusu tsahuaquique etsuri jebuda tsehue:

—Nemuicue Yusu. Pureama neacue. Amenatu juetihua huecaca tura inime cacuareticarama juya cuanaque nerecat-urayaque. Pureama neacue barepa, yahua, cueri cuanaja ecuaque, cueri, espere cuana jadya aquique, —jadyatu jucuaré.

⁸ Yusu tsahuaquiratu peya quiqueyaque tupucuaré.

—¡Epu ebari Babilonia bacanitu teredadiya, tuhua ecuita aniya cuanaque dyaque jidama cuita juya tibu! Tumeque epuju cuanaratu peya epuju cuanaque cajuchatishahua; tuna tuna epunara deca cuana jaraquere ishü enijuquishau buchique, —jadyatu jucuaré beta ishüque Yusu tsahuaquique.

⁹ Jadya juatsutu junanucacuaré quimisha ishüque Yusu tsahuaquique. Jebuda etsuri tsehuetu jadya jucuaré:

—Dyaque jidamatu canerecatibuque Mapisi Ebari Jiuque miqui cuanaque, tuja cueya eaja yacuaju chichucata juya cuanaque, tuja ebacani tunaja equetiju, emetucuju jadya cahuenemeretiya cuanaque. ¹⁰ Dyaque tuna nerecada judadiya, dyaque Yusu cahuaishacuare tibu. Etiqui, asufre jadyaju nubi ishüque tuna. Dyaque tuna nerecada jubuque. UHUISHA BUCHA IYETAE ATAHUARA, Yusu tsahuaqui asicadama cuanara tuna petabuque nerecada juyaju. ¹¹ Tuna nerecada juya juque etiqui huanitu netitsurajacabuque ama. Huecada tupu, meta tupu tunajatu aijama canajara juya, Mapisi Ebari Jiuque, tuja cueya jadya miqui juhua tibu, tumbaedya Mapisi Ebari Jiuja ebacani tsehue cahuenemeretihua tibu. ¹² Jadya tibudya Yusuja cuanaque, tuja quisarati cacuatsashati bacaqui cuanaque, Jesús queja nimee jujacaya ama cuanaque necacasaturaticue peya cuana tsehue, Jesús queja nimee ejujacau tibu, —jadyatu jucuaré quimisha ishüque Yusu tsahuaquique.

¹³ Tume tuque bacacuaré etsuri barepa juque.

—Huenecue era cuejayaque: “Dyaque jida taa reeque amena Ecuana Cuatsashaqui queja nimee majuya cuanaque”, jadyatu judadiya. Majutsutu amena dutya merecuana, nerecada anie rehua juyaque jadyatu tereya. Tyatanahuie tuna Ecuana Cuatsashaquira tyaana acuareque, tuque merequi jucuaré tibu. Ni aitu aijama juya ama. Canajarabuque tuna. Riyaque ri Yusuja Espirituja quisarati, —jadya tura acuare.

Yusuja cuanaque casitatidadiyaque

¹⁴ Tuequedya tuque bacuare eje bucha judadiyaque. Bacuare tuque ejeque cuana ecuita jiuque barepa huani paja dyaque aniyaju. Iyucaju tujatu puja oro eaque anicuare. Inacuare tujatu cuchiru etununaque arusu raca ishuque buchique. ¹⁵ Yusuja etare juquetu cuinanacuare peya etsahuaquique. Turadyatu quiquecuare etsuri jebuda tsehue huani dyaque aniyaque:

—Inacue micue cuchiru beta eque jacua eaque, etununaque. Mepecue amena euhuaque. Juetihuatu amena huecaca euhuaque uva caca pitu ishuque. Ejahuanetu amena pitutaqui tuque, —jadya tujatu acuare.

¹⁶ Tura jadya ahuajutu barepa huani dyaque aniyaque jecuaré yahuaaju cuchiru etununa tsehue pitumeretahuaque pitura.

¹⁷ Tumetu peadya Yusu tsahuaquique cuinanacuare Yusuja etare barepa juque. Inanucacuare tujatu cuchiru beta eque jacua eaque, etununaque. ¹⁸ Yusuja yacua juquetu cuinanacuare peya etsahuaquique. Tumequetu etiqui tsehue ujeda aishuque ecuatsashaque jucuare. Etsuri jebuda tsehue tujatu ihuaracuare cuchiru etununaque inaquique:

—Inacue micue cuchiru beta eque jacua eaque, etununaque. Uva esa cuana jahuanehuaaju tubuyaque emepeta bucha, jadidyatu mepetanaya Yusu adeba baecua cuanaque. Amena tuna tunaja jucha cuana tibu nrecada atanaya, —jadya tujatu acuare.

¹⁹ Tumetu barepa juque Yusu tsahuaquique junacuare yahuaaju tuja cuchiru etununa tsehue. Yusu adeba baecua cuanaque, Yusu cahuaishu ishucamadya aniya cuanaque tuna uva amena ejahuanequé pitu ishucbuchique. Barepa juque Yusu tsahuaquique tu uva caca pituquique buchique. Uva caca jahuaneyaqué pitu pujira pitutsu equiniqui aridaju nacaca tisi ishucuishu bucha, jadidyatu barepa juque Yusu tsahuaquique junacuare yahuaaju Yusu adeba baecua cuanaque cuinanashara nrecaturadiru ishuc. ²⁰ Uva nacaca tisiyaqué equiniqui juque ejuriu bucha, jadidyatu Yusu adeba baecua cuanaja jetiama ami jurihua epu ebari tipare. Cahuayuja epere eque dee cuitatu jucuare. Cueri quimisha ciento kilómetro quini buchatu juhua.

15

Yusu tsahuaqui cuanaquetu pacarucu amena ishuc cuanaque canerecati ishuc tyatanacuareque

¹ Bacuare tuque barepaju peya caadebati ishuc bape. Bacuare tuque Yusu tsahuaqui cuanaque. Pacarucudya tuna

tyatanacuare amena ishuque pacarucu canerecati ishu cuanaque yahuaju beishu. Riya cuanaque canerecaturati tsehuetu Yusuja cahuaiti terecuare.

² Tumbaedy a tuque bacuare Mapisi Ebari Jiuque muima cuanaque, tuja cueyaja yacuaju huipuchitanama cuanaque. Número tsehuema cuanaque tuna jucuare, Mapisi Ebari Jiu jadique ebacani tsehuema cuanaque. Tuna tuna neticuare bei ebari jiuque jiruru, vidrio etiqui tsehue eaque eujaju. Ena jiuquetu yuneri neri huecada jucuare. Inacuare tunajatu arpa dudu ishuque Yusuja etyaque. ³ Moisés beru israelita cuana cuinanashayaque Yusu pureama ayaque jerucuare bucha, tumbaedy tuna jerucuare UHUISHA BUCHA IYETAETAHUAQUE pureama ayaque:

“Yusu, miquemi Ecuana Cuatsashaquique.

Ni ai buchiquetu aijama micue ataquimaque.

Dutya mira ayaque tu jidaque.

Miratu aya ecuita cuanara inime tillaqui ayaque.

Dutya mira ayaque tu tuyu, yunerique.

Miquemi dutya yahuaju aniya cuanaque naruquique.

⁴ Dutyarami muiya, Ecuana Cuatsashaquique.

Dutyarami sumitsu pureama aya.

Mique peadya camadya mi juchaju caasicatimaque.

Dutya yahua juque tuna jebuque mique pureama ara, mira ayaque tuyu dutya queja batanahua tibu”, jadya tuna jucuare jeru eque.

⁵ Riya cuanaque baatsu tuque banucacuare Yusuja etare barepa juque. Pana bau tuque acuire Yusuja eaniqui neri, “Dyaque Muidaque” bacani, Yusu tsehue catsuruti ishuedya. ⁶ Yusuja eaniqui neri juquedyatu cuinanacuare Yusu tsahuaqui cuanaque, pacarucu ujeje canerecati ishuque dujuqui cuanaque. Ejutuqui jida tiquidaque tunajatu una jucuare. Yacua eque cuitatu oro eatsehue ecaquereti jucuare. ⁷ Jadya juatsutu bape butsequiniera ecana tyabarecuare peadya peadya equiniqui oro eaque pacarucu Yusu tsahuaqui cuanaque. Equiniqui cuanatu ejequesha jubarecuare ai tsehue cuana Yusu Maju Baecuaja cahuaiti tsehue. ⁸ Yusu tuhuadya tuja eaniqui neri mudaju anicuare. Etehua tujatu jida pijique, casa jadya jucuare. Jadya tibutu eaniqui mudaque huani tsehue jequecuare. Yusu tsahuaqui cuanaja pacarucu ujeje canerecati ishuque inajacatillama jari tuputu ni ejeradya jutidya jadya juyaque eje bucha ameretaqui ama bahua riyaque yahuaju juyaque tume cuanaque ujeje cuana eque.

16

Dyaque canerecati ishu judadiyaque jucuaque

¹ Jadya juatsu tuque bacacuare etsuri jebudaque Yusuja eaniqui neri juque cuinanayaque. Jadya tujatu pacarucudya acuare Yusu tsahuaqui cuanaque:

—Neijehuetibarecue yahuaju pacarucu equiniqui cuanaju aniyaque. Equiniquiju aniyaque ijehueyaju cama tuna Yusura dyaque nerecaturabuque Yusu adeba baecua cuanaque, —jadya tujatu ecana acuare.

² Jadya ayajutu icueneque Yusu tsahuaquique cuinanatsu cuacuare. Cuaatsu tujatu ijehueticuare equiniquiju aniyaque yahuaju. Pusese dyaque jidama ujedaque tunajatu cuinanacuare dutya ecuita cuanaja ecuita cuanaju Mapisi Ebari Jiuja ebacani ehueene cuanaja, tuja cueya miqui cuanaja jadya.

³ Beta ishuque Yusu tsahuaquiratu ijehuecuare tuja equiniqui juque cueri cuanaja ecuaqueju. Tumetu ena cabapeticuare ami esanaque bucha. Dutyatu majuterecuare cueri cuanaja ecuaqueja enaju aniya cuanaque.

⁴ Quimisha ishuque Yusu tsahuaquiratu ijehuecuare tuja equiniqui juque cueri cuanaju, cueri huitsana cuanaju jadya. Dutya enatu ami ecabapeti jucuaque. ⁵ Jadya junucatsu tuque bacacuare Yusu tsahuaquique ena cuana naruquique.

“Yusu, miquemi tuyu, tuna jadya nerecaturahua tibu. Miquemi ni riya piji buchique ecajuchati ni ecaasicati juchaju.

Miquemi yuequedya animetse juhuaque.

Miquemi anisiri ishuque.

⁶ Iyehua tuna micue cuanaque, mique equeque quisarati cuejaqui cuanaque jadya.

Micue cuanaque tunajatu ami quijehuetishahua.

Iyacua tuquemi tuna nerecatura ishu ena ami cabapetishahua tunaja jadya ijie ami aishu.

Jadidya tuna ataqi, tuna jidama juhua tibu”, jadya tujatu Yusu acuare.

⁷ Bacacuare tuque ejeque cuana quisaratiyaju mesa muru ijimedaque pahua ishu peque.

“Yusu, miquemi Ecuana Cuatsashaquique.

Aijamatu micue ni ai ataquimaque.

Miratu ama amadya aya dutya aana ayaque.

Yunerijudya tuquemi jidama cuanaque yuamaturahua”, jadya tujatu Yusu acuare.

⁸ Pushi ishuque Yusu tsahuaquiratu ijehuecuare tuja equiniqui juque ijjetiju. Yusuratu ijeti dyaque uqueda amerecuare, ecuita cuana tuja uque tsehue pahua ishu. ⁹ Uquera tuna dutya dyaque canerecatishacuare. Arepa jadya canerecatie juhua ama bucha, tuna inime cacuaretihua ama; ni tuna Yusu pureama acuare. Tume ecana jidama jutidya tuja ishu quisaraticuare riyá cuanaque canerecati cuana cuadishaquija ishu.

¹⁰ Pishica ishuque Yusu tsahuaquiratu tuja equiniqui juque aniyaque ijehuecuare Mapisi Ebari Jiuja eaniqui dyaque. Jadya juhujutu Mapisi Ebari Jiura dutya naruhua cuanaque apuda ducu neri anicuare. Tumeque uje tsehue tuna dyaque nerecada jucuare. Yana cuana tuna cacarutibarecuare majyaque tumeque ujera.

¹¹ Arepa jadya nerecadae juhua ama bucha, tunajatu ajacacuare ama jidamaque. Tume tuna jidama jutidya Yusu barepaju aniyaja ishu quisarati acuare, canerecatiya cabatitsu tumeque pusese peya ujeje cuana jadyara ayaju.

¹² Shucuta ishuque Yusu tsahuaquiratu equiniquiju aniyaque ijehuecuare Eufrates cueriju. Jadya ahujutu cueri uracuare. Cueri urahuajutu anicuare ediji ecuari cuana ijeti cuinanaya queja amaca aniya cuanaque jeishu.

¹³ Jadya junucatsu tuque banucacuare quimisha ijahua cuana huahua jiu cuanaque. Matuja Ebari Jiuja yatsanaca juque, Mapisi Ebari Jiuja yatsanaca juque, pusha pusha aridaja yatsanaca juque jadya tuna cuinanabarecuare. ¹⁴ Riya cuanaquetu ijahua cuana jucuare inimeradya jutidya ai aquí cuanaque. Riya cuanaque ijahua cuanatu cuacuare dutya ecuatsashaquí cuanaque riyaque yahua juque sitara, Yusu dutya iyaquí tsehue cati ishu. Tumeque huecacatu Yusu, tuja jetiama ecuita cuana tsehue catibuque Mapisi Ebari Jiuque, tuja jetiama ecuita cuana tsehue. ¹⁵ Bacacuare tuque etsuri jadya quisaratiyaju:

—Nebacacue. Micuanara ihuayaju ama muya jutidya junabuque, chiri puji cuana aira ihuayaju ama ejunau bucha. Equihuati, ecabajeteti ique junanucayaju juya cuanaque tuna dyaque jida jubuque, catacatitsu tahui bahue cuanaque bucha ama. Ihuayaque junahuaju ecatacati cuinanaquenatsu tsurutsatsu bisu tsehue etsurutsau bucha jutidya tuna jubuque ecatacati tibu, —jadyatu jucuare tumeque etsuri.

¹⁶ Quimisha ijahua eyuamaturaquí cuanara tuna sitacuare huaraji cuana, tuna jiteque dutya yahuaju catiya cuanaque emata Armagedón bacani peque.

17 Pacarucu ishucque Yusu tsahuaquiratu tuja equiniquiju aniyaque ijehuecuare cuejijiju. Bacacuare tuque etsuri barepa equeque, Yusuja eaniqui neri muda equeque:

—¡Amenatu terehua! —jadyatu jucuare.

18 Jadya juatsutu pupipupiya, sicacada tiritiya jadya jucuare. Yahuatu bucucucuar dyaque casada. Dyaque mudatu yahua bucucucuar, ecuita cuana riyaque yahujau anitibunehua equequetu jadya juma. 19 Epu dyaque aridaquetu jaquetanacuare quimisha cuare. Dutya yahua juque epu cuanatu yuamaturatanacuare. Yusutu nime aputacuare ama epu Babilonia bacaniyu aniya cuanaque jidama juhua cuana tsehue. Ecuita majuyaque canerecatiyaque equiniqui juque veneno ejiu bucha, jadidyatu Babiloniaju cuanaque dyaque nerecada jubuque, Yusu tuna tsehue dyaque ecahuaiti juya tibu. 20 Dutya ecububu cuana, emata cuana jadyatu terecuare. 21 Tumebaedyatu barepa juque pacacacuare bise aridaque ecuita cuana dyaque pushi tunca kilo tupu bicueque. Ecuita cuanaratu jidamaque quisarati acuare Yusuja ishucque, bisera ecana nerecaturayaju, dyaque nerecada juya cabatitsu.

17

Epuna decadeca aridaque dyaque nerecada atanayaque

1 Tumetu Yusu tsahuaquique pacarucu equiniqui inaquijucuarque jecuar eaqueja. Isaracuare tura ique:

—Riyaque epu ebariju cueri japadama aniya cuanaque tuna epuna decadeca aridaque bucha. Petamereya mique era tumeque epuju aniya cuanaque eje bucha nerecada atanadadiyaque. 2 Riyaque yahujau huaraji dyaque arida cuanaque tuna anihua tumeque epuna tsehue jucha juyaque. Tuja biji equetu jucuar. Ecuita cuana yahujau aniya cuanaque tujatu uva nacaca esasanasha tsehue nijuquishanicuar, tuatsehue tahuishatsu, tuja biji eque aquerecara aatsu, —jadya tura acuare.

3 Jadya junucatsu Espiritura ique petamerecuare eje bucha judadiyaque. Yusu tsahuaquira ique dujucuar ecuita anitaya amaju. Bacuar tuque epuna Mapisi Ebari Jiuque pudedaque isaanitsu juaniyaju. Mapisi Ebari Jiujatu anicuar pacarucu iyuca, peadya tunca edana jadya. Dudyatu Mapisi Ebari Jiuja ehuenecuar anicuar Yusu cahuaishucque. 4 Tumeque epunaratu jutucuar una sahuapudeque. Jidatu ecabajejeti jucuar oro tsehue, tiquida tsuje arida cuana tsehue, tumu caca perla bacani tsehue jadya. Inacuare tujatu equiniqui oro eaque. Educujutu anicuar ai bijiseritaqui cuanaque. Jidama cayuamati ishucque

tsehue ejequetu jucuare. ⁵ Equetiju tujatu anicuare ebacani ehuenegue eje buchique jadique adebataquique ama. “Babilonia epu dyaque aridaque, epuna decadeca arida cuanaque, caadebati baecua cuanaque, equijahuati cuanaque, dutya yahuaju ujeu baqui cuanaque aniquique”. Jadique tujatu ehue jucuare equetiju. ⁶ Tume tuque adebacuare tuque Yusuja cuanaja ami ijitsu nijiqui ejuque, Jesús jiteque majucuare cuanaja amiju. Jadya bacatsu ique anajacatuacuare. ⁷ Tume Yusu tsahuaquira jadya acuare:

—¿Eje bucha juatsumi anajacataya? Jida mique cuejaya tumeque epuna eje buchique, tumeque Mapisi Ebari Jiu pacarucu iyucaque, peadya tunca edanaque jadya tura isaanayaque jadya. ⁸ Tumeque Mapisi Ebari Jiuque mique era petamerehuaque, tumeque tu beru anicuareque. Iyacuatú amena aniya ama. Jadya ama buchatu tsunutaya ama cuinana ishú emajaca ebari juque. Pana maju jumaque jaritu cuinanabuque. Yusu Tsehue Anisiribuqueja Quiricaju ebacani huenema cuanaque tuna anajacatabuque Mapisi Ebari Jiuque chacha banucatsu. (Yusuja cuanaja ebacanitu huenetahua yahua iyatanahua equeque.) Chacha banucatsutu ecuita cuana riyaque yahuaju aniya cuanaque jubuque: “Mapisi Ebari Jiuquetu chacha jucuare. Aputacuare tuque. Iyacia bacue chacha aninucaya” jadya.

⁹ “Iyacia rique cuejaya jida ejera adebataqui bayaju cueyane ishú. Pacarucu iyuca tu pacarucu emata. Tumeque dyaquedyatu tumeque epuna aniya. ¹⁰ Tumbaedyatu tumeque pacarucu iyuca cuana pacarucu huaraji arida cuanaque buchique. Tumeque pishica huaraji cuanatu amena huaraji jujacacuare. Peadyara camadyatu iyacia naruya. Pacarucu ishúque tu junama jari. Junatsutu eje tsunue ama ecuatsashaque junabuque. ¹¹ Mapisi Ebari Jiu beru anicuareque, iyacia aijamaque, tudyatu quimisacarucu ishúque huaraji. Pacarucu tsehue cuanaquedya tume. Jadya juatsutu Yusura pana aputasha abuque.

¹² “Mira peadya tunca edana petahua cuanaque tu peadya tunca huaraji dyaque arida cuanaque, ecuita cuana cuatsasha catibutima jari cuanaque. Tuna tuna junabuque. Ejet-sunue ama tuna ecuita cuanara muibabuque, tuna tumbaedyaya Mapisi Ebari Jiuque jadya. ¹³ Riya cuanaque peadya tunca huaraji arida cuanaque tuna ecadutyati Mapisi Ebari Jiu tsehue. Tumeque huaraji arida cuanaja sudaru cuanatu catibuque Mapisi Ebari Jiuja casa tsehue. ¹⁴ Tuna tuna catsatibuque UHUISHA BUCHA IYETA EATAHUA tsehue cati ishú. UHUISHA BUCHA IYETA EATAHUARA tuna casa secabuque. Jetiera amatu tuque muibuque. Tuquetu huaraji

dutya huaraji cuanaja huaraji. Tuatsehue cuanaque tuna tuja eihuara cuanaque, Yusuja emepe cuanaque Cristo queja nimee jujacahua ama cuanaque jadya. ¹⁵ Bahuami tumeque cueri cuanaja ecuaque epuna decadeca aridara isaaniyaju. Tume cueri cuanaja ecuaque, tumeque tu ecuita cuana dutya yahua juque, dutya anae cuanaque jadique. ¹⁶ Tume mira peadya tunca edana Mapisi Ebari Jiuja bahuaque, tume cuanaratu epuna decadeca aridaque equijahuatigue ujeu babuque. Chiribuque tunajatu dutya ai tumeque epunaja aniyaque. Ecatacati tunajatu shanatillabuque. Iyebuque tunajatu epuna. Iyetsu tunajatu epuna rami arabuque. Arabishatsu tunajatu etiquiju pahuabuque. ¹⁷ Tume tunajatu Yusura inime cacuaretishabuque tura amerecara aya eque tuna juishu. Tumetu ecuari cuanara tyabuque casa Mapisi Ebari Jiuque, Yusura quisarati iyahuaque judadiya tupu. ¹⁸ Epuna mira petahuaque, tumequetu ecuita cuana tumeque epu ebariju aniya cuanaque jadique. Tumeque epu ebari juque huaraji cuanaratu yahua juque ecuari cuana narubuque, —jadya Yusu tsahuaquira cuejacuare.

18

Babilonia epu cayuamaticuareque

¹ Jadya juatsu tuque banucacuare Yusu tsahuaquique dyaque casadaque barepa juque buteyaju. Yahua tujatu huecada amerecuare tuja hueca tsehue. ² Jebudatu quiquecuare:

“¡Cayuamatihua tuque!

Babilonia eputu pana aputa, cayuamati jadya juhua.

Ijahua cuanaja eaniqui tume.

Dutya yatanana jidama cuanaja eaniqui tume.

Tumbaedy a jeta aqui asicada cuanaja eyuamatura cuanaja eaniqui tume.

³ Tumeque epu ebariju aniya cuanaratu cajuchatishacuare peya epuju cuanaque.

Tunaja jidama inimeju tunajatu amerecuare.

Enajehue ijitsutu dutya inime jidaque aputatereya.

Jadidyatu ecuita cuana riyaque yahua juque jidamaque inime tupuqui aatsu, tumeque epu juque, tuna taca nime aputadya jutidya tuna juya.

Huaraji dyaque arida cuanaquetu catyaticuare dutya tumeque epu juque jidama cuanaju cabijishatitsu.

Catyati puji cuana riyaque yahua juque tuna cachipiruticuaque tuhua jetiama catyati,

quemi ishu jadya aniya cuana tsehue”,

jadyatu jucuaque.

⁴ Jadya juatsu tuque bacanucacuare peya etsuri barepa equeque.

“Necuinanacue tumeque epu arida juque, micuana ecue cuanaque, tuhua aniya cuanaja juchaju ejuu tibu, tuna canerecatiya bucha canerecatie ejuu tibu.

⁵ Tuhua aniya cuanaja jucha tu umada.

Yusu barepaju aniyaquetu nime aputataya ama tuna jidama juyaque.

Huecatanahuatu dutya tume cuanaque.

⁶ Neacue tumeque epu aridaju aniya cuanaque, peya cuana tunara ahua bae.

Peya cuana tuna nerecaturahua bucha, dyaque ecana nenerecaturacue tunaja jucha tibu.

Peya cuana tuna peya inime amerehua bucha, dyaque peya inime ecana neamerecue.

⁷ Tumeque epu aridaju aniya cuanaque tuna casumiti arida juhua.

Jidama tuna anihua.

Dutyai jidamaque inime tsehue tuna jidadya jutidya anihua.

Tuna tuna dyaque jidama anihua.

Dyaque ecana nenerecaturacue.

Tumeque epuju aniya cuanaque tuna jadidya juya:

‘Riyadyapa ecuanaja huaraji dyaque casadaque buchique.

Ejaca ama ecuana.

Nerecada judadinime ama ecuana’ jadyatu juya Babiloniaju aniya cuanaque.

⁸ Jadya tibudyatu juetibuque huecaca canerecati ishuque.

Umada tuna majubuque.

Umada tuna peya inime jubuque.

Jetiama tuna ejacatilla jubuque.

Mije juatsu tuna dyaque nerecada jubuque.

Amena ishutu etiquira tillabuque epu.

Dyaque casada tu tumeque epu nerecaturadadiquique.

Tuquetu Yusu, Ecuana Cuatsashaquique”,

jadya tuque bacacuare.

⁹ Huaraji cuana peya yahua cuanaju dyaque arida cuanaque juchaju anihua cuanaque Babilonia juque ecuita cuana tsehue etsujequi cuana pana catsumeti ama juhua cuanaque tuna pau, peya inime jadya jubuque, tumeque epu ebariju ecuita cuana aniya cuanaque jiteque, epu tiruyaque huani netitsuraya baatsu. ¹⁰ Epu japada tuna netibuque bajida juatsu, tuna dyadi nerecada eatananucaju. Quiqueterebuque tuna:

“Acue, nerecapane Babiloniaju aniya cuanaque.

Icuene tunajatu casa anihua.

Tumebaedy tunaja dutya tunara ai bijida bayaque anihua. Muya jutidya tuna nercada juya”, jadya tuna jubuque.

¹¹ Catyati puji cuana riyaque yahuaju cuanaque tuna tumebaedy pabuque. Peya inime tuna jubuque tumeque epu ebariju aniya cuanaque jiteque. Tunara catyati ishuhue beya cuanaquetu aija quemitaqui ama jubuque. ¹² Riya cuanaque tunajatu catyati ishuhue bebahue jucuare tuhua: ai tsuje arida cuanaque —oro; metal dyaque tsuje aridaque plata bacani; tumu tiquida cuanaque, tumu tiqui pucacada tsuje aridaque perla bacani. Tumebaedy tunaja bebahue jucuare ejutuqui cuana jidaque lino, seda jadya bacani, ejutuqui pude sehueque, tumebaedy pudedaque. Tumebaedy tunaja bebahue jucuare ai tsuje arida cuanaque —acui bape bape ijimeda cuanaque, marfil eaque, acui jida pijique, metal bronce bacani, fierro, marmol. Jetiama ai tsuje arida cuanaque tunajatu catyati ishuhue bebahue junenicuare tumeque epu ebariju. ¹³ Tumebaedy tunaja bebahue jucuare jetiama ai catyati ishuhue cuanaque ai earaqui bajeje ishuhue cuanaque, canela bacani, tumebaedy peya ijimeda cuanaque earaqui ishuhue cuanaque. Tumebaedy tunajatu bebahue jucuare catyati ishuhue muru ijimedaque, bape bape ijimee cuanaque ijimedaque mirra bacani, peya bape bape cuanaque. Tumebaedy tunaja bebahue jucuare iji ishuhue cuanaque, ara ishucuanaque jadya —uva nacaca esasanashaque, etseri, trigo, peya bape cuanaque pan ishuhue cuanaque. Tumebaedy tunajatu bebahue jucuare uu cuana. Bebahue tunaja jucuare uu cuana cabuti ishuhue, uhuisha, cahuayu, tumebaedy caretu cuana. Tumebaedy tunajatu bebahue jucuare ecuita cuana chipiruda cuana queja catyati ishuhue; uu catyati eata bucha tunajatu acuire ecuita bucha ama. ¹⁴ Epu ebari tirutereya baatsutu catyati puji cuana quiqueterebuque:

“Dutya chipiruqui cuanara bijiserihua cuanaquetu aputaterehua.

Aputatere jidatu juhua dutya chipiru tunaja cabajejeti ishuhue cuanaque.

Ni eje tuputu rehua ejitaju junucaya ama”, jadya tuna jubuque.

¹⁵ Tuhua ai catyati juhua cuanaque, cachipirutihua cuanaque tuna tumeque epuju cajipetibuque ama. Japada tuna netibuque nercada eatanauque mubatsu. Pabuque tuna. Peya inime tuna jubuque.

¹⁶ “¡Acue, nercapane epu aridaju aniya cuanaque!

Eputu jucuare epuna ejutuqui jida piji tsehue ecabajejeti bucha, tumebaedy ejutuqui pude sehueque, pudedaque

jadya tsehue, oro tsehue, tumu tiquida jida piji cuana tsehue jadya tsehue ecabajejeti bucha.

¹⁷ Yara tupuju tuque micuana aputahua dutya tsuje arida cuanaque”,

jadyatu jubuque catyati puji cuana.

Duty cuaba ebari cuana cueri cuanaja ecuaque eque cuaya cuanaque, tuhua mere juya cuanaque, tueque juneniya cuanaque jadya tuna epu japada netibuque. ¹⁸ Epu tiryuaque huani petatsu tuna quiquebuque: “iAijamatu peya epu riyaque epu bucha dyaque aridaque!” jadya tuna jubuque qui que eque.

¹⁹ Muru tsehue tuna iyucaju capucatibuque, peya inime juyaque adebata ishu. Pabuque tuna. Peya inime tuna jubuque. Quiqueterebuque tuna:

“iAcue, nerecapane epu dyaque aridaju aniya cuanaque!

Duty ecua cuaba ebari metse cuanaque cueri cuanaja ecuaque eque cuaya cuanaque ecua cachipiritic-uare catyati ishu cuanaque jetiama tumeque epuju beatsu.

Yaratupujutu dutya terehua.

Aputaterehua”,

jadya tuna jubuque.

²⁰ “Arepa riyaque yahuaju cuanaque pau, peya inime jadya tumeque epu ebariju aniya cuanaque jiteque paju ama bucha, micuana Yusuja cuanaque pureama jutidya nejucue, tumeque epu eje bucha juya baatsu.

Pureama nejucue dutya micuana barepaju cuanaque, Yusuja ecuadisha cuanaque, micuana Yusuja quisarati cuejaqui cuanaque.

Yusuratu dyaque nerecaturaya tumeque epu aridaju cuanaque, tuhua aniya cuanara micuana jidama tsehue aniquerehua tibu”,

jadyatu jucuar ejeque cuana.

²¹ Tumetu Yusu tsahuaqui casadara nityatsuracuare tumu aridaque. Jucualetu tumu ebari erieri ishuque bucha. Casada tsehue huetsatsu tujatu marecuare cueri cuanaja ecuaqueju.

“Riyaque tumu cueri cuanaja ecuaqueju ijehuetanahua bucha, jadidyatu epu ebari Babilonia pana aputa jubuque.

Ni eje tupu ejitaju juishu amatu aputabuque.

²² Babiloniajutu chine, ni mere aninucabuque ama.

Ni ejeratu arpa ni rauta, ni corneta dudunucabuque ama.

Ni ejequetu tuja teeju mere, ni erierinucabuque ama.

²³ Ni ai huecatu ejitaju junucabuque ama riyaque epuju.

Ni eje tuputu huanequi, ahuequi jadya juya cuanaja chine sicacada junucabuque ama.

Icuene Babiloniaju catyati ishü bequi juhua cuanaque tuna cachipirutinicuare, dyaque umada chipiru tumeque epu ebariju inacuare tibu.

Ecuita inime metse cuanaque tuna jubarecuare.

Tumebaedyä Babilonia juque maru cuanaratu dutya yahuaju aniya cuanaque ijahue ahua tunaja maru tsehue”,

jadyatu jucuare Yusu tsahuaquique.

²⁴ Tumeque epuju cuanaratu jetiama iyehua Yusuja cuanaque, Yusu equeque quisarati cuejaqui cuanaque. Tumeque epuju cuanara Yusuja cuanaque iyeya baatsutu peya epuju cuanara tumebaedyä iyecuare Yusuja cuanaque peya epuju cuanaque.

19

¹ Jadya juatsu tuque bacanucacuare umadaque barepaju quiqueyaju etsuri jebuda tsehue:

“¡Aleluya!

¡Pureama mique ecuana aya, Yusu!

Miquemi Ecuana Cuatsashaquique.

Miquemi Ecuana Inajacamerequique.

Dyaque jida taa mique.

Sumiya mique ecuanara.

Miquemi dutya casa tsehueque, Yusu ecuanara muiyaque.

² Miquemi cuji juya ama eje buchique inime tsehue.

Mira ecuana yuneri tuyuju eje bucha aya.

Miratu nrecada amerehua epuna decadeca aridaque tuja biji eque anihuaque.

Miratu nrecaturahua tumeque epuju aniya cuanaque, tunara Yusu merequi cuanaque iyehua tibu”, jadya tunajatu Yusu acuire.

³ Tume tuna jadya junucacuare:

“¡Aleluya!

¡Pureama mique ecuana aya, Yusu!

Tumeque epu tereyaque huani juyaquetu terenime ama”, jadya tunajatu Yusu acuire.

⁴ Tume beta tunca pushi earacana Yusu mui juya cuanaque, tumebaedyä pushi bape bape butsequinie cuanaque tuna chichucata juatsu huipuchitanacuare yahuaju cuita. Tume tunajatu Yusu tuja eaniqui cacuatsashati ishujü aniyaque muicuare.

—¡Jadidya paju! ¡Aleluya! ¡Pureama mique ecuana aya, Yusu!

—jadya tuna Yusuja yacuaju jerucuare.

⁵ Tumetu bacataqui jucuare Yusuja eaniqui cacuatsashati ishü eque etsuri jadya juyaju:

“Dutya mique merequi cuanarami pureama aya, Yusu.

Dutya achaacha cuanara, ecapajiti esiri cuanarami pureama aya.

Dutya micue yacuaju huipuchitana ishü aya cuanarami pureama aya”.

UHUISHA BUCHA IYETAE ATAHUAQUE tuja cuana tsehue caradatibuqueque

⁶ Tumebaedya tuque bacacuare jetiama ecuita cuana quisaratiyaju, ena sicacada tuuuya bucha, tiritiyaju enara piyeyaju juya bucha. Jadya tuna jucuare:

“¡Aleluya!

¡Pureama mique ecuana aya, Yusu!

Miquemi enaruqui jutibunehua, Ecuana Cuatsashaquique.

Miquemi Yusu Dutya Iyaquique, ecuanara muiyaque.

Necapureamaturatira.

Pureama nejura.

‘Dyaque jida, casada jadya taa mique’ jadya neara.

⁷ Dyaque jida ecuana, mira ecuana naruya tibu.

Pureama ecuana juya, mira ayaque baatsu.

Amenatu huecaca juetihua ‘UHUISHA BUCHA IYETAE ATAHUAQUE caquemitiyaque’ bacani.

Juetihuatu huecaca tuque tuja cuana tsehue cajacatinuca ishüque ama.

Micue cuanaque tuna ecabajejeti quihuatiya miaqueja judiru ishü, epuna tuja yahuique juya tsehue cajipeti ishü ecabajejeti bucha.

⁸ Micue cuanaque tuna jutumeretahua ejutuqui jida pajadaque, tiquida, caquemitiyaque ejuta bucha”, jadya tunajatu acuare.

⁹ Tume Yusu tsahuaquira jadya acuare:

—Huenecue jadya: “Pureama paju UHUISHA BUCHA IYETAE ATAHUAja casitati ishüque chine juyaju cuejatahua cuanaque”. Rियाque quisarati tu Yusu equeque cuitadya, —jadya tura acuare.

¹⁰ Tume tuque tuja yacuaju chichucata juatsu muicuare. Tume tura jadya acuare:

—¡Muiume ique! ¡Yusu peadya camadya muicue! Ique Yusu merequique nucadya. Ique, mique, umae cuana jadya buchique Jesús queja ecatyati cuanaque, tuaqueja nimee jujacahuaque ama, —jadya tura acuare.

Yuneri cuitadya Jesús queja ecatyati cuanaque, Yusu equeque cuitadya quisarati cuejaqui cuanaque tuna Jesúsja Espiritura tsumeya tuque cacuejamereti ishü.

Cahuayu paja dyaque eque junabuqueque

¹¹ Jadya juatsu tuque bacuare barepa epacashatana. Tumetu cahuayu paja ejitaju jucuare. Tuque dyaque eque junayaque tu TUYU, YUNERIQUE bacani. Jadya tujatu ebacani, tuyu narubuque, catibuque jadya jubuque tibu.

¹² Cahuayu paja dyaque eque jeyajatu yatuca tiquida jucuare, etiqui jujuya bucha. Tuja iyucaju tu anihua jetiama puja cuana, tuque ecuarique adebataqui juishuque. Ebacani ehue ne juhuaquetu tura camadya adebaya.

¹³ Tura ejutuqui jutuyaquetu jucuare ami tsehue epude. Tuja ebacanitu YUSUJA QUISARATI. ¹⁴ Yusuja cuanaque jetiama cati ishu ecabajejeti cuanaratu tupujudya acuar. Ejutuqui jida pajada, asicadama tsehue tuna ecajututi jucuare. Cahuayu paja cuana dyaque eque tuna jecuar.

¹⁵ Cahuayu paja dyaque equejatu ecuatsaju anicuare quiyeti ishucue cuerudaque, tume tsehuedya Yusu adeba bae cuanaque sacubare ishu. Tuja casa aniya tsehue tujatu narubuque. Uhuisha naruqui cuanaratu cuatsashaya muida tsehue uhuisha cuejataquima cuanaque; jadidyatu tura cuatsashabuque muida tsehue tuque muibacarama juya cuanaque. Uva caca tapapashatsu mere puji cuanara etisiu bucha, jadya tuna tura nerecaturabuque cuejataquima cuanaque. Jadya tuna Yusura abuque Dutya Casa Tsehiera. ¹⁶ Tuja unaju, etsacaju jadya tu ehue ne jeeque ebacani CACUATSASHATI PUJI CUANA CUATSASHAQUIQUE, ECUARI CUANAJA ECUARI DYAQUE ARIDAQUE jadya.

¹⁷ Jadya juatsu tuque banucacuare Yusu tsahuaquique ijettu netiyaju. Quiquecuare tujatu dutya upati jamani bucha cuanaque barepa juque:

—Nejecue. Nekaradaticue Yusura earaqui bajejeyaque ara ishu. ¹⁸ Ejetsunue ama tunajatu majutere ishucue jucuare huaraji cuana, sudaru cuana cuatsashaqui cuanaque, sudaru casada cuanaque, cahuayu cuana, cahuayu isaaniqui cuanaque. Dutya maju ishucue ebacua, amena cuanaque, ecuita metsequi, metsema cuanaque. Nejecue. Nearanacue tume emaju cuanaque, —jadyatu jucuare Yusu tsahuaquique.

¹⁹ Tume tuque bacuare Mapisi Ebari Jiuque, huaraji cuana Yusu muiba baecua cuanaque, tuna jiteque catiya cuanaque jadya. Dutya tume cuanaque tuna casitaticuare cati ishu, cahuayu paja dyaque equeque, tuja sudaru cuana jadya tsehue cati ishu. ²⁰ Tumetu Mapisi Ebari Jiuque, tumeque pusha pusha aridaque Mapisi Ebari Jiuja yacaju inimeradya jutidya ai aqui juhuaque jadya risitanacuare. Tumeque pusha pusha aridaquetu junenicuare, turapa Yusu equeque cuitadya quisarati cuejaya jadya; tume taa jadique ama.

Mapisi Ebari Jiuque, quisarati pusha pusha cuejaquique ecatsetu chacha iyemaque asufre tsehue etiqui jujuyaju ijehue-tanacuare. ²¹ Peya cuanatu iyecuare cahuayu paja dyaque equera tuja ecuatsaju quiyeti ishunque beta eque jacua tsehue. Dutya jamani cuanatu pana jeque jucuare tuhua emaju cuanaque aratsu.

20

1.000 maraju jubuqueque

¹ Tume tuque banucacuare barepa juque Yusu tsahuaquique buteyaju. Inanityacuare tujatu emajaca dyaque aridaque pacasha ishunque, yatanana cuana Yusu muicarama juya cuanaque nrecaturadadi ishujayaque ni eje tupu nrecada jujaca ishujama. Tumbaedyatujatu inacuare Satanás risi ishunque. ² Yusu tsahuaquiratu nere inati acuare Matuja Ebari Jiuque, Mapisi Ebari Jiuque yahua nanadaju anicuareque. Tumbaedyatujatu peya ebacani “Ijahua”, “Satanás” jadya. Peadya mil mara tuputu Satanás erisi jucuare. ³ Yusu tsahuaquiratu Satanás emajaca ebariju marecuare. Pana teri tujatu acuare etsecue ni ejeque cuinana ishujama, tuja riyaque yahujaju aniya cuanaque ijahue anuca ishujama peadya mil mara adadiya tupu. Chamacama peadya mil mara cuetihujaju piisitu pisutanancabuque ejetsunue ishujama.

⁴ Jadya juatsu tuque bacuare jetiama eaniqui cacuatsashati ishujama cuanaque. Tuhadya tuna anibarecuare Yusura inime bajeje ishujama casa tyahua cuanaque. Tumbaedyatujate bacuare Jesús quisarati yunerique Yusuja quisarati ejitaju ahuaque cuejaqui jucuare cuanaja yatanana cuana. Tuna tuna iyuca tubutsu iyetanacuare cuanaque, Yusuja quisarati cuejahua tibu. Tunaratu muicuare ama Mapisi Ebari Jiuque ni tuja cueya. Cahuenemereticarama tuna jucuare equetiju ni emetucuju Mapisi Ebari Jiuja ebacani. Bacuare tuque chacha junucayaju. Enarunque tuna jucuare Cristo tsehue peadya mil mara tupu. ⁵ Tuna emajuque nityatsuratananucahuaju jadya juyaque tuda tu icueneque emajuque netit-surancuayaque bacani. Peya emaju cuanaque tuna netit-surancuayaque peadya mil mara cuetihujaju piisi. ⁶ Yusura emajuque icuene nityatsurancuayacuanaque tuna dyaque jida pureama juya. Yuneri cuitadya tuna Yusu jaque. Tuna tuna maju beta ama jubuque, Yusuja ama cuanaque jubuque bucha ama. Yusuja, Cristoja pae tuna judadibuque. Riyaque yahujaju tuna peadya mil mara Ecuana Cuatsashaqui Jesús tsehue enarquite jubuque.

⁷ Peadya mil mara juhuajutu Satanás cadena tsehue erisique inajacatanabuque. ⁸ Tumetu cuinananucabuque dutya yahua juque ecuita cuana ijahue ara. Turatu ijahue abuque Yusu muiba baecua cuanaque, Gogju, Magogju anicuaire bae cuanaque. Satanasratu sitabuque dutya riyaque yahuaju cuanaque Yusu tsehue cati ishu. Yusu tsehue catibuque cuanaque tuna piyebatilla tupu ama. Cueri cuanaja ecuaque juque mejiji tsucaca bucha tuna piyebatilla tupu ama.

⁹ Tume tuna tsuracuare yahua quini eque ejeque ecuita cuana. Yusuja cuanaque ecasitatique tunajatu tabucuaire, tumbaedyu Yusuja epu iyuhuedaque. Jadya baatsutu Yusura barepa juque etiqui pacacashacuare. Tumeque etiqui tsehue tuna Yusura pana pahua acuare tuja cuanaque tabuqui juhua cuanaque. ¹⁰ Ijahua tuna ijahue aqui que bacue maretanacuare bei tupu arie etiqui asufre tsehue jujuyaju, Mapisi Ebari Jiuque ijehuetanahuaju, tumbaedyu Yusuja quisarati cuejaquipa ejuu jadique pusha pusha aridaque. Tuhua tuna huecada tupu, meta tupu dutya mara ni eje tupu nrecada jujacaya ama.

Yusura emaju cuanaque eje bucha adadiyaque cueja

¹¹ Jadya juatsu tuque bacuare Dutya Ecuita Cuatsashaquique, eaniqui pajadaju aniyaju. Tuque baatsutu yahua, barepa jadya cuinanatsu huanacuare. Dadicuaire ama tatse eju catehua ishunque. Huanacuare tatse tuja yacua juque. ¹² Tume tuque banucacuare emaju cuanaque umada —nanada cuanaque, ehue ebari cuana, esiri cuanaque jadya. Tuna tuna neticuaire Yusuja yacuaju. Riyaque yahuaju tuna ai mere juya cuanaquetu ehue tumeque quiricaju. Tumeque quirica ecatsatu pacashatanacuare. Tumbaedyatu pacashatanacuare quirica Yusuja cuanaja dutya ebanani cuana ehue cuanaque ni eje tupu Yusu jaca ishu cuanaque ama. Yusura tuna peadya peadya eje bucha adadiyaque cuejacuaire, tunaja mere eje bucha juhua eque, quiricaju ehue equedya. Tuja biji eque anihua cuanaque tujatu jida acuare. Tuja biji eque ama anihua cuanaque patu nrecaturacuare. ¹³ Cueri cuanaja ecuaque juquetu emaju cuanaque cuinanacuare. Tumbaedyu emaju cuanaja eaniqui juque emaju cuanaque cuinananucacuare. Yusuratu quisarati ejitaju acuare eje bucha peadya peadya judadiyaque tuna eje bucha anie, meree riyaque yahuaju juhua equedya aishu. Yusuja biji eque anihua cuanaque tujatu jida acuare. Tuja biji eque ama anihua cuanaque bacuetu nrecaturacuare. ¹⁴⁻¹⁵ Jadya juatsutu dutya emaju cuanaque, emaju cuanaque aniquique emajacaju cuanaque,

cueya muiqui juhua cuanaque; dutya pusha pusha arida juhua cuanaque jadya. Tuna tuna nrecada jujacabuque ama etiqui bei tupu arieju. Tuhuadya tunajatu maju beta ishucue, tuhuaque cuinananucaya ama tibu, —jadya tura acuare.

Jerusalén epu iyacuaque

⁹ Tumetu jecuare Yusu tsahuaquique camadya ishucue ujeje canerecati ishucue eaniqui juque yahuaju ijehuequique.

—Jecue. Bamereya mique era, ahuequi juyaque UHUISHA BUCHA IYETA EATAHUAja ehuanecue buchique, —jadya tura acuare.

¹⁰ Yusuja Espiritura petamerecuare tahuiju bucha. Yusu tsahuaquira tsuraquerecuare emata dyaque barudaju. Tura bamerecuare Jerusalén epu ebari Yusu jaque. Tumeque epu tuque buteyaju bacuare barepa juque Yusuja yacua juque. ¹¹ Tumeque epu ebarijutu Yusuja huecara tiquida amerecuare. Tumeque huecatu jucuare tumu dyaque jida pijija hueca bucha, tumu jaspe bacani bucha. Cristal ude tsehue udatsu hueca ecuetiu bucha cuetie tujatu hueca jucuare. ¹² Eputu etachi etibarilla jucuare baruda. Peadya tunca beta earacana tujatu etsecue anicuare. Dutya etsecue cuanajutu netibarecuare peadya Yusu tsahuaqui cuanaque. Peadya tunca beta earacana cuare israelita cuanaja ebacani ehuene jubarecuare dutya etsecue cuanaju. ¹³ Anicuaretu quimisha etsecue ijete cuinanaya queja amaca, quimishadya ijete nubiya queja, quimisha nei diji queja, quimisha beni diji queja amaca jadya. ¹⁴ Epu tibarilla ishucuetu ea jucuare peadya tunca beta earacana tumu dyaque. Tumeque tumu cuanajutu peadya tunca beta earacana UHUISHA BUCHA IYETA EATAHUAja ecuadisha cuanaja ebacani cuana ehuenbare jucuare.

¹⁵ Yusu tsahuaquique eatsehue quisaratijayatu anicuare sari oro eaque. Tume sari tsehue tujatu epu ebari tuputaqui jucuare, tumbaedy a etsecue, epu penequique jadya.

¹⁶ Eputu tsucu pushi jucuare. Junu, quini, jadya tujatu jucuare dutya tupu. Jadyatu barepa juque Yusu tsahuaquira tupucuar tuja sari tsehue. Baru, quini, junu jadyatu epuja dutya tupu jucuare; beta mil beta ciento kilómetro tujatu dutya equ e amaca jucuare. ¹⁷ Tuequedya tujatu tupucuar epu tachiquique. Shucuta tunca pushi earacana metrotu jucuare baru epu tachiquija. Ecuana medida tsumeya tshuedya tujatu tupucuar.

¹⁸ Tumeque epu tachiquique tu tumu eaque jaspe bacani. Eputu oro ujamaque neri jucuare, vidrio bae huecae. ¹⁹⁻²⁰ Epura tumu cuana ebajeque isaaniyaquetu jucuare

dutya bape bape cuanaque tumu jida piji cuana tsehue. Jadya bacanietu tumu cuana jucuare: jaspe, zafiro, ágata, esmeralda, ónice, cornalina, crisólito, berilo, topacio, crisoprasa, jacinto, amatista jadya. ²¹ Peadya tunca beta earacana etsecue tu tumu tiquidaque perla bacani eaque. Dutya etsecue eaquetu peadya perla eaque camadya jucuare. Epu patyaque ediji dyaque icueneque tu oro neri, ena bucha huecaequé.

²² Tumeque epu ebarijutu aijama etare Yusu mui ishuque cuita camadya. Dutya quejadya jutidyatu aniya Yusu Dutya Iyaquique, UHUISHA BUCHA IYETAÉ ATAHUAQUE jadya ecatsé mui ishuque. ²³ Tuhuatu saretanaya ama ijeti ni badi epu uda ishu, Yusuja huecaradya jutidya epu udaya tibu. UHUISHA BUCHA IYETAÉ ATAHUAQUE tu eudaquique. ²⁴ Tuja huecaratu huecatillabuque dutya tuhua aniya cuanaque. Riyaque yahua juque huaraji cuana, arepa tuna mui pureama jadya eatau ama bucha tunajatu Yusu, UHUISHA BUCHA IYETAÉ ATAHUAQUE jadya mui, pureama jadya amerebuque. ²⁵ Riyaque yahuaju tuque ecuana epu cuanaju eteriqui cuana teriya apunayaju. Tuhuatu aijama teri ishuque, apuna baecua tibu. ²⁶ Riyaque yahuaju cuanaque tuna jutibuque tuhua Yusu pureama, mui jadya aishu. ²⁷ Nubibuque amatu tuhua, ni ai quibetimaque, cabajejetimaque. Nubibuque amatu ni ejeque Yusuja biji eque ama aniya cuanaque, ni ejeque jidamaque ni pusha pusha aridaque. Yusuja quiricaju ebacani ehue ne aniya cuanaque cuita camadya tuna nubibuque, dutya ebacani eiya cuanaque Yusu queja judiru ishu ni eje tupu jaca ishu ama. Tumeque quirica tu UHUISHA BUCHA IYETAÉ ATAHUAQUE. Tume cuanaque cuita camadya tuna Yusuja epu ebariju nubidirubuque.

22

¹ Tuequedya tura bamerecuare cueri jida huecadaque. Tumeque ena ijitsutu maju baecua ishuque. Tumeque cueritu cristal bucha huecae jucuare. Cuinanacuaretu Yusuja, UHUISHA BUCHA IYETAÉ ATAHUAQUE eaniqui cacuatsashati ishu equeque. ² Epu patya equetu juricuare ediji dyaque tsumetanaya eque. Cueri macare beta eque tu acui huijacuare ecuana maju baecua amerequique. Dutya baditu cacacatiya, maraju, badiju, badiju cama. Tumeque acuija ejaqui tu jida dutya yahuaju aniya cuanaque sama ishu. ³ Tuhuatu amena aijama jidamaque. Yusu, UHUISHA BUCHA IYETAÉ ATAHUAQUE jadya tatsé huaraji dyaque muida que tumeque epu ebari juque. Tatsé merequi cuanara tatsé pureama abuque. ⁴ Babuque tunajatu Yusuja ebutsequini.

Equetiju tunajatu ehue ne jubuque Yusuja e bacani. ⁵ Tuhuatu apuna baecua jubuque. Tuhua aniya cuanaratu sarebuque ama ude, lámpara ni ijetija uda ishu, Yusu ecuanaja Huaraji Dyaque Aridara udaya tibu. Tuhua aniya cuanaque tuna dutya mara mara enaruqui jubuque.

Jesucristo junanucayaque amena piji dyaneque

⁶ Jadya juatsu Yusu tsahuaquira jadya anucacuare:

—Riyaque quisarati cuana ri yunerique. Dutya mira quisarati bacaya equedyatu judadibuque. Yusratu cuejaya tuja quisarati cuejaqui cuanaque tuna eje bucha quisarati ishu. Tudyatu ecuanaja huaraji dyaque aridaque. Tumebaedya tujatu cuadishacuare tuja etsahuaqui, masadama eje bucha judadiyaque bamere ishu, —jadya tura acuare.

⁷ Jesústu quisaraticuare:

—Masadama junanucaya. Riyaque quiricaju ri ehue ne eje bucha judadiyaque. Dyaque jida tu riyaque quiricaju ehue ne eque aniya cuanaque, —jadyatu Jesús jucuaré.

⁸ Era Juanradya tuque bacacuare, bacuare jadya dutya riya cuanaque. Pana baca aatsu, baatsu jadya chichucata jucuaré Yusu tsahuaquique ique dutya petamerequija yacuaju, tuque mui ishu.

⁹ —Jadya juume. Muiume ique. Mique bae Yusu merequique jutidya ique. Dutya ecuanaja Yusuja quisarati cuejaqui cuanaque, riyaque quiricaju ehue ne cuanaque muibaqui cuanaque ecuanaja Yusu merequi cuanaque. Yusu peadya camadya muicue. ¹⁰ Tehuaume riyaque quiricaju mira huenehuaque. Tsunutaya ama tu quisarati ehue ne eque judadi ishuque. ¹¹ Jadya juya tupu ejeque jidamaque, jidamadya paju. Cuejataquima aniyaque, cuejataquimadya paju. Ejera jidaque ayaque, jidadya paju. Yusuja cuanaque jida, tuyu Yusuja biji eque paanijaca amadya, —jadya tura acuare.

¹² Jesústu quisaratinucacuare:

—Neadebacue bacue ique masadama junanucayaque. Tyabarenaya tuna etsujequi peadya peadya tuna eje bucha mere juhua eque. Yusuja biji eque anihua cuanaque tuque jida abuque. Tuja biji eque ama anihua cuanaque tuna nerecaturabuque. ¹³ Ique dutya ai iyametsequi juhuaque, dutya ai tilladadiqui juyaque jadya. Eradyatu dutya iyahua catibuti ishu. Eradyatu dutya tillanucaya. Ique letra A-Z buchique, —jadyatu jucuaré.

¹⁴ Dyaque jida taa jucha cuana caapupashameretihua cuanaque. Jutu ishuque asicadaque ecutsatiu bucha, jadya secas tuna Yusura dutya asicadaque ahua. Yusura tuna nudyatsabuque tuja epu tsecue eque tuque aniyaju, acui caca

maju baecua juishuque ara ishu. ¹⁵ Yusutu badirubuque ama Yusu adeba baecua cuanara, dutya jidaque bijidamaduraqui cuanara, maruhuisa cuanara, jatsura puji cuanara, tunaja caquemitiqeremaque jaraquereya cuanara, puna puna, decadeca jadya juya cuanara, quiyeti puji cuanara, yusu cueya cueya eaque muiqui cuanara, dutya pusha pusha tsehue eje buchique ejenemerequi cuanara. Jadya cuanaratu Yusu badirubuque ama.

¹⁶ Jesústu quisaratinucacuare:

—Ique Jesús. Eradya tuque ecue ique tsahuaquique barepa juque cuadishahua dutya eaqueja ecatyati cuanaque bahue amere ishu. Ique ecuari David eque ejuracanaque, icuene israelita cuanaja ecuari jucuaque. Ique apudajudya purari ebari cuinanayaque tiquie buchique, —jadyatu jucuaque Jesús.

¹⁷ Yusuja Espiritura, tumbaedyá UHUISHA BUCHA IYETAÉ ATAHUAJa ehuaneeque bucha cuanaratu Jesús jadya aya:

—Jecue.

Ejera pana ijacobaca ayara neacue Jesús:

—Jecue.

Ejeque Yusu queja judirucara juyaque tuaqueja pajudiru. Jesucristo queja catyatitsutu yuneri tsujema einajaca juishuque, Ijahuaja etiquiju enubidiruueque. Ejeque ijicara juyaque, jecue. Tsujema ijinacue ena maju baecua ishuque.

¹⁸ Ejera isarayaja isara ishuque ri riyaque quirica. Ejera ni adaya quisarati rehua ehueneeque, Yusratu nerecat-urabuque ujeje canerecati ishuque riyaque quiricaju ehue tsehue. ¹⁹ Riyaque quiricajuri ehue dutya jidaque Yusu adebaqui cuanaque eje bucha judadibuqueque. Ejera ni se-caya riya piji Yusuja quisarati riyaque quiricaju ehueneeque, Yusratu tuaqueja judirushaya ama ni tuja epu ebariju. Tumeque ecuitatu Yusuja epu Jerusalén iyacuaque bacaniju anidirubuque ama.

²⁰ Riya cuanaque cuejaquiuetu jadya juya:

—Jejee, masadama junanucaya, —jadyatu juya Jesucristo.

—¡Jadidya paju! Jecue, Ecuana Cuatsashaquique Jesús, —jadya ique juya.

²¹ Ecuana Cuatsashaqui Jesucristora jida tsehue nenarucue peadya peadya tuja quiyuhuebati tsehue. Jadidya paju.

Riya tupu camadya.

Juan